


Iwaperite tajorentsi ikenkithatakoetziri

awinkatharite Jesokirishito: owakirari

inimotakiri tajorentsi



New Testament in Ashéninka Pajonal (PE:cjo:Ashéninka  
Pajonal)

# Iwaperite tajorentsi ikenkithatakoetziri awinkatharite Jesokirishito: owakirari inimotakiri tajorentsi

## New Testament in Ashéninka Pajonal (PE:cjo:Ashéninka Pajonal)

copyright © 2008 Wycliffe Bible Translators, Inc.

Language: Ashéninka Pajonal

Translation by: Wycliffe Bible Translators, Inc.

Ashéninka Pajonal [cjo], Peru

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Ashéninka Pajonal

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 18 Apr 2025 from source files dated 29 Jan 2022

97defb47-361b-545a-898b-173aeaa61806

## Contents

MATEEYO . . . . .	1
MARIKOSHI . . . . .	86
ROOKASHI . . . . .	133
JOWA . . . . .	216
RANTAYITAKIRINI . . . . .	275
OROOMAJATZI . . . . .	346
1 KORINTOJATZI . . . . .	377
2 KORINTOJATZI . . . . .	407
KARAASHIÝAJATZI . . . . .	428
EJEESOJATZI . . . . .	441
JIRIPOSHIJATZI . . . . .	453
KOROJAASHIJATZI . . . . .	461
1 TEJAWOONIKAJATZI . . . . .	469
2 TEJAWOONIKAJATZI . . . . .	476
1 TEMOTEEYO . . . . .	480
2 TEMOTEEYO . . . . .	489
TEETO . . . . .	495
JIRIMOOJI . . . . .	499
IJORIYOTZINKARITE . . . . .	501
JANTYAAKO . . . . .	527
1 PEETERO . . . . .	538
2 PEETERO . . . . .	548
1 JOWA . . . . .	554
2 JOWA . . . . .	562
3 JOWA . . . . .	564
JOORASHI . . . . .	566
ROÑAAGAYITAKIRINI . . . . .	569

# MATEEYO ROJANKINATAKOTAKIRI JESOKIRISHITO, TSIKA IKANTA ROWAWIJAAKOTANTZI

*Iwaeropaeni ichariniüteni Jesoshi  
(Rk. 3.23-38)*

<sup>1</sup> Paerani ijekawitani Jesokirishito jaka kipatsikika. Tekirani ijekini jaka, ijekini itakaantaworini ichariniüteni Iraviiiri eejatzti Awaraamani. Iroñaaka nojankinateyemironi iwaeropaeni riraga ichariniüteni riraga Jesokirishito.

<sup>2</sup> Eenironi ijekini paerani rirori Awaraama, iinani otzimiru itomini iitachari Ijaaka. Itomini irira rirotaki Jakoowo. Itomipaenini rirotaki Joraa eejatzti rirentzipaeni.

<sup>3</sup> Itomini riraga Joraa rirotaki riraga Paareshi eejatzti Shaari. Rinironi irirapaeni owaero Tamaara. Itomini riraga Paareshi iwaero Eshiroomo. Itomini irira rirotaki Araami.

<sup>4</sup> Itomini irira rirotaki Aminagaawa. Irira rirotaki ashitaririni Naashoni. Itomini riraga Naashoni rirotaki Sharimoo.

<sup>5</sup> Riraga Sharimoo rirotaki ashitaririni Woosho. Rinironi rootaki Raawa: rootaki paashinijatotatsiri atziri. Itomini riraga Woosho iwaero Oweeri. Rinironi rootaki Roota: rootaki paashinijatotatsiri atziri eejatzti. Itomini riraga Oweeri rirotaki Isayi.

<sup>6</sup> Itomini irira rirotaki Iraviiiri, riraga jewawentziririni joriyyopaenini paerani. Ari ikaataki irinta shiramparipaenini 14.

Roojatzsi ikoñaatapaaki itomini riraga Iraviiiri iitachari Sharamoo. Rinironi rowaga iinan Oriiyashi tekira ikami.

<sup>7</sup> Itomini rirori Sharamoo riraga Rowowaama. Itomini irira rirotaki Awiiyashi. Itomini riraga Awiiyashi rirotaki Aasha.

<sup>8</sup> Itomini irira rirotaki Joshepaata. Itomini riraga Joshepaata iwaero Joraama. Itomini irira rirotaki Oshiiyashi.

<sup>9</sup> Itomini riraga Oshiiyashi rirotaki Jotaama. Itomini irira rirotaki Akaashi. Itomini riraga Akaashi iwaero Eshikiyashi.

<sup>10</sup> Irira rirotaki ashitaririni Manasheeshi. Itomini irira rirotaki Amoo. Itomini riraga Amoo rirotaki Joshiyyashi.

<sup>11</sup> Riraga Joshiyyashi rirotaki ashitaririni Jekoniiyashi, eejatzsi rirentzipaeni. Ari ikaataki jaka eejatzsi paashini shiramparipaenini 14. Ijeekantari riraga Jekoniiyashi eejatzsi rirentzipaeki ipokapaaki joraaroopaeni poñachari inteenanta kipatsi iitachari Wawirooniya. Ranaakotakiri joraaro joriyyopaeni roojatzsi ragaeyakirini osheki irirapaeni roojotakiri raanakiri inampikinta rantawaeteniri. Raanakiri maawaeni joriyyopaenini janta inampikinta.

<sup>12</sup> Roojatzsi ikoñaatapaaki itomini riraga Jekoniiyashi iitachari Jaratyeeri. Itomini rirotaki iwaero Jorowaweeri.

<sup>13</sup> Itomini riraga Jorowaweeri rirotaki Awyoori. Irira rirotaki ashitaririni Eryakiimi. Itomini irira iwaero Ajooro.

<sup>14</sup> Itomini riraga Ajooro rirotaki Sherooko. Itomini irira iwaero Akiimi. Ro itomini irira rirotaki Eryooro.

<sup>15</sup> Irira rirotaki ashitaririni Eryaari. Itomini irira iwaero Mataa. Itomini riraga Mataa rirotaki Jakoowo.

<sup>16</sup> Riraga Jakoowo rirotaki ashitaririni Josee. Irira ikashiyakawo rayero Mariiya, rowaga riniro Jesoshi, iitachari eejatzi Rotyaantanewo Tajorentsi.

<sup>17</sup> Ari ikaataki maawaeni rirori shiramparipaenini eejatzi 14.

### *Ikoñaatapaaki Jesokirishito*

<sup>18</sup> Iroñaaka nokamantemi tsikarika ikanta ikoñaatantapaakari paerani Jesokirishito. Rinirontapaakyaaawo irira rowaga tsinani oetachari Mariiya. Eejatzi ikashiyakawo rayero Josee, omaanta tekiraata imatziro, tekiraata rayiro. Roojatzi omotzifashitaka, tema otajonkappaakiro Ishire Tajorentsi omotzitakaapaakiro.

<sup>19</sup> Riraga Josee tema iñaakirowa omotzitaki; roojatzi ikenkithashiryaaantawitaka, ikantzi: "Tee okameethatzi iroka tsinani. Tema oshinetakari paashini shirampari. Iroñaaka eero nayiro". Omaanta irira ikameethataki, rootaki ikowantakari ikamintheero. Tee ikoyi rowashiwentayero. Ikenkithashiryaaawitaka: "Eero nokantziri atziripaeni ishirontawentawokari. Apaniroeni nokamantathatero, nokantero: 'Eero nayimi'".

<sup>20</sup> Omaanta eenirorika ikenkithashiryaaawitaka, imaanaki roojatzi romapokappaakiri ronampiri Tajorentsi romishimpyaakiri, ikantapaakiri:

—Josee, tema eeröka icharineetenipero Iraviirini. Eero pikenkithashiryaaakotawo pookero Mariiya. Tekatsi oshinetaya paashini shirampari. Omotzitakirira tema otajonkakitziro Ishire Tajorentsi, rootaki ikoñaatantyaa.

<sup>21</sup> Aririka otzimaki otomi, piiteri Jesoshi.\* Rowawijaakoteri anteyiyorini kaari kameethatatsi, rootaki piitantyaariri iwaero Jesoshi.

—Jee, aritaki.

Roojatzi ipiyanaaka riraga ronampiri Tajorentsi.

<sup>22</sup> Roojatzi otzimantakariri otomi omonkaatantyaari rojankinatakotzitakarini paerani kamanantzirorini iñaani Tajorentsi iitachari Iseyashini. Rootaki Ishire Tajorentsi ojankinataakaikiriri. Ajaa, iroka ikantziri:

<sup>23</sup> "Inja omotzitashitanakya apaani kaari shinatariri shirampari, otzimeri otomi, iiteeteri Emanoeri". Okantakotziri Emanoeri: "Itsipatakae Tajorentsi". Rootaki iroka ikantakiriri rirori ronampiri Tajorentsi.

<sup>24</sup> Ipiriinantanaka Josee, ikemijantaperotanakiro ikantakiriri ronampiri Tajorentsi. Riyaatashitakiro Mariiya, ikantakiro:

—Aritaki inja naaperotemi. Omaanta iroñaaka thame nopankoki.

<sup>25</sup> Omaanta tekira imatziro Josee rowaga Mariiya, roojatzi otzimantakari otomi. Ikoñaatantapaakari, riraga Josee iitakiri itominthori Jesoshi. Roojatzikya raantaperotanakawo.

## 2

### *Apaanipaeni yotakotziriri ompokiropaeni rareetakitaru Jesoshi*

<sup>1</sup> Ikoñaatapaaki Jesoshi janta nampitsiki owaero Weri. Ojeeki Weri janta Joreeyaki. Ikoñaatantapaakari eeniro ijeki Eroreshi Jerojareeki. Irinta-paeni kaari joriyyotatsiri, omaanta ipinkathariwenteeyakirini maawaeni joreeyajatzi. Roojatzi rareetapaenta apaanipaeni yotanitzinkaripaeni poñaachari paashinikinta kipatsi, ipoñaaka janta inteenanta. Ikinapaaki riywapiintzinta oorya. Riyotapiintawitari ompokiropaeni iitarikamakya.

<sup>2</sup> Ipokantapaentari janta rojampitapaakiri jerojareejatzi, ikantapaakiri:

—¿Tee piñiiri tsika ijekakika riraga jewaperowenterini ijoriyy-otzinkaritepaeni, riraga owakira koñaaateentsiri? Janta nonampikinta

\* <sup>1:21</sup> Okantzi Jesoshi apaanteki aari: Owawijaakotantatsini.

noñaaawakiri ikontetapaaki jenoki ompokiro, rootaki niyotantanakari koñaatapaaki. Nopokantapaakari iroñaaka, nopinkathateri, noki-moshirewenteri.

<sup>3</sup> Ikemantawakariri riraga pinkathari Erooreshi, tee inimotanakiri, ikenkithashiryaanaka: "Tee nokoyi paashini jewawenantatsini, naaka apaniroeni". Eejatzi maawaeni jerojareejatzi ikemantawakariri, ikenkithashireeyanakan.

<sup>4</sup> Roojatzi ikaemakaantakiri riraga Erooreshi maawaeni jewatatsiripaeni ñaanakowenantsiripaeni janta Tajorentsipankoki. Eejatzi ikaemakaantakiri maawaeni jewatakayitziririni iyotaantzirori Iwaperite Tajorentsi. Rojampitawakiri maawaeni, ikantawakiri:

—¿Oetaka okantziri Iwaperite Tajorentsi? ¿Tsika ikoñaatekapa Rotyaantanewo Tajorentsi?

#### <sup>5</sup> Ikantankiri:

—Ari okantzi: ikoñaate janta Weriki jaka Joreeyakika. Tema paerani aritaki rojankinatakotzitakarini kamanantzirori iñaani Tajorentsi iitachari Mikiyyashini, ikantaki:

<sup>6</sup> "Janta Joreeyaki ari ojeeki nampichaaniki oetachari Weri. Tee ike-makotawitawo maawaeni atziri omaanta anaakotero maawaeni nampitsi antawo Joreeyaki ikemakotero maawaeni atziri. Rooma ikoñaatzimoteri jeekatsiri janta Jewatatsini, ikempoyeeyerini maawaeni joriyopaeni".

<sup>7</sup> Riraga Erooreshi imanakiro maawaeni okaatzi ikemawakiri, ikaemakaanteeyakirini riraga yotakopiintawitariri ompokiropaeni. Ipokantapaakiri, ikantawakiri:

—¿Tsika okaatzika piñaantakariri ompokiro ikontetapaaki piyotantakari ikoñaatapaaki jewatatsini?

<sup>8</sup> Ikemawakiri ikamantapaakiri, roojatzi rotyaantawakiri ikantawitawakiri:

—Kameetha piyaate Weriki paminakiteri tsikarika ijekaperotzi eentsi. Aririka piñaapakiri pipokaate jaka pikamantaaten, kameétha nareetakityaari naari nopinkathatantakityaariri nokimoshirewenteri eejatzi.

—Jee, ari.

<sup>9-10</sup> Ikemantapaakariri ikantawakiriri, rowaganaka riraga yotakotziriri ompokiropaeni. Roojatzi janta niyanki awotsi iñaawaatziiri eejatzi ompokiro jenokira maakiri chapinki janta ipoñaakanta. Iñaantawaariri ikimoshireper-otanaki. Reewatanakiri apatziro rowakaanakiri janta ijekakinta een-chaaniki; ari ikatziyapaaka janta jenoki ipankokira.

<sup>11</sup> Roojatzi rareetantapaaka janta, ikyappaaki pankotsiki, iñaappaakiri Jesoshi, eejatzi riniro. Rotziwerowashitapaakari, riwethatantapaakari, eejatzi ipinkathatapaakiri ikimoshirewentapaakiri. Roojatzi itaaparyanta-paakawo itsiwoote, raakiro inowikyaakiro iraata ororotatsiri kameethap-erotatsiri, pinaperotachari. Eejatzi raakiro apite kajankaritatsiri eejatzi kameethatatsiri. Roojatzi ipashitantapaakari Jesoshi.

#### <sup>12</sup> Roojatzi imaappaaki. Imishiwaetakaakiri Tajorentsi. Ikantakiri:

—Eero pipiyanaa janta Erooreshiki.

Ikemawakiri roojatzi ikinapithatantanaari paashiniki awotsi, riyaatapi-thateeri iipatsiteki.

#### *Josee ishiyapithatakari Erooreshi*

<sup>13</sup> Roojatzi ipiyeyanaani inampiki rirori yotakotziriri ompokiropaeni, roojatzi rapiiatapiro Josee romishimpyaantakariri ronampiri Tajorentsi, ikantapaakiri:

—¡Pipiriinte! Ikowaki pinkathari riraga Erooreshi rowamaakaanteri eentsi. Paanakirijanta Ejiipitoki, eejatzi pitsipatanakyaawo piina. Ari pijekapaaki janta, eero pipiyaa. Paata nokantemi pipiyee.

—Jee, aritaki.

<sup>14</sup> Roojatzi ipiriintanaka ikantanaka riyaatapithatanakiri niyankipaetenit siteniri. Ishiyakaapithatanakari eentsi janta Ejiipitoki, itsipatanakawo iina.

<sup>15</sup> Ijeekawitapaaka janta, ijeki, ijeki, ojamanitanaki janta, roojatzi ikamanaki riraga Erooreshini. Riraga Tajorentsi ikamantakiri Josee roojatzi ipiyantari iipatsiteki. Rootaki omonkaatantakawori rojankinatakotzitakarini paerani kamanantzirorini iñaani Tajorentsi iitachari Oseeyashini. Rirotaki Awinkatharite jankinatakayiriri. Rojankinatzni:

“Ikantakin Tajorentsi: ‘Ijeekawitakya notyomi janta Ejiipitoki, roojatzi nokamanteeri ipiyee’”.

### *Ikijanaka Erooreshi*

<sup>16</sup> Rootaki riyotantanakari riraga Erooreshi teera ipiyaa yotakotziriri ompokiropaeni, ikantaki:

—Irintapaeni ramatawitakinakya.

Ikijanaka roojatzi rotyaantanakiri joraaropaeni, ikantakiri:

—Piyaate janta Weriki, eejatzi piyaate janta paashinipaenikira pankotsikira okaakini. Powamaakiteriroña eentsipaeni janta. Pithonkeri maawaeni shirampari owakira yowatsiri roojatzi irintapaeni monkaateenchari apite rojarentsite, powamaakiteriroña maawaeni.

—Jee, ari.

Rootaki ikanantakawori iroka, rooma ikantziri chapinki riraganki yotakotziriri ompokiropaeni ikantzi tekira imonkaatziro Jesoshi rojarentsite apite. Ikenkithashiryaawitaka iita eeniro ijeki Jesoshi Weriki.

<sup>17</sup> Ari omonkaataka iroka rojankinatzitakarini paerani kamanantzirori iñaani Tajorentsi iitachari Jeremiiyashini. Rojankinatakakironi paashini nampitsi okaakini Weri, ikantzi:

<sup>18</sup> “Inja ikemakoetero janta Ramaaki ari iraakoeyakarini ramaajatopaeni otomipaeni, osheki okoetyagaeyakirini. Rowaga ojawaenini Rakeeri eejatzi tsinanipaeni iraakotyaari otomipaeni eero okaatzimotziro iraakotyaari. Rootaki iraanteeyakaririni okoetyagaeyanakirini rowamagaetakiri otomipaeni, maawaeni”.

### *Ipiyanaa Josee Najareeteki*

<sup>19</sup> Tee ojamanitzi ikamantakari Erooreshini, eeniro ijeki riraga Josee janta Ejiipitoki. Roojatzi romishimpyaantaari ronampiri Tajorentsi, ikantapaeri:

<sup>20</sup> —Iroñaka okameethatzi pipiyeerakya janta piipatsiteki, tema kamaki kowawitachari rowamayerimi Jesoshi.

<sup>21</sup> Ikemawakirira roojatzi ipiyantaa iipatsiteki oetachari Ishirayeeri. Riyaatawanaka Weriki raanakiri eentsi eejatzi itsipatanakawo iina.

<sup>22</sup> Omaanta niyanki awotsi ikemakotakiri Arekiraawo, itomini Erooreshini, iroñaka ipinkatharitzi ipoyaatakari ashitaririni. Ari ithawanakan rirori Josee, tee ikoyi riyaatanee janta. Roojatzi rapiitakiro romishimpyaagaeri ronampiri Tajorentsi, ikantapaakiri:

—Eero piyaatzi pinampiki paerani, riraga Arekiraawo rowamaakaantawakirkari eentsi.

Rootaki riyaatantanakari iroñaka janta Karireeyaki.

<sup>23</sup> Ikanta rareetapaaka janta ijekapaaki nampitsiki tsikarika ijeekawita paerani oetachari Najareete, aritaki rantaritapaaki Jesoshi janta. Rootaki

omonkaatantakari iroñaaka ikantakirini kamanantzirorini iñaani Tajorentsi paerani, ikantzi: "Ipoñaaka riraga Rotyaantanewo Tajorentsi Najareeteki".

### 3

*Riraga Jowa kaawoshitakotantatsiri Tajorentsi ikamanantapiintzi janta okaankiityeenta*

(Mr. 1.1-8; Rk. 3.1-9, 15-17; Jowa 1.19-28)

**1** Ikanta riyaataki Jowa, riraga kaawoshitakotziriri Tajorentsi janta Joreeyaki okaankiityeenta. Aritaki ritanakawo ikenkithatakaapiintseayakirini atziripaeni.

**2** Ikantapiinteevirini:

—Pikenkithashirayaawakyaata, eero pikimitaa paerani. Pipakagaero kaari kameethatatsi panteeyakirini. Pameenteeyari Tajorentsi ironaaka. Rooteentsi reewawentemi, eejatzi raminakowiritantem.

**3** Paerani ikenkithatakotzitakarini Jowa riraga kamanantzirorini iñaani Tajorentsi iitachari Isseeyashini. Iroka rojankinatakotzitakaririni, ikantzi: "Eenitatsi iinja atziri kenkithatakayerini atziripaeni janta okaankiityeenta, ikanteri: 'Paamayarirapa Awinkatharite, pikameethatanaki pineshi-ronkatakawakaeya'".

**4** Eejatzi Jowa, tee ikithaatawo kithaarentsi kameethari. Omaanta ikithaatawo ontyaantsi iwitzi kameeyo. Eejatzi ishirikathakitar mashitsimashi ikimitakari riraga Iriiyashi kamanantzirori iñaani Tajorentsi. Rowapiintari kimitariri tsitsiri.\* Eejatzi ithotziri iyaa pitsi eenitatsirika.

**5** Ipokashitapaakiri maawaeni jerojareejatzi. Eejatzi ikemijantapaakiri maawaeni joreeyajatzi. Eejatzi maawaeni jeekatsiri okaakini iñaa oetachari Joriraani, eejatzi ipokashitapaakiri ikemijantapaakiri.

**6** Ikantapaakiri kemaperotapaakiriri:

—Niyotzi eenitatsi kaari kameethatatsi nantziri. Nokowaperotzi ineshirronkaperotena Tajorentsi rowawijaakotena.

Roojatzi ikaawoshitakotawakariri Tajorentsi riraga Jowa iñaakira oetachari Joriraani.

**7** Eejatzi ipokaeyawitakanri warijeeyopaeni eejatzi saroseeyopaeni. Ikwawitaka ikaawoshitakotawakirimi rirori eejatzi.

Omaanta ikijathawakiri Jowa ikantawakiri:

—¡Eerokateeyakini maankipaeni! Pikimiteeyakaarini kamaariipaeni. Tema pitheeyawaetashita eejatzi pamatawitashitari maawaeni. Tee okameethatzí pantziri. Tee pikowaeyawitani piyatae paamariki kaari tsiwakanitatsini, rootaki pikowantawitakari pikaawoshitakotyiarimi Tajorentsi. Eero pikenkithashiryaashiwitaa eero rowashironkaemi Tajorentsi tema pikaawoshitakotashitayaari.

**8** Pikowakirika nokaawoshitakotawakimiri Tajorentsi pityaawo pikenkithashireeya pijeeakteeyari kameetha, pookaero kaari kameethatatsi pantapiinteevakirini niyotantyaari tee pikimitaa paerani.

**9** Eero pikantawaetashita:

"Nocharinetakari Awaraamani, rootaki niyotantakari aritaki nawijakote". Pamatawitashitaka eeroka apaniroeni. Tee paapatziyaperotari. Ikwakirikami riraga Tajorentsi, imatero ipeyeromti atziri iroka mapika oshenkateeyaarinimi Awaraamani, aritaki rantakiromi.

**10** Maawaeni inchato kaari kithokitatsi tema ari atowakiro apiyotero atagaeyeroni paamariki. Eejatzi eerori pikimiteeyakawoni inchato kaari

\* **3:4** Janta Ishirayeeri rowari riraga oshiyariri tsitsiri.

kithokitatsi. Kyaaryoowa rookimikari eerori Tajorentsi paamariki kaari tsiwakanitatsini.

<sup>11</sup> Niyotakiririka rookaero atziri kaari kameethatatsi rantziri, nokawoshitakotawakiri Tajorentsi iñaakira. Omaanta kaakitaki impaetapaakinani, riraga Rotyaantanewo Tajorentsi. Ranaakotakina, tema rirotaki jewaperowenantatsiri. Aritaki ikithaatakaapaakaero Ishire Tajorentsi maawaeni aapatziyakariri amitakotantyaariri.

<sup>12</sup> Owiitakirorika arooso aakiro otzinkayitakiro. Rowaga otaki ataakiro paamaariki. Rooma rowaga owatha otetakiro akempoyaantapiintaworiki. Eejatzi ikimiteri riraga impaetakinari. Tema rinashityaari attziripaeni. Retakotaari aapatziyeyakaririni ijekimotantyaariri janta okameethatztinta omaantakya kaari kameethatatsi rookaerini paamariki kaari tsiwakanitatsini.

*Jesoshi ikaawoshitakotakari Tajorentsi  
(Mr. 1.9-11; Rk. 3.21-22)*

<sup>13</sup> Ikantaka ipoñaanakan Karireeyaki Jesoshi, riyaataki iñaaki oetachari Jori-raani. Riyaatashitakiri Jowa ikaawoshitakotantawakyaariri Tajorentsi,

<sup>14</sup> omaanta tee ikowawita riraga Jowa. Ikantawitawakari:

—Eero nokawoshitakotzimiri Tajorentsi eerori. Rooma eeroka kaawoshitakotanakinarinikya Tajorentsi naari. ¿litaka pikowantari nokawoshitakotawakimiri eeroka? Rooma eerokataki pinkatharitatsiri.

<sup>15</sup> Ikantapaakiri:

—Rootaki okameethatantari iroñaaka pikaawoshitakotenari Tajorentsi naaka amonkaatantyaawori ikowakaakaeri.

Roojatzi ikantawakiri:

—Jee ari, pipokeeta jaka.

<sup>16</sup> Roojatzi ikaawoshitakotantawakari rirori. Roojatzi ishitowaataneera iñaaki, iñaawakitziiro Ishire Tajorentsi opoñaaka jenokinta Tajorentsikinta ayiitashitapaaakiri okimiwitapaaakari jamomo ookantapaakari.

<sup>17</sup> Roojatzi ikemayitawakirini Tajorentsi janta jenokinta, ikantanaki:

—Riotaki notyomi nonintashireperotanewo. Osheki niweshiryaaawentakari.

## 4

*Ikowawitaka iwinkatharite kamaari rantakayerimi Jesoshi kaari kameethatatsi*

*(Mr. 1.12-13; Rk. 4.1-13)*

<sup>1</sup> Roojatzi riyaataki Jesoshi tekatsinta atziri ipanko: okaankiityeenta janta. Tema iyaatakaakiri Ishire Tajorentsi. Rootaki iyaatatakantakariri iñaanantyaariri iwinkatharite kamaariipaeni.\* Ikowawitaka irira rantakayerimi Jesoshi kaari kameethatatsi ranaakotantyaariri.

<sup>2</sup> Eeniro ijekapaaki riraga Jesoshi janta okaataki 40 kiteziri tee rowa, ayimaperotakiri itashe.

<sup>3</sup> Roojatzi ipokashitapaaakiri riraga iwinkatharite kamaariipaeni. Iñaantawitapaaakari, ikantawitapaaakari:

—Eerokarika Itomipero Tajorentsi, pipeyero mapika opeyanakya owanawontsi poyaari.

<sup>4</sup> Omaanta ikantawakiri:

---

\* **4:1** Riraga iwinkatharite kamaari ronampiri naawita Tajorentsi paeraniperoroña, omaanta ipiy-athatantakaririni paerani riraga Tajorentsi rootaki rookantakariri rirori jika jaawiki.

—Eero nantziro. Okantzi Iwaperite Tajorentsii: “Tee apatziro akoyiro owanawontsi ashintsiwathatantyaari, inta kowaperotachari akemijantap-eroteri maawaeni ikowakaakaeri Tajorentsii ashintsitantyaari ashireki”.

<sup>5</sup> Roojatzi raanakiri janta Jerojareeki ikatziyakaakari janta okaapankata-paakinta Tajorentsipankoki.

<sup>6</sup> Iroñaaka ikantawitanakari:

—Eerokarika Itomi Tajorentsii, pomyaanakyaatyaa jaawiki, ñaa, eero pikamapaaki. Pikenkithashireerotya okaatzi okantzimiri Iwaperite Tajorentsii: “Ari rotyaantakimiri Tajorentsii ronampiripaeni ikempoyeemi. Ari raawakimi rakokira eero pikagaantapaaka jaawikinta mapiki”. Ñaakiro, ¿itaka pithaawantakari?

<sup>7</sup> Rapiitziri ikantawakiri:

—Eero nomyaa. ¿itaka noñaanantyaariri Pawa? Eejatzi paashini okantzi Iwaperite: “Tee okameethatzi añaantawityaari riraga Tajorentsii, rowashironkaekari”.

<sup>8</sup> Roojatzi riweyaantantanakari raanakiri antawoki ochempi. Roñaagakiri Jesoshi maawaeni kipatsipaeni rashii jewawenantatsiripaeni, iñaakiro maawaeni nampitsi owaneenkataka eejatzi maawaeni rowaagawo jeekeyitatsirini,

<sup>9</sup> ikantawitanakari:

—Naapatziyakagaeyemirini maawaeni jeekatsiri kipatskipaeni, aririka pipinkathatena naaka.

<sup>10</sup> Omaanta ikantanakiri:

—Eero naapatziyimi. Piyaatekyaa inteenanta, kamaari, eerokakya Jatanaashi. Rooma okantzi Iwaperite Tajorentsii: “Pipinkathateri Awinkatharite, tema rirotaki Tajorentsii. Apatzirokya irira paapatziyari, pipinkathateri, eejatzi pikimoshirewenteri”.

<sup>11</sup> Roojatzi riyaatantanaka inteenanta riraga iwinkatharite kamaaripaeni. Rimpaeaki ipokapaaki ronampiripaeni Tajorentsii, ramitakotapaakiri, ipa-paakiri rowanawo.

### *Ritanakawo Jesoshi riyotaantzi Karireeyaki*

(Mr. 1.14-20; Rk. 4.14-15; 5.1-11; 6.17-19)

<sup>12</sup> Ikantaka ikemawaki riraga Jesoshi ragaetakiri Jowa romonkyaantet-takariri omonkyaaagamentotsiki. Roojatzi ipiyantanaa Karireeyaki, areeta-paa inampiki Najareeteki.

<sup>13</sup> Roojatzi roshirkantakawo ipanko, ryaatanaki Kaperinawooki ari ijeekapae. Rootaki Kaperinawootatsiri Karireeyawero ojeeki ochereeteki antawo inkaare. Ijeekaki shaporoonijatzi eejatzi nejatarijatzi janta paerani.

<sup>14</sup> Awijantakari iroka omonkaatantyaari rojankinatakotzitakaririni paerani riraga Iseeyashini:

<sup>15</sup> “Ijeeki shaporoonijatzi eejatzi nejatarijatzi janta ochereetekinta inkaareki intatsikeronta Joriraaniki, janta Karireeyaki. Ijeekaeyininta kaari yotziri Tajorentsii.

<sup>16</sup> Okimitzimotawitakari eeniro otsitenitzi, okimiwitaka tee riyotawitarini riroriipaeni Tajorentsii. Riyaatantyaarimi paamarikinta omaanta iroñaaka eero. Okimitzimotantyaariri okitejifakotapaakiri, okimiwitaa riyotakaakiri riraga Tajorentsii. Riraga iyotziriri rirori eero riyaatzi paamariki”.

<sup>17</sup> Aripaete Jesoshi ikenkithatakanakiri maawaeni atziri janta, ikanteeyakirini:

—Pikenkithashiryaawakyaata, eero pikimita paerani inta pipakaero kaari kameethatatsi pantziri. Pameentyaari iroñaaka Tajorentsi. Rooteentsi kameetha ipinkathariwenantemiri.

*Riyoyaakiri Jesoshi apaanipaeni ryotaanewo ejatzi ryotaakiri atziripaeni*

<sup>18</sup> Ikinanaki janta ochereetekira rowaga inkaare iitachari Karireeya. Ikinanaki iñaapaakitziiri riraga Shimo ii teetziri ejatzi Peetero, ejatzi rirentzi riraga Antereeshi. Irira apite ishiryaatapiintzi shima.

<sup>19</sup> Ikanta Jesoshi ikaemapaaakiri, ikantapaakiri:

—¿Eeroka shiryaawaetapiintatsiri? Pipoke, thame poyaatanakina aritaki niyotaakimi paapatziyakaapiintyaari atziripaeni Pawa Tajorentsi.

<sup>20</sup> Roojatzi rookantanakawo ishiryaaamento royaatanakiri ryotaantyaariri.

<sup>21</sup> Ro ijanthaneentawitanaka iñaapaakitziiri Jantyaako ejatzi rirentzi Jowa, rirotaki itomi apite Sewereeyo. Ijeekaki ipitoki ishirikawaetzi ishiryaaamento. Itsipatari ashitariri. Ikaemapaaakiri ikantapaakiri:

—Thame poyaatanakina.

<sup>22</sup> Roojatzi royaatantanakariri. Rookanakiri ashitariri ijeekanaki janta ipitoki.

<sup>23</sup> Ikanta ikinakinawaetzi ikenkithatakaantzi riraga Jesoshi. Ithotyeeyakironi maawaeni Karireeyaki. Janta ikenkithatakaakiri maawaeni atziri nampitsikipaeni ojeekira pankotsi ipiyotantapiintarira joriyopaeni. Ikamantapaakiri atziripaeni tsikarika ikanta Tajorentsi reewawenanteeyerini maawaeni. Ejatzi retsiyatkoeyawakirini maawaeni mantsiyatzinkaripaeni paashinijatopaeni matakiriri mantsiyarentsitayitatsirinipaeni.

<sup>24</sup> Riraga jeekaeyatsirini inteenanta janta Shiiryaki ithotyaanaka ikemakoyakirini Jesoshi. Roojatzi ramanteeyanakaririni maawaeni mantsiyari, kyaantariri kamaari, kijopookitatsiri, katsiwaetsatsiri, maawaeni. Retsiyatotawaeri Jesoshi maawaeni.

<sup>25</sup> Royaatanakiri osheki karireeyajatzi, tekaaporishijatzi, jerojareejatzi, joreeyajatzi ejatzi poñaaneenchari intatsikeronta Joriraaniki. Royaatanakiri maawaeni.

## 5

*Ikenkithawaetzi riraga Jesoshi janta tonkaariki; ikantziri atziri iki-moshiretanteeyaaari  
(Rk. 6.20-23)*

<sup>1</sup> Paashiniki kitejiriki iñaawakiri piyotawentari rikaataki oshekini atziri. Rootaki itonkaantanakari eechonkiini tyonkaarikiini. Ari ijeekapaaki jaga. Roojatzi ipokanaki ryotaanewopaeni okaakini, ejatzi ipiyotawentapaakari riraga atziripaeni.

<sup>2</sup> Roojatzi ryotagaeyawakirini, ikantawakiri:

—Aririka pikowaperote pikimityaari Tajorentsi rootaki reentsitetantemiri, pikemijantena iroñaaka.

<sup>3</sup> —Eerokarika yotakotachari tee pikameethatzi, aritaki riweshiryaakaakimi riraga Tajorentsi, kameetha ipinkathariwentakimi.

<sup>4</sup> Eerokarika owashiretzinkari, aritaki riweshiryaakaakimi Tajorentsi roemoshirenkakimi.

<sup>5</sup> Eerokarika maerishiretatsiri aritaki riweshiryaakaakimi Tajorentsi ineshironkatakimi reentsitetakimi.

- 6 Eerokarika kowaperotzirori ikoyiri Tajorentsi, aritaki riweshiryakaakimi irira ramitakotakimi.
- 7 Eerokarika neshironkatantaniri maawaeni atziri, aritaki riweshiryakaakimi Tajorentsi tema ari ineshironkaperotakimi eeroka.
- 8 Eerokarika kameethatzinkari pajankaneki, aritaki riweshiryakaakimi Tajorentsi aritaki piñagaeri.
- 9 Eerokarika omaeryaaantatsiriri paashinipaeni atziri ijeeki kameetha, aritaki riweshiryakaakimi riraga Tajorentsi. Rootaki kameetha ikananteemiri: "Eerokataki reentsite Tajorentsi".
- 10 Eerokarika antaperotzirori kameethaperotatsiri, rootaki ikijantemiri atziripaeni, aritaki riweshiryakaakimi Tajorentsi. Rooma reentsite-takimi eejatzi piyotzi reewawentakimi.
- 11 Riyotakirorika atziri paapatziyakina, rootaki ikantzimatantemiri, rowashironkaantemiri, eejatzi itheeyakotantemiri, itheenkemi, omaanta eero pikantashiryaa, eero. Aritaki riweshiryakaakimi riraga Tajorentsi.
- 12 Omaanta pikantyaani piweshiryaaoperotanakya, rooma ipinataperotawaemi iinja riraga Tajorentsi janta okameethaperotzinta. Eero pimajantzir: tema paerani ikijeetakirini rirori kamanantzirorini iñaani Tajorentsi eejatzi.

### *Roshiyakaawentakiro Jesoshi tziwi eejatzi ootamentotsi*

- 13 Eekiro riyaatatyyee Jesoshi riyotaaperoteri, ikanteri:

—¡Pamine sha! Noshiyakaawentemiro tziwi. Tema aaka akatyokapi-intziri iwatha tziwiki, eero ishitzitanta. Rooma teerika okatyotzi oakan-teekaata. Tema ari ookakiro, tektsi koyeroni. Ari poshiyeeyawitakawoni eerokapaeni tziwi: eerokateeyakini iyotagaeyakiririni atziri tsika ikantya ikameethatantyayari.

14 Eejatzi ari pikimiwitakwo eeroka oorentamentotsi. Pikenkithashiryakaoteroterya. Aririka ojeeki nampitsi tsikarika otongkaetya, eero omana maawaeni iñeetawakiro otamorekankyaarika tsiteniriki. Tee otzika temo ojeekinta tonkaariki. Eejatzi pikimiteeyawitakawoni, eerokapaeni iyotagaeyakiririni maawaeni atziripaeni: eero pimaniro piyotayitziririni, inta kameetha piyotaantayiteroni kameethatayitatsirini.

15 Eejatzi, okimitaka aririka poonthoteri pootamento pipankoki, eero pitankimotakotziri kantziriki, inta powakiri janta jeñokiinira ootaperontanyaari okofeete耶 maawaeni pankotsiki pikini paminawaete.

16 Ari pikimiwitawo iroka eerokapaeni iroñaka, apatziro pantero maawaeni kameethatatsiri, rirotantyaari pinampijatzipaeni paapatziyapi-intari Tajorentsi, ikimoshiretantyayari riroripaeni, ikanantyaari: "Oshekí ikameethaperotzi Pawa Tajorentsi".

### *Ikenkithatakotziro riraga Jesoshi Iwaperite Tajorentsi okameethatzi*

- 17 Eejatzi riraga Jesoshi ikantziri atziripaeni:

—Eero piitakaashiwitawo nopolokantari jaka nopolakaayemiro paapatziyawo rojankinarini Moeseshi, eero. Eejatzi eero piitashiwitakwo nokantemi tee okameethatzi oetarika rojankinatakiro kamanantayitzirorini iñaani Tajorentsi paerani, eero. Omaanta nopolokantari niyotaap eroeyemironi ikantaperoeyakirini, piyoperotantyaari kameetha oetarika okantakotziri.

<sup>18</sup> Othonkyaarika kipatsi eejatzi jenoki inta eero othonkimaeta rojankinarni Moeseseshi eejatzi kamanantayitzirorini iñaani Tajorentsii. Kyaaryo omonkaatyawo maawaeni ikantakirini paerani.

<sup>19</sup> Eerorika pikemijantaperotziro kaminagaantsi, eejatzi eerorika piyoteeri paashinipaeni atziri ikemijantaperotziro roori, tema pijkeekashita janta ipinkatharitzinta Tajorentsii. Omaanta aririka pikemijantaperotero maawaeni rojankinateeyinirini, eejatzi aririka piyotagaeyerini paashini atziri ikemijantaperoyeroni, ari pipinkathariwenantapae janta ipinkatharitzinta riraga Tajorentsii.

<sup>20</sup> ¿Piitakaashiwitakawoma ikameethataki irintapaeni iyotaantawitawori Iwaperite Tajorentsii eejatzi riraga warijeeyopaeni? Iroñaka nokantemi: tee imonkaatziro ikowakaawitariri Tajorentsii. Eerorika panaakotziri pikameethaperote, eero piyatzi eerori janta ipinkatharitzinta.

*Ikenkithatakotakiro Jesoshi kijaantsi  
(Rk. 12.57-59)*

<sup>21</sup> Eejatzi ikantziri riraga Jesoshi:

—Piyotakiro ikantziri achariniitenipaeni paerani: “Eero powamayiri paashini atziri. Ninkarika owamaantatsiri eejatzi rirori rowamagaeteri”.

<sup>22</sup> Omaanta nokantemi naaka: eero pikijiri paashinipaeni: rowashironkaemikari Tajorentsii. Eejatzi eero pikantziri atziri: “Tee piyotzi. Tee afñiyo piipatha”. Pikantakirika ayotaki tema pikijakiri rootaki okameethatantari rowamaakaanantemiri pinkatharipaeni. Eejatzi okimita aririka pikaweyeri atziri pikanteri: “Eero ka majontzi”, tema pikijakiri rootaki okameethatantari rotyaantemii Tajorentsii paamarikinta kaari tsiwakanitatsini.

<sup>23</sup> Pamine, piyatantyaari janta Tajorentsipankoki pikanteri riraga Tajorentsii ipeyakotemiro kaari kameethatatsi pantziri, rootaki pipashitantariri pipira riyotantyaari rirori kyaaryo pookakiro kaari kameethatatsi pantakiro, omaanta eenirorika ikijawentzimiri paashini atziri,

<sup>24</sup> Pinyaawo piyatashiteri riraga kijakimiri pikanteri: “Pipeyakotenawo okaatzni nantziri, eero napiitziro kaari kameethatatsi. Eero amaerneentawakaana. Pineshironkatena, kameetha aakameethatawakagaeya”. Pipeyakotantawakagaeyaawoni, pipiyanaki iroñakakya Tajorentsipankoki, roojatzi pipashitantapaakyari Tajorentsii oetarika pikowashityaari pipashityaari.

<sup>25</sup> Eenitatsirika kijakimiri ikowaki raanakimi janta pinkathariki ikantakotantemiri, eero pikijiri inta pishintsite pikanteri: “Eero akijawakaa, thame aakameethatawakagaeya”. Aririka rareetakaapaakimi pinkathariki, ikanteri joraaro: “Paanakiri irika”, roojatzi romonkyakaantawakimi janta omonkyaaagamentotsiki.

<sup>26</sup> Rooma eerorika pipaperotziro maawaeni pireewitziriri, eerowa roey-owitzimi roojatzi pipinatanteeyariri.

*Ikanteeyakirini Jesoshi: “Kyaaryoowa, pishirontawokari tsinani kaari payi”*

<sup>27</sup> Eejatzi ikantziri:

—Piyotakiro ikantziri achariniiteni paerani: “Eero pishirontzimotawo piina paashini tsinani, eero pishirontzimotari piimi paashini shirampari”.

<sup>28</sup> Nokantemii naaka: “Aririka piñaawenashireeyawo tsinani eejatzi pikenkithashiryaaakotyaaworika pishirontyaawo, ari eenitatsi pantani, kim-itaka piñaathatzimotakawo piina”.

**29** Noshiyakaawentemiro: aririka antakayemiro poki kaari kameethatatsi, pikithokireero, pookero. Tema tee pikoyi iyaatakayemi paamariki kaari tsiwakanitatsini. Tema okameethatzi piyaatashiteeya kasheakini poki janta jenokinta.

**30** Aririka antakayemiro pako kaari kameethatatsi, pithatyeero pako pookero. Tema tee pikoyi iyaatakayemi paamariki kaari tsiwakanitatsini. Tema okameethatzi piyaaponthotziitashiteya janta jenokinta. Ņaakiro, tee okameethaperotzi papuitapiintero kaari kameethatatsi.

**31** Eejatzi ikantzini riraga achariniiteni paeran: “Aririka pikowaki pookaero piina, pojankinateniro paperi pookanteeyaaawori, ari okaata-paaki”.

**32** Omaanta nokantemi naaka: “Eerowa pookaero piina. Aririka pookaero piina eejatzi pageria kaashini, tema piñaathatzimotaawo piinaperoni. Agaerika eejatzi paashini oemi piina, eeniro antani: oñaathatzimotaari oemiperoni. Eejatzi riraga agaeroni, eeniro rantani. Omaanta apatziro okameethawita pookaero aririka oñaathatzimotakimirika paashini shiram-pari”.

### *Eero pamatawitziri paashinipaeni*

**33** Eekiro riyaatatzi ikantziri riraga Jesoshi:

—Piyoteeyakini okantziri Iwaperite Tajorentsi, rootaki ikantzirini yotaantatsirini: “Eero pitheeya, eero pikantawaetashita”. Eejatzi ikantakini: “Aririka pikante: ‘Riyotaki Awinkatharite ari nomonkaatemiro maawaeni nokantakimir. Namatawitakimirika ari rowashironkaakina’. Pikanterorika: ‘Riyotzi Awinkatharite aritaki nomonkaatakimiro maawaeni nokantakimir’, ari okameethatzi pimonkaataperotero okaatzi pikantakiri”. Rootaki okantakiri rojankinatakirini paerani riraga Moeseeshini.

**34** Omaanta nokantemi naari: eero pitheeyawaeta. Aririka pothataakiro pikantziri, ɿiitaka pikowantyaari pikante: “Riyotakiro Awinkatharite nothataakiro nokantzimiri”? Okameethatakti pimonkaataperotero maawaeni pikantakiri. Eero eejatzi pikantashita oetarika. Apaanipaeni ikantashita: “Tee notheeya. Ņaakiro, okantani eeniro jenokinta, eejatzi okantani nothataakiro nokantziri”, omaanta ikantashita. Nokantemi eero pikimitari irinta; rooma Tajorentsi rirotaki jeekatsiri jenokinta. Riyotzi pothataakirorika pikantziri. Eenitatsi paashini ikantashita: “Okantani ojeeki jenokinta jeekamentotsi rash Tajorentsi eejatzi nokimita naari, nokantani kameetha noñaawaetzi”, omaanta ikantashita. Nokamantemi naaka: temma tee okameethatzi pikantawaetashitya oetarikapaeni tema riyotzitakimiro Tajorentsi okaatzi pikantakiri.

**35** Eejatzi apaanipaeni ikantashita: “Tee notheeya. Ņaakiro, okantani eeniro kipatsi, eejatzi nokantani nothataakiro nokantziri”, omaanta ikantashita. Nokantemi naaka eero pikimitari irinta, rooma Tajorentsi rirotaki ashitarowi kipatsi. Ikantakowentziri maawaeni. Riyotzi pothataakirorika pikantziri. Eejatzi paashinipaeni ikantashita: “Tee notheeya. Ņaakiro, okantani eeniro ojeeki Jerojaree, eejatzi nokantani nothataakiro nokantziri”, omaanta ikantashita. Eejatzi nokantemi naaka, eero oshiyari irinta; rooma Tajorentsi rirotaki otyaantziriri jewawenantatsiri ijekantari janta.

**36** Eejatzi eero pikimitari paashinipaeni kantsiri: “Tee notheeya. Ņaakiro, kyaaryo eenitatsi noeto, eejatzi kyaaryo tee notheeya”. Eero poshekiiro pikantziri. Eero pimatziro pitajonkeri pikitamaatakyaaawori piishi.

**37** Eero pitheeya. Kyaaryoorika pantero oetarikapaeni, kameetha pikante: “Jee, nantakiro”. Eerorika pikoyi pantero, pikante: “Eero nantziro”.

Monkaataka. Tee okameethatzi poshekeero piñaani pamatawitantyaariri paashinipaeni. Rowashironkaemikari Tajorentsi.

*Eero pipiyatari kijawitemini  
(Rk. 6.29-30)*

<sup>38</sup> Eekiro ryaatatodzi ikanteeyakirini riraga Jesoshi:

—Eejatzi ikantakin achariniiteni paerani: “Aririka pikithokiriiteri roki paashini atziri eejatzi ipiyatemi ikithokiriitemiro pashi poki. Aririka pitzinkeryaakoteri raeki paashini atziri, kameetha ipiyatemi eejatzi itzinkeryaakotemi pashi paeki”.

<sup>39</sup> Omaanta nokantemi naaka: eero pipiyatari kijakimiri omaanta aririka ipajawootemi rakokira, pishinetayaari jantakironta ipajawootemi eejatzi, eero pipiyatari.

<sup>40</sup> Aririka atziri raakaantemi pinkathariki okaatzi pireewitziriri raapi-thatemirorka piithaari, pipawakiri eejatzi paashini pipewiryaakoktarira, eero pikijiri omaanta pineshironkatawakiri.

<sup>41</sup> Aririka romperateetemi payeniri rowaagawo apaani kiroometero powawijaaneenteniri apaani paashini kiroometero eejatzi. Eero pilkijashita inta pineshironkateri.

<sup>42</sup> Ikowakotemirika owashironkaachari koetyeemotziriri, pipawakiri. Eejatzi aririka ikantemi: “Pipashitawakinawo iroka eejatzi noepiyeemi os-heninka ininja”, ari pipashitawakyaari, eero pithañaapithatari.

*Ikantzi riraga Jesoshi: “Pineshironkateri kijakimiri”  
(Rk. 6.27-36)*

<sup>43</sup> Eekiro ryaatatodzi ikantziri Jesoshi:

—Eejatzi ikantaki achariniiteni paerani: “Pineshironkateri neshironkatz-imiri eerori. Omaantakya kijakimiri, pikijaperoteri rirori”.

<sup>44</sup> Omaanta nokantemi naaka: pineshironkaperoteri kijawitakimiri, owashironkaawitakimiri, maawaeni. Pamanakotyaaari, pikanteri Tajorentsi ineshironkateri maawaeni rirori.

<sup>45</sup> Rootaki ikowakaakiriri Tajorentsi maawaeni aapatziyariripaeni reentsitetayitakarini. Rirotaki wetsikakiriri oorya: rooryakoteeyakirini maawaeni atziri, aapatziyariri eejatzi kaari aapatziyari. Eejatzi rowariyaakinirini inkani kameetha oshookantari maawaeni owanawontsi. Eejatzi rowawo maawaeni atziri: riraga aapatziyariri eejatzi kaari aapatziyari, eejatzi kaari yotziri Tajorentsi, maawaeni rowawo. Rootaki ayotantawori ineshironkatziri Tajorentsi maawaeni riraga aapatziyariri eejatzi riraga kaari yotziri. Eejatzi eerori rootaki pineshironkateeyantyaaririni maawaeni.

<sup>46</sup> Apatzirorika pineshironkatawakiri neshironkatzimiri eerori, eero ijeekekakayimi Tajorentsi jenokinta. Rirma riyotzi theenkantsiri ee-jatzi ineshironkatawakiri neshironkatziriri. Omaanta panaakoteri eerori, pineshironkateeyirini maawaeni.

<sup>47</sup> Apatzirorika piwethatashityaari wethatzimiri, eero piyatzi pijeeeki janta jenokinta. Rirma riyotzi maawaeni kaari yotziri Tajorentsi ri-wethatariri rirori. Panaakoteri: piwethateeeyarini maawaeni.

<sup>48</sup> Pikameethaperotanaki, pikimitakotyaaari Piri jenokinta, riroma osheki ikameethaperotaki irira.

—Paamawentyaawo, pipankinatakotarkari Tajorentsi iñaantemiri atziri rootaki iñaaperotantemiri pikameethatzi eeroka. Aririka pantero iroka tekatsi okanty ipinatemiri rirori iinja.

<sup>2</sup> Aririka pipashityaari owashironkaenkari koetyeemotariri, eero pithoteero pikamantziri paashinipaeni. Eero pikimitari riraga oshiyakaawaerintzi raapatziyarimi Tajorentsi. Aririka iperi irira owashironkaenkari oetarika, ikamanteyakirini maawaeni atziripaeni janta nampitsiki. Ikananantayitaririni atziripaeni iñaaperotantyaariri ikameethatzi. Aririka iñaaperotawityaari atziri, monkaataka; omaanta eerowa iñaaperotziri riraga Tajorentsi, tekatsi riweshiryaa wenantyaari.

<sup>3-4</sup> Eero pikimitari riraga oshiyakaawaetawitachari raapatziyarimi Tajorentsi. Rootaki, aririka pineshironkateri owashironkaenkari, pimaniro, roojatzi riweshiryaa wenantemiri Tajorentsi. Rooma riyotakiro irira oetarika pantziniriri, roojatzi okimitakya, aritaki ramitakotakimi enitatisirkira koetyeemotemini.

### *Riyotagaeyakaeni Jesoshi tsika akanterori akenkithatakayeri Tajorentsi (Rk. 11,2-4)*

<sup>5</sup> Ejatzti ikantzi Jesoshi:

—Aririka pikenkithatakayeri Tajorentsi, eero pikimitari os-hiyakaawaetawitachari raapatziyarimi rirori. Ikowaperotziro ikatziya ikenkithatakayeri janta pankotsi ipiyotantapiintarira joriyyopaeni eejatzi janta niyanki nampitsi iñaantyaariri atziripaeni, rootaki iñaaperotantyaariri ikameethatzi. Kyaaryo nokantemiri iroka: monkaataka. Iñaaperotantariri atziripaeni, omaanta tee iñaaperotziri Tajorentsi ikameethatzi.

<sup>6</sup> Aririka pikenkithatakayeri Tajorentsi, piyaate apaniroeni pipankoki, pashitakotanakya intthomaenta roojatzi pikenkithatakayeri ashitzimiri riraga Tajorentsi. Riro neemini apaniroeni pijeekekira ari iñaaperotemi pikameethatzi, riweshiryaa wenantemiri.

<sup>7</sup> Aririka pikenkithatakakaakiri, eero poshekiiro ñaagantsi anik, anik, anik. Eero pikenkithashiriilo aririka poshekiiro ñaagantsi osheki rootaki ikemijanantemirim. Rootaki rametari rirori kaari yotziri Tajorentsi.

<sup>8</sup> Kyaaryoowa, pikimitarikari riroripaeni. Riyoperotziro Tajorentsi maawaeni koetyeemotakimiri. Tekirani pikanteri, riyotzitakawo.

<sup>9</sup> Aririka pikenkithatakayeri Tajorentsi, ari pikimiteero eeroka iroka: “Pawa, niyotzi pijeeki jenokinta eejatzi jaawikika eejatzi pikemijanteeyanan.

Osheki pikameethaperotaki.

<sup>10</sup> Kameethapero pipinkathawenteeyanan.

Nokowaki nantemiro kipatsikika pikowakaakinari, nokimityaari rantziri ponampiripaeni janta jenokinta. Rooma imatakimiro maawaeni pikowakaakiriri.

<sup>11</sup> Maawaeni kitejiri pamitakoeyenani nantawaete, eero okoetyeemotan-tana noyaari.

<sup>12</sup> Niyotzi eenitatsi kaari kameethatatsi nantziri, omaanta eero pikijawan-tanawo, inta pipeyakotenawo. Rooma nopeyakotziniri antakaana-wori naari oetarikapaeni, tee nokijiri.

<sup>13</sup> Eero pishinetziri kamaari rantakayenawo kaari kameethatatsi.

Pikanteetatyeyaaani peewawenteeyenani.

Ashi powantyaawo pitajonkawentena.

Eejatzti naari, ashi nowantyaawo noñaaperotemi.

Rootaki nokantakimiri, ari okaatzi”.

<sup>14</sup> Ejatzti ikantzi riraga Jesoshi:

—Aririka pipeyakoteniri kijakimiri, eejatzi ipeyakotzitemiro Piri jenokinta eeroka kaari kameethatatsi pantziri.

<sup>15</sup> Omaanta eerorika pipeyakoteeniri maawaeni rantakaawitakimiri, eero ipeyakotzimiro riraga ashitzimiri jenokinta okaatzi kaari kameethatatsi pantakiri.

### *Riyotaakiri Jesoshi riyotaanewo tsika ikantya itzitawentyaari Tajorentsi*

<sup>16</sup> Eejatzi ikanteeyakirini:

—Aririka pitzitawentyaari Tajorentsi pikenkithataakaantakyaariri irira, eero piyotakaakiri paashinipaeni. Eero pikimitari riraga oshiyakaawaetawitachari raapatziyarimi rirori. Aririka itzitawentyaari Tajorentsi, rowashirepootashitaka riyotantyaari maawaeni itzitawentawo. Roojatzi atziripaeni ikenkithatakotziri ikameethaperotzi omaanta kyaaryo tee riweshiryaaawentari riraga Tajorentsi.

<sup>17</sup> Eero pikimitari riroripaeni. Aririka pitzitakotaari Tajorentsi kameetha pikishitya eejatzi kameetha pikantya pikiwapootya poshepootya,

<sup>18</sup> eero riyotantzimi riraga atziri pitzitawentatyaaari Tajorentsi omaanta apaniroeni yotemini Tajorentsi rirotaki weshiryaaawentemini eejatzi ñaaperotemini pikameethatzi. Rootaki riweshiryaaakaantemiri iinja.

<sup>19</sup> Eejatzi ikantzi:

—Eero pikenkithashiryaaapiintziro pipiyotero powaagawo jaka jaawikika: opathaagaantzikari eejatzi rapeyagaanteetzitzimirokari eejatzi ikoshiteetzimikari.

<sup>20</sup> Omaanta pikantya pikenkithashiryaaakopiintyaari Tajorentsi eejatzi pantero ikowakaakimiri rootaki ñaaperotantemiri pikameethatzi.

<sup>21</sup> Ñaakiro, aririka pikowaki pipiyotero powaagawo jaka kipatsikika rootaki pipeyakotantapiintariri Tajorentsi, omaanta aririka pikowaki piweshiryaaakayaari rirori pikenkithashiryaaakopiintyaari.

### *Poki okimiwitakari oorentamentotsi*

(Rk. 11.33-36)

<sup>22</sup> Eenitatsi poki paminantari kitejiriki. Okimitaka eenitatsi oorentamentotsi pitsiwootapiinrantari tsiteniriki piñaantyaawori. Aririka okameethataki oki, kameetha paminawaetantyaari.

<sup>23</sup> Omaanta eerorika okameethatzi poki, eero piñiiro, kimitaka tsiteniriki. Eejatzi okimitaka, aririka pikenkithashiryaaapiintero kaari kameethatatsi, eero piyotziri Tajorentsi, eero piñiiri, kimitaka tsiteniriki.

*Eejatzi ikantzi riraga Jesoshi: “Aririka pantawaewentya eerori, tekatsi pikantya panteniri Tajorentsi ikowakaakimiri”*  
(Rk. 16.13)

<sup>24</sup> Eekiro riyatatyye ikantakiri:

—Tekatsi pikantya pithamaeteniri apite piwaatorote. Aririka pithamaeteniri apite, pikenkithashiryaaakotakiri apaani kameetha rirori, pineshironkateri, omaanta pikenkithashiryaaakoteri paashini tee ikameethatzi, pitheenkiri. Eejatzi okimitaka aririka panteniri Tajorentsi ikowakaakimiri, pikenkithashiryaaakopiinteri kameetha irinta, pinintaperotantyaariri, eero pikoyi pipiyotero powaagawo osheki. Omaanta aririka pikowaki pipiyotero osheki powaagawo, aritaki pantawaetaawentero eeroka paantyaawori, eero pikowae paapatziyari riraga Tajorentsi. Eero pimatziro papitetziri piwaatorote.

### *Pikenkithashireero Tajorentsi ikoyiri*

(Rk. 12.22-31)

<sup>25</sup> Eejatzi ikantziri:

—Ari nokantemi: eero pikenkithashiryaakotashitapiintawo oetarika-paeni poyaari, pimiri, pikithaatapiintyaari, oetarikapaeni. ¿Rootakima pi-jeekantari powapiintyaawo? Tee rootaki pijkeekanta, inta rootaki pijkeekan-tari pikenkithashireeri Tajorentsi riraga wetsikakimiri, eejatzi pipinkathateri. ¿Rootakima piwatha otzimantari powaneenkatantyaaawori? Tee rootaki otzimantari. Omaanta eeniro pijkeekantari piyoteri Tajorentsi pi-weshiryaakayaari rootaki okameethatantari panteniri ikowakaakimiri.

<sup>26</sup> Pamineri riraga tsimeripaeni jenokiweri. Tee ipankiwaetzi, tee rowi-itzi, eejatzi tee rantzi ipanko ojeekantari rowanawo. Omaanta maawaeni kitejiri eenitatsi royaari: tema ramitakotziri riori Tajorentsi. Maawaeni kitejiri ineshironkatziri, tema eeroka osheki inintaperotakimi, rootaki ipan-takimiroi eejatzi.

<sup>27</sup> Aririka pikenkithashiryaapiintero ¿arima pimatakiro pojanthaya apaniroeni? Eero. Patsipetashita pikenkithashiryaakotashita.

<sup>28</sup> ¿litaka pikenkithashiryaapiinantawori piithaari, oetarika pikithaatyaari? Paminero oteyakipaeni ampee, tee okenkithashiryaapi-intziro irona: “¿Oetarikapaeni nokithaatyaawo?” Tee okirikawaetzi, eejatzi tee ontyaawaetzi,

<sup>29</sup> omaanta osheki owaneenkataka. Pamine, paerani osheki rowa-neenkawaetani riraga jewawenantatsiri iiletetziri Sharamooni, ojeekini os-hekini rowaagawo, omaanta tee ikimitaperotawo oteyakipaeni, osheki owa-neenkaperotaka irowapaeni.

<sup>30</sup> Riroma rirotaki Tajorentsi owaneenkatzirori oteyakipaeni inchashi, omaanta intsipaete okamateyatzi, intsipaete opariteyatzi, eejatzi rootakoet-ziro. Rooma eerori, pijkeekini. Riroma ineshironkaperotzimi eeroka rootaki piyotantaperotari itzimakayemiro oetarika koetyeemotzimiri kameethat-siri. Pameentyaari, eero pitheenkiri, aritaki itzimimotakaakimiro riraga Tajorentsi.

<sup>31</sup> Rootaki eero pikenkithashiryaakotapiinrantashitawo oetarika, eero pikantzi: “¿litaka noyaari? ¿Oetaka nomiriteri? ¿Oetaka nokithaatyaari?”

<sup>32</sup> Ikowakowaeyironiroña irokapaeni riraga kaari yotziri Tajorentsi. Eero pikimitari irirapaeni. Riroma riyotzimi riraga piri jenokinta, riyotziro koetyeemotakimiri.

<sup>33</sup> Rootakikya pikantyaani pityaawo pipinkathatantyaaririni Tajorentsi eejatzi pikanteri rowameethashiretemi, roojatzikya ramitakotemi eenitatsi koetyeemotakimiri.

<sup>34</sup> Rootaki eero pikenkithashiryaakopiiintawo inkaamani oetarika panteri. Rooma tekatsirika tzimimotzimiri, omaanta ramitakotemi riweshiryaakayemi riraga Tajorentsi inkaamani, eejatzi maawaeni kitejiri riweshiryaakayemi.

## 7

### *Eero pikantzimatzi paashinipaeni (RK. 6.37-42)*

<sup>1</sup> Eejatzi ikantzi riraga Jesoshi:

—Eero pikantakotashitari paashini atziri. Aririka pikantakotashityaari, ikantzimikari Tajorentsi: “Pantakiro eerori kaari kameethatatsi”.

<sup>2</sup> Aririka pikijeri paashinipaeni, aritaki ikijawaemi eerori Tajorentsi. Eejatzi okimitaka, aririka pineshironkateri paashinipaeni, ari ineshi-ronkatawaaemi rirori.

<sup>3</sup> Eenitatsirika kaari kameethatatsi pantziri, tee okameethatzi pikanteri paashini atziri eerori: “Eenitatsi kaari kameethatatsi pantziri”. Noshiyakaawentemiro iroka: aririka otyaakyaatakimi antawo inchapanki

pokikira, ḡarima piñiitakiri ityaakyaa wo owaanini inchapetoki rokikira paashini atziri?

<sup>4</sup> Ñaakiro, tee okameethatzi pikanteri: “Ajaakya, nagaemiro pityaakyaa wo pokikira”.

<sup>5</sup> iPoshiyakaawaetashita paapatziyarimi Tajorents! ¡Pamatawitantashita! Pikowawitak piimitakotyaa rim kameethaperotzinkari. Ñaakiro, pityaawo pookero eerori antawowa inchapanki konompyaatoteencharira roojatz piokichaataanteeyaa ri ari pimatero pagaaenri ityaakiro paashinir atziri. Eejatzi okimitaka pikowakirika pikanteri pisheninka ipakayero kaari kameethatatsi rantziri, pityaawo pipakayero pantziri eerori roojatz piimatero pikanteri.

<sup>6</sup> Tee pipapiintziri otsitzi kameethaperotatsiri iwatha. Eejatzi tee pipapiintziri chaancho poreryaanikitatsiri mapi pinaperotachari royaawo, tee ikoyi royaawo. Tema ratsikawitawakawo eejatzi ikjakotyaa wo rowitsintakiro mapi. Eejatzi okimitaka kameetharoña oetarika okantziri Iwaperite Tajorents!. Kameetha pikenkithatakayeri paashinipaeni atziri okantziri. Omaanta aririka ikijantemiro, tee ikoyi ikemijantem, eero poñaashirenkir inta piyotaapiinteri koyirori.

*Pamaniri Tajorents! oetarika, ari ipakimi  
(Rk. 11.9-13; 6.31)*

<sup>7</sup> Eejatzi ikantzi riraga Jesoshi:

—Aririka pikanteri atziri ipawakimiro oetarika pikowakowateri, aritaki piñaaeko. Aririka pareetya pankotsiki, pikantapaakiri jeekatsiri: “Pashitreenawo”, roojatz riashitaryaantakimiro. Ari okimitaka iroka, pikanteririka Tajorents! pikoyiri, aritaki imatakimiro oetarika kameethatatsiri pikowakowatziri.

<sup>8</sup> Aritaki ramitakotakiri maawaeni amaniriri. Eejatzi kowakowatakotziriri rirori koetyeemotariri, aritaki imatakiro. Aririka pikenkithatakapiinteri, ari ikemijantem, imatemiro oetarika kameethatatsiri pikanterri.

<sup>9</sup> Pamine, aririka ikantem pitomi: “Pawa, pipena kaniri noyaari”, ḡarima pipashitawakyaari mapi?

<sup>10</sup> Eejatzi ikantemirika: “Pipawakina shima noyaari”, ḡarima pipashitawakyaari maanki?

<sup>11</sup> Ñaakiro, tee pikameethaperotzi omaanta piyotzi pineshironkapiinteri peentsitepaeni. Owanaaperotaka riraga Piri jeekatsiri jenokinta osheki ikameethaperotaki. Tema riyoperotziro ineshironkaperotziri maawaeni kenkithatakakiriri.

<sup>12</sup> Eejatzi ikantaki riraga Jesoshi:

—Pikowakirika raakameethateeyimini paashini atziri eejatzi pikimitzityaari eerori kameetha paakameethateri raakameethatantemirikya eerori. Tema rootaki okantakirini rojankinarini Moeseeshi eejatzi rojankinatakiro kamanantayitzirorini iñaaani Tajorents!

*Ikenkithatakotziro Jesoshi apite awotsi  
(Rk. 13.24)*

<sup>13</sup> Eejatzi ikenkithatakotakiro riraga Jesoshi tsikarika akantya akyantyaari janta jenokinta roshiyakaawentakiro awotsi, ikantzi:

—Pikowakirika pikye ijekinta Tajorents!, pikinantapaakyaawo okaamanchakitzuñi awotsi, pikyaantapaakyaawo okaatzini omoo. Eenitatsi paashini awotsi jaawokipetaztiri. Tee opomeentsita ikinanteetyaawo roori; eenitatsi oshekini kinantawori, eejatzi janta ikyanteetyaawo antawo

omoo. Omaanta maawaeni kinayitaneentsini janta eero rareeta jenokinta inta ikemaatsitapiintyaawo paamari kaari tsiwakanitatsini. Osheki kyaantawori.

<sup>14</sup> Omaanta rowaga paashini awotsi okaamanchakitziini osheki opomeentsitaka ikinanteetyaawo. Eenitatsi apaanipaeni kinantawori, omaanta kameetha rareetyaawo rirori okaatzini omoo ikyantapaakyaaari Tajorentsikinta, eero rapiiteero ikamae.

*Ikenkithatakotziri Jesoshi amatawitantatsiri  
(Rk. 6.43-46)*

<sup>15</sup> Eejatzi ikantzi riraga Jesoshi:

—Kyaaryoowa, ramatawitzimikari oshiyawitariripaeni iyotaantzirori Iwaperite Tajorentsi. Kyaaryoowa, piitakaashitarikari maawaeni iyotaantatsiri iyotaatziimi Iwaperite Tajorentsi kameetha. Kyaaryo iyotaawitzimi apaanipaeni, tee iyotaaperotzimiro kyaaryooperotatsiri.

<sup>16</sup> Paminaperoteri rantayitzirini, riraga iyotaantzirori, rootaki piyontyaaririi ikameethatzirika. Pamine, ¿kithokitziroma oowa kitochee? Teewee. ¿kithokitziroma iyeera\* kawana? Teewee. Tee omatziro. Eejatzi ikimita riraga amatawitantatsiri, tekatsi ikantya rantero ikowaperotziri Tajorentsi.

<sup>17</sup> Inchato kameethari okithokitziro okithoki kameethari, ari athotero. Omaanta teerika okameethatzi inchato, tee okithokitziro okithoki kameethari.

<sup>18</sup> Rowaga inchato kameethari, tekatsi okantya okithokitero okithoki kaari kameethatatsi. Eejatzi kaari kameethatatsi inchato, tekatsi okantya okithokitero kameethatatsiri okithoki.

<sup>19</sup> Tema achekapiintziro chochoki kaari kithokitatsini, oejapiintziro pamariki.

<sup>20</sup> Eejatzi okimitaka, potsikanataperotaari maawaeni kowatsiri ryoteemi. Piyote okameethatzirika rantziri, ari kameetha eejatzi iyotaantziro Iwaperite Tajorentsi. Rooma teerika okameethatzi rantziri, eejatzi tee okameethatzi iyotaantziri.

*Ikenkithatakotziri Jesoshi yotakoperoteeriri  
(Rk. 13.25-27)*

<sup>21</sup> Eejatzi ikantzi riraga Jesoshi:

—Eeniro ñaawaetashitachari osheki ikantashita: “Eeroka Nowinkatharite, osheki noppinkathatzimi”. Omaanta eero ryaateeyini irira janta notsipatyaari jenokinta, inta jataperotatsini janta maawaeni riraga antaperotziniriri Pawa ikowakaakiriri.

<sup>22</sup> Aririka noppinkatharentsiperotanaki nopyoyteeyerini maawaeni atziri nokantakowenantyaariri. Eenitatsi oshekini atziri kantashitenani: “Nowinkatharite, osheki nokenkithatakotzimi. Nokantziri kyaanttariri kamaari: ‘Pameentyaari Jesoshi pawijakotanteeyaari’. Eejatzi nokantziri atziripaeni: ‘Riotaki Jesoshi matakaanawori notajonkantzi’”.

<sup>23</sup> Omaanta nokanteri irirapaeni: “Tee niyotzimi, tee reentsitetzimi Pawa. Piyaate inteenanta, osheki pantziro kaari kameethatatsi. Tee nokoyi pijeekei-motena jaka”.

*Atziri owetsikirori pankotsi kijopathariki kipatsi eejatzi owetsikirori im-panekkiki  
(Rk. 6.47-49)*

\* <sup>7:16</sup> Iyeeratasiri rootaki chochoki, oshiyawo komashiki. Ithoetziro, pocharini. Tee antawoperotzi.

**24** Pamine, aririka paapatziyawo maawaeni okaatzi nokantzimiri eejatzi aririka pantakinawo maawaeni nokowakaakimiri, okameethataki, eero ka yotaniri, pikimitakotakari atziri wetsikirori ipango okijopathatzira kipatsi.

**25** Roojatzi opariyantapaaka inkani, oonkanaka. Opokawitapaaka antawo tamypaa otatsinkawitapaakawo, omaanta tee ataananakiro. Rootaki kaari ataantawo, tema riwetsikakitziyo okijopathaperotzira kipatsi.

**26** Eejatzi okimitya eerori, eerorika pikenkithashireero maawaeni okaatzika nokantakimiri eejatzi eerorika pantanawo maawaeni nokowakaawitzimiri, tee okameethatz. Eeroka kimitariri kaari yotatsi. Pikimitakotyaari wetsikirori ipango janta impanekii teki ochereeteki iñaa.

**27** Okanta opariyapaaki inkani, oonkanaka. Opokapaaki antawo tamypaa otatsinkanakiro pankotsi, aanakiro iñaa. Ñaakiro, ratsipetashitakawo riraga wetsikawitawori. Eero patsipetashitawo eerori pikemijantana, omaanta pantaperotero kameetha nokowakaakimiri.

**28** Rootaki ikanteeyakiririni piyotawenteeyakaririni janta tonkaariki. Ari rotsikanateeyanakarini maawaeni, ikantzi:

**29** —Osheki riyanitzi irira, ikenkithatakaakae kimitaaka pinkathari, kameetha ryotaakae; tee ikimitari riraga iyotaantawitawori rojankinarini Moeseeshi.

## 8

### *Retsiyatakotakiri Jesoshi patheenkari*

(Mr. 1.40-45; Rk. 5.12-16)

**1** Ithonkapakiro riraga Jesoshi ryotagaeyakirini atziri janta tonkaariki. Roojatzi roerinkantapaa, eejatzi royaateeyakirini oshekini atziri.

**2** Roojatzi ipokashitapaakiri apaani shirampari patheenkari, itonkiyotawakari rotziwerowashitapaakari, ikantapaakiri:

—Nowinkatharite, tema eenitatsi pitajorenka, pikowakirika petsiyatakotena, niyotzi aritaki pimatakiro.

**3** Roojatzi rowaankantawakawo rako rirori, ipampitawakiri ikantziri:

—Jee, nokowaki. Petsiyatakotanee iroñaaka.

Intsipaete opeyanaka ipathaawo.

**4** Roojatzi ikantziri:

—Eerowa pikamantziri paashinipaeni netsiyatakotakaakimi, inta pantero ikantzitarin paerani Moeseeshini: piyaatashiteri riraga ñaanakowenantsatsiri Tajorentispankokinta pikanteri irira: “Paerani nopathaawitani, omaanta iroñaaka, etsiyatakotaana. Paminena tee añagaero iroñaaka, nopathaawo”. Aririka raminawakimi, roojatzi pipantapaakyaari pitsimerite jenokiweri itaantyaanariri Tajorentsi, riyyoteeyantyaarini atziripaeni etsiyakotatakimi. Roojatzi riyaatantanaka.

### *Riraga Jesoshi retsiyatakotakiri ronampiri kapitaano*

(Rk. 7.1-10)

**5** Ikantaka itharyaanaka Jesoshi, eejatzi riraga oyaateeyakiririni, roojatzi rareetanteeyapaakani Kaperinawooki. Itonkiyotawakari apaani iwinkatharite oshekini joraaro. Kaari riro joriyo.

**6** Ikantapaakiri:

—Nowinkatharite, eenitatsi nonampiri janta nopankokinta, tee imatziro ishwata, eejatzi osheki ikatsitaki; katsitaperotanaki. Nokowaki petsiyatakotakayeri.

**7** Roojatzi ikantawakiri:

—Aritaki niyaate netsiyatakotakayemiri.

**8** Omaanta ikantanakiri:

—Osheki nopinkathatzimi. Tee nokameethatzi naari; tee naaka joriyo, eero notsipatapaakimi janta nopankoki. Apatzirorika pikante etsiyatakotanee riori, niyotaki aritaki etsiyatakotanaki. Patsipetawokari piyaate nopankoki, osheki pipinkathariwenantzi.

<sup>9</sup> Eejatzi naari eenitatsi kantanari oetarika nanteri, eejatzi nokimitzita naari nojoraarote eenitatsi nomperateeyakarini. Nokanteririka apaani joraaro: "Piyaate", ari ryaatanaki. Nokanteririka paashini: "Pipoke", ari ipokanaki. Eejatzi nokimitziri nonampiri riori, aririka nokanteri: "Iroka panteri", ari rantakiro.

<sup>10</sup> Ikanta ikemantawakariri, ari rotsikanatanakari, roojatzi ipithokashitantanakari oyaateeyakiririni, ikantanakiri:

—Kyaaryootaki iroka nokantemiri, maawaeni jakaa anampipathakika tekatsi apaani noñaaneente kimitakotyarini irika paashinijatzitatsiri atziri: osheki rameentaperotakari Tajorentsi.

<sup>11</sup> Inja janta ipinkatharitzinta, aritaki ipiyoteeyaani oshekini paashinijatzitatsiri atziri ipoñaayitapaakyaani paashinipaenikinta kipatsi. Itsipata-paeyaari Awaraama, Ijaaka, Jakoowo, riweshiryaawaetya maawaeni janta.

<sup>12</sup> Omaanta oshekini joriyo jeekatsinimi janta, aritaki ikenkithashirya irirapaeni: "Naaka joriyo, rootaki niyaatantyaari jenokinta", omaanta eero ryaatzi, tee raapatziyaperotari Tajorentsi. Ikowakaawitakari itsipatyaarimi janta ipankokinta, omaanta osheki itheenkakiri, rootaki rotyaanantyaari janta otsitenikaakiperotzikinta. Tema ijeki janta paa-mariki kaari tsiwakanitatsini. Janta riraaperotanakya eejatzi ratsikaeki-teeyanakyaaani, tyakiririri. Osheki rowashironkaanakya janta, osheki ike-maatsityaawo paamari owatsinka.

<sup>13</sup> Roojatzi ikantawakiri riraga iwinkatharite joraaro:

—Kameetha iroñaaka piyaate pipankoki. Paapatziyaperotakina, rootaki retsiyatakotantaneeyari ponampiri.

Intsipatee retsiyatakotanee.

### *Jesoshi retsiyatakotakiro ryote Peetero*

(*Mr. 1.29-34; Rk. 4.38-41*)

<sup>14</sup> Ryaatanaki iroñaaka riraga Jesoshi ipankoki Peetero. Ikyaanta-paakari iñaaapaakitziro riyote omantsiyataki, omaryaaka omaamentokira, ojaawamerikitzi.

<sup>15</sup> Ipampitapaakiro akokira, roojatzi awijakotantanaa ojaawameriki-witaga etsiyatakoperotanee. Roojatzi opiriinantanaka mantsiyawitachari opantawakari rowanawo.

<sup>16</sup> Okantaka otsitenitanaki, ramaetapaakiri oshekini kyaantakariri kamaari. Roojatzi ikenkithatakanawakari roojatzi rowawijaakotantawakariri. Eejatzi retsiyatakotawakiri oshekini mantsiyatzinkari.

<sup>17</sup> Tema imonkaatakiro riraga Jesoshi maawaeni ikenkithatakotzitakaririni paerani Iseyashini. Ikantakotzitakaririni:

"Inja retsiyatakoteri Rotyaantanewo Tajorentsi oshekini mantsiyatzinkari, eejatzi osheki ineshironkateeyirini".

### *Kowawitachari oyaaterinimi Jesoshi*

(*Rk. 9.57-62*)

<sup>18</sup> Paashiniki kitejiri iñaaantakariri riraga Jesoshi oshekiniroña piyotawen-teeyakaririni, ari ikantanakiri riyotaanewopaeni:

—Thame aate intatsikeronta inkaare.

<sup>19</sup> Ikanta ipokashitapaakiri iyotaantzirori Iwaperite Tajorentsi, ikantapaakiri:

—Iyotaanari, nokowaki naari noyaatemi tsikarika piyaate.

**20** Rakanakiri Jesoshi, ikantanakiri:

—Riraga piratsi eenitatsi imoo imaantari. Eejatzi ikimita riraga tsimeri jenokiweri, eenitatis rookantari, imaantari. Kyaaryo naaka poñaachari jenokinta, nokoñaatapaaki jaka kipatsikika, omaanta tekatsi naaka nopanko nomantaanyaari. Patsipetashitawokari poyaatenra, powashironkaakari.

**21** Ikantapaaki paashini riyotaanewo:

—Nowinkatharite, nokowawitaka noyaatemimi omaanta tekiraata ikami pawa. Ikamakirika nokitatanakiri roojatzikya noyaatantanakimi kijokiro nowanakimi.

**22** Omaanta ikantawakiri:

—Poyaatanakina. Paata ikitateri ikaateeyinira kaari yotziri Tajorents, eejatzi ikaateeyinira theenkantatsiri.

### *Romaerintakiro riraga Jesoshi antawo tampyaa*

(Mr. 4.35-41; Rk. 8.22-25)

**23** Roojatzti rotetantanaka riraga Jesoshi pitotsiki, itsipatanakari riyotaanewopaeni. Ikowaki imontyeero inkaare.

**24** Roojatzti imaanaki rirori pitotsiki. Niyanckaani omapokashitapaakari riyotaanewopaeni antawo tampyaa, omaetonkaapaaki otetaagapaaka.

**25** Roojatzti ryaatashitantanakari riyotaanewo, ikaakapaakiri, ikantapaakiri:

—¡Nowinkatharite! ¡Aritaki pimaaki! ¡Rooteentsi apiinkiwee! ¡Powawijaakotena, eejatzi eerori, powawijaakotya!

**26** Roojatzti ipiriintanaka, ikantawakiri:

—¿litaka pithaawantari? ¿litaka kaari pameentaperotantana?

Roojatzti ichereemotantakawo tampyaa eejatzi otamakaari. Ikantakiro:

—¡Pimaeritel!

Roojatzti okaatantanaka tampyaa, eejatzi omaeritzitanaa iñaa: tee añawaero otamakaari.

**27** Ari rotsikanateeyanakarini riroripaeni, roojatzti ikantawakaaka:

—¿Tsikama iitätyaarika atziritatsiri irika? Pamineritya okemijanantakariri tampyaa eejatzi omaetonkaa: romaryaantakawori.

### *Rowawijaakotakiri kyaantariri kamaari*

(Mr. 5.1-20; Rk. 8.26-39)

**28** Ikantaka Jesoshi rareetapaaka intatsikeronta, raatakotapaaka janta. Tema owaero rowaga kipatsi Karaara. Ikanta apite atziri kyaantariri kamaripaeni, ipoñaaka kaminkarimashiki, itonkiyotawakari riraga Jesoshi. Riraga kyaantariri kamaari osheki ikijakaakarí iyamaaritepaeni, rootaki ithaawanantakariri atziripaeni. Tee ikinantanaawo awotsi ikinapiintawitaga.

**29** Roojatzti icheraacheraatakanakari kamaripaeni, ikantziri:

—¿litaka poñaashirenkantanari, Jesoshi? Niyotakimi, eeroka Itomi Tajorentsiperi. ¿Rootakima pipokashitantanari powashironkaena? Tekiraataga omonkaataa kitejiri powashironkaantenari.

**30** Ari ipiyotziteeyakan chaanchopaeni janta, osheki rowawaeteeyani.

**31** Ikantaka kamaari ikantakiri riraga Jesoshi:

—Aririka pookakagaenari irika nokyaantawitarika, pishinetena niyaatashiteri chaancho nokyaantapaeyaari irirapaeni.

**32** Roojatzti ikantawakiri:

—Piyaate, pikyaantapaakyaari irinta.

Roojatzti ryaatantanaka ishirinkashitanakari chaancho, roojatzti ishiyanaka maawaeni impeetaki, ipiinkapaaki inkaareki, motoririri, motoririri. Itsitsiyeeyapaakini iñaakira, motoririri.

**33** Ikantaka shentawitariri chaancho ishiyanaka, tema ithaawanakitzi rootaki riyaatantanakari ojeekinta nampitsi ikamantapaakiri maawaeni atziri oetaka awijimotakiriri eejatzi ikamantakotapaakiri kyaantawitariri kamaari awijkotee.

**34** Roojatzi ikjaka maawaeni jeekatsiri janta, eejatzi ithaawantari rootaki ipokashitantapaakari ikantapaakiri riraga Jesoshi:

—Thame piyaate! Tee nokoyi pipokimotena jaka nonampikika!

## 9

### *Retsiyatakotakiri Jesoshi kijopookitatsiri (Mr. 2.1-12; Rk. 5.17-26)*

**1** Roojatzi rotetantanaa riraga Jesoshi pitotsiki, ikaateeyaneerini riyotaanewopaeni. Ipiyanaka inampiperokinta intatsikeronta inkaare.

**2** Roojatzi ramaetapaakiniri riori apaani kijopookitatsiri, ramakotakiri imaamentoki. Riyotaki riraga Jesoshi osheki raapatziyari riraga amiriri, rootaki ikanantawakariri riraga kijopookitatsiri:

—Piweshiryaanakya, niyompari, tema ari nopeyakotakaemiro kaari kameethatatsi pantawitari, aritaki nowawijaakoteemi.

**3** Ikanta apaanipaeni iyotaantzirori Iwaperite Tajorentsi ikemawakiri. Roojatzi ikantawakagaeyantanakarini:

—Irika shiramparika iitajorentsishityaami. Itheenkakiri Tajorentsi.

**4** Riyotakiri irirapaeni Jesoshi oeta ikenkithashiryaari rajankaneki, rootaki ikanantanakari:

—Litaka pitheenkantanari? Litaka pikijashiryaantanari?

**5** Aririka nokanteri irika: “Iroñaaka netsiyatakoteemi, pipiriintee, panashiteeyaa”, tema ari potsikanatanakyaari. Eerorika imatziro ipiriinta, ari pishirontawentanakina naaka. Omaanta kameetha pikantanaki tekatsi shirampari materoni rowawijaakoteri atziri kaari kameethatatsi rantziri. Kameetha pikantzi. Tema piitashiwitaka nokantashitari: “Nowawijaakotemi, eero nokjawenzimiro kaari kameethatatsi pantziri”.

**6** Nokowaki piyote tee nokantawaetashita. Naaka poñaachari jenokinta, nokoñaatapaaki jaka kipatsikika. Ikantakina paeraniperoroña Pawa janta: “Powawijaakotenari antzirori kaari kameethatatsi eero akijantari paata”. Nokowaki iroñaaka piyote eenitatisi notajorenka, rootaki nomatatariri nokamintheeri antzirori kaari kameethatatsi, nowawijaakoeyerini.

Rootaki ikanantakariri kijopookitatsiri:

—Pikatziyanaki, paaneero pimaamento, piyaatee pipankoki.

**7** Roojatzi ipiriintantanaka riraga kijopookiri katziyanaa, jatanee ipankoki.

**8** Iñaantawakariri maawaeni piyoteenchari oetarika awijaneentsiri, rot-sikanatawakari, thaawanaki, ikanteeyanakini:

—Tema ikameethatzi Tajorentsi, imatakaakiri irika retsiyatakotakaakiri mantsiyatziinkari.

### *Ikantana Jesoshi: “Mateeyo, poyaatena” (Mr. 2.13-17; Rk. 5.27-32)*

**9** Roojatzi rowaganaka riraga Jesoshi roojatzi nojeekakinta naari. Naaka Mateeyo. Iñaapaakina jaka pankotsikika nopiyotayitzinrininta iyorkitepaeni atziri eekiro noperi pinkatharitatsiri Oroomaki. Ikantapaakina:

—Thame poyaatanakina.

Roojatzi nokatziyantanaka noyaatanakiri.

**10** Roojatzi naanakiri janta nopankoki nokantziri: "Thame nakiyotemi". Eejatzi naanakiri riyotaanewopaeni. Eejatzi nakiyotawakiri. Eejatzi nokae-makiri riraga notsipatayitarini nopiyoteeyinirini oroomajatzi iyorkite, eejatzi nokaemakiri paashinipaeni antzirori kaari kameethatatsi. Ari nokaateyeyakirini maawaeni; nowaeyakan.

**11** Ikantaka iñaakinaga ipokashiteeyakinani warijeeyopaeni, ikaemapaa-kiri apaani riyotaanewo Jesoshi, ikantziri:

—¿litaka rantziri riraga iyoteemiri? Rakiyoteeyakirini piyotziriri iyorkite oroomajatzi, eejatzi ikaateeyakirini paashini kaari kameethatzinkari. Tee okameethatzi iroka.

**12** Omaanta ikemakiri riraga Jesoshi, rootaki ikanantanakariri:

—Riraga kaari mantsiyatatsini tee ikoyi aawinantsirsri raawinteri intakya mantsiyatatsri rirotaki kowatsiri. Okimitaka iroka, riraga kenkithashiryaa-witachari ikameethatzi, tee ikoyi ipokashiten-a nowawijaakotantyaariri inta apatziro riraga iyotakotachari eeniro rantani rirotaki pokashitanari nowawijaakotanteeyaariri.

**13** Thame piyaate piyotakoeyawakironi iroka okantakotziri Iwaperite Tajorentsi, okantzi: "Tee apatziro nokoyi powamaashitapintenari powishate inta eejatzi nokowakaaperotakimirri paapatziyaperotena. Eejatzi nokowakaaperotakimi kameetha pineshironkaperoteri maawaeni". Tee apatziro nopokashitziri nowawijaakoteri riraga kameethatzinkari omaantaka-nopokashitaperotzi riraga kaari kameethatatsi, riyotanteeyariri Tajorentsi.

Rootaki ikantziriri riraga Jesoshi warijeeyopaeni.

### *Rojampitanteetari Jesoshi tzitawentaantsi*

(*Mr. 2.18-22; Rk. 5.33-39*)

**14** Roojatzi ipokaeyapaakini riyotaanewo Jowa kaawoshitakotziriri Tajorentsi ikantapaakiri riraga Jesoshi:

—Pamine, notzitawentapiintari Tajorentsi, eejatzi ikimitaka riraga warijeeyopaeni; omaantakya pashi piyotaanewopaeni tee itzitawentapiintee-yarini riori, inta rowapiinteeyan maawaeni kitejiri. ¿litakaky?

**15** Ikantawakiri:

—Piyotaki rametakawo riraga aatsiri iina ikaemiri inampijatzipaeni rowakaakari riweshiryaa-wentakawo roori. Eero retakotanakawo kaemakaantziriripaeni. Omaanta aririka raapithateetaneeri inteenanta, roojatzikya retakotanakyaari, eero rowa. Eejatzi nokimity naari paata, aririka niyaate. Niyaaterika roojatzi retakoe-yantana-kyaanri riori niyotaanewopaeni, eejatzi itzitawenteeyanakyaarini Tajorentsi tema retakoe-yanakya-ananani. Rooma eeniroka nojeeki jaka, eero itzitawentari Pawa, tema riweshiryaa-wentanta.

**16** Tee pimaejantziri iyotaantatsiri, tee. Eejatzi eenitatsirika pimaathapooki antyashipawo rooteentsi oshipaaye, aririka powawatatero owakirari maathaantsi, roojatzi aririka pikiwero aminthatanaka owakirari, eero omonkaatanawo, roojatzi otzijagaantanaka antyashipawotsrsi, patsipetashitakawo powawatatziro. Eejatzi okimitakya, patsipetashityaawo paapatziyawo maawaeni okaatzi iyoteetakimirri. Okameethatzi pipakayero paashini paapatziyawitarira roojatzi kameethatanaki paapatziyana naari.

**17** Rapiitakiro Jesoshi roshiyakaawenteniri okaatzi riyotaakiriri, ikantzi:

—Piyotzi aakapaeni joriyyopaeni shirkiriri imashi piratsi apiyaatantyaawori awishooawaantsi oowa. Omaanta eero apiitantari apiyaatantari awishooawaantsi oowa owakirari inthomaenta itaworimashi inta apiyaatantya owakira mashiri. Apitantyaaririka tema ari ijagaanaki. Okimitaka iroka,

oetarika niyotagaemiri naari eejatzi owakirari. Tee okameethatzi pipiy-oteri ikemijantakayimiri paashini iyotaantsi. Pipakayero pikemijantziro ikantawitzimiri irintapaenri roojatzi kameethatanaki paapatziyena naari.

Rootaki ikantakiriri riraga Jesoshi.

*Riraga Jesoshi retsiyatakotakiro jokaawitawori iraa eejatzi rañaakagaero eejatzi kamaawiteenchari*

(Mr. 5.21-43; Rk. 8.40-56)

<sup>18</sup> Roojatzi ipokashitapaaakari jewawentzirori ipiyotapiinteeyaninta joriyyopaeni, rotziwerowashitapaaakari ipinkathatantapaaakari riraga Jesoshi, ikantapaaakiri:

—Kamaki nishintyo, nokowaki piyaatakite nopankoki pipampitakite-nawo roojatzi añaantaneeyaari eejatzi.

<sup>19</sup> Roojatzi ikatziyantanaka Jesoshi royaatanakiri janta, nokaa-teeyanakirini naaka maawaeni riyotaanewo.

<sup>20-21</sup> Ari janta niyanki awotsi oyaatapaaakiri Jesoshi apaani tsinani, okaataki 12 ojarentsite owashironkaaka, omantsiyataki, ari okantatyaaani ojokaatziro iraa. Okanta okenkithashiryaaka, okantzi: “Aririka nopampitz-itakiri iithaari Jesoshi aritaki netsiyatakotanee”. Roojatzi okinashitanta-paaakari itapiiki, opampitzitapaaakiri opatziyaakiki iithaari.

<sup>22</sup> Roojatzi ipithokanaka iñaawakiro, roojatzi ikantawakiro:

—Piweshiryaaanakya, choeni, pameentakina, rootaki petsiyatakontaari. Aripaete etsiyatakotanee.

<sup>23</sup> Roojatzi nowaaganaka areeteeyapaakinani ipankoki jewatatsiri. Noñaapaakiri jonkatakoeyawitaworini kamaentsiri eejatzi oshekini atziri iraakoeyawitaworini icheragaeyakini riraaka.

<sup>24</sup> Roojatzi ikanantapaaakari riraga Jesoshi:

—Thame piyaatanee. Tee okami irowa piraakowitakarira, omaashita. Roojatzi ishirontawentakari injii, injii, injii.

<sup>25</sup> Roojatzi riyowantanaka nekokironta roojatzi ikyaatapaaaka riraga Jesoshi. Roerikawakotapaaakiro roojatzi opiriintantanaka añaanee.

<sup>26</sup> Othotyaanaka ikemakoetawakiri Jesoshi janta maawaeni nampitskipaeni.

### *Raminakaakiri apite kaari kokichaatatsini*

<sup>27</sup> Roojatzi nowaagaeyanakanai, tema royaatakiri Jesoshi apite kaari kokichaatatsini ichereemotakiri, ikantakiri:

—Tema eeroka icharineetenri Iraviirini. Rotyaantakimi Tajorentsi rootaki nokowantari pineshironkatena.

<sup>28</sup> Roojatzi nokyaanteeyapaakani eejatzi riraga kaari kokichaatatsini ipokashitapaaakiri rirori roojatzi ikanantawakari:

—¿Pikenkithashiryaakama aritaki nomatakiro nokokichaatakagaemi?

Ikantawakiri:

—Jee, Nowinkatharite, niyotzi aritaki pimatakina pikokichaatakagaena.

<sup>29</sup> Roojatzi ipampitaktakari rokiki, ikantanakiri:

—Paapatziyakina rootaki netsiyatakanteemiri.

<sup>30</sup> Roojatzi raminantanaa. Ikantakiri rirori:

—Eerowa pikamantziri paashinipaeni: “Ikokichaatakagaana Jesoshi”.

<sup>31</sup> Omaanta riyaatantanakari ikantakiri maawaeni iñaapaakiri:

—Ikokichaatakagaana Awinkatharite.

<sup>32</sup> Nokantaka riyaateeyakaawitanakinanira riraga Jesoshi, roojatzi noon-thaantawakari atziri ramakiri kyaantariri kamaari. Tee imateeya iñaawaete.

<sup>33</sup> Roojatzi rookantawakanari Jesoshi riraga majontzitakaawitakariri, roojatzi iñaawaetantanaa. Ari rotsikanateeyawakariniroña maawaeni ñaaawakiriri, ikantawakaaka:

—Pamine, paerani tee añaapaintziro kimitaworika iroka jaka aepatsitekika.

<sup>34</sup> Omaanta ikanteeyakini riraga warijeeypaeni:

—Irika shiramparitsirika ramitakotakitziiri iwinkatharite kamaaripaeni. Rootaki imatantariri rookakiniri ikaateeyinira ikamaaritzi rotyaantziri.

### *Osheki ineshironkatziri riraga Jesoshi atziripaeni, ikowaki raapatziyari*

<sup>35</sup> Osheki ikinakinayitanakini riraga Jesoshi ithotyaakiro maawaeni nampitsipaeni, riyotaantaki janta pankotsi ipiyotantapiinttarira joriyopaeni. Ikenkithatakotapiintziri Tajorentsi, tsika ikanta ipinkathari-wenantzi. Eejatzi retsiyatakotakaakiri maawaeni mantsiyaripaeni, tekatsi pomeentsitzimotyaarini.

<sup>36</sup> Ikanta iñaawakirira oshekini atziri ipiyotawentakari, osheki retakoeyakarini. Ikantzi:

—Osheki rowashironkagaeyakan irirapaeni, tekatsi iyotaantatsiri riyo-taaperoteri oetarika okantaperotziri Iwaperite Tajorentsi. Ikimiwitari owisha riraga kaari ishenteetzi, rootaki rowashironkagaeyantakarini.

<sup>37</sup> Roojatzi ikanteeyanani:

—Okimitakawo iroka oshekitziranki okithoki pankiwaerontsi. Omaanta tekatsipero antawaetatsini owiiteroni okithoki. Eejatzi okimitaka roori een-itatsi iroñaka osheki atziri kowawitachari raapatziyaperotyhaarimi riraga Tajorentsi omaanta tekatsi osheki aapatziyakagaeyaaririni.

<sup>38</sup> Pamaneri Awinkatharite Pawa Tajorentsi rotyaanantyaariri oshekini kenkithatakayeririni anampijatzi, raapatziyanteeyaririni.

## 10

### *Riyoyaakiri Jesoshi 12 riyotaanewopaeni*

(*Mr. 3.13-19; Rk. 6.12-16*)

<sup>1</sup> Roojatzi ikaemaeyanakinani Jesoshi maawaeni nokaateeyinira 12 riyotaanewo. Imatakagaeyakinawoni nowawijaakoteri kyaantawitariri kamaari nookiniri iyamaarite. Eejatzi netsiyatakotantayitaayaririni omatayitzirini paashinijatopaeni mantsiyarentsi.

<sup>2</sup> Iroka nowaeropaenika naakapaeni rotyaantanewo: Shimo, (riraga iiheetziri eejatzi Peetero), eejatzi rirentzi Antereeshi; Jantyaako, (riraga itomi Sewereeeyo), eejatzi rirentzi Jowa;

<sup>3</sup> Jiripi eejatzi Waritoromee; Tomashi eejatzi naaka, nowaero Mateeyo (riraga piyotawitanariri paerani iyorikite oroomajatzi); Jantyaako (riraga itomi Arijeeyo); Tareeyo;

<sup>4</sup> Shimo, (riraga kathaaperotzinkari antayitzirorini oetarikapaeni); eejatzi riraga Joorashi (riraga karyootejatzi, rirotaki aakaanteririni iinja Jesoshi).

*Rotyaanteeyantenarini Jesoshi nokenkithateeyeni eejatzi retsiyatakoey-erini mantsiyatayitatsirini*

(*Mr. 6.7-13; Rk. 9.1-6*)

<sup>5</sup> Rotyaanteeyantenarini riraga Jesoshi, omaanta rityaawo eenitatsi iroka ikantawakinari:

—Eerowa piyatashitziri riraga kaari joriyyotatsi, eejatzi riraga jamaarya-jatzi.

<sup>6</sup> Intakya piyatashiteri maawaeni ajoriiyotzinkarite. Nokimitakaantakiri owisha, riraga kaari ishenteetzi.

**7** Tsikarika pikineeyanakini pikenkithatakayeri atziripaeni. Pikanteri: "Rooteentsi ipinkathariwente Tajorentsi".

**8** Petsiyatakotakayeri mantsiyatzzinkari, pañaakagaeri kamatsiri, petsiyatakotakayeri patheenkari, eejatzi powawijaakoteri kyaantawitariri kamaari. Osheki ineshironkatakimi Tajorentsi ramitakotashitakimi eerori, omaanta tee ikowantzimotzimiro. Eejatzi pikimitzitya eerori, pineshironkateri paashinipaeni pamitakoteri. Eero pikowantzimotari.

**9** Eero paanaki piyorikite,

**10** piwoorijate, paashini pimaatha, paashini pijapatote, paashini pikotzi, oetarika paashinipaeni: piyatashitanakya. Ninkarika pineshironkatakiri okameethatzi ineshironkatemi eerori ipashitemi koetyeemoyitakimirini.

**11** Aririka pareetapaakyaa nampitsiki pikowakowatapaakiri apaani atziri kameethatatsiri rajankaneki. Aririka raakameethatawakimi, ari pijeekapakki janta, roojatzi paata powaagantaneeya paashiniki nampitsi.

**12** Aririka pareetapaakyaa, piwethatapaakyaaari ashitawori inampi.

**13** Aririka raakameethatawakimi irinta, pikanteri Tajorentsi: "Pawa, pineshironkaperoteri". Omaanta teerika raakameethatawakimi, eero pikantzirri ijeekakaeri kameetha.

**14** Eerorika raakameethatawakimi jeekatsiripaeni janta nampitsiki, eejatzi eerorika raapatziyeeyawakimini, ari powaaganakya. Eejatzi potekakontatanakya piitzikira riyotantyaari eero pipiyashitari eejatzi. Pikantereyanakirini: "Iroñaka tee paapatziyana, ari rowashironkaemi Tajorentsi inja".

**15** Kyaaryootaki iroka nokantemiri: aririka othonkaeya iinja kipatsi, ikantakowenanteeyaaaririni Tajorentsi maawaeni atziri, roojatzi rowashironkaantakyaari maawaeni joroomajatzini eejatzi maawaeni komoorajatzini, rooma oshekin ranteeyakironira kaari kameethatatsi. Omaanta riraga kaari aapatzieyeeyawakimini rirotaki iinja kemaatsitapertyaawoni osheki katsiri. Tema rowashironkaaperotantakyaariri riraga Tajorentsi riroripaeni.

**16** Pamine, notyaantatziimira iroñaka pikenkithatakotena janta maawaeni anampijatzikinta, omaanta nokimitakaantawitakimi eeroka owisha pojatekantyaari koweenkatatsiri. Kyaaryoowa, rowashironkaemikari theenkantatsiri. Rootaki nokowantakimiri pikenkithashiryaaoperota kameetha eejatzi piyohaniperote kameetha. Pikimitakotyaari maanki. Osheki ikenkithashiryaaoperota aririka raminaminate royaari; omaanta eejatzi kameetha paakameethatante pikimitakotyaari jamomo. Tee riyotzi ikijanita paashinipaeni, kameetha ijeeki. Ari pikimitakotyaari eerori: pijeeki kameetha eero powashironkaera paashinipaeni.

Rootaki ikantawakinari riraga Jesoshi.

*Inja ikijemikya oshekinai atziri.*

(Mr. 13.9-13; Rk. 21.12-19)

**17** Ikanteyakinani riraga Jesoshi:

—Kyaaryoowa, rowashironkayitziminikari atziri. Aritaki raaneemi janta riyotaawakaakanta jewatatsiripaeni rowashironkaantemiri. Eejatzi raaneemi janta pankotsiki ipiyotantapiintarira joriyyo ipajapajaapiintemi.

**18** Riyotakimirika paapatziyakina, raaneemi atziripaeni janta ijeekinta jewaperowenantsirsipaeninta paashinijatzitatsiri atziri, roojatzi eeroka pikenkithatakagaeyerini riyoteeyantanakyaarini atziripaeni.

**19** Aririka raakaantakimi eero pikantashiryaaashita: "¿Oetaka nokantapaakiriri?" Tema naaka yotakaakimiri oetarika pikantapaakiriri.

**20** Eero piyotashita eerori pikenkithatakayeri, omaanta Ishire Tajorentsi iyotaaperotemini pikenkithatakayeri.

**21** Inja osheki ari ikijaperowentakinani atziripaeni. Apaani aririka raakaanteri rirentzi, ari rowamagaetakiri; paashini raakaanteri itomi, ee-jatzi paashinipaeni raakaantayiterini ashitariri.

**22** Paapatziyakina, rootaki ikijantemiri atziripaeni, omaanta eero pipakaero paapatziyana. Roojatzirika pikantyaani kijokiro poyena paapatziyena, aritaki nowawijaakotakimi kameetha pijeekimotantenari janta jenokinta.

**23** Aririka ikijimi jeekatsiripaeni nampitsiki, ari pishyanaki, pitharyaanaki paashiniki nampitsiki. Kyaaryo, tekira pithotziro maawaeni nampitsi jika Ishirayeeriki, tekira piyotagaeri maawaeni, roojatzi nopyiantapaeya naari. Tema naaka poñaachari jenokinta, nokoñaataapaa ki jaka kipatsikika.

**24-25** Osheki ikijanakina iroñaaka atziripaeni. Paapatziyakina rootaki ikijantemiri eerori. Pamine, aririka imonkaawityaari ryotaanewo iyoteeriri ryote ari kameetha, omaanta eero imatziro ranaakotziri. Eejatzi aririka imonkaawityaari onampirentsi riraga omperatariri ari kameetha, omaanta eero imatziro ranaakotziri. Osheki ikijakina, iitashitakina naaka Wereshe-woo riraga iwinkatharite kamaaripaeni. Inja rowanaaperotemi eeroka osheki ikijaperotanakimi.

*¿Ninka athaawantyaarika?  
(Rk. 12.2-9)*

**26** Omaanta eero pithaawanteyarini. Inja ari piyotakiro maawaeni kaari piyotziri iroñaaka. Tema ari piyotakiri ninkarika kijakiriri Tajorentsi ee-jatzi ninkarika kijakimiri eerkapaeni aapatzianyari naari. Piyotero oetaka rantayitakirini ee-jatzi tsika ikanteeteri rowashironkagaeteri. Iroñaaka tee riyotzi irirapaeni nopinkatharitaki, omaanta iinja riyoperoeyeni maawaeni; iñaawakinaka nopinkathariperotapaaki naari, ee-jatzi pikaatena eerori.

**27** Apaniroeni nokamantakimi eerori iroñaaka, omaanta tekira riyotzi theenkantatsiri, nomanawitakawo. Inja nokowaki pikamanteri maawaeni ryotyantyaari irirapaeni.

**28** Imatawityaawo rirori theenkantatsiri rowamaemi omaanta eero pithaawantari. Tekatsi ikantemiri rotyaantemiri paamari kaari tsiwakanitatsini. Omaanta riraga Tajorentsi pipinkathaperoteri; ikowakirika irira imatero rowamaemi ee-jatzi rotyaantemiri janta paamari kaari tsiwakanitatsini. Riro-taki pithaawantyaari irira.

**29** Pamine, tee ipinaperowita tsimeri iryaanini, riraga jenokiweripaeni, omaanta teerika ikowakayiri Tajorentsi ikame, eero ikami. Eejatzi riyotzi tsikarika okaate ikamantyaari apaani. Eejatzi okimitakya eerori, eerorika ikowakayimi pikame, eerokya ishinetziri atziri rowamaemi.

**30** Riyotziro tsikarika okaatzi piishi, tema ee-jatzi riyotziro maawaeni okaatzi awijimotemini.

**31** Ñaakiro, osheki panaakotziri tsimeripaeni jenokiweri, osheki ikenkithashiryaakimi riraga Tajorentsi. Iroñaaka eero pithaawantari. Ikantzimatemirika atziri, omaanta eero pithaawantari.

**32** Pikanteririka atziri: “Naapatziyari Jesoshi”, ee-jatzi naari nokimitzityaawo janta jenokinta nokanteri Pawa: “Raapatziyakina rirori, nosheninkatakari”.

**33** Omaanta pikanteririka atziri: “Tee naapatziyari Jesoshi”, ee-jatzi nokimitzityaawo naari janta jenokinta nokanteri Pawa: “Tee raapatziyana rirori, tee niyotziri naari”.

**34** Eejatzi ikantana riraga Jesoshi:

—Eero piitakaashita nopolakika jakaa ari raakameethatawaka-gaeyanakyaani atziri. Tee rootaki nopolanta raakameethatawakaan-teyarini inta ikijawakaantyaaarini.

**35-36** Aririka raapatziyena apaani shirampari omaanta rirentzi tee raapatziyana. Rootaki ikijawakaantari. Ikimitaaganki shirampari aririka raapatziyena naaka tema ari ikijawakiri ashitariri. Tsinani aririka aapatziyena roori ari okijawakiro iniro; eejatzi okijitanakyaawo ewatyero rowaga ayiro kaari aapatziyana.

**37** Rooma okameethatzpi pintintaperoteri piri eejatzi piniro, omaanta nokowaki kameethapero pintintashireperotena naari. Eerorika pintintaperotera, eero noñaaperotzimi eerori pikameethatzpi. Eejatzi, okameethatzpi pintintashireteri pitomi eejatzi pishinto, omaanta nokowaki kameethapero pintintashireperotena naari. Eerorika pintintashireperotana, eero noñaaperotzimi eerori pikameethatzpi.

**38** Nokowaki pikyaaryooowentenawo maawaeni nokowakaakimiri. Aririka ikijanteetemiro, omaanta nokowaki eekiro piyaatatyee pikyaaryooowentenawo oetarika nokowakaakimiri. Eerorika pikyaaryooowentanawo maawaeni, eero noñaaperotzimi naari pikameethaperotzi.

**39** Aririka pikaminthaaoperoya eerori apaniroeni iroñaaka, ari powashironkaaperotanakya inja. Omaanta paapatziyaperotenerika iroñaaka, omawitya rowashironkawitemi atziri, tema eero patsipetashitawo paapatziyana; aritaki inja pañaagae janta okameethaperotzinta.

**40** Piyaatantari, ninkarika aakameethatemini eero, tema raakameethatzitakina naari eejatzi. Eejatzi maawaeni aapatziyanari, tema rirotaki aapatziyaaariri Pawa, riraga otyaantakinari.

**41** Maawaeni aririka raapatziyari eejatzi raakameethateri kamanantayitzirorini iñaani Tajorentsi imonkaatawakaantyaaari iñaaperotawakiri rirori. Tema ari ipinatakiri inja. Eejatzi okimitaka maawaeni aririka raakameethateri kameethatzinkari riraga aapatziyanari eejatzi ikimitakari, imonkaatawakaatya iñaaperotawakiri riraga Tajorentsi ikameethatzpi. Eejatzi ipinatzityaa iinja.

**42** Ninkarika pantashitachari atziri oetarika omawitya apatziro tajokira iñaa tema rirotaki aapatziyanari nonintanewo, kyaaryootaki nokantzimiri: “Eero patsipetashitawo panteri, ari ipinatakimi Pawa iinja”.

## 11

**1** Rootaki ikanteeyanarini riraga Jesoshi, ari okaatapaaki ryotaakinari. Roojatzi niyaateeyanakini. Eejatzi rowagananaka Jesoshi janta paashinipaenkinta nampitsi, ryotaakiri jeekatsiripaeni, ikenkithatakaakiri. Niyaatanaki naaka apitepaeni, eejatzi paashinipaeni ryiaateeyanakini apitepaeni ryotaanewopaeni, nokaateeyini 12.

### *Rotyaantakiri Jowa ryotaanewo iñeeri Jesoshi (RK. 7.18-35)*

**2** Riraga Jowa kaawoshitakowentziriri Tajorentsi ijeekaki iroñaaka omonkyaaagamentotsiki. Ikantaka ikemakotakiro rantakiri Jesoshi, riraga iiteetziri Rotyaantanewo Tajorentsi, rootaki rotyaanantakari apite ryotaanewo raminakiteri Jesoshi.

**3** Ikantawakiri:

—Piyaatashitakiririka Jesoshi pojampitapaakiri: “¿Eerokama Rotyaantanewo Tajorentsi naamagaeyakarini? ¿Eenitatsima paashini naamagae-yarini?”

<sup>4</sup> Roojatzi ipokantapaaka rirori apite rareetapaakari Jesoshi. Rojampitan-tapaakari, ikantawakiri:

—Iroñaka pipiyanee, pikamantapaeri Jowa okaatzi maawaeni pikemaki-nari eejatzi maawaeni piñaakotakinari.

<sup>5</sup> Pikamantapaeri naminakagaeyakirini riraga kaari kokichaaw-itacharini, nokatziyatziyatakagaeyakarini riraga kijopookiwitachari-paeni, netsiyatakotakagaeyakirini riraga pathawitacharipaeni, nokemakagaeyakirini riraga kaari kemawitachanipaeni, eejatzi nopirintayitaneerini kamawiteencharipaeni. Niyotakagaeyakirini owashironkaawitacharipaeni tsika ikantya rowawijaakotanteeyaaariri riraga Tajorentsi.

<sup>6</sup> Riweshiryakaakanakimi maawaeni kaari theenkanari naaka. Rootaki pikantapaeriri Jowa.

<sup>7</sup> Roojatzi ipiyantanaa janta riraga apite, ikanantapaariri riraga Jowa okaatzira iñaakotakiriri janta.

*Riraga Jesoshi iñaaperotziri riraga Jowa kaawoshitantatsiri ikameethatzi  
(Rk. 7.24-30)*

Omaanta eeniro ijeekaki riraga Jesoshi ikenkithatakagaeyakirini piy-otawentakariripaeni, ikantanakiri:

—Paerani piyaatapiintzi janta tekatsinta atziri ipanko pikemijantapi-intziri Jowa. ¿Itaka piyaatashiteeyantakitaririni? ¿Rootakima piyaatashitan-tarari pikemijanteri iñaawaetashitachari? Teewee.

<sup>8</sup> ¿Piyaatashitantakitariri piñaakitzirma atziri kithaatachari kameetha? Teewee. Riraga kithaatawori iithaari kameethatatsiri ijeekaeyini janta ipankoki jewawanentatsiri.

<sup>9</sup> Ajaatyta, pikamantena: ¿Itaka piyaatashitakitziri? ¿Rioma piitzi kamanantzirori iñaani Tajorentsi piyaatashitantakitariri? Tema kyaaryo ikamantziro, omaanta ranaakoperoeyakirini paashinipaeni kamanantay-itzirorini iñaani Tajorentsi.

<sup>10</sup> Ikenkithatakotzitakarini paerani Tajorentsi, ikantzitakinani: “Noty-omi, notyaanteri iinja jewatemiini ikenkithatakapaakiri joriyyopaeni, ikan-teri: ‘Pikenkithashireeyaanitya, okameethatzi pijeeki kameetha, paamyari Awinkatharite, kaakitaki’”. Rirotaki riraga Jowa kaawoshitakotziriri Tajorentsi rojankinatakotziteetakariri paerani.

<sup>11</sup> Kyaaryo nokamantemiri, tema oshekini naawita kamanantatsiri omaanta tekatsi kimityaarini Jowa riraga kaawoshitakotziriri Tajorentsi. Tema ranaakoeyakirini maawaeni paashinipaeni ryoperotakiri Tajorentsi. Omaanta riraga atziri kaariroña yoperotatsi omaanta iñaakiririka Jesoshi itajonkantzi rootaki ranaakoperotantanakariri iroñaka Jowa; tema iñaakirri tsika ikanta Tajorentsi reewawenantzimati.

<sup>12</sup> Paerani ikenkithatakotanani naari riraga Jowa kaawoshitakotantatsiri Tajorentsi, eejatzi raapatziyakawo osheki atziri okaatzi ikenkithatakota-nari. Iroñaka nokenkithatakotziri Tajorentsi piyotanteeyakarini. Eejatzi paapatziyakaanteeyaririni.

<sup>13</sup> Tema paeraninki ikenkithatakotanani maawaeni kamanantayitzirorini iñaani Tajorentsi, ryotanteeyaworini maawaeni nopokaerika iinja. Eejatzi ikimitani Moeseeshini ikenkithatakotana. Maawaeni ikantzini: “Aritaki ipokaki Rotyaantanewo Tajorentsi, omaanta rityaawo ipoke kimiwityaarini Iriiyashini, eentsikiro rimpaaetapaaki Rotyaantanewo Tajorentsi”.

<sup>14</sup> Aririka paapatziyawo nokantzimiri, rirotaki irira kimiwitariri Iri-iyashini ipokapaaki. Tema reewatakina Jowa.

<sup>15</sup> Iroñaka pikemperotakina pikempitakira.

Rootaki ikanteeyiririni maawaeni piyotawentari.

**16** Eejatzi ikanteeyirini riraga Jesoshi:

—Tee piyotzi iitarika pikoyiri pikemijanteri. Pikimitakari eentsipaeni jeekatsiri awotsiki, kantziriri paashinipaeni:

**17** “Nojonkawaetantawitari omaanta tee inimotakimi, tee piweshiryanaaka. Niraawitanaka, omaanta tee piraaga. Tee nomatziro niweshiryaa kayemi”.

**18** Ņaakiro, pikowawita ranteeyeronimi pinampijatzi oetarika pikowakaawitakariri. Piňaawitakari Jowa rametakawo tee rowa kameethatatsiri eejatzi rametakawo tee rirapiintziro shinchaaripaeni ikenkithashiryaa kotoari Tajorentsi. Roojatzi pikantashitari: “Oo, eenitatsi iyamaarite pinkakaakiriri, rootaki kaari rowaperotanta eejatzi kaari rrirantawo shinchaari”.

**19** Naaka poňaachari janta jenokinta, nokoňaatapaaki jaka kipatsikika. Nowa maawaeni eejatzi niriro shinchaari. Roojatzi pikantzmatakina: “Pamine sha, irinta owashitachari, shinkitachari. Itsipaminthatakari ayitakaeriri ayorikite eejatzi paashinipaeni kaari kameethatzinkari”. Omaanta nokantemi riyotzi Tajorentsi ari okameethataki maawaeni ikowakaakinari; eejatzi maawaeni aapatziyanaari, riyotaki okameethataki ikowakaakinari Pawa.

Rootaki ikantziriri.

*Jesoshi ikantakotziri jeekatsiri nampitskipaeni tsikarika itajonkantzi os-heki. Tema tee raapatziyari.*

(Rk. 10.13-16)

**20** Roojatzi riraga Jesoshi ikantakotziri jeekatsiri nampitsipaeni tsikarika itajonkantzi osheki. Iňaawitakari osheki rioripaeni omaanta tee ikenkithashiryaa, tee ikoyi ipakaero kaari kameethatatsi rantziri: tema itheenkakiri riraga Tajorentsi. Rootaki ikananteeyaririni:

**21** —Ashironkaamatsitemiini eerokapaeni korashiinijatzi, eejatzi eeroka wetheerajatzi. Powashironkaanakya maawaeni. Osheki piňaawitawakinota notajonkantzi, omaanta tee pikenkithashiryaa waka, tee paapatziyana. Iňaawakinami notajonkantzi riraga tziirojatzini paerani, eejatzi riraga shiroojatzini, ari ikenkithashiryaa naka yami, ipakaakiromi kaari kameethatatsi rantzirini paerani, raapatziyenami.

**22** Iinja aririka ikantakowenteri maawaeni Pawa, rowashironkayeri riraga tzirojatzini eejatzi riraga shiroojatzini, osheki tee ikameethatzini. Omaanta rowashironkaaperotemiroňa erori. Tema piňaakotawakinawo notajonkantzi omaanta tee paapatziyana.

**23** Eejatzi eerori kaperinawoojatzi, piitashiwitakawo piyotakiri Tajorentsi piyaatantyaari jenokinta, omaanta pitheenkawaetana, rootaki piyaatantyaari owashironkagaantsikinta, ari pikemaatsityaaworoňa paamari jaawiki. Iňaawakiromi riraga joroomajatzini maawaeni piňaawakiri erori, ari ikenkithashiryaa naka yami, eero ithonkirimi paerani Tajorentsi, roojatzi okantyaani irofiaaka inampi.

**24** Iinja eejatzi rowashironkayerini riraga Tajorentsi joroomajatzini, tee rameentari riraga Tajorentsi, omaanta rowashironkaaperotemiroňa erori kaperinawoojatzi, tee paapatziyana, omawitya piňaawitakinaga nota-jonkantzi.

Rootaki ikantziriri riraga Jesoshi.

*Pipokashiteena naaka, ari piňeero nomakoryaakaayiteemini*

(Rk. 10.21-22)

**25** Paashini kitejiri ikenkithatakaakiriri riraga Jesoshi Iriri, ikantziri:

—Noñaaperotzimi, Pawa, eeroka jewaperowentziriri maawaeni jantajenokinta eejatzi jaka kipatsikika. Eenitatsi kantashitcharipaen ikan-tashita: “Niyoperotzi naari”, omaanta pimanapithateeyakirini piyotantari. Ariwee. Omaanta piyotakaanteeyakirini paashinipaeni, riraga atziri kim-itariiri eentsipaeni: tema irirapaeni kaari kantakaaperotachari inta raap-atziyeeyimini.

<sup>26</sup> Pineshironkateeyakirini irirapaeni, pikowakaakiri riyote. Ariwee, pantziro pikoyiri.

<sup>27</sup> Rootaki ikantziriri ashitariri, roojatzi ikananteeeyakaririni piyotawen-teeyaririni:

—Rirotaki Pawa iyotakaakinari maawaeni, eejatzi riyoyaakina nopolinkathariwenante maawaeni. Tekatsi paashini atziri yotakoperotziriri Itomi: apatziro Pawa rirori riyoperotana. Eejatzi tekatsi yotakoperotziriri riraga Pawa, apatziro naari niyoperotakotziri. Eejatzi riyotziri rirori, riraga atziri niyoyaakiri niyotakaantyaariri.

<sup>28</sup> Eeroka maawaeni, aririka patsipetyaawo kameethatanakimi, aririka powashironkaeya, pameentena pikantena, aritaki nowawijaakotakimi ni-weshiryaa kayememi.

<sup>29</sup> Paapatziyena pikowakirika niyoteemi; tema naaka amatsinkakayemini eejatzi osheki noneshironkatantz. Eero nopolmeentsitawentzimi. Aririka paapatziyena, niweshiryaa kayememi.

<sup>30</sup> Pikowakirika naakarika piwinkatharite, eero nowashironkaantzimi, inta namitakotapiintemi. Pikowakirika naakarika piwinkatharite, eero opomeentsitzimotantzimi paapatziyena, tema nokimoshiryaa kayememi.

## 12

### *Ikenkithatakotakiri Jesoshi kitejiri amakoryaanteetari (Mr. 2.23-28; Rk. 6.1-5)*

<sup>1</sup> Paashiniki saawaro noyaateeyakirini Jesoshi janta pankiwaerentsi-mashikinta, maawaeni nokaateeyakirini riyotaanewopaeni. Rooteentsi ojampateeriko. Eejatzi ayimateeyakinani notashe janta, rootaki notzim-peyanteeyanakaworini nowaeyakawoni.

<sup>2</sup> Ifiaawakina warijeeyopaeni, roojatzi ikanantakari Jesoshi:

—Pamineriuuta piyotaanewopaeni. Iroñaaka kitejitsatsiri kaari antawaetantapiinta; iroñaaka tee okameethatz rowitantyaawori; tee ikemijantaper-otziri okaatzi ikantziri Tajorentsii.

<sup>3</sup> Rakanakirii:

—Tema tee piñaananeentziro Iwaperite Tajorentsii okenkithatakotakirini Iraviirini. Ayimatantawitakarini paerani itashe, eejatzi ayimatantaw-iteeyakaririni itashe maawaeni oyaatziriri.

<sup>4</sup> Roojatzi ikyantapaaka okaankiitzi ipankomawoki Tajorentsii. Eenitatsi jewatatsiri janta, riraga ñaanakowenantsatsiri. Ari ikantapaakiri: “Ayimataktina notashe”. Eeniyo ojeekaki paa janta rashii Tajorentsii. Tee ishineteetziro royaawo maawaeni joriyyopaeni, apatziro riraga ñaanakowenantsatsiripaeni rirotaki oyaawomi. Omaanta tee ikoyi rowashironkayeeri, rootaki ipantawakariri Iraviirini, eejatzi tsipatariripaeni. Rowaeyakawoni. Iroñaaka tee pikantzi: “Tee okameethatzি rantzirini Iraviirini”. ¿litaka pikantari: “Tee okameethatzি iroka rantziri piyotaanewopaeni?”

<sup>5</sup> Eejatzi piyotakiro rojankinatakirini paerani Moeseeshi: “Okaate 6 kitejiri pantawaete omaanta apaani kitejiri eero pantawaetantawo”. Maawaeni saawaroki tee antawaetapiintzi aakapaeni. Omaanta maawaeni

saawaroki riyaatapiintzi ñaanakowenantatsiri rantawaetapiintzi janta Tajorentsipankoki. Tee pikijantari, tema inimotakimi rantziri.

<sup>6</sup> Kyaaryo iroka nokantemiri: okaatzti niyotaantziri naari anaakoperotakiko oetarikapaeni riyotagaetziriri atziri janta Tajorentsipankoki.

<sup>7</sup> Ñaakiro, rojankinateetakini paerani: "Ikantzi Tajorentsii: 'Tee nokoyi apatziro powamashitapiintenari pipir, inta nokowakaaperotakimir paapatziyaperotena; nokowaki pineshironkantante kameetha maawaeni atziri'". Piyotakoperotakirorikami iroka ikantziri Tajorentsii, tema eeromi pikanatarimi irika owiitakirorika teriiko: "Tema eenitatsi kaari kameethatatsi pantziri".

<sup>8</sup> Nopoñaaka naaka jenokinta, nokoñaatapaaki jaka kipatsikika: tema naaka kantatsini oetarika anteri saawaroki.

Rootaki ikantziri Jesoshi.

*Itharyeeyanakanji Jesoshi ipiyotapiinanta joriyyopaeni retsiyatatakiri atziri kijopookitatsiri rako*

(Mr. 3.1-6; Rk. 6.6-11)

<sup>9</sup> Ikanta itharyaakagaeyanakinani riraga Jesoshi roojatzi ikyakaanteeyapaakinani pankotsiki apiyotantapiintarira aaka joriyyopaeni.

<sup>10</sup> Eenitatsi janta warijeeyopaeni eejatzi eenitatsi atziri kijopookitatsiri rako. Riraga warijeeyopaeni ikantawakiri riraga Jesoshi:

—¿Okameethatzima petsiyatakoteri atziri kitejitsiriki kaari rantawaetantapiinteetari?

Ikowaki retsiyatatakoteri Jesoshi atziri kitejiriki kaari rantawaetantapiinteetari, rootaki ikantakotashitantakariri jewayitatsiriniki ikante: "Rantawaetzi Jesoshi kitejitsiriki kaari rantawaetantapeetari, tee ikameethatzim irika".

<sup>11</sup> Rakanaki:

—Pamine, aririka ipariye powishate omookira kitejitsiriki kaari rantawaetantapeetari, ¿eeroma pagaaetziri pariyawiteenchari omooki?

<sup>12</sup> Tema ranaakotziri atziri owisha, ikameethaperotaki. Okameethatzin aneshironkateri atziri kitejitsiriki kaari rantawaetantapeetari.

<sup>13</sup> Roojatzi ikanantawakari riraga kijopookitatsiri rako:

—Powankaero pako.

Roojatzi rowankantanakawo, kameethatanee rako, omonkaatanaawo paashini rako.

<sup>14</sup> Ikanta warijeeyopaeni ikijeeyanakanji, riyatanaki rajaryagaeyanakarini, ikantzi:

—¿Tsika akanterika owamaakaanantyaariri Jesoshi?

*Rowaga Iwaperite Tajorentsi okenkithatakotzitakari Jesoshi*

(Mr. 3.7-12; Rk. 6.17-19)

<sup>15</sup> Riyotakotanaka riraga Jesoshi ikowatzi warijeeyopaeni rowamaakaanteri, rootaki ishitowapithantanakariri, rowaagakaantanakinari, royaateyakinani osheki atziri. Ikanta Jesoshi retsiyatatakiri oshekini mantsiyatzinkari, maawaeni pokashitziriri.

<sup>16</sup> Roojatzi ikanteeyantakaririni:

—Eerowa pikamantziri paashinipaeni: "Retsiyatakotakaakina Jesoshi".

<sup>17</sup> Imonkaatakiro Jesoshi maawaeni rojankinatakotzitakarini paerani Isseeyashi. Ikantzitakarini Tajorentsii:

<sup>18</sup> “Pamine sha! Iraka notyaantanewoka. Nokowakaakiri rantenawo maawaeni oetarika nokowakaakiriri. Osheki nonintaperotziri, osheki noñaaperotziri ikameethatzim. Notyaanteniri noshire, okithaatakayaari, amitakopiinteri. Ikanteri paashinijatzitsirii

atziri, raapatziyeena, nookirikari paamariki kaari tsiwakanitatsini, rowaga kitejitsatsiri iinja nokantakowenterini maawaeni atziri ikameethatzirika.

<sup>19</sup> Eero ipiyawaantetanta, eero ishintsitziro ipaante. Eero akemiri icherayi.

<sup>20</sup> Eero rowashironkaeri owashiretachari. Eero ramatawitziri kowatsiri riyotena. Ikantyaani ineshironkatante, roojatzi kitejitsatsiri iinja nokantakowenantyaaririni maawaeni atziri.

<sup>21</sup> Rirotaki owawijaakoteerini paashinijatzitsatsiri atziri, tektsi paashini owawijaakoteerini". Rootaki maawaeni aapatziyariri raamaantakariri rirori.

Rootaki ikantakirini Tajorentsi paerani.

*Riraga warijeeyopaeni ikantzimateeyakironi Ishire Tajorentsi  
(Mr. 3.20-30; Rk. 11.14-23)*

<sup>22</sup> Ikanta ramaetakiniri Jesoshi kyaanttariri kamaari. Tee imateeya iñee, eejatzi tee iñaawaetzti. Roojatzi rowawijaakotantawakari: iñaakagaeri eejatzi iñaawaetakagaeri.

<sup>23</sup> Ari rotsikanateeyanakarini maawaeni ñaakoeyakiririni ikantawakaeyananakani:

—¿Riotakima irika Owawijaakotanteentsirika aamagaeyakarini riraga icharineeteni Iraviirini?

<sup>24</sup> Omaanta riraga warijeeyopaeni ikantawakaaka:

—Rirotaki Wereshewoo, riraga iwinkatharite kamaaripaeni amitakotakiriri imatantakariri rotyaantakiri iyamaarite.

<sup>25</sup> Omaanta Jesoshi riyotakotakiriri okaatzi ikenkithashireeyakirini rootaki ikantanakariri:

—Aririkami romanatawakaeyaami atziripaeni kipatsikitzirika tema ari ithonkawakagaeyakaanimi. Eejatzi okimita riraga jeekatsiripaeni nampitsiki aririka rantawakaakya, rinteenaryaawakaeyanakyaanimi eero kijokiro rowawakaanami rookawakaanakya, itsiparyaawakaanakya.

<sup>26</sup> Pamine, aririkami ramitakotenami Jatanaashi notyaanteri iyamaarite, tema ari ithonkaeyawakaakyaanimi.

<sup>27</sup> Eejatzi pikantzi eero ka rirotaki Wereshewoo riorikami amitakotenanimi notyaantziri kamaari, nojampitemi eerori, ¿rirojatzima eejatzi kamaari amitakotziriri pisheninkapaeni eerori rotyaanantariri kamaari? Kaari-wee. Pojampiteri piyotaanewopaaeni riro kantemini okaatzika pikantakiri kameethatakirika.

<sup>28</sup> Omaanta rootakirika Ishire Tajorentsi amitakotanari notyaanan-takariri kamaari, tema rootaki piyotantyaarimi monkaataka kitejiri ikowantawitari Tajorentsi ipinkathariwenteeyemimini pajankaneki.

<sup>29</sup> Eenitatsirika kowatsiri ikoshiteri shintsiperotatsiri, rooma rityaawo roteyiri, shepik, ranaakoteri roojoteri. Impaetzti ikoshiteri rowaagawo, eero imatziro ipiyawakari ashitawitawori rowaagawo. Eejatzi ikimitaka, Jatanaashi ikimiwitakari shintsitsatsiri, omaanta otajonkakina roori Ishire Tajorentsi, nanaakotziri rirori, nomatantawori notyaanteri iyamaarite.

<sup>30</sup> Riraga kaari aapatziyana rirotaki kijantanariri. Eejatzi okimiwitira iroka maawaeni kaari amitakotana niyotaakoteri Tajorentsi, ari riyotaakiri atziri kaari raapatziyantyaari rirori.

<sup>31-32</sup> Eejatzi ikantakiriki Jesoshi riraga warijeeyopaeni:

—Rootaki nokamantemiri: “Kyaaryoowa, pitheenkimatzirokaria Ishire Tajorentsi. Riraga Tajorentsi ineshironkatziri maawaeni kaari kameethatakatcha, eejatzi maawaeni kantzimatawitariri eero ikijantari rantziri aririka raapatziyeeyari. Eejatzi ineshironkatziri Pawa

maawaeni kantzimatawitanari. Omaanta eero ineshironkatziri riraga kantzimatakirori Ishire. Eero ineshironkatziri iroñaaka eejatzi iinja, inta rowashironkaeri kameetha”.

<sup>33</sup> Rooma inchato kameethari okithokitanaki kameetha okithoki. Rooma teerika okameethatzi inchato, tee okithokitziro okithoki kameethari. Piñeerorika okithoki okameethataki piyotanakiro roori owaato kameethataki. Eejatzi nokimita naari, aririka nantero kameethatatsiri, tema kameethatakina, omaanta aririkami nanteromi kaari kameethatatsi ero nokameethatzimi. Iñaanteeri atziri okaatzi antziri riyotanteeri akameethatzirika, rooma teerika akameethatzi.

<sup>34</sup> Amatawitantanirori eerori maawaeni, poshiyakari maanki. Osheki pitheeya. Teksti pikantya piyotaante kameetha. Tee okameethatzi pikenkithashiryaaari pajankaneeki, rootaki kaari okameethatanta pikantziri.

<sup>35</sup> Riraga kameethatatsiri atziri ikenkithashiryaaapiintawo kameethatatsiri, rootaki okameethatantari rantziri. Rooma riraga kaari kameethatzinkari ikenkithashiryaaapiintawo rantero kaari kameethatatsi, rootaki kaari okameethatanta rantziri.

<sup>36</sup> Pamine, oetarika pikantziri jaka jaawikika riyotaki Tajorentsi. Iinja kitejitsirori othonkantapaakyaaarin kipatsi, arimache ikantakowenteeyemini: ikenkithashiryaaakayemiro maawaeni tee okameethatzi pikantziri iroñaaka.

<sup>37</sup> Okameethatzirika pikantziri, aritaki iñaaperotemi pikameethatzi, omaanta teerika okameethatzi pikantzi, ikantemi: “Eenitatsi kaari kameethatatsi pantziri, tema tee paapatziyana kameetha. Rootaki piyaatantyaari paamariki kaari tsiwakanitatsini, osheki pikemaatsityaawo”.

Rootaki ikantakiriri riraga Jesoshi warijeyopaeni.

*Riraga theenkantsiri ikowakowitakari Jesoshi itajonkantemi  
(Rk. 11.29-32)*

<sup>38</sup> Roojatzi ikanantawitanakari warijeyopaeni eejatzi iyotaantayitzirorini Iwaperite Tajorentsi:

—Iyotaanari, nokowaki noñeemi pitajonkero oetarikapaeni, niyotantemiri erokarika riraga Owawijaakotantatsiri.

<sup>39</sup> Ikantawakiriri riraga Jesoshi:

—Tee pikameethateeyini, osheki pitheenkakiri Tajorentsi, rootaki pikanantawitakinari. Eero noñaayimiro notajonkantzi. Omaanta apatziro nokenkithashiryaaakagaemiri rantakiri paeraniperoroña Jonaashini riraga kamanantzirorini iñaani Tajorentsi. Pikenkithashiryaaakotatyeyeromi tema ari paapatziyakinami.

<sup>40</sup> Paerani iniyakirini antari omanni, okaatagi 3 kitejiri ijekaki isheetomawokinta inthomaenta. Eejatzi nokimitya naari paata, okaate 3 kitejiri nojeeki inthomaenta omooki kipatsi.

<sup>41</sup> Aririka ipiriinte niniweejatzi ikantakowenteeyakimironi oetarika pantziri. Iinja Tajorentsi, ikantemi: “Eenitatsi kaari kameethatatsi pantakiri eerori”. Paerani riraga niniweejatzini raapatziyawakarini Jonaashi ikenkithatakotantariri Tajorentsi. Iroñaaka eeroka, piñeeyawitakinani naari. Tema osheki nanaakoperotakirini riraga Jonaashini, omaanta tee paapatziyawakina.

<sup>42</sup> Kyaaryo ikantakoeyemini eerori iinja riraga Tajorentsi: “Eenitatsi panteeeyakirini kaari kameethatatsi”. Paerani iwinkathawoten i sheewajatzinipaeni okemakotantakaririni Sharamoo riyothanitzi osheki, rootaki opokashitantakariri okemijanteri. Atsipewentakari opoñaanaka inteenaa.

Omaanta naaka nanaakoperotakiri rirori. Piñeeyawitakinani omaanta tee paapatziyeeyanani.

<sup>43</sup> Eejatzi noshiyakaawentemiro: aririka apaani atziri rookaeri kamaari ikinanaki janta opiryaaapathatzinta ikowakowatzi tsika imakoryaantyaari. Omaanta tee iñi imakoryaantyaari.

<sup>44</sup> Roojatzi ikantzi: "Nopiyetaa noipoñaakanta ishireki shirampari". Roojatzi ipiyantaa, iñaapaatziiri shirampari ikimiwitakawo pankotsi pishiyyaka tekatsi jeekantyaarini. Tema tee raapatziyaperotari Tajorentsi. Rootaki ikyaanantapaariri kamaari.

<sup>45</sup> Roojatzi riyaatantanaka raakitziri paashini kamaari, ikaatzi 7. Maperori osheki tee ikameethatzi. Ikantakiri: "Thame aate ajeekaeyini nojeekira chapinki". Irika atzirika paerani rowashironkaawitakani eechonkiini. Omaanta iroñaaaka rapiiteerira imaperotakiri, osheki rowashironkaaperotanakya. Eejatzi pikimiteeyakanri iroñaaaka tee pikameethatzi, rootaki osheki powashironkaanteeyaanri inja.

Rootaki ikanteeyakiririni riraga Jesoshi.

*Irira Jesoshi isheninkatakari maawaeni aapatziyariri  
(Mr. 3.31-35; Rk. 8.19-21)*

<sup>46</sup> Eneniro ikenkithawaetakagaeyananri riraga Jesoshi naakapaenii maawaenii piyotawentakariri, okantaka riniro areetapaaka eejatzi rirentzipaenii, ikatziyeeyapaakanri janta inkokironta. Tema okowaki okenkithatakayeri.

<sup>47</sup> Enitatsi kamantakiriri:

—Areetapaaka piniro eejatzi parentzipaenii, okowapaakimi. Okowaki okenkithawaetakaemi.

<sup>48</sup> Omaanta ikantawakiri:

—¿Ninkama nanatatsiri? ¿Ninkama yeeyitatsiripaenii?

<sup>49</sup> Roojatzi rookotanteeyakanakarini riyotaanewopaenii ikantanakiri:

—Irika niyotaanewopaenii, sha, nokashiyakaakari rirotaki yeeyipaenii, eejatzi noñakiro kimitaka nana.

<sup>50</sup> Rirotaki nonampijatziperoeyakanri maawaenii antziniriri Pawa jenokinta ikowakaakiriri; rirotaki nokanteeyirini yeeyi, choeni, eejatzi nana.

## 13

*Roshiyakaawentakiri irira Jesoshi pankiwaetatsiri  
(Mr. 4.1-20; Rk. 8.4-8)*

<sup>1</sup> Roojatzi riywantanaka riraga Jesoshi pankotsiki jataki inkaareki. Ari ijeekapaaki.

<sup>2</sup> Eejatzi ipiyotawentakari oshekini atziri. Iñaapaakiro rirori pitotsi othatako othapyakiinira, roojatzi rotetantapaaka, ijeekapaaki. Ari ikatziyeeyapaakanri piyotawentariipaenii impanekiiteki.

<sup>3</sup> Roojatzi osheki ikenkithatakagaeyakinani. Roshiyakaawentakinari pankiwaetatsiri, ikantzi:

—Riyaatzi pankiwaetatsiri rookayitzironi okithoki teriiko rowanekei.

<sup>4</sup> Pariyagaantapaentsiri apaanipaenii okithoki awotsiki ikantaka konthawo ipokapaaki rowapaakawo.

<sup>5</sup> Paashini apaanipaenii okithoki opariyagaantapaaki mapipookiki. Tekatisperowa kipatsi: eechonkiini janta. Intsipaete oshookawitanaka. Eejatzi intspaaete antawotapaaki.

<sup>6</sup> Ishintsiityaapaaki oorya intspaaete ojampiyanaki. Roojatzi okamantaka, tema tekatsi osheki operitha.

<sup>7</sup> Paashini okithoki pariyapaentsiri kitocheemashiki. Oshookawitanaka pankirentsi anaanakiro kitochee roojatz si okamantanaka.

<sup>8</sup> Paashinipaeni okithoki opariyapaaki kipatsiperoki kameethari. Oshookanaki, okithokitanaki. Apaanipaeni okithokitanaki okaatzi 30. Paashinipaeni okithokitanaki okaatzi 60. Eejatzi paashinipaeni okithokiperotanaki okaatzi 100.

<sup>9</sup> Eenitatsirika pikempita pikemantari, aritaki powakempitayawo nokantakimiri.

*Riyotakiri Jesoshi riyotaanewopaeni roshiyakaawentziniriri  
(Mr. 4.10-12; Rk. 8.9-10)*

<sup>10</sup> Notsipatanakari paashinipaeni riyotaanewo nojampitapaakiri riraga Jesoshi:

—*litaka poshiyakaawenantakariri paashinipaeni?* Tee imateeyironi riyotakotziro oeta pikantawitariri.

<sup>11</sup> Ikantawakina:

—Ishinetzimi Tajorentsi piyotakotero kaari riyotzi paashinipaeni. Ikwaki piyote tsika ikanta rirori ipinkathariwenantzi. Omaanta tee ikoyi riraga paashinipaeni riyotakotero tsika ikanta reewawenantzi.

<sup>12</sup> Eenirorika yowitachari ikoyirika riyoperote, aritaki niyotakaperotakiri. Omaantakya paashinipaeni kaari kowatsini riyote, rootaki kaari riyotantyaari. Eero niyoteeri eejatzi ari nopeyapithatakiri riyowitari ee-chonkiini.

<sup>13</sup> Rootaki noshiyakaawenantakanariri riroripaeni, rooma tee ikoyi riyote. Ramineeyawityaani omaanta riyotakoeyironi iñeyawitakarini. Ike-maeyawityaani nokantziri omaanta tee riyotakotawakiro nokantawitariri.

<sup>14</sup> Omaanta imonkaatapaakiro ikenkithatakotzitakarini paerani Iseeyashi, ikantakotzitakarini:

“Pikemaeyawityaani omaanta eero piyotakotawakiro okantakotziri. Pamineeyawityaani omaanta eero pikenkithashiryakoeyawoni piñeyawitakarini.

<sup>15</sup> Tee pikoyi piyote, rootaki kaari pikenkithashiryaaantawaka. Tee pikoyi pikemi, rootaki piwitantawakawori pikempita. Tee pikoyi paminaperote, rootaki pimachookantawakari. Aririkami pikowakimi piyotemi aritaki pikemawakiromi, eejatzi piñaakimi eejatzi piyotakotenami pajankanekira. Rooma tee pikoyi paapatziyana nowawijaakotantemiri”. Rootaki ikenkithatakotakiririni paerani Iseeyashi.

<sup>16</sup> Omaanta eerori amineeyeemini, pikokichaantawo poki rootaki paap-atziyantakinari, tema rootaki pikimoshireeyantarini.

<sup>17</sup> Kyaaryo, ikowaeyawitakani paerani maawaeni kamanantayitzirorini iñaani Tajorentsi eejatzi maawaeni kameethatzinkarini iñeeyeronimi iroka piñaakirika iroñaaka eerokapaeni. Ikowaeyawitakani ikemaeyenanimi okim-itaka iroñaaka eeroka pikemanari. Omaanta tee iñeyanan, tee ike-maeyanan.

Rootaki ikanteeyakinanri Jesoshi.

*Riraga Jesoshi riyotagaeyakirini riyotaanewo oetarika kantakotachari  
(Mr. 4.13-20; Rk. 8.11-15)*

<sup>18</sup> Roojatz si ikanteeyantakinanri riraga Jesoshi:

—Iroñaaka niyotagaeyemironi oeta okantakotziri noshiyakaawentakimiri inkaaganki.

<sup>19</sup> Arimachee nokantapiintziri paashinipaeni tsika ikanta Tajorentsi reewawenantzi, omaanta teerika ikemiro rirori, ikimiwitawo awotsi tsikarika opariyagaantapaaki apaanipaeni okithoki. Ikanta ipokapaaki

konthawo rowapaakawo okithoki awotsiki, ari oshiyawori ipoki kamaari raapithatakiri rajankaneki ikenkithashiryaawitawakawo nokantziri.

<sup>20-21</sup> Rooma mapipooki opariyapaakira paashini okithoki oshiyakaawentakiri atziri kemawitawakawori noñaani omaanta ariwitanaka owakiran ikimoshirewentanakiro. Omaanta tekiraata riyotakoperotziro kameetha noñaani opomeentsitzimotakari oetarikapaeni, ikijaneentayitanakirini atziripaeni roojatzi ipakaantanaawo raapatziyawitawo noñaani.

<sup>22</sup> Kitocheemashiki opariyantapaakari paashini okithoki oshiyakaawentakiri atziri kemawitawakawori noñaani omaanta osheki ikenkithashiryaaperotakawo oetarikapaeni jeekatsiri jika kipatsiki eejatzi riweshiryaawentashitakawo rowaagawo. Rootaki kaari ikenkithashiryaantawo nokantawitariri. Tee raapatziyana kameetha.

<sup>23</sup> Kipatsipatha kameethari opariyantapaakari paashinipaeni okithoki oshiyakaawentakiri atziri kemaperotawakirori noñaani raaperotawakiro kameetha okaatzti okantziri. Raapatziyaperotanakawo. Raapatziyakaanakari paashinipaeni atziri oshekiperotanaki iroñaaka iyemijantzinkaritepaeni. Apaanipaeni raapatziyakaakari 30 atziri, paashinipaeni raapatziyakaakari 60, eejatzi paashinipaeni raapatziyakaakari 100.

Rootaki ikantakinari.

### *Roshiyakaaventziriri Jesoshi teriikopero eejatzi oshiyawitawori teriiko*

<sup>24</sup> Eejatzi paashini roshiyakaawentakina riraga Jesoshi, ikantzi:

—Aritaki ikantari Tajorentsi ipinkathariwenantzi, reentsitetari atziripaeni. Ikmikitakari pankitzirori okithoki teriiko. Riyoshiiwitakawo ipankitakiro kameethari okithoki.

<sup>25</sup> Ikantaka tsiteniriki imaanaki, eejatzi ratziritepaeni. Ikantaka ipokaapaki kijapaakiriri ramakiro okithoki oshiyawitawori teriiko omaanta kaari owaetawo. Ipankitapaakiniri janta rowanekinta, itsipataapaakiro teriiko. Roojatzi ryaatantanaa ithonkanakirowa ipankitanakiniri.

<sup>26</sup> Okanta oshookanaki teriiko, okithokitanaki. Eejatzi oshookitanaka roori oshiyawitawori teriiko. Ari ojatzinkanakawo.

<sup>27</sup> Ifñaawakiro ratziritepaeni oshookanaki, roojatzi ryaatashitantanakari ashitarowi irinta, ikantapaakiri: “Tema otsiyakotanaki okithokipaeni rooperori pipankitakiri janta powaneki. Omaanta ɿitakakya oshookantateetanakari oshiyawitawori teriiko?”

<sup>28</sup> Ikantawakiri: “Riotakirika pankitakirori kijanari”. Roojatzi ikantapaakiri: “ɿPikowakima niyaate iroñaaka nothokakitero oshiyawitawori teriiko?”

<sup>29</sup> Ikantanakiri: “Eero. Aririka pithokawitakyaawo ari pithokakotakiro roori teriikopero”.

<sup>30</sup> Ari okaantawakaata. Otsipatawakyaawoota oshooki. Iinjakya aminawakiroota ojampatawakiita owiitantlyawori. Roojatzikya nokanteeyemini: “Pithokero oshiyaaawitawori teriiko, otayaata janta paamariki. Eekiro pimpaatanakiro powiitanakiro teriikopero. Pikempoyeenawo janta nokempoyaapiintzironta”.

Rootaki roshiyakaawentakinari riraga Jesoshi.

### *Roshiyakaawentakinawo irira Jesoshi okithoki moshitaaja (Mr. 4.30-32; Rk. 13.18-19)*

<sup>31</sup> Eejatzi paashini roshiyakaawenteeyakinawoni riraga Jesoshi, ikantzi:

—Aritaki ikanta Tajorentsi ipinkathariwenantzi, roshiyawitakawo okithoki moshitajaaj\* ipankiitziri owantsiki.

**32** Okaatzini okithoki naawita omaanta oshookanakirika, antawotanaki. Anaakotanakiro paashinipaeni pankirentsi aritaki raampeyantayitakyaawoni tsimeripaeni jenokiweripaeni eejatzi ari imaashitantakyaawo. Kimitaka iroka iroñaaka eenitatsi apaanipaeni aapatziyaniari ipinkathatziri Tajorentsi. Omaanta eekiro, eekiro ayotakaeri paashinipaeni raapatziyari riori roojatzi iinja ari roshiektero aapatziyaniari.

*Roshiyakaawentakiro irira Jesoshi tapiyakawori paa  
(Rk. 13,20-21)*

**33** Eejatzi paashini roshiyakaawentanari, ikantzi:

—Aritaki ikantari riлага Tajorentsi reewawenantzi eekiro eekiro riyoteeri maawaeni ikowakaakiriri. Roshiyakawo tsinani owetsikiro paa. Aakiro os-heki opane teriiko, eejatzi otsipataakiro eechonkiini tapiyakaawori eejatzi eechonkiini iñaa. Roojatzi otapiyantanakya maawaeni.

**34** Aritaki ikantapiintatyani roshiyakaawentapiinteyakinirini maawaeni piyotawentakariri. Tee riyotaaperoneentziri kameetha iñaanai, inta roshiyakaawentashitanari iñaanai.

**35** Imonkaatakiro rojankinatzitakarini paerani kamanantzirorini iñaanai Tajorentsi:  
“Ikantzi riлага Tajorentsi: ‘Osheki noshiyakaawenteeyenirini atziripaeni nokamanteeyerini kaari riyoteeyawityaani riori paerani, tema omanimotawitakari’ ”.

*Oeta okantakotzi oshiyawitawori teriiko eejatzi teriikopero*

**36** Roojatzi riwethatantanaari riлага Jesoshi piyotawentakaripaeni.

Roojatzi ryaatantaa riori janta pankotsiki. Naaka maawaeni riyotaanewo noyaatanakiri. Nokantziri:

—Piyotaaperotenawo poshiyakaawentakiniriri maawaeni piyotawenz-imiri inkaaganki. ¿Oetaka oshiyakawori oshiyawitawori teriiko ipankiitziri teriikomashiki?

**37** Ikantanakina:

—Arimache nopoñaanaka naaka jenokinta, natziriperotapaaki jaka kipatsikika. Naaka kimiwitawori ipankiitziri teriiko kameethari. Naapatziyaka-gaeyakarini atziripaeni raapatziyari Tajorentsi.

**38** Rowaga owantsitsirsri rootaki kantakotachari maawaeni kipatsika ajeekantarika. Rowaga teriikopero oshiyakaawentakiri maawaeni reentsite Tajorentsi. Omaanta oshiyawitawori teriiko oshiyakaawentakiri oyaatziriri iwinkatharite kamaari.

**39** Riraga kijantatsirsri pankitakirori oshiyawitawori teriiko rirotaki iwinkatharite kamaaripaeni. Rowaga owiitachari okithoki oshiyakaawentakiro kipatsi othonkaeyarika iinja, ikantakowenantyaariri Tajorentsi maawaeni atziri okaatzি rantziri. Riraga owiitzirori pankiwaerentsi okantakotziri ronampiripaeni Tajorentsi.

**40** Ñaakiro, ipiyotakaantakiro oshiyawitawori teriiko itaantyaawori. Ari okimitya iinja areetapaakyra nokantakowenantyaariri atziri okaatzি rantziri.

**41** Notyaanteeyirini oshekini nonampiripaeni, ipiyotantyaaririni maawaeni kaari kameethatzinkari, eejatzi maawaeni antakayiriri paashini atziri kaari kameethatatsi,

---

\* **13:31** Iroka moshitajaaj rootaki okithoki owaanini pankirentsi, shookatsrisri inampiki paashinijatzitsirsri atziri.

<sup>42</sup> roojatzi nookakaanterini janta paamarikinta kaari tsiwakanitatsini. Osheki rowashironkagaeya janta, osheki ikemaatsityaawo paamari.

<sup>43</sup> Ikimoshiretakaaperoteri Pawa maawaeni kameethatzinkari, rajankaneki, irirapaen'i ari ishipakiryaanaki ikimitanakyaari oorya; itsipyaari riori janta ipankoperokinta. Powakempitaperotawakyaaworika nokantakimirika ari paawakiro.

### *Ikenkithatakotziri Jesoshi koriki imaneetziri*

<sup>44</sup> Aritaki ikantari riraga Tajorentsi ipinkathariwenantzti, reentsityaaririka atziripaeni. Ikimitakari shirampari ñaakiriri oshekini koriki imaneetziri kipatsikira. Osheki ikowakotakiri rootaki ikenkithashiryaantanakari: “Namananteroota kipatsi naakotantyaariri koriki”. Ityaawentakotaneeri jatanaki ipimanteyakironi rashitayitarini ramanantakotantyaariri kipatsi ijeekakira koriki. Roojatzi ramananantakawo kipatsi. Ikimoshirewentanakiri osheki iyorikite riraga amanantakirorira.

### *Roshiyakaawentakiro Jesoshi poreryaanikitatsiri mapi*

<sup>45</sup> Eejatzi ikantari riraga Tajorentsi reewawenantzti, reentsitetari kowatsiri raapatziyaari. Irintakya ikimitakari kowatsiri ramanantero poreryaanikitatsiri mapi kitamaari, pinaperotachari.

<sup>46</sup> Ifñaawakiro apaani okameethaperotaki, opinaperotaka. Ikowaperotakiro, rootaki ipimanantawori maawaeni tzimimotziriri raantariri koriki. Roojatzi ithonkakiri iyorikite ramananantakawori rowaga poreryaanikitatsiri mapi kitamaari, pinaperotachari.

### *Ikenkithatakotziro irira Jesoshi tsikarika ikanta shiryaatatsiri*

<sup>47</sup> Rapiitakiro riraga Jesoshi roshiyakaawentakinari tsika ikantari Tajorentsi reewawenante, ikantakina:

—Aririka reewawenante riraga Tajorentsi, ari ikimitari shiryaatatsiri, rowiinkakiro ishiryaamento niyanxyaani inkaareki roojatzi inoshikakotakira raaki osheki shima inashitzinkaripaeni rotetakiri pitotsikira.

<sup>48</sup> Ojamanitanaki aririka riyeekitanaki pitotsikira roojatzi ipokanta oth-appyakiini. Riyoyaawaetapaaki kameethatatsiri rotetakiri kantziriki. Riraga kaari kameethatatsiri rookayitakirini.

<sup>49</sup> Aritaki okimiteeya iinja aririka nopalae jaka kipatsikika notyaanterika nonampiripaeni, ipokapaaki jaka jaawikika riyoyaayitapaakirini ikaatzi kameethatzinkari rajankaneki, omaanta riraga kaari kameethatatsi rajankaneki, rinashitapaakyaari riori

<sup>50</sup> rookaeyirini janta paamarikinta kaari tsiwakanitatsini. Ari ri-raakoeyaani eejatzi ratsikaekitya antawaete riori: ikemaatsiteeyaaawoni katsiri.

<sup>51</sup> ḡPikemaperotakiroma nokantakimir?

Nokanteeyakirini:

—Jee, nokemakimi.

<sup>52</sup> Roojatzi ikanteeyanan:

—Aririka ikemijantena riraga iyotaantzirori Iwaperite Tajorentsi, riyotanakiro osheki. Tema iroñaaaka riyotziro maawaeni rojankinateet-zirini paerani, eejatzi raapatziyanarika, riyotziro owakiratatsiri niyoteeriri iroñaaaka. Riyotanakiro tsikarika ikantari riraga Tajorentsi reewawenantzti.

Okimitaka, riyotziri koetyeemotziriri ratziritepaeni irintapaeni ashaagan-tachari kameethari, roojatzi ipantariri apaanipaeni itaworitatsiri rowaa-gawo eejatzi apaanipaeni owakiratatsiri rowaagawo, oetarika koetyeemo-tarri. Eejatzi okimitaka iroñaaka eerori, kameetha piyotagaeri paashini-paeni itakaantaworini Iwaperiteki Tajorentsi eejatzi piyoteetyaari owaki-rari niyotaakimirika iroñaaka.

*Ipiyanaa Jesoshi Najareeteki  
(Mr. 6.1-6; Rk. 4.16-30)*

53 Ari okaatapaaki roshiyakaawentakinari riraga Jesoshi, thonkapaaka, roojatzi riyaatantanaa.

54 Iroñaaka ipiyanaa riraga Jesoshi janta iipatsiteki ipoñaakanta. Noy-aateeyanakirini naaka. Roojatzi riyotaantapaakari janta pankotsiki ipiy-otantapiintarira joriyopaeni. Ari rotsikanateeyanakarini maawaeni ke-mawakiriri, ikanteeyanakirini:

—¿litakacya iyotaakiriri riyothanitantakari? ¿Ninkakya matakaakiririka itajonkantzi?

55 Tema rirotaki itomini riraga wetsikirori jeekamentotsipaeni. Paminerotya rinirowa Mariiya. Pamineritya rirentzipaeni Jantyaako, Josee, Shimo eejatzi Joorashi.

56 Eejatzi akaateeyakironi ritsiroopaeni jaka. ¿Tsika opoñaaka maawaeni iroka riyothanitantari?

57 Rootaki itheenkantakariri riraga Jesoshi, ikantzimatzi, rootaki ikanantakariri irira:

—Atziripaeni iñeeririka paashinijatzi kamanantzirori Iwaperite Tajorentsi kameetha raapatziyaperotawakyaari. Riroma rirorika jeekariko inampiki ikamanantawityaaworika Iwaperite Tajorentsi eero ikowaperotzi raap-atziyaperotyaari, inta itheenkiri rirori.

58 Osheki itheenkaeyakirini ikaateeyini ijeki. Tee raapatziyaperoeyarini rootaki kaari osheki itajonkananta janta.

## 14

*Riraga Erooreshi rowamaakaantakiri Jowa. Roojatzi iitakaawitakari Je-soshi rirotaki Jowani piriintachari  
(Mr. 6.14-29; Rk. 3.19-20; 9.7-9)*

1 Apaani kitejiri ikemakotawakiri Jesoshi riraga Erooreshi. Tema irira rirotaki pinkathariwenziriri maawaeni karireeyajatzi iroñaaka.

2 Ikemakotantawakariri, ikanteeyanakirini ronampiripaeni: “Aamaaka rirotaki Jesoshitatsiri riraga Jowa kaawoshitakotziriri Tajorentsi. Nowa-maakaantawitakari omaanta aamaaka piriintarika añagae eejatzi, rootaki imatantakawori itajonkantapae iroñaaka”.

3-4 Chapinki riraga Erooreshi raapithatakiri rirentzi Jiripi iina, oetachari Eroriyyashi. Roojatzi ikanantakari riraga Jowa kaawoshitakontatsiri Tajorentsi:

—Tee okameethatzi okaatzi pantakiri. Rootaki raakaanantanakariri Jowa romonkyakaantakiri omonkyagamentotsiki. Roojatzi roojotakaantakiri karenathaki.

5 Chapinki ikowawitaka rowamaakaanterimi, omaanta ithaawan-takari atziripaeni. Osheki raapatziyeyakarini Jowa, tema ikenkithashiryakotziri rirotaki kamanantzirori iñaani Tajorentsi rootaki ikenkithashiryantakanakari riraga Erooreshi: “Aririka nowamaakaantakiri ari ikijakowentakyaari atziripaeni”. Rootaki ithaawantakari rowamaakaanterimi chapinki.

**6** Roojatzi omonkaatantaka kitejitalsiri paerani ikoñaatantapaakari riraga Erooreshi. Ipiyotawentari oshekini inampijatzi ikimoshirewentziri, ishinkitawetaa. Eejatzi okantaka opirantakotziri ishinto Eroriiyashi, osheki iñaawenaperotakawo,

**7** rootaki ikanantakawori:

—Oetarika pikowakotenari, aritaki nopakimiro. Riyotzi Tajorentsi, eero namatawitzimi.

Roojatzi iyaatashitantanakawori ojampitantawori iniro.

**8** Okantawakiro ishinto:

—Pikanteri rowamaakaanteri riraga Jowa.

Roojatzi okanantakariri roori:

—Nokowaki powamaakaanteri riraga Jowa, pipakotenawo piratoki iitoni, iyontyaari nana kyaaryo kamaperotaki.

**9** Roojatzi rowashiretantanaka rirori tee ikowawita rowamaakaanterimi omaanta inkaaganki ikemaeyawakirini maawaeni atziripaeni okaatzi ikan-takiri. Tekatsi ikantaneeya roepiyaneero.

**10** Rootaki ithatyakaakanantakariri iitoki riraga Jowa.

**11** Roojatzi ramanteetakawo iitoni thatyaaka. Aawakiro, roojatzi aan-takanawori iniro.

**12** Ikantaka riraga riyotaanewoni roojatzi ipokantapaaka raanakiro iwatha ikitatakiro. Roojatzi riyaatashitantanakari riraga Jesoshi ikamanta-paakiri:

—Rowamagaetakirirakya Jova.

**13** Ikemantawakari rirori kamaki irira, roojatzi riyaatantanaka apaniroeni janta tekatsinta atziri. Itsipateeyanakinan.

### *Rowakaakari Jesoshi 5000 shirampari*

(Mr. 6.30-44; Rk. 9.10-17; Jowa 6.1-14)

Itenteeyanakinan, rootaki nokinantakoeyanakarini pitotsi. Omaanta ikemakotakiri oshekini atziri, ipoñeyanakani nampsikipaeni, ikinanaki onomateeteki iñaa, royaatakina.

**14** Roojatzi naatakoeyantapaakani, notonkagaeyanakini kipatsiki. Eejatzi noñaapaakiri oshekini oyaakiriri Jesoshi. Osheki retakoshiryapaakari irira maawaeni, retsiyatkoeyakirini mantsiyatzinkaripaeni.

**15** Tsiteniityaaki oorya. Nokaateeyakirini paashini riyotaanewo Jesoshi, nokanteeyawitakarini:

—Pamine, tekatsi atziri ipanko jaka, rooteentsi otsitenite. Potyaanteri atziripaeni riyaateeyini pankotsikipaeni ramananteeta royaari.

**16** Ikantawakina:

—Eero, ¿litaka ratsipetashitanyaari riyaate? Piperi eerori royaari.

**17** Nokantanakiri:

—O, tekatsi noperiri. Paminetya sha, tee oshekitzi paa okaatzi apawakooni. Eejatzi mereto ikaatzi apite.

**18** Ikantawakina:

—Pamakinawo maawaeni eejatzi mereto.

Roojatzi nopantakari.

**19** Ari ikanteeyanakirini maawaeni:

—Pijeeki jaawiki katawomashiki.

Jeekaeyanakini. Roojatzi raantakawo paa eejatzi mereto. Raminanaki jenokinta, ikantanakiri Ashitariri:

—Ariwee, Pawa, pipakinawo iroka nowanawo noyaari.

Ari ikagaakiro paapaeni, shimapaeeni, ipaeyakinarini maawaeni. Eekiro nopenakiri paashinipaeni atziri. Roojatzi nowaeyakawoni maawaeni.

<sup>20</sup> Ari rowaeyakawoni maawaeni piyotawentakariripaeni, reshitankiro owanawontsi. Roojatzi nopyiotayiteeromi tzimagaantapaentsiri niyeekitakiro kantzirkira okaatzti 12.

<sup>21</sup> Naamaashita ikaateeyakiniriraga owaeyakaworini shirampari 5.000, eejatzi tsinaniipaeni eejatzi eentsipaeni.

*Irira Jesoshi ranashaatapaawo inkaareki, tee itsitsiyi  
(Mr. 6.45-52; Jowa 6.15-21)*

<sup>22</sup> Roojatzi rotyaanteeyakinaniriraga Jesoshi, ikanteeyakinani:

—Niyotaanewopaeni, potetanakya pitotsiki, peewatena intatsikeronta.

Roojatzi eejatzi rotyaantakiri maawaeni piyotawentakariri, ikantakiri rirori:

—Piyaaterapa janta pipankokipaeni.

—Jee, ari.

<sup>23</sup> Roojatzi itonkaantanaka tonkaariki apaniroeni, ikenkithatakaeri Ashitariri. Otsitenitantanaka, eeniro ijeki apaniroeni janta.

<sup>24</sup> Nokanteeyanakanri nokinakoeyanakini niyankaani inkaareki. Roojatzi antawo omaetonkaaki, eejatzi oepiyapiyatotakina antawo tampyaa.

<sup>25</sup> Okantaka rootzimateentsi okitejite, noñagaatziiri Jesoshi ranashaata-paawo iñaa. Tee itsitsiyi. Eejatzi tee niyotawaeri.

<sup>26</sup> Tema rominthaaagapaakin, nokaemaeyantanakanri:

—¡Eeeee! ¡Kaakitaki peyariwee!

Osheki nothaawantaperotawakari.

<sup>27</sup> Omaanta ikanteeyapaakinanri:

—Naakanya pokatsiri, piweshiryaawentawakina, eero pithaawan-tashitana.

<sup>28</sup> Roojatzi ikanantanakari Peetero:

—Eerokarika Nowinkatharite pilkaemena nanashaatyata naari iñaki, niyaatashitemiita pikatziyakaga eerori.

<sup>29</sup> Ari ikantakiri:

—Pipokanaki.

Roojatzi imitaanaki inkaareki, ranashaatantawitanakawo, riyaatemi janta Jesoshiki.

<sup>30</sup> Omaanta roojatzi ikenkithashiryaanakiro tampyaa, eejatzi ithaawanaki, itsitsiyimawitanaka. Ikaemanaki:

—Nowinkatharite, paawaena.

<sup>31</sup> Roojatzi rakotashitawakiri, rakathawakotawaeri. Ikantakaniri:

—Eechonkiini paapatziyana. ¿litaka kaari pameentaperotantana?

<sup>32</sup> Roojatzi rotetantapaa pitotsiki, notsipateeyanaarini, roojatzi kaatanee tampyaa.

<sup>33</sup> Osheki nopinkatheeyanakirini, nokanteeyanakirini:

—Kyaaryootaki, eureka Itomi Tajorentsipero.

*Retsiyatakotakaakiri maawaeni mantsiyatzinkari janta  
(Mr. 6.53-56)*

<sup>34</sup> Roojatzi nomontyaanteeyanaawoni, naatakoeyapaani intatsikeronta. Tema nareeteeyapaakanri janta Jenejareeteki.

<sup>35</sup> Ikantaka jeekayitatsirini riyyotawaerira areetapaa Jesoshi roojatzi ikamantawakaanteeyanakanri maawaeni ikaateeyinira ijekaeyini. Ramayakirini maawaeni mantsiyatzinkaripaeni.

<sup>36</sup> Royikiuyakarini ipampitziteeyakirini imaatha. Ikantaka roojatzi ipampitziteeyantakarini imaatha opatziyaaakikira. Etsiyatakoeyaneeni maawaeni okaatzti owawijaakotzitakiriri imaatha.

# 15

## *Owaariperotzirori ashire (Mr. 7.1-23)*

<sup>1</sup> Paashini kitejiri ipokashitapaakiri riraga Jesoshi apaanipaeni warijeeyo eejatzi iyotaantzirori Iwaperite Tajorentsi. Ipoñeeyakanji Jerojareeki, ikanta-paakiri:

<sup>2</sup> —Tema aakaeyakini joriyo. Ameteeyakawoni rootzimateentsirika oyaa itakyaawo akiwero ako, roojatzi owantanakya. Tema tee akimitari kaari yotziri Tajorentsi rootaki ryotaakaerini itakaantaworini paerani. ¿litakakya kaari imonkaatantawo piyotaanewopaeni? Tee okameethatzi rowashitya, tekiraata ikiwawakota.

<sup>3</sup> Ikantawakiri:

—¿litakakya kaari pimonkaatantawo eeroripaeni ikaminaawitzimirira Tajorentsi? Osheki pimonkaatashitakawo ikantashitayitarini itakaantaworinipaeni rootaki kaari paapatziyaperotantawo ikaminaawitzimirira.

<sup>4</sup> Tema ikantziri Moeseeshini: “Pipinkathateri piri eejatzi piniro”. Eejatzi ikantzi: “Riraga Tajorentsi ikantakotziri akawaantetziriri ashitariri eejatzi rinoiro: ‘Okameethatzi rowamagaeteri’”.

<sup>5</sup> Omaanta eerokapaeni pikanteeyakirini atziri: “Pimatero pikanteri ashitzimiripaeni: ‘Eero nomatziro namitakotzimi, nopeni koriki tzimimowitanarika namitakotantemirim, irika nashi koriki: tema nokashiyakaatziiri Tajorentsi noperi’”.

<sup>6</sup> Naakiro, pantashiteeyakawoni eerori pikowakaeyakarini, tee pan-teeyironi ikowawitari rirori. Pookaeyanakironi Iwaperite Tajorentsi panantyaawori okimitaka ranteeeyakirini picchariniitenipaeni paerani. Tee pishinetziri atziri ramitakotziri ashitariri eejatzi rinoiro.

<sup>7</sup> ¡Amatawitantaniripaeni! Poshiyakaawaetashita paapatziyakari rirori, omaanta tee paapatziyari. Kyaaryo ikenkithatakotziteeyakimirini paerani Iseyashi. Iroka rojankinatzitakarini:

<sup>8</sup> Ikantzi Tajorentsi: “Iraka atzirika ikantashiteeyakinani ipaanteki: ‘Nopinkathatzimi’, omaanta rajankanekira tee raapatziyaperotana, okimitzimotakina inteea ijekaeyakini.

<sup>9</sup> Ratsipetashitakawo ipiyotawentashitana, tee ryotaantziro nokaminaan-tariri, inta ryotaantashitawo ikantayitzirini ichariniitenipaeni paerani”.

<sup>10</sup> Roojatzi ikaemantakari riraga Jesoshi piyotawentariripaeni. Ikaem-anakiri ikanteeyawakirini:

—Pikemapiroeyenani, piyotawakiro nokamantemiri:

<sup>11</sup> okaatzi powayitarini, tee iñaakotzimiro Tajorentsi owaariperotero pishire. Omaantyaka okaatzi piñaawaetziri kaariperotatsiri eejatzi okaatzi pikenkithashiryayitarini rootaki owaariperotzirori pishire.

<sup>12</sup> Nokantanaka niyaatashiiyakirini riraga Jesoshi, naakapaeni ryotaanewo, nokanteeeyapaakirini:

—¿Piyotakima eeroka ikijantakimiro warijeeyopaeni pikantakiriri inkaaganki?

<sup>13</sup> Rakanakina:

—Okimitaka atziri inothokero maawaeni kaari ipankitzi, arimache iinja rowashironkayeri riraga Pawa jenokinta maawaeni atziri kaari reentsite-tari.

<sup>14</sup> Eero pikenkithashiryayakotapiintawo ikantziri riroripaeni. Tee ikoyi ryotero ikowakiri rirori. Ikimitakari kaari kokichaatsati. Noshiyakaawen-temiri: rakathateririka kaari kokichaatsati paashini kaari kokichaatsati,

eenitatsirika omoo janta, tema aritaki ipariyeeyakini irira apite omooki. Okimiwitaka iroka, riraga warijeeyopaeni Riyotaakiri paashini atziri kimiriri kaari kokichaatatsi. Tema tee ikoyi Riyoteri oetarika ikowakaakiriri Tajorentsi. Tema kimitatka kaari kokichaatatsi, tee Riyotziri rirori. Rootaki iinja irira rowashironkaantyaariri.

**15 Ikantziri riraga Peetero:**

—Tee nokemimi. Piyoteenawo oetaka okantaperotziri: “Oetarika oy-aari, tekatsi okantero owaariperotero ashire. Omaanta oetarika ak-enkithashiryaaari, rootaki owaariperoteeni”.

**16 Ikantawakiri:**

—Eejatzi eeroka, ¿tema pikemaperotana?

**17 ¿Tema piyotzti oetarika oyaari iyaatzi asheetoki roojatzi ashitan-teyyaawo? Tekatsi okantziro ashire.**

**18 Maawaeni pikenkithashiryaaari** opoña pajankaneki rootaki piñaawaetantawori. Piñaawaeterika kaari kameethatatsi tema rootaki owaariperotzirori pishire. Omaanta owaariperotziro pishire okaatzpiñaawaetayitzirini pipaanteki kaari kameethatatsi eejatzi okaatzpikenkithashiryaaayitarini. Rooma pajankaneki tee pikameethatzi.

**19 Rooma piyotziro tee pikameethatzirika pajankaneki** ari pantziro kaari kameethatatsiri, powamaantzi, pishirontzimotawo tsinani kaari piina, paapithatziri paashini atziri iina, maenari piñaathatawo tsinani kaari payi, pikoshitzi, pitheeya, pikantzimatzi paashini atziri.

**20 Rootaki eeroka powaariperotantawori.** Omaanta teerika pikiwawakota rootentsirika poya, tekatsi okantero pishire. Eero ikijantzimiro Tajorentsi.

**21 Roojatzi jatanaki rirori Jesoshi, naaka, maawaeni.**

*Rowawijaakotziro Jesoshi ishinto kanaanajato*

(Mr. 7.24-30)

Riyaatakanakina riraga Jesoshi janta Tziiroki eejatzi Shirooki.

**22 Opokashitapaakiri** janta kanaanajato, rowaga kaari joriiyotatsi. Okantapaakiri:

—Nowinkatharite, rooma eeroka ichariniiteni jewatatsirini riraga Iraviiri. Nokowaki pineshironkatena, eejatzi nishintyo pineshironkatero. Ikyanta-paakawo kamaari, shiyashiyataka.

**23 Omaanta imaeritanaki, tee rakawakiro.** Nokantawitari naari:

—Pikantero iyaateeta, atama oñaashirenkakae. Tema osheki okaemakae-mataki.

**24 Roojatzi ikantzi:**

—Rootaki rotyaanantakinari Pawa, apatziro nowawijaakoteri nojoriyy-otzinkaritepaeni. Rirotaki kimitariri owihsapaeni kaari ishenteetzi.

**25 Omaanta otziwerowashitapaakari,** apiitakiri okantakiri:

—Nowinkatharite, pineshironkatena.

**26 Ikantawakiro,** roshiyakaawentakiro:

—Tee okameethatziaapithateri atomi owanawontsi apantyaariri otsitzite. Eeroka kaari joriiyotatsi. ¿litaka noneshironkatantemiri?

**27 Tee okantzimoneentanakyaawo ikantawitakaworira,** inta okantziri:

—Kyaaryo, Nowinkatharite, kameetha iroka pikantanarika. Omaanta, riraga otsitzite rowawo opetokeeriki pariyayitatsirini jaawiki royaarika ashitariri rotsitzite.

**28 Ikantawakiro:**

—Tsinani, kameetha paapatziyaperotakina. Aritaki nomatakimo pikowakotakinari.

Aripaete awijakotanee ishinto.

<sup>29</sup> Roojatzi riyaatantanaa riraga Jesoshi, eejatzi maawaeni nokaateeyaneerini.

*Retsiyatakotakiri irira Jesoshi oshekini mantsiyatinkari  
(Mr. 7.31-37)*

Ikinakaanakina riraga Jesoshi janta othapyaakiini inkaare janta Karireeyaki. Itonkaakanakina tonkaariki, ijeekakaapaakina janta.

<sup>30</sup> Ipokashiteeyakirini osheki atziri ramakiri osheki mantsiyari: aashetawitachari, kamampowaakiwitachari, majontziwitacharipaeni, thatyaaponthowitacharipaeni, eejatzi paashinipaeni mantsiyawitachari roojeekaeyakirini iitzikeroki rirori. Retsiyatakoyakirini maawaeni.

<sup>31</sup> Roojatzi rotsikanatantanakari atziri iñaakirira aashetawitacharini anashitaa kameetha, riraga kaari kokichaawitachani kokichaate, majontziwitachari ñaawaetanee, kaari shewawitachani rako shewatanaa eejatzi paashinipaeni mantsiyari etsiyatakote. Ari rotsikanateeyakarini tee riyotzi oeta ikanteeyanakirini roojarazi iñaaperoeyantanakarini riraga Tajorentsi. Ikanteeyanakini:

—Tema ikameethaperotaki Tajorentsi riraga pinkathariwentziriri maawaeni joriyopaen.

*Rowakaakari Jesoshi 4000 atziri  
(Mr. 8.1-10)*

<sup>32</sup> Roojatzi ikaemaeyantakinani riraga Jesoshi naakapaeni maawaeni riyananewo. Ikanteeyakinani:

—Osheki netakoeyakarini maawaeni piyotawentanari, tema okaataki kitejiri 3 itsipateeyakinani jaka. Tektsi roya. Tasheyamoonthataki. Tee nokoyi notyaantashiteeyaaari inampiki tekirarika rowa. Rooma notyaantashiteeyaririka, ari ishipetatanakî awotsiki. Eero imatziro rareeta inampiki.

<sup>33</sup> Nokantapaakiri:

—Pamine, tektsi atziri ipanko jaka. ¿Tsika ayenirika owanawontsi aperiri? Oshekini ikaateeyiniroñia.

<sup>34</sup> Ikantawakina:

—¿Tsika okaatzika owanawontsi jeekaentsiri?

Nokantanakiri:

—Okaataki 7 paa, eejatzi mereto apaanipaeni.

<sup>35</sup> Roojatzi ikanantawakariri riraga piyotawentariri:

—Pijeekaeyini maawaeni katawomashiki.

<sup>36</sup> Jeekaeyanakini. Roojatzi raantakawo paa eejatzi mereto. Ikantziri ashitariri:

—Ariwee Pawa, eenitatsi noyaari.

Roojatzi ikagaantakawo paa eejatzi mereto. Ipakinawo eejatzi maawaeni riyotaanewo. Naawakiro, noshirinkakiniri rirori piyotawentakariripaeni. Itajonkakiniri oshekitanaki paa, roshekitanaki eejatzi mereto.

<sup>37</sup> Nowaeyakawoni, kemaeyanakinani maawaeni. Roojatzi nopyioteeyakironi tzimagaantapaentsiri niyeekiteero kantzirkira, okáatzi 7.

<sup>38</sup> Tee ayoperotzi tsika ikaatzi maawaeni owaenchari. Owaka osheki tsinani eejatzi eentsipaeni. Omaanta aamaashitya 4.000 shirampari owaenchari.

<sup>39</sup> Roojatzi rotyaanantaari, ikantakiri:

—Piyaateerakya iroñaka pipankokipaeni.

Roojatzi riyaatantanaa. Noteteeyantanakani pitotsiki, montyaakotanakina janta Makataaki.

## 16

*Ikowawitaka warijeeypaeni iñeerimi irira Jesoshi itajonkantemi  
(Mr. 8.11-13; Rk. 12.54-56)*

**1** Ikanta ipokashiteeyapaakirini warijeeypaeni eejatzi saroseeyopaeni ikowaeyawitakanri rantakaantyaaririmi riraga Jesoshi kaari kameethatatsi ikijantanakyaaririmi. Ikantawitapaakari:

—Nokowaki noñeemimi pitajonkante, niyotantanakyaari kyaaryo piñoñaaka jenokinta.

**2** Rakanakiri rirori:

—Pamine, aririka itsiteniityaanaki oorya piñaakirorika okiraaway-eetyaanaki, tema pikantanaki: “Paminetya jenoki kiraawayeetyaaki. Eero opariyi inkani”.

**3** Omaanta, amaetyaakakya piñaakirorika aaninkaki, ari pikantanaki: “Rooteentsi opariye inkani. Paminetya aaninkakinta”. Amatawitantaniri, piyotakoeyakironi opariyerika inkani. Omaanta tee piyotakotzimaetawo maawaeni okaatzi piñeeyawitakarini jaka kipatsikika.

**4** Tee pikameethateeyini, osheki pitheenkakiri riraga Tajorents. Iroka tee okameethatzi. Pikowawita piñeena notajonkante, omaanta eero noñaayimiro. Apatziro iinja, piñaakironi roshiyakaawentakinarini paerani Jonaashini.

Rootaki ikantakiriri riraga Jesoshi, roojatzi riyaatantanaa.

*Roshiyacaantziniri Jesoshi tapiyakaawori paa  
(Mr. 8.14-21)*

**5** Rareetakaeyapaakinani intatsikeronta inkaare irira. Tema nopeyakotanakiro paa: tee naanakiro.

**6** Ikanteeyakinani rirori:

—Paamayaawowa rowaga tapiyakaawori paa rashи warijeeypaeni ee-jatzi rashи saroseeyopaeni.

**7** Roojatzi nokantawakaeyantanakani:

—¿Itaka ikanantakaeri: “Paamayaawowa tapiyakaawori paa rashи war-ijeeypaeni eejatzi rashи saroseeyopaeni”? Rooma ikanantakaeri teera amaneero paa. Aamashitya rootakirika ikanantakaeri.

**8** Ikantaka riyotakotakina oetrika nokantawakaakari, rootaki ikanantanakinari:

—¿Tekirama tameentaperotana? ¿Itaka pikanantari: “Tekatsi paa”?

**9** ¿Tekirama piyotana? ¿Tema pikenkithashiryawakiro chapinki okaatatakotawitakagaanki paa apawakooni, omaanta ikemaeyakawoni osheki atziri rowantakawori? Ikaatakiranki 5.000 shirampari okaatzi tzimagaantapaentsiri 12 kantziriki yikitapaaentsiri.

—Jee. Kyaaryo.

**10** ¿Tema pikenkithashiryawakiro kaatatsirranki paa 7, eejatzi nowakaakari 4.000 shirampari omaanta ikemaeyakawoni maawaeni eejatzi tzimagaantapaentsiri poteteero kantziriki okaatzi yikitatsiri 7?

—Kyaaritaamakya.

**11** Ikantanakina:

—¿Itaka kaari piyotantawakawo nokantawitakimiri: “Paamayaawowa tapiyakaawori paa rashи riraga warijeeypaeni eejatzi riraga saroseeyopaeni? Tee ro nokantakoperote rowaga paa pipeyakotanakiri inkaaganki”.

**12** Roojatzi niyotakotantakawo oeta okantakotziri ikenkithatakotakiri tee ro ikenkithatakoperotzi tapiyakawori paa omaanta ikenkithatakotziri maawaeni riyotantayitzirini warijeeypaeni eejatzi saroseeyopaeni. Tema

riyotaashitakari kaari rooperotatsiri. Tee ikoyi riraga Jesoshi ramatawitan-tenawo riroripaeni okaatzti riyotaantayitzirini.

*Peetero ikantziri riraga Jesoshi: "Eeroka Owawijaakotantsini"*  
*(Mr. 8.27-30; Rk. 9.18-21)*

<sup>13</sup> Roojatzi niyaateeyantanakan intatsikeronta Joriraani paashiniki Sesareeya rowaga nampitsi riwetsikakaantapaakiri Jiripi riraga pinkathari. Ari nokinakitzi janta. Roojatzi ikanteeyanakinani riraga Jesoshi:

—Nopoñaaka naaka jenokinta natziriperotapaaki jaka jaawikika. ¿Oetaka ikenkithashiryaaakoeyanarini naaka atziripaeni? ¿Tsikama iitakinaka naaka?

<sup>14</sup> Nokantawakiri:

—Ikantzi apaanipaeni: “Jesoshi rivotaki Jowani, riraga kaawoshitakowitariri Tajorentsi, piriintaa”. Ikantzi paashinipaeni: “Irira rivotaki Iriiyashini, riraga kamanantzirorini iñaani Tajorentsi, añagaatsiri”. Ikantziri paashinipaeni: “Jesoshi rivotaki Jeremiiyashini, añagaatsiri”. Eejatzi paashinipaeni ikantzi: “Rivotaki paashini kamanantzirorini iñaani Tajorentsi, piriintaachari”.

<sup>15</sup> Roojatzi ikanteeyantanakinani:

—Eerokapaeni, ¿oetaka pikenkithashiryaaakoeyanarini naaka?

<sup>16</sup> Riraga Shimo, iiteetziri eejatzi Peetero ikantawakiri:

—Eerokataki riraga Rotyaantanewo Tajorentsi naamaakari. Eeroka Itomi Tajorentsi, riraga Añaaperotatsiri.

<sup>17</sup> Ikantziri:

—Piweshiryawaayaetya, Shimo itomi Jonaashi. Riyotaakimiro iroka riraga Tajorentsi. Tee riro yoteemironi atziri.

<sup>18</sup> Noetzimi Peetero, tema okantziri piwaero apaanteki aari: mapi. Tema paapatziyana naaka riraga Rotyaantanewo Tajorentsi. Rootaki nokowakaantakimiriyoteeri atziri iroka niyotagaeyakimirini eerori. Paapatziyakaakari osheki atziri. Rowashironkaawitakimirika iwinkatharite maawaeni kamaari omaanta eero imatziro ranaakotemi.

<sup>19</sup> Niyoteemi oetarika ranteeyerini atziri ryaatanteeyari Tajorentsikinta jenokinta. Eerorika paapatziyakagaeyaarini atziri jaka kipatsikika, eero ryaatzi jenokinta; omaanta maawaeni atziri paapatziyakagaeyakinarini rivotaki jeekaeyatsini iinja janta jenokinta.

<sup>20</sup> Roojatzi ikanteeyantakinani:

—Eerowa pathawayitawo pikamanantawaetzi, pikante: “Jesoshi rivotaki Rotyaantanewo Tajorentsi, riraga Owawijaakotantsini”.

*Irira Jesoshi ikamantzitakari ikame*  
*(Mr. 8.31-9.1; Rk. 9.22-27)*

<sup>21</sup> Aripaete ritanakawo ikamanteeyananani ikame. Ikanteeyanani:

—Rooteentsi niyaate janta Jerojareeki. Osheki rowashironkayena janta riraga aataperoteenchari, riraga jewawentayitziririni ñaanakowenantsirsri Tajorentsi, eejatzi riraga iyotaantayitzirorini Iwaperite Tajorentsi, maawaeni. Aritaki okantyaari rowamagaeten, omaanta okaate kitejiri 3, ari nopiriintanee nañagae.

<sup>22</sup> Tee inimotziri Peetero okaatzti ikantakiriri. Rootaki raantanakariri eekitziroeni jaga ikantapaakiri:

—Nowinkatharite, ¡tee okameethatzi pikantakirika! ¡Eero powashironka! ¡Eero pikami!

<sup>23</sup> Roojatzi ipithokashitantanakari riori, ikantanakiri:

—¿Itaka pikanantakari? Pikimitakari Jatanaashi, riraga iwinkatharite kamaaripaeni.                   ¿Itaka pookakaantanawori?                   Pikantakirika

pienkithashiryaashitakawo ikenkithashiryaari atziri; tee piyotziro ikowakaakinari Tajorentsi. Eero pookakaanawo ikowakaakinari Pawa. Nonmonkaateniriita.

**24** Roojatzi ikanteeyanani:

—Pikowaperotzirika paapatziyaperotena, okameethatzpi pikyaaryoo wen-tenawo oetarika nokowakaakimiri naari, eero pantashitawo pikowakaari eerori. Pipomeentsiwentena: aririka rowashironkaawitemi, omaanta eekiro piyaatanakitye paapatziyaperotanakina. Tema iroka kimitaka pinatanakitzi ro piyoroshite.

**25** Riraga kowawitachari ikaminthayaami ari rowashironkaantyaari iinja Tajorentsi, omaanta riraga kemaatsitawentenani, iñeenaroña janta Tajorentsikinta.

**26** Omawitya pipiyotaperotawityaaworika osheki owaagawontsi jaka kipatsikika, omaanta pipeyakotakiririka Tajorentsi, eero piyaatzpi jenokinta ijeekinta rirori. Tema patsipetashiteeyawitakawoni maawaeni pashiteeyawitakarini. Ñaakiro, tekatsi pikantya pipinateri Tajorentsi ijeekakaantemiri janta inampikinta.

**27** Nopoñaaka naari jenokinta, nokoñaatapaaki kipatsikika. Eejatzi niyaatawitaatyia jenokinta. Tema eejatzi nopyaate iinja jaka, notsipatapaakyaaari nonampiripaeni, nopyinkathariperotapaaki, nokimitapaakyaaari Ashitanari. Roojatzi nokantakowenantapaakyaaari maawaeni atziri okaatzi rantayitzirini.

**28** Kyaaryo, iroka nokantzimirika, eenitatsi apaanipaeni iroñaaka pikateeyakinika jaka, eerotzitarika pikami, ari piñaawaena nopyinkathariperotapaaki.

Rootaki ikantakinari Jesoshi.

## 17

### *Ishipakiriimotakiri Jesoshi 3 riyotaanewo*

(Mr. 9.2-13; Rk. 9.28-36)

**1** Ikanta itsipatakina naaka maawaeni riyotaanewo, nomaaki 6.

Roojatzi rookanakina, raanakiri apatziro Peetero, Jantyaako eejatzi Jowa, riraga rirentzi Jantyaako, raanakiri janta antawoki tonkaari.

**2** Roojatzi ishipakiriimotantanakari. Iñaawakiri ishipakiryaapootanaki ikimitanakari oorya, eejatzi iilhaari okitamaaperotanakiroña.

**3** Romapokapaakiri Moeseseshi, eejatzi Iriiyashi, rirotaki kamanantzirori inñaani Tajorentsi paerani. Ikenkithatakapaaakiri Jesoshi.

**4** Roojatzi riraga Peetero, ikantziri:

—Nowinkatharite, kameethatapi apokaeyakinika jaka noñaantakimiri. Pikoakirikira, niwetsikemi pankoshintsi 3: apaani pashi, apaani rashii Moe-seeshi, eejatzi paashini rashii Iriiyashi.

**5** Eenirowa inñaawaetzpi omapokapaaka menkorii, otzikaapaakiri maawaeni, osheki oshipakiryaapaaaki roori. Ari ijeekaki Tajorentsi menkoriki inñaawaetanaki, ikantziri:

—Irika rirotaki notyomi nonintaperotanewo, osheki niweshiryaawentaperotakari. Pikemijanteri.

**6** Ikemantawakaworira riraga riyotaanewopaeni ikantziri rirori, ithaawantanakari osheki, itankimotapithatanakari.

**7** Omaanta ipokashitapaakiri Jesoshi, ipampitapaakiri. Ikanteeeyakirini:

—Pikatziyanee, eero pithaawantari.

**8** Roojatzi raminawitanaa tekatsitanee, apaniroeni Jesoshi.

**9** Roojatzi roerinkantanaa. Ari niyanki awotsi ikantakiri:

—Eerowa pikamantakotzitana piñaakinaka iroñaka. Omaanta naaka irraga atziriperotapaentsiri nokamawitakya arika eejatzi nañagae, aripaeterakya pikamanteeyanakirini paashinipaeni atziri okaatzika piñaawakiri iroñaka.

**10** Roojatzi ikanteeyantakarini riroripaeni:

—Riraga iyotaantzirori Iwaperite Tajorentsi ikanteeyini: “Riotaki itapaakyaaawoni ipoke Iriiyashini, eentsikiro rimpetaapaaki ipokapaaki rirori Rotyaantanewo Tajorentsi”. ¿litakaya ikanantawaetakari iroka?

**11** Rakanakiri:

—Kyaaryo okaatzi ikantakirini: “Riotaki itapaakyaaawoni ipoke riraga Iriiyashi, rowameethateeyapaakirini maawaeni”.

**12** Omaanta nokamantemi: kyaaryo ipokapaentzi Iriiyashini omaanta tee riyyotawakiri atziripaeni, osheki rowashironkashiteeyawakarini. Eejatzi ikitimitawakina naari iinja, osheki rowashironkaeyawakinani.

**13** Roojatzi niyotakoperoeyantanakawoni ikenkithatakotatziiri Jowani, irraga kaawoshitakotziriri Tajorentsi.

### *Rowawijaakotziri riraga Jesoshi ewonkiri kokikokitatsiri*

(Mr. 9.14-29; Rk. 9.37-43)

**14** Roojatzi rareeeteeyantapaanani rookaeyanakinanira chapinki. Osheki atziri oyaakiriri. Roojatzi ipokashitapaakiri Jesoshi apaani shirampari. Rotziwerowashitapaakari, ikantapaakiri:

**15** —Nowinkatharite, pineshironkateri notyomi. Osheki ikamanapiintzi, osheki rashironkaapiinta. Ipariyapiintzi itaapiinta paamarikira, pokiree; eejatzi ipiinkaatapiintzi ifñaakira, chomoog.

**16** Naawitanakananari piyotaanewo, nokantawitapaakari: “Powawijaakoteneri notyomi”, omaanta tee imatziri.

**17** Rakanakiri rirori Jesoshi:

—¡Atziri theenkantsirs! ¿Tekiraatama piyotzi? ¿Tsika okaateka notsipatemi piyotantyaari imatakaantemirori Tajorentsi petsiyatakotante? Osheki pitheenakina.

Roojatzi ikantawakiri ashitariri:

—Pamakinari jaka pitomi.

**18** Roojatzi ikantakiri Jesoshi kamaari:

—Eero poñaashirenkiri rirori, inta pookaneeri. Roojatzi rawijakotantanaa riraga eentsi.

**19** Roojatzi nojampitantapaakari:

—¿litakaya kaari nomatantawo nowawijaakoteri naari?

**20** Ikanteeyanakinani:

—Ñaakiro, okantakaakimira tee paapatziyaperotawo okaatzi nokantawitakimiri rootaki kaari pimatantawo powawijaakoteri. Kyaaryo, aririkami paapatziyaperotakyaawo nokantzimiri, tema aritaki pimatakiro tonkaari pikanterorika: “Pishirinke janta”. Roojatzi oshirkantantanayka janta. Ñaakiro, tekatsi pomeentsitzimotemini pameentaperotyaaworika nokantzimiri.

**21** Pookantyaariri kamaari kimitakaaririka aakiriri eentsika okameethatzi pityaawo pamaneri osheki Tajorentsi eejatzi pitzitakotyaari irira.

Roojatzi itharyaaanaka rirori Jesoshi, itsipatanakina naaka maawaeni riyotaanewo.

### *Rapiiteeniri eejatzi Jesoshi ikanteeri ikame*

(Mr. 9.30-32; Rk. 9.43-45)

**22-23** Apaani kitejiri janta Kariireeyaki, rapiitaana riraga Jesoshi ikan-teeyaanani naaka maawaeni ryotaanewo, ikantzi:

—Nopoñaanaka naari janta jenokinta natziriperotapaaki jaka. Rooteentsi ragaetena, rowamagaetena naari. Okaate kitejiri 3 ipiriintaneena Pawa nañagae.

Nokemantawakari, nowashireeyanakan. Roojatzi notharyaanteeyanakan.

### *Ipinatakiro Jesoshi riwetsikantayitaworini Tajorentsipanko*

**24** Roojatzi ryaatakagaeyantanakinani riraga Jesoshi janta Kaperinawooki, areeteeyapaakinani. Eeniro ijeki janta riraga piyotziriri koriki rowameethatanteetyaawori Tajorentsipanko. Ikanta ipokashitapaakiri Peetero rioripaeni, ikantapaakiri:

—Ipinatapiintzirma riraga iyoteemiri rowameethatanteetyaawori Tajorentsipanko?

**25** Rakanakiri rirori:

—Jee, ipinatziro.

Roojatzi ipiyanaka pankotsiki ijekinta Jesoshi. Ipiyanaka, ikyappaaki, ikowawitaka rirori Peetero rojampiterimi aririka ipakiri koriki rowameethatanteetyaawori Tajorentsipanko. Omaanta ryotaki riraga Jesoshi ikenkithashiryaaakari Peetero rootaki rathawaakotanfanakariri, ikan-tanakiri:

—Shimo, ¿oetaka pikenkithashiryaaari eerori? Riraga jewawenantatsiri, ¿tsika itzimika ikowakotapiintziri iyorikite? ¿Ikowakotzirma inampijatzipero? ¿Riroma ikowakotziri paashinijatzitatsiripaeni atziri?

**26** Ikantawakiri:

—Riroma ikowakotziri paashinijatzipaeninta atziri.

Roojatzi ikantanakiri rirori:

—Kyaaryo, tektsi ikowakotziri inampijatzipero. Eejatzi okimitaka naari, tektsi ikowakotena Pawa, tema nosheninkatakari.

**27** Omaanta tee nokoy eeniro ikijawentenari riraga kempoiiriri koriki. Piyaate iroñaaaka pakachaatakite inkaarekinta. Aririka paaki shima, poerikeri, paminawaanteteri ipaanteki, aritaki piñiitakiri koriki. Roojatzi paaneeri kempoiiririkinta koriki, pipapaakiri. Rivotaki apinatakari aaka.

## 18

### *Ikenkithatakotakiri Jesoshi jewawenantsini paata janta jenokinta (Mr. 9.33-37; Rk. 9.46-48)*

**1** Ojamanineentensi nopolashitapaakiri riraga Jesoshi, naaka maawaeni ryotaanewopaeni, nokantapaakiri:

—Maawaeni naaka piyotaanewo, nokowaki pikantena ¿ninkama jewaperoterinka atziripaeni janta ipinkathariperotzinta Tajorentsi?

**2** Roojatzi ikaemantakari eentsi, ikatziyakaakari niyanki,

**3** ikanteyawakinani:

—Kyaaryo nokamantemiri pikenkithashiryagaeyaari pameentari Tajorentsi, eejatzi pipakaero pajagaaga. Nokowaki pikimitakotyari irika eentsika, paapatziyaperotena. Eerrika paapatziyaperotana, eero pimatziro piyaate janta ipinkatharitzinta Tajorentsi.

**4** Irika eentsika tee ikantakaaperota, tee itheenkana inta raapatziyaperotana. Maawaeni kimitakotyarinii irira rivotaki tsipateeyeenarinnee-wawenantzi.

**5** Aririka pineshironkateri aapatziyanari, kimitaririka irika eentsi, eejatzi pikimitzitakina naari: pinintashiretakina.

<sup>6</sup> Omaanta aririka pantakayeri eentsi aapatziyanari kaari kameethatatsi, ari rowashironkaaperotakimi eerori Tajorentsi. Okameethawitami pityaa-womi pikamemi eero pantakaantariyka kaari kameethatatsi aapatziyanari, rootaki kaari nowashironkaantemimi.

*Ikantziri Jesoshi: "Pantzirokari kaari kameethatatsi"*  
(Rk. 9.42-48; Rk. 17.1-2)

<sup>7</sup> Ikantziri eejatzi:

—Netakotari maawaeni atziri. Kyaaryo, tee ikowawita ranteromi kaari kameethatatsi, omaanta rantakagaetakiri. Arimache rowashironkaaperotakirikya Tajorentsi iinja irintapaeni antakaakiriri.

<sup>8</sup> Noshiyakaawentemiro antakayemirorika pako kaari kameethatatsi pichekerro, pookero. Eejatzi pikimitzityaawo roori piitzi antakayemirorika kaari kameethatatsi. Piyaatyookakitashiteeya jantajenokinta rooma otzimawityaarika apite pako eejatzi apite piitzi iyaatakaashitzimikari janta paamariki kaari tsiwakanitatsini.

<sup>9</sup> Eejatzi poki, aririka aminakayemiro kaari inimotziri Tajorentsi pikithokireero, pookero. Kashetaakini pikyaapae jantajenokinta. Rooma otzimaawityaarika apite poki iyaatakaashiteemikari paamariki kaari tsiwakanitatsini.

<sup>10</sup> Eejatzi ikantzi riraga Jesoshi:

—Eero pimanintziri kimitakariri irika eentsika aapatziyanari. Eenitatsi ronampiri Tajorentsi kempoyaakowentapiinteeeyakiririni maawaeni rirorpaaeni. Eejatzi eerori pikimityaari, pikantani pikempoyaawenteri eentsipaeni.

<sup>11</sup> Nopoñaanaka naakajenokinta, natziritapaaki. Nopokashiteeyakirinijatatsinimi paamariki kaari tsiwakanitatsini, nowawijaakoteeyerini.

*Roshiyakaawentziri Jesoshi owisha peyeenchari*  
(Rk. 15.3-7)

<sup>12</sup> Noshiyakaawentemiro eejatzi. Eenitatsirika ashitachari 100 rowishate, ipeyakyaarika apaani, ictsiakantanakyaarika? Tema ari rookanakiri riraga jeekagaantaneentsiri 99 rowishate keshiiki jataki iroñaaka ikowakowataateri riraga peyeenchari.

<sup>13</sup> Omaanta iñagaeririka eejatzi, ¿rioma riweshiryaaawentyaari riraga piyoteenchari kaari peyachani? Kaari. Omaanta riweshiryaaawentyaari riraga peyawiteenchari.

<sup>14</sup> Ikitakaga riraga ashitariri rowishate tee ikoyi ipeya apaani, eejatzi ikimita riraga Pawa jeekatsirijenokinta, tee ikowakaaneentziri ipeya apaaniatziri aapatziyanari.

*Tsika akantya apeyakotawakaantyuawori antzimotakimirori kaari kameethatatsi*

(Rk. 17.3)

<sup>15</sup> Eejatzi ikantakina Jesoshi:

—Aririka rantzimotakimiro piyemijantzinkarite kaari kameethatatsi okameethatzi piyaatashiteri pikenkithatakayeri apaniroeni. Omaanta eero pikijiri; eero pikamantziri paashinipaeni. Aririka ikemijantemini inetheemi eero eejatzi Tajorentsi pipeyakoteniri okaatzi rantzimotakimiriroojatzi pineshironkatanteeyaari, aritaki pineshironkatawakagaeya paakameethatawakagaeya, eejatzi ineshironkatzityaari rirori.

<sup>16</sup> Omaanta eerorika ikemijantawakimi, apawo piyaatashiteri. Iroñaaka paaneeri paashini apaani eerorika apite piyemijantzinkarite. Paaneeri ikenkithatakayeri, ryotantyaari rirori kyaaryo pikantziri, eejatzi ryotantyaari kyaaryo pikowaki pineshironkateri.

<sup>17</sup> Eerorika ikemijantawakimi, pipiyoteri maawaeni piyemijantzinkarite jaga, pikanteri maawaeni ikantawakayaari rirori. Eerorika ikemijanteyawakirini okaatzi ikantawitakariri, rootaki piyotantyaari ikimitakari kaari yotziri Tajorentsi, eejatzti paashini antzirori kaari kameethatatsi. Iroñaaka pikimitakayaari kaari yotziri Tajorentsi, riraga antzirori kaari kameethatatsi, eero pikantakotziri aapatziyariri Tajorentsi.

<sup>18</sup> Kyaaryootaki iroka nokantemiri: eeroka, riraga aapatziyaperotanari, oetarika pithañaari kipatsiki, ari ithañaakyaawo Pawa jenokinta; eejatzti oetarika pishinetziriri kameethatatsiri eejatzti ikanteri Tajorentsi ishinetziriri. Pikanteririka eenitatsi kaari kameethatatsi rantziri, eejatzti ikanteri rirori. Pikanteririka tee añiiro kaari kameethatatsi rantziri, eejatzti ikimitya riraga Tajorentsi.

<sup>19</sup> Eejatzti nokantemiri, aririka eerokapaeni pikanteri Pawa jenokinta ramitakotemi oetarikapaeni, omawitya pikaaterika apite, aritaki ikemijantakimi, ramitakotakimi.

<sup>20</sup> Tsikarika pipiyotawentena aririka apite aapatziyaranari, eerorika 3, aririka osheki, eejatzti naari nokaatemi. Eejatzti ari iyotakayemi Ishire Tajorentsi oetarika kameetha pikanteriri Tajorentsi.

Rootaki ikantakiri Jesoshi.

### *Pineshironkatante atziri*

<sup>21</sup> Ikantaka Peetero, ryaatashtakiri Jesoshi, rojampitapaakiri, ikantakiri:

—Nowinkatharite, ¿tsika okaateka noneshironkatapiinteri riraga kijapiintanari nopeyakopiinteniri? ¿Arima okaate 7 nopeyakopiinteniri?

<sup>22</sup> Ikantawakiri:

—Pikanteetatyeyaaani pineshironkateri, pipeyakoteniri rantziri. Eero pipiyatakotari kijapiintzimiri.

<sup>23</sup> Noshiyakaawentemiro tsika ikanta Tajorentsi ineshironkatziri aapatziyariri. Ikimitakari pinkathari rireewiteetziri ronampiripaeni. Tema iroñaaka ikowakiri irira ipinanteeri ireewitakiriri.

<sup>24</sup> Ikaemakiri apaani ireewitziriri oshekiperi koriki. Ikantawitawaari: “Pipinatawaena pireewitanaga”.

<sup>25</sup> Ikantawakiri: “Tekatsi naye nopinatemiri”. Roojatzi ikanantakari paashini ronampiripaeni: “Paanakiri irika pipimanteri, eejatzti iina, itomipaeni, rowaagawo, maawaeni, roojatzi ipinatanteena koriki rireewitaanaga”.

<sup>26</sup> Ikanta riraga ireewitziriri rotziwerowashitanakari ipinkathatanakiri, ikantanakiri: “Eero pipimantana poyaawentawakyaata aritaki nopinateemi”.

<sup>27</sup> Roojatzi osheki retakotatari iwaatorote, ishinetziri riyowanee, ikantawakiri: “Aritaama, monkaataka pireewitana, eero nokowakota-neemi”.

<sup>28</sup> Ikanta ireewitantawitacharira ryaawitanaaga. Ari janta niyanki awotsi itonkiyotawakari ireewitziriri rirori. Tee rireewiperotziri osheki: inta eechonkiini. Roojatzi roerikakentsitaktakari ikentsiki, ikantakiri: “Intsipaete pipinatena pireewitana”.

<sup>29</sup> Roojatzi rotziwerowashitanakari, ikantawitakari: “Poy-aakowentawakyaata, aritaki nopinateemi iinja maawaeni nireewitzimiri”.

<sup>30</sup> Omaanta tee ikoyi ineshironkateri eejatzti royaakowentya omaanta romonkyaaagakaantashitakari ikantakiri: “Pipinatenarika maawaeni pireewitanaga, roojatzi noemishitowakaananteemi”.

<sup>31</sup> Ikantaka iňaakowenantakariri paashinipaeni ratzirite riraga iwaatorote, okantzimoneentanakari roojatzi riyatashitantanakari iwaatorote, ikantapakiri: "Noňaateekiri iriranki petakotaariranki eerori. Teera retakotantateeta rirorita inta romonkyaaagakaantateekiri ireewitawitariri rirori ee-chonkiini".

<sup>32</sup> Roojatzi ikaemakaanantakari riraga iwaatorote, ikantawakiri: "Ñaakiro, pikantakina inkaaganki: 'Eero pipimantana', rootaki noneshironkaperotantakimiri, nokanantawitakimiri: 'Troňaaka eero pipinataana pireewiwanaga'. Omaanta eeroka, tee pikameethatzi. Tee pineshironkatziri riraga ireewitawitzimiri eerori eechonkiini".

<sup>33</sup> Tema okameethawita pineshironkaterimi eerori ireewitzimiri eechonkiini. Nokimitakimira naari noneshironkatakimi: tee nowashironkaemi".

<sup>34</sup> Roojatzi ikijantaperotanaka iwaatorote romonkyaaagakaantakiri, ikantakiri: "Nokowaki iroňaaka pipinatena maawaeni pireewitanaga; pipinate-narika maawaeni roojatzi noemishitowakaananteemi".

<sup>35</sup> Ikaatakaapaakawo Jesoshi, roojatzi ikanantanaka:

—Okimitakira iroka noshiyakaawenteeyakinirini, eejatzi ikimitemi iinja eerori Ashitanari jeekatsiri jenokinta, eerorika pineshironkatziri atziri, eerorika kyaaryoopero pipeyakotziniri oetarikapaenai rantzimotzimiri, ari rowashironkaaperotakimi Pawa iinja, eero ipeyakotzimiro eerori pantani.

## 19

### *Eero pookiro piina*

(Mr. 10:1-12; Rk. 16:18)

<sup>1</sup> Ithonkantanakawori riyotaantzi riraga Jesoshi, ishitowakaanakina Karireeyaki, jatanakina iroňaaka janta intatsikeronta Joriraani janta okaak-intawo Joreeya.

<sup>2</sup> Eejatzi royaatanakiri oshekini paashinipaeni atziri. Eejatzi rirori retsiyatatakotawakiri maawaeni mantsiyatzinkari.

<sup>3</sup> Eejatzi ipokashitapaakiri warijeeyopaeni. Ikowawitaka ikompitakayaarimi, rootaki ikanantawitapaakariri:

—¿Tsikama okantzika Iwaperite Tajorentsí? ¿Okameethatzima ninkarika kowashitachari rookero iina?

<sup>4</sup> Ikantawakiri:

—Tema piňaanatapiintawito okantziri Iwaperite Tajorentsí. Paerani ri-wetsikakiri Tajorentsí shirampari eejatzi tsinani.

<sup>5-6</sup> Eejatzi ikantzi: "Aririka rayero shirampari iina, rinteenaryaanakiri ashitariri eejatzi riniro, omaanta tee nokowakayiri rookero iina, eero. Inta nokowaki kijokiro rowanakiro irowa. Rinashitawitani paerani shirampari eejatzi tsinani, omaanta aririka raaki iina, kimitanaa apaani ikantaka, kijokiro rowawakaanakya". Ifňaakiri Tajorentsí apaani ikantaka; eero iroňaaka rookakagaeri atziri.

<sup>7</sup> Roojatzi rojampitanakiri, ikantakiri:

—¿Litakaka ishinetantariri riraga Moeseeshi shirampari rookero iina? Tema ikamineeri shiramparipaeni: "Tekirarika pookiro piina pityaawo pojankinateniro paperi pikantero iroňaaka ookawakaatyeyea. Roojatzi pimatanteeyawo pookaero piina".

<sup>8</sup> Ikantawakiri:

—Tema pikijoshiretakizi pajankaneki rootaki ishinetantakimiri. Omaanta tee ikoyiro Tajorentsí.

<sup>9</sup> Nokantemi naari, aririka pookero piina roojatzi paye paashini, aritaki panteero kaari kameethatatsi. Tema pishirontzimotakawo piina

paashini tsinani. Apatziro aririka oshirontyaari paashini shirampari, okameethawita pookeromi.

**10** Eejatzi nokanteeyanakirini naaka riyotaanewopaeni:

—¿Kyaaryootaki pikantakinari? ¿Aririka naaki noena eero nomatziro nookero? Okameethatzi eero nayi noena.

**11** Ikantawakina:

—Kyaaryo iroka pikantziri. Jee, apaanipaeni atziri tekatsirika iina imaterorika riweshiryaanakya, omaanta kaari maawaeni atziri.

**12** Eenitatsi apaanipaeni kaari matachani rayi iina, tema ashi royoiro ikoñaatantakari ipiryakitzi, rootaki kaari imatantawo itsipatantyaawori tsinani, rootaki kaari raanta iina. Eenitatsi apaanipaeni rayiteetziri iyatharekitho, rootaki kaari raanta iina. Eenitatsi paashini kaari kowatsini raye. Ikowakiri ijekashitya ikyaaryoowenteniri Tajorentsi oetarikapaeni ikowakiri ranteniriri. Eerorika pikoyi pishirontyaawo tsinani tekatsirika piina, omaanta pimatero piweshiryaanakya, aritaki kameetha eero payi piina.

### *Jesoshi ramanakotakari eentsipaeni*

(Mr. 10.13-16; Rk. 18.15-17)

**13** Eejatzi ramaetakiniri riraga Jesoshi eentsipaeni. Ikantapaakiri ashitariri:

—Pioneeronkawakiri neentsitepaeni, pamaneri Tajorentsi ineshironkatenari.

Nokantawiteeyawakarini:

—Eero pashiiri Awinkatharite.

**14** Omaanta ikantana irira:

—Eero pikatziyakaari. Pishinetenari ipokashitenataa eentsipaeni. Riyotzi irira rameentana. Maawaeni aapatziyanari, ikimityaari irika eentsipaeni rameentana, tema ari reentsitetakyaari Tajorentsi.

**15** Roojatzi ipampitantawakari iitokira maawaeni, ikantziri Tajorentsi:

—Pawa, nokowaki pineshironkateri irika eentsipaenika.

Roojatzi ryaatantanaka riraga Jesoshi, itsipateeyanaanani maawaeni ryotaanewo.

### *Ikenkithawaetakaakiri riraga Jesoshi ashaagantzinkari*

(Mr. 10.17-31; Rk. 18.15-17)

**16** Paashini kiteziri ipokashitapaakiri shirampari, ikantapaakiri:

—Iyotaantatsiri kameethari. Pikamantena, ¿iitaka kameethatatsiri nanteri iroñaaka naari jaka nojeekeanteyaripa janta jenokinta? Nokanteetapaatyeyani.

**17** Ikantawakiri:

—¿Iitaka pikantanarni: “Kameethari”? Tekatsi kameethatzzinkari, apatziro ikameethatzi Tajorentsi. Omaanta pikowakirika piyaate jenokinta, pantero maawaeni ikaminaakimiri Tajorentsi rojankinatakirini Moeseeshi.

**18** Rakanakiri ikantanakiri:

—¿Tsika okantyaaka nanteri?

Ikantawakiri Jesoshi:

—Eero powamaeri atziri, eero pishirontawo tsinani kaari payi, eero pikoshitzi, eero pitheeyakotari paashinipaeni,

**19** pipinkathateri piri eejatzi piniro. Pineshironkateri paashinipaeni atziri: pikimitaaga eerori osheki pineshironkata, ari pikimitzityaari paashinipaeni atziri pineshironkateri.

**20** Ikantanaki:

—Nomonkaatakiro maawaeni iroka eenironi neentsitapaakini roojatzi iroñaka. ¿Oetaka paashini nanteri?

<sup>21</sup> Rakanakiri:

—Pikowakirika pikameethaperotantaneeyaari pithotyeero maawaeni iroka, piyaaate pipimantero maawaeni tzimimotzimiri, piperi owashironkaenkari, rootakirakya kaari pikenkithashiryaaantaneeyawo pipiyotaneero powaagawo, inta pikenkithashiryaaantaneeyawo Tajorentsi, roojatzi pipiyashitanteena, thamerakya poyaataneena naari.

<sup>22</sup> Ikanta rirori ikemantawakari osheki rowashiretanaka. Riyotakotanaka osheki rowaagawo, tee ikowaki ipimantero.

<sup>23</sup> Roojatzi ikanantanakina Jesoshi:

—Kyaaryo nokantzi, osheki opomeentsitzimotari ashaagantzinkari ikowaki Tajorentsi ipinkathariwenante.

<sup>24</sup> Napiitemiro noshiyakaawentemiro: riraga kameeyo opomeentsitzimotakari roshinthateri imooki kithapi. Rowanaaperotaka riraga ashaagantzinkari opomeentsitzimotaperotakari rirori ikowaki Tajorentsi ipinkathariwenteri.

<sup>25</sup> Nokemaeyantawakaaworini ikantakinari Jesoshi, ari notsikanateeyanakarini. Roojatzi nojampitanantanakari:

—¿Ninkama awijakotatsinika?

<sup>26</sup> Roojatzi ramineeyakinani maawaeni, ikanteeyakinani:

—Riraga atziri eero imatziro rowawijaakotya apaniroeni, omaanta Tajorentsi aritaki imatakiro rowawijaakoteri atziri. Kaari imatawita atziri omaanta rirori imatziro oetarika pomeentsiwitachari.

<sup>27</sup> Ikantanakiri Peetero:

—Pamine Nowinkatharite, nookaeyanakironi naaka maawaeni tzimimoteeyawitanarini, noyaateeyantanakimirini. ¿Oetaka nayeri iinja owinawo?

<sup>28</sup> Ikanteeyawakinani:

—Kyaaryo iroka nokamanteeeyemirini, “Nopoñiaaka naaka jenokinta, natziriperotapaaki kipatsiki, Iinja ari otzimae owakirari kipatsi. Naaka nojeeki iinja janta nowinkatharimentoki, nopinkatharitaperote. Eejatzi eeroripaeni pitsipateeyenani pipinkatharieeyeni. Okaate 12 piwinkatharimentopaeni pijekanteeyearini eerori. Pipinkathariwenteeyerini maawaeni joriyopaeni.

<sup>29</sup> Maawaeni ikaatzi ookayitanakirorini ipankopaeni, rirentzipaeni, ritpsiropaeni, iriripaeni, riniropaeni, reentsitepaeni, iinapaeni, iipatsitepaeni royaatatenari, eero ratsipetashiteeyawoni. Riraga Tajorentsi ari roepiyayiteenirini rookaeyawitanakarini. Rookanakirika apaani roepiyayiteenirini Tajorentsi osheki. Eejatzi ikanteetatyeyaanitsipateeyenani janta rañaaperoeyapaeni jenokinta.

<sup>30</sup> Eenitatsi iroñaka osheki pinkatharitatsiri jaka kipatsiki, omaanta eero ipinkathariteeyini maawaeni janta jenokinta: rooma aamashitya apaanipaeni pinkatharitagaantatsini. Eejatzi eenitatsi iroñaka osheki owashironkaenkari, omaanta iinja janta jenokinta ipinkatharitagaantapae rirori”.

## 20

### *Antawaeteeyatsirini janta oowamashiki*

<sup>1</sup> Eekiro riyaatatyye ikamantziri riraga Jesoshi:

—Noshiyakaawentemiro tsikarika ikanta Tajorentsi ipinkathariwenantzi. Ikimikitakari ashitawori roowamashite. Riyaatanaki irira amaetyaaka janta nampitsiki ramineri owiitziniriri roowate.

<sup>2</sup> Iñaapaakiri apaanipaeni kowatsiri rowiiteniri, ikantapaakiri: “Aririka pamitakotena iroñaaka, aririka itziroryaanaki oorya, aritaki nopolatakimi apaani koriki, riraga iitachari tenaaryo”.<sup>\*</sup> Ikantawakiri: “Ari kameetha”. Roojatzi ikanantanakari: “Piyaate iroñaaka powiitenawo”. Roojatzi ryaatanantanaka rowiitziro.

<sup>3</sup> Roojatzi ijenokiityaantapaaka oorya, ryaatanaki janta ramineri owiitziniriri roowate. Iñaapaakitziiri janta apaanipaeni jeekashitachari kaari antawaetatsi.

<sup>4</sup> Ikantapaakiri: “¿Tee pikowaeyini eerori powiitenen noowate? Aritaki nopolatakimi kameetha”. Rakanakiri: “Jee, aritaki nowiitakimiro”. Roojatzi ryaatanantanaka rowiiteniri.

<sup>5</sup> Tampatsika oorya ryaatanaki eejatzi janta ramine paashini owiitakoterini roowate. Ragaatzia paashini rotyaatankiri rantawaete. Eejatzi tsiteni-teni piyanaa raminaatzi paashini amitakoterini. Iñaakitzi apaanipaeni kaari owiitatsi; rotyaatankiri rantawaete eejatzi.

<sup>6</sup> Tsiteniityaaperotanaki, riweyaantapanaatawo raminapanaaatzi paashini, roojatzi iñaantapaaka jeekashitzinkari tekatsi rante. Roojatzi ikanantapaakiri: “¿litaka pithotyaakotziri jaka, tekatsima pantawaero?”

<sup>7</sup> Rakanakiri: “Tekatsi antawaetakaenani”. Roojatzi ikanantanakari: “Thame pamitakotena, powiitakotena noowate. Aritaki nopolatakimi kameetha”. Jatanaki.

<sup>8</sup> Rootzimateentsi itziroriimate oorya, roojatzi ikanantanaka ashitawori roowamashite. Ikantakiri jewatakaantzirori antawaerontsi: “Pikaemeri antawaeteeyatsirsini pipinateeyerini. Pitanakyaari pipinateri riraga impaetaperotapaentsiri rantawaetzi roojatzi pithonkanteeyaaari pipinateri maawaeni iriranki roojatzi ikaati antawaeteentsiri amaetyaaka”.

<sup>9</sup> Roojatzi ipokantapaaka riraga impaetapaentsiri rowiitziro. Eechonki-ini rantawaetaki irirapaeni omaanta ipinatawakiri maawaeni apaani tenaaryo.

<sup>10</sup> Roojatzikya ipokantapaaka rirori itakawori rantawaetapaaki amaetyaaka. litakaashiwitaka ari ipinataperoetakiri osheki omaanta ipinatawakiri tenaaryo eejatzi.

<sup>11</sup> Iñaatziiri raawakirira iyorikite roojatzi ikiñaanikowenantanakariri owiitakaakiriri,

<sup>12</sup> ikantanakiri: “¿litaka nomonkaatantakariri owakira pokapaentsiri rantawaetzi? Pipinatakina okaatzira pipinatakiriri rirori. Tema naaka nantawaetaki amaetyaaka roojatzi tsiteniutene eejatzi osheki natsipetakari ijaawanka oorya. Okameethawita pipinaperotenami oshekyaajeeni koriki”.

<sup>13</sup> Ikantawakiri: ‘Niyompari, tee namatawitzimi; nopolinaperotakimi kameetha. Eejatzi tema nokantakimi amaetyaaka: ‘Nopinatempi apaani tenaaryo’. Eejatzi pakakina: ‘Jee, aritaki, kameethataki’.

<sup>14</sup> Iraka piyorikiteka paanakiri, piyaate pipankoki. Nopantakariri iraka impaetapaentsiri rantawaetzi ikaatzira nopolimiri eerori. Aritaki nokowakaawo naari rootaki nopolantakariri.

<sup>15</sup> Tema okameethatzi nopolashitakari noorikite. ¿litaka kaari pikowakaantana noneshironkateri? Rootaki ikantakiriri riraga ashitawori roowamashite.

<sup>16</sup> Naakiro, riraga Tajorentsi iñaaperoeyakirini aapatziyakariri osheki ojarentsi ikameethataki; eejatzi iñaaperoeyakirini riraga aapatziyakariri iroñaaka ikameethatzi. Tema imonkaatawakaeyakani maawaeni,

\* **20:2** Tenaaryo rirotaki ikithoki koriki monkaatachari antawaerontsi apaani kitejiri.

rowawijaakoeyakirini, omawitya raapatziyari osheki ojarentsi, rooma eechonkiinirika".

Rootaki ikantziri riraga Jesoshi, roojatzi itharyaakaanakina.

*Rapiitana Jesoshi ikamanteeyakinani rowamaeteri*

(Mr. 10.32-34; Rk. 18.31-34)

<sup>17</sup> Ikantaka Jesoshi itonkaakagaeyakinani janta Jerojareeki. Ari niyanki awotsi roojatzi riyoshiitakanina naakapaeni Riyotaanewopero 12 ragaeyanakinani intyañaampiini. Ikamanteeyakinani:

<sup>18</sup> —Iroñaaka piyoteeyakini atonkagaeyatyeeni janta Jerojareeki. Nopoñaaka naaka jenokinta, natziriperotapaaki jaka, omaanta rooteentsi omonkaatyua raanteetenari ragaeyenani jewawentayitzirininaa nakanowenantatsiri eejatzi iyotaantayitzirorini Iwaperite Tajorentsii. Ikanteeyenani: "Osheki tee pikameethaperotzi, rootaki pikamantyaari".

<sup>19</sup> Roojatzi raantena janta kaari yotziri Tajorentsi ikantapaakiri: "Irika Jesoshi payeri, powamaeri". Ari ishirontawenteeyawakinani rirori. Ipajajaatawakina, ikentakotakaantawakina inchapankeki ikanteetziri koroshi, roojatzi nokamantakya. Okaatapaakirika kitejiri 3 roojatzi ipiriinanteena Pawa añaagaana eejatzi.

Rootaki ikanteeyakinarini.

*Iyaatashitakiri Jesoshi iina Sewereeyo*

(Mr. 10.35-45)

<sup>20</sup> Roojatzi opokashitantapaakari riraga Jesoshi iina Sewereeyo. Otsipatapaakari otomi apite, iitachari Jantyaako eejatzi Jowa, riraga apite Riyotaanewo, otiwierowashitapaakari, okantapaakiri:

—Nokowaki pineshironkatena.

<sup>21</sup> Ikantawakiro:

—¿Oetaka pikoyiri?

Okantziri:

—Aririka iinja pipinkatharitaroperotapae nokowakaakiri apiteka notyomi itsipatemi: apaani jeekatsini pakoperoki, paashini pampateki. Ikaatemi itsipateeyemini pipinkathariteeyini.

<sup>22</sup> Rakanakiro Jesoshi:

—Tee piyotzi oetarika pikowakotanari. Pamine, rooteentsi nokemaatsityaawo osheki katsiri naari. Rooma patsipetashitakawo eerori teerika imatziro ikimitana naaka nokemaatsityaawoka osheki katsiri.

Ikantanakiri otomipaeni:

—Aritaki nomatakimiro naari.

<sup>23</sup> Roojatzi ikanantakari:

—Kyaaryo aritaki pikemaatsiteeyakyaawoni, omaanta naaka eero nomatziro nokantzimi ninkarika jeekimotenani iinja nakoperoki, nampateki; apatziro yotsatsiri Pawa jeekatsiri jenokinta ninkarika ikashiyakayitakarini paerani jeekatsini.

<sup>24</sup> Nokemaeyantakaworini naaka Riyotaanewopaeni iroka ikantakiri roojatzi nokijanteeyanakarini riraga Jantyaako eejatzi Jowa. Nokijanteeyanakaririni ikowaeyawitakityaani ipinkathariteeyenimi.

<sup>25</sup> Roojatzi ikaemanteeyakinani Jesoshi naakapaeni Riyotaanewo, ikanteeyakinani:

—Piyoteeyakini eeroka riraga iwinkatharitepaeni kaari yotziri Tajorentsi rameteeyawoni romperateeyarinii isheninkapaeni.

<sup>26-27</sup> Omaanta eerokapaeni eero pikimitakoeyarinii. Eero pomperataneeyanii eerori. Pikowakirika peewawanante, pamitakoeyerinii kameetha

atziripaeni: petakotyaari, eero pomperatashiteeyarini. Panteniri kameetha maawaeni oetarika ikowakoeyemirini.

**28** Pikitmitakotena naaka. Tee ro nopolantyaari naaka jaka kipatsikka nopoleratayitapaakimini, inta nopolantari jaka namitakoeyemini, noneshironkateeyemini, nokamawenteyemini nopolinawenanteeyemirorini kaari kameethatatsi pantziri eerokapaeni maawaeni pawijakotanteeyaaari, eero rowashironkaanteemi Tajorentsi.

*Retsiyatakotakaakiri riraga Jesoshi kaari kokichaatatsi apite  
(Mr. 10.46-52; Rk. 18.35-43)*

**29** Rookaeyakaanaanawoni Jesoshi nampitsi owaero Jerikoo. Ikinneeyanakini janta awotsiki itonkaakaantyaariri Jerojareeki. Royaateeyakirini osheki atziri.

**30** Eenirop ijeekaki jaga othapikira awotsi irira kaari kokichaatatsi ikaatzi apite. Ikamanteetakiri:

—Kaakitaki Jesoshi.

Roojatzi ikaemantawakari, ikantziri:

—¡Pineshironkatenal! ¡Rooma eero ka icharineeteni Iraviirini!

**31** Roojatzi ikiyathatakiri piyotaneenchari, ikantteyawakirini:

—¡Pimaerite!

Eekiro ikaematzii, ishntsithatakiri ikaemakiri:

—Nowinkatharite, pineshironkaten. Rooma eero ka naamagaeyakarini, eerkataki icharineeteni Iraviirini.

**32** Ikatziyapaaka riraga Jesoshi, ikantapaakiri:

—¿Oetaka pikoyiri namitakotemiri?

**33** Ikantawakiri:

—Nowinkatharite, nokoyi pikokichaatakagaena.

**34** Roojatzi ineshironkatapaakiri, ipampyaakitapaakiri rokikira. Kokichaatanee, roojatzi royaatantakari osheki riweshiryawentanakari.

## 21

*Rareetya riraga Jesoshi Jerojareeki, ikiyakotakari ewankari wooro  
(Mr. 11.1-11; Rk. 19.28-40; Jowa 12.12-19)*

**1** Rootzimatapaentsi nareetya Jerojareeki, ari nareetapaakyaawo Wetejajee jeekatsiri janta tonkaariki owaero Oriiwomashi. Roojatzi rotyaanantakari riraga Jesoshi apite riyotaanewo,

**2** ikantakiri:

—Thame peewate jaga nampitsiki, aririka piñaappaakiri wooro tsinani othatakotaka otsipatakari otomi ewonkiri poojoryaakotapaakiri. Pamakinari jaka.

**3** Aririka ikanteetawakimi: “¿Itaka poojoryaakotantawori?” pikanteri: “Ikowatziiro Awinkatharite”. Ari roepiyemiri intsipaete. Roojatzi ikanantanakimi: “Paanakiniri”.

**4** Ranantakawori iroka, imonkaatziro rojankinatakotzitakaririni paerani kamanantzirorini iñaani Tajorentsi iitachari Jakariiyashi. Ikantzitakani:

**5** “Pikanteeyerini jeekaeyatsirini janta Jerojareeki: ‘Paamayari iinja Piwinkatharite, kaakitaki. Osheki ikameethaperotaki. Tee riyotzi ikantakaaperota, ikyakotapaakyaaari ewonkiri wooro’”.

**6** Roojatzi riyaatanaki riyotaanewo apite iñaappaakitziiro wooro tsinani otsipatari otomi ewonkiri, roojoryaakotapaakiro, ramakiniri.

**7** Ramakiri apite. Nowankitakiniri imitzikaakira kithaarentsi, roojatzi ikyakotantakari Jesoshi.

8 Osheki atziri kinantanakawori janta awotsiki iñaawakiri, eejatzi iñaaperoeyawakirini maawaeni: ishitashitaantakiri\* awotsiki imaathaapaeni ikinapaakirapa wooro. Paashinipaeni ichoonkayitakironi kompiroshi ishitashitakiri awotsiki ikinapaakinta wooro.

9 Osheki atziri jewateeyakiririni awotsikira. Osheki paashini impaeteentsiri eejatzi. Osheki ikimoshirewenteeyanakirini. Roojatzi ikaemaeyanakini, ikanteeyanakini:

—¡Paminerri irika, rirotaki icharineetenri Iraviirini aamagaeyakarini!  
¡Thame apinkathateeeyerini!      ¡Rotaantakiri Awinkatharite!      ¡Thame añaaperooyerini!      ¡Tema iñaaperotakiri riraga Tajorentsi, tema ikameethaperotzi!

10 Roojatzi rareetakaantapaakina Jerojareeki. Ikemakoeyawakirini maawaeni jerojareejatzi, rojampitawakagaeyanakan:

—¿Ninkama irika pokapaentsirika?

11 Rakaeyapaakirini paashinipaeni pokaentsiri:

—Rirotaki Jesoshi, riraga kamanantzirorini iñaani Tajorentsi jeekaw-itachari paerani Najareeteki, rowaga nampitsi janta Karireeyaki.

*Rookaeyakirini Jesoshi pimantayitatsirini janta Tajorentsipankoki  
(Mr. 11.15-19; Rk. 19.45-48; Jowa 2.13-22)*

12 Ikantaka Jesoshi ikyakaapaakina janta Tajorentsipankoki. Iñaapaakitziri janta inthomaenta osheki amanantatsiri eejatzi pimantatsiri, rootaki opoñaantanakari rookaeyapaakirini maawaeni irirapaeni. Tema rotatsinkitawaetapaakirini maawaeni imeejate riraga kaampiyawakaayitanaririni iyorkite. Eejatzi ikimitzitakari rirori pimantatsiri jamomo rotatsinkitayitapaakirini maawaeni imeejatepaeni.

13 Roojatzi ikanteeyanakirini:

—Okantzi Iwaperite Tajorentsi: “Ikantzi Tajorentsi: ‘Iroka Tajorentsipankoka okameethatzhi pikenkithatakapinteeeyenani, omaanta eerokapena pikoshitashiteeyakarini atziri pokaeyawitacharini jika Tajorentsipankokika’”. Tee okameethatzzi iroka panteeyakirini.

14 Eejatzi janta ipokashitapaakiri oshekini kaari kokichaatatsi, eejatzi kijopookitatsiripaeni. Retsiyatakoeyawakirini.

15 Riraga jewawentayitziririni ñaanakowenantatsiripaeni eejatzi riraga iyotaantayitzirorini Iwaperite Tajorentsi iñaakirira okaatzi rantakiri. Eejatzi ikemakirri osheki eentsipaeni ikaemaeyakini:

—¡Osheki okameethaperotaki rantayitakirini Jesoshi!      ¡Thame añaaperooyerini!      ¡Tema rirotaki icharineetenri Iraviirini!

Omaanta tee inimotanakiri riraga jewawentayitziririni ñaanakowenantatsiripaeni iroka iñaakiri eejatzi ikemakiri. Rootaki ikijantaperotanakari osheki.

16 Roojatzi ipokashiiyantapaakarini Jesoshi, ikantapaakiri:

—¿Pikemaeyakirini inkaaganki ikantakimiri riraga eentsipaeni? Tee okameethatzzi iroka ikantakimirika. Tee okameethatzzi ipinkathateeeyemini. Rakanakiri:

—Jee, nokemaeyakirini. Tekirama piñaanatziro Iwaperite Tajorentsi kantakotzirori: “Iñaaperooyerini eentsipaeni owawijaakotantsiri iinja”.

17 Roojatzi riyaateeyakaantanakinani janta Wetaaniyaki. Ari nomaa-paaki.

\* 21:8 Rootaki rameteeyarini rirori joriyopaeni ishitashitaantayitzirini pinkathari imaathaaki ipokerika.

*Rowamaakiro Jesoshi iyeera  
(Mr. 11.12-14, 20-26)*

<sup>18</sup> Okitejitanaki ipieeyakaanakinani janta Jerojareeki. Ari niyanki awotsi itasheyapaaki Jesoshi.

<sup>19</sup> Iñaaapaakiro awotsinampiki chochoki iitachari iyeera, oshiyawitawo potooki. Ikwawitapaaka ithotemi okithoki, omaanta tekatsi; apatziro iyotashitaka oshi. Teera iñaaapaakiro okithoki roojatzi ikanantanakawo:

—Eero iroñaaka papiitero pikithokite ithotanteemiri atziri.

Okantaka rowaga iyeera jampiyashitanaki intsipaete.

<sup>20</sup> Inkaamani aririka rawijakagaeyanakinawoni rowaga iyeera, noñaaawakirowa ojampishitanaki intsipaete roojatzi nokenthashiryaakoeyanakironi. Rojampieetakiri riraga Jesoshi:

—¿Tsika okantanakaka ojampirinkashitantanakari intsipaete rowaga iyeera?

<sup>21</sup> Ikantawakina:

—Kyaaryo, aririka eekiro piyaatatye tameentaperotaari Tajorents, aritaki imatakaakimiro pantero kimitaworika piñaakirika iroñaaka. Eejatzi pikanteririka Tajorents: “Poshirinkero iroka tonkaari janta inkaarekinta, aritaki imatakaakimiro”.

<sup>22</sup> Pameentaperotaaririka, aririka pamaneri, aritaki imatakaakimiro oetarikapaeni pikowakoteriri.

Roojatzi itharyaakagaeyanakinani Jerojareeki.

*Ikanteetakiri Jesoshi: “¿Ninkama otyaantzimiri?”*

*(Mr. 11.27-33; Rk. 20.1-8)*

<sup>23</sup> Ikantaka Jesoshi ipiyakagaeyakinani Tajorentsipankoki, ikyaki riyotaantapaaki. Roojatzi ipokashitantapaakariri riraga jewawentayitziririni ñaanakowenantsiri eejatzi riraga aataperoteenchari, ikantapaakiri:

—¿Ninkama otyaantaperotzimirika piyotaantariri joriyyopaeni eejatzi pet-siyatakoeyantakaririni? ¿Ninkama otyaantzimiri pookantapaakariri pimantatsiri chapinki?

<sup>24</sup> Ikantawakiri:

—Eejatzi naari, nojampitemi apaani. Aririka pakawakina, aritaki nokamantanakimi ninkarika otyaantakinari.

<sup>25</sup> ¿Ninkama otyaantakiriri Jowa ikaawoshitakotantariri Tajorents joriyyopaeni? ¿Riotakima Tajorents otyaantziriri? ¿Atzirima otyaantziriri?

Roojatzi ikantathatawakagaeyantanakan:

—Akanteririka: “Tajorents otyaantakiri”, ikantanakaekari: “¿Itaka kaari paapatziyantarikya?”

<sup>26</sup> Omaanta akantakiririka: “Atziri otyaantakiri”, ikijanakaekari atziri-paeni. Tema maawaeni iitashitari Tajorents otyaantakiriri Jowa riyanaanantari.

<sup>27</sup> Roojatzi ikantapaakiri:

—Tee niyotzi ninkarika otyaantziriri.

Rakanakiri rirori:

—Eejatzi nokimitzitaka naari, eero nokamantzimi ninkarika otyaantakirini nanantawori piñaakotakinaria.

*Roshiyakaawentakiniri riraga ñaanakowenantsiri ashitachari apite itomi*

<sup>28</sup> Eejatzi ikanteeyakirini riraga Jesoshi:

—Noshiyakaawentemiri ashitachari itomi apite; ¿iitaka pikenkithashiryaakotakariri eeroka? Ikantakiri itawori ikoñaatzi: “Notyomi, piyate iroñaaka pantawaete janta noowamashiteki”.

<sup>29</sup> Rakanakiri, ikantawakiri: “Eerowa niyaatzi”. Ikantaka paata ikenkithashiryaanaa, roojatzi riyaatantaa rantawaetzi.

<sup>30</sup> Eejatzi ikantziri paashini itomi: "Notyomi, piyaate iroñaaka, pantawaete janta noowamashiteki". Ikantanakiri: "Ari, pawa, niyaate". Omaanta tee riyaatzi.

<sup>31</sup> Ari, iroñaaka nojampitemi: ¿Ninka kemijantaperotziririka ashitariri ikowakaakiriri?

Ikantakiri:

—Irinta itakawori ikoñaatapaaki, jatatsiri rantawaetzi.

Ikantakiri:

—Kyaaryo iroka nokantemirika: ranaakoeyemini riraga piyotziriri korki ipantyaariri oroomajatz eejatzi rowaga tsinani ñaathapiinteeyawitaririn shirampari kaari oemi. Tema raapatziyakina rootaki imatantakawori Tajorentsi reewawentakiri rajankaneki.

<sup>32</sup> Pamine, paerani ipokawitapaentaga riraga Jowani kaawoshitantsiri jaga riyoteeyawitapaakimini tsika pikantya pijekanteeyari kameetha; omaanta eeroakapaeni tee pikowaeyini paapatziyeeyawakyaarini. Omaanta aapatziyeeyawakaririni riraga piyotziriri koriki ipantyaariri oroomajatz eejatzi rowaga tsinani ñaathawitaririni shiramparipaeni kaari oemi. Piñeeyawitakarini raapatziyeeyawakoni okaatzi riyotaakiriri Jowa rootaki ikameethatantari. Omaanta eeroakapaeni tee pikenkithashiryaaente, tee paapatziyimaetawakari Jowani.

### *Roshiyakaawentakiri Jesoshi aminirori oowamashi (Mr. 12.1-12; Rk. 20.9-19)*

<sup>33</sup> Iroka paashini roshiyakaawenteeyakiniririni riraga jewateeyatsirini ñaanakowenantsiri eejatzi riraga iyotaantayitzirorini Iwaperite Tajorentsi. Ikantakiri:

—Pikemaeyawakinani paashini nokantemiri. Eenitatsi apaani pankitzirori roowamashite. Eejatzi rotantotakotakiro maawaeni othapiki. Eejatzi riwetsikashitakiro tsikarika rawishoowero oowa rowantyaawori owaaga. Riwersikakiro eejatzi pankotsi jenokitatsiri, ijekashitantyaawori aminawiritanteroni oowamashi. Roojatzi riraga ashitarori roowamashite ikantanakiri antawaetzinirripaeni: "Iroñaaka paminenawo noowamashite eejatzi pithamaetakotenawowa. Inja pipashitena kashetani". Rakaeyanakirimi: "Jee, aritaki, nomatakimiro". Roojatzi ryaatantanaka riori paashiniki kipatsi.

<sup>34</sup> Ojamanitakotanaki roojatzi omonkaatantapaaka irakanaki oowapaeni. Roojatzi rotyaanantawitaka ronampiripaeni ashitarori roowate, ikantawitawakiri: "Piyaate iroñaaka janta pikantteri riraga aminanawori noowamashite ipakaantawakina nashi naari". Roojatzi ryaateeyawitanakani, areeteeyapaakanji janta.

<sup>35</sup> Ìñaawakiririka riraga aminayitzirorini oowamashi, rompojawakiri apaani, tok; eejatzi paashini rowamaawakiri, shemi; omaanta paashini rompojantawakiri mapiki, shemi.

<sup>36</sup> Ikanta riraga ashitarori roowamashite eekiro rotyaanantakitz ronam-piripaeni. Ikantaka aminirorira oowamashi ithonkawakiri, rowamaakiri ikimitaakirira paashini jewatapaentsiri.

<sup>37</sup> Roojatzi ikenkithashiryaaanaka ashitarori roowamashite ikantzi: "Iroñaaka notyaanteri notyomi. Aamaaka eero rowamaawakiri irira. Rirotaama ipinkathatawakiri". Roojatzi rotyaanantawitanakari itomi.

<sup>38</sup> Ikantaka Ìñaawakirira roojatzi ikantawakaantanka: "Kaakitakira riraga itomi ashitarori roowamashite. Aririka ikamaki paata ashitariri, rirotaki poyaateeyaaarini iriri; tema rirotaki ashiteeyawoni. Iroñaaka thame owa-maawakiri. Aakoteerooota aaka roowamashite".

**39** Roojatzi roerikawakiri shepik, raanakiri janta othapiki, rowamaakiri, shemi.

**40** ¿Oetaka pikenkithashiryari eeroka? ¿Ipokaerika ashitawori roowamashite tsika ikanteeyapaakirinika riraga antawaateeyawitanaririni roowamashiteki?

**41** Rakaeyananakirini:

—Ari rowamaeyapaakirini maawaeni, roojatzi raminanteeya paashini riroperotatsiri amineenirini eejatzi pakaantapiintenirini irakapaetetaneerika rotyaanteeniri riori rashityaari.

**42** Roojatzi ikantawakiri riori Jesoshi:

—Tekirama piñiilo okantziri Iwaperite Tajorentsi:

“Itheenkakiro mapi riraga wetsikirori pankotsi, omaanta iñaaperotakiro Tajorentsi okameethatzzi: tema okijotakaakiro maawaeni pankotsi. Rooma ikameethataki Awinkatharite, tema otsikanatakaworoña maawaeni rantziri”.

**43** Rootaki nokanantakimiri: eero piñeyirini Tajorentsi eerori ipinkathari-wenteeyeminimi. Omaantakya reewawenteeyerini paashinijatzitsiri atziri: riraga pinkathataperoeyakiririni eejatzi aapatziyaperoeyakaririni.

**44** Naaka oshiyakawori rowaga mapi: tema nokenkithatakotziro kameethaperotatsiri. Ninkarika kaari aapatziyawakyaawoni kyaaryooperotatsiri, aritaki rowashironkaaky: riyaate janta ikemaatsityaawonta, ashi rowaero.

**45** Riraga jewawentayitziririni ñaanakowenantsirsipaeni eejatzi riraga warijeeyopaeni ikemaeyantawakaworini roshiyakaawentayitakinirini Jesoshi roojatzi ryotakoeyantawakawoni rirotaki irirapaeni roshiyakaawenteeyakirini. Tema tee raapatziyari riori.

**46** Ikowaeyawitanakani raakaanterimi Jesoshi omaanta ithaawan-teeyakarini atziripaeni. Ryotaki atziripaeni riraga Jesoshi rirotaki kenkithatakotziriri Tajorentsi, rootaki kaari raantari.

## 22

*Roshiyakaawentakiri Jesoshi kaemakaantawitariri atziripaeni rowakaeyaari*

**1** Rapiitakiniri eejatzi Jesoshi roshiyakaawentakiniri piyotawen-teeyakarini, ikanteeyakirini:

**2** —Noshiyakaawentemiro tsika ikanta Tajorentsi ipinkathariwenantzi. Ikimitakari riraga pinkathari. Eenitatsi itomi owakira aatsiri iina. Ikan-taka riraga ashitariri ikowaki riweshiryawentyaari itomi, rootaki ikae-makaananteeyakaririni inampijatzi rakiyoteri rowakayaari.

**3** Rotyaantakiri apaanipaeni ronampiri romiñaawitakitarit atziripaeni ipokeeta rowayaani, omaanta tee ikowaeyini ipoke.

**4** Rapiitakir rotyaantawitanakari paashini ronampiripaeni, ikantaw-itakari: “Piyaatare pikamantaateriita riraga ikamantakitzirira inkaaganki itawitakitariri: ‘Pojataki kaniri eejatzi iwatha, oyitaka maawaeni’. Thame powakitya”.

**5** Omaanta riraga romiñaawitakitarit tee ikowaeyini ipoke. Jateeeyakini tsikarikapaeni: riyaatzi apaani janta rowaneki, paashini ikinanaki riyomparita.

**6** Omaanta paashinipaeni ragaeyawakirini rotyaantaw-itakari, ranteetawakiri pok, pok; ipajapajaateeyakirini osheki rowashironkaeyakirini roojatzi rowamaantakari.

<sup>7</sup> Ari ikemaki riraga jewatatsiri, antawo ikijanaka. Roojatzi rotyaanantanakari joraaropaenri riyaate rowamaeri owamaantatsiriipaeni. Riraga joraaropaenri ithonkakitziri maawaeni, eejatzi ipankopaeni rootakiro maawaeni.

<sup>8</sup> Roojatzi ikanantanakari paashinipaeni ronampiri. "Mataka maawaeni owanawontsi oyitaka. Omaanta riori ikanteeyawitakitarini inkaaganki: 'Tee ikameethatzi', tekatsi okantya ipokanteeyaarini, rooma tee ikameethatzi.

<sup>9</sup> Piyaatanaki iroñaaka janta awotsikipaeni antawopetatziki, pomíñaanakiri maawaeni piñaanakirira. Pikanteri: 'Thame nakiyotemi kaniri: rooma aaki notyomí iina'".

<sup>10</sup> Ikantaka ronampiripaeni jateeyanakini, ramayitapaakirini ikaatzi iñaaityakitzirini janta, kameethatzinkaripaeni eejatzi kaari kameethatzinkaripaeni. Rareetakagaeyakarini ipaeyapaakirini kithaarentsi rooperori.

<sup>11</sup> Roojatzi ikyaantapaaka riori jewawenantatsiri riwethatantawakari pokayiteentsirinipaeni, raminapaaki jaga; roojatzi iñapaakiri apaani shi-rampari kaari kithaattacha kameetha.

<sup>12</sup> Itonkiyotapaakari, ikantapaakiri: "Niyompari, nopawitanakimi inkaaganki kithaarentsi kameethari pikithaawentyaarimi notyomi oemoshiryaantyhaariri. ¿Itaka kaari pikithaatantawo?" Omaanta imaeeritashitaka.

<sup>13</sup> Roojatzi riraga pinkathari ikanantanakari ronampiripaeni: "Payeri irika poojoteri rakoki eejatzi iitziki, pookeri intena otsiteniperotzinta rowaga paamariki kaari tsiwakanitatsini, ashi royero riori janta, riraya eejatzi ratsikaekitya tyakiririri, osheki ikemaatsityaawo".

<sup>14</sup> Ñaakiro, eejatzi ikimiwitaka Tajorentsi, ikaemakaantawitakari maawaeni atziri rawijakotanteeyaarimi, omaanta eero roshekitzi kyaatsini, apatziro apaanipaeni owawijaakotaachani.

### *Riyotaakiri Jesoshi warijeyopaeni ranteniri pinkathari ikowakaeriri (Mr. 12.13-17; Rk. 20.20-26)*

<sup>15</sup> Ikanta ikiyeeyanakanri riraga warijeyopaeni roojatzi ishitowantanaa ikenkithatakawakagaeyakani, ikanteeyini:

—¿Tsika akanterika Jesoshi akompitakaantyaariri, akijakaantyaariri?

<sup>16</sup> Roojatzi rotyaanteeyantakarini irirapaeni riyotaanewopaeni itsipateeyakarini riraga oyaateeyiririri Erooreshi. Ipokashitakiri Jesoshi, ikantakiri:

—Iyotaantatsiri, niyotzi piñaawaetziro rooperotsiri: tee pitheeya. Eejatzi kameetha piyotaantziro Iwaperite Tajorentsi eejatzi eero pikemijantap-erotziri atziripaeni oetarika ikantawitemiri rirorika pinkathari kaaririka pinkathari. Eekiro piñaawaetzirio kameethatatsiri.

<sup>17</sup> Iroñaaka pikantena oetarika pikenkithashiryaaari. ¿Okameethatzima aperi pinkathari, riraga Seesari ayorikite? Tema irira kaari joriyyo. ¿Terikama okameethatzi?

<sup>18</sup> Riraga Jesoshi ryotakotakiri ikowaeyawitakani ramatawiterimi ikom-pitakaantyaariri. Rootaki ikanantanakariri:

—¡Eerokapaeni oshiyakaawaetashitachari paapatziyarimi Tajorentsi! ¿Itaka pamatawitantenarimi?

<sup>19</sup> Poñaayenari koriki pipapiintziriri oroomajatzi.

Roojatzi ramantakanari apaani ikithoki koriki iitachari tenaaryo.

<sup>20</sup> Roojatzi ikanantawakari:

—¿Ninkama ashitawori ipoo owakoteencharika? ¿Tsikama itzimika ashita-wori iwaero jankinateencharika?

**21** Rakanakiri:

—Kaarima riraga Seesari.

Roojatzi ikanantanakari:

—Panteniri irinta ikowakaakimiri; eejatzi pantzityaanari riraga Tajorentsi ikowakaakimiri.

**22** Ikemaeyantawakaworini maawaeni iroka, ari rotsikanateeyanakarini, tekatsi paashini ikantaneeriri. Roojatzi rookantanaari: jateeyaneeni.

*Ikamantakiri Jesoshi saroseeyopaeni "Kyaaryo, apiriintee eejatzi"*  
(*Mr. 12.18-27; Rk. 20.27-40*)

**23** Roojatzi ipokapaaki saroseeyopaeni. Iitashiwitakawo eero apiriinta añaagae eejatzi, eero aatzi jenokinta. Ipokashitapaakiri, ikantapaakiri riraga Jesoshi:

—Iyotaantatsiri, ikantzini Moeseeshi: “Eenitatsirika shirampari iina, omaanta tekatsirika itomi, aririka ikamaki, okameethatzi ragaero iinani rirentzi itzimakaanteyaaawori otomi. Itzimapaakirika otomi kimiwitanaka rirotaki ashityaarini rirentzini itomi”.

**25** Paerani eenitatsi atziri ikaateeyini 6 rirentzi. Itanakawori rantaritzi raawitaka iina, omaanta tee itzimakaero eentsite. Ikamashitaka. Ikantaka paashini rirentzi roojatzi raantawitaawo riori.

**26** Eejatzi riori tee itzimakaero eentsite. Ikamashitaka riori. Eejatzi ikimitteyakani maawaeni rirentzipaeni, aawitawori iinani rirentzini. Tee itzimakagaeyironi eentsite. Ikamashiteyakani maawaeni.

**27** Impaete okamae roori.

**28** Aririka ipiriinteyaneeni iinja, ¿ninkama iinannteeyaaawoni? Tema iinan-teeyakawonika paerani maawaeni.

**29** Roojatzi ikanantanakari riori:

—Osheki pikompitakawo. Tee pikemaperotziro okantziri Iwaperite Tajorentsi, eejatzi tee piyotakoperotziri itajorentsiperotaki.

**30** Aririka ipiriinteyaneeni rañaagae eejatzi, tekatsi agaeroni iinja. Maawaeni piriintaachani eero ragae iinapaeni. Omaanta ikimitakoeyaarinia ronampiripaeni Tajorentsi jenokinta.

**31** Riraga kamaawitachari ari ipiriintee iinja, tema piñaanatziro ikantziri Tajorentsi iwaperiteki:

**32** “Naaka Tajorentsi, raapatziyanewo Awaraama, Ijaaka, Jakoowo”. Ñaakiro, tee ikantzi: “Raapatziyawitanaga paerani”. Omaanta eeniro añaishiire janta jenokinta, roojatzi ikanta raapatziyari iroñaaka rootaki ipinkathariwenantariri Tajorentsi.

**33** Ikemantawakawori iroka riraga piyotawenteeyakaririni ari imaeri-yanakini, rotsikanateeyanakarini, ikanteeyanakini:

—Kameetha ryotaantzi Jesoshi.

*Ikamantziri Jesoshi oetaka okowakaaperoteeri Iwaperite Tajorentsi*  
(*Mr. 12.28-34*)

**34** Ikemaeyantakaririni warijeeyopaeni kameetha rakakiri riraga Jesoshi saroseeyopaeni, romaeryaakiri ipiyoteeyakani ipokashiteyapaakirini riori.

**35** Ikowawitaka ikompitakayaarimi warijeeyopaeni. Ikaatziri apaani iyotaantzirori Iwaperite Tajorentsi, riyoperotziro okantziri. Ikantawita-paakari:

**36** —Iyotaanari, eenitatsi osheki iyotaakaeri Iwaperite Tajorentsi: ¿tsika otzimika kameethaperotatsiri kaminagaantsi akemijantaperoteri?

**37** Ikantawakiri riori:

—Rootaki iroka kameethaperotatsiri: “Pinintashireperoteriroña kameetha Tajorentsi, riraga Awinkatharite. Pikyaaryoowentero pinintashireperoteri maawaeni pajankaneki, eejatzi maawaeni pishireki, eejatzi pikantyaani pikenkithashiryaaapiintyaari”.

<sup>38</sup> Rootaki anaakotantaperotatsiri maawaeni kaminagaantsi Iwaperiteki Tajorentsi.

<sup>39</sup> Eenitatsi paashini, kimitawori: “Okimita osheki pinintaperotaka eerori, pikimiteerira paashinipaeni atziri, pinintaperoteri maawaeni”.

<sup>40</sup> Aririka pantero iroka, aritaki pimonkaatero maawaeni rojankinatzirini paerani Moeseeshi, eejatzi rojankinatzirini riraga kamanantayitzirorini iñaani Tajorentsi.

### *¿Ninkama iriri Jesokirishito?*

(Mr. 12.35-37; Rk. 20.41-44)

<sup>41</sup> Eenirowa ipiyoteeyakaní warijeeyopaeni,

<sup>42</sup> rojampiteeyakirini Jesoshi:

—¿litaka pikenkithashiryaaakotziriri Rotyaantanewo Tajorentsi, riraga Owawijaakotantatsini? ¿Ninka tomintaririka?

Ikanteeyananakirini:

—Rirotaki icharineetení Iraviiri.

<sup>43-44</sup> Ikantakiri:

—Paerani ojakinataakaikirini Ishire Tajorentsi Iraviirini, ikanantariri Rotyaantanewo Tajorentsi: “Nowinkatharite”. Rooma piyotziro Iwaperite Tajorentsi okantzi: “Riraga Pawa Tajorentsi ikantakiri Nowinkatharite: ‘Pijekimotena nakoperoki, pitsipatena eewawenteri atziripaeni. Pijkeekanaki roojatzi nothonkantakaari maawaeni kijakimirí’”. ¿litakaya ikanantariri riraga Iraviirini paerani: “Nowinkatharite”?

<sup>45</sup> Tema ikenkithatakotzitarini Iraviirini Rotyaantanewo Tajorentsi, ikantziri: “Nowinkatharite”. ¿Tsika ikantyaari Iraviirini ipinkathateeri icharineetení impaetatsiri ijeki? Rooma ametakawo apinkathatziri jewateeri.

<sup>46</sup> Imaeritashiteeyanakaní maawaeni. Tekatsi akaneentsini eechonkiini. Eejatzi paashiniki kitejiri tee rapiiteeri rojampitanerí: ithaawantanakari rapiiterimi rojampiterimi eejatzi.

## 23

*Ikantzi Jesoshi: “Eero poshiyakotari iyotaantawitawori Iwaperite Tajorentsi eejatzi warijeeyopaeni”*

(Mr. 12.38-40; Rk. 11.37-54; 20.45-47)

<sup>1</sup> Ikanteeyakirini riraga Jesoshi piyotawenteeyakaririni eejatzi naaka maawaeni riyotaanewo:

<sup>2</sup> —Irira iyotaantzirori Iwaperite Tajorentsi eejatzi irira warijeeyopaeni rirotaki poyaatariri Moeseeshini ryotaantziro Iwaperite Tajorentsi.

<sup>3</sup> Okameethatzi pikemijantaperotero oetarikapaeni ikantzimirí omaanta eerokya pantziro rantziri. Ikantawitzimi: “Ari pikantya, kameetha pijeki”, omaanta tee ijeki rirori kameetha.

<sup>4</sup> Osheki opomeentsitzimotzimi pantero maawaeni ryotagaeyakimirini, omaanta tee ryoteemi maawaeni okaatzi okantziri Iwaperite Tajorentsi, eejatzi tee ipomeentsiwenzimaetawo rantero rirori oetarika ikantawitakimirí.

<sup>5</sup> Rantashitawo oetarikapaeni piñaantyaariri, piñaaperotantyaariri ikameethatzi. Tema romaawakotakawo eechonkiini Iwaperite Tajorentsi rakoki eejatzi roojoyinatakotzitakawo ipankaki, pikantyaari

kameetha raapatziyaperotakari Tajorentsi. Eejatzi rowaneentashitaka ikithaashitetziitakawo ikantakaaperotashitaka.

<sup>6</sup> Aririka rowaeyani, ikowaperotzi itsipatapiintyaari jewatatsiri. Eejatzi ikimitzitaka janta pankotsiki ipiyotantapiinttarira joriyyopaeni ikowaperotaki itsipatapiintyaari jewatatsiri janta.

<sup>7</sup> Ikantakaaperotashitaka rootaki ikowantakari kameetha piwethateeyaarini janta aririka pitonkiyotaari, eejatzi ikowaki pikanteeyerini: "Iyotaanari".

<sup>8</sup> Omaanta eeroka, eerokya pikimitakotari. Eero pikowanaki ikanteetemi paashinipaeni: "Iyotaanari" iflaaperotantemiri. Maawaeni eerokapaeni pimonkaatawakagaeyakan: eerokataki yeeyipaeni. Apatziro Rotyaantanewo Tajorentsi rirotaki pikanteri: "Iyotaanari". Okameethatzi apatziro piñaaperoteri irira.

<sup>9</sup> Jaka kipatsikika, eero pikantashitari paashinipaeni atziri: "Pawa". Omaanta apatziro pikante Pawa riraga jeekatsiri janta jenokinta, eejatzi piripero eejatzi pirithori jaka kipatsiki. Tekatsi paashini pikanteri.

<sup>10</sup> Eejatzi eero pishinetziri ikanteetashiyitzimini: "Neewatzinkarite". Enitatisi peewatzinkarite papintzite apaani, naaka riraga Rotyaantanewo Tajorentsi.

<sup>11</sup> Pikowakirika peewawenante, pityaawo pamitakotapiinteri paashinipaeni, pineshironkateeyerini.

<sup>12</sup> Aririka pikante: "Naaka Neewawentemi, osheki nokameethatanaki", aritaki ipashiwentakagaeyakimini Tajorentsi. Aririka pikante: "Tee nomatziro apaniroeni, Pawa Tajorentsi, pamitakotenari", roojatzi ramitakotemi, imatakayemiro, kameetha peewawenantyaariri atziri.

Rootaki ikanteeyanarini rirori.

### *Ashironkaamatsitemiini iyotaantzirori Iwaperite Tajorentsi eejatzi warijeeyopaeni*

<sup>13</sup> Roojatzi ikantakiri Jesoshi iyotaantayitzirorini Iwaperite Tajorentsi eejatzi warijeeyopaeni:

—Ashironkaamatsitemiini! Poshiyakaawaetashita paapatziyari Tajorentsi, omaanta osheki pamatawitakiri atziripaeni. Kaari rooperori piyotaakiriri oetarika ikowakaawitariri Tajorentsi riyoteeririm. Ashironkaamatsitemiini iinja powashironkaeyaani osheki. Eero paapatziyari Tajorentsi ipinkatharitakaantemiri pajankaneki, eejatzi eero pishinetziri paashinipaeni atziri raapatziyari ipinkatharitakaantyaariri rajankaneki.

<sup>14</sup> Eeroka oshiyakaawaerintzi pikoyi paapatziyarimi Tajorentsi. Osheki netakotakimi rooma paata ari powashironkaaperoeyakaani. Osheki paapithatakiro opankopaeni kamaentsiripaeni oemi. Tema osheki pojanthaashitawo pamanawaetashitari Tajorentsi. Omaanta tee paapatziyawo iňaani, rootaki rowashironkaantaperotemiri osheki iinja.

<sup>15</sup> Eeroka poshiyakaawaetashita paapatziyarimi Tajorentsi. ¡Ashironkaamatsitemiini! Pamatawitantaki osheki rootaki powashironkaanteeyaaarini iinja. Piyaate tsikarika piyotaantawityaaririni paashinijatzitsiri atziri ipeyanteeyari joriyyo roshiyantemirim ierori rootaki ryaatanteeyaaarini rirori janta paamariki kaari tsiwakanitatsini.

<sup>16</sup> Osheki rowashironkaaperoeyemini Tajorentsi. Pikimitakoeyakarini kaari kokichaatatsini ikathatziri paashini kaari kokichaatatsini. Rooma tee piyotziri Tajorentsi rootaki kaari pimatantawo piyoteeri kameetha paashinipaeni atziri. Pikantashita: "Aririka akante: 'Tema ojeeki Tajorentspango jaga, piyotantyaari eero namatawitzimi', pikenkithashiryaaashita

okameethatzi pamatawitante. Omaanta aririka pikante: 'Tema ijeeki oor-tatsiri pinatachari osheki janta Tajorentsipankokinta, piyotantyaari tee namatawitzimi', tema kyaaryoopero piñaawaetziro kameethatatsiri. Kaari pamatawitantzi'. Teemaeta piyotziri Tajorentsii oetarika ikowakaakimiri.

**17** ¡Eeroka majontzi! Osheki piñaawaetashitaka. ¿Oetaka kameethaperotatsiri? ¿Ooroma kameethaperotatsiri? ¿Tajorentsipankoma kameethaperotatsiri? Tema rashii Tajorentsii Tajorentsipanko. Rootaki Tajorentsipanko kameethataakaanakiriri ooro ojeekakira.

**18** Eejatzi tee okameethatzi pikantashita: "Aririka akante: 'Tema ari ojeekaki aritaari ataantapiintanariri Tajorentsii apira, piyotantyaari eero namatawitzimi', aritaki ayotzi kameetha amatawitante. Omaanta aririka akante: 'Tema ari eenitatsi apira owamaakiniri Tajorentsii attakiniri janta aritaariki, piyotantyaari eero namatawitzimi', ari piyotzi eero amatawitanziroño".

**19** ¡Eeroka kaari kokichaagantz! ¿Litaka kameethaperotatsiri? ¿Riotakima pipira? ¿Rootakima aritaari pitaantanariri Tajorentsii pipira kameethatatsiri? Tema rashii Tajorentsii aritaari rootaki ikameethataakanakawori pipira pitaakiniri Tajorentsii".

**20-22** Paminetya, osheki pikantzi: "Tema eenitatsi aritaari ataantapiintanariri Tajorentsii apira", "Tema eenitatsi Tajorentsipanko", "Tema eenitatsi jenokinta", oetarikapaeni. Tee okameethatziroña pikantashitawo, tema piitashiwitaka okameethatzi pamatawitantzi. ¿Piitashitama tee ijeeki Tajorentsii? Tema ijeeki, eejatzi ari rowashironkaawentakimiro maawaeni pamatawitantzia.

**23** ¡Ashironkaamatsitemiini eerokapaeni warijeeyopaeni eejatzi iyotaantzirioripaeni Iwaperite Tajorentsii! Poshiyakaawaetashita paapatziyari Tajorentsii, aritaki rowashironkaaperoyakimini Tajorentsii iinja. Pamine, eenitatsi eechonkiini panteeyawitakarini. Paakirika piyorikite 10, apaani pipakiri Tajorentsii. Paakirika piwankiri 10 meentashi, koraanteroshi, eejatzi tsirikana 10, apaani maawaeni irowa pipakiriri Tajorentsii. Rootaki panteeyawitakarini eechonkiini; omaanta eenitatsi kameethaperotatsiri ikowakaaperotawitakimiri Tajorentsii, omaanta iroka tee pantziro. Ikowakaawitakimiri kameetha pijeeki, eejatzi pineshironkateeyerini paashinipaeni atziri, eejatzi pikyaaryoowenteniri okaatzi ikowakaakimiri rirori. Maawaeni iroka roowitaka kameethaperotawitachari panteeyerinimi. Eekirokyaa impaetanaki pipashityaari apaani oshi, maawaeni paakiri.

**24** ¡Tee piyoteeyini! Pikyaaryoowentawitakawo kaari ikowakaaperotzimi Tajorentsii. Omaanta tee pikenithashiryaaoperotzimaetawo rowaga ikowakaaperowitakimiri.

**25** ¡Ashironkaamatsitemiini eerokapaeni! Poshiyakaawaetashita paapatziyari Tajorentsii, omaanta ari pashironkaperoteeyaani iinja. Pamine, pameteeyawitawoni pikiaeyironi pimirimento eejatzi piwiratote otapiikira, omaanta tee pikiwimaetawo inthomaenta. Rootaki oshtzinatantayitakarini rooma tee pikwiwo. Eejatzi pikimiwitakawo eerori pimirimento. Ñaakiro, osheki pikwayitzironi pakopaeni, pikameethatantyaarimi, omaanta tee paapatziyari Tajorentsii pikameethatantyaarimi. Tema eejatzi piñaawenashiryagaero oetarika pashitantawori apatziro eeroka, osheki paapithatzaatiiri okaatzi rasshitari paashinipaeni.

**26** ¡Eeroka warijeeyopaeni kaari kokichaatatsi: tee piyotziroña pantero kameethaperotatsiri! Aririkami pityaawomi pikameethatanakimii pajankaneke, roojatzimi okameethatzimi iñaaperotantemirimi Tajorentsii, eejatzi atziripaeni.

<sup>27</sup> Ashironkaamatsitemiini eerokapaeni iyotaantawitawori Iwaperite Tajorentsi eejatzi warijeeyopaeni. Osheki pamatawitantaki rootaki rowashironkaanteeyemirini osheki iinja. Pikimiwitakawo omoo impeeta romonkyaatapiinteeitariri kaminkari. Kameetha owaneenkawitaka jeñokiini kitamaawitaka omaanta janta inthomaenta shitzitanaki. Tema yeekitaki itonkipaeni kaminkari.

<sup>28</sup> Ari pikimitzimotakari atziri pikameethatemi, ifñaaperoeyantawitakimirini riroripaeni okaatzi pantziri. Omaanta tee pikameethatzimaeta pajankaneki, osheki pamatawitantzi eejatzi osheki pantapiintakiro kaari kameethatatsi. Tema pitheeyashita.

<sup>29-30</sup> Ashironkaamatsitemiini eerokapaeni oshiyakaawaerintzi paapatziyari Tajorentsi: osheki powashironkaaperoeyaani iinja. Iroñaaka pimoontashiyitakirini kaminkari powantyaanariri itonkipaeni. Eejatzi poshirinkantayiteyaaririni itakaantaworini kamaentsiri paerani, riraga rowamaayitakirini picchariitieni riraga kamanantayitzirorini iñaani Tajorentsi. Powaneenkayitakironi rowaga tonkitsipankopaeni kameetha. Pikitayitantaririni kameethatzinkaripaeni rajankaneki eejatzi pikantayitzini: "Aririkami nokoñaatzityakaami paerani ikoñaatantakari nochariniitieni, eero nokempiyarimi naari nowamaeri rirori, riraga rowamaakirini nochariniitieni".

<sup>31</sup> Tema pikantakotashita eero ka apaniroeni aririka pikanteeyeni: "Nochariniitieni riraga owamaakirini kamanantayitzirorini iñaani Tajorentsi". Pikkantashita: "Eero nakawentziri riroripaeni". Pamatawitashitaka eero ka apaniroeni.

<sup>32</sup> Eejatzi eerori iroñaaka pikimitakoeyakarini. Eerokateeyakini owa-maantatsiri. Aritaki pimonkaatakiro ritakarini rantakiri picchariitieni.

<sup>33</sup> ¡Kimitteyakimini maankipaeni! ¡Tee pikameethaperoeyini! ¿Piitashitama eero rotyaantzimi Tajorentsi paamarikinta kaari tsikanitatsini?

### *Ikanteeyakirini Jesoshi: "Rowashironkagaeyakimini Tajorentsi"*

<sup>34</sup> Eekiro riyaatatayee ikanteeyirini riraga Jesoshi:

—Notyaantemiri iinja paashinipaeni kamanantayiterorini iñaani Tajorentsi, rirotaki iyothaniperotatsiri eejatzi iyotaantatsiri. Notyaantemiri ryoteemi kameethaperotatsiri. Niyotakotakimi eero paapatziyawakari, inta powamaagaantashiteeyawakyaarini apaanipaeni eejatzi apaanipaeni pikentakotakaantawakiri, riraga paashinipaeni pipajapajaatakaantawakiri janta pankotsiki pipiyyontapiintarira eejatzi paashinipaeni pikijagaantawakiri tsikarika ikinayitakini.

<sup>35</sup> Eenitatsi kaari kameethatatsiri pantakiri eerori, rooma inimotakimi eerori ikameeta maawaeni kameethatzinkari: ritanakawo rowamaakiri riraga Aweerini eejatzi ikantanaka paashinipaeni maawaeni riro oweyaantapaakawori riraga Jakariiyashi, riraga itomini Perekiiyashini. Rowamaagaeyakirini picchariitieni janta Tajorentsipankoki okaakiniki aritaari. Aririkami pikoñaatzityakaami eero ka, arimache pakawentakirimii eerori. Ashi poyiro powamaantzi.

<sup>36</sup> Kyaaryootaki iroka nokantemiri. Ari pimonkaatakiro paata iroka nokantakimiri. Ashi poyiro powashironkaeri paashinipaeni atziri kameethari. Rootaki ikanantemiri Tajorentsi: "Eenitatsi pantani".

<sup>37</sup> ¡Ashironkaamatsitemiini jerojareejatzipaeni! Eerokapaeni powamaakiri rotyaantane wopaeni Tajorentsi: tema pompojantakari mapi kamanantayitzirorini iñaani Tajorentsi. Okimitzirranki tyaapa ojatewirinikitziri iyeerikini eejatzi nokimiwitaka naari, osheki netakoeyawitakimini. Nokowaperowitaka nowawijaakoeyemini omaanta eerokapaeni tee pikowaeyini namitakoeyemini.

<sup>38</sup> ¡Pamine sha! ¡iroka pinampika! Eero roojatzi okanteetatyeyaaani ojeeki. Tekatsi jeekatsini iinja.

<sup>39</sup> Eero papiitaana piñagaana. Apatziro piñagaena iinja, pikanteerika: "Kameethaperotaki Jesoshi, rirotaki Awinkatharite, riraga Rotyaantanewo Tajorentsi". Osheki pikimoshirewenteeyanakinani.

Rootaki ikantakiriri riraga Jesoshi.

## 24

### *Inja ishekiroryagaeteero Tajorentsipanko*

(Mr. 13.1-2; Rk. 21.5-6)

<sup>1</sup> Roojatzi riraga Jesoshi riutowantanaa Tajorentsipankoki roowiteenchami riyaaate. Nopokashiteeyapaakirini naakapaeni riyotaanewo naminakagaeyapaakirini notsikanateeyapaakawoni maawaeni Tajorentsipanko.

<sup>2</sup> Roojatzi ikanteeyantanakarini:

—Piñaakiro maawaeni iroka pankotsika. Piñaawitakawoka iroka pankotsi iroñaaka. Iinja eero piñagaero eejatzi. Ari ishekiroryagaeteero maawaeni okaatzti piñaawitakarika.

### *Tsika okantyaaka rootzimateentsirika ipokae Jesoshi*

(Mr. 13.3-23; Rk. 21.7-24)

<sup>3</sup> Roojatzi niyaateeyanakini tonkaariki oetachari Oriiwomashi, notonkaanaki, tonka, tonka. Areeteeyapaakinani tonkaariki, ari imakoryaapaaki Jesoshi, roojatzi niyaatashitapaakiri nokantapaakiri:

—Pikamanteeyenani: ¿tsika okaateka ishekiroryaanteetyaawori ironta pankotsipaeninta? ¿litaka iyotakayenani iinja tsika okaateka pipokantyaari, othonkanteeyari kipatsi?

<sup>4</sup> Ikantanakiri riraga Jesoshi:

—Kyaaryoowa, ramatawiteetzimikari iinja.

<sup>5</sup> Enitatsi oshekini pokatsinipa kantapaentsini: "Naaka Rotyaantanewo Tajorentsi". Kyaaryoowa, ramatawitzashitzimikari riori.

<sup>6</sup> Pikemakopiinteyeroni omanataantsi. Pikemaeyerini atziri ikanteeyeni: "Romanatawakaeyatyani paashinikipaeni nampitsi eejatzi paashiniki kipatsipaeni". Omaanta eero pithaayi. Aritaki 'okantyaari romanatawakagaeyaani. Omaanta tekira omonkaaty maawaeni nokantakimiri, okaatzti nopolanteeyari. Tekira othonkanteeyari kipatsi.

<sup>7</sup> Atziri jeekatsiri paashinikipaeni kipatsi ari ikijawakayitanakyaani jekatsiri paashini kipatsi, romanatawakagaeyani. Itasheyeyanakini, tekatsi ragae rowayaarini. Opokaayeni antawo mantsiyarentsi. Omoyekapiintya kipatsi, othonkayiteroni tsikarikapaeni omoyekapiintya.

<sup>8</sup> Omaanta tekiraata omaperota ikemaatsitaperotyaawo katsiri.

<sup>9</sup> Eekiro riyaatatyee ikamantawakina:

—Riyotakimirika atziri paapatziyakina, rowashironkaeyemini ikemaatsitakagaeyemironi osheki katsiri, rowamaakaantemi, ikijeyemini maawaeni atziri.

<sup>10</sup> Osheki atziri piyakoteeyaworini ranteero kaari kameethatatsi, roojatzi rookanteeyawo raapatziyari Tajorentsi. Ikijayitanakirini paashinipaeni kemijantzinkari raakaantayitanakirini.

<sup>11</sup> Inja osheki pokatsini theeyashitachani ikantapaaki:

—Naaka iyotaantzirori Iwaperite Tajorentsi. Tema ramatawiteeyashitakarini osheki aapatziyawitakariri Tajorentsi.

**12** Eekiro riyaatanakityee atziri rantaperotanakiro kaari kameethatatsi rootaki rookantanakyaawori inintashiretawakagaeyani eejatzi ipeyakotantanakaariri Tajorentsi.

**13** Omaanta ninkarika kijokiro owaperotenani ikanteetatyaaani raap-atzyiana rirotaki nowawijaakoteeyerini.

**14** Piyaatakayero noñaani eerokapaeni maawaeni aapatziyanari. Piyaate maawaeniki kipatsi, pikanteri maawaeni atziri nokowaki nowawijaakoteri. Omonkaatapaakyaarika maawaeni iroka, roojatzikya omonkaatantapaakya maawaeni nokantzitakimiri.

**15** Eekiro riyaatatyyee ikamantteeyanan:

—Paerani rojankinatzini Intañeeri, riraga kamanantzirorini iñaani Tajorentsi, ikantzini: “Aritaki ipokaki iinja jaga Tajorentsipankonakiki osheki kaari kameethatatsini, reewanaperoeyashiteeyakawoni okaatzjeekayitatsirini jaga maawaeni”. Tema piyotziro iroka nokenkithatakotziri. Aririka piñaakiripa atziri rantapaakirorka okaatz rojankinatzitakarini riraga Intañeeri rootaki piyotantanakyaari irika nokamtakotziri.

**16** Roojatzi pijekirika Joreeyaki, pishintsite pishiyeyananakin tonkaariki.

**17** Aririka pijeki inkokironta, eero pikyaapanataati inthomaekipipankoki paantapanataatyaaawori powaagawo, inta pishiyaperotanaki.

**18** Eejatzi aririka pijeki owantsiki, eero pipiyashitapanaatawo paashini piithaari.

**19** Ashironkaamatsiteroeni paata tsinani motzitatsiri eejatzi thotatsiri eentsite eero omatziro oshiyaperota kameetha.

**20** Kaakitaki iinja pishiyapithatyaaari omaanta pamaneri Tajorentsi okantya eero pishiyanta inkanipaeteki, eejatzi eero pishiyanta kitejiriki pimakoryaantapiintari.

**21** Eejatzi ikantzi riraga Jesoshi:

—Osheki piñeero iinja opomeentsitzimoteeyemini. Pashironkaaperotanakyaaroña, panaakoteri maawaeni itakaantaworini atziri paerani pashironkaeya. Eejatzi eero iñiilo maawaeni impaetatsiri ijeki okimitaka iroka.

**22** Arirkami ojamanitemi rowashironkaeyeminimi, ari pithonkaeyakyanimi, omaanta riraga Tajorentsi ikaminthaakiri maawaeni aapatziyariri riyoyeeyakirini, rootaki kaari ojamanitantlya rowashironkaemi.

**23** Eejatzi iitarika kantakimini: “Areetapaaka Rotyaantanewo Tajorentsi riraga Owawijaakotantatsini; paminerri irika”. Paashini kantatsini: “Irinta areetapaaka janta”. Omaanta eero paapatziyari.

**24** Kaakitaki iinja osheki amatawitantatsiri ikantapaaki: “Naaka Jesokirishito riraga owawijaakotantatsiri”. Omaanta kaari. Paashinipaeni ikante: “Naaka iyotaantzirori Iwaperite Tajorentsi”. Ramatawitantayita-paakyaaririni atziripaeni tema itajorentsijeempiyaashitapaakya. Eejatzi aritaki ikowakowawitakya tsika ikantya ramatawitantyaaririmiri riyoyaap-erotayitakirini Tajorentsi.

**25** Naakiro, nokamtztakimiro tsikarika okantyaari iinja.

**26** Rootaki piyotantyaari aririka ikanteetemi: “Ipaminel Irinta Jesokirishito janta okaankiteronkiutziinta”. Eero patsipetawo piyatzi. Eejatzi ikanteetemirika: “Irika jaka Jesokirishito inthomaekika pankotsi. Eero pakiri”.

**27** Kyaaryo, nopoñaaka naaka jenokinta, natziriperotapaaki kipatsikika. Eejatzi nopyiee paata janta jenokinta. Tema romapokimi tariito rookathatyaaarika, tyaaooo, ithotyaapaentziro janta jenokinta. Ari nokimiteeyaa iinja naari aririka nopoakae: nomapokaeyapaemini omaanta ari piñeeyawenaanani maawaeni.

**28** Tsikarika ijeki kaminkari, eejatzi rewoteenkatzita riroripaeni tzijo. Eejatzi okimitaka, tsikarika ijeki kemijantawitanari, eejatzi tsikarika ijeki kaari yotana, rootaki ipokashitantyaariri oshekini amatawiterini.

**Aritaki okantyaari iinja ipokanteeyaaarini Jesoshi  
(Mr. 13.24-37; Rk. 21.25-36; 17.25-36; 12.41-48)**

**29** Eekiro riyataatyee ikantzi riraga Jesoshi:

—Ari osheki opomeentsitzimoeyanakyaarini atziri, maawaeni: osheki rowashironkagaeyanakyaaniroña. Roojatzi intsipaete itsiwakanaki oorya, eejatzi riraga kashiri, eejatzi ipariyanaki ompokiro maawaeni: tema she-watanaka maawaeni jenokijatzi.

**30** Roojatzi nokontetantapaapya janta jenoki. Roojatzi retakotanteeyanakyaani maawaeni theenkayeyanarini. Ari iñeeyawaenani maawaeni atziri nokinapae menkoriki nopolinkatharitaperotapaaki, noshipakiryaperotapaaki.

**31** Itziwootanakiri nonampiri tziwoorentsi. Maawaeni nonampiri ipokaeyapaakini ipiyoteeyerini maawaeni aapatziyanari. Maawaeni ikaatzi niyoyeeyakirini. Ithotyeeyerini ipiyoteeyerini riroripaeni maawaeni paashinikipaeni kipatsi.

**32** Paashini ikamanteeyanarini riraga Jesoshi:

—Iroñaaka noshiyakaawentemiro iyeera. Pikemijantena. Rooteentsirika oshookaempikanaki, eejatzi oshitanee, ari piyotanaki rooteentsi okithokitee.

**33** Eejatzi okimitakya, aririka piñaawakiro iroka nokantzikimirika piyotantyaari rooteentsi nopolakae.

**34** Eerorika pikamita, aritaki piñaawakiro maawaeni iroka nokantzikimirika.

**35** Othonkaeya jenokijatopaeni eejatzi kipatsi omaanta noñaani eero othonka. Omonkaataperoteeyá kameetha maawaeni nokantzikimirika.

**36** Omaanta tekatsi yotatsini tsikarika okaate; tee riyotzi ronampiri Pawa, eejatzi naari tee niyotzi. Apatziro Pawa apaniroeni yotatsiri.

**37-39** Paerani eenironi ijekini riraga Noe, rowapiinteeyani atziripaeni, ishinkiteeyani, raapiinteeyini iina, maawaeni. Tee ikenkithashiryaakotanaawo ikantawitakariri Noeni: “Kaakitaki oonkawo”. Roojatzi iinja rotetantanaka riraga Noeni ipitoki, rashitakotanaka, jaae tok. Omapokapaakiri antawo inkaani, oonkanaka. Ithonkaeyakani, maawaeni theenkakiriri, itsitsiyeeyakini. Eejatzi ikimitakya iinja maawaeni theenkayeyanarini, aririka omonkaatapaapya nopolakteeyari, eero ikenkithashireeyani nomapokaeyapaakirini. Rootaki nowashironkaanteeyapaakyaaariri, eero nowawijaakotapaeri.

**40** Roojatzi itsipatatakayaarika apite shirampari thamaetsiri janta owantsiki, apatzirorika apaani rirotaki aapatziyanari. Tema rirotaki irira naaneeri notsipatanakyaari, omaanta paashini, eero naaneeri.

**41** Okimitakya, eenitatsi apite tsinani tonkayitzirorini shinki, apatzirorika apaani aapatziyanari tema rootaki irowa naaneeri notsipatanakyaawo, omaanta paashini eero naaneero.

**42** Rootaki paamagaeyantanarini, pikenkithashiryaapiintena. Tee piyotzi tsika okaateka nopolantyaari. Nomapokapaakimikari.

**43** Okimitaka riraga ashitawori ipanko ikoshiteetziri. Riyoteemi rooteentsi ipoke koshitantatsini, ikakitemi, eero ishinetzirimí ikoshiteri, inta roepiyawaerimi.

**44** Eejatzi naari, paamagaeyantanarini, nomapokaemikari. Paapatziyap-eroteena, tee piyotzi tsika okaateka nopolantyaari.

**45** Pikimityaari onampirentsi kameethari, ikyaaaryooowentziniri maawaeni ikantziriri iwaatorote. Ikanteririka irira: "Eeroka wetsikapiinteriorini rowanawo notyomi, pipapiinteri kameetha". Tema imonkaatakiniri.

**46-47** Aririka iñeeri kameetha riwetsikapiintziro rowanawo, ari ikanteri: "Kameetha pantziro nokowakaakimiri. Iroñaaka eeroka kempoyeenawoni maawaeni tzimimotanari. Kameetha nopinatem, niyotzi eero pamatawitanana". Tema ari ikimoshiryaanaki ronampiri.

**48** Omaanta eenitatsirika paashini ronampiri, kaari aapatziyarini riraga iwaatorote. Ikantashitya irinta: "Iroñaaka jatanaki nowaatorote, eero ipiyita".

**49** Roojatzi irinta kaari aapatziyariri ikijiri paashinipaeni onampirentsi, ikapojaipiintziri, ishinkitapiinta.

**50** Roojatzi romapokapaakiri riraga iwaatorote, tee raamayari riraga kaari aapatziyarini.

**51** Roojatzi rowashironkaapaakiri, rotyaanteri janta inteenanta, itsipatantyaariri amatawitatantsiri. Roojatzi janta riraaperotanakya eejatzi osheki ikemaatsityaawo katsiri. Eero pikimitari eeroka, inta irintakya pikimityaari riraga aapatziyaperotariri iwaatorote.

Rootaki ikantziri riraga Jesoshi.

## 25

### Roshiyakaawentakiro 10 ewankawo

**1** Eekiro riyaatatyee ikamanteeyakinani riraga Jesoshi:

—Iroñaaka noshiyakaawentemiro tsika ikanta Tajorentsi reewawanantzi. Eenitatsi ewankawo 10, kowatsiri aminakowentero rayi iina apaani shirrampari. Okanta otsitenitanaki roojatzi aantayitakan oorentamento ootanakyaari iinja aririka ipokaki.

**2** Okaataki ewankawo iyoperotaneentsiri apawakooni eejatzi okaataki kaari yotatsini apawakooni.

**3** Aawiteeyanakawoni irowa ootamento, omaanta tee ayiro oyeenka oriwo ootantyaari roori.

**4** Omaanta roori yotatsiri, aakotanakiro oyeenka oriwo ootantyaari awotsikira.

**5** Ikantaka rojamanitaki aatsini iina, tekiraata ipokeeta. Agaeyakironi owochokini, roojatzi omaanteeyanakani maawaeni.

**6** Okantaka niyankipaeteki tsiteniri, okemataatzi kaemaantsi: "Kaakitaki aatsini iina, piyaate paminawakiri".

**7** Roojatzi opiriinteeyantawitanakani maawaeni, owetsikawitanakari ootamento.

**8** Okantawitakawo kaari yotatsini: "Pipena naari eechonkiini pashi oyeenka oriwo rooteentsi nothaatakota nashi naari".

**9** Akanakiro rowaga yotanitzinkawo: "Eero nopimi. Iyotaka nashi naari. Tekatsi nopenmiri eerori. Nopakimirika tekatsi nootaneeya naari. Piyaate pamananantapaentya eerori ipimantapiinanta".

**10** Roojatzi iyaatantanaka amananantapaenta. Aritaki areetzimatapaaka riraga aatsini iina kyaanaki janta ithomaenta pankotsiki. Itsipaeyanakwonni wetsikaaenchari inkaaganki. Ashitakotanaka pankotsiki, tog.

**11** Roojatzi opiyawitapaaka kaari kenkithashiryaacha, okantawitapaakari: "Pashitareenawo naaka jaga".

**12** Omaanta ikantawakiro: "Tee niyotzimi, ninkarika. Tee nokoyi pipokashiten a jaka".

<sup>13</sup> Pikenkithashiryaakoperotawakiro iroka noshiyakaawentakimirika. Okimitakaga yotaniperotatsiri aamaaperotakari aatsiri iina, eejatzi pikimitya eerori: paamayena tee piyotzi tsikarika okaatzi nopokanteeyaari. Yotaniperotatsiri kijokiro owakotziro oyeenka oriwo. Ejatzi pikimitya eerori, kijokiro powanakiro Ishire Tajorentsi.

*Roshiyakaawentakiri Jesoshi atziripaeni ipaetakiri koriki roshekeeri  
(Rk. 19.11-27)*

<sup>14</sup> Eekiro ikantatzi riraga Jesoshi:

—Eejatzi noshiyakaawentemiro paashini tsika ikanta Tajorentsi ipinkathariwenantzi. Kimitaka ryaatziranki ashagantachari paashinikinta nampitsi. Ritakawo ikaemaeyakirini ronampiri maawaeni, ikanteyakirini: "Nokowaki poshekeenari noorikite".

<sup>15</sup> Roojatzi ipantakari apaani ronampiri koriki 5.000. Ikantakiri: "Ajaa, poshekeenarira noorikite". Rakanakiri: "Jee, aritaki". Eejatzi paashini ipakiri rirori: ipakiri ikaatzi 2.000, osheki ipinataka. Ikantakiri: "Ajaa, poshekeenarira". Rakanakiri: "Jee, aritaki". Eejatzi paashini ipawitakari rirori ikaatzi 1.000. Ikwawitaka roshekeenirimi. Eejatzi ipinataka rirori osheki. Riro ipaperoetakiri osheki yotaniperotatsiri. Omaanta riraga yotatsiri eechonkiuni tee ipaperoetziri osheki. Ipaeyakirini maawaeni roojatzi ryaatananaka ashitariri iyorikite paashiniki nampitsi.

<sup>16</sup> Riraga aaperoteentsiri koriki 5.000 ryaatanaki, roshekyaaperotantyaanariri iyorikite iwaatorote. Ikantaka riyomparitaka; roojatzi raantaka paashini koriki 5.000.

<sup>17</sup> Eejatzi riyomparitaka rirori agaentsiri 2.000. Eejatzi roshekitakiniri: raaki rirori paashini 2.000.

<sup>18</sup> Omaanta riraga aawiteenchari 1.000 raanakiri rotetashitanakari omooki kipatsi.

<sup>19</sup> Ojamanitakotaki iwaatorote. Ikantaka iinja roojatzi ipiyantapaa ipankoki. Ikantapaakiri: "Iroñaaka pamaenari maawaeni noorikite. Nokoyi niyote tsika ikaatki".

<sup>20</sup> Roojatzi ipokantapaaka ipaetanakirira paerani 5.000, ikantapaakiri iwaatorote: "Irika piyorikite pipanakinariranki eejatzi irika paashinika piyorikite 5.000 rirotaki naakiri niyomparitantakari".

<sup>21</sup> Roojatzi ikanantawakari iwaatorote: "¡Kameethataki! Pimataperotakiro nokowakaakimiru. Pikyaaryooventakiro eechonkiuni piyomparitaka rootaki iroñaaka nopantemiri paashini osheki. Eeroka aminakaanteroni. Iroñaaka pipokanaki jaka, pikye pitsipatena akimoshireeyeni".

<sup>22</sup> Roojatzi ipokantapaaka riraga ipaetanakirira paerani 2.000, ikantapaakiri iwaatorote: "Ajaa, irika piyorikiteka pipakinari. Niyomparitaka osheki, noshekyaantakimiriri. Naakimin paashini 2.000".

<sup>23</sup> Ikantawakiri iwaatorote: "Kameethataki, pimatakinawo nokowakaakimiru. Pikyaaryooventakiro eejatzi piyomparitaka, rootaki nopantemiri paashini osheki. Eeroka aminakaanteroni. Iroñaaka pikyee jaka pitsipatena akimoshireeyeni".

<sup>24-25</sup> Rimpautapaaki riraga aawiteenchari 1.000, ikantawitapaakari: "Niyotakimi eeroka, tee pineshironkatantzi, osheki nothaawan-takimi. Noetakaamintheetzi noshekyaakimiririka piyorikite, ari paapithateenarimi maawaeni, rootaki kaari niyomparitanta. Rootaki nokitatantakariri piyorikite inthomaeki kipatsi. Irika piyorikiteka, pagaeeri".

<sup>26</sup> Roojatzi ikantawakiri: "Tee okameethatzi pantziri, osheki piperataka. Piyowitaka nokowawitaka naari roshekitanakimi noorikite.

<sup>27</sup> ¿Litaka kaari pipantari riraga kempoyaapiintziriri koriki? Ari pipakirimi irranki, ipinatawaenami, apawo naantakyaarimi. Eejatzi ipitawaenarimi maawaeni nashipero naari”.

<sup>28</sup> Roojatzi ikantawakiri riraga paashini ronampiri: “Paapithateri noorikite, piperi riraga oshekyaakinariri iroñaaka 10.000.

<sup>29</sup> Nopaperoteri osheki riraga ashaagantaperotachari, omaanta riraga kaari ashaagantaperowitacha otzimimowityaaririka eechonkiini aritaki naapithatakri tekatsi jeekimotaneerini.

<sup>30</sup> Iroñaaka irika paanakiri janta pookeri otsiteniperotzinta rowaga paamariki kaari tsiwakanitatsini, tee ikameethatzi. Nokowaki ikaateri maawaeni riraga riraaperotya eejatzi kemaatsitakawori katsiri. Janta ri-raawaetyaanta, ratsikaekityaanta. Tyakiririri, tyakiririri”.

### *Iinja Jesoshi ikantakowenterini maawaeni atziri*

<sup>31</sup> Ikamanteeyanani riraga Jesoshi:

—Naaka poñaachari jenokinta, nokoñaatapaaki jaka kipatsikika. Rooteentsi niyaatanee, roojatzi ari nopyie, notsipatyaa maawaeni nonampiri. Nopokantyaari, arimache nopinkatharentsitapaaki, notsipatapaakyaa maawaeni nonampiri. Nopinkatharentsiperotapaaki, ipinkathaperoyawakinani maawaeni jeekatsiri.

<sup>32</sup> Nopiyoteeyapaakirini iinja maawaeni atziri, poñeeyapaencharini paashinikipaeni kipatsi. Nokimitakotaari ashitachari ipirapaeni rinashityaaririka: rinashitakari owisha, rinashitzitakari riraga kaawira, maawaeni. Eejatzi nokimitakaantapaakirii iinja naari maawaeni atziri: ninashityaa aapatziyakinari, eejatzí ninashityaa riraga theenkanari.

<sup>33</sup> Nokanteeyerini maawaeni aapatziyanari: “Pipoke jaka nakoperokika”. Eejatzi nokanteeyerini paashinipaeni: “Pipoke eerori jaka nampatekika”.

<sup>34</sup> Roojatzi nokanteeyantakyaarini maawaeni nakoperokitziri: “Pipokaeyanakini maawaeni eerokapaeni ikimoshiretakaaperotemi osheki Pawa. Paerani riwetsikitkimironi pjeekantyaari janta inampikinta. Iroñaaka piyata pitsipatyaa. Kameetha ipinkathariwenteeyemini.”

<sup>35</sup> Ayimawitakinani notashe, pipawakinani noyaari. Ayimawitakinani nomiri, pipawakinani nomiri. Tee piyowitanani omaanta pineshironkatan-takinarini janta pipankokipaeni.

<sup>36</sup> Tekatsiwitani noethaari, roojatzi pipakinawo. Nomantsiyawitani, roojatzi pipokashitakina pineshironkatakita. Romonkyaaagaetakinani omonkyaaagamentotsiki roojatzi pipokashitanakina pineshironkatakina.

<sup>37</sup> Ari pikaateeyerini maawaeni paashini kameethatzinkari rajankaneki pikanteeyinipa: “Nowinkatharite, tsika okaatzika ayimatantawitakimiri pitashe nopantakimiri powanawo. Tee nokenkithashiryaaaneero. ¿Tsika okaatzika ayimatantawitakimiri pimiri, nopantakimiri?

<sup>38</sup> ¿Tsika okaatzika noneshironkatantakimiri noemaakimi nopankoki? ¿Tsika okaatzika nopantakimiri piithaari?

<sup>39</sup> ¿Tsika okaatzika noñaantakimiri pimantsiyatzi niyaatashitantakimiri noneshironkatantakimiri?” ¿Tsika okaatzika omonkyagaetakimi nareetan-takitzimiri?

<sup>40</sup> Roojatzi nokantanantakyaari: “Kyaaryo nokantemi: ‘Pineshi-ronkatakiririka apaani aapatziyanari eejatzi pikimitztakina naari, pineshironkatakina’”.

<sup>41</sup> Roojatzi nokanteeyantakyaarini maawaeni katziyeenchari nampateki: “Piyaateeyeni iroñaaka janta paamarikinta kaari tsiwakanitatsini, pike-maatsityaawo paamari riwetsikakiri paerani Tajorentsi. Riwetsikashitziriri

iwinkatharite kamaariapaeni eejatzi maawaeni ikaatzi oyaatziriri. Iroñaaka ari pikaateri pitsipatyaaari janta, osheki powashironkaaperoeyaani.

<sup>42</sup> Paerani ayimatakina notashe, omaanta tee pipawakina noyaari. Ayimatakina nomiri, omaanta tee pipawakina.

<sup>43</sup> Niyaatashitawitzimini noñeemi, omaanta tee pineshironkatawakina, tee poejeekawakina pipankoki. Tekatsini noethari, omaanta tee pipawakina nokithaatyaaari. Nomantsiyatzini eejatzi romonkeetakina omonkyagaamentotsiki, omaanta tee pipokashitana pareetena”.

<sup>44</sup> Roojatzi ikanteeyantanakinani eejatzi: “Nowinkatharite, ¿tsikapaetenika okaatzi noñaantakimiri pashironkaawaetaka kaari noneshironkatantzimi?”

<sup>45</sup> Roojatzi nokanteri: “Kyaaryo, tee pineshironkatziri irintapaeni aapatziyanari, rootaki kaari pineshironkatantana naari”.

<sup>46</sup> Rowashironkaeyerini riraga Tajorentsi janta paamari kaari tsiwakanitatsini. Ikanteetatyeyaaani ashi roiro ijeki janta; omaantakya riraga kameethatzinkari ijekaeyini rirori janta jenokinta, ikanteetatyeyaaani rañaaperotapee.

## 26

*Ikenkithawaetakaawaka joriyyopaeni: “¿Tsikarika akanteri Jesoshi owa-makaanantyaariri?”*

(Mr. 14.1-2; Rk. 22.1-2; Jowa 11.45-53)

<sup>1</sup> Ithonkantakawori riraga Jesoshi ikamanteeyakinani maawaeni iroka, ari ikanteeyanani naaka maawaeni riyotaanewo:

<sup>2</sup> —Piyoteeyakini rooteentsi areetya kitejiri akenkithashiryaaakotapi-inantariri rawijantakarini paerani ronampiri Tajorentsi janta Ejiipitoki. Okaataki apite kitejiri areetantyaari. Roojatzi raakaananteetenari ikentakoetena.

<sup>3</sup> Roojatzi ipiyotaka riraga jewayitziririni ñaanakowenantatsiripaeni eejatzi riraga aataperoteenchari. Ipiyotaka janta ipankoki iwinkathariteki ñaanakowenantatsiripaeni. Iwaero irira rirotaki Kaejashi.

<sup>4</sup> Rajaryaakari Jesoshi rowamaakaanteri:

—¿Tsika akanterika Jesoshi aantyaariri eejatzi owamaakaanantyaariri? Omaanta tee akoyi riyote atziripaeni, ikijakowentarikari.

<sup>5</sup> Ikantanaki paashinipaeni:

—Pamine, rooteentsi areetya kitejiri rawijantanakarini paerani ronampiri Tajorentsi Ejiipitoki, rooteentsi ikimoshireeyanakini atziri maawaeni. Eero amatziri aaneeri rirori iroñaaka, ikijakowentarikari maawaeni atziri.

*Ojeetantakari Jesoshi wetaaniyajato kajankaari*

(Mr. 14.3-9; Jowa 12.1-8)

<sup>6</sup> Ikantaka riraga Jesoshi itharyaanaka roojatzi rareetantapaaka Wetaaniyaki. Itsipateeyakinani naakapaeni maawaeni riyotaanewo. Nareeteeyapaakani ipankoki Shimo, riraga pathaawitacharini paerani.

<sup>7</sup> Nowaeyapaakani, roojatzi opokashitapaakiri roori tsinani, amakotakiro kajankaari poteeryaki kameethari. Oshekini owinawo iroka kajankaari. Roojatzi ojeetapaakiri iitoki Jesoshi.

<sup>8</sup> Noñeeyawakironi irowa, nokijeyyanakironi, nokantzi:

—¿Itaka apaatantawori?

<sup>9</sup> Opimanteromi kajankaari, aantyaatami oshekini koriki, oneshironkaterimi oshekini owashironkaenkari.

<sup>10</sup> Ikantanaki Jesoshi:

—¿Itaka pikantawenantawori iroka tsinanika? Kameethataki okaatzi antakirika.

**11** Rooma riraga owashironkaenkaripaeni ikanteetatyeyaaani itsipateeyemini jakaa pineshironkatapiinantaariri, omaanta naaka eero nokanteetatyeyaaani nojeekimoteeyimini naari.

**12** Iyotakotakina iroka tsinanika rooteentsi nokame, rootaki ojeetantakinari.

**13** Kyaaryo iroka nokamantemirika, tsikarika ikenkithatakoteetero noñaani, aririka othotyaanakya maawaeni kipatsiki eejatzi ikenkithatakotzityaawo iroka tsinanika okaatzi antakiri ikenkithashiryaaakotantapiintetyaawori roori oneshironkatakina.

*Ikantziri Joorashi ñaanakowenantatsiri: "Namtakotemi payeri Jesoshi"*  
(*Mr. 14.10-11; Rk. 22.3-6*)

**14** Ikantaka ryaatashitakiri Joorashi karyootejatzi riraga jewatayitziririni ñaanakowenantatsiri ikenkithatakaeri. Rirowitaka naawita riyotaanewo Jesoshi.

**15** Ikantapaakiri:

—Aririka nokamantemti tsika pikanteriri Jesoshi paantyaariri, ¿iitaka pipinatenari?

Ikantawakiri:

—Nopinatemti koriki ikaate 30 ikithoki riwetsikaetziri piraata.

Roojatzi ipantawakari.

**16** Roojatzi ipiyantapaa riraga Joorashi. Aripaete raminaperotziri riyotantyaaari tsika ikanteriri raakaanantyaariri.

*Riweyaantakaanaari rowakaanaari riyotaanewo Jesoshi*  
(*Mr. 14.12-25; Rk. 22.7-23; Jowa 13.21-30; 1 Ko. 11.23-26*)

**17** Monkaatapaaka kitejiri nowaeyawoni paa kaari tapiyacha. Roojatzi ryaatashitantakari apaanipaeni riyotaanewo riraga Jesoshi, ikantapaakiri:  
—¿Tsika pikoyika nowojantemiro owaeyaarini' akenkithashiryaaantyaa-wori rawijantanakarini ronampiri Tajorentsi janta Ejiipitoki paerani?

**18** Ikantawakiri:

—Piyaate Jerojareekinta, pikantapaakiri shirampari piñaapaakirinta janta: “Ari ikantzi iyotaantatsiri: ‘Rooteentsi nomonkaatero maawaeni ikowakaakinari Pawa. Nokoyi noya pipankoki, notsipateeyarini maawaeni niyotaanewo’”.

**19** Roojatzi ryaatantanaka, imonkaatakiro maawaeni okaatzi ikantakiriri riwetsikaeyaaakini royaari.

**20** Otsitenitantanakari, itsipateeyakinani Jesoshi naakapaeni riyotaanewo, ryaateeyapaakini janta rakiyoteeyakinani maawaeni janta.

**21** Eenirowa nowaeyanakanai maawaeni, roojatzi ikanteeyantanakinani riiori Jesoshi:

—Kyaaryo nokantemti: iroñaaka jika pikatzika, eenitatsi aakaantenani.

**22** Roojatzi osheki nowashiretanteeyanakanai, ikanteeyanakini apaani-paeni:  
—¿Naakama, Nowinkatharite, aakaantemini?

Eejatzi paashinipaeni ikantziri:

—¿Nowinkatharite, naakama aakaantemini?

**23** Ikanteeyanakinani:

—Riotaki irika ochaantakotakinari iroñaaka nowiratoteki riotaki aakaantenani.

**24** Okenkithatakotzitakinani Iwaperite Tajorentsi paerani, aritaki nomonkaatakiro maawaeni okenkithatakotanari. Omaanta osheki rowashironkaaperotanakya riraga aakaantenani. Eero ikoñaatzimi paerani irira, eeromi rowashironkashitarimi Tajorentsi.

<sup>25</sup> Roojatzi rojampitantari Joorashi rirori:  
 —¿Naakama, iyotaanari, aakaantemini?  
 Ikantawakiri:  
 —Jee, eerokakya.

*Riyotaakae riraga Jesoshi owawentyaari eejatzi amiriwenteri*  
*(Mr. 14.22-35; Rk. 22.19-20; 1 Ko. 11.23-26)*

<sup>26</sup> Rooteentsi nothonkimatero noya, raakiro riraga Jesoshi paa, ipaasonki-wentakawo. Roojatzi ikagaakiro, ipaeyakinani naakapaeni, ikantana:  
 —Ajaa, payero, poyaawo. Okimitaka nokagaakimiro paa, tema naakataki oshiyakaawenteenchari, paata nokamawenteeyemini.

<sup>27</sup> Roojatzi raakotantakawo awishooawaantsi oowa pajoki, ipaasonkiwen-takawo. Ipakoteeyakinani, ikanteeyakinani:  
 —Ajaa, pimiriteeyeni maawaeni.

<sup>28</sup> Rooma iroka oshiyawitawo niraa. Paata aririka nokamawentakimi, napaatawenteemi niraa, ineshironkatantemiri Tajorentsii. Aririka pameen-tena, eero ikenkithashireero kaari kameeethatatsi pantziri. Owakirari imotaakina iroka nokantakimiri, piyotantyaari tsikarika pikantya pawijakotanteeyari eerori eejatzi maawaeni atziri.

<sup>29</sup> Iroñaaka eero napiiutziro nomiritziro awishooawaantsi oowa. Iinjaa aririka napiitero nomiritero, aritaki nokaateeyemini amiritero owakirat-siri awishooawaantsi oowa janta Tajorentsikinta.

*Ikantana Jesoshi: "Iroka tsiteniri, ari pookaeyanakinani"*  
*(Mr. 14.26-31; Rk. 22.31-34; Jowa 13.36-38)*

<sup>30</sup> Nomampaawenteeyakarini Tajorentsii, roojatzi ryaatakaanteeyanaki-nani janta tonkaariki oetachari Oriiwomashi, notonkaaneentanaki maawaeni.

<sup>31</sup> Roojatzi ikanteeyanani riraga Jesoshi:  
 —Iroka tsitenirika, aritaki pookaeyanakinani eerokapaeni, maawaeni. Rooma paeraniperoroña ikantakotzitana Tajorentsii Iwaperiteki ikantzini: "Noshineteririka rowamaeri riraga kempoyiiriri rowishatepaeni, ishiy-eeyanakyaani, rotsipareeyawakaanakyaani". Iroka rojankinatziro Jakari-iyashi riraga kamanantzirorini iñaani Tajorentsii paeraniperoroña.

<sup>32</sup> Omaanta aririka nopiriintanee nañagae, neewatananeemi janta Karireeyaki, ari piñeena janta.

<sup>33</sup> Roojatzi ikantziri Peetero:  
 —Aririka rookemi irikapaeni maawaeni, omaanta naari, eero nookimi.

<sup>34</sup> Ikantawakiri:  
 —Kyaaryo, iroka tsitenirika, tekirarika iñee tyaapa, ari okaate 3 pikante: "Tee niyotziri Jesoshi".

<sup>35</sup> Ikantawitarit:  
 —Aririka notsipatemi akame, omaanta eero nokantzi: "Tee niyotziri Je-soshi".  
 Eejatzi nokanteeyawitakani maawaeni.

*Ramani Jesoshi Iriri janta Jethemaniiki*  
*(Mr. 14.32-42; Rk. 22.39-46)*

<sup>36</sup> Ikantaka rareetakagaeyapaakinani riraga Jesoshi janta oriwwomashiki owaero Jethemaniiki, ojeeki janta tonkaari owaero Oriiwomashi. Ikan-teeyapaakinani rirori:

—Pijeekawakiita jaka. Niyaatakiteeta janta nokenkithatakaakiteriita Pawa.

<sup>37</sup> Raanakiri riraga Peetero, eejatzi itomi Sewereeyo apite. Osheki retakotanaka riraga Jesoshi, antawo ikenkithashiryaanakiro okaatzi awijimoteri.

<sup>38</sup> Roojatzti ikantziri:

—Osheki netakotanakaroña. Pijkeekawakiita jaka, pikakiterapa.

<sup>39</sup> Roojatzti ijanthawitanaka eechonkiini, romaryapaaka tankimota-paaka kipatsiki, ikenkithatakaakiri Ashitariri, ikantziri:

—Pawa, tee nokowawita nokemaatsityaawomi katsiri, omaanta eero nantashitawo nokowawitari naari, inta nantemiro pikowakaakinari eerori.

<sup>40</sup> Roojatzti ipiyashitapaari riyotaanewo 3, iñaapaatziiri imagaeyakini maawaeni. Ikantapaakiri riraga Peetero:

—Tema pamaweneentziro piwochokini, ¿tee pimatziro pikakineentzi eechonkiini?

<sup>41</sup> Pikakite, pamaneri Tajorentsi ramitakotantemiri eero panantawo kaari kameethatatsi. Kyaaryo, pikowawitaka pantaperoteromi maawaeni nokowakaakinmiri, omaanta tee pimatziro.

<sup>42</sup> Ikantaka rapiitakiro ipiyanaaka jaga, ikantziri:

—Pawa, pikowakaaperotakinaworika nokemaatsityaawo katsiri, kameethataki. Aritaki nomatakiro, nomonkaatero maawaeni pikowakaakinari.

<sup>43</sup> Ari ipiyapaa iñaapaeri riyotaanewo 3 imagaeyakini. Osheki ayimapero-takiri iwochokini.

<sup>44</sup> Roojatzti riweyaantapaentawo ipiyanaaka, ikenkithatakaayiri Iriri. Roojatzita rapiitapae ikantakiriri inkaaganki.

<sup>45</sup> Roojatzti ipiyashitakari riraga riyotaanewo, ikantapaakiri:

—¿Pimaati? Iroñaka monkaatapaaka. Iroñaka ikantakowentenakya kaari kameethatzinkari, iroñaka raaneena.

<sup>46</sup> Pipiriinte, thame aate. ¡Pamine sha! Kaakitapaaki irinta aakaantenani.

### *Roerikaetakiri riraga Jesoshi*

(Mr. 14.43-50; Rk. 22.47-53; Jowa 18.2-11)

<sup>47</sup> Iroñaka ipokashitantapaakari Joorashi, riraga riyotaanewo naawita Jesoshi. Ipokashitapaakiri, reewatapaakiri rirori oshekinini atziri. Maawaeni ramaeyakironi antawo rowejamento eejatzi ipajamento wetsikachari inchato. Ipoñaanaka janta jewatayitatsirini ñaanakowenantatsiripaeniki eejatzi aataperoteenchari.

<sup>48</sup> Ari, ikamantanakiri inkaaganki riraga Joorashi irirapaeni:

—Nonintapootapaakiri Jesoshi, piyotantyaariri. Rirotaki paerikapaakiri eerori.

<sup>49</sup> Roojatzti ipokashitantapaakari, ikantapaakiri:

—Eniromi, iyotaanari?

Roojatzti inintapootapaakiri.

<sup>50</sup> Ikantawakiri rirori Jesoshi:

—Notsipatanewo, ¿itaka pipokashitziri jaka? Pantero iroñaka.

Roojatzti ipokashitantapaakariri maawaeni roerikapaakiri, shepik.

<sup>51</sup> Roojatzti inojokiryaakiro paashini riyotaanewo Jesoshi rashи rowejamento. Ikowawitaka ichekawakirimi iitoki riraga ronampiri iwinkatharite ñaanakowenantatsirini, omaanta apatziro ichekawitawakari ikempita.

<sup>52</sup> Ikantziri riraga Jesoshi:

—Powaero powejamento ipiyatzimikari. Rooma ichekaetawakiri rirotaki chekantapiintatsiri.

<sup>53</sup> Rooma piyotzi nokowakirkami, nokanterimi Pawa, roojatzzi rotyaante-narimi oshekiniroña ronampiri ikijakowentenami.

**54** Omaanta ikijakowentenarikami, rowawijaakotenarikami, eero nomonkaatziromi okantakotanarini Iwaperite Tajorentsii.

**55** Roojatzi ikanteeyawakirini riraga maawaeni pokashitapaakiriri:  
—¿Itaka pamantawori powejamentopaeni eejatzi pipajamentopaeni kim-  
itaka naaka koshintz? Piñaapiintana maawaeni kitejiri janta Tajorentsii-  
pankoki, niyotaapiintziri atziri, tee payitanakya chapinki.

**56** Omaanta rootaki paantanari iroñaaka omonkaatantyaari  
rojankinatakotzitanarini riraga kamanantayitzirorini iñaani Tajorentsii  
Iwaperiteki.

Roojatzi nothaawantanaka naaka riyotaanewopaeni, noshiyanaka  
maawaeni.

*Riraga jewatatsiripaeni ikantakowenantariri Jesoshi  
(Mr. 14.53-65; Rk. 22.54, 63-71; Jowa 18.12-14, 19-24)*

**57** Ari, ragaetanakiri riraga Jesoshi janta ipankoki Kaejashi, riraga  
iwinkatharite ñaanakowenantsiripaeni Tajorentsipankoki. Ipiyotakanta  
janta riraga iyotaantzirori Iwaperite Tajorentsi eejatzi aataperoteenchari.

**58** Roojatzi rimpetaanaki Peetero janta inteenaneente roojatzi raree-  
tantlyaari ipankoki Kaejashi riraga iwinkatharite ñaanakowenantsiri. Ikyaa-  
paaki otaamapetaataga mapi, ijekapaaki okaankiityeera. Itsipatapaakari  
waariryapaeni.

**59** Roojatzi riraga iwinkatharite ñaanakowenantsiri, riraga paashini  
jewawentayitzirini irirapaeni eejatzi paashinipaeni jewatayitzirini  
ikowanaki atziri itheeyakotashityaarini Jesoshi rootaki, ari  
rowamaakaananteetyaariri rirori.

**60** Roojatzi eenitatsi oshekini theeyakotawitakariri, omaanta tekatsi ikan-  
teri rowamaakaanantyaariri. Roojatzi ipokapaaki paashini apite theeyako-  
tapaakariri,

**61** ikantapaaki:

—Ikantzi irika: “Noshekiroreero Tajorentsipanko; okaate kitejiri 3 aritaki  
nowetsikaero”.

**62** Ikatziyanaka iwinkatharite ñaanakowenantsiri, ikantanakiri:

—¿Tekatsima pikanteri eerori? ¿Oetaka pikantziriri iroka ikantakotzimiri?

**63** Omaanta imaeritashitaka riraga Jesoshi. Rapiitakiri rirori ikantanakiri:  
—Tema iñaakimi Tajorentsi, riraga Añaaperotatsiri. Pikantaperotena:  
¿eerokama Itomi Tajorentsi riraga Rotyaantanewo?

**64** Ikantziri:

—Naakataki. Naaka poñaachari jenokinta, natziritapaaki jaka kipatsikika.  
Inja piñeanani nojeeki rakoperoki Tajorentsipero, eejatzi iinja piñaawakinani  
nokinapaakini menkoriki, nopyapae jaka kipatsikika.

**65** Roojatzi ikijantanakari rirori maawaeni, rootaki itzijagaakotantanaka  
iithaarki. Ikantzi:

—¿Pikemakirikya ikantziri? Tee okameethatziroña, iitajorentsitakimiwee.  
¿Itakama akowantari paashini kantakoterini?

**66** ¿Itaka pikenkithashireeyirini eerori? ¿Tsikamaakanterika?

Ikanteeyirini:

—Eenitatsi rantani. Okameethatzzi ikame.

**67** Roojatzi ipokapaaki rirori maawaeni reewapootakiri ipookira. Eejatzi  
ikapojayitakirini. Rontajawootakiri tak, tak, tak.

**68** Ikantziri:

—Rotyaantanewo Tajorentsi, pikantena: ¿ninka kapojakimirika?

*Ikantzi Peetero: “Tee niyotziri Jesoshi”  
(Mr. 14.66-72; Rk. 22.55-62; Jowa 18.15-18, 25-27)*

**69** Riraga Peetero eenirokya ijeki janta inkokironta. Oñaawakiri onam-pirentsi okantawakiri:

—Eroka tsipatariri Jesoshi, riraga karireeyajatzi.

**70** Rakanakiro:

—Tee niyotzi oetarika pikantanari.

**71** Roojatzri rawijanaki janta ikyaawitapaakaga, eenitatsi paashini onam-pirentsi oñaawakiri roori, okantziri:

—Pamine sha, irika tsipatariri Jesoshi, riraga najareetejatzi.

**72** Ikantanakiro:

—Tee niyotziri irika pikantakinari. Teerika okyaaryootaki iroka nokantakimiri, nokowaki rowashironkayenaata Tajorentsi.

**73** Ro ojamaniwitanaka eechonkiini, ipokapaaki paashini ñaawakiriri, ikan-tapaakiri:

—Kyaaryo, eerokakya tsipatariri. Nokemakiro piñaawaetaki, eerokakya karireeyajatzi.

**74** Ikantanakiri:

—Teewee, tee niyotzirikya irika shirampari pikantakiri. Riyotzi Tajorentsi kyaaryo nokantakimiri. Teerika okameethatzi nokantakimiri, nokowaki rowashironkayenaata Tajorentsi.

Roojatzri iñaantanaka tyaaa.

**75** Roojatzri ikenkithashiryaawakiro ikantziriri Jesoshi: “Tekiraata ifnee tyaaa, okaate 3 pikante: ‘Tee niyotziri Jesoshi’”. Roojatzri riyowanaki, riraapaka jmmm, jmmm.

## 27

### *Ragaetanakiri Jesoshi janta Peraatoki (Mr. 15.1; Rk. 23.1-2; Jowa 18.28-32)*

**1** Owakira okitejitanaki, ikenkithawaetakaawaka riraga jewatayitziririni ñaanakowenantsirri eejatzi aataperoteenchari ikantawakaaka:

—¿Tsikama akanterika iroñaaka Jesoshi owamaakaanantyaariri?

**2** Roojatzri roojotakiri, raanakiri janta ijekinta pinkathari iitachari Per-aato. Irinta kaari joriyo inta rirotaki oroomajatzi.

### *Ishirikashitaka rirori Joorashi (Ran. 1.18-19)*

**3** Ipoñaashitanaka Joorashi riraga aakaantakiriri Jesoshi riyotaki rowamaakaantashityaari irinta, omaanta tektsi rantawita kaari kameethatatsi. Riyotakotanaka, osheki ikenkithashiryaanaka, roojatzri ipiyantanaka Tajorentsipankoki roepiyapaeniri 30 ikithoki koriki ipinawitakariri chapinki raakaanantakariri. Raminapaakiri jewawentayitziririni ñaanakowenantsiripaeni eejatzi aataperoteenchari.

**4** —Ajaa, piyorikite. Tee okameethatzi iroka nantakiri: tema naakaantashitakari Jesoshi. Tektsi rantawita: ikamashitya iroñaaka.

Omaanta ikanteeyawakirini irintapaeni:

—Omawitya, eerokaritya.

**5** Roojatzri rookanakiri iyorikite, romanatanakiri, patareei, janta Tajorentsipankoki, ishiyanaka roojatzri ishirikantapaaka.

**6** Ari, riraga jewawentziriri ñaanakowenantsirri ragaatziri koriki, ikantzi:

—Tee okameethatzi jaka akempoyeeri irika korikika. Rooma rirotaki apinatakiriri Jesoshi raakaanantyaariri.

**7** Roojatzri ikenkithatakaawaka:

—¿Tsikama akanterika korikika?

Ikantzi:

—Thame amanantero kipatsi akitatantyaariri kamatsiri riraga poñaachari paashiniki kipatsipaeni.

Rootaki ramanantakawori kipatsi oetachari ragaetapiintziri kipatsi kowitzipitha.

<sup>8</sup> Paerani roojatzsi iroñaka iiteetziro rowaga kipatsi: “Iwinawo Jesoshi raakaanantakariri”.

<sup>9</sup> Imonkaatakiro rojankinatzitakarini paerani Jeremiiyashi: “Raaneeri 30 ikithoki koriki riwetsikanteetariri iraata oetachari piraata.

Riotaki iwinawo raakaanantyaariri Rotyaantanewo Tajorentsi. Eero roshekizti koriki ipinatantawityaariri.

<sup>10</sup> Riotaki ramananantyaawori kipatsi janta ragaetapiintziri kowitzipitha. Riotaki Awinkatharite kanterini ramanantero kipatsi”.

### *Peraato rojampitziri Jesoshi*

(Mr. 15.2-5; Rk. 23.3-5; Jowa 18.33-38)

<sup>11</sup> Ari, ragaetanakiri riraga Jesoshi janta ijeekinta pinkathari iitachari Peraato, ikatziyimotapaakari. Ikantawakiri irira:

—¿Eerokama iwinkatharite joriiyopaeni?

Ikantapaakiri:

—Jee, naakanya.

<sup>12</sup> Roojatzsi ikijakiri riraga jewawentayitziririni ñaanakowenantsiripaeni eejatzsi riraga aataperoteenchari ithawetakotakiri, omaanta imaaeritashitaka rirori, tekatsi ikantzi.

<sup>13</sup> Ikantawakiri riraga Peraato:

—¿Tema pikemakiri ikantakotzimiri? ¿Litaka kaari pikananta eerori?

<sup>14</sup> Tekatsi ikantzi Jesoshi, tee rakiri. Roojatzsi rotsikanatanakariroña riraga ikenkithashiryaaanaka.

<sup>15</sup> Ari maawaeni ojarentsi, aririka omonkaataka kitejitalsiri rawijantanakarini paerani ronampiri Tajorentsi Ejiipitoki, riraga Peraato ikantapi-intawakiri maawaeni jeekatsiri:

—Eeniro ijeeki oshekini pinampijatzi janta omonkyaaagamentotsiki.

—¿Pikowakima noemishitowaemiri apaani omonkyaaagarewo?

Rootaki ikantapiintziri maawaeni ojarentsi roemishitowapiintziri omonkyaaagarewo, ninkarika ikoyiri joriiyopaeni.

<sup>16</sup> Eeniro ijeeki omonkyaaagamentotsiki shirampari ikemakotakiri joriiyopaeni, iitachari Warawaashi.

<sup>17</sup> Roojatzsi iroñaka kitejiri ipiyotaka oshekini atziri, rootaki ikantawakariri:

—Piyotzi nametakawo noemishitowaemiri apaani jeekatsiri omonkyaaagamentotsiki. —¿Ninkama pikowakiri noemishitowaemiri iroñaka? —¿Riotakima Warawaashi? Teerika pikoyiri irira, —¿riotakima pikowaki irika Jesoshika, riraga piitziri Rotyaantanewo Tajorentsi?

<sup>18</sup> Riraga Peraato riytakotziri jewatatsiripaeni joriiyopaeni osheki iki-jashitari riraga Jesoshi; tema tee ikowakayaari riraga joriiyopaeni royaateri rirori raapatziyari. Rirowitaka ikanterimi maawaeni joriiyo: “Nokowaki poemishitowaeniran riraga Jesoshi”.

<sup>19</sup> Eejatzsi inkaaganki otyaantakiri iina riraga Peraato kantziriri: “Okantzi piina: ‘Eero powamaakaantziri riraganki, ikameethaperotaki. Nomishitawakiri inkaaganki, osheki nokenkithashiryaaakotawakiri’ ”. Rootaki kaari ikowantawita rowamaakaanterimi.

<sup>20</sup> Omaanta riraga jewatayitziririni ñaanakowenantsiripaeni eejatzsi aatap-erooteenchari ikantziri riraga atziripaeni:

—Pikanteri: “Poemishitowaeri Warawaashi. Riraga Jesoshi, pikentako-takaanteri”.

**21** Roojatzi rapiitawakiri, ikantawakiri riraga Peraato:

—Pamine sha, ikaataki apite. ¿Ninkama pikowakiri noemishitowaemiri? Ikantzi maawaeni:

—¡Warawaashi!

**22** Ikantawakiri:

—¿Tsika akanterika irika Jesoshika, riraga ii teetziri Rotyaantanewo Tajorentsi?

Ikantakiri maawaeni:

—¡Pikentakotakaanteri!

**23** Ikantawitari rirori:

—¿Itama rantakiri nokentakotakaanantyaariri?

Eekiro ikaemapaakitzi:

—¡Pikentakotakaanteri! ¡Pikentakotakaanteri!

**24** Osheki ikijanaka maawaeni. Riyotanaki riraga Peraato ratsipetashitaka rojampitawitakari. Ikanantakariri riraga ronampiri:

—Pamakotenawoota iñaa.

Ramakotakiniri, roojatzi ikiwawakotaka rako riyotantyaari atziri tee ikowawita rowamaakaanteri riraga Jesoshi. Tee ikowawita, roojatzi ikantawakiri:

—Kaari naari kowatsini nowamaakaanteri, kaari. Pikowakirika eerori, eerokamacheetaka kentakotakaanterini.

**25** Ikantakiri:

—Nokowaperotaki, rooma naakakya kantakimiri. Kameetha ikijenaata naari Tajorentsi, eejatzi kameetha ikijeri maawaeni notyomi nashi.

**26** Roojatzi roemishitowakiri riraga Warawaashi. Roemishitowakiri, ikantawakiri riraga joraaro:

—Paaneeri Jesoshi, powajankiteri, roojatzi pikentakoteri.

### *Riraga joraaropaeni raanakiri ishirontawentakari Jesoshi*

(Mr. 15.16-20; Jowa 19.1-3)

**27** Ikantaka joraaropaeni raanakiri irira janta ipankokira pinkatharentsi, roojatzi ikaemapaakiri paashinipaeni joraaro.

**28** Roojatzi raatonkoryaakiri iithaari. Ikithaatziri paashini kithaarentsi kityonkamawoneentatsiri.

**29** Roojatzi riwetsikantakanari amantheerentsi kitocheetatsiri ramanteetakaakiri. Eejatzi ipakiri kotzitsi, ikantziri:

—Poerikiro pikotzi.

Riraga jewawenantatsiri paerani rametakawo ikithaatapiintawo kityonkari, ramanteetawo ramanteerhi pinaperotachari, eejatzi roerikapiintziro ikotzi pinatachari. Roojatzi rotziwerowashitapaakari, roshiyakaawaetashitaka ipinkathajeempiyaakari, ikantziri:

—Eeroka, nowinkatharite. ¿Peewatanakimi, peewawenterimi maawaeni joriyyopaeni?

Ishirontawentakari:

—Injii, injii, injii.

**30** Reewapootakiri maawaeni. Roojatzi raapithatanakiri ikotzi. Romperatanakari iitokira.

**31** Osheki ishirontawentanakari injii, injii, injii. Roojatzi raatonkoryagaeri kityonkamawoneentatsiri, ikithaatakagaari iithaaripero, roojatzi raantanakari ikentakotantyaariri.

### *Ikentakotakiri Jesoshi koroshiki*

(Mr. 15.21-41; Rk. 23.26-49; Jowa 19.17-30)

**32** Ikanta raanakiri joraaro riraga Jesoshi koroshiki. Romperatakari irira raaneero antawo inchato oetachari koroshi. Osheki otenatzsi,

ipomeentsiperotawo raaneero. Janta awotsiki itonkiyotawakari shireenejatz iitachari Shimo. Romperatawakari joraaro ikantziri:

—Ajaa, koroshi, paaneeniri irika.

Roojatzi itsipatanakari, raanakiniri koroshi.

<sup>33</sup> Roojatzi rareetapaaka maawaeni tonkaariki oetachari Koorikota. Ari aetziro aari apaanteki: iitonakintsi.

<sup>34</sup> Areetapaaka, ipawiteetapaakari riraga Jesoshi awishoowaantsi oowa otspatakawo kepishiyanto. Ikemijantawitawakawo, tee ikoyi rirero.

<sup>35</sup> Roojatzi ikentakotakiri joraaropaeni koroshiki. Roojatzi rowatzikakotakiri. Eejatzi iñaathawaetaka irirapaeni riyyotantyaari ninkarika aakironipa iithaari.

<sup>36</sup> Roojatzi ijeekantanaka jaga, raminakowenteri riraga Jesoshi. Ro ijeekantanakari, raminakowenterita, rowawijaakotzirikari paashini atziri.

<sup>37</sup> Eejatzi inkaaganki rojankinatakoetakiro owaanini inchakotaki: "Irika rirotaki Jesoshi iwinkatharite joriyyopaeni". Roojatzi ikentakoetakiro jeñokiiniki iitoki Jesoshi.

<sup>38</sup> Eejatzi ikentakotakiri apite koshitantatsiri; apaani rowatzikakotakiri rakoperoki riraga Jesoshi, eejatzi paashini rowatzikakotakiri rampateki.

<sup>39</sup> Eenitatsi oshekini atziri awijayitatsirini awotsiki ininatakiri riraga Jesoshi. Rotekayinatapaaka irinta. Ishirontawentapaakari, injii, injii, injii.

<sup>40</sup> Ikantapaakiri:

—Pishekiroreeromi Tajorentsipanko, okaate kitejiri 3, piwetsikaeromi. Ajaaty, powawijaakotya eeroka. Eerokarika Itomi Tajorentsi, ari payiite jaawiki.

<sup>41</sup> Eejatzi ikimitaka riraga jewatayitziririni ñaanakowenantsiri eejatzi riraga iyotaantayitzirorini Iwaperite Tajorentsi, eejatzi riraga warijeeypaeni, eejatzi riraga aataperoteencharipaeni ishirontawentakari. Ikantzi:

<sup>42</sup> —Rowawijaakotakiri apaanipaeni anampijatzi, omaanta iroñaka tee imatziro rowawijaakotya rirori. Thame aminawakiriita, rirotakirika awinkatharite kimitaka pikantzi, kameetha rayiite jaawiki iroñaka. Rayiterika jaawikika, ari aapatziyanaakyaari aaka. Injii, injii, injii.

<sup>43</sup> Tema ipinkathatawitarira Tajorentsi rirori: rowawijaakoteriita iroñaka. Aamaashitya aritaki rowawijaakoterimi itomi, rooma ikantzi: "Naakakya Itomi Tajorentsi". Injii, injii.

<sup>44</sup> Eejatzi ikimitaka riraga koshintzi ikentakoteetakiri, ishirontzitaka rirori.

### *Ikamaki Jesoshi*

(Mr. 15.33-41; Rk. 23.44-49; Jowa 19.28-30)

<sup>45</sup> Ikaataki oorya tampatsika, omapokapaaka otsitenitanaki maawaeni kipasti, roojatzi shaawiteni.

<sup>46</sup> Rootentsi okitejitanee, antawo ikaemanaki Jesoshi, ikantzi:

—Erii, Erii, īraama jawaatani?

Rootaki akantziri apaanteki: "Notajorentsite, Notajorentsite, īitaka pookantanari?"

<sup>47</sup> Ikemantawakariri riraga jeekaneentsiri, ikantzi:

—Pikemiri, ikaemiri Iriiyashi.

<sup>48</sup> Roojatzi ishiyanaka atziri, rowiinkakiro piyonkashinkanari awishoowaantsi oowa kepishaari. Rojataqkiro chekopikira rowaankakotanakiniri riraga Jesoshi, rajookawakiromi.

<sup>49</sup> Omaanta ikantziri paashinipaeni:

—Eero pantziro. Thame aminawakiriita aririka ipokashitapaakiririka Iriiyashi rowawijaakoteriita. Injii, injii.

50 Roojatzi rapiitziro ikaemi. Antawo ikaemi. Roojatzi ikamantanaka.

51 Ikamantaka Jesoshi, omapokanaka otzijagaanaka antawoni otzikaakiro janta Tajorentsipankoki inthomaenta. Tontari ironta, otzikaakiro omookira. Omapokanaka itanaka jenoki otzijagaanaka owaag, roojatzi jaawiki, apitemankitanaka. Eejatzi omoyekanaka kipatsi, moye, moye. Okotaanaki antawo mapi maawaeni.

52 Eejatzi rashitaryaakotanaka ijeekira kaminkari, ipiriintanaka oshekini aapatziyariri Tajorentsi.

53 Rimpaketaki ipiriintanaa Jesoshi, ryaateeyanakini Jerojareeki. Iñeeyawakirini oshekini atziri.

54 Eejatzi riraga omperatariri joraaro eejatzi joraaropaeni riraga kem-poyaakiriri riraga Jesoshi iñaawakiro omoyeka kipatsi eejatzi iñaawakiri riraga piriintayitaneencharini, iñaawakiro otsitenitanaki, maawaeni. Roojatzi ithaawantanakariroña, ikantzi:

—Kyaaryo, rivotaki Itomi Tajorentsi.

55 Eejatzi jaga, eeniro oshekini tsinani aminawaetawakiri riraga Jesoshi. Rootaki oyaawaetanakirini, opoñeeyakan Karireeyaki. Kijokiro owapiintanakirini, oneshironkatzirini, opapiintzirini rowanawo.

56 Okaatakiro Mariiya rowaga makaraarajato; paashini Mariiya rowaga riniro Jantyaako eejatzi Josee; eejatzi paashini rowaga riniro Jantyaako eejatzi Jowa, rirojatzi itomi Sewereeyo apite. Roojatzi oñaawakiri rirori, ikamanaki.

### *Romonkeetakiri Jesoshi omooki*

(Mr. 15.42-47; Rk. 23.50-56; Jowa 19.38-42)

57 Rooteentsi otsitenityaanaki. Eeniro ryaatanaki apaani riyotaanewoni Jesoshi iitachari Josee. Ipoñaaka irinta Arimateeyaki; rivotaki ashagantzinkari.

58 Ryaatashitanakiri riraga Peraato, ikantapaakiri:

—Kamaki Jesoshi. Nokowaki pishinetena naaneeri nomonkeeri omooki janta, riwetsikaetzinirinta kamatsiri.

—Jee, ari.

Roojatzi ikaemiri joraaro, ikantawakiri:

—Pishineteri irika raaneeri.

59 Roojatzi ryaataki rirori Josee, raakitziri, raanakiri, roojatzi rapineetakotanakiri tokoyakira kitetatsiri.

60 Roojatzi romonkyaanakiri omooki, rowaga owakira imokaetziro mapi impeetaki. Ipineero, rotzitakiro antawo mapi omookira, rashitakotantakiriri. Roojatzi ryaatapithatantanaari.

61 Enitatsi eejatzi janta Mariiya, rowaga makaraarajato, eejatzi ojameto otsipatakawo. Opokaki, roojatzi ojeekaki okaakinira omoo. Aminakowenantawakariri rirori romonkyaanakiri.

### *Riyaataki joraaro ishentawitakawo omoo romonkyagaetakirira Jesoshini*

62 Rawijantanakawo kitejiri ikentakotantariri Jesoshi oetachari Kitejittatsini rawijantanakarini Ronampiri Tajorentsi paerani Ejiipitoki. Okitejitanaki ryaatashitapaakiri jewatayitziririni ñaanakowenantsiri eejatzi warjeeypaeni janta Peraatoki.

63 Ikantapaakiri:

—Nowinkatharite, nokemawakiri ikantzi chapinki riraga amatawitantatsiri: “Nokame, roojatzi okaate kitejiri 3, ari nopersiintanee nañagae”.

64 Nokowaki potyaanteri joraaro iroñaaka ishentaperotero omoo janta romonkyagaetakirinta. Raminaperotero roojatzi omonkaatantyaari

kitejiri 3. Riyaatashitzirikari riyotaanewoni raanakirikari, roojatzi ikantzirikari atziripaeni: "Piriintanaa Jesoshi, añaagae". Paerani osheki ramatawitantzini irinta Jesoshini, omaanta aririka raaneeri riyotaanewo rirori, ramatawitatoperotzirikari irintapaeni anampijatzi, ikantzirikari: "Piriintanaa Jesoshi añaagae".

<sup>65</sup> Ikantawakiri rirori Peraato:

—¡Ajaa, joraaropaeni! Paanakiri janta raminaperoteroota omoo.

<sup>66</sup> Roojatzi riyaatantanaka, rashitakoperotakiri, roojatzi ishenteeyakironi riraga joraaro.

## 28

### *Ipiriintanaka irira Jesoshi*

<sup>1</sup> Awijanaki kitejiri imakoryaantari, iroñaaka otominkotapaaki. Eeniro otsitenineentzi, opiyaka janta Mariiya makaraarajato, eejatzi otsipatakawo ojameto. Iyaatantari aminashityaawo omoo omonkyagaetakirinta riraga Jesoshini.

<sup>2</sup> Omapokanaka antawo omoyekanaka kipatsi rareetapaakaga ronampriri Awinkatharite, poñaaneencharijenokinta. Ipokantapaakari ipinaapithata-paakiri mapi, roojatzi ijee Kantapaakawo.

<sup>3</sup> Osheki ishipakiryapaaki. Ikimatakawo raamorenkiranki tariito osheki ishipakiryaki. Kitamaaperori iithaari.

<sup>4</sup> Oshekiroña ithaawantawakari rirori maawaeni joraaro. Tee imatziro ishewata, kimiwitaka kamanaki.

<sup>5</sup> Roojatzi opokapaaki tsinanipaeni, othaawantapaakari eejatzi, omaanta ikantziro rirori:

—Eero pithaayi eerori. Niyotaki pipokashitawitari paminerri Jesoshi, riraga ikentakoteetakiri.

<sup>6</sup> Tee añiiri iroñaaka, piriinta, añaagae. Rooma ikantakiminikya paerani, monkaataka. Paminerotya romaryaanteetawitakaririka, tekatsi.

<sup>7</sup> Iroñaaka intsipaete piyaate pikanteriita maawaeni riyotaanewo: "Ipiriintanakiri Tajorentsi Awinkatharite, añaagae eejatzi. Reewatemi Karireeyaki. Iroñaaka piyaate eeroka, aritaki piñeeri janta". Rootaki nopolkantari nokantemi.

<sup>8</sup> Roojatzi owaperotanakiroroña, eejatzi osheki okimoshiretanakiroña; iyaatanaki oshiyashitanakina naakapaeni riyotaanewo okantena.

<sup>9</sup> Niyanki romapokapaakiro riraga Jesoshi, riwethatapaakawo, ikantziro:  
—¿Eeroka?

Roojatzi iyotawakiri, iyaatashitapaakiri, otziwerowashitapaakari, roojatzi oerikapakiri iitzikira. Osheki opinkathatapaakiri.

<sup>10</sup> Roojatzi ikantawakiro:

—Eero pithaayi. Piyaateeyini iroñaaka, pikanteri maawaeni niyotaanewo riyaate janta Karireeyaki. Aritaki iñaapaakina janta.

—Jee, ari.

### *Ikantaki joraaropaeni: "Ikoshiteetakiri Jesoshini"*

<sup>11</sup> Rootaki opokashitantanari okantapaakina, eejatzi irinta joraaropaeni riraga aminawitawori omoo ipiyankawo nampitsikinta riyatashitanakiri jewatayitziririni ñaanakowenantsirsiki ikamantapaakiri maawaeni oetarika awijaneentsiri. Ikemawakiri rirori.

<sup>12</sup> Roojatzi ipiyoteeyakirini jewatayitziririni joriiyopaeni eejatzi aataperoteencharipaeni riyotaawakaaka, ikanteeyakini:

—¿Iroñaaka tsika akantyaaka amanakotantyaariri?

Roojatzi ikaemakaantakiri maawaeni joraaropaeni, ikantawakiri:

—Ajaa, koriki, osheki nopolinatem.

<sup>13</sup> Rootaki pikanantyaariri atziripaeni: “Ragaetaatziri Jesoshini, rooma nomaanakitzi eechonkiini niyankiiteni tsiteniri. Okimitaka ipokapaaki riyoataanewopaeni Jesoshini raapaentziri”.

<sup>14</sup> Aririka ikemakowentawakimi pinkathari, aritaki niyaataki naari janta nokamantakowentem eero rowajankitantzimi.

<sup>15</sup> Roojatzti raakiri koriki ipinateeyakirini jewatayitzirini joriyyopaeni, ryaatanaki itheeyawaetaka, imonkaatakiro maawaeni ikamantakiri. Rootaki ikantakiri maawaeni joriyyopaeni roojatzi iroñaaka, tee riyotzi kyaaryooperorika rañagae Jesoshi.

### *Iñeeyeerini Jesoshi janta Karireeyaki*

<sup>16</sup> Paashini kitejiri niyaatanaki naaka riyoataanewopaeni Jesoshi 11 tonkaariki janta Karireeyaki ikenkithatakotakiri chapinki Jesoshi tekira ikamini. Tekatsi itsipatanewoni iroñaaka Joorashini, rooma kamaki.

<sup>17</sup> Iñaanteeyapaakaririni, ipinkathaperotapaakiri, ikimoshirewentakiri. Omaanta apaaniipaeni ikantashiretti:

—¿Riro takima Jesoshi?

<sup>18</sup> Roojatzi Jesoshi romapokapaakina ikanteeyapaakinani maawaeni:

—Iroñaaka Pawa iitakina itzinkami jenokinta eejatzi kipatsika.

<sup>19</sup> Rootaki notyaanantemiri piyatae maawaeniki nampitsi, piyoteeri maawaenati atziri raapatziyena, eekiro ryaatatayee rameentena, pithoteeyanakironi maawaeni kipatsi. Aririka raapatziyakimi atziri riyanakirorika naaka owawijaakotakiriri, kameetha pikaawoshitakoteniri Tajorentsi. Rootaki ikowakaakiriri Pawa, eejatzi nokowakagaeyakiririni naari, eejatzi okowakagaeyakiririni Ishire Tajorentsi.

<sup>20</sup> Eejatzi pikamanteeyerini maawaeni imonkaatero maawaeni kameethatatsiri nokamantakimiri eerori. Naari kijokiro nowanakimi, nokempoyeemi, eejatzi maawaeni aapatzianari; roojatzi nopyanteeeyari nopolinkatharitantlypaakaari kipatsikika.

Ari okaatzi.

Naaka jankinatzirori:

Mateeyo

# MARIKOSHI ROJANKINATAKOTAKIRI JESOKIRISHITO, TSIKA IKANTA ROWAWIJAAKOTANTZI

*Rantayitzirini Jowa kaawoshitakotantziriri Tajorentsi  
(Mt. 3.1-12; Rk. 3.1-18; Jowa 1.19-28)*

<sup>1</sup> Iroñaka nokamantemiro kameethatatsiri. Nokamantemi rowawi-jakotantzi Jesokirishito. Tema rirotaki Itomi Tajorentsi.

<sup>2</sup> Paerani eenironi ijeekini kamanantzirorini iñaani Tajorentsi iitachari Iseeyashi. Rojankinatakotzitakarini Tajorentsi ikantziriri itomi: "Pikemina, notyomi. Notyaanteri kenkithatakotemini, reewatanakimi. Tema ari ikanteri maawaeni atziri: 'Paamayarirapa Awinkatharite, pikameethashire-tanaki'.

<sup>3</sup> Eenitatsi iinja atziri kenkithatakayerini atziripaeni janta okaankityenta, ikanteri: 'Paamayarirapa Awinkatharite. Pikameethatanaki iñaaperotantapakimiri pikameethatzti. Aririka pikameethatanaki pikimityaawo awotsi kameethatatsiri ikinantapaakyaaari Jewaperowenantatsiri: powameethatero iñaaperotanteeyapaakyaaaworini'.

<sup>4</sup> Aritaki monkaatapaaka ikantztakarini paerani Iseeyashini. Jowa riraga kaawoshitakotziriri Tajorentsi ijeekaki janta tekatsinta atziri ipanko, ikim-itakiro rojankinatakotzitakaririni Iseeyashi paeraniperoroña. Ikantakiri maawaeni pokashitziriri:

—Pikenkithashiryagaeyakya, eero pikimita paerani. Aririka pookaperoteero pantawitaro, aritaki nokaawoshitakotakimiri Tajorentsi, roojatzi riyoteeyantanakyaani atziri ikaminthaaperotatzii rirori, eero ikenkithashiryaakontakteemiro pantayiwitakarini.

<sup>5</sup> Ikanta ipokashitapaakiri maawaeni jeekatsiri kipatsiki owaero Joreeya, ejatzi maawaeni jerojareejatzi, ikantapaakiri:

—Eenitatsi kaari kameethatatsi nantziri. Nokowaki nawijakote, tema naapatziyaperotari Tajorentsi.

Roojatzi ikaawoshitakotawakiniri riraga Jowa maawaeni romitsitsiyaakotawakiri iñaakira iitachari Joriraani.

<sup>6</sup> Tee ikithaatawo Jowa kameethatatsiri, inta ikithaatawo ontyagaantsi iwitzikameeyo. Ishirikathakitatashimashi. Rowapiintari kimitariri tsitsiri. Ejatzi ithotziri eechonkiini iyaa pitsi.

<sup>7</sup> Ikenkithatakapiaintziri maawaeni atziri ikantapiintziri:

—Kaakitaki impaetakinari, riraga Rotyaantanewo Tajorentsi; tema ranaaaktakina, ipinkathariperotzi irinta. Osheki noñaakoweenkatziri irira, omaanta naaka tee noñaakoweenkata.

<sup>8</sup> Nokaawoshitakotzimiri Tajorentsi iñaaki, omaanta riraga impaetakinari ikithaatakapaaakaero Ishire, amitakotanteeri.

*Jowa ikaawoshitakotawakiniri Tajorentsi Jesoshi, ejatzi Jatanaashi  
iñaantawitakari*

*(Mt. 3.13-17, 4.1-11; Rk. 3.21-22, 4.1-13)*

<sup>9</sup> Paashini kitejiri rareetapaaka Jesoshi janta ijeekinta Jowa. Ipoñaka Najareeteki, jeekatsiri kipatsi iitachari Karireeyaki. Riraga Jowa ikaawoshitakotawakiniri Tajorentsi rirori iñaakira iitachari Joriraani.

**10** Eenirowa othapyaaki iñaa, raminanaki jenokinta, roojatzi omapoka-paaka iñaawakiro Ishire Tajorentsi, ayitashitapaakiri Jesoshi, oshiyapaakari jamomo.

**11** Ikematziiri Tajorentsi ikantziri:

—Eeroka notyomi nonintashireperotzimi. Osheki nokimoshirewentaper-otakimi.

**12** Roojatzi aanakiri Ishire Tajorentsi tekatsinta atziri ipanko, okaankiity-eenta.

**13** Ijeekaki janta okaataki 40 kitejiri. Riraga Jatanaashi ipokashiwitakari iñantawitapaakari, ikoyi rantakayerimi kaari kameethatatsi. Eejatzi tekatsi atziri itsipatyaaari janta, omaanta rojatekaakari koweenkayitatsirini piratsi, omaanta ineshironkatakiri ronampiripaeni Tajorentsi, ipakiri rowanawo.

*Ritananakawori Jesoshi riyyaakiri riyyotaanewopaeni*

(Mt. 4.12-22; Rk. 4.13-15)

**14** Paashini kitejiri ragaetanakiri riraga Jowa omonkyaaagamentotsiki janta Jerojareeki. Roojatzi ipiyanaka Jesoshi Karireeyaki. Ikaman-teeyakirini atziripaeni tsikarika ikanta Tajorentsi rowawijaakotantzi.

**15** Ikanteeyakirini:

—Rooteentsi ipinkathariwentayiteeni Tajorentsi. Pikenkithashiryagaeya, pookaero panteeeyirini eero pikimita paerani: tee pikameethawitani. Omaanta paapatziyeeyaarini Tajorentsi, pawijakotanteeyarini.

**16** Paashini kitejiri ikinanaki Jesoshi ochereeteki inkaare jeekatsiri Karireeyaki. Iñaapaakiri Shimo, eejatzi rirentzi Antereeshi. Ishiryaatzi inkaareki: aritaki ikantapiinta, ishiryaatapiintziri shima.

**17** Ikanta Jesoshi ikaemapaakiri, ikantapaakiri:

—Pipoke, thame poyaatanakina aritaki niyotaakimi paapatziyakaapi-ntyaaari atziripaeni Pawa Tajorentsi.

**18** Roojatzi rookantanakawo ishiryaamento, royaatanakiri riyyotaantyaariri.

**19** Ro ijanthawitanaka eechonkiini, iñaapaakiri Jantyaako itsipatari rirentzi Jowa. Rirotaki itomipaeni Sewereeyo. Ari ijekaeyini ipitoki ishirikiro ishiryaamento.

**20** Ikantapaaka Jesoshi, ikaemakotzitapaakari, ikantziri:

—Thame poyaatanakina.

Roojatzi royaatantteeyakarini rirori iroñaaaka. Intsipaete rookanakiri iriri ipitoki, itsipatayitanakarini ikaatzi amitakotayitziririni ishiryaatzi. Ikantzi:

—Jatakinagapa, pawa. Noyaatatyeeri Jesoshi.

—Jee, piyaate.

*Ikyapaaki Jesoshi ipiyoteeyantarini joriyyopaeni*

(Rk. 4.31-37)

**21** Roojatzi rareetapaa Jesoshi Kaperinawooki, ikaateeyirini riyyotaanewopaeni. Rootaki saawaro, kitejitsatsiri imakoreeyantarini joriyyopaeni, ikyapaaki pankotsiki ipiyotantapiintarira irira. Riyyotaapaakiri atziri.

**22** Riraga atziripaeni, rotsikanateeyanakarini, ikantawakagaeyanakan:

—Piñaakiri, kameetha riyyotaantaperotaki, riyoperotzi irira. Tee ikimitari riraga iyotaapiinteeyawiteerorini Iwaperite Tajorentsi: tee riyoperotzi iri-ropaeni.

**23** Eenitatsi janta shirampari kyaantariri kamaari. Ikaemakotawakiri Jesoshi, ikantawakiri:

**24** —Niyotakimi: eeroka riraga Jesoshi najareetejatzi, eejatzi eeroka Ito-mipero Tajorentsii riraga kameethaperotatsiri. ¿litaka pipokashitantanari? ¿Areetakama pithonkaeyantenerini?

**25** Iñaashintsithatakiri rirori kamaari:

—¡Pimaeriteewee! Pishitowantaneeyari irira shiramparira.

**26** Ari rompetawathatakaakari shirampari, ishintstanaki ikaemanaki, roojatzi rookantanaari kamaari.

**27** Eejatzi rotsikanateeyakarini atziripaeni maawaeni. Ro-jampitawakaanaka:

—¿Piñaakiroma imatakiri rantakiri? Owakira akemakiro iroka riyotaakaeri. Eejatzi imatakiri kamaari, rotyaantakiri: ithaawantaperotakari, jatanee.

**28** Roojatzi intsipaete ikenkithatakotanteeyakarini maawaeni karireeyajatzi.

### *Retsiyatakotakiro Jesoshi riyote Peetero*

(Mt. 8.14-15; Rk. 4.38-39)

**29** Ipoñagaayaani pankotsiki ipiyotapiinanta joriyopaeni riyaateeyanakini ipankoki Shimo, eejatzi Antereeshi. Royaateeyanakirini Jantyaako eejatzi Jowa.

**30** Ikamanteetawakiri Jesoshi:

—Ojaawamerikitatzi riyote Shimo. Eeniro jaga omaamentoki omaryaaka.

**31** Ari riyaatashitanakiro, ikathawakotapaakiro, piriintanaka. Roojatzi opeyantanaa ojaawamerikitza, roojatzi opaeyantakarini rowanawo.

### *Ro saawaro retsiyatatakotayitantakaririni Jesoshi mantsiyariipaeni*

(Mt. 8.16-17; Rk. 4.40-41)

**32** Rooteentsi itziroree oorya, ramayitakinirini Jesoshi maawaeni mantsiyari, eejatzi maawaeni kyaantariri kamaari.

**33** Maawaeni nampitsiweri ipiyoteeyapaakani omooki pankotsi.

**34** Ijeekaeyapaakini maawaeni mantsiyari, inashitachari imantsiyari-paeni. Retsiyatakoyeerini. Eejatzi ikantakiri kamaariipaeni:

—Pookaeyaneerini riraga pikyaantanewo, eejatzi pimaeriteeyeni.

Riraga kamaariipaeni, riyoteeyakirini Jesoshi rirotaki Tajorentsii, rootaki kaari ikowakaantari kamaariipaeni ikamanteri atziri.

### *Ikenkithatakaeri Jesoshi Iriri*

(Mt. 4.23; Rk. 4.42-44)

**35** Rootzimateentsi okitejite, ipiriintanaka Jesoshi. Riyaatanaki janta tektsi jeekatsini, ikenkithatakaeri Iriri.

**36** Ikowakowateeri Shimo eejatzi ikaateeyinira itsipateeyarinai.

**37** Iñaantapaariri, ikantapaakiri:

—Ikowakowaeyakimini maawaeni atziri.

**38** Ari ikantawakiri rirori:

—Ari ikantawakaata. Thame aate paashinikipaeni nampitsi. Aritaki janta nokenkithatakagaeyerini paashinipaeni atziri, rootaki nopolantakari kipatsikika.

**39** Ikinakinayitanakini, ithotyaagaeyanakironi nampitsipaeni janta Karireeyaki. Ikenkithatakaapiintakiri atziri janta pankotsiki ipiyotantapiintarira joriyopaeni, rowawijaakoeyakirini maawaeni kyaantariri kamaari.

### *Retsiyatakakirii Jesoshi patheenkari*

(Mt. 8.1-4; Rk. 5.12-16)

**40** Paashini kitejiri ryaatashitakiri patheenkari Jesoshiki. Patheenkari tee imatziro itsipatari paashini atziri. Tee oshinetziri Iwaperite Tajorentsi. Ari ryaatashitakiri riori, rotziwerowashitapaakari ipinkathatantapaakariri, ikantapaakiri:

—Tema eeroka pinkathari, pikaminthayena. Eenitatsi pitajorenka: pikoyirika petsiyatakoteena, ari pimatakiro.

**41** Osheki retakotaperotawakiri. Ari rakotashitawakiri, ipampitawakiri. Ikantawakiri:

—Jee, nokoyi: aritaki petsiyatakotee.

**42** Roojatzi opeyantanaa iwathaawo, etsiyatakotanee.

**43** Rotyaanteeri, ikantaperotakiri:

**44** —Nokantemi: eerowa pikamantayitzirini paashini atziri, inta piyaatashiteri flaanakowenantsiri, poñaagapaeyaari etsiyatakoteemi, roojatzi ishineteemi pipiyashiteri atziripaeni. Pimonkaatero ikantzirini Moeseshi: powamaeniri Tajorentsi pipira riyatantyaari atziripaeni etsiyatakoteemi.

**45** Ari ryaatanaki, omaanta ikamantakotayitakironi, maawaeni awijimotayitakiririni. Riyotakoeyakirini atziri Jesoshi, rootaki kaari ryaatantanaka nampitsiki. Ijeekakitzi janta okaankiiyeenta. Ipokashiiyakirini atziri poñaayitacharini paashinipaeniki nampitsi.

## 2

### *Retsiyatakotakiri Jesoshi kijopookitatsiri (Mt. 9.1-8; Rk. 5.17-26)*

**1** Paashini kitejiri ipiyanaa Jesoshi Kaperinawooki. Ikemakoeyeerini areetapaaka riori ijeekapaaki pankotsinentsiki.

**2** Ipiyoteeyakan osheki atziri, yikitaki pankotsiki. Tekatsi ikinapaaki paashini atziri rotzikaapaakiro omoo. Ikenkithatakagaeyakirini Jesoshi iñaani Tajorentsi.

**3** Ari inatakotapaakiri kijopookitatsiri. Ikaatzi 4 amiriri.

**4** Tekatsi ikantya rontsirokyaaari Jesoshi, rotzikaakiri atziripaeni. Roojatzi rateetakaantanakari jenoki pankotsi. Imoontapaakiro kaméetha, apatziro rothataakotakiri ijeekakira Jesoshi. Royiitakotakiri imaamentoki.

**5** Riyotawakiri Jesoshi rameenteeyakarini riraga 4 amakiriri, rootaki ikanantakariri riraga kijopookitatsiri:

—Niyompari, ari nopeyakotakaemiro kaari kameethatatsi pantawitari, aritaki nowawijaakoteemi.

**6** Eeniyo jaga ijeekaki iyotaantzirori Iwaperite Tajorentsi.

**7** Ikenkithashireeyakan rajankaneki riori:

—¿litaka ikantashiwaetantari irika? Iitajorentsitashitaka. ¿Tsika ikanterka rowawijaakotantyaariri? Tema apatziro rowawijaakotantzi riraga Tajorentsi.

**8** Riyoshiryaakotakiri Jesoshi ikenkithashiryaari, ikantziri:

—¿litaka pikenkithashiryaantari?

**9** ¿litaka pomeentsitaperotachani? ¿Opomeentsitama nokanteri irika kijopookitzinkari: “Eero nowashironkaemi, inta nowawijaakoteemi”? ¿Opomeentsitaperotama nokanteri irika kijopookitzinkari: “Pikatziyanee, paaneero pimaamento, pikatziyatziyawetaeñeyaa”? Eerorika imatziro, tema aritaki pishirontawentakina.

**10** Nokowaki piyoteeyeni eenitatsi notajorenka nowawijaakotantyaariri.

**11** Rootaki ikantakiriri kijopookitatsiri:

—Nokantzimi, pikatziyanaki, paaneero pimaamento, piyaatee pipankoki.

<sup>12</sup> Roojatzi ikatziyantanaka, raaneero imaamento, ishitowanee. Iñeeyawaerini ijoriyyotzinkaritepaeni, ari rotsikanateeyanakarini. Ikanteeyakanini:

—Tema ikameethaperotzi Tajorentsi, tee añiiro paerani kimitawori iroka.

*Riyoyaakiri Jesoshi Rewii  
(Mt. 9:9-17; Rk. 5:27-39)*

<sup>13</sup> Paashini kitejiri piyanaa Jesoshi othapyaaki inkaare. Ipiyotashiteeya-paarini eejatzi osheki atziri, riyotagaeyerini.

<sup>14</sup> Roojatzi rowaaganaa eejatzi. Iñaapaakiri Rewii, riraga itomi Arijeeyo, ijejeri pankotsiki ipiyotapiintziri koriki: ipiyotapiinteeeyinirini oroomajatzti. Riraga joriiyopaeni roonakari piyotapiintziriri koriki. Omaanta ikanta-paakiri riraga Jesoshi:

—Thame poyaatanakina.

—Jee, thametaatyamaami.

Ari ikatziyanaka, royaatanakiri.

<sup>15-16</sup> Ari riyaateeyanakini ipankoki Rewii. Rowakagaeyapaakarini osheki oyaateeyiririni Jesoshi, riyotaanewopaeni, osheki piyotapiintziriri koriki, maawaeni. Eejatzi rakiyoteeyakirini osheki paashinipaenai kaari kameethatzinkaripaeni. Rareeteeyapaakani iyotaantzirori Iwaperite Tajorentsi, rirotaki warijeeyo. Iñaakotapaakiri Jesoshi ikempiyeeyakarini rakiyoteeyirini kaari kameethatzinkaripaeni. Rojampitapaakiri riyotaanewopaeni:

—¿litaka itsipateeyantaririni irikapaeni, rowaeyani? Tee ikameetha-teeyini.

<sup>17</sup> Ari ikemawakiri rirori Jesoshi, ikantziri:

—Riraga kaari mantsiyatatsini tee ikoyi aawinantatsiri raawinteri, intakya mantsiyatatsiri rirotaki kowatsiri. Tee ro nopolantya nokaaemeri kenkithashiryaachari kameethatatsiri, inta riraga kaari kameethatatsi.

*Riraga riyotaanewo Jesoshi tee itzitapiintya*

<sup>18</sup> Ikantaka itziteeyani riyotaanewopaeni Jowa eejatzi riyotaanewopaeni warijeeyo. Apanipaeni atziri ipokashitziri Jesoshi, ikantapaakiri:

—Iroñaaka itziteeyani riyotaanewopaeni Jowa, eejatzi ikimiteeyani riyotaanewopaeni warijeeyo. ¿litaka kaari itztitanta piyotaanewopaeni eerori?

<sup>19</sup> Ari ikantawakiri Jesoshi:

—Okimitaka aririka raye shirampari iina, ikaemaeyerini isheninka iki-moshirewenteeyerini. Rareetapaakyaari, ¿arima itziteeyapaakyaani rirori? Eero. Tema riweshiryaawentapaakyaari. Ñaakiro, iroñaaka nokaa-teeyirini naari niyotaanewopaeni: ¿litaka notzitakaantyaariri?

<sup>20</sup> Omaanta aririka rookaeyaneerini isheninka aatsiri iina, aripaetekya itziteeyanakyaani. Eejatzi iinja naari, nookaeyaneerini niyotaanewopaeni, rowashiretakoeyanakinani, roojatzi itziteeyantanakyaani.

<sup>21</sup> Tee pimaejantziri iyotaantatsiri, tee. Eejatzi eenitatsirika pimaathapooki antyashipawo rooteentsi oshipaaye, aririka powawatatero owakirari maathaantsi, roojatzi aririka pikiwero aminthantanaka owakirari, eero omonkaagaakitanaa, roojatzi otzijagaantanaka antyashipawotatsiri, patsipetashitawo powawatatziro. Eejatzi okimitakya, patsipetashityawo paapatziyawo maawaeni okaatzi iyoteetakimiri. Kameetha pipakaakiro paashini paapatziyawitariri roojatzi kameethatanaki paapatziyena naari.

<sup>22</sup> Napiitakiro noshiyakaawentemiro okaatzi niyoteemiri. Piyotzi aakapaeni joriiyopaeni awetsikiri imashi piratsi apiyaatantyaawori awishoowaantsi oowa. Omaanta eero apiiuantari apiyaatantari awishoowaantsi oowa owakirari inthomaenta itaworimashi inta

apiyaatantya owakira mashiri. Apiitantlyaaririka tema ari ijagaanaki. Okimitaka iroka, oetarika niyotagaemiri naari eejatzi owakirari. Tee okameethatzpi pipiyotero ikemijantakayimiri paashini iyotaantsi. Pipakayero pikemijantziro ikantawitzimiri irintapaeni roojatzi kameethatanaki paapatziyena naari.

### *Ikantawakaawentakawo saawaro*

(Mt. 12.1-8; Rk. 6.1-5)

<sup>23</sup> Paashini saawaro ikinanaki Jesoshi pankirentsimashiki, itsipateeyarini ryotaanewopaeni. Ari niyanki rowiitanaki ryotaanewo okithoki teriko, itayaakiro otaki, rowaeyawoni okithoki.

<sup>24</sup> Ari ikantziri warijeeyo:

—¿litaka rowiitantanawori okithoki, itayaawaetantakawo iroka kitejirika amakoryaantari? Tee okameethatzpi. ¿litaka ranantawori?

<sup>25</sup> Rakanakiri Jesoshi:

—¿Tema tee pikenkithashiryaaneentziro Iwaperite Tajorentsi kenkithatakotziripi paerani Iravirini, riraga jewawanentatsiri maawaenijoriiyopaeni? Tekatsi raye royaari, ayimatakiri itashe, eejatzi itsipateeyarini.

<sup>26</sup> Eniro janta ipankomawoki Tajorentsi paa riwetsikaetziniri irira: tee ishineteeyerini rowaeyaawoni maawaenii atziri, apatziro rowaeyaawoni ñaanakowenantatsiripaeni. Omaanta ayimawitakari itashe Iravirini. Riyaatashitakiri Awyataari, riraga iwinkatharite ñaanakowenantatsiripaeni, ikantziri: "Notasheyeyakini. Tekatsi nowaeyaarin". Ari ipawakiri paa: "Eenitatsi iroka, powapaeya". Ari rowakawo, eejatzi rowakagaeyakarini itsipateeyarini. Kaari riroripaeni ñaanakowenantatsiri, omaanta tee ikoyi Tajorentsi rowashironkagaeyerini.

<sup>27</sup> Pamine, riraga Tajorentsi riwetsikakiniri atziri kitejiri imakoreeyantyaarini. Tee ro riwetsikantyaanariri atziri inaapinkathatero kitejiri.

<sup>28</sup> Nopoñaaaka naaka jenokinta, natziriperotapaaki jaka kipatsiki: tema naaka kantatsini oetarika anteri saawaroki.

## 3

### *Riraga Jesoshi retsiyatatakotziri kijopookitatsiri rakoki*

(Mt. 12.9-14; Rk. 6.6-11)

<sup>1</sup> Riraga Jesoshi ryaatanee eejatzi pankotsiki ipiyotantapiintari joriiyopaeni. Aritaki ijekirkir jaga: shirampari kijopookitatsiri rakoki.

<sup>2</sup> Raminashiiyawakarini atziri riraga iijanewo, joreririri: ikowaki ryote aririka retsiyatatakoteeri saawaroki. Tee ishineteetziro retsiyatatakoteetzi atziri saawaroki. Ikowaeyakini riroripaeni ikantakooyerini: "Tee okameethatzpi iroka rantakiri Jesoshi".

<sup>3</sup> Riraga Jesoshi ikantziri kijopookitatsiri rako:

—Pikatziyee, pipoke jaka niyanki.

Roojatzi ryaatantanaka niyanki, ikatziyantapaaka.

<sup>4</sup> Roojatzi rojampiteeyakirini maawaenii amineentsiri:

—¿Kameethama aneshironkateri atziri kitejiriki amakoreeyantarini? ¿Arima owashironkayeri? ¿Okameethatzima owawijaakoteri? Teerikama, ¿pikowakima owamaeyerini?

Omaanta imaeriiyanakini.

<sup>5</sup> Ikiyanaka Jesoshi, ramineeyanakirini, eejatzi retakoeyanakarini riroripaeni. Tema ikiyoshiryaanakitzi rajankaneki tee ikamintaanteeyini atziri. Ikantziri shirampari:

—Powaankaero pak.

Ari rakotanee, roojatzi retsiyatakotantanaa.

<sup>6</sup> Ishitowaeyanakini warijeeyopaeni, ryaatashiiyanakirini itsipamintharipaeni Erooreshi. Ikantawakagaeyakan: —¿Tsikatyakaanterika Jesoshi, owamaantyaariri?

*Retsiyatakotantzi Jesoshi janta inkaareki  
(Mt. 4.24-25; 12.15-21; Rk. 6.17-19)*

<sup>7</sup> Riraga Jesoshi eejatzi ryotaanewopaeni ryaatapitheeyanakirini warijeeyopaeni inkaareki ijeekapaaki apaniroeni, omaanta royaateeyanakirini osheki karireeyajatzi, eejatzi joreeyajatzi,

<sup>8</sup> jerojareejatzi, iroomayajatzi, jeekatsiri intatsikeronta iñaaki Joriraani, maawaeni jeekatsiripaeni Tziiroki, Shirooki, maawaeni. Ikemakoeyakirini itajonkantzi, rootaki ryaatashiiyantakaririni osheki atziri.

<sup>9</sup> Ikantziri ryotaanewo:

—Pamakinawoota pitotsi, notetawakyata: rawitsineeyapaakinanikari atziri. Rooteentsimi rowamayenami.

<sup>10</sup> Ikanta Jesoshi rotetantakawo pitotsi ari ikenkithatakagaeyakirini atziripaeni kipatsiki, roojatzi rayitantapaaka eejatzi kipatsiki. Osheki retsiyatakoeyawakirini mantsiyatzzinkaripaeni. Riraga paashini mantsiyari rinteenaryayitakirini atziripaeni, ikowaki ipampitantapaeyaariri Jesoshi awijakotanee imantsiyari.

<sup>11</sup> Riraga atziri kyaantariri kamaari rotziwerowashitapaakari ipinkatheeyakirini. Icheraanaki iñaawaetakaakiri ikantziri:

—Jesoshi, eerokataki Itomi Tajorentsi.

<sup>12</sup> Ikantaperotziri Jesoshi:

—Pimaerite, eero pikamantakotana.

*Riyoyaakiri Jesoshi ryotaanewoperotyaaari  
(Mt. 5.1; 10.1-4; Rk. 6.12-16)*

<sup>13</sup> Paashini kitejiri itonkaanaki Jesoshi tonkaariki. Ikaemakaantakiri ikaatziri ryoyaakiri, ari ipokashiteeyakirini.

<sup>14</sup> Riyoyagaeyakirini 12 shirampari, itsipaperoeyaarini. Iinja iiteri rotyaantanewo, tema rotyaanteeyerini ikenkithatakagaeyerini maawaeni atziripaeni iñaani Pawa Tajorentsi.

<sup>15</sup> Eejatzi ipakiri itajorenka, rookakaakowiritanantyaariri kamaaripaeni atziri.

<sup>16</sup> Rirotaki ryoyaakiri ryotaanewo 12. Riyoyaakiri Shimo (iitakiri Peetero),

<sup>17</sup> eejatzi Jantyaako itsipatakari rirentzi Jowa, (rirotaki itomipaeni Sewereeeyo. Iitakiri riroripaeni iroñaka Wowaneerejeshi). (Akantziri aaka apaanteki: “Oshiyawori oñaawaepookitzi”)\*

<sup>18</sup> Eejatzi ryoyaakiri Antereeshi, Jiripi, Waritoromee, Mateeyo, Tomashi, Jantyaako (itomira Arijeeyo), Tareeyo, paashini Shimo (riraga kathaaperotzinkari antayitzirorini oetarikapaeni).

<sup>19</sup> Eejatzi ryoyaakiri Joorashi (riraga karyootejatzi, aakaanterini iinja Jesoshi).

*Itakaawitakari ikyaatkariri kamaari Jesoshi  
(Mt. 12.24-32)*

<sup>20</sup> Roojatzi ipiyanaa Jesoshi pankotsinentsiki. Ipiyoteeyaani eejatzi osheki atziri. Tekatsi ikantya rowaeya eejatzi ryotaanewo.

\* <sup>3:17</sup> Oshiyawori oñaawaepookitzi okantakotziri: “shintsitziniriri rantawaetziniri Jesoshi rootaki iitantakariri”.

**21** Ikemakotakiri Jesoshi isheninkapero, riyaatashitawitaari raaneerimi ipankoperoki. Ikantawakaanaka:

—Osheki ishinkiwentaka Jesoshi, tee iñaakota, thame aaneeri.

**22** Ipokashitapaakiri eejatzi jerojareejatzipaeni, iyotaantzirori rojankinarni Moeseshi. Ikantashitapaakari:

—Riotaki Wereshewoo kyaantapaakariri ishireki Jesoshi. Tema riotaki iwinkatharite maawaeni kamaari: riotaki amitakotziriri rirori rotyaantziri iyamaarite, rootaki imatantakariri.

**23** Ikaemaeyawakirini Jesoshi, roshyaakaawenteeyawakirini:

—¿Kyaaryooma ikyaaantapaakina iwinkatharite kamaari? Pamine: ¿tsika ikantyaaka Jatanaashi rookaeya rirojatzi? Eero imatziro.

**24** Okimitaka aririka ikijawakagaeyani jeekatsiri nampitsiki, rookawaka-gaeyarinika, ¿arima ijeekaeyaneeni kameetha? Eero.

**25** Eejatzi okimitaka aririka ikijawakagaeyani jeekatsiri pankotsiki, ¿arima kijokiro rowawakaaneeyaa? Eero.

**26** Eejatzi ikimitaka, aririka Jatanaashi ikijerimi iyamaaritzinkarite, rookawakagaeyanimi, eeromi ijeekimi, inta aritaki ithonkawakaeyakanimi. Rootaki.

**27** Eejatzi ikimita rirori koshitantatsiri: ithaawantari shintsiperotatsiri ikyapankoteri ikoshitantlyaariri rowaagawo. Aririka ipokashiteri, reewataapaakiri roerikapaakiri, roojotapaakiri shintsitsatsiri, roojatzikya raantyaaawo oetarikapaeni rowayitzirini ipankoki.

**28** Kyaaryootaki iroka nokamantaperotemiri: ineshironkateeyirini Tajorentsi maawaeni antzirori kaari kameethatatsi. Tema ipeyakoteniri okaatzí rantziri. Eejatzi, aririka ikantzimateeyawityaarini, ineshironkateeri eejatzi.

**29** Omaanta eero ineshironkateeri riraga kantzimatziroi Ishire Tajorentsi: ikanteetatyeeyaani ijeeki rirori paamariki kaari tsiwakanitatsini. Eerowa rawijkakotee.

**30** Rootaki ikantakiriri Jesoshi. Ñaakiro, ikantashiiyawitakanin inkaaganki: “Riotaki iwinkatharite kamaari amitakotziriri Jesoshi”. Tema rootaki Ishire Tajorentsi amitakotziriri, kaari iwinkatharite kamaari.

### ***Ikamantziri Jesoshi ninka isheninkatakari***

(Mt. 12.46-50; Rk. 8.19-21)

**31-32** Ikantaka ijeeki Jesoshi pankotsiki, ijeekimoeyapaakirini areeteeyapaakaririni. Roojatzí areetapaaka riniro, otsipateeyapaakarini rirentzi-paeni eejatzi ritsiropaeni. Okatziyapaaka inkokironta, okantziri oñaapaakiri:

—Pikanterani notyomi.

Ari ikyashitanakiri, ikantapaakiri:

—Areetapaaka piniro, parentzipaeni, eejatzi pitsiropaeni. Ojeekapaaki inkokironta, okowapaakimi.

**33** Rakawakiri:

—¿Ninka nanatatsiri? ¿Ninka yeeyitatsiripaeni?

**34** Roojatzí rookotantanakari jeekimoeyakiririni. Ikantanaki:

—Iroka nanaka. Irika yeeyika.

**35** Ninkarika antapiintzirori ikowakaeriri Tajorentsi: riroteeyakini yeeyi, choeni, nana. Nosheninkateeyakarini maawaeni aapatziyeyanarini.

<sup>1</sup> Paashini kitejiri, rapiitakiri Jesoshi riyotagaeri janta othapyaakiinta inkaare. Ari ipiyotawentapaakari oshekini atziri. Ikanta Jesoshi iñaawakirira roshekitapaaki atziri, rotetanaka pitotsiki, rotatsinkakiro eechonkiini niyankyaani inkaare, ijekanakir iroñaaaka rirori. Tema oshekyantzi atziri ikatziyashitakari othapyaaki.

<sup>2</sup> Ari riyotaayitakirini oetarikapaeni, eejatzi roshiyakaawentayitakironi okaatzzi ikenkithatakotayitzirini. Ikantakiri iroñaaaka:

<sup>3</sup> —¡Pikemena! Riyaatanaki pankiwaetatsiri janta rowanekei rookakitero okithoki teriiko.

<sup>4</sup> Ari rookakitapaakiro okithoki teriiko. Eenitatsi apaanipaeni ookakitapaenchari awotsiki. Ikanta ipokapaaki jenokiweripaeni, rowapaakawo okaatzzi rookakitawitakari irika shirampari janta awotsiki.

<sup>5</sup> Eenitatsi paashini pariyapaentsiri okithoki janta mapipookiki, tee oshenkaawitapaaka, intsipaete oshookawitanaka.

<sup>6</sup> Ari ijenokitapaakir oorya, roojatzi ojampiyashitantanaka. Tee oparithap-erotzi, rootaki okamantanakari.

<sup>7</sup> Opariyapaaki paashini okithoki kitcheemashiki. Okanta oshookawitanaka, okimotatawitanaka. Omaanta anaanakiro oshookanaki kitchee rootaki kaari okithokitantanaka.

<sup>8</sup> Paashinipaeni okithoki opariyapaaki kipatsiperoki kameethari. Oshookanaki, okithokitanaki. Apaanipaeni okithokitanaki okaatzzi 30. Paashinipaeni okithokitanaki okaatzzi 60. Eejatzi paashinipaeni okithokiperotanaki okaatzzi 100.

<sup>9</sup> Pikoyirika piyotakotero okaatzzi nokenkithatakaakimiri paapatziyena iroñaaaka.

<sup>10</sup> Jateeyaneeni atziripaeni ikaatzzi piyotawentakariri Jesoshi, eeniro itsipateeyanaarini Jesoshi apaanipaeni aapatziyariri eejatzi riyotaanewopaeni, riyaatee pankotsiki. Ikanta rojampiteeyakirini rirori, ikanteeyakirini:

—Iyoaantatsiri, ¿oetaka poshiyakaawentakiri inkaaganki okaatzzi pikenkithatakiri?

<sup>11</sup> Ikantakiri Jesoshi:

—Pamine, iroñaaaka nokamantemiro eerori kaari piyotawita: aritaki piyotakiro tsika ikantari Pawa reewawenantzzi. Rioma paashinipaeni atziri, eerowa nokantziri rirori inta noshiyakaawentashitayitaanarini.

<sup>12</sup> Irintapaeni atziri rivotaki aminawitachari, tee iñeemaetawo okaatzzi nantziri. Eejatzi rivotaki kemijantawitanari, teemaeta ikemathatziro oetarika nokantawitakariri. Rootaki kaari rookantawo okaatzzi rantayitzirinira kaari kameethatatsi, eero ipeyakotzimaetanari Pawa rantziri.

<sup>13</sup> Eejatzi ikantakiri:

—¿Tema pikemathatawakiro eeroka okaatzzi noshiyakaawentakiri inkaaganki? Aririka napiitakimiro noshiyakaawentayitemironi, eerowa piyotakotawakiro eejatzi.

<sup>14</sup> Riraga pankiwaetatsiri okithoki rivotaki oshiyakariri iyotaantzirori iñaani Tajorentsi. Rowaga okithoki oshiyakawo iñaani.

<sup>15</sup> Rowaga awotsi opariyantapaakari apaanipaeni okithoki oshiyakari atziri kemawitawakawori iñaani Tajorentsi, omaanta riraga Jatanaashi ipokapaaki imanimotakaapaakiri: tee raapatziyanaana.

<sup>16</sup> Eejatzi iroka pariyapaentsiri mapipookiki, rootaki oshiyakaawentachari apaanipaeni atziri kemawitawakawori iñaani Pawa, intsipaete iroñaaaka ikimoshirewentawitanakawo.

<sup>17</sup> Pankirentsi okaatzzi kaari tzimaperotatsi oparitha, intsipaete okamanaki. Iroka roshiyakawo riraga atziri ikemijantawitaka

roojatzi rowashironkagaetakiri, aririka ikijeetakiri. Rootaki intsipaete rookantanaawori ikemijantawita.

<sup>18</sup> Rowaga kipatsi kitcheemashiteentsiri oshiyakaawentziri kemath-atawitawakawori iñaani Pawa Tajorentsi,

<sup>19</sup> omaanta ikenkithashiryaaapiintziro jeekayitatsirini jaka kipatsikika, iki-moshirewenteeyironi rashitayitarini. Eekiro ikowanakitzi rashaagawotya, oetarikapaeni, rootaki rookantaawori ikemijantawita.

<sup>20</sup> Omaanta iroka kameethari kipatsi oshiyakaawentziri kemaper-otawakirori iñaani Tajorentsi. Aritaki raapatziyaperotakawo, eejatzti raapatziyakaaperotakari paashinipaeni atziri. Apaani raapatziyakaakari 30, paashini raapatziyakaakari 60, paashinipaeni raapatziyaperotakaakari 100.

### *Roshiyakaawentakiniri Jesoshi ootamentotsi (Rk. 8.16-18)*

<sup>21</sup> Eekiro riyaatatzi ikantakiri Jesoshi:

—Akowakirika ootakotya ḫarima owakiri ootamentotsi kowitziki inthomaanya? ḫArima amanalikri ootamentotsi? ¡Eero! Tema akowatzi oyeri ootamentotsi jeñokiini okoñeetyaantyaari aminanteeyaaarini maawaeni.

<sup>22</sup> Okimitaka iroka iinja okoñaatanaki maawaeni amanayitawitarini iroñaaka riyoteeyanakironi maawaeni okaatzi anteyakirini.

<sup>23</sup> Pikoyirika piyotero kameetha, ari pikemaperotawakiro iroka nokamantakimiri.

<sup>24</sup> Paashini ikantakiri eejatzti:

—Pikenkithashireeyawo iroka pikemakiri. Aririka eechonkiini paap-attiyawakyaawo nokamantzimir, ari eechonkiini piyotawakiro. Aririka osheki paapatziyaperotawakyaawo, ari osheki piyotawakiro, niyotaaperotakimiri.

<sup>25</sup> Riraga aapatziyawakawori niyotaakiriri, eekiro niyaatatye niyotaaperoteri. Riraga kaari aapatziyawakawori nokamantawitakariri, eero riyotzi oetarika, tema ipeyakotakiro eechonkiini riyowitari.

### *Roshiyakaawentziniri Jesoshi okithoki shookatsiri*

<sup>26</sup> Eejatzti ikantzi:

—Tema ipinkathariwenteeyakaeni Tajorentsi. Roshiyakari atziri jatatsiri rowaneki ipankitziro okithoki.

<sup>27</sup> Imaapiintzi tsiteniriki, ikakitapiintzi kitejiriki. Shitowathowatanaki iwankiri, okimotatanaki. Tee riytakotzimaetawo tsika okanta oshookantakari.

<sup>28</sup> Oshookaki kipatsiki: eewatanaki othowaki, roojatzi owaatotantanaka, roojatzi owathatantanaka.

<sup>29</sup> Aririka ojampatanaki okithoki, ichekakoetero, tema monkaatapaaka rowiitanteetyaawori.

### *Roshiyakaawentziniri moshitaaja (Mt. 13.31-32; Rk. 13.18-19)*

<sup>30</sup> Eejatzti ikantzi Jesoshi:

—Tsika nokantemirorika noshiyakaawentemiroka tsika ikanta Tajorentsi ipinkathariwenantz? Tsika akanteroka akenkithatakotantyaawori?

<sup>31</sup> Oshiyakawo okithoki moshitaaja. Omaanta rowaga okithoki, tee okim-itawo paashinipaeni kithokitatsiripaeni: okaerikitziini kameetha.

<sup>32</sup> Aririka apankitero, oshookanaki. Okimotatanaki, anaayitanakironi paashinipaeni pankirentsitayitatsirini. Antawotayitanakini owaempkipaeni, aritaki raampeyakyaawo shiwankitayitatsirini.

<sup>33</sup> Aritaki ikantapiinta Jesoshi, roshiyakaawentapiintziniri atziri riyotaantyaariri iñaani Tajorentsi. Aririka eechonkiini ikemakiro, ari eechonkiini riyotakiri: oshekirkka ikemawakiro, ari osheki riyotakiri.

<sup>34</sup> Riyotaantariri tema roshiyakaawentapiintziniri. Omaantakya riyotaanewo, ithotyaagaeyakinirini ryotaaperoeyakirini.

*Romaerintakiro riraga Jesoshi tampyaa  
(Mt. 8.23-27; Rk. 8.22-25)*

<sup>35</sup> Itziroryaanaki oorya, ikantziri Jesoshi riyotaanewopaeni:  
—Thame amontyaanee intatsikeronta inkaare.

<sup>36</sup> Roojatzi ryaatapithatantanakari ikaatzi piyotawentakariri.  
Ari ijeekaki Jesoshi rirori pitotsiki. Roteteeyapaakanri riyotaanewopaeni roojatzi imontyaakotantanaka. Ejazti imontyaakotantanaka apaanipaeni atziri ikaatzi piyotawenteeyakaririni, ikinakoeyanakini paashiniki pitotsi.

<sup>37</sup> Imontyaakomintheeyani ari omapokashitakari niyanyaani inkaare antawo tampyaa. Antawo otamakaari, otetaatapaaka pitotsiki roowiteenchami itsitsiyakotemi.

<sup>38</sup> Omaanta imaatzzi Jesoshi rirori janta opataki pitotsi, rotziitotaka. Ikaemanakiri iroñaka riyotaanewo, ikantziri:

—¡Iyotaanari! ¡Aritaki pimaaki! ¡Rooteentsi apiinke!

<sup>39</sup> Ari ikaakakiri Jesoshi, ipiriintanaka, ikaemakotakiro tampyaa, ikantziro:

—¡Aritaki pitampyaataki!

Ikantziro eejatzi inkaare:

—¡Pimaeritel!

Okanta iroñaka tampyaa awijanaki, maeritanee inkaare.

<sup>40</sup> Roojatzi ipithokashitantanakari Jesoshi ikantanakiri riyotaanewopaeni:

—¿litaka pithaawantari? ¿Tekirama tameentaperotana naaka?

<sup>41</sup> Tema antawo ithaawaeyanakini riyotaanewopaeni, tekatsi ikanteeyanakini. Okanta ojamaniiyaaki, rojampitawakagaa, ikantawakaeyani:

—¿Ninkama irika, romaeryaantakawori tampyaa, eejatzi romaeryaantakawori inkaare? ¿Riotakima Tajorentsi?

## 5

*Rookakaakowentakiri Jesoshi shirampari ikyaatashiretariri kamaari  
(Mt. 8.28-34; Rk. 8.26-39)*

<sup>1-2</sup> Rareetakaakari Jesoshi intatsikeronta inkaare, ari rareetakaappaakari iipatsiteki karaarajatzi. Ro raatakoeyapaakanri kipatsiki. Intsipaete iñaawakiri Jesoshi shirampari kyaantashiretariri kamaari. Ishiyashitawakari Jesoshi ipoñaka janta kitataarewontsimashiki,

<sup>3</sup> ari ijeekawaetzi rirori. Tema tekatsi aaweerini oojoterini karenathakira.

<sup>4</sup> Okantawitaka roojotantawitapiintteitariri kijothari rakoki, eejatzi iitziki, omaanta itzimpejakopiintayitakini. Tekatsi monkaatzityaarini ishintsini.

<sup>5</sup> Ikantatyaaani, ryaatapiintzi tonkaariki. Ikaemakaematapiintzi, itowae-tapiinta mapikipaeni. Tema ishinkiwentakaakari iyamaarite.

<sup>6</sup> Riraga shirampari iñaawakarira inteeni ipokaki Jesoshi, ishiyashitakari rareetappaakari, rotziwerowashitappaakari, ipinkathatappaakari.

<sup>7-8</sup> Ikanta Jesoshi, iñaawakirira shirampari ikyaatashiretariri kamaari, icheraakotawakiri, ikantziri:

—¡Kamaari, pookaneeri shiramparira!

Irika shirampari, antawo icheraanaki ikantakaakarira iyamaarite, ikantanaki:

—¿litaka poñaashirenkantanari? Eeroka Jesoshi, itomi Tajorentsipero. Nokantemi iroñaaka eero powashironkaana.

**9** Roojatzi Jesoshi rojampitakiri irika kamaari, ikantakiri:

—¿Tsika piitaka?

Rakanakiri kamaari, ikantzi:

—Nowaero Oshekyaantzi. Rootaki noetantari, tema osheki nokanta nojeeekantari irika shirampari.

**10** Teera nokoyi potyaantena naakapaeni paashiniki kipatsi.

**11** Ari ijeekaki eejatzi janta oshekyaantzi chaancho tonkaariki, ikaatzi 2.000, rowawaeteeyani.

**12** Ikantanaki kamaari, ikantziri Jesoshi:

—Ari nokoyi potyaantena janta chaanchoki, nojeekeanteyapaakyaaarini inthomaenta.

**13** Ari ishinetakiri. Rookaeyaneerini shirampari, ishirinkashiteeyanakarini chaancho, ikyanteeyapaakarini. Roojatzi ishiyeeyanakanri riraga chaanchopaeni impeetaki, ari ithonkaeyakanri: ipiinkaeyapaakini inkaareki pooo, pooo, pooo.

**14** Ikanta irikapaeni shentziriri chaancho, iñaakirowa okaatzi awijeentsiri, antawo ithaawaeyanakini iroñaaka. Shiyeeyanakanri, ikantapaakiri ikaatzi jeekaeyatsirinipaeni okaakinira. Intsipaete antetanaka ñaagantsi. Pokaeyanakini atziripaeni raminerri iitarika awijimotakiriri chaancho.

**15** Riyaatashiteetakiri Jesoshi, iñeetapaakiri riraga shirampari ijeekantawitari kamaariipaeni. Ijeekaki ikithaatawaoo iithaari, kameethatanee. Tema iñeetapaakirira, antawo ithaawanteeyapaakarini.

**16** Ikanta irikapaeni ñaakiriri inkaaganki Jesoshi okaatzi rantakiri, ikanteyawakirini paashinipaeni atziri owakira pokapaentsiri okaatzi awijeentsiri inkaaganki. Ari okaatzi ikantawakiriri tsika ikanta iñaakiri ipiinkantakari chaanchopaeni.

**17** Ikanta ikemaeyawakinira atziripaeni, ikanteeyakiriri:

—Jesoshi, iroñaaka tee nokoyi pipokimotena nonampiki, pipiyanki.

**18** Ikanta ikemawakira Jesoshi, roojatzi rotetanaa pitotsiki. Ikantawitawaari iroñaaka irika shirampari rookakiniri iyamaaritepaeni, ikantziri:

—Jesoshi, nokoyi noyaataneemi.

**19** Rakanakiri Jesoshi, ikantanakiri:

—Eero poyaatana, piyaaate pinampiki tsikarika ijeeki pinampijatzipaeni. Pikantapaeri maawaeni okaatira awijimotakimiri. Pikantapaeri eejatzi: “Ineshironkatakina Nowinkatharite”.

**20** Ikemawakirira irika shirampari, roojatzi riyaatanee janta inampiki. Ikantakiri inampijatzeejatzi riyaataki maawaeni paashiniki nampsitsi janta iipatsiteki oetachari Tekaaporishi. Ikantapaeri osheki atziri okaatzi awijimotakiriri.

Ikanta ikemaeyawaerini ikenkithawaetapae, osheki itzimaetyaashi-iyankani.

### *Retsiyatakotziro Jesoshi jokaatzirori iraa*

(Mt. 9.18-26; Rk. 8.40-56)

**21** Ikantanaka imontyaanaka Jesoshi intatsikeronta inkaare. Ipiyoeyakaninta osheki atziri janta othapyaaikiini.

**22** Rareetapaaka shirampari iwaero Jaero, riraga jewatakaayitziririni ijoriyyotzinkaritepaeni janta pankotsiki ipiyotantapiintarira. Inaapaakiri, rotziwerowashitapaakari Jesoshi riwethatantapaakariri Jesoshi.

<sup>23</sup> Ikantaperotapaakiri:

—Rooteentsi okame nishintyo. Pipoke pipampitakitero awijakotanta-neeyaaari roori, eero okamanta.

<sup>24</sup> Ari royaatanakiri, roojatzi royaatayitanakirini osheki piyotawentariri, rawitsinaawakaanaka.

<sup>25</sup> Ari okaatakti tsinani jokaatzirori iraa, okaatakotaki 12 ojarentsi.

<sup>26</sup> Osheki raawinteetawitakawo, thonkapaaka oorikite omaanta eekiro iyaatatzi ojokaatziro iraa.

<sup>27-28</sup> Okemaki ikantakoevirini Jesoshi: “Osheki retsiyatakotantzi”. Ojatekanakari oyaateeyiririni okinapaaki itapiiki. Okenkithashiryaanaka: “Aririka nopampitziteri imaatha, aritaki netsiyatakotee”.

Ari opampitzitawakiri imaatha, kaatakotanee ojokaatziro iraa.

<sup>29</sup> Okemawakitya tsinkaririri, awijakotanee.

<sup>30</sup> Eejatzi rirori intsipaete ikemashitawakawo itajorenka. Ari ipithokashitanakari oyaatzziriri, ikantziri:

—¿Ninkama pampitzitakinawori nomaatha?

<sup>31</sup> Rakanakiri ryotaanewo, ikantanakiri:

—Tema piñiiri roshekitaki oyaatayitzimirini. Rawitsinaayitakimini. Eekiro pikantatzi: “¿Ninkama pampitzitanawori nomaatha?”

<sup>32</sup> Raminaminayitanakini ikoyi iñeeri pampitzitakiriri imaatha.

<sup>33</sup> Roori tsinani, osheki othaawanaki ompetatanaka, tonki, tonki, tonki. Iyotaki awijakotanaki. Otsiwerowashitapaakari, ofñaaperotantariri. Oth-otyaakiro okantaperotakiri maawaeni.

<sup>34</sup> Ikantziro:

—Tsinani, pameentakina, rootaki petsiyatakotantaari. Iroñaaaka piyaate, pikimoshiretee. Tema etsiyatakoteemi.

<sup>35</sup> Tekiraata ithonkiromi ikenkithawetaakayiro, ipokaeyapaakini ronam-piripaenri riraga Jaero. Ikantapaakiri:

—Kamanaki pishinto. ¿litaka poñaashirenkantariri irika iyotaantatsiri?

<sup>36</sup> Ikemawakiro Jesoshi iroka ikantapaakiriri. Ikantziri:

—Jaero, eero pikantashiryaaashita, inta pameentena naaka.

<sup>37</sup> Tekatsi ishinete oyaatanakirini, inta ishinetakiri riraga Peetero, Jantyaako itsipatanakari rirentzi Jowa.

<sup>38</sup> Roojatzi rareeteeyapaakani ipankoki Jaero. Ifñaapaakiri atziripaeni: ikaemaeyakini, rowashiretakoeyawakoni, riraakoeyakawoni.

<sup>39</sup> Ikyapaaki, ikantapaakiri:

—¿litaka pikaemakotantawori? ¿litaka piraakotayitantaworini? Tee okamaperotzi ewankawo, omaashita.

<sup>40</sup> Ishirontawenteeyawakarini, roojatzi roemishitowaeyapaakirini. Raanakiri iri eejatzi iniro, eejatzi ryotaanewopaeni, ikyashitapaakiro janta omaryaakanta ewankawonta kamawiteencharira.

<sup>41</sup> Roerikawakotapaakiro. Ikantziro rashii ipaanteki:

—Tarita komi.

(Akantziri aaka apaanteki: “Ewankawo, pañaagae”.)

<sup>42</sup> Roojatzi añaantanaa, opiriintanaa, sherok, anashitanaa. Okaataki ojarentsite 12, rootaki omatantaari anashiwaeta. Rotsikanateeyanakawoni osheninkapaeni.

<sup>43</sup> Ikantaperotziri rirori:

—Eerowa pikamantayitzirini atziri okaatzi piñaakiri nantakiri. Ari iroñaaaka pipero owanawo.

**6***Riyaataki Jesoshi Najareeteki  
(Mt. 13.53-58; Rk. 4.16-30)*

<sup>1</sup> Roojatzi riyaatantanaa Jesoshi, areetapaa inampiki rirori. Royaateey-erini ryotaanewo.

<sup>2-3</sup> Roojatzi kitejiri imakoryaantapiintari, ryotaantapae janta pankotsiki ipiyotaptapiintarira joriyyopaeni. Rotsikanatawakari osheki kemawakiriri. Itheenkayakirini Jesoshi, ikanteeyini:

—Tema rirotaki asheninkapero aari. ¿Tsika ipoñaakaakawoka iroka ryotaantziri? ¿Tsika ikantakari itajonkantayitantakarini? ¿Kaarima irika wetsikapiintzirori jeekamentotsi? Rirotaki otomi Mariiya, tema rirotaki rirentzipaeni Jantyaako, Josee, Joorashi, eejatzi Shimo. Eejatzi ritsiropaeni, tema ojeekimoteeyakaeni jaka.

<sup>4</sup> Ikantzi Jesoshi:

—Inaaperoeyakirini atziri kamanantzirorini inaan Tajorentsi. Omaanta rirorika kamanantawityaawoni inampijatzi osheki itheenkiri.

<sup>5</sup> Kyaaryo inampiweri itheenkayakirini riraga Jesoshi, rootaki kaari itajonkantapiinanta janta inampiperoki. Apatziro ipampitayitzirini apaaniplaeni mantsiyatzinkari, retsiyatatakotayitzirini.

<sup>6</sup> Omaanta tee raapatziyeeyarini inampijatzi, rootaki rotsikanatantanakari riraga Jesoshi, ikenkithashiryaaka: “¿Litaka kaari raapatziyeeyantanani?”

*Rantayitzirini ryotaanewopaeni Jesoshi*

*(Mt. 10.1-15; Rk. 9.1-6)*

Ikinakinayitanakini Jesoshi nampitskipaeni, ryotaantayitanakini.

<sup>7</sup> Eejatzi ryoyaakiri ryotaanewo 12. Imatakaakiri rowawi-jaakotantyaariri kyaantawitariripaeni kamaari. Roojatzi rotyaanteeyakirini; itsipatawakaanteyananakarini, apitepaeni ryiaatayitanakini nampitskipaeni.

<sup>8</sup> Ikantaperotawakiri:

—Aririka piyaatanaki, tekatsikya paanaki. Eero payi poyaari, eero payiro pithaahe. Eejatzi eero payi piyorikite. Omaantakya paanaki pikotzi.

<sup>9</sup> Eejatzi pijapatotanakya, omaanta eero paanaki paashini pimaatha.

<sup>10</sup> Eejatzi ikantawakiri:

—Tsikarika pijekapaaki, aritaki pijekaarikotapaaki, roojatzi piyaatantakya paashiniki nampitsi.

<sup>11</sup> Eerorka raakameethateeyawakimini janta nampitsiki, eejatzi eerorka ikemijanteeyawakimini, ari pishirinkanaki potekakontatanakya piitzikira ryotantyaari eero pipiyashitari eejatzi. Omaanta ari rowashironkaakiripa Tajorentsi inja.

<sup>12</sup> Ari ryiaateeyananakini ryotaanewopaeni. I kamanteeyakirini atziripaeni:

—Pikenkithashiryaagaeya, eero pantapiintziro eejatzi kaari kameethatatsi, inta pookaero.

<sup>13</sup> Rowawijaakoeyakirini osheki kyaantawitariri kamaari. Ijeetantayitakarini oyeenka oriwo osheki mantsiyariipaeni, retsiyatakoeyakirini.

*Riraga Erooreshi rowamaakaantakiri Jowa kaawoshitantatsiri.*

*(Mt. 14.1-12; Rk. 9.7-9)*

<sup>14</sup> Osheki kemakoeiririni Jesoshi, rootaki ikemakotantakariri eejatzi pinkathari iitachari Erooreshi. Ikantayitzini atziripaeni:

—Rirotaki Jowa kaawoshitantatsiri, kamawiteenchari: piriintanaa. Rootaki ipiriinrantari itajorentsitzira.

**15** Eenitatsi paashini kantayitawitacharini:

—Riotakirika Iriiyashini: piriintaachari.

Paashini kantayitatsirini eejatz:

—Riotaki kamanantzirorini iñaani Tajorentsi. Roshiyaari kamanantayitzirorini iñaani Tajorentsi paerani.

**16** Ikemakotantariri riraga Jesoshi, ikantzi Erooreshi:

—Rirotateekityaami Jowa. Nochekakaantawitakari ikentsiki omaanta piriintanaa eejatz.

**17-19** Ari paerani Erooreshi raapithatakiri rirentzi iina. Iita rirentzi Jiripi, ro iinantawitarini, Eroriyyashi.

Riraga Jowa ikantapiintawitakari Erooreshi:

—Tee okameethatzi paapithateri pirentzi iina.

Okijanakiri Eroriyyashi, okowaperotaki owamaakaanteri, omaanta tee ikoyi riraga oemi. Osheki oñaashirenkapiintakiri, rootaki raakaanantakariri Jowa, romonkyaakaantakiri omونکیاagamentotsiki.

**20** Ipinkathatawitakari riraga Jowa, riyyotziri ikameethaperotzi, raapatziyaperotari Tajorentsi. Rootaki kaari ikowanta rowamaakaanteri. Tema ithaawakaawitattyari Jowa, ikenkithatataapiintziri. Raapatziyawitawo ikantziriri Jowa, omaanta tee riyyotzti tsika ikanty.

**21** Monkaataka kitejiri ikoñaatantakari paerani Erooreshi. Rowaka-gaeyakarini osheki inashitayitacharini jewatatsiripaeni karireeyajatz. Rootaki kitejiri owamaakaantakyaariri rowaga Eroriyyashi Jowa.

**22** Okyaapaaki ishinto roori janta rowaeyaninta opirantakotapaakiri. Iñaaperotawakiro kameetha riraga Erooreshi eejatz itsipateeyarini. Ikantziro ewankawo:

—Pikowakotena iitarika pikoyiri. Aritaki nopakimi.

**23** Iñaakina Tajorentsi, riyyotz eero namatawitzimi. Otarikapaeni pikowakotakinari, aritaki nopakimi. Pikowakirika nopagaantemi noeopatsite, aritaki nopakimi kashetani.

**24** Shitowanee roori, ojampitapaakiro iniro:

—¿Oetaka nokowakoteriri?

Akawakiro roori:

—Ro pikowakoteriri iito Jowa kaawoshitakotziriri Tajorentsi.

**25** Intsipaeete opiyashitanaari pinkathari. Okowakotapaakiri, okantziri:

—Nokoyi iroñaka pipakotenawo piratoki iito riraga Jowa.

**26** Osheki rowashiretanaka. Tema aritaki ikantakiro inkaaganki: “Eero namatawitzimi”. Eejatz ikeemaeyawakirini maawaeni itsipateeyakarini. Tee iroñaka ikowae ramatawitero.

**27** Ari rotyaantakiri owamaantatsir, ikantawakiri:

—Pamakinawo iito Jowa.

Ari ryaatanak ianta romonkyaakirinta, ichekapaakiri ikentsiki.

**28** Ramakotakiro piratoki iito, ipapaakiro ewankawo. Roori, owaakiniro iniro.

**29** Ikemakotakiri ryotaanewoni Jowa, ari ryaatashiiyakirini. Raaneero iwatha ikitatero.

*Rowakaakari irira Jesoshi osheki atziri*

(Mt. 14.13-21; Rk. 9.10-17; Jowa 6.1-15)

**30** Paashini kitejiri ipiyayitaani riraga rotyaantanewo Jesoshi. Ikanteeypaakirini maawaeni rantayitakirini. Eejatz ikanakoyepaeroni maawaeni ryotaanteeyakirini.

**31** Osheki atziri piyotawenteeyapaakirini Jesoshi. Apaanipaeni jatayiteeni, eekiro ipokatz i paashini, rootaki kaari imatanta rowaeyaani rrirori eejatz i ryotaanewo. Ikanteeeyakirini irirapaeni:

—Thame ayowaeyanakini, aate janta tekatsinta atziri amakoryaaawakiita eechonkiini.

<sup>32</sup> Roojatzi ryaateeyanakini, ikinakotanaki pitotsiki.

<sup>33</sup> Omaanta iñeeyawakirini oshekini atziri, riyoteeyanakirini tsikarika ryaate. Ipoñaayitanakanani ipankokipaeni, ishiyashitanakari, ishirethapyaatananakawo othaphyaakini. Ranaakoeyakirini rirori, royaapaakiri.

<sup>34</sup> Imitaanaki riraga Jesoshi eejatzri riyotaanewopaeni, iñaapaakiri osheki oyaakiriri. Roojatzi osheki retakoshiryaaperotapaakari roshiyakaantapaaakiri owisha kaari ishenteetzi. Osheki riyotagaeyapaakirini oetarikapaeni.

<sup>35</sup> Roojatzi itsiteniityaanaki oorya. Ipokashitapaakiri riyotaanewopaeni, ikantapaakiri:

—Iroñaaka ajeekaki jaka tekatsi pankotsi, tekatsi owanawontsi. Eejatzri itsiteniityaanaki oorya.

<sup>36</sup> Okameethazi potyaanteeyerini atziri ryaateeta owantsiki, nampitskipaeni. Ramanantapaente rowanawo.

<sup>37</sup> Rakanakiri Jesoshi, ikantziri riraga riyotaanewopaeni:

—Piperiita eero ka owanawontsi.

Ikantawakiri riroripaeni:

—¿Pikoyima niyaate namanantakite owakagaeyaaririni atziripaeni? Osheki opinata: eero imonkaata koriki.

<sup>38</sup> Ikantawakiri:

—¿Tsikama okaatzika owanawontsi? Piyaate, paminakitero.

Ari iñaakitziro, ikantapaeri:

—Apatziro apawakooni okaatzi paa, eejatzri apite mereto.

<sup>39</sup> Ikantawakiri:

—Poejeeekiri atziripaeni jaga katawomashiki. Pipiyoteeyerini, eejatzri pinashiteeyakaarini.

<sup>40</sup> Ari ipiyoteeyakirini, ijekaeyanakini. Apaanipaeni piyoteenchari ikaatzi 100 atziri, rinashitaka paashinipaeni piyoteenchari ikaateeyini 50. Enitatisi osheki paashinipaeni piyoteenchari.

<sup>41</sup> Ari raakiro riraga Jesoshi paa eejatzri mereto, raminanaki jenokinta, ikantziri Iriri:

—Ariwiee, Pawa, eerkatakapi pakinawori iroka noyaarika.

Ikagaakiro paa. Ipayitakirini riyotaanewopaeni roshirinkakiniri piyoteenchari. Eejatzri mereto, royiitakiniri maawaeni atziri,

<sup>42</sup> ari rowaeyakani. Ikemaeyanakan, tee ithonkanakiro owanawontsi.

<sup>43</sup> Raayiteeroni tziimagaantapaentsiri, riyeekiteeyironi kantziriki okaatzi 12.

<sup>44</sup> Ikaateeyini owaenchari 5.000 shirampari, eejatzri tsinanipaeni, eejatzri eentsipaeni.

### *Ranashaatawo irira Jesoshi inkaareki*

<sup>45</sup> Roojatzi rotyaantakiri riraga Jesoshi riyotaanewo, ikantziri:

—Thame potetanakya pitotsiki. Peewateeyenani intatsikeronta inkaareki, janta Wetheeraki: notyaanteeyeriniita ipankokipaeni irika piyoteenchari.

—Jee, ari.

<sup>46</sup> Ikanta ryaatanaki atziripaeni roojatzi ryaatanaki riraga Jesoshi tonkaariki, ikenkithatakayiri Tajorentsi

<sup>47</sup> Tsiteniriki eekiro oepiyakotziri tampyaa. Ari iniyankitakotanaki inkaareki riyotaanewo, omaanta eeniro ijekaki rirori apaniroeni tonkaariki.

**48** Ikanta iñaakiri riyotaanewo, ikomakomateeyawitanaawoni riyotakiri makoempekitapaaki. Ari ryaatashitanakiri rirori. Ranashaatanakawo inkaare, tee itsitsiyi. Roowiteenchami rawijanakirimi

**49** roojatzi iñeeyantawaarini, ranashaatapaakawo inkaare. Iiteyawitawakarini peyari. Ari ikaemaeyanakini:

—¡Eeeee! ¡Kaakitaki peyariwee!

**50** Ari iñeeyawakirini maawaeni. Ithaawaeyanakini. Intsipae*t*iñaanatapaakiri rirori:

—Piweshireeyanakyaani. Naaka pokatsi. Eero pithaawantana.

**51** Rotetapaaka pitotsiki itsipateeyapaakarini roojatzi opeyantanaa tampyyaa. Riweshiryaaawentari eejatzi osheki rotsikanateeyanakarini.

**52** Iñeeyawitakarini inkaaganki itajonkiro paa omaanta tekira ikenkithashiryaakoperotari irira rivotaki Tajorentsi. Tema eeniro okijotzimoneentakiri rajankane.

### *Rantayitzirini Jesoshi janta Jenejareeteki*

**53** Imontyaantanakawori, rareeteeyapaakani Jenejareeteki. Raatakoeyapaakani.

—Rayiiteeyapaakini, intsipae*t*riyoteeyawakirini atziri.

**55** Ishiyashiteeyawakarini. Ramakoeyakinirini mantsiyatzzinkaripaen ishitashiki, janta ijekapaa*kira* Jesoshi, aritaki janta raakotanakiniri.

**56** Ikinakinayitzini owaaninikipaen nampitsi, nampitsikipaen antawo, eejatzi owantsikipaen. Tsikarika ikinayitzini Jesoshi ipiyotayitakinirini mantsiyaripaen. Royiitakinirini niyanki nampitsiki, ikanteeyawakirini:

—Pishineteenawo nopampitzitawakimiro opatziyaakiki piithaari.

Ari rawijakoeyaneeni maawaeni pampitzitawakiriri iithaari.

## 7

### *Rameteeyayarini joriyyopaeni (Mt. 15.1-9)*

**1** Ikanta ipokapaaki warijeeyopaeni, eejatzi apaanipaeni iyotaantzirori Iwaperite Tajorentsi, ipoñaaka Jerojareeki. Ipiyotawentapaakari Jesoshi.

**2** Iñagaeyapaerini riyotaanewo, rowaeyani tee ikiwawakota: tema tee ikiteshiretzi. Ikantereyini: “Aririka oyaa, ityaawo akiwawakotya akameethashiretanta*yaari*”.

**3** Riraga warijeeyo rameteeyawoni rootzimateentsirika roya ikiwawakoperota. Tema rameteeyawoni maawaeni joriyyopaeni. Rooma eerorika ikiwawakota eero royiita. Imonkaatayitzironi riyotaantapiintzirini itakaantaworini.

**4** Aririka ipoñagaeyo janta nampitsiki niyanki, eerorika ikiwawakoperotapa*a*eero rowa paa. Eejatzi imonkaatashitatayitakawoni osheki oetarika riyotaayitzirini atziripaen. Ikwapiinteeeyironi iwajoni, iwachakate, iyotsironakite; maawaeni.

**5** Ari rojampiteeyapaakirini Jesoshi:

—¿Itaka kaari imonkaatantawo piyotaanewo riyotaantayitzirini itakaantaworini? Irika iroñaaka owaencharika tee ikiwawakota ipeyakotakiro okantziri kaminagaantsi: eeniro rantani.

**6** Icantanakiri Jesoshi:

—Osheki pamatawitantayitzini, tema poshiyakaawaetashita paapatziyari Tajorentsi. Aritaki ikamantakotzitakimini paerani Iseeyashi. Rojankinatakini, ikantzi: “Irika atzirika ikantawaetashiteeyakinani:

'Nopinkathatzimi', omaanta rajankanekira tee raapatziyaperotana, okimitzimotakina inteenaa ijeekaeyakini.

<sup>7</sup> Ratsipetashitakawo rotziwerowashitana; roshiyakaawaetashita iñaaoperotana. Ramatawitashitayitakarini ijoriyyotzinkaritepaeni: ikantawitari iroka riyotaawitaririki miwitaka rootaki Iwaperite Tajorentsi". Kyaaryootaki iroka ikantzitakarini Iseyashi.

<sup>8</sup> Eejatzi ikantziri Jesoshi:

—Pookanakiro ikaminaawitzimiri Tajorentsi, inta paap- atziyashitanakawo riyotaanteeyirini atziri.

<sup>9</sup> Aritaki pitheenkakiro ikaminaawitzimiri Tajorentsi, inta pikowashitaka pimonkaatero riyotaantayitzirini itakaantaworini.

<sup>10</sup> Tema ikantziri Moeseeshini: "Otzikiye pipinkathateri piri eejatzi piniro". Eejatzi ikantzi: "Riraga Tajorentsi ikantakotziri akawaantetziriri ashitariree eejatzi riniro: 'Okameethatzi rowamagaeteri'".

<sup>11</sup> Omaanta pikantashitapiinteyawitarini atziri: "Aririka pikashiyakeri Tajorentsi piyorkite, ari pipaperoteri. Rashironkaawaetyaarika piri, piniro, pikanteri: 'Eero nomatziro nopenmiri koriki: irika koriwaka, tema nokashiyakaakiri Tajorentsi noorikite noperiri'".

<sup>12</sup> Aritaki iroñaka tee pishinetziri ajoriyyotzinkaritepaeni retakotaneeyaari iriri, riniro.

<sup>13</sup> Pikowakaakiri raapatziyawo piyotaapiintziriri, omaanta piyotaakiri itheenkakiro ikantziri Tajorentsi. Aritaki pikantapiintari: pookakaayitzirini ajoriyyotzinkaritepaeni raapatziyawowa Iwaperite Tajorentsi.

### *Ikamantakotziro Jesoshi owaariperotzirori ashire*

(Mt. 15.10-20)

<sup>14</sup> Rapiitakiro ikaemaeri riraga Jesoshi piyoteeyeencharini ikanteeyirini: —Pikemaperoyenani maawaeni. Nokoyi pikemaperotena nokantemiri.

<sup>15</sup> Okameethatzi owaeyaawoni oetarikapaeni, eero añairo antani: tektsi okantero owanawontsi ashire. Omaanta aririka pikenthashiryaaakotyaa wo kaari kameethatatsi, eejatzi piñaawaeterorika kaari kameethatatsi, rootaki owaariperoteroni pishire.

<sup>16</sup> Eerokapaeni kemayitakirorini okaatzi nokantakimiri, pikenthashiryaaakotyaa wo.

<sup>17</sup> Ithonkakiro riyotaakiri eejatzi rookaneeri piyotawentari, roojatzi ikyAAPAE pankotsiki Jesoshi eejatzi riyotaanewopaeni. Rojampitapaeri irira:

—¿Oetaka poshiyakaawentziniriri inkaaganki?

<sup>18</sup> Ikantawakiri:

—Eejatzi eeroka, ¿tee pikemawakina inkaaganki? Oetarikapaeni owayityarini okameethatzi, eero añairo antani. Tema piyotawakiro.

<sup>19</sup> Rooma eero omatziro owaariperotziro ashire, inta iyaataki asheetoki, roojatzi ashitanteeyawori.

Rootaki riyotaayitziririni okameethataki oetarika rowaetari.

<sup>20</sup> Eejatzi ikantziri:

—Omaanta pikenthashireerorika kaari kameethatatsi, eenitatsi pantani.

<sup>21</sup> Rooma pikenthashiryaaakaworika pajankaneki pantero kaari kameethatatsi, rootaki panantyaawori maaawaeni: pishirontyaawo tsinani kaari payi, pishirontyaari shirampari kaari payi, pikoshite, powamaante,

<sup>22</sup> osheki pikowaperotero oetarikapaeni rashitayitarini paashinipaeni atziri, pantero kaariperoripaeni, pamatawitanteri, piñaathatantya, piñaawenawaetya pikowaperote pikimityaari ashaagantzinkari,

pikantzimateri atziri, pikantakaaperotya, tee piyoteeyironi pantero kameetha.

<sup>23</sup> Kyaaryo, pikenkithashiryawo pantero kaari kameethatatsi, rootaki panantawori: rootaki powariperotantakari.

*Retsiyatakoteero Jesoshi ishinto shirojeniishiyajato*  
(Mt. 15.21-28)

<sup>24</sup> Roojatzi ryaatanee Jesoshi Tziiroki. Ijeekapaaki pankotsinentsiki, tee ikowawita riyoteeterimi. Omaanta tekatsi ikantya imanapithatyaari atziri.

<sup>25</sup> Ojeeki janta tsinani, ikyaaantawitakawo ishinto kamaari. Oke-makotawakiru roori Jesoshi, iyaatashitanakiri, otziwerowashitapaakari.

<sup>26</sup> Kaari joriiyo, oponaaka Shirojeniishiyaki. Okantapaakiri:

—Ikyaaantakawo nishintyo kamaari, petsiyatakoteenawo.

<sup>27</sup> Roshiyakaawentashitanawo, ikantawakiro:

—Nitawakyaariita nojoriiyotzinkarite netakotyaari. Tee okameethatzi aapithateeri rowanawo eentsite aperi otsitzi.

<sup>28</sup> Rooriakanakiri:

—Jee, kyaaryo. Ari ijeekita rirori otsitzi otapinaki raperotayitzironi rowanawopetokipaeni eentsite.

<sup>29</sup> Ikantaneero:

—Jee, kameetha; kyaaryo pikantakiri. Kameetha piyaatee iroñaaka, awi-jakotanee pishinto.

<sup>30</sup> Opiyanaaga opankoki. Oñaapaero ishinto, omaryaaka omaamentoki, awijakotanee, temá yowanee owamaarite.

*Riraga Jesoshi retsiyatatakotziri matakempitatatsirini*

<sup>31</sup> Roojatzi rowaagakaantanaari Jesoshi riyotaanewo, ikinanee Shirooki, roojatzi kirinkanta Joriraaniki, roojatzi rareetapaa inkaareki owaero Karireeya. Ikinanaki ochereeteki intatsikeronta Karireeya janta Tekaapor-ishiki.

<sup>32</sup> Ramaetapaakiniri shirampari amashitzinkari inthomaenta ikempita, kaari kematsi eejatzu imajontzitzi. Ikantapaakiri amiriri:

—Pipampitawakiri, petsiyatakoteeri.

<sup>33</sup> Riraga Jesoshi rookaneeri piyotawenttariri, apaniroeni itsipatanakari matakempitari. Romonkyaaakiniri rakoempeki ikempitaki. Reewatakiro rakoempeki, ipampitakiri ineniki.

<sup>34</sup> Raminanaki jenokinta, ikenkithataakaakiri Tajorentsi roojatzi ikantziri ipaante rashি:

—Epeta!

Akantziri aari añaaneki: “Piwitaryaaneeya”.

<sup>35</sup> Iwitoryaanaa ikemantari. Opeyanaa imajontziwit, kameetheenkata-nee iñaawaetanee.

<sup>36</sup> Rapiitapiintawitari ikantziri:

—Eerowa pikamantakotana.

Omaanta tee ikemijantaperotziri, eekiro ikamantakotanakitzii.

<sup>37</sup> Eekiro rotsikanateeyanakityaarini Jesoshi. Ikanteeyini atziripaeni:

—¿Itakakya? Okameethaperotantari rantayitzirin. Imataperotakiro Jesoshi maawaenai rantayitzirini. Kemanee amashitzinkari inthomaenta ikempita, eejatzu riraga majontziwitachari, iñaawaetakagaeri.

<sup>1</sup> Paashini kitejiri ipiyoteeyakanee ejatzi osheki atziri, tekatsi rowaeyaaarini. Riraga Jesoshi ikaemiri riyotaanewo, ikantawakiri:

<sup>2</sup> —Netakoeyakarini irikapaeni. Ro netakoeyantakaririni 3 kitejiri itsipateeyakinani, tee rowa.

<sup>3</sup> Agaeyakirini itashe. Eenitatsi apaanipaeni poñeenchari inteedna: aririka notyaanteeyawiteeyarini iroñaka ipankoki, ari ishipetawathatanaki niyanki awotsiki.

<sup>4</sup> Rakanakiri riraga riyotaanewo:

—¿Tsika akantyaaka akemakagaeyantyaaririni paa? Jaka tekatsi atziri jeekatsini.

<sup>5</sup> Rojampitakiri:

—¿Tsika okaatzika jeekaentsiri paa?

Ikantzi:

—Okaatzzi 7.

<sup>6</sup> Ikantteeyakirini piyotawenteeyaririni:

—Pijeekaeyeni katawomashiki.

Raakiro paa, ipaasonkitziri Iriri. Ikagaakiro, ipaeyakinani naaka riyotaanewopaeni, noshirinkaeyakinirini piyoteenchari.

<sup>7</sup> Eenitatsi eejatzi mereto apaanipaeni. Ipaasonkiwentakiri eejatzi. Roojatzi ikantziri riraga riyotaanewo:

—Pipaeyerini eejatzi mereto.

<sup>8</sup> Roojatzi nowaeyakanee, nokemaeyananakani. Naayiteeroni tzimagaantapantsiri, nowaero kantziriki. Okaatzzi yekitaatsiri 7.

<sup>9</sup> Ikaateeyini owaenchari 4.000 shirampari. Roojatzi rotyaanteeyeerini:

—Piyaateeyeeeni pipankokipaeni.

### *Ikowawita warijeyo iñeerimi Jesoshi itajonkantayitzini*

(Mt. 15.39-16.4; Rk. 12.54-56)

<sup>10</sup> Itsipateeyanaarini riyotaanewo, roteteeyanaani pitotsiki. Niyaateeyaneeni janta Tarimanootaki.

<sup>11</sup> Ari ipokapaaki warijeyopaeni. Ikijathatapaakiri, ikantziri:

—Ajaatya, pitajonkantayiteni niyotantemiri eerokatakirkira Tajorentsi, roojatzikya aririka nomatero naapatziyemi.

<sup>12</sup> Osheki okantzimoneentanakari Jesoshi. Ikantzi:

—¿Litaka ikowaeyantarini maawaeni atziri noñaayeri notajonkante? Kyaaryootaki iroka nokamantaperotemiri, eero noñaayimiro notajonkantayiteni.

<sup>13</sup> Roojatzi riyaatakaantanaari riyotanewo, rotetanaa eejatzi pitotsiki. Riyaataanee, imontyaanaa intatsikeronta.

### *Ikantziri Jesoshi: "Ramatawitzimikari warijeyo"*

(Mt. 16.5-12)

<sup>14</sup> Ipeyakoeyanakironi riyotaanewo raanakiromi rowanawo pitotsiki, inta apaani paa raanaki.

<sup>15</sup> Ikantziri Jesoshi:

—Paamawentyaawo tapiyakaawori paa, rashitari warijeyopaeni, eejatzi rashitari Erooreshi.

<sup>16</sup> Roojatzi ikantawakaanaka, ikanteeyini:

—Tekatsi paa ashii, rootaki ikanantakaeri: “Paamawentyaawo tapiyakaawori paa”.

<sup>17</sup> Riyotakotakiri Jesoshi ikenkithashiryaaari, ikantziri:

—¿Litaka pikantawakaantari: “Tekatsi paa ashii”? ¿Litaka kaari pikemaperotanta? ¿Litaka kaari piyotanta? ¿Pikijoshiryaakitzi pajankaneki?

**18** Otzimawita poki, *¿iitaka kaari piñaanta?* Otzimawita pikemantari, *¿iitaka kaari pikemanta?* *¿ilitaka kaari pikenkithashiryaantaawo*

**19** noshekyaantakawori paa? Okaatawita apawakooni paa, ikaatzi owakawori 5.000 shirampari. Ari paglero tzimagaantapaentsiri. *¿Tskama okaatzi yeekitatsiri kantziriki?*

Ikanteeyawakirini:

—Okaatzi 12.

**20** Ikantzi Jesoshi:

—Eejatzi paashini, okaatzi paa 7, ikaatzi eejatzi owakawori 4.000. Pagaero eejatzi tzimagaantapaentsiri. *¿Tsika okaatzika kantziri piyeekitakiri?*

Ikanteeyirini:

—Okaatzi 7.

**21** Ikantziri:

—*¿Tekirama iroñaka piyotawakiro?* Tee ro nokenkithatakoteri paa inkaaganki, omaanta nokenkithatakotzi Riyotaantziri warijeeyo eejatzi Erooreshi.

### *Retsiyatakoteeri Jesoshi kaari kokichaatatsini*

**22** Ikantaka rareeteyanakan Wetheeraki. Ramaetapaakiniri Jesoshi kaari kokichaatatsini. Ikantapaakiri amiriri:

—Pipampitawakiri ikokichaatantaneeyaari.

**23** Ari ikathathanakiri kaari kokichaatatsini, raanakiri othonkapaakanta nampitsi. Reewakitapaakiri rokiki, ipampitakiri rokiki. Rojampitakiri:

—*¿Kokichaateemi?*

**24** Raminanee, ikantzi:

—Jee, kokichaawitaana noñaawitaari shirampariipaeninta, omaanta tee ikofiaataperotzi, ikimitzimotashitakina inchatopaeni ranashiteeyani.

**25** Rapiiteeri eejatzi, ipampiteeri rokiki. Roojatzi ikokichaaperotanee, etsiyatakotaperotanee. Raminanee, koñaaperotanee maawaeni.

**26** Ikantziri Jesoshi:

—Eerowa píkinanee nampitsiki pikamantzirkari atziri oetarika awijimotakimiri. Apatzirokya powaneero pipankoki.

### *Riraga Peetero ryotakotziri Jesoshi rirotaki Rotyaantanewo Tajorentsi (Mt. 16.13-20; Rk. 9.18-21)*

**27** Ikantaka rowaaganaa Jesoshi, itsipatanaari ryotaanewopaeni. Riyaa-teyanakini janta Sesareeyaki riwetsikakaantakiri Jiripi. Niyankitanaki awotsiki, rojampitayitakirini ryotaanewo:

—*¿ilitaka ikenkithashiryaakotanari atziripaeni?* *¿Ninkama naaka?*

**28** Rakanakiri, ikantakaniri:

—Apaanipaeni aamaayiteencharini eeroka Jowani kaawoshitakotziriri Tajorentsi. Irira paashinipaeni raamaakimi eeroka riraga kamanantzirini iñaani Tajorentsi iwaero Iriiyashi. Paashinipaeni ikantzi eeroka inashitachari kamanantzirorini iñaani Tajorentsi piriintaachari.

**29** Rojampiteeyakirini:

—Eerokakya, *¿iitaka pikenkithashiryaakoeyanarini?*

Rakanakiri Peetero, ikantakiri:

—Eerokataki naamagaeyakarini paerani: eeroka Rotyaantanewo Tajorentsi.

**30** Roojatzi ikanantanakari:

—Eerowa iroñaka pikamantakoperotzitanaata, pikante: “Jesoshi rirotaki Rotyaantanewo Tajorentsi, riraga Owawijaakotantsini”.

### *Ikanteeyirini Jesoshi: “Nokemaatsitawenteeyemini” (Mt. 16.21-23; Rk. 9.22)*

**31** Roojatzi riraga Jesoshi riyotagaeri eejatzi:

—Naaka poñaachari jenokinta, nokoñaataapaaki jaka kipatsikika. Iinja osheki nokemaatsitawenteeyemini. Kyaaryo, itheenkakina aataperoteenchari atziri, eejatzi jewatayitziririni ūaanakowenantsiri, eejatzi iyotaantzirori Iwaperite Tajorentsii: itheenkäyenani, rootaki rowamaakaanantenri iinja. Nokamawitakya, omaanta okaate 3 kitejiri, roojatzi nopiriinanteeuya.

**32** Aritaki ikantaperoeyawitakarini. Riraga Peetero raanakiri inteneeni, ikantakiri:

—Litaka pikanantawori iroka? Tee okameethatzi pikame.

**33** Roojatzi ipithokashiiyakarini Jesoshi riyotaanewopaeni, ramineeyanakirini. Roojatzi ishntsithatakiri Peetero, ikantziri:

—Pikimitakari Jatanaashi. Piyaate. Eeroka pikenkithashiryaashitakawo ikenkithashiryaaati atziripaeni. Tee piyotziro ikowakaakinari Tajorentsii.

### *Tsika akantyaaka aakapaeni oyaatantyaariri Jesoshi*

(Mt. 16.24-28; Rk. 9.23-27)

**34** Roojatzi ikaemakiri Jesoshi piyoteencharipaeni eejatzi riyotaanewopaeni. Ikantakiri:

—Aririka pikowaki poyaateeyenani, eero pantziro kaari kameethatatsi pikowashitayitarini eerori. Poyaateeyanakinani, pikyaaryooowenteeyenawoni maawaeni nokowakaakimiri: omawitya aririka pikamakotena.

**35** Tekirarika piwetsika pikamakotena, patsipetashita pijeeki, ari piyaataki paamariki kaari tsiwakanitatsini. Omaanta aririka piwetsikakya pikamakotena, eejatzi aririka paapatziyakaayitenarini paashinipaeni atziri eero patsipetashitawo: pikanteetatyeyaaani pañe janta jenokinta.

**36** Aririka pashiteeyawoni maawaeni jeekayitatsirini jaka kipatsiki, omaanta piyaate paamariki kaari tsiwakanitatsini, tema patsipetashitakawo pashitayityawoni oetarikapaeni.

**37** Ņaakiro, tektsi pikantya pipinateri Tajorentsi ijekakaantemiri janta inampikinta.

**38** Tema naaka poñaachari jenokinta, natziritapaaki jaka kipatsikika. Eejatzi nopyanee janta. Roojatzi iinja nopyanteeya eejatzi jaka kipatsikika notsipatapaakyaari maawaeni ronampiri Pawa riraga kameethatatsiripaeni, notajorentsiperotapaaki: nokimityaari Pawa. Rootaki okameethatanteeyaaari pikenkithashireeyaani: aririka pipashiwentzimotakaakyaari kaariperotatsiri naaka iroñaaka, eejatzi aririka pipashiwentakayaawo noñaani, ari iinja nopashiwentakaapaemi eeroka aririka nopyiee.

## 9

**1** —Kyaaryootaki iroka nokamantaperotemiri. Pamine, akaateeyakini iroñaaka jaka. Eerotzitarika pikamiteeyani, aritaki piñaawaena noppinkathariperotapaaki, notajorentsitapaaki.

### *Irira Jesoshi ipaashinitzimotanakiri riyotaanewo*

(Mt. 17.1-13; Rk. 9.28-36)

**2** Awijanaki 6 kitejiri. Raanakiri Jesoshi riraga Peetero, Jantyaako, eejatzi Jowa, reewatanakiri janta antawo tonkaari. Ari ijekapaaki irirapaeni. Ipaashinitanaki Jesoshi, ipaashinitzimotanakiri oyaatziriri.

**3** Oshipakiryaanaki imaatha okitamaamawoperotanaki osheki. Jaka kipatsiki tee añiiro kitamaari kimityaawoni iroka.

**4** Romapokapaakiri ikoñaatzimotapaakiri Iriiyashini eejatzi Moeseeshini, ikenkithataakaapaakiri Jesoshi.

**5** ūnaawaetashiwaetanaka Peetero:

—Iyotaanari, tema okameethataperotzi pamakinaka jaka noñaantakimiri. Iroñaka nokowaki niwetsikaeyenimi 3 pankoshintipsaeni: apaani pashi, apaani rashii Moeseeshi, eejatzi paashini rashii rirori Iriiyashi.

<sup>6</sup> Ithaawaperotayitanakini osheki, rootaki kaari riyyotanta Peetero iitarika ikanterimi.

<sup>7</sup> Otzikaapaakiri menkori. Omapokanaka iñaani Tajorentsi menkoriki, ikantakiri:

—Riotaki notyomi nonintaperotziri, paapatziyaperotyaari.

<sup>8</sup> Intsipaete raminawitanaari ryotaanewo, tekatsi riroripaeni, inta apaniroeni Jesoshi.

<sup>9</sup> Roojatzi ipiyanteeyanaani, roerinkaeyanaani. Ikkantaperotziri Jesoshi:

—Eerowa pikantakotzirokya iroka piñaakiri iroñaka. Aririka piñaakina nañagae eejatzi, ari pikenkithatakotero okaatzi piñaakina. Naaka poñaachari jenokinta nokoñaataapaaki jaka kipatsiki.

<sup>10</sup> Ari ikemaeyawitakarini, roojatzi rojampitawakaantanaka iitaka iroka ikantziri Jesoshi: “Nañagae eejatzi”.

<sup>11</sup> Roojatzi ikanteeyantakarini riroripaeni:

—Riraga iyotaantzirori Iwaperite Tajorentsi ikanteeyini: “Riotaki itapaakyawoni ipoke Iriiyashini, eentsikiro rimpetaapaaki ipokapaaki rirori Rotyaantanewo Tajorentsi”. ¿litakaya ikanantawaetakari iroka?

<sup>12</sup> Riraga Jesoshi rakanakiri, ikantanakiri:

—Kyaaryo ikanteetzi: “Riro itapaakyawoni ipoke Iriiyashini, rowameethateeyapaakirini maawaeni”. Tema naaka rojankinatakotzitakarini paerani: “Osheki ikemaatsityaawo, eejatzi osheki itheenkaetawakiri”. ¿litaka rojankinatantawori iroka?

<sup>13</sup> Iroñaka nokantemi: aritaki ipokapaenti paerani paashini Iriiyashini. Ikkantaminthatziri atziri osheki rowashironkaakiri, imonkaatakiro rojankinatakotziteetakaririni paerani. Eejatzi ikimitena naari.

### *Retsiyatakotziri Jesoshi kyaantariri kamaari*

(Mt. 17.14-21; Rk. 9.37-43)

<sup>14</sup> Roojatzi ipiyanteeyanaani janta ijekaeyakininta ryotaanewopaeni paashini. Iñeeyapaakirini itsipateeyapaakarini osheki piyotawentakariri. Ijeeki iyotaantzirori Iwaperite Tajorentsi, iñaanatziri ipiyapiyawaanteeyakarini riraga ryotaanewopaeni Jesoshi.

<sup>15</sup> Ari iñeeyawakirini Jesoshi ipokae, rotsikanataperotawakari. Ishiyashiteeyanakarini, riwethateeyawakarini.

<sup>16</sup> Rojampitapaakiri:

—¿litaka piñaanatawakaanteeyarin?

<sup>17</sup> Rakanakiri apaani shirampari, ikantzi:

—Iyotaanari, namakimiri notyomi. Ikyaatkarini kamaari, romajontzi-itakinari.

<sup>18</sup> Aririka ishinkiwentakaapaeyaari, rowariyaakiri kipatsiki, ishimoretakaanakiri, ratsikaekitakaanakari, ikijopookitakaanakiri. Nokantawitari piyotaanewo: “Petsiyatakoteeri”. Teewee, tee imatziro.

<sup>19</sup> Rakanakiri Jesoshi:

—Atziri theenkantaniri. Tee paapatziyimaetana. ¿Tsika okaateka piyoteeyantyaarini? Niyotaapiintawitakimiri, omaanta tee paapatziyeyawakawoni. Intsipaete, pamakinaritya pitomi.

<sup>20</sup> Ari ramakiniri. Riraga kamaari, iñaapaakiri Jesoshi. Rapitziwitakaanakari eentsi, ipariyakaanakiri kipatsiki, pok. Ipinaapinaatakaanakari, ishinkanawatxitakaanakiri ipaanteki.

<sup>21</sup> Riraga Jesoshi rojampitakiri iriri eentsi:

—¿Tsika okaatzika itantanakariri?

Rakanakiri:

—Eeniro reentsitapaaki.

<sup>22</sup> Osheki itaakaapiintari paamariki, eejatzi ipiinkakayitapiintakirini iñaaki. Ikowawita rowamaerimi. Pitajonkantzirika, pineshironkateena, petsiyatakoteneari.

<sup>23</sup> Ikantziri Jesoshi:

—¿litaka pikantanantari: “Pitajonkantzirika”? Pameentanarika, aritaki imatakimiro eeroja Tajorentsi oetarikapaeni.

<sup>24</sup> Ishintsitanaki ikantziri iriri eentsi:

—Nameentawitzimi. Teerikama nameentaperotzimi, pamitakotena nameentaperotantemiri.

<sup>25</sup> Riraga Jesoshi iñaawakiri ishiyashiteeyapaakarini osheki atziri. Ish-itsithatakiri kamaari, ikantziri:

—Eerokataki kamaari. Pimajontzitakaantzi, eejatzi pamashikempi-tatakaantzi. Iroñaaka nokantaperotemi: “Pipakagaeri, eero pipiyantari eejatzi”.

<sup>26</sup> Riraga kamaari ikaemakaanakiri eentsi, rapitziwitakaanakari roojatzi rookaneeri. Riraga eentsi ikimiwitakari kamatsiri. Osheki kantayitatsirini:

—Kamaperotaki.

<sup>27</sup> Omaanta ikathawakoteeri Jesoshi, ipiriinteeri, ikatziyanaa rirori, sherok.

<sup>28</sup> Roojatzi ikyagaeyapaeni pankotsiki. Riyoteeyananaki riyotaanewo, rojampiteeyirini:

—¿litakaka kaari nomatantawo naari netsiyatakoteri?

<sup>29</sup> Rakanakiri:

—Osheki ishintsitzi riraga kamaari, rootaki kaari pimatantari petsiyatakoteeri riraga shinkiwentawitachari. Eejatzi maawaeni kimiteeyaririni, eero pimateeyirini apaniroeni. Apatzirika pitzitawentyari Tajorentsi eejatzi pamanaperoteri, ari ramitakotakimi rirori powawijaakoteri kyaantawitariri kamaari.

*Rapiitakiri Jesoshi riyotaanewo, ikantakiri: “Aritaki nokame”  
(Mt. 17.22-23; Rk. 9.44-45)*

<sup>30-31</sup> Roojatzi rowaaganaka Jesoshi eejatzi riyotaanewopaeni janta, ikinane Karireeyaki. Ari ikowaki rirori ryoteeri riyotaanewopaeni apaniroeni, rootaki imantanakari riyaatayitaneeni. Ikantanakiri irirapaeni:

—Naaka poñaachari jenokinta, nokoñaatapaaki jaka kipatsikika: rooteentsi raakaanteetena. Rayena atziri rowamaena. Ari nokamaperotawitakya, ari okaate 3 kitejiri, eejatzi nañagae.

<sup>32</sup> Omaanta tee ryoteeyawakironi ikantawitakariri. Ithaawan-teeyananakini rojampiterimi oetarika ikantawitariri.

*Tsika akantyaaka apinkathariwenante iinja  
(Mt. 18.1-5; Rk. 9.46-48)*

<sup>33</sup> Ikantaka rareeteeyapaakani Kaperinawooki, ijekaeyapaakini pankotsiki. Rojampitziri Jesoshi riyotaanewo:

—¿litaka pikantawakaari awotsiki?

<sup>34</sup> Imaeriteeyananakini rirori, ipashiwenteeyananakini; rooma ikantawakaanaka janta awotsiki, ikantzi:

—Iroñaaka akaateeyinika, ¿ninkama anagaenika apinkatharite?

<sup>35</sup> Roojatzi ijekantapaakawo Jesoshi jeekamentotsi. Ikaemakiri riyotaanewo, ikantziri:

—Aririka pikoye pipinkathariwenante, petakoeyaaarini maawaeni atziri, eejatzi pamitakoeyerini, pineshironkaeyerini.

<sup>36</sup> Ramakiniri apaani eentsi. Rojatekapaakiniri niyanki, rawithak-itawakiri. Ikantziri:

<sup>37</sup> —Aririka pineshironkateri aapatziyanari, kimitaririka irika eentsi, ee-jatzi pikimitzitakina naari: pintashiretakina naari. Eejatzi okimitaka, aririka pinintashiretena, tee apatziro naaka pinintashireperotena, omaantakya eejatzi Pawa otyaantakinari.

*Rowawijaakotantzi paashini aapatziyariri Jesoshi  
(Mt. 10.42; Rk. 9.49-50)*

<sup>38</sup> Roojatziriraga Jowa ikantanakiri:

—Iyotaanari, noñeeiyakirini shirampari, ikantzi: “Naapatziyakari Jesoshi, rootaki nookantakariri kamaari”. Tee iroñaaka akaateeyerini riori jaka, rootaki nothañaakotantariri.

<sup>39</sup> Ikantziri Jesoshi:

—Eero pithañaakotari. Tema naaka nomatakaakiri itajonkantzi. Irira tee ikijeeyeeni, tema rantakinawo nokowakaakiriri.

<sup>40</sup> Ninkarika kaari kijaneenteenri rirotaki atspateeyearini.

<sup>41</sup> Aririka riyatwakimi atziri eeroka aapatziyanari, rootaki ikamintaantawakimiri ipawakimi pimiri, omawitya aririka okaate eechonkiini, aritaki ipinatakiri Pawa. Kyaaryootaki iroka nokamantzimiri.

*Koweenkatsiri antakirorika kaari kameethatatsi  
(Mt. 18.6-9; Rk. 17.1-2)*

<sup>42</sup> Eejatzi irika eentsi, aapatziyanari: aririka pantakayeri kaari kameethatatsi, aritaki rowashironkaaperotakimi Tajorentsii. Okameethatawitami pikamityaami paerani, eero pantakaantarikya kaari kameethatatsi aapatziyanari; rootaki kaari nowashironkaantemimi.

<sup>43</sup> Eenitatsi iroka noshiyakaawentemiri: iroñaaka piyotantyaari tee okameethatziroña pantero kaari kameethatatsi. Aririka antakayemiro pako kaari kameethatatsi, pithatyeero. Aritaki okameethatziri piyaaponthotziitashitya jenokinta, okantyaata janta pañaantaperotapaeyaari. Tee okameethatziroña otzime apite pako eerorika pithatyeero, rootaki piyaatantyaari paamariki kaari tsiwakanitatsini. Tema okanteetatyeyaaani amoreki.

<sup>44</sup> Eero janta ikami chowitsi, eejatzi eero otsiwakanitzi paamari roori.

<sup>45</sup> Eejatzi aririka antakayemiro piitzi kaari kameethatatsi, pithatyeero. Aritaki okameethatzzi piyaaponthotziitashitya jenokinta, okantyaata janta pañaantaperotapaeyaari. Tee okameethatzzi eenitatsi apite piitzi: eerorika pithatyeero, rootaki piyaatantyaari paamariki kaari tsiwakanitatsini.

<sup>46</sup> Eero janta ikami chowitsi. Eejatzi eero otsiwakanitzi paamari roori.

<sup>47</sup> Eejatzi aririka aminakayemiro poki kaari inimotziri Tajorentsii, pikithokireero, pookero. Ari okameethatziri kashetaakini pikyaapae janta ipinkatharitzinta Tajorentsii. Rooma otzimaawityaarika apite poki: iyaatakaashiteemikari paamariki kaari tsiwakanitatsini.

<sup>48</sup> Eero janta ikami chowitsi. Eejatzi eero otsiwakanitzi paamari roori.

<sup>49</sup> Eeroka aapatziyeyakinarini, rootaki ikijanteyantemirini kaari aapatziyeyanarini. Aririka paapatziyeyenani, ari piñeero opomeentsitzimotemi.

<sup>50</sup> Okameethatzzi tziwi. Omaanta aririka opeyanakya owatyorite, tekatsi okantya okatyotanee eejatzi. Ari pikimitya eerori: pikempoyeero iñaani Tajorentsii pajankaneki paakameethatawakaanteeyaaarini. Tema

okameethatzi: pikantyaani paakameethatawakagaeyaani, maawaeni. Tema pikimitakotakawo tziwi.

## 10

*Riyotaakiri Jesoshi atziri: "Eero pookaero piina"*

(Mt. 19.1-12; Rk. 16.18)

<sup>1</sup> Ikantaka rowaaaganaa Jesoshi, ikinakaaneeri riyotaanewopaeni Joreeyaki. Eejatzi riyaatee intatsikeronta Joriraani. Ipiyotawentapaari eejatzi osheki atziri, riyotagaeyapaerini. Tema aritaki rameteeyawoni riyotaantapiintzi.

<sup>2</sup> Ipokashitapaakiri warijeeyopaeni. Ikowawita ikompitakayaarimi Jesoshi, rootaki rojampitanteeyapaakaririni:

—¿Tsikama okantzika Iwaperite Tajorentsi? ¿Oshinetama rookaero shirampari iina?

<sup>3</sup> Rakanakiri riraga Jesoshi:

—¿Oetakama rojankinatakirini Moeseeshi pikemijantaperotantyaawori?

<sup>4</sup> Rakaeyananakirini rirori:

—Rojankinarini Moeseeshi oshinetziri atziri rookaero iina. Tema okantzi: “Aririka pikoyi pookaero piina, pityaawo, pojankinateniro paperi pikanteero: ‘Iroñaaka nookaemi’. Roojatzikya pimatantyaawo pookaero”.

<sup>5</sup> Ikantanakiri Jesoshi:

—Tee ikowakaantziro Tajorentsi pookaero piina, omaanta eerokapaeni tee añiiro pikenithashiryaaantari, rootaki rojankinatantakimirori Moeseeshi paerani iroka.

<sup>6</sup> Paeraniperoroña ritantakawori riwetsikantaki Tajorentsi, riwetsikakiri shirampari eejatzi tsinani.

<sup>7</sup> Rootaki rotsiparyaantyaaariri shirampari iriri, eejatzi riniro, kijokiro rowantanakyaawori iina.

<sup>8</sup> Rinashitawitani paerani shirampari eejatzi tsinani. Omaanta aririka raaka iina kimitanaa apaani ikantaka: kijokiro rowawakaanakya.

<sup>9</sup> Iñaakiri Tajorentsi apaani ikantaka; eero iroñaaka rookakagaeri atziri.

<sup>10</sup> Roojatzikjeekantapaa pankotsiki. Rojampitapaeri eejatzi riyotaanewo:

—¿Tsika okantaka iroka pikantakiri?

<sup>11</sup> Ikantziri:

—Ninkarika ookeroni iina aririka ragae paashini tsinani, tema iñaathatzimotaawo iinaperoni.

<sup>12</sup> Eejatzi okimitya roori tsinani, aririka ookaeri oemi, agaerika paashini shirampari, tema oñaathatzimotaari oemiperoni.

*Riraga Jesoshi iñaaperotziri eentsipaeni*

(Mt. 19.13-15; Rk. 18.15-17)

<sup>13</sup> Ikanta ramaetapaakiniri eentsipaeni, ikantapaakiri Jesoshi:

—Pipampiteri eejatzi pikanteri Tajorentsi kameetha ijeekakagaeyerini irika eentsipaeni.

Omaanta ikantawakiri riyotaanewopaeni:

—Eero pamiri eentsipaeni jaka, rocheempitaririkari iyotaanari.

<sup>14</sup> Tee inimotanakiri Jesoshi rantakiri. Ikantanakiri:

—Pishinetenari ipokashitenaata eentsipaeni. Eerowa pikatziyakari. Piñeeyakirini irikapaeni eentsika, tee itheengaeyanan, inta rameenteeyaki-nani. Tema reewawenteeyirini Tajorentsi maawaeni kimiteeyaririni rirori.

<sup>15</sup> Kyaaryootaki iroka nokamantaperotzimiri, irika eentsipaeni rameenteeyakarini Tajorentsi. Riroma riraga kaari oshiyarini eentsi, riraga kaari ameentari Tajorentsi, eero imatziri reentsitetari.

<sup>16</sup> Inataperoeyawakirini eentsi, rowaeyakinirini rako iitoki. Ikan-teeyirini:

—Kameetha ineshironkatemi Tajorentsi.

*Ikenkithawaetakayiri Jesoshi ashaagantzinkari  
(Mt. 19.16-26; Rk. 18.18-27)*

<sup>17</sup> Ikanta riyaatee Jesoshi, ikinanee awotsiki. Ishiyapaaka apaani shiram-pari, rotziwerowashitapaakari. Ikantziri:

—Iyotaantatsiri kameethari. ¿Oetakama nanteri nañaantyaari, nokantee-tatyeyaaani?

<sup>18</sup> Ikantziri:

—¿litaka pikanantanari: “Kameethari”? Tekatsi kameethatatsini, inta apatziro Tajorentsi ikameethatzti.

<sup>19</sup> Piyomacheetawo iroka ikaminagaetakiriri Moeseeshini: “Eero powamaantzi. Eero pishirontawo kaari piina. Eero pikoshitzi. Eero pitheeyakotati atziri. Eero pamatawitanzi payitantlyaariri rashitayitarini paashini atziri. Pipinkathateri piri eejatzi piniro”.

<sup>20</sup> Ikantanakiri rirori:

—Pamine, eenironi newankaritapaakini, nothotyaakiro maawaeni iroka-paeni, roojatzi iroñaaka.

<sup>21</sup> Riraga Jesoshi, raminanakiri, inintashireperotakiri. Ikantakiri:

—Eenitatsi apaani kaari pantzi. Piyaate iroñaaka pipimantayiteroni maawaeni pashaagawo. Pipashiteeyaaarini kaari tzimatsi rashaagawo, rooma eeniro ikashiyakaaperotakimiri Tajorentsi kaari thonkanitachani jenokinta. Roojatzi poyaatantanakina.

<sup>22</sup> Ikemawakirira ikantakiriri, ookantzimotapaakari rajankaneki rowashiretakatanakawo. Ro rowashiretantanakari tema oshekini tzimimotziriri rowaagawo. Roeyomaetanaka, riyaatanee.

<sup>23</sup> Ari ipithokashitanakari Jesoshi ryotaanewo, ikantziri:

—Riraga ashaagantzinkari opomeentsitzimotari ikowaki Tajorentsi ipinkathariwenteri.

<sup>24</sup> Ikemanteeyawakaririni ryotaanewo, rotsikanatanakari. Rapiiteeri eejatzi Jesoshi, ikantziri:

—Notyomipaeni, kyaaryo opomeentsitzimotari atziri ikowaki Tajorentsi ipinkathariwenteri aririka rameentyaawo rowaagawo.

<sup>25</sup> Noshiyakaawentemiri kameeyo. Tema opomeentsitaka roshinthateri kameeyo imooki kithapi. Omaanta pomeentsiperotachari ashaagantzinkari ikowaki Tajorentsi ipinkathariwenteri.

<sup>26</sup> Tema osheki iroñaaka rotsikanateeyanakarini rirori. Ikantawakaanaka:

—¿Ninkama iroñaaka awijakotaatsini? Pomeentsiritaani.

<sup>27</sup> Raminanakiri Jesoshi, ikantziri:

—Eero imatashitawo atziri rowawijaakoteeya rirori, omaanta rirotaki Tajorentsi materini rowawijaakoteeri. Tekatsi pomeentsitzimotyaarini rirori.

*Tajorentsi ipinateeyerini maawaeni oyaateeyiririni Jesokirishito  
(Mt. 19.27-30; Rk. 18.28-30)*

<sup>28</sup> Roojatzi Peetero ikantanakiri rirori:

—Omaantakya naaka, nookayitakironi maawaeni, oetarika nashiteeyaw-itarini, noyaatanakimi eerori.

<sup>29</sup> Ikantzi Jesoshi:

—Kyaaryootaki iroka nokantemiri. Aririka pikowaki poyaatanakina, eero patsipetashitawo pookayiteroni pinampi, pirentziapaeni, pitsiropaeni, piniro, piina, piri, peentsitepaeni, powanepaeni. Eejatzi aririka pikowaki pikamanantero noñaani raapatziyanteenari atziri, eero patsipetashitawo.

<sup>30</sup> Kyaaryo, ikijawentemiro paapatziyana opomeentsitzimotawitemi, omaanta eero patsipetashitawo. Aririka pookanakiro apaani oetarika, ipaemi Tajorentsi 100: pipankopaeni, pirentziapaeni, pitsiropaeni, piniro, peentsitepaeni, powanepaeni, maawaeni. Aritaki iinja otzimimoteeyeemini osheki janta pañaaperoeyapaeninta, pikanteetatyeyaaani.

<sup>31</sup> Eenitatsi iroñaaka osheki pinkatharitatsiri jaka kipatsikika, omaanta eero ipinkathariteeyini maawaeni janta jenokinta: rooma aamashitya apaanipaeni pinkatharitagaantatsini. Eejatzi eenitatsi iroñaaka osheki owashironkaenkaripaeni, omaanta iinja janta jenokinta ipinkatharitagaantatape riori.

### *Rapiiteeniri eejatzi Jesoshi: "Aritaki nokamaki paata"*

(Mt. 20.17-19; Rk. 18.31-34)

<sup>32-33</sup> Ikanta ikineeyanakini awotsiki, rooteentsi rareeteeyaaani Jerojareeki, reewatanaki Jesoshi. Rotsikanatanakari oyaateeyiririni, eejatzi ithaawaeyanakini. Ari ipiyotziri eejatzi riraga 12 riyotaanewo, ikantziri:

—Pikemijantena. Iroñaaka piyoteeyakini atonkagaeyatyenee janta Jerojareeki. Tema naaka poñaachari jenokinta, nokoñaatapaaki jaka kipatsikika. Rooteentsi omonkaaty raanteetenari ragaeyenani jewatayitziririni ñaanakownenatsiri eejatzi iyotaantayitzirorini Iwaperite Tajorentsi, rowamaakaantakina. Raakaanteena eejatzi, raantenari kaari yotziri Tajorentsi.

<sup>34</sup> Ishirontawenteeyakinani, reewapootena, ipajapajaatena, rowamaena. Okaatapaaki 3 kitejiri, roojatzi nopersiniantaneeya.

### *Ikantziri Jesoshi tsika ikantyaari ipinkatharitanyaari*

(Mt. 20.20-28)

<sup>35</sup> Ipokashitakiri okaakini Jantyaako, eejatzi Jowa, riraga itomipaeni Sewereeyo. Ikantziri:

—Iyotaanari. Nokowaki pishinetenawo iitarika nokowakotemiri.

<sup>36</sup> Ikantawakiri Jesoshi:

—¿litaka pikoyiri noshinetemiri?

<sup>37</sup> Ikantziri:

—Inja pipinkatharitaperote, pishinetena nojeekimotemi pakoperoki. Irrika yeeyika ijeekimotemi pampateki, nokimiteeyemini eerori pipinkatharitzi.

<sup>38</sup> Ikantziri Jesoshi:

—Tee piyotzi iitarika pikantakinari. Pamine, osheki nokemaatsityaawo naari, ¿arima pimatakiro osheki pikemaatsityaawo eerori?\*

<sup>39</sup> Ikantaki riyotaanewo:

—Jee, ari nomatakiro.

Ikantawakiri:

—Inja piñeero pikemaatsityaari.

<sup>40</sup> Omaanta tekatsi nokantya noshinetempi pijekki nakoperoki, eejatzi nampateki. Inta kantsatsine Pawa ninkarika jeekimotenani: riyyotzitakarini paerani riraga jeekimotenani.

\* <sup>10:38</sup> Riraga Jesoshi roshiyakaawentashitawo aririka ikemaatsitakyaawopa katsiri kimitaka rirakitziro kepishaaperotatsiri, eerorika kimitaka ikaawoshiwentakityawo oetarika pomeentsiperotachari.

**41** Ikemaeyantakaworini riraga paashinipaeni riyotaanewo iroka ikantakiri, ikijanteeyanakarini riraga Jantyaako eejatzi Jowa. Nokijanteeyanakaririni ikowaeyawitakityaani ipinkathariteeyenimi.

**42** Ikanteeyirini Jesoshi:

—Pipokaeyeni. Piyotzi ijeeki iwinkatharitepaeni kaari yotziri Tajorentsi. Romperatayitakarini atziripaeni riori. Eejatzi riraga jewatatsiripaeni, romperateeyakarini isheninkapaeni.

**43** Eero pikimitari eeroripaeni. Omaantakya aririka pikowaki pipinkathariwenteeyerini atziri, petakoeyaarinmaawaeni pitsipateeyarini.

**44** Eejatzi aririka pikowaki peewawenante, otzimatye petakoeyaarinmaawaeni.

**45** Naaka poñaachari jenokinta, nokoñaatapaaki jaka kipatsikika. Tee ro nopokantyaari nomperatemi eerokapaeni, intakya nopokantari namitakoeyemini, eejatzi nokamawenteeyemini eerokapaeni atziri nopolinawenantemirori kaari kameethatatsi pantziri, nowawijaakotantemiri.

### *Retsiyatakotziri Jesoshi Waritemeeyo*

(Mt. 20.29-34; Rk. 18.35-43)

**46** Ikanta rareetaka Jesoshi janta nampitsiki owaero Jerikoo. Rowaaganaa eejatzi, itsipateeyanakarini riyotaanewopaeni eejatzi osheki piyoteenchari. Ari ijeekaetzini awotsinampiki shirampari iitachari Waritemeeyo, rirotaki itomi Temeeyo. Kaari kokichaatatsi Waritemeeyo, inethaakopiintziri atziri ipashityaari koriki.

**47** Ikmakotawakiri kaakitaki Jesoshi, riraga najareetejatzi. Owakira ikemakotawakiri, ikaemawakiri, ikantziri:

—¡Jesoshi! Tema eero ka icharineeteni Iraviiri, pineshironkatapaena naari.

**48** Osheki atziri ishintsitheeyakirini:

—¡Pimaerite!

Eekiro ikaemaperotanakitzi, ikantzi:

—¡Jesoshi! ¡Icharineeteni Iraviiri! ¡Pineshironkataneena!

**49** Ikatziyapaaka Jesoshi, ikantzi:

—Pikaemeri.

Ikaemaetziri kaari kokichaatatsi, ikanteetziri:

—Piweshiryaanakya, pikatziyanee. Ikaemimi irinta.

**50** Roojatzi rookantanakawo ipewiryaaakotari, ikatziyanaka, sherok. Riyaatashitanakiri Jesoshi.

**51** Ikantawakiri:

—¿Itaka pikowakotanari? ¿Tsika nokantemika?

Rakanakiri riraga kaari kokichaatatsi.

—Pawa, nokowaki naminee.

**52** Ikantziri Jesoshi:

—Iroñaaka piyaatee. Pameentakina, rootaki petsiyatakontaari.

Roojatzi ikokichaattananaa, royaatanakiri riori.

## 11

### *Riyaatanaki Jesoshi Jerojareeki, iñaaoperotawakiri atziripaeni*

(Mt. 21.1-11, 14-17; Rk. 19.28-40; Jowa 12.12-19)

**1** Paashini kitejiri rareetzimataapaakari Jesoshi Jerojareeki eejatzi Wetejajeeki, okaakiniki Wetaaniyaki: itonkaanakiro tonkaari oetachari Orieiwomashi. Riraga Jesoshi rotyaatankiri riyotaanewo apite,

**2** ikantakiri:

—Piyaate janta nampsitsiki. Aririka pareetakya janta piñaapaakiri apaani wooro ewankari, tekira ikyaa kotaan. Eeniro ithatakotaka; pithataryaa kotaashitapaakyaa pamakinari.

<sup>3</sup> Aririka ikanteetawakimi: “¿litaka pithataryaa kotaantariri wooro?” pikan-tanakiri: “Ikaemakaantziri Awinkatharite. Iinja roepiyeemiri”. Aritaki ishinetawakimiri iwoorote.

<sup>4</sup> Roojatzi riyataanaki riyotaanewo. Iñaapaakiri wooro janta awotsiki. Ihatakotaka okaakini ashitakontsi pankotsi. Ithataryaakotapaakyaa.

<sup>5</sup> Eeniro ijeki atziripaeni, rojampitawakiri:

—¿Oetaka pantziri? ¿litaka pithataryaa kotaantariri wooro?

<sup>6</sup> Rakanakiri, ikantziri okaatzi ikantawakiriri inkaaganki Jesoshi. Ari ishinetawakiri iroñaaka raanakiri wooro.

<sup>7</sup> Ari ikatatakotanakiniri Jesoshi. Rowankitakiniri imitzikaaki iithaari-paeni, roojatzi ikyaa kotaantanakari rirori.

<sup>8</sup> Ari ranashitakaanakari awotsiki, iñaaperoeyawakirini maawaeni atziri, romaankaeyakironi kithaarentsipaeni awotsiki. Paashinipaeni ichekakiro oshi kompirosi, eejatzi rowakiniri awotsiki.

<sup>9</sup> Riraga jewateeyakiririni eejatzi impaeteeyatsirini, ikaemaeyanakini:

—¡Rikitapaaki owawa jaa koteeni! ¡Thame añaaperotawakiri! ¡Riotaki rotyaan-takaeniri Tajorents!

<sup>10</sup> Paerani Iraviirini ipinkathariwentzirini nojoriyyotzinkarite: omaanta iroñaaka, ipinkathariwentakae irika añaawakirika. Riotaki icharineetenipero Iraviirini. Thame añaaperoteri Tajorentsji jenokijatzi.

<sup>11</sup> Roojatzi rareeteeyapaakani Jerojareeki, ikyaa kota Tajorentsipankoki. Ithotyaa kiro raminayitapaakironi. Ari itsiteniityaanaki oorya. Roojatzi ishitwantanakari, ipiyanaka Wetaaniyaki. Itsipateeyanakarini 12 riyotaanewo.

### *Iñaakiro Jesoshi iyeera kaari tzimatsi okithoki (Mt. 21.18-19)*

<sup>12</sup> Ari okitejitanaki eejatzi rookaneero Wetaaniya, riyatae Jerojareeki. Ari niyanki awotsi aawitakari itashe Jesoshi.

<sup>13</sup> Iñaakiro intena inchato iitachari iyeera. Oztimawita oshi. Ari riyataashitziro, ikowawitapaakawo okithoki. Tee iñiiro, inta apatziro oshi. Tekiraata iypaeteta okithokitanteeayaari.

<sup>14</sup> Ikantanakiro Jesoshi:

—Tekatsi owaeyaawoni pikithoki iinja.

Ikemakiri riyotaanewopaeni.

### *Riraga Jesoshi rookaeyakirini Tajorentsipankoki pimantayitawitacharini (Mt. 21.12-17; Rk. 19.45-48; Jowa 2.13-22)*

<sup>15</sup> Roojatzi rareeteeyaa eejatzi Jerojareeki. Ikyaa pae Tajorentsipankoki. Rookaaeyapaakirini maawaeni pimanteeyawitacharini eejatzi maawaeni amananteeyawitacharini. Rotatsinkitayitapaakirini imejatepaeni riraga pimantayitatsirini iyorkite. Eejatzi rotatsinkitayitapaakirini ijeekamen-topaeni pimanteeyawitaririni jamomo.

<sup>16</sup> Ithañaanakawo ipimantero owaagawontsi janta Tajorentsipankoki.

<sup>17</sup> Ari riyotaantaki, ikanteeyirini:

—Paerani rojankinateetzironi Iwaperite Tajorentsji, ikantzini: “Ikantzi Tajorentsji: ‘Iroka Tajorentsipankoka okameethatzi pikenkithatakaapiinteeyenani eerokapaeni maawaeni inashitzinkaripaeni atziri, omaanta eerokapaeni pikoshitashiteeyakarini atziri pokaeyawitacharini jika Tajorentsipankokika’”. Tee okameethatzi iroka panteeyakirini.

<sup>18</sup> Ari ikemaeyawakirini maawaeni riraga piyotawentari, rootaki rotsikanateeyantananakaririni. Eejatzi ikemakotakiri jewatayitziririni ñaanakowenantsatsiripaeni, iyotaantzirori Iwaperite Tajorentsi, maawaeni. Ikanteeyawitakani:

—¿Tsika akanterika Jesoshi owamaantyaariri?

Omaanta tekatsi ikanteri, ithaawanteeyakarini. Tema ipinkatheeeyakirini atziri Jesoshi.

<sup>19</sup> Itziroryaanaki oorya, ari rookaneero Jesoshi nampitsi.

### *Iñeyakironi rowaga iyeera, okamanaki*

(Mt. 21.20-22)

<sup>20</sup> Okitejitanaki eejatzi, ipiyanaa Jesoshi eejatzi riyotaanewopaeni janta Jerojareeki. Ikineetaneero iyeera. Iñaapaakiro, okamanaki, roojatzi janta oparithaki.

<sup>21</sup> Ikenkithashiryaakiro Peetero ikantanakiri Jesoshi chapinki. Ikantziri:

—Iyotaanari, paminero iyeeraka powamayimatakiri chapinki. Kamanaki.

<sup>22</sup> Rakanakiri Jesoshi:

—Pameentyaari Tajorentsi.

<sup>23</sup> Kyaaryootaki iroka nokamanteyemirini. Aririka pikanteri Tajorentsi: “Poshirinkero otzhinta, pookero janta inkaareki”, eororika pitheenkashiretti, inta piyotaperotaki roshirinkero, aritaki imatakimiro.

<sup>24</sup> Rootaki nokamanantzimirori iroka: aririka pikenkithatakayeri Tajorentsi, oetarika pikanteriri, pikenkithashirya: “Aritaki imatakinaawo nokantakiriri”. Pameentaperotyaaririka, aritaki imatakimiro.

<sup>25</sup> Aririka pikenkithatakayeri Tajorentsi, aririka eekiro piyaatatayee pikijiri paashini atziri ari pityaawo piyaate pikaminthayeri irira: oetarikapaeni rantzimatkimiri eero pameñaawo pikijiri inta pipeyakoteni. Roojatzi eorori, eero ikijimi Pawa Tajorentsi pantayitzirini eorori, inta ipeyakotemiro.

<sup>26</sup> Eorrika pipeyakotziniri atziri, kijakimiri, eero ipeyakotzimiro eorori Tajorentsi.

### *Ikantawentawakaakawo itajorenka Jesoshi*

(Mt. 21.23-27; Rk. 20.1-8)

<sup>27</sup> Ipiyakagaeyarini eejatzi Jerojareeki, ikatziyatziyawaeta janta Tajorentspankoki. Riraga jewawentayitziririni ñaanakowenantsatsiripaeni, iyotaantziroripaeni rojankinarini Moeseshi, eejatzi aataperoteenchari ipokashiteeyakirini.

<sup>28</sup> Ikanteeyapaakiri:

—¿Ninka iyotaakimiroka pipinkatharitantari pimatayitantaworini pantayitzirini? ¿Ninkama iitakimiriaka pinkathari, pantantyaawori iroka?

<sup>29</sup> Ikantawakiri Jesoshi:

—Iroñaka apaani nojampiteeyemini eorori. Aririka pakakina eorori, roojatzi nokamanantemiri naaka ninkarika otyaantakinari.

<sup>30</sup> Riraga Jowa ikaawoshitakotayitzinirini Tajorentsi atziri. ¿Ninkama otyaantziriri ikaawoshitakotayitzinirini? ¿Rioma Tajorentsi otyaantziriri? Teerikama, ¿rioma atziri otyaantziriri? Pakenatya.

<sup>31</sup> Ari ikantawakaanaka ñaanakowenantsatsiripaeni:

—Aririka akanteri: “Riotaki Tajorentsi otyaantziriri”, ikanteekari: “¿litaka kaari paapatziyantari Jowa?”

<sup>32</sup> Eejatzi eero akantziri: “Riotaki atziri otyaantziriri”. Ikijanakaekari maawaeni atziri.

Ñaakiro, riraga ñaanakowenantatsiri ithaawanteeyakarini atziripaeni; maawaeni irira iñaaperoeyakirini kameetha Jowa, ikanteeyini: "Tema irira Tajorentsi otyaantziriri Jowa ikamanantzi iñaani".

<sup>33</sup> Rootaki ikanantariri ñaanakowenantatsiripaeni:

—Tee niyotzi ninkarika otyaantziriri.

Ikantzi Jesoshi:

—Eejatzi naari, eero nokantzimi ninkarika otyaantanari nopinkatharitan-tari nomatantawori iroka.

## 12

*Roshiyakaawentziniri Jesoshi pankitzirori oowamashi*

(Mt. 21.33-46; Rk. 20.9-19)

<sup>1</sup> Roojatzi roshiyakaawentziniri Jesoshi iroka, ikantziri:

—Ipankitziro shirampari roowamashite. Eejatzi rotantotakotakiro maawaeni othapiki. Eejatzi riwetsikashitakiro tsikarika rawishoowero oowa rowantyaawori owaaga. Riwetsikakiro eejatzi pankochaaniki ijekantyaari jenoki raminakowenantyaawori maawaeni. Roojatzi ikantziri thamaetakoteroni: "Paminawiritantenawo maawaeni: iinja pipashitena kashetani". Roojatzi ryaatantanaka paashiniki kipatsi.

<sup>2</sup> Ojamanitapaentzi iraakanaki okithoki oowa. Ari riraga ashitawori rotyaantawitari ronampiri apaani, raagaantakitemi oowa.

<sup>3</sup> Tee ipawakiri, omaanta raawakiri, shepik; ipajatashitawakari, tak, tak, tak. Roepiyawaeri, tekatsi raanaki.

<sup>4</sup> Ari rotyaantawitaka eejatzi paashini ronampiri. Rompojawakiri iitoki, pok, pok, rowashironkaawakiri.

<sup>5</sup> Rotyaantawitaka paashini eejatzi. Rowamaawakiri, shemi. Eejatzi rotyaantawitakari osheki paashinipaeni: apaanipaeni ipajapajaatawakiri; irira paashinipaeni rowamaawakiri.

<sup>6</sup> Apatziro apaani yotapaencha itomi rirori, inintaperotziri. Ikenkifhashiryaaanaka rirori: "Rirorika notyomi irira ipinkathatawakiri". Rotyaantawitakari rirori.

<sup>7</sup> Omaanta ikantawakaanaka thamaetakotzirori: "Kaakitakira itomi ashitawori, aririka ikamaki iriri, rirotaki irika ashitaperoteeyawoni. Thame owamaawakiri, roojatzikya aakotanteeyawo aka roowamashite".

<sup>8</sup> Ari raawakiri, rowamaawakiri, shemi. Rookakiri othapikinta oowamashi.

<sup>9</sup> ¿litaka pikenkithashireeyarini? ¿Tsika ikanterika ashitawori rowamaashite? Tema ari ipokaki irira, ithonkappaakiri ratziritepaeni. Paashini raminee aminawiritantenerini.

<sup>10-11</sup> Tema piñaanatziro Iwaperite Tajorentsi, tsikarika okantakotana naaka, noshiyakawo mapi. Okantzi: "Riraga wetsikaeyirorini pankotsi itheenkakiro apaani mapi ikantzi: 'Tee okameethatzi', omaanta iinja rowaga mapi itheenkawitakari, iñaakiro riraga Tajorentsi okameethatzi, tema rirotaki yoyaakirori kijotakaaperoteroni pankotsi. Tema rootaki ot-sikanatantanakawori aakapaeni".

<sup>12</sup> Riyotakoeyawakironi ikantakiri Jesoshi, rirotaki roshiyakaawentakiri irirapaeni. Rootaki ikowaeyantawitakarini ragaeyanankirinimi, omaanta ithaawanteeyakarini riraga piyotawenteeyakaririni. Rootaki rookaeyan-tanaarini, ryaateeyaneeni.

*Kameethama apinateri iwinkatharite oroomajatz*

(Mt. 22.15-22; Rk. 20.20-26)

<sup>13</sup> Rotyaanteetziri warijeeyopaeni eejatzi oyaatziriri Erooreshi. Ikowawitaka ikompitakayaarimi Jesoshi.

<sup>14</sup> Rareetapaaka, ikantapaakiri:

—Iyotaantatsiri, niyoteeyakimini eerokataki kameethatatsiri. Tee okantzimoneentzimi oetarikapaena ikantayitzirini atziri, tee pithawantari. Kameetha piyotaantziro ikowakagaeyeerini Tajorentsi. ¿Okameethatzima aka joriiyopaeni noperi iwinkatharite oroomajatzi koriki? ¿Teerikama okameethatz? ¿Noperima? ¿Eeroma noperi?

<sup>15</sup> Riyotakotakiri Jesoshi, ikowashita ramatawiterimi irika jampitakiriri. Ikantziri:

—¿litaka pikowantakari pikompitakayenami? Pamakinari koriki, poñaayenari.

<sup>16</sup> Ari apaani ramakiniri. Rojampiteeyirini:

—¿Ninkama oshiyakaawentachari ipooka? ¿Ninkama ashitawori iwaero jankinateencharika?

Rakaeyanakirini rirori, ikantziri:

—Irira ashitawori Seesari, riraga iwinkatharite oroomajatzi.

<sup>17</sup> Ikantziri:

—Panteniri pinkathari ikowakaemiri, eejatzi panteniri Tajorentsi ikowakaemiri rirori.

Rotsikanateeyanakarini riraga jampiteeyiririni.

### *Rojampitakowenteetziro aririka rañaagae kamayiteentsiri*

(Mt. 22.23-33; Rk. 20.27-40)

<sup>18</sup> Ikantapiintzi saroseeyo: “Eero ipiriintaa kamatsiri”. Ari ipokashitziri rirori Jesoshi, rojampitapaakiri:

<sup>19</sup> —Iyotaantatsiri, ikantzini Moeseeshi: “Eenitalsirika shirampari iina, omaanta tekatsirika itomi, aririka ikamaki, okameethatz ragaero iinani rirentzi itzimakaanteeyaawori otomi. Itzimapaakirika otomi kimiwitana ka rirotaki ashityaarini rirentzini itomi”.

<sup>20</sup> Ari. Eeniros shirampari rirentzi 6. Raawita iina, roojatzi ikamaki. Tekira itzimakayiro itomi.

<sup>21</sup> Raawitaawo rirentzini apitetapaentsiri. Ikamaki rirori, eejatzi tee itzimakayiro itomi. Eejatzi ikimitaa rirori riraga tres-tapaentsiri.

<sup>22</sup> Eejatzi rirori ikimiteeyakani maawaeni rirentzini. Tektsi tzimakayeroni itomi. Roojatzi okamantaka roori tsinani.

<sup>23</sup> Inja aririka ipiriinteyaneeni kamaeyeentsirini, ¿ninkama agaeroni? Tema iinanteeyawitawoni maawaeni.

<sup>24</sup> Ikantziri Jesoshi:

—Tee piyotziro Iwaperite Tajorentsi, eejatzi tee piyotakotziri Tajorentsi, itajorentsiperotaki, tema rootaki pikompitantakawori iroka.

<sup>25</sup> Ikamaeyakini. Inja ipiriinteyaneeni eejatzi. Omaanta eero ragae eejatzi iina. Eero itzimae aakagaerini eejatzi. Aritaki roshiyapaeyaari ronampiri Tajorentsi jeekatsiri jenokinta.

<sup>26</sup> Iroñaaka nokamantemi: aritaki ipiriinteyaneeni kamatsiripaeni. Tema piñaanatakiro rojankinarini Moeseeshi. Okenkithatakotziro inchashimpoki, oponthowitaka omaanta tee othonka. Janta ikemakiro paerani Moeseeshi ikantziriri Tajorentsi: “Naaka Tajorentsi, ikantani ipinkatheeeyakinani Awaraama, Ijaaka, eejatzi Jakoovo”.

<sup>27</sup> Ñaakiro, eeniro rañi riroripaeni ishireki, roojatzi ikantani raapatziyari Tajorentsi. Rootaki pikompitantakawori pikenkithashiryaashitaka kamaki. Ñaakiro, eero athonkaperoyaani. Osheki pikompitaperotakawo eerori.

*Ikenkithatakotziro ikowakaaperotakaeri Tajorentsi  
(Mt. 22.34-40)*

<sup>28</sup> Eeniro jaga apaani iyotaantzirori Iwaperite Tajorentsi. Tema ikemakiri rirori. Riyotawakiri Jesoshi kameetha riyotaakiri saroseeyopaeni. Roojatzi rontsirokantapaakari rojampitapaakiri:

—¿litaka ikowakaaperoteeri Tajorentsi?

<sup>29</sup> Rakanakiri Jesoshi:

—Tema rojankinatakaeniro Moeseeshi paerani ikowakaaperoteeri Tajorentsi. Eenitatsi iroka rojankinatzirini: “Nojoriiyotzinkaritepaeni, pikemijanteeyenani. Riraga Tajorentsi, rirotaki Awinkatharite, apaniroeni ipinkatharitzi irira.

<sup>30</sup> Oshekiperio pinintashireperoteri, maawaeni pajankaneki, pikantyaani. Eejatzi pikenkithashiryaapiinteri”.

<sup>31</sup> Eekiro rojankinatatzinii kaminagaantsi, ikantziri: “Pikimita eeroka osheki pininta apaniroeni, eejatzi pikimiteeyerini maawaeni atziri osheki pinintaperooyerini”. Rootaki ikowakaaperoyakaerini.

<sup>32</sup> Ikantanakiri iyotaantzirori Iwaperite Tajorentsi:

—Jee, aritaki. Kyaaryootaperotaki iroka pikantakiri. Apaniroeni ikanta Tajorentsi, tekatsi paashini.

<sup>33</sup> Okameethataperotzi anintashireperoteri maawaeni ajanganeki, ak-enkithashiryaapiinteri. Eejatzi akimita aka aninta, eejatzi akimiteri maawaeni akaateeyinira, anintaperooyerini rirori. Rootaki ikowakaaperotakaeri Tajorentsi. Tee ro ikowaperote atayeniri tsimeripaeni.

<sup>34</sup> Ikemakiri Jesoshi, kameetha ikantakiri, ikantziri:

—Rooteentsi pipinkathateri Tajorentsi, ipinkathariwenantemiri rirori. Roojatzi ithawantanaka atziripaeni rojampitaneerimi eejatzi.

*Ikenkithatakotaa rirojatzi Rotyaantanewo Tajorentsi  
(Mt. 22.41-23.7; Rk. 20.41-47)*

<sup>35</sup> Riyotaantzi Jesoshi janta Tajorentsipankoki:

—Ikantzi iyotaantzirori Iwaperite Tajorentsi: “Riraga Rotyaantanewo Tajorentsi, icharineetenri Iraviiri”. ¿litaka ikanantari?

<sup>36</sup> Tema ro Ishire Tajorentsi jankinatakaeririni Iraviiri. Rojankinatakironi iroka: “Riraga Tajorentsi ikantziri Nowinkatharite: ‘Pijeeki jika nakoperoki, pikaatenia apinkathariteeyeni. Aritaki nowashironkagaeyerini maawaeni kijeyyawitakimirini’”.

<sup>37</sup> Tema ikenkithatakotzitarini Iraviiri Rotyaantanewo Tajorentsi, ikantziri: “Nowinkatharite”. ¿Tsika ikantyaari Iraviirini ipinkathateeri icharineetenri impaetatsiri ijeeiki?

Ari ikemaeyawakirini, ikimoshireeyanakini osheki piyotawentakariri. Ikanantakari iroka riyotakaakiri atziri riyote riraga Rotyaantanewo Tajorentsi kaari apatziro icharineni Iraviiri omaanta eejatzi rirotaki itajorentsite paeraniperororoña tekira ipokapaaki kipatsiki.

<sup>38</sup> Eejatzi ikantziri:

—Paamayaarira iyotaanteyyawitaworini Iwaperite Tajorentsi. Ikwashita rowaneenkarya, ikantakaaperotyaawo iithaari, ikinakinathanthanatzii takayero. Ikwaki iñaaperotashityaari atziri jaga nampsitsiki.

<sup>39</sup> Eejatzi aririka riyaatapiinte janta pankotsiki ipiyotantapiintarira joriyyopaeni, riyoyaapiintziro jeekamentotsi kameethaperotatsiri. Eejatzi aririka ipiyoteeyani atziri rowaeyani ikowaki rirori rojatekapaeya niyanki itsipatanteeyaaririni pinkatharipaeni.

<sup>40</sup> Rowashironkayiro kamatsiri oemi raapithatapiintziro maawaeni tzim-imotawitawori. Rojamantziro ikenkithatakayiri Tajorentsi, wero, wero.

Osheki ramatawitantzi, omaanta iinja rookeri Tajorentsi paamariki kaari tsiwakanitatsini.

*Rowaga ashironkaenkawo opakiri Tajorentsi maawaeni oorikite  
(Rk. 21.1-4)*

<sup>41</sup> Ari ijeekaki Jesoshi, imontetakawo rotetantapiintariri korikika riwetsikantyaaawori kameetha Tajorentsipanko. Raminaminthatziri osheki pokatsiripaeni, rotetziri iyorikite roteteeyapiintzinirira. Ipoki osheki ashagantzinkari, rotetapaaki oshekiperio iyorikite.

<sup>42</sup> Opokapaaki roori kamatsiri oemi ashironkaenkawo. Otetapaakiri roori apimerontakite oorikyaanikite, tee ipinaperowitya irika.

<sup>43-44</sup> Ikaemiri ryotaanewo, ikantziri:

—Kyaaryootaki iroka nokamantemiri: eechonkiini otetawitaka iroka ashironkaenkawo, omaanta iñaaperotakiro Tajorentsi okameethatzzi. Tema opakiri maawaeni tzimimatowitakawori: tekatsi iroñaaka amananantaneeya owanawo. Omaanta riraga ashagantzinkari, osheki roteteeyawitakan, omaanta tee iñaaperotziri Tajorentsi ikameethatzzi: tema oshekini iyorikite ikempoyaashitari.

## 13

*Inja ishekiroryagaetero Tajorentsipanko  
(Mt. 24.1-2; Rk. 21.5-6)*

<sup>1</sup> Roojatzi ishitowakaantanakari Jesoshi Tajorentsipankoki. Ikantziri apaani ryotaanewo:

—Iyotaanari. Paminero mapika riwetsikanteetawori Tajorentsipanko kameethatakari.

<sup>2</sup> Ikantziri Jesoshi:

—Piñaakiro tsika okantari iroka mapipanko. Antawo naawita, omaanta iinja ishekiroryagaetero, ookayitanakyaani jantapaeni mapi. Othonkaperotanakya pankotsi.

*Iñeeteri aririka othonkimateeyaa  
(Mt. 24.3; Rk. 21.7)*

<sup>3</sup> Roojatzi rareetapaaka tonkaariki owaero Oriiwomashi. Imontenampitapaakawo Tajorentsipanko. Riyaatakaneeentanakiri jantyaajeeni Jesoshi, Peetero, Jantyaako, Jowa eejatzi Antereeshi. Ari ijeekapaaki.

<sup>4</sup> Rojampitapaakiri:

—Pikamanteeyenani. Tsika okaateka ishekiroryaanteetyaawori maawaeni Tajorentsipankonta? Arima iinja omonkaatapaeyaarika ishekiroryaantyaawori, tsika nokantyaaka niyotantyaari?

*Inja rashironkagaeyani atziri  
(Mt. 24.4-8; Rk. 21.8-11)*

<sup>5</sup> Ikantziri Jesoshi:

—Kyaaryoowa, ramatawiteetzimikari.

<sup>6</sup> Enitatsi osheki pokatsini, ikante: “Naaka Rotyaantanewo Tajorentsi”. Ramatawitatapaakiri osheki atziri.

<sup>7</sup> Aririka pikemakoteri romanatawakaaka atziri, eejatzi pikemiri paashini kantatsini: “Romanatawakagaeyaaani atziri”. Omaanta eero pithaayi. Aritaki okantyaari iinja, romanatawakaapiintya, omaanta tekiraata omonkaata nopinkatharitapaeaari.

<sup>8</sup> Riraga atziri jeekatsiri paashinijatoki kipatsi romanatapiintanakiri atziripaeni jeekayitatsirini paashinikipaeni kipatsi. Eejatzi apaani jewawenantatsiri ragaayanakirini inampijatzipaeni romanatakayaari. Omoyekapiintayitanakyaani kipatsi, eejatzi itasheyapiinteeyanakini

osheki atziripaeni. Eekiro ryaatatyyee ikemaatsiteeyaawoni oetarikapaeni, rashironkaaperoeyanakyaani.

*Ikantziri Jesoshi: "Ikiijeyapiinterini aapatziyanari"*  
(Mt. 24.9-14; Rk. 21.12-19)

<sup>9</sup> Eejatzi ikantakiri Jesoshi:

—Paamawentya eerokapaeni. Paapatziyakina rootaki raanteetemiri iyotaawakaenchariki ikantakowentemi. Aririka piyaate janta pankotsiki ipiyotantapiintarira joriyopaeni, aritaki ipajapajeetawakimi, tak, tak, tak. Raanakimi janta ijeekinta jewawenantatsiri, eejatzi janta ijeekinta pinkathariperotatsiri. Aririka rayemi, roojatzi pikemijantakayeri rirori, rawijakotanteeyaari.

<sup>10</sup> Okameethatzi rityaawo ikemakoeyenani maawaeni atziri jeekatsiri kipatsiki nowawijaakotantzi, roojatzi nopolanteeyaa nopolinkathariperotapaaci.

<sup>11</sup> Aririka ragaetanakimi janta, aririka ikantakowenteetemi, eero pikeneenthashirya: “¿Oetaka nokanteriri?” Aritaki iyotaakimi Ishire Tajorentsi oetarika pikanteriri. Rootaki ñaawaetaakaemini, tee eero ka ñaawaetashitachani apaniroeni.

<sup>12</sup> Inja apaani shirampari kaari aapatziyana raakaanteri rirentzi aapatziyanari, rowamaakaanantyaariri. Paashini raakaanteri itomi aapatziyanari. Eejatzi paashini atziri ikijanakiri ashitariri, rowamaakaanteri.

<sup>13</sup> Paapatziyakina, rootaki ikijanteetemiri maawaeni. Kyaaryo, opomeentsitzimoeyemini, omaanta aririka pikantyaani pameentaperotena, aritaki nowawijaakoteemi.

*Inja opomeentsitaperotanakya janta Joreeyaki*  
(Mt. 24.15-20; Rk. 21.20-23)

<sup>14</sup> Eejatzi ikantziri Jesoshi:

—Aririka piñaanatero rojankinarini Intañeri, piyotawakiro ikantzirini: rashironkagaeyanakyaani atziri. Ikantzi eejatzi eenitatsi Tajorentsipankoki oonariri Tajorentsi, rootaki maawaeni atziri rookantanakawori Tajorentsipankoki. Aririka pijeechi Joreeyaki, eejatzi piñeeririka riraganki, pithaakyaate, pishiyeeyanakini janta tonkaariki.

<sup>15</sup> Aririka pijeechi pankotsiki inkokironta, eero pikyaapanata paantayita-panaatyaworini oetarikapaeni, inta pishiyanaki.

<sup>16</sup> Eejatzi piyaaterika owantsiki, eero pipiyapanaata paapanaatero pitthaari.

<sup>17</sup> Aririka omonkaatapaakya maawaeni iroka, ooo, osheki ashironkayitanakyaani motzitayitatsirini, eejatzi ashironkaakya thotayiriri eentsite: opomeentsitzimoeyawonni oshiye.

<sup>18</sup> Pamaneri Tajorentsi areetya iroka owashironkagaantsika ojarentsipaeteki kameetha pishiypaeroeyantanakyaarini eero opariyi inkani raawakimikari kijeyemirini.

*Raamawentakagaeyakarini Jesoshi ikantziri: "Ramatawitzimikari"*  
(Mt. 24.21-26; Rk. 17.22-24, 21.22-24)

<sup>19</sup> Eenitatsi eejatzi ikantziri Jesoshi:

—Aritaki inja rashironkaaperoeyanakyaani osheki atziri. Paerani tee ñañaapiintzironi kimityaawoni iroka, eejatzi riraga maawaeni itakaantaworini, tee ifiiironi. Eejatzi maawaeni impaetaryitsini, inja eero ifiiiro eejatzi kimityaawoni iroka.

<sup>20</sup> Tee ishinetziro Tajorentsi ojamanite iroka owashironkagaantsi: rooma aririkami ishineteromi, ari ithonkawakaeyakaanimi. Rooma romaeerintakiro, tema ikaminttheeyakaenii aakapaeni aapatziyeeyaririni, riraga riyoayaitakirini rirori.

<sup>21</sup> Aririka ikamanteetemi: "Pamine, irira rotyaantanewo Tajorentsi", eero paapatziyari. Eejatzi aririka ikanteete: "Irira", eero paapatziyaperotari, itheeyashita.

<sup>22</sup> Ipokapaaki amatawitatantsini, ikantapaaki: "Naaka Jesokirishito, naaka kamanantzirorini iñaani Tajorentsi". Itajorentsijeempiyaashita-paakya, ikoyi paapatziyawakaari, rantayitemironi kaari piñaapiintzi. Ikwawita ramatawiterimi aapatziyeeyaririni Tajorentsi, omaanta tekatsi ikanteri.

<sup>23</sup> Paamawentya. Neewatzitakimiro nokamantaperoeyakimironi maawaeni.

*Riraga Jesoshi ikamantakotaa ipiyanteeyaaari  
(Mt. 24.29-31; Rk. 21.25-28)*

<sup>24</sup> Eejatzi ikantziri:

—Aririka ipakaakiro ikijawakagaeyani, roojatzikya itsiteniityaantanakya oorya, eero ikimitanaa ikimitaaka iroñaka. Eejatzi eero ikitamashitanee kashiri.

<sup>25</sup> Eejatzi ipariyagaantanaki ompokiropaeni, ipoñaakya jenoki, ishewashe-watashtanakya paashinipaeni.

<sup>26</sup> Naaka poñaachari jenokinta, nokoñaatapaaki jaka kipatsikika: iinja iñeyawaenani atziri nokinapae menkoriki. Notajorentsiperotapaaki, nopolinkatharitapaaki.

<sup>27</sup> Eejatzi notyaanteeeyerini nonampiripaeni ipiyoteeyerini maawaeni aapatziyeeyanarini. Ipoñaayitanakyaani maawaeni kipatsikipaeni.

*Roshiyakaawentziniri Jesoshi iyeera  
(Mt. 24.32-35; Rk. 21.29-33)*

<sup>28</sup> Eekiro ryaatatyee ikantziri:

—Enitatsi iroka piyotantyaawori oshiyakaawentaantsika iyeera. Owakirika oshookaempkekitanee, aririka otzimanee oshi, piyotaki rootaatsi ojarentsitee.

<sup>29</sup> Eejatzi, okimita, aririka piñeyawakironi maawaeni iroka nokamantyatikimirini, piyotanaki okaakitapaana, rooteentsi nopolashitaatemi.

<sup>30</sup> Kyaaryootaki iroka nokamantzimiri. Tekira pikamaeyeni eerokapaeni, omonkaatapaakya maawaeni iroka nokamantzimiri.

<sup>31</sup> Aritaki othonkaeya maawaeni kipatsi eejatzi ithonkaeya maawaeni jenokijatzi: kashiri, oorya, ompokiropaeni, maawaeni. Omaanta noñaani, eero othonkanita.

*Aamagaeyaari Jesoshi: tee ayoteeyini tsikarika okaate ipokanteeyaaari  
(Mt. 24.36-51; Rk. 21.34-36)*

<sup>32</sup> Eeritatsi eejatzi ikantziri riraga Jesoshi:

—Tekatsi yotsini tsikarika okaate kitejiri eejatzi tsikarika ikaate oorya; tee riyyoti ronampiri Pawa, eejatzi naari tee niyotzi. Apatziro Pawa yotsi.

<sup>33</sup> Paamawentya, eejatzi paamagaeyenani. Tee piyotzi tsika okaate nopolanteeyaaari.

<sup>34</sup> Noshiyakaawentemiri atziri, jatatsiri inteea. Aririka rookanakiro ipanko, ikanteeyanakirini maawaeni ronampiripaeni iitarika ranteeyeniririni. Eejatzi rirori riraga jeekakaeyiniriri ipanko ikantanakiri rirori: "Paamagaenaga".

<sup>35</sup> Rootaki nokanteeeyantzimirini: paamagaeyenani eerori. Tee piyotzi tsika okaata nopolanteeyaa: aririka itziroryaanee oorya, aririka niyankite tsiteniri, aririka iñee tyapa, aririka okitejiytaanaki nopolae.

<sup>36</sup> Kyaaryoowa, paamaaperoeyenani. Aririka nopolae, nomapoka-paemikari. Noñaapaemikari, maashiretakimi.

<sup>37</sup> Iroka nokantzimirika, rootaki nokanteeeyakiririni maawaeni atziri. Paamaaperoeyenani, maawaeni.

## 14

### *Ikowaeyakini joriiyopaeni raakaanteri Jesoshi (Mt. 26.1-5; Rk. 22.1-2; Jowa 11.45-57)*

<sup>1</sup> Okaatapaaki apite kitejiri omonkaatantyaari kitejitalsiri rawijantari ronampiri Tajorentsi janta Ejiipitoki paerani. Iroka kitejiri tee rowapi-pintawo tapyachari paa, inta kaari tapyachacha. Ari ikowaki jewatayitziririni ñaanakowenantatsiri eejatzzi iyotaantzirori Iwaperite Tajorentsi tsika ikan-teriri ramatawiteri Jesoshi raantyaariri. Aritaki ikowaperotawita rowa-maerimi Jesoshi.

<sup>2</sup> Ikantzi:

—Eero aantari kitejiri rawijantarini ronampiri Tajorentsi: ikijakowentee-yarinikari atziripaeni.

### *Apaani tsinani ojeetziri Jesoshi kajankaari (Mt. 26.6-13; Jowa 12.1-8)*

<sup>3</sup> Ikantaka Jesoshi ijekakki Wetaaniyaki, janta ipankoki Shimo pathaawitacharini. Osheki owaeyacharini janta. Opokapaaki tsinani, amakotapaakiro kajankaari. Iyoshaaka owaa naariwo osheki owinawo. Okameethaperotzi ojeekantari, ro riwetsikaetziri mapi iitachari arawaashitoro. Okagaakotapaakiniri, ojeetantapaakari iitoki.

<sup>4</sup> Ijeekaeyini apaanipaeni kijaperoeyakirorini. Ikantawakaanaka rirori:  
—¿litaka iroñaaka eewanatantakawori iroka kajankaarika?

<sup>5</sup> Arimi opimanteromi, aantakyaawomni osheki koriki, roojatzikya opayi-terinimi ashironkayitacharini.

Tee inimoeyanakirini okaatzi antakiri,

<sup>6</sup> omaanta ikantzir Jesoshi:

—Eero pithañaakotawo. ¿litaka pikijantawori? Okameethaperotzi ojeetakina.

<sup>7</sup> Aritaki ikantani ikaatzimikya osheki ashironkaenkari. Aririka pikowaki petakotyaari, aritaki pimatakiro pipakiri. Omaanta naaka, eero nokantani notsipateeyemini. Eero oshekitzi kitejiri pineshironkatantanakinari jaka kipatsiki.

<sup>8</sup> Tee omatayitzironi oetarikapaeni, omaanta ojeetakina naaka. Tema ajeetapiintziri kamatsiri, omaanta tee riyotakotya. Omaanta iroka tsinanika itakina ojeetakina, eeniroka nañi. Iyotakina nokame paata.

<sup>9</sup> Kyaaryootaki iroka nokamantemiri: tsikarika ikamananteeyeroni atziri noñaani, eejatzzi ikamantakoetero iroka tsinanika oetarika antakiri, ikenkithashiryaaakoeyantyaaworini.

### *Ikenkithashiryaaaka Joorashi raakaanteri Jesoshi (Mt. 26.14-16; Rk. 22.3-6)*

<sup>10</sup> Eeniro irira Joorashi karyootejatzi, rirotaki riyotaanewo naawita Jesoshi. Ikantanaka riyaatanaki apaniroeni janta ijekinta jewatayitziririni ñaanakowenantatsiri, ikantakotziri Jesoshi raakaanantyaariri.

<sup>11</sup> Ari ikemaeyawakirini riroripaeni ikantapaakiriri, iki-moshireeyanakini, ikantawakiri: "Kameethataki: osheki nopinatemikoriki iroñaka".

Roojatzi ikenkithashiryaanaka Joorashi: "¿Tsika nokanterika naakaanantyaariri Jesoshi? ¿Tsika okaateka?"

*Rotyaanantakariri riraga Jesoshi riyotaanewopaeni ramine tsika rowaeyaani*

(Mt. 26.17-19; Rk. 22.7-13)

<sup>12</sup> Monkaatapaaka kitejiri rowaeyantaworini paa kaari tapiyacha. Eejatzi rowamaakiri owisha rowaeyaarinikitejiriki ikenkithashiryapiintziro rawijantariri ronampiri Tajorentsi paerani. Ikanta riyotaanewo rojampitziri Jesoshi:

—¿Tsika pikoyika nowojanteri owisha?

<sup>13</sup> Ari rotyaantziri riyotaanewo apite, ikantziri:

—Piyaate Jerojareeki. Aritaki pitonkiyotawakyaari shirampari, aatsiri iñaa chomoki. Poyaatanakiri rirori.

<sup>14</sup> Tsikarika janta ikyapae, aritaki piñaapaakiri ashitawori ipanko; rirotaki piñaanatapaakiri. Pikantapaakiri: "Ikantzii iyotaantatsiri: '¿Tsikama nojeekantapaakyaari nowakaantapaeyaariri niyotaanewopaeni owisha?'"

<sup>15</sup> Roojatzi roñagantawakimiro janta jenoki oshitamenkotanta antawo. Ari piwetsikero janta owanawontsi.

<sup>16</sup> Roojatzi ryaatanaki riyotaanewo janta, iñapaakiro iroka ikantakiriri, roojatzi rowojantapaakiro rowanawo.

*Ikantakotakiri Jesoshi aakaanterini*

(Mt. 26.20-25; Rk. 22.21-23; Jowa 13.18-30)

<sup>17</sup> Roojatzi itsiteniityaanaki oorya. Rareetapaaka rirori Jesoshi, itsipateeypaakarini riyotaanewopaeni.

<sup>18</sup> Ijeekaeyapaakini, rowaeyapaakani, ikantziri Jesoshi:

—Kyaaryootaki iroka nokamantemiri. Apaani akiyotanari iroñaka rirotaki aakaantenani paata.

<sup>19</sup> Rowashireeyanakaniriraga riyotaanewopaeni, ikantaki apaanipaeni:

—¿Naakama aakaantemini?

Eejatzi paashini:

—¿Naakama?

Eejatzi paashinipaeni rojampiteeyanakirini.

<sup>20</sup> Ikantzii Jesoshi:

—Tema rirotaki aakaantenani ochaantakotakinarika iroñaka nowajoneki.

<sup>21</sup> Naaka poñaachari jenokinta, nokoñaatapaaki jaka kipatsikika. Rooteentsi nokame. Aritaki omونکااتکا rojankinatakotziteetakinari. Omaanta ari rowashironkaakya riraga aakaantenani. Eerrikami ikoñatizimi rirori, eeromi raakaantanami, eejatzi eeromi ikemaaatsitawomi katsiri.

*Roshiyakaawenteeyakaeroni Jesoshi ikamawentakae aaka*

(Mt. 26.26-29; Rk. 22.14-20; Jowa 13.21-30; 1 Ko. 11.23-26)

<sup>22</sup> Eenirowaeyakaniraakiro Jesoshi paa. Ipaasonkitziri Iriri Tajorentsi, ikagaakiro, ipaeyakirini riyotaanewo. Ikantziri:

—Powaeyawoni iroka paa, oshiyakaawentzirori nowatha. Tema naaka kamawenteeyakimirini.

<sup>23</sup> Eejatzi raakiro pajoki awishoowaantsi oowa. Ipaasonkitakiri Tajorentsi, ipakoeyakirini, rireeyawakironi.

<sup>24</sup> Ikanteeyakirini:

—Iroka oshiyakaawentzirori nira. Napaatawenteri osheki atziri. Aririka nokamawentemi, piyoteeyakironi kyaaryo ikantakimiri Tajorentsi, rowawa-ijaakoymeni.

<sup>25</sup> Kyaaryootaki nokanteeyimirini. Eero iroñaaka napiiteero jaka kipatsiki nireero awishoowaantsi oowa. Aririka nojeekapae janta ipinkatharitzinta Tajorentsi, ari nirapaera eejatzi.

*Ikanteeyirini Jesoshi riyotaanewo: "Inja pookaeyaneenani"*  
*(Mt. 26.30-35; Rk. 22.31-39; Jowa 13.31-38)*

<sup>26</sup> Ari ithonkakiro rowaka, romampaawenteeyanakarini Tajorentsi, roojatzi riyaatanteeyanakan janta tonkaariki, oetachari Oriiwomashi.

<sup>27</sup> Ikanteeyakirini Jesoshi:

—Inja pookaeyaneenani. Aritaki rojankinatakotziteetakimini: "Rowama-gaeteri rriraga shentziriri owisha, roojatzi ikinashiwaetanakya rowishate".

<sup>28</sup> Omaanta, iinja nopiriinteerika nañaaga neewateeyanakimini janta Karireeyaki, ari piñeena.

<sup>29</sup> Ikantziri Peetero:

—Aririka rookaeyemini maawaeni paashini, inta naaka, eero nookimi.

<sup>30</sup> Ikantawakiri rirori:

—Kyaaryootaki iroka nokantemiri: iroñaaka tsiteniriki, tekiraatarika rapi-itakiroota iñi tyaaa, osheki pithaawanaki. Okaate 3 pikante: "Tee niyotziri Jesoshi".

<sup>31</sup> Omaanta ikantaperotzi Peetero:

—Eero nookimi. Atsipatawakagaeyaniroña akamaeyeni, eero nokantzi: "Tee niyotziri".

Eejatzi imonkaatawakaaka ikanteeyakirini maawaeni paashinipaeni.

*Ikenkithatakaeri Jesoshi Iririjanta Jethemaniiki*  
*(Mt. 26.36-46; Rk. 22.39-46)*

<sup>32</sup> Roojatzi rareeteeyapaakani janta Jethemaniiki. Ikanteeyirini riyotaanewo:

—Pijkeekayawakiniita jaka, nokenkithatakaawakiriita Pawa.

<sup>33</sup> Rirotakikya raanakiri Peetero, Jantyaako, eejatzi Jowa. Areetzimota-paakari ikenkithashiryaanaka, eejatzi osheki rowashiretanaka.

<sup>34</sup> Ikantziri:

—Osheki netakotanaka. Pijkeekawakiita jaka, pikakiterapa.

<sup>35-36</sup> Ari ishirinkaneentanaka eechonkiini jaga. Rotziwerowanaka kipatsiki, ikenkithatakaeri Iriri. Ikantziri:

—Pawa, eeroka matzirori maawaeni oetarikapaeni. Nokowawitaka powawijaakotenami iroka nokemaatsityaari, omaanta eero nantziro nokowawitari nanteri naari, inta nokowaki nantemiro pikowakaakinari eerori.

<sup>37</sup> Roojatzi ipiyanaa jaga ijekakira riyotaanewo. Iñaaapaatziri, imagaeyakini. Ikantapaakiri Peetero:

—Shimo, ¿maakimima? ¿Eeroma pamawetziro pikakite eechonkiini?

<sup>38</sup> Pikakite. Pamaneri Tajorentsi okantyaatakya aririka ikowaki iwinkatharite kamaari rantakayitemironi kaari kameethatatsi, eerokya panantawo. Kyaaryo pikowaperowitaka pantenrimi Tajorentsi ikowakaakimiri, omaanta tee pimatziro.

<sup>39</sup> Ipiyanaka eejatzi, ikenkithatakaapaeri Iriri roojatzi ikanteeri ikantakiriri inkaaganki.

<sup>40</sup> Ipiyapaa, iñeeypaaperini magaeyakini eejatzi. Osheki agaeyakirini iwochokini. Osheki ipashiwenteeyakani, tee riyotzi oetarika ikanteeyirini.

<sup>41</sup> Ipiyapiyataka riraga Jesoshi, okaatzi 3 ipiyanaaka. Roojatzi ipiyantapaaka ikantapaakiri:

—Eekiroma pimaatzi. Iroñaaka monkaatapaaka, rooteentsi ikentakotakaanteetena: rooteentsi rayena kaari aapatziyanari.

<sup>42</sup> Iroñaaka pipiriinte, thame aate. Oo, okaakitapaaki aakaantenani.

### *Ragaeyakirini Jesoshi*

(Mt. 26.47-56; Rk. 22.47-53; Jowa 18.2-12)

<sup>43</sup> Eeniro iñaawaetzi Jesoshi, ipokapaaki riraga Joorashi, rirowitaka riyotaanewo. Itsipateeyapaakarini iroñaaka osheki atziri. Ramaeypaakironi ichekamentopaeni eejatzi rompojamentopaeni wetsikachari inchato. Rioteeyakini rotyaantanewo jewatayitziririni ñaanakowenantatsiri, riraga rotyaantanewo iyotaantzirori Iwaperite Tajorentsi, riraga aataperoteenchari.

<sup>44</sup> Ikantziteeyakarini riraga Joorashi irirapaeni:

—Iroñaaka nokamantaperotemi piyotantapaakyaaariri Jesoshi: piñaakinarika nothowootapaakiri, rirotaki poerikapaakiri. Paanakiri.

<sup>45</sup> Ari ipokapaaki rokaakintapaakari. Ikantapaakiri:

—Iyotaanari.

Ithowootapaakiri.

<sup>46</sup> Roerikaeyapaakirini, shepik, ishirikaperotapaakiriroña ragaeyanakirini.

<sup>47</sup> Apaani riyotaanewo raanakiro ichekamento. Ithatziitakiri ikempita ronampiri iwinkatharite ñaanakowenantatsiri, thatzik.

<sup>48</sup> Ikanta Jesoshi iñaakiri okaatzi rantakiri riyotaanewo, ikantziri:

—¡Eero! Okanteekaata, poyaankaero pichekamento, ipiyatzimikari. Tema piyotzi maawaeni antawakaantawori ijawirite eejatzi rowamaanteetakari jawiri. ¿Tee piyotzi nokowakirkami, nokanterimi Ashitanari rotyaantearimi oshekinipero ronampiri piyakowentenanimi?

Roojatzi ipampitakiri ikempita, retsiyatatakotakiri.

Ari ikanteeyawakirini Jesoshi:

—¿Naakama koshintzi? ¿Litaka pamashitantanari pichekamento eejatzi pompojamentopaeni? Paashitanakina, eero noshiyapithatzimi.

<sup>49</sup> Aritaki maawaeni kitejiri notsipateeyawitzimini janta Tajorentsi-pankoki, niyotaantzimiri. Pikoyirika payena, paanakina. Iroñaaka omonkaataka okantzitakarini Iwaperite Tajorentsi.

<sup>50</sup> Riraga riyotaanewopaeni rookaeyanakirini, shiyeeyananaki maawaeni.

<sup>51</sup> Apaanikya ewankari oyaatawitanakariri Jesoshi. Tee ikithaatanakya, omaanta rapineetashitakawo iwashikawo. Roerikaetawitawakari,

<sup>52</sup> ithañaanaka rirori, rookanakiro iwashikawo, ishiyamerikitanaka.

### *Ikanteevini jewatatsiripaeni: "Okameethatzi ikame Jesoshi"*

(Mt. 26.57-68; Rk. 22.54-65; Jowa 18.12-14, 19-24)

<sup>53</sup> Ari ragaeyanakirini Jesoshi iwinkathariteki ñaanakowenantatsiri. Ipiyotawenteeyapaakarini maawaeni jewatayitziririni ñaanakowenantatsiri, aataperoteenchari eejatzi iyotaantzirori Iwaperite Tajorentsi.

<sup>54</sup> Riraga Peetero royaatakowentawitanakari Jesoshi, omaanta rookaneentanakiri inteenanta, roojatzi rareetantapaaka janta ipankoki iwinkatharite ñaanakowenantatsiri. Tee ikyapaaki rirori pankotsiki; ijekimotapaakiri onampirentsipaeni rakitsitapaakawo paamari.

<sup>55</sup> Ari inthomaenta ipiyotawentakari Jesoshi riraga jewatayitziririni jori-iyopaeni. Rojampiteeyirini atziri:

—¿Piñaakotakirima rantziri Jesoshi kaari kameethatatsi nowamaakaanantyaariri?

Omaanta tekatsi iñaakoteri.

**56** Ipokapaaki osheki theeyakotakariri, tee omonkaatawaka ikantayitakirini.

**57** Apaanipaeni katziyaneencha, itheeyakotashitakari, ikantzi:

**58** —Nokemaeyakirini Jesoshi ikantzi: “Inja noshekiroreero Tajorentsipango iroka riwetsikani atziri. Ari okaate 3 kitejiri niwetsikae naaka paashini Tajorentsipango, kaari riwetsiki rirori atziri”.

**59** Omaanta tee omonkaatawakaya ikantayitawitakarini.

**60** Ikatziyanaka niyanki riraga iwinkatharite ñaanakowenantatsiri. Rojampitakiri Jesoshi, ikantakiri:

—¿Itaka kaari pakantana? ¿Oetaka iroka ikantakotayitakimirini irika?

**61** Omaanta imaeeritaki, tee raki. Rapiitakiri riraga iwinkatharite ñaanakowenantatsiri:

—¿Eerokama Rotyaantanewo Tajorentsi naamagaeyarini, riraga Itomi Tajorentsi noñaaperotziri?

**62** Rakanakiri:

—Naaka. Kyaaryo pikantakiri. Inja piñeena nojeeki janta rakoperoki Pawa Tajorentsi, nokaateeyirini neewawenanteeyapaeni. Eejatzi piñaawaena nokinantapaeyaawo janta menkori, aririka nopyiee paata.

**63** Riraga iwinkatharite ñaanakowenantatsiri ikijanaka. Ikenkithashiryaaakotanakari Jesoshi ikantzimatakiri Tajorentsi, rootaki itzijagaantanakawori iithaari. Ikantanaki:

—¿Iroñaaka iitaka akowantyaara paashini kantakoterini?

**64** Pikemaeyawakirini iroñaaka okaatz ikanakiri, tema itheenkakiri Tajorentsi. ¿Tsika pikanteeyinika eeroka?

Ikantteeyanakini:

—Kyaaryo, eenitatsi rantani. Okameethatzi ikame.

**65** Eenitatsi apaanipaeni eewatayitziririni. Roojatzi ipashikapootakiri, eejatzi ikapojapootakiri. Ikantziri:

—Pikamantena iroñaaka ninkarika kapojapootakimiru.

Eejatzi riraga waairiyaapaeni ipajapooteyakirini.

### *Ikantz Peetero: “Tee niyotziri Jesoshi”*

(Mt. 26.69-75; Rk. 22.55-62; Jowa 18.15-29)

**66** Eeniyo ijekki rirori Peetero janta inkokironta pankotsiki rakitsita. Opokapaaki apaani ronampiri iwinkatharite ñaanakowenantatsiri.

**67** Ofaaapaakiri Peetero, rakitsita paamariki. Otsikanatapaakari, joreririri, okantapaakiri:

—Eeroka tsipatariri riraga Jesoshi najareetejatzi.

**68** Ithaawanaki, ikantanaki:

—Tee, tee niyotzir oetarika pikantziri. Tee nokemimi eejatzi.

Roojatzi ryaatanaki ashitakontsiki shiirkoki. Iñaanaki tyappa.

**69** Apiiteeri oñaagaeri onampirentsi. Okanteeyirini maawaeni okaateeyakinira:

—Riotaki irika tsipatariri Jesoshi.

**70** Eejatzi rapiiteero Peetero, ikantziri:

—Tee niyotziri.

Ari ojamanitapaentzi eechonkiini. Roojatzi ikantziri irikapaeni katziyati-teencharini:

—Kyaaryooperotaki. Eerokataki tsipatariri Jesoshi, eerokataki karireeyajatzi.

**71** Ikantaperotanaki:

—Tee niyotziri riraga shirampari pikantakinari. Riyotzi Tajorentsi kyaaryo nokantaki: notheeyakyaarika, nokowaki rowashironkayenaata Tajorentsi.

**72** Rapiitakiro iñaanaki tyaaa. Ikenkithashiryaaneero Peetero ikantakiriri Jesoshi: “Tekiraatarika rapiitanakiroota iñaanaki tyaaa, okaate 3 pikante: ‘Tee niyotziri Jesoshi’”. Ari rowashiretanaka Peetero, roojatzi riraantanaka, jmmm, jmmm.

## 15

*Ragaeyanakirini Jesoshi Peraato*

(Mt. 27.1-26; Rk. 22.66-23.5; Jowa 18.28-40)

**1** Rooteentsi okitejiuyaanaki, rapiitakiro ipiyotawenteeyarini Jesoshi riraga jewatayitziririni ñaanakowenantsirsipaeni, eejatzi aataperoteenchari ee-jatzi iyotaantzirori Iwaperite Tajorentsi. Ikantakowenteeyakirini Jesoshi. Roojatzi roojoteeyakirini irira, raanakiri janta, ipapaakiri Peraato.

**2** Rojampitawakiri:

—¿Eerokama iwinkatharite joriiyopaeni?

Riraga Jesoshi rakanakiri:

—Pikantakiri eeroka kyaryoopero.

**3** Ikanteeyini jewatayitziririni ñaanakowenantsatsiri:

—Osheki rantayitakirini irika, tee ikameethatzti.

**4** Rapiiteeri Peraato, rojampitziri:

—¿Itaka kaari pakanta? Pikemawakiri osheki kantakotashiteeyakimirini.

**5** Tee raki Jesoshi. Riraga Peraato tee riyotzi oetarika ikenkithashireeyarini.

**6** Ari eenitatsi rametari: maawaeni ojarentsi, aririka omonkaatapaeya kitejitsatsiri rawijantakiriri ronampiri Tajorentsi achariniuteni paeranipero Ejjipitoki. Roeyowapiintziri omonkyaaagarewo apaani ikowakagaeyirini atziripaeni.

**7** Eeniro iroñaka rashitakotaka janta atziripaeni kowayitawitacharini rookerimi pinkathari: iwaero apaani Warawaashi rirotaki owamaantaneri.

**8** Ari ryaatashiiyakirini riraga piyoteenchari, ikanteeyapaakirini Peraato:

—Nokoyi panteeyenawoni iroka pametari: poeyowaenari apaani pomonkyaaaganewo.

**9** Rakawakiri Peraato, ikantawakiri:

—¿Riroma pikowakiri noeyoyemiri riraga Jesoshi piwinkatharite?

**10** Riyotaki Peraato osheki iñaaperoeyirini atziripaeni Jesoshi, rootaki iki-jeeyantanakaririni ñaanakowenantsirsipaeni raakaantanakariri.

**11** Ari riraga jewatayitziririni ñaanakowenantsatsiri ikenkithayitanakini, ikanteeyakirini atziripaeni:

—Pikante: “Kaari Jesoshi”. Pikanteeyirini: “Riraga poeyowaeri Warawaashi”.

**12** Rapiiteeri eejatzi Peraato, ikantziri:

—¿Tsikama nokanterika iroñaka irika pipinkatheeeyawitakarini?

**13** Ikaemaeyanakini paashinipaeni:

—Pikentakotakaanteri koroshiki.

**14** Rojampitziri:

—¿Itaka rantakiri nokentakotakaanantyaariri?

Eekiro rapiitanaatzziro ikaemaeyanakini:

—¡Pikentakotakaanteri, pikentakotakaanteri!

**15** Ikowanaki Peraato ikimoshiretakagaeyeerini riraga atziripaeni, rootaki roemishitowantaariri Warawaashi. Omaanta Jesoshi ipajatakaantakiri, roojatzi raakaantakiri ikentakotakaantakiri.

*Ishirontawenteeyakarini riraga Jesoshi*

(Mt. 27.27-31)

**16** Roojatzi irira joraaropaeni raanakiri Jesoshi inthomaenta ipankoki Peraato, ari okaankiityaaaneentzi eechonkiini. Owaeronta rowaga pankotsi peretooryo. Riraga joraaropaeni ikaemaeyakirini maawaeni paashinipaeni.

**17-18** Itheenkaeyakirini, ishirontawenteeyakarini, ikantziri:

—Erokatakima iwinkatharite joriiyopaeni? Iroñaaka naari noñaaperotemi. Ari ikanteetakiriri iroñaaka Jesoshi, tema rantaminthatakiri rootaki roshiyakaawenantakariri apaani jewawenantatsiri. Raatonkoryaagae-takiri Jesoshi, ikithaateetakiri kityonkamawoneentatsiri. Ragaetakiniri kitochee, riwetsikaetakiniri ikimitakaanteetakiniri amantheerentsi roojatzi ramantheetakaantakari.

**19** Rotziwerowashitakari, ifñaaperajeempiyaakari, roojatzi rompojantakari chonkopishitonki iitoki eejatzi reewapooteeyakirini.

**20** Ari osheki rantaminthatakiri, roojatzi reshitapaakiri. Roojatzi raatonkoryaakiri ikithaawitakariri kityonkamawoneentatsiri, ikithaateeri iitharipero rirori. Roojatzi raantanakari ikentakoteetantyaaariri antawokotaki koroshi.

*Ikentakoteetantakariri riraga Jesoshi*

(Mt. 27.32-44)

**21** Roojatzi joraaropaeni raanakiri Jesoshi. Niyanke awotsi iñaakiri shirampari iwaero Shimo rirotaki iriri Arejaantero eejatzi Roojo. Owakira ijeekapaaki Jerojareeki ipoñaakawo paashiniki nampitsi iitachari Shireene. Romperatawakari iroñaaka, ikantakiri:

—Pinatanakiniri Jesoshi iroka koroshi.

Ikanta Shimo inatanakiro, raanakiro.

**22** Ari ragaeyanakirini Jesoshi janta tonkaariki oetanta Koorikota. Rootaki iitantawori tonkaari oshiyakawo iitonaki atziri.

**23** Ari ipakowitzakari kepishaari, eero ikemaatsiperotantawo katsiri, inta tee rirawakiro Jesoshi.

**24** Roojatzi ikentakoteetakiri Jesoshi rakokira eejatzi iitzikira, rowatzikakoteetakiriri kipatsiki. Ikanta irikapaeni joraaro, raakiro iithaari. Roojatzi rookayitzironi mapyaaniki. Ro riyotantyaaari ninkarika ayeroni iithaari. Eejatzi rapiitakiro riyotakoeyeroni mapi roojatzi raantanakayaawo maawaeni okaatzi ikithaayitariniri rirori.

**25** Jenokiityaapaaki oorya, ikentakoteetantakariri.

**26** Roojatzi raaki paashini inchakota owaanini, rojankinateetakiro jankinarentsi okantzi: “Rirotaki jewawentziriri joriiyopaeni”. Rootaki rojankinatantakawori, riyoteetantyaaari iitarika rowamaanteetakariri. Iken-takoetakiniri jeñokiini ipatzitoki Jesoshi.

**27** Iroñaaka eeniro ikaatzi apite koshintzi ikentakoteetakiri eejatzi, ari itsipatakari Jesoshi. Apaani rowatzikakoteetakiniri rakoperoki, irira paashini rowatzikakoetakiniri rampateki.

**28** Rootaki omonkaatantakari jankinarentsi Iwaperiteki Tajorentsi kantatsiri: “Ikimitakaanteetyaari kaari kameethatatsi”.

**29** Ari rawijayitzini iroñaaka osheki atziri, osheki itheenkimawaetakiri Jesoshi, osheki ishirontawentari, ikanteeeyirini:

—¡Oo! Eeroka shekiroreeronimi Tajorentsipanko, ro awijawitakya 3 kitejiri ari piwetsikaeromi eejatzi.

<sup>30</sup> ¿Arima pitajonkantashiwaeta? Intsipaete, pitajonkakowentya eeroka: payiitee iroñaaka ikentakoetakimira koroshiki.

<sup>31</sup> Roojatzi ipokantapaaka eejatzi irikapaeni jewatayitziririni ñaanawanentatsiripaeni eejatzi iyotaantawitarori Iwaperite Tajorentsi. Ishirontawenteeyakarini, ikantawakaeyananaki:

—Paminerri irikakya, riowitaka owawijaakotziriri paashini atziri, tee imatziro rowawijaakotyta riori.

<sup>32</sup> Eerokawitaka Rotyaantanewo Tajorentsi, jewawenantawitariri ajoriyy-otzinkaritepaeni. Aminamatsitawakiriita aririka rayiitee koroshiki. Aririka añaakiri, thame aapatziyari.

Eejatzi ikimitakari riori tsipatakariri Jesoshi ikentakotaka, itheenkakiri eejatzi.

### *Ikamanaki Jesoshi*

(Mt. 27.50-56; Rk. 23.45-49; Jowa 19.30-37)

<sup>33</sup> Ikaataki oorya tampatsika, omapokashitapaaka otsitenitanaki maawaeni kipatsi. Tee añaaneeri oorya. Okaatzi ojamanitapaentzi 3 oora. Roojatzi rooryaantanaa.

<sup>34</sup> Roojatzi ikaemantanaka antawo Jesoshi ikantzi ipaanteki rashí:

—Eroe, Eroe, ¿raama jawaataní?

Rootaki akantziri aaka apaanteki: “Notajorentsíte, Notajorentsíte, ¿iitaka pookantanari?”

<sup>35</sup> Ikemantawakariri apaanipaeni jeekaneentsiri ikantzi:

—Pikemiri, ikaemiri Iriiyashi.

<sup>36</sup> Ari ishiyanaka atziri, rowiinkapaakiniri kepishaatatsiri piyonkashinkanari. Rojatakiniri jawookiikira. Ipawitari ratsimiyawakiromi. Ikantziri katziyayiteencharinipaeni jaga:

—Ari ikantawakaata: aminawakiriita aririka ipokashitapaakiri Iriiyashi rayiitashitapaakiri.

<sup>37</sup> Antawopero ikaemanaki Jesoshi, kamanaki.

<sup>38</sup> Eenitatsi janta Tajorentsipankoki antawo tokoya, tontarini, ashitako omooki. Itanakawo jenoki, otzijagaanaki waaaag, roojatzi jaawiki. Thatzii. Apitemankitanaka.

<sup>39</sup> Eeniro imontetakari itzinkami joraaro. Iñaawakiri tsika ikantanakari Jesoshi ikamantanakari. Roojatzi ikanantanaka:

—Kyaaryoopero: rioperotaki irika shirampari Itomi Tajorentsi.

<sup>40</sup> Eeniro apaanipaeni tsinani ojeeki inteenapaeni aminayitzini. Okaa-teyakironi Mariiya makaraarajato, eejatzi ojameto, Mariiya rootaki riniro Jantyaako eejatzi paashini Josee. Jantyaako impaerintzi ikonaatzi. Eejatzi okaateeyironi Jaromee.

<sup>41</sup> Eeniro ijeekwitaní janta Karireeyaki oyaateeyirini maawaeni iroka-paeni tsinani amitakotziriri. Iroñaaka ojeeki jaka osheki paashinipaeni tsinani. Itonkaantanakari Jesoshi janta Jerojareeki, oyaateeyanakirini.

### *Itaka ikantakiriri Jesoshini*

(Mt. 27.57-61; Rk. 23.50-56; Jowa 19.38-42)

<sup>42</sup> Itsiteniityaanaki oorya. Ro kitejitalsini inkaamani imakoryaantee-yarini, tema iroñaaka riwetsikaeyironi oetarika ashi inkaamani.

<sup>43</sup> Eeniro Josee, riraga poñaachari Arimateeyaki. Aritaki ikaateeyirini riraga iyotaawakagaeyacharini. Iñaaperoteeyirini atziripaeni riori. Raamaari

Tajorentsi rirori ikowaki reewawenteri. Iroñaaka ishirampariperotanaki Josee, ryaatashitanakiri Peraato, ikantapaakiri:

—Nokoyi pishinetenari naaneeri Jesoshini.

<sup>44</sup> Itzimaetyaashitanaka riraga Peraato. Ikenkithashiryaaanaka: ¿Okyaryootzitanakyama, intsipaete ikamanaki Jesoshi? Ari ikaemakaantakiri iwinkatharite joraaro. Rojampitawakiri:

—¿Kyaaryooma? ¿Kamaperotanakima Jesoshi?

<sup>45</sup> Ikantziri:

—Jee, kamaperotaki.

Roojatzti rotyaanantakari Josee roytakoteeri jaawikira Jesoshini.

<sup>46</sup> Ramanantaki Josee tokoya. Roytitakiri Jesoshini rapineetakotakiri. Romaryakiri omooki, janta imoonteetzironta impeeta. Ipinaashitakiri antawo mapi omooki.

<sup>47</sup> Oñaakoperotakiri Mariiya makaraarajato tsika rowakiri. Otsipatawo ojameto, rowaga riniro paashini Josee.

## 16

### *Ipiriintanaka Jesoshi*

<sup>1</sup> Awijanaki kitejiri imakoryaanteeyarini. Roojatzti amananantanakari tsi-nani kajankapaneri, otziritanteeyaririmy Jesoshini. Ro owaeropaeni roori tziriterinimi Mariiya makaraarajato, eejatzi roori okaatziro ojameto riniro Jantyaako, eejatzi roori Jaromee.

<sup>2</sup> Ari okitejiityaanaki iyaatzi janta omooki rotetawitakarinta Jesoshini. Rootaki tominko iyaatantakari. Ari ijenokitapaaki oorya, roojatzti areetan-tapaaka.

<sup>3</sup> Okantawakaeyanakan:

—¿Ninka pinagaenironika rowaga mapi ashitantari? Antawoni, eero aawiros aaka.

<sup>4</sup> Aminapaaki, oñaapaakiro rowaga mapi antawo, pinaanaka ashitaryaanaka.

<sup>5</sup> Okyaapaaki omooki janta rowawitakarinta. Tee oñaapaeri Jesoshini, omaanta irira oñaapaaki apaani shirampari jaga. Ikithaatua kithaarentsi kitamaaripero. Otsinkashiryaaanakiro irowapaeni oñaapaakirira ijeki.

<sup>6</sup> Ikantawakiro:

—Eero pithaayi. Riro paminawitari riraga Jesoshi najareetejatzi, riraga ikentakoetakiri. Piriintanaa, tee añaagaeri jaka. Jatee. Paminerotya rowawi-itakarika.

<sup>7</sup> Piyaatee iroñaaka pikamantapaeri Peetero eejatzi paashini ryotaanewopaeni. Pikantapaakiri: “Reewatanakimi janta Karireyayki, aritaki piñaapaeri janta. Tema aritaki ikamantzitakimini paerani”.

<sup>8</sup> Ari intsipaete iyowanee, oshiyanaka. Ompetatanaka, osheki otsinkashiryaaanakiro. Othaawanaki, rootaki kaari okamanantari atziri otokiyotakari janta awotsiki.

### *Oñaagaeri Mariiya Jesoshi*

*(Jowa 20.11-18)*

<sup>9</sup> Rootaki ipiriinantaari Jesoshi tominko. Ro ritaperotaari roñaagaawo Mariiya makaraarajato. Rootaki paerani ikyaatantawitakawo 7 kamaari, omaanta retsiyatakotakironi.

<sup>10</sup> Roojatzikya iyaatantanaka roori okamantapaakiri riraga itsipateeyawitarini Jesoshi. Roojatzti rowashiretakoeyawitarini, eejatzi eeniro ri-raakoeyawitarini.

<sup>11</sup> Roojatzi okamantawitapaakari:  
—Piriintanaa Jesoshi, noñaagaeri.  
Tee raapatziyawakawo.

*Iñaakiri apite riyotaanewo Jesoshi  
(Rk. 24.12-35)*

<sup>12</sup> Roojatzi ipaashinipootanaki ipookira Jesoshi, roñaagapaari apite riyotanewoni ranashiiyani janta awotsiki.

<sup>13</sup> Ari ipiyanaa irika ñaakiriri, ikamantapaakiri paashinipaeni. Eejatzi ikimitawakiri, tee raapatziyawakari.

*Ikenkithatakagaeyirini Jesoshi maawaeni riyotaanewo  
(Mt. 28.16-20; Rk. 24.36-49; Jowa 20.19-23)*

<sup>14</sup> Ari rowaeyani riyotaanewopaeni, ikaateeyini 11. Roojatzi roñaagaeyantapaaririni Jesoshi. Ikanteeyapaakirini:

—Tema nokamtitzakimini ari nopersiintee: ¿iitaka kaari paapatziyantana? Tema tee añiiro pikenkithashiryäantari. ¿litaka kaari paapatziyantari ñaakinari inkaaganki?

<sup>15</sup> Piyaateeyeni pithotyaanakiro maawaeni kipatsi. Pikamanteeyerini maawaeni atziri tsika ikanteeya rawijakotanteeyaari rirori.

<sup>16</sup> Ninkarika aapatziyawakyaawoni rowaga pikamantakiriri, roojatzi raapatziyantawakyaari Tajorentsi ari ikaawoshitawentanakyaari irira tema aritaki rawijakotee. Rooma riraga kaari aapatziyawakyaawoni ari rawashironkaaperoteri Tajorentsi rirori.

<sup>17</sup> Tsikarika piyaateeyeni, itajonkakowentemi Tajorentsi, riyoteeyantyaarini atziri kyaaryootaki iroka pikantakiriri. Nomatakayemiro petsiyatakantyaariri kyaantariri kamaari. Piyotayiteroni paashinipaeni ñaagantsi pikenkithatakantenari.

<sup>18</sup> Aririka poerikawityaari maanki, aririka ratsikawitemi, omaanta eero rowamaemi. Eejatzi, aririka piraakowityaawo piyantatsiri, eero owa-maemi. Eejatzi, aririka pipampiteri mantsiyatatsiri eejatzi pikantakowenti, ari rawijakoeyeeni.

*Ithonkapakiro Marikoshi rojankinari  
(Rk. 24.50-53)*

<sup>19</sup> Rootaki ikanteeyakiririni Awinkatharite Jesoshi, roojatzi roenokantanaa jenokinta, ijekapae janta rakoperoki Tajorentsi, ikaatapaeri ipinkatharitapae rirori.

<sup>20</sup> Ari riyaateeyanakini riyotaanewopaeni. Ikinakinayitanakini, ikamanantayitanakini tsikarika ikinayitanakini. Kijokiro rowakiri Awinkatharite, ramitakoevirini. Eejatzi itajonkantayitakini, riyoteeyantakarini atziripaeni kyaaryooperotaki ikamanteeyakiririni. Aritaki okantaperotari.

Ari okaatzi.

Naaka jankinatzirori:

Marikoshi

## ROOKASHI ROJANKINATAKOTAKIRI JESOKIRISHITO, TSIKA IKANTA ROWAWIJAAKOTANTZI

**1-4** Naaka Rookashi nokoyi niwethatemi eeroka Teyoojiro tsikarika pikanta pijkeeki. Iroñaaka nokoyi nokenkithatakoteri Jesokirishito. Ikaateeyakini osheki jankinatakoeyakiririni, ikamantakotayitakironi okaatzi rantayitakirini. Ifeeyakirini, eejatzi ikemakoeyakirini, rootaki rojankinatakotantariri. Noñaanatakiro naari okaatzi rojankinatakiri, eejatzi nojampitakowentayitakironi rantayitakirini niyotakoperotantakawori, nothotyaakiro maawaeni. Iroñaaka nokamantemiro naari, nokowaki piyoperotero kameetha rantayitzirini Jesoshi, rootaki nojankinatantakimirori piyoperotantyaaworini kyaaryo rooperori okaatzi riyogaetakimiri.

### *Iriba Kawiriyeeri ikamantziri Jakariiyashi itzime itomi*

**5** Paerani, ipinkatharitantari Erooreshi janta Joreeyaki, eenitatsi eejatzi ñaanakowenantsiri Tajorents iitachari Jakariiyashi. Rivotaki icharineeteni Awiiyashini: aririka areetapaeya kitejiri rantawaetantyaanariri Tajorents janta Tajorentsipankoki ikaateeyirini isheninkathoripaeni rashi rirori riraga icharineetenipaeni Awiiyashini. Owaero iina Erijaweeda, rivotaki ojariitepaenini Awoonoi eejatzi.

**6** Riraga Jakariiyashi rivotaki aapatziyariri Tajorents, eejatzi iina rootaki aapatziyariri. Ikantani rantayitakironi okaatzi ikaminaakiriri rirori, rootaki riyooteeyantakaririni atziri ikameethataki. Tekatsi okantya ikantakowenantyaariri.

**7** Omaanta tee itzimi reentsite: amashithakitya iina, eejatzi imonkaatawakagaeyakanri rantyashipariteeyakini.

**8** Okantaka omongaatapaaka kitejiri rantawaetakaanteeyaririni isheninkathoripaeni, eejatzi riraga Jakariiyashi.

**9** Rameteeyawoni riyoaaapiintzi apaani ñaanakowenantsiri rotyaanteri inthomaenta Tajorentsipankoki itaantyaanariri Awinkatharite kajankapaneri. Ikanteeeyakirini isheninkathori rirori:

—Iroñaaka eeroka niyoyaakimpiyaate inthomaenta janta, pitayeniri Awinkatharite kajankapaneri.

**10** Ikanta ikyaanaki inthomaenta, omaanta paashini piyoteeyeencharini oyakiriri inkokironta, ikenkithatakagaeyirini riraga Tajorents.\*

**11** Janta inthomaenta, romapokakiri ronampiri Awinkatharite, ikatziyimotapaakari rakoperoki okaakini aritaari itaakirowa kajankapaneri.

**12** Iñaantawakariri rotsikanatanakari, tee riyotzi oeta ikantanakiri, eejatzi osheki ithaawanaki.

**13** Omaanta ikantakiri:

—Jakariiyashi, eero pithaayi. Eenitatsi pamanakotakiriri Tajorents; tema ikemakimi, rootaki otzimantyaari iinja piina pitomi. Piiteri Jowa.

**14** Osheki pikimoshirewenteri, eejatzi ikimoshirewenteeyerini osheki atziri aririka ikoñaatapaaki.

**15** Eejatzi iñaaperoteri Tajorents ikanmeethataki. Eero ririro awishoowaantsi oowa eejatzi inashitachari shinchaari. Ojeekantyaari

\* **1:10** Rameteeyawoni itaakirorka kajankapaneri, ramaneeyani.

Ishire Tajorentsi rajankanekira; tekiraata okoñaatziri riniro roojatzi ojekantzitari.

<sup>16</sup> Osheki raapatziyakagaeyaarini pijoriyyotzinkaritepaeni, ipinkatha-teyantyaaririni Tajorentsi, tema rirotaki irira Awinkatharite maawaeni.

<sup>17</sup> Ikimtyaari Iriiyashini, osheki iyotaakiri Ishire Tajorentsi, eejatzsi os-hintsitakaakiri. Reewatakiri Awinkatharite, ikamanteeyerineri isheninka-paeni raamagaeyaarini rirori, eejatzsi inintaperooyerini reentsitepaeni. Riyotagaeyerineri rirori raapatziyanteeyaariri Tajorentsi, ikimtyaari riraga itakaantaworini raapatziyarini. Riyotagaeyerini theenkantatsiri kameetha raapatziyaari rirori.

<sup>18</sup> Ikantakiri Jakariiyashi:

—¿Tsika nokantyaaka niyoperotantyaari kyaaryootakirika iroka pikantak-inari? Antyashiparitakina, eejatzsi noena, antyashipawotaki roori.

<sup>19</sup> Rakanakiri:

—Naaka Kawiriyeeri, kijokiro noyiri Tajorentsi. Rirotaki otyaantakinari nokamanantzimirorika iroka kameethatatsiri.

<sup>20</sup> Aritaki omonkaatakyka iroka nokamantakimiru, omaanta tee paap-atziyawo nokantawitakimirika, pitheenkakina. Iroñaaka pimajontzite, eero piñaaawaetanee roojatzi paata ikoñaatantakya pitomi.

<sup>21</sup> Eeniro janta inkokironta piyoteeyeencharini royaawitaari Jakariiyashi, ikanteeyakini:

—Ojamanitateekityaami ipeyaka. ¿Litaka kaari ishitowantaa?

<sup>22</sup> Roojatzi iñaaawaeri ishitowapae, tee imataneeya iñaaawaetanee, omaanta rookorookotashwietaaka. Roojatzi riyoteeyantanakan, ikanteeyanakini:

—Eenitatsi iñaaakiri janta inthomaenta. Tee iñaaawaetaantsiperotanee.

<sup>23</sup> Okaatzi 7 kitejiri rantawaetaki Tajorentsipankoki. Roojatzi ipiyanaa ipankoki rirori.

<sup>24</sup> Roojatzi omotzitaktaka iina, okempoyaaka opankoki. Ikaatzi 5 kashiri tee oshitowae.

<sup>25</sup> Okantzi:

—Paerani tee itzimawityaani notyomi, rootaki nopashiwenantakari, omaanta iroñaaka eero napiiteero nopashiwentaa. Ineshironkatakina Awinkatharite, tema ikameethaperotaki.

### *Irira Kawiriyeeri ikamantziro Mariiya itzimaki otomi*

<sup>26</sup> Okaatakotaki 6 owashirite omotzitaki Erijawera. Roojatzi rotyaanantakari eejatzsi riraga Tajorentsi Kawiriyeeri:

—Piyaate Najareeteki: jeekatsiri Karireeyaki.

<sup>27</sup> Pareetakityaawo tsinani owaero Mariiya, okashiyakari ayeri Josee, riraga icharineeteni Iravii. Omaanta tekira oshinetari shirampari.

<sup>28</sup> Ikantaka riyaatashitakiro riraga Kawiriyeeri. Romapokapaakiro ikan-tapakiro:

—¿Eeniromi, Mariiya? Nopokantari nokamantemi: piweshiryaanakya. Osheki inintashireperotakimi Tajorentsi, kijokiro rowakimi. Panaakotakiro maawaeni tsinani ikaminthaaperotzimi rirori.

<sup>29</sup> Omaanta othaawantawakari, okenkithashiryaanaka: “¿Litaka ikanantarnari?”

<sup>30</sup> Ikantapaakiro:

—Eero pithaawantana. Kyaaryo, ikaminthaaperotakimi riraga Tajorentsi.

<sup>31</sup> Rooteentsi pimotzite. Iinja pitzimeri pitomi, piiteri Jesoshi.

<sup>32</sup> Ipinkathariperote. Riyoteeyakirini atziri rirotaki Itomi Tajorentsi, riraga jeekatsiri jenokinta. Tema rirotaki Awinkatharite. Paerani riraga Iraviiрини ipinkathariwentawitarini ijoriyyotzinkariteni.

**33** Iinja ipinkatharite rirori eejatzi. Tema ikantziri Tajorentsi itomi: "Notyomni, eeroka pipinkathariwenteeyeririni maawaeni, pikanteetatyeyaaani". Aritaki ikantyaari ipinkathariwenante, eero ipakagaero.

**34** Okantawakiri:

—¿Tsika nokantyaaka itzimantyaari notyomi? Tekatsikya noemi.

**35** Rakanakiro:

—Irowa tzimakayemini Ishire Tajorentsi. Rootaki tajonkawentemini. Iinja ikantakoeteri pitomi: "Ikameethaperotaki, tee añiilo kaari kameethatatsi rantziri. Rirotaki Itomi Tajorentsi".

**36** Eejatzi nokamantemi: antyashipawoperowitaka roori pinatsito Erijaweera, tema ikanteetziro roori tee iyotziri otzimeri eentsite, omaanta okaatakotaki 6 owashirite iroñaaka omotzitaki. Iinja otzimeri otomi.

**37** Ñaakiro, tekatsi pomeentsitzimotaarini Tajorentsi, imateeyironi oetarika ikoyiri.

**38** Okantanakiri:

—Tema rirotaki Nowinkatharite. Inimotakina oetarika ikowakaakinari. Ikowakaakinarika itzimashitya notyomi, ari kameethataki.

Roojatzi ipiyantanaka riraga ronampiri Tajorentsi.

### *Jataki Mariiya areetyaawo Erijaweedra*

**39** Awijanaki apaanipaeni kitejiri roojatzi iyaatanantanaka rowaga Mariiya Joreeyaki. Oshintsitanaki iyaatananaki otonkaanaki tonkaariki.

**40** Areetapaaka janta ipankoki riraga Jakariiyashi. Oñaapaakiro Erijaweedra, okantapaakiro:

—¿Eeniromi?

**41** Rowaga Erijaweedra okemantawakawori Mariiya okaemapaaki, oke-matziiiri ishewatanaka eentsite omotzikira, mitzi. Eejatzi okyaatapaakawo Ishire Tajorentsi iyotaaperotakiro,

**42** roojatzi ocheraantanaka, okantziro:

—Tema ineshironkatakimi Tajorentsi, eejatzi ikimiteeyironi maawaeni tsinani; omaanta eeroka, panaakoeyakinani: ineshironkaperotakimi rirori. Tema eejatzi iñaaperotziri peentsite ikameethatzi.

**43** Eeroka ashityaarini Awinkatharite. ¿litaka pikenkithashiryaantanari pareetantanari?

**44** Pamine, nokemantawakimiri piwethatapaakina, ikimoshiryaanaki neentsite, ishewatanaka nomotzikiri, mitzi.

**45** Paapatziyaperotawakawo maawaeni ikamantakimiri Awinkatharite, rootaki ineshironkatantakimiri.

**46** Okantzi Mariiya:

—Tema ikameethaperotaki Awinkatharite,

**47** rirotaki Atajorentsite eejatzi owawijaakoeyeerini. Osheki noki-moshirewentakiri.

**48** ¿litaka ineshironkatantakinari naari? Naaka ashironkaenkawo, tekatsi niyotzi naari. Omaanta iroñaaka aripaete ikimoshirewentena maawaeni atziri.

**49** Osheki itajonkakowentakina, tema itajorentsiperotaki, ikameethaperotaki.

**50** Ikantatyeyaaani ineshironkaeyakirini maawaeni pinkatheeyiririni.

**51** Osheki itajonkantayitakini. Ithonkaeyeroni okaatzti ikenkithashiryaari maawaeni kantakaaperotzinkari.

**52** Imateeyakirini pinkatharitawitachari rookakaakiri ipinkathari-wenantawita. Omaantakya ashironkaenkari ipeyakiri pinkathari.

<sup>53</sup> Kimitaka ipakiri osheki oetarika riraga koetyeemotakariri, ari rotyaan-takiro Ishire iyoteeri atziri kowatsiri riyoteri Tajorentsi eejatzi raap-atziyantyaariri. Omaanta riraga kenkithashiryaa-kotawori tektsi koety-eemotyaarini, eero rotyaantziniiri Ishire ryotaantyaari. Eero rowawi-jaakotziri.

<sup>54</sup> Ikantani riraga Tajorentsi ramitakoeyakirini ajoriyyotzinkarite, tee ipeyakotee aari inta ineshironkaeyakaeni.

<sup>55</sup> Aritaki rantakiro maawaeni ikantakiriri itakaantaworini paerani: Awaraama eejatzi maawaeni icharineeteni ikanteetatyeyaaani.

Rootaki okantakirori rowaga Mariiya.

<sup>56</sup> Ojeekakitzi 3 kashiri, roojatzi opiyantanaa onampiki.

### *Ikoñaatapaaki Jowa kaawoshitantatsiri*

<sup>57</sup> Monkaatapaaka kitejiri okoñaawaanitanyaariri Erijawera. Tema koñaatapaaki otomi.

<sup>58</sup> Ikemakoeyakironi osheninkapaeni, ikimoshirewenteeyanakironi. Ikanteeyanakini:

—Tema ineshironkaperotakiro Awinkatharite.

<sup>59</sup> Ari okaataki imaakotaki 7, roojatzi okitejitanaki omonkaataka itotonatantyaariri ishiramparitarira. Rameteeyawoni joriiyopaeni iitakotyari jewatatsiri itomi ikoñaatapaaki iwaero iriri, rootaki ikantaneeyarini isheninka:

—Tema iitya Jakariiyashi, iitakotyari iriri.

<sup>60</sup> Omaanta okantzi riniro:

—Eero iita Jakariiyashi, omaanta iitya Jowa.

<sup>61</sup> Ikanteeyanakironi:

—¿litarikya pikowantari piiteri Jowa? Tee añiiri pisheninka iitachani Jowa.

<sup>62</sup> Roojatzi rookorookotantanakariri rojampitantakari riraga Jakariiyashi:

—¿Oetaka pikoyiri eeroka?

<sup>63</sup> Rookotanakiniri paperi, rojankinatakiniriri: “Aritaki iitya Jowa”. Ari rotsikanateeyanakarini riroripaeni.

<sup>64</sup> Roojatzi imapokashitanaa riraga Jakariiyashi iñaawaetanee eejatzi, ikantzi:

—Tema ikameethaperotaki Tajorentsi.

<sup>65</sup> Roojatzi rotsikanateeyantanakarini maawaeni isheninka. Ikemakoeyakirini maawaeni jeekatsiripaeni tonkaarikipaeni: rowaga jeekatsiri Joreeyaki.

<sup>66</sup> Ikenkithashireeyanakan rajankaneeki maawaeni kemakoeyakiririni ikantzi: “¿Tsikama ikantatyaarika riraga eentsi? ¿Oetakama ranteri paata? Tema ineshironkaperotakiri Awinkatharite itajonkawentakiri”.

<sup>67</sup> Roojatzi rowaga Ishire Tajorentsi iyotaakiri riraga Jakariiyashi, ikanantakowori iroka:

<sup>68</sup> —Tema ikameethaperotzi Awinkatharite, rirotaki tajonkawenteeyakaerini. Ipokashiteeyakaeni ikamawenanteeyeerini ipinawenanteeyeerorini kaari kameethatatsi antziri rowawijaakoeyanteerini.

<sup>69</sup> Paerani Iraviirini rantakiniri Tajorentsi ikowakaakiriri. Iroñaaka rotyaantakiri Tajorentsi icharineeteni Iraviirini, itajorentsitsaki, rowawi-jaakotante.

<sup>70</sup> Tema paeraniperoroña riraga kamanantayitzirorini iñaani Tajorentsi, riraga kameethaperotatsiri, ikantakirini atziripaeni: “Ikantzimi Tajorentsi:

<sup>71</sup> ‘Notyaantemiri owawijaakoeyemirini, eenitatsirika kijeyemirini, oonawaetzimiri, aritaki rowawijaakoeyakimini’.

<sup>72</sup> Tema noneshironkateeyakirini ichariniiteni Awaraama, maawaeni. Eero nopeyakotziro nokashiyakagaeyakarini.

<sup>73</sup> Paerani nokantaperotakiri pichariniiteni Awaraama:

<sup>74</sup> 'Inja nowawijaakooyerini picharineetenipaeni, nokijakowenteeyaarini kijeeyawitakaririni, eero ifthaawaeyini aapatziyeeyenarini.

<sup>75</sup> Ninkarika aapatziyenani rivotaki nashipaeni. Nowameethateeyerini, nokantyaani noñaaperooyerini ikameethatz'i". Rootaki ikantakiriri Tajorentis itakaantaworini.

<sup>76</sup> Iroñaaka notyomi, nokantemi: "Iiteetemi: 'Eerokataki kamanantzirori iñaaani Tajorentsi jenokijatz'i". Tema ari pikamanteeyeerini atziri okameethatz'i ijekki kameetha, raamagaeyaarinii Awinkatharite.

<sup>77-78</sup> Piyotagaeyerini atziripaeni riyoteeyantyaarini tsika ikantya rawijakotanteeyaaari. Pikamanteeyeerini ikamínthaaperoeyakirini Tajorentsi, eero ikenkithashiriiro eejatzi kaari kameethatasri rantayitzirini. Aririka riywapaaki oorya, eero otsitenitanee, inta okitejitanaki. Eejatzi okimiktyaka, aririka ipoñaakya Awinkatharite jenokinta, ayoperoeyanakinii

<sup>79</sup> rowawijaakooyerini maawaeni aapatziyariri rriraga kaari yotawitariri Tajorentsi, rriraga thaawantawitawori ikame. Riyotakagaeyapaakirini tsika ikantyaari iñaaoperontantyaariri Tajorentsi ikameethatz'i.

Rootaki ikantakirini Jakariiyashi.

<sup>80</sup> Okanta awijaki osheki ojarentsi, antaritanaki Jowa, osheki raapatziyakari Tajorentsi. Roojatzi ryaatantaka apaniroeni tekatsinta atziri ipanko, roojatzi paata ikenkithatakapiinteeeyakirini atziripaeni.

## 2

### *Ikoñaatapaaki Jesoshi*

<sup>1</sup> Eenitatis oroomajatz iwaero Seesari Awoshito, rivotaki pinkathariwentzirori maawaeni kipatsipaeni. Owakira ikoñaatantakari Jowa, otomi Erijaweeera, ikaminaakiri Seesari:

—Nokowaki rojankinatakoeyaani maawaeni atziripaeni, niyotantyaari tsikarika ikaatzi.

<sup>2</sup> Irira Shiriiño rivotaki jewawentziriri shiiryajatzi, rojankinatanteetakawori iwaeropaeni atziri.

<sup>3</sup> Rootaki ryaateeyantanakarini maawaeni atziri janta nampitsikinta tsikarika ikoñaatapaaki ichariniiteni paerani, rojankinatakotakaantya iwaeropaeni.

<sup>4</sup> Eeniro ijekkaki rriraga Josee janta Najareeteki. Rivotaki icharineeteni Iraviiri rriraga pinkatharitawitacharini. Aritaki inampitawoni irira Weriki, ojekki janta Joreeyaki. Rootaki ryaatantanakari Josee janta, rojankinatakotakaantya.

<sup>5</sup> Itsipatanakawo Mariiya rowaga ikashiyakarira rayero. Tekira oshinetari shirampari, omaanta omotzitashitaka rooteentsi otzimeri otomi.

<sup>6</sup> Rareetapaaka rirori janta Weriki roojatzi okemantakari ratsikaneentakiro thowiwiwiwi.

<sup>7</sup> Ikowakowawitapaaka rirori pankotsi imaantapaakyarimi omaanta ithotyaakowitapaakawo ijekkantapaakyarimi, inta iñaaapaaki apaani ipanko piratsi. Aritaki okoñaatakiri otomi jewatatsiri itzimi. Oponatakiri, owakiri jaga royiitaptiinteeantanariri piratsi rowanawo.

<sup>8</sup> Tsitenitanaki, eeniro ijekkayitzini shentziriri rowishate janta keshiiki. Tee imayi, ikakiwentziri rowishate.

<sup>9</sup> Romapokapaakiri Awinkatharite, ishipakiryaakoeyapaakirini, kimitaka okitejite, eejatzi iñagaeyawakirini ronampiri Awinkatharite. Ithawantawakari oshekiperō, ikantaka rompetateeyananaki, tonki, tonki.

<sup>10</sup> Roojatzi ikantapaakiri:

—Eero pithawantana, eenitatsi nokamantemiri okameethaperotaki. Osheki pikimoshirewentero, eejatzi osheki ikimoshirewentero maawaeni atziri.

<sup>11</sup> Owakira ikoñaatapaaki Weriki owawijaakotemini: rirotaki Awinkatharite riraga Rotyaantanewo Tajorentsi.

<sup>12</sup> Piyaate janta ipankoki piratsi, paminakiteri rirori owakira koñaatapaentsiri. Piñaapaakiri iponataka janta romaryaaka royiitantapi-inteetantanariri piratsi rowanawo. Nokamantakimiro iroka iroñaaka piyantanyaari kyaaray tee namatawitzimi.

<sup>13</sup> Roojatzi romapokantapaakariri Jenoki oshekini ronampiri Tajorentsi iñaaperoeyapaakirini, ikantapeyapaakini:

<sup>14</sup> —Rooma ikameethaperotaki Tajorentsi, noppinkathateeyirini janta Jenokinta. Eejatzi jaka kipatsikika ijekakagaeyerini kameetha maawaeni antzirori ikoyiri Tajorentsi riraga pinkathatziriri.

<sup>15</sup> Roojatzi ipiyeyantanaani maawaeni Jenokinta, roojatzi ikantawakaeyananaki rirori shentziriri rowishate:

—Ikamantakae ronampiri Tajorentsi koñaatapaaki Weriki owawijaakoten. Thametya aminakiteri.

<sup>16</sup> Roojatzi ishintisperotantanakari ryaatanaki, iñaapaakitziiri janta ipankokinta piratsi. Iñaapaakiri Josee, eejatzi rowaga Mariiya, omaryaakiri otomi royiitantapiinteetanariri piratsi rowanawo.

<sup>17</sup> Iñaantapaakariri, roojatzi ikamanteeypatapaakarini jeekatsiripaeni jaga okaatz ikanakiriri ronampiri Tajorentsi.

<sup>18</sup> Ikanakira maawaeni kemakiriri ikanawakaanaka:

—¿Pikemakiro ikantziri? ¿Oetaka ikantziri?

<sup>19</sup> Omaanta roori Mariiya osheki okenkithashiryaanakawo ikanteeyakiririni, okenkithashiryaakopintakawo ajankaneki.

<sup>20</sup> Roojatzi ipiyeyantanaani rirori shentziriri rowishate keshiiki. Iki-moshirewenteeyananakirini Tajorentsi ikanteeyananakini:

—Tema ikameethataki Tajorentsi. Okameethataki maawaeni roñaagakaeri eejatzi maawaeni ikantakaeri. ¡Kameethari Tajorentsi!

### *Itotonateetakiri Jesoshi*

<sup>21</sup> Okaataki 7 imaakotaki Jesoshi roojatzi kitejitsiri 8 itotonatantee-takariri ishiramparitantarira. Eejatzi iitakiri iwaero Jesoshi: imonkaatakiro ikantitzakawori Mariiya chapinki ronampiri Tajorentsi.

### *Ragaetanakiri Jesoshi tajorentsipankoki*

<sup>22-24</sup> Paerani rojankinatakaakirini Awinkatharite Moeseeshi: “Aririka okoñaawaanite tsinani otomi, okempoyeeya opankoki okaate 40 kitejiri: eero iyaatzita apiyoteeyaninta apinkathaperotzirinta Tajorentsi. Omonkaatakyaarika 40 kitejiri, okameethatzi iyaate Tajorentsipankoki aanaeri ñaanakowenantsirsiki apite jamomo eerorika apite jampakitzi”. Eenitatsi paashini rojankinatziniri okantzi: “Rirorka shirampari riraga jewatatsiri otzimirri tsinani, ikowakaakiri Awinkatharite raapatziyaperotaayi, ranaakoteri impaetatsini ikoñaatzii”.

Ari ikaatakotaki 40 kitejiri itzimantakari Jesoshi, roojatzi ryaateeyantaani Jerojareeki: Josee, Mariiya, eejatzi kijokiro owanakiri eentsite. Imonkaateeyakironi maawaeni rojankinatzirini Moeseeshi iroka okyaantapiinteeyaa Mariiya Tajorentsipankoki. Eejatzi okantakiri Tajorentsi:

—Irika notyomika, nokowaki rantaperotemiro oetarika pikowakaakiriri.

25 Ari ijeeki janta Jerojareeki shirampari iitachari Shimyo. Rirotaki aapatziyaperotariri Tajorentsi, kameetha ijeeki, raapatziyaperotawo roori Ishire. Eejatzi raamaari Rotyaantanewo Tajorentsi: riraga weshiryaaaka-gaeyaaririni maawaeni joriyyopaeni.

26 Okamtakiri Ishire Tajorentsi: “Eerotzitarika pikami, ari piñaawakiri Rotyaantanewo Tajorentsi”.

27 Roojatzi otyaanantakari Ishire Tajorentsi rirori janta Tajorentsi-pankoki; eekiro rimpatapaaki Josee, Mariiya, othomaakiri Jesoshi.

28 Riraga Shimyo iñaawakirira Jesoshi, riyaatashitakiri ithomaawakiri; roojatzi ikanantakari Tajorentsi:

—Nowinkatharite, tema pikameethaperotaki,

29-30 noñaakiri owawijaakoteenani, riraga pikantakinari noyeeri. Iroñaka monkaataka, tekatsi noyaanee eejatzi. Nokimoshiretaki, wetsikakina nokame.

31 Kyaaryo, potyaantakiri rowawijaakooyerini maawaeni atziri:

32 rirotaki riytakagaeyerini paashinijatzitsiri atziri, riweshiryaaawen-teeyaarini maawaeni joriyyopaeni aapatziyeeeyemirini.

33 Roojatzi raminantanaka Josee, eejatzi Mariiya, rotsikanatanakari rirori; ikenkithashiryaakoperaotanakawo ikantakiri.

34-35 Eekiro ikanteeyanakirini:

—Nokowaki ineshironkaeyemini Tajorentsi.

Eejatzi ikantakiro rinriowa eentsi:

—Pamine, iinja osheki piraakotaari pitomi: ipokantakari jaka ayoteeyantyaarini tsika akantya awijakoeanteeyaarini omaanta ikaate osheki atziri theenkaeyeririni: rowashironk-agaeaani riroripaeni. Omaantakya paashini atziripaeni, riweshiryaaawentaperooyaarini pitomi. Apaani theenkaeyeririni, paashini weshiryaaawenteeyaaririni, okoñaatzimotantyaariri ikenkithashireeyarini.

Rootaki ikantakirori Shimyo.

36-37 Ari ojeeki eejatzi Tajorentsipankoki tsinani oetachari Aana: ojekantawo pankotsi imaantapiintari atziripaeni aapatziyaperotariri Tajorentsi jaga okaankiutzi Tajorentsipankoki. Tema roori rootaki kamanantakotatsiri, osheki okamantapiintakiri osheninkai iñaani Tajorentsi. Irini iita Janoeri: rirotaki isheninkani Asheeri. Antyashipawoperotaki Aana: okaataki ojarentsite 84. Eejatzi roori ayitaka oemi eenironi ewankawotapaaki. Okaatzsi otsipatawitakari oemi 7 ojarentsi, tekiraata otsipaperotyaariitami roojatzi ikamapithatantakawo. Rootaki ojekantakari iroñaka ipankoki Tajorentsi. Otzitawentari rirori, eejatzi okantani: kitejiriki, tsiteniriki amanapiintari Tajorentsi; osheki opinkathatakiri. Tee okenkithashiryaaoperotaawo owayitarini.

38 Okanta iyaatashitakiri Jesoshi roori. Okantakiri Tajorentsi:

—Ariwee, noñaakiri naari.

Roojatzi okanteeyakirini osheninkathoripaeni:

—Eeniropa irika, rirotaki owawijaakooyerini atziripaeni: maawaeni aamagaeyaririni.

39 Imonkaatakiro Josee eejatzi Mariiya maawaeni rojankinatakirini Moe-seeshi: tema rirotaki ojankinataakiriri Awinkatharite. Roojatzi ipiyan-teeyanaani Najareeteki: jeekatsiri Karireeyaki.

*Rewankaritapaakini Jesoshi, ipiyanaa eejatzi Tajorentsipankoki*

**40** Ikanta ikimotatanaki Jesoshi, eekiro riyaatatz ithaamentanakitya ee-jatzi riyothanitaki ikenkithashiryaaperota kameetha, eejatzi eekiro ikimitakotakanakityaari Tajorentsi. Eejatzi irira osheki inintaperotakiri rirori.

**41** Rametapiinteeyawoni maawaeni ojarentsi riyaatapiintz riraga Josee eejatzi rowaga Mariiya janta Jerojareeki, aririka omonkaatapaeya kitejittsiri iitachari Rawijantakarini Ronampiri Tajorentsi joriiyopaeni janta Ejiipitoki.

**42** Ari iroñaaaka okaataki rojarentsite riraga Jesoshi 12. Rapiitantaawori riyaatee eejatzi janta Jerojareeki. Itsipatanakawo riniro, ashitariri eejatzi paashinipaeni inampijatzi.

**43** Riyaatanaki ikimoshirewentero rantakiri Tajorentsi. Rojamanitakitzi apaanipaeni kitejiri ikimoshirewentanakiri janta, roojatzi ipiyeeyawitaani riraga Josee eejatzi Mariiya itsipatawitanaari inampijatzi. Tee riyotzi jekanakira riraga Jesoshi Jerojareeki.

**44** Apaani kitejiri ikinanaki Josee eejatzi iina. Raamaashitawitakari itsipatanakari Jesoshi paashinipaeni inampijatzi. Tsitenini raminaminawitakari roojatzi otsitenitantanaka. Ikowakowawitanakari ikaateeyeenira ipokae,

**45** omaanta tee iñagaeri. Roojatzi ipiyantanaka janta raminaminatziri.

**46** Okaataki kitejiri 3 roojatzi iñaantapaari rirori Tajorentsipankoki: ikaateeyirini iyotaantayitatsirini. Ikemijantziri irintapaeni ryotaantzi eejatzi rojampitayitakirini rirori oetarkapaeni.

**47** Ari rotsikanatakari maawaeni kemakiriri, ikantzi:

—¿Pikemawakiri ewankarika? ¡Riyothaniperotzi! Kameetha rakawakiri ikantziriri iyotaantatsiri, tee ikompitawo.

**48** Ari rotsikanatapaakari Josee, eejatzi iina. Okantakiri irowa:

—Notyomi, ¿tsika pijeekekakika? Pamine, nokowakowawitakimi nokaatziri pirithori. Osheki nokoetyaakimi.

**49** Rakanakiro:

—¿Itaka pikowakowatantanari? Tema piyotzi nokowaperotaki nokemijantaperotero ikoyiri Pawapero. Rootaki nojeekantari jaka.

**50** Omaanta tee ryotakotawakiri riroripaeni ikantawitakariri.

**51** Roojatzi riraga Jesoshi royaatantanaawo, roerinkanaka ipiyeeyanaani Najareeteki. Ipiyanaaga ikantani ikemijantaperotapiintziri maawaeni okaatz ikanziriri riraga Josee eejatzi riniro. Tekatsi rante: tee iperanita, tee ipiyathanita. Omaanta roori Mariiya osheki okenkithashiryaakawo ajankaneki maawaeni iroka oñaakiri eejatzi okemakiri.

**52** Eekiro, eekiro, riyaatanakitzi riyothaniperotanakitzi, oemonkanaka kameetha. Eejatzi Tajorentsi iñaaperotakiri rirori Itomi ikameethatz, eejatzi maawaeni atziripaeni iñaakiri ikameethatz.

### 3

#### *Ritantakawori Jowa ikenkithatz (Mt. 3.1-6; Mr. 1.1-6; Jowa 1.19-28)*

**1** Iroñaaaka okaatz 15 ojarentsi ipinkathariwenteeyakirini maawaeni jeekayitatsirini kipatskipaeni riraga oroomajatz iwaero Teweeryo Seesari. Ari rotyaantakiri riraga Poonshiyo Peraato ipinkathariwentziri joreeyajatzi. Eejatzi rotyaantakiri riraga Erooreshi ipinkathariwentziri riraga karireeyajatzi; omaanta rirentzi Erooreshi, iwaero Jiripi, ipinkathariwentziri riraga itooryajatzi eejatzi tarakoniitejatz. Eejatzi riraga Rijaañashi ipinkathariwentziri awireefñajatzi.

<sup>2</sup> Eejatzi iroñaka ipinkathariwenteeyirini ñaanakowenantatsiripaeni Aanashi eejatzi Kaejashi. Roojatzi ijekantapaaka Jowa, itomi Jakariiyashi, janta okaankiyeenta. Ikantakiri Tajorentsi:

—Nokowaki iroñaka pikenkithatakaeri atziripaeni, eenitatsi nokowakiri pikamanteeyeririni.

<sup>3</sup> Ikanta ikinakinayitanakini rirori othapyaakiini iñaa iitachari Joriraani, ikanteeyakirini atziripaeni:

—Pikenkithashiryagaeya, eero pikimitagaa paerani, pookaero kaari kameethatatsi panteeeyakirini, roojatzi ikamintheeyantemirini Tajorentsi: eero ikenkithashiryakotemiro pantawitarini. Roojatzi nokaawoshitakonteeeyakimirini Tajorentsi riyotantyaari atziri awijakoteemi.

<sup>4</sup> Paerani ikenkithatakotzitakarini Jowa riraga kamanantzirorini iñaa Tajorentsi iitachari Iseyashi. Iroka rojankinatakotzitakaririni, ikantzi: “Eenitatsi iinja atziri kenkithatakayerini atziripaeni janta okaankiyeenta, ikanteri: ‘Paamayarirapa Awinkatharite. Pikameethatanaki iñaaperotantapaakimiri pikameethatzi. Aririka pikameethatanaki pikimiyawo awotsi kameethatatsiri ikinantapaakaaryi Jewaperowenantatsiri: powameethatero iñaaperotanteeyapaakyaaworini.

<sup>5</sup> Pikiyagaanteero opompaetopaeni, pityaakiyiteroni otenkanaapaeni, powameethatero maawaeni. Eejatzi powameethatero awotsi tzipitayitatsirini, otampsikatantyaari kameethä, okameethapanakaatanee. Noshiyakaawentashitakawo iroka.

<sup>6</sup> Roojatzikya maawaeni atziripaeni iñeyantawakyaarini owawijaakoey-eririni, riraga Rotyaantanewo Tajorentsi”.

### *Ikantayitziririni Jowa atziri (Mt. 3.7-12; Mr. 1.7-8; Jowa 1.19-28)*

<sup>7</sup> Ikantaka ipokashiteeyawitakarini osheki atziri ikowawitaka ikaawoshitakoeayarinimi Tajorentsi. Omaanta riraga Jowa eenitatsi ikanteeyawakiririni:

—Eerokateeyakini maankipaeni: pikimiteeyakarini kamaaripaeni. Tema osheki pamatawitanteeyini, eejatzi pitheeyawaetashita. Tee okameethatzi pantziri. Tee pikowaeyawitani piyatae paamariki kaari tsiwakanitatsini, rootaki pikowantawitakari pikaawoshitakoyaarimi Tajorentsi.

<sup>8</sup> Pikowakirika nokaawoshitakotawakimiri Tajorentsi, pityaawo pikenkithashireeya, pijeekeanteyaa kameetha, pookaero kaari kameethatatsi pantapiinteeeyakirini niyotantyaari tee pikimiwita paerani. Eero pikantawitashita: “Nosheninkatakari Awaraamani, rootaki niyotantakari aritaki nawijkatee”. Pamatawitashitaka eeroka apaniroeni. Ikwakirkami riraga Tajorentsi, imatero ipeyiromi atziri iroka mapika, osheninkatanteyaaririmi rirori aritaki rantakiromi. Omaanta eerokapaeni eerokawitaka icharineeteni Awaraama, eerorika paapatziyari rirori patsipetashitakawo pisheninkawitakari: rooma pajankanekira kimitakimi mapi: pikijotzira.

<sup>9</sup> Maawaeni inchato kaari kithokitatsi tema ari atowaeyakironi apiyoteeyeroni atagaeyeroni paamariki. Eejatzi eerori pikimiteeyakawoni inchato kaari kithokitatsi. Kyaaryoowa rookimikari eerori Tajorentsi paamariki kaari tsiwakanitatsini.

<sup>10</sup> Rojampiteeyakirini riraga atziripaeni:

—¿litaka pikoyiri nanteeyerini?

<sup>11</sup> Rakanakiri:

—Otzimirika apite piithaari, pipagaanteri ashironkaenkari apaani. Otzimotzimirika osheki powanawo, pipagaanteri eejatzi ashironkaenkari. Pikaninthaantapiinte.

<sup>12</sup> Eejatzi ipokashitakiri Jowa aayitziririni koriki: rayiniri riraga oroomajatzi, osheki ramatawitziri eejatzi atziripaeni. Tema raagaantztapiintakiri. Ipokashiiyakirini ikowaki ikaawoshitakoeyawakirini Tajorentsi, rojampita-paakiri:

—¿Oetarika nanteri naari piyotantenari kyaaryo naapatziyakari rirori?

<sup>13</sup> Ikantawakiri:

—Eero powanaashitawo eeroka apaniroeni paashitzitantyaariri iyorikite atziri, omaanta pimonkaataperotero kameetha ikantakimiri oroomajatzi.

<sup>14</sup> Eejatzi ipokashiiyakirini apaanipaeni joraaro, rojampitakiri:

—¿Oetaka nanteri naari?

Ikantawakiri:

—Eero pikijashitari atziri pikowantyaari pominthaayeri paapi-thantyaariri iyorikite, eejatzi eero pikowantari payitantlyaariri iyorikite. Pikimoshirewenteri ipinatzimirira piwinkatharite, eero pikoyi ipaetemi paashini.

<sup>15</sup> Ikanta raamagaeyarini Jesokirishito, iitashiteeyawitani rooteentsi rareetya. Ikenkithashiryaakoeyirini ikantzi: “¿Riotakima Jowa Rotyaantanewo Tajorentsi?”

<sup>16</sup> Omaanta ikanteeyakirini Jowa:

—Nokaawoshitakoeyakimirini Tajorentsi iñaaki: kaari pomeentsitachani. Iinja ipokapaakirika Awinkatharite, osheki nopinkathaperotakiri, rooma naaka tee nonomkaatari naari. Rotyaanteeyeeni rirori Ishire Tajorentsi ojeekantakanimi pajankaneki, owameethateeyemini.

<sup>17</sup> Iinja rinashitakagaeyaarinin irira kameethatatsiri eejatzi kaari kameethatatsi. Akimitzirowanki aari anashitawo okithoki pankirents, kitekiyiteentsirini eejatzi anashitakawo roori jampipentakitsiri. Akempoyeero okithoki, inta atayero jampipentakiri. Eejatzi ikimiteeyeeni rirori impaetakinari, riraga Rotyaantanewo Tajorentsi: ikamintheeyerini aapatziyeyayarini, irira iñaaperotakiri ikameethatzi. Omaanta riraga theenkiriripaeni ari rowashironkagaeyakirini. Tema iñaaperotakiri tee ikameethatzi.

### *Romonkyaagakaantakiri Erooreshi Jowa omonkyagamentotsiki (Mt. 14.3; Mr. 1.14; 6.17)*

<sup>18</sup> Aritaki ikenkithatakaapiintziri Jowa: ikamantapiinteeyakirini atziri tsika ikanteeyaa ikameethatanteeyaa, eejatzi ikamantziri tsika ikanteeyaa rawijakantanteeyaa.

<sup>19-20</sup> Eejatzi ikantakiri riraga Erooreshi:

—Tee okameethatzi pantayitzirini. Paapithatakiri parentzi iina rowaga Eroriyyashi. Eeniro osheki paashini kaari kameethatatsi pantayitzirini.

Roojatzi ikijanakiri Erooreshi. Ipinkathariwenteeyirini karireeyajatzi, rootaki imatantakawori raakaantakiri Jowa, shepik, romonkyaagakaantakiri. Eekiro riyaatatzি rantaperotanakiro kaari kameethatatsi.

### *Riraga Jesoshi ikaawoshitawentakari Tajorentsi (Mt. 3.13-17; Mr. 1.8-11)*

<sup>21-22</sup> Tekirani romonkyaagakaanteetziri Jowa, eejatzi tekirani ikenkithatakotakiri Tajorentsi riraga Jesoshi, tema riraga Jowa ikaawoshitawenteeyakarini Tajorentsi osheki atziri. Eejatzi riraga Jesoshi ikaawoshitawentakari ashitariri, roojatzi ikenkithatakantakariri irira. Omapokapaaka ayiitashitapaakiri Ishire Tajorentsi, opoñaaka jenokinta.

Oshiyawitapaakari jamomo. Eejatzi ikemaeyawakironi ikantakiriri Tajorentsí:

—Eeroka notyomi nonintashireperotzimi. Osheki nokimoshirewen-takimi.

*Rojankinatziro iwaeropaeni ichariniitenipaeni paerani Jesoshi  
(Mt. 1.17)*

<sup>23</sup> Okaataki rojarentsite Jesoshi 30, ritantanakawori ikenkithatakagaeyirini ijoriyyotzinkaritepaeni. Omawitya ikenkithashiryaka maawaeni atziri rirotaki itomi Josee, rirotaki itominthori, riraga jewatatsiri ikoñaatzi. Ekiro rimpetaapaaki reentsiteperopaeni Josee.

Iriri riraga Josee iwaero Erii.

<sup>24</sup> Iriri riraga Erii iwaero Mataani.

Iriri riraga Mataani iwaero Rewii.

Iriri riraga Rewii iwaero Meeriki.

Iriri riraga Meeriki iwaero Jaanani.

Iriri riraga Jaanani iwaero Josee.

<sup>25</sup> Iriri riraga Josee iwaero Matateyashi.

Iriri riraga Matateyashi iwaero Amooshi.

Iriri riraga Amooshi iwaero Nawooni.

Iriri riraga Nawooni iwaero Eeshiri.

Iriri riraga Eeshiri iwaero Nagae.

<sup>26</sup> Iriri riraga Nagae iwaero Maatari.

Iriri riraga Maatari iwaero Matateyashi.

Iriri riraga Matateyashi iwaero Sheme.

Iriri riraga Shemee iwaero Joseeki.

Iriri riraga Joseeki iwaero Joraa.

<sup>27</sup> Iriri riraga Joraa iwaero Jowanaani.

Iriri riraga Jowanaani iwaero Reeja.

Iriri riraga Reeja iwaero Jorowaweeri.

Iriri riraga Jorowaweeri iwaero Jaratyeri.

Iriri riraga Jaratyeri iwaero Neeri.

<sup>28</sup> Iriri riraga Neeri iwaero Meeriki.

Iriri riraga Meeriki iwaero Ariitzi.

Iriri riraga Ariitzi iwaero Kojaami.

Iriri riraga Kojaami iwaero Eremoraami.

Iriri riraga Eremoraami iwaero Eere.

<sup>29</sup> Iriri riraga Eere iwaero Joshoe.

Iriri riraga Joshoe iwaero Eriyeshaari.

Iriri riraga Eriyeshaari iwaero Joriimi.

Iriri riraga Joriimi iwaero Mataa.

Iriri riraga Mataa iwaero Rewii.

<sup>30</sup> Iriri riraga Rewii iwaero Shimyo.

Iriri riraga Shimyo iwaero Joraa.

Iriri riraga Joraa iwaero Josee.

Iriri riraga Josee iwaero Jonaani.

Iriri riraga Jonaani iwaero Eryakiimi.

<sup>31</sup> Iriri riraga Eryakiimi iwaero Mereeya.

Iriri riraga Mereeya iwaero Maenaani.

Iriri riraga Maenaani iwaero Mataata.

Iriri riraga Mataata iwaero Nataani.

<sup>32</sup> Iriri riraga Nataani iwaero Iraviiri.

Iriri riraga Iraviiri iwaero Isayii.

Iriri riraga Isayii iwaero Oweeri.

Iriri riraga Oweeri iwaero Woosho.  
 Iriri riraga Woosho iwaero Sharimoo.  
 Iriri riraga Sharimoo iwaero Naashoni.  
<sup>33</sup> Iriri riraga Naashoni iwaero Aminagaawa.  
 Iriri riraga Aminagaawa iwaero Araami.  
 Iriri riraga Araami iwaero Aarani.  
 Iriri riraga Aarani iwaero Eshiromi.  
 Iriri riraga Eshiromi iwaero Paareshi.  
 Iriri riraga Paareshi iwaero Joraa.  
<sup>34</sup> Iriri riraga Joraa iwaero Jakoowo.  
 Iriri riraga Jakoowo iwaero Ijaaka.  
 Iriri riraga Ijaaka iwaero Awaraama.  
 Iriri riraga Awaraama iwaero Taree.  
 Iriri riraga Taree iwaero Nakoori.  
<sup>35</sup> Iriri riraga Nakoori iwaero Sherooko.  
 Iriri riraga Sherooko iwaero Ragaawo.  
 Iriri riraga Ragaawo iwaero Pereeki.  
 Iriri riraga Pereeki iwaero Eeweri.  
 Iriri riraga Eeweri iwaero Jaari.  
<sup>36</sup> Iriri riraga Jaari iwaero Kaenaani.  
 Iriri riraga Kaenaani iwaero Aratajaari.  
 Iriri riraga Aratajaari iwaero Sheeme.  
 Iriri riraga Sheeme iwaero Noe.  
 Iriri riraga Noe iwaero Rameeki.  
<sup>37</sup> Iriri riraga Rameeki iwaero Matojareeni.  
 Iriri riraga Matojareeni iwaero Enoko.  
 Iriri riraga Enoko iwaero Jareeri.  
 Iriri riraga Jareeri iwaero Maarareeri.  
 Iriri riraga Maarareeri iwaero Kaenaani.  
<sup>38</sup> Iriri riraga Kaenaani iwaero Enooshi.  
 Iriri riraga Enooshi iwaero Seete.  
 Iriri riraga Seete iwaero Araani.  
 Paerani riwetsikantakariri Tajorentsi riraga Araani.

## 4

### *Jatanaashi ikowawita rantakayerimi Jesoshi kaari kameethatatsi (Mt. 4:1-11; Mr. 1:12-13)*

<sup>1</sup> Ikanta Jesoshi itonkaantanaari tema ipoñaakaga Joriraanikira. Ikithaatakotakawo Ishire Tajorentsi, aanakiri janta okaankiityeenta.

<sup>2</sup> Okaatzzi 40 kitejiri ijekaki janta, tee rowaneenta eechonkiini: aap-erotakiri itashe. Ikanta riyaatashitakiri Jatanaashi riraga iwinkatharite kamaarpaenii iñaantari, ikowawitaka rantakayerimi kaari kameethatatsi.

<sup>3</sup> Ikantawitapaakari:

—Eerokarika Itomipero Tajorentsi, ajaatyta: pitajonkero iroka mapika, opeyanakya paa, poyaari.

<sup>4</sup> Rakanakirji Jesoshi:

—Eero nantziro. Okantzi Iwaperite Tajorentsi: “Tee apatziro akoyiro owanawo ashintiwathatantyaari, inta kowaperotacha akemijantaperotermaawaenii ikowakaakaeri Tajorentsi ashintisantyaaashireki”.

<sup>5</sup> Roojatzi raanakiri antawoki ochempi, rookotapaakiniri maawaenii kipatsi,

<sup>6</sup> ikantakiri:

—Pikowakirika nokanteeyerini maawaeni jeekatsiripaeni ipinkathateeyemini, raakameethateeyemini. Aritaki nomatakiro noperi ninkarika nokoyiri. Tema naaka pinkathariwenteeyiririni maawaeni,

<sup>7</sup> aririka nokanteri ipinkathateeyemini eerori, aritaki ipinkathateeyaki-mi. Apatzirokyaka nokowaki potziwerowashitena, pipinkathatena naari.

### <sup>8</sup> Rakanakiri:

—Rooma okantzi Iwaperite Tajorentsi: “Pipinkathateri Awinkatharite, tema rirotaki Tajorentsi. Apatzirokyaka irira paapatziyari, piñaaperoteri, ee-jatzi pikimoshirewenteri”.

<sup>9</sup> Roojatzi raantanakari janta Jerojareeki, okaapankatapaakinta Tajorentsipankoki, jantoojenoki. Ikantapaakiri:

—Eerokarika Itomi Tajorentsi, ajaatyä: pomyaanakyaatyä jaawiki, eero pikamantapaaka.

<sup>10</sup> Pikenkithashireerotya okaatzi okantzimiri Iwaperite Tajorentsi: “Ari rotyaantakimiri Tajorentsi ronampiripaeni, ikempoyeemi”.

<sup>11</sup> Eeniropi eejatzi paashini rojankinatzirini: “Aritaki raawakimi rakokira, eero pikagaantapaaka jaawiki mapiki”. Ñaakiro, ¿iitaka pithaawantakari?

### <sup>12</sup> Rakanakiri:

—Eero nomyaa. ¿iitaka noñaanantyaariri Pawa? Rooma eenitatsi paashini okantz Iwaperite Tajorentsi: “Tee okameethatzi añaantawityaari Tajorentsi: rowashironkaemikari”.

<sup>13</sup> Ikanta iwinkatharite kamaari teera imatziro rantakayiri Jesoshi kaari kameethatatsi, roojatzi rookantanaari. Omaanta iinja rapilteeri.

### *Ipiyanaa Jesoshi Karireeyaki (Mt. 4.12-17; Mr. 1.14-15)*

<sup>14</sup> Roojatzi ipiyantanaa Jesoshi Karireeyaki, osheki omatakaakiri Ishire Tajorentsi: tema okithaatakaakari roori. Tee ojamanitzi ikemakoeyakirini maawaeni jeekatsiripaeni janta.

<sup>15</sup> Riyotaantapiintaki pankotsiki ipiyotantapiintarira joriiyopaeni. Ikan-teeyanakini:

—Tema ikameethataperotaki Jesoshi; tema kameetha ryotagaeyakaeni.

### *Rareetapaa Jesoshi Najareeteki (Mt. 13.53-58; Mr. 6.1-6)*

<sup>16</sup> Roojatzi ryaatantanaa Jesoshi Najareeteki, rootaki inampi rantaritarakira paerani. Ikantanaka saawarokí ryaatanaki janta pankotsiki ipiyotantapiintarira joriiyopaeni, tema rametapiinteyawoni ryaatzisaawaroki. Inthomaenta ikatziyapaaka, iñaanateniri atziripaeni Iwaperite Tajorentsi.

<sup>17</sup> Ipaetawakiri rojankinarini Iseyashi. Rapineeryaakiro, raminakiro iñaanateniriri. Okantzi:

<sup>18</sup> “Okithaatakaapaakinia Ishire Awinkatharite, otyaantakina nokamanteri maawaeni ashironkaayitacharini tsika ikantyaari rawijakotanteeyaari. Nokamanteri maawaeni romperatanewopaeni kamaari noemishitowaeyerini. Noñaakagaeri eejatzi kaari kokichaatatsi. Eejatzi nopakaakowenteeri maawaeni rowashironkagaetziri.

<sup>19</sup> Eejatzi nokamanteeyerini atziri rooteentsi notajonkakowenteri”.

<sup>20</sup> Roojatzi rapineetantawo Iwaperite Tajorentsi, roepiyeeniri ipaeri, roojatzi ijeekantanaa. Ari rotsikanateeyanakarini joreririri.

### <sup>21</sup> Ikanteyakirini:

—Kyaaryo iroñaaka nomonkaatakiro iroka noñaanatakimirika, naaka okenkithatakotzi.

<sup>22</sup> Ikanta iñaaperoeyawitakarini kameetha Jesoshi, eejatzi iñaaperoeyakironi okaatz i kantakiriri. Roojatzi rojampitawakaeyakan:

—¿Karima itomiranki Josee?

<sup>23</sup> Ikantakiri:

—¿Pitheenkatyaanama? Naamaashita pikantenami: “Ajaaty, powawijaako-teritya pinampijatzipero eerori. Nokemakotakimi pitajonkantaki janta Kaperinawooki, iroñaaakaka pitajonkantetya eejatzi jika anampikika”.

<sup>24</sup> Omaanta nokamantemi pameteeyaaawoni eerokapeni pitheenkaeyirini pisheninkapero: tee piyotzi pipinkathatziri riori, omaantakya paashinijatzi rirotaki pikoyiri pipinkathateri.

<sup>25-26</sup> Kyaaryo iroka nokamantemiri: paerani eenironi ijekini Iriiyashini, piyoteeyakini tee opariyini inkani. Tema paerani osheki ojarentsitakini. Okaatz 3 ojarentsi eejatzi 6 kashiri, tee opariyanee inkani. Itashey-eeyanakini maawaeni jeekatsiripaeni kipatsiki. Eejatzi ojeeki osheki kamayiteentsirini oemi jika, omaanta rotyaantakiri Tajorentsi Iriiyashi paashiniki kipatsi owaero Jeniishiya. Rotyaantziri ryaatashitero kamsiri oemini jeekatsiri janta Jareepetaki, okaaktintawo Shiroo. Itajonkawentapiintakiniro owanawo. Omaanta jeekatsiri jika inampiki, tee itajonkawentziniro.

<sup>27</sup> Eejatzi, paerani ijekantakari Eriseeyoni riraga kamanantzirorini iñaani Tajorentsi, ijekini jika osheki pathleenkari, omaanta tekatsi retsiyatakte. Apatziro retsiyatatakiri shiiryajatzi iitachari Naamaani. Tema raapatziyari Tajorentsi.

<sup>28</sup> Ikemaeyantawakarini piyoteeyeencharini, ikijeeyaperotanakan.

<sup>29</sup> Roojatzi ikatziyeeyantanakan, ragaeyakirini, shepik. Raanakiri janta othapiiteki nampsiti, ojeekinta impeeta. Rotatsinkantyaaririmi,

<sup>30</sup> omaanta tee imatziri, tee iñaawakiri tsikarika ikinanawo.

### *Ipiyanaa Jesoshi Kaperinawooki (Mr. 1.21-28)*

<sup>31</sup> Ari ipiyanaa Jesoshi Kaperinawooki karireeyawero. Saawaroki riyota-gaejakirini atziri.

<sup>32</sup> Riraga atziripaeni rotsikanateeyanakarini, ikantawakagaeyakan:

—Tema okameethataki iroka riyotaakaeri. Ikimiwitakari pinkathari: rooma riyotaaperotakae kameetha.

<sup>33</sup> Ari ijekkaki pankotsiki janta ipiyotantapiintarira joriyyopaeni shiram-pari kyaantariri kamaari. Icherayimotawakiri, ikaemakotawakiri:

<sup>34</sup> —Eeroka Jesoshi poñaachari Najareeteki. Niyotakimi: eeroka Ito-mipero Tajorentsi riraga kameethaperotatsiri. ¿litaka pipokashitantanari? ¿Pikowawitama pookena janta otsiteniperotzinta?

<sup>35</sup> Iñaashintsithatakiri Jesoshi, ikantakiri:

—¡Pimaerite! Pishitowantaneeyari irira shiramparira.

Roojatzi rotyaantanakari shirampari kipatsiki, tereei, roojatzi rookantaari. Tekatsi ikantanakari shirampari, rioperotanee.

<sup>36</sup> Rotsikanateeyanakarini eejatzi ikanteeyanakini:

—Piñaakiri: apatziro iñaanatakari kamaari, roojatzi ishitowantana. Os-heki ipinkatharentsitak, osheki itajonkant.

<sup>37</sup> Ikanta ikemakoejakirini Jesoshi maawaeni jeekatsiripaeni jika.

### *Retsiyatakakiro Jesoshi riyote Peetero (Mt. 8.14-15; Mr. 1.29-31)*

<sup>38</sup> Roojatzi ishitowantana Jesoshi pankotsiki ipiyotantapiintarira joriyyopaeni ryaatanaki ipankoki Shimo. Ikanteetawakiri:

—Omantsiyatatzira riyote Shimo, osheki ojaawamerikitaki. Petsiyatako-teero.

<sup>39</sup> Roeyotashitapaakawo, ikantapaakiro:

—Ari opeyaneeya pijaawamerikiri, petsiyatakotanee.

Roojatzi opeyantanaa, tekatsitanee; okatziyanaka, opaeyawakirini rowanawo.

*Retsiyatakotayatirkirini paashinipaeni atziri*

(Mt. 8.16-17; Mr. 1.32-34)

<sup>40</sup> Ikanta itziryaanee oorya. Ramaetapaakiniri Jesoshi osheki mantsiyari inashitachari imantsiyarentsite. Ipampiteeyawakirini, retsiyatatakoeyawakirini.

<sup>41</sup> Eejatzi rowawijaakoyitakirini osheki kyaantariri kamaari. Riraga kamaaripaeni riyotawakirira Jesoshi rirotaki Rotyaantanewo Tajorentsi rootaki ikaemaeyantanakan, ikanteeyini:

—Eeroka Itomi Tajorentsi.

Omaanta riraga Jesoshi ro romaeryaantakariri, tema ikantanakitziiri:

—Pimaerite, eero pikamantakotana.

Roojatzi rookantanaari riori atziripaeni.

*Rowaaganaa Jesoshi paashinikipaeni nampitsi*

(Mt. 4.23-24; Mr. 1.35-39)

<sup>42</sup> Okantaka okitejitanaki riyaatanaki Jesoshi janta tekatsinta jeekatsini. Omaanta ikowakowaeyanakiiri atziripaeni. Iñaantaariri, ikanteeyawita-paarini:

—Eero piyaatee, pijeki jaka Kaperinawooki.

<sup>43</sup> Omaanta ikantanakiri Jesoshi:

—Eero nojeeki. Nokowaki nokamanteri paashinipaeni atziri ipinkathari-wenteeyerin Tajorentsi, tema okameethatzi riyoteeyeroni riroripaeni. Rootaki rotyaanantakinari Pawa.

<sup>44</sup> Ikantaka ikinakinayitanakini Jesoshi janta Karireeyaki, ikenkithataka-gaeyakirini atziri janta pankotsikipaeni ipiyotantapiintarira joriyyopaeni.

## 5

*Riraga Shimo ishryaataki osheki shima*

(Mt. 4.18-22; Mr. 1.16-20)

<sup>1</sup> Paashini kitejiri ikenkithatzir Jesoshi janta othapyaaki inkaare iitachari Jenejareete. Iiteetziro eejatzi Karireeeya. Itsitachonchoeteeyapaakani atziripaeni, ikowaeyakini ikemero iñaani Tajorentsi.

<sup>2</sup> Ikanta Jesoshi iñaakiro apite pitotsi janta othapyaaki. Tekatsi otetantyaawoni: riraga shiryaatatsiri ikiwatziro ishryaamento iñaaki.

<sup>3</sup> Rotetaka Jesoshi ipitoki Shimo, ikantakiri:

—Shimo, potyaantero eechonkiini niyankaani pitotsi.

Ari ijeekakotaki, riyotagaeyakirini piyoteencharipaeni othapyaakininta.

<sup>4</sup> Ithonkantakawori riyotagaeyakirini, ikantakiri Shimo:

—Piyaate janta ojaanaatakinta, pishiryaaate.

<sup>5</sup> Rakanakiri:

—Iyotaanari, nokitejitatowitaka noshiryaatzi inkaaganki, tekatsi naaneente eechonkiiniroña. Iroñaakakya pikantakinaka, aritaki nyaataaki noshiryataate eejatzi.

<sup>6</sup> Ikantaka ishryaataatzir: raaperotaki osheki shima monki, monki. Yeekitaki ishryaamentoki, rooteentsi otzijagaanakimi.

<sup>7</sup> Ikaemawakotakiri iyempiyaminthari jeekatsiri paashiniki pitotsi ikantziri: “Pipoke pamitakoteeyenani”.

Roojatzi ipokakotanteeyapaakani, rotetakotakiri terori, terori; yeekita-paaki apite pitotsiki, roowiteenchami otsitsiyanakimi.

<sup>8-10</sup> Ikaatzi osheki shima raaki, antawo ikenkithashiryaa-kotanakawo okaatzika iñaakiri; Peetero ejatzi ikimiteeyakan iyempiyaminthari: riraga Jantyaako ejatzi Jowa. Rirotaki itomi Sewereeyo. Itsipatapiintari Shimo ishiryaa-tapiintziri shima. Rotziwerowashitanakari Peetero Jesoshi, ikantakiri:

—Nowinkatharite, potsipareena. Tee nokameethaperotzi naaka, eero pitsipatana.

Rakanakiri Jesoshi:

—Eero pithaawantana. Eenitatsi nokamantemiri: eerokataki shiryaa-witarineri shima, omaanta iroñaaka eero pishiryaa-taneeri shima, inta paap-atziyakaapiinteeyaa-rini atziripaeni Tajorentsi.

<sup>11</sup> Ikanta raatakoeyapaani, roojatzi rookaeyantanakawoni ipitopaeni, ishiryaa-mentopaeni, maawaeni. Royaateeyanakirini Jesoshi.

### *Retsiyatakoteeri Jesoshi patheenkari*

(Mt. 8.1-4; Mr. 1.40-45)

<sup>12</sup> Paashiniki kitejiri janta nampitsiki ari ijeeki Jesoshi roojatzi ipokantapaaka shirampari pathaaperotatsiri: othonkakiri ipathaawo. Iñaantapaakariri Jesoshi, rotziwerowashitapaakari, ikantziri:

—Nowinkatharite, tema eeniro pitajorenka: pikowakirika petsiyatakotena, aritaki pimatakiro.

<sup>13</sup> Roojatzi rowaankantawakawo rako rirori, ipampitawakiri. Ikantziri:

—Nokowaki. Petsiyatakote.

Intsipaete opeyanak ipathaawo.

<sup>14</sup> Roojatzi ikantakanakiri:

—Eerowa pikamantakotana. Apatziro piyaatanaki janta ñaanakowenantsiriki, poñaagapaeyaari riyotantyaari etsiyatakoteemi. Pimonkaatero ikantakirini Moeseeshi: “Paanakiniri ñaanakowenantsiriki pipira itayeniri Tajorentsi riyoteeyantyaarini atziripaeni etsiyatakoteemi”.

<sup>15</sup> Omaanta eekiro ryaatatyee ikamantakoeyakirini Jesoshi. Oshekiniroña atziri ryaatashiteeyawitakarini raapatziyarimi, eejatzi osheki ikowaeyawitani retsiyatakotantyaaririmi.

<sup>16</sup> Omaanta ryaatanaki rirori janta tekatsinta atziri ipanko, ikenkithatakayeri Iriri.

### *Retsiyatakoteeri Jesoshi kijopookitatsiri*

(Mt. 9.1-8; Mr. 2.1-12)

<sup>17</sup> Paashini kitejiri ryotaantee Jesoshi pankotsiki. Ari ijeekayitakini okaakini warijeeyopaeni eejatzi iyotaantzirori Iwaperite Tajorentsi: ipoñaayitanakani osheki nampitsikipaeni, janta Karireeyaki, Joreeyaki, eejatzi poñaayitaneecharini Jerojareeki. Tema eenitatsi itajorenka Awinkatharite imatantawori retsiyatakotantzi.

<sup>18</sup> Okaakitapaaki shirampari-paeni, ramakoeyakirini kijopookitatsiri. Ikowaeyawitakani raanakirimi janta ijeekakinta Jesoshi, omaanta tekatsi ikinakaanakiri, rotzikagaeyakirini atziripaeni.

<sup>19</sup> Tekatsi ikini ikyaapaaki, rootaki rateetakaantanakariri opatzitoki pankotsi. Rothataakotakiri imoontakiro ijeekakira Jesoshi, roojatzi royi-itakotakiri kijopookitatsiri.

<sup>20</sup> Riyotawakiri amakiriripaeni raapatziyeeyakarini, rootaki ikanantawakariri:

—Niyompari, ari nopeyakotemiro kaari kameethatatsi pantawitari, aritaki nowawijaakotemi.

**21** Ikantaka ikenkithashireeyanakan i warijeeyopaeni eejatzi iyotaantzirori Iwaperite Tajorentsii: “Tee okameethatzi iroka: ittajorentsitsashitaka. Apaniroeni Tajorentsii rowawijaakotantzi”.

**22** Omaanta rirotakotakiri Jesoshi ikenkithashireeyarini riropipaeni, roojatzi ikanantanakari:

—*¿litaka pikenkithashiraantari pajankaneki: “Ittajorentsitsashitaka”?*

**23** Aririka nokanteri irika: “Netsiyatakoteemi iroñaaka, pikatziyatziyawaetanaki”, tema ari potsikanatanakyaa. Eerorika imatziro ipiriinta, ari pishirontawentanakina naaka. Omaanta ari kameetha pikantanaki tekatsi shirampari materoni rowawijaakoteri atziri kaari kameethatatsi rantziri. Kameetha pikante. Tema piitashiwitaka nokantashitari: “Nowawijaakotemi, eero nokijawentzimiro kaari kameethatatsi pantziri”.

**24** Nopoñaaka naaka jenokinta, nokoñaatapaaki jaka kipatsikika. Nokowaki piyoteeyeni eenitatsi notajorenka, eejatzi nomatakiro nokamintheeri antzirori kaari kameethatatsi, nowawijaakooyerini.

Roojatzi ikanantanakari kijopookitatsiri:

—Iroñaaka nokantemi: pikatziyanaki, paaneero pimaamento, piyaatee pipankoki.

**25** Iñeeyawakirini ikatziyanaa, raaneero imaamento, jatanee ipankoki. Ikantanaki:

—Ariwee, tema ikameethaperotaki Tajorentsi.

**26** Ari rotsikanateeyanakarini atziripaeni, ikanteeyanakini:

—Tema ikameethaperotaki Tajorentsi, ipinkatharitaperotzi. Tee añaapiintziro iroka añaakirika iroñaaka.

*Royaatanakiri Rewii Jesoshi, tema rirotaki piyotawitanariri pinkathari iyorikite*

(Mt. 9.9-13; Mr. 2.13-17)

**27** Roojatzi ishitwantanaa Jesoshi, roojatzi iñaantapaakari Rewii, riraga piyotayitziniriri atziri iyorikite, ipantyaariri pinkathari. Ijeeki janta pankotsiki ipiyotapiintzirira koriki, rojakinatapiintzinta. Ikantapaakiri:

—Thame poyaatanakina.

**28** Ipakaanakiro rojakinatakotayitzirini koriki, rookanakiro maawaeni, ikatziyanaka, royaatanakiri Jesoshi.

**29** Riraga Rewii raanakiri irira eejatzi riyoataanewo janta ipankoki. Roojatzi ikaemakaantakiri paashinipaeni piyotziniriri pinkathari iyorikite, eejatzi paashinipaeni atziri, rowakagaeyakarini.

**30** Ipokapaaki warijeeyopaeni eejatzi riraga iyotaantzirori Iwaperite Tajorentsii ikifaanikowntakiri rirori: ikantakiri riyoataanewo:

—Pamineritya Jesoshi: itsipateeyakarini piyotziriri iyorikite oroomajatzi, rowaeyani, imirifiyini. Eeniro eejatzi paashinipaeni kaari kameethatatsini. Tee okameethatzi itsipateeyaarini rowakagaeyaarini.

**31** Ikantawakiri riraga Jesoshi:

—Riraga kaari mantsiyatatsini tee ikoyi aawinantatsiri raawinteri. Intakya mantsiyatatsiri rirotaki kowatsiri.

**32** Tee riro nopolashitziri kameethatzinkari omaantakya nopolashitziri riraga kaari kameethatatsi, riyotanteeyariri Tajorentsii eejatzi raapatziyari. Rootaki ikantziriri rirori warijeeyopaeni.

*Rojampitakiri ñaanakowenantatsiri: “¿litaka kaari itzitanta piyotaanewo”*

(Mt. 9.14-17; Mr. 2.18-22)

**33** Ikantakiri warijeeyopaeni Jesoshi:

—Pamine, itzitapiinta riyotaanewo Jowa, eejatzi ikenkithatakaapiintziri Tajorentsi: eejatzi ikimiteeyakarini riyotaanewo warijeeyo. Omaanta ri-raga piyotaanewopaeni pashi tee itzitawo; inta rowapiinteeyani, rirapiinteeeyini.

<sup>34</sup> Rakanakiri:

—Aririka raye shirampari iina, ikaemaeyerini isheninkapaeni ikimoshirewenteeyantyaaririni. Aririka rareeteeyakyaani, ḡarima itziteeyapaakyaani? Eero. Eejatzi naari, nokaateeyirini iroñaka niyotaanewopaeni: ḡlitaka notzitakaantyaariri?

<sup>35</sup> Rooma rookaeyaneerini isheninka aatsiri iina, roojatzikya itziteeyantanakaani. Eejatzi nokimiwitaka naari: aririka iinja nokame, ari rowashiretakoeyanakinani niyotaanewo, roojatzikya itziteeyantanakaya-woni riori.

<sup>36</sup> Eejatzi roshiyakaawentziri iroka; ikantziri: “Eejatzi, eenitatsirika atziri iithaari owakirari, eero itzijagaero owawatawo eechonkiini rowawatatanhyaawori antyashipawopooki imatha. Aririka powawatatero, eero omonkaatawakaana. Eejatzi pikiwerorika aminthamawotanakyaarika owakirari, eejatzi eekiro iyaatanakitye osipaanaki itaworipooki.

<sup>37-38</sup> Tema apyaaganantawo owakirari pyaarentsi imashiki owakirari, roojatzi ashirkakotantakyaawo eero apaatanta. Aririka oshimowanaki oshinchaatanakirika, otapiyaperotakiri imashi. Riorika owakirari, eero ipejakotzi, eejatzi eero apaata oowaa. Roorikami apyaaganantyaawomi pyaarentsi itawori imashi, tema itapiyamoottzanakirika itonkanaki: pooo. Tziajanaki, eejatzi apaatanakya pyaarentsi.

<sup>39</sup> Tema aririka ireeyeroni itaworyaateentsiri pyaarentsi, eero akoyiro irero owakirari”.

## 6

### *Ikantawakaanteeyakawoni kitejitsirsisaawaro*

(Mt. 12.1-9; Mr. 2.23-28)

<sup>1</sup> Apaani saawaro, ikinanaki Jesoshi teriikomashiki, itsipatanakari riyotaanewopaeni. Irirapaeni ithatyayitakini apaanipaeni okithoki teriiko, ramirokakitakiro, okaankikitanaki okithoki, rowaeyakawoni.

<sup>2</sup> Ifñeeyakirini warijeeyopaeni, ikantakiri:

—Tee okameethatzi iroka pantziri. Tema iroka saawaro, kitejitsirsira makoreeyantarini, eero atayaantawo iroñaka. ḡlitaka panantakawori?

<sup>3-4</sup> Rakanakiri Jesoshi:

—Tema tee piñaananeentziro rojankinatakoteetakiririni Iraviiri. Aantakariri itasheni eejatzi itsipateeyarini. Eenitatis janta ipankomawoki Tajorentsi paa riwetsikaetziniriri irira. Apaniroeni rowaeyawoni ñaanakowenantatsiripaeni, tee oshinetziri Iwaperite Tajorentsi paashinipaeni royaawo. Omaanta rashironkaantawitakari, aantawitakariri itashe Iraviiri, rootaki ipantakariri paa riraga iwinkatharite ñaanakowenantatsiri, eejatzi ipaeyakirini maawaeni oyaateeyiririni. Ñaakiro, tema tee ikowakayiri rowashironkaeya itashheyi.

<sup>5</sup> Nopoñaka jenokinta, nopolapaaki jaka kipatsikika, nokoñaatapaaki: tema naaka kantatsini oetarika anteri saawaroki.

### *Retsiyatakotakiri kijopookiwakori*

(Mt. 12.9-14; Mr. 3.1-6)

<sup>6</sup> Paashini saawaro ryaatanee janta pankotsiki ipiyotantapiintarira jori-iyopaeni, ikyapaaki riyotaantapaaki irirapaeni. Ari ijeekaki janta shiram-pari kijopookitatsiri rakopero.

**7** Rotsikanaperotakari iyotaantzirori Iwaperite Tajorentsi eejatzi warijeeyopaeni, ikowaki riyoteri aririka retsiyatatakante saawaroki, ikantakotantyaariri iwinkathariteki: "Noñaakiri Jesoshi rantakiro kaari kameethatatsi".

**8** Omaanta riyotakiri Jesoshi ikenkithashireeyakarini. Ikantanakiri kijopookiri rako:

—Pipoke, pikatziyapae jaka niyankika.

Roojatzi ikatziyantanaka, riyaatashitakiri.

**9** Ikanteeyakirini rirori:

—Iroñaaka nojampiteeyemini. ¿Oetaka kameethatatsiri anteeyerini saawaroki? ¿Kameetharinima akaminthayeri atziri? Teerika okameethatzi, ¿pikowatzii ma owashironkaeri? ¿Kameetharinima owawijaakoteri atziri? Teerikama okameethatzi, ¿pikowatzii ma owamaerri?

**10** Ramineeyakirini Jesoshi, imaeeriiyakini. Roojatzi ikanantanakari:

—Powaankaero pako.

Roojatzi rowaankantanakawo, kameethatanee rako.

**11** Omaanta ikijaperoeyanakanii ñaanakowenantatsiripaeni. Ikantawakaeyanakanii:

—¿Tsika akanterika owamaakaanantyaariri?

*Riyoyaantakariri Jesoshi riyotaanewopaeni  
(Mt. 10.1-4; Mr. 3.13-19)*

**12** Paashini kitejiri riyaataki Jesoshi tonkaariki, ikenkithatakantyaariri Iriri. Ari ikitejitakotakaakiri ikenkithatakayiri.

**13** Ikaemaeyakirini oyaateeyakiririni, riyoyaanteeyakaririni **12** riyotaanewopero. Ikwaki rotyaanteri iinja ikenkithatakantyaawori iñaani Tajorentsi, rootaki iitantariri rotyaantanewo Jesoshi. Iroka iwaeropaeni:

**14-16** Shimo (eejatzi iitziri Jesoshi Peetero), Antereeshi (riraga rirentzi Shimo), Jantyaako, Jowa, Jiripi, Waritoromee, Mateeyo, Tomashi, Jantyaako (riraga itomi Arjeeeyo), Shimo (riraga kathaaperotzinkari antayitzirorini oetarikapaeni), Joorashi (riraga rirentzi Jantyaako) eejatzi Joorashi kary-ootejatzi (riraga aakaanterini iinja Jesoshi). Rootaki iwaeropaeni riyotaanewo riyoyaakiri Jesoshi.

**17** Roojatzi roerinkapaa janta okameethapatheeteenta. Ipiyotakanta osheki riyotaanewopaeni, eejatzi osheki paashinipaeni atziri: ipofeeeyakani Joreeyaki, Jerojareeki, Tziiroki, eejatzi Shirooki. Ojeeki Tziiro eejatzi Shiroo inteeena, janta othapyaaaki antaworoña inkaare. Riyaatashiiyakirini Jesoshi ikemijanteeyawakirini, eejatzi ikowaeyakini retsiyatakoeyeni maawaeni mantsiyariipaeni.

**18** Rowawijaakoeyakirini kyaantariripaeni kamaari.

**19** Ikowaeyakini maawaeni ipampiteeyapaakirini, itajonkakowenantyaariri retsiyatatakantaneeyaari imantsiyatakira.

*Ikenkithatakakiriri Jesoshi kimoshireteeyatsirini  
(Mr. 5.1-12)*

**20** Riraga Jesoshi ramineeyanakirini riyotaanewopaeni, ikantakiri:

—Aririka pashironkaawitakya iroñaaka, pikimoshirete: aritaki ipinkathariwenteeyemini Tajorentsi.

**21** Aririka pikoyi pantero oetarika ikowakaakimiri irira, pikimoshirete: aritaki ramitakotakimi pantero. Aririka powashiretawitakya iroñaaka, pikimoshirete: aritaki ikimoshiryaaakagaemi rirori iinja.

**22** Aririka ikijeeymemini atziripaeni panantawori okaatzi ikowakaakimiri Tajorentsi, eerorika ikowaeyimini itsipateeyimini, imaninteeeyemini rika

ikantemi: "Tee pikameethatzi". Eejatzi ikijanteeyemironirika paap-  
atziyanaka, omaanta ikimoshiryaaakayemi Pawa. Tema nopoñaaka naaka  
jenokinta, nokoñaataapaaki jaka kipatsikika.

<sup>23</sup> Aririka ikijeeeyemini, pikimoshireperote, pikanteeyeni:  
"Kameethawee". Tema aritaki kameetha ipinaperotemi Pawa jenokinta.  
Kyaaryo riraga itakaantaworini ikijeeeyakirini riraga kamanantayitzirorini  
iňaani Tajorentsi paeraniperorona.

### *Ikenkithatakotakiri Jesoshi ashironkaachani iinja*

<sup>24</sup> Eenitatsi paashini eejatzi ikantakiriri Jesoshi:

—Omaanta riraga ashaagantachari, ikimoshirewentziro rowaagawo  
iroňaaka: monkaataka, rowashironkaeya rirori iinja.

<sup>25</sup> Eejatzi rowashironkaeyani iinja riraga kimoshirewenteeyawitaworini  
iroňaaka rowanawopaeni, tema ari iňaakiro iinja itashe.

Rowashironkaya iinja shironteeeyacharini iroňaaka: iinja rowashire-  
teyanakaani eejatzi riragaeyaani.

<sup>26</sup> Aririka iroňaaka iňaaperoeyemini maawaeni atziri, iinja osheki  
pashironkaeya: tema riraga itakaantaworini paerani iňaaperoeyashitarini  
riraga amatawiteeyiririni.

### *Ikowaki Jesoshi anintaperoteri kijayiteerini*

(Mt. 5.38-48; 7.12)

<sup>27</sup> Eejatzi ikanteeyakirini riraga Jesoshi:

—Pikemijanteeyawakinani nokantemiri: pinintaperoteri eeroka kijeey-  
imirini, pikaminthayeri.

<sup>28</sup> Pamaneri Tajorentsi ramitakooyerini maawaeni kantzima-  
teyakimirini, eejatzi maawaeni kijeeyimirini.

<sup>29</sup> Aririka ipajawootemi, pishineteeyaari ipajawootemi eejatzi jakakiroka.  
Aririka raapithatemiro pipewiryakogo, piperi paashini piithaari eejatzi.

<sup>30</sup> Aririka ramanakotemiro oetarikapaeni, piperi. Aririka raapithatemiro  
powagawo, eero pikowakoteeri eejatzi.

<sup>31</sup> Aririka pikowaki ikaminthayeri paashinipaeni, eejatzi eerori  
pikaminthayeri irirapaeni.

<sup>32</sup> Apatzirorika pinintaperotashiteeyarini maawaeni nintaperoeyimirini  
eerori, tema monkaataka okaatzika pantakiri: tekatsi ikantya ipinatemiri  
Tajorentsi. Tema riyotzitari riraga kaari aapatziyariri rirori inintaper-  
oeyakirini riraga nintaperoeyiririni rirori.

<sup>33</sup> Eejatzi okimitaka roori: apatzirorika pineshironkatashityaari neshi-  
ronkapiintzimiri eerori, tema eejatzi monkaataka okaatzika pantakiri.  
¿litaka pikoyiri ipinatemiri Tajorentsi? Eejatzi riraga kaari aapatziyariri  
Tajorentsi ikamitheeyirini kamitheeyiririni rirori.

<sup>34</sup> Aririka pikowaki roepiyeeemi pipakiriri atziri, tema monkaataka:  
¿pikenkithashiryaaakama ipaemi eejatzi Tajorentsi? Tema eejatzi ipakiriri  
riraga kaari aapatziyariri irira oetarikapaeni, eejatzi ikowaki roepiyeeeniri  
okaatzti ipawitariri.

<sup>35</sup> Rootaki nakanantakimiri pineshironkaeyerini eeroka kijeeyakimirini,  
pikamintaante, pipashitatityaarni ashironkaenkari: eero  
pikenkithashiryaa aririka imatero roepiyeeemi. Aririka pantero  
iroka, aritaki ipinataperotakimi Tajorentsi kameetha, eejatzi  
itomintaperoeyemini. Tema kameetha ipinkathariwenantzi rirori janta  
jenokinta. Kyaaryo ikamitheeyakirini piyaathateeyawitaririni, riraga  
kaari kameethateeyatsini.

<sup>36</sup> Ineshironkataperotantzi Tajorentsi: eejatzi pikimitakooyaarini eerori pineshironkatante.

*Eero pikantawentziri paashinipaeni*  
(Mt. 7.1-6)

<sup>37</sup> Eekiro ryaatatyyee ikantakiri Jesoshi:

—Eero pikantakowentashitari atziri, eejatzi eero pikantashitari: “Eeniro rantani”, ikantzimikari Tajorentsi: “Eeniro pantani eerori”. Eero pikijawentziri atziri rantayitzirini inta pikaminthayeri: panterorika iroka eero ikijawentzimiro riraga Tajorentsi pantayitzirini eerori, inta ikaminthayemi.

<sup>38</sup> Aririka pipayiterini ashironkaenkari koetyeemotayitaririni, eejatzi ikimiteemi rirori Tajorentsi: ipayitemironi maawaeni koetyeemotayitakimirini eerori. Noshiyakaawentemiro: tee ithañaaneentawo ipaperoitemi; inta kameetha rotenakero, ipatzitakotero, rowintaaperotero, ranonkayitakaaneentakawo ipashitemiri. Omaanta aririka eechonkiini pikaminthaaante, eejatzi eechonkiini ikaminthayemi eerori. Aririka pikaminthaaantaperote osheki, eejatzi osheki ikaminthaaaperoetemi eerori.

<sup>39</sup> Roojatzi roshiyakaawentakiniriri Jesoshi, ikantakiri:

—¿Arima imatakiro kaari kokichaatsati rakathateri ikaateeyinira paashini kaari kokichaatsati intentawakaya? Eero imatziro: eenitatsirika omoo jaga, tema ari ipariyeeyakini.

<sup>40</sup> Apaani riyotaanewo tee ranaakotziri iyoteeriri riyoperote. Omaanta aririka ithonkakiro rishitooryataperotaki, aritaki ikimitakotanakyaari iyoteeriri.

<sup>41</sup> ¿Itaka pikijawenantariri pisheninka rantayitzirini? Piyotakotawakyaata eerori aamaashitya eerokarika maperotakirori kaari kameethatatsi, eeniro osheki pantani. Okimitaka pikantawitakaririra pisheninka: “Otyaakyatirimpi opaneki kipatsi”, omaanta eerori, eeniro tyakaayatakimiri antawo inchapanki, konompyaatoteencharira pokiki.

<sup>42</sup> Okameethatzima pikanteri: “Ajaaty, nosheninka, nagaemiro pityaakyawo”. Tema piyotakotya eenitatsi inchapanki otzikaakimiri eerori pokikira. ¿Tsika pikantyaaka paanteeyaanariri ityaakyawo pisheninka? ¡Pamatavitak! Pikowawitaka pikimitakotyaarimi kameethaperotzinkari. Ñaakiro, pityaawo pookiro eerori antawowa inchapanki konompyaatoteencharira pokikira, roojatzi paminaperotaneerika, ari pamitakoteri pagueniri ityaakyawowa pisheninka rokikira riori.

*Inchato kameethari eejatzi inchato kaari kameethatatsi*  
(Mt. 7.17-20)

<sup>43</sup> Eenitatsi paashini roshiyakaawentakiniriri Jesoshi, ikantakiri:

—Aririka okameethate inchato, eejatzi okimitztaka okithoki roori okameethatataki. Rooma teerika okameethatzai inchato, eejatzi okimitztaka okithoki roori tee okameethatzai.

<sup>44</sup> Aririka añero okithoki inchato ayotzi tsika okantari inchato roori. Tema rootaki ayoteeyantaworini inchato rooperori, aririka okameethate okithoki. Aririka pikowaki pithote chochoki, ¿arima piyaataki janta kawanaki? Eero piyaatzi, tema piyotakiro tee okithokitantawo komashiki kawana; eejatzi okimitztza tsikontochee eero okithokitziro oowa.

<sup>45</sup> Aririka akenkithashireero kameethatatsi, akenkithatayiteroni kameethatayitatsirini. Aririka akenkithashireero kaari kameethatatsi, akenkithatakotayiteroni kaari kameethatatsi. Tema añaawaetantakityawo akenkithashiryaayitarini.

*Owatzikantakari apite pankotsi inashitachari kipatsi*  
(Mt. 7.21-29)

**46** Eekiro ryaatatyee ikantakiri Jesoshi:

—¿litaka pikantashiwaetantanari: “Nowinkatharite”? Tee pikemijantaperotanora.

**47** Iroñaka noshiyakaawentemiri tsika ikantari aapatzianari. Ike-mawakiro noñaani, ikemijantaperotanakiro: ranteeyakironi maawaeni nokantakiriri.

**48** Ikimitakarini atziri wetsikirori ipanko. Ikiyashiperotakiro inthomaenta, royaankakiro tzinkamintsipanke ityaakitakotakiro kameetha, kijoperotanaki. Okantaka opariyaperotaki inkani roojatzi amaanitapaaaka iñaa. Otatsinkawitapaakwo antawo amaan, omaanta tee aawiyiro: rooma kijoperotaki kameetha tzinkamintsipanke.

**49** Omaanta riraga kaari kemijantaperotanari ikimitakari shirampari wetsikawitachari ipanko, tee ikiyashiperotziro inthomaenta, eejatzi tee ityaakitakoperotziro kameetha. Okantaka osheki amaanitapaaaki iñaa roojatzi otyaantanakawo ipanko ayitanakiri, tee añagaero.

Rootaki ikanteeyakiririni Jesoshi.

## 7

### *Retsiyatakotakiri Jesoshi ronampiri kapitaano (Mt. 8.5-13)*

**1** Ejatzi ipiyanaa Jesoshi janta Kaperinawooki.

**2** Janta nampsitsiki ari ijeki kapitaano. Rirotaki oroomajatzi, kaari joriyo. Ikantaka imantsiyataki ronampiri, roowiteencha ikamemi. Riraga kapitaano osheki inintaperotziri ronampiri.

**3** Ikemakotakiri Jesoshi itajonkantaki, roojatzi rotyaanantakariri aataperoteenchari joriyyopaeni ikantakiri:

—Pikamantakiteri Jesoshi ipokanakiita jaka retsiyatatakitenari nonampiri.

**4-5** Ikantaka rareeteeyapaakarini, ikantaperoeyapaakirini:

—Piyaatashiteri. Ikameethaperotzi riraga kapitaanonta, osheki ininteyakaeni aaka joriyyopaeni. Riwetsikakaantakaeniro pankotsi apiyotan-tapintyari. Okameethatzsi petsiyatakoteniri ronampiri.

**6-7** Roojatzi royaateeyanakirini. Okaakitapaaki inampi, itonkiyotawakari paashini rotyaantanewo kapitaano. Ikamantapaakiri, ikantziri:

—Eenitatsi iroka ikantakiri nowapitaanote: “Nopinkathataperotakimi, rootaki kaari niyaatanta notonkiyotemi. Rooma naaka tee nokameethatzsi, rootaki kaari nokowanta pipoke nopankokika. Niyotaki pikowakirika pet-siyatakoteri nonampiri, aritaki retsiyatatakote.

**8** Ejatzi naari eenitatsi kantanari oetarika nanteri, ejatzi nokimitzita naari nojoraarote eenitatsi nomperateeyakarini. Nokanteririka joraaro: ‘Piyaate’, ari ryaatanaki. Nokanteririka: ‘Pipoke’, ari ipokanaki. Ejatzi nokimitziri nonampiri rirori, aririka nokanteri: ‘Iroka panteri’, ari rantakiro”.

**9** Ikemantawakawori Jesoshi okaatzi ikantakaantawakiriri, ari rotsikanatanakari. Roojatzi ipithokashiteeyantanakarini oyaateeyakiririni, ikanteeyanakirini:

—¿Pikemakiroma iroka ikantakirika riraga oroomajatzi? Tekatsi noñe nojoriyyotzinkarite apaani kimitakotyarini rirori: osheki rameentakina.

**10** Roojatzi ipiyanteeyanaani rotyaantanewo kapitaano ipankoki. Iñaapaatziiri ronampiri, etsiyatakotanee.

*Rowañagaeri Jesoshi kamawiteenchari janta Nayikinta*

<sup>11</sup> Paashini kitejiri riyaatanaki riraga Jesoshi janta Nayiiki, itsipateeyakarini ronampiripaeni eejatzi osheki paashini oyaateeyiririni.

<sup>12</sup> Rokaakinteeyapaakawoni nampsiti, roonthakowentakari inatakoetapaaikiri kaminkari, ikitateeterimi. Rinirowa kamaki roori oemi, eejatzi apintzite otomi tekatsi paashini. Oyaatakowentakiri otomini, otsipateeyarini osheki onampijatzi.

<sup>13</sup> Iñaantawakawori Awinkatharite, osheki retakotawakawo, ikantawakiro: –Eero piraakotari pitomi.

<sup>14</sup> Riyaatashitakiro kajo inatakotanteetakariri, ipampitapaakiro. Ikatziyakaapaakari natakotziriri. Ikantakiri Jesoshi kamaentsiri: –Ewankari, pipiriintee.

<sup>15</sup> Roojatzi ipiriinantanaa, ikotyaatanaka; ñaawaetanee. Roojatzi ikanantawo riniro:

–Irika pitomika añaanee.

<sup>16</sup> Rotsikanateeyanakawoni atziripaeni iñaanteeyawakawoni, ithaawaeyanakini, ikanteeyanakini:

–Tema ikameethaperotaki Tajorentsi. Rotyaantakaeniri kamanantzirorini iñaani. Kyaaryo, itajonkawentakae, ikaminthagaeyirini aapatziyeyayaririni.

<sup>17</sup> Roojatzi ikemakoeyantakaririni maawaeni joreeyajatzi, eejatzi othotaanaka ñaagantsi paashinikipaeni nampsiti.

*Irira Jowa Kaawoshitantsiri rotyaantakiri riyotaanewo Jesoshiki  
(Mt. 11.2-6)*

<sup>18</sup> Ikanta ikemakotakiri riraga Jesoshi riyotaanewopaeni Jowa, riraga kaawoshitakotziniriri Tajorentsi. Riyaatashiyakirini, ikamtapaakiri rantayitakirini rirori. Riraga Jowa, ikaemakiri riyotaanewo apite.

<sup>19</sup> Roojatzi rotyaantakiri Awinkathariteki, ikantawakiri:

–Piyyatakite Jesoshiki, pojampitakiteri pikanteri: “¿Eerokama Rotyaantane wo Tajorentsi naamagaeyakarini? ¿Eeniroma paashini naamagaeyaarini?”

<sup>20</sup> Ikanta rareeteeyapaakarini rirori, ikantapaakiri:

–Rotyaantakina riraga Jowa, ikantana: “Pojampitakiteri Jesoshi: ¿Eerokama Rotyaantane wo Tajorentsi naamagaeyakarini? ¿Eeniroma paashini naamagaeyaarini?”

<sup>21</sup> Omaanta tee rakawakiri rirori, inta rantzi retsiyatatakotayitzirini osheki mantsiyatayitsirini, eejatzi rowawijaakotayitakirini osheki kyaantariri kamaari rajankaneki. Eejatzi raminakaayiteerini osheki kaari kochaatatsini.

<sup>22</sup> Roojatzi ikantakiri riroripaeni:

–Iroñaaka pipiyanee pikamantapaeri Jowa okaatzira pikemakinari eejatzi piñaakotakinari nantziri. Pikamantapaeri naminakagaeyakirini riraga kaari kokichaawitacharini, nokatziyatzyatakagaeyakirini riraga kijopookiwitacharipaeni, netsiyatakotakagaeyakirini riraga pathaawitacharipaeni, nokemakagaeyakirini riraga amashitachari inthomaenta ikempita eejatzi nopiriintayitanerini kamawiteencharipaeni. Eejatzi niyotakagaeyakirini owashironkaawitacharipaeni tsika ikantya rowawijaakotanteeyaariri riraga Tajorentsi.

<sup>23</sup> Riwershiyaaakanakimi maawaeni kaari theenkanari naaka.

*Irira Jesoshi ikantzi: “Ikameethaperotaki Jowa”  
(Mt. 11.7-15)*

<sup>24</sup> Ikanta ipiyeyanaani riraga rotyaantanewo Jowa, omaanta eeniro ijeekanaki Jesoshi ikenkithatakagaeyanakirini piyotawentakariri. Ikenkithatakotanakiri riraga Jowa, ikanteyanakirini:

—Paerani piyaatapiinti janta tekatsinta atziri ipanko pikemijantapi-intziri rirori. ¿Itaka piyaatashiteeyantakitaririni? ¿Rootakima piyaatashitan-tarirpi kikemijanteri ñaawaetashitachari? Tee iñaawaetashita.

<sup>25</sup> ¿Itaka piyaatashitantaperotariri piñeeri? ¿Piyaatashitantakitariri piñaakitzirima atziri kithaatawori owaneenkatachari kithaarentsi piñaperotachari? Teewee. Pamine, riraga kithaatawori owaneenkatachari isheninkatakari pinkathari, riweshiryaaawentawo rowaagawo jeekatsiri ipankoki pinkathari. Omaanta riraga Jowa tee ikimitakotari rirori.

<sup>26</sup> Ajaaty, pikamantena: ¿itaka piyaatashitatziri? ¿Rioma piiitziri kamanantzirori iñaani Tajorentsi piyaatashitantakitariri? Tema kyaaryo ikamanantziro, omaanta ranaakoperoeyakirini paashinipaeni kamanantzirori iñaani Tajorentsi.

<sup>27</sup> Tema piyoteeyironi riraga Tajorentsi ikenkithatakotzitakarini rirori Iwaperiteki paerani, ikantzitakinari: "Notyomi, notaanteri iinja jewatem-ini ikenkithatakapaakiri joriiyopaeni, ikanteri: 'Pikenkithashireeyaani, pijeeki kameetha, eero pantziro paashini kaari kameethatatsi, paamayari Awinkatharite, kaakitaki' ". Kyaaryo, rirotaki riraga Jowa Kaawoshitantsi ojankinatakotziteetakariri paerani.

<sup>28</sup> Tema ranaakoeyakirini irira maawaeni paashinipaeni kamanantatsiri: imatakiro maawaeni ikowakaakiriri Tajorentsi, rootaki iñaaperotantakariri irira ikameethatzsi. Omaanta iñaaperotaperotakiri kameetha Tajorentsi maawaeni ipinkathariwentaperoeyirini.

### *Ñaanakowenantsiri itheenkaeyakirini Jowa eejatzi Jesoshi (Mt. 11.16-19)*

<sup>29</sup> Ikanta ikemaeyakirini osheki atziri ikantakiriri Jesoshi. Ikeman-takariri, ikanteyanakini:

—Kyaaryo, tema ikameethaperotaki Tajorentsi.

Eejatzi ikaateeyakirini kemaeyakiririni riraga piyotayitziririni iyorkite eekiro iperi oroomajatzsi, tema ikaawoshitakotayitawakinirini Tajorentsi Jowa chapinki.

<sup>30</sup> Omaantakya riraga warijeeypaeni eejatzi riraga iyotaantayitzirorini Iwaperite Tajorentsi tee ikowaeeyini ranteniri rirori ikowakaawitariri: tema tee riyaatashitziri Jowa ikaawoshitakotantyaariri rirori. Ejatzi tee ini-motziri ikantawitariri Jesoshi.

<sup>31</sup> Ikantzi eejatzi:

—¿Itaka noshiyakaawenteniriri irikapaeni kaari raapatziyantana? Tee ikoyi ikenkithashiryaaanteenta. ¿Itaka ikimitakari?

<sup>32</sup> Irira noshiyakaawenteeyerini eentsi, ñaathawaeteeyacharini pankotsiki okaankiityeera. Ipoñaanaka apaani ikantanakiri: "Apaniroeni no-jonkawaetawita omaanta tee poyaatana, tee pomampaawaeta. Nowashire-takotawitariri kamaentsiri, omaanta eeroka tee pitsipateeyanan powashire-takoeyaarini".

<sup>33</sup> Naakiro, riraga Jowa itzitapiintaka, tee ririro kachaja eejatzi paashini shinchaari, eekiro pikanteeyatzii: "Eenitatsi iyamaarite pinkakaakiriri, rootaki kaari rowaperotanta, eejatzi kaari rirantawo shinchaari".

<sup>34</sup> Omaanta naaka nopoñaaka janta jenokinta, nokoñaatapaaki jaka kipat-sikika, roojatzi nowapüntawita eejatzi nirapiintawita. Omaanta eekiro

pikanteeyatziini: "Irinta owaagatzinkari, shinkitzinkari. Itsipatapiinteevakarini piyotapiintziniriri oroomajatz iyorikite, eejatzi itsipatapiinteevakarini paashinipaeni kaari kameethatatsini".

<sup>35</sup> Omaanta nokantemi: "Riyotzi Tajorentsi ari okameethataki maawaeni ikowakaakinari; eejatzi maawaeni aapatzianari, riyotaki okameethataki ikowakaakinari Pawa".

### *Riyaataki Jesoshi ipankoki Shimo riraga warijeeyo rakiyoteri*

<sup>36</sup> Ikanta apaani warijeeyo iwaero Shimo, ikantakiri Jesoshi:

—Pipoke nopankoki, owaeyaani.

Rakanakiri:

—Jee, kaakitakina.

Ikanta riyaateeyanakini, ijekapaaki jeekamentotsiki.

<sup>37</sup> Ari ojeeki tsinani jaka nampitsiki antapiintawitawori kaari kameethatatsi. Okemakotakiri Jesoshi, rowatya jaga ipankokinta warijeeyo, iyaatashitakiri oñaakiteri. Aakotanakiniri kajankaari. Ro aakotantanakanari mapi kitamaari imokaetziri.

<sup>38</sup> Ojeekimotapaakiri okaakini iitziki Jesoshi. Iraaperotapaaka, opitenkantakari oyaaki iitzikira, oshetantanaari oeshi. Roojatzi otihoyzitanakiri iitziki, eejatzi ojeetantakari kajankaari iitziki.

<sup>39</sup> Iñaantawakawori riraga warijeeyo, ikenkithashiryaaanaka: "Rirotakima Rotyaantaneowo Tajorentsi, ari riyotawakiromi iroka tsinanika opampitakiri, eejatzi eeromi ishinetawomi opampiterimi iitziki". Tema osheki antapiintziro kaari kameethatatsi.

<sup>40</sup> Omaanta riyotakiri Jesoshi okaatzi ikenkithashiryaaakari, ikantakiri:

—Shimo, eenitatsi nokantemiri.

Rakanakiri:

—Ajaaty, iyotaanari, pikantenatya.

<sup>41</sup> —Noshiyakaawentemiri. Eenitatsi shirampari ikaatzi apite ireewitziiri. Apaani rireewitziri 500 tenaaryo, paashini rireewitziri 50 tenaaryo.

<sup>42</sup> Irika apiteka atziri ireewitantatsiri tee imatziro ipinakowenteeya ireewitantzatsiri. Ikantaka riraga rireewiteetziri iñaakirira tee imatziro ipinateeri, rootaki ikanantakariri: "Iroñaaka nokoyi netakotemi, eero pipinataana pireewiwitanaga, ikaanteekaata. Apaani rireewitawitakari ee-chonkiini, omaanta riraga paashini rireewitaperotawitakari. Pikantena: ḡninka inintaperoetanakirika ashitariri iyorikite?"

<sup>43</sup> Rakanakiri:

—Naamaashitya riraga ireewitaperotawitakariri, tema rirotaki ikamintthaoperotakiri kameetha.

Ikantanakiri:

—Kyaaryo okaatzi pikantakinari.

<sup>44</sup> Roojatzi raminantanakawo Jesoshi tsinani, ikantziri Shimo:

—Ñaakiro, inkaaganki nokyaapaaki jaka pipankokika, omaanta tee paakameethatawakina: tema tee pipawakina iñaa nokiwantapaakyaworimi noetzi. Omaanta tsinanika, okiwantapaakinawo oyaaki noetziki, eejatzi oshetantakinawo oeshi.

<sup>45</sup> Piwethatantanari, tee pithowootana, omaanta roori, onintanintaatakiro noetzi.

<sup>46</sup> Tee pjeetantanawo noetoki iyeenka, omaanta iroka, ojeetantakinawo noetziki kajankaari.

<sup>47</sup> Pamine, eeniro antayitawitakarini osheki kaari kameethatatsi omaanta nokamintthaakiro, eero nokenkithashiryakoteero antayitzirini:

tema rootaki onintaperotantakinari. Aririka nokaminthayeri antayitawitaworini eechonkiini, eechonkiini intintashiretakina rirori. Omaanta nokaminthaaperoteririka osheki eejatzi intintaperotzitena osheki rirori.

**48** Roojatzi ikantawakiro tsinani:

—Eeniro pantayitawitakarini, omaanta eero nokijantzimiro, eero no-kenkithashiryaakoteemiro eejatzi.

**49** Eeniro ijeekaeyakini owaeyeencharini, rojampitawakagaeyanakan:

—¿Tsikama iitätyaarika irika, ipeyakotakaantakanawori antzirori kaari kameethatatsi?

**50** Omaanta Jesoshi eekiro riyaatatzsi ikantziro roori:

—Pameentakina, rootaki pawijakotantaari. Piyaatee kameetha, pi-weshiryaaperotaneeya.

## 8

### *Oyaateeyakirini Jesoshi tsinani amitakopiunteeyiririni*

**1** Roojatzi Jesoshi ikinakinayitanakini nampitskipaeni. Ikenkithatakagaeyakirini atziri, ikamanteeyakirini:

—Rooteentsi ipinkathariwenteeyemini Tajorentsi.

Kijokiro rowakiri riyotaanewopaeni, ikaatzira 12,

**2** eejatzi oyaateeyakirini tsinanipaeni. Tema apaanipaeni roori ikyaatitawitakawo kamaari, eejatzi paashinipaeni omantsiyatashitawitaka omaanta retsiyatakoeyeeroni Jesoshi. Owaero apaani tsinani Mariya makaraarajato. Ikaatawita kamaari jeekantawitawori 7.

**3** Eejatzi paashini oyaatziriri, owaero Jowaana, iina Kooja. Riraga Kooja, rirotaki amitakotziriri pinkathari Erooreshi. Eejatzi oyaatakiri Sosaana, eejatzi paashinipaeni tsinani. Iroka tsinanipaeni amitakopiunteeyakirini Jesoshi, opapiinteeyakirini koetyeemotakariri.

### *Roshiyakaawentziniri ookakitzirori okithoki teriiko*

(Mt. 13.1-23; Mr. 4.1-20)

**4** Ipiyotawenteeyakarini Jesoshi oshekini atziri, roojatzi roshiyakaawenteeyakinirini ookayitzirorini okithoki teriiko, ikanteeyakirini:

**5** —Riyaataki shirampari rookakitziro okithoki teriiko owantsiki. Apaanipaeni pariyapaentsiri awotsiki: raatzikayitakironi anashitayitacharini, ikanta ipokaeyapaakini konthawopaaeni rowaeyapaakawoni, ithonkappaakiro pariyapaentsiri.

**6** Paashinipaeni pariyapaentsiri mapimashiki. Oparithawitanaka ee-chonkiini, omaanta tee ashepathatakoperotzi, rootaki ojampishitantanakari, intsipaete okamaeyanakin.

**7** Paashini okithoki opariyapaaki kitcheemashiki: oshookawitanaka, omaanta anaanakiro kitcheepaeni, rootaki okamantanakari.

**8** Omaanta paashini opariyapaaki kameethariki kipatsi: oshookanaki kameetha, okithokitaperotanaki osheki.

Rootaki roshiyakaawenteeyakinirini. Roojatzi ishintsithatanakiro ipaante, ikanteeyanakirini:

—Eenitatisirika pikempita pikemantari, powayempitaperotyaawo iroka nokantakimirika.

**9** Rojampiteeyakirini riyotaanewopaeni:

—¿Oetaka kantakotachari poshiyakaawentziri inkaaganki?

**10** Rakanakiri:

—Eerokataki aapatziyariri Tajorentsi, rootaki ikowakaantakimiri irira piyoteeyeroni eeroka kaari riyoteeyini paashinipaeni atziri kaari aapatziyariri. Eeroka niyotakaakimi tsika ikanta Pawa ipinkathariwenteeyaki-mini. Omaanta noshiyakaawenteeyakinirini paashinipaeni: ramineeyawityaani irirapaeni, omaanta eero riyotakoperotziro oetarika iñaawityaari; ikemaeyawityaani, omaanta eero riyotakotziro ikemaeyawitakarini.

<sup>11</sup> Rootaki iroka noshiyakaawentzimiri: rowaga okithoki oshiyakaawentzirori iñaani Tajorentsi.

<sup>12</sup> Iroka awotsi opariyantawitapaakari okithoki oshiyakaawentziri kemaeyawitawakaworini iñaani Tajorentsi: ipokapaaki Kamaari, rookaka-gaeri ikenkithashiryaaawitakawowa iñaani Tajorentsi. Tee ikowakayiri raap-atziyari eejatzi rawijakote.

<sup>13</sup> Rowaga mapipookiteentsiri opariyantawitapaakari okithoki, oshiyakaawentakiri atziri weshiryaawentawitanakawori iñaani Tajorentsi, inimotawitakori. Omaanta tee ikyaryooowentziro: aririka opomeentsitzimotakari raapatziyari, roojatzi rookantaneeyawo.

<sup>14</sup> Iroka kitcheemashi opariyantawitapaakari, oshiyakaawentakiri kemaeyawitakaworini iñaani Tajorentsi, omaanta ikenkithashiryapi-intziro rantapiintziri, iweshiryaawentawo owaagawontsipaeni, eejatzi ikowaki ikimoshirewentashityaawo oetarikapaeni kaari kameethatatsi. Ratsipetashitakawo ikemawitawo iñaani Tajorentsi: tee raapatziyawo kameetha, tee rantaperotziniri rirori ikowakaawitariri.

<sup>15</sup> Omaanta iroka okameethatzi kipatsi oshiyakaawentziri atziri kemaper-otawakirori iñaani Tajorentsi. Ikyaryooowentaperotanakiro kameetha raapatziyaperotanakawo, ikameethashiryaaanaki rajankaneki. Rirotaki antaperotzirori maawaeni ikowakaakiriri Tajorentsi. Tema riyotaakiri paashinipaeni iñaani Tajorentsi.

### *Roshiyakaawentakiniri Jesoshi ootamentotsi (Mr. 4.21-25)*

<sup>16</sup> Enitatsi paashini roshiyakaawentakiniriri Jesoshi riyotaanewo, ikan-teeyakirini:

—Aririka oonthoteri ootamentotsi amineeyantyaarini, ¿arima ataapatako-takiri kantziriki? ¿Arima amanakiri tsikarika? Okameethatzi owakoteri jeñokiini okoñaatantyaaari oetarikapaeni. Rootaki imatantapaakyaaworikyaapaentsirsira iñaapaakiro oetarikapaeni jeekatsiri inthomaenta.

<sup>17</sup> Okimitaka iroka iinja okoñaatanaki maawaeni amanayitawitarini iroñaaka riyoteeyanakironi maawaeni okaatzi anteeyakirini.

<sup>18</sup> Paamayawowa okameethatzi pikemaperoeyawakinani piyoteeyantey-yarini. Eechonkiini piyotaki iroñaaka, omaanta aririka pikemaperoena, nothotyeeyemironi niyotakaaperoyemini. Aririka piitakaashiwita piyotzi, eero pimatziro paapatziyawo niyotaawitakimirkka, eejatzi ari pipeyako-takiro okaatzi piyotawitari eechonkiini: tekatsi piyotzimaetaneeya.

### *Riyaatashiteeyakirini isheninkapero Jesoshi iñeeri (Mt. 12.46-50; Mr. 3.31-35)*

<sup>19</sup> Okantaka iyaatashitantanakari Jesoshi riniro, otsipateeyanakarinirirentzipaeni. Rareeteeyapaakan pankotsiki janta ijekakinta rirori, omaanta tekatsi ikantapaakya rontsirokaeyapaakyaarini: rookagaeyakirini oshekipaeni atziri.

<sup>20</sup> Ikamanteetakiri Jesoshi:

—Okowapaakimi piniro, eejatzi parentzipaeni. Ojeekapaaki janta inkokironta.

<sup>21</sup> Omaanta rakanakiri:

—Ninirontakawo maawaeni aapatziyaperoeyakaririni Tajorentsi, maawaeni antaperotziniriri ikowakaakirori. Eejatzi maawaeni aapatziyariri riroteeyakini yeeyipaeni, choenipaeni.

*Romaerintakiro Jesoshi tampyaa ejatzi omoetonkaari inkaare  
(Mt. 8.23-27; Mr. 4.35-41)*

<sup>22</sup> Paashini kitejiri rotetanaka Jesoshi pitotsiki, itsipateeyakarini riyotaanewopaeni. Ikantakiri:

—Thame amontyagaeyaneeni intatsikeronta inkaare.

<sup>23</sup> Ikantaka ryaatakoeyawitanakani, aakotanakirii tampyaa. Jatakotaki niyankyaani, ari janta opataki pitotsi imaanaki Jesoshi. Roojatzi omapokaeyakirini antawo tampyaa, otetaatapaakawo iñaa pitotsiki, rooteentsi itsitsiyakoeyenimi.

<sup>24</sup> Roojatzi ikaakantanakari riyotaanewopaeni ikantakiri:

—¡lyotaanari! ¡Pipiriinte! ¡Rooteentsiwee atsitsiyakoteeyeni!

Ari itzinaanaka, roojatzi rojantzikaantakawo tampyaa, ipeyeero omoetonkaari: opeyaperotanaa kameetha.

<sup>25</sup> Ikantziri riyotaanewo:

—¿Itaka kaari pameenteeeyantanani?

Ithaawanteeyanakarini, eejatzi rotsikanateeyanakarini. Ikantawaka-gaeyanakanai:

—¿Ninkama irika? Omaerintakirori tampyaa, eejatzi omoetonkaari: ipeyeero. Tee añaapiintziri kimityaarinii irika.

*Rookaeniri Jesoshi atziri iyamaarite  
(Mt. 8.28-34; Mr. 5.1-20)*

<sup>26</sup> Ipoñaanaka Jesoshi Karireeyaki, roojatzi rareetapaaka intatsikeronta: janta Karaarakri.

<sup>27</sup> Raatakotapaaka, rayiiteeyapaakini kipatsiki. Iñaapaakiri atziri kyaantawitariri kamaari: ojamanitaki ijekamerikitzi tee ikithataawo iithaari. Tee ijeki pankotsiki, inta ikinakinamerikitzi janta kaminkarimashiki.

<sup>28</sup> Iñaantawakariri Jesoshi, rotziwerowashitawakari, roojatzi icheraakaantanakari iyamaarite ipaantekira shirampari, ikantakiri:

—¿Itaka poñaashirenkantanari? Niytawakimi: eerokataki Itomi Tajorentsiperio jeekatsiri jenokinta. Eero powashironkaana.

<sup>29</sup> Rootaki ikaemantanakari, ithaawantawakari Jesoshi, riyotaki kamaari rotyaantatyeri. Riraga shirampari ojamanitaki ijekantakari kamaari, ik-inakaapiintziri tsikarikapaeni. Roojatapiinteetawitari rakoki eejatzi iitziki karenathaki, omaanta osheki ishuntsitakaakiri kamaari, ithatyakiro karenatha roojotanteetayitaririni. Aririka ithatyaanakiro, ishiyakaanakari kamaari janta teenta ijeki atziri.

<sup>30</sup> Rojampitakiri Jesoshi:

—¿Oetaka piwaero?

Rakanakiri:

—Nowaero Oshekyaantzi.

Rootaki iitantakari Oshekyaantzi ijekantakari inthomaenta oshekini kamaari.

<sup>31-32</sup> Ari ijeki janta tyonkaarikiini osheki chaancho rowaeyani. Riraga kamaari ikanteeyakirini Jesoshi:

—Eero potyaanteeyanani jaawikinta otsitenikaakitzinta inta nokowaki potyaanteeyenani janta chaanchoki, nokyaantapaakyaari rirori.

Ikantanakiri:

—Piyaateeyeni.

<sup>33</sup> Roojatzi rookaeyantanaarini shirampari, ishirinkashitanakari chaanchopaaeni, roojatzi ishiyeeyantanakanri rioripaeni ipariyeeyanakini impeetaki, ipiinkaeyapaakini inkaareki, motoririri, motoririri. Tsitsiyeyapaakini maawaeni.

<sup>34</sup> Riraga shentawitariri chaancho iñaantawakariri, ishiyeeyanakani janta nampsitsiki ikamanteeyerini isheninka eejatzi jeekaeyatsirini owantsiki.

<sup>35</sup> Roojatzi ipokaeyantanakanri atziri raminerri riraga kyaantawitakariri kamaari, oetarika awijimotakiriri. Iñaapaatziri, tekatsitanee, tee ishinkiwentanaa, ijekae kameetha Jesoshik. Ikithaataawo imaatha, kenkithashiryaaperotanaa kameetha iroñaka. Ithaawanteeyapaakarini.

<sup>36</sup> Riraga ñaaperotakiriri ikamanteeyawakirini maawaeni inampijatzi okaatzi rantakiri Jesoshi, ithotyaawakiniri.

<sup>37</sup> Osheki ithaawaayanakini maawaeni nampitawori jaga. Rotyaanteey-erini Jesoshi, ikantziri:

—Piyaatee, eero pipokae eejatzi.

<sup>38</sup> Omaantakya riraga kyaantawitakariri kamaari ikantawitakari Jesoshi: —Nokowaki noyaataneemi.

Omaanta ikantziri:

<sup>39</sup> —Eero poyaatana. Aritaki pijeki, piyaatee pipankoki. Pikamanteyapaerini pinampijatzipaeni ikaminthaakimiri Tajorentsi.

Roojatzi riyaatantanaa, ikinakinayitanakini nampsitsiki, ikamanteyakirini inampijatzipaeni:

—Piñaakina: osheki ikaminthagaana Jesoshi.

*Retsiyatakoteero Jesoshi ojokaatzirori iraa eejatzi ipiriinteero rishinto Jaero*

(Mt. 9.18-26; Mr. 5.21-43)

<sup>40</sup> Roojatzi ipiyantanaa Jesoshi, imontyaanaawo inkaare. Royagaeyakirini osheki atziri, raakameethateeyawaerini.

<sup>41-42</sup> Itonkiyotawakari shirampari iitachari Jaero: rirotaki jewatakanatsiri janta pankotsiki ipiyotantapiintarira joriiyopaeni. Rotziwerowashita-paakari iitziki Jesoshi ipinkathatantapaakariri, ikantapaakiri:

—Thame nopankoki, rooteentsi okame nishintyo.

Apinto rishinto, okaataki ojarentsite 12. Roojatzi royaatanakiri, rawitsinagaeyanakirini oyaateeyanakiririni.

<sup>43</sup> Oyaatanakiri eejatzi tsinani ojokaatzirori iraa, okaatakotaki 12 ojarentsite ojokaatakiro. Osheki raawintawitakawo; othonkakiri oorikite aaw-intakaanantari. Omaanta tekatsi materoni etsiyatakoteroni.

<sup>44</sup> Okinashitapaakiri itapiiki opampitzitakiri iithaari okaatapaakira, roojatzi opeyantanaa iraa.

<sup>45</sup> Roojatzi ikantanaki Jesoshi:

—¿Ninka pampitzitakinawori noethaari?

Ikanteeyanakini paashinipaeni:

—Tee nopampitzitzimiro piithaari.

Roojatzi ikantanaki Peetero:

—Iyotaanari, pamine, ikaateeyini atziri osheki rinkiteeyakimini, rawitsineeyakimini. Eekiro pikantanakitzi: “¿Ninka pampitzitakinawori noethaari?”

<sup>46</sup> Omaanta royiikiitakari rirori:

—Eenitatsi pampitzitakinawori. Okamantakina notajorenka: eenitatsi notajonkakowenteri.

<sup>47</sup> Iyotanaki tsinani tekatsi okantya omanapithateri opampitzitakirira iithaari. Ompetatanaka, iyaatashitanakiri, otziwerowashitapaakari, okan-tapaakiri:

—Naakataki antzitakimirori piithaari, rootaki netsiyatakotantaari nojokaawitawoni niraa.

Ikemaeyawakironi maawaeni atziripaeni.

<sup>48</sup> Ikantakiro Jesoshi:

—Tsinani, pameentakina, rootaki petsiyatakotantaari. Piyaatanee kameetha pipankoki, pikimoshiretanee.

<sup>49</sup> Eenirowa ikenkithawaetakayiro tsinani, areetapaaka paashini ikaateyinira ijeki Jaero ikamantapaakiri:

—Kamanaki pishinto. Eero poñaashirenkantari iroñaaka iyotaantatsiri riyaate apankoki.

<sup>50</sup> Ikemawakiri Jesoshi, roojatzi ikanantanakari:

—Eero pikantashiryaa. Aririka pameentena, ari añaagae pishinto.

<sup>51</sup> Ari rareeteeyapaakan i pankotsiki. Ikantzi Jesoshi:

—Eero eeroka pikyeeyapaeni: intakya rirori kyaatsini Peetero, Jowa, Jantyaako, iri, eejatzi iniro, ari ikaate.

<sup>52</sup> Eenirowa riraakoeyakwoni osheninkapaeni, rowashiretakoeyakawoni. Ikanteeyakirini Jesoshi:

—Eero piraakoeyawoni: tee okamaperotzi, inta omaatzi.

<sup>53</sup> Ishirontawenteeyanakarini, tema riyoteeyakini kamaperotaki.

<sup>54</sup> Roojatzi roerikawakotapaakiro, ishintsithatapaakiro ipaante, ikantzi:

—jEwankawo, pipiriintanee!

<sup>55</sup> Roojatzi opiriinantanaa. Ikantakiro iniro:

—Pipero owanawo oyaata.

<sup>56</sup> Ashitaanitachari ari rotsikanatanakari ikantanaki:

—jPamine! jlmatakiro ipiriintziro kaminkawo!

Omaanta ikantakiri Jesoshi:

—Eerowa pikamantakowaetana iroñaaka okaatzika piñaakiri.

## 9

*Rotyaantakiri Jesoshi riyotaanewo ikenkithatakagaeyerini atziri  
(Mt. 9.35-38; 10.5-15; Mr. 6.7-13)*

<sup>1</sup> Ipiyoteeyakirini Jesoshi riyotaanewo 12, imatakagaeyerini itajorenkaki, itajonkakowenantyaariri paashinipaeni, ikanteeyakirini:

—Nokowaki pookakaakowenteeyerini atziri kyaantawitariri iyamaarite, pimateri pookeri maawaeni kamaaripaeni, eejatzi petsiyatakoyerini maawaeni mantsiyatayitsirini.

<sup>2</sup> Iroñaaka piyaateeyeni. Pikinakinayitanakini, pikamanteeyerini atziri: “Rooteentsi ipinkathariwenteeyemini Tajorentsi”. Eejatzi petsiyatakotayiterini mantsiyatayitsirinipaeni.

<sup>3</sup> Nokantemi, tekatsi paanaki: eero payi paashini pimaatha, pikotzi, pithaate, powanawo, piyorikite, pipewiryakogo, apatziro pikithaatakarika.

<sup>4</sup> Ninkarika aakameethatawakimini ari pijeekapaaki.

<sup>5</sup> Eerorka raakameethateeyawakimini jeekatsiripaeni, powaaganakya, eejatzi poteakontatanakya piitzikira riyotantyaari eero pipiyashitari eejatzi. Pikanteeyanakirini: “Iroñaaka tee pikemijantana, ari rowashironkaemi Tajorentsi iinja”.

<sup>6</sup> Roojatzi riyaatanteeyanakan, ikinayitanakini nampitskipaeni. Ikamanteeeyakirini atziri tsika ikanteeyaka rawijakotanteeyaari. Eejatzi retsiyatayiteerini mantsiyatayitsirini.

*Riraga Erooreshi ikowaki iñeerii Jesoshi  
(Mt. 14.1-12; Mr. 6.14-29)*

<sup>7</sup> Ikanta riraga pinkathari Erooreshi ikemakotakiri rantayitakirini Jesoshi, itajonkantayitakini. Tee riyotzi oetarika ikenkithashireeyaari. Ikanteetayitzini: "Irira Jesoshitsatsiri rirotaki Jowani: piriintaachari".

<sup>8</sup> Ikantayitzini paashinipaeni: "Roñaagantapaa eejatzi Iriiyashi". Paashini kantayitatsirini: "Piriintaa paashini kamanantzirorini iñaani Tajorentsi".

<sup>9</sup> Omaanta ikantzi Erooreshi:

—Nothayaakaantakiri Jowani: kamataaki. Omaanta, ¿ninka irika ake-makoeyakirini itajonkakowenteeyakirini atziripaeni? Nokowaki noñeri.

*Ikaatzi 5.000 shirampari ipakiri Jesoshi rowanawo  
(Mt. 14.13-23; Mr. 6.30-46; Jowa 6.1-15)*

<sup>10</sup> Ikanta ipiyeeyanaani rotyaantanewo Jesoshi, ikamanteyapaerini rantayitakirini. Rothatagaeyaneerini ragaeyaneerini riyotaanewopaeni janta Wetheeraki.

<sup>11</sup> Omaanta riyoteeyakini atziri jatanaki, roojatzi royaateeyantanakarini. Riraga Jesoshi riwethateeyawakarini riyotagaeyakirini tsika ikanta Tajorentsi ipinkathariwenteeyakirini. Eejatzi retsiyatkoeyakirini mantsiyariipaeni.

<sup>12</sup> Okantaka otsiteniityaanaki, ipokashitapaakiri riyotaanewopaeni, ikanteeyapaakirini:

—Paminerotya, kaankiityaaki jaka. Potyaanteeyerini atziri iroñaaka nampitskipaeni: raminantyaari imagaeyantyaarini eejatzi rowaeyantyaarini.

<sup>13</sup> Omaanta ikantawakiri:

—Pipaeyerini eeroka rowaeyaarini.

Ikantanaki:

—Tekatsi nopaeyeririni. Pamine, okaataki jaka paa apawakooni, eejatzi apite mereto. ¿Pikowakima niyaateeyenii namanantakiteniri rowaeyaarini maawaeni irikapaeni? Eenitatsi oshekini atziri.

<sup>14</sup> Aamaashitya ikaateeyini shirampari 5.000 ipiyoteeyakani. Ikantziri Jesoshi:

—Poejeekaeyerini maawaeni: pinashitayitaarini ikaatayiteni 50 piyotachani, eejatzi paashinipaeni ikaate 50. Eejatzi ikimiteeyakyaani maawaeni.

<sup>15</sup> Ari ikanteeyakirini, roejeekaeyakirini.

<sup>16</sup> Roojatzi roerikantakawo Jesoshi paa, eejatzi mereto. Raminanaki jenokinta, ikantziri Iriri: "Ariwee, Pawa, pipakinawo nowanawo". Roojatzi ipantakari riyotaanewo, ikantakiri:

—Aja, poshirinkeniri riraga piyoteeyeencharinira.

<sup>17</sup> Rowaeyakanii maawaeni, ikemaeyapaakanii. Roojatzi raantayitaawoni tzimagaantapaentsiri, roteteero kantziriki. Okaatzi riyekiteeri 12.

*Ikantziri Peetero: "Eerokataki Jesoshi riraga Rotyaantanewo Tajorentsi"  
(Mt. 16.13-23; Mr. 8.27-33)*

<sup>18</sup> Paashini kitejiri ryaatanaki apaniroeni Jesoshi ikenkithatakaeri Iriri. Riyoshiitanakiri raanakiri riyotaanewoperopaeni 12. Roojatzi rojampitan-takari:

—¿litaka ikenkithashiryaaakoperotanari ajoriyyotzinkaritepaeni? ¿Tsikama noefaperotaka naari?

<sup>19</sup> Rakanakiri:

—Ikantayitzini apaanipaeni: "Rirojatziita Jowani kaawoshitantaw-itacharini, piriintaacha". Irira paashini ikantzi: "Rirojatziita Iriiyashini, oñaagantapaacha eejatzi". Irira paashini ikantzi: "Rirojatziita paashini kamanantzirorini iñaani Tajorentsi, piriintaachari".

**20** Roojatzi rojampitantanakari rirori ikantanakiri:

—Omaanta eeroka, ñtsika pikanteeyinika?

Rakanakiri Peetero:

—Eerokataki Rotyaantanewo Tajorentsi naamagaeyakarini.

**21** Omaanta ikantaperoeyirini:

—Eerowa pathawayitawo pikamanantawaetzi, pikante: “Jesoshi rirotaki Rotyaantanewo Tajorentsi, riraga Owawijaakotantsini”.

**22** Kyaaryo, nopoñaanaka jenokinta, nokoñaatapaaki jaka kipatsikika omaanta osheki nokemaatsitya paata. Itheenkayenani aataperoteenchari, jewatayitzirini, ñaanakowenantatsiripaeni, iyotaantzirori Iwaperite Tajorentsi, maawaeni. Ikanteeyenani: “Kaari irira Jesokirishito”. Rowamaakaantena, okaate kitejiri 3, nopersiintanee eejatzti.

*Ikantzi Jesoshi: “Poyaataperoeyanakinani: eero piperawenteeyawoni”  
(Mt. 16.22-28; Mr. 8.32-38)*

**23** Roojatzi ikanteeyantakarini Jesoshi maawaeni:

—Pikowaeyakinirika poyaataperoeyanakinani, otzimatye pookap eroeyanakironi oetarikapaeni inimoteeyawitzimirini eerokapaeni pantziri, inta maawaeni kitejiriki pipomeentsiwenteeyaaawoni nokowakagaeyakimirini naari, omawitya rowamaanteetemiro, omawitya ikijanteetemiro.

**24** Aririka pantawaetaawentashitya eeroka iroñaaka, eero piyotaperotziri Tajorentsi, eejatzti eero pijeekimoteeri iinja. Rooma aririka piintaperotena naari, eejatzti pipomeentsiwentayitenawoni nokowakagaeyimirini naaka, eero patsipetashitawo, inta piweshiryaaawentyaari iroñaaka Tajorentsi, eejatzti pijeekimotapaeri iinja.

**25** Omawitya pipiyotaperotawityaworika osheki owaagawontsi jaka kipatsiki, omaanta pipeyakotakiririka Tajorentsi, eero piyaatzi jenokinta ijekinta rirori. Tema patsipetashiteeyawitakawoni maawaeni pashtieeyawitakarini. Ñaakiro, tekatsi pikantya pipinateri Tajorentsi ijekakaantemiri janta inampikinta.

**26** Tema naaka poñaachari jenokinta, natziritapaaki jaka kipatsikika. Eejatzti nopersiintanee janta. Roojatzi iinja nopersiinteyya eejatzti jaka kipatsikika, notajorentsiperotapaaki: nokimtyaari Pawa eejatzti maawaeni ronampiri, riraga kameethaperotatsiripaeni. Rootaki okameethatanteeyaaari pikenkithashireeyaanji: aririka pipashiwentakayena naaka iroñaaka, eejatzti aririka pipashiwentakayaawo noñaani, ari iinja nopashiwentakaapaemi eeroka aririka nopyiee.

**27** Omaanta kyaaryo iroka nokamantemiri, eero namatawitzimi: eerorika pikamita, piñaayitawakironi tsika ikanta Tajorentsi ipinkathariwenantzi.

*Ipaashinitzimotakiri Jesoshi ryotaanewo  
(Mt. 17.18; Mr. 9.28)*

**28** Rootzimateentsi awijanaki apaani tominko riyaatantakari Jesoshi tonkaariki, ikenkithatakayiri Iriri. Raanakiri Peetero, Jantyaako, eejatzti Jowa.

**29** Eenirowa ikenkithatakaakiri Iriri, ari omapokashitapaaka ipaashinipoootanaki, eejatzti oshipakiryaaperotanaki iithaari, ochookyaakiri riraga amineeyakiririni.

**30** Romapokashitapaakari eejatzti apite shirampari, ikenkithatakaapaakiri Jesoshi. Riraga ayiitapaentsiri rirotaki Moeseeshini eejatzti Iriiyashini;

**31** tee ikimitee akimiteeyanika aaka, ikameethaperotaki: ikimiteeyakarini jenokijatzi. Ikenkithatakaawakagaeyakan 3: ikenkithatakotakiro ikame iinja Jesoshi janta Jerojareeki.

<sup>32</sup> Osheki ipochokyaayitawitanaka Peetero eejatzi itsipateeyarini, omaanta tee imagaeyini. Ramineeyakirini Jesoshi, ishipakiryaaaki, ikimantanakowo kitejiri. Eejatzi ramineeyakirini riraga itsipateeyakarini.

<sup>33</sup> Rooteentsi ipiyanee riraga apiteteentsiri, ikantziri Peetero:

—Iyotaanari, kameethataki pamakinaka jaka, noñeeyakimini. Iroñaaka nokowaki niwetsikemi 3 pankoshintsi: apaani pashi, apaani rashii riori Moeseeshi, eejatzi apaani rashii riori Iriiyashi.

Ikanta Peetero iñaawaetashitanaka, tee ikenkithashireeya oetarika iñaawaeteri.

<sup>34</sup> Omapokashitapaakari eenirowa ikenkithawaeteeyini menkori, otzika-gaeyapaakirini, roojatzi ithaawaeyantanakan.

<sup>35</sup> Roojatzi ikemaeyakirini Tajorentsi, iñaawaetaki menkorikira, ikantanaki:

—Rirotaki irika notyomi nonintaperotanewo: pikemijanteeyawakirini.

<sup>36</sup> Roojatzi ramineeyantawitanaarini: tekatsi iñaanee, apatziro Jesoshi apaniroeni ikatziya. Ikanta imaneeyakironi okaatzi iñaakiri, ojamanitakotaki, tee ikamantawaetzi. Paatakya ikamantakoteeripa okaatzi iñaakiri.

#### *Retsiyatakoteeri Jesoshi eentsi ikyaatantawitakari kamaari*

(Mt. 17.14-21; Mr. 9.14-29)

<sup>37</sup> Okitejitanaki, roerinkaeyananaki, itonkiyoteeyawakarini osheki atziri.

<sup>38</sup> Ikantawakiri apaani:

—Iyotaanari, pikaminthaaneenari notyomi napintzite, tekatsi paashini.

<sup>39</sup> Rowariyaapiintziri kamaari, ikaemakaapiintziri. Rompetatakaapiintari, ishimoretakaapiintari. Rowashironkaapiintakiri: tee rotsiparyaaneneen-tari.

<sup>40</sup> Nokantawitakari piyotaanewopaeni retsiyatatakoterimi, omaanta tee imatziri.

<sup>41</sup> Rakanakiri Jesoshi:

—Eero imatziri: tema ari pikaateeyini pitheenkanteeyini, rootaki kaari imatantari kamaari; tema pikenkithashiryaaneenta. Osheki neshiwen-takimi notsipatakimi niyotagaeyawitakimironi iñaani Tajorentsi. „Teki-raatama piyotakoperoyironi itajorenka Tajorentsi? Pamakinari pitomi jaka.

<sup>42</sup> Rootaki iniyankitakaawitapaakari itomi, romapokashitanaaka kamaari iparyakaakirii kipatsiki, tereei, rompetatakaakari tonki, tonki. Roojatzi rotyaanantaari Jesoshi kamaari, rowawijaakoteeri eentsi. Ikanteeri Iriri:

—Irika pitomi: awijkottee iroñaaka.

<sup>43</sup> Rotsikanateeyanakarini kameetha maawaeni atziripaeni, ikantawaka-gaeyananaki:

—Tema itajorentsiperotaki kameetha Tajorentsi.

#### *Rapiiteero Jesoshi ikamantakota ikame iinja*

(Mt. 17.21-23; Mr. 9.29-32)

Eenirowa rotsikanateeyakarini, ikanteeeyakirini Jesoshi riyotaanewo:

<sup>44</sup> —Pikenkithashiryaaperotero iroka nokamantemirika. Eero pipeyakotziro. Nopoñaaka naaka janta jenokinta, nokoñaatapaaki jaka kipatsikika, omaanta iinja aritaki raakaanteetakina.

<sup>45</sup> Omaanta tee riyoteeyawakironi ikantawitakariri. Tee ishinetziri Tajorentsi riyotakoeyawakironi. Ithaawanteeyakarini rojampiterimi oetarika ikantawitariri.

#### *Ikantziri Jesoshi riyotaanewo tsika ikantyaari ipinkatharitanteeyarini*

(Mt. 18.1-5; Mr. 9.33-37)

<sup>46</sup> Roojatzi ikantawakagaeyananaki riyotaanewopaeni Jesoshi, raama-gaeyakan, ikantzi:

—Jaka akaateeyinika: ¿ninka anaakotantaatsini ipinkatharitee? ¿Naakama pipinkathateeeyeni?

<sup>47</sup> Riyotakotakiri Jesoshi oetaka ikenkithashireeyakarini. Ikaemakiri eentsi:

—Pipokanaki jaka okaakini.

<sup>48</sup> Roojatzi ikanteeyantanakarini riyotaanewopaeni:

—Paminerri irika eentsi, aapatziyanari. Aririka petakotaari irika eentsika, eejatzi petakotakina naari. Aririka petakotakina naari, eejatzi petakotakari otyaatankinari. Aririka petakotaari paashinipaeni atziri, aritaki pipinkatharitaki iinja.

### *Retsiyatakotantaki paashini aapatziyariri Jesoshi*

(Mr. 9.38-40)

<sup>49</sup> Roojatzi ikanantakari Jowa:

—Iyotaanari, chapinki noñaakiri shirampari janta rowawijaakotayitakirini kyaantawitariri kamaari. Ikamantawitakina raapatziyimi, rootaki imatantarirri rowawijaakotziri. Omaanta tee kijokiro rowaeyeenii aaka rootaki nookakaantakariri rowawijaakoteri kyaantawitariri kamaari.

<sup>50</sup> Rakanakiri Jesoshi, ikantziri:

—Eero pithañaakotari. Irira tee ikijeeyeeni, tema rantakinawo nokowakaakiriri. Rootaki atspateeyantakaririni.

### *Riraga jamaaryajatzi tee raakameethatziri Jesoshi*

<sup>51</sup> Rooteentsi areetya kitejiri ryaatee Jesoshi jenokinta. Apatziro ipoñaanaka ryaatanakiki Jerojareeki.

<sup>52</sup> Rotyaantakiri riyotaanewo, ikantakiri:

—Thame pityaawo janta Jamaaryaki, pamine ajeekanteeyapaakyaaarini.

<sup>53</sup> Ikanta ryaatawitanaka, omaanta riyoteeyakirini jamaaryajatzi ryaatatayte Jesoshi janta Jerojareeki, rootaki kaari ishinetantawakari roojeekawakiri inampiki. Roojatzi ipiyantanaa, ikamantapaeri Jesoshi, ikantziri:

—Eero ishinetee amaye inampiki.

<sup>54</sup> Ikemantawakari Jantyaako eejatzi Jowa, ikantakiri:

—Nowinkatharite, ¿pikowakima nokanteri Tajorentsi itagaeyerini maawaeni jamaaryajatzi? Nokimityaari Iriiyashini paerani: itakaantakirini joraarropaeni kijeyakiririni.

<sup>55</sup> Rookathatanakiri Jesoshi, ikantanakiri:

—Tee okameethatzi akijeri. Tee piyoteeyini eeroka tsika pikantakari: tee pikameethashiretti.

<sup>56</sup> Naaka poñaachari jenokinta, natziritapaaki jakä kipatsikika. Tee ro nopolantya nowamaayiterini atziri, inta nopolantari nowawijaakoeyerini.

Roojatzi rowagaeyantanaani paashiniki nampitsi.

### *Riraga kowatsiri oyaateeyeririnimi Jesoshi*

(Mt. 8.18-22)

<sup>57</sup> Ikanta ikineeyanakini awotsiki, itonkiyotawakari shirampari, ikantawakiri Jesoshi:

—Nowinkatharite, nokowaki noyaataperotanakimi, tsikarika piyaate.

<sup>58</sup> Ikantanakiri:

—Naaka poñaachari janta jenokinta nokoñaatapaaki jakä kipatsikika nowawijaakotantyaariri atziri. Pikemijantawakiro iroka nokamantemiri: riraga otsitziniro eenitatsi imoo imaapiinantari, riraga jenokiweripaeni eenitatsi imasha; omaanta naaka, tekatsi nopolanko nomaanlyaaari.

<sup>59</sup> Roojatzi ikantakiri paashinii atziri:

—Poyaatanakina eeroka.

Rakanakiri ikantzi:

—Nowinkatharite, nokowawitaka, omaanta ikamawakiita pawa. Aririka nokitatanakiri roojatzikya noyaatantanakimi.

**60** Rakanakiri Jesoshi:

—Eeniro ikaateeyini theenkantatsiripaeni, rirotaki kitaterini aririka ika-maki. Omaantakya eeroka, thame poyaatena pikamanteeyeriniita atziri tsika ikanta Tajorentsi ipinkathariwenanteeyerini.

**61** Ikantziri paashini shirampari:

—Aritaki, nowinkatharite, noyaataperotanakimi: omaanta niteeyapaentyaariniita niwethateeypaentyaariniita nosheninkapaeni.

**62** Omaanta rakanakiri Jesoshi:

—Pithapaterorika kipatsi pipankiwaetantyaaari piwankiri, eero paminam-inawaetzì tsikarikapaeni, eero otzipitzipiwaetantanaka pithapatakiri. Eejatzti okimitaka roori: pikowakirika ipinkathariwentemı Tajorentsi, poyaat-aperotena, eero pikenkithashiryapiintziro panteero ejatzti pantapiintaw-itarini paerani.

## 10

### *Rotyaantakiri Jesoshi 72 kenkithatakaanteeyatsirini*

**1** Roojatzi rotyaanteeyakirini Awinkatharite osheki ryotaanewopaeni reewateeyanakini, ikaateeyini 72. Ikantawakiri:

—Piyaateeyini nampsikipaeni nokanteeyakimirini, apite pikantawakaayitanakyaani. Eekiro nimpaaeteemi iinja naari.

**2** Okimitaaka pankirentsi oshekiterika okithoki tekatsiperorika owi-teroni apaatanakya okithoki rooma tee roshekitzi owiiteroni. Eejatzti okimitak iroñaaka eeniro oshekiperi atziri kaari aapatzyiana. Pamaniapiinteri Awinkatharite rotyaanteeyayaaaririni osheki amitakotemini pikenkithatakagaayerini atziri, ryaatanteeyaaarini riori jenokinta.

**3** Pamine, osheki opomeentsitzimoeyemini, osheki rowashironkaeyemini theenkantatsiri: pikimtyaari owisha, rojatekakari manitzipaeni. Iroñaakakya, piyaateeyini pikenkithateeyeni.

**4** Eero paanaki pithaate, piyorikite, pijapatote. Aririka pitonkiy-otawakyaari atziri niyanki, eero pikatziyakaari pikenkithawaetakayiri, omaanta pawijanakiri: apatziro powaanakiro janta nokantakiminta.

**5** Tsikarika pijeekapaaki, pikanteri Tajorentsi ramitakoteri ashitarowi ipanko raapatzyanteneri ijekantyaari kameetha.

**6** Aririka raapatzyena, ari rawijkotee, ijekantyaari kameetha. Rooma erorika raapatzyana tee patsipetashitawo pikenkithatakayiri iñaani Tajorentsi: tema pantakiniri iroka nokantakimiri.

**7** Tsikarika janta pijeekapaaki, aritaki pijeekaeyapaakini. Eero pikinaki-nayitzini pankotsikipaeni. Poyaawo oetarika ipawakimir, ejatzti pirero, maawaeni. Okameethatzi ipawakimi oetarikapaeni koetyeemotakimir: riraga atziri antawaetatsiri ikameethatzi ipineeteri.

**8** Tsikarika pareetapaakya, aririka raakameethatawakimi, powapaakyawo oetarika ipawakimir.

**9** Eenitatsirika mantsiyaripaeni, petsiyatakooyerini. Pikamanteeyerini maawaeni: "Rooteentsi ipinkathariwenteeyemini Tajorentsi".

**10** Omaanta eerorika raakameethatawakimi paashinipaeni atziri, pikanteeyanakirini:

<sup>11</sup> “Pikemaeyawakinani: ikowawita Tajorentsi ipinkathariwentemimi, omaanta tee pikoyi. Tee paakameethateeyawakinani, eejatzi okimitaka, tee paakameethatawakiri Tajorentsi. Iroñaaka pashironkagaeyaani”.

<sup>12</sup> Rootaki nokowakiri pikamanteriri. Naakiro, paerani riraga joroomajatzini imaninteeyakirini Tajorentsi rootaki ithonkanteeyakaririni. Omaanta eerorika raapatziyeyawakinimi atziri iroñaaka, ari iinja ranaakotaperoteri joroomajatzini ikemaatsitaperoteeyaawoni osheki.

*Ikenkithatakotakiri Jesoshi piyattheeyakaririni  
(Mt. 11.20-24)*

<sup>13</sup> Eejatzi ikantzi Jesoshi:

—Ashironkaamatsiterini korashiinijatzi eejatzi wetheerajatzi: osheki iñaakoeyawitakinawoni notajonkantapiintaki, omaanta tee raapatziyeyawakinani. Rirorikami ñeeyakinanimi tziirojatzi eejatzi shiroojatzi, tema ari ikenkithashireeyaneeyaanimi, rookaeyeeronimi kaari kameethatatsi ranteeeyirini.

<sup>14</sup> Kyaaryootaki rowashironkaeyakirini Tajorentsi iinja tziirojatzi eejatzi shiroojatzi, rowashironkagaeyerini, omaanta rowashironkaaperoeyerini osheki korashiinijatzi eejatzi wetheerajatzi.

<sup>15</sup> Eejatzi ikenkithashireeyawitakan kaperinawoojatzi ryaateeyenimi janta Jenokinta, omaanta eero ryaateeyini inta ryaateeyeni janta paa-mariki jeekatsiri inthomaenta kipatsi ikemaatsityawa.

<sup>16</sup> Niyotaanewo, pikemaeyenani. Aririka raapatziyeyawakinimi atziri-paeni, eejatzi naari raapatziyeyakinani. Aririka itheenkayawakinimi eerori, eejatzi ikimitzitakina naari itheenkayakinani. Eejatzi okimitaka, aririka itheenkayenani naari, tema itheenkayelerini eejatzi riraga otyaan-takinari. Iroñaakkaya, piyaaateeyenani.

Ari ikanteeeyakani.

*Piyeyapaani ryotaanewo Jesoshi kaatatsiri 70*

<sup>17</sup> Ikantaka ipiyeyapaani rotyaantanewopaeni Jesoshi, ikimoshireeyapaakini. Ikamanteeyapaakirini:

—Nowinkatharite, riytakina kamaari naapatziyakimi, ikemijantaperotakina. Nomatakirikya notyaanteeyakirini.

<sup>18</sup> Rakanakiri:

—Kyaaryo riraga Jatanaashi ipinkathariwentawitakari iyamaaritzinkarite, omaanta noñeeyakimini pimateeyakirini potyaantakiri kamaari eerori: iroñaaka niyotaki eero ipinkatharitaperotzi Jatanaashi, tema ramitakotakimi Tajorentsi panaakontakariri kamaaripaeni.

<sup>19</sup> Iroñaaka osheki notajonkawentakimi: okimiwitaka aririka paatzikawityaari maanki, eero rowamaemi; eejatzi riraga kitoniro, tekatsi ikantemi. Eejatzi ikijawitemi riraga iwinkatharite kamaari, omaanta tekatsi ikantemi, tema notajonkakowentakimi.

<sup>20</sup> Kyaaryo potyaantayitakirini kamaari, omaanta eero piweshiryaaawentawo iroka, inta pikimoshirewentaperoeyeroni piyaaateeyeni jenokinta, tema rojankinateetakiro piwaero janta.

*Ikimoshireperotaki Jesoshi  
(Mt. 11.25-27; 13.16-17)*

<sup>21</sup> Roojatzi riraga Jesoshi okimoshiretakaaperotakiri Ishire Tajorentsi, ikantziri Iriri:

—Pawa, osheki pikameethataki. Pipinkathariwenteeyirini maawaeni jenokijatzi eejatzi maawaeni kipatsijatzi. Eeniwitacha atziri iyotawitachari, riytayitawitawoni oetarikapaeni, omaanta pimanapithatakiri piñaani: tee

riyoteeyironi tsika ikantyaari rawijakotanteeyaari. Omaantakya piyotaaperoeyakirini riraga kaari iyoperowitachari: itheenkaeyawitakarini ijoriyyitzinkarite omaanta pikowakaaperoeyakirini rirori riyote.

**22** Roojatzi ikanteyakirini piyotawenteyakirini:

—Riotaki Pawa matakaakinawori maawaeni. Apaniroeni riyoperotana Pawa, tekatsi paashini iyoperotenani. Eejatzi nokimita naari, apaniroeni niyoperotziri, tekatsi paashini iyoperoterini: omaantakya ninkarika nokowakaakari noñaayeri, riotaki yoterini Pawa eejatzi.

**23** Ipithokashitanakari rirori riyotaanewopaeni, apaniroeni irira ikan-teeyakirini:

—Piñeeyakinani eeroka nomatakiro kaari iñaaapiinteevini paashinipaeni atziri. Okameethatzi pikimoshirewentena, eejatzi ikimoshirewentena paashini ñaaayitanarini.

**24** Ikowaeyawitakanani paerani riraga kamanantzirorini iñaa Tajorentsi iñeenami notajonkantayiteni, omaanta tee iñaa notañonkantayitzini. Eejatzi ikowaeyawitani iñeenami riragapaeni pinkatharitayitawitacharini. Eejatzi ikowaeyawitani ikemaeyenanimi, omaanta tee ikemaeyanani. Intakya erokapaeni piñeeyakinani, pikemaeyakinani.

*Ikowaperotzi Tajorentsi anintashireperoteri, eejatzi anintashireperoteri maawaeni atziri*

(Mt. 22.34-40; Mr. 12.28-34)

**25** Paashini kitejiri ipokashitakiri iyotaantzirori Iwaperite Tajorentsi rowaga rojankinarini Moeseeshi. Ikowawitaka ikompitakayaarimi Jesoshi, ikantawitapaakari:

—Iyotaanari, ¿tsika nokantyaaka nojeekantyaari jenokinta, nokanteetaty-eayaani?

**26** Ikantawakiri:

—¿Oetaka okantziri rojankinarini Moeseeshi? ¿Oetaka okantzimiri?

**27** Rakanakiri:

—Okantana: “Okameethatzi anintashireperoteriroña Tajorentsi maawaeni ajankaneki. Riotaki Awinkatharite. Eejatzi kameetha akyary-oowenteri aapatzyaari. Eejatzi kameetha akenkithashiryaaperotyaari tema ikameethaperotaki. Eejatzi paashini ikowaki Tajorentsi: akimifaaka anintaa aaka, eejatzi akimiteri paashinipaeni atziri, anintaperoteriroña”.

**28** Ikantanakiri:

—Kyaaryooperotaki iroka pikantakirika. Aririka pimonkaatero iroka erori, aritaki pijekae jenokinta pikanteetatyeyaaani.

*Ikantakotziri jamaaryajatzi, neshironkatziriri joriyyo*

**29** Omaanta riraga iyoperowitawori rojankinarini Moeseeshi tee inintashireperotziri maawaeni atziri, rooma ikowawita imaniromi. Rootaki rojampitanakariri Jesoshi:

—¿Ninkama atziri nonintaperooyerini?

**30** Ikantawakiri:

—Noshiyakaawentemiro. Ikinanaki apaani joriyyo awotsiki. Ipoñaanaka Jerojareeki roerinkawitanaka taapiki raretantyaami nampsiki iitachari Jerikoo. Icantaka niyanki awotsi romapokapaakiri apaanipaeni koshintzi roerikapaakiri, shepik. Roojatzi raatonkoryaapaakiri, raapithatapaakiri iithaari, osheki ipajapajaatakiri tag, tag, tag. Roojatzi rookamerikanakiri awotsiki, rawijanakiri. Rooteentsi ikamemi riraga owashironkaenkari.

**31** Ikantapaaka ikinapaaki awotsiki ñaanakowenantatsiri, rirowitaka joriyyo eejatzi. Iñaawitapaakari rirori rowashironkagaetakiri, roshinampitapi-thatanakiri, tee retakotanakari.

<sup>32</sup> Eejatzi ikimitaka irira paashini shirampari riraga icharineeteni Rewini. Tema maawaeni irirapaeni ramitakotziri ūaanakowenantatsiri janta Tajorentispankoki. Ikinapaaki awotsiki, iňawitapaakari rirori, eejatzi roshinampitapithatanakiri, tee retakotanakari rirori eejatzi.

<sup>33</sup> Omaanta ikinapaaki paashinijatzitsiri atziri rirotaki jamaaryajatzি, roonanewo joriyyopaeni. Ikinapaaki iňapaakitziri rirori, roojatzi retakotan-tapaakari.

<sup>34</sup> Ryaatashitapaakiri raawintapaakiri, eejatzi roojotakotapaakiri rompojeetakirira. Eejatzi eeniro ramakiri iwoorote riraga jamaaryajatzি. Roojatzi raakiri rirori rowankitakiri iwooroteki, raanakiri janta ojeekinta panktsi. Eejatzi janta kameetha inintashireperotanakiri raawintapaakiri.

<sup>35</sup> Okitejitanaki ikowaki riraga jamaaryajatzি ryaate. Ikantanakiri ashita-wori ipanko: "Ajaa, irika korikika. Nokowaki pikamintheeri irika shirampari. Tekirarika imonkaata koriki, paata nopolatapaemi paashini aririka nopyiee".

<sup>36</sup> Ari ikaataki 3 ūakiriri owashironkaenkari awotsiki. ¿Ninka atziri ninta-perotakiriri?

Rootaki rojampitakiriri riraga Jesoshi iyoperowitawori rojankinarini Moeseeshi.

<sup>37</sup> Rakanakiri:

—Tema rirotaki riraga etakotakariri.

Ikantanakiri riraga Jesoshi:

—Eejatzi eerori, pikimityaari: pinintashireperoteri maawaeni atziri.

### *Jesoshi rareeteeyapaawoni Maarita eejatzi Mariyya*

<sup>38</sup> Ari ikinanaki awotsiki Jesoshi, itsipateeyarini Riyotaanewopaeni. Ra-reeeteeyapaakwoni owaanini nampitsi.

Roojatzi janta oňaantawaari tsinani owaero Maarita, okantawakiri:

—Thame pijeekaeyeni nopankoki.

<sup>39</sup> Otsipatapo irento janta opankoki owaero Mariyya. Ojeekimotakiri Awinkatharite iitziki, okemijantawakiri, Riyotaapaakirori.

<sup>40</sup> Rowaga Maarita, oshintsiwaetawakiniri onkotsitayitzinirini rowana-wopaeni. Roojatzi iyaatashitakiri, okantapaakiri:

—Nowinkatharite, pamine, apaniroeni nonkotsitayitzimironi poyaari. Rooma rowaga eentyo, tee amitakotana. Potyaantero amitakotenaata jaka.

<sup>41</sup> Rakanakiro:

—Maarita, osheki pikenkithashiryaaoperotakawo eeroka ponkotsiwaete owanawontsi, eejatzi powameethayiteroni oetarikapaeni. Osheki pikenkithashiryaaakawo. Okameethatawitaa maawaeni iroka,

<sup>42</sup> omaanta eenitatsi apaani kameethaperotatsiri: rootaki iyoyagaanan-takari pirento roori, tekatsi kantawenteroni.

## 11

### *Riyotayiri Jesoshi Riyotaanewo tsika ikantya ramaneri Tajorentsi (Mt. 6.9-15; 7.7-11)*

<sup>1</sup> Paashiniki kitejiri ryaatasi Jesoshi ikenkithatakayeri Ashitariri. Ithonkatapaakiro ikenkithatakayiri Iriri, roojatzi ikantapaakiri apaani Riyotaanewo:

—Nowinkatharite, paerani riraga Jowani Riyotaakiri Riyotaanewopaeni tsika ikantya ikenkithatakayeri Tajorentsi. Eejatzi eeroka iroňaaka nokowaki piyoteena naari tsika nokantya namaneri.

<sup>2</sup> Ikanawakiri:

—Aririka pikenkithatakayeri, ari pikimtero iroka pikanteri:

Pawa, jeekatsiri jenokinta,  
osheki pikameethaperotaki, nokowaki pipinkathariwenteeyenani,  
maawaeni.

Okameethatzi nantteyemironi maawaeni  
pikowakaakinari: nokoyi nokimityaari  
ponampiripaeni jenokijatzinta ranteeyimironi maawaeni pikowakaakiriri.

<sup>3</sup> Pamitakotena maawaeni kitejiriki  
eero okoetyeemotantana noyaari.

<sup>4</sup> Eero pikijawentanawo kaari kameethatatsi nantziri inta  
pilkaminthayena: tema naari nokamintheeyirini maawaeni  
atziri. Eero pishinetziri kamaari rantakayenawo  
kaari kameethatatsi.

*Pikowakaperoteri Tajorentsi koetyeemotzimir, aritaki imatakimiro*

<sup>5</sup> Eejatzi ikantakiri Jesoshi:

—Pamine, niyotaanewopaeni, noshiyakaawentemiro. Aririka piyatashiteri pitsipaminthari tsiteniriki pinetheeri rowanawo. Pikantapaakiri:

<sup>6</sup> “Tekatsi nopawakiriri niyompari owakira rareetapaaka. Nokoyi pipawakina nowakayaariri”.

<sup>7</sup> Aamashity ari ikantawakimimi: “Eero poñaashirenkana, osheki nowochokini. Maawitakina naaka, eejatzi neentsitepaeni, maawaeni. Ashitaka ashitakontsi. Tekatsi nokantya nopiriinte nopantemirori poyaari”.

<sup>8</sup> Ñaakiro, pitsipaminthari powawitari. Tee ikowawita ipiriinte ipantemirori poyaari. Omaanta eekirowa poñaashirenkiri roojatzi ipiriinantanakya, ipawakimiro poyaari pikowakotakiriri. Rooma tee ikoyi poñaashirenkapiinteri.

<sup>9</sup> Eejatzi okimita, aririka pamanapiinteri Tajorentsi, ari ramitakotapiintakimi ipakimi koetyeemotzimir. Pikowakotapiinteri aritaki piñaakiro koetyeemotzimir. Pikenkithatakaapiinteri aritaki ikemakimi, imatakayemiro kameethatatsiri.

<sup>10</sup> Kyaaryo, maawaeni amanapiintziriri Tajorentsi ari ramitakotakiri iñaantyaawori koetyeemotariri. Maawaeni kowakowapiintatsiri riyotaapiinteri iñaantyaawori koetyeemotariri. Maawaeni kenkithatakaapiintziriri ari ikemakiri kameetha imatantyaawori kameethatatsiri.

<sup>11</sup> Ñaakiro, ikowakotemirika pitomi owanawontsi royaari, ¿arima pipawakiri mapi? Ikowakotemirika shima royaari, ¿arima pipawakiri maanki?

<sup>12</sup> Aririka ikowakotemi iithoki tyappa, ¿arima pipawakiri kitoniro? Eero pipawakiri, inta pipaperotawakiri kameethatatsiri royaari.

<sup>13</sup> Ñaakiro, tee pikameethawity eerokapaeni, omaanta piyotzi pineshironkatziri peentsitepaeni. Rooma irintapaeni Ashitakaerí jenokinta ryotaperotiri riori ineshironkaperotee aakapaeni. Aririka pikowakoperoteri, rotyaantemiro Ishire amitakotemini.

*Ikanteetziri riraga Jesoshi rirotaki kamaari*

(Mt. 12.22-32, 12.43-45; Mr. 3.20-30)

<sup>14</sup> Paashini kitejiri iñaakiri Jesoshi shirampari imajontzitakaakiri kamaari, ikyaatantawitakari rajankaneki. Itajonkakowenteeri Jesoshi, rowawijaako-terei, roojatzi iñaawaetantanaa eejatzi. Rotsikanateeyanakarini maawaeni ñeeyakiririni.

<sup>15</sup> Omaanta ikantayitzini apaanipaeni:

—Ramtakotashitakari Jesoshi Wereshewoo: riraga iwinkatharite kamaari, rootaki imatantawori rowawijaako-terei imajontzitakaakirira kamaari.

**16** Ijeekaki paashini theenkiriri Jesoshi, ikantziri:

—Ajaaty, pitajonkante, niyotantemiri kyaaryorika piponaaka jenokinta.

**17** Omaanta riyotakiri rirori ikenkithashireeyakarini. Ikantziri:

—Aririka romanatawakagaeyaani atziri, tema aritaki ithonkawaka-gaeyakaanyaani. Eejatzi aririka ikijawakagaeyaani ashinko, tema ari itsipareeyawakaanakaanyaani.

**18-19** Eejatzi okimita, aririka ikijeeyerinimi Jatanaashi iyamaaritzinkarite, tsika ikantyaari ipinkathariwenantyaariri? Eerori pikanteeyakini iroñaaka: "Rirotaki Wereshewoo amitakotziriri Jesoshi rowawijaakotantariri imajontzitakaeri kamaari". Rirorka amitakotenanimi nowawijaakotziriri imajontzitakaeri kamaari, ¿ninka amitakotziriri pisheninkapaeni rowawijaakotantariri atziri kyaantawitakariri kamaari? ¿Rirojatzima pisheninka eerori kamaari?

**20** Omaanta imatakaakinawo Tajorentsi nowawijaakotantariri imajontzitakaeri kamaari, piyoteeyantyaarini iroñaaka kijokiro rowaeyakimini riraga Tajorentsi, ikowaki ipinkathariwenteeyemini.

**21** Paashini roshiyakaawentakiniriri Jesoshi, ikantaki:

—Pamine, eenitatsirika shirampari shintsitsatsirii ithatyamento, ichekopite, maawaeni, tema ishentaperotziro ipanko. Eero ishinetziro ikoshiteeteri rowaagawo.

**22** Omaanta ipokapaakirika anaakotapaakirini shintsitaperotatsiri, eero imatziro rotsinampaawakiri rirori oetarka ranantapaakyaariri. Tema ari raapithatapaakiri rowamaamentopaeni. Roojatzi ikoshitantanakaaryaari rowaagawo, ipaeyanakirini isheninkapaeni rirori.

**23** Ikijeeyakinani maawaeni kaari inimoteeyirini nantero, rootaki rantawakaantanakari osheki atziri kaari raapatziyantaneena.

### *Ipiyaso eejatzi kamaari*

**24** Aririka ipakagaeri atziri kamaari, okameethatzi ipinkanakiri: rapi-iteerikai eejatzi. Okimitaka iroka: ikinakinayitakini riraga kamaari janta ochempiki, ikowakowawita tsika ijeekantyaari. Omaanta teerika iñee ijeekantyaari, roojatzi ikenkithashiryaaantanaawori ipoñaanakanta, ikante: "Nopiyaneeta janta nopoñaakanta".

**25** Aririka ipiyapae, ifñaapaeri shirampari kimitaka pankotsi, opishitaka eejatzi kameetha okaankiityaaki.

**26** Roojatzi ryaatantaka ikaemerri paashinipaeni iyamaaritzinkarite, ikaatzi 7. Maperori tee ikameethatzi riroriipaeni. Ñaakiro, iroka pankotsi roshiyakawo kyaantawitariri kamaari. Aririka rapiiteeri ikyaanteeeyari, roojatzi imaperotanteeya eero ijeekanee kameetha.

### *Ikantzi Jesoshi: "Ikimoshireeyakini maawaeni aapatziyanari"*

**27** Ijeekaeyakini janta osheki kemaeyakiririni Jesoshi. Ocheraanaki apaani tsinani, okantzi:

—Tema okimoshirewentakimi piniro koñaatakimir!

**28** Omaanta ikantawakiro:

—Jee, kyaaryo, omaanta ikimoshireperoeyakini maawaeni kemaeyirorini iñaani Tajorentsi, eejatzi raapatziyeyari.

### *Ikowakotziri theenkantaniri Jesoshi itajonkante (Mt. 12.38-42; Mr. 8.12)*

**29** Eekiro ipiyotawenteeyatyaarini Jesoshi paashinipaeni atziri. Roojatzi riyotagaeyantakarini, ikantziri:

—Tee pikameethateeyini. Pikowaeyawitani piñeeyenanimi notajonkan-teemi eejatzzi, omaanta eero notajonkantzi. Apatziro pikenkithashireeyaa Jonaashini piyotantyaari:

<sup>30</sup> paerani iniyakiri antari omani. Okaatzi 3 imaaakotaki inthomaenta, roojatzzi ishitowantanaa ipaanteki, ryaatantanaka riyoteeri niniweejatzzi. Tema rotyaantakiri Tajorentsi. Ari nokomiteeya iinja naari piyoteeyantyaarini rotyaantakina Tajorentsi: tema nopoñaaka janta Jenokinta natziritapaaki jaka kipatsiki.

<sup>31</sup> Eejatzzi rowaga iwinkathawoteni sheewajatzzi, oponaaka inteedna kameetha, paashiniki kipatsi. Paerani oponaaka inteedna ökemijanantariri Sharamooni. Okowaki riytakaaperotero riytantaanziri. Pamine, nanaakoperotakiri naaka Sharamooni niyotzi, omaanta eeroka pitheenkayakinani. Iinja, aririka ipiyoteeyerini Tajorentsi maawaeni kamatsiripaeni, ikanteeyemini: “Eenitatsi pantani: pitheenkakiri Notyaantanewo. Rooma roori rowaga iwinkathawoteni sheewajatzzi, tema riro aapatziyakaakaworini okaatzi riyotaakirori Sharamooni”.

<sup>32</sup> Eejatzzi ikimitaka riraga niniweejatzini: raapatziyakari Jonaashini. Ikenkithashireeyanaani, ipakagaeyeeroni kaari kameethatatsi ranteeyawitarini. Nanaakotziri naaka Jonaashini, omaanta eeroka tee paapatziyeyananani. Iinja ikantempi Tajorentsi: “Raapatziyakarini niniweejatzini Jonaashini: omaanta eeroka, iitaka kaari paapatziyantari Notyaantanewo?”

### *Ikenkithatakotziro Jesoshi ootamentotsi (Mt. 5.15; 6.22-23)*

<sup>33</sup> Eejatzzi ikanteeyakirini Jesoshi:

—Aririka poonthoteri ootamentotsi, arima pimanakiri tsikarika? Arima potetakiri kantziriki? Tema powapiintziri jeñokiini ijeekapiintzira, pikoñaatakotantyaari.

<sup>34</sup> Iroka oki okimitawitawo ootamentotsi ashi awatha. Okameethatzirika oki, ari añeyakironi oetarikapaeni. Omaanta teerika okameethatzzi, eero añiilo oetarikapaeni, okimitaka akinaki tsiteniriki, tee ayoteeyini tsikarika akinaki. Eejatzzi okimita aririka akenkithashireero kameethatatsiri ari antero kameethatatsiri. Omaanta akenkithashireerorika kaari kameethatatsi rootaki anantyaawori kaari kameethatatsi.

<sup>35-36</sup> Okameethatzzi piyotakotya eeroka paapatziyaperotakaririka Tajorentsi. Pimonkaaterorika iroka, ari piyoperotanaki iroñaaka eero pitheenkimatantee. Tema pikimitakotakari ootamentotsi ootaperotachari. Rootaki ikanteeyakiririni Jesoshi.

### *Ashironkaamatsitemiini ari rowashironkagaeyeemini Tajorentsi iinja (Mt. 23.1-36; Mr. 12.38-40; Rk. 20.45-47)*

<sup>37</sup> Roojatzzi ikantanakiri warijeeyo Jesoshi:

—Thame aate nopankoki, oya.

Roojatzzi royaatantanakari, rowakaapaakari.

<sup>38</sup> Tee ikiwawakota Jesoshi, rootaki rotsikanatantanakariri kameetha warijeeyo.

<sup>39</sup> Ikantanakiri rirori: “Eerokapaeni pikenkithashiryaaakopiinteeeyironi okaatzi piñaayitzirini. Omaanta tee pikenkithashiryaaakopiinteeeyironi oetarika jeekayitatsirini pajankaneki. Pametawo pikiwiropako, piwatha, piithaari, maawaeni. Omaanta tee pookmaetawo kaari kameethatatsi jeekatsirini pajankanekira. Pikimitakari atziri kiwawitawori iwajoni ikiwashitakawo jeñokiini, omaanta inthomaekira eeniro ojeeki owanawontsi opathayitakawoni. Omaanta tee pithonkiro pikiwiropako,

<sup>40</sup> Tee pikenkithashiryaaanteen. Ḷapatiroma riwetsikakiro Tajorentsi pakō? Tema eejatzi riwetsikiro pikenkithashiryaaantari.

<sup>41</sup> Pipashitayitawitarini ashironkaenkari koetyeemowitariri, omaanta tee pikaminthaaperotziri, patsiwakashitakawo pípaki. Omaanta aririka pikaminthaaperoteri paashinipaeni atziri, tema ari pikameethataki.

<sup>42</sup> Pashironkagaeyani eerokapaeni. Kyaaryo pipagaantapiintawitarit Tajorentsi eechonkiini pashi meenta, koraantero, kachaarikishi, omaanta tekira omonkaata ikowakayimiri Tajorentsi. Eeniro pantawitakari kameetha, eejatzi eeniro kaari pantzi. Tee pinintashireperotziri irira eejatzi tee pikaminthaaperotziri paashinipaeni atziri. Okameethatzpi piperi Tajorentsi eechonkiini piwankiri, omaanta eero pipeyakotziro pinintashireperoteri eejatzi pantaperoteniri ikowakaakimiri.

<sup>43</sup> [Ashironkaamatsitemiini eerokapaeni! Aririka ipiyoteeyaani ajoriyyotzinkarite iñaaperotantyaariri Tajorentsi, pikowaeyini ipinkathateeyemini eeroko eejatzi. Aririka pikinayitanakini pankotsikipaeni, pikowaki kameetha raakameethateeyaperotemini atziripaeni.

<sup>44</sup> Kyaaryo, rowashironkagaeyemini Tajorentsi. Pikimitakari kaminkari kitatachari kipatsiki, imanaka; tekatsi yotatsini ari ikineeyini atziripaeni, tee riyoteeyini rootentsimi raatzikakoterimi kaminkari pathagaentsiri. Eejatzi pikimitaka eerori, pimanayitawitawoni kaari kameethatatsi pantayitzirini".

Rootaki ikantakiriri Jesoshi warijeeyopaeni.

<sup>45</sup> Roojatzi ikanantanaka iyotaantzirori rojankinarini Moeseeshi:

—Iyotaantatsiri, okaatzika pikantakiri eejatzi naaripaeni pikijakaakina.

<sup>46</sup> Rakanakiri Jesoshi:

—Jee, eejatzi eerori rowashironkagaeyemini Tajorentsi. Osheki powanaayitakinirini atziripaeni pikowakaaperotakiri imonkaatero, omaanta tee imatziro. Eejatzi pikimitaka eerori: tee pimonkaateeyironi. Eejatzi tee petakotari riroripaeni.

<sup>47</sup> Kyaaryo, pashironkagaeyana. Pimonkaateeyakarini picharinii teni rowamagaeyakirin kamanantayitzirorini iñaani Tajorentsi.

<sup>48</sup> Tema riyotakotakina naaka irirapaeni. Eejatzi eerokapaeni owamaantatsiri. Tee pikoyi eero ka paapatziyena. Ari pitzimitakyaarikami paerani eerori, ari powamagaeyakirinim eerori eejatzi riraga kamanantatsirini.

<sup>49</sup> Riyotakoeyakimini Tajorentsi, ikantzimi: "Notyaanteniri atziri kenkithatakayerini, omaanta rowamaayitawakirini apaanipaeni, irira paashinipaeni ikijawakiri, ikemaatsitakaawakyaa!".

<sup>50</sup> Eenitatsi panteeyakirini maawaeni: pashi powaeyironi powamaantzi. Riraga itakaantaworini powamagaeyerinimi, roojatzi pikanta iroñaka eerori pikowaki powamagaeyerinii aapatziyeeeyakirinii Tajorentsi.

<sup>51</sup> Pisheninkateeyakarini owamaakiririni Aweeri. Eejatzi pisheninkateeyakarini owamaakiririni riraga Jakariyyashi: rowamagaefakiri rirori janta Tajorentspankoki. Eeniro panteeyakirini maawaeni, rootaki rowashironkaawentemiri Tajorentsi.

<sup>52</sup> Pashironkagaeyani eerokapaeni. Piyotaantawitawo rojankinarini Moeseeshi, omaanta pashironkagaeyana: tema pamatawiteeyakirini ajoriyyotzinkaritepaeni. Tee pikowaeyini piyotakoteri Tajorentsi eerokapaeni, eejatzi tee pikowakagaeyirini riyoteeyerini riroripaeni riyoteri irira.

<sup>53</sup> Rootaki ikanteeyakiririni maawaeni, roojatzi ishitowantanaa. Iki-jeeyanakiririni riraga warijeeyopaeni eejatzi riraga iyotaantzirori Iwaperite Tajorentsi, eejatzi eekiro roñashirenkanakitziri, rojampijampitanakiri oetarikapaeni,

54 ikowaeyawitakanī ikompitakayaarimi, ipoñaaakaantyaariri,  
raakaanantyaariri.

## 12

### *Paamagaeyaawoni warijeeyo ranteeyirini (Mt. 10.28-33, 12.32, 10.19-20)*

1 Ipiyotawenteeyakarini Jesoshi oshekiperoroña atziri, rawitsinaawaka-gaeyakani. Roojatz ikanantakari riyotaanewopaeni:

—Paamayaarira warijeeyopaeni, ramatawiteeyiminikari. Roshiyakaawaetashita raapatziyari Tajorentsi, omaanta osheki ramatawitantzi.

2 Liteeyawitakanī tekatsi yotsini ramatawiteeyawitakarini, omaanta iinja aritaki riyotakoeyerini maawaeni atziri rashī rowaeyironi ramatawitanntzi.

3 Eejatzi eeroripaeni, oetarika pomanawitari pikantziri iroñaka, ari ike-makoyeemini iinja. Oetarika pikamantathatantawitariri apaani atziri janta pipankoki, ari itacheronkawaantetanaki ikaemanaki janta ipiyoteeyaninta atziripaeni.

### *¿Ninka athaawantaperotyaari?*

4 Iroñaka, notsipaminthari, nokamantemi: eero pithaawantari riraga atziri kowatsiri rowamaemi. Aririka rowamaemi, omaanta apatziro rowa-mawityaawo piwatha, omaanta eero rowamaero pishire.

5 Omaanta riraga Tajorentsi pithaawantyaari: ikowakirika, rowamaemi ari imatakiro. Omaanta eejatzi ikowakirika rotyaantemi paamariki kaari tsikanitatsini, ari imatakiro. Rirotakikya pithaawantya rotyaantzimikari paamariki.

6 ¿Ipinaperotama iyaanini shiwankitzinkari? Tee ipinataperota, omaanta ryoteeyirini Tajorentsi: tee ipeyakoeyirini apaani.

7 Eejatzi okimtaka, riyoperoeyakimini eerori: riyyotziro eejatzi tsika okaatz piishipaeni. Ikempoyeeyakirini shiwankitzinkari iyaanini, tema erokapaenii ikempoyaaperoeyakimini. Eero pikantashiryaaashita, omaanta piweshiryaaawentyaari Tajorentsi.

8 Eejatzi piyoteeyakironi iroka nokantemiri: eero pipashiwentaakaana, aririka pikamanteeyerini paashinipaeni atziri paapatziyakina, aritaki nokamantakiri Pawa eejatzi ronampiripaeni janta jenokinta pisheninkatakinna. Tema naaka poñaachari jenokinta, nokoñaatapaaki jaka kipatsikika.

9 Omaanta pipashiwenta kayenarika jaka kipatsiki, eejatzi eerori nopashi-wentakayemi naari janta jenokinta iinja.

10 Aririka ikantzimatena atziri, ari imatero Tajorentsi ikaminthayeri, aririka raapatziyeeena iinja, eero ikenkithashireero ranteeyirini. Omaanta aririka ikantzimateeyeroni Ishire Tajorentsi, eero ikaminthayimaetari Tajorentsi. Tema tee ikoyi rirori raapatziyena.

11 Aririka ragaetemi janta pankotsiki ipiyotantapiintarira joriiyopaeni, eejatzi janta kantakowenantatsiriki, eejatzi janta jewatatsiriki, eero pi-thaawanteeyarini. Eero pikenkithashiryaaashitapiintawo: “¿litaka nokanteri?”

12 Aririka ragaetemi, ro iyoteemini Ishire Tajorentsi oetarika pikanteriri.

### *Kyaaryoowa, piñaawenataperotawokari osheki owaagawontsi*

13 Roojatz ikanakirri apaani shirampari Jesoshi:

—Iyotaanari, ipanakirri pawani yeeyika maawaeni tzimimoeyaw-itiririni. Tekatsi ipena naari. Pikanteri yeeyi ipagaanteena naari rowaagawo.

**14** Rakanakiri:

—Eero nokantziri. ¿Naakama kantakowenantatsiri, nakanantyaariri pirentzi?

**15** Roojatzi ikanteeyirini maawaeni piyotawenteeyakaririni:

—Kyaaryoowa: piñaawenaperotawokari rashitayitarini paashinipaeni, eero oweshiryaaoperotakayimi.

**16** Roojatzi roshiyakaawenantanakanari, ikantziri:

—Eenitatsi iipatsite ashaagantzinkari. Osheki onintzi pankirentsi kameetha oshookayitanakini iwankiripaeni.

**17** Monkaatapaaka rowiitantlyaawori okithokipaeni, ikempoyaantyaaworimi opankokipaeni roori, omaanta iroñaaaka yeekitapaaki. Tee omonkaatapaakawo paashini.

**18** Ikenkithashiryaaaka ikantzti: “¿Tsika nokanteroka? Tekatsi nowantyaawori maawaeni. Jaa, niyotaki iroñaaaka tsika nokantero: noshiryakaanttero pankochaanikira, nantakaantee antawopero pankotsi nowantyaawori maawaeni nowankiripaeni, eejatzi maawaeni nowaagawo.

**19** Oshekitaki iroñaaaka maawaeni, tekatsi koetyeemoteenani. Ojamani okantya, eeroota othonkitaa nowanawo; iroñaaaka nomakoree osheki ojarentsi, eero nantawaetzitaa. Iroñaaaka nowapiintya, noshinkitapiintya, niweshiryaaawentyaawo maawaeni tzimimotanari”. Rootaki ikenkithashiryaaakari ashaagantzinkari.

**20** Omaanta ikantzti Tajorentsi: “Tee piyotakota. Iroñaaaka tsiteniriki pikame, roojatzi ¿ninkarika ashiteeyawoni maawaeni tzimimoeyawitzimirini?”

**21** Ñaakiro, tee riyotzi maawaeni kowawitachari roshekeero rowaagawo jaka kipatsiki. Okameethawita ijekimi kameetha ijekanteeyaarimi iinja janta jenokinta. Tema rootaki ikowakiri Tajorentsi.

### *Pikanteri Tajorentsi ikempoyaawentemi*

(Mt. 6.25-34)

**22** Eejatzi ikantakiri Jesoshi riyotaanewo:

—Eero pikenkithashiryaaakoperotapiintawo tsika paye poyaari eejatzi pikithaatyaari.

**23** Tema rirotaki Tajorentsi owañaakimirí. ¿Opomeentsitzimotarima iroñaaaka ipemi poyaari eejatzi pikithaatyaari?

**24** Pikenkithashiryaaakotaari tsika ikantari tsimeri jenokiweripaeni: tee ipankitaanta eejatzi tee ikempoyaanta rowanawo pankotsiki, omaanta ipapiintziri Tajorentsi royaari. Pamine, ikempoyaawenteeyakirini irira tsimeripaeni jenokiweri tema eejatzi eerori ari ikimitemi.

**25** ¿litaka patsipetashitantawori pikenkithashiryaaapiintawo oetarikapaeni? ¿Piitzima aririka pikenkithashiryaaapiintawo eekiro piyaatatayee pantaripenthakiitanaki? Eerotaatyaaami. Eejatzi ¿arima pimatakiro pojanthayero pañaantari? Eero pimatziro.

**26** Ñaakiro, patsipetashitakawo pikenkithashiryaaapiintawo. Tekatsi paye.

**27** Pikenkithashiryaaakotaawo tsika okanta oteyakipaeni. Tee othamaetaanta, eejatzi tee ontyaanta oethaari, omaanta okameethaperotaki. Paerani osheki rowaneenkataní Sharamooni, omaanta tee ikimiperotawo oteyakipaeni: anaakotakiri, okameethaperotaki irowa.

**28** Ñaakiro, rowaneenkatakira Tajorentsi oteyakipaeni inchashi. Eechonkiini ojeekawita, omaanta intsipaete ojampiyane. Omaanta eerokapaeni ojamani pijieki: tema piyotzi ikenkithashiryaaoperotakimi eerori. ¿litakaya pitheenkantakariri?

<sup>29</sup> Eero pikenkithashiryapiintawo oetarika poyaari, eejatzi oetarika pireri: ikemakayemi Tajorentsi.

<sup>30</sup> Tema rootaki rantapiinteeeyirini kaari yotziri Tajorentsi ikenkithashiryapiintawo oetarika rowapiinteeyaarini. Omaanta eeroka, ryotzitakimiro Pawa Tajorentsi maawaeni koetyeemotakimiri.

<sup>31</sup> Eerokapaeni pityaawo pikenkithashiryakoperoteri Tajorentsi eejatzi pipinkathataperoteri irira, aritaki ipakimiro maawaeni koetyeemotakimiri.

<sup>32</sup> Niyotaanewo, osheki inintaperotakimi Pawa Tajorentsi: ikowaperotaki ipinkathariwenteeyemini, ikamintaaperoeyemini.

<sup>33</sup> Pipimantero pashitayitarini, pipayiterini ashironkaenkari owinawo. Aritaki ipinatakimi Tajorentsi janta jenokinta. Ojeekaperote powaagawo janta: eero opathagae, eero opitsitee, eero ikoshiteeteemi, eero rapeyeero kaero.

<sup>34</sup> Aririka ojeeki powaagawo jaka kipatsiki, osheki pikenkithashiryakiro jeekeyitatsirini kipatsikika. Omaanta aririka ojeeki powaagawo janta jenokinta, aritaki pikenkithashiryakopointakiri Tajorentsi.

*Piwetsikaeyaani, tee piyotzi tsika okaate ipokashiteeyemini Tajorentsi  
(Mt. 24.45-51; 25.1-13; Mr. 13.33-35)*

<sup>35-36</sup> Eekiro riyaatatziki ikanteeyakirini Jesoshi riyotaanewo:

—Paamagaeyaarinini piwinkatharie, piwetsikashireeyaaani. Pikim-takotyaari riraga ronampiri ashitawori ipanko. Riyaataki riraga ashitawori iineeri isheninka raye iina. Raamagaeyaarinini ronampiripaeni janta ipankoki. Aririka rareetapaeya ikowapae rashitaryaawaeniri, eejatzi ikowapae iñaapaero owetsikayitakani kameetha. Aririka otsitenitanee, ikowaki oorentya ipanko. Eejatzi ikowaki ikakite ronampiripaeni, ramitakotantawaeyaariri onampitariri.

<sup>37</sup> Aririka iñaapaeri riwetsikaeyakanini maawaeni. Riraga ashitawori ipanko ijeekakagaeyerini maawaeni ronampiripaeni, rowakagaeyapaeyaarini.

<sup>38</sup> Omawitya tee riyoteeyawityaani tsika okaatzi ipokanteeyaari: aririka niyanki tsiteniri, rooma rootzimateentsirika okitejite. Omaanta roojatzi iñeyapaerini ronampiri riwetsikaeyakanini maawaeni, ari ikimoshireeyakanini irirapaeni.

<sup>39</sup> Piyotakoteeyakironi iroka nokamantemiri: aririkami riyotemi ashita-wori ipanko rooteentsi ipoke tsiteniriki koshitantatsiri, tema aritaki ikaki-takimi, eero imatziromi ikoshiterimi. Omaanta tee riyotzi tsikarika okaate ipokantyaari koshintzi.

<sup>40</sup> Eejatzi nokimitawitari koshintzi, tee nokamantzimi tsikarika okaate nopolakteeyari. Paerani nopoñaaka jenokinta, nokoñaatapaaki jaka kipatsikika. Iinja nopiaatae eejatzi. Pikenkithashireeyenani, paamagaeyeenani: nomapokapae mikari.

*Onampirentsi kyaaryooowentzirori ikanteetziriri eejatzi kaari kyaary-oowenteroni*

<sup>41</sup> Ikanta rojampitakiri Peetero:

—Nowinkatharite, ḥapatziroma poshiyakaawenteeyanawoni naakapaeni kameetha? Eejatzima rirori, ḥpikowakima poshiyakaawenteeyerini maawaeni atziri kameetha?

<sup>42</sup> Rakanakiri:

—Nokenkithatakagaeyatziiirini maawaeni kyaaryooowentzirori nokowak-agaeayakiririni. Ikimitaka iwaatorote atziripaeni, ikowakaakiri apaani ronampiri ikyaaaryooowenteniri rowakaapiintyaari paashinipaeni ronampiri-paeni. Roojatzi riyaatantaka iwaatorote tsikarika.

<sup>43</sup> Aririka rowakaapiintakyaari kameetha, ipokaerika iwaatorote, riweshiryawentapaakyaaari.

<sup>44</sup> Ikantapaakiri: "Kameetha pimonkaatakinawo. Iroñaaaka eeroka amineyeyenaworini maawaeni tzimimotanari".

<sup>45</sup> Omaanta, ikantateyerimi riraga ratzirite: "Eero ipokitaa nowaaatorote". Apatziro ipoñaanaka ikijakijaatanakiri onampirentsipaeni, ipajajaatakiri: shirampari, tsinani, maawaeni. Iperataka osheki, ishinkishinkitashitaka. Omaanta tee imonkaatziniri ikowakaawitanakariri iwaatorote retakotaarimi paashinipaeni.

<sup>46</sup> Paashiniki kitejiri ipokae iwaatorote, romapokapaeri. Rowajankitaapaakiri ronampiri, ikimitakaanteri paashinipaeni kaari monkaateroni ikawitanatanakariri.

<sup>47</sup> Naakiro, riyotawitakawo ronampiri ikowakaayitawitakaririni iwaatorote, omaanta tee ikemijantaperotziri, tema rootaki ipajatakanantyaariri, tema osheki ipajapajaatakaperoteri.

<sup>48</sup> Omaanta eero rowajankitaaperotziri kaari yotzinkari. Tekirarika riyoteeri iwaatorote oetaka kameethatatsiri ranteri eero ipajatashitari osheki. Omaantakya riraga yoperowiteenchari rirotaki ipajeeteri kameetha.

*Inja osheki ikijawakaawenteeyenani atziripaeni  
(Mt. 10.34-36)*

<sup>49</sup> Eejatzi ikantzi Jesoshi:

—Atayerorika owantsi, taanaka maawaeni. Okimiwitaka iroka, nopolakika jaka kipatsikika nokenkithatakagaeyakirini maawaeni atziri iñaani Pawa, eejatzi nokamawenteri. Apaanipaeni raapatziyawakawo omaanta paashinipaeni tee raapatziyawo inta ikijashitawakina roojatzi rowamaantakinapa iinja. Nokowakaawitakari ranteromi iroñaaaka.

<sup>50</sup> Osheki nokenkithashiryakotaka iroñaaaka: rooteentsi nokemaatsiperotyaawo katsiri.

<sup>51</sup> ¿Piitashiteeyawitanima nopolashiteeyakirini atziri nomaerinteeyerini, kameetha raakameethatawakaantyaari? Teewee, omaanta ikijawakaanteeyenani.

<sup>52</sup> Apaani pankotsi ijekantyaaworika apawakooni atziri, riraga 3 ipoñashitanakya ikitjanakiri riraga paashini apitera. Riraga apitera ipiyatakotzitanakyaari rirori.

<sup>53</sup> Apaani atziri ikitjanakiri itomi, eejatzi itomi ipiyatakotzitanakyaari iriri. Tsinani okijananakiro ishinto, eejatzi rowaga ishinto opiyatakotzitanakyaawo iniro. Tsinani okijitanakawo ewatyeero opiyatakotzitanakyaawo ayiilo.

*Pikenkithashireeya piyotantyaari ryoteemiro Tajorentsi  
(Mt. 16.1-4; Mr. 8.11-13)*

<sup>54</sup> Roojatzi ikantteeyirini piyotawenteeyaririni:

—Aririka piñaakiro antawo tampyaa amakiro menkori otsitenipithatanaki, pikanteeyini: "Kaakitaki inkaniwee". Tema piyoteeyakini opariyatye inkani.

<sup>55</sup> Aririka piñaakiro opiteyaryaanaki piyogo, pikanteeyeni: "Rooteentsi oniyankite ojarentsite". Tema eejatzi piyoteeyakini.

<sup>56</sup> ¡Amatawitananiril! Piyotakoeyawitawoni tsikarika okantya jenoki, eejatzi kipatsi. Tema piyoteeyakini opariyatyeerika inkani. Omaanta tee pikowaeyini piyoteeyeni opomeentsitzimoteeyemini iinja.

<sup>57</sup> ¿Litaka kaari pikantakotantari okaatzi kyaaryooperotatsiri?

<sup>58</sup> Aririka raakaanantemiri atziri koriki pireewitziriri, aririka raanakimi kantakotantsiriki. Tekiraatarika rareetakayemi, piwetsikaeri pikanteri:

"Eero pikijana, ari nopolateemi iinja". Rooma eerorika pikantziri rootaki romonkyaaagakaanantemiri omonkyaaagamentotsiki.

<sup>59</sup> Aririka romonkyaaakimi, ipinatakaaperotakimiri maawaeni koriki okaatzi pireewitziriri. Eerorika pipiri, eero roemishitowiteemi.

## 13

### *Pookaero kaari kameethatatsi pantapiinteyirini*

<sup>1</sup> Roojatzi ipokaki paashini atziripaeni, ikamantapaakiri Jesoshi:

—Riyaateeyawitakan karireeyajatzipaeni janta Jerojareeki rowamaenirimi Tajorentsi ipira. Riraga kaaripero Peraato rowamaakaanteeyakirini karireeyajatzipaeni janta okaankiitziira ipankoki Tajorentsi, tsikarika rowamaapiintzinrinta ipirapaeni. Ari rowamaakiri itsipatakari eejatzti ipirapaeni. Riraa atziri otsipateeyanakawoni rashira ipira.

<sup>2</sup> Rakanakiri Jesoshi:

—¿Piitakaakirima riraga karireeyajatzti rirotaki antaperoeyakirorini kaari kameethatatsi ishinetantakariri Tajorentsi rowamaakaanantakariri Per-aato?

<sup>3</sup> Nokamantemi: tee ro ikamantari. Omaanta eerokapaeni, kyaaryowa: eerorika pikenkithashiryaa, eejatzi eerorika pookaero kaari kameethatatsi pantapiinteyirini, aritaki pikimiteeyakyaarini riroripaeni pithonkakya.

<sup>4</sup> Eejatzi paerani otziroryaantakari antawo mapipango janta Shiroeki, atsinakaeyakirini 18 shirampari, ikamaeyakini. ¿litaka ikamaeyantakarini? ¿Rantaperotakitziroma kaari kameethatatsi ikamaeyantakarini?

<sup>5</sup> Nokantzimi: "Tee". Tema ikimiteeyakarini maawaeni paashini atziri. Eejatzi nokantzimi eerori, pikimityaari riroripaeni eeromi pilkenkithashireeyaani, pookaero kaari kameethatatsi pantapiinteyirini. Eerorika pantziro iroka eerokapaeni, aritaki rotyaantakimi paamariki kaari tsiwakanitatsini.

### *Rowaga iyeera kaari kithokitatsini*

<sup>6</sup> Roojatzi roshiyakaawenteyantakanarini iroka, ikantzi:

—Ipankitakiro atziri iyeera janta roowamashiteki. Ojamanitaki ojeekaki, tee okithokitzi. Riyaatapiintawita raminee okithoki, rowiitemi: omaanta tee okithokitzi.

<sup>7</sup> Roojatzi ikantziri riraga thamaetziniriri: "Pamine, okaataki 3 ojarentsi nopolakiintawitaka nowiitemi okithokipaeni, omaanta tee okithokitzimaeta eechonkiini. Aminashita okatziya. Pichekero, nopankiteeta oetarikapaeni kameethatatsiri".

<sup>8</sup> Rakanakiri thamaetziniriri: "Ari okantawakaata iroñaaka iroka ojarentsika. Noshewatawakiroota kipatsi amethopanetantanakyaari, eejatzi nowapiinteniro itziya pipira, kameetha otzimantyaari okithoki.

<sup>9</sup> Rooma okithokitakirika paashini ojarentsi, tema kameetha eerokya achekiro. Rooma eerorika okithokitzi, roojatzi nochekantakyaawo".

### *Retsiyatakotakiro saawaroji Jesoshi kyaantawitawori kamaari*

<sup>10</sup> Paashiniki saawaro Riyotaantaki Jesoshi janta pankotsiki ipiyotantapitarira joriiyopaeni.

<sup>11</sup> Enitatsi janta pankotsiki apaani tsinani kyaantawitawori paerani kamaari itsiyojoemitzitakaakiro. Okaatafotaki 18 ojarentsi otsiyojoemitzitawita, ashi owakiro otsiyojoemitzitaki: tekatsi okanteyya otampatsikatan-teeyaaari.

<sup>12</sup> Iñaantakawori Jesoshi, ikaemakiro:

—Pipokanaki, iroñaaka netsiyatakoteemi.

<sup>13</sup> Ipampitawakiro, roojatzi awijakotantanaa. Kameethatanee, okatziyanaa. Okantanaki:

—Retsiyatakotaana Tajorentsi, tema ikameethaperotaki.

<sup>14</sup> Riraga jewawentzirori janta pankotsiki ipiyotantapiintarira joriyyopaaen ikiyanakiri Jesoshi. Ikanteeyanakirini piyoteeyeencharini:

—Okameethatzti antawaeteeyeni 6 kitejiri, omaanta aririka omonkaata-paakya kitejiri 7 okameethatzti amakoryaaperoeyanakini. Eero antawaet-zimaetantawo. Aririka pikowaki petsiyatakaoeyeeni, pipoke paashiniki kite-jiri, eerokya pipoki saawaroki.

<sup>15</sup> Ipiyawaantetanakari Awinkatharite, ikantanakiri:

—¡Amatawitantanir! Osheki pamatawitantashitaka. Tema pantawaeteeyini eero ka saawaroki. Pamine, aririka imiritaki piwaakate saawaroki, tema ari pithatakoryaakoteri paanakiri janta ojeekinta iñaa. Eejatzi pilkim-itzi piwoorote, maawaeni. Kyaaryo, pineshironkateeyirini pipirapaeni saawaroki.

<sup>16</sup> Omaanta kaari pipira iroka tsinanika, inta pijoriyyotzinkawote. Paeranitaki ikyaatawitakawo kamaari kimitaka othatakotaka roori: tema okameethataki akaminthayero saawaroki, etsiyatakoteero.

<sup>17</sup> Ikemantawakawori iroka, ipashiwenteeyanakanmaawaeni kijeeyakiririni Jesoshi. Omaanta riroripaeni paashini atziri riweshiryaaawenteeyanakarini Jesoshi, ikanteeyanakini:

—Okameethateeyakini rantayitakirini Jesoshi.

*Jesoshi roshiyakaawentziro moshitaaja eejatzi tapiyakaawori paa  
(Mt. 13.31-34; Mr. 4.30-32)*

<sup>18</sup> Roojatzi ikantzi Jesoshi:

—¿Piyoteeyiniima tsika ikanta Tajorentsi ipinkathariwenantzi? ¿Tsika nokanteroka noshiyakaawenantemirori?

<sup>19</sup> Oshiyakawo okithoki moshitaaja ipankitziri shirampari rowaneiki. Oshookanaki, okimotatanaki, oshiyawitakawo inchato. Rookantapiintakawo tsimeri jenokiweri imakoryaantapiintawo owaempekikipaeni.

<sup>20</sup> Rapiitakiro, ikantzi:

—¿Tsika nokanteroka noshiyakaawenantemirori tsika ikanta Tajorentsi ipinkathariwenantzi?

<sup>21</sup> Okimitakawo tsinani aakiro tapiyakaawori paa eechonkiini. Ot-sipataakiro osheki teriikopane otapiyantanakari. Oshineeyakaanakiro maawaeni, roojatzi antawotantanaka. Eejatzi ikimita riraga atziri. Eenitatsirika apaani antzirori kaari kameethatatsi, rantakagaeyerini paashini-paeni atziri rantero kaari kameethatatsi.

*Pipomeentsiwentyaawo pareetantyaarijenokinta  
(Mt. 7.13-14, 21-23)*

<sup>22</sup> Ikantaka ikinakinayitakini Jesoshi nampsikipaeni, riyotaantayitzini. Roshiretakawo riyaate Jerojareeki.

<sup>23</sup> Rojampitakiri apaani:

—Nowinkatharite, ¿tsika ikaateeyinika awijakoeyaatsini? ¿Arima ikaate apaaniipaeni?

Rakanakiri:

<sup>24</sup> —Noshiyakaawentemiro. Okimiwitakawo okaatzini omoo akyaantyaaarijenokinta. Eenitatsi osheki kowawitachani riyaatemijenokinta, omaanta eero imatziro rareeta. Pipomeentsiwentyaawo pareetantyaari janta.

<sup>25</sup> Eejatzi okimiwitakawo rantziri ashitawori ipanko. Ijeekaki inthomaenta rirori, rashitakotaka, riyaawitakiro ashitakontsi.

Roojatzi pipokaeyantawitakyaani eerokapaeni, pikantawitapaakyaari: "Nowinkatharite, pashitareenawo, nokyaantyaari". Omaanta ikantawakimi: "Tee niyoteeyimini tsikarika pipoñaa".

<sup>26</sup> Roojatzi pikanteeyawitanakyaarini: "Paerani pitsipateeyakinani non-ampiki owaeyakan, eejatzi piyotagaeyakinani".

<sup>27</sup> Aritaki ikantemi: "Tee niyotzimi. Piyaatee, pipiyane tsikarika pipoñaka. Osheki pantayitzironi kaari kameethatatsi. Tee pikameethatzi".

<sup>28</sup> Piñaantakariri Awaraama, Ijaaka, Jakoowo, maawaeni riraga kamanantzirorini iñaani Tajorentsi ijekkaki jenokinta, omaanta eerokapaeni, roepiyawaemi Tajorentsi, eero pimateeyironi pikyaapae. Roojatzi osheki powashiretaperotanakya, piraaperotanakya eejatzi patsikaekiteeyanakyaani, tyakiririri.

<sup>29</sup> Ipoñieeyapaakyaani aapatziyariri Tajorentsi intatsikeronta, jakakiroka, katonko, kirinka, maawaeni kipatskipaeni. Ijeekaeyapaakini janta ipinkatharentsitzinta rirori.

<sup>30</sup> Rareetaperoteeya riraga pitheenkaeyakirini. Omaanta riraga pipinkathateeyawitakarini eero rareeteeyaani rirori: ashi rowaeyeroni ijekkaeyanakini jaka.

### *Riraaneentakotawo Jesoshi Jerojaree (Mt. 23.37-39)*

<sup>31</sup> Roojatzi ipokantaka apaanipaeni warijeeyo. Ikantapaakiri Jesoshi:  
—Piyaate paashiniki kipatsi. Ikowaki Erooreshi rowamaakaantemi.

<sup>32</sup> Rakanakiri:

—Pikamantakiteri riraga amatawitantsiri: "Ikantzi Jesoshi: 'Eero noshiya. Nokantyaani nowawijaakooyeriniita kyaantawitariri kamaari eejatzi mantsiyariipaeni: iroñaa, inkaamani, eejatzi paashini kitejiri. Roojatzi nomonkaatakiro maawaeni' ". Rootaki pikanteriri.

<sup>33</sup> Rootaki nokinakinayitantlyaarini iroñaa, inkaamani, eejatzi paashiniki kitejiri. Eejatzi okameethatzi nokame Jerojareeki: tema janta aritaki ikamapiuntzi kamanantayitzirorini iñaani Tajorentsi.

<sup>34</sup> Eejatzi ikantakiri Jesoshi:

—Riraga jerojareejatzi osheki rowamaayitakirini kamanantzirorini iñaani Tajorentsi. Roshemyaapiinteyakirini mapiki paashinipaeni rotyaan-tanewo Tajorentsi. Okimitzirranki tyaapa ojatewirinikitzi irlaani-paeni, eejatzi nokimiwitaka naaka osheki nokowawitaka nopyoteeyerin-im jerojareejatzi: naapatziyakagaeyarinimi iñaani Tajorentsi omaanta tee ikowaeyini.

<sup>35</sup> Pamine, tekatsi amitakoterini iroñaa, rookaeyirini Tajorentsi, ikantzi: "Ari ikantakaata". Eero iñagaana eejatzi iroñaa. Iñija, aririka nopyiee, ari iñawaena, eejatzi ikanteeyeeni: "Tema ikameethaperotaki Rotyaantanewo Tajorentsi".

## 14

### *Retsiyatakoteeri saawaro ki Jesoshi aawayinkaripaeni*

<sup>1</sup> Paashiniki saawaro ryaatanaki Jesoshi janta ipankoki jewata-gaeyiririni warijeeyopaeni rowakayaari. Paashini warijeeyopaeni inetapitakiri Jesoshi, ikowakowataki tsika ikantya ipoñakaantyaariri ikantakowenantyaariri.

<sup>2</sup> Ijeeki janta apaani mantsiyari, ari inewootakiri riraga Jesoshi. Tema aawayayitakini maawaeni iwatha.

<sup>3</sup> Rojampitziri riraga iyotaantziroripaeni Iwaperite Tajorentsi eejatzi war-jeeyopaeni:

—¿Okameethatzima etsiyatakoteri mantsiyaripaeni kitejiriki amakoreeyantarini?

<sup>4</sup> Omaanta ari imaeeriteeyanakini, tee rakaneentzi eechonkiini. Ipoñaanaka Jesoshi ikathatakiri mantsiyari, retsiyatakteeri, roojatzi rotyaanantaari ipankoki.

<sup>5</sup> Roojatzi ikanantakari riraga aminaperoyakiririni:

—Tema pantawaeteyini eero kapaeni saawaroki. Aririka ipariyaki piwaakate omooki, tema ari pagaaeri eejatzi.

<sup>6</sup> Eejatzi imaeeriiyanakini.

### *Eero pikantakaaperoyeyani*

<sup>7</sup> Ikanta rotsikanateeyakarini Jesoshi riraga owaeyacharini riyoyagaeyakironi rooperori jeekamentotsi. Ikwaki ijekimoteri okaakini riraga pinkathari iñaaperotantyaarimi. Roojatzi roshiyakaawenteeyakirini Jesoshi:

<sup>8</sup> —Aririka rakiyotemi pijoriyyotzinkarite, eero pijee kantashitawo jeekamentotsi ijekakerotzira pinkathari. Ari aamaashitya, rareetapaakyaarika paashini owakotaarini pinkathariperotatsiri,

<sup>9</sup> roshirinkimikari paashiniki jeekamentotsi riraga kaemakaantakimir, ikantzimikari: “Eero pijeeki jaka. Ijeekapaakiita rirori pinkathariperotatsiri”. Roojeekaemikari janta othapiki, tema ari pipashiwenta nanya.

<sup>10</sup> Omaantakya okameethatzzi pijekapaaki janta othapiki. Roojatzi aririka iñaakimi riraga kaemakaantzimir, roojatzi ikanantakimi: “Pipokanaki jaka, niyompari, pijekimoteri okaakini pinkathari”. Iñagaeyemini maawaen iwaeyeencharini itsipateeyakimini pinkathari.

<sup>11</sup> Pikantakaaperotashityaarika eero ka apaniroeni pikowaki iñaaperotanteemiri, ari ipashiwenta kaki Tajorentsi: tekatsi ñaaperotaneemini. Omaanta riraga kaari kantakaaperotachani rirotaki iñaaperoteri Tajorentsi kameetha, itsipatantyaariri ipinkathariwenante.

*Ikenkithatakotakiri Jesoshi kaemakaantawitariri atziri rowaka gaeyaarini* (Mt. 22.2-14)

<sup>12</sup> Eejatzi ikantakiri Jesoshi riraga kaemakaantakiriri roya:

—Aririka pikaemakaanteri atziri powakaanteeyaa ririni, eero pikaemapi-inteeyirini pisheninkaperopaeni eejatzi riraga ashaagantzinkaripaeni. Aririka powakaakyaari, ari rirori ipiyateem, rowakagaemii iinja.

<sup>13</sup> Omaanta okameethaperotzi pikaemakaantaperoterira riraga kaari ashaagantayitachani, riraga kijopookitsiri, riraga kaari kokichaatsati, maawaen.

<sup>14</sup> Rooma paata rirori tekatsi ikanteemii ipiyateemii rowakagaeyeemini. Omaanta iinja ipiriinteeyeerini Tajorentsi maawaenii aapatziyeyyaririni. Roojatzi ipinaperoteemii rirori Tajorentsi. Eero patsipetashitawo pikamintaantzi.

<sup>15</sup> Ikemantakariri apaani owaenchari, ikantanaki:

—Tema okameethaperotaki ajekae janta ipinkatharitzinta Tajorentsi.

<sup>16</sup> Ikantawakiri Jesoshi:

—Ikimitaka apaani shirampari ronkotsitakaantakiro oshekiowanawontsi, roojatzi ikaemakaantakiri osheki atziri roya.

<sup>17</sup> Onkotsiteeyakani maawaenii. Roojatzi rotyaanakiri ronampiri: ‘Piyaate, pikamanteeyerini: ‘Monkaataka, onkotsiteeyakani maawaenii, pipoke iroñaaka’’.

<sup>18</sup> Omaanta tee ikowaeyini ryaateeyeni. Ikantzi apaani: "Owakira namanantakotaki noepatsite. Niyaate iroñaaka naminakitero, kameethatakirika. Pikamanteeri: 'Eero ipoki rirori'".

<sup>19</sup> Ikantzi paashini: "Owakira namanantakiri 10 waaka. Nokowaki naminakitero kameethatakirika. Pikamantapaeri: 'Eero ipoki rirori roya'".

<sup>20</sup> Ikantziri paashini: "Owakira naaki noena. Tektsi nokantya niyaate".

<sup>21</sup> Ikantaka ipiyanaa riraga ronampiri rotyaantawitari. Icamantapaeri: "Ikanteeyini: 'Eero niyaatzi nowa' ". Roojatzi ikjijantanaka riraga iwaatorote, ikantanakiri ronampiri: "Ikantakaata nosheninkapaeni. Iroñaaka piyaate janta pankotsikipaeni nampitsi, pikinayitanakini pikowakowayitakiterini riraga kaari ashaagantachani, riraga kijopookitatsiri, riraga aashetatzinkari, riraga kaari kokichaatasi, maawaeni". Roojatzi ryaatananaka, ikaemaeyakitzirini, pokaeayaapakini.

<sup>22</sup> Ikantaka rareetapaa eejatzi, ikantapaeri iwaatorote: "Niyaatakizti, nokamanteeyakirini. Areeteeyayaapakani, omaanta tekiraata imonkaata".

<sup>23</sup> Ikantakiri eejatzi: "Piyaatakite eejatzi janta, pikinayitanakini awotsikiipaeni, pikaemaeyakiterini paashinipaeni ipokanakiita, nokowatzzi riyekitantaperoyapaakyawoni nopanko.

<sup>24</sup> Omaanta riraga nosheninka nitawitakari nokaemakaantawitakari, eero roymaetawo iroka nonkotsitakaantawitakanariri".

Rootaki ikenkithatakagaeyiririni Jesoshi janta ipankoki warijeeyo.

### *Pipomeentsiwentaperoteniri Jesoshi ikowakagaeyakimirini*

(Mt. 5.13; 10.37-39; Mr. 9.50)

<sup>25</sup> Ikantaka paashiniki kitejiri ikinanaki Jesoshi awotsiki eejatzi royaateeyanakirini osheki atziri. Ipithokashiteeyakarini, ikanteeyakirini:

<sup>26</sup> –Niyotaki pininteevirini piripaeni, piniropaeni, piinapaeni, pitomipaeni, pirentzipaeni, pitsiropaeni, maawaeni. Eejatzi eeroka ninteevachani apaniroeni. Omaanta pikowaeyakinirika poyaateeyenani, okameethatzni naaka pinintaperoyeenani kameetha. Eerrika pinintaperotana, tektsi pikantya pipeyeeya niyotaanewo.

<sup>27</sup> Eejatzi eerrika pipomeentsiwentaperotanawo nokowakagaeyakimirini, eejatzi eerrika poyaataperotana, tektsi pikantya pipeyeeya niyotaanewo. Pikenkithashireeyaani tsikarika pikantyaari.

<sup>28</sup> Okimitaka aririka ikowaki rantakaantero shirampari ipanko, rityaawo rojampiteri riraga wetsikenirini tsika okaate opinatya. Roojatzi raminantakaari iyorikite monkaatakarika.

<sup>29</sup> Eerrika ritawo raminiri tsika ikaatzi iyorikite imonkaatyarika, aamaashitya aririka ikompitakyaawo. Apatzirorika imonkaatakawo otzinkamipankepaeni ari ikaatapaaki iyorikite rootaki kaari imatantawo ithonkakaantero. Roojatzi ishirontawentyaari atziri.

<sup>30</sup> Ikanteeyeni: "Paminerri, riwetsikakaantawitaka ipanko, omaanta tee ithonkakaantziro. Tee itzimaperotzi iyorikite, injii, injii".

<sup>31</sup> Eejatzi riraga pinkathari, aririka ikemakotakiri paashini pinkathari rotyaantakiri 20.000 joraaro rowayiritantyaariri. Aririka ikaate ijomraoreto 10.000, tee riyoperotzi okameethatzirika romanatawakiri riraga pokatsini. Tema rityaawo ikaemaeyerini isheninkapaeni ikenkithawae-takagaeyerini ryotantyaari okameethatzirika romanatya roepiyantyaariri riraga pokashiterini.

<sup>32</sup> Aririka ikanteeyakini isheninka: "Ari ranaakoeyakaeni, oshekiperotaki. Eero amatziro apiyatari". Ikanteeyanakini: "Tekira rareeteeyaanii, thame otyaante apaanipaeni ashenninka rojampiteri oetarika ikowakoteeri eerokya rowayirifantee".

<sup>33</sup> Eejatzi pikimitya eeroripaeni: aririka pikowaki poyaatena, pityaawo pikenkithashireeya tsika okanteeyarini maawaeni tzimimoeyimirini. Pikenkithashiryaperoeyakyaarinkia: roojatzi pookaeyeeroni, poyaataperoeyanakinan naari.

<sup>34-35</sup> Nokowaki riraga aapatziyanari riyoteeri paashinipaeni atziri ijeekae kameetha, rooma eerorika riyoteeri, tee imatziro rantero nokowakaayitaw-itakaririni, ratsipetashitakawo ijeeki. Ikimitakawo tziwi kaari katyotatsini: tema tee okameethatzi, ookapiintziro. Pikenkithashiryaperooteri iroka nokanteeyakimirini piyotakoperotantyaawori.

Rootaki ikanteeyakiririni Jesoshi oyaateeyiririni.

## 15

*Ikenkithatakotakiri Jesoshi riraga owisha peyachari*

(Mt. 18.10-14; Jowa 10.1-18)

<sup>1</sup> Ijeekaeyini janta osheki joriyyo piyotziriri iyorikite ijoriyyotzinkarite eekiro ipiri riraga oroomajatz. Ikaateeyakirini paashinipaeni antapiintzirori kaari kameethatatsi. Ikemijantapiinteeeyakirini Jesoshi ikinkithatzi.

<sup>2</sup> Ikiñaanikowenteeeyakirini riraga warijeeyopaeni eejatzi riraga iyotaantzirori Iwaperite Tajorents:

—Tee okameethatzi iroka rantakirika Jesoshi: itsipatapiinteeeyakarini kaari kameethatayitatsini, rowaeyani.

<sup>3</sup> Roojatzi roshiyakaawenantakanari iroka Jesoshi, ikantakiri:

<sup>4</sup> —Pamine, ikaaterika powishate 100, ipeyakyaarika apaani, tema ari pookanakiri riraga 99 janta keshiiki, roojatzi piyaatantanakya janta teenta ijeeki atziri, pikowakowataateri peyeenchari. Pikowakowateeririka roojatzi piñaanteeyaa.

<sup>5</sup> Aririka piñaapaeri, tema osheki pikimoshirewentapaeri. Tema ari pamari pinateeri, powapaeri janta ijeekaeyininta paashinipaeni owisha.

<sup>6</sup> Eejatzi, aririka pareetapaeya pinampiki, tema ari pikamaeyapaakirini pisheninka, pikanteeyerini: “Thame akimoshireeyeni: ipeyawitaka nowishate, noñagaeri eejatzi”.

<sup>7</sup> Eejatzi ikimita rirori Tajorents. Aririka ikenkithashiryagaeya apaani antzirori kaari kameethatatsi, rookaerorika rantziri, iroñaka Tajorents ikanteri maawaeni jeekatsiripaeni jenokinta: “Thame akimoshireenteeyerini”. Tema tee riro ikantakotziri riraga paashinipaeni kameethateeyatsirini.

*Ikenkithatakotakiri Jesoshi koriki peyachari*

<sup>8</sup> Eenitatsi paashini ikantakiriri Jesoshi:

—Paashini eejatzi noshiyakaawentemiro: eenitatsi tsinani oorikite, ikaatzi ikithoki 10. Aririka ipeyakya apaani, okowakowayiteerini. Aririka otsitenitanaki, oonthoteri ootamento, oñaantyaariri, eejatzi opishitaperotero pankotsi aminayiteerini otyaakitakiririka kipatsi. Okanta okowakowateeri roojatzi oñaanteeyaa.

<sup>9</sup> Aririka oñaagaeri, okaemaeyerini osheninkapaeni, okanteri: “Thame pitsipateeyenani, akimoshireeyini. Noñagaeri eejatzi noorikite peyawiteenchari”.

<sup>10</sup> Eejatzi nokamanteeyemini: eejatzi ikimitaka riraga Tajorents. Aririka ikenkithashiryagaeya apaani antzirori kaari kameethatatsi rookaerorika rantayitzirini, kimoshiretanaki Tajorents, eejatzi ronampiripaeni.

*Ikenkithatakotakiri Jesoshi apaani ewankari shiyapithatariri Iriri*

<sup>11</sup> Paashini eejatzi roshiyakaawentakiniriri Jesoshi, ikantzi:

—Eenitatsi shirampari ikaatzti itomi apite.

<sup>12</sup> Riraga impaetatsiri ikoñaatzi ikantakiri Iriri: “Pawa, nokowaki pipena iroñaaka kashetani powaagawo eejatzi piyorikite papanakinari paata aririka pikamae”. Roojatzi ipakiri.

<sup>13</sup> Paashini kitejiri ipimantanakiro rowaagawo ipawitakariri Iriri. Roojatzi ryaatanaki intena, paashiniki kipatsi, raanakiro maawaeni jeekimotziriri. Janta ryaatakinta, tee ijekapaaki kameetha, rootaki rapaattakawori maawaeni rowaagawo eejatzi iyorikite.

<sup>14</sup> Roojatzi ithonkatakotantapaaka, tekatsi jeekimotaneerini, eejatzi tee añaagaero rowaeyaarin. Osheki rashironkaawaetaka ewankarika, aaperotakiri itashe.

<sup>15</sup> Rootaki ikinakinatantanakari ramini antawaerontsi. Ari iñaapaakiri ashitachari osheki ichaanchote. Ikantapakiri: “¿Pikowakima nantawaetemi?” Ikantawakiri: “Jee, nokowaki paminenari nochaanchote”.

<sup>16</sup> Ikantaka raminawitanari ichaanchote, ipapiintziri rowanawo: rowaga oshiyawitawori otaki intsipa. Omaanta riraga ewankari tekatsi perini rowanawo, ikowawitaka rakiyoterimi chaancho, omaanta riraga ashitariri tee ishinetziri.

<sup>17</sup> Roojatzi ikenkithashiryaanaka ikantzi: “Janta pawakinta ikaateeyini osheki ratzirite. Eenirowaeyerini maawaeni. Ikemapiinteeyanikameetha, eejatzi otizmagaantzi owanawontsi. Omaanta naaka jaka aaperotakina notashe, rooteentsi nokame.”

<sup>18</sup> Iroñaaka nopyiee janta pawaki, nokantapaeri: ‘Pawa, tema nopyiathatakimi tee nokemijantaperotziro okaatzpi pikantawitakinari, eejatzi tee naapatziyari riraga Tajorentsi. Eenitatsi nantzimotakimiri.

<sup>19</sup> Eero iroñaaka pitomintaana inta pikimitakayeenaa ponampiri, naaka thamaeteemironi powanipaeni’”.

<sup>20</sup> Roojatzi ipiyanta, ikinanee awotsiki. Ikantanaa, rootaatsi rareeteeyaa ipankoki iriri. Ikanta irira iñiuitawaari janta intena, ikinapae. Osheki ikimoshiretanee, retakoshiryaawaari. Ishiyashitawaari, rawithakitawaeri, ithwootawaeri, ikamintaahaperotawaeri.

<sup>21</sup> Roojatzi ikanantapaari itomi: “Pawa, tema nopyiathatakimi tee nokemijantaperotziro pikantawitakinari eejatzi nopyiathatakari Tajorentsi. Eenirowaeyerini nantani. Tee okameethatzpi pitominteenaa iroñaaka, inta pikimitena ponampiri”.

<sup>22</sup> Omaanta iriri ikaemakiri ronampiripaeni, ikanteeyirini: “Pishintseeyini paakitero kithaarentsi kameethari, pikithaateri notyomika. Eejatzi paakiteniri aniiyo, poyaankenirirakoki. Paakiteniri ijapatote, pijapatotapaera.

<sup>23</sup> Eejatzi paakiteniri waaka ewonkiri, tzimaperotatsiri iyeenka, powamenirini. Thame maawaeni akimoshirewentaera notyomi, owaeyaani maawaeni.

<sup>24</sup> Noetakaawitaka eero noñaagaeri, ikimitzimotakina kamawitaka. Omaanta iroñaaka kimitaka añaagae eejatzi, noñaagaeri. Ipeyawitaka, iroñaaka ipokae, añaayiteerini eejatzi”. Osheki ikimoshireeyanakini rowakagaeyakarini.

<sup>25</sup> Eenirowaeyerini paashini itomi, riraga jewataneentsiri rantaritzi, ikantanakawo, ryaatza ithamaetzti janta owantsiki: tee iñaawaeri rirentzi rareetantapaari riiori. Ikanta ipokae, rokaaktintapaawo pankotsi, ikemapaatziiri ijontateeyini eejatzi iwaerateeyini.

<sup>26</sup> Ikaemapaakiri apaani onampirents, rojampitakiri: “¿Oetaka piwaeratawenteeyirini?”

<sup>27</sup> Rakanakiri: "Areetapaa parentzi. Rowamaakaantawakiniri piri waaka ewonkiri riraga wathantzi, rowakagaeyakarini maawaeni atziri. Osheki ri-weshiryawentawaari parentzi ipokae, kameetha rareetaa tekatsi oyerini".

<sup>28</sup> Roojatzi ikijantanaka rirentzi, tee ikoyi ikyAAPAE pankotsiki. Riyowanaki iriri, ikantawitawaari: "Pipokanaki, notyomi, pikyaapae. Pi-weshiryawentawaeyaari parentzi".

<sup>29</sup> Omaanta rakanakiri itomi: "Eerowa, pawa, nokoyi nokantemi. Paerani nantakimiro oetarikapaeni pikaminaakinari, tee nopiyathaneentzimi ee-chonkiini. Omaanta tekatsi pipaneentena naaka eechonkiini nowakaayityaaririni notsipamintharipaeni. Tee pipaneentana apaani chiiwo.

<sup>30</sup> Inta riro pikowateekikya yeeyira piperi, riyatapithawitakimi inteeina ithonkitakimiri piyorikite; ipinayitakirorini tsinanipaeni imayempitziro. Iroñaaka ipiyapaaga powamaakiniri waaka wathantzi".

<sup>31</sup> Rakanakiri iriri, ikantanakiri: "Notyomi, akantatyaaani kijokiro owawakaa. Eerokataki ashiteyyaawoni maawaeni owaagawontsika aririka nokamae.

<sup>32</sup> Omaanta okameethaperotzi aweshiryawentawaeyaari parentzi. Okimiwitaka ikamaki, aetakawitaka eero añaagaeri eejatzi. Iroñaaka kimitaka añaagae eejatzi añaagayeerini. Ipeyawitaka, iroñaaka añaagaeri eejatzi. Thame aweshiryawenteeyaarini.

Okimitaka iroka, ari ikimitee Tajorentsii aari inintaperotakae, ajeekimoterrika kameetha eejatzi eerorika ajeekimotziri kameetha".

## 16

### *Ikenkithatakotakiri Jesoshi amatawitziriri iwaatorote*

<sup>1</sup> Eejatzi ikantakiri Jesoshi riyotaanewo:

—Eenitatsi eejatzi ashaagantzinkari apaani kempoyaawitanariri iyorikite, maawaeni. Roojatzi ikamananteetakari ashaagantzinkari: "Ikoshitakimira riraga kempoyaawitzimiriri piyorikite".

<sup>2</sup> Roojatzi ikaemakiri, rojampitakiri: "¿Kyaaryooma iroka ikanteetakinari? ¿Pikoshitakina noorikite? ¿Litaka pikoshitantanari? Iroñaaka poepiyeenari maawaeni noorikite, nokowaki pojankinatenawo iwaeropaeni maawaeni ireewitanari. Iroñaaka eero noshinetaneemiri eejatzi noorikite".

<sup>3</sup> Ikantaka ikenkithashiryaanaka rirori: "Eero iroñaaka ishinetanaana nowaatorote nokempoyaageniri iyorikite. ¿Tsika nokantyaaka iroñaaka? Tee noshintsiwathatzি nothamaetantyaari. Eejatzi nopashiwentaka nonethaakoteri atziri ipashitena koriki.

<sup>4</sup> ¡Jaaa! Niyotaki iroñaaka oetaka nanteri. Iroñaaka nokaminthagaeyerini maawaeni ireewiteeyiririni nowaatorote, raakameethataanteeyenarini naari janta ipankoki: eero ishinetantana nowashironkaawaetya".

<sup>5</sup> Ikanta ikaemaeyakirini maawaeni ireewiteeyiririni iwaatorote. Rojampitakiri riraga jewatapaentsiri ipokapaaki, ikantziri: "¿Tsika ikaatzika pireewitziriri nowaatorote?"

<sup>6</sup> Rakanakiri: "Nireewitziri osheki oyeenka oriwo. Okaatzi nireewitziriri yeeikitachani 100 wiwoo owaanini". Ikantawakiri: "Jee, kyaaryo. Eeniro iroka paperi ojankinataka pireewitziriri. Payero paperika, pojankinateniri paashini, pikante: 'Nireewitzimi 50 wiwoo owaanini yeeikitatsini oyeenka oriwo'. Amatawiterita nowaatorote". Rakanakiri ireewitziriri "Jee, kameethataki".

<sup>7</sup> Roojatzi ishitowanee jewatapaentsiri, ipokapaaki paashini. Rojampitawakiri: "¿Tsika okaatzika pireewitziriri nowaatorote?" Rakanakiri: "Osheki nireewitziri teriiko, okaatzi yeeikitatsini koshitaariki 100".

Roojatzi ikantanakiri: "Eeniro paperika pojankinatakiniriri paerani nowaatorote. Kyaaryo, ari okaatzi pireewitziri 100. Thame amatawiteriita. Pookaero iroka paperika; pojankinateniri paashini, pikantari: 'Ari okaatzi nireewitzimi 80 koshitaari, yeekitatsini teriiko' ". Roojatzi rojankinatakiniri.

<sup>8</sup> Ikanta riraga iwaatorote riytantanaka ramatawitakiri. Ikantanaki: "Tee okameethatzi ramatawitakina, omaanta osheki ryothanitzi tsika ikantya rayero koetyeemotakariri". Kyaaryo riraga theenkantsiri ryothanitzi ikenkithashireeya tsika ikantya rantero kaari kameethatatsi. Ari ikimityaami riori riraga aapatziyariri Tajorentsi ikenkithashiryaa per-tyaawomi rantero okaatzi kameethatatsiri ikoyiri Tajorentsi.

<sup>9</sup> Iroñaka nokamanteeyemini: eenitatsirika piyorkite, pikaminthagaey-erini paashinipaeni, pipaeyerini koetyeemotariri riori. Ari ipinaperoteemi eerori Tajorentsi iinja. Aririka pikamaeyakini, ari pookanakiro tzimimoey-imirini, omaanta raakameethateeyawaemini riori janta jenokinta. Tema eenitatsi janta pijekantyaari kaari thonkanitachani.

<sup>10</sup> Eerorika pikoshitzi eechonkiini eero eejatzi pikoshitzi osheki. Omaanta pikoshiterika eechonkiini, eejatzi aritaki pikoshitaki osheki.

<sup>11</sup> Aririka pikoshitayiteni oetarikapaeni, riytaki Tajorentsi tee paapatziyari riori: eejatzi eero isheninkatzimi, eero pimatziro piñiilo inampi.

<sup>12</sup> Eerorika pamitakontantari atziri piyorkite itajonkawentawitakimiru Tajorentsi, tsika ikantyaaka ipinatantawaeemiri iinja janta jenokinta?

<sup>13</sup> Eero pimatziro pantawaeziniri kameetha eenitatsirika piwatoorote apite. Omaanta apaani pinintaperotanaki, inta paashini poonanakyaari. Piweshiryaaawentyaari apaani, omaanta riraga paashini, eero piweshiryaaawentari. Eejatzi okimita iroka, aririka pikenkithashiryaakopointyaari koriki, eero pimatziro poyaataperotziri kameetha Tajorentsi.

### *Riraga Jesoshi riyotaakiri warijeeyopaeni ikowakaakiriri Tajorentsi*

<sup>14</sup> Ikanta ikemaeyantawakaririni warijeeyopaeni ikantakiriri Jesoshi, roojatzi ishirontawenteeyantananakaririni. Ikowaperotakiita rashaagantya osheki, rootaki ishirontawenanantanakariri Jesoshi.

<sup>15</sup> Roojatzi ikantanakari:

—Pikowaeyawitakan iiteeyemini atziri pikameethateeyakini, omaanta riyo teeyakimini Tajorentsi. Iñaaperoeyawitakimini atziri, omaanta riytaki Tajorentsi tee pikameethateeyini pajankaneki.

<sup>16</sup> Paerani okameethatzini paapatziyakawoni rojankinarini Moeseeshi eejatzi riraga kamanantayitzirorini iñaani Tajorentsi. Omaanta areetapaaka iroñaka Jowa, riraga kaawoshitakotziriri Tajorentsi. Paashini iroñaka ikowakagaeyakimiru Tajorentsi. Riraga Jowa ritanakawo ikamanteeyakimini kameethatatsiri: rooteentsi ipinkathariwenteeyemini riori. Ikowaperoyawitakan atziri iñeeri.

<sup>17</sup> Inja opeyaneeya kipatsi eejatzi jenoki, omaanta eero opeyaa roori rojankinarini Moeseeshi: ikowaki Tajorentsi pikantyaani pikemijantero piyotantyaari pijeki kameetha.

<sup>18</sup> Tema okantzi: "Eero piñaathatzimotawo piina paashini tsinani". Aririka pookaero piinapero pagauerika paashini tsinani, piñaathatzimotakawo piinaperoni. Eejatzi tee okameethatziri payero tsinani oókiriri oemii.

### *Ashaagantzinkari eejatzi Raajawo (Mt. 19.1-12; Mr. 10.1-12)*

<sup>19</sup> Ikanta ikanteeyakirini Jesoshi:

—Eeniwitacha shirampari ashaagantzinkari, osheki iithaari kameethamawotatsiri, osheki rowaneenkataka. Maawaeni kitejiriki rowakagaeyakarini isheninka owanawontsi pinaperotachari.

<sup>20</sup> Eenitatsi eejatzi ashironkaaperotachari iitachari Raajawo. Ojonkayitakini ijoepaeni opathaakayitakirini. Ari ijeekapiintawita janta ikyaapiintzinta riraga ashaagantzinkari ipankoki.

<sup>21</sup> Osheki rowashironkaawaetaka, aaperotakiri itashe. Ikowawita raperotateryeronimi rowanawo rowariyaayitzirini ashaagantzinkari jaawiki. Eejatzi riraga otsitzipaeni ithoyitapaakirini ipathaawokipaeni.

<sup>22</sup> Roojatzi ikamaki rirori. Riyaatashitakiri ronampiripaeni Tajorentsi, raawaeri, roojatzi raantanaari janta ijeekinta Awaraamani. Okameetheetyeenta osheki. Eejatzi ikamaki riraga ashaagantzinkari. Ikitateetakiri kipatsiki.

<sup>23</sup> Osheki rashironkaaperotaka iroñaaka riraga ashaagantawitacharini janta jaawiki paamariki, osheki ikemaatsitakawo. Raminanaki janta ijeekinta Awaraama, iñaataatziri eejatzi riraga Raajawo.

<sup>24</sup> Ikaemakotakiri: “Pawa Awaraama, petakotena. Pikanteri riraga Raajawo rowiinkeroota rakoempeki iñaaki, ipokeeta jaka ipitenkaatenaata nopaanteki iñaa. Oshekiperio nashironkaaka jaka paamariki”.

<sup>25</sup> Omaanta ikantakiri Awaraama: “Notyomi, pikenkithashireeya tsika pikanta paerani pijeebkini kipatsiki. Kameetha pijeekwitan, omaantakya riraga Raajawoka osheki rashironkaawitakan. Tema iroñaaka kameetha ijeekapae rirori jaka, rooma eeroosa osheki pikemaatsitakawo janta.

<sup>26</sup> Eejatzi pijeebakotaki intatsikeronta impeeta, tekatsi ikinashitemi Raajawo. Eejatzi eerori, tekatsi pikinashiteri pipokantyaari jaka”.

<sup>27</sup> Roojatzi ikanantakari: “Eerorika pimatziro pikaminthayena, nokowaki potyaanteeri Raajawo kipatsiki: janta ipankoki pawani.

<sup>28</sup> Ijeekinta janta yeeyipaeni, ikaatzi apawakooni. Nokowaki ikamantapaeri, ipokikari rirori jaka. Paminena naari iroñaaka, osheki nokemaatsitakawo jaka”.

<sup>29</sup> Roojatzi ikantziri Awaraama: “Eenitatsi rojankinarini Moeseeshi eejatzi rojankinarini paashini kamanantayitzirorini iñaani Tajorentsi. Rootaki raapatziyeeyaarini”.

<sup>30</sup> Ikanta rakanakiri: “Jee, eeniro naawita. Omaanta aririka iñagaeri kamaentsiki ipiriinteeyaa, aritaki ikenkithashireeyaneeyaaani, rookaero kaari kameethatähtaa ranteeyirini”.

<sup>31</sup> Ikantanakiri Awaraama: “Teerika raapatziyawo Iwaperite Tajorentsi, eero eejatzi raapatziyari kaminkari ipiriintawiteeyarika”.

## 17

*Eero pantakaeri atziri kaari kameethatatsi  
(Mt. 18.6-7; Mr. 9.42; Mt. 18.21-22)*

<sup>1</sup> Ikanteeyakirini Jesoshi riyotaanewopaeni:

—Nokamantemi: ikantyaani eenitatsi atziri antakagaeyeririni paashinipaeni atziri kaari kameethatatsi. Omaanta rowashironkagaeyeririni Tajorentsi riraga antakayiriri paashinipaeni kaari kameethatatsi.

<sup>2</sup> Aritaki rowashironkaaperoyerini antakagaeyeririni eentsipaeni kaari kameethatatsi. Okameethawitami riteetyaari mi roojoteetenirimi mapi antawo ikentsiki rowiinkaeterimi. Rowinkaetatyeyeririkami tekatsi antakaaneerinimi eentsi kaari kameethatatsi.

<sup>3</sup> Kyaaryoowa, pantakaerikari atziri kaari kameethatatsi.

Eejatzi ikantakiri:

—Aririka piñaakotakiri pisheninka rantero kaari kameethatatsi, pikenkithatakayeri. Aririka rookaero rantziri, pikaminthayeri, paakameethateeri.

<sup>4</sup> Aririka ikijemi atziri, ikoshitemirika, ikantzimatemirika, oetarika. Omaanta aririka ikanteetemi: “Tee okameethatz i nantzimotakimiri, osheki nowashiretakota, eero napiiteero, pikaminthagaena pipeyakotenawo nantzimotakimiri”, ari nokowaki pikaminthayeri. Aririka osheki rapiiteero rantzimoteemiro, ejatzi osheki ikantemi: “Pikaminthayena pipeyakotewawo nantakiri”. Tema nokowakaakimi ejatzi osheki pikaminthayeri: eero pikijawentziri.

### *Pameentaperotakaeri Jesoshi*

(Mt. 21.22; Mr. 11.22-26)

<sup>5</sup> Riraga rotyaannewopaeni ikantakiri Awinkatharite:

—Nameentawitzimi, omaanta nokowaperotaki piyoteena nameentaperotantemiri.

<sup>6</sup> Rakanakiri:

—Pameentenarikami eechonkiini, pikowakirikami, pikanteri Tajorentsi iponchakireero inchatowa, rowiinkero janta inkaareki. Tema ari imatakimiromi, rowiinkaa temiromi.

### *Rantayiterini omperatatsiri*

<sup>7</sup> Eejatzi ikanteeyakirini Jesoshi:

—Okimitaka eenitatisi shirampari ratzirite. Ithamaetapiintziniri eejatzi raminapiintziniri ipira. Aririka ipokae ratzirite pankotsiki, ¿iitaka ikantawaeriri iwaatorote? ¿Arima ikantawaeri: “Pipoke, pijekapae, powapaeya”? Eero ikantziri.

<sup>8</sup> Tema ikantashitawaeyaari iwaatorote: “Iroñaaka ponkotsiwentapaena noyaari; ejatzi nomiriteri, pamakinawo. Aririka nokemapaakya, ari powanakya eorori”.

<sup>9</sup> Eejatzi tee ikantziri: “Ariwee, pantakinawo”; tema rametakawo apatziro rantawaetaipiintziniri iwaatorote.

<sup>10</sup> Eejatzi eerripaeni, okameethatz i pantapiinteyinirini maawaeni ikowakagaeyakimiri Tajorentsi. Roojatzi okameethatz i pikante: “Apatziro nantakiniri ikowakaakinari. ¿iitaka nokantakaaperotantyaari? Tekatsi okantya Tajorentsi ipinatantenari”.

### *Retsiyatakoeyakirini Jesoshi 10 patheenkari*

<sup>11</sup> Ikanta rowaaganaa Jesoshi, ikinayitanakini okaakini oweyaantawonta Jamaaryaki eejatzi Karireeyaki. Roshiretakawo rareetya Jerojareeki.

<sup>12</sup> Roojatzi rareetapaaka paashiniki nampitsi, iñeeyawakirini patheenkari-paeni, ikaateeyini 10. Ikatziyeeyakani eekitziroeni jaga.

<sup>13</sup> Ikaemakoeyawakirini:

—Jesoshi, eeroka nopinkathateeyirini, petakoeyenani, petsiyatakoeyenani.

<sup>14</sup> Iñaantakariri riraga Jesoshi, ikanteeyakirini:

—Piyaateeyeni janta ijekinta ñaanakowenantsiri, poñaagapaea yaari.

Ari ikemijantaperoeyakirini, riyaateeyanakini. Janta niyanki awotsi ari retsiyatakoeyaneeni.

<sup>15</sup> Iñeeyantawaani etsiyatakoeyaneeni, ipiyanaa apaani janta Jesoshiki. Icheraaperotaki, ikantzi:

—Tema ikameethatatai Tajorentsi, retsiyatakotakina.

<sup>16</sup> Rotziwerowashitapaakari Jesoshi, roeyotashitaperotakari, ipinkathataperotakiri, ipaasonkitaperotapaakiri. ¡ipoñaa irika shirampari Jamaaryaki!

<sup>17</sup> Roojatzi ikantakiri Jesoshi:

—Tema ikaateeyini netsiyatakoeyakirini 10. ḡTsikama paashinipaeni?

<sup>18</sup> Apatziro irika paashinijatzitsiri atziri ipiyashitapanaatana, ipaan sonkitakina, eejatzi iññaaperotakiri Tajorentsi. Riroma asheninkaperopae ni naawita, tee ipiyapanaaataa ipaasonkitantyaariri rirori.

<sup>19</sup> Roojatzi ikantziri otziwerowashitakariri:

—Iroñaaka pikatziyee, okameethatzi piyaatee. Pameentakari Tajorentsi, rootaki pawijakotantaari.

*Tsika ikantari Tajorentsi ipinkathariwenantzi  
(Mt. 24.23-28, 36-41)*

<sup>20</sup> Riraga warijeeypaeni rojampiteeyakirini Jesoshi, ikantziri:

—ጀTsika okaate ipoke Tajorentsi ipinkathariwenteeyanteerini?

Rakanakiri:

—Aririka ipinkathariwenant Tajorentsi, omaanta eero piññaaperotziri.

<sup>21</sup> Eero pimatziro pikante: “Eeniro jaka”, eejatzi: “Eeniro janta”. Kyaaryo, eero ikoñaataperotzi: okameethataki pipinkathashireeyerini maawaeni.

<sup>22</sup> Eejatzi ikanteeyakirini riyotaanewopaeni:

—Tema naaka poñaachari jenokinta, nokoñaatapaaki jaka kipatsikika, omaanta eero nokantatyeyaaani kijokiro nowaeyeemini. Iinja pikowaeyawitaneeyaani piñagaenami eejatzi, omaanta eero piñagaana.

<sup>23</sup> Eejatzi aririka ikanteetemi: “Piyapaa Jesoshi, ari ijekapaaaki janta”. Paashini ikanteetemi: “Ari ijekapaaaki jaga”. Omaanta kaarina naaka. Eero patsipetashitawo piyatashitana.

<sup>24</sup> Aririka omonkaataperotapaakya nopolanteeyari, ari piyotaperotawaena. Okimitaaganqui aririka aamorenkiranki maawaeni jenoki morek, morek, eejatzi nokimitapaeya naari aririka nopyiee eero nomanapaa, eero pikompitawaana.

<sup>25</sup> Omaanta nityaawo nokemaatsitayitaawoni osheki katsiri, eejatzi itheenkaeyenani atziripaeni.

<sup>26</sup> Ikimitaka paerani ijekantakari Noeni tema maawaeni paashini-paeni atziri itheenkaeyakirini Tajorentsi, eejatzi rantakiro osheki kaari kameethatatsi. Eejatzi ikimiteeya iinja atziripaeni aririka nopyiee naari riraga atziriperotapaentsiri, osheki itheenkaeyeenani rirori.

<sup>27</sup> Rowapiinteyani paerani, rirapiinteyini, raapiinteyironi iinapaeni, raakaayitakironi rishintopaeni oemi, paashini oetarikapaeni. Ari ikanteeyani, roojatzi rotetantanaka Noe ipitoki. Roojatzi opokapaaki antawo inkani, oonkanaka maawaeni kipatsi. Ikamaeyanakini maawaeni theenkantatsiri.

<sup>28</sup> Eejatzi ikimiteeyakani isheninka riraga Roote, jeekaeyatsirini Joroomaki: rowapiinteyani, rirapiinteyini, ikinayitanakini riyomparitayitanakani, ipankitayitzironi rowayitarinipaeni, riwetsikayitzironi ipankopaeni.

<sup>29</sup> Omaanta ishitowantanakari Roote, rotyaantakiro Tajorentsi osheki paamari poñaachari jenokinta, itagaeyakirini maawaeni joroomajatzini. Theenkantatsiri rootaki ithonkanteeyakaririni Tajorentsi maawaeni, thoperee.

<sup>30</sup> Aritaki okantyaari aririka nopyiee. Ijeeki osheki theenkantatsiri, eero ikenkithashiryaari Tajorentsi.

<sup>31</sup> Pamine, aririka omonkaatapaakya nopolanteeyaaari, pijekerika okaankiityeera pankotsi, eero pikyaapanaaatzsi pankotsiki paantapanaatyaawori powaagawo. Eejatzi, pantawaeterika powaneki, eero pipiyapanaaata pipankoki paantapanaatyaawori powaagawo.

<sup>32</sup> Kyaaryoowa pikimitawokari iinani Roote, pipithokakari eerori pitapi-iki.

<sup>33</sup> Ninkarika kaari kowatsini ratsipewentena naaka omawitya ikamawen-tena eero ryaatzi janta ijekinta Tajorentsi. Omaanta kowatsiri rat-sipewentena naaka omawitya ikamawentena naari, ikanteetatyeyaaani ijekimotena jenokinta.

<sup>34</sup> Aririka nopalae, eenitatsirika apite atziri imayi imaamentoki. Apaani aapatzianari rootaki naantaneeyariri notsipatanakyaari, omaanta paashini, eero naaneeri.

<sup>35</sup> Otsipatawakayaarika apite tsinani otoonkiro shinki. Apatziro apaani aapatzianari rootaki naantaneeyawori notsipatanakyaawo, omaanta paashini, eero naaneero.

<sup>36</sup> Itsipatawakayaarika apite shirampari janta owantsiki, ithamaetzi. Ap-atziro apaani aapatzianari rootaki naantaneeyariri notsipatanakyaari, omaanta paashini, eero naaneeri.

<sup>37</sup> Ikemaeyantakaririni riyotaanewopaeni, rojampitanakiri:

—Nowinkatharite, ḡtsikama oflaaganteeyaka iinja iroka pikantakinari?

Rakanakiri:

—Tsikarika ijeki kaminkari, aritaki ipiyotawenteeyari tzijopaeni. Os-hiyakaawentachari tzijo, tema iinja maawaeni aapatziyeyyanarini naaka aritaki ipiyotawenteeyenani.

## 18

### *Jesoshi ikenkithatakotakiri kantakotantatsiri kaari kameethatatsi*

<sup>1</sup> Paashiniki kitejiri roshiyakaawenteeeyakinirini eejatzi Jesoshi riyotaanewo. Ikowaki riyoteeri ikenkithatakapiinteri Tajorentsi, ikyaryooyenteeyeroni, eero ipakagaero.

<sup>2</sup> Ikanteeyakirini:

—Eenitatisi janta nampitsiki riraga kantakotantatsiri, kaari pinkathatziri Tajorentsi. Eejatzi tee riyotzi ikaminthayeri atziripaeni.

<sup>3</sup> Ari ojeeki janta nampitsiki apaani tsinani, kamaentsiri oemi. Iyaatashtapiintawitari riraga kantakotantatsiri, okantapiintawitari: “Pamitakotena, tee okameethatzi ikijapiintena riraga paashini shirampari”.

<sup>4</sup> Tee ikowawita riraganki ramitakoteromi, omaanta ikenkithashiryaanaka, ikantz: “Tee nopinkathawitari Tajorentsi, eejatzi tee nokoyi nokaminthayeri paashinipaeni atziri.

<sup>5</sup> Omaanta osheki ashiiryaaquina iroka tsinanika. Namitakoteroota, erokya opokashitantananaana, eero ashiiryaaanaana eejatzi”.

<sup>6</sup> Ikantanaki Awinkatharite:

—Pamine, tee ikameethatzi riraga kantakotantatsiri nokenkithatakotakira, omaanta ramitakotakiro iroka tsinani oñaashirenkapiiintziriri.

<sup>7</sup> Omaantakya riraga Tajorentsi, ikameethaperotaki. Aririka ikantyaani ramanapiinteri aapatzianari ikenkithatakapiinteri rirori, tema aritaki ramitakotakiri.

<sup>8</sup> Kyaaryootaki iroka nokamantemiri: intsipaete ramitakoeyerini Tajorentsi maawaeni kenkithatakagaeyeririni. Omaanta aririka nopiyee jaka kipatsikika ḡarima roojatzi noñeyapaemini pikantyaani pameenteeyenani, pikenkithatakagaeyirini Tajorentsi?

*Jesoshi ikenkithatakotakiri warijeeyo eejatzi piyotziniriri oroomajatziko-riki*

<sup>9</sup> Paashini eejatzi roshiyakaawentakiri Jesoshi. Ikenkithatakotziri ri-raga kantakaaperotzinkari, riraga theenkaeyiririni paashinipaeni atziri. Ikantzit:

<sup>10</sup> —Riyaataki apite shirampari Tajorentsipankoki ikenkithatakayeri Tajorentsi. Apaani rirotaki warijeeyo, omaanta paashini piyotziniriri iyorikite joriiyopaeni eekiro iperikya oroomajatz.

<sup>11</sup> Ikantaka ikatziyapaaka riraga warijeeyo, ikantawitapaakari: "Tajorentsi, ariwee, osheki nokameethataki naaka. Tekatsi nante, tee nokimitari riraga koshitantatsiri, riraga amatawitantatsiri, shrontayitaworini osheki tsinani. Eejatzi tee nokimitari irika ayitziriri atziri iyorikite.

<sup>12</sup> Nametakawo maawaeni tominko notzitapiinta apite kitejiri, eejatzi nopagaantapintayitzimironi maawaeni naayitzirini. Naakirika 10 oetarika, apaani nopakimi".

<sup>13</sup> Omaanta riraga piyotapiintziniriri oroomajatz iyorikite ikatziyaneen-tapaaka inttea. Tee ikantakaaperota rirori, omaanta osheki ipashi-wentakaakawo rantayitzirini, rootaki kaari raminanta jenokinta, apatziro rompojashipaneetaka. Ikantzi: "Tajorentsi, pineshironkatena naari, tee nokameethaperotzi, eeniro osheki nantani".

<sup>14</sup> Nokamantemi, oshekini naawita rantani riraga shirampari, omaanta ikamintaakiri Tajorentsi. Aririka ipiyee ipankoki riyotanaki iñaaperotakiri rirori ikameethatzi. Omaantakya riraga warijeeyo, tee ikimitari. Eero iñaaperotziri riraga Tajorentsi kantakaaperotachari. Omaanta riraga kaari kantakaaperotachani ipeyeeri pinkathariwenantatsini.

### *Ikowaki Jesoshi ipokashiteeyerini eentsipaeni (Mt. 19.13-15; Mr. 10.13-16)*

<sup>15</sup> Okantaka tsinaniipaeni amaeyakinirini Jesoshi eentsipaeni, okowaki ipampiteeyerini eejatzi ikanteri Tajorentsi ramitakotantyaariri. Omaanta iñaantawakawori riyotaanewo, itañaakowitzakawo eero amiri eentsitepaeni: tee ikowakaawityaari ipokashiteri.

<sup>16</sup> Omaanta ikaemiri Jesoshi eentsipaeni, ikantakiri riyotaanewo:

—Pishinetenari ipokashitenataa eentsipaeni. Eerowa pikatziyakari. Nokowaki ipokashiteenaata. Piñeyakirini irikapaeni eentsika: tee itheenkaeyanan, inta rameenteeyakinani. Tema reewawenteeyirini Tajorentsi maawaeni kimiteeyaririni rirori.

<sup>17</sup> Eejatzi, kyaaryootaki iroka nokamantemiri: maawaeni kaari oshiyarini eentsi riraga aapatziyanari kameetha, eero imatziri reentsitetari Tajorentsi.

### *Ewankari ashaagantzinkari (Mt. 19.16-30; Mr. 10.17-31)*

<sup>18</sup> Paashini kitejiri ryaatashitakiri Jesoshi apaani iwinkatharite joriiyo. Ikantapaakiri:

—Iyotaanari kameethari. Pikamantena: ¿oetakama nanteri nañaantyaari, nokanteetatyeyaaani?

<sup>19</sup> Ikantawakiri Jesoshi:

—¿Itaka pikanantanari: "Kameethari"? Tekatsi kameethatatsini, inta apatziro Tajorentsi ikameethatzi.

<sup>20</sup> Piyotakoeyironi maawaeni ikaminaakaeri Tajorentsi: "Eero piñaathatzimotawo piina paashini tsinani, eero powamaantzi, eero pikoshitzi, eero pitheeyakotari paashini atziri, pipinkathateri piri eejatzi piniro".

<sup>21</sup> Rakanakiri:

—Tema maawaeni iroka nomonkaatakiro: eenironi newankaritapaakini, roojatzi iroñaka.

**22** Ikemantawakawori iroka, ikantanakiri Jesoshi:

—Eenitatsi apaani koetyeemotakimiri ejatzii: pipimanteeyeroni maawaeni tzimimotayitzimirini, pipaeyerini ashironkaenkari owinawo. Aririka pimatakiro iroka, ojeeke osheki tzimimoeyemirini janta jenokinta. Pipimantakirorika powaagawo, pipokanaki poyaataperotanakina.

**23** Ikemantawakawori iroka, osheki rowashiretanaka. Rooma ashaagantzinkaripero, tee ikoyi ipimantero rowaagawo, omaanta rompetakawo.

**24** Iñaakirira Jesoshi rowashiretanaka, roojatzikantaki:  
—Opomeentsitzimotakari ashaagantzinkari ikowaki Tajorentsi ipinkathariwenteri.

**25** Napiitemiro noshiyakaawentemiro: tema opomeentsitzimotakari riraga kameeyo roshinthateri imooki kithapi. Omaanta ashaagantzinkari opomeentsitzimotaperotyaari ikowaki Tajorentsi ipinkathariwenteri.

**26** Ikanta rojampitanakiri riraga kemawakiriri:

—¿Arima? ¿Pomeentsitakama? ¿Ninkama materoni awijakotaatsini?

**27** Rakanakiri Jesoshi:

—Iroka kaari imatapaiintzi atziri, omaanta imatakiro Tajorentsi rirori.

**28** Roojatzikantaki Peetero:

—Iyotaanari, nookaeyakironi maawaeni tzimimoeyanarini noyaateeyantakimirini iroñaaka.

**29** Rakanakiri:

—Kyaaryootaki iroka nokamantemiri: tee patsipetashitawo. Aririka pookaeyeroni pipankopaeni, piinapaeni, pirentzipaeni, pitsiropaeni, piripaeni, piniropaeni, pitomipaeni, pishintopaeni: omaanta rootaki pookaeyantyaaririni pikowaperotaki ipinkathariwentemi Tajorentsi, eero patsipetashitawo.

**30** Aritaki ipinatakimi Tajorentsi iroñaaka jaka kipatsikika, ejatzii ipinatawaemi iinja janta jenokinta: pikanteetatyeyaañi pañaaperotapae janta.

### *Rapiiteero Jesoshi ikamantakota rowamagaeteri*

(Mt. 20.17-19; Mr. 10.32-34)

**31** Riyoshiiteeyanakirini roojatziki aikemantakari Jesoshi riyotaanewo 12, ikantanakiri:

—Pamine, iroñaaka aateeyeni Jerojareeki. Eenitatsi rojankinatakotzitakinirini paerani riraga kamanantayitzirorini iñaani Tajorentsi. Naaka poñaachari jenokinta, nokoñaatapaaki jaka kipatsikika. Iroñaaka janta Jerojareeki ari omonkaaty maawaeni rojankinatakotzitakinirini.

**32** Raakaantena asheninka aari, rayena kaari yotziri Tajorentsi. Ishirontawenteeyenani, rowashironkagaeyenani, reewapootayitenani,

**33** ipajapajaatena, rowamaena. Okaatapaakirika 3 kitejiri, nopiriintanee ejatzii.

**34** Omaanta tee riyotakoeyawakironi oetarika ikanteeyawitakiririni, ikompiteeyawakawoni.

### *Raminakagaeri Jesoshi kaari ñaantatsi*

(Mt. 20.29-34; Mr. 10.46-52)

**35** Ikantanaka Jesoshi, ikinanaki awotsiki, rootzimateentsi rareetya nampitsiki iitachari Jerikoo. Ari ijekki janta awotsinampiki shirampari kaari ñaantatsi, inethaakotapiintziri koriki awijayitatsirini.

**36** Ikemantawakari rirori ipokaeyapaakini osheki atziri, rojampitakiripaashini atziri:

—¿Ninka pokatsiripaeni?

**37** Rakanakiri:

—Kaakitaki Jesoshi, riraga Najareetejatzi, royaateeyakirini osheki atziri. Ari ikinapaakawo jaka.

<sup>38</sup> Roojatzi ikaemakotantawakari:

—Jesoshi, eero ka icharineeten i Ravirini. ¡Pamitakaajeetenaty naaka!

<sup>39</sup> Ikanteeyanakirini jewateeyiririni Jesoshi:

—¡Pimaerite!

Omaanta, eekiro ikaemanakitzi:

—¡Jesoshi! ¡Pamitakaajeetenaty!

<sup>40</sup> Roojatzi ikatziyantapaaka Jesoshi, ikantanaki:

—Pamakinari.

Ikanta ramaetakiri. Roojatzi rojampitawakiri:

<sup>41</sup> —¿litaka pikoyiri?

Rakanakiri:

—Nowinkatharite, nokowaki noñaantee naari.

<sup>42</sup> Ikantanakiri:

—Aritaki piñaantee iroñaaka. Pameentakina, rootaki petsiyatakotaari.

<sup>43</sup> Aripaete iroñaaka iñaantane. Roojatzi royaatantanakari Jesoshi, ikantanaki:

—Iñaakagaana Tajorentsi, tema ikameethataki.

Eejatzi ikimiteeyakarini maawaeni ñeeyakiririni, ikanteeyakini:

—Tema ikameethataki Tajorentsi.

## 19

### *Iñaakiri Jakeeyo Jesoshi*

<sup>1</sup> Roojatzi ikinanaki riraga Jesoshi janta nampitsikinta iitachari Jerikoo.

<sup>2</sup> Ari ijeeki janta ashaagantzinkari iitachari Jakeeyo. Rirotaki riraga jewatakyitziririni maawaeni piyotapiintziniriri oroomajatz iyorikite ijori-iyotzinkaritepaeni.

<sup>3</sup> Ikowawita rirori Jakeeyo iñeerimi riraga Jesoshi, omaanta tee rantaripenthakiutzi: ikaamokokitziini. Oshekini atziri rotzikaakiri rootaki kaari imatanta iñeeri rirori.

<sup>4</sup> Roojatzi ishiyantanaka, ranaanakiri maawaeni atziri reewatanaki janta awotsiki.

<sup>5</sup> Roojatzi rateetantapaakawo inchato janta othapiki ikinanakinta paata Jesoshi. Rateetapaakiro inchato roojatzi raminakotawakiri riraga Jesoshi ikinapaaki jaawiki. Rareetantapaakariri, raminapaaki jenoki, roojatzi iñaantapaakari, ikantapaakiri:

—Jakeeyo, intsipaete pojoonki. Ari noshiretakawo iroñaaka pipankoki.

<sup>6</sup> Roojatzi intsipaete rojoonkanaka, ikantawakiri:

—Jee, thameeta nopankoki.

Oshek ikimoshirewentawakiri riraga Jakeeyo.

<sup>7</sup> Omaanta ikijanaka amineeyakiririni, ikantzi:

—Irira teera ikameethatz. ¿litarikya riyaatashitantariri Jesoshi janta ipankokinta?

<sup>8</sup> Niyanki awotsi riraga Jakeeyo raapatziyari Jesoshi, roojatzi ikantakiri:

—Nowinkatharite, iroñaaka nopagaanteeyerini owashironkaenkari kashetani tzimimotanari. Eenitatsirika atziri namatawitakiri nokoshitakiri, noepiyeeniri maawaeni, eejatzi nopaeri paashini oshek. Okaatzirika apaani nokoshitakiri, nopaeri 4.

<sup>9-10</sup> Roojatzi ikantawakiri:

—Iroñaaka kitejiri pawijakotaki. Iroñaaka pikimiperotari achariniiteni paerani Awaraamani, paapatziyakari Tajorentsi. Naaka poñaachari jenokinta nokoñaatapaaki jaka kipatsikika. Rootaki noopoñaantari jenokinta: naminaminatziri owashironkaenkari, riraga kaari yoperotziriri Tajorentsi, nokowaki nowawijaakoteri maawaeni.

*Jesoshi ikenkithatakotziri pinkathari pakiriri ronampiripaeni koriki  
(Mt. 25.14-30)*

**11** Ikemaeyakironi atziripaeni ikantakiri Jesoshi. Eejatzi riyoteeyakini rooteentsi rareetya Jerojareeki. Iitashiteeyakan rooteentsi ipoke Tajorentsi ipinkathariwenante jaka kipatsiki,

**12** roojatzi roshiyakaawenantakanariri iroka, ikantziri:

—Ijeeki apaani shirampari, pinkatharitawitachari. Tema ikaemakaan- takiri paashini pinkathari janta paashiniki kipatsi. Ikantaka ryaatanaki, ipeyawakiri pinkatharipero ipinkathariwenantyaariri inampijatzipaeni.

**13** Ikanta rootzimateentsi ryaate, ikaemakiri ronampiripaeni ikaatzi 10, ipaeyanakirini osheki koriki. Ikantakiri: “Irika korikika, osheki iwinawo. Nokowaki piyompariteeyantyaarini. Aririka nopyiee, naminapaeri tsika ikaatzi koriki paakiri”.

**14** Ikantaka ryaatanaki iitantlyaariri pinkathari. Omaanta tee ikowaeyirini inampijatzipaeni ipinkatharite, osheki ikijeeyakirini. Rotaanteeyawitakani apaanipaeni inampijatz, ikantawitari riraga paashini pinkathari: “Tee nokowakagaeyirini ipinkathariwenteeyenani riraganki, tee ikameethatzi”.

**15** Omaanta iitawakiri pinkathari, roojatzi ipiyantanaa ipinkathari- wenantyaariri. Ikaemakaantteeyakirini ronampiripaeni: riraga ipaeyawi- tanakarini iyorikite. Rojampiteeyakirini: “¿Poshekyaaakinrima noorikite?”

**16** Ari ikantapaakiri riraga jewatatsiri: “Pamine, iroñaaka noshekyaaoper- otakiri piyorikite. Apaani pipakinari, noshekyaaoperotakiri, iroñaaka naaki 10”.

**17** Ari ikantanakiri pinkathari: “Kameethatakimi. Osheki piyotaki. Pikyaaryooventakinawo eechonkiini okaatzi nokantakimiri. Iroñaaka noetemi pinkathariwenteroni osheki nampsitsi, okaate 10. Pikyaaryoowen- tenawo pipinkathariwentero”.

**18** Ikantaka ipokapaaki paashini, ikantapaakiri: “Irika piyorikiteka. Pi- pakinari apaani, iroñaaka naaki apawakooni”.

**19** Eejatzi ikantawakiri: “Iroñaaka pipinkathariwentero eeroka apawakooni nampsitsi”.

**20** Roojatzi ipokantapaaka paashini, ikantapaakiri: “Nowinkatharite, eeniro piyorikiteka pipawitakinari chapinki. Nokempoyaakimiri nowaañorerakte”.

**21** Osheki nothaawantakimi, niyotaki osheki pipinkatharitaki. Paapi- thatziri paashinipaeni rashitayitarini, eejatzi payitantziro okithoki kaari pipankitzi”.

**22** Roojatzi ikanantanakari: “Tee pikameethatzi, tee pantanawo nokowakaawitakimiri. Pikantawitana: ‘Osheki pipinkatharitzi, paapithatziri paashinipaeni rashitayitarini, paayitzironi okithoki kaari pipankitzi’. Piyotawitakaga, rootaki nokijantakimiri iroñaaka”.

**23** ¿Iitaka kaari powantanari noorikite waankoki? Powakirim i janta, ari roshyekyaanakyaami iroñaaka noorikite”.

**24** Roojatzi ikanantanakari riraga katziyayiteencharini: “Paapithateri noorikite. Piperi riraga agaentsiri 10”.

**25** Ikanteeyawitanakarini: "Nowinkatharite, eenitatsi oshekini iyorikite iroñaaka. ¿litakaya pipashitantyaariri paashini eejatzi?"

**26** Rakanakiri: "Nokamantemi, itzimerika ashaagantachani, nopaeri paashini eejatzi. Omaanta riraga kaari ashaagantacha, naapithateeri rowaga tzimotawitariri eechonkiini.

**27** Eejatzi riraga kijakinari kaari kowakaawitenani nowinkatharite, pamaeyakinarini, naminakoeyemiriniita powamaeyerini".

Rootaki ikenkithatakagaeyakiririni Jesoshi atziripaeni.

*Rareetapaa Jesoshi Jerojareeki  
(Mt. 21.1-11; Mr. 11.1-11; Jowa 12.12-19)*

**28** Roojatzi rowaaganaka eejatzi Jesoshi, riyaate Jerojareeki.

**29** Rootapaensi rareetyaawo nampsiti iitachari Wetejajee eejatzi Wetaaniya. Ari ojeeki janta tonkaari iitachari Oriiwomashi. Roojatzi rotyaanantaka riyotaanewo apite,

**30** ikantakiri:

—Piyaate janta nampsitsiki, ari piñaappaakiri wooro ithatakotaka janta. Tekira ikyaakoetari. Pithataryakotapaakiri, pamakinari.

**31** Aririka rojampiteetemi: "¿litaka pithataryakotantariri?" Pikanteri: "Ikowakiri Awinkatharite".

**32** Roojatzi riyaateeeyantanakani apite, iñaappaakitziri ikantakiriri Jesoshi.

**33** Ikanta ithataryakotapaakiri. Roojatzi rojampitantanakari ashitariri: —¿litaka pithataryakotantariri nowoorote?

**34** Rakanakiri:

—Ikowakiri Awinkatharite.

—Ari, paanakiniri.

**35** Roojatzi raantanakari janta Jesoshiki. Rowankitakiniri imitzikaaki iithaariipaeni ijekantyaari Jesoshi, roojatzi ikyakotantakari.

**36** Ikanta rowaagakotanaka janta awotsiki, ishitashiteeyakinirini atziripaeni iithaariipaeni awotsiki, ranashitantanakyaaari wooro.

**37** Ari ritanakawo iroñaaka roerinkakotanaka. Royaateeyanakirini osheki aapatzieeyakiririni, iweshiryawenteeyanakarini, ikaemaeyanakini. Ikanteeyanakini:

**38** —Tema ikameethataki Tajorentsi. Añeyakirini itajonkawentapiinteeyakaeni. Ikameethataki Awinkatharite rotyaatkaeniri Tajorentsi. Kameetha ijekkaeyakini maawaeni jenokijatzi, iñaaperoeyakirini Tajorentsi.

**39** Ari ijekitaka riraga warijeeyopaeni, ikaateeyakirini atziripaeni. Ikantawitakari Jesoshi:

—Iyotaantsatsiri, pojantzikaagaeyerini riraga oyaateeyimirini.

**40** Rakanakiri:

—¿litaka nojantzikaantyaariri? Okameethataki ranteeyakirini. Ijantzikaeyanakinirikami írikapaeni, tema ari iñaawaetakaakiromi Tajorentsi mapipaenika oñaaperotantenerimi.

**41** Ikanta rokaakiteeyapaakawoni, iroñaaka raminakotapaakiro Jerojaree. Riraakoeyapaakarini Jesoshi jeekatsiripaeni,

**42** ikantzi:

—Nokowawitaka nojeekekagaeyeminimi kameetha, omaanta tee pikowaeyini. Pitheenkayakinani, iroñaaka eero piñagaana nopinkathariwenteeyemini.

**43** Iinja ipoke powayiritepaeni rotzikaperoeyapaakimini, itapoteeyapaakimini joraaropaeni, eero ishineteeyimini tsikarika pikini pishiyantyaari. Romanateeyapaakimini,

**44** ijoweyaperoeyapaakironi pipanko kameetha. Rowamaagaanta-paakimi. Nopokashiteeyawitakimini, noppinkathariwenteeyemini, omaanta tee pipinkathateeyawakinani, inta pitheenkaeyawakinani. Rootaki awijatsini iinja maawaeni iroka.

*Romishitowiri Jesoshi pimantayitatsirini tajorentsipankoki  
(Mt. 21.12-17; Mr. 11.15-19; Jowa 2.13-22)*

**45** Rareetantapaakari Jesoshi Tajorentsipankoki ifeeyapaakirini pimantayitatsirini eejatzi amanantayitatsirini. Roojatzi rookatheeeyantapaakarini rookakiri inkokironta. Ithonkaeyakirini maawaeni,

**46** ikantakiri:

—Tema rojankinatziteetakawo Iwaperiteki Tajorentsi: “Ikantzi Tajorentsi: ‘Iroka Nopankoka okameethatzi pikenkithataakaapiinteyenan eerokapaeni maawaeni atziri’, rootaki niwetsikakaaantawori”. Omaanta iroñaka eerokapaeni pikoshitashiteeyakarini atziripaeni pokaeyawitacharini nopankoki.

**47** Ikantapiintatyaaani maawaeni kitejiri riyaatapiintzi Tajorentsipankoki, ryotaantapiintaki. Omaanta ikijeeyanakirini riraga jewatayitziririni ñaanakowenantsirsipaeni, riraga iyotaantzirori rojankinarini Moeseshi, eejatzi riraga pinkathariwenteeyiririni jeekatsirsipaeni. Rojampitawaka-gaeyakan:

—Tsika akanterika Jesoshi, owamaakaanantyaariri?

**48** Omaanta tee ryoteeyini tsika ikanteriri, tema eeniro osheki atziri piyotawenteeyakaririni, ikemijantziri okaatzi ikantziriri.

## 20

*Rojampitziri Jesoshi: “¿Ninka otyaantakimir?”  
(Mt. 21.23-27; Mr. 11.27-33)*

**1** Apaani kitejiri ijekaki Jesoshi janta Tajorentsipankoki ryotagaeyakirini atziripaeni, ikamantakiri tsika ikanteeyaaarini rawijakotanteeyarini. Ikantaka ipokaeyapaakini riraga jewatayitatsirini ñaanakowenantsirsipaeni, riraga iyotaantzirori Iwaperite Tajorentsi, riraga aataperoteenchari, maawaeni.

**2** Ikanteeyapaakirimi:

—Pikamanteeyenani ninka owakimirika pinkathari: ¿ninka otyaantakimirika pantayitantaworini iroka?

**3** Rakanakiri:

—Eejatzi naari, eenitatsi nojampiteeyemirini. Pikamanteeyenani:

**4** ¿Ninkama otyaantakiriri Jowa ikaawoshitakotantariri Tajorentsi? ¿Rioma Tajorentsi otyaantakiriri? Karima, ¿rioma otyaantziriri atziri?

**5** Tee rakaeyirini, inta ikantawakagaeyananaki:

—¿litaka akanteriri? Akanteririka: “Riotaki Tajorentsi otyaantakiriri”, ikanteekari: “¿litaka kaari paapatziyantari?”

**6** Eejatzi akantawitakyaaririka: “Riraga atziripaeni otyaantakiriri”, tema ari ikijeeyanakaeni atziripaeni. Rompojanteerokari mapi. Tema rirori ikenkithashiryaakoperotziri Jowa riotaki kamanantzirori iñaani Tajorentsi.

**7** Rootaki ikananteeyanakaririni:

—Tee niyoteeyini ninkarika otyaantakiriri Jowa.

**8** Roojatzi ikanantaka rirori Jesoshi:

—Eejatzi naari, eero nokamantzimi ninkarika otyaantakinari.

*Jesoshi ikenkithatakotakiri riraga pankitzirori oowa  
(Mt. 21.33-44; Mr. 12.1-11)*

<sup>9</sup> Roojatzi ikenkithatakagaeyakirini Jesoshi atziri, roshiyakaawenteeyakinirini, ikantakiri:

—Enitatsi atziri pankitzirori oowamashi. Roojatzi ikanantakari ratzirite: “Paminawiritanenawo, iinja aririka okithokitanaki, paye eerori kashetani okithoki, kashetani pipena naari”. Ikanteeyanakirini: “Ari, kameetha”. Roojatzi riyaatantanaka ashitawori paashiniki kipatsi, ipeyaka ojamani janta.

<sup>10</sup> Okanta omonkaatapaaka rowiitakiro okithoki. Riraga ashitawori roowate rotyaantakiri riraga ronampiri, ikantakiri: “Piyaatakite janta ojeekinta noowate, pikowakotakiteri riraga aminanawori rotyaantawakina kashetani”. Ikantaka jatafawanaka omaanta ikijejerawakirini, ipajapajaatawakiri, roepiyawakiri. Tekatsi ipawakiri.

<sup>11</sup> Roojatzi rotyaanantawitakari paashini ronampiri, omaanta ikaweyawaetawakiri, ipajapajaatawakiri, roepiyawakiri. Tekatsi ipawakiri.

<sup>12</sup> Roojatzi rotyaanantawitakari paashini eejatzi, omaanta eejatzi ipajawakiri, tak, tak, osheki riywakaakiri riraa. Roepiyawakiri eejatzi.

<sup>13</sup> Ikenkithashiryaaka iroñaaka riraga ashitawori, ikantzi: “Litaka nanteri iroñaaka? Aamaashitya rirorika notyaanteri iroñaaka notyomi nonintaperotziri. Aririka iñleeyerawakirini irira, aamaashitya rirorika ipinkathawakiri”. Roojatzi rotyaanantawitakari rirori.

<sup>14</sup> Iñanteeyawakaririni, ikantawakagaeyakanani: “Pamineritya itomi ashitawori iipatsite. Aririka ikamaki iriri, tema rirotaki aakoteroni. Thame owamaawakiri, agaeroota iinja aaka kipatsi”.

<sup>15</sup> Roojatzi roerikantawakari, shepik. Ragaeyanakirini janta okaatapaaki iipatsite, rowamaagayakirini, shemi.

Rootaki ikenkithatakagaeyakiririni Jesoshi. Ikanteeyakirini:

—Oetaka pikenkithashiryaari ikanteriri riraga ashitawori iipatsite.

<sup>16</sup> Tema ari riyaatakte rirori, ikijaperoeyakiterini thamaetawitanariri rowani, eejatzi rowamaakiteri. Roojatzi raminanteeya paashini thamaeteenirini.

Ari ikanteeyanakirini kemaeyawakiririni:

—Tema eero imatziro ranteeyeroni iroka, eero ishinetziri Tajorentsi.

<sup>17</sup> Ramineeyakirini Jesoshi, ikantziri:

—¿Piitakaawitakama eero imatziro? ¿Oetakama otzimantakari Iwaperite Tajorentsi? Tema okantzi: “Riraga wetskaeyirorini pankotsi itheenkakiro apaani mapi, ikantzi: ‘Tee okameethatzi’, omaanta iinja rowaga mapi itheenkawitakari, iñakiro riraga Tajorentsi okameethatzi, tema rirotaki iyyaakirori iroka mapi kijotakaoperoteroni pankotsi. Tema rootaki ot-sikanatantanakawori aakapaeni”.

<sup>18</sup> Noshiyakawentemiri atziri aririka ipariyaki antawoki mapi tema ari ikagaapokitapaaki. Eejatzi aririka opariyaki antawo mapi ari atsinakapaakiri, opithoryaapaakiri. Kimitaka iroka, ninkarika kaari aapatziyana naaka eero rawijakote, eejatzi aririka nokantakoteri kaari aapatziyana aritaki notyaanteeyakirini paamari kaari tsiwakanitatsini.

*Riyoteeri Jesoshi atziri ikemijantaperoteri ikantziri pinkathari eejatzi ikantziri Tajorentsi*

*(Mt. 21.45-46; 22.15-22; Mr. 12.12-17)*

<sup>19</sup> Riraga jewatayitziririni ñaanakowenantsirsipaeni, eejatzi riraga iyotaantzirori Iwaperite Tajorentsi ikowaeyawitakanri ragaeyerinimi iroñaaka Jesoshi, tema riyotakoeyawakani rirotaki roshiyakaawenteeyakirini.

Omaanta tee imatziro rayiri, ithaawanteeyakarini atziripaeni, ikantzi: "Eero ayiri, ikijakotanakarikari atziripaeni".

<sup>20</sup> Roojatzi rotyaanantakari ūnaanakowenantsirii atziri, ikantakiri:

—Iroñaaaka piyaate pamatawiteri riraga Jesoshi. Pikimitakaantapaakyari kyaaryo pikowaperotaki paapatziyari; omaanta, pikompitakaeyari iñaani. Aririka ikompitanaikyaawo ikanteri, intsiapae pipokanaki pikamantena. Roojatzi aatashitantakyaari pinkathari, akamanteri ikantakiri.

<sup>21</sup> Ikantaka riyaatashitanakiri Jesoshi, ikantapaakiri:

—Iyotaanari, niyoteeyakini kyaaryooperotaki maawaeni pikantakinari ejatzi maawaeni piyotaakinari. Tee paminashitarit atziri ipooki piyotantyaariri ikameethatzirika, inta paminaperotzi rajankani ikenkithashiryaaantari. Eejatzi kameetha piyotagaeyakinawoni ikowakagaeyakinarini Tajorentsi.

<sup>22</sup> Iroñaaaka pikamantena: ¿okameethatzima apaeyerini riraga iwinkatharite oroomajatzi ayorikite ikowakotakaeri? ¿Eeroma apiri?

<sup>23</sup> Ikanta riraga Jesoshi riyotakotakirini ikowaeyawitani ramatawiterimi. Ikantziri:

—¿litakaky pikowantari pikompitakayenawo noñaani?

<sup>24</sup> Poñaayenari ikithoki piyorikite. ¿Ninka roshiyapootakarika irika korikikika? ¿Ninka ashitawori iwaero jankinateencharika?

Rakanakiri:

—Rootaki ipoo iwinkatharite oroomajatzi, riraga Seesari, ejatzi ojankinataka iwaero.

<sup>25</sup> Roojatzi ikanantanakari Jesoshi:

—Okameethatz panteniri irinta ikowakaakimiri, ejatzi pantzityaanari Tajorentsi ikowakaakimiri.

<sup>26</sup> Tektsi ikanteeyaani ikompitakayaari iñaani Jesoshi, kameetha riyotaantaperotaki. Rotsikanateeyanakarini riraga amatawiterinimi, rootaki imaariteeyantanakarini. Tektsi ikantaneeri ejatzi.

### *Rojampitakoventeetziro aririka rañagae kamayitatsirini*

(Mt. 22.23-33; Mr. 12.18-27)

<sup>27</sup> Roojatzi riyaatashitantakari Saroseeyo Jesoshi. Ikenkithashireeyani riraga Saroseeyo, ikantzi: "Eero ipiriinteeyaani riraga kaminkaripaeni, eero riyateeeyini jenokinta". Rareetapaakaga, ikantapaakiri:

<sup>28</sup> —Iyotaantatsirii, ikantzini Moeseeshi: "Eenitatsirika shirampari iina, omaanta tekatsirika itomi, aririka ikamaki, okameethatz ragaero iinani rirentzi itzimakaanteeyaawori otomi. Itzimapaakirika otomi kimiwitanaka rirotaki ashityaarini rirentzini itomi".

<sup>29</sup> Amashitya eeniro shirampari ikaatzi rirentzi 6 impaetatsiri. Riraga itawitanakawori raawitaawo iina, ikamashitaka. Tee itzimi itomi.

<sup>30</sup> Roojatzi raantawitaawo riori rirentzini. Eejatzi tee itzimakayiro itomi, roojatzi ikamantaka riori.

<sup>31</sup> Eejatzi ikimitaka paashini rirentzini. Raawitaawo tsinani, ikamashitaka ejatzi riori. Eejatzi ikimiteeyakani maawaeni rirentzini. Tektsi tzimakayeroni otomi.

<sup>32</sup> Ro impaeteentsi roori tsinani, okamaki.

<sup>33</sup> Iroñaaaka pikamantena: kyaaryorika ipiriinteeyanee ni maawaeni ka-maeyawiteencharini, ¿ninka iinanteeyaaawoni iroka tsinani? Tema ikaateeyawitani aawitawori 7.

<sup>34</sup> Ikanta ikantawakiri Jesoshi:

—Kyaaryo, jika kipatsiki rameteeyakawoni shirampari rayi iina. Eejatzi tsinani paenii ameteeyawoni ayi oemii.

<sup>35</sup> Ari ipiriinteeyeerini Tajorentsi maawaeni atziri iñaaperotziri, omaanta janta jenokinta eero ragae iina. Eejatzi tsinani, eero agae oemi.

<sup>36</sup> Eejatzi eero janta ikamae eejatzi, ikimiteeyapaeyaarini maawaeni ronampiripaeni Tajorentsi, jeekimoeyiririni: tee ikamaeyini riori. Ikantani rañagaeyini. Eejatzi itomintaperoeyeeyarini maawaeni atziri riraga ipiriinteeyeerini.

<sup>37</sup> Paerani riyotzitakani Moeseeshi ipiriinteeeyaneeni kamayitatsirini. Ikenkithatakotantawori inchashimpoki amorekawitachari, ikenkithatakotakiri eejatzi Awinkatharite. Ikantzini: "Raapatziyana Awaraama. Eejatzi Ijaaka raapatziyana, eejatzi Jakoowo".

<sup>38</sup> Ñaakiro, tee ikantzni: "Raapatziyawitakinani Awaraamani". Añaatsi iroñaaka Awaraama eejatzi paashinipaeni, rootaki ikanantakari: "Raapatziyana".

<sup>39</sup> Roojatzi ikantayitantakarini apaanipaeni iyotaantzirori Iwaperite Tajorentsi:

—Iyotaanari, kameethataki iroka pikantakiri.

<sup>40</sup> Ithaawanteeyakarini rojampiteeyaneerinimi eejatzi.

### *Jesokirishito rivotaki icharineeteni Iraviiri*

(Mt. 22.41-46; Mr. 12.35-37)

<sup>41</sup> Paashini eejatzi ikantakiri Jesoshi:

—¿Itaka pikanteeyantarini: "Rivotaki Rotyaantanewo Tajorentsi icharineeteni Iraviirini"?

<sup>42</sup> Tema paerani romampaawenttarini Iraviiri Tajorentsi, rojankinatakiro iroka: "Riraga Tajorentsi, ikantakiri Nowinkatharite: 'Notyomi, pijeki jika nakoperoki, pikaatenaa apinkathariteeyeni,

<sup>43</sup> roojatzi ipinkathateeyantemirini maawaeni kijeeyawitakimirini".

<sup>44</sup> ¿Rioma Jesokirishito icharineeteni Iraviiri? Rirorika icharineeteni ¿itaka ikanantaririkya paerani: "Nowinkatharite"? Tee pameteeyawitawoni pipinkathateeyirini impaetatsiri ijeki.

### *Paamayaarira iyotaantawitori Iwaperite Tajorentsi*

(Mt. 23.1-36; Mr. 12.38-40; Rk. 11.37-54)

<sup>45</sup> Maawaeni atziri ikemaeyakirini Jesoshi, riyotagaeyakirini riyoaanewopaeni, ikantakiri:

<sup>46</sup> —Paamayaarira riraga iyotaanteeyawitaworini Iwaperite Tajorentsi. Osheki ikowaki ikinakinathanthanatziite. Eejatzi ikowaki kameetha raakameethateeyawakirini atziri janta nampitsiki. Eejatzi janta pankotsiki apiyotantapiintarira, ikowaki ijekimotapiinteri pinkatharipaeni. Eejatzi arírika ipiyoteeyani atziri rowaeyani, ikowaki kijokiro rowapiinteri pinkatharipaeni. Eero pikimitari riroripaeni.

<sup>47</sup> Kimiperowitaka ikameethatzi. Rojamanitziro ikenkithatakayeri Tajorentsi. Ikowaeyawitakanira atziri raapatziyaperotakayaarimi Tajorentsi. Omaanta osheki ramatawitapiintakiro kamatsiri oemi, ikoshitashitakawoni tzmimotzirori. Kyaaryootaki iroka nokamantemiri: rowashironkaaperoeyerini osheki Tajorentsi paamariki iinja.

## 21

### *Ikenkithatakotziro Jesoshi tsinani ashironkaenkawo*

(Mr. 12.41-44)

<sup>1</sup> Ari ijeekaki Jesoshi janta Tajorentsipankoki. Raminayitawakirini ashagantzinkari otetziriri iyorkite janta rotetantapiintaririra.

<sup>2</sup> Eejatzi iñaakiro irowa kamaentsiri oemi owashironkaenkawo. Otetapakirri roori apimerontakite oorikyaanikite, kaari pinatacha.

<sup>3</sup> Ikantzi:

—Kyaaryo iroka nokamantemiri: pitheenkitzirokari irika amakiri iroka kamaentsiri oemi. Omaanta osheki iñaaperotzitakiro Tajorentsii irika amakirika, anaakotakiri ramaeyawitakarini riraga ashaagantzinkari.

<sup>4</sup> Osheki iwinawo ramawitakari rirori, omaanta eeniro ikempoyaa-gantanaki tzimagaantapaentsiri rirotaki ramakiri rirori. Rooma iroka, amanakiri maawaeni tzimimotawitawori, tee añagaeri tzimagaantanaatsini, tektsi aantaneya oyaari.

### *Inja ishekiryagaeteero Tajorentsipanko*

(Mt. 24.1-3; Mr. 13.1-4)

<sup>5</sup> Ikenkithatakaawakaeyakanri riyotaanewopaeni, ikanteeyini:

—Tema okameethaperotaki Tajorentsipankoka. Eejatzi maawaeni mapi-paeni riwetsikantakawori, okameethateeyakini, eejatzi maawaeni rowa-nenkatantakawori janta otantoki.

Ikemanteeeyakaririni, ikantziri Jesoshi:

<sup>6</sup> —Inja ishekiryagaeteero maawaeni iroka piñaaperoeyirini iroñaaka. Rookaeteero mapipaenika inteea.

### *Oeta awijatsini iinja rootzimataatsirika ipokae Jesoshi*

<sup>7</sup> Roojatzi rojampiteeyakirini:

—¿Tsika okaateka omonkaatantyaari iroka pikantakinari?      ¿Tsika nokantyaaka niyotantyaari rooteentsi omonkaatyaya?

<sup>8</sup> Ikantakiri:

—Kyaaryoowa, ramatawiteetzimikari. Ipoke osheki atziri ikantapaakimini: “Naaka Jesokirishito”. Paashini kantapaentsini: “Rotyaantakina Jesokirishito nokamantemri rooteentsi ipokae”. Omaanta eero paapatziyari.

<sup>9</sup> Pikematyeeri atziri ikante romanatakagaeyatyanaati atziripaeni, eejatzi rookaeyerini iwinkatharitepaeni. Omaanta eero pithaawaeeyini. Aritaki okantyaari ikijawakaapiinteeyaaani, omaanta tekira omonkaata nopolkan-teeyaa.

<sup>10</sup> Eejatzi eenitatsi paashini ikantakiriri:

—Riraga atziripaeni romanaterini inashitapaeni atziri. Eejatzi riraga jewanenantsirsri paashiniki kipatsi ragaeyanakirini inampijatzipaeni romatakayaari romanateeyirini riraga jeekatsiripaeni paashiniki kipatsi.

<sup>11</sup> Eejatzi osheki otzimayitanakini antawo omoyoke jaka kipatsik. Agaey-erini atziripaeni itashe, osheki ikamaeyanakini; eejatzi omateeyirini mantsiyarentsi atziripaeni, ikamagaantayiteni rirori. Eejatzi okimitzitanakya janta jenokinta ari piñaawakiro kaari piñaapiinteeyini, osheki pi-thaawanteeyanakyaawoni.

### *Jesoshi ikantakiri riyotaanewo: “Inja ikijeeyemini atziri”*

(Mt. 24.9-22; Mr. 13.9-20)

<sup>12</sup> Eejatzi ikanteeyakirini:

—Omaanta reewateetemi ikijeetemi: tema paapatziyakina. Ragaeyanakimini theenkantatsiri janta pankotsiki ipiyotantapiantarira joriiyopaeni, eejatzi romonkyayitemini omonkyagamentotsiki. Ragaeyanakimini eejatzi janta pinkatharipaeniki, ikijatheeyemini, ikantemi: “¿litaka paapatziyan-tariri Jesoshi?”

<sup>13</sup> Omaanta eero pithaawantari riraga kijawitemini, inta pikamanteey-erini tsikarika nokanta nowawijaakoeyakimini.

<sup>14</sup> Eero pikenkithashiryaa: “Aririka ragaeten, ¿oetaka nokanteriri?”

<sup>15</sup> Aririka ragaetakimi niyotagaeyemini naaka oetarika pikanteriri. Eero imatantzimi riraga kijemini ipiyawaantetemi, ikantemi: "Pikompitashitawo".

<sup>16</sup> Nokamantemi: tee apatziro raakaantemi paashinijatzi atziri ee-jatzi raakaantzitemi piripaeni, piniropaeni, pirentzipaeni, pitsiropaeni, pisheninkapaeni, maawaeni. Rowamaagaantemi.

<sup>17</sup> Tema riyoteeyakiminirika atziri paapatziyakina, rootaki roonaperotantemiri.

<sup>18-19</sup> Omaanta aririka kijokiro poyena eejatzi pikyaaryooentenawo maawaeni nokanteeyakimirini, ari nokempoyaaperoeyakimini. Eejatzi piyaaperoeyanteeyaaarini jantajenokinta pikanteetatyeyaanpi pijeekaperoeyapaeni. Eero imateeyironi riraga kijeeyawitakimirini rookakagaezemironi piyaateeyini jantajenokinta.

<sup>20</sup> Eejatzi ikantaki Jesoshi:

—Aririka piñagaeyawakirini joraaro rinkiteeyapaakironi Jerojaree, ari piyoteeyanakini rooteentsi ithonkaeyeeroni pinampi.

<sup>21</sup> Roojatzi okameethatzi ishiyeeyanakini tonkaariki maawaeni jeekaeyatsirini nampsitsiki. Eejatzi maawaeni jeekatsirini Joreeyaki, ishiyeeyanakini. Eejatzi riraga jatayitatsirini owantsikipaeni, eero ipiyapananaata nampsitsiki.

<sup>22</sup> Aritaki omonkaatakyaa maawaeni iroka rojankinatziteetakarini paerani: "Rowajankitaperooyerini Tajorentsi maawaeni theenkayakirini".

<sup>23</sup> Aririka omonkaatapaakya maawaeni iroka, oo, osheki ashironkayitanakyaani motzitayitatsirini, eejatzi ashironkaakya thotaayitziririni eentsite: opomeentsitzimoeyaawoni oshiye. Osheki ikemaatsitayitanakyaawoni riraga jeekatsiripaeni. Osheki rowashironkagaeyerini Tajorentsi.

<sup>24</sup> Romanateeyerini osheki atziri, ikamagaantayitanakini. Paashinipaeni roojotayiterini, ragaetanakiri paashinikipaeni kipatsi. Ijeekapaaki kaari yotziripaeni Tajorentsi ojamani Jerojareeki, roojatzi ikananteeyaa Tajorentsi: "Aritapaaki, monkaatapaaka".

### *Ikenkithatakotaa Jesoshi, tsika okantyaari aririka ipiyee (Mt. 24.23-31; Mr. 13.21-27)*

<sup>25</sup> Eekiro riyaatatyee ikantziri Jesoshi:

—Piñeeyawakirini ipaashiniteeyanakini jenokijatzi: riraga oorya, kashiri, ompokiropaeni, maawaeni. Piñero kaari piñaapiinteeyini. Eejatzi jaka kipatsiki itahaaweyanakini maawaeni atziri, ikemaeyawakironi opoematanaki antaworoña inkaare, moo. Eejatzi ifñaawakiro antaworoña otamakaari. Ramineeyanakironi, joreririri.

<sup>26</sup> Eero riyoteeyini atziri tsikarika ikanteeyanakyaani, rootaki ithaawaperoeyantanakyaarini. Ishewatayitanakyaani ompokiro.

<sup>27</sup> Roojatzi piñeevantawakinani, nopyiye eejatzi. Tema nopoñaaka paerani jenokinta, nokoñaatantapaentari jaka kipatsiki. Aririka nopyiye eejatzi, nokinapae menkoriki, notajorentsitaperotapaaki, nopinkatharitaperotapaaki.

<sup>28</sup> Aririka piñagaeyawakironi iroka nokanteeyakimirini, piweshireeyanakyaani, pamineeyawakinani: rooteentsi nowawijaakotaperoeyemini, tema nagaeaatatyeemini naaneemi jenokinta.

### *Ikantakota Jesoshi aririka ipokaatee iinja (Mt. 24.32-35; Mr. 13.28-32)*

<sup>29</sup> Roojatzi roshiyakaawenantakanari iroka, ikantakiri:

—Paminero iyeera tsika okantari. Kaaririka iyeera, eejatzi paashini inchato paminero.

<sup>30</sup> Aririka eereshitanee oshi, piyoteeyanakironi rootzimataatsi ojarentsi-tanee.

<sup>31</sup> Eejatzi okimitaka, aririka piñaakiro omonkaataky maawaeni nokamantzitakimirika, piyoteeyanakini rooteentsi ipinkathariwentaperoeyem-ini Tajorentsi.

<sup>32</sup> Aririka piñagaeyawakironi itanakya iroka nokamantakimir, ari eerotzi-tarika pikamita, aritaki piñagaeyakironi omonkaataky maawaeni.

<sup>33</sup> Aritaki othonkaeya maawaeni kipatsi eejatzi ithonkaeya maawaeni jenokijatz: kashiri, oorya, ompokiropaeni, maawaeni. Omaanta noñaani, eero othonkanita.

*Ikantzi Jesoshi: "Paamaperoeyeenani kameetha".*

(Mt. 24.36-44; Mr. 13.33-37)

<sup>34</sup> Eejatzi ikantakiri:

—Paamaaperoeyenani: nomapokapaemikari nokantakowenantemiri. Kyaaryoowa pikenkithashiryaa kotaawokari kaari kameethatatsi pajankaneki. Pishinkiteeyanikari. Pikenkithashiryaa piintzirokari jeekayatsirini jaka kipatsiki.

<sup>35</sup> Aritaki nomapokapaakiri maawaeni jeekatsiripaeni kipatsiki. Nowashironkagaeyerini maawaeni kaari aamaawenteyachani.

<sup>36</sup> Eekiro piyaatatyee paamawentya. Eejatzi pamaneri Tajorentsi ramitakotemi kameetha pareeteeyanteeyaaarin Jenokinta, eerokya pikemaatsi-tantawo maawaeni iroka nokamantakimir.

<sup>37</sup> Maawaeni kitejiriki riyotaantaki Jesoshi janta Tajorentsipankoki. Maawaeni tsiteniniki riyaatapiintzi janta tonkaariki iiteetziri Oriiwomashi.

<sup>38</sup> Eejatzi maawaeni kitejiriki riyaatapiinteyakini atziripaeni Tajorentsipankoki ikemijanteeyirini.

## 22

*Ikamantawakaeta raakaanteeteri Jesoshi*

(Mt. 26.1-5, 14-16; Mr. 14.1-2, 10-11; Jowa 11.45-53)

<sup>1</sup> Rooteentsi areetya kitejitsatsiri rowantapiinteeyaworini paa kaari tapiyacha. Tema ikenkithashiryaa kopiintawo joriyyopaeni paerani rawijeyantakaworini ronampiri Tajorentsi ipankopaeni janta Ejilpitoki.

<sup>2</sup> Rowameethatawakagaeyakanri riraga jewatayitziririni ñaanakowenantatsiripaeni eejatzi riraga iyotaanteeyirorini Iwaperite Tajorentsi ikantzi:

—¿Tsika akanterikakya Jesoshi owamaantyaariri? Aamaashitya ari iki-jakotanakyaari atziripaeni.

<sup>3</sup> Ikantaka riraga Jatanaashi ikyaatapaakari Joorashi karyootejatz, riraga riyotaanewo naawita Jesoshi: riyotaakiri raakaanteri iwinkatharite.

<sup>4</sup> Ari riyaatashitakiri riraga jewatayitziririni ñaanakowenantatsiripaeni ee-jatzi waariyaa ashi Tajorentsipanko, ikantapaakiri:

—Namitakotemi paakaanantyaariri Jesoshi.

<sup>5</sup> Ikemantawakariri, ikimoshireeyanakini, ikanteeyawakirini:

—Ari, kameetha. Ari nopinatakimi koriki iroñaaka.

<sup>6</sup> Ikantakiri:

—Ari, kameethataki. Iroñaaka naminaperoteri, roojatzi nokamantemi tsika pikantyaari pimanakaantyaariri payeri eerokya iñaakowenantawakari atziripaeni.

*Awinkatharite rowakaakari riyotaanewopaeni*

(Mt. 26.17-19; Mr. 14.12-16)

<sup>7</sup> Areetapaaka kitejitsatsiri rowantapiinteeyaworini paa kaari tapiyacha eejatzi rowamaapiinantariri owisha, ikimitzirira ichariniitenipaeni paerani janta Ejiipitoki.

<sup>8</sup> Riraga Jesoshi rotyaantakiri Peetero eejatzi Jowa, ikantawakiri:

—Thame peewate powojantero owanawontsi owaeyaarini, akenkithashireeyantaaworini rawijantanakari paerani owamaantatsiri.

<sup>9</sup> Rojampitanakiri:

—¿Tsika pikowakiroka nowojantero?

<sup>10</sup> Rakanakiri:

—Aririka pareetakya nampsitsiki, piñaapaakiri shirampari raakotaneero iñaa. Poyaatanakiri janta pankotsiki, tsikarika ikyaaape.

<sup>11</sup> Pikantapaakiri riraga ashitawori ipango: “Ikantzi Awinkatharite: ‘¿Tsika nowakayaarika niyotaanewopaeni?’”

<sup>12</sup> Roñaayimiro janta oshitamenkotakanta jenoki. Owetsikaeyakan ajeekaeyantyaarini. Ari powojanteeyapaakini owaeyaarini.

<sup>13</sup> Roojatzi riyaateeyanakini, iñaapaakiro ikantakiriri Jesoshi. Ronkotsiteeyapaakirini royaari, ikenkithashiryaaakotantyaariri ronampiri Tajorentsi rawijantanakariri ichariniitenipaeni paerani janta Ejiipitoki.

*Jesoshi riyotagaeyakirini riyotaanewo rowawentapiintyaari paa  
(Mt. 26.20-29; Mr. 14.17-25; Jowa 13.18-30; 1 Ko. 11.23-26)*

<sup>14</sup> Rareeteeyapaakani Jesoshi eejatzi rotyaantanewopaeni rowaeyapaakani.

<sup>15</sup> Ikanteeyakirini Jesoshi:

—Osheki nokoyitakani nowakagaeyaneemini iroka owanawontsika eeniroka nañi, akenkithashiryaaawori rowawijaakotantaki Tajorentsi paerani.

<sup>16</sup> Nokamantemi, naapatziyaperotakari Tajorentsi rootaki nokamantyaari. Eero napiiteero nowawo iroka eejatzi jaka kipatsikika. Kyaaryo, rooteentsi nokame, nomonkaatero maawaeni rojankinatzitakarini riraga kamanantayitzirorinipaeni eejatzi paashini jankinatayitakirorini Iwaperite Tajorentsi paerani. Nomonkaatero maawaeni roojatzi nowapaeyaawo tsikarika ipinkathariwenant Tajorentsi.

<sup>17</sup> Ikanta raakotakiro pajoki, ipaasonkitakiri Iriri, roojatzi ikantzi:

—Paakoeyawakironi iroka, pireeyeroni.

<sup>18</sup> Nokamantemi: eero napiiteero nireero awishoowaantsi oowa jaka kipatsikika. Omaantakya nirapaero eejatzi janta ipinkatharitzinta Tajorentsi.

<sup>19</sup> Roojatzi raakiro paa, ipaasonkitakiri Iriri. Ikagaakiro, ipaeyakirini riyotaanewo, ikantziri:

—Iroka paaka, powaeyaawoni. Naaka kamawenteeyemirini. Nokowaki powapiintyaawo paa pikenkithashiryaaakotapiinantenari nokamawenteeyakimini.

<sup>20</sup> Rowaeyakani maawaeni. Roojatzi ipakoeyakirini awishoowaantsi oowa. Ikanteeyakirini:

—Aririka pirero iroka, nokowaki piyoteeyeni oñaaganteroni owakirari inimotawakaantsi. Tema rootaki niraa apaatawenteeyemirini, nokamawenteeyemini nowawijaakoeyantemirini.

<sup>21</sup> Roojatzi ikanteeyakirini:

—Eenitatisi akaateeyakinika iroñaaka owaeyakani riraga akaantenani owamaakaantenani.

<sup>22</sup> Naaka riraga atziriperotapaentsiri nokamawenteeyerini maawaeni atziri rootaki ikowakinari Pawa Tajorentsi, omaanta ashironkaamatsiterini riraga akaantenani.

<sup>23</sup> Ikemanteeyawakaririni, rojampitawakagaeyanakan:  
—¿Ninkama akaanterini?

*Riyotagaeyakirini Jesoshi Riyotaanewo tsika ikantyaari ipinkathartanyaari*

(Mr. 10.42-45)

<sup>24</sup> Roojatzi ikantawakaanteeyakarini riyotaanewopaeni:  
—¿Ninka iinja jewatakaaperoeyantatsirini? ¿Ninka anaakotantaperotatsini ipinkatharitaperote?

<sup>25</sup> Ikantanakiri Jesoshi:

—Rameteeyawoni riraga jewatatsiripaeni kaari yotziri Tajorentsi ipinkathateeyakirini iwinkatharitepaeni. Ikantashiteeyakani: “Retakoeyakarini atziripaeni”, omaanta eeniro romperataperotapiinteyarini.

<sup>26</sup> Omaanta eerokapaeni, eero pikimitakoeyarini. Aririka pikowaki pipinkathariwenante, eero pikantakaaperota, inta pamitakotapiinteri kameetha paashinipaeni.

<sup>27</sup> ¿Ninka ipinkathataperotziri atziri? ¿Riragama wetsikapiintziniriri rowanawo? Kaari. Tema riro ipinkathateetziri riraga omperateeyaririni nopolipipaeni. Omaanta naaka tee nomperateeyimini, inta netakoeyakimini.

<sup>28</sup> Kijokiro powaeyakinani paerani roojatzi iroñaaka, piyoteeyakini opomeentsitzimotapiinteyakaeni.

<sup>29</sup> Rootaki nokantzimiri iroñaaka eerori pipinkathariwenante, ikimitaakina Pawa ikowakaakinawo nopinkathariwenante.

<sup>30</sup> Pitsipatapiinteeyenani owapiinteeyaani eejatzi irapiinteeyenai janta nopinkatharitapaenta, eejatzi apinkathariwenteeyerini maawaeni joriipyopaeni.

*Jesoshi ikenkithatakotakiri Peetero rookeri*  
(Mt. 26.31-33; Mr. 14.27-31; Jowa 13.36-38)

<sup>31</sup> Eejatzi ikantanakiri Awinkatharite:

—Shimo, pikemina, riraga Jatanaashi ikantanakiri Tajorentsi ikowaki iñaantemi, riyyantyaari paapatziyaperotakinari. Kyaaryoowa, ikowaki rantakayemiro kaari kameethatatsi.

<sup>32</sup> Omaanta nokantakiri Tajorentsi ramitakotemi eerokya pookaperotantawo paapatziyana. Iinja, aririka pithawetakotya oetarika pantakiri, eejatzi pookero ari poyaatena eejatzi, pikenkithashiryaa kagaeyeerini maawaeni piyemijantzinkarite, paapatziyakaaperoeyantyaaririni.

<sup>33</sup> Rakanakiri Shimo:

—Tema eeroka Nowinkatharite, kijokiro nowanakimi; aririka romonkeetemi, eero nookimi. Romonkeetenaata naari. Aririka rowamagaetemi, notsipataperotanakimi. Rowamagaetenaata naari.

<sup>34</sup> Ikantanakiri:

—Nokamantemi: iroñaaka tsitenirikika, tekiraata iñee tyappa, okaate 3 pikante: “Tee niyotziri Jesoshi”.

*Thaato eejatzijawiri*

<sup>35</sup> Roojatzi ikanteeyantakarini Jesoshi riyotaanewopaeni:

—Paerani notyaanteeeyakimini pikenkithatakagaeyantaririni atziripaeni. Nokanteeyawakimini: “Eero payi pithaate, piyorkite, eejatzi paashini pitihari”. Iroñaaka nojampiteeyemini: “¿Pashironkagaeyakanima? ¿Eenitatsima koetyeemoeyakimirini?”

Raanakirini:

—Tekatsi koetyeemotenani.

<sup>36</sup> Roojatzi ikanteeyanakirini:

—Iroñaaka nokanteeyemini: eenitatsirika pithaate, paanakiro. Eenitatsirika piyorkite, paanakiri. Tekatsirika pijawirite, pipimantero pipewiryakotari pamananantyaawori apaani pijawirite.

<sup>37</sup> Aritaki omonkaatakyä rojankinatakotakinarini paerani Iseeyashi: “Rowamagaeteri, ikimitakaanteetyaari owamaantzinkari”. Kyaaryo, oth-otyaaperotakya kameetha maawaeni rojankinatakotzitakinari paerani ri-raga kamanantzirorini iñaani Tajorentsi.

<sup>38</sup> Roojatzi ikanteeyirini:

—Eenitatsi iroka, Nowinkatharite: apite okaatzi nojawirite.

Rakanakiri:

—Ari, monkaataka.

*Janta Jethemaniiki ikenkithatakayiri Jesoshi Iriri  
(Mt. 26.36-46; Mr. 14.32-42)*

<sup>39</sup> Roojatzi ishitowanaki Jesoshi, riyaatanee eejatzi janta riyatapiintzinta: janta tonkaariki iitachari Oriiwomashi. Itsipateeyanakarini riyotaanewopaeni.

<sup>40</sup> Rareeteeeyapaakani, ikanteeyapaakirini:

—Iroñaaka pamaneeyaarini Tajorentsi ramitakoeyantemirini: pantzirokari kaari kameethatatsi.

<sup>41</sup> Roojatzi rowaaganaka Jesoshi apaniroeni eekitziroeni jaga. Rotzi-herowapaaka, ikenkithatakaeri Iriri, ikantziri:

<sup>42</sup> —Pawa, pikowakirika, powawijaakotenawo iroka nokemaatsitakyaari. Omaanta eero pantziro nokowakiri naari, inta pantero pikowakaakinari eerori.

<sup>43</sup> Roojatzi ipokapaaki apaani ronampiri Tajorentsi, ramitakotapaakiri Jesoshi, ishintsitantakari.

<sup>44</sup> Osheki ikemaatsitakawo, eekiro ikenkithatakaperotanakitziri Iriri. Antawo ikemawakiro imajawitanaki, tema otsipatanakawo iyaaki rira roojatzi othaatantanaka, pitek, pitek.

<sup>45</sup> Ithonkanakiro ikenkithatakaerai Iriri, riyaatanee janta ijekaeyakininta riyotaanewopaeni, iñeeyapaatzirini magaeyakini. Rooma osheki rowashireeyanakani inkaaganki, rootaki imaantanakari.

<sup>46</sup> Ikanteeyapaerini:

—¿litaka pimagaeyantakarini? Pipiriinteeeyaneeni. Pamaneeyaarini Tajorentsi ramitakotemi eerokya panantawo kaari kameethatatsi.

*Ragaetakiri Jesoshi*

*(Mt. 26.47-56; Mr. 14.43-50; Jowa 18.2-11)*

<sup>47</sup> Enirowa ikenkithatakagaeyawitarini Jesoshi riyotaanewo, areeteeeyapaakani osheki atziri, reewateeyapaakirini Joorashi. Rirowitaka riyotaanewo Jesoshi, omaanta iroñaaka ikowaki raakaanteeri. Ipokashita-paakiri rirori, ithowootapaakiri.

<sup>48</sup> Ikantawakiri:

—Ro pithowootantanari, paakaananteenari. Tema piyotaki naaka riraga atziriperotapaentsiri riraga poñeenchari jenokinta.

**49** Ikanta iñaakowentawakirira okaatzi awijimotakiriri Jesoshi. Rojampiteeyirini:

—Nowinkatharite, ¿pikowakima nochekiri?

**50** Rootaki ichekaetakiri ikempitapero apaani ronampiri riraga iwinkatharite ñaanakowenantatsiri, thatzik.

**51** Ikantakiri Jesoshi:

—Ari okantakaata, eero pikoshekari.

Roojatzi roepiyeeniri ikempita, rowithagaeniri.

**52** Irira itsipateeyapaakarini Joorashi riraga jewatayiririni ñaanakowenantsiripaeni, eejatzsi riraga jewatakaantatsiri janta ipankokinta Tajorentsi, eejatzsi aataperoteenchari. Ikantawakiri Jesoshi:

—¿litaka pamashitanari pichekamentopaeni eejatzsi pompojamenterapai? ¿Naakama koshintzi?

**53** Tema notsipatapiinteeyawitzimini janta Tajorentsipankoki, omaanta tee pikoshekaeyanani. Omaantakya iroñaka monkaataka paantakinarika: rooma ipinkathariwenteeyakimini iwinkatharite kamaari.

### ***Ikantzi Peetero: "Tee niyotziri Jesoshi"***

(Mt. 26.57-75; Mr. 14.53-72; Jowa 18.15-27)

**54** Roojatzi roteyanteetakari Jesoshi, shepik. Ragaeyanakirini janta ipankoki iwinkatharite ñaanakowenantatsiri. Ikantaka rimpetaanaki Peetero itapiiki Jesoshi.

**55** Janta pankotsiki, okaankiityeera, ari roeshita paamari. Ijeekaeya-paakini, rakitsiteeyapaakani riraga agaeyakiririni Jesoshi. Ari itsipateeyapaakarini Peetero.

**56** Roojatzi opokapaaki ronampiri ñaanakowenantatsiri. Okatziyapaaka, aminapaakiri Peetero, joreririri. Roojatzi okantanaki:

—Eejatzsi irika rirotaki oyaatziriri Jesoshi.

**57** Ikantawakiro:

—Tee niyotziri riori.

**58** Roojatzi paashini aminakiriri, ikantakiri:

—Tema eeroka oyaatziriri Jesoshi.

Ikantakiri:

—Teewee. Tee noyaatziri.

**59** Ari ojamanitapaentzi, roojatzi ikantaki paashini:

—Kyaaryo, rirotaki oyaatakiriri irika shirampari, tema eejatzsi ipoñaka Karireeyaki.

**60** Ikantakanakiriri riraga Peetero:

—Tee niyotzi oetarika pikantakinari.

Roojatzi iñaantanaka tyaaa, anterekoo.

**61** Riraga Jesoshi ipithokashitanakari Peetero, raminanakiri. Roojatzi ikenkithashiryaantanakawo ikantzitakariri inkaaganki: “Tekiraatarika iñee tyaaa, okaate 3 pikante: ‘Tee niyotziri Jesoshi’”.

**62** Ari ishitowanaki Peetero, riraaperotanaka, jmmm, jmmm. Osheki retakoperotanaka.

### ***Ishirontawenteeyakarini Jesoshi***

(Mt. 26.67-68; Mr. 14.65)

**63** Riraga shenteeyakiririni Jesoshi ishirontawenteeyakarini, eejatzsi ipajapajaatakiri, tak, tak.

**64** Roojatzi ipashikapootantakari eejatzsi ipajapootakiri, ikantakiri:

—Pikamantenaata ninka pajapootakimiri. Injii, injii.

**65** Osheki rowashironkaeyakirini, tema itheenkakiri, ishirontawenteeyakarini.

*Ipiyotaventeetari Jesoshi  
(Mt. 26.59-66; Mr. 14.55-64; Jowa 18.19-24)*

<sup>66</sup> Okantaka okitejitanaki ipiyoteeyani riraga aataperoteenchari, riraga jewatayitziririni ūaanakowenantatsiripaeni, riraga iyotaantzirori Iwaperite Tajorentsi, maawaeni. Ragaeyanakirini Jesoshi janta ikantakowentapiin-teyirininta atziri.

<sup>67</sup> Rojampiteeyakirini:

—Pikamantenaata: „jeerokama Rotyaantanewo Tajorentsi naama-gaeyakarini?

Rakanakiri:

—Nokantemirikami: “Jee, naaka Jesokirishito”, eero paapatziyawo nokantemiri.

<sup>68</sup> Eejatzi, nojampitemirikami oetarikapaeni, eero pakana.

<sup>69</sup> Omaanta nokantemi iroñaaaka riraga atziriperotapaentsiri ijekimota-paeri Pawa rakoperoki, notsipatapaeyaariita notajorentsitaperotapae.

<sup>70</sup> Rojampiteeyakirini:

—¿Eerokama Itomi Tajorentsi?

Rakanakiri:

—Jee, naaka.

<sup>71</sup> Roojatzi ikanteeyanakini:

—¿litaka akowantyaari paashini kamantakoterini? Tema akemaeyakirini aaka ipaanteperoki, iitajorentsitashitaka. Enitatsi rantani.

## 23

*Raanakiri Jesoshi janta Peraatoki  
(Mt. 27.1-14; Mr. 15.1-5; Jowa 18.28-38)*

<sup>1</sup> Riyaateeyanakini maawaeni, raanakiri Jesoshi janta Peraatoki. Riotaki oroomajatzi, pinkathariwenteeyiririni joriyyopaeni.

<sup>2</sup> Ikantapaakiri:

—Enitatsi rantakiri irika. Ramatawiteeyakirini nojoriiyotzinkaritepaeni, ikanteeyawitakarini: “Eero pipiri pinkathari piyorkite”. Eejatzi ikantapi-intzi: “Naaka Rotyaantanewo Tajorentsi, naaka jewawentzimiri”.

<sup>3</sup> Rojampitakiri Peraato:

—¿Kyaaryoma? ¿Eerokama iwinkatharite joriyyo?

Rakanakiri:

—Jee, naaka.

<sup>4</sup> Roojatzi rirori ikanteeyawakirini:

—Tee añiilo rantani irika.

<sup>5</sup> Omaanta eekiro ikanteeyanakitziini:

—Ikijakagaeyakarini atziripaeni, ikanteeyakirini: “Thame ookeri awinkatharite”. Ritanakawo janta Karireeyaki, iroñaaaka ikinakinayitzini jaka Joreeyakini, ramatawiteeyakirini maawaeni.

*Raanakiri Jesoshi janta Erooreshiki*

<sup>6</sup> Ikemantakawori Peraato ikanteeyakiririni, rojampitakiri:

—¿Riotakima karireeyajatzi irika?

<sup>7</sup> Rakanakiri:

—Jee, riotaki.

Ikantawakiri:

—Paanakiri janta Erooreshiki. Riotaki pinkathariwenteeyiririni karireeyajatzi. Ari ijekaki iroñaaaka jaka Jerojareeki. Ipokaki chapinki.

<sup>8</sup> Ikanta ragaeyaneerini janta. Iñaantawakariri Erooreshi, ikimoshiryaanaki. Osheki ikemakotzitapiintari, itajonkantayitakini, rootaki ikowantawitakariri iñeeri. Ikowawita iñeerimi itajonkantayitenimi.

<sup>9</sup> Osheki rojampitayitawitakarini oetarikapaeni, omaanta tee rakiri Jesso.

<sup>10</sup> Osheki rapiitapiintakiniri riraga amakiriri, ikantzi:

—Tee ikameethatzi. Eeniro rantani.

<sup>11</sup> Roojatzti ishirontawenanteeeyakaririni Jesoshi riraga Erooreshi eejatzi maawaeni joraaropaeni. Tema ikithaatakaakari kameethari kithaarentsi, ikimitakaantawitakari pinkathari, ishirontawenteeeyantyaaririni. Roojatzzi rotyaanantaari eejatzi janta Peraato.

<sup>12</sup> Aripaete raakameethatawakaga Erooreshi eejatzi Peraato. Omawitya paerani ikijawakaawita.

### *Rowamaakaantakiri Peraato Jesoshi*

(Mt. 27.15-26; Mr. 15.6-15; Jowa 18.39-19.16)

<sup>13</sup> Roojatzti ipiyoteeyantakarini Peraato riraga jewatayitziririni ñaanakowenantatsiripaeni, pinkatharipaeni, eejatzi osheki atziripaeni.

<sup>14</sup> Ari ikanteeyakirini:

—Pamine, inkaaganki pamawitakinari irika, pikanteeyawitakinani riyotagaeyakirini atziri rookaeyenani naari, eejatzi rirori nowinkatharitzinkaritepaeni. Piñeyakinani nojampitakiri oetarikapaeni, omaanta noñaaperotakiri ikameethatatz: tee añiilo rantani.

<sup>15</sup> Eejatzi rirori Erooreshi, iñaaperotakiri kameethatatsi, rootaki roepiyan-takinari jaka. Ñaakiro, tekatsi rante nowamaakaanantyaariri.

<sup>16</sup> Iroñaaka nopajatakaantashitawakyaari, roojatzzi noeyowaanteeyari.

<sup>17</sup> Rametapiinteeyawoni rirori maawaeni ojarentsi aririka omonkaatapaeya iroka kitejiri ikimoshiryaanteeyarini roeyowapiintzi apaani omonkyaaagarewo.

<sup>18</sup> Omaanta maawaeni piyotawentakariri Jesoshi ikaemaeyanakini:

—Powamaakaanteri irika, omaanta riraga Warawaashi poeyowaeri.

<sup>19</sup> Paerani irika ikanteeyakirini atziri janta Jerojareeki: “Thame ookeri riraga pinkathari”. Eejatzi rowamayitzirini atziri, rootaki romonkyaaantestariri omonkyaaagamentotsiki.

<sup>20</sup> Ikowawita Peraato roeyowaerimi Jesoshi, rootaki ikowantawitakari rojantzaerimi atziripaeni.

<sup>21</sup> Omaanta eekiro ikaemaeyanakitziini riroripaeni:

—¡Pikentakotakaanteri! ¡Pikentakotakaanteri!

<sup>22</sup> Rapiitwitaari eejatzi Peraato:

—¿Itaka nokentakotakaanantyaariri? ¿Itaka rantakiri? Nojampiteeyawitakimini, omaanta tee pikamantaperotana opoñaantyaari nowamaakaanantyaariri. Nopajatakaantashitawakyaari, roojatzzi nopakaanteeyari.

<sup>23</sup> Eekiro ikaemaeyanakitziini:

—¡Pikentakotakaanteri! ¡Pikentakotakaanteri!

Eekiro ikantanakitzi, roojatzzi rakakaantakari Peraato,

<sup>24</sup> Ikantziri:

—Ari nomateeyakironi iroka pikowakagaeyakinarini.

<sup>25</sup> Roeyowakaanteeri Warawaashi, riraga piyathatachari eejatzi owa-maantsiri, eejatzi ikanteeyakirini:

—Paanakiritya Jesoshika, pantero oetarika pikoyiri pantakaeriri.

*Ragaeyanakirini ikentakotantyaari.*  
*(Mt. 27.31-32; Mr. 15.21-23; Jowa 19.16-17)*

<sup>26</sup> Ari ragaeyanakirini Jesoshi janta ikentakoterinta, ikinanaki awotsiki. Itonkiyoteeyawakarini shireenejatz iitachari Shimo. Ipoñaanaka owantsiki. Ari romperatawakari joraaro inatanakiniri Jesoshi koroshi, rowaga ikentakotantyaarira. Royaatapaeri itapiiki Jesoshi.

<sup>27</sup> Royaateeyanakirini osheki atziri. Eenitatsi eejatz i osheki tsinani ocheragaeyakini iraakoeyakarini. Osheki owashiretakoeeyakarini.

<sup>28</sup> Omaanta raminanakiro Jesoshi, ikanteeyanakironi:  
 —Jerojareejatopaeni, eero piraakoeyananani, inta eeroka iraakoeyeenchani, eejatz i piraakoeyaarin peentsitepaeni.

<sup>29</sup> Iinja opomeentsitzimoeyemini, pashironkagaeyanakyaani. Iinja ikanteete: "Okimoshiretanaki kaari tzimatsi otomi".

<sup>30</sup> Eejatz i kowaeeyawitanakyaani atziripaeni opariyashiteeyerinimi impeeta atsinakantyaariri eero raňaantana.

<sup>31</sup> Pamine, tektsi nanteni naaka, omaanta rowashironkaawaetashitena. Tema iinja rashironkaaperoeyani osheki maawaeni antzirori kaari kameethatatsi.

<sup>32</sup> Eejatz i ragaetanakiri apite koshitantatsiri, itsipatantakariri riori Jesoshi, ikentakoetakiri.

*Ikentakotakiri Jesoshi koroshiki*  
*(Mt. 27.33-38; Mr. 15.22-32; Jowa 19.18-24)*

<sup>33</sup> Rareetakaanteeyapaakaririni janta tonkaariki ii teetziri Iitonakintsi ikentakoeyapaakirini koroshiki, tyag, tyag. Omaanta apaani koshintzi ikentakoetakiri riori paashiniki koroshi janta rakoperokira Jesoshi. Irira paashini ikentakoetakiri jakakiroka rampateki.

<sup>34</sup> Roojatz i kenkithatakariri Jesoshi Iriri:  
 —Pawa, pikaminthayeri irikapaeni, eero powajankitawenziri rowamaakinaka. Tee riyawoetzi riori oetarika rantziri.

Riraga joraaropaeni ikowaeeyakini ragaeyeroni iithaarini Jesoshi. Ikantawagaeyakan:

—Thame ookero mapyaaniki ayoteeyantyaarini ninkarika ayeroni iithhaarini.

Ikantanaki paashini:

—Jee, thame.

<sup>35</sup> Ipyotawenteeyakarini janta osheki atziri, amineeyiririni, eejatz i riraga pinkathari paeni. Ishirontawenteeyakarini Jesoshi, injii, injii; ikantzi:

—Rowawijaakotawitakari paashinipaeni, ajaaty aminawakiriita aririka iroňaaka imateeya riori rowawijaakoteeya. Riroperotakirkira Jesokirishito, riraga Rotyaantanewo Tajorentsi, ari imateeya rowawijaakoteeya.

<sup>36</sup> Eejatz i riraga joraaropaeni, ishirontawenteeyakarini. Riyaatashitakiri, iperimi awishoowaantsi oowa kepishaari.

<sup>37</sup> Ikantakiri:

—Eerokarika iwinkatharite joriyo, ajaaty powawijaakoteeya iroňaaka: injii, injii.

<sup>38</sup> Eeniro ikentakoteetakiro janta koroshiki jankinarentsi owaetakiniri jeňokiini ipatziitoki Jesoshi. Ojankinataka iňaaniki kireeshiyajatz, eejatz i iňaaniki oroomajatz, eejatz i iňaaniki joriyiyo. Ojankinataka, okantzi: "Irika rirotaki jewawenziriri joriyyopaeni".

*Ikenkithatakariri Jesoshi koshitantatsiri ikentakoetakirira*  
*(Mt. 27.39-53; Mr. 15.33-38; Jowa 19.28-30)*

**39** Apaani koshintzi kentakoteencharira rampateki Jesoshi ishirontawen-takari rirori ikantakiri:

—Eerokarika Rotyaantanewo Tajorentsi, powawijaakotya eejatzi powaw-ijaakotitenaa naari.

**40** Omaanta ikijathatanakiri paashini koshintzi, ikantakiri:

—¡Pimaerite! ¿Tema pithawantari Tajorentsi? Eejatzi eeroka rooteentsi pikame.

**41** Eeniro antziri aaka, tee akameethatzi rootaki akamantyaari, omaan-takya irika tekatsi rante ikamashitakya. Tee ikimitakotee aaka.

**42** Roojatzi ikanantanakari:

—Jesoshi, aririka pareeteeya janta Tajorentsikinta pikenkithashiryaa-paena naari, powawijaakotena.

**43** Rakanakiri:

—Kyaaryo nokantemiri: iroñaaka kitejirika pitsipatapaakina janta okameethaperotzinta.

**44-45** Ikaataki oorya tampatsika. Omapokashitanaka otsitenikaakipero-tapaaki maawaeni kipatsi. Tee añaaneri oorya. Okaatzsi ojamanitaki 3 oorapaeni. Roojatzi ooryaantanaa eejatzi. Tema eejatzi enenatisi janta Tajorentsipankoki otzikayirori niyanki. Okantaka omapokashitanaka otz-iagaanaki, waaag, thatzik; apitemankitanaka.

**46** Roojatzi ikaemanaki Jesoshi, ikantanaki:

—Pawa, iroñaaka nokame. Eeroka pikempoyagaena.

Roojatzi ikamantanaka.

*Rowashireteeyanakani maawaeni ñaakiriri Jesoshi ikamaki  
(Mt. 27.54-56; Mr. 15.39-41)*

**47** Iñaantawakariri iyapitaanote joraaropaeni, ikantanaki:

—Tema ikameethatki Tajorentsi. Kyaaryo ikameethaperotzini irika shi-ramparini. Tekatsi rantani.

**48** Eejatzi riraga amineeyiririni, ikenkithashireeyanakani maawaeni. Ipiyeeyanaani inampiki, osheki rowashireteeyanakani.

**49** Omaantakya riraga yotakiriri Jesoshi, ikatziyeeyakani jantyaajeeni, ramineeyanakini. Okaateeyakirini iroka tsinanipaeni poñaachari Karireeyaki, tsipatapaakariri chapinki Jesoshi.

*Romonkyaagaetakiri Jesoshi omooki  
(Mt. 27.57-61; Mr. 15.42-47; Jowa 19.38-42)*

**50-51** Ari ijeeki janta kameethari shirampari, iitachari Josee, arimateeyajatzi. Ojeeki Arimateeya janta Joreeyaki. Ari ikaatziri Josee riraga paashinipaeni ikaatzira ipinkathariteeyini joriiyopaeni, rowameethatawakaeyani, omaanta tee ikowawita rirori ikentakotakaan-terimi Jesoshi. Ipinkathatziri riraga Tajorentsi, raamagaeyakarini ipokae ipinkathariwenteeyerin maawaeni atziri.

**52** Ikanta riyaataki rirori Peraatoki, ikantapaakiri:

—Nokowaki pishinetenari Jesoshini, naaneeri.

Ikantawakiri:

—Kameethataki, ari paaneeri.

**53** Roojatzi royiitakotantari, rapineetakotakiri tokoyaki, kameethama-wotatsiri. Raanakiri janta ojeekinta mapi, rowaga owakira imokaetzi, romonkyaapaakiri inthomaenta. Tekiraata rowanteetawo kaminkari, riro-taki omapokapaakirori Jesoshi.

**54** Tema rootaki weereneshi ikamantakari Jesoshi. Riwetsikaeyakironi atziri oetarikapaeni, tema rooteentsi saawaro imakoryaantapiintari.

<sup>55</sup> Rowaga tsinanipaeni oyaatakowenteevakirini Jesoshini, aminakoevakirini ragaeyanakirini omooki, janta royaankakoeyakirini inthomaenta.

<sup>56</sup> Roojatzi opiyanteeyanaani janta opankoki. Owetsikapaakiro ka-jankaari eejatzi paashini kajankaatsiri. Areetantapaakari saawaro omakoryagaeyakini, omonkaatziro ikaminaantziri Tajorentsi.

## 24

### *Ipiriintanaa Jesoshi*

(Mt. 28.1-10; Mr. 16.1-8; Jowa 20.1-10)

<sup>1</sup> Otominkotapaaki, okanta tsinanipaeni iyaataki amaetyaaka janta rookaetakitzirinta Jesoshi. Aanakiro kajankaari owetsikakiri. Oyaatanakiro paashinipaeni tsinani.

<sup>2</sup> Areetapaaka rowaetakirira chapinki omooki antawo mapi, ratsinakokantanteetakariri omooki. Areetantawitapaakawori oñaapaatziro ashitaryaanaka mapi.

<sup>3</sup> Okyaashitawitapaakari Jesoshini omooki, omaanta tee oñaapaeri Awinkatharite.

<sup>4</sup> Tee iyoteeyanakini oetarika okenkithashiryaanakyaari. Roojatzi romapokantapaakawo apite shirampari, ikatziyimotapaakawo okaakini. Oshipakiryaaamawotaki iithaari.

<sup>5</sup> Osheki othaawantawakari, oeyomaetanaka roojatzi kipatsiki. Rojampi-tapaakiro:

—¿litaka paminantariri añaatsiri jaka? Jaka rookaetziri kaminkari.

<sup>6</sup> Tee añaagari Jesoshi jaka, temta tzinaanaa. Pikenkithashireero ikamantz-itakimirini janta Karieeyaki.

<sup>7</sup> Tema ikantzi: “Naaka poñaachari janta jenokinta, nokoñaatapaaki jaka kipatsikika. Inja rayena kaari aapatziyana, ikentakotena koroshiki. Okaate 3 kitejiri arinopiriintanee eejatzi”.

Monkaataka iroñaaka.

<sup>8</sup> Roojatzi okenkithashiryaantanaawo ikamantzitakaworini rirori.

<sup>9</sup> Opiyanaa okamantapaakiri riyotaanewopaeni eejatzi paashinipaeni aapatziyariri.

<sup>10</sup> Owaero iroka tsinanipaeni: Mariiya rowaga makaraarajato, Jowaana, Mariiya riniro Jantyaako, eejatzi paashinipaeni tsinani. Tema okantawitakari rotyaantanewo Jesoshi iroka.

<sup>11</sup> Omaanta tee raapatziyawo riraga riyotaanewopaeni Jesoshi iroka okamantawitapaakariri, iitakaashiteeyakanı okantawaetashita.

<sup>12</sup> Omaanta riraga Peetero ishiyanaka janta omooki rowaeyaw-itakarininta chapinki Jesoshi. Raminapaakiro inthomaenta, iñaapaakiro tokoya iponatantawitakariri. Roojatzi ipiyanaa pankotsiki, osheki ikenkithashiryaakotanaka.

### *Janta awotsiki iñaawakiri riyotaanewo Jesoshi*

(Mr. 16.12-13)

<sup>13</sup> Ikanta ryaatanaki apite riyotaanewo Jesoshi janta nampitsiki owaero Emawooshi. Ipoñaaka Jerojareeki, okaatzi ojamanitzi 11 kiroometero raree-tantyari nampitsikinta.

<sup>14</sup> Ikinanaki, ikenkithatakaawakaanaka. Ikenkithatakotziri awijimo-takiriri Jesoshi, eejatzi maawaeni okaatzi rantakiri.

<sup>15</sup> Ranashita ikenkithatakaawaka, roojatzi itsipatantapaakari riraga Jesoshi, kijokiro rowanakiri janta awotsiki.

<sup>16</sup> Iñaawitawakari, omaanta tee ishinetziri Tajorentsi riyotawakiri.

**17** Ikantapaakiri:

—Inkaaganki pikinantapaakari awotsiki, Ɂuitaka piñaanatawakaantari? Ɂitaka powashiretantakari?

**18** Ikanta apaani iitachari Kerejowashi, rakanakiri:

—Riyoteeyakini maawaeni jerojareejatzı okaatzi awijeentsiri. ɁApatzirona pikintakaakawo eeroka tee piyotzi oeta awijeentsiri?

**19** Ikantanakiri:

—Ɂilitakakyä?

**Ikantawakiri:**

—Tema pikemakotziri Jesoshini, riraga Najareetejatzı? Ikenkithatakaapi-inteeyanawoni ikoyiri Tajorentsi eejatzi osheki itajonkantapaintzi. İňaaperotziri irira eejatzi iňaaperotziri maawaeni atziri ikameethatzi.

**20** Raakiri riraga jewawentziriripaenı ńaananakowenantsatsiripaenı eejatzi awinkatharitepaenı. Ikanteeyakini tee ikameethatzi, ikentakotakaantakiri kamaki.

**21** Noetashitawitaka irira rirotaki owawijaakoeyenarinimi aakapaenı maawaeni joriyyopaenı, pinkathariwenteeyenarinimi. Omaanta iroňaaka okaataki 3 kitejiri ikamantakari.

**22** Jataki tsinanipaenı inkaaganki amaetyaaka janta rowawiitakarinta Jesoshi. Opiyantapaakari,

**23** okamantapaakinı: “Tee noňagaeri Jesoshini, tekatsı. Omaantakya noňaapaakiri ronampiripaenı Tajorentsi, ikantawakina: ‘Piriintanaa, aňaagae Jesoshi’”. Rootaki okantapaakinari.

**24** Roojatzi ishiyantanaka apaanipaenı riyotaanewo Jesoshi janta, ramnakitziro rowawiitakarinta iňaapaakiro okaatzi okantakinari, omaantakya Jesoshini, tee iňiiri.

**25** Roojatzi ikantakiri:

—Teef aňiöri piyotantari, pitheenkakiro ikantziri riraga kamanantayitzirorini iňaani Tajorentsi. Tee paapatziyawo.

**26** Tema ikantxitakanı rityaawo riraga Rotyaantanewo Tajorentsi ikemaaitsiyaawo osheki katsiri, roojatzikya ipinkathariperotanaki.

**27** Roojatzi riyotaantakoperotanaka rirori apaniroeni Iwaperite Tajorentsi, ithotyaanakiro maawaeni kenkithatakotziriri rirori. Ritanakari rojankinarini Moeseeshi, rimpaketakiro riyotaakiri rojankinarini paashinipaenı kamanantayitzirorini iňaani Tajorentsi.

**28** Rareeteeyantapaakarini nampitsiki, rooteentsı rawijanakimi riraga Jesoshi,

**29** omaanta ikanteeyawakirini paashinipaenı:

—Eero piyatziita, pijekanakıita nopankoki. Tsiteniityaaki, rooteentsı otsitenite.

Roojatzi riyaatantapaenta ipankoki.

**30** Roojatzi itsipateeyantapaakarini rowa. Raapaakiro paa riraga Jesoshi, ipaasonkitakiri Tajorentsi, roojatzi ipantakari maawaeni.

**31** Okantaka opokimotapaakiri ikenkithashiryaanaka, riyotataatziiri Jesoshi. Roojatzi ipeyimotantanaari eejatzi, tee iňaawaeri.

**32** Ikantawakaanaka:

—Rootawetsikya rookantzimotakaakinawo kameetha najankaneki ikenkithawaetakaantapaakaeri janta awotsiki. Riyotaantakaerori okantakotziri Iwaperite Tajorentsi. Tema osheki akimoshirewentaperotakiro okaatzi ikantakaeri.

**33** Roojatzi ipiyantanaa Jerojareeki. İňaapaatziiri janta riraga 11 riyotaanewo Jesoshi, itsipatakari paashinipaenı aapatziyariri, ipiyoteeyakani.

<sup>34</sup> Ikantawakiri maawaeni jeekatsiri janta:  
—Kyaaryoroña piriintaperotanaa Awinkatharite añaagae. Iñaawakiri Shimo.

<sup>35</sup> Roojatzi ikanantapaakari riraga apite:  
—Eejatzi naari, noñaagaeri janta awotsikinta, kameethapero riyotaakina omaanta tee niyotzitawitari, omanimoshiryakina janta nopankoki ika-gaantakawori paa, ipantakinawori, aripaete niyotanakiri.

*Iñeyeyeini riyotaanewo Jesoshi  
(Mt. 28.16-20; Mr. 16.14-18; Jowa 20.19-23)*

<sup>36</sup> Eeniropi ipiyoteeyakani pankotsiki ikenkithataakaawakagaeyani, roojatzi romapokantapaakari Jesoshi, ikatziyimoeyapaakarini niyanki. Ikanta-paeri:

—Pikimoshireeyanakini, maawaeni.

<sup>37</sup> Rotsikanateeyanakarini, tee riyoteeyawakirini, iitashiteeyaw-itawakarini kamaari. Ithaawanteeyakarini.

<sup>38</sup> Rojampitapaakiri:

—¿litaka pitahaawanantanari? ¿litaka pitheenkaeyantanarini pajankaneki?

<sup>39</sup> Pamineeyeroni nako eejatzi noetzi ikyaanatanakinaga kiraawo. Naaka pokaatsiri. Ajaaty, pipampiteeyenani piyoteeyantenarini. Piñaakina, eenittatsi nowatha eejatzi notonki. Tee naaka kamaari. Riroma kamaari tekatsi iwatha eejatzi itonki.

<sup>40</sup> Roojatzi roñaaganteeyakarini rako eejatzi iitzi.

<sup>41</sup> Omaanta eeniropi itheenkaneentayitzini, tee raapatziyaperotari rirotaki piriintaacha. Ikimoshireeyawitakanii jeñokiini iwathakira omaanta jaga rakanekii eeniropi ikantashireeyini: “Kyaaryo, rirotakiroña ari aamaashitya kaaririka”. Rootaki ikanantanakariri:

—¿Eenitatsima oyaari?

<sup>42</sup> Ari ipakiri shima tashirentsi.

<sup>43</sup> Raawakiri, roymotakari. Ari ramineeyakirini, joreririri.

*Ari riweyaakiro Jesoshi riyotagaeyakirini riyotaanewo  
(Ran. 1.4-8)*

<sup>44</sup> Roojatzi ikanteeyantakarini:

—Tema chapinki nokamantzitakimi: “Osheki nokemaatsityaawo, rowamagaeten. Ótzimatye omonkaatyaa maawaeni rojankinatakotzitakinarini Moeseeshi, eejatzi riraga kamanantayitzirorini iñaani Tajorentsi, eejatzi riraga mampaawaetawenteeyaririni irira”. Iroñaaka monkaataka.

<sup>45</sup> Roojatzi riyotaaperoeyantakaririni okantayitzirini Iwaperite Tajorentsi,

<sup>46</sup> ikanteeyakirini:

—Tema okantai Iwaperite Tajorentsi: “Aritaki ikamaki Rotyaantane newo Tajorentsi, okaate 3 kitejiri ari ipiriintanee eejatzi.

<sup>47</sup> Ikenkithatakoteeteri maawaeni kipatskipaeni, ritanakyaawo jaka Jerojareeki: ikemakoeeyakirini maawaeni atziri. Ikamanteeyerini irrapaeni: ‘Pikenkithashireeyanakyaani, pookaeyeroni kaari kameethatatsi panteeyirini. Pameentyaari Tajorentsi rowawijaakotantemiri’”.

<sup>48</sup> Ari piñaagaeeyakironi iroñaaka monkaataka rojankinatakotziteetakinarini paerani.

<sup>49</sup> Iroñaaka notyaantemiro ikashiyakaakimiri Pawa: opokashitemi Ishire, okithaatkayemi. Omaanta pijeeckawakiita jaka nampitsikika roojatzi opokawakiita. Ari omatakagaeyemini panteeyantyaaworini oetarikapaeni ikowakagaeyemirini Pawa.

*Roenokanaa Jesoshijenokinta  
(Mr. 16.19-20; Ran. 1.9-12)*

<sup>50</sup> Paashini kitejiri ragaeyantanakarini riraga Jesoshi riyotaanewopaeni janta Wetaaniyaki. Ari janta niyanki, rowankanakiro rako Jesoshi, ikenkithataakaakiri Iriri, ikantziri:

—Pawa, irika niyotaanewopaenika: pitajonkawenteeyerini, piweshiryaaakagaeyaarini.

<sup>51</sup> Ikantzirika iroka, eekiro roenokanaa jenokinta, peyanaa.

<sup>52</sup> Osheki ipinkathateeyakirini, roojatzi ipiyanteeyanaani Jerojareeki, iki-moshireeyanakini osheki.

<sup>53</sup> Riyaatapiintaki janta Tajorentsipankoki, ikantapiinteeyakini:

—Tema ikameethataki Tajorentsi.

Ari okaatzti.

Naaka jankinatzirori:

Rookashi

# **JOWA ROJANKINATAKOTAKIRI JESOKIRISHITO, TSIKA IKANTARI ROWAWIJAAKOTANTZI**

<sup>1</sup> Iroñaaka naaka Jowa nojankinatakoteri irira apintzitatsiri rivotaki iyoperotakotakaaneeriri Tajorentsi. Naaka riyotaanewo Jesoshi.

Tekirani riwetsikironi kipatsi, eeniro ijeeki riraga iyoperotakotakaaneeriri Tajorentsi. Itsipatarini irira Pawa Tajorentsi. Eejatzi rivotaki Tajorentsi.

<sup>2</sup> Ikempiyakarini paeraniperoroña ashitariri.

<sup>3</sup> Riraga iyoperotakotakaaneeriri Tajorentsi rivotaki wetsikirori maawaeni, oetarikapaeni añaayitzirini. Tekatsi paashini wetsikeroni oetarika. Tekatsimi irira, eeromi riwetsikaeyeronimi okaatzzi añaayitzirini, ari tekatsi tzimashitachanimi.

<sup>4</sup> Rivotaki owañagaeyakaerini eejatzi roshiyakawo kitejitatotakagaeyerini: tema riyoperotakaakae tsika ikantari Tajorentsi.

<sup>5</sup> Paerani tee ayoteeyawitarini rirori, okimitzimotakae ajeekakitzi tsiteniriki; roojatzi ipokantapaakari riraga iyoperotakotakaaneeriri Pawa Tajorentsi. Iroñaaka okimitzimotakae akitejitatkoeyakini. Tema kameetha riyoperotakotakaeri rirori aakapaeni. Iroñaaka riraga theenkiriri rirori okimitzimotari eekiro ryaatatayee ijeeki tsiteniriki; omaanta tee imatziro rantakagaero apitantlyawaori ajeeki tsiteniriki.

<sup>6</sup> Riraga Pawa Tajorentsi rotyaantakiri shirampari iitachari Jowa.

<sup>7</sup> Ikwanteeri rirori maawaeni aka aapatziyaperotaari riraga iyoperotakotakaaneeriri Tajorentsi. Rootaki rotyaanantariri riraga Jowa ikantakotayitapaakirini irira. Ari ikinanaki riraga Jowa ikantakotayitapaakirini rirori.

<sup>8</sup> Kaari irira rivotaki iyoperotakotakaaneeriri Tajorentsi, inta riraga Tajorentsi rotyaantakaerí rirori ikantakotantapaakyaariri irira impae-tatsini.

<sup>9</sup> Ari impaetzti ipokantapaakari riraga iyoperotakotakaaneeriri Tajorentsi jaka kipatsiki. Roojatzi riyoperotakaantanakaeriri Tajorentsi aakapaeni jeekatsirika kipatsikika.

<sup>10</sup> Ari ijeekimotapaakiri atziripaeni kipatsikika. Tema riwetsikantakawori kipatsi paeraniperoroña omaanta tee riyoteeyawakirini atziri rivotaki wetsikaeyerakirorini.

<sup>11</sup> Ipokawitapaaka rashiki iipatsiteki: ipokawitapaaka ijoriyyotzinkarite, omaanta tee ipinkathawakirini.

<sup>12</sup> Omaanta reentsitetari Tajorentsi apaanipaeni atziri. Ninkarika aapatziyakariri riraga iyoperotakotakaaneeriri Tajorentsi, riraga ameentariri, tema reentsitetakari riraga Tajorentsi.

<sup>13</sup> Eero reentsitetee akowashitari aka, eejatzi tee ro akoñaatashitee reentsitetee Tajorentsi inta ikowashitanaka irira reentsitetakae.

<sup>14</sup> Riraga iyoperotakotakaaneeriri Tajorentsi ipokapaaki jaka kipatsiki ikoñaatapaaki atziri. Iitantakari Jesoshi. Riraga Pawa Tajorentsi rotyaan-takiri jaka. Ijeekimoeyapaakaeni aakapaeni itsipatakae. Noñaayitawakirini irira rapintzite Itomi Pawa Tajorentsi ishipakiryaaaki. Ikimiperotakari Iriri; rivotaki kyaaryooperotatsiri, eejatzi ineshironkaperotakae aka.

**15** Ikanta riraga Jowa riyotaakotakiri riraga Jesoshi ikantakotakiri irira rirotaki iyoperotakotakaaneeriri Tajorentsi. Ikantayitakirini riraga atziri:  
—Irika Jesoshi nokamantakotakiri chapinki. “Ranaakotena riraga impae-tatsini. Tekirani noñaaatzini naari, eenironi ijeeki rirori itsipatari Ashitariri Tajorentsi”.

**16** Irira Jesoshi ashi royo rointaperotantzi rootaki ineshironkaperotanteeri aaka. Eekiro riyaatatzi ineshironkaperotakae.

**17** Paeraniperoroña riraga Tajorentsi rojankinatakaeriri Moeseeshini. Rojankinatziro oetarika ikowakiri anantyaawori aaka ajeekantyaari kameetha. Eejatzi rojankinatakotziri riraga Jesokirishito ineshironkaperotakae. Iroñaa ka ipokaki irira tema rirotaki kyaaryooperotatsiri, neshironkaperotantatsiri.

**18** Tekatsi atziri ñeerieen Tajorentsi, omaanta riraga Jesoshi Itomi rapintzite iñiiri. Ikimitari Iriri, rooma kijkokiro royiri. Tema itsipatawakaaka. Apintzi irira iyoperotakotakaaneeriri riraga Tajorentsi.

### *Riraga Jowa ikantakotakiri Jesoshi*

**19** Nityaawo nokantakoteri riraga Jowa okaatzi ikantakotakiri riraga Jesoshi. Riraga jewatatsiripaeñi joriiyopaeni jeekatsiri janta Jeroja-reeki rotyaantakiri apaanipaenii ñaanakowenantsiri Jowaki rojampikowen-takaantakiri irira. Eejatzi rotyaantakiri apaanipaenii amitakontantsiri ñaanakowenantsiri itsipatakarí: tema rirotaki icharineetení Rewiini. Ro-jampitapaakiri, ikantapaakiri:

—¿litaka pikaawoshitakotantariri Tajorentsi atziri? ¿Ninkamika? ¿Eerokama Rotyaantanewo Tajorentsi naamagaeyawitakarini?

**20** Ikantaperotawakirikya:

—Kaari naaka.

**21** Rapiitakiri:

—¿Kyaaryo? ¿Eerokama Iriiyashini?

—Kaarina.

—Eerokama riraga kamanantzirori iñaaani Tajorentsi naamagaeyakarini?

—Kaarina.

**22** Rapiitakiri:

—¿Ninkamika? ¿litaka nokantapaeriri otyaantakinari? ¿litaka pantziri?

**23** Ikantawakiri:

—Naaka ikenkithatakotzini paeraniperoroña Iseyashi riraga kamanantzirorini iñaaani Tajorentsi. Rooma rojankinatzini:  
“Inja ipokae kaematsini, ikenkithatapiinte janta tekatsinta atziri ipango, ikante: ‘Pikenkithashireeyakya, paapatziyari Awinkatharite, rowameethatantemiri. Rootaki ipokantyaari riyoteemiro pijeekatyaari kameetha. Ipokantyaaripa’.”.

**24** Irika pokaentsiri riraga ojampitantatsiri rirotaki warijeyopaeni.\*

**25** Ikantapaakiri:

—¿Kyaaryo? ¿Kaarimima Rotyaantanewo Tajorentsi? ¿Kaarimima Iriiyashini?  
¿Kaarimima riraga kamanantzirorini iñaaani Tajorentsi naamagaeyakarini ipokae? ¿litaka pikaawoshitakotantawakariri Tajorentsi riraga atziripaeni?

**26** Ikantawakiri:

—Tema naaka nokaawoshitakotantawakariri Tajorentsi apatziro iñaa. Eenitatisi iroñaa ka paashini shirampari kaari piyotzi eerokapaeni itsipatake: tema rirotaki riraga Rotyaantanewo Tajorentsi.

**27** Rirotaki impaetanari, tema rirotaki jewaperotatsiri. Osheki noñaa koweenkaperotziri irira. Tee noñaa koweenkaperota naari.

\* **1:24** Warijeyo rirotaki jewatatsiri piyotapiintantsiki joriiyopaeni.

**28** Aritaki ikantapiinta riraga Jowa janta Wetaaniyakinta, intatsikeronta Joriraaniki. Janta ikaawoshitakotapiintarinta Tajorentsi atziripaeni iñaaki.

### *Rapiitakiri riraga Jowa ikenkithatakotakiri Jesoshi*

**29** Okitejitanaki raminanaki riraga Jowa iñaawakiri Jesoshi ipokapaaki. Ikantziri atziripaenika:

—¡Pamine sha! Irakatapaaki Jesoshi riraga Rotyaantanewo Tajorentsi. Iwaero eejatzi rowishate Tajorentsi. Ikamawentee paata aaka maawaeni atziri, iñaaperotanteeri Ashitariri akameethatz. Raapithateeero aakapaeni oetarika kaari kameethatatsi antziri. Oshiyantyaariri rowamagaetantyaariri owisha iñaaperotanteeri riraga Tajorentsi aaka maawaeni joriyo akameethatz.

**30** Rirotaki irira nokenkithatakotakiri chapinki nokanantakariri: "Ranaakotakina impaetapaenani, rirotaki jewaperotatsiri. Osheki noñaakoweenkaperotakiri irira. Tee noñaakoweenkata naari. Tekiranı nokoñaatzini naaka, eenironi ijeki irira itsipatakari Pawa Tajorentsi".

**31** Paerani tee niywitarini rirotaki Rotyaantanewo Tajorentsi, omaanta iroñaaka niyoperotziri. Eejatzi ikowaki riraga Tajorentsi riyoteri maawaeni ikaateeyinira nojoriyyotzinkarite. Rootaki nopalantakari naaka nokaa-woshitakotawakiri maawaeni nojoriyyotzinkarite nookotantyaariri rirori.

**32-33** Roojatzi ikanantanakari:

—Tee niyotawitarini naaka. Omaanta rotyaanantakinari riraga Tajorentsi, ikantakina: "Pikaawoshitapiintawakiri atziri iñaaki, piyoteeri maawaeni riroripaeni ikenkithashiryakotena. Linja piñaawakiro ayiitapaaki Noshire. Ninkarika ookantapaakyari rirotaki riraga kithaatotakotawakowori atziripaeni Noshire". Ari impaetzi noñaawakiro oshawiinkapaaki Ishire Tajorentsi. Opoñaaka jenokinta, ookantapaakari Jesoshi. Oshiyawitapaaakirjamomo.

**34** Kyaaryo noñaaperotakiro. Rootaki nokantakotantakariri: "Rirotaki Itomi Tajorentsi".

### *Atziri ikamantakotziri Jesoshi rirotaki Rotyaantanewo Tajorentsi*

**35** Okitejitanaki rapiitakiro ikatziya riraga Jowa jaga itsipatana naaka riyotaanewo apite.

**36** Raminakiri riraga Jesoshi ikatziyatziyawaetaty janta awotsiki. Ikantzi riraga Jowa:

—¡Sha! Paminerri irinta. Rirotaki Rowishate Tajorentsi; riraga Rotyaantanewo. Rotyaananttariri ikamawenteeyerini maawaeni atziri, rowawiajakotanteeri. Roshiyakari owisha rowamaapiintziri ñaanakowenantsirs iñaaperotanteeri Tajorentsi aakapaeni joriyo akameethatz.

**37** Nokemantawakiriri riraga Jowa naaka riyotanewo apite, rootaki noy-aantanakariri riraga Jesoshi.

**38** Ipithokashitakina irira iñaakina noyaatakirira. Ikantakina:

—¿Itaka pikoyiri?

Nokantawakiri:

—Tekatsi. Iyotaantatsiri, ¿tsika pijeeekika?

**39** Ikantawakina:

—Thame poyaatanakina noñaayemiro.

Roojatzi noyaatantanakariri rirori, noñaapaakiro pankotsi ashinentsi ijekantari. Ari jenokitapaaki oorya. Noñaapaakiro pankotsi, nojeekimota-paakiri maawaeni kitejiri.

**40** Iwaero paashini areetapaenchari Antereeshi rivotaki rirentzi Shimo iiteeri paata Peetero.<sup>†</sup>

**41-42** Tsitenini oorya riyaatanaki Antereeshi raminakiteri rirentzi. Iñaantapaakirir irira, ikantapaakiri:

—Noñaakiri Rotaantane wo Tajorentsi. Thame poyaatanakina, piñaapaeri.  
—Jee, thame.

Ari rareetapaakari Jesoshiki. Raminawakiri, ikantawakiri:

—Rooma eeroka Shimo, itomi Jonaashi. Iinja iiteetemi: Peetero.

**43-44** Okitejitanaki riraga Jesoshi ikoyi ipiyanee ipankokinta janta paashiniki kipatsi. Oeta kipatsi Karireeya. Naakappaeni riyotaanewopaeni itsipatakina. Omaanta tekirani riyaateni janta, riraga Peetero raminakitziri jag a riyompari Jiripi. Romiñaakiteri. Jiripi, Peetero eejatzi Antereeshi ipoñaaka Wetheeraki: itsipatwakaaka janta. Wetheera rootaki nampitsi jeekatsiri janta Karireyaki. Raminakitziri, ari iñaakiri rirori, ikantziri:

—Thame paminerri Rotaantane wo Tajorentsi.  
—Jee, thame.

Iñaantawakari Jesoshi riraga Jiripi ikantawakiri:

—Thame poyaatanakina.

Roojatzti royaatantanakari. Ari jateeyanakini maawaeni.

**45** Ari yowapaakina maawaeni janta okaakini Kanaa, paashini nampitsi jeekatsiri Karireyaki. Ari irira Jiripi riyaatakizti ipankoki riyompari Nata-neeri. Iñaapakiri ikantapaakiri:

—Noñaakirikya riraganki, rojankinatakotzitakarini paeraniperorono Moe-seeshi. Eejatzi kamanantayitzirorini iñaani Tajorentsi rojankinatzitakoe-yarini rirori. Rivotaki Jesoshi, itomini Josee najareetejatzi.

**46** Ikantawakiri:

—Tee ikameethatz i maawaeni najareetejatzi. ¿Kyaaryooperoma ikameethatz rirori?

Rakanakiri Jiripi:

—Thame paminerri, piyotantyaariri ikameethatzirika.

Ari riyaatnaki.

**47** Ari rokaakintee yapaakarini riraga Jesoshi iñaawakiri ipokapaaki, ikantziri tsipatayitakaririni:

—Paminerri ña riraga Nataneeri. Rivotaki joriyyopero kimiperotariri itakaantawori paerani Ishirayeerin: ikameethataki, tee riyotzi ramatawi-tantzi.

**48** Rojampitapaakiri Nataneeri, ikantapaakiri:

—¿Tsika pikantakaka piyotantawakinari nokameethatz?

Ikantawakiri:

—Noñaakimi janta pontsiritawo iyeera, tekira ikenkithatakaemi Jiripi.

**49** Rakapaakiri riraga Nataneeri:

—Tema eeroka Itomi Tajorentsi: pithotyaakiro maawaeni, piyotayitzirini. Erokataki jewawentziriri joriyyopaeni.

**50** Ikantawakiri:

—Pamine, inkaaganki nokantakimi: “Noñaakimi pontsiritawo iyeera”. ¿Rootakima paapatziyantakinari? Ari piñea iinja notajonkantaperotanaki osheki, impaetzkyia paapatziyantaperotenari.

**51** Kyaaryootaki iroka nokantemiri. Aritaki piñaakiro iinjajenokiperonta inthomaenta. Piñaakiri ronampiripaeni Tajorentsi rayiitashitena ipiyaneero eejatzi. Ikanantari nopokantari jaka kipatsiki niyoperotakotakaeriri riraga

<sup>†</sup> **1:40** Okantzi: “Iinja iiteetemi Sheejashi okantakotzi Peetero”. Tema akantziri aari apaanteki Sheejashi eejatzi Peetero: mapitatsiri. Sheejashi rootaki ñagaantsi ipaanteki ewereeyojatzi. Peetero rootaki ñagaantsi ipaanteki kireeshiyajatzi.

Tajorentsi maawaeni atziri. Tema naaka poñaachari jenokinta, nokoñaataki jaka kipatsikika.

## 2

### *Ritanakawo Jesoshi itajonkantawori iñaa*

<sup>1-2</sup> Okaatzi nomaaaki apite. Okitejitanaki aritaki ikimoshireeyini maawaeni kanaajatzti. Ojeeki nampitsi owaero Kanaa kipatsi owaero Karireeya. Ikimoshirewenteeyakirini riroripaeni apaami shirampari owakira rayirowa iina. Tema romiñaakiri oshekini atziri rakiyoteri.\* Eeniro ikaateeyinira kanaajatzti, eejatzti roori riniro Jesoshi, eejatzti notsipeeteyakarini naaka, Jesoshi, eejatzti paashinipaeni riyotaanewo, maawaena.

<sup>3</sup> Ari rowaeyakan maawaeni atziri eejatzti imiritaki awishoowaantsi oowa, rootaki iwyaaritayitarini joriyyopaeni rirori. Rooteentsi ithaatzi-matero, rootaki okanantariri rowaga riniro Jesoshi:

—Tekatsi paashini awishoowaantsi oowa: ¿tema aritaki pimatakiro pamitakoteri?

<sup>4</sup> Ikantawakiro:

—Nana, ¿iitaka pikanantanari? Tekiraata omonkaata notajonkante.

<sup>5</sup> Omaanta okantziri roori onampirentsipaeni jaga:

—Pikemijantaperoterira oetarika romperatemiri.

<sup>6</sup> Eeniro jaga chomoo antawopero† okaatzi 6. Riwetsikaetziro mapi. Rootaki ojeekantari iñaa ikiwantapiintari joriyyopaeni ikiwakowentari Tajorentsi. Omaanta iroñaaka thaataka.

<sup>7</sup> Ikantziri rirori maawaeni onampirentsia:

—Piyeekitero iñaa chomookipaenira.

Ari riyeekiteeyakironi maawaeni.

<sup>8</sup> Roojatzi ikanantanakari:

—Pikitero iroñaaka paakotanakiniri omperatzimiri, pimpaete paakotanakiniri maawaeni atziri.

Ari raakotanakiniri.

<sup>9</sup> Ikemijantawakiro riraga omperatariri, tema opeyanaka awishoowaantsi oowa. Tee riyozi omperatariri onampirentsia tsikarika opoñaaka iroka, omaanta riyotaki onampirentsia, iyeekitzirori chomookira iñaa. Roojatzi riraga omperatantachari ikaemantakariri aatsiri iina.

<sup>10</sup> Ikantziri:

—Tema rootaki itapiintari kameethari awishoowaantsi oowa aperi atziri. Aririka ashinkitawitanakyaani apokashitapaero majankaari. Aritaki okantari ameteeyarini. Eerokaritya eeroka kempoyaakirori rowaga kameethari. Owakira iroñaaka pamakaantakiro.

Ari maawaeni ririro.

<sup>11</sup> Ari janta Kanaa jeekatsiri Karireeyaki, ritakawo Jesoshi itajonkantaki. Roñaagakinawo ishindsight. Noñaakiri naaka eejatzti paashini riyotaanewo, roojatzi ameenantanakariri maawaeni.

<sup>12</sup> Roojatzi noerinkanteeyanakarini Kaperinawooki. Itsipatanakina Jesoshi naaka, riniro, rirentipaeni, rirojatzi paashinipaeni riyotanewo. Ari nokaateeyanakirini maawaeni. Nomagaeyanakini janta apaanipaeni tsiteniriki.

\* <sup>2:1-2</sup> Naakapaeni joriyyopaeni nametapiintawo iroka. Aririka atziri raye iina, ari romiñeeri oshekini atziri rakiyoteri. Ikimoshireeyakini maawaeni. † <sup>2:6</sup> Aapaani okaateyekitatsini 80 riitero iñaa.

*Iroñaka nokantakoteri riraga Jesoshi roemishitowaeyakirini Tajorentsi-panko pimantatsiri paeni*

<sup>13</sup> Rootzimateentsi kitejiri nokimoshiryaantapiintari naakapaeni joriyo owaero Kitejitatsiri rawijantariri ronampiri Tajorentsi. Nokenkithashiryaakotawo kitejiri paeraniperoroña rawijantakarini irira ipankokipaeni nocharini teni janta Ejipitoki.

Rootaki oshekini atziri itonkaantanakari Jerojareeki tonka, tonka, tonka, ipinkathatantariri riraga Tajorentsi. Ari itonkaanaki riraga Jesoshi janta. Nokaatanakiri paashinipaeni ryotanewo noyaatanakiri.

<sup>14</sup> Nokyakaapaakiri Tajorentsipankoki noñaapaakiri janta pimantatsiri waaka, owisha, jamomo, maawaeni. Eejatzi ijekaki jaga kaampiyaitziririni atziri iyorikitepaeni.

<sup>15</sup> Ari iñaakiro riraga Jesoshi shiwithapaeni riwetsikashitakiri pajamentotsi ipajatantyaariri waaka. Roojatzi romishitowanteeyakaririni owisha, waaka, maawaeni. Ipitamenkakotakiri imeejatekipaeni kaampiyaitziririni iyorikitepaeni, rojokitakiri iyorikitepaeni:

<sup>16</sup> Ikanteyirini pimantatsiri jamomo:

—Pagaeyanakirini irika. Eero pipimantawaetzi jaka nopinkathatapitzirika Pawa.

<sup>17</sup> Roojatzi nokenkithashiryaantanakawo rojankinatakotziteetakaririni irira Jesoshi paeraniperoroña Iwaperiteki Tajorentsi: “Naamaakotzitakari, Pawa, iroka Tajorentsipankoka; rootaki rowamaanteetenari iiinja”.

<sup>18</sup> Ikantakanakiri jewatatsiripaeni joriyopaeni:

—¿litaka panantawori iroka? ¿litaka poñaayenari niyotantemiri eerokarika rotyaantzi irira Tajorentsi?

<sup>19</sup> Ikantawakiri:

—Pishekiroreero iroka Tajorentsipankoka ari okaate 3 kitejiri napiiteero notzinagaero.

<sup>20</sup> Roojatzi ikijathatantanakari riraga jewatatsiripaeni joriyoyo:

—Okaatzi oshekini ojarentsi riwetsikanteetakawori iroka Tajorentsipankoka. ¿Arima okaate 3 kitejiri piwetsikanteeyaaawori eerori? Eerowa pimatziro.

<sup>21</sup> Ñaakiro, rirojatzi oshiyakaawentachari. Rioma rirotaki oshiyakaawentachari iwatha Tajorentsipankoka, rooma kijokiro royiri Ashitariri.

<sup>22</sup> Ikamantakari, okaataki 3 kitejiri ipiriinantanaari. Roojatzi, aritaki nokenkithashireeyanakironi iroka oshiyakaawentachari. Eejatzi niyotanakiro okenkithatakotakirini paerani Iwaperite Tajorentsi monkaataka iroñaaka maawaeni okenkithatakotakiri.

<sup>23</sup> Areetapaaka Kitejitatsiri rawijantariri ronampiri Tajorentsi nokimoshiryaantari maawaeni naaka joriyyojatzi. Ijeekapaaki riraga Jesoshi Jerojareeki, osheki itajonkantayitapaakini. Iñaayitakirini atziri, rootaki raapatziyeeyantakaririni.

<sup>24</sup> Omaanta ryotzi rirori itaka ikenkithashiryaari maawaeni atziri, rootaki raamaantanakari: “Ragaetanakinakari”.

<sup>25</sup> Riyotakiri riraga atziri itaka ikenkithashireeyarini. Riyotashitaka, tekatsi kamanterini.

### 3

*Ikenkithawaetakaakiri Jesoshi Nikoreemo*

<sup>1</sup> Eeniyo shirampari jewatziriri joriyopaeni iwaero Nikoreemo. Rirotaki warijeeyo.

<sup>2</sup> Ikanta riraga Nikoreemo ipokashitakiri Jesoshi tsiteniriki, ikantapaakiri:

—Iyotaanari, niyotakimi pipoñaaka Tajorentsiki. Rootaki pipokantakari, piyoteeyapaenani. Eeromi itsipatzimimi Tajorentsi eeromi pitajonkantzimi. Rootaki nokowantari piyoteena naari.

<sup>3</sup> Ikantawakiri riraga Jesoshi:

—Kyaaryooperotaki iroka nokantemiri: riraga kaari apiitaachani ikofaaatee, eero reentsitetari Tajorentsi, eejatzi eero imatziri iñiiri irira, itsipatantyaariri jenokinta.

<sup>4</sup> Ikantapaakiri riraga Nikoreemo:

—Aririka antyashiparitaki, ¿tsika akantyaaka apiiiteero akoñaatanteeyaari? ¿Arima amateeero apiyaneero omotziki anironi apiitero akoñaatantapaeyaari?

<sup>5</sup> Ikantawakiri:

—Kyaaryootaki iroka nokantemiri: maawaeni kaari apiitaachani ikofaaatee eero reentsitetari Tajorentsi. Omaanta aririka rityaawo okoñaateri riniro eejatzi impaetzti apawo otzimirri Ishire Tajorentsi, aritaki rashitakyaari riraga Tajorentsi eejatzi raminakowiritantakiri.

<sup>6</sup> Tsinani aririka oeyoyeeri otomi, ikimitari ashitariri, ikame. Eejatzi okimiwitaka Ishire Tajorentsi, aririka otzimeri atziri ikimityaari Tajorentsi, eero ikami, inta ikantyaani ijeki itsipatyaari Tajorentsi.

<sup>7</sup> Aririka nokantemi: “Papiiteeya pikoñaatee”, eero pitzi-maetyaashitanaka.

<sup>8</sup> Tsikarika okoyi otampyaataki tampyaa, pikemawakiro opoematapaaki, moo. Omaanta tee piyotzi tsikarika okinapaaki eejatzi tee piyotzi tsikarika iyaate. Eejatzi ikimiwitawo maawaeni otzimantari Ishire Tajorentsi.

<sup>9</sup> Ikantapaakiri riraga Nikoreemo:

—¿Oetaka poshiyakaawentanari?

<sup>10</sup> Ikantawakiri:

—¿Kaarimima eerori iyotaayitziririni maawaeni ajoriiyotzinkarite? ¿Itaka kaari piyontantawakawo iroka nokantzimiri?

<sup>11</sup> Kyaaryooperotaki iroka nokantemiri: nokantakotziri iitarika niyotziri eejatzi noñaayitzirini omaanta tee paapatziyawo nokantayitawitzimirini.

<sup>12</sup> Iroñaaka nokenkithatakowitzimiro iñeetziri jaka kipatsikika, omaanta tee paapatziyawo. Aririka nokenkithatakotemiro oetarika ikoyiri riraga Tajorentsi, ¿arima paapatziyakina?

<sup>13</sup> Tektsi atziri jatatsini jenokinta eejatzi ipiyee jaka kipatsikika ikantemi oetarika ikoyiri Tajorentsi. Omaanta naaka nopoñaaka jenokinta nokoñaatapaaki kipatsikika. Aririka nokenkithatakotero jenokinta, niyotakiro oeta nokantziri.

<sup>14</sup> Paeraniperoroña ryaatantakari achariniiteni paerani janta tekatsinta atziri ipanko, ratsikayitawakirini oshekini maanki. Ikamayitakini oshek. Ari ikantakiri riraga Tajorentsi Moeseeshini: “Piwetsikeri oshiyarini maanki powatzikakoteri inchapankeki. Raminayiterinirika atziripaeni ari retsiyatatakotanee, eero ikami”. Aritaki imatakiri Moeseeshini. Retsiyatatakotanari oshek atziri. Ikimiwitaka ikantana riraga Tajorentsi: “Rowamagaetemi eerori rowamayemi atziri, rowatzikakotemi inchapankeki”.

<sup>15</sup> Pikamawenteri atziri powawijaakoteri maawaeni aapatziyemini”.

Rootaki ikantziriri Jesoshi riraga Nikoreemo. Ithonkapaakiro ikenkithatakakiri.

<sup>16</sup> Inintashireperotanteeri roña riraga Tajorentsi aakapaeni maawaeni atziri kipatsikika, rootaki rotyaanantakariri Itomi rapintzite jaka kipatsikika. Ninkarika aapatziyeyaaririni riori, eero ryaatzi paamariki kaari tsiwakanitsini, inta ikanteetatyeyaaani ijeki jenokinta itsipatapaeyaari Tajorentsi.

<sup>17</sup> Tee ro rotyaanantariri Tajorentsi riraga Itomi jaka rowashironkae akapaenii atziri, inta rotyaanantakaariri rowawijaakotee.

<sup>18</sup> Eero ikantakowenteeyirini Pawa Tajorentsi maawaeni aapatziyariri Jesoshi. Omaanta ikantakowenanteeyakaririni rirori maawaeni kaari aapatziyarinii, rootaki rowashironkaantyaariri iinja.

<sup>19</sup> Ro rowashironkaantyaariri theenkaeyiririni riraga Jesoshi. Omaanta Irira ipokaki rirori riyotaanteeri aaka tsikarika ikantari riraga Tajorentsi eejatzi riyotaanteeri ajeeki kameetha. Noshiyakaawentemiri: okimiwitaka ikitejitatotakiri atziri jaka kipatsiki tema iinaakiro maawaeni oetarika ranteeeyirini. Omaanta riraga kaari aapatziyariri rantapiinteeyironi kaari kameethatatsi, tee ikoyiro riyotero iroka riyotaawitakariri; inta okimiwitita inintaperotziro tsiteniriki irirapaeeni. Tee ikoyi ijekki kitejiriki, ikantzi: "Iifeeterokari riraga Tajorentsi antziri aaka, rowashironkaanteerokari".

<sup>20</sup> Maawaeni antzirori kaari kameethatatsi ikijakiri Jesoshi. Tee ikoyi ipokashiteri: riyotaki rooñaawontzitzirkari kaari kameethatatsi rantziri, rootaki kaari ipokashitantarri raapatziyanthaariri.

<sup>21</sup> Omaanta antzirori kyaaryooperotatsiri, rirotaki pokashitziriri riraga Jesoshi. Roñaagayitzirini kameethatatsiri rantziri. Riroma rirotaki Tajorentsi antakayiriri kameethatayitsirini, rootaki kaari ipashiwenanta rirori ipokashitziri. Kimiwitaka ijekkaki kitejiriki imatziro iiniiri maawaeni atziri eejatzi Tajorentsi.

### *Jowa riraga kaawoshitakotantsiri rapiitziro ikantakotziri Jesoshi*

<sup>22</sup> Inja riyaatakanakina riraga Jesoshi Joreeyaki. Nojeekapaaiki janta, nokaawoshitakotantsipaakari Tajorentsi atziri.

<sup>23</sup> Eejatzi riraga Jowa ikaawoshitakotawakiri Tajorentsi atziri jaga Aenookira okaakintawo Jariimi; tema oshekitapaaki iñaa jaga. Riyaatashitanakiri oshekini atziri ikaawoshitakotawakiniri riraga Tajorentsi.

<sup>24-25</sup> Tekiraata romonkyaagaetziri riraga Jowa. Riyotaanewopaeni rashii piywaaantetakari paashini joriyyo. Ro ipiyapiywaaantetawakagaeyani, ikantzi tsika akanteeyanakyaanika akiteshiretanteeayaarini.

<sup>26</sup> Roojatzri riroripaeni ipokashitantsipaakariri riraga Jowa ikantapsaakiri:

—Iyotaanari, ikaawoshitakotawakiri Tajorentsi riraganki pitsipatariranki chapinki jantakironta Joriraaniki. Riraganki pikantakotakiri rirotaki Rotyaantanewo Tajorentsi. Rootaki riyaatashitananakariri maawaeni atziri, tema iroñaaka rookanakae aaka. ¿litakaya?

<sup>27</sup> Ikantawakiri:

—Tektsi amatashiteeyani aaka apaniroeni, inta Tajorentsi jenokijatzi matakagaeroni maawaeni kameethatatsiri.

<sup>28</sup> Pikemakina eerokapaeni nokantakimi chapinki: "Kaarina naaka riraga Rotyaantanewo Tajorentsi. Omaanta rotyaanantakina riraga Tajorentsi neewatanakiri rirori".

<sup>29</sup> Noshiyakaawentemiro. Irira owakira aatsiri iina, aaperotzirori. Ikomoshirewentakiro iina. Rootaki riraga isheninkathoripaeni iki-moshirewenantyaariri. Iroñaaka nokimiwitari riraga kimoshirewentziriri aatsiri iina.

<sup>30</sup> Kyaaryo chapinki osheki atziri ipokashitapiintana ikemakotziri Rotyaantanewo Tajorentsi; omaanta iroñaaka rookanakina, riyaatashitakiri ipinkathaperotziri rirori. Naaka tee: eero iroñaaka ipinkathatanaana.

<sup>31</sup> Riragakya poñaachari jenokinta reewaperowenteeyirini maawaeni. Naaka kipatsijatzi, nomonkaateeyarini maawaeni jeekatsiripaeni kipatsikika, tee apinkathariteeyini ikimitaga rirori. Tema apatziro ak-enkithawaetakotashitawo iroka añaayitzirini jaka kipatsikika.

<sup>32</sup> Omaanta riraga poñaachari jenokinta ikamantakotziro oetarikapaeni iñaayitzirini eejatzi ikemayitzirini janta. Omaanta tekatsi osheki aapatziyap-erotawakyawoni ikantakiri.

<sup>33</sup> Omaanta maawaeni aapatziyawakawori okaatzi ikantziri riyotzi kyaaryooperotaki maawaeni ikantziriri Tajorentsi.

<sup>34</sup> Rirotaki Tajorentsi otyaantziriri riraga Jesoshi, iroñaaka riyotaanta-paakiro iyenkithari. Riraga Tajorentsi tee ithañaawo Ishire, inta ikithatzitakari Itomi Ishireki.

<sup>35</sup> Riraga Pawa jenokijatzi inintaperotziri Itomi, eejatzi rotyaantakaeri reewaperowenteeyeeni aakapaeni maawaeni atziri.

<sup>36</sup> Maawaeni aapatziyariri Itomi Tajorentsi ikanteetatyeyaaani rañe jenokinta. Omaanta eero riyatzi jenokinta riraga kaari aapatziyari rirori, tema ikanteetatyeyaaani ikijantyaari Tajorentsi.

## 4

### *Rookaneero Jesoshi Joreeya*

<sup>1-3</sup> Riraga warijeeyopaeni ikemakotakiri Jesoshi. Ikanteeyirini atziri:

—Riraga Jesoshi ranaakotziri Jowa riyotaantzi. Osheki raapatziyakaakari atziripaeni, osheki ikaawoshitakotawakari Tajorentsi.

Omaanta tee ikaawoshitakotari Tajorentsi riraga Jesoshi inta naakapaeni riyotaanewo kaawoshiiteenchari. Riyotaki Awinkatharite ikemakotakiri riraga warijeeyopaeni oetarika rantziri. Rootaki rookakaantanaanawori Joreeya ipiyakaantanaanari Karireeyaki.

### *Ikenkithatakaakiro Jesoshi jamaaryajato*

<sup>4-5</sup> Ikinakaanaana Jesoshi Jamaaryaki naakapaeni. Rareetakaapaentana okaakini nampitsi iitachari Shikaari. Rootaki iipatsiteni Jakooowoni paera-niperoroña: iroka ipakiriri itomini Joseeni.

<sup>6</sup> Eenitatsi jaga iiyakotanewo iñaa Jakooowoni. Makotapaaki riraga Jesoshi, rooma nopoñaa maawaeni intena. Ijeekimotashitapaakawo okaakini roori imakoryaantapaaka. Tema tsiteniityaapaaki oorya.

<sup>7-8</sup> Notsipatakari naaka paashinipaeni riyotaanewo niyaatapaentzi jaga nampitsiki namanantapaentzi nowanawo. Roojatzi opokantapaaka tsinani jamaaryajato okitaatzi iñaa. Ikantawakiro rirori:

—Pipakotena nomiri.

<sup>9</sup> Okantziri:

—¿Kaarimima joriyyo? ¿Litaka pikowakotantanari iñaa? Naaka jamaaryajato. Tema tee raakameeethateeyirini joriyyopaeni jamaaryajatzi. Rootaki okanantakariri: “¿Litaka pikowakotantanari iñaa?”

<sup>10</sup> Ikantawakiro riraga Jesoshi:

—Tee piyotzi oetarika ikowakaakimiri riraga Tajorentsi nomatemiri. Eejatzi tee piyotzi naari ninkarika. Nokantakimi: “Pipakotena nomiri”. Omaanta piyotakinarikami naari, pikantakinami eerori: “Eerokakya pipenaata nomiri”. Roojatzi nopashitatemirorimi iñaa owañaantatsiri.

<sup>11</sup> Okantakiri:

—Tekatsi pikitaatantyaari. Inthomaeperonta ojeeki iñaa kiteyaaperotatsiri. ¿Ninka payenirika iroka iñaa owañaantatsiri?

**12** ¿Panaakotakirika achariniiteni riraga Jakoowoni kiyashitzirori iroka iiyakotanewoni? Imiritzirini iñaaaka imiriteeyironi maawaeni rirori itomipaeni eejatzi maawaeni ipira. Roojatzi iroñaaka nomiriteeyirini naaka. Okameethataki iñaa: ¿pikenkithashiryaka pipena iñaa anaakotzirorini iroka okameethatzi?

**13** Ikantawakiro:

—Ninkarika miriteeyirorini iroka iñaa ari rapiitero maawaeni ikemaero imiri.

**14** Omaanta ninkarika miritakironi iñaa nopiriri naaka, eero rapiitziro imiritee. Rowaga iñaa noperiri okimita iyowaatakapakitzi ishireki, rootaki owañaakiriri. Ikantyaani ijekimotapaakina.

**15** Okemakiri. Tee iyotzi ikantakotziro roori Ishire Tajorentsi. Okenkithashireeya ikantakotziro iñaa. Okantakiri:

—Pipenawokya iroñaaka iroka iñaa pikantakinari, eerokya nomiritanna. Eero natsipataatwao noppokaate jaka nokitaatanee iñaa.

**16** Ikantanakiro rirori:

—Pityaawo piyaaate pikaemakitenari piimi.

**17** Okantawakiri:

—Tektsi noemi.

Ikantanakiro:

—Kyaaryootaki pikantakinari: “Tektsi noemi”.

**18** Ikaataki piimi paawitakari apawakooni. Irira pitsipatashitari iroñaaka kaari piimi. Kyaaryo pikantakina.

**19** Okantawakiri:

—Kyaaryo eerokakya kamanantayitzirorini iñaani Tajorentsi: apaani iroñaaka nojampitemi.

**20** Jaka tonkaariki ipinkathapiinteeeyirini riraga Tajorentsi maawaeni nochariniiitenipaeni. Eerokapaeni joriyyopaeni pikantzi kameetha apinkathateri Jerojareeki. ¿Oetaka kameethatatsiri?

**21** Ikantawakiro:

—Pikemijantero iroka nokantemiri iroñaaka. Paata eero pikentashiriijo tsikarika pipinkathateri riraga Tajorentsi. Atsipetashita akenkithashiryashitawo tsikarika apinkathateri inta okameethaperotzi akenkithashireeri ninka apinkathateri.

**22** Eerokapaeni jamaaryajatzee piyotziri irira pipinkathawitari. Naaka-paeni joriyyo, niyotziri naaka ninka naapatziyeyearini. Riraga owawi-jaakotantatsini rirotaki joriyyotatsini paata.

**23** Monkaataapaaka pipinkathaperoteri riraga Pawa: pikoyirika, ari amitakoyemini maawaeni Ishire Tajorentsi, iyoteemiro kyaaryooperotatsiri. Rootaki ikoyiri Tajorentsi.

**24** Tektsi iwatha riraga Pawa Tajorentsi. Riraga kowatsiri raapatziyaari irira, okameethatzi ikemijantaperotero Ishire okaatzi iyotayeeriri kyaaryootatsiri.

**25** Okantanakiri:

—Niyotaki ipokae Rotyaantanewo Tajorentsi, riraga iiteetziri Kirishito. Rareetapaakaerika ryotakaapaakae oetarikapaeni.

**26** Ikantawakiro:

—Naaka riraga Rotyaantanewo Tajorentsi.

**27** Rootaki ikantakirori riraga Jesoshi rowaga tsinani. Roojatzi naaka, nokaatakiri paashinipaeni ryotaanewo nareetapaa. Noñaapaakiri. Omaanta tee nojampitapaeri: “¿litaka pikantzirori tsinani? ¿litaka pikenkithatakaantawori?” Naminashitapaakari.

<sup>28</sup> Naminashitapaakari, ookanakiro oowitzite opiyanaka onampiki. Okantapaakiri onampiweri:

—Thame poyaatanakina maawaeni.

<sup>29</sup> Noñaayemiri shirampari kantakinari maawaeni oetarika nantayitzirini. Riomachee Rotyaantanewo Tajorentsi.

Ikemijanantawori okaatz i okantakiri,

<sup>30</sup> roojatzi royaatantanakawo maawaeni raminakiteri riraga Jesoshi.

<sup>31</sup> Rootaki tekira opiya roori iiyakotanewoki, nokantawitanakari Jesoshi:

—Iyotaanari, poya.

<sup>32</sup> Ikantawakina:

—Eenitatsi nowari nashi naari kaari piyotzi eeroka.

<sup>33</sup> Roojatzi nokantawakaantanaka:

—¿Ramaetakinirima rowanawo?

<sup>34</sup> Ikantanakina:

—Nantziniri otyaantakinari ikowakaakinari okimitzimotakina nowaka, os hintsitaakaakina eejatzi iweshiryakaakina.

<sup>35</sup> Rooma pikantawakaawita eerokapaeni tekira omonkaata 4 kashiri ari agaeyantyaaworini opiyotapiintaga, pankirentsi. Piitashiwitaka aririka pareetakya janta Karireeyaki roojatzi piyoteeri atziri oetarika ikantziriri Tajorentsi. Omaanta nokantemi: pamineri oshekini atziri pokatsini jaka. ¿Píñaakiri? Kithaatawori kitamaari. Ikojiri maawaeni riyoferi Tajorentsi. Piyotaantyaariri oetarika ikoyiri rirori raapatziyantyaariri.

<sup>36</sup> Aririka piyotaakiri atziri roojatzikya raapatziyari riraga Tajorentsi, ari nokimoshiryaa kayemi. Okimiwit ari ariki powiiteniri piwatorote ipinatemi. Piyotaashitari eejatzi ikemijantana roojatzi eero ikami inta ikanteetapatiyeeyaa i jeekei jenokinta Tajorentsi. Rootaki iinja maawaeni rityaawo yotaakotziriri Tajorentsi eejatzi maawaeni impaetatsiri ryotaakotanakiri rirori apiyowentyaari riraga Tajorentsi akimoshireeyantyaarini, maawaeni.

<sup>37</sup> Kyaaryootaki iroka ikantapiinteetziri: “Irira pankitakirori eero rowiitziro inta paashini owiiteroni”.

<sup>38</sup> Notyaanteeeyemini piyotagaeyeririni atziri oetarika ranteri reentsiteeeyakaririni riraga Tajorentsi. Naari eejatzi paashinipaeni atziri niyotaakiri eechonkiini, iroñaaaka thame pithonkaeri piyoteeri eeroka.

<sup>39</sup> Aririka okantakotapaakiri riraga Jesoshi rowaga tsinani, raapatziyanakari oshekini onampiweri. Tema okantziri: “Noñaayemiri shirampari kantakinari maawaeni oetarika nantayitzirini”. Rootaki royaatantawori jaga. Rareetanteeyakaririni maawaeni.

<sup>40</sup> Ipokashitantakari ikantapaakiri:

—Pijeekimotanakinaata.

Ari ijeekakaanakina apite kitejiri janta,

<sup>41</sup> nokenkithatakanakiri irirapaeni Jesoshi eejatzi naaka maawaeni ryotaanewo. Raapatziyaperotanakari osheki riraga shikaarijatz.

<sup>42</sup> Ikanteeeyakironi riraga shikaarijatz rowaga tsinani:

—Naapatziyakawo eechonkiini pikantakinari omaanta iroñaaakaya nokmaperotakiri irira Jesoshi, rootaki niyoteeyantakarini kyaaryokya oetarika pikantakinari. Rirotaki Owawijaakotantatsiri maawaeni jeekatsiri kipatsiki riraga aapatziyariri. Rirotaki irinta Rotyaantanewo Tajorentsi.

<sup>43</sup> Ari apite imaaki Jesoshi janta. Okitejitanaki tee ikoyi ikijanakiri riraga jewatatsiripaeni joriyopaeni rootaki ryaatantanakari. Ipiyanee iipatsiteki Karireeyaki. Noyaatanakiri naakapaeni ryotaanewo.

<sup>44</sup> Riyaatantari omaanta riyotzi tee raapatziyaperotari osheki atziri janta. Rirotaki Jesoshi kantapiintatsiri: "Tee raapatziyari atziri kamanantzirorini iñaa ni Tajorentsi iipatsiteki inta itheenkapiintziri inampijatzí".

<sup>45</sup> Omaanta aririka nareetapaeya maawaeni naakapaeni Karireeyaki, raakameethatawakiri riraga Jesoshi maawaeni karireeyajatzi. Riyaatakitzi oshekini irirapaeni chapinki janta Jerojareeki, ikimoshireeyini maawaeni. Aritaki janta iñaayitakironi rantziri Jesoshi. Rootaki iroñaka raakameethatantakariri maawaeni.

### *Jesoshi retsiyatatakotziri itomi jewatatsiri*

<sup>46</sup> Rapiitakiro ryaatanee riraga Jesoshi Kanaaki: rowaga karireyawero. Janta chapinki ipeyakiro iñaa awishoowaantsi oowa.

Eeniro ijekki Kaperinawooki jewatatsiri, imantsiyataki itomi.

<sup>47</sup> Ikemakotawakiri riraga Jesoshi poñaachari Joreeyaki, areetapaa Karireeyaki. Ari ryaatashitanakiri, ikantapaakiri:

—Rooteentsi ikame notyomi. Thame petsiyatakotakitenari.

<sup>48</sup> Ikantakiri riraga Jesoshi atziripaeni:  
—Eerrika notajonkantayitzini, ¿arima paapatziyeyakinani? Aritaki pikanteeyarini eeroka, pitheenkaeyanani.

<sup>49</sup> Rapiitziri ikantapaakiri:

—¡Nowinkatharite! ¡Intsipaete, pipoke nopankoki! ¡Ikamikari notyomi!

<sup>50</sup> Ikantawakiri:

—Pipiye iroñaka. Eero ikami pitomi, aritaki retsiyatatakotee. Ikemijantaperotanakiri piyanaa.

<sup>51</sup> Niyanki awotsi itonkiyotawakari ronampiripaeni, ikantapaakiri:  
—Etsiyatakotee pitomi.

<sup>52</sup> Roojatzti rojampitantaapakari, ikantapaakiri:

—¿Tsika ikaatakika oorya retsiyatatakantakari?

Ikantakiri:

—Chapinki, itziroryaanaki oorya, aritaki awijanaki ijaawamerikitzi.

<sup>53</sup> Ikenkithashiryaanakiro aritaki ikaataki oorya ikanantakariri Jesoshi: "Eero ikami pitomi". Rootaki rameenantanakariri Jesoshi. Eejatzi ikimi-iyakanri riraga isheninka maawaeni, rameentakari riori.

<sup>54</sup> Iroñaka apite itajonkantaki riraga Jesoshi janta Karireeyaki ipoñaanakanta Joreeyaki.

## 5

### *Retsiyatakotziri mantsiyatzinkari janta inkaareki*

<sup>1</sup> Iroñaka monkaatapaaka paashini kiteziri nokimoshiryaantanaari maawaeni joriyyopaeni. Tema ipiyotakiri oshekyaantzi atziri janta Jerojareeki, ipinkathatantyaariri Tajorentsi. Eejatzi itonkaanaki riraga Jesoshi janta tonka, tonka.

<sup>2</sup> Eenitatsi oshirikota riwetsikaetziro mapi inkinagaakitakiro maawaeni pankotsi janta rowakinta Jerojareekinta. Eejatzi eenitatsi ashitakontsipaeni. Apaani owaero ipaanteki ewereeyo, rashitako owisha. Ari inthomaenta oshirikota okaakini rashitako owisha eenitatsi inkaareki itachari Wetheshita. Eejatzi eenitatsi janta kaapa apawakooni.

<sup>3</sup> Rootaki janta romaryaanteeyarini mantsiyari osheki. Ipiyoteeyanira mantsiyaperotatsiripaeni: riraga kaari kokichaatatsi, kijopookitsiri, matharitonki, maawaeni. Royeeeyironi iñaa omaemañaatyaa.

<sup>4</sup> Aririka omaemañaatyaa iñaa nokantapiintzi naakapaeni joriyyo: "Ipokapaaiki inkaareki ronampiri Tajorentsi, imaemañaataakaakawo iñaa, chomok,

chomok. Roojatzi ninkarika ityaawoni itsitsiyaatantyaawo ari retsiyatako-tee".

Ari oshekini mantsiyatzinkari janta royeeyeroni omaemañaaty a iñaa.

<sup>5</sup> Eenitatsi jaga shirampari okaatzi 38 rowawijaakiri rojarentsite imantsiyataki.

<sup>6</sup> Ari ikatziyatziyawaetashita riraga Jesoshi janta iñaapaakiri irira mantsiyatzinkari romaryaaka. Riyotakotapaakiri aritaki okaataki rojarentsite osheki imaryaka jaka. Ikantziri:

—¿Pikoyí petsiyatakotee?

<sup>7</sup> Ikantawakiri:

—Jee. Omaanta tektsi tsitsiyakayenani aririka omaemañaaty a iñaa. Naaka tee nomatziro notsitsiye apaniroeni: tema rootaki ranaakotantanari paashini, itakawori itsitsiyaki rirori.

<sup>8</sup> Ikantapaakiri:

—Pipiriintee, paaneero pishitashi, piyaate pipankoki.

<sup>9</sup> Roojatzi etsiyatakotanaki. Ipiriintanaa raaneero ishitashi ipankoki.

Rootaki kitejittatsiri nomakoryaantapiintari naakapaeni maawaeni jori-iyoo.

<sup>10</sup> Rootaki ikanteeyantakaririni riraga jewatatsiripaeni joriyyopaeni okaatzi iñaakiri rirori:

—Rootaki iroñaka kitejittatsiri amakoryaantapiintari. Tee oshineta aa-neero iroñaka ashitashi. ¿litaka paantanakawori pashi?

<sup>11</sup> Ikantawakiri:

—Riraga etsiyatakotakanari rirotaki kantanari: "Paaneero pishitashi, piyaatee pipankoki".

<sup>12</sup> Roojatzi ikanantanakari:

—¿Ninka kantakimirika iroka?

<sup>13</sup> Tee riyozi rirori ninkarika etsiyatakotziriri. Eenitatsi jaga osheki atziri, ipeymotanakari riraga Jesoshi.

<sup>14</sup> Inja irira Jesoshi raminaminatakiri riraga etsiyatakotziriri, eejatzi iñaakir janta Tajorentsipankoki. Ikantziri:

—Ñaakiro. Eeroka etsiyatakoteemi. Eero pantapiintziro eejatzi kaari kameethatatsi. Apiitaneemikari pimantsiyate, pikamaekari.

—Jee. Aritaki.

<sup>15</sup> Roojatzi riyaatantanaka shirampari. Ikantapaakiri riraga jewatatsiri-paeni joriyyopaeni:

—Rirotaki etsiyatakotakaakinari Jesoshi.

<sup>16</sup> Rootaki ikijantanakariri irirapaeni jewatatsiripaeni joriyyo riraga Jesoshi. Ikowantakari rowamagaeterimi rirori tema retsiyatatakotakari kitejittatsiriki nomakoryaantapiintari maawaeni naaka joriyyopaeni. Ari ikantziri piyotawentari:

—¿litaka pikanantari kitejittatsiriki amakoryaantapiintari?

<sup>17</sup> Rootaki ikantawakiriri:

—Roojatzi ikantani Pawa rantziro kameethatatsiri. Eejatzi nokimitari naaka. ¿litaka nopakaantyaaworikya nantziro kameethatatsiri kitejittatsiriki amakoryaantapiintari?

<sup>18</sup> Eekiro riyaatatzi ikowaperotziroña rowamaeroño riraga Jesoshi. Tee apatziro iñaakiri ranantashitawo kitejittatsiriki nomakoryaantapiintari; inta eejatzi ikemakiri riraga Jesoshi ikantzi: "Pawa nashi rirotaki Tajorentsi". Roojatzi ikanantanaka riroripaeni jewatatsiri joriyyopaeni:

—litajorentsitashitaka, tee ikameethatzi.

<sup>19</sup> Ikantawakiri riraga Jesoshi:

—Kyaaryootaki iroka nokantemiri. Tee nantashitawo naaka apaniroeni inta nomonkaatakiro oetarika noñaakotziriri rantziri Pawa.

<sup>20</sup> Irira inintaperotanawaaka Itomi riyotaakinawo maawaeni nantziri. Iinja imatakayena nanaakotero nantakinirika shiramparika, tema notajonkaperotantyaariri oetarikapaeni, rootaki potsikanaperotantanakinari osheki.

<sup>21</sup> Rooma ipiriinteeri Pawa kaminkari rowañaakiri. Eejatzi nokimityaari naaka, nowañaanakiri ninkarika nokowakaari.

<sup>22</sup> Eero ikantakowentziri Pawa atziri ikameethatzirika, eero: inta rootaki rotyaanantakinari naaka nokantakowenantyaariri.

<sup>23</sup> Ikowakiri Pawa maawaeni atziri iñaakoweenkateri rirori. Eejatzi ikowakaakina iñaaperotena naari maawaeni atziri nokameethaperotzi. Riraga kaari iñaaperotanaa naaka nokameethatzika, tee iñaaperotziri Pawa rirori ikameethatzi. Tema rirotaki Pawa otyaantakinari.

<sup>24</sup> Kyaaryootaki iroka nokantemiri. Maawaeni kemirori nokantziri, aririka raapatziyakyaari otyaantanari, aritaki ikantyaani ijekantakyaari janta jenokinta notsipatyaaari naaka. Eero ikantakowentziri Pawa. Ikamawitaka, omaanta ari rapüteeyaa rañaagae.

<sup>25</sup> Kyaaryootaki iroka nokantemiri. Iroñaaka riraga kaari aapatziyari ikemaeyawaeroni noñaani: tema naaka Itomi Tajorentsi. Ikanteetatyeeanyaani rañaagaenyi maawaeni aapatziyawori noñaani. Aritakikya iroñaaka omonkaatakyaa raapatziyeyantenerari.

<sup>26</sup> Irira Pawa ashii royo roño eejatzi rowañaakiri atziri. Naaka nomonkaatakarri. Ikowakaakinari naaka ashii noyo roño eejatzi nowañaakiri atziri.

<sup>27</sup> Tema nopoñaaka jenokinta natziritapaaki jaka kipatsikika. Ro rotyaanantanari nokantakowenteri maawaeni atziri ikameethatzirika.

<sup>28</sup> Eero potsikanatana. Iinja ikemaeyenani maawaeni riraga kaminkari okaatzi nokantziri.

<sup>29</sup> Aritaki ipiriintanakiri antzirori kameethatatsiri, raneeyanakini ijeki jenokinta ijekira Tajorentsi. Eejatzi riraga eekiro riyaatayee antzirori kaari kameethatatsi ipiriintawitanakyaapa omaanta ikantakowenantyaariripa riraga Tajorentsi maawaeni: rotyaanteri paamariki kaari tsiwakanitatsini.

<sup>30</sup> Tekatsi nokantya nantashityaawo. Nokantakowenantyaaririka atziri ikameethatakirika nomonkaatakiro ikantanari Pawa. Kyaaryoopero nokantakowenantariri. Tee nantashitawo oetarika nokoyiri naari inta nanteniri Pawa otyaantakinari ikowakaakinari irira.

<sup>31</sup> Eejatzi ikantziri Jesoshi:

—Aririka naaka kantakotachanimi apaniroeni, pikantemi: “Tee kyaaryoopero ikantzi”.

<sup>32</sup> Omaanta eenitatsi paashini kantakotanari, riraga Pawa. Niyotzi kyaaryootaki ikantakotanari irira.

<sup>33</sup> Omaanta eerokapaeni, potyaantayitakirini riraga Jowa, pojampi-takaantakiri. Eejatzi irira ari ikantakoperotakiro kyaaryooperoatsiri, ikantakimi: “Rirotaki Jesoshi Owawijaakotantsiri, rirotaki Itomi Tajorentsi”.

<sup>34</sup> Tekatsi okantya ikamantakotena atziri: “Ikameethatzji Jesoshi”, omaanta nokowaki eeroka pawijakote, rootaki nakanantzimirori iroka.

<sup>35</sup> Riraga Jowa roshiyawitari ootamentotsi amorekaperotatsiri. Piñaawakiri okoñeetyaapaaki rashii: rooma osheki riytakaakimi. Pikimoshirewentawitawakari eechonkiini.

<sup>36</sup> Eenitatsi eejatzi paashini riyotakaakimiri, rowaga anaakotziriri Jowa, piyoperotantenari. Iroñaaka nothotyaaneeniri Pawa otyaantakinari

maawaeni okaatzi ikantakinari. Oetarika nantayitzirini naari, iyotakaakimiri rotyaantakinaria Pawa.

<sup>37</sup> Ejatzzi ikamantakotakina naaka Pawa riraga otyaantakinari. Omaanta tee pikemijantaneentziri oetarika ikantziri, eejatzzi tee piñaaneentziri tsika ikantari.

<sup>38</sup> Ejatzzi tee paapatziyana naaka Rotyaantanewo, rootaki kaari paap-atziyantawo ikantziri riori.

<sup>39</sup> Piñaanapiintawitakawo Iwaperite Tajorentsi, rootaki pikenkithashiryaan-tari pawijakotantari, pikantatyeyeaani pañaanaki. Omaanta rootaki roori kantakotanari naaka.

<sup>40</sup> Omaanta tee pikoyi tameentena naaka nowañaantemiri.

<sup>41</sup> Omawitakya pikantashita piñaaperotana, tee tameentana.

<sup>42</sup> Niyotzimi naaka, tee pinintaperotziri Tajorentsi pajankanekira.

<sup>43</sup> Rotyaantana Pawa, rootaki nopolantakari. Omaanta tee piñaaperotana erokapaeni. Aririka ipokashitemi paashini atziri kaari rotyaantanewo Pawa, iñaaperota apaniroeni, rirotakiky piñaaperotawakirikya.

<sup>44</sup> Ejatzzi eeroika ñaaperotawakaachari. Aritaki pikantari. Omaanta tee pikoyi iñaaperotemi rapintzite Tajorentsi pikameethatantyaari. ¿Tsika pikantyaaka paapatziyaperotantyaariri eeroaka? Eero pimatziro.

<sup>45</sup> Eero pikenkithashiryaashita naaka thawetakotemini Pawaki: "Eeniro, Pawa, irikapaeni rantziro kaari kameethatatsi". Eenitatsi paashini thawetakotemini: rirotaki riraga Moeseeshini, ikanteri irira Pawa: "Tee raap-atziyawo irokapaeni rowaga pojankinatakakinari". ¿Piitakaa ari rowawi-jakoteemi? Eerowa.

<sup>46</sup> Arimi paapatziyaperotyaarimi riraga Moeseeshini, ari paapatziyaperotakinami naari. Tema rojankinatakotzitakina riori paerani.

<sup>47</sup> Niyotakimi tee paapatziyawo rojankinarini Moeseeshi. ¿Arima paap-atziyakaawo nokantzimiri naari? Eerowa.

Rootaki ikantziriri Jesoshi riraga jewatatsiripaeni joriiyopaeni.

## 6

### *Roshekyakiro paa ejatzzi mereto rosheekyakiri*

<sup>1</sup> Paashini kitejiri riraga Jesoshi imontyaakaanakinawo inkaare naaka-paeni maawaeni ryotaanewo. Noetziro inkaare Kariireeya naakapaeni joriyo. Omaanta iitziro Teweeryashi riraga paashinijatzitsiri atziri.

<sup>2</sup> Imontyaakaanakinawo inkaare, royaatakiri oshekyaantzi atziri. Iñaakotantakariri maawaeni itajonkantzi. Itajonkawentakiri mantislyatzinkari.

<sup>3</sup> Itonkaakaanakina tonkaariki. Ijeekakaapaakina janta.

<sup>4</sup> Rooteentsi omonkaatya Kitejitalsiri rawijantari ronampiri Tajorentsi. Rootaki nokimoshiryaantanakyaari naakapaeni joriyo.

<sup>5</sup> Ijeekakaapaakina riraga Jesoshi, raminanaki. Iñaawakiri oshekini atziri pokashitakiriri. Ikantziri Jiripi:

—¿Tsika amananteeka rowayityaarini atziripaeni?

<sup>6</sup> Ro ikantashitantariri, ikowaki iñaantyaari riraga Jiripi. Omaanta ryotaki oetarika ranteri.

<sup>7</sup> Ari ikantawakiri:

—Taanitya. Aririka amanantawityaawo oshekini, aririka ikaate 200 tenaaryo, tekira omomkaata owanawontsi royaari atziripaeni. Itasheni. Aaka tekatsi osheki koriki. Eero amatziro amanantziro osheki owana-wontsi.

<sup>8</sup> Ari eenitatsi janta paashini riyotaanewo, riraga Antereeshi. Rirotaki rirentzi Peetero. Ikantziri rirori:

<sup>9</sup> Iyotaanari, eenitatsi jaka apaani ewankari ipaani apawakooni. Eenitatsi eejatzi mereto apite. Omaanta notheenkakiri: eero riyomaatari, eenitatsi oshekini atziri.\*

<sup>10</sup> Eenitatsi jaga oshekini katawomashi, roojatzi ikanantawakari riraga Jesoshi:

—Aritaki poejeekaeysterini maawaeni atziri katawomashikira. Ikaataki 5.000 shirampari jeekaeyeentsirini. Eejatzi tsinanipaeni eejatzi eentsipaeni ijekaeyini: maawaeni.

<sup>11</sup> Roojatzi raantakawo rirori paa eejatzi raantakari mereto. Roojatzi raminanaki jenokinta ikantziri Ashitariri:

—Ariwiee, Pawa, eenitatsi nowanawo.

Ari ikagaakiro paa eejatzi ikagaakiri mereto, ipakiri riyotaanewopaeni, eekiro rowawijeniri maawaeni atziri ijekira. Rowaeyani atziripaeni maawaeni ikoyiri.

<sup>12</sup> Ikemaeyantapaakarini maawaeni ikantana riraga Jesoshi naakapaeni riyotaanewo:

—Pagaatero maawaeni tzimagaantapaentsiri, tee nokoyi eewanatyawo.

<sup>13</sup> Ikemaeyakawoni iroka paa apawakooni. Nagaatziro tzimagaantapaentsiri. Notetakiro kantzirkipaeni: niyeekitakiro okaatzi 12.

<sup>14</sup> Ineeyakirini itajonkakiro paa, roojatzi ikanteeyantanakarini:

—Rioperotaki irika kamanantzirorini iñaani Tajorentsi akemakotziri, amagaeyarini paerani.

<sup>15</sup> Riyotawakiri Jesoshi ipokashiiyerinimi owaeyeencharini raanakirimi iiterimi jewawenantatsini. Roojatzi ipeyapithatantanakari. Riyaatanaki riraga Jesoshi tonkaariki apaniroeni.

### *Riraga Jesoshi ranashaatawo inkaare*

<sup>16-17</sup> Itziroriimatanaki oorya noerinkaeyanakan naaka maawaeni riyotaanewo inkaareki, noyeri riraga Jesoshi janta. Tsitenitapaaki, omaanta tekira ipoki. Roojatzi notetantanaka pitotsiki nomontyaantyaawori intatsikeronta janta Kaperinawooki.

<sup>18</sup> Opokapaaki antawo tampyaa mooo, mooo, omaemañaata inkaare, rootaki amantapaakawori antawo otamakaari.

<sup>19</sup> Aritaki nokomakomatakiro niyanki. Inteena kipatsi, aamaashitya ari okaatzi 5 kiroometero aririkapa 6 nareetantakyaari. Eekiro nokomaeyawitakani. Roojatzi noñaantawakari riraga Jesoshi ranashaatawo inkaare; rokaakintapaakina. Tee itsitsiyi: kimiwitapaaka rootaki ranashitanta-paakari kipatsi. Nothaawaperotanaki maawaeni.

<sup>20</sup> Omaanta ikantapaakina irira:

—Naakataki, eero pithawantana.

<sup>21</sup> Roojatzi nokimoshiretantanaa naawakiri notetawakiri pitotsiki. Intsi-paete naatakoeyapaakani othapyaakiini janta niyaatenta.

### *Rirotaki Jesoshi oshiyawori owanawontsi añaakaakiriri aapatziyariri*

<sup>22</sup> Okitejitanaki riraga atziripaeni eeniro ijekanaki intatsikeronta inkaare raminaminawitanakari Jesoshi. Ikantawakaaka:

—¿Tsika ijekika riraga Jesoshi? Chapinki rotetaa pitotsiki riyotaanewopaeni riyaatanaki. Tee rotetaka riraga Jesoshi. Kaari paashini pitotsi. ¿Tsikarika ijekaki rirori?

\* <sup>6:9</sup> Joriyyojatzi rowaka paa maawaeni kitejiri okimitaaganki aari owawo kaniri.

<sup>23</sup> Iroñaaka rareetawitapaaka oshekini teweeryashijatzi, ikinakotapaaki ipitoki. Raatakoeyapaakan okaakini nowawaeteeyakaninta paa chapinki. Ikowawitapaakari ikantzi:

—¿Tsikama Jesoshi? ¿Tsikama riyotaanewo?

<sup>24</sup> Tee iñeeyapaerini; eejatzi naakapaeni, tee iñeeyapaanani. Roojatzi rote-tantanaa atziri ipitokipaeni riyaatakotanaki Kaperinawooki, ikowanteeaya-paakaririni riraga Jesoshi.

<sup>25</sup> Aritaki iñeeyapaakirini. Ikantapaakiri:

—Iyotaanari, naminamineeyakimini. ¿Tsika pikantaka pareetantapaari jaka?

<sup>26</sup> Ikantawakiri:

—¿Litarikya pikowantanari? Kyaaryootaki iroka nokantemiri: tee ro pikowantanapipinkathatena, inta pikowantanana nowakayemi kimitaka nantakiri chapinki.

<sup>27</sup> Iroka oyaarika ari othonkanakya. Eero patsipewentashitawo, inta naaka patsipewentaperotya; naaka materoni nowañaaperotemiri rootaki pañaaperotantapaakyarini janta jenokinta pikantyaani. Nopoñaaka jenokinta, rotyaatankina Pawa jaka kipatsikika, natziritapaaki rootaki nowañaeyantakimirini.

<sup>28</sup> Rojampitakiri:

—¿Tsikama nokantyaaka nanantyaawori ikowakaakinari Tajorentsi?

<sup>29</sup> Ikantawakiri:

—Paapatziyeeyenani naaka Rotyaantanewo: rootaki ikowakaemiri Pawa.

<sup>30</sup> Roojatzi rojampiteeyantanaarini, ikantaneeri:

—¿Oetaka poñaayenari naapatziyantemiri? Aririka noñaakimi pitajonkante, aritaki niyotaki kyaaryoopero pikantakinari.

<sup>31</sup> Paeraniperoroña riraga achariniitenipaeni rowaeyakawoni manaa janta tekatsinta atziri ipanko. Okantzi Iwaperite Tajorentsi: “Ipaetakiri rowanawo rowaeyantaworini. Opoñaaka jenokinta”. Tema riro Moeseeshini paeyakiriri, rootaki riyoteeyantakyarini achariniitenipaeni paerani okameethatzi royaateri maawaeni.

<sup>32</sup> Ikantawakiri riraga Jesoshi:

—Kyaaryootaki nokantemiri. Tee riro Moeseeshini piriri rowaeyarini poñeenchari jenokinta, inta riraga Pawa pawitakariri. Iroñaaka ikowawita ipemi paashini powaeyaari kameethaperotatsiri, poñaachari jenokinta.

<sup>33</sup> Rowaga paa poñaachari Tajorentsi jenokinta rootaki owañiiriri maawaeni atziri.

<sup>34</sup> Rootaki ikantakiri Jesoshi. Rirotaki kantakotacha apaniroeni. Omaanta tee ikemaperotziri atziri. Ikantziri:

—Aritaki pikanta, Nowinkatharite, pikantyaani pipapiintenawo rowaga noyari pikantakotakinari.

<sup>35</sup> Ikantawakiri riori:

—Naaka Rotyaantanewo Tajorentsi. Naaka oshiyawori paa owañaantatsiri. Naaka owañaakiriri atziri. Aririka poyaatanakina eero ayimi pitashe eejatzi paapatziyanarika eero pimiritanee.

<sup>36</sup> Aritaki nokanteyawitakimini. Piñeyawitakinani notajonkantzi omaanta tekira paapatziyana.

<sup>37</sup> Ikantanari riraga Pawa: “Pikempoyeeyinarini maawaeni ameentakini”. Riyoteeyakirini ipokashiteeyanakinani raapatziyanteeyanakinarin. Riraga pokashitapaenani, eero noepiyawakiri.

<sup>38</sup> Tee ro nayiitantapaari nanantyaawori nokowashitari naari, inta nantero ikowakaakinari otyaantakinari. Rootaki nayiitantapaakari.

<sup>39</sup> Irintapaeni nokempoyaakiniri irira Pawa, eero nopeyakotzi apaani. Nopiriinteyirini irirapaeni iwatha omonkaatantapaeya kitejiri othonkanta-paeaari kipatsi. Rootaki ikowakaanari riraga Pawa otyaantakinari.

<sup>40</sup> Maawaeni atziri ñeenani aririka raapatziyena, ari ikanteetatyeeyaani ijeekimotakiri Tajorentsi jenokinta. Nopiriinteyerini iinja, othonkanta-paeaari kipatsi. Rootaki ikowakaakinari Pawa otyaantakinari.

<sup>41</sup> Roojazzi ikiñaanikowenantanakari riraga jewatatsiripaeni joriyyopaeni. Tema ikemakiri ikantaki: "Naaka oshiyawori owanawontsi, poñaachari jenokinta", rootaki ikiñaanikowenantanakariri.

#### <sup>42</sup> Ikanteyini:

—Ayotziri rirori. Tema rirotaki Jesoshi, itomi Josee. Ayotziri iriri, rirotaki Joseeni. Eejatzi ayotziro rirori. ¿litaka ikanantari: "Nopoñaaka jenokinta"? Ikantashitaka.

#### <sup>43</sup> Riyotzi riraga Jesoshi oetarika ikantawakaakari. Ikantziri:

—Eero pikñaanikowentana.

<sup>44</sup> Eromi ikoyimi Pawa otyaantakinari, tekatsi pokashitenanimi raapatziyantenarimi. Omaanta riraga aapatziyaranari rirotaki nopiriintaneeri iinja omonkaatapaakyaaarika kitejiri nokantakowenantyaariri maawaeni atziri.

<sup>45</sup> Rojankinatakotzitakari paeraniperoroña kamanantayitzirorini iñaani Tajorentsi: "Tajorentsi riyotagaeyakirini maawaeni". Maawaeni aapatziyakawori ikantziri rirori, riyotawakirorika, aritaki rameentakina nowawiaakotantyaariri.

<sup>46</sup> Nopoñaaka jenokinta, rootaki noñaantariri Pawa. Tekatsi paashini ñeerini.

<sup>47</sup> Kyaaryootaki iroka nokantemiri, riraga aapatziyaranari ikantyaani ijeeki iroñaaka eejatzi iinja jenokinta janta Tajorentski.

#### <sup>48</sup> Iroka ikanteyirini eejatzi:

—Naaka oshiyawori owanawontsi owañaakiriri atziri. Kyaaryo naaka owañeerini rirori.

<sup>49</sup> Rañaawitanaka picchariniitenipaeni paeraniperoroña rowaeyawitakawon manaa janta tekatsinta atziri ipankó. Omaanta ari ikamaki janta.

<sup>50</sup> Omaanta naaka tee nokimitawo iroka. Tee nomatziri noshinetziri aapatziyakinari riyaate paamariki kaari tsiwakanitatsini.

<sup>51</sup> Naaka oshiyawori owanawontsi owañaakiriri atziri, nopoñaaka jenokinta. Ninkarika oyaawoni iroka owanawontsi ikanteetatyeeyaani rañaagaeeyenei jenokinta. Noperi maawaeni jeekatsiri kipatsikika rañeeyantyaarini: tema rootaki nowatha.

<sup>52</sup> Roojazzi ikantawakaeyantanakarini riraga jewatatsiripaeni joriyyopaeni. Ikanteyini:

—Tee nokemaperotziri. ¿Tsika ikantyaaka ipanteerori Jesoshi iwatha aari owantyaawori?

#### <sup>53</sup> Ikantawakiri rirori:

—Kyaaryootaki iroka nokantemiri, rooma nopoñaaka jenokinta, natzirita-paaki jaka. Eerorka powowo nowatha, eejatzi eerorka piro nira eero pañi. Jee, noshiyakaawentemi nowatha eejatzi nira. Kyaaryo nokantzimi eejatzi, eerorka paapatziyawo nokamawenteri atziri iñaaperotantariri riraga Tajorentsi, eero pikantani pijeeki jenokinta.

<sup>54</sup> Maawaeni oyaawoni nowatha, eejatzi ireroni nira, ikanteetatyeeyaani rañeey omoanta eerorka pikenithashryaakotana nokamawentakimi eejatzi eerorka pikowakaana nowawijaakotemi eero nopiriintzimi iinja omonkaatapaakyaaarika kitejiri nokantakotantyaariri maawaeni atziri.

#### <sup>55</sup> Nowatha rootaki owanawontsiper. Nira rootaki imiritaperoetziri.

<sup>56</sup> Ninkarika oyaawoni nowatha eejatzi miriteroni niraan roojatzi ikantya, kijokiro rowana. Eejatzi nokimitya naaka, kijokiro noyeri.

<sup>57</sup> Añaatsiri rirotaki Pawa otyaantakinari: rirotaki owañaaakinari naari. Eejatzi ikimiteeyaaani rirori oyaawoni nowatha, nowañeeeyerini maawaeni.

<sup>58</sup> Rootaki iroka owanawontsi ayitapaentsiri jenokinta. Tee okimitawo rowaga rowaeyarini achariniuteni paeraniperoroña. Irira ikamaki okaankityeenta. Intakyा nowañaaiki maawaeni aapatzianari. Riraga oyaawoni owanawontsika nokantakimiri ikanteetatyeyaaani rañagaeyeni rirori jenokinta.

<sup>59</sup> Aritaki riyotagaeyakiririni Jesoshi piyotapiintaantsiki rashī joriyyopaeni, janta Kaperinawooki. Tema osheki roshiyakaawentakaero iwatha eejatzi riraa.

### *Ikantakotakiro tsika ikantyaani ijekantyaari atziri*

<sup>60</sup> Oshekini kemaeyawitawakaworini riyotagaeyawitakaririni, roojatzi ikantanantaka:

—Opomeentsitzimotakae antero iroka ikantakaerika aaka, eero amatziro aapatziyawo.

<sup>61</sup> Riyotashitaka riraga Jesoshi ikijimawaetakiri riraga iyotagaeyawitakaririni. Ikantanakiri:

—¿Terika okameethatzimotzimi iroka nokantakimirkia?

<sup>62</sup> Paerani nopoñaka naari jenokinta, natziritapaaki jaka kipatsikika. Iinja piñeeyawakinani nopyanee jenokinta. ¿Roojatzi iitaka pikenkithashireeyantarini?

Ikantziro iroka ikenkithashiryakotziri ikame, ipiriintanee, eejatzi ipiye Iririki.

<sup>63</sup> Ishire Tajorentsi rootaki owañagaeyeririni maawaeni jeekaeyatsirini jenokinta. Eero ijekaeyini maawaeni atziri. Iroka nokamantakimiri oshiyawitawo Ishire Tajorentsi: aririka paapatziyaawo, ari owañaaikimi jenokinta.

<sup>64</sup> Niyotakoeyimini: eenitatsi pikaateeyinika kaari aapatziyana.

Paerani riyotzitari riraga Jesoshi ninka kaari aapatziyaarini. Eejatzi riyotzitakari akaanterini iinja.

<sup>65</sup> Eekiro riyaatatzti ikantanakiri:

—Niyotaki tee paapatziyeyananai maawaeni, rootaki nokanantakimiri inkaaganki: “Eeromi ikowakaerimi Pawa, tekatsi materoni pokashitenanimi naaka”.

<sup>66</sup> Rootaki rookantanakariri osheki riraga aapatziyaaririmi. Aripaete tee royaateeyaneerini.

<sup>67</sup> Roojatzi riraga Jesoshi ikantteeyanakinani 12 riyotaanewo:

—¿Arima pookaeyanakinani eeroka eejatzi?

<sup>68</sup> Rakanakiri Peetero:

—Nowinkatharite, eerrika noyaatzimi eeroka, ¿ninkakya noyaatanakirika? Ikantyaani rañeeyanakinai jenokinta maawaeni aapatziyeyakaworini pikantakirika.

<sup>69</sup> Naapatziyeyimini, niyoteeyanakimini; eeroka Rotyaantanewo Tajorentsi, pikameethaperotaki.

<sup>70</sup> Ikantanakiri:

—Rooma eeroka niyoyagaeyakimini. Pikaatzzi jaka 12, omaanta apaani pikaatzika, rirotaki oyaatziriri iwinkatharite kamaari.

<sup>71</sup> Ikenkithatakotakiri Joorashi karyootejetzzi, itomi riraga Shimo. Eeniro itsipatawitana maawaeni. Omaanta rirotaki akaanterini riraga Jesoshi iinja.

## 7

*Iroka ikantayitziririni karireeyajatz i ejatz jerojareejatz i*

**1** Roojatz ikinakinatakanakina riraga Jesoshi Karireeyaki. Ikowawita riraga jewatatsiripaeni joriyyopaeni rowamaerimi, rootaki kaari ikowantari riori riyaate Joreeyaki.

**2** Rooteentsi napiitero nokimoshireeyantyaarini naaka joriyyopaeni. Rooteentsi maawaenai atziri riyaate Jerojareeki riwetsikaeyeroni pankoshintsi ijekantyaari 7 kiteziri, ikenkithashireeyantyaaworini ikineeyanakini ichariniitenipaeni paerani janta tekatsinta atziri ipanko.

**3** Rirentzipaeni riraga Jesoshi ikantziri:

—Pyaate iroñaaka Joreeyaki. Poñaagapaeri piyotaanewopaeni janta oetarika pantziri. Tema pitajonkawenteeri osheki atziri.

**4** Pikowakirika ryoteeyemini maawaenai atziripaeni pikinakinayitanakini iñeeyantemirini. Eero pimaniro oetarika pantayiterini. Aririka pitajonkantayiteni, poñaayaari maawaenai atziri.

**5** Tee raapatziyari rirentzipaeni riori,

**6** rootaki ikanantakariri riori:

—Tekiraata omonkaatyta kiteziri niyaatatakanantyaariri osheki atziri janta Jerojareeki. Omaanta eerokapaeni piyaate oetarika kiteziri pikoyiri.

**7** Tekatsu ikantya maawaenai atziri ikijemi eeroka, pikimiiyarini. Inta naaka roonakina osheki. Nokananteeyakaririni: “Tee okameethatz iroka pantayitzirini”, rootaki ikijantanakinari.

**8** Pitonkagaeyanakiniita eeroka Jerojareeki. Tekiraata niyaatziita, tekira omonkaatyta kiteziri notonkaakaantyaariri osheki atziri.

**9** Aritaki ikantawakiri. Ari ijekanaki Karireeyaki.

**10** Omaanta rirentzipaeni rirotaki jateentsiri Joreeyaki, itonkaanaki tonka, tonka. Ikimoshiretapaaki. Rimpaeitanaki riraga Jesoshi itonkaakaanakina. Omaanta tee roñaagantapaeroña: tee ikoyi iñaayitawakirini oshekini atziri.

**11** Janta Jerojareeki ikanta riraga jewatatsiripaeni joriyyopaeni raminam-inawitakari riraga Jesoshi. Ikowantawitakari rayerimi. Ikanteeyini:

—¿Tsika riraganki Jesoshi?

**12** Piyoteenchari janta ikamantawakaaka riori. Apaanipaeni ikantzi:

—Rirotaki kameethari.

Apaanipaeni paashini ikantzi:

—Tee ikameethatz i, irira osheki ramatawitziri atziri.

**13** Omaanta ithawantakari atziripaeni riraga jewatatsiripaeni joriyyopaeni, rootaki imanakotantakawori ikantakotziriri riori.

*Riyotaantaki Jesoshi janta Tajorentsipankoki*

**14** Tee roñaagantapaaroña riraga Jesoshi, imaaki 3. Okitejitanaki itonkaanaki irira Tajorentsipankoki. Riyotaantapaaki.

**15** Rotsikanatakari riraga jewatatsiripaeni joriyyopaeni riori. Ikantawakaaka:

—Tee ayotaatziiri aaka. ¿Litaka riyotantayitaworini oetarikapaeni?

**16** Ikantawakiri:

—Tee naaka yotashitawori iroka niyotaakimirika, inta riyotakaanawo riraga otyaantakinari.

**17** Pikowaperoterika panteniri ikowakaakimirri riraga Tajorentsi, aritaki piyotanakiro. Piyanakaki rotyaantanarika riori. Piyanakaki noñaawaetashitatarika.

<sup>18</sup> Ikowantari ikimoshiryaashitakaakari atziri riraga ñaawaetashitachari, ikantakotziro okaatzira ikoyiri. Aririka itheeyashita, ikowanakiri riraga atziri ikantakoteri: "Kameetharini irika ñaawaetashitachari". Omaanta eenitatsirika kantakaanatatsiri ikowanakiri otyaantziriri ikantakoteri: "Kameetharini otyaantakiriri". Tema riyotaantaki kyaaryooperotatsiri, tee itheeyashita.

<sup>19</sup> Rooma rootaki ikantzimiri Moeseeshini paeraniperoroña: "Iroka pantayiterini. Rootaki ikowanakiri Tajorentsi". Omaanta tekatsi jaka mataperoteroni iroka ikantakimiri. ¿litarikya pajaryaantanari naaka powamaena?

<sup>20</sup> Ikantawakiri maawaeni piyoteenchari:

—Ikyaantashitakimi kamaari. ¿Ninka ajareemini rowamaemi?

<sup>21</sup> Aritaki ikemiri riraga Jesoshi omaanta tee ikantawakiri. Inta ikantziri riraga jewatatsiripaeni jorliyopaeni:

—Eerokapaeni pikoyi powamaena. Apaani notajonkantaki saawaroki, rootaki pikowantari powamaena.

<sup>22</sup> Omaanta ikantakimiri riraga Moeseeshini Iwaperiteki Tajorentsi: "Pitonateri pitomi aririka ikaatakotapaaki 8 kitejiri". Omaantakya kaari Moeseeshini kantaperotatsini, intakya riraga icharinii teni paerani. Rootaki iroñaaka pitotonatantariri pitomi pitothowapiinta eejatzi saawaroki rowaga kitejittatsiri amakoryaantari.

<sup>23</sup> Pitotonatantapiintawo kitejittatsiri amakoryaantapiintari, pimonkaatantawori rojankinatziri Moeseeshini Iwaperiteki Tajorentsi. Rootaki kitejittatsiri amakoryaantapiintari netsiyatakotantariri riraga shirampari. Omaanta eekiro piyaatatzsi pikijashitatyaana. ¿litarikya?

<sup>24</sup> Aririka paminapooteri pisheninka, eero pikantashita: "Kameetharini irinta. Riraga paashini pikante tee ikameethatzi". Pityaari piyoperoteri, roojatzikya piyotanaki oetarika pikenkithatakoteriri. Eejatzi okimitya pikenkithashiryaaperotero nokantzimiri piyoperotantenari.

### *Ipoñaka Rotyaantanewo Tajorentsi jenoki*

<sup>25</sup> Roojatzi ikanantawakaaka jerojareejatzi apaanipaeni:

—¿Karima irika ikowaetziri rowamagaeteri?

<sup>26</sup> Paminerri iroñaaka, riyotaantayitzini jaka tee imaniro. Tekatsi kanterini: "Pimaerite". ¿Raamaatyarima maawaeni jewatatsiri riyoperotaki irika Rotyaantanewo Tajorentsi?

<sup>27</sup> Omaanta ayotakotakiri aka tsikarika ipoñaka irika Jesoshi. Irira karireeyajatzi. Ipokaperotapaerika riraga Rotyaantanewo Tajorentsi, tekatsi yotakoterini tsikarika ipoña rirori. ¿Paamaakama irinta rirotaki Rotyaantanewo Tajorentsi?

<sup>28</sup> Eekiro ryaatatzsi riyotaantzi riraga Jesoshi Tajorentsipankoki, ikantzi:

—¿Pikenkithashireeya piyotenami? ¿Piyotzima tsikarika nopoñaakari? Tee piyoperotzi. Tee nopolashita, eenitatsi otyaantakinari: rioperotatsiri. Kaari piyotziri eeroka,

<sup>29</sup> inta naaka niyotziri naari. Riraga otyaantakinari rirotaki nopoñiimotanakari jenökinta.

<sup>30</sup> Roojatzi ikowantaperotawitakari rayerimi. Omaanta tekatsi ayerini. Tekiraata omonkaatya raanteetyaariri.

### *Rooteentsi riyaatee Jesoshi*

<sup>31</sup> Osheki piyotantyaarirai raapatziyakari. Ikantayitzini:

—¿Aririka ipokapaaki riraga Rotyaantanewo Tajorentsi, ranaakotapaerri riraganki itajonkantapae? Eerowee.

<sup>32</sup> Riraga warijeeyopaeni ikemaeyawakirini atziri ikenkithatakotakiri riraga Jesoshi. Ari maawaeni ikiyanakiri. Rootaki irirapaeni eejatzi jewatatsiripaeni ñaanakowenantatsiri rotyaanantakariri waariryapaeni raantyaaririmi.

<sup>33</sup> Rootaki ikanantanakariri riraga Jesoshi atziri:

—Iroñaaka notsipatanakimi. Rooteentsi nopyianee otyaantakinarikinta.

<sup>34</sup> Pikowakowawitakitenarika omaanta eero piñaana. Tsikarika nojeeki eero pimatziro piyaate eerori.

<sup>35-36</sup> Ikantawakaaka riraga jewatatsiripaeni joriiyopaeni:

—¿litaka ikanantari? ¿Tsikama ryaateka irika shirampari eero añairi? ¿Tsikama ryaateka kaari amatantyaawo aate aaka? Arima ryaate riraga atziri jeekayitatsirini paashinikipaeni kipatsiki. ¿Arima riyotaapaeri atziri janta?

### ***Ikashiyakari rotyaaneniri roori Ishire Tajorentsi***

<sup>37</sup> Rowaga riweyaantanakawo kitejiri niweshiryaaawenteeeyantyaaririni Tajorentsi rootaki kameethaperotatsiri kitejiri. Ishitowantapaakari oorya maawaeni naaka nopyotantakari janta Tajorentsipankoki, nopinkathatariri riraga Tajorentsi, eejatzi nokimoshireperotaki. Tema ikatziyashita riraga Jesoshi janta. Romapokashitanakawo itacheronkawaantetanaki, ikantanak:

—¡Maawaeni ninkarika miritatsiri ishireki ipokashitenata imiritapaeta!

<sup>38</sup> Ari otzimantakyaari rajankaneki aapatziyaranari iñaa owañaantatsiri os-hitowantapaakyaari. Rootaki okantakotziri Iwaperite Tajorentsi iroka iñaa nokantakimirika imiritapaeta.

<sup>39</sup> Ro roshiyakaawentakiri iñaatatsiri rowaga Ishire Tajorentsi, rootaki iinja kithatakayaarini maawaeni aapatziyariri Jesoshi. Omaanta teki-raata ijenokanaa riraga Jesoshi rootaki tekira opokashitantari roori Ishire Tajorentsi aapatziyariri.

<sup>40</sup> Eenitatsi oshekini piyoteeyeencharini jaga ikemawakiri ikantakiriri rirori, roojatzi ikanantanaka apanipaeni:

—Riroperotaki irika kamanantzirorini iñani Tajorentsi aamaantakariri maawaeni.

<sup>41</sup> Paashini kantayitatsirini:

—Rirotaki Rotyaantanewo Tajorentsi.

Paashini kantatsirisi:

—¿Arima ipoñeyani riraga Rotyaantanewo Tajorentsi Karireeyaki? Tee-wee.

<sup>42</sup> Rooma okantzi Iwaperite Tajorentsi: “Rotyaantanewo Tajorentsi riro-taki icharineeteni Iravíirini. Ipoñaakya Weriki, janta ijekawitani irira-paerani”.

<sup>43</sup> Roojatzi ipiyapiyawaaantakotakariri maawaeni riraga Jesoshi.

<sup>44</sup> Eenitatsi apanipaeni kowawiteenchari ragaerimi, omaanta tee imatziro.

<sup>45</sup> Ipiyeeyakanaki maawaeni waariryapaeni. Rareeteeyapaakarini riraga jewatatsiripaeni ñaanakowenantatsiri eejatzi warijeeyopaeni. Ikantawakiri:

—¿litakajaga kaari pamantanari jaka? Nokantawitzimi inkaaganki: “Pamakinari”.

<sup>46</sup> Rakapaakiri:

—Kameetha iñawaetzti irinta shiramparinta. Kameetha riyotaantzi, tekitsi paashini kimityaarini. Tee ikantziro oetarika kaari kameethatatsi.

<sup>47</sup> Ikantawakiri:

—Ramatawitashitakimi eerokapaeni eejatzi.

<sup>48</sup> ¿Naapatziyakari naakapaeni jewatatsiri? Kaari naapatziyari. ¿Raapatziyakaririka warijeeyopaeni? Kaari.

<sup>49</sup> Omaanta irintapaeni atzirinta tee riyojeempiyaawo Iwaperite Tajorentsi. Tee okameethatziri iñaaperotziri riraganki. Rowashironkaeri Tajorentsi maawaeni irinta iinja.

<sup>50</sup> Eenitatisi jaga Nikoreemo, pokashitakiriri riraga Jesoshi chapinki tsiteniriki. Itsipatfawakaeya iwarijeeyotzinkarite, ikantanakiri:

<sup>51</sup> “¿Pikantakotashitarí: ‘Tee ikameethatziri Jesoshi?’” Eeromi okantakae rojankinarini Moeseeshi okameethatziri ityaawo akemijanteri ikantakiri, ee-jatzi okameethatziri ityaawo ayotero kameetha oetarika rantakiri.

<sup>52</sup> Ikantawakiri:

—Tema eeroka eejatzi pikimiwitari kaireeyajatzi riraga kaari iyotziriri. Paminaminayiteroni Iwaperite Tajorentsi piyotantyaari tee ipoña Karireeyaki riraga Rotaantanewo Tajorentsi.

<sup>53</sup> Roojatzi ryaatanee maawaeni ipankokipaeni.

## 8

### *Tsinani shirontariri shirampari kaari oemi*

<sup>1</sup> Omaanta irira Jesoshi ryaatakanakina tonkaariki, iitachari Oriiwomashi. Ari nomaaki janta.

<sup>2</sup> Okitejitzimataki ipiyakaapaakina Tajorentsipankoki. Oshekyaantzi atziri ryaatashitanakiri. Ijeekapaaki riraga Jesoshi, ryotaantapaariri.

<sup>3</sup> Ramaeyapaakinirini apaani tsinani iñeetakiro oshirontakari shirampari kaari oemi. Riraga amirori rirotaki iyotaantziroripaeni Iwaperite Tajorentsi, eejatzi warijeeyopaeni. Rojatekakiro niyanki.

<sup>4</sup> Ikantapaakiri:

—Iyotaantatsiri, iñeetakiro tsinanika oshirontakari shirampari kaari oemi.

<sup>5</sup> Paerani rojankinatzini Moeseeshi okameethatziri rompojanteetyaawo mapi tsinani oshirontakari kaari oemi. ¿Tsika pikantzika eerori?

<sup>6</sup> Iñaantawitari, ikowaeyawitani ikompitakayaarimi, rootaki ikananteyawitaririni. Omaanta apatziro roeyotanaka Jesoshi, rojankinatantanakawo rakoempeki kipatsiki.

<sup>7</sup> Rapiitawitanakari riroripaeni:

—¿litaka pikantziri?

Ikatziyanaka irira. Ikantawakiri:

—Eenitatsirika pikaatzika iroñaaka kaari antziro kaari kameethatatsi, rityaawo rompojero mapiki, ari roojatzi pompojero maawaeni.

<sup>8</sup> Rapiitziro roeyotanaka, eejatzi rojankinatanee kipatsiki.

<sup>9</sup> Omaanta ikemantawori iroka, maawaeni thawetakotzirori ryaatanee. Ritanaawo riraga aatayiteencharini, rimpaaetanaki riraga maawaeni ewankaripaeni ryaatanee. Roojatzi ijeekanaki riraga Jesoshi, eejatzi roori tsinani, roojatzi okatzya jaga. Ejatzi nojeekanaki naakapaeni ryotanewo eejatzi paashini atziri.

<sup>10</sup> Ikatziyanaa riraga Jesoshi. Tekatsi iñaaki thawetakotzirori, inta eenitatsi tsinani. Ikantziro:

—¿Tsika iroñaaka riraganki thawetakotakimiriranki? ¿Tekatsima thawetakotemironi pantziri?

<sup>11</sup> Okantanakiri roori:

—Tee noñaawaeri, nowinkatharite, jateeyaneeni. Roojatzi ikanantawakawo:

—Eejatzi naari, eero nokantakowentzimiro pantakiri. Piyaatanee iroñaaka, eero papiitziro panteero kaari kameethatatsi.

### *Tajorentsi rirotaki kantakotziriri Jesoshi*

**12** Impaetzti rapiitantawori iñaanataneeri Jesoshi atziri ikantanakiri:

—Naaka oshiyaworiranki ootamentotsiranki koñeetyaakayeroni maawaeni kipatsipaeni. Tema niyoperotakotziri riraga Pawa Tajorentsi eejatzi niyoperotakotzimiro tsika ikanta. Eejatzi nokantakotzimiro oetaka kyaaryooperotatsiri. Ninkarika aapatziyakinari eero rantapiintziro kaari kameethatatsi, tema kimitakotaka ijekaki kitejiriki ikimitaaga riraga Tajorentsi.

**13** Roojatzi ikanantanakari warijeeyopaeni:

—Tema pikantakotashita eeroka apaniroeni. Nokemimi omaanta tee nomatziro naapatziyemi, eerorika tekatsi apite ikantana. Tema tee niyotzi kyaaryooperorika okaatzi pikantziri.

**14** Ikantawakiri:

—Jee, naaka kantakotacha. Omaanta kyaaryooperotaki nokantakiri. Ro okameethatantakari niyotzi naaka tsikarika nopoñaakari. Eejatzi niyotzi tsika nyaatee. Omaanta eeroka tee piyotzi tsikarika nopoñaanakari. Eejatzi tee piyotzi tsikarika nyaatee.

**15** Pikimitakari oshekini paashini atziri. Tee piyotana omaanta pikantakowentashitakina maawaeni. Pikenkithashiryaashita: “Irika shirampari ikimita maawaeni paashini shirampari”. Omaanta naaka tee nokantakowentzimi iroñaaka.

**16** Omaanta nokantakowentemimi pikameethatzirika iroñaaka, kyaaryootaki nokantakowentemimi. Niyatikimi; eejatzi kijokiro royenaa Pawa riraga otyaantakinari, riyotakimi eejatzi. Nokaataki apite niyoperoeyemini.

**17** Rooma okantzi Iwaperite Tajorentsi rowaga piñaanatapiintziri: “Apiterika ikaate kantakoterini atziri ari ayoperotanaki kyaaryooperotaki ikanteri”.

**18** Ari nokantakota naaka, eejatzi ikantakotana Pawa riraga otyaantakinari; apite nokanta.

**19** Ikantanakiri riraga warijeeyo:

—¿Tsika iroñaaka piri?

Ikantawakiri riraga Jesoshi:

—Tee piyotana. Tee piyotziri Pawa eejatzi. Aririka piyotakinami eeroka, piyotakirimi riraga Pawa eejatzi.

**20** Rootaki ikantakiriri maawaeni Jesoshi janta Tajorentsipankoki. Ijeekanaki okaakini janta ipapiintzirinta Tajorentsi koriki. Ikowawitaka riraga warijeeyopaeni ragaeterimi riraga Jesoshi omaanta tekira omonkaata ikamantyaari maawaeni ikowakaakiriri Ashitariri, rootaki kaari imatanteetari ragaeteri.

**21** Eekiro riyaatatzi riraga Jesoshi ikantanakaki:

—Rootzimateentsi nyaatee. Pikowakowawitanakinami maawaeni piñaanakinami omaanta eero piñaana. Eero pimatziro piyaate nyaateenta naari. Tema roojatzi pikantyaani pantapiintero kaari kameethatatsi roojatzi pikamantaka, rootaki piyaatantyaari paamariki kaari tsiwakanitatsini.

**22** Ikantawakaaka riraga jewatatsiripaeni joriiyopaeni:

—Pikenkithashireeya ishinetatyaa. Pikemakiriroña ikanantari: “Rooteentsi nyaatee, eero pimatziro piyaate nyaateenta naari”.

**23** Ikantanakiri riraga Jesoshi:

—Eeroka jeekatsiri kipatsikika omaanta naaka nopoñaaka jenokinta. Jaka kipatsikika rootaki pijejerkantari eerokapaeni. Tee nojeekaperotzi naaka kipatsikika.

<sup>24</sup> Rootaki nokanantakimiri inkaaganki: "Tema roojatzi pikantyaani pantapiintero kaari kameethatatsi roojatzi pikamantakya". Eerorika paapatziyawo nokantakimiri, aritaki piyaataki paamariki kaari tsiwakanitatsini.

<sup>25</sup> Rojampitakiri, ikantakiri:

—¿Ninkamika?

Ikantawakiri:

—Tema nokantaperowitakimi.

<sup>26</sup> Eenitatsi osheki nokantemirimi; eenitatsi eejatzi pantayitzirini nokantakowentemirimi. Omaanta riroperotaki otyaantakinari, eenitatsi ikantakinari irira: rootaki iroka nokamanteriri atziripaeni.

<sup>27</sup> Tee riyyotziri riraga jewatatsiripaeni joriyyopaeni rirotaki ikenkithatakotakiri Ashitariri, riraga Pawa Tajorentsi.

<sup>28</sup> Roojatzi ikantziri riraga Jesoshi:

—Aririka powatzikakotakina paata koroshiki, aritaki piyotanakina eerokapaeni. Piyotena nopoñaanaka jenokinta, natziritapaaki jaka kipatsikika. Eejatzi ari piyotanakina tekatsi nantawitya naari. Nokantziro iroka riyyotaakinari Pawa otyaantakinari,

<sup>29</sup> kijokiro rowanakinä rirori. Tema nantziniri naari oetarika ikowakaakinari irira, rootaki kaari rookantana.

<sup>30</sup> Eeniro ikanteeyakiririni iroka, ari osheki atziri raapatziyimawitakari.

<sup>31</sup> Roojatzi Jesoshi ikanantanakari riroripaeni:

—Aririka paapatziyaperotanakyaawo nokantzimiri, tema eeroka niyotaanewopaeni.

<sup>32</sup> Aritaki piyotakoperotanakina naaka riraga kyaaryooperotatsiri. Rootaki nookakaakowenantakimiri. Eero omperateeteemi paashini.

<sup>33</sup> Ikantawakiri riroripaeni:

—Naaka icharineetenipaeni Awaraamani. Tekatsi omperatenani paerani roojatzi iroñaaka. ¿litakajaga pikanantanari: "Pookakaakowenantakinari"?

<sup>34</sup> Rakakiri rirori:

—Kyaaryooperotaki iroka nokantemiri. Eenitatsi omperatariri maawaeni antzirori kaari kameethatatsi. Rowaga kaari kameethatatsi rantapiintziri, oshiyawitari omperatariri.

<sup>35</sup> Riraga omperarentsi eero ikantani ijekaperote ipankoki omperatariri. Omaantakya riraga itomi ashitawori ipanko ikantani ijekaperote irira.

<sup>36</sup> Naaka Itomi Tajorentsi. Aririka nookakaakowentakimi, eero rapiiteemi romperateemi.

<sup>37</sup> Niyoperotakimi maawaeni, eerokatawitaka icharineetenipaeni Awaraamani. Omaanta tee paapatziyawo nokantzimiri. Rootaki pajaryaantanari powamaena.

<sup>38</sup> Naaka nokamtzimiro okaatzi ikantakinari Pawa nashi eejatzi roñaagakinawo janta notsipatarinta. Omaanta eeroka ikantzimi pirintakari pashi rootaki pantapiintziri eerokapaeni okaatzi ikowakaakimiri.

<sup>39</sup> Ikantawakiri:

—Naakapaeni joriyyopero, naaka icharineetenipaeni Awaraamani.

Ikantziri riraga Jesoshi:

—Kaari. Eerokami maawaenimi icharineeteniperopaenimi Awaraamani aritaki pikimitanakyaarimi. Raapatziyanani paerani rirori, piccharineetenitakyaarinimi, pikimityaarimi eeroripaeni, paapatziyakinami.

**40** Naaka kantawitawori kyaaryootatsiri nokemiri Tajorents. Omaanta pajareeyanani powamaena. Tee pikimitani riraga Awaraamani, tee. Iki-moshiryantakari rirori raapatziyakawo oetaka ikantziri riraga Tajorents.

41 Omaanta pantapiintziro eeroka rantziri piriperotari.

Roojatzi ikanantanakari irirapaeni:

—¿Paashinika ashitanari? Apaani nirintari naakapaeni. Rirotaki Tajorents.

**42** Ikantakiri riraga Jesoshi maawaeni:

—Rirorikami pirintyaarimi Tajorents aritaki pinintaperotakinami naaka. Tee nopolashita; aritaki nopoñaakari riroriki, rirotaki otyaantakinari.

**43** ¿Litaka kaari piyotantawakawori nokantzimiri? Tema tee pikoyi paapatziyawo okaatzi nokantzimiri, rootaki kaari pimatantawo paapatziyawo.

**44** Rirotaki Jatanaashi pirintakari eerokapaeni. Rootaki pikowantakari pantapiintziniri ikowakayimiri. Owamaantatsirini paerani: irira rirotaki oñaagantzirori rowamaantzi. Tee ikenkithashireeyawo kyaaryootayitsirini, rootaki kaari ikameethatanta. Theeyachari irira, rootaki itheeyantaytaarini atziri.

**45** Omaanta naaka nokamantawitakimiro kyaaryooperotsatsiri, omaanta tee paapatziyana; tema poyaatatziri riraga Jatanaashi.

**46** ¿Eenitatsi jaka ñaakinari naari nantziro kaari kameethatatsi? Teewee. Rooma okameethatakirika nokantakimiri, ¿iitaka kaari paapatziyantana?

**47** Maawaeni itomintari Tajorents, rirotaki aapatziyawori ikantziri. Tee itomintzimi eerokapaeni. Rootaki kaari paapatziyantawo ikantziri rirori.

48 Roojatzi ikantawakiri riraga jewatatsiripaeni joriiyopaeni:

—Kyaaryootaki nokantakimiri. Eerokataki jamaaryajatzi, eejatzi ithawirentsitakaashitakimi kamaari.

**49** Ikantawakiri rirori:

—Tee nothawirentsitzi: nopinkathatziri Pawa. Omaanta eeroka tee pipinkathatana; pitheenkakina eeroka.

**50** Tee nokowashita iñaaperotena atziri; inta Pawa kowaentsiri iñaaperotena maawaeni atziri. Eejatzi rirotaki kantakowenterini maawaeni theenkanari ikameethatzirika.

**51** Kyaaryootaki iroka nokantemiri: raapatziyaperotawakyaaworka nokantziriri, eero ikamaperotzi.

52 Roojatzi ikanantanakari riraga jewatatsiripaeni joriiyopaeni:

—Iroñaakaroña niyoperotakimi pithawirentsitaki. Kamaki Awaraamani. Eejatzi kamanantayitzirorini iñaani Tajorents, kamaki riroripaeni. Omaanta pikantzi eerori: "Eero ikami aapatziyaworini nokantziri".

**53** Kamaki achariniiteni paerani Awaraamani. Kamaki riroripaeni kamanantayitzirorini iñaani Tajorents. ¿Piitashiwitama panaakotziri riraga Awaraamani? ¿Piitashiwitama panaakotziri maawaeni paejatziiteni peewap-erotaki eeroka?

**54** Ikantawakiri Jesoshi:

—Aririka nokantashityaami neewawanenantsi, rooma natsipetyaawomi. Pawa, riraga pikantziri eerori: "Notajorents", rirotaki jewatakaakinari.

**55** Tee piyotziri eeroka rirori, omaanta niyotziri naaka. Aririka nokantakimi: "Tee niyotziri", aritaki nokimitemimi eerori, notheeyakyaaami naaka. Rooma niyotziri riraga Pawa. Nomonkaateniri okaatzi ikantanari.

**56** Achariniiteni paerani riraga Awaraamani, riyotakotakina rootaki ikimoshiryantakari. Riyotzi injia nopoake jika kipatsiki, natziritapaaki. Iñaakina roojatzi ikimoshireperotantanaka eejatzi.

**57** Ikantziri riraga jewatatsiripaeni joriiyopaeni:

—Tekiraata pantyashiparitzimaneenteeta. ¿Piñirima Awaraamani? Tee-wee.

<sup>58</sup> Ikantawakiri rirori:

—Kyaaryootaki iroka nokantemiri. Tekirani ikoñaatzini riraga Awaraamani, eenirona nojeeki naari. Jee, noñaanakiri.

<sup>59</sup> Roojatzi ramantawitanakawori mapi riraga jewatatsiripaeni, rompojerimi riraga Jesoshi. Omaanta romanapithatanakari irira Tajorentsi-pankoki, raminaminawitapaakari janta. Tee iñiiri. Tema shitowanaki rirori.

## 9

### *Retsiyatakotakiri Jesoshi kamampowaakitatsiri*

<sup>1</sup> Inja ikinakaanakina janta riraga Jesoshi. Noñaapaakiri shirampari kamampowaakitatsiri. Aritaki ikantapaaka owakira ikoñaatapaaki.

<sup>2</sup> Nokaatziri riyotaanepaeni nojampiteeyirini, nokanteeeyirini:

—Iyotaanari, ¿iitaka ikoñaatantakari kamampowaakitatsiri? ¿Rooma rantay-itzironi kaari kameethatatsi ashitariri ikamampowaakitantakari itomi? ¿Aririka irika antakirori kaari kameethatatsi ikamampowaakitantakari?

<sup>3</sup> Ikantawakiri:

—Tekatsi rantzi, ikamampowaikitashitaka. Eejatzi ashitariri, tekatsi rantzi. Ro ikamampowaakitantakari irika itajonkakowenantakyaariri riraga Tajorentsi. Ikowakaakiri maawaeni atziri riyanotaki kyaaryo itajorentsitaki.

<sup>4</sup> Iroñaakaroña okameethatzi antero oetarika ikowakiri Tajorentsi. Rotyaanantanari nokimitantari irira, notajonkakowenantakyaariri irika. Kaari nojamanitzi. Aririka ojamanitaki aka aririka itziroryaanaki oorya eero amatziro antero oetarika.

<sup>5</sup> Eenirona nojeekika jaka kipatsikika, naaka iyotakotakaakiriri Tajorentsi maawaeni atziri.

<sup>6</sup> Ikanantakariri iroka, reewatantanakawori kipatsi, ijampowathatakiro, roojatzi itziryaakitantakari rokikira kamampowaakitatsiri.

<sup>7</sup> Ikantakiri Jesoshi irira:

—Piyaate janta Shiroeki, pikiwaakitakitya.

Rootaki Shiroe\* inkaare. Roojatzi riyaatantanaka, ikiwaakitapaaka. Ipiya, aminanee.

<sup>8</sup> Eenitatsi jaga inampiweri, eejatzi riraga ñaapiintziriri inethaantapiintzki koriki. Ikanteeyanakiní:

—¿Kaarima irika riraganki jeekapiintatsiri nethaantapiintatsiri koriki?

<sup>9</sup> Apaanipaeni kantayitatsirini:

—Rirotaki.

Paashini kantayitatsini:

—Kaari irira. Roshiyashitari.

Ikantawakiri rirori:

—Naakataki.

<sup>10</sup> Rojampitakiri:

—¿Tsika ikanteetakimika pikokichaatantaari?

<sup>11</sup> Ikantawakiri rirori:

—Riraga shiramparinta iitachari Jesoshi reewatakiro kipatsi, ijampowathatakiro, itziryaakitantakinawo nokikira. Ikantakina: “Piyaate Shiroeki, pikiwaakitakitya”. Niyaatanaki, nokiwapaaka, roojatzi nokokichaatanaa.

<sup>12</sup> Roojatzi ikanantanakari:

\* <sup>9:7</sup> Akantziro aari apaanteki Shiroe: Rotyaantziri.

—¿Tsikaroña irira?

Ikantawakiri:

Tsikarika, taanitya.

**13-14** Rootaki kitejiri nomakoryaantapiintari naakapaen ioriyo itziryaaki-tantariri riraga Jesoshi kamampowaakitawitachari ikokichaatakaantaariri. Roojatzi raanteetanakanariri warijeeyopaeni.

**15** Rojampitawakiri ikantawakiri:

—¿Oetaka raashitakimiri pikokichaatantaari?

Ikantziri:

—Itziryaakitantakinawo jampowatha nokiki, roojatzi niyaatantanakari nokiwaakitakita. Iroñaaaka kokichaataana.

**16** Roojatzi ikanantanaka warijeeyo apaanipaeni:

—Riraga shirampari rantawaetantawo kitejiri amakoryaantapiintari. Teetsikya ipoñaaaka Tajorentsi.

Paashini kantayitatsini:

—Rirorikami antziori kaari kameethatatsi, eero imatzromi itajonkan-tayitenimi. Tema ipiyapiyawaantetawakaanteeyakarini, anik, anik, anik.

**17** Rapiitanakiri ikantanakiri:

—¿litaka piitzirika eerori riraga kokichaatakaakimiri?

Ikantawakiri:

—Noetziri naaka rirotaki kamanantzirori iñaani Tajorentsi.

**18** Riraga jewatatsiripaeni joriyyopaeni tee raapatziyari: iitakaashitaw-itaka tee ikamampowaakitzi. Ikaemakaantakiri ashitariri eejatzi riniro

19 rojampitawakiri, ikantawakiri:

—¿Riotaki irika pitomi pikantziriranki: “Ikoñaatapaaki kamampowaakitat-siri”? ¿litaka iroñaaaka ikokichaatantaari?

**20** Rakapaakiri:

—Jee, rirotaki notyomi. Noñaaperotziri ashi royiro ikoñatakotapaakiro ika-mampowaakitapaaki.

**21** Omaanta tee noñiiri tsikarika ikantaari ikokichaatantaari, tee niyotzi naaka. Eejatzi tee niyotzi ninkarika kokichaatakaakiriri. Tee reentsitanee iroñaaaka. Pojampiteri irira.

Rootaki ikantziri ashitariri riraga warijeeyopaeni. Ari jatanee.

**22** Riraga ashitariri ithaawanteeeyakarini riraga jewatatsiripaeni joriyyopaeni, tema rirotaki aritaki ipiyowenteeeyakarini riraga Jesoshi. Ikan-teeyitakan: “Eenitatsirika kantatsini: ‘Riotaki Jesoshi Rotyaantanewo Tajorentsi’, eero ishinetziri irira atsipatyari akemijanteeyini”. Rootaki ithaawanteeyanakarini ashitariri,

**23** rootaki ikanantanakariri: “Tee reentsitanee iroñaaaka notyomi. Pojampi-teri irira”.

**24** Roojatzi rapiitakiri rirori ikaemakaantakiri riraga kamampowaaki-witachari. Ikantawakiri:

—Piñaaperoteri Tajorentsi. Irinta shirampari niyoteeyirini rirori antzirori kaari kameethatatsi.

**25** Ikantapaakiri riraga kamampowaakiwitachari:

—Rirorikama antziori kaari kameethatatsi, tee niyotzi naaka. Apatziro niyotakikya, nokamampowaakitawitani paerani, iroñaaaka kokichaataana.

**26** Rapiitakiri ikantawakiri:

—¿Tsika ikantapaakimika ikokichaatakaanteemiri?

**27** Rakapaakiri:

—Rootaki nokantawitakimiri inkaaganki omaanta tee paap-atziyawakawo. ¿litaka pikowantari papiitero pikemiro? ¿Pikowaeyanakinirika eero kaapiatziyari rirori?

**28** Roojatzti ikijathatantanakariri ikantanakiri:  
—Eerokatajaantaki eerori riyotaanewo. Omaanta naakapaeni riyotaanewopaeni Moeseeshini.

**29** Niyoteeyini ikenkithatakaakirini Tajorentsi riraga Moeseeshi paera-niperoroña. Rooma riroriranki shirampari tee niyoteeyirini tsikarika ipoñaakari irira.

**30** Ikantawakiri:  
—¡Kyaaritaamaka! Rootaki notsikanatantakimir. Tee piyotziri eerori tsikarika ipoñaakari, omaanta rirotaki kokichaatakaakinari.

**31** Ayotakoeyirini Tajorentsi, tee ikemijantziri antayitzirorini kaari kameethatatsi. Omaanta riraga pinkathaperoteriri Tajorentsi, antzirori ikowakaakiriri, rootaki ikemapiintantariri riraga Tajorentsi.

**32** Tee akemakotapiintziri kokichaatakayerini koñaatapaentsiri kamam-powaakitatsiri. Omaanta naaka nokoñaatapaaki nokamampowaakitapaaki, tema retsiyatatakotaana rirori.

**33** Eromi ipoñaami Tajorentsiki tekatsimi matenanimi etsiyatakoteenani.

**34** Ikantziri riroripaeni:  
—Paerani pikoñaatantapaakari tee pikameethatapaaki. ¿Arima pikowaki iroñaaka piyoteeyinani? ¡Lantzikoeni! ¡Intsipaete piyaate jaga!  
Rootaki rookantakariri Tajorentsipankoki.

**35** Ikemakotakiri riraga Jesoshi rookaeyakirini warijeeyopaeni riraga ka-mampowaakiwitachari. Roojatzzi raminakitziri, ikantapaakiri:

—¿Paapatziyarima Itomi Tajorentsi?

**36** Ari ikantawakiri:

—¿Tsika ijekakika, naapatziyakari?

**37** Ikantapaakiri:

—Naakataki. Piñaakinaroña, nokenkithatakaakimi iroñaaka.

**38** Ikantawakiri:

—Naapatziyawakimi, Nowinkatharite. Eeroka rioperori.

**39** Ikantapaakiri:

—Rootaki nopokantakari kipatsikika, nokantakotantyaariri maawaeni atziri tsika ikanteeyani. Tema noñaakimi eeroka, eerokawitaka kamam-powaakitatsiri omaanta iroñaaka nokokichaatakagaemi. Niyotaakotakimiri Tajorentsi. Tema paapatziyana rootaki iinja piñaantyaariri irira. Kimi-taka iroka nopokapaaki jaka niyotaakoteeriri Tajorentsi maawaeni atziri. Riraga aapatziyeyanarini aritaki riyotaakiri paashini atziri iñeeri iinja. Omaanta riraga kaari aapatziyeyanarini inta ikenkithashiryaaawita riy-oterimi Tajorentsi, tema tee riyotzimaetari eejatzi eero iñiiri iinja. Itashiw-itaka riyotziri iroñaaka. Omaanta roshiyashitakari kamampowaakitatsiri tee riyoperotziri irira.

**40** Riraga warijeeyopaeni itsipateeyakarini, ikemaeyawakironi ikantakiriri. Roojatzti ikanteeyantanakani apaanipaeni:

—Iroka poshiyakaawentakiri kamampowaakitatsiri, ¿teetsikya pikenkithashiryaaakowitzana naaka kamampowaakiwitachari?

**41** Rakapaakiri rirori:

—Pikamampowaakitzira, eero ojeeki kaari kameethatatsi pantziri; omaanta pikanteeyawitaní: “Namineeyini”, rootaki ojeekantari pantani.

## 10

*Riraga Jesoshi ikenkithatakotziri ashitariri rowishate*

<sup>1</sup> Eekiro riyaatatzi riyotaantzi riraga Jesoshi, ikantanakiri:

—Kyaaryootaki iroka nokantemiri. Rooma tsiteniniki romonkyaapiintziri ashitariri rowishate ishiirkoteki. Eenitatsi apaani omoo ejatzi ashitarako kameetha. Romonkyaantari ikempoyaantari tsiteniriki. Ninkarika pokatsini eerorika ikyapaaki omooki inta rateetashitapaakya raantyaariri owisha, irira rirotaki koshintzi. Ikoyi ikoshite.

<sup>2-3</sup> Enitatsirika atziri shentziniriri ashitarako, aririka ipokapaaki ashitariri, ari rashitaryaawakiniri ishineteri ikyaanaki. Aririka ikyashitapaakir, ikaemapaakiri rowishate iwaeropaeni, ari ipokashiteri maawaeni, eero ithaawantawakari ashitariri. Roojatzi raanakiri janta paashitomashiki,

<sup>4</sup> reewatanakiri. Ari riyowaantetziri iñaani, rootaki royaateeyantaririni.

<sup>5</sup> Aririka ikaemawityaari kaari iñaapiintzi rowishate, eero riyowaantetwakiri ipante. Eero royaatziri inta ishiyaapithatanakyaari maawaeni.

<sup>6</sup> Rootaki roshiyakaawentawitakanariri riraga Jesoshi omaanta tee riyotakoteeyironi oetarika roshiyakaawentziniriri.

<sup>7-9</sup> Ikantereyanakirini eejatzi:

—Kyaaryootaki iroka nokantemiri. Naaka oshiyawori ashitakontsi ikyapiintzira owisha. Tema kimitaka iroka, aririka pikowaperotaki piyoteeri Tajorentsi paapatziyakinarika naari. Maawaeni eeroja jewatatsiri joriyyopaeni jaka kaari aapatziyanari kimitakimi koshintzi. Kaari piyotaakoperotakiriri Tajorentsi atziri. Omaanta naaka iyoperotziriri riraga Pawa. Ninkarika aapatziyenani naaka nowañaakiri ikantyaani nojeekay-eri eejatzi nopaperoteri oetarika owañeerini.

<sup>10</sup> Ipokashitziri koshintzi ikoshite owisha, rowamaeri. Eerokapaeni jewatatsiri pikimiwitakari: rooma tee pikameethatzi. Tee piyotaakotantap-erotziri Tajorentsi atziri, rootaki aririka ikame irira, tee riyoperotanakiri Tajorentsi. Rootaki kaari iñaaperotantariri rirori ikameethatzi. Tema rootaki kaari nomatantawo nojeebakayeri naaka eejatzi Pawa. Omaanta naaka nopokaki nowañaantakariri kameetha.

<sup>11</sup> Naaka oshiyariri riraga shentziniriri rowishate kameethari. Tema naaka ashitariri kameethari aapatziyaperotanari rootaki nokowntakari nokamawenteri.

<sup>12</sup> Tee nokimitari shentziniriri owisha ipinatziri ashitariri. Irira kaari ashitariri owisha. Aririka iñaawakiri rirori ipokapaaki manitzi, ithaawantanakari ishiyaapithatanakari; rookanakiri owishapaeni. Rojojatzi raantapaakyaaarika riraga manitzi apaanipaeni owisha, rowamayitapaakirini. Maawaeni paashinipaeni owisha itsiparyaayitanakani.

<sup>13</sup> Aritaki ikantari rirori. Tee ikenkithashiryaaoperotziri owisha, inta ikenkithashiryaaashitakari koriki ipineeteriri, rootaki ishiyaapithantanakariri. Pikimitaka eerokapaeni jewatatsiripaeni pookanakiri irika kamampowaakiwitachari, tee pamitakotziri kameetha.

<sup>14-15</sup> Tema naaka oshiyariri riraga shentziniriri rowishate kameethari. Kyaaryo naaka ashitariri kameethari riraga aapatziyanari. Tema maawaeni iriyapaeni nokashiyeyirini nosheninka. Kimitaka niyotziri Pawa eejatzi riyotakina naaka, tema niyotziri riroripaeni, eejatzi naaka riyotzitana. Eejatzi nokamawenteri.

<sup>16</sup> Eenitatsi eejatzi paashinijatzitsiri atziri kaari joriyyotatsiri. Nokowntakari maawaeni irira eejatzi ikemantenari oetarika nokantziri, piyotaakotantariri Pawa Tajorentsi roojatzi raapatziyanteena. Aririka raapatziyenara nokashiyerei nosheninka. Tema nokashiyerei nosheninka maawaeni aapatziyanari, joriyyotatsiri eejatzi paashinijatzitsiri atziri.

<sup>17</sup> Eejatzi ikantzi Jesoshi:

—Nokowashitari naaka nokamawenteri atziripaeni, rootaki nokamawenantaariri iinja eejatzi nopiriintanee. Rootaki inintaperotantanari Pawa.

<sup>18</sup> Tektsi matashityawonimi rowamaenami, inta nokowaperotaki nokamawenteri maawaeni atziri rootaki nomatantyaawori. Nomatero nokamawenteri atziri, eejatzi nomatero nopiriinte: rootaki ikowakaakinari Pawa.

Ari riyaatakaanakina naakapaeni.

<sup>19</sup> Aritaki okantari ikantakiriri riraga Jesoshi. Roojatzi ipiyapiyawaanteenteeeyapaakaririni maawaeni jewatatsiripaeni joriiyopaeni.

<sup>20</sup> Eenitatsi osheki kantayitatsirini:

—Ikyaantashitakari kamaari. ¿litaka pikemijanantariri?

<sup>21</sup> Ikantzi paashinipaeni:

—Tee ikyaantari kamaari, tema kameetha riyotaantzi. Kaari irinta kamaari: tema ineshironkatakiri kamampowaakitatsiri, rootaki ikokichaatakaantariri.

### *Rapiitziro ikantzi Jesoshi: "Naaka monkaatakariri Tajorentsi"*

<sup>22</sup> Okanta okyaawontsitapaaki. Monkaatapaaka kitejiri no-kenkithashiryantaawori rowameethatanteetawori Tajorentsipanko paerani. Ipiyakaakina Jesoshi Jerojareeki.

<sup>23</sup> Ari ikatziyatziyawaeta rirori janta owtineenkayitani otzinkampipaeni pankotsi, noetziro pankotsi Rashi Sharamooni. Tema rootaki ikaapanomatantakawori rinkinagaakitero okaatzira.

<sup>24</sup> Ipiyowentapaakari osheki jewatatsiripaeni joriiyopaeni, rojatekapakiri Jesoshi. Ikantapaakiri:

—Paerani pimanapithatakinawo. Pikantaperotena iroñaaka: ¿eeroka Rotyaantanewo Tajorentsi poemishitowaeri oroomajatz?

<sup>25</sup> Ikantawakiri:

—Aritaki nokanteeyawitakimini; omaanta tee paapatziyawakina. Oetarika nantayitakirini, rivotaki Pawa otyaantakinari matakaakinawori. Iroka nantayitakirini, rootaki riyotakaemirini naaka Rotyaantanewo Tajorentsi.

<sup>26</sup> Aritaki nokantakimi: tee ro kaari pikowanteyani pikemijantena, inta kaari pimatantawo pikemijantana.

<sup>27</sup> Riraga aapatziyanari ikemiro nokantziri. Niyotziri maawaeni eejatzi irirapaeni royaatana.

<sup>28</sup> Aritaki naaka nowañaakiri maawaeni. Tema roojatzi ikantyaani no-jeekakaakiri naaka. Eero riyaatzi paamariki kaari tswakanitatsini. Nokempoyaaperotakiri, okimitzimotawitana noerikawakotakiri. Tektsi aapi-thatenarini.

<sup>29</sup> Riraga Pawa pakinariri ikantakina: “Pikempoyeenari irirapaeni”. Ranaakotakiri maawaeni itajonkantaperotzi, tektsi aapithaterini eejatzi Pawa rakoki.

<sup>30</sup> Nomonkaataperotakari Pawa, eejatzi naaka imonkaatakina.

<sup>31</sup> Roojatzi maawaeni riraga jewatatsiripaeni joriiyopaeni ramawitanaka mapi rompojantyaaririm.

<sup>32</sup> Omaanta ikantanakiri rirori:

—Rivotaki Pawa tajonkakaakinari. Osheki noñaagayitakimironi. ¿litakama nantakiri pikowantari pompojantenari mapiki?

<sup>33</sup> Ikantawakiri:

—Tee ro nompojantemiri mapiki pantzirowa kameethatatsiri. Eeroka shirampari, omaanta piitajorentsitashitaka, rootaki nompojantemiri mapiki.

**34 Ikantanakiri rirori:**

—Tema rojankinataktakiniri Tajorentsi atziri Iwaperiteki rirori, okantzi: "Nokanteeyemini eero ka maawaeni tajorentsitsatsiri".

**35 Riraga ojankinatzirorini Iwaperite Tajorentsi ikantziri: "Tajorentsitsatsiri".** Tekatsiakantereo inashitakayaawo Iwaperite Tajorentsi.

**36 Ikowakaakina Pawa, rootaki rotyaanantakinari jaka kipatsikika. Inkaaganki nokantakimi: "Naaka Itomi Tajorentsi".** ¿litaka iroñaaka pikanantri: "Piitajorentsitsashitaka"? Itajonkantaki Pawa.

**37 Eerorika nokimitari irira eero paapatziyana.**

**38 Omaanta nokimitaririka, paapatziyeeyanani.** Eerorika pikoyi paapatziyashitana naari, okameethatzi paapatziyakotenawo nantziri. Paapatziyawo, roojatzi piyotantyaari ikimitana Pawa. Eejatzi naari nokimitari irira. Piyoperotawakiro.

**39 Rapiitziri ikowaperoeyawitanakani rayerimi, omaanta ipeyi-motanakari Jesoshi.**

**40 Ari imontyaakaanakinawo naaka riraga Jesoshi Joriraaniki.** Riyaataakaanakina janta intatsikeronta tsikarika paerani Jowani ikaawoshitantzi. Aritaki ijekakaapaakina janta apite kashiri.

**41 Osheki pokashitanakiriri eejatzi. Ikanteeyawakaapaakani:**

—Tee itajonkantzi Jowani omaanta kyaaryootaki maawaeni ikantakotakiriri Jesoshika.

**42 Osheki aapatziayitawakaririni riraga Jesoshi janta.****11*****Ipiriintanakiri Jesoshi Raajawo***

**1 Ijeeki Wetaaniyaki shirampari iwaero Raajawo, imantsiyataki.** Ojeeki eejatzi ipankoki ritsiropani: rowaga Mariiya, eejatzi rowaga Maarita.

**2 Chapinki ojeetziri Mariiya Awinkatharite iitziki.** Ro ojeetantari kajankaari. Oshetantari oeshi eejatzi. Tema mantsiyataki iyaariri,

**3 rootaki otyaanantakariri kanterini Jesoshi.** Inteenanta riyaatashitakiri. Iñantaapaakariri ikantapaakiri:

—Nowinkatharite, riraga Raajawo pinintaperotziri, mantsiyataki. Thame aate.

**4 Ikemantawakariri Jesoshi ikantawakiri:**

—Imantsiyatawitawakyaata omaanta eero ikamaperotzi. Ro imantsiyatantakari, ikowaki Pawa Tajorentsi maawaeni atziri ipinkathatena naari eejatzi ipinkathatzityaari irira.

**5 Jesoshi inintaperotziro roori Maarita, irento, eejatzi iyaariri.**

**6 Ari ikemakotzitakari imantsiyataki, tee riyaatzita intsipaete, ijekanaki apite kitejiri.**

**7 Roojatzi ikanantanakina maawaeni:**

—Thame apiyeyanakini eejatzi Joreeyaki.

**8 Nokantanakiri naari:**

—Iyotaanari, chapinki janta ari rompojakimimi mapiki riraga joreeyajatzi. ¿Eekiroma pipiyashitanaatyerei janta? Eero aatzi: rowamaemikari.

**9-10 Riyotantari Jesoshi oetarika ikenkithashireeyari Pawa Tajorentsi eejatzi oetaka ikowakaanari naari, ikantana maawaeni:**

—Tema eeniro okaatzi 12 oorapaenii apaani kitejiri akatziyatziyawae-tantyaari eero antziwatanta. Eejatzi eenitatisi 12 oorapaenii tsiteniri akatziyatziyawae-tantyaaworika aritaki antziwatanya. Okimiwitakawo iroka, tekiraata omonkaata kitejiri rowamaena. Aritaki amatakiro akatziyatziyawae-tantyaari eero. Pawa ikowakaakae

ate aaka. Aririka aapatziyaperotaari riraga Tajorentsi, eero imatziro paashini atziri ipakaagagaero aapatziyakarira.

<sup>11</sup> Aritaki ikantakinari. Roojatzi ikanantanari:

—Imaashitaka<sup>\*</sup> Raajawo. Niyaate iroñaka nokaakapaeri rirori.

<sup>12</sup> Nokantanakiri:

—Maaperotakirika, Nowinkatharite, aritaki retsiyatakotanee.

<sup>13</sup> Omaanta ikenkithatakowitakari Raajawo, ikamaki. Naaka, noetakashitawitaka ro ikantanari: "Imaashita, imakoryaantari".

<sup>14</sup> Roojatzi ikantaperotantanakinari:

—Kamaperotakiroña Raajawoni.

<sup>15</sup> Kameethaperotaki tee noñiri naaka ikamimotena, pimatantyaawori paapatziyaperoeyanakinani, rootaki nokimoshiryaaantanakari. Thame amineeyakiterini maawaeni.

<sup>16</sup> Riraga Tomashi iieteziri Tsipantzi, ikanteeyananani:

—Thame aateeyanakini maawaeni, rowamagaete aaka.

<sup>17</sup> Roojatzi niyaatantanaka.

Nomagaeyakini niyanki awotsi. Okitejitanaki roojatzi nowaagantanaka. Tsiteni rootzimateentsi nareetya inampiki Raajawoni. Ikanteetawakina ikaatakotaki 4 kitejiri omonkyaaaganteetantakariri Raajawoni omooki impeetaki.

<sup>18</sup> Rowaga Wetaaniya okaakintawo Jerojaree, aamaashitya okaatzi 3 kilometero.

<sup>19</sup> Ipoñaka Jerojareeki osheki joreeyajatzi pokashitzirori Maarita eejatzi Mariiya. Eejatzi itsipatawo wetaaniyajatzi. Ikantapaakiro:

—Eero petakotashitari piyaaririni.

<sup>20</sup> Ari ritakawo apaani shirampari, kamanteroni Maarita:

—Kaakitakira Jesoshi.

Ookanakiro opanko, jatanaki otonkiyotawakari. Omaanta Mariiya, eeniro ojeekanaki pankotsiki.

<sup>21</sup> Okantawakiri rowaga Maarita:

—Aririkami pijeekimpi jaka, Nowinkatharite, eeromi ikamimi aarinini.

<sup>22</sup> Niyotaki iroñaka oetarika pikanteriri riraga Tajorentsi aritaki ipakimi okaatzi pikowakoteriri.

<sup>23</sup> Ikantapaakiro:

—Aritaki rapiiteero rañaagae piyaaririni.

<sup>24</sup> Okantawakiri:

—Jee, aririka omonkaatapaakya kitejiri ipiriinanteeyariri Tajorentsi maawaeni kamayitatsirini, aritaki ipiriintanee rirori aarinini. Niyotakiro iroka.

<sup>25-26</sup> Ikantapaakiro:

—Naaka anaakagaerini maawaeni kamawiteenchari, eejatzi nowañagaeri riraga piyaaririni eejatzi. Ikamawitakaryaika aapatziyanari ari rapiiteero rañaagae eejatzi. Eero noshinetziri apaani atziri aapatziyanari itsipatyari Jatanaashi janta paamariki kaari tsiwakanitatsini. ¿Paapatziyawoma iroka nokantakimirika?

<sup>27</sup> Okantawakiri:

—Jee, Nowinkatharite, niyatikimi eerokataki riraga Itomi Tajorentsi riraga Rotyaantanewo naamaakari.

<sup>28</sup> Ari, piyaate pikaelemiro parento.

Roojatzi opianaka, okantziro rowaga Mariiya. Okamantathatapaakiro:

\* <sup>11:11</sup> Ikantzirorika joriyopaei **imaashitaka** omatero okantakotziri apite inashita. 1. Irira imaaki 2. Ikamaperotakitzi.

—Areetapaaka Iyotagaeri, ikaemakaantapaakimi.

<sup>29</sup> Okantziro:

—Jee, ari.

Intsipaete okatzianaka, iyaatashitanakiri Jesoshi.

<sup>30</sup> Tekiraata rareetya rirori pankotsiki. Eeniro ijekki janta otonkiyotakitarina Maarita. Ari royiyo janta Mariiya.

<sup>31</sup> Ari iñaakiro roori iyaatzi maawaeni tsipataworipaeni pankotsiki ari roemoshirenkaatziiro, roojatzi royaatantanakawo maawaeni. Iitawitaka ari iyaate apiitero iraakotaari iyaaririni janta omookinta.

<sup>32</sup> Ari oñaapaakiri Jesoshi, iyaatashitziri otziwerowashitapaakari owethatar. Okantapaakiri:

—Poemoshirenkapaena, Nowinkatharite. Aririkami pijee kimi jaka, eero ikamimi aarinini.

<sup>33</sup> Iñaawakiro riraga Jesoshi irayimotapaakari, eejatzi riragaeyakan joriiyopaeni riraga tsipatayitaworini. Roojatzi ikantashiretanaki rirori, rowashiretanaka.

<sup>34</sup> Ikantanak:

—¿Tsika powakirika?

Okantawakiri:

—Janta, Nowinkatharite, nowakiri omooki. Thame paminakitero.

<sup>35</sup> Ari riraappaaka riraga Jesoshi.

<sup>36</sup> Rootaki ikanantanakari joreeyajatzi:

—Piñaakiri, osheki intashiretawitarini.

<sup>37</sup> Eenitatsi apaanipaeni kantaneentsiri:

—¿Kaarima irika kokichaatakagaeriri kamampowaakitatsiri? Eenirorikami jaka, ¿arima retsiyatakoteerimi eejatzi Raajawoni, eero ikamimi?

<sup>38</sup> Rapiitziro ikantashireperotanaki rirori. Rokaakiwitapaakawo omoo imoontashitanteetakariri kaminkari impeetaki. Rashitakotanteetakari mapi.

<sup>39</sup> Ikantapaaki riraga Jesoshi:

—Pipinoyaakoteri mapikika.

Okantawakiri rowaga Maarita:

—Eero, Nowinkatharite, ikaatakotaki imaakotaki 4 kitejiri ikamantakari. Shitzitanaki.

<sup>40</sup> Ikantanakiro:

—Eero pikantzi: “Eero”. Tema nokantakimi: “Paapatziyakinarika aritaki piñaakiro itajonkante Tajorentsi”.

<sup>41</sup> Roojatzi ipinoyaanteetakawo mapi. Raminanaki riraga Jesoshi jenoki, ikantanaki:

—Ariwee, Pawa, niyotaki pikemakina.

<sup>42</sup> Niyotaki pikanta pikemapiintana. Eenitatsi osheki katziyimotanari jaka. Nokowaki riyote maawaeni potyaantakina, rootaki nokenkithatakaantzimiri.

<sup>43</sup> Roojatzi ikaemaperotantanaka:

—Raajawo, pipiriintee, pipokae.

<sup>44</sup> Roojatzi riywantanaka kamawiteenchari. Chapinki roojatanteetawakariri tokoyatha: rakoki, iitziki, maawaeni. Ipashikapootanteetawakariri paaño. Iroñaaka ikantziri Jesoshi:

—Poojoryaakoteri, potyaanteri riyaatee.

<sup>45</sup> Riraga joreeyajatzi, rirotaki tsipateeyakaworini Mariiya, iñaakoeyakirini Jesoshi ipiriintakagaari Raajawo rowañaagaeri.

### *Rajaryagaeyakarini rowamaeri Jesoshi*

Tema oshekini riraga jewatatsiri raapatziyeeyanakarini Jesoshi.

<sup>46</sup> Paashinipaeni riraga jewatatsiri iñaakiri eejatzi ikijanaka. Roojatzi riyataashitakiri warijeeyopaeni, ikantakotapaakiri riraga Jesoshi, okaatzi rantakiri.

<sup>47</sup> Ari ikantakoeyakitzirini riraga warijeeyopaeni. Tema ikaemakaanteeyakirini riraga 70 jewawentziriri joriyyopaeni. Ikantawakaeyakan:

—¿Tsika akanterika? Riraganki shirampari osheki itajonkantapiintaki.

<sup>48</sup> Aririka ashinetanakiri eekiro ryaatza itajonkantzi, ari raapatzieeyanakyaarini maawaeni atziri, ipokashiteekari oroomajatz, ishekiriowakoteekari Tajorentsipankoki. Eejatzi ithonkaekari aaka, maawaeni.

<sup>49</sup> Itsipatari Kaejashi riroripaeni janta. Iroñaaka ojarentsi rirotaki irira iwinkatharite ñaanakowenantatsiripaeni. Ikantanaki rirori:

—Tekatsi piyote eerori.

<sup>50</sup> Tee pikenkithashiryaa. Pamineeyini: okameethatzimoeyemini-ita ikameeta apaani shirampari rowawijaakoeyanteerini aakapaeni, eero athonkanta maawaeni aakapaeni.

<sup>51</sup> Tee ikantashitari iroka. Rooma rirotaki iwinkatharite maawaeni ñaanakowenantatsiri. Riyotaakiri Tajorentsi, rootaki ikantakotzitantakariri ikamawenteeyerini riraga Jesoshi maawaeni joriyyopaeni.

<sup>52-53</sup> Tee apatziro ikamawenteeyirini joriyyopaeni, inta ikamawenteri maawaeni atziri reentsitetantyaariri Tajorentsi maawaeni aapatziyariri rirori. Inashiteeyawitani, ijekkaeyini maawaeni nampitsikipaeni inteenaki omaanta ikamawenteri ipyoeyantyaaririni maawaeni. Aripaete riraga jewatatsiripaeni joriyyopaeni rajaryagaeyakarini riraga Jesoshi, rowamaeri.

<sup>54</sup> Rootaki kaari iroñaaka ikinapiinantanakari irira janta roshekitinta joreeyajatzipaeni, tee roñaagapaari. Riyaatakanakina paashiniki kipatsi. Ari ijekkakaapaakina nampitsiki oetachari Ejerayeemi othapikinta janta tekatsinta atziri ipanko.

<sup>55</sup> Rootzimateentsi omonkaatyta Kitejitalsiri Rawijantariri Ronampiri Tajorentsi janta Ejiipitoki ikimoshireeyantyaarini maawaeni nojoriyyotzinkarite. Iroñaaka itonkaanaki maawaeni Jerojareeki rowameethantanakyaariri, ipinkathatantyaariri Tajorentsi. Riyaateeyanakini jeekatsiri tsikarikapaeni,

<sup>56</sup> tema raminaminawitapaakari Jesoshi. Ikyapaaki maawaeni Tajorentsipankoki ipinkathateri Tajorentsi, ikantawakaapaaka:

—¿Oetaka pikenkithashiryaa eeroka, arima ipokaki Jesoshi?

—Aamashity aririka.

<sup>57</sup> Tema aritaki ikantakaantakae aaka maawaeni atziri riraga warijeeyopaeni eejatzi jewatatsiripaeni ñaanakowenantatsiripaeni:

—Aririka piñaakiri Jesoshi, pipoke pikamantakitena intsiapate.

Tema ikowaeyanakini raakaanteri.

## 12

### *Janta Wetaaniyaki ojeetziri tsinani Jesoshi*

<sup>1</sup> Tekiraata 6 kitejiri omonkaatantyaari nokimoshirewenantyaawori Kitejitalsiri Rawijantariri Ronampiri Tajorentsi janta Ejiipitoki. Rareetakaaneena riraga Jesoshi Wetaaniyaki janta ijekinta riraga Raajawo kamawiteenchari: riraga rowañagaeri Jesoshi. Tema itsipateeyakawoni rit-siropaeeni, rowaga Maarita eejatzi rowaga Mariiya.

<sup>2</sup> Ari riwetsikaetakiro owanawontsi iñaaperotantyaariri Jesoshi. Tema eejatzi ikaateeyirini Raajawo, naaka riyotaanewopaeni eejatzi paashinipaeni atziri. Rakiyoteeyirini maawaeni. Maarita rowaga ritsiro riraga Raajawo rootaki kitantatsirini okitziri atziripaeni.

<sup>3</sup> Irente Mariya amapaakiniri Jesoshi kajankapithari yoshaachari naariwo, kameethaperotatsiri. Pinaperotachari. Otziripithatantanakari iitziki, roojatzi oshetantanakari oeshi. Kajankaenkatanaki maawaeni pankotsiki.

<sup>4</sup> Ari eenitatsi jaga Joorashi karyootejatzti rirowitaka riyotaanewo. Riyotaki riraga Jesoshi rirotaki aakaanterini iinja. Ikantawakiro:

<sup>5</sup> —¿litaka kaari pipimanantawo kajankapithari? Pinaperowitachari osheki koriki. Apayitanakiririnimi riraga ashironkaenkaripaeni. Omaanta peewanatashitakawo owinawo maawaeni.

<sup>6</sup> Ikantashita: tee ineshironkatziri ashironkaenkari. Ikempoyaawitanari noorikite maawaeni, omaanta rirotaki ayitanariri eechonkiini noorikite. Tema eejatzi ikowaki eechonkiini owinawo kajankapithari, rootaki iki-jakotantawori tee opiri owinawo.

<sup>7</sup> Ikantziri Jesoshi:

—Okantyaata. Iyotaki nokame, rootaki otziripithatantanari\* tekiraata nokame.

<sup>8</sup> Ikantyaani ikaatemikya maawaeni owashironkaenkari, ari pimatero pineshironkatapiinteeyerini. Omaanta naaka eero nokantani nokaatemi maawaeni kitejiri. Eero oshekitzi kitejiri pineshironkatantanakinari jika kipatsiki.

<sup>9</sup> Osheki joreeyajatzipaeni kemakoeyawakiririni riraga Jesoshi eenitatsi janta, rootaki ryaatashitantanakari maawaeni. Eejatzi ryaatashitanakiri maawaeni ikoyi iñaantyaariri Raajawo, riraga kamawiteenchari ipiriintapakiri rirori.

<sup>10</sup> Rajaryagaeyakarini maawaeni jewatayitatsirini Tajorentsipankoki: tema ikowanaki rowamaeri eejatzi Raajawo.

<sup>11</sup> Osheki joreeyajatzipaeni iñaakoeyakiririni riraga Jesoshi rowañaakiri Raajawo, rootaki ironaaka osheki jewatatsiri joriyyopaeni raapatziyeyantanakaririni riraga Jesoshi, eejatzi rotsipariitanakari paashinipaeni jewatatsiri riraga kowatsiri rowamaerimi.

### *Riraga jerojareejatzti iñaaperotziri Jesoshi*

<sup>12</sup> Okitejitanaki oshekini pokaentsiri ikimoshireeyini maawaeni. Ike-makoeyakirini riraga Jesoshi ari ipoki Jerojareeki.

<sup>13</sup> Ari ragaeyanakironi oshipaeni kompiroshi eejatzi paashinipaeni oshiyawori raanakiro janta awotsiki itonkiyoteeyawakarininta Jesoshi. Itacheronkawaanteteeyini:

—¡Sha! ¡lrika owawijaakotantsini! ¡Ikameethaperotzi! ¡Riotaki Rotyaantanevo Tajorentsi! ¡Riotaki irika reewawenteeyirini nojoriyyotzinkaritepaeni!

<sup>14</sup> Iñaapaakiri Jesoshi apaani wooro tekiraata ikyakotari atziri. Riotaki omapokaantapaakariri ikyakotapaakari rirori. Rootaki imonkaatantakawori jankinarentsi Iwaperiteki Tajorentsi. Okantziri:

<sup>15</sup> “Maawaeni jeekatsiri Jerojareeki, eero pithaayi, pokapaaki jewawen-temini ikyakotapaakari wooraani tekira ikyakoetari”.

\* <sup>12:7</sup> Rametari joriyyopaeni ijeetantyaari kajankaari kaminkari eejatzi itziripithatantyaari kajankapithari eejatzi ityaakitantlyaari panetatsiri tokoyamaashiki iponatantyaaririra kaminkari tekiraata ikitata. Roojatzi raantanakyaari ikitateri.

<sup>16</sup> Omaanta tee niyotzi naaka maawaeni Riyotaanewo imonkaatziro rojankinateetziro paerani Iwaperiteki Tajorentsi. Aritaki ikamawentee riraga Jesoshi, ipiriintaka eejatzi ryaataneejenokinta, ari okanta nokenkitashiryaaakotziro maawaeni noñaakiri atziri rantakiri rirori. Rootaki nakanantari: "Kyaaryo ari okanta. Imonkaatakiro rirori oetaka rojankinatetziri Iwaperiteki Tajorentsi".

<sup>17</sup> Ari chapinki ikaemiri Raajawo: "Pishitowae", ari shitowanee. Kamap-erotawiteenchari, omaanta rapiitziro rañee: nokaatzi osheki ñaakoeyiririni, roojatzi nokantakoeyakironi iroka noñeeyakirini.

<sup>18</sup> Ari ikemakotakiri riraga Jesoshi maawaeni atziri itajonkantzi rirori, rootaki ryaatashiteeyantakaririni itonkiyotawakari maawaeni.

<sup>19</sup> Roojatzi ikanantawakaantanaka warijeeyopaeni:

—Naakiro. Maawaeni atziri royaatziri rirori. ¡Tee okameethatz! ¿Oetakaty anteri? Tekira amatziri apakaeri rirori.

Riraga jewatatsiripaeni joriiyopaeni eekiro ryaatatz ioperatanaka royaateri rirori.

### *Paashinijatzitatsiri atziri ikoyi iñeeri riraga Jesoshi*

<sup>20</sup> Itonkaanaki Jerojareeki osheki atziri ikimoshiretantlyaari, eejatzi ipinkathatantyaariri Tajorentsi. Ikaatziri kireeshiyajatz iowakira peyacha joriyo.

<sup>21</sup> Ryaatashiteeyapaakirini irirapaeni riraga Jiripi, rirotaki wetheera-jatzi. Ojeeki Wetheera Karireeyaki. Ikantapaakiri:

—Yeeyi, nokoyi noñeeri Jesoshi.

<sup>22</sup> Jiripi ryaatashitanakiri ikantakiri Antereeshi. Roojatzi ryaatantanaka apite eejatzi riroripaeni ikanantyaariri riraga Jesoshi.

<sup>23</sup> Ikantawakiri irira:

—Eerokataki paashinijatzitatsiri atziri omaanta pikoyi piyotena naaka. Kameetharini. Okameethatawita maawaeni atziri maawaeni kipatsiki raapatziyenami naaka. Tema rooteentsi nokamawentemi eerokapaeni maawaeni atziri.

<sup>24</sup> Kyaaryootaki iroka nokantemiri. Aririka omanakitero teriiko mapipookiki, eerorika opariyapaaki kipatsiki, eero oshooki roojatzi okantya: apaani okithoki ojeekanak. Omaanta tziroyaapaentsiri kipatsiki, kimiwitaka kamaki okithoki oshookantari owaatha, roojatzi okithokitantanakya osheki.

<sup>25</sup> Eenitatsi atziripaeni kempoyaayiwitacharini, tee ikoyi rowashironkaya, omaanta ratsipetashitakawo ikempoyaaka, tema rootaki ryaatantyaari paamariki kaari tsiwakanitatsini. Omaanta kaari kempoyaacha inta rantakiniri Tajorentsi ikowakaakiriri omawitya ikemaatsiwenntyari kipatsikika, tema roojatzi ikantyaani rañaapae jantajenokinta nojeekekayeri kameetha.

<sup>26</sup> Maawaeni kowatsiri rantenawo nokowakaakiriri, okameethatz royaatenata; tema ikaatena tsikarika nojeeki naari. Eejatzi iñaakiri Pawa ikameethatz rirori.

<sup>27</sup> Iroñaaka nokenkitashiryaaanaka. ¿Oetaka nokanteriri Pawa? ¿Nokanteririka: "Pawa, rooteentsi rowashironkayena atziri, powawijaakotena"? Eero nokantziri. Tema ro noshintsitashitantakawori nopokantakari kipatsiki nokemaatsityaawo eejatzi nokamawenteri maawaeni atziri.

<sup>28</sup> Roojatzi ikenkitahataantakariri Ashitariri. Ikantziri:

—Pawa, nokowaki ipinkathateeyeminiita atziripaeni, iñaaperoeyeminiita pikameethatz.

Roojatzi nokemaeyantakaririni Pawa jantajenokinta, ikantzti:

—Tema poñaagakotakityaanari notajorenka eeroka, rootaki iñaaoperotantakinari atziripaeni nokameethatzi. Iinja papitero poñaagakaanteroni notajorenka eeroka, rootaki iñaaoperotantenari osheki atziri.

<sup>29</sup> Ari ikemaeyawitawakarini katziyeeyawiteencharini, inta tee riyoperotawakiro. Ikantagaantashitanaka:

—Oñaawaepookitatzি.

Paashini kantayiteentsini:

—Iñaanatatziri ronampiri Tajorentsi.

<sup>30</sup> Ikantziri riraga Jesoshi:

—Tee naaka opokashitzi ñaagantsi iyotaantenari: inta eeroka riyotakagayawitakimini Tajorentsi otyaantakinari.

<sup>31</sup> Iroñaakaroña ikantakowenteri maawaeni theenkantatsiri, ikantziri: “Eeniro pantziro kaari kameethatatsi, aritaki nowashironkaemi”. Iroñaaka ejatzi rookakaakiri Pawa riraga iwinkatharite maawaeni kamaaripaeni ejatzi maawaeni kaari aapatziyana.

<sup>32</sup> Rooteentsi rowamagaetenä rowatzikakoetenä koroshiki roojatzikya no-kenkithashiryaakaakari maawaeni atziri, ipokashiteeyenani, ikoyi nowawijaakoteri riroripaeni.

<sup>33</sup> Rootaki ikantakiri riraga Jesoshi. Ikamantzitakari tsika ikantyaaka ikamantyaari iinja.

<sup>34</sup> Ikantawakiri atziri:

—Iyotagae Iwaperite Tajorentsi: “Roojatzi ikanteetatyeyaaani Rotyaantanewo Tajorentsi rañe”. ¿litaka pikantziri? ¿litaka pikantawori eeroka: “Ari rowamagaetakiri atziritapaentsirika”? ¿Ninkakya irika kamatsineka?

<sup>35</sup> Rakanakiri:

—Notsipatemi naaka riraga iyotakoperotakaaneeriri Tajorentsi paashini eechonki. Paapatziyena iroñaaka. Eerorika paapatziyana eero piyotziri riraga Tajorentsi. Rootaki piyaatantyaari paamariki kaari tsiwakanitatsini.

<sup>36</sup> Rootaki paapatziyantanari imatantyaawori reentsitetemi. Roojatzi ojeekantapaakimi pajankaneki noñaani.

Roojatzi ryaatantanaka imanapithatanakari.

### *Kaari raapatziyantari jewatatsiripaeni joriyyopaeni*

<sup>37</sup> Iñaawitakari osheki atziri itajonkantayitakini riraga Jesoshi omaanta tee raapatziyeyawakarini.

<sup>38</sup> Imonkaatakiro rojankinatakotzitakaririni paerani Iseeyashi riraga kamanantayitzirorini iñaani Tajorentsi, ikantzi:

“Nowinkatharite, eero roshekiperotzi aapatziyawakimini rowaga akamanteriri. Iñaawitemi pitajonkante. Omaanta eero raapatziyimi”.

<sup>39</sup> Rootaki kaari imatantyaawo raapatziyari Jesoshi. Tema ikantzitakani ejatzi:

<sup>40</sup> “Riraga Tajorentsi tee ishinetziri riyoperoteri kimitaka tee iñiiri rokiki riraga kaari aapatziyariri Jesoshi ejatzi tee ishinetziri riyotakayeri rajankaneki kimitaka tee ikenkithashirya rajankaneki. Ikantziri Tajorentsi: ‘Iñeekari. Riyotzikari. Rameentanakari. Nowawijaakotzirkari’”.

Rootaki kaari imatantawo maawaeni kaari aapatziyariri Jesoshi ikenkithashiryaaño.

<sup>41</sup> Paerani iñaakiri riraga Iseeyashi ishipakiryaaki Awinkatharite, impaetzti ikenkithatakotziri.

<sup>42</sup> Ejatzi osheki jewatatsiripaeni joriyyopaeni raapatziyawitanakari Jesoshi. Omaanta ithaawantari warijeyopaeni, rootaki kaari ikanantari

inampijatzi: "Naapatziyakari Jesoshi". Ikenkithashiryaa: "Ikijantanarikari naapatziyari irira, eero ishinetanaana notsipataneeyaari atziri janta piyotaantsiki nopolinkathateri Tajorentsi".

<sup>43</sup> Riraga warijeeypaeni ikowapiintzi iñaaperooyerini atziripaeni ikameethatzi, tee ikenkithashiryaa koperotari Tajorentsi iñaaperoteririka irirapaeni ikameethatzi.

### *Kameetha aapatziyari riraga Jesoshi*

<sup>44</sup> Roojatzi itacheronkawaantetantanaka riraga Jesoshi:

—Maawaeni aapatziyanari, tee apatziro naaka raapatziyaperotana, inta eejatzi raapatziyitari otyaantakinari.

<sup>45</sup> Maawaeni iñaapiintakinari, iñaapiintzityaari eejatzi otyaantakinari.

<sup>46</sup> Tema nopolakapaaki jaka kipatsiki, nokimitapaakari ootamentotsi niyotakotakaantyaariri riraga Tajorentsi maawaeni atziri eero eekiro riyaatatyee ijekanaki tsiteniriki; omaanta imatziro raapatziyana, eero rantapiintanakiro kaari kameethatatsi, inta imonkaatakiro ikowakaakiriri Tajorentsi.

<sup>47</sup> Omaanta ninkarika kemayitawitakaworini nokantziri: eerorika ikemijantaperotziro, eero nokantakowentziri naaka. Tee ro nopolantari kipatsikia nokantakowentayiterini atziri, inta nopolantari nowawijaakoteri.

<sup>48</sup> Maawaeni theenkakinari kaari aapatziyawori noyenkithari, eenittasi okantakowenteri iinja. Iroka noyenkithari nokantawitakari: iinja omonkaatapaakyaarikaroña othonkantyaari kipatsi, ari okantakowenteri theenkakinari okaatzi nokantziri.

<sup>49</sup> Tee noñaawaeta shita. Pawa otyaantakinari, rirotaki kantanari: "Rootaki irokakya piñaawaeta paaeri. Irokakya pikantapaeriri".

<sup>50</sup> Riraga aapatziyawori kaminagaantsi rashì Pawa okaatzika nokamantakiriri, ari owañaanakiri ikanteetatyeyaaani ijeki jenokinta. Tema nomonkaatakiro maawaeni okaatzi ikantakinari Pawa.

## 13

### *Jesoshi riyyotagaeyakinawoni tsiteniriki tekiraata ikami*

<sup>1</sup> Rooteentsi nokimoshirewenteeyanakironi Kitejitatsiri Rawijantari Ronampiri Tajorentsi janta Ejiipitoki. Aritaki riyyotaki riraga Jesoshi omonkaataka rookantanaawori kipatsika, ipiyantanaari Ashitaririki. Ikantatyeyaaani ineshironkaeyakaeni maawaeni rashiteeyakaeni kipatsijatzika. Iroñaaka ineshironkaperote, tee ithaawanaki ikamawentee.

<sup>2</sup> Ari nowaeyani maawaeni notsipatakari Joorashi karyootejatzi, riraga itomi Shimo. Ikenkithashiryaa kakaakari rajankaneki riraga iwinkatharite kamaripaeni riraga Joorashi raakaantawityaarini Jesoshi iinja.

<sup>3</sup> Riraga Jesoshi riyyotaki Iriri iitakiri jewawenteroni maawaeni oetarikapaeni kipatsikia eejatzi jenokinta. Riyyotaki eejatzi ipoñaaka Tajorentsiki, rooteentsi ipiyashitaneriee eejatzi.

<sup>4</sup> Ari rowakagaeyakinanai irira Jesoshi, roojatzi ikatziyanaka. Raatonkoryaanakawo iithaari. Rapineethakitanakawo roshewootantari.

<sup>5</sup> Roojatzi ijantakawo iñaa tajokira antawo, ikiwanteeyakinawoni noetzi paeni: nashi naari eejatzi paashinipaeni riyyotaanewo. Ro roshetantakina-wori noetzi roshewootantari.

<sup>6</sup> Roowiteenchami ikiwayitzitapakirimi riraga Peetero, ikantziri:

—Rooma eerokataki Nowinkatharite, tee okameethatzi pikiwenawo noetzi naari, inta okameethatemi nokiwemiromi piitzi eeroka.

<sup>7</sup> Ikantawakiri:

—Tee piyotakotziro iroñaaka iroka nantakimiri. Aritaki piyotakiro iinja.

**8** Ikantziri rirori:

—Eerokya pikiwanawokya noetzikya.

Ikantawakiri:

—Eerorikakya nokiwimiro piitzi, eero akimitawakaa iinja.

**9** Roojatzi ikanantakariri rirori:

—Nowinkatharite, eero apatziro pikiwenawo noetzipaeni, inta eejatzi pikiwenawo nako, nopoo, maawaeni. Nokoyi akimitawakayaaroña.

**10** Ikantawakiri:

—Eero rapiitziro ikiwakya kaawoshiteenchari. Rapiitziro ikiwirop apaniroeni iitziki. Kiteteeyawitakimini eerokapaeni inta apaani kaari kitetatsi.

**11** Riyotakiri Joorashi rirotaki akaanterini. Rootaki ikanantakari: “Apaani kaari kitetatsi”.

**12** Ithonkaeyakinani ikiwaeyakinawoni noetzi maawaeni. Roojatzi ikithaatantaawo iithaari. Eejatzi ijeekimoteeyakinani, ikantana:

—¿Piyoteeyakinima iroñaaka iitaka nanantayitaworini irokapaeni?

**13** Rooma pikantapiinteeyanani: “Iyotaantatsiri”, eejatzi “Nowinkatharite”. Kyaaryootaki iroka pikantakinari. Naaka iyotagaeyimirini. Okameethatzi pipinkathatena.

**14** Naaka piwinkatharite, omaanta nokiwakimiro piitzi namitakotantzimiri nokimitakari ponampiri. Ari poshiyakotenawo naaka: pamitakoperotawakaya.

**15** Noñaagakimiro inkaaganki tsika pikantya eeroka. Aritaki iroñaaka pikimittawakagaeyanakyaani.

**16** Kyaaryootaki iroka nokantemiri. Ronampiri tee ranaakotziri omperatariri. Eejatzi riraga rotyaantanewo eero ranaakotziri otyaantakiriri.

**17** Iroñaaka piyotakiro iroka niyotaakimiri, tema rootaki pikimoshirentanyaari pimónkaatakirorika nokowakaemiri nokimoshiryaaantemiri.

**18** Eniro iroñaaka apaani nokantakoperoteri, tee maawaeni nokenkithatakotzimi. Niyoyagaeyakinimi maawaeni, tema niyoteeyakinimi. Eenitatsi Iwaperite Tajorentsí tekiraajeeni omonkaatyata, okantzi: “Riraga owakotakinari nopaani, rirotaki piyankashitenani”.

**19** Aritaki nokanteeyakinimi tekiraata ragaeten. Piyontari omonkaataka okaatzi nokantakimiri, aritaki paapatziyakotena naaka riraga Rotyaantanewo Tajorentsí riraga Owawijaakkotantsiri.

**20** Kyaaryootaki iroka nokantemiri. Aririka raakameethateetawakiri notyaantanewo, eejatzi naari, raakameethatena. Aririka raakameethatawakina naari eejatzi ikimiteri riraga otyaantakinari raakameethateri.

### *Ikantzi Jesoshi: “Rooteentsi raakaanteetena”*

**21** Roojatzi rowashiretantanaka Jesoshi, ikamanteeyanan:

—Kyaaryootaki iroka nokantemiri. Eenitatsi jaka akaantenani.

**22** Ari naminawakaanaka naaka maawaeni riyotaanewo, tee niyotzininkarika kantakotakinari.

**23** Naaka riyotaanewo inintaperotana Jesoshi, eenirona naari notziintanakari ichopineeki noñaanatantakari.

**24** Rookotakina Peetero, ikantana:

—Pojampiteri. ¿Ninka ikenkithatakotzirika?

**25** Roojatzi apawo notziitaperotantanakariri ichopineeki riraga Jesoshi. Nokantakiri:

—Nowinkatharite, ¿ninka akaanteminika?

**26** Ikantakina:

—Aririka nochaantero paa, irika nopakiri, rirotaki aakaantenani.  
Roojatzi rochaantanakawo paa, ipakiri Joorashi itomi Shimo karyoote-jatzi. Ari raawakiro.

<sup>27</sup> Roojatzi ikenkithashiryaakaantakariri iwinkatharite kamaaripaeni Joorashi raakaanteri rirori. Riraga Jesoshi riyotzi oetaka ikenkithashiryaari rirori. Ikantanakiri:

—Oetarika pikenkithashireeyirini pantero, pimateroota intsipaete.

<sup>28-30</sup> Raantawakawori rowaga paa, rowakawo, roojatzi riyaatantanaka raakaanantyaariri. Rirotaki kempoyaakinariri noorikite maawaeni. Naakapaenä owaeyeencharini jaga tee niyotawakiro ikantakiriri: "Pimateroota intsipaete". Riyaatantakari, raamaanaka apaanipaeni ikantziri Jesoshi: "Pamanante oyaari akimoshirewantasyawori Rawijantariri Ronampiri Tajorentsi". Paashini raamaaka ikanteri: "Piyaate pipashitayityaarini ashironkaenkari". Niyankitaki tsiteniri ipiyashitanakari.

### ***Ikamantakina naakapaeni riyotaanewo riyaateeta***

<sup>31</sup> Roojatzi ikamantanakina Jesoshi:

—Nopoñaanaka naari jenokinta, natziritapaaaki jaka kipatsiki. Rooteentsi kijashitanari raantaneenari. Roojatzi nokamawenteri maawaeni atziri, nopersiniantaneyari, nopyantari jenokinta. Tema nokamawenantyaariri aapatziyeeyanarini ipinkathateeyanteenarini naari eejatzi Pawa ikanteri: "Tajorentsi riroperori. Rotyaantakaeri Itomi riraga Jesoshi ikamawentee aari".

<sup>32</sup> Eejatzi ikimitya Pawa, riyotakagaeyerini atziri ipinkathateeyinani naari. Eejatzi ikantakotenari rirori: "Rirotaki notyomi. Rantakiro kameetha maawaeni nokowakaantakariri rantero". Iroñaaka imatero: eero ijama-neentawo.

<sup>33</sup> Iroñaaka, niyotaanewopaeni, rooteentsi nookanteyeyaneemirini. Pikowakowaperotana omaanta okimitaka nokantakiri jewatatsiripaeni joriyyopaeni chapinki, eejatzi iroñaaka nokanteyemini eerokapaeni: "Nopyantari janta, omaata eero pimatziroota eerori piyaateeta, tekira".

<sup>34</sup> Paashini nokamineeyemirini iroñaaka: "Pineshironkatawakaeyanikya maawaeni. Nokimitaka naaka noneshironkaeyimini, eejatzi pikimitawakaeyani eeroka, pineshironkatawakaeyanikya.

<sup>35</sup> Aririka pineshironkatawakagaeyanikya, aritaki riyotakoeyakimini eeroka maawaeni atziri: eerokapaeni niyotaanewopero".

### ***Ikante Peetero: "Tee niyotziri Jesoshi"***

<sup>36</sup> Ikantzi riraga Peetero:

—¿Tsika piyaatfea, Nowinkatharite?

Ikantakiri:

—Janta niyaatee, eero pimatziroota poyaatanakina iroñaaka. Iinja aritaki poyaatanakina.

<sup>37</sup> Ikantziri rirori:

—Nowinkatharite, ¿iitarikya kaari nomatantyaawo noyaatemi iroñaaka? Omawitya rowamagaateerika, aritaki okanta.

<sup>38</sup> Ikantawakiri:

—¿Arima pantero? Kyaaryootaki iroka nokantemi. Tekirani iñiini tyappa, pikante: "Tee niyotziri Jesoshi". Okaate 3 pikante.

—Eero pikenkithashiryaashipiintawo inta tameentyaari Tajorentsi. Eejatzi naari, tameentena.

<sup>2</sup> Janta inampiki Pawa eenitatsi oshekini pankotsipaeni. Eero oshekitzimi, ari nokantemimi: “Tee oshekitzi”. Niyaate janta niwetsikaeyapaemini pipango, pijekanteeyapaeyerini eeroka iinja.

<sup>3</sup> Aririka nomatemiro pijekantyaari, ari napiitaatero nopyiyashiiyakitemini nagaeyaatemini. Aritaki notsipatapaakimi nojekinta naari.

<sup>4</sup> Piyotzi tsikarika niyaatee. Piyotzi eejatzi tsikarika nokinanaki.

<sup>5</sup> Ikantziri riraga Tomashi:

—Tee niyotzi naaka tsikarika piyaatee. ¿Tsika niyotantyaari tsikarika pikine?

<sup>6</sup> Ikantakiri:

—Tema naaka oñaayemironi pikinantanakyaari pareetantyaari Pawaki, eejatzi naaka yotaapiinteeyakimironi kyaaryooperotatsiri, naaka añaakagaeyakimirini pikanteetatyeyaaani. Tektsi pikantya piyatashiteri Pawa, inta naaka aaneemini.

<sup>7</sup> Piyoteeyantakinarinimi naaka piyoteeyakirinimi Pawa eejatzi. Paata piñeena nokamawenteri maawaeni atziri ikimitaaka ikantanari Pawa roojatzi piyoperoteri tsika ikantari rirori.

<sup>8</sup> Ikantziri riraga Jiripi:

—Nowinkatharite, poñaagaeyenarini Piri; ari okaatapaaki, eero napiita-neemi nojampikowentaneeri.

<sup>9</sup> Ikantakiri:

—Paerani notsipateeyakimini. ¿Tekirama piyotana? Maawaeni ñaakinari, kimitaka iñaakiri Pawa rirori. ¿Litaka pikantanari iroñaaka: “Poñaayenari piri”?

<sup>10</sup> ¿Tekirama piyotzimate nokimitari Pawa? Eejatzi ikimitana rirori. Tee nokantashita. Ikimitana irira, rirotaki matakaanawori notajonkantzi.

<sup>11</sup> Tema nokantzimi nokimitari irira. Eejatzi ikimitana naari. Paapatziyawo iroka nokantakimirni. Erorika pikoyi paapatziyashitana, ari piñaaperoeyakinani notajonkantaki, tema rootakikya paapatziyantanakinari.

### *Aririka riyaatanee Jesoshi, osheki imateniri aapatziyariri*

<sup>12</sup> Eejatzi ikanteeyanakinani riraga Jesoshi:

—Rootaki kyaryoootaki nokamantemiri. Maawaeni aapatziyenani ikimiteeyanani, eeniropa nantziro naaka eejatzi ikimitya rirori rantaperotero. Tema niyotaakiri atziri rootaki raapatziyantakinari apaanipaeni. Ari niyaateeta Pawaki, eejatzi opoki rowaga Ishire Tajorentsi amitakotemini. Rootatzi pikamanantyaari atziri maawaeni nokantakimirni naaka, rootaki raapatziyantayitenarini oshekini.

<sup>13</sup> Aririka paapatziyakanina, aritaki nomatakimo oetarika pikowako-tereri riraga Pawa. Iroka nokantemiro ikanantyaari maawaeni atziri iñaaperoteri Pawa.

<sup>14</sup> Paapatziyaperotakinaria, pimatero pinetheena Naaka oetarikapaeni, aritaki nomatakimo pikantenari.

<sup>15</sup> Pinintaperotanaria, pikemijantaperoeyenani oetarika nokamina-gaeyemirini.

<sup>16</sup> Naaka amanerini Pawa rotyaanteeyemironi paashini Amitakoeyemirini. Aritaki imatakimo. Rootatzi okantyaani otsipateeyemini roori:

<sup>17</sup> rootaki rowaga Ishire Tajorentsi iyotayemironi maawaeni kyaaryootakotatsirini Tajorentsi. Omaanta tee riyoteeyironi irowa kaari aapatzianari, rootaki kaari opokashiteeyantaririni otsipateeyarini. Omaanta

aritaki kijokiro owanteeyakimirini eerori. Rootaki piyoteeyantakaworini eeroka.

<sup>18</sup> Nopiyaneerika Pawaki, eero nookimi apaniroeni, ari nopyashiiyemini Noshireki.

<sup>19</sup> Rooteentsi niyaate. Eero rapiitana iñeeyanakinani kaari aapatziyanari, inta piñeeyenani eeroka. Ashi noyiro nañi, rootaki pañaanteeyanakarini eerori: pikantyaani pijeeki jenokinta.

<sup>20</sup> Aririka nopiriintanee, aritaki piyoteeyanakini nokimitari Pawa. Tema eejatzi pikimiteeyenani eeroka, eejatzi nokimiteeyimini naari: akimatwakaeyani.

<sup>21</sup> Maawaeni yotawakirori nokaminaakiriri, ikemijantaperotakirorka eejatzi, rirotaki nintashireperotanari. Pawa aritaki inintashireperotakiri nintashireperotanari. Eejatzi naari aritaki nonintashiretakiri rirori. Niyotakaaperoteri tsika nokanta.

<sup>22</sup> Enitatsi janta paashini Joorashi, kaari karyootejatzi. Rojampitziri irira, ikantziri:

—Nowinkatharite, piyotakaaperotakina naaka tsika pikantari. ¿litaka kaari piyotakaantari kaari aapatziyemini tsikarika pikantari?

<sup>23</sup> Ikantakiri:

—Pinintaperotana eeroka omaanta tee inintaperotana riraga kaari aapatziyanari. Pinintaperotanarika, pikemijantaperotero nokantzimiri, roojatzi inintaperotantemiri riraga Pawa. Roojatzi nopalashiiyakimini pishireki, kijokiro nowantemiri Naaka eejatzi Pawa.

<sup>24</sup> Omaanta kaari nintashiretanari, eero ikemijantaperotziro nokantziri. Iroka nokantakimirika, kaari nashi nokantzimiri naari, inta ikantziri otyaantakinari.

<sup>25</sup> Eenironaka notsipateeyimini, aritaki nokamantzitakimiro omaanta tekiraata pikemaperotana.

<sup>26</sup> Riyotzi Pawa paapatziyakina, rootaki rotyaanantemirori amitakontatsiri roori Ishire Tajorentsi. Iyotakaemiro oetarakapaeni. Okenkithashiryaaakaapakimiro maawaeni nokantzimiri. Rootaki kenkithashiryaaakayemironi eerokapaeni maawaeni nokantakimir.

<sup>27</sup> Eekiro riyaatatayee ikantanakina riraga Jesoshi:

—Rooteentsi niyaate. Nokimoshiryaanaki naaka tee nowashiretakota. Nokowaki pikimitena pikimoshireeyanakini eeroka: tema naaka pikimoshirewente. Eero imatziro atziri roemoshirenkemi. Omaanta naaka oemoshirenkemini. Aririka eekiro piyaatatayee pikenkithashiryaaakotena naaka aritaki nojeekekagaeyakimini kameetha.

<sup>28</sup> Aritaki pikemakiro nokanteeeyakimirini rooteentsi niyaate, eejatzi nopyiee. Aririka pinintaperotena kameetha pikimoshirewentena niyaate Pawakinta. Aritaki riraga Pawa ranaakotakina.

<sup>29</sup> Iroñaka nokamantzitakimiro tekiranı niyaatee. Aririka piyotaki omonkaataka nokantakimir, paapatziyaperoeyantenerini.

<sup>30</sup> Eechonkiini napiitzimi nokenkithataakimi. Awotsikitapaaki jewatatsiri maawaeni kaari aapatziyanari: rirotaki iwinkatharite kamaaripaeni. Tekatsi ikanty rirori reewawentena naaka.

<sup>31</sup> Omaanta noshinetari rowamaena oyaatziriri rashı. Irira Pawa ikowakaakinari nokamawenteri maawaenı atziri. Rootaki nokantariri riyooteeyantakanakaworini atziri nonintaperotziri riraga Pawa, eejatzi nanopaintziniri oetakarika ikowakaakinari. Pikatziyanaki. Thame aatee.

# 15

## *Riraga Jesoshi rirojatzi oshiyakaawentacha owaatotha oowa*

**1** Ikantawitanaana riraga Jesoshi inta eekiro riyaatatz i riyoataana. Iroka paashini roshiyakaawentakinari irira:

—Naaka kimitawori owaatotha oowa. Eeroka kimitawori otha. Rivotaki Pawa thamaetakotzirori.

**2** Aririka otha kaari kithokitapaentsiri riraga thamaetakotzirori ipejayitzironi, eejatzi rookiro. Omaanta rowaga kithokitatsiri rowameethatakotakiro okithokiperotantanakyaaari. Kimitaka iroka, Pawa rantakimiro eerokapaeni aapatzianari. Raapatziyaperotakaantemiri, ikameethatakapero takimi.

**3** Iroka niyotagaeyakimirini, rootaki owameethashireeyakimirini Ishire.

**4** Kijokiro powaeyenani. Aritaki naari kijokiro nowaeyemini. Otha oowa aririka ochewaryaanaki, eero omataa okithokite, rooma ari okamae. Aritaki pikimiteeyaworini eerori. Eerorika kijokiro powaeyenani, eero pimatziro piyoteeyerini kameetha paashini atziri raapatziyanenari.

**5** Naaka kimitawori owaatotha. Eerokapaeni pikimitawo othapaeni. Maawaeni kijokiro oyenani rirotaki mateeyanakirorini oetarika nokowakaakiriri. Tema kijokiro noyeri naari. Omaanta aririka pintareeyanakinani, eero pantzimaeta wo nokowakaakimiri. Rootaki okameethatantar i kijokiro powanakina naaka.

**6** Riraga kaari kijokiro owana, ari ikimitakaanteetakyaari otha oowa ipejeetero, thatzik. Roojatzi aririka ojampishitanaki, rookaetero paamariki, pok, otaya, tzinini.

**7** Roojatzirika kijokiro powaeyanakinani eejatzi aririka paapatziyaperotyaawo nokantzimiri, pikantena oetarika pikowayitzirini: aritaki nomatakimiro.

**8** Aririka pimatayitakironi oetarika nokowakayemiri, riyoperotemi maawaeni atziri eerokaperotaki niyotaanewopaeni. Aritaki ifñaaperoteri atziri riraga Tajorentsi ikameethatz.

## *Riraga Jesoshi isheninkatakari maawaeni riyoataanewo*

**9** Iroka eejatzi ikanteeyanarini riraga Jesoshi:

—Kimitaka inintashiretana Pawa osheki, eejatzi naaka nokimiteeyimini, nonintashireeyimini osheki. Kijokiro poyena, rootaki anintaperotawaka-gaeyantyaarini osheki.

**10** Pikemijantaperoterorika nokaminagaeyimirini, aritaki nokantanakimiri nonintaperoeyanakimini naaka. Nokemijantaperotziro ikantakinari riraga Pawa, roojatzi ikantani inintaperotakina.

**11** Ashi noyiro nokimoshiryaanaki naari. Ro nokamanantzimirori iroka pikimoshirewenantyaawori eeroka. Nokowaki pikimoshireperotanaki maawaeni.

**12** Iroka nokaminaantemiri: tema nonintashireeyimini naaka. Rootaki nokaminaantakimiri: pikimitaaga eerori, pinintaperotawaka-gaeyani.

**13** Riraga neshironkaperotziriri atziri, ikamawentakiririka, rirotaki nintashireperotziriri kameetha.

**14** Aririka pimateeyakironi nokantakimiri, eerokaperotaki notsipamintharipero.

**15** Eero noeteeyakimini iroñaaka nonampiri, tee riyotzi onampirentsi oetarika rantziri onampitariri. Omaanta niyotakagaeyakimini okaatz i kamantakinari riraga Pawa, rootaki atsipaminthatawakaantaperotakari iroñaaka.

<sup>16</sup> Tee eerokapaeni yoyeenani; inta naaka yoyayitakimirini eerokapaeni. Notyaantakimi panantyaawori oetarika nokowakaayitemirini. Eero patsipetawo oetarika pantayitenarini. Pikemijantaperotenarika, aritaki imatakaakimiro riraga Pawa oetarika pikanteriri.

<sup>17</sup> Napiitanakimiro iroka nokaminagaeyakimini: pinintawakagaeyani maawaenai.

### *Theenkantatsiri roonakari Jesoshi eejatzi aapatziyariri*

<sup>18-19</sup> Eekiro ryaatatz ikanakina Jesoshi:

—Riraga kaari aapatzianari ineshironkatawakaaka. Aririkami pikimityarimi eeroka, aritaki ineshironkatakimimi eeroka. Omaanta tee pikimitari. Niyooyeeyakimini maawaenai, rootaki roonantakimiri. Kyaaryo, roonantakimiri riraga kaari aapatzianari, omaanta nokowanaki piyoperote ritawo roonana naari.

<sup>20</sup> Pikenkithashiryaakiro nokantakimiri chapinki: “Riraga ronampiri tee ranaakotziri onampitariri”. Aritaki ikijakina. Eejatzi ikimitemi eeroka, ikijeeyemini. Tee ikemijantaperotziro nokanteeyawitakaririni. Eejatzi eeroka, eero ikemijantaperoeyimini pikamanteeyawityaaririni eeroka-paeni.

<sup>21</sup> Rirotaki Tajorentsi otyaantakinari. Omaanta tee riyotziri maawani rirori, rootaki ikijantemiri. Tema piyotaakowitakinari riroripaeni. Rootaki ranantawori iroka.

<sup>22</sup> Ari nopolashitawitakari, nokenkithatakaawitakari. Eeromi nopolashitzirimi eero eenitatsimi iroñaaka rantani. Omaanta iroñaaka tekatsi okantya irirapaeni ikantero: “Tee niyotziro nantziro kaari kameethatatsi”.

<sup>23</sup> Riraga oonakinari roonakari Pawa rirori.

<sup>24</sup> Eero eeniromi rantani, eeromi iñaaawitakina notajonkawentzimotakirimi. Nomataytakironi kaari imatayitzini atziri. Omaanta iñaaawitakina notajonkantzi, eekiro roonantyaana. Eejatzi roonitakari riraga Pawa.

<sup>25</sup> Aritaki ikantari maawaenai. Tema monkaatapaaka iroka rojankinakotziteetakaririni rirori Iwaperiteki Tajorentsi: “Roonashiitana maawaenai, tekatsi nantawitya”.

<sup>26</sup> Ari notyaantakimiro eerokapaeni Amitakotemini, rowaga Ishire Tajorentsi. Opoñaakya Pawaki, kameetha iyotaapaemiro kyaaryooperotatsiri. Aririka opokapaaki okantakotapaakina naaka.

<sup>27</sup> Eejatzi eerori, okameethatzi pikantakotakina naari eejatzi. Tema eeroka tsipatapiintakinari paerani nitantakawori niyotaakotakiriri atziri-paeni.

## 16

<sup>1</sup> Eekiro ryaatatz ikanana riraga Jesoshi:

—Nokoyi eero pipakaero paapatziana, rootaki nokanantzimiori maawaenai iroka.

<sup>2</sup> Paata pikowaeyawityaani pikaaterimi ajoriiyotzinkarite janta piyotapi-intaantsiki inta roepiyawakimi. Rowamaemi eejatzi. Aritaki riraga kijakimiri ikenkithashireeya rantziniri Tajorentsi ikowakaakiriri.

<sup>3</sup> Tee riyotziri riraga Pawa, eejatzi naaka, tee riyotana, rootaki ranantemirori iroka.

<sup>4</sup> Aririka omonkaataky iroka nokantakimiri, aritaki pikenkithashiryaanakiro nokantakimikya rootaki iroñaaka nokanantzimiori. Paerani notsipatzimini, rootaki kaari nokanantzimini, omaanta rooteentsi niyaaatee, rootaki nokanantaperotakimiri.

*Opoke Ishire Tajorentsi*

<sup>5</sup> Ikantanakina riraga Jesoshi:

—Iroñaa ka niyaate otyaatankinariki. Omaanta tee pojampitana: “¿Tsika piyaateka?”

<sup>6</sup> Iroñaa karoña nokantakimi, rootaki petakoperotantanakari maawaeni pajankane ki.

<sup>7</sup> Kyaaryooperotaki iroka nokantakimiro. Okameethatzimotzimi niyaatee. Eerrika niyaatee eero opokashitzimi Amitakoperotemini rowaga Ishire Tajorentsi. Aririka niyaātanaki, aritaki notyaanteeyapaakimironi Noshire.

<sup>8</sup> Areetapaakimiri ka, ari oñaanashiretapaakiri maawaeni kaari aapatzianari okanteri: “Eeroka antayitzirorini kaari kameethatatsi”. Oñaanashiretapaakiri maawaeni ikamawenterira Jesoshi iñaaperotantariri Tajorentsi ikameethatzi, eejatzi rowameethatantyaariri. Eejatzi oñaanashiretapaakiri maawaeni tsika ikantyaari Tajorentsi ikantakowenantyaariri maawaeni kaari aapatzianari.

<sup>9</sup> Tema tee raapatziyana rootaki rowashironkaawentyaari iinja kaari kameethatatsi. Eejatzi rowaga Ishire Tajorentsi okanteri: “¿Litaka kaari paapatziyantari Jesoshi?”

<sup>10</sup> Maawaeni kaari aapatzianari tee riytakoperotziri Pawa Tajorentsi iñaaperotakotantanari naaka. Omaanta aririka opokapaaki rowaga Ishire Tajorentsi oñaanashiretapaakiri maawaeni atziri nokamawenteri eejatzi nopiyanteeyari Pawaki, rootaki raapatziyantendaririka iñaaperoteri rirori ikameethatzi.

<sup>11</sup> Eejatzi opokashitantlypaakari Ishire Tajorentsi iyotakagaeyapaerini maawaeni theenkantsirsiri ari ikantakotanteri Tajorentsi, rowashironkagaeyerini. Tema rirotaki rirori rowashironkagaeyerini Jatanaashi riraga iwinkatharite kamaari paeni, eejatzi rirotaki jewatatsirsiri maawaeni theenkakinari jaka kipatski.

<sup>12</sup> Tekira eeniro osheki nokamantemirimi omaanta eero pimatziro piyoteeyawakironi iroñaa ka.

<sup>13</sup> Kyaaryooperotaki maawaeni iyoteemiri Ishire Tajorentsi. Aririka opokapaaki, iyotakaapaemiro maawaeni kyaaryootatsirsiri. Eero iyotaashita apaniroeni. Oetarika okemakinari naaka niyotaantziri aritaki iyotaapaemi maawaeni. Iyoteemi oetarika awijatsini iinja.

<sup>14</sup> Aawakironi noyenkithari roojatzi iyotaantawakimi eeroka, tema apatziro okamantemiro maawaeni iroka noyenkithari. Tema ari oñaaperoteena. Tema apatziro okamantakotana naaka.

<sup>15</sup> Maawaeni ikantayitanarini Pawa, nokantayitakironi naaka, rootaki nokantakimiri maawaeni: “Iyotaantemiri rowaga Ishire maawaeni iroka nokantziri”.

<sup>16</sup> Ikantanakina Jesoshi:

—Paata eero piñana. Paashini paata ari papiitero piñeena.

Ikantakota Jesoshi ikamawentee eejatzi ipiriinantaneeyari omaanta tee nokemaperotziri.

<sup>17</sup> Roojatzi nokantagaantawakaeyakan:

—¿Tsika okantaka iroka ikantakaeri? “Paata eero piñitana. Paashini paata ari papiitenpa piñeena”. Ikantzi eejatzi: “Niyaatee Pawaki”.

<sup>18</sup> ¿Litakakya ikanantari: “Paata”? Tee ayotakotawakiri oetarika ikan-takaeri.

<sup>19</sup> Riyotaki Jesoshi nokamantawakaaka. Riyotaki nokowawitari nojampiterimi. Ikantanakina:

—¿Pojampikowentawakaanakawo nokantakimiri? “Paata eero piñaana. Paashini paata papiitena piñeena”.

<sup>20</sup> Kyaaryootaki iroka nokantemiri. Ari piraakotanakina maawaeni, powashiretanakya. Omaanta kimoshirewitachari maawaeni kaari aap-atziyanari. Powashirewitakya eerokapaeni, omaanta ari papiitero pikimoshiryaneen.

<sup>21</sup> Aririka omonkaatakyaa oeyowantyaariri otomi tsinani, okemaatsitakari. Ikoñaatantakari eentsite, tee okenkithashiryaanaka okemaatsitakari, inta okimoshirewentziri riraga otomi.

<sup>22</sup> Aritaki pikimitakari iroñaaka eerokapaeni, powashiretawitaka nokamantari. Omaanta aritaki nopiriintanee napiitero noñaaneemi. Rootaki pikimoshireeyantanakarini, tekatsi owashiretakaaneemini eeroaka.

<sup>23</sup> Aririka nopiriintanee, roojatzi piñaantawaena eero pikowanaki pojampitena kyaaryootaki nokantemiri. Paerani nojeeekawitani janta Pawaki roojatzi nopolakatari jika kipatsikika ejatzi nopyiyamaetaneeya Pawaki. Kyaaryootaki iroka nokantemiri: aririka paapatziyena, ari ramitakotemi Pawa oetarika pikanteriri.

<sup>24</sup> Paerani tekira paapatziyanani, pikenkithatakoeyanani naaka. Iroñaakaroña pamanakotenaata roojatzi ikemantakimiri, ipantemiri okaatzi pikowakotanari pikimoshireeyantanakyaarini kameetha.

<sup>25</sup> Ejatzi ikantanakina riraga Jesoshi:

—Ari noshiyaakaawentapiintzimironi oetarika, omaanta paata eero napiitziro noshiyaakaawenteemiro. Inta okameethatzni nokamantakoperoteri Pawa, eero nomanapithatzimiro.

<sup>26-27</sup> Inja eero pikenkithashiryaa pikantena naaka: “Nowinkatharite, pamaneri Pawa nokoyi ramitakoteni”. Eeroka nintashiretakinari. Paapatziyena kyaaryo nopoñaaka Pawaki, rootaki inintaperotantakimiri irira Pawa. Ari ineshironkaperoejakimini, rootaki ramitakotantemiri koety-eemotzimiri maawaeni.

<sup>28</sup> Nojeeekawitani riroriki, roojatzi nopolakatari kipatsikika. Iroñaaka nookaneero kipatsika, nopyiyashitaneeri Pawa.

<sup>29</sup> Nokantziri naakapaeni:

—Iroñaakaroña pikamantaperotakinawo. Tee poshiyakaawentanawo.

<sup>30</sup> Ari tekirani nokantzimini, piyotzi oetaka nokenkithashiryaaakari. Iroñaaka niyoteeyakini maawaeni pithotyaakiro piyotziro maawaeni, rootaki nokimoshiryaaantakari pipoñaaka Tajorentsiki. Tekatsi iroñaaka nojampiteemiri.

<sup>31</sup> Ikantawakiri Jesoshi:

—¿Kyaaryooma paapatziyaperotakina iroñaaka?

<sup>32</sup> Rooteentsi nokemaatsitantlyaawori, ari nominthaagakaantakimi, piyatanaki eeroka pinampikipaeni. Pookaeyanakinani apaniroeni. Aritaki rootzimateentsi omonkaatapaakyaaaroña. Inta tee naaka apaniroeni, kijokiro rowana riraga Pawa.

<sup>33</sup> Ro nokamanantzimirori iroka piweshiryaaantyaari. Aritaki piweshiryaaawentakina. Jaka kipatsikika rowashironkaetemi, omaanta piweshireeyanakyaanikya. Nanaakotakiri maawaeni jeekatsiri kipatsikika, noppinkathariperotzi naaka, notsipatemi.

**1** Ari okaatapaaki maawaeni ikanteeyakinarini Jesoshi, roojatzi raminantanaka jenokinta, ramanantanakari Iriri, ikantakiri:

—Pawa, monkaatapaaka kitejiri nokamantyaari. Rooma naaka Pitomi. Paerani akashiyeeyakawoni nokamashiteri atziripaeni, pipiriinantaanari nokamawitakaga rootaki piñaaperotantariri maawaeni atziri ikameethatzzi raapatziyantenari naaka eejatzi nowañaakiri ikantyaani ijeki jenokinta atspatwakaantyaari aaka. Iroñaaka pamitakotena nomonkaatapaakiro maawaeni nokemaatsiwenantyaariri. Ari nowañaakiri maawaeni aapattiyanari ipinkathatanteeyemirini eeroka.

**2** Tema ari piitakina riraga pinkathariwenantatsiri maawaeni jeekatsirika kipatsiki, rootaki nomatantawori nañaakagaeyeerini maawaeni piyyagaeyakinarini nashityaari. Ro piyoyaantakariri ikanteetatyeyaaani rañagaeyeenitsipateeyeeni.

**3** Eeroka Tajorentsi apintzi. Kameetha riyoteeyemini atziri maawaeni. Eejatzi kameetha riyote naaka potyaantanewo: tema naaka Jesokirishito. Maawaeni ryoperotena ikanteetatyeyaaani rañee jenokinta.

**4** Jaka kipatsikika nantakimiro maawaeni pikowakaakinari, rootaki nopinkathatkaantakimiriri atziripaeni.

**5** Paerani, Pawa, tekirani awetsikironi kipatsi, pitsipatanani janta jenokinta apinkathariiyini. Iroñaaka papitero pikimitakagaena eejatzi akaate apinkathariiyeni.

**6** Ari eekiro riyaatatzi ikantziri Ashitariri:

—Irika atziripaeni kipatsijatzi maawaeni pashitakari. Pikantakina: “Pikempoyaanakinari”. Ari niyotakaakiri maawaeni tsikarika pikantari. Raapatziyaperotawakawo maawaeni piyoyaakiri.

**7** Iroñaaka riyoteeyananakimini eeroka itaperotawori piyotagaeyakaninamaawaeni okaatzi niyotagaeyakiririni.

**8** Maawaeni piyotaakinari, nokamantakiri niyotaanewopaeni, niyotaap-erotakiri maawaeni. Raapatziyakawo rajankaneki. Rootaki riytakotantakinawori kyaaryo nopoñaakanta jenokinta eejatzi eeroka otyaantakinari.

**9-10** Namanakoeyakarinika irikapaeni. Tee namanakoeyarini irirapaeni kaara aapatzianari inta apatziro irika nokempoyaakimiri. Tema eeroka ashitariri maawaeni irika, eejatzi pashitakaakinari naari maawaeni. Tema ashiteeyananakarini maawaeni, rirotaki ashi. Raapatziyana maawaeni, rootaki ipinkathatantanari.

**11** Eero eekiro niyaatatyee nojeekanaki kipatsikika, omaanta irikakya jekaneentsini maawaeni jaka, omaantakya naakakya piyashitaneeemini. Pawa, eeroka riroperori. Tema eekiro piyaatatzpi tajonkantzi. Iroñaaka eeroka aminaneerini pitajorenkaki, ikimitanteeri. Nokowaki imonkaatawakaya ikimitakae aaka amonkaatawakaka.

**12** Notsipatanteeyakaririni maawaeni, tema pimataakaakina, rootaki nomatariri nokempoyaantakariri. Naminakowentakiri maawaeni; tekatsi ashironkaachani, inta apaani rashironkaeya riraga Joorashi, rirotaki jatatsini paamariki kaari tsiwakanitatsini. Aritaki omonkaatakyakokantakirini jankinatacharini Piwaperite paerani.

**13-14** Niyotaakiri riroripaeni pikantanari, rootaki iroñaaka ikijantanakariri maawaeni kaari aapatzianari. Ro ikijantakariri, tee ikimitarikya. Ikimitana naari riraga niyotaanewopaeni nashi, tee nokimitari naari kaari aapatzianari. Iroñaaka nopiyashitaneeemi. Tekiraata eenirona nojeeki kipatsikika, nokantziri riroripaeni maawaeni piñaani, ro nokimoshireperotakaantyaariri maawaeni, ikimitenaata naari nokimoshiretzi.

<sup>15</sup> Tee namanatzii: "Paapithateri kipatsiki", inta apatziro nokantzimi: "Pikempoyeeri eero imatantari iwinkatharite kamaari rantakayeeri oetarakapaeni".

<sup>16</sup> Irikapaeni tee ikimitari theenkantatsiri, ikimitaakina naaka: tee nokimitari theenkantatsiri.

<sup>17</sup> Pinashityaari riroripaeni, piyotakagaeyerini kyaaryooperotatsiri, ikyaaryoowentemiro maawaeni pikowakagaeyiririni. Piñaani rootaki kyaaryooperotatsiri.

<sup>18</sup> Potyaantakina niyaatashitantariri atziripaeni nokenkithatakagaeyirini. Ejazti naari nokimitakari notyaanteeyerini riyaatashitantyaariri atziri maawaeni kipatsiki ikenkithatakagaeyerini.

<sup>19</sup> Nokyaaryoowentemiro maawaeni pikowakaakinari: tema nokamawenteri riroripaeni, riyoteeyantyaaworini ikyaaryoowenan-teeeyemirorini oetarika pikowakaakiriri.

<sup>20</sup> Iroka eejazti ikantziriri Jesoshi Ashitariri:

—Tee riro namanakotari apatziro ayotaanewoka jaka; inta eejazti namanakotari maawaeni riraga raapatziyakagaeyaripa: riraga aapatziyeyyanarini iinja.

<sup>21</sup> Nokowakikya ikimitawakaanakyaaroña maawaeni. Tema akim- itawakaaka, Pawa, atsipatawakaaka aaka. Ejazti nokowaki ikimitee aaka maawaeni riraga aapatzianari, roojazti riytantyaawori atziri kyaaryo potyaantaperotakina.

<sup>22</sup> Pitajonkakowentakina nokimitantakimir eerori, eejazti notajonkakowentakirini maawaeni rirori ikimitawakaantyaari. Imonkaateeyakaeni aaka, akimitawakaaka.

<sup>23</sup> Ikimitana naari. Nokimitzimi eerori. Rootaki ikimitawakaaper- otantyaari maawaeni aapatzianari, roojazti riytantyaari maawaeni atziri potyaantakina, eejazti pimonkaatakagaeyakinarini naaka eejazti riraga aapatzianari, pinintaperoeyananani.

<sup>24</sup> Tekirani ojeekini kipatsi, tema pinintaperotanani, rootaki piitantakinari naari, nopinkathariwenteri atziri. Iroñaaka, Pawa, nokowaki itsi- pateeeyenani iñaantenari nopinkathaperotanaki. Tema pikantana: "Pikempoyeeyenarini maawaeni", aritaki nomatakimiro.

<sup>25</sup> Pikameethaperotaki, Pawa. Tee riyotzimi maawaeni kaari aapatzianari, omaanta niyotzimi naari. Ejazti riyoteeyakimini irikapaeni potyaantakinari,

<sup>26</sup> niyotakagaeyakirini tsikarika pikantari eerori. Aritaki napiitakiniri niyotakaaperoteri, pinintaperotantariri, pikimitakaantenari naari pinintashireperotana. Ejazti ikimiteeyakinani maawaeni. Ari okaatzi.

Rootaki ikantziriri Jesoshi Ashitariri.

## 18

### Raantanakariri Jesoshi

<sup>1</sup> Ipakaanakiro Jesoshi ikenkithatakaeri Ashitariri roojazti riyaatatakanakina: Jesoshi, eejazti naaka maawaeni riyoataanewo. Noerinkanaka nomontyaanakawo piryaajanteniri iitachari Sherooni. Notonkaanaki roojazti nareetantapaaka Oriiwomashiki. Nokyaapaaki.

<sup>2</sup> Aritaki janta riyaatatakipaaintanakina Jesoshi, rootaki riyotantari riraga Joorashi, riraga aakaanterinira.

<sup>3-5</sup> Riraga jewatayitatsirini ūaanakowenantatsiri Tajorentsipankoki eejazti warijeeyopaeni rotyaantawakiri joraaropaeni eejazti waairiyaapaeni. Reewatapakiri riraga Joorashi. Ramapaaki ootamentotsipaeni,

oorenantyaaripaeni, rompojamentopaeni eejatzi; ipokashitapaakiri riraga Jesoshi maawaeni. Riyotaki irira iitaka ikanteriri. Riyaatanaki itonkiyotawakari, ikantawakiri:

—¿Ninka paminirika?

Rakapaakiri:

—Riraga Jesoshi najareetejatzi.

Ikantawakiri:

—Naakataki.

**6** Ikanantawakariri riraga Jesoshi: “Naakataki”, roojatzi ipiyantanakawo itapiiki. Ityaapaaki maawaeni kipatsiki, tereei.

**7** Rapiitawakiri:

—¿Ninka pikowaperotzirika?

Ikantawakiri:

—Riraga Jesoshi najareetejatzi.

**8** Ikantziri:

—Tema nokantakimi: “Naaka Jesoshi”. Naakarikakya pikoyi, pishineteri riyaateeta irikapaeni notsipatakarka.

**9** Omonkaatantapaakawori ikantakiriri Jesoshi Ashitariri: “Irika pikantakinari: ‘Pikempoyeenari’, tekatsi ashironkaachani”.

**10** Roojatzi Peetero inojakiryaaantanakawo ichekamento. Ithatzi-itawakiri ronampiri Iwinkatharite ñaanakowenantatsiripaeni, omaanta ithatziitashitawakari ikempita rakojanorikitzirika. Iwaero onampirentsi Maariko.

**11** Roojatzi ikanantariri riraga Jesoshi rirori:

—Poepiyero pichekamento poyaankaero. Rootaki ikowakaakinari Pawa ragaetenä nokemaatsitawenantyaariri atziri. Eero nothañaapithatari.

### *Raanakiri Jesoshi joraaro Aanashiki*

**12** Roojatzi ragaeyantakarini riraga Jesoshi. Rirotaki agaeyanakiririni joraaropaeni, iwinkatharite joraarpaeni, waarihyaapaeni. Roojatzi roottantanakari.

**13** Ritapaentawo raanakiniri Aanashiki. Rirotaki rikonkiri Kaejashi riraga iwinkatharite ñaanakowenantatsiri iroñaaka.

**14** Irika rirotaki kantakiriri jewatatsiripaeni joriyyopaeni: “Okameethatz-imotzimi ikameeta shiramparinta apaani, rowawijaakotantyaariri maawaeni atziripaeni eero rowamaeri oroomajatzi”.

### *Peetero imanakotashitakari Jesoshi*

**15** Peetero rirotaki oyaatakowentawitanakariri riraga Jesoshi, notsipatari naaka. Riraga iwinkatharite ñaanakowenantatsiripaeni riyotana naaka rootaki ishinetantanari naaka nokyaantapaaka niyankiiteki ipankoki, notsipata-paakari riraga Jesoshi.

**16** Omaanta riraga Peetero ikatziyapaaka ashitakontsikira jantakirowa. Niyowanee inkokironta, nokantapaakiro shentzirori ashitakontsi:

—Pishineteri irira ikye.

Okantana:

—Jee, ari.

Roojatzi ikyakaantapaakinari riraga Peetero.

**17** Rowaga onampirentsi okantawakiri:

—¿Kaarimima eerori riyotaanewo Jesoshi?

Ikantziro:

—Kaarina.

<sup>18</sup> Okatsinkaetyaaki. Roeshitaka paamari onampirentsipaeni, eejatzi waariryapaeni. Rakitsiiyakani osheki paamariki. Eejatzi riraga Peetero itsipatapaakari maawaeni rakitsiiyapaakan.

### *Riraga Kaejashi rojampitakiri Jesoshi*

<sup>19</sup> Riraga iwinkatharite ñaanakowenantatsiripaeni rojampitakiri Jesoshi, ikantakiri:

—¿Ninka yotaapiintziririka? ¿Oetaka piyotaapiintziriri maawaeni?

<sup>20</sup> Ikantawakiri rirori:

—Ikemakina maawaeni atziri niyotaantziri. Niyotaantapiintzi janta ipiyotapiintanta joriiyopaeni. Eejatzi niyotaantapiintzi jaga Tajorentsipankoki. Tekatsi nomanapithatziri atziri.

<sup>21</sup> ¿Itaka pojampitananarri naari? Pojampiteri irirapaeni kemakinari oetarika nokantakiriri. Riyotakiro riroripaeni.

<sup>22</sup> Roojatzi ipajapootantanakariri apaani waariryaa katziyenchari jaga. Ikantziri:

—¿Arima apiyathatakyari iwinkatharite ñaanakowenantatsiri?

<sup>23</sup> Ikantawakiri:

—Teerika kyaaryooperotatsiri nokantakiriri, piyotakayenawo. Rooma okyaaryootzirika nokantakiriri, ¿itaka pipajapootantanakinari?

<sup>24</sup> Rootaki riraga Aanashi rotyaanantakariri waariryaa raaneeri Jesoshi oojoteencharira janta Kaejashiki.

### *Rapiitziri Peetero imanakotashitakari Jesoshi*

<sup>25</sup> Riraga Peetero eekiro rakitsitatya. Roojatzi ikananteetakariri:

—Tema eero ka riyotaanewo Jesoshi.

Roojatzi imanakotashita, ikantanaki:

—Kaari naaka.

<sup>26</sup> Itsipatari maawaeni janta paamariki apaani ronampiri Kaejashi. Rirotaki isheninka riraga ithatyakempitawitakari riraga Peetero. Ikantziri:

—Eerokama noñaakiri orliwomashiki itsipatzimi Jesoshi.

<sup>27</sup> Rapiitakiro Peetero imanakotaka. Roojatzi iñaantanaka tyaapa.

### *Raanakiri Jesoshi Peraatoki*

<sup>28</sup> Okitejiitaanaki rookanakiro maawaeni ipanko Kaejashi. Raanakiri Jesoshi ipankoki Peraato, riraga oroomajatzi rirotaki jewawentziriri joriyyo. Kaari joriyyo, rootaki kaari ikowanta joriiyopaeni ikyaapae ipankoki. Ikantzi riraga jewatatsiri joriyyo:

—Rooteentsi owawentakotaari Tajorentsi aaka akenkithatakoteeri paeraniperorōña aririka rawijanakiri joriiyopaeni ronampiri Tajorentsi janta Ejijipotki. Aririka aate inthomaenta ipankoki Peraato eero amatziro oya aaka, eero iñaaperotee aaka Tajorentsi akameethatzti.

<sup>29</sup> Roojatzi riyowashitantanakariri Peraato. Ikantawakiri riraga amaeyakiririnira:

—¿Itaka rantakiri irika shiramparika pamantakinariri?

<sup>30</sup> Ikantapaakiri rirori:

—Eenitatsi rantayitzirini. Eeromi rantziromi kaari kameethatatsi, eero namimirimbi.

<sup>31</sup> Roojatzi ikanantawitakari Peraato:

—Paaneeri eerori. Tema ojeeki jankinarentsi pashi yotayimiri powashironkaantyaariri. Pimateri eerori powashironkaeri.

Ikantapaakiri rirori:

—Tee ishineteetanari nowamaeri.

<sup>32</sup> Rootaki ikantakiriri omonkaatantakari ikantzitakari Jesoshi. Tema ikantzitani: "Ari ikentakoteetena koroshiki".

<sup>33</sup> Roojatzi ipiyantanaa Peraato ipankoki. Ikaemakaanteeri Jesoshi. Ikantziri:

—¿Eerokama jewawentziriri joriyyopaeni?

<sup>34</sup> Ikantawakiri Jesoshi:

—¿Piyowitakinaka? ¿Iitaka pojampitananari? ¿Eenitatsima paashini kaman-takimiri?

<sup>35</sup> Rakanakiri:

—¿Naakama iroñaaka joriyyo? Rivotaki atziri amakimiri jaka, riraga jew-atayitatsirini ñaanakowenantatsiri. ¿Iitaka pantakiri ikijantakimiri maawaeni?

<sup>36</sup> Ikantawakiri riraga Jesoshi:

—Tee nopinkathariwenantzi jaka kipatsiki. Nopinkathariwenanterikami jaka, aritaki ikijakowentakinami maawaeni nonampiri: eeromi ishinetzirim i rirori riraga joriyyopaeni ramakinami. Omaanta tee jaka nopinkathari-wenantzi.

<sup>37</sup> Roojatzi ikanantakari:

—¿Kyaaryooma? ¿Eerokama jewaperotatsiri?

Jee, naaka jewaperotatsiri. Kyaaryo pikantakina. Nokantziri maawaeni atziri kyaaryooperotatsiri. Rootaki natziritantapaakari, rootaki nopokantakari kipatsikika. Maawaeni riraga iyotanakirori kyaaryooperotatsiri, rivotaki maawaeni aapatziyani.

<sup>38</sup> Ikantziri riraga Peraato:

—¿Oetaka iroka pikantziri: "kyaaryooperotatsiri"?

Roojatzi riyowashitantanari irira riraga joriyyopaeni, ikantakiri maawaeni:

—Nojampitawitakimi inkaaganki, tee pikantana iitaka rantaperotakiri nowamaantyaariri.

### *Riraga Peraato ikowawitaka ipakayerimi Jesoshi*

<sup>39</sup> Eekiro riyaatatzi ikantzi:

—Aririka omonkaatapaeya Kitejitsatsiri Rawijantariri Ronampiri Tajorentsi, noeyowapiintzimiri apaani romonkeetziri. Tema aritaki okantari ameteeyarini. ¿Pikoyima noeyowaemiri jewaperotzimiri?

<sup>40</sup> Roojatzi ikaemantanaka maawaeni:

—Eero poeyowaanari irira, inta poeyowaenari riraga Warawaashi.

Tema irira rivotaki koshintzi.

## 19

<sup>1</sup> Roojatzi raakaanantakariri Peraato riraga Jesoshi, ipajatakaantakiri.

<sup>2</sup> Riraga joraaro itapotayitakinirini ramantheeri kitochee okimiwitakawo tsikontochee. Ramantheetakaakariri. Ikithaatkiri kityonkamawori.

<sup>3</sup> Ipokashitapiintakiri maawaeni riraga joraaro iñaathawaetashitari ipinkathatziri, ikantajeempiyashahtapaakari:

—Eeroka jewawentziriri joriyyo nopinkathatemi. Injii, injii, injii.

Roojatzi ipajawootantapaakari rakoki.

<sup>4</sup> Rapiitziro riyowashitaneeri Peraato jewatatsiripaeni joriyyopaeni. Ikantziri:

—Rivotaki irika, napiitzimiri namaemiri. Nojampitawitakimi, omaanta tekatsi pikanteeyinani niyotantyaari iitaka pikijantakariri. Namakaanan-tariri paminerri eerokapaeni nopajatakaantakiri. Omaanta tee niyotzi iitakakya nowamaakanantyaariri.

<sup>5</sup> Riyowanee Jesoshi rirori. Ramantheetakawo okimiwitakawo tsikontochee, ikithaatkawo kityonkamawori. Ikantajeeyirini Peraato:

—Riotaki irika. Ņaakiri, nopajatakaantakiri.

<sup>6</sup> Raminawakiri jewatayitatsirini ūnanakowenantatsiripaeni eejatzi waairiyaapaeni. Ikaemanaki:

—¡Pikentakotakaanteri koroshiki! ¡Pikentakotakaanteri koroshiki!

Ikantziri Peraato:

—Pagaeyanakirini eeroka, pikentakotakaanteri. Nojampitawitakari, tekatsi nokemakotziri rantzi iitakarya nowamaakaanantyaariri.

<sup>7</sup> Ikantawakiri jewatatsiri Tajorentsipankoki:

—Eenitatsi Iwaperite Tajorentsi iyotaanari okameethatzi ikame iitajorentsishita. Tema ikantzi rirori: “Naaka Itomi Tajorentsi”, rootaki okameethatantakari ikame.

### *Rapiitakiri riraga Peraato rojampitakiri Jesoshi*

<sup>8</sup> Ikemantawakariri Peraato ikanteeyakiririni eekiro riyaatatzithaa wap-erotanaki.

<sup>9</sup> Ipiyakaanaari, ikyaanee ipankoki eejatzi Jesoshi. Ikantapaeri riraga Peraato:

—¿Tsika piponaaaka eeroka? ¿Ninkami eeroka?

Tee rakanakiri rirori.

<sup>10</sup> Roojatzi ikanantanakari:

—¿Itaka kaari pakantana? Naaka jewatatsiri atziriki. Nokowakirika, ari nomatero nookakaakowentemi. Eejatzi okimitaka, nokowakirika, nomatero nokentakotakaantem kcoroshiki. Tema piyotakiro.

<sup>11</sup> Ikantawakiri Jesoshi:

—Eeromi ishinetzimimi Tajorentsi, tekatsi pikantenami. Riraga amakaantakinari jaka, rirotaki antaperotakirori kaari kameethatatsi.

<sup>12</sup> Roojatzi ikowantawitanaka Peraato ipakaerimi. Omaanta rapiitziro ikaemanaki jewatatsiripaeni joriyopaeni:

—¡Aririka pipakaeri irira, tee pitsipamintatari Seesari! Irika riraga kantashitachari: “Naaka jewatatsiri”. Tema rirotaki kijakiriri peewatzinkarite riraga Seesari janta Oroomaki.

### *Ikentakotakaantakiri riraga Jesoshi*

<sup>13</sup> Ikemantakari Peraato ikanteeyakiririni riyowakaaneeri Jesoshi. Janta riwetsikaetzironta, oenokamentotsi iwetsikaetziri mapi. Janta eenitatsi jeekamentotsi ijekapiintzira Peraato ikantakowenantapiintzirira atziri. Nokantziro naaka maawaeni joriyo: “Kawaata”.\*

<sup>14</sup> Okitejitanaki Kitejitalsiri Rawijantariri Ronampiri Tajorentsi janta Ejipitoki. Roojatzi ikanteeyantakarini Peraato:

—Riotaki irika jewatatsiri pashi eerori.

<sup>15</sup> Omaanta ikaemaeyanakini riroripaeni:

—¡Payeri! ¡Paanakiri janta! ¡Pikentakotakaanteri koroshiki!

Rojampitziri ikantziri:

—¿Nokentakotakaanteri piwinkatharite?

Ikantawakiri riroripaeni:

—Tee nopinkatharitakaayiri, omaanta apaniroeni Seesari nopinkatharitakaayiri.

<sup>16</sup> Roojatzi ikantakiri joraaropaeni:

—Paaneeri pikentakoteri.

Roojatzi raantanakari.

### *Ikentakotakaantakiri Jesoshi janta koroshiki*

\* <sup>19:13</sup> Ikantziro rirori ipaanteki arameeyojatzi Kawaata: opatzito pankotsi.

<sup>17</sup> Roojatzi raashitantanaka Jesoshi koroshi. Rookanakiro pankotsipaeni ryiwakotantanaki owtieenkapaataga inkokironta antawopaeni mapi, rareetantapaakawo tonkaariki oetachari litonakintsiki. Iitziro rowaga tonkaari joriyyopaeni: "Koorikota".

<sup>18</sup> Aritaki ikentakotakiri koroshiki. Itsipatakari apite shirampari. Iken-takotakiri riroripaeni paashini koroshiki apite. Rowamagaetakiri Jesoshi rojatekaetakiri niyanki. Apaani rowamagaetakiri rakoperoki Jesoshi, riraga paashini rampateki.

<sup>19</sup> Peraato rojankinatakaantaki kantatsiri: "Jesoshi najareetejatz, rirotaki jewawentziriri joriyyopaeni". Ipatakotakantakiro koroshiki.

<sup>20</sup> Okaakintawo nampitsi aritaki ikentakotakiri Jesoshi. Osheki jewatatsiri joriyyopaeni ñaanatakirori rojankinatziri. Ojankinatawitaka ipaante joriyyo, eejatzi oroomajatzi eejatzi ipaanteki kireeshiyajatz.

<sup>21</sup> Riraga jewatayitatsirini ñaanakowenantatsiri joriyyopaeni ikantziri Peraato:

—Tee okameethatzi pojankinatziro: "Riotaki jewawentziriri joriyyopaeni", inta pojankinate: "Irira kantashitachari: pinkathariwentziriri joriyyo".

<sup>22</sup> Ikantawakiri Peraato:

—Aritaki, nomatakiro: nojankinatakaantakiro. Eero ninashitawo nojank-inari.

<sup>23</sup> Ari ikentakotakiri joraaro. Ari ikaatzi 4 joraaro: itakariri rayitakiri ipashikari iïtoki, paashini ishintonromashite, paashini ijapatote, paashini iithari eejatzi. Omaanta ipewiryaaotari, tee oshirika inta ontyaajaam-panatashita maawaeni.

<sup>24</sup> Rootaki ikanantawakagaeyakarini:

—Eero atzijagaero. Thame añaathawaetawentyaawo ninkarika ayiterini.

Aritaki ikantari joraaro. Imonkaatakiro kantatsiri Iwaperiteki Tajorents, ikantzi: "Ipawakaayitawoni noethaarini. Ipankinatzitenawo nopewiryaaotari".

<sup>25</sup> Rowaga riniro Jesoshi okatziyapaaka okaakini ikentakotakaga. Otsipatawo irentopero, roojatzi owaero Mariya. Rootaki iina Kerejowashi. Eeniro jaga eejatzi Mariya makaraarajato. Eejatzi naaka nokatziya okaakini.

<sup>26</sup> Iñaanakiro Jesoshi riniro, eejatzi iñaaquina naari. Ikantziro:

—Nana, ajaa, irikakya Jowa rirotaki pitomintanakyaari.

<sup>27</sup> Ikantanakina:

—Ajaa, rootaki pinironteeyarı pitsipataperoteeyawo.

Roojatzi naantanaawo nopankoki noshenantawori. Ro ikanantanari teminintashireperotakina.

<sup>28</sup> Riyotanaki Jesoshi aritaki monkaataka maawaeni. Roojatzi ikanantanaka:

—Nomiritaatyami.

Ro ikanantari imonkaatakiro okantziri Iwaperite Tajorents.

<sup>29</sup> Eenitatsi jaga chomokira yikitaki kepishaari. Ijashiteetakiniri piyonkashinkanarikira. Rojataakiniri jawokiikira. Ipakotakiri ipaantekira riraga Jesoshi.

<sup>30</sup> Ratsimiyawakiromi roojatzi ikanantanaka:

—Aritaki iroñaaka, nomonkaatakiro ikowakaakinari Pawa.

Roojatzi roeyotantanaka, ikamanakni.

*Rojataakiri Jesoshi*

<sup>31</sup> Iroñaka riwetsikawenteeyironi joriyo kitejiri nomakoryaantapiintari. Itzirorimatanakirika oorya, rooteentsi areetya saawaro rootaki kitejitsirii nomakoryaantapiintari. Tee ikowaeyini joriyyopaenii riraga kentakoeyeencharini rowawijeero koroshiki, rootaki ikanteeyantakaririni Peraato:

—Pikagaakaantero iporipaeni, roojatzi pojataakaanantanakyaariri, ikamantyaari intsipaete.

<sup>32</sup> Roojatzi ryaatashitanteeyanakaririni joraaro, ikagaaporitakiri iporikira riraga tsipatakariri riraga Jesoshi. Eejatzi ikagaaporitayiteetakarini paashinipaeni.

<sup>33</sup> Apatziro rowashiwitapaakari Jesoshi, ikagaerimi iporikira: omaanta iñaapaakitziri kamaki, rootaki kaari ikagaantari iporiki.

<sup>34</sup> Omaanta apaani joraaro rojataapaakiri imerikiki. Iyowaatanaki riraatyonkininini. Eejatzi iñaa iyowaatanaki.

<sup>35</sup> Naaka ñaakotakiriri, iroñaka naaka kantakotakiriri paapatziyantyaariri Jesoshi. Niyotki kyaaryo nokantzimiri.

<sup>36</sup> Aritaki ikanteetakiriri, eejatzi omonkaataka Iwaperite Tajorentsi kantatsirini: “Eero ikagaayiteetzirini itonki apaani”.

<sup>37</sup> Eenitatsi paashini jankinarentsi Iwaperiteki Tajorentsi okantzi: “Aritaki ramineeteri Rotyaantanewo Tajorentsi, riraga rojatagaetakiri”.

### *Romonkeetakiri Jesoshi omookira*

<sup>38</sup> Eeniro janta ijekaki koroshiki Josee arimateeyajatzi. Riyotaanewo Jesoshi naawita, omaanta imanakiro. Ro imanantakawori ithaawan-takari jewatatsiripaeni joriyyopaenii. Omaanta ishirampariwentanakirii ryaatashitakiri riraga Peraato ikantapaakiri:

—Pishinetayenari Jesoshini, naaneeriita.

Ikantawakiri:

—Paaneeri.

Roojatzi ryaatantanaka ragaateri.

<sup>39</sup> Itsipatanakari riraga Nikoreemo. Rivotaki jatashitziriri paerani Jesoshi tsitiririki. Raakotanakiniri itziritantyaariri. Imaemañaaatziro owaa inchato owaero miira, eejatzi opane inchato owaero aaroe. Aamaashita okaatzi otenatzi 30 kiïro.

<sup>40</sup> Ragaetaatziri Jesoshini. Ro tokoyatha rapineetakotantakariri, itsipatakiro kajankari. Rootaki rametari joriyyopaenii aririka riwetsikeri kamsatsiri.

<sup>41</sup> Ojeekinta pankirentsi okaakini ikentakoeyakirininta koroshiki. Janta pankirentsi ojeekinta rowanteetyaariri, owakirarika imokaetzirika.

<sup>42</sup> Rooteentsi itziroryaanaki oorya, omonkaantantyaari kitejiri amakoryaantapiintari. Iñaakiro Josee okaakinitaki omoo. Rootaki rowantakariri Jesoshini janta. Ari ipinaashitanakiri mapi omooki. Ipiyanaa maawaenipankotsiki.

## 20

### *Okowawitari Mariiya Jesoshini*

<sup>1</sup> Otominkotapaaki. Rooteentsi okitejitzimate iyaatakaakiro Mariiya makaraarajato janta omooki rowawiitakarinta Jesoshini. Oñaapaakiro ookanaka mapi rashitakotantawitakariri.

<sup>2</sup> Oñaapaakiro inthomaenta omooki. Tee oñiiiri Jesoshini. Tekatsi. Os-hiyakaanakawo roori. Ari areetapaaka pankotsiki tsikarika nojeeki naaka eejatzi Peetero, okamantapaakina:

—Tekatsi Jesoshini omooki. Tema ragaetaneeri. Tee ayotzi tsikarika owaetakiri.

<sup>3</sup> Okamantapaakina, niyaatantanakari naaka eejatzi Peetero. Niyaatanaki rowawiteetakarinta.

<sup>4</sup> Noshiyanaka apite, omaanta nanaakotakiri Peetero.

<sup>5</sup> Niyowapaaki noeyotapaaka naminantapaakari inthomaenta. Noñiilo tokoyatha öukanaka omooki, omaanta tee nokyaapae. Tekatsi iwatha Jesoshini.

<sup>6</sup> Rimpetaapaaki ipokapaaki riraga Peetero. Rirotaki kyaapaentsiri inthomaenta. Roojatzsi iñaapaakiro tokoyatha.

<sup>7</sup> Eejatzi rowaga paaño opashikantawitakariri iitoki, tee otsipatawo tokoyatha. Apitziwita ookashitanaka roori.

<sup>8</sup> Ari nokyaanaki naaka, noñaakiro, roojatzi niyotantanakari piriintanaa Jesoshi.

<sup>9</sup> Tekiraata nokenkithashireeyironi Iwaperite Tajorentsi kantatsiri: "Ika-makirika Rotyaantanevo Tajorentsi, aritaki ipiriintanee".

<sup>10</sup> Noñaapaakiro, nopiyanaka nopankoki.

### *Aminawakiri Mariiya Jesoshi*

(*Mr. 16.9-11*)

<sup>11</sup> Omaanta Mariiya makaraarajato opiya omooki eejatzi katziyeen-charira inkokiroeni, iraakotakari riraga Jesoshini. Oeyotanaka, aminanaki inthomaenta.

<sup>12</sup> Oñaakiri apite ronampiri Tajorentsi, ikithaatavo kitamaari. Ijeekaki rowawiteetakarinta Jesoshini. Ijeekaki apaani iitokira rowawiitakarira Jesoshini, paashini iitziki.

<sup>13</sup> Ikantziro:

—Tsinani, ¿iitaka piraantari?

Okantawakiri irowa:

—Ragaetanakiri Nowinkathariteni. Tee niyotzi tsikarika rowaetakiri.

<sup>14</sup> Roojatzsi opithokaantanaka. Oñaamacheetawakari riraga Jesoshi ikatziya-paaka, omaanta tee iyotawakiri.

<sup>15</sup> Ikantziro:

—Tsinani, ¿iitaka piraantari? ¿Ninka pikoyirika?

Oetakaashiwitakari irira rirotaki thamaetakotzirori pankirentsipaeni. Okantziri:

—¿Eerokama aanakiriri Nowinkathariteni? Pikamantenaata tsikarika powakiri. Aritaki naakiteri naari.

<sup>16</sup> Ikantziro:

—Mariiya.

Opithokanaka, okantawakiri:

—¡Iyotaanari!

<sup>17</sup> Okimoshiryaantari okenkithashireeya ipiyaka. Oerikawakiri. Roojatzsi awithakitantawakariri. Ikantziro:

—Pipankaena, eero poteyaana. Tekiraata noenokana Pawaki. Iroñaaka nokowaki piyaatashiteri maawaeni aapatziyanari, pikamantapaakiri maawaeni rooteentsi noenokaeya Pawaki. Tema rirotaki Tajorentsi. Tema rirojatzsi Piri eeroka, piyotziri rirotaki Tajorentsi, rootaki pipinkathatantariri.

<sup>18</sup> Roojatzsi opokashitantaanari naaka, eejatzi paashini riyotaanewopaeni, okamantapaakina maawaeni:

—Noñagaerikya Awinkatharite.

Eejatzi okamantapaakina okaatzi ikantayitakirorini rirori.

### *Ritapaakari Jesoshi, roñaagaeyerini riyotaanewo*

<sup>19</sup> Itsiteniityaanaki oorya, nopyoteeyakani, nokaatakiri paashini riyotaanewo. Nothaawantari jewawentziriripaeni joriyyopaeni, riraga owa-makaantakiririni Jesoshini, rootaki noyaawitantakawori ashitakontsi. Romapokashitapaakina riraga Jesoshi ikatziyapaaka niyanki. Ikantapaakina maawaeni:

—Pikimoshireeyanakini maawaeni.

<sup>20</sup> Roojatzti roñaagantapaakinawori maawaeni rako eejatzi imerikiki. Noñaawakiri maawaeni rirotaki Nowinkatharite, roojatzti nokimoshiryaaantanaka maawaeni.

<sup>21</sup> Rapiitakina:

—Pikimoshireeyanakini maawaeni. Rirotaki paerani otyaantakinari Pawa, eejatzi eerori iroñaaka nokimitemi eeroka, notyaantemi.

<sup>22</sup> Roojatzti itajonkantanakina maawaeni, joo. Ikantzi:

—Pagaero Ishire Tajorentsi, kijokiro owaeyanakimini maawaeni.

<sup>23</sup> Piñaakiri atziri raapatziyaperotakina, roojatzti pikantyaaariri: “Ikamintheemi Tajorentsi eerori, eero ikijawentzimiro pantayitzirini”. Rootaki ikaminthaaperotantyaaariri Pawa riraga pikantziri. Pikanteririka paashini atziri: “Tee paapatziyari Jesoshi, rootaki ikijawenantemirori Tajorentsi”, aritaki paata ikijawentakimiro.

### *Ikanteeyakirini Tomashi: “Noñeyakirinika Awinkatharite”*

<sup>24</sup> Ipokashitanteeyakinarini, tee añiiri Tomashi, riraga ii teetziri Tsipantzi: apaani peyeenchari.

<sup>25</sup> Ipokantapaakari irira, nokamanantawakari:

—Noñeyakirinika Awinkatharite.

Omaanta ikantana:

—¿Kyaaryo? Tee naapatziyawo. Nokoyi noñeero rako, tsikarika ikyaaki kiraawo, nokoyi nomonkeero nakoempeki. Eejatzi nokoyi nomonkeero nako imerikiki. Eerorika nomonkiro, eero naapatziyawo.

### *Rapiitakiri iñeeyakirini riyotaanewo riraga Jesoshi*

<sup>26</sup> Awijanaki apaani tominko, ari napiitziro nopyoteeyanakan pi kotsiki, itsipatakina maawaeni riraga Tomashi. Oshekini nothaawantakari maawaeni kijanakinari, rootaki napiitantakawori noyaawitantakawori ashitakontsi. Rapiitapaakina romapokapaakina riraga Jesoshi, ikatziyashitapaaka niyanki. Ikantapaakina maawaeni:

—Pikimoshiryaañakaaroña maawaeni.

<sup>27</sup> Roojatzti ikanantapaakari riraga Tomashi:

—Paminero nako. Pakote, pomonkeero pakoempeki jaka. Pakote, eejatzi pomonkeero pako nomerikikika. Eero pitheenkanā, inta paapatziyena.

<sup>28</sup> Roojatzti ikanantawakari riraga Tomashi:

—Eerokaperotaki Nowinkatharite, eerokaperotaki Notajorentsite.

<sup>29</sup> Ikantapaakiri:

—Iroñaaka piñaakina, rootaki paapatziyantakinari. Eenitatsi kaari ñaanari, omaanta raapatziyeyakinaní: nokimoshireperotakaanakiri maawaeni irikapaeni.

<sup>30</sup> Oshekini itajonkantayitakini riraga Jesoshi. Naaka maawaeni riyotaanewo, noñeyakirini, omaanta tee nojankinatziro maawaeni jaka.

<sup>31</sup> Ro nojankinatantakawori iroka paapatziyantyaaariri maawaeni riraga Jesoshi rirotaki Rotyaantanewo Tajorentsi, riraga Itomi. Aririka paapatziyakayaari, aritaki rowañaakimi pikantyaani ijekakaayemi rirori.

## 21

### *Rapiitziri riyotaanewo 7 iňaakiri Jesoshi janta Karireeyaki*

<sup>1</sup> Nokanta nopyieeyanaani naakapaeni riyotaanewo janta Karireeyaki. Roojatzi rapiitana roňaagapaana riraga Jesoshi, eejatzi paashinipaenri riyotaanewo. Noňeeyawaerini othanyaakiini inkaareki Teweeryashiki. Iitziro eejatzi Inkaare Karireeya. Aritaki okantakari.

<sup>2</sup> Nopyoteeyakan, naaka itomi apite Sewereeyo. Nokaateeyirini Peetero, eejatzi riraga Tomashi. Itsipatana Nataneeri, riraga karireeyajatzi poňaachari Kanaaki. Eejatzi eenitatsi apite paashini riyotaanewo Jesoshi. Nopyotaka maawaeni.

<sup>3</sup> Ikantana Peetero:

—Niyaate noshiryaate.

Nokanteeyanakirini:

—Eejatzi naari.

Ari niyaateeyanakini. Noteteeyapaakani maawaeni pitotsiki. Noshiryaatawita, roojatzi nokitejitakotantaka. Tekatsi nayi.

<sup>4</sup> Okitejitanaki ikatziyapaaka riraga Jesoshi othanyaakiini. Tee niyoteeyawakirini.

<sup>5</sup> Ikantapaakina:

—Notsipaminthari, ¿Paaki shima?

Nokantawakiri:

—Tekatsi.

<sup>6</sup> Ikantakina:

—Apawo pishiryaate pakoperoki, aritaki paaki.

Ari noshiryaatanaki maawaeni. Naaki oshekiniroňa shima, tee naawyakotziri notetakoteri nopitoki.

<sup>7</sup> Naaka nokantziri Peetero:

—Jaa, rirotakimakya Awinkatharite.

Ari ikithaatanakawo rirori iithaari. Ipiinkashitanakiri ramaatanaki othanyaakiinira raatapaaka.

<sup>8</sup> Nimpaeetakotapae naakapaeni, nonoshikakotziri shima. Okaakitapae othanyaakiini, aamaashitaka okaatzi 100 meetero.

<sup>9</sup> Nomitaanaki maawaeni omerikyaataki othanyaakiiniki. Noňaapaaki paamari, itashitziri shima. Eenitatsi eejatzi paa.

<sup>10</sup> Ikantawakina:

—Pamagaantakinari iroňaaka shima pishiryaatakirira.

<sup>11</sup> Rapiitziro rotetapaa Peetero pitotsikira inoshikaatakotapaakiri shima ishiryaatamentoki kipatsiki. Yeekiperotaki antaripaeni shima, ikaatz 153. Oshekiperorona omaanta tee opejanaki noshiryaatamento.

<sup>12-13</sup> Ikantawakina:

—Ajaa, poya.

Ikagaakinawo paa eejatzi ikagaakinari shima. Nowaeyakarini maawaeni. Nothaawantakari nokanterimi: “¿Ninkamika”? Maawaeni niyotawakiri rirotaki Awinkatharite.

<sup>14</sup> Ikamaki chapinki Jesoshi, ipiriintanaa. Rootaki roňaagaana eejatzi maawaeni riyotaanewo. Iroňaaka okaatzi 3 roňaagaana naakapaeni.

### *Riraga Jesoshi ikenkithatakaakiri Peetero*

<sup>15</sup> Nowaeyakan maawaeni. Roojatzi rojampitantakari Jesoshi riraga Shimo, iitziri Peetero:

—Peetero, ¿panaakotakiri irikapaeni, pinintashireperotana eeroka?

Ikantawakiri rirori:

—Eeroka, Nowinkatharite, yotatsiri nonintzimi.

**Ikantanakiri:**

—Piyoteeri riraga aapatziyanari: tema ari roshiyakaari nashi nowishaanite.

**16 Rapiitakiri, ikantawakiri:**

—¿Pinintashiretana?

**Rapiitawakiri ikantawakiri:**

—Jee, Nowinkatharite, eeroka yotsatsiri nonintashiretzimirika.

**Ikantziri:**

—Pikempoyeenari maawaeni ameenteeyakinarini.

**17 Rapiitziro rojampitziri, tres-tapaentsiri. Ikantziri:**

—¿Pineshironkatanama?

Roojatzi rowashirewaetantanaka Peetero. Tema ro rowashiretantakari okaatz 3 rojampitziri Jesoshi okimitaka chapinki riraga Peetero imanakotashitaka okaatz 3. Ikantawakiri:

—Eerokakya, Nowinkatharite, yotzirorikya maawaenikya. Piyotana eeroka nonintashiriimirika eechonkiini.

**Ikantziri:**

—Pikempoyeeri kameethariri maawaeni aapatziyanari. Tema roshiyawitaari nowishate. Piyotakoperotakina.

**18 Kyaaryootaki iroka nokantemiri:** paerani, eeniro pewankariwaet-zini, pikithaatapiintawoni piithaari. Piyaatapiintayitzini tsikarika pikoyiri piyaate: tekatsi atziri kantemini: “Eero piyatzti”. Omaanta aririka pantyashipariperotapaaki, pakote pakoki, roojoteetemi, ikithaatemi paashini-paeni. Raanakimi janta tsikarika tee pikowawita piyaate.

**19 Aritaki ikantakiri.** Riyotaakiri tsika ikantyaari rowamagaetantyaariri Peetero iinja. Aririka iñeeteri ikamaki, riyotanaki maawaeni iñaoperotakiri Tajorentsi ikameethatzi. Roojatzi ikanantanakyaari:

—Thame, poyaatanakina.

**20 Ipitohanakanaka Peetero.** Iñaakina noyaatanakiri, rooma naaka riyotaanewo Jesoshi inintaperotziri. Chapinki nowakagaeyantakaririni Jesoshi, naaka ojampitakiriri: “Nowinkatharite, ¿ninka aakaanteminika?”

**21 Iñaantakinari Peetero, rookotana, eejatzi ikantziri Jesoshi:**

—Nowinkatharite, ¿tsika ikanteeterika iinja riraganki?

**22 Ikantawakiri:**

—Nokoyirika ijekanakiita jaka roojatzi nopyianteyyaari, eero pikenkithashiryaaotari. Omaanta eeroka poyaatenataa.

**23 Rowagaeyakinirini** maawaeni paashinipaeni aapatziyariri Jesoshi okaatz ikanztiriri irira. Iitashiwitaka irira eero nokami. Omaanta tee ikantzi Jesoshi: “Eero ikami Jowa”. Inta ikantawitari: “Nokoyirika ijekanakiita jaka roojatzi nopyiantakyaari, eero pikenkithashiryaaotari”.

**24 Naakapero** riyotaanewo riraga Jesoshi, jankinatzirori iroka. Noñiiro maawaeni. Niyoteeyakini kyaaryooperotaki maawaeni iroka nojankinatakiri.

**25 Teera** nohotziro nojankinatziro maawaeni rantayitakirini Jesoshi. Arimi ojankinatayitakotyami maawaeni, rantayitakirini, naamaashitya ari iyekitakiromi maawaeni kipatsi iñaanamentopaeni.

Ari okaatz.

Naaka jankinatzirori:

Jowa

## RANTAYITAKIRINI ROTYAANTANEWO JESOSHI

*Rookashi rapiiteeniri rojankinatakiniri Teyoojiro*

<sup>1</sup> Nokoyi niwethatemi, nonintanewo Teyoojiro. ¿Tekatsima oyemini? Naaka kameetha. Paerani nitantakawori nojankinatantakimirori, niyotaantakimirori osheki rantayitzirini Jesoshi. Eejatzi niyotaantakimirori osheki riyotaantayitzirini.

<sup>2-3</sup> Ari iñaashitzimaetakawo ikamakira, ari rañaagae, roojatzi roñaagantapaakarirri riyotaanewopaeni. Osheki iñaakotapiinteevirini rantapaakiri rirori, rootaki riyoperotantarirri rañaagae. Okaatzi 40 kitejiri roñaagapiinantariri. Ikenkithatakotziri tsikarika ikanta Tajorentsii reewawanantzi. Rotyaantanakiri riyotaanewopaeni riyoteeri paashini atziri oetarika ikowakaakiriri ranteri. Ro kantziriri Ishire Tajorentsii. Roojatzi riraga Tajorentsii raaneeri Itomi jenokinta, roojatzi noweyaantakawori nokenkithatakotakiri paerani. Iroñaaka eekiro niyaatatzii nowaayemiro nokantemi rantziri riraga rotyaantanewopaeni Jesoshi, riraga otyaantanakiriri paerani.

<sup>4</sup> Apaani kitejiri, tekira riyaateejenokinta, ikaatakagaeyakirini Jesoshi eejatzi riyotaanewopaeni ikantaperotakiri riraga Jesoshi:

—Eero pookanakiro Jerojareeki, nokowaki poyaawakiroota ikashiyakaakimiro Ashitanari, rowaga pikemakinari chapinki nokantztakimiriroña.

<sup>5</sup> Riraga Jowani ikaawoshitakotzimiri Tajorentsii iñaaki, riyotantakari atziri paapatziyari Tajorentsii. Omaanta eero ojamanitzi opokashitemi Ishire Tajorentsii, okithaatakaapaakimi, riyotantyaari atziri kyaaryo pikemijantaperotakina naari.

*Roenokantanakari Jesoshi jenokinta*

<sup>6</sup> Paashini kitejiri ipiyotawenteeyakarini Jesoshi riyotaanewopaeni ee-jatzi paashinipaeni aapatziyariri janta tonkaariki owaero Oriiwomashi. Rojampiteeyirini. Ikantziri apaani:

—Nowinkatharite, aaka isheninkani riraga achariniiteni Ishireeyeerini. Paerani ijeekawitani jewawanantatsiripaeni achariniitenipaeni; omaanta iroñaakaroña tekatsi. ¿Arima iroñaaka pikanteri paashini reewawenteeyenani? Osheki nokowaki.

<sup>7</sup> Ikantawakiri:

—Tee ikowakayimi Ashitanari piyotero tsikarika okaate. Ojamanitzi-irika rooma tsikarika okaate. Apatziro Ashitanarikya apaniroeni kantsatsini.

<sup>8</sup> Iinja itajonkawenteeyeminiita eejatzi opokashiteeyemini Ishire. Omatakayemi, rootaki nokowakaakimiri pikenkithatakotena jaga Jerojareeki, eejatzi pithotyaanakiro Joreeyaki pikenkithatakotena. Eejatzi pikenkithatakotena janta Jamaaryaki, eejatzi pithotyaanakiro maawaeni paashinipaenikinta kipatsikinta, pikenkithatakotena. Tsikarika piyatae nokowaki pikenkithatakotena.

<sup>9</sup> Rootaki ikantanakiriri Jesoshi. Ari ramineeyawakirini maawaeni, roojatzi roenokantana jenoki, ipeymotanakari menkoriki.

<sup>10</sup> Ari ramineeyanakirini jenoki joreririri, jatanaki. Ari romapokapaakiri apite ronampiri Tajorentsii, ikatziyimoeyapaakarini. Ikimitapaakari shi-rampari; kitamaamawori imaatha.

<sup>11</sup> Ikantapaakiri:

—¿Eeniromi, karireeyajatzi? ¿Litaka eekiro paminanta jenoki? Piñaawakiri riraga Jesoshi roenokanaka jenokinta. Eejatzi ipiye paata. Aririka ipiye, ikimitapaeya iroñaaka ryaatantanaari.

**12** Roojatzi roerinkantanaa taapiki, ipiyeyanaani Jerojareeki riraga rotyaatelanewo Jesoshi kimitaka apaani kiroometero. Ökaakini Jerojaree, tee inteenaperotzi.

**13** Ari rareeteeyapaakani, rateeteeyapaakini oshitamenkota jenoki. Janta imaapiinteeeyininta riraga Peetero, eejatzi Jowa, Jantyaako, Antereeshi, Jiripi, Tomashi, Waritoromee, Mateeyo, Jantyaako (riraga itomi Arijeyo), Shimo (riraga kathaaperotzinkari antayitzirorini oetarikapaeni), eejatzi Joorashi (riraga itomi paashini Jantyaako), imaapiinteeeyini maawaeni.

**14** Ari rapiitapiinteeeyironi ipiyoteeyani eejatzi ikenkithatakagaeyirini Tajorentsi. Itsipateeyarini rirentziipaeni Jesoshi, eejatzi riniro rowaga Mariya, eejatzi paashinipaeni tsinani. Aritaki ikantani ikenkithatakapi-inteeeyirini Tajorentsi.

### *Riyoyaayitantakaririni Mateeyashi poyaatariri Joorashini*

**15** Ari paashini kitejiri ikatziyanaka riraga Peetero ikatziyimoteeyanakarini iyemijantzinkaritepaeni. Aamashitya ikaateeyini 120.

**16** Ikantzi:

—Nojoriyyotzinkaritepaeni, okameethatzi amonkaatero okantzirini Iwaperite Tajorentsi. Paerani iyoteerini Ishire Tajorentsi Iravirini ikenkithatakotantaririni Joorashini: riraga jewateeyakiririni agaeyakiririni Jesoshi.

**17** Aritaki akaateeyawitariniroña. Paerani itsipateeyawiteeni rantawaetakaawitakina.

**18** Omaanta raakaantashitaari Awinkatharite, ipinatashiteetawitakari korki. Raawitakari, roojatzi roepiyeeniri, rirotaki koriki ramanananteetakawori kipatsi. Roojatzi irira ishirikananaka, shirik; ithatanaka. Roojatzi ithatyaakotantanaka, thatzik; ipityaanakanaka; roojatzi ikotaantapaaka imotziki, waag, iyowapaaki isheeto.

**19** Riyoteeyakirini maawaeni jerojareejatzi. Rootaki iitanteetawori kipatsi ramananteetziri Asheererama. Akantziro apaanteki aaka: “Iwinawoni Jesoshi rowamaanteetawitakariri”.

**20** Aritaki paerani rojankinateetzironi mampaantsi kantatsiri: “Okaankipankotanaki ipankoni akaanterini Awinkatharite, tekatsi jeekantzityaarini”. Eejatzi okantzini mampaantsi: “Okameethatzi eeniro poyaatyarini kenkithatakaaantatsini”.

**21-22** Iroñaaka thame akanteri paashini: “Pipoyaatyaaari Joorashini”: tema rootaki ikowakaakaeri Tajorentsi. Rirotaki akanteri tsipatapiinteeeyerini paerani: ñaaperotziriri Jowani ikaawoshitantzini, eejatzi ñaapiintziriri Jesoshi. Akowki ñaakiriri rañaagae eejatzi ryaatanee jenokinta: akanteri ikaateeyeeni akenkithatakoyerini Jesoshi. ¿Ninka akanterika iroñaaka ipoyaatyaa?

**23** Ari ikantzi paashini:

—Rirorika irika Josee Warajawaashi, iiteetziri eejatzi Jooshito. Teerika irira, rirorika irika Mateeyashika. Ari ikaemiri apite:

—Pipokanaki jaka niyanki.

**24-25** Roojatzi ikenkithatakera Tajorentsi, ikantziri:

—Nowinkatharite, eerokakya iyotzirori tsika ikanteeyarini maawaeni atziri rajankaneki. Eeniropiye ipiye. Piyotakayenari ninkarika pikowakayaari eeroka poyaatyarini Joorashini. Tekatsi ikanta iroñaaka rirori ikenkithatee eejatzi ranantee: tema kamaki rirori, jataki janta paamariki kaari tsiwakanitatsini.

**26** Roojatzi iñaathawaetaka, tema riyoyaakiri Mateeyashi. Ari ikaatawitani chapinki rotyaanewo Jesoshi 11. Iroñaaka ikaateeyeeni eejatzi 12.

## 2

### *Kitejiri iiteetziri: "Pentekoshiteshi"*

**1** Ari iroñaaka omonkaatapaaka kitejiri iiteetziro: "Pentekoshiteshi". Ari ipiyoteeyakan Jerojareeki maawaeni aapatziyariri Jesoshi.

**2** Omapokashitapaakari, ikemawakiro oshiyaaawitawori antwo tampyaa, opoematapaaki, mooo. Opoñaanaka jenokinta, othotyaapaakiro pankotsi ijekaeahtarini.

**3** Ejatzi okoñazimotashitapaakari oshiyaaawitakawori paamari, otsiparya-gaayapaakari ojeekanteyapaakarini iifotipaeni maawaeni jeekaentsiri.

**4** Okithaatagaeyapaakarini Ishire Tajorents. Roojatzi iñaawaetantanakawo inashitachari paantentsipaeni tekatsi iyoteerini, imateeyakironi rowaga oñaawaetakaapaakiri Ishire Tajorents.

**5** Ari ijeeki janta Jerojareeki joriyyopaeni, aapatziaperotawori rojankinarini Moeseeshi, ipoñaayitanakan paashinipaeni kipatsiki, tsikarika.

**6** Ikemanteeyawakaririni iñaawaeteeyanakorini, rootaki ipiyotawentapaakari osheki atziri. Ikemaeyapaakironi ipaantepero. Tee riyotakotapaeri.

**7** Rotsikanatakari, ikenkithashireeyapaakani rojampitawakagaeyapaakani:

—Tema maawaeni riraga ñaawaeteentsirika rirotaki karireeyajatzi.

**8** ¿Tsika akantaka akemanteeyanakaworini maawaeni apaanteperopaeni?

**9** Iroñaaka akaateeyakirini paaratyajatzi, meryajatzi, eraamajatzi. Ejatzi eenitatsi jeekatsiri Mesopotaamiyaki, Joreeyaki, Kaparooshiyaki, Poontoki, Aashiyaki,

**10** Jiriiyaki, Pampiiriyaki, Ejiipitoki. Ejatzi akaateeyakirini poñaayiteencharini okaakintapae Shireeneki, janta kipatsiki owaero Riwy. Ejatzi eenitatsi areetantachari poñaayitacharini Oroomaki joriyyopaeni ejatzi peyeenchari joriyo.

**11** Akaateeyakini joriyyoperotatsiri ejatzi peyaachari joriyo. Akaateeyirini kireeshiyajatzi eejatzi araawayajatzi. Akemaperoyakironi ashi apaantepero omawitya inashita atziri rash ipaantepaeni ikemayitzironi.

**12** Ari rotsikanateeyanakarini oshekyantzi atziri, tee riyotakotziri. Rojampitawakagaeyanakani:

—¿Tsika akantaka akemantawori apaantepero?

**13** Omaanta paashinipaeni, ishirontawenteeyanakarini, ikantzi:

—Ishinkiteeyakani irinta, injii, injii.

**14** Ari eeniro janta riraga Peetero, akaateeyirini paashinipaeni rotyaanewo Jesoshi. Itacheronkawaantetanakiru ikantanakiri:

—Nojoriyyotzinkaritepaeni, maawaeni eeroka jeekatsiripaeni jaka Jerojareeki, piyoteeyawakironi iroka nokantemiri, pikemijanteeyawakinani.

**15** Piitashiteeyawitakarini ishinkiteeyakani irikapaeni. Omaanta tee ishinkiteeyani. Jaka aepatsiteki tema ishinkitapiinteeyanati tsiteniriki, omaanta kitejiriki eero ishinkita. Tema iroñaaka tekira ijenokitapaaki oorya. Tekira omonkaata ishinkitapiinteeta,

**16** omaanta iroka pikemakiri ikantakotziri kamanantzirorini iñaani Tajorentsipero iitachari Joeri paerani, tema rojankinatzitakawoni oetarika ikantziri Tajorents.

**17** Ikantzi Tajorents: "Inja iñeero maawaeni atziri notyaanteniri Noshire. Okamantakaayiterini noñaani pitomipaeni, pishintopaeni. Riraga

ewankaripaeni niyotakaeri oetarikapaeni rajankaneki. Eejatzi Ishire Tajorentsi oñaagayitakirini antyashipariпаeni oetarikapaeni, kimiwitaka imishiwaetatz.

<sup>18</sup> Eejatzi maawaeni aapatziyenani shiramparipaeni, tsinanipaeni, notyaanteniri Noshire, ikenkithatakotantenerari.

<sup>19</sup> Ari nomatero iinja kaari piňaapiintzjenoki eejatzi jaka kipatsikika: potsikanatanakyaawo. Aritaki piňeeyeroni iinja riraani oshekini kamaentsiri, eejatzi piňawakiro otagaeyanakyaani pankotsipaeni: oshekiperokachaaperotanaki.

<sup>20</sup> Nityaawo noetsiwakanakiri oorya; eejatzi riraga kashiri, ilkyonkatanaki, roshyanakyaawo iraantsi. Roojatzi omonkaatapaakya kitejiri rareetantapaakyaari Piwinkatharite reewatawenteri maawaeni atziri. Osheki imatapaakiro, ikantakoeyantyaaririni irira.

<sup>21</sup> Omaanta rowawijaakoeyirini maawaeni atziri ikantzi: 'Nowinkatharite, powawijaakotena'.

Rootaki rojankinatzirini Joeri.

<sup>22</sup> Eekiro ikantzi Peetero:

—Nojoriyyotzinkarite, pikemijantawakiro iroka nokantemiri, nokenkathakoteri Jesoshi, riraga najareetejatzi. Itajonkantayitzini, imatayitakirini kaari aňaapiintzi. Eejatzi imatayitakironi oetarikapaeni, aytantariri itajorentsiperotaki. Tema piňaapiinteeyakirini eerori, piyotakiriroña. Tema rirotaki Tajorentsi matakaakiriri.

<sup>23</sup> Paerani aritaki riytakotzitarini irira, ikantztan: "Aritaki okantyaari, ipimanteeteri riraga Jesoshi". Rirotaki atziri kaari kameethatatsi owamaakiriri, omaanta eerokapaeni pikentakotakaanteeyakirini, powamaakaanteeyakirini.

<sup>24</sup> Ari osheki ikemaatsitayitakawoni, ikamaperowitaka. Omaanta rowaňaagaeri eejatzi Tajorentsi, tee ikowakayiri eekiro ikamaperotaty.

<sup>25</sup> Tema rojankinatzitakawoni paeraniperoroña Iraviiri iňaani Jesoshi: "Niyotaki kijokiro rowakina Ashitanari, ijeekaki nakoperoki ramitakotapi-intakina, kaari nothaawantya.

<sup>26-27</sup> Osheki nokimoshirewentakiri, rootaki nokanantariri: 'Pawa, osheki niweshiryaa. Niyotaki eero pookana janta jaawikinta. Eejatzi eero pishinetana nopathayi paata, tema piňaaperotana nokameethatzi. Niyotaki pimatakaakinawo iroka pikantakinari.

<sup>28</sup> Piyotakaakinawo nokantyaani naňaaperotanaki, kijokiro owawakaeya, nokantyaani niweshiryaaawentanakimi'".

Rootaki iňaani Jesoshi rojankinatzirini Iraviiri.

<sup>29</sup> Eekiro rowaaganakitziro Peetero:

—Iroňaaka, nojoriyyotzinkarite, piyotaperotziro nokamantaperotemi ikanmaki achariniiteni riraga Iraviirini, ikitataka. Eenitatsira iroňaaka ikitatakanta.

<sup>30</sup> Kamanantzirori rinawitani. Riyotaperotzironi ikantaperotziriri Tajorentsi: "Kyaaryootaki iroka nokamantaperotemiri, eero namatawitzimi. Iinja reewawenante pijoriiyotzinkariperote, poayaatemini".

<sup>31</sup> Ňaakiro, tekiranai ipiriintaani Rotyaantanewo Tajorentsi, omaanta riyatotkotzitakarini Iraviiri. Tema rojankinatzitakan: "Ikante Rotyaantanewo Tajorentsi: 'Pawa, niyotaki eero pookana janta jaawiki, eejatzi eero pishinetana nopathaye'".

<sup>32</sup> Rirotaki Jesoshi piriinteeriri Tajorentsi. Aritaki noňeyakirini naari, iroňaaka nokamantaperotakimiro.

**33** Aritaki raawaeri janta rakoperoki, ikaatantapaakariri reewawenenantzi. Eejatzi okithaatakaakari Jesoshi Ishire Tajorentsi, rowaga ikashiyakaakiriri Iriri. Iroñaakaky, rotyaanteeyakinawoni naari jaka: rootaki piñaanteeyakinarini eejatzi pikemaeyantakinarini.

**34-35** Pamine, tee riro kenkithatakotachani riraga Iravii paerani, inta ikenkithatakotziri Rotyaantanewo Tajorentsi. Tee roenokaeya irira Iravii ririni jenokinta inta riraga Rotyaantanewo Tajorentsi. Tema rojankinatzitani rirori paerani: "Irira Pawa Tajorentsi rirotaki kantziriri Awinkatharite riraga Rotyaantanewo Tajorentsi: 'Pijeekapae jaka nakoperoki, pikaatena eewawenante roojatzi iñaaperoeyantemirini paata maawaeni kijeeyawitzimirini'".

**36** Eekiro ikamantanakiri Peetero:

—Tema aakateeyakini icharineeteni Ishireeyeerini. Kameetha riyoperoyereroni maawaeni ajoriiyotzinkarite iroka nokantakimiri: piken-takotakaantawitakari Jesoshi, omaanta ipiriinteeri Tajorentsi, kyaaryo ipeyawaeri eejatzi Jewawenantsatsiri, eejatzi Rotyaantanewo, kimitaka ikashiyakaakiriri achariniiteni paerani.

**37** Ikemanteeyawakaworini iroka, osheki ikenkithashiryaaperorneyakanani. Riyotakoperotanaka kyaaryo rantziro kaari kameethatatsi. Rojampiteeyirini Peetero eejatzi paashinipaeni rotyaantanewo:

—Nojoriyyotzinkarite, ¿tsika nokanteeyaanika aritakima ikaminthagaena Tajorentsi?

**38** Rakanakiri:

—Pikenkithashiryaaagaeyakya, eero pikimitaaga paerani. Kameetha paapatziyari Jesokirishito eejatzi pikaawoshitakowentyaari Tajorentsi riytantyaari atziri paapatziyari Jesoshi. Rootaki ikaminthaanteeyemirini Tajorentsi, eero rapiiteemiro ikenkithashiryaakoktzimiroroña eejatzi kaari kameethatatsi pantteeyawitakarini. Rootaki okithaatakaantakimiri Ishire rotyaantzimiri.

**39** Rootaki ikashiyakagaeyakimirini eerori; eejatzi ikashiyakagaeyakirini rirori pisheninkatanakayaarini iinja, eejatzi maawaeni atziri jeekayitatsirini paashinipaeni kipatsiki. Rootaki ikashiyakagaeyakaerini maawaeni; rootaki ikowakagaeyakaeri Awinkatharite, aririka aapatziyeeyaarini.

**40** Osheki paashini ikamantaperoeyiririni, ikowaki raapatziyakaapertoysi. Eejatzi iroka ikantakiriri:

—Pookero kaari kameethatatsiri pantziri ari rowawijaakoteemi Tajorentsi. Rootaki eero rowashironkaantzimi paata.

**41** Ari ikemaperotakiro oetarika ikantakiri riraga Peetero, raapatziyawakawo ari ikaawoshitawentakari Tajorentsi, aamashitya ikaateeyakin 3.000.

**42** Ikantatyeyaanai ikemijantaperoeyirini iroka riyotagaeyiririni. Ikantatyeyaanai kameetha ikimitawakagaeyakanai: itsipatawakagaeyakanai rakiyotawakaeyani owanawontsi, ikenkithashireeyantakaririni riraga kamawenteeeyakiririni, eejatzi ramanapiinteeeyirini Tajorentsi.

### *Ijeeki kameetha riraga aapatziyariri Jesoshi*

**43** Riraga rotyaantanewo Jesoshi rantapiintakiniri atziripaeni kaari ñaapiinteeeyirorini eejatzi imatayitakironi oetarika riyotantanakariri kyaaryo itsipataro Tajorentsi. Osheki rotsikanatanakari maawaeni atziri, ikantzi:

—Imataakaakiri Tajorentsi aapatziyariri Jesoshi.

**44** Ari ikimitawakaeyakanai irirapaeni. Tee ithaawakaeyawoni oetarikapaeni, omaanta ipawakaapiinta tzimimotayitziririni, oetarikapaeni.

**45** Ipmanteeeyironi rowaagawo eejatzi iipatsite. Ipagaanteeyakirini iyorikite maawaeni aapatziyariri Jesoshi koetyeemotziriri.

**46** Maawaeni kitejiri ryaatapiinteeeyini janta Tajorentsipankoki. Eejatzi rakiyotawakaeyakanı ḥawanawontsi ipankokipaeni rirori, ikenkithashiryaantari kamawenteeyakaerini. Aririka rowaeyani, ikimoshireperoeyini, eejatzi kameetha ipashitawakaeyakanı.

**47** Ikanteeyini:

—Kameetharini Tajorentsi.

Eejatzi riraga maawaeni jeekatsiripaeni iñeeyakirini rirori ikameethatzi. Ikantatyeyaaani maawaeni kitejiri raapatziyaperotanakyaari paashinipaeni atziri, roshekitaaperoeyakirini Awinkatharite.

### 3

#### *Ikenkithatakaantzi Peetero janta Tajorentsipankoki*

**1** Paashini kitejiri, shaawiityaaki oorya, itonkaanaki Peetero eejatzi Jowa janta Tajorentsipankoki oetotziikinta tonkaari. Maawaeni kitejiri shaawiityaaki oorya ryaatapiintzi joriliyopaeni janta ramanantapiintariri Tajorentsi.

**2** Eeniro ijeekaki janta apaani shirampari kijopookitatsiri. Aritaki ikantzitapaaka paerani owakira ikoñaatapaaki. Ari maawaeni kitejiri ramaetapiintziri omooki Tajorentsipanko iiteetziro: “Kameethari omoo”. Aritaki rowaetapiintziri omooki inethaanteryaariri iyorikite kyaayitatsirini.

**3** Riraga Peetero eejatzi Jowa roowiteencha ikyeeyapaenimi Tajorentsipankoki, omaanta iñawakirri rirori ikantawitawakari:

—Pikaminthayena, nojoriyyotzinkarite, pipena koriki.

**4** Ari ramineeyapaakirini Jowa, Peetero, ikantziri:

—Paminenatya.

**5** Raminaperotawitawakari, iitashiwitaka ari ipakirimi oetarika.

**6** Omaanta ikantanakiri:

—Tekatsi noorikite, omaanta nokowaki nokaminthayemi. Nokanteri Je-sokirishito, riraga najareetejatzzi ikatziyatziyatakagaemi rirori. Iroñaaka pipiriinte, pikatziyatziyawaaete.

**7** Roerikakiri rakoperoki, ikatziyakiri. Intsipaete retsiyatakote, ishinstitanaki iitziki.

**8** Ishintsitzi ikatziyanaka, sherok. Ikatziyaperotanaka, ikatziyatziyawaaetanaka. Itsipatanakari, ikyaanaki Tajorentsipankoki. Ijapo(j)apotanaka, ikantanakiki:

—Kameetharini Tajorentsi.

**9** Iñieyawakirini maawaeni atziri: ranaashitanaka. Ikemaeyawakirini ikantanakiki:

—Kameetharini Tajorentsi.

**10** Ari riyoteeyawakirini, rirotaki irika jeekawitacharini omooki, nethaapiinrantawitachari koriki. Iñeeyakirini retsiyatakote, rootaki rotsikanatantanakariri. Tee riyotakotziri.

**11** Ari roerikakerotanakiri Peetero eejatzi Jowa. Eeniro ikatziyajanta ipiyotapiinteeeyantaririra: ro ikaapanomatakaantziro iiteetziro rashii Sharamoo, rirotaki wetsikakaantzirori paerani. Roojatzisihiyashitantaapakari maawaeni atziri, rotsikanatapaaakari.

**12** Iñawakiriri Peetero, ikantawakiriri ijoriiyyotzinkaritepaeni:

—¿ilitarikya potsikanatantanari? ¿ilitaka paminanteeyanarini, joreririri? Eero piitashitana naaka Tajorentsi nanashitakaantaariri irika kijopookiwitachari. Eero eejatzi piitashitana naapatziyaperotakari nomatantaariri.

**13-14** Irira Tajorentsi rirotaki etsiyatakoteeriri. Paerani raapatziyapaakari Awaraama, Ijaaka, Jakoowo, eejatzi maawaeni achariniiteni. Okameethatzikimilitagaeyarini rirori paapatziyeeeyarini Tajorentsi. Rirotaki ūaaperotaperotziriri Jesoshi ikantzi: “Naakiro, ikameethaperotzi Notyomi, rantakinawo maawaeni nokowakaakiriri”. Kyaaryo osheki ikameethaperotzi Jesoshi. Rirotaki paakaantakiri. Ro ipankagaerimi Peraato, aritaki pikantakowentakiri: “Tee nokoyi pipankaeri”, omaanta pikowakiri ipankaeri owamaantatsiri. Kyaaryo ikamawenteeeyerini maawaeni atziri.

**15** Powamaakaantakiri owañaagaeyiririni atziri. Ikamawitapaenta, roojatzi ipiriinantaari Tajorentsi. Noñeeyeerini rootaki nakanantzimiri.

**16** Eniro irika shirampari: ikemakotantawakariri Jesoshi, raapatziyaperotakari kameetha, rootaki retsiyatatakanteeri. Irika iroñaaka piñaakiri. Tema piyoteeyirini. Ari raapatziyaperotakari Jesoshi, rootaki itekatsitantaari. Piñaakiri iroñaaka ranashitanaka.

**17** Eejatzi ikanteeyirini Peetero:

—Ari nojoriyyotzinkaritepaeni, iroñaaka niyotaki tee piyotawitarini Jesoshi rirotaki Rotyaantanewo Tajorentsi. Eejatzi riraga jewatatsiripaeni tee ryoteeyawitarini rootaki pikentakotakaanteeyantakaririni rirori.

**18** Omaanta irira Tajorentsi ishinetakimi panantakawori maawaeni iroka, pimonkaatantakawori maawaeni rojankinatakaakiri kamanantayitzirorini iñaani paeraniperoroña. Tema maawaeni rojankinatakotzitarini Rotyaantanewo Tajorentsi otzimatye ikemaatsityaawo.

**19** Pikenkithashireeyanakyaani, eero pikimita paerani, inta paapatziyeeeyarini Jesoshi; roojatzi ikaminthayemi Tajorentsi; tema rowameethateeyimini, eero ikenkithashiryakotemiro eejatzi kaari kameethatatsi pantayitawitarini. Eejatzi itsipateeyantemirini Awinkatharite, riweshiryakaagayemini.

**20** Eejatzi iinja rotyaantemiri eejatzi Jesoshi, riraga Rotyaantanewo. Tema paeraniperoroña riyooyaakiri rotyaanteri rowawijaakoteri atziripaeni.

**21** Omaanta iroñaaka ijekapae janta jenokinta, ikantyaani roojatzi riraga Tajorentsi rowameethatantayitapaakyaworini maawaeni, oetarikapaeni. Tema rootaki ikantziririri paeraniperoroña riraga kamanantayitzirorini iñaani Tajorentsi, riraga rowameethateeyirini rirori: rirotaki ūaawetaakagaeyiririni maawaeni.

**22** Ikantzini Moeseshi: “Riraga Pawa Tajorentsi rotyaantemiri paashini kamanantzirorini iñaani Tajorentsi, ikimitena naari rotyaantakina. Rirotaki joriyyo ikimitakae aaka. Oetarikapaeni ikamantemiri, paapatziyawakyaari.

**23** Omaanta maawaeni kaari aapatziyarini rirori, ithonkaeyerini Tajorentsi, eero rapiiteero itsipatari ijomiyotzinkaritepaeni”.

**24** Eejatzi rojankinatakotzitawoni paerani Samoeri eejatzi maawaeni kamanantayitzirorini iñaani Tajorentsi iroka piñaayitakirini iroñaaka.

**25** Aritaki ipokapaaki riraga Rotyaantanewo Tajorentsi ikashiyaakari rotyaanteeri. Tema ikashiyaakaanantakaririni kamanantayitzirorini iñaani Tajorentsi eejatzi paejatziiiteni riraga Awaraama, Ijaaka eejatzi Jakoowo.

**26** Rotyaantakiri Tajorentsi aakaki, reewateeyakaeni ryotagaeyakaeroni. Eniro panteeyironi kaari kameethatatsi, omaanta ipokashiteeyakimini rowawijaakoeyemini eero pashironkanta; ikowaki riweshiryakaagayemini. Rootaki kyaaryo pikenkithashiryaaanteeyanakyaarini, eero pikimitaga paerani.

<sup>1</sup> Eeniropi ikenkithatzia Peetero eejatzi Jowa, ikenkithatakayiri atziripaeni. Ari ipokapaaki ūaanakowenantatsiripaeni, eejatzi jewatatsiri waariyapaeni ashi Tajorentsipango eejatzi saroseeyopaeni.

<sup>2</sup> Ikijashireeyanakanji, ikantawakaanaka:

—¿Oetakama riyotaantariri atziri? Iroka ikamantakiriri: “Ipriintanee kamatsiripaeni: tema piriintanaa Jesoshi”. Tee okameethatzia iroka riyotaanteeriyirini.

<sup>3</sup> Itsitenizmatantanaka oorya, ragaeyanakirini, omaanta eeniro jankinarentsi rashiri riori joriyyopaeni othaňantsita rojampitantlyaariri atziri tsiteniriki, rootaki raantanakariri romonkyaagaeyapaakirini omonkyaagamentotsiki, roojatzi ikitejitakoeyakini.

<sup>4</sup> Omaanta raapatziyaperotawakawo osheki kemaeyawakiririni Peetero, aamashitya ikaateeyakini 5.000 shirampari, aapatziyakariri Jesoshi; eejatzi okaateeyakini roori tsinanipaeni eejatzi eentsipaeni.

<sup>5</sup> Inkaamani ipiyyoteeyani eejatzi janta Jerojareeki jewatatsiripaeni, aata-teroeentchari, iyotaantzirori Iwaperite Tajorentsi.

<sup>6</sup> Ikaateeyirini Aanashi, riraga iwinkatharite ūaanakowenantatsiripaeni. Eejatzi itsipatari Kaejashi, paashini Jowa, Arejaantero, eejatzi maawaeni isheninka iwinkatharite ūaanakowenantatsiripaeni.

<sup>7</sup> Ari ikaemakaantakiri Peetero, Jowa eejatzi riraga kijopookiwitachari rojatekakiri niyanki, rojampiteeyakirini:

—¿Ninka matakaakimirori petsiyatakotantariri irika shirampari? ¿Ninka kantakimiri?

<sup>8</sup> Ari iyotaakiri Ishire Tajorentsi Peetero, omatakaaperotakiri. Ikenkithatakagaeyakirini piyotawenteeyaririni ikantzi:

—Jewatatsiripaeni eejatzi aa taperoteencharipaeni.

<sup>9-10</sup> ¿Pininaneeentakina nantakirowa kameethatatsiri? Pojampitakina tsika nokantaka netsiyatakotakaanttariri irika kijopookiwitachari. Nokowaki eerokapaeni eejatzi maawaeni atziri piyotawakiro. Rirotaki Jesokirishito riraga najareetejatzi etsiyatakoteariri. Pikentakotakaantawitakari, omaanta ipriinteerii Pawa Tajorentsi. Jee, imatakaakina Jesoshi netsiyatakotantariri irika iroňaaka katziyeencharika jika etsiyatakoperotee.

<sup>11</sup> Rirotaki Jesoshi oshiyakaawentachari mapitatsiri pitheenkakiri eerokapaeni wetsikawitawori pankotsi, omaanta iroňaaka ipeyakiro rooperotatsiri mapi pankotsi. Ikimiwitaa iroka Tajorentsi ipeyakirii Jesoshi rioperotatsiri. Eerokateeyakini oshiyakariri wetsikawitawori: pitheenkakiri Jesoshi.

<sup>12</sup> Omaanta tekatsi paashini owawijaakotantatsini. Tee ijeki jaka kipatsikika paashini owawijaakoteeni. Apaniroeni Jesoshi imatziro rowawi-jakotee.

<sup>13</sup> Ikenmantawori iroka rotsikanateeyanakarini riraga jewatatsiripaeni. Ari imaeeritanaki ikenkithashiryaakotanakari, iňaakirira tee ithaayi. Roojatzi ikantawakaaka:

—Naakiro, tee ithaawanteeyarini riroripaeni. ¿Litaka kaari ithaawanta? Eejatzi tee ithotyaaperotziro Iwaperite Tajorentsi, tee niyotayiri naakapaeni, omaanta osheki riyotzi apaniroeni. ¿Tsika ikantaka riyotantakari? ¿Arima imatakiro Jesoshi, riraga kijokiro rowawitakari riyotagaeyirini?

<sup>14</sup> Ari ifteeyakirini itsipatkaririi riraga retsiyatakoteari. Tekatsi ikantya ikantakoteri.

<sup>15</sup> Ari rotyaantanakiri:

—Piyowakite janta.

Ari riyowanaki. Roojatzi ikantawakagaeyanakanji rirori jewatatsiripaeni:

**16** ¿Tsika akanterika irintapaeni? Riyotanakiri maawaeni jerojareejatzzi ita-jonkawentakiri riraga kijopookiwitachari. Tekatsi akante: “Tee imatziro”.

**17** Omaanta tee okameethatzi ikenkithatakagaeyanakirini atziripaeni. Thame akantaperoterita: “Eerotya iroñaaka pikenkithatakotziri riraga Jesoshi. Aririka papiitero pikenkithatakoteri, aritaki nowashironkaakimi”.

**18** Ari rapiiteeri, ikaemaeri. Icantaperotziri:

—Eerotya iroñaaka pikenkithatakotziri Jesoshi. Aririka papiitero pikenkithatakoteri, aritaki nowashironkaakimi.

**19** Rakanakiri:

—Tema inee Tajorentsi maawaeni aari. Pikantaperotenatyta: ¿Kameethama nothotyeero naapatziyemi okaatzi pikantakinari? Tema irira Tajorentsi naapatziyari.

**20** Tekatsi nokantya iroñaaka nookaero nokenkithatakotziro iroka noñaaperotakiri, eejatzi iroka nokemaperotakiri.

**21-22** Ari rapiitakiri eejatzi ikantaperowitakari, roojatzi rotyaanantaari. Tekatsi rante rowashironkaantyaariri. Paerani imonkaatakiro 40 rojarentsite kijopookiwitachari. Ari osheki ikenkithashireeyakironi atziri retsiyatakotziri Jesoshi, riyoteeyantakarini itajorentsitaki. Infeeyakironi atziri iroka imatakaakiri, ikantapiinteeyanakini: “Kameetharini Tajorentsi, osheki imatakaagayakirini aapatziyakiriri Jesoshi”, rootaki kaari rowashironkaantari.

### *Ramanakiri Tajorentsi riraga aapatziyariri Jesoshi*

**23** Ari roeyowaeyanakirini jewatatsiripaeni, roojatzi riyaateeyanakini Peetero eejatzi Jowa aapatziyeeeyakirini Jesoshi. Ikamantapaakiri iroka ikantawitakariri riraga jewatatsiripaeni ñaanakowenantsiri eejatzi aataperoteenchari.

**24** Ikemantawakawori iroka, ikenkithatakagaeyakirini Tajorentsi. Ish-intsipaantetziro apaani, ikantzi:

—Nowinkatharite, eeroka wetsikirori jenoki, kipatsi, inkaare, maawaeni; eejatzi piwetsikaeyakirini maawaeni tzimanteeyaworini.

**25** Eejatzi paerani piyotaakirini nochariniiteni Iraviri, riraga aapatziyap-erotzimiri. Ýyotaakiri pishire, rojankinatantawori iroka:

“¿litaka ikijanteeyakirini riraga kaari yotziri Tajorentsi? ¿litaka ikenkithashiryaashitantawori joriyyopaeni ranteeyeroni kaari kameethatatsi?”

**26** Riraga iwinkatharitepaeni atziri jaka kipatsiki rajaryagaeyawityaarini Tajorentsiperi, eejatzi riraga Rotyaantanewo, ikowaeyawityaani ithonkaeyerinimi”.

**27** Jaka nampitsikika ipiyoteeyakani rajaryagaeyawitakarini pitomi Jesoshi, riraga piñaaperotziri ikameethaperotatzi. Irira piyoyaaperotakiri, eejatzi potyaantaperotakiri. Ikaateeyini ajaryaanteeyawitacharini Erooreshi, Poonshyo Peraato, jewatatsiripaeni joriyyopaeni, eejatzi joraaropaeni tema rirotaki paashinijatztatsiri atziri; maawaeni.

**28** Paerani eeroka pikantaki: “Aritaki okantyaari”. Ari chapinki ithonkakiro imonkaatakiro irikapaeni.

**29** Iroñaaka, Pawa, piyotakiro iroka ikantaperotawitakina: “Eero pikenkithatakoteeri Jesoshi”. Tema naaka aapatziyaperotakimiri. Pimatataaperotena eero nothaawanta nokenkithataperotero piñaani.

**30** Pitomi Jesoshi rirotaki Nowinkatharite iroñaaka, rootaki nokowantakari imatakaaperotena notajonkakowenante, netsiyatakantyaariri mansiyariipaeni; nomatapiintero kaari inaapiinteeyini, niyotakagaeyerini atziri kyaryo irira riropotaki pitomi, eejatzi piñaaperotziri ikameethaperotzti.

<sup>31</sup> Aritaki ramaneeyirini Tajorentsi. Roojatzi omoyekanaka pankotsi ijekaeyantarini. Otajorentsiwenteeyapaakirini Ishire, roojatzi kameetha ikenkithatantawori iñaani Tajorentsi, tee ithaawaneentzi.

### *Raakameethatawakagaeyakanri riraga aapatziyariri Jesoshi*

<sup>32</sup> Osheki ikaatzi iroñaaka aapatziyariri Jesoshi, kameetha ijekaeyakini, eejatzi imonkaatawakagaeyakanri: oetarika ikowaeyirini eejatzi oetarika ikenkithashireeyani. Tee imashithatawakagaeyani, omaanta ipawaka-gaeayakawoni maawaeni tekatsitzimotakiriri.

<sup>33</sup> Rowaga Ishire Tajorentsi imatakaakiri riraga rotyaantanewo Jesoshi, rootaki kameetharini ikamanantapiintariri atziripaen:

—Ikamawentakae Awinkatharite Jesoshi omaanta ipiriintakiri Pawa Tajorentsi, rañaakiri eejatzi iroñaaka.

Eejatzi ikanteeyini atziri:

—Tema ikameethateeyakini aapatziyariri Jesoshi.

<sup>34-35</sup> Riraga ashitacharipaeni iipatsite eejatzi ipanko, ipimantagaanteyini. Iroka opinayitarini, ramaeyakirini rotyaantanewo Jesoshi, ipa-paakiri. Roojatzi ipagaantakiriri paashinipaeni riori koetyeemotariri, kaari rashironkaanteyantani aapatziyaripaeni Jesoshi.

### *Nokantakoteri pakiriri eejatzi amatawitantatsiri*

<sup>36</sup> Iroñaaka nokantakoteri aapatziyariri Jesoshi icharineeteni Rewii iitachari Josee. Paashini iitziri riraga rotyaantanewo Jesoshi: Werenawee. Akantzi aaka apaanteki: “Weshiryakaantachari”. Rirotaki poñaachari Cheepereki.

<sup>37</sup> Rashitawitawo kipatsi, omaanta ipimantziro. Raanakiro owinawo, ipapaakiri riraga rotyaantanewo Jesoshi aritaki irirapaeni ipakiri aapatziyariri Jesoshi. Ipakiri atziri tektsi oetarika royaari. Rootaki maawaeni aapatziyariri Jesoshi iñaaperotziri Werenawee.

## 5

<sup>1</sup> Omaanta eeniro paashini aapatziyariri Jesoshi iwaero Ananiyyashi, ro iina Sajiira. Ipmantakiro iipatsite.

<sup>2</sup> Tee ikoyi iperi rotyaantanewo Jesoshi maawaeni iyorikite, rootaki ikantanakawori iina:

—Aririka aate aperi koriki, eero akantziri tsika okaatzika ipineetakaeri. Apashitapaakyaari kashetani koriki akimitakaantero rootaki maawaeni ipineetakaeri, rootaki iñaaperotanteeri aari akameethatzi.

—Jee, aritaki.

Roojatzi riyaatanki riraga Ananiyyashi apaniroeni, ipapaakiri rotyaantanewo Jesoshi iyorikite. Ikantapaakiri:

—Irika korikika, rootaki maawaeni owinawo noepatsiteni nopimantakiri.

<sup>3</sup> Omaanta iyotaakiri Ishire Tajorentsi Peetero:

—Ikowaki ramatawitashitemi. Ipakimi kashetani koriki rashii iipatsite. Kaari maawaeni.

Rootaki ikantanariri:

—Ananiyyashi, pishinetaakari Jatanaashi itheeyakaakimi. Pikowawitakami pamatawiteromi Ishire Tajorentsi. Pipashitakinari kashetani piyorkite.

<sup>4</sup> Tekirani pipimantero rowaga piipatsiteni rootaki pashi eerori. Ari pimateromi pamanantero oetarika pikowayitzirini eejatzi piperi ninkarika. ¿litaka pamatawitashitanari? Naaka pamatawiwitakina apaniroeni; omaanta Tajorentsi eero pimatzi pamatawitziri.

<sup>5</sup> Ikemantawakariri Ananiiyashi, roojatzi ityaantanaka, pog. Kamanaki. Ithaawaperoeyanakini osheki maawaeni ñeeyakiririni.

<sup>6</sup> Roojatzi riwetsikaeyakirini ewankari ikitateri; raanakiri, ikitateri.

<sup>7</sup> Ojamanitapaentzi eechonkiini, ari okyapaaki iina roori. Tee iyotzi kamaki oemini.

<sup>8</sup> Ikantawakiro Peetero:

—¿Kyaaryooma pipakinari maawaeni koriki, rowaga owinawo piipatsiteni pipimantakiri?

Ariakanakiri:

—Jee, nopakimirri maawaeni.

<sup>9</sup> Roojatzi ikanantakawo roori:

—¿litaka pikimitantariri piimini, pamatawiteromi Ishire Tajorentsi? Okaakitapaaki kitatziriri piimini: rirojatzi aanakimini eerori.

<sup>10</sup> Roojatzi otyaantanaka roori, pog, kamanaki. Ikyapae riraga ewankari-paenii, iñaapaakiro, kamaki. Ari raanakiro, ikitatero roori, otsipatapaari oemini.

<sup>11</sup> Ari ithaawaeyanakini maawaeni riraga aapatziyariri Jesoshi rowashironkaerikari Tajorentsi, eejatzi ithaawaeyanakini maawaeni kemakoeyakiririni. Ikenkithashireeyawoni: “Tee okameethatzni namatawitante. Rowashironkaanakari naari Tajorentsi”.

#### *Retsiyatakotakiri osheki atziri*

<sup>12-14</sup> Ari ipiyoteeyakanii maawaeni aapatziyariri Jesoshi janta kaapanomarentsiki iiteetziro rashii Sharamoo. Eejatzi eekiro riyaatatzii roshekiperotanaki aapatziyariri Awinkatharite. Osheki ikaateeyini shirampari eejatzi tsinani. Osheki iñaaperoeyakirini atziripaeni riraga aapatziyariri Jesoshi, ikanteeeyini:

—Ikameethataperoeeyini aapatziyariripaeni Jesoshi.

Omaanta riraga kaari aapatziyariri irira ithaawakaanteeyakaririni itsipateeyaarinimi.

Osheki itajonkawenantzii riraga rotyaantanewo Jesoshi. Osheki omataakaakiri Ishire Tajorentsi.

<sup>15-16</sup> Rootaki rowapiinantakariri atziripaeni mantsiyaripaeni janta awotsiki: romaryaayitzirini shitashintsiki, okantyaata aririka rawijanaki Peetero, ipampitanakiri, eerorika ipampitanakiri aririka ramparyaatawakyaaari rootaki retsiyatatakantyaari. Eejatzi ipiyotashiteeyakanii osheki atziri, poñachari nampitsikipaeni janta othapikiyitapaakini Jerojaree. Ramayitakinirini mantsiyaripaeni, eejatzi kyaantariri kamaari. Retsiyatakaoeyeerini maawaeni.

#### *Riraga ñaanakowenantatsipaeni ikijaperotziri rotyaantanewo Jesoshi*

<sup>17</sup> Ari ikijanakiri iwinkatharite ñaanakowenantatsiri, eejatzi paashinipaeni ñaanakowenantatsiri, tema rirotaki saroseeyotatsiri.

<sup>18</sup> Ari raakaantakiri riraga rotyaantanewo Jesoshi, romonkyaa-gakaantawitakari omonkyaaagamentotsiki.

<sup>19</sup> Omaanta niyanki tsiteniri roeyowaeri ronampiri Tajorentsi riraga-paeni rotyaantanewo Jesoshi, rashitaryaapaakiniri ashitakontsi, raanakiri inkokiroeni.

<sup>20</sup> Ikantzi:

—Piyyate janta Tajorentsipankoki, pikatziyapaaki. Pikamantaperooyerini atziri tsika ikantyaari ijeekanteeyarí ikanteetatyeyaaani jenokinta.

<sup>21</sup> Ikantawakiri:

—Jee, ari nokamantteeyakirini.

Ari owakira okitejitanaki ryaatanaki Tajorentsipankoki, riyotaantapaaki.

Eeniro iwinkatharite ñaanakowenantatsiripaeni eejatzi tsipateeyaririni janta paashiniki pankotsi. Tekira riyotakoteri roeyoyiri rotyaantanewo Jesoshi. Roojatzi ikaemakaantakiri maawaeni paashini jewatatsiri joriyyopaeni. Roojatzi ikantziri waariry:

—Piyaate janta pomonkyaagakitzirinta tsitenini chapinki aapatziyariri Jesoshi, pamaeyakinari.

<sup>22</sup> Ari ryaatashitawitakari, tee iñaapaakiri. Roojatzi ipiyantanaka, ikantapaakiri:

<sup>23</sup> —Tee añaari. Noñaapaakiro pankotsi, oyaawitaperotaka. Eejatzi eeniro ikatziyawitaka shentawitawori omoopaeni. Roojatzi nashitaryaantawita-paakawo omoo, nokyaawitapaaka; tekatsi noñaapaaki inthomaenta.

<sup>24</sup> Ikemantawitakariri, ikantawakagaeyanakan:

—¿Tsikarika ikinanakika?

—Taanitya. Eerokaritya.

—¿Tsika akanterika iroñiaaka?

—Taanitya.

<sup>25</sup> Roojatzi ipokashitantapaakari apaani kamantapaakiriri, ikantapaeri:

—Riragapaeni shirampari pomonkyaagakaantawitakari, katziyeeyaapani janta Tajorentsipankoki. Riyotagaeyapaakirini atziri.

<sup>26</sup> Roojatzi ryaatashitantanakari iyapitaanote itsipatantanakari waariryapaeni, ragaeyanakirini, omaanta tee ikoshekanakari ithaawantakari atziri; ikantzi:

—Kameetha aanakiri ikijakowentarikari atziri aapatziyariri Jesoshi, rompojanteerokari mapi aaka.

Rootaki raantanakariri kameetha, tee ikijanakiri.

<sup>27</sup> Ari raanakiri, rowapaakiri janta ijekinta jewatatsiripaeni. Ikantawakiri iwinkatharite ñaanakowenantatsiri:

<sup>28</sup> —¿Itaka pikenkithatacantariri eejatzi atziri? Tema nokaminaawitzimi: “Eero pikenkithatakotaneeri Jesoshi”. Iroñaka eekiro piyotagaeyirini maawaeni jerojareejatzi. Ro iroka pikantakotakinari: “Irira jewatatsiripaeni owamaakaantakiriri Jesoshi; ikantashita rantashitakawo kaari kameethatatsiri”. Tee okameethatzi pikanteeyakirini. Pimaeriteeyeni, eero pikamanantanee eejatzi.

<sup>29</sup> Rakanakiri Peetero, ikantanakiri:

—Omaantakya naapatziyaperotari Tajorentsi. Eero naapatziyimi eeroka aririka pikantena: “Eero pikenkithatakotziri Jesoshi”. Inimotakiri paashini-paeni rotyaantanewo Jesoshi.

<sup>30</sup> Eeroka kyaaryootatsi powamaakaantakiriri Jesoshi. Pikentakotakaantakiri koroshiki. Omaanta ipiriinteeri Tajorentsipero.

<sup>31</sup> Itzinagaeri rakoperoki janta jenokinta. Ipeyeeri Jewaper-owenantsiri eejatzi Owawijaakoeyakaerini. Ikowakagaeyakirini ajoriiyotzinkaritepaeni ikenkithashiryaaperotanteyari eejatzi rookero rowaga kaari kameethatatsi ranteeyawitakarini aritaki ikaminthagaeyerini, eero ikenkithashiryaakoteero eejatzi okaatzi kaari kameethatatsi ranteeyawitakarini.

<sup>32</sup> Aritaki noñaaperotakiro rantayitakirini Jesoshi, eejatzi niyotaki okithaatagaeyakarini Ishire Tajorentsi maawaeni aapatziyariri Jesoshi. Rootaki nokenkithatakotapiinantariri rirori. Tekatsi nokantya nomaeerte.

Roojatzi ikanteeyini paashinipaeni rotyaantanewo Jesoshi:

—Kyaaryo iroka ikantziri Peetero.

<sup>33</sup> Ikemanteeyawakaririni, riyotanteeyawakaworini kyaaryo ranteeyakironi kaari kameethatssi, rootaki ikijanteyyanakaririni, ikowayawitanakan rowamaerimi.

<sup>34</sup> Omaanta ikatziyanaka apaani jewatatsiri iitachari Kamariyeeri. Rirotaki warijeyeo, eejatzsi iyotaantzirori oetarika rojankinatziri Moeseeshi. Maawaeni atziri iñaaperoeyirini. Ikantzi:

—Nojoriyyotzinkarite, nokoyi ishitowaeyakiteniita aapatziariri Jesoshi, eero ikemantawo nokantemiri.

Ari rotyaanteeyakirini inkokironta.

<sup>35</sup> Roojatzsi ikananteeyakarini:

—Nojoriyyotzinkarite. Kyaaryoowa, paamawentyaaga pantzirikarira aapatziariri Jesoshi.

<sup>36</sup> Pikemina. Nokenkithashiryaa kayemiri apite shirampari. Nokantakotziri riraga Teyoorashi, rirotaki jeekatsiri paerani, osheki ikantakaap-erotani. Ari ipiyotashitatwakari osheki ratzirite, naamaashitya ikaateeyini 400. Omaanta rowamaetakiri, roojatzsi rinteenaryaanantanakari oyaateeyawitaririni. Ipeyashiteeyanakan, tektsi akemakoteeri eejatzsi.

<sup>37</sup> Eejatzsi imawitanakawo rirori iitachari Joorashi, riraga karireeyajatzsi. Janta rojankinatakoeyantani, eejatzsi reewatawitanakari apaanipaeni atziri. Eejatzsi rirori, rowamagaetawakiri. Rowaaganaka oyaatawitariripaeni, tektsi akemakoteeri paashini.

<sup>38</sup> Rootaki iroñaka nokamanantzimiri, eero pashiiriiri irikapaeni, ikan-takaata. Rirorika otyaantziriri atziri ikenkithatzsi, tema eejatzsi ipeyaneeya rirori.

<sup>39</sup> Rirorika otyaantziriri Tajorentsi, tektsi pikanteri pomaerinteri. Pikiji-matzirkari Tajorentsi.

<sup>40</sup> Ari inimoeyanakirini rirori. Ikaemaeri eejatzsi, ipajatakaantakiri. Roo-jatzsi ikantaperotawitari:

—Eero eejatzsi pikenkithatakoteeri Jesoshi.

Roojatzsi rotyaanantaari.

<sup>41</sup> Ari riyaateeyanakini, ikimoshireeyanakini, ikanteeyini:

—Iñaaperotee Jesoshi akameethatssi, rootaki ishinetantakaeri akemaat-sitawenteeyakarini.

<sup>42</sup> Maawaeni kitejiri riyotaantapiintzi janta Tajorentsipankoki, eejatzsi pankotskipaeni. Ikantani: riyotaantapiintzi, ikamanantapiintzi. Ikaman-tapiintziri atziri:

—Jesoshi rirotaki riraga Rotyaantanewo Tajorentsi aamagaeyarini paerani.

## 6

### *Riyooyaakiri amitakotantatsini*

<sup>1</sup> Ari roshekyaatnakari aapatziariri Jesoshi, eejatzsi ikijashiryaaanaka riraga iyotzirori ipaante kireeshiyajatzsi. Ikantawakaanaka:

—Maawaeni kitejiri, aririka ipantawitya owanawontsi, tee ipaperotziro natziritzinkawote ashiaari: iroka kamayiteentsirini oemi. Omaanta ipapo-eroeyirini kameetha iyotzirori ewereeyo, rowaga ipaante joriiyopaeni.

<sup>2</sup> Ari riraga rotyaantanewo Jesoshi ipiyoteeyakirini maawaeni aapatziariri Jesoshi. Ikantziri:

—Tee okameethatssi nookanakiro nokenkithatapiintziro iñaani Tajorentsi, nopantayitemirorini owanawontsi.

<sup>3</sup> Iroñaka, noyemjantzinkaritepaeni, piyoyee 7 shirampari, riraga piñaaperotziri ikameethatssi. Piyoyeeri riraga iyothanetatsiri,

kemijantaperotzirori Ishire Tajorentsi. Akanteriita rirori rirotaki pantatsini owanawontsi.

<sup>4</sup> Omaanta naaka, apatziro namaneri Tajorentsi, eejatzi nokenkithatero iñaani.

<sup>5</sup> Inimoeyakirini maawaeni iroka ikantakiriri. Riyoyaakiri Eshiteewa, rirotaki aapatziyaperotariri Jesoshi, kemijantaperotzirori Ishire Tajorentsi. Riyoyaakiri eejatzi Jiripi, Pirookoro, Irikanoori, Temoo, Parimeenashi. Eejatzi riyoyaakiri Nikoraashi, riraga peyeenchari joriiyo, poñaachari Antyoki-iyaki. Omaanta iroñaka raapatziyaperotari Jesoshi.

<sup>6</sup> Roojatzi roñaagantapaakari riraga rotyaantanewo Jesoshi. Rowakiniri rako iitoki, roojatzi ramaneeyirini Tajorentsi: "Pamitakooyerini irikapaeni pantaytatsirini owanawontsi".

<sup>7</sup> Osheki ikaatzi kemaeyakirori iñaani Tajorentsi. Eekiro roshekyaaper-otanakitya aapatziyakariri Jesoshi janta Jerojareeki. Eejatzi oshekiniroña ikaatzi ñaanakowenantsiri ikimitakotanaari aapatziyariri Jesoshi.

### *Riraga Eshiteewa rirotaki riyoyaanewo Tajorentsi*

<sup>8</sup> Osheki ramitakoperotakiri Tajorentsi Eshiteewa. Osheki imatakaakiri Tajorentsi ikenkithataktakariri atziri. Osheki itajonkakaakari Tajorentsi. Imataperotayitzinirini atziri kaari iñaapiinteevini. Imatakaakiniri oetarikapaeni riyoteeyantakaririni Jesoshi rirotaki Tajorentsi.

<sup>9</sup> Eniro ipiyotapiinteevantarini janta Tajorentsipankoki atziri riraga ipimanteetawitari paerani, omaanta ipakaeri amanantawitariri. Eejatzi janta ipiyotanta shireenejatzi, arejanteriyyajatzi, poñaachari Shiriishiyaki, Aashiyaki. Riyaatashiteeyawitakarini Eshiteewa, ikijatheeeyawitakarini ee-jatzi ipiyapiyawaaantetakari.

<sup>10</sup> Omaanta osheki riyothanetzi Eshiteewa, tekatsi ikanteeyerini ipiyapiyawaaantetaperoeyaarini. Eenitatsi riyotantari kameetha iñaawaetzti, tema iyotaakiri Ishire Tajorentsi.

<sup>11</sup> Ari osheki ikijeeyakirini riraganiki, ikantziri paashini isheninkapaeni:

—Pamine, nokowaki pitheeyakotaari Eshiteewa. Aririka pimateeyeroni nokantakimiri, nopinafemi koriki. Ro iroka pikantakotashityaariri: "Nokemakiri Eshiteewa, itheenkimatakiri Moeseeshi. Eejatzi ikimitakiri rirori Tajorentsi, ikantzimatakiri".

Ikantziri:

—Ari nokamanteeyerini atziripaeni.

<sup>12</sup> Ikemanteeyawakaní atziripaeni, ikijeeyanakaní eejatzi aataperoteen-chari, iyotaantzirori rojankinarini Moeseeshi, maawaeni. Intsipaete riyaatashiteeyakirini Eshiteewa, raapaenziri, shepik; ragaeyanakirini janta pinkatharipaeniki ikantakotantariri.

<sup>13</sup> Raanakiri eejatzi riraga theeyachari, ikantapaakiri:

—Aritaki ikantaperotzi Eshiteewa, ikantapiintzi: "Tee okameethatzi Tajorentsipankoka". Eejatzi ikimitziro rojankinarini Moeseeshi, itheenkapi-intziro.

<sup>14</sup> Nokemakiri, ikantzi: "Riraga Jesoshi, najareetejatzi, ishekiroreero iroka Tajorentsipankoka. Ipaashinitero iroka ametayitakarini eejatzi ipaashin-tayiteroni ryotaayitakaerini Moeseeshi".

<sup>15</sup> Ramineeyakirini maawaeni jeekaentsiripaeni, joreririri. Ishipakiryaapootanaki Eshiteewa, ikimitanakari ronampiri Tajorentsi.

—¿Kyaaryooma iroka ikantakiri?

*Eshiteewa raakowenta apaniroeni*

**2** Ikantawakiri Eshiteewa:

—Nowinkatharitepaeni maawaeni, teewee nokantzimatziri Pawa Tajorentsi. Pikemena, nojoriyyotzinkaritepaeni. Paeraniperoroña inaaperotantariri achariniiteni ipinkathatziri Tajorentsi, eejatzi naari iroñaaka nopinkathatziri. Paeraniperoroña ijeekantawitarini janta Mesopotaamiyaki achariniiteni Awaraamanı, roñaagapaakari Tajorentsi riraga kameethatatsiri.

**3** Ari ikantapaakiri: “Pookanakiro piipatsiteka eejatzi pisheninka, piyaate janta paashiniki kipatsi rowaga noñaayemiro”.

**4** Roojatzti rookantanakawori iipatsitekareeyajatzi, rareetaka Araanaki. Aritaki janta ikamapaakiri iriri, roojatzti rareetakaakari Tajorentsi jaka aepatsitekika.

**5** Omaanta, tee ipiri iipatsite, tee ipaneentziri eechonkiini ijeekantyaari. Eejatzi tekiranitomini itomi. Omaanta ikantzitakarini Tajorentsi: “Paata ikoñaate pitomi eejatzi iinja oshekini impaetatsiri. Noperi irikapaeni iroka kipatsi”.

**6** Eejatzi ikantakiri Tajorentsi: “Inja ryaate poyaatemini ijeeki iipatsiteki paashinijatzitsiri atziri rowaga Ejiipitoki. Okaate ojarentsi 400 ijeekanaki janta. Riraga ejiipitojatziri ototaki owashironkaerini pisheninkani iinja, romperataperotakyaari osheki.

**7** Roojatzikya nokantakotanteeyerini riraga omperatayitaririni. Omaanta irira pisheninkani, noepiyayiterini jaka kipatsikika, ari ipinkathaperotakina jaka.

**8** Nokowaki iroñaaka pitotonayityaani pishiramparitantari ryotantyaari atziri paapatziyaperotakina eejatzi pikenkithashiryaantyaawori nokantakimiri”. Rootaki ikantakiriri Tajorentsi Awaraama. Ari roojatzti ikoñaatapaaki itomi, riraga Ijaaka. Okaataki kitejiri 8, roojatzti itotonatantakari. Roojatzti ikoñaatapaaki itomi riraga Ijaaka, iitakiri Jakoowo. Itomipaeni riraga Jakoowo ikaateeyakini 12. Tema itotonatakananteeyakirini maawaeni. Tema rioteeyakini achariniiteni.

**9** Eekiro ikantziri Eshiteewa:

—Ari rantariteeyananakini itomipaeni Jakoowo, ikijeeyakirini apaani rirentzi, iwaero Josee. Ipimanteyakirini, roojatzti ragaetanakirini Ejiipitoki. Omaanta kijokiro rowakiri Tajorentsi.

**10** Janta rowashironkagaeyawitakarini jeekatsiripaeni, omaanta rowawijaakotakiri rirori Tajorentsi. Ramitakotziri oetarika rantziri rootaki inaaperotantariri iwinkatharite ejiipitojatzti iiteetziri Jarayoo. Iñaakiri otzimimotziri ryotantari, rootaki iitantanakariri riraga Josee jewaperotatsiri. Reewateeyirini maawaeni ejiipitojatzti, eejatzi isheninka Jarayooni.

**11** Impaetzi ari itasheyeyananakini maawaeni ejiipitojatzti eejatzi jaka aepatsiteki rowaga Kanaanaki, tsikarika ijeeki Jakoowo, eejatzi itasheyeyananakini atziripaeni. Osheki rowashironkaeyananakani: tektsi raanakiro rowaeyarini achariniiteni.

**12** Riraga Jakoowo ikemakotakiro ari eenitatsi teriiko janta Ejiipitoki. Ritakari rotyaantakiri itomipaeni, ikantakiri: “Piyaate Ejiipitoki pamanantakite owanawontsi”.

Ari ramanantakitzi roojatzti ipiyantaa.

**13** Rooteentsi ithonkimateero owanawontsi, eejatzi rapiiteeri rotyaanteeri itomipaeni ikantziri: “Piyaate pamanantakite eejatzi owanawontsi”. Ari ryaateeyananakini eejatzi, roojatzti iñeyantapaakarini jewatatsiri.

Ikantawakiri: "Naaka Josee pipimantakiri paerani". Eejatzi ikantziri Josee Jarayooni: "Irika rirotaki yeeyiperopaeni naari".

<sup>14</sup> Roojatzi ikanantakari rirentzi: "Pikantaateri pawa ipokae jaka, eejatzi ikaateeyinira rirori".

<sup>15-16</sup> Roojatzi ryaatantanaka Jakoowo janta Ejiipitoki, ragaeyanakirini isheninkapaeni, ikaateeyini 75. Ari ikamapaaki janta. Roojatzi raaneeri Jakoowoni, ikitatapaeri janta Shekeemiki, ari oetari kipatsi ramanantzirini Awaraama. Irira pimantzirori kipatsi itomipaenini Emoori. Ipinatakiri korki. Eejatzi paata ikimiteeyakarini maawaeni itomipaeni riraga Jakoowoni, ikamaeyakinii maawaeni rirori janta Ejiipitoki.

<sup>17</sup> Eekiro ikantziri Eshiteewa:

—Rootaneentsi omonkaatakyu ikantakiririni Tajorentsii Awaraama. Ikaatzi osheki achariniiteni aari, roshekitanaki janta Ejiipitoki.

<sup>18</sup> Impaetzii ipinkathariwentziri paashini Jarayoo, kaari yotakotziriri Josee.

<sup>19</sup> Ramatawiteeyirini achariniiteni. Ishintsithateeyakirini, ragaeyakirini itomipaeni, rowamayiteeyakirini.

<sup>20</sup> Roojatzi ikoñaatantapaaka Moeseeshi. Aritaki ikanta Tajorentsii, iñaakiri rirotaki kameetha eentsi. Ikaatki 3 kashiri ikempoyaakirii ashitariri janta inthomaenta ipankoki, imanapithakirii ejiipitojatzii.

<sup>21</sup> Tee imatziri imanerii eejatzi ipankoki, rootaki riwetsikantakanariri tsiwoonaki, imanakotawitakari othapyaaiki iñaaki. Okantaka rishinto Jarayoo opokaki roojatzi oñaantakariri. Ari aanakiri okempoyaakaantapaakirii onampiki, okimitakaantakanari rirotaki otomipero.

<sup>22</sup> Riyotaaperotakiri ejiipitojatzii maawaeni okaatayitzini riyotayitzirini rirori. Kameetha iñaawaetzi. Imaperotziro oetarikapaeni rantayitzirini.

<sup>23</sup> Eekiro ryaatatzii ikantziri Eshiteewa:

—Ari okaatzi rojarentsite Moeseeshi 40, roojatzi ryaatantanakari rareetari ijoriiyotzinkaritepaeni.

<sup>24-25</sup> Ikenkithashiryaa riraga Moeseeshi ari reewateeyawakirinimi ijoriyotzinkaritepaeni eejatzi ikenkithashiryaaawitaka ari riyoteeyawakirini rirotaki amitakoeyerini. Ikenkithashiryaaawitaka riyotemi rotyaantakirii Tajorentsii, omaanta tee riyotawakiri rirotaki jewatatsiri. Iñaakowentapaakirii apaani joriiyo, rowashironkaakirii: ipajapajaatakiri ejiipitojatzii, tak, tak. Ari ikijakowentapaakari Moeseeshi ijoriiyotzinkarite, roojatzi rowamaantapaakari ejiipitojatzii.

<sup>26</sup> Inkaamani iñaakiri ijoriiyotzinkarite apite, ikijathatawakaanaka. Ikowawita rirori romaeeremi. Ikantziri: "Tema pijoriiyotzinkaritawakaaka. ¿litaka pikijawakaanteeyakarini?"

<sup>27</sup> Ari rotatsinkawakiri riraga kijaperoteenchari, ikantziri: "¿Ninkama peyakimiri iroñaka nowinkatharite? ¿Pikowakima pomperatayitenanii?

<sup>28</sup> ¿Pikowakima iroñaka powamaena naari, pikimitakaantenami riraganki ejiipitojatzii powamaakirii chapinki?"

<sup>29</sup> Ikemantawakari ikantakiriri, roojatzi ishiyantanaka Moeseeshi, ithaawanaki. Roojatzi ijekantapaaka nampsitsentsiki janta iipatsiteki Mariyaani. Raapaaki iina, roojatzi ikoñaatapaaki itomi apite.

<sup>30</sup> Ari eekiro ikenkithatakagaeeyirini Eshiteewa:

—Okaatki 40 ojarentsi ijekimotziri Moeseeshi rikonkiri. Roojatzi roñaagantakari ronampiri Tajorentsii, janta amorekimosakirii inchashimpoki, janta okaankiitye tee oshookaperotzii inchashi okaakintawo ochempii owaero Shinayii.

<sup>31</sup> Raminanakiro, roojatzi rotsikanaperotanakawo ikenkithashirya: "Amorekawitaka inchashimpoki, omaanta tee otaaga. ¿litarikya?" Ari riyaatashiteromi, ikowawita raminaperoteromi. Roojatzi ikemantakari Awinkatharie,

<sup>32</sup> ikantziri: "Naaka Tajorentsipero, ikantani iñaaperoeyakinani pijoriyyotzinkariteni paerani: riraga Awaraama, Ijaaka, eejatzi riraga Jakoowo, maawaeni". Jaa, omaanta riraga Moeseeshi ithaawaperotanaki, tee raminanakiro.

<sup>33</sup> Ikantziri eejatzi Tajorentsi: "Piñaaperotena, pijapatoreeya, iroñaaka pikatziyantakawo kipatsi nowameethatan, iroka nopaashinitziro.

<sup>34</sup> Noñaakiri janta Ejiipitoki pijoriyyotzinkarite niyoyaayitakirini, osheki rowashironkagaeyakan. Nokemakiri ikaminthagaeyananakani, iroñaaka nokaminthagaeyirini. Rootaki nopokashitantariri nopakakowenteri. Iroñaaka notyaantemi eeroka janta Ejiipitoki".

<sup>35</sup> Tema paerani itheenkatwakari riraga Moeseeshi, ikantzirini: "¿Ninkama peyakimiri nowinkatharie?" Rirotaki irira rotyaanantakariri Tajorentsi. Iroñaaka ipeyakiri jewatatsiri eejatzi owawijaakotziriri riraga achariniiteni. Rirotaki otyaatankiriri ronampiri Tajorentsi paerani iñaakiri janta inchashimpoki.

<sup>36</sup> Ragaeeyerini ijoriyyotzinkaritepaeni, imatayitakironi kaari iñaapiinteeeyini eejatzi itajonkakowenantzi. Imatayitakironi itajonkakowenantzi janta Ejiipitoki, janta ocheraaki inkaareki Kityonkari eejatzi janta okaankiitye tekatsinta atziri ipanko. Okaatzi 40 ojarentsi imatapiintayitakironi.

### <sup>37</sup> Eejatzi ikantzi Eshiteewa:

—Rirotaki irika Moeseeshi kantziriri ijoriyyotzinkariteni: "Ikimitakinaka riyoakina Tajorentsi kamanantzirori iñaani, ari iinja riyoyeeri paashini ajoriyyotzinkarite kamananterorini iñaani".

<sup>38</sup> Paerani ikinakinatanteeyarini achariniiteni janta tekatsinta atziri ipanko, reewawenteeeyakirini riraga Moeseeshi. Janta ochempiki oetachari Shinayii ikenkithatakeri ronampiri Tajorentsi. Ikemawakiro Moeseeshi iñaani Tajorentsi, roojatzi ikamananteeyakaririni maawaeni achariniiteni, riyoataantakariri iñaani. Roojatzi ikamananteeyakaerini iroñaaka aari, rootaki ayotantakariri rirori.

<sup>39</sup> Tee notheenkiri naari oetarika riyotayitakaerini Moeseeshi, inta naapatziyaperotakawo maawaeni ikantziri rirori. Omaanta paerani itheenkakirji achariniiteni, tee ikoyi raapatziyari. Ikowaeyawitani ipiyeme Ejiipitoki.

<sup>40</sup> Ikanteeeyirini Aawooni: "Riraga Moeseeshi rirowitaka agaeyakiteerini janta Ejiipitoki, ramaeyawitakaeni jaka. Omaanta riyaataki chapinki Shinayiiki. Iroñaaka tee ayotakotziri iitarika owakiriri kaari ipokantaa. Iroñaaka piwetsikaeyenani paashini atajorentsite, añaaperotero roori".

<sup>41</sup> Ari riwetsikaeyakironi, roshiyakaantakiri ewankari tooro. Ikoyi ipeyeromiti ajorentsite. Rowamagaeyakinironi owisha, ramashiyitakanawoni, ipashiyitakawoni. Ikimoshirewenteeyashitakawoni riwetsikan.

<sup>42</sup> Ijamashiryaaneentakari Tajorentsi, rookanakiri: ishineteeyakirini ikenkithashirya rirotaki Tajorentsi riraga oorya, kashiri, ompokiropae, oetarikapaeni. Tema rootaki rojankinatakotzirini paerani riraga Amooshini. Ro iroka rojankinatzirini: "Nojoriyyotzinkarite, iroka ikantzimiri Tajorentsi: 'Icharineeteni Ishirayeeri, janta okaankiitye pijeekaeyawitaninta paerani 40 ojarentsi. Omaanta aririka powamaantapiintanariri piratsi pitaantapiintanariri, ¿kyaryoperoma

pipinkathapiintaperotana naari? Tee. Tee pipinkathapiintana kyaaryoopero naaka,

<sup>43</sup> inta piñaaperotapiintakiri irira Marooko piitajorentsitashtihari ipankomawoki. Eejatzi pipinkathatashtakari oshiyariri ompokiro iwaero Renejaa. Pipinkathatashtakari piwetsikaeyirini eerori. Rootaki notyaanantyaariri inteenajatzri riraga ashiiryajatzri ragaeyakitemini raanakimi inampiki, romperateeyemini". Rootaki rojankinatzirini paerani Amooshi.

<sup>44</sup> Eekiro ikantanatzi Eshiteewa:

—Ikantakoeyakinanai naari nokantzimatashitakawo rootaki nanantakawori kaari kameethatatsiri. Omaanta tee apatziro ijeeki Tajorentsi pankotsiki wetsikachari mapi. Paeraniperorofa riraga achariniiteni ri-wetsikaeyakinirini Tajorentsi ipankomawo janta okaankiitye. Rantziro okimitaaka ikantakiriri Tajorentsi Moeseeshi. Riroma riyotakaakiri janta ochempiki tsikarika ikantyri riwetsikantyaawori.

<sup>45</sup> Ikamantakari riraga Moeseeshi, rirotaki Joshoe poayaataariri reewawenteyaneerini achariniiteni. Rareetantapaakari jaka aepatsitekika rootaki ikashiyakaakaeri Tajorentsi paerani, eejatzi ramaeyakironi ipankomawo. Rareetanteeyawitapaakarini iñeeyapaakirini paashinijatzitsiri atziri jeekawitachari jaka. Imatakaakiri Tajorentsi joriyyopaeni rookakaakiri riroripaenii iipatsite. Rootaki ipakiriri ajoriyyotzinkaritepaeni aepatsitepero. Ari iñaaperotziri Tajorentsi ipankomawoki, eejatzi Iraviiirini iñaaperotzitakarini rirori janta.

<sup>46</sup> Riraga Tajorentsi iñaaperotziri Iraviiirini ikameethatzi. Ikantawitarini rirori: "Pawa, tema eero ka Tajorentsipero iñaaperotzimini achariniiteni. Iroñaka nokowaki pishinetena niwetsikemiro pijekantyaari".

<sup>47</sup> Omaanta riraga Tajorentsi tee ikowakayiri Iraviiirini riwetsikero ipanko, omaanta ikowakaakiri itomi riraga Sharamooni rirotaki wetsikaperoteroni Tajorentspango.

<sup>48</sup> Tee apatziro ijeekantawo Tajorentsi riraga jenokijatzri iroka Tajorentsi-pango riwetsikaetziniri mapi. Tema ithotyaakiro maawaeni kipatsi: ijeeki tsikarika. Rirotaki matakirori oetarika ikoyiri. Tema rirotaki wet-sikakirori maawaeni, oetarikapaenii. Aritaki ikantzita kamanantzirorini iñaani Tajorentsi:

<sup>49</sup> "Ikantzi Pawa Tajorentsi: 'Noshiyakaawentemiro. Jenokinta okim-itaka nojeeekinta. Rowaga kipatsi oshiyawitakawo shitashintsi naatzikantawo noetzi. ¿Tsika pikantyaaka piwetsikantenari pankotsi nojeeekantyaari? ¿Arima nomonkaatashitakyaawo?'

<sup>50</sup> Tema naaka wetsikaeyakirorini maawaeni jeekatsiripaenii".

Rootaki ikantziri kamanantzirorini iñaani Tajorentsi.

<sup>51</sup> Nojoriyyotzinkaritepaeni, kyaaryo noñaaperotatziri Tajorentsi eejatzi nokemijantziro rojankinarini Moeseeshi omaanta eero ka, tee pikoyi piyote. Poshiyeeyakarini paashinijatzitsatsi atziri: tee pikenkithashireeya. Tee pikemijantaperotziri Tajorentsi. Aritaki pikantatyaa piipyathatakawo Ishire. Poshiyakari achariniiteni.

<sup>52</sup> ¿Eenitatsima kamanantzirorini iñaani Tajorentsi kaari ikijini achariniiteni? Teewee añiiri, tema riyotashitaka kijeyakiririni maawaeni. Rowamagaeyakirini maawaeni kenkithatakaanantawitacharini; riraga kantakiriri: "Iinja ipoke kameethataperotatzirini". Tema pokawitaka, rirotaki Jesoshi, omaanta tee piñaaperoyawakirini eero ka, inta paakaantakiri, powamaakaantakiri.

<sup>53</sup> Piyoteeyawitawoni ikaminaantziri Tajorentsi ronampiri riyotaawitariri Moeseeshi, omaanta tee paapatziyaperotawo.

Rootaki ikantziriri Eshiteewa atziri.

<sup>54</sup> Ari ikemaeyawakironi iroka ikantakiriri, roojatzi ikijanteeyantanakani. Osheki ikijeeyanakirini, ratsikaekitawenteeyanakarini raekiki, tyakiririri.

<sup>55</sup> Omaanta irira Eshiteewa, riweshiryaawentashiryaaperotakawo Ishire Tajorentsi. Raminaperotanaki jenokinta, iñaakiro ishipakiryaani Tajorentsi. Eejatzi iñaakiri Jesoshi ikatziyaka rakoperoki.

<sup>56</sup> Ikantanaki:

—Jaa, irinta noñaaperotakiri jenokinta, riraga Atziriperotapaentsiri janta rakoperoki Tajorentsi. Rivotaki Jesoshi.

<sup>57</sup> Ishintsitanaki ikaemaperoyanakini, rashiteeyanakironi ikempita, ishiyashiyyapaakarini. Ragaeyapaentatzirini, shepik.

<sup>58</sup> Ragaeyanakirini jata oweyaapaakanta nampitsi. Roojatzi rompojanteeyakaririni mapiki. Riraga ompojakiriri, raatonkoryaakiri iithaari, rowankitziro iitziki Sawoori, ikantziri:

—Paminawakinawo noethaari, nompojawakiriita.

Ikantziri:

—Ari.

<sup>59</sup> Ari rompojampojaatakiri Eshiteewa, roojatzi ramanantanakari Tajorentsi, ikantanakiri:

—Nowinkatharite Jesoshi, paashiretawaenawo noshire.

<sup>60</sup> Rotziwerowanaka, antawo ikaemanakiri, ikantanaki:

—Nowinkatharite, tee okameethatzi iroka ranteeeyakirini, omaanta eero pikijawentziro iroka rantakinari inta pipeyakoteniri.

## 8

<sup>1</sup> Rootaki ikantakiri, roojatzi ikamantanaka. Ikantanaki rirori Sawoori:  
—Ariwee, kamaki; ñaa okaanteekirira.

### *Riyaatzi aapatziyariri Jesoshi janta Jamaaryaki*

Roojatzikya ritantanakawori kijakiriri Eshiteewa ikijeeyakirini maawaeni aapatziyariri Jesoshi janta Jerojareeki. Ithonkagaanteeyakanani, ishiyeeyanakanani maawaeni paashinipaeni janta Joreeyaki, eejatzi Jamaaryaki. Inta jeekaneentsiri riraga rotyaantanewopaeni Jesoshi.

<sup>2</sup> Ari ikitatakiri Eshiteewa. Riro tyakitakotziriri aapatziyariri Jesoshi. Osheki riraakoeyakarini.

<sup>3</sup> Omaanta Sawoori, ikowawita ithonkaeyerinimi riraga aapatziyariri-paeni Jesoshi. Riyaatashiteeyirini ipankokipaeni, inoshikaeyirini shiram-pari, tsinani, maawaeni. Romonkyaagaeyakirini omonkyagaamentotsiki.

### *Raapatziyeyakarini Jesoshi jeekatsiri paashinipaeniki nampitsi*

<sup>4</sup> Riraga shiyeyaneencharini, ikinakinayitanakini paashinikipaeni nampitsi. Ikenkithateeyakotakirini Jesoshi eejatzi ikenkithateeyakironi ñaani Tajorentsi.

<sup>5</sup> Riraga Jiripi rareetapaaka nampitsiki, irona Jamaaryawero. Ikamatotakotapakiri Rotyaantanewo Tajorentsi raamaakari rivotaki Jesoshi.

<sup>6</sup> Ikemaeyantakaririni, eejatzi iñeyantakaririni itajonkantayitzini, raapatziyaperoeyawakarini atziripaeni.

<sup>7</sup> Rowawijaakoeyakirini osheki kyaantawitariri kamaari, antawo ikemaeyanakini riraga kamaaripaeni, roojatzi ishitowantanaka. Retsiyatakoeyakirini osheki kijopookitatsiri, eejatzi paashinipaeni atziri amashitachari iitziki.

<sup>8</sup> Roojatzi ikimoshireeyantanakani riraga jeekatsiri-paeni nampitsikinta.

**9-11** Eenitatsi janta shirampari iitachari Shimo. Paerani osheki ojarentsi isheripiyaritawitaniroña. Tema ramatawitakiri maawaeni jamaaryajatzi, ikenkithashiryakotakiri imatakiromi kaari iñaapiinteeini, roojatzsi rotsikanantatakaariri irirapaeni, rootaki ikantakaaperotantakari osheki. Iñaaperoeyawitakarini atziri: jewatatsiripaeni, atziritzinkaripaeni, maawaeni. Ikanteeyini:

—Irika Shimo ojeekantakari itajorenka Tajorentsi. Tema rirotaki jewatatsiri. Thame apinkathateri.

**12** Omaanta roojatzsi rareetantapaakari Jiripi, ikamantakotakiri Tajorentsi, tsika ikanta reewawanantz. Eejatzi ikamantakotakiri Jesokirishito. Ari ikaawoshitakotakiri Tajorentsi maawaeni aapatziyeyakaririni Jesoshi: shirampari, tsinani, maawaeni.

**13** Eejatzi ikimiwitaa riraga Shimo ikantzi: “Eejatzi naaka naapatziyari”. Eejatzi ikaawoshitakoteetakiri Tajorentsi. Roojatzsi kijokiro rowantanakari Jiripi. Iñaakotayitakirini oetarika rantayitakirini, eejatzi itajonkantaperotayitzini. Roojatzsi rotsikanaperotanakari iñaakirowa rantayitakirini.

**14** Riraga rotyaanantane Jeshoshi, jeekatsiri Jerojareeki, ikemakoeyakirini jamaaryajatzi raapatziyeyakawoni rirori iñaami Tajorentsi, roojatzsi rotyaanantakariri Peetero eejatzi Jowa janta.

**15-16** Riyaatanaki.

Janta Jamaaryaki tekiraata okithaatakaari Ishire Tajorentsi jamaaryajatzi; apatziro ikaawoshitawenteeyakarini Awinkatharite Jesoshi. Rootaki aririka rareetakari riraga Peetero eejatzi Jowa ramanantakaariri Tajorentsi. Ikantziri: “Pikithaatakaayaari riraga jamaaryajatzi Pishire. Tema rootaki matakayerini”.

**17** Ari rowakiniri rako iitoki riraga jamaaryajatzipaeni, roojatzsi okithaatakaantakari Ishire Tajorentsi, otajonkakagaeyakirini.

**18** Iñaakotakiri riraga Shimo. Riyotanaki aririka rowapaakiniri rako iitoki atziri, okithaatakaakari rowaga Ishire Tajorentsi, roojatzsi ikanantakari:

**19** —Ajaa, koriki, nokowaki piyoteena notajonkante naari, nokimitemi eerori. Nokowaki aririka noyeniri nako iitoki atziritzinkaripaeni, raashireeyantyaaworini Ishire Tajorentsi.

**20** Omaanta ikantanakiri Peetero:

—Itispataantemiri Tajorentsi piyorikite rotyaantemi janta paamariki kaari tsiwakanitatsini. Piitakaashiwitaka eeroka ari pamanantakiro itajorenka Tajorentsi.

**21** Tekatsu pikantya pikimitena: riyotzimi Tajorentsi tee pikameethashiretti.

**22** Pikenkithashiryagaagaeya, eero pikimita paerani, pookaero kaari kameethatatsi pantayitzirini. Pamaneri Tajorentsi, pikanteri: “Pikaminthagaena: piyekotenawo iroka kaari kameethatatsi nantakiri”.

**23** Niyotakimi osheki pikantakaaperota, pikowawitaka pimonkaatenami, eejatzi ashi poyiro tee pikameethatzi.

**24** Rakanakiri Shimo, ikantzi:

—Pikanteriita Tajorentsi ikaminthayena okantyaatakye eero niyatanta paamariki kaari tsiwakanitatsini.

**25** Riraga Peetero, Jowa, Jiripi ikamantakotakiro iñaani Awinkatharite, ikenkithatakotakiro. Ikinayitanakini osheki nampitskipaeni Jamaaryaki, ikanteeyakirini jeekatsiripaeni:

—Aririka paapatziyeyayari Jesoshi, rowawijaakoteemi Tajorentsi, gaeyanakimini jenokinta.

Roojatzsi ipiyeyantaani Jerojareeki.

*Raapatziyaperotakari Jesoshi eteyopiiyajatzi*

**26** Ari ikantaki ronampiri Awinkatharite, ikantakiri Jiripi:

—Iroñaaka piyaatanaki, pikinanaki janta awotsiki kinachari okaankiitye teenta oshookaperotzi inchashi: rowaga poñaaneenchari Jerojareeki, roojatzi areetachari janta nampitsi Kaashaki.

**27** Ari ryaatanaki, ikinanaki awotsiki. Itonkiyotawakari shirampari poñaachari Eteyopiiyaki. Rirojatzi owinkathatzinkarite Kantaasheshi, riraga kempoyeevinirorini maawaeni oorikite. Rootaki roori iwinkathawote eteyopiiyajatzi. Ari chapinki ryaatakitzi janta Jerojareeki, ipinkathaperotziri Tajorentsi.

**28** Iroñaaka ipiyaa, ijekaki ishiyakomentoki, iñaanatziro rojankinarini Isseyashi, riraga kamanantzirorini iñaani Tajorentsi.

**29** Ro Ishire Tajorentsi kantakiriri Jiripi:

—Piyaate janta, pitonkiyotawakyawo shiyakomentotsinta.

**30** Ishiyashitanakari, ikemapaakiri iñaanatziro. Ikantapaakiri:

—¿Pikemaperotakiroma iroka piñaanatzirika?

**31** Rakanakiri:

—Teewe nokemaperotziro. ¿Tsika nokantyaaka nokemaperotantyaawori? Tekatsi iyotayenani. Potetapaeya, pijekimotapaena jaka.

**32** Eeniro iroka okantziri jankinarentsi iñaanatziri:

“Aririka rowamagaeteri owisha, imaeiritashitanaka. Aririka rameeteet-ziri owishaaniki, imaeiritashita. Ejazti ikimityaari Rotyaantanewo Tajorentsi rirori, imaerite.

**33** Rowashiwentagaeteri, eero okameethatzi ikantakoteetziriri. Roojatzi rowamaantyaari. Eero itzimi itomipaeni”.

**34** Rojampitziri, ikantziri:

—Pikamantenaty. ¿Ninka ikenkithatakotziri riraga kamanantzirorini iñaani Tajorentsi? ¿Rirojatzima kenkithatakotashitacha? ¿Paashinima ikenkithatakotziri?

**35** Roojatzi ikamanantanakari Jiripi, ikamantakotziri Jesoshi. Ritakanari okantziri rowaga Itawori Iwaperite Tajorentsi, riyoataaperotakiri.

**36** Eekiro ryaatakaatziiri awotsiki, roojatzi iñaantapaakawo eteyopiiyajatzi iñaa. Ikantakiri:

—Eeniro iroka iñaa. ¿Kameetharima nokaawoshitakotaari Tajorentsi?

**37** Rakanakiri:

—Paapatziyaperotakaririka Jesoshi, kameetha pikaawoshitakotaari Tajorentsi.

Ikantziri:

—Naapatziyaperotakari. Niyoperotaki rivotaki Jesokirishito Itomi Tajorentsi.

**38** Ikanta ikatziyakaapaakawo ishiyakomento. Ari rayiitapaaki, ranashiteeyananaki, itsipatawakaanaka apite, ranashaateeeyakawoni iñaa. Roojatzi ikaawoshitawentakari Tajorentsi.

**39** Ari ishitowanee iñaakira roojatzi Ishire Awinkatharite omapokashitanakari aanakiri Jiripi inteea. Tee iñaawaeri ejazti riraga itsipatawitari inkaaganki. Apaniroeni ryaatanee rirori, ikimoshireperotanaki.

**40** Omaanta Jiripi, aanakiri Ishire Tajorentsi iñaakotashitapaaka nampitsiki janta oetanta Ashooto. Ari rareetantapaaka, ikenkithatayitanakini nampitskipaeni:

—Paapatziyeeyaarini Jesoshi pawijakoeyantyaarini.

Roojatzi ipiyantanaa janta Sesareeyaki.

## 9

*Ipaashinitantaari Sawoori*

<sup>1</sup> Ari ashi royoiro ikijaperotaka Sawoori. Rajaryaawitakari rowamagaey-erinimi maawaeni aapatziyeyyaririni Jesoshi. Roojatzi ryaatashitantakari iwinkatharite ñaanakowenantatsiripaeni ikantziri:

<sup>2</sup> Nokowaki pojankinateniri riraga aapatziyakaworini rojankinarini Moeseeshi jeekatsiri janta Tamaashikoki, pikanteri: "Pamitakooyerini Sawoori eejatzsi tsipatariri ragaeyerini maawaeni aapatziyariripaeni Jesoshi. Nokowaki ragaeyerini: shirampari, tsinani, maawaeni. Roojatzi roojoteeyerini, ramaeyakirini jika Jerojareeki".

Ari rojankinatiniri, ipakiri.

<sup>3</sup> Roojatzi ryaatantanaka, ikantanaka shok, shok: roowitapaenchami Tamaashikoki. Omapokashitapaakari oshipakiryapaaki, ikatziyakaga Sawoori: opoñaaka jenokinta.

<sup>4</sup> Pariyanaki irira kipatsiki, teree, ikematziiro iñaani Jesoshi jenokinta:  
—Sawoori, Sawoori: ¿uitaka pikijantanari?

<sup>5</sup> —¿Ninkamika, Nowinkatharite?

—Naaka Jesoshi, piijani. Pikijakiri maawaeni aapatzianari rootaki pikijantakinari naari.

<sup>6</sup> Iroñaaka eero pikijana omaanta pikatiyi piyaate, powaaganakya janta Tamaashikoki. Inja ari ikanteetemi oetarika panteri.

<sup>7</sup> Ari ikatziyeeyakanri riragapaei shirampari itsipateeyawitakarini, osheki imaeriiyanakini. Tema ikemashitakawo paantentsi, omaanta tekatsi iñe.

<sup>8</sup> Riraga Sawoori, ikatziyanaa. Rokiryaawitanaa, tee imateeya ikokichaatee, rootaki ikathatantanakariri, rareetakaakari Tamaashikoki.

<sup>9</sup> Okaatzi ijekashitaka 3 kitejiri. Tee ikokichaatee, tee rowaeya, tee riree.

<sup>10</sup> Ari eeniro janta Tamaashikoki aapatziyariri Jesoshi, iitachari Ananiiyashi. Ramparyaatakarri Awinkatharite, ikantapaakiri:

—¡Ananiiyashi!

Ikantawakiri:

—¿ilitaka, Nowinkatharite? Eenirona jaka.

<sup>11</sup> Ikantakiri:

—Iroñaaka piyaate awotsiki iiteetzirinta Tampatsikari. Pikowakowata-paakiri shirampari iitachari Sawoori, riraga taarishojatzi. Pikowakowata-paakiri janta ipankoki Joorashi. Tsitenishitakotaki. Eeniro rirori ramanana.

<sup>12</sup> Koñaatziro iñaaperotakiro, iñaakimi pikyaashitapaakiri, pipampitapaakiri iitoki, iñaanaa etsiyatakotanaki.

<sup>13</sup> Ikantawakiri:

—Nowinkatharite, osheki nokemakotziri, ikenkithatakoteetziri riraga pikantakinari. Osheki rowashironkaeyirini aapatziyeyimirini janta Jerojareeki, ikantanakirikya.

<sup>14</sup> Rooma rotyaatziri jika riraga jewatayitziririni ñaanakowenantatsiripaeni rirori ragaeyantanakinani maawaeni ameenteeyimirini. Osheki nothaawantaperotakari.

<sup>15</sup> Omaanta ikantakiri riraga Awinkatharite:

—Piyaate. Rooma rirotaki niyoyaakiri. Rirotaki kenkithatakotanakinani. Ikenkithatakagaeyerini paata joriyyopaeni, kaari joriyyo, jewawentayitziririni atziri, maawaeni.

<sup>16</sup> Ejatzsi inja noñaayeri oetarikapaeni okaate ikemaatsitawentena.

<sup>17</sup> Ari ryaatanaki Ananiiyashi, ikyapaaki pankotsiki. Rowapaakiniri rako iitoki, ikantziri:

—Sawoori, eerokataki noyemijantzinkarite. Rotyaantakina Awinkatharite Jesoshi, riraga oñaagakimir i janta awotsiki pikinapaakinta. Rotyaantana pikokichaataantaneeeyari, eejatzi okithaatakaakimi Ishire Tajorentsi.

<sup>18</sup> Roojatzi opariyaantanaka rokikira oshiyawitawori ipentaki shima, kochikaataperotanee. Ari riyaatanaki, ikaawoshitakoteetakiri Tajorentsi.

<sup>19</sup> Ari rowawaetaka, roojatzi ishintsitantanaa.

Apaanipaeni kitejiri ijeekimotawitanakari aapatziyariri Jesoshi janta Tamaashikoki.

<sup>20</sup> Riyaatagi riraga Sawoori ipiyotapiintaga joriiyopaeni, ikantapiinteyirini:

—Riroperotakiroña Jesoshi Itomi Tajorentsi.

<sup>21</sup> Antawo tee riytakotziri riraga kemaeyawakiririni. Ikanteeyini:

—Tema rirotaki riraga thonkaeyerinimi aapatziyariri Jesoshi janta Jerojareeki. Tema rootaki ipokashitantawitakariri jaka roojoteeyakiterinimi aapatziyariri Jesoshi, ragaeyanakirinimi janta ñaanakowenantsirkinta. Omaanta iroñaaka ikantzi: “Paapatziyaperotyaari Jesoshi”.

<sup>22</sup> Eekiro riyaatanakitzi Sawoori ikenkithataperotzi, tee ithaawantaneentaari amineeyakiririni. Tee riytakotziriroña riraga joriiyotatsiri. Riyotakaataperotakiri, ikantzi:

—Riraga Jesoshi, rirotaki Kirishitotatsiri, riraga Rotyaantanewo Tajorentsi.

### *Riraga Sawoori ishiyapithatakari joriiyopaeni*

<sup>23</sup> Ari awijanaki osheki kitejiri roojatzi rajaryaanteeyawitakarini joriiyopaeni rowamaerimi riraga Sawoori.

<sup>24</sup> Omaanta riytakotakiri Sawoori rajaryaakari. Maawaeni kitejiriki tsiteniriki ramineeyawitakawoni joriiyopaeni ikyaatapiintari rowaga Tamaashikoki, ikowaeyawitakani raawakirim Sawoori, rowamagaeyerinimi.

<sup>25</sup> Omaanta, tsiteniriki itsipatanakari riyotaanewopaeni otantotsiki rowaga inkitzirori pankotsipaeni; rateetakaanakiri, roojatzi rotetantakari antawoki kantziri, roojatzi royiitakotantaari kantziriki okaankiütziira. Roojatzi ishiyantanaa, tee iñeeyawaaerini owamagaeyerinimi.

<sup>26</sup> Ari rareetapaaka Jerojareeki. Ikowawitaka itsipateeyapaeyaarinimi aapatziyariri Jesoshi, omaanta ithaawanteeyawakarini. Iitakashiwitakari tee raapatziyariri Jesoshi.

<sup>27</sup> Roojatzi raanakiri Werenawee, itentanakari janta ijeekinta rotyaannewo Jesoshi. Ikamantapaakiri:

—Kyaaryo, ragaeyerinimi Sawoorika ayemijantzinkarite janta Tamaashikoki, omaanta janta awotsiki iñaakiri Awinkatharite Jesoshi, ikenkithataakaakiri. Raapatziyariri, roojatzi janta Tamaashikoki ikenkithatakotapiintapaakiri irira, tee ithaawantayitapaakarini theenkantatsiri.

<sup>28</sup> Ari raakameethateeyakirini aapatziyariri Jesoshi, kameetha ijeekimotakiri rirori janta Jerojareeki. Ikantani Sawoori, kijo rowaeyakirini ayemijantzinkarite. Kameetha ikenkithatakotaperotziri Awinkatharite.

<sup>29</sup> Ikenkithatakagaeyawitakarini joriiyopaeni iyotzirori ipaante kireeshiyajatzi, omaanta ipiyathateeyawakarini; ikowaeyawitakanani rowamaerimi,

<sup>30</sup> omaanta riytakotakiri iyemijantzinkarite, roojatzi raantanakari Sawoori janta Sesareeyaki. Roojatzi rotyaanteeyakirini Taarishoki.

<sup>31</sup> Kameetha ijeekaeyini aapatziyeyakaririnipaeni Jesoshi janta Joreeyaki, Karireeyaki, Jamaaryaki. Eekiro ryaatanakitzi raapatziyeyanakarini Jesoshi. Rameteeyakawoni iñaaperoeyirini Awinkatharite. Ejatzi osheki iweshiryakaaperoeyakarini Ishire Tajorentsi.

### *Itajonkantayitzini Peetero janta Riiraki*

<sup>32</sup> Ari ikinakinayitakini Peetero rareetayitarini aapatziyariripaeni Jesoshi, roojatzi rareetantakari nampitsiki iitachari Riira. Janta ijeeki osheki aapatziyariri Jesoshi.

<sup>33</sup> Iñaapaakiri shirampari iitachari Eneeyashi. Okaatzi ojarentsi 8, imaryaka imaamentoki, ikijopookitaki.

#### <sup>34</sup> Ikantapaakiri:

—Eneeyashi, rirotaki Jesokirishito etsiyatakoteemini. Pikatziyanee, piwetsikaero pimaamento.

#### Intsipaete ipiriintanaka.

<sup>35</sup> Iñeeyakirini riirajatzi, eejatzi saroonajatzi; roojatzi maawaeni raapatziyeyantanakarini Awinkatharite Jesoshi.

<sup>36</sup> Ojeeckawita Joopeki aapatziyariri Jesoshi oetachari Tawiita. Owaero ipaanteki kireeshiyajatzi: Toorikashi. Kameetha iroka antayitzirini: ashi oyiro oneshironkatantayitzini.

<sup>37</sup> Omantsiyatanaki, roojatzi okamantaka. Ari ikiwachempokiteetakiro owathanai, roojatzi rowakiro janta shitamenkotsiki, janta jeñokiini.

<sup>38</sup> Rowaga Riira okaakintawo Joope aritaki ijeeki riraga Peetero. Riraga aapatziyariripaeni Jesoshi, ikemakotakiri rirori eeniro ijeeki janta. Rootaki rotyaantanakariri apite shirampari:

—Pishintsite, pikantakiteri Peetero ipokeeta.

Ari riyaataki, ikantaperotapaakiri:

—Intsipaete, poyaatanakina paminakitero tsinani, kamaki.

<sup>39</sup> Ari riyaatanaki Peetero, royaatanakiri. Rareetakaakari, raanakiri janta pankotsiki jeñokiini. Otapotheeyawentakawoni maawaeni kamayiteentsirini oemi, iragaeeyakani. Eeniro oñaapiytakironi ookayitakirini, eejatzi oethaariperopaeni. Okanteeyakini:

—Tekirani okamini Tawiita, opayitanawoni maawaeni iroka noethaari.

<sup>40</sup> Ari roemishitowaeyapaakirini maawaeni atziri. Rotziwerowanaka, ikenkithatakaeri Tajorentsi. Ipithokashitanakawo kamaentsiri, ikan-tanakiro:

—Tawiita, pipiriintee.

Roojatzi okiryaantanaa, oñaatziiri Peetero okaakini, roojatzi opiriinan-tanaa.

<sup>41</sup> Ikathawakoteero, ikatziyeero. Ikaemaeyakirini eejatzi aapatziyeyyaririni Jesoshi, eejatzi roori ikaemaeyakironi kamayiteentsirini oemi, maawaeni. Ikyapaaki, ikanteeyawakirini:

—Pamine, añaanee eejatzi.

<sup>42</sup> Ari ikemakoeyakironi maawaeni joopejatzi. Ikaatzi oshekini aapatziyayitanakaririni Awinkatharite Jesoshi.

<sup>43</sup> Osheki kitejiri ijeeki Peetero Joopeki. Ijeeki ipankoki Shimo, riraga wetskipiintziriri mashitsipaeni.

<sup>1</sup> Ari eeniro ijeki janta Sesareeyaki shirampari iitachari Koroneeryo. Rriotaki iyapitaanote osheki joraaro, poñaayitacharini Itaaryaki.

<sup>2</sup> Kaari joriyyo omaanta raapatziyaperotari Tajorentsi. Eejatzti ikimiteeyarini maawaeni jeekimotziripaeni. Osheki ikaminthagaeyirini joriyyopapaeni owashironkayitacharini. Ikantatyaaani ikenkithataakaeri Tajorentsi.

<sup>3</sup> Itsiteniityaanee oorya iñaashitawakari ronampiri Tajorentsi, roñaagaperotapaakari. Rokaakintapaakari, ikantapaakiri:

—Koroneeryo.

<sup>4</sup> Raminaperotawakiri, joreririri. Oshekini ithaawantaperotanakari. Ikantawakiri:

—¿litaka, Nowinkatharite?

Ikantakanakiri:

—Ikaemakimi Tajorentsi pamanapiintakiri, eejatzti iñaakimi pikamintaakotapiinteyakirini atziripaeni.

<sup>5</sup> Rootaki ikowantakari iroñaaka potyaante apaanipaenai shirampari janta Joopeki. Pikaemakaanteri riraga Shimo, iiteetziri eejatzti Peetero. Irira ikamantemi oetaka ikowakaakimiri Tajorentsi. Pikemijantawakiri.

<sup>6</sup> Irira ijekimotziri iitachari eejatzti Shimo, riraga wetsikapiintziririni mashitsi. Eenitatsi ipanko othapyaäkiini antawo inkaare.

<sup>7</sup> Ari ipiyanaa ronampiri Tajorentsi, riraga kenkithawaetakaakitziriri. Ikaemakiri Koroneeryo ronampiri apite, eejatzti joraaro apaani. Riraga joraaro rirotaki aapatziyaperotariri Tajorentsi. Ikaateeyirini amitakoeyiririni Koroneeryo.

<sup>8</sup> Ikanamteeeyakirini maawaeni iroka ikantakiriri ronampiri Tajorentsi, roojatzi ikantziri:

—Nokowaki piyaaateeyeni Joopeki, paminerri riraga Peetero.

Ari riyaateeyanakini.

<sup>9</sup> Inkaamani, aririka itampatsikatapaaki oorya, rokaakinantapaakawo rowaga Joope. Tekiraata rareetapaakari, riraga Peetero eeniro rateetanaki jenoki, ikenkithataakaeri Tajorentsi.

<sup>10</sup> Itasheyawitaka, ikowawita royaami. Eenitatsi wetsikiniriri royaari, omaanta tekira othonkiro, ari ramparyaataakari.

<sup>11</sup> Iñaakiro jenokinta inthomaenta. Ayiitakotapaaki pankotsiki oshiyawitawori tokoya antwo. Roerikakoetakiro janta okaamawotapaakinta.

<sup>12</sup> Rotetayitakani inthomaenta maawaeni inashiyitacharini riraga kaari rowaeta; rirotaki otetayiteenchani chaancho, maankipaeni, jenokiweripaeni, maawaeni.

<sup>13</sup> Iroñaaka ikemawakiri Tajorentsi, ikantziri:

—Peetero. Ajaa, thame powamaeri, eejatzti poyaari.

<sup>14</sup> Ikantawakiri:

—Nowinkatharite, paerani pikantakiri nochariitiipaenai iitarikapaenii kameethatzi royaari, eejatzti iitarikapaenii kaari royaari. Eejatzti naari, tee nametapiintari noyaari irika kaari rowaetari pikantawitakinari noyaari iroñaaka.

<sup>15</sup> Rapiiteeri:

—Tema naaka Tajorentsi. Nokantzimi naaka: “Kameetharini rirori-paeni”. Aririka nokowakaakimiri naaka, eero pikantashitari eerori: “Tee ikameethatzi”.

<sup>16</sup> Rapiiteeniri paashini:

—Powamaeri, poyaari.

Roojatzi itzinaakotanteetaariri jenokinta.

<sup>17</sup> Tee rirotakotawakiro Peetero iroka iñaakirika. Ikenkithashiryaaanaka: “¿litaka ikowakaanari Tajorentsi nanteniriri? ¿litakakya ikanantanari”?

Roojatzi rareetantapaaka pankotsiki rotyaantanewo Koroneeryo. Ro-jampitakowentapaakiri:

—¿Tsika ipanko Shimo, riraga wetsikapiintziriri mashitsi?

Ikamanteetawakiri:

—Iroka ipankoka.

<sup>18</sup> Ari rojampitakiri atziri inthomaenta:

—¿Arima ijeekimotzimi riraga Shimo Peetero?

Rakanakiri:

—Jee, aritaki ijekkaki.

<sup>19</sup> Eeniropikenkithashiryaawo Peetero iñaakiri, ari okantakiri Ishire Tajorentsi:

—Ikantaka rareeteeyapaakani 3 shirampari, kowapaakimiri.

<sup>20</sup> Payiitashiteri. Eero pikantashiryaashita, poyaateeyanakirini. Temanaaka amaeyakiririni.

<sup>21</sup> Ari ranaashitashitapaakari, ikantapaakiri:

—Naaka pikoyiri. ¿Iitaka pipokashitantanari?

<sup>22</sup> Ari rakanakiri riori:

—Rotyaantakina Koroneeryo, riraga kapitaanotatsiri. Rashi royiro ikameethatzi, eejatzi iñaaperotziri Tajorentsi. Maawaeni joriyyotatsiri iñaaperoeyirini ikameethatzi. Ikantziri ronampiri Tajorentsi: “Pikaemakaanteri Peetero pipankoki. Pikemijantawakiro iñaani”. Rootaki rotyaanantarnajaka.

<sup>23</sup> Ari ikantawakiri:

—Pikyaapae.

—Ari.

Ineshironkatawakiri roejeekawakiri. Inkaamani royaatanakiri, itsipateeyanakarini apaanipaeni aapatziyariri Jesoshi rirotaki joopejatzti.

<sup>24</sup> Apaani imagaeyanakini niyanki, roojatzi rareetantaka janta Sesareyaki. Royaakiri Koroneeryo janta, ipiyoteeyakirini maawaeni isheninka eejatzi itsipaminthapiinteyayarini.

<sup>25</sup> Roojatzi rareetanteeyapaakarini Peetero, riyowashitanakirin Koroneeryo riwethatawakari, roojatzi rotziwerowashitawakari iitziki, ipinkathatawakiri.

<sup>26</sup> Ari ikatziyakagaari Peetero, ikantziri:

—Pikatziyanee. Tee naaka Tajorentsi, rooma naaka atziri eejatzi, akimittawakaaka.

<sup>27</sup> Ari ikenkithatakaawakaapaaka, ikyapaakira pankotsiki. Iñaapaakiri osheki piyoteenchari,

<sup>28</sup> Ikantapaakiri:

—Naaka joriyyo. Piyoteeyini eerori tee ishinetana nojoriiyotzinkarite not-sipateeyaaarini paashinijatzitsiri atziri. Eejatzi tee ishinetana nareetyaari. Nokenkithashiryeeyakironi tee ikowakaanawo iroka Tajorentsi. Omaanta iroñaaka ryotaakina Tajorentsi tee okameethatzi nopinkiri paashini atziri, tee okameethatzi nokante: “Tee ikameethatzi”. Niyyotaki ishinetakina Tajorentsi notsipatyaari paashinijatzitsiri atziri.

<sup>29</sup> Ari pikaemakaantakina, roojatzi nopokantanaka, tee nokijotanaki. Iroñaaka nojampitemi, ¿iitaka pikaemakaanantanari?

<sup>30</sup> Ikantawakiri Koroneeryo:

—Chapinki tsitenini oorya, ikimitaka iroñaaka, namanakiri Tajorentsi jaka nopankoki. Noñaakiri ikimiwitapaakari shirampari, ikatziyimotapaakina. Ikithaaatowo shipakiryaatsiri iithaari.

<sup>31</sup> Ikantapaakina: “Koroneeryo, ikemakiro Tajorentsi pamanakiriri. Riyotakimi osheki pineshironkatayitzirini ashironkaenkarri.

<sup>32</sup> Potyaanteri atziri janta Joopeki, ikaemakiteri Shimo, iiteetziri eejatzi Peetero. Ijeekimotziri paashini Shimo, riraga wetsikiriri mashitsi. Ojeeki ipancho othapyaakiini antawo inkaare”.

<sup>33</sup> Intsipaeta nokaemakaantkimi, roojatzi pipokantaka. Iroñaaka nokaateyakirini riraga Tajorentsi jaka. Nokowaeyakini nokemaeyeroni iroka ikowakaakimiri Awinkatharite.

<sup>34</sup> Ari iñaawaetanaki Peetero, ikantzi:

—Iroñaaka niyotaperotaki tee rinashitakagaeyeeni Tajorentsi atziri. Ikowakaakiri maawaeni atziri, joriyyo eejatzi kaari joriyyo raapatziyeeyarini Jesoshi, rootaki reentsitetantariri maawaeni.

<sup>35</sup> Tee ikenkithashiryakotero inashitayitanika añaani eejatzi ametayitarini inashitacharipaeni, omaanta iñaaperoeyakirini ikameethatzia maawaeni pinkathateeyiririni, eejatzi maawaeni antapiintzirori kameethatatsripaeni.

<sup>36</sup> Naaka joriyyo. Piyoteeyawakironi iñaani Tajorentsi reewateeyakanani, riyotakagaeyakinani. Kameethari iroka ikantakinari: “Aririka paapatziyaperoeyarini Jesokirishito, kameetha nojekakagaeyemini, pikimittawakaanteeyarini”. Rooma rirotaki Awinkatharite maawaeni,

<sup>37</sup> piyoteeyakironi. Reewataki Jowani kaawoshitantatsiri ikenkithatakotakiri, ikantzi: “Kameetha pikaawoshitawenteeyarini Tajorentsi”. Roojatzi ikenkithatakotakiri paashinipaeni, itanakawori janta Karireeyaki. Ikananantakiro iñaani Tajorentsi maawaeni nampitskipaeni janta Joreeyaki.

<sup>38</sup> Ikamanteeyirini atziri tsika ikantakiri Tajorentsi Jesoshi, riraga naja-reetejatzi, rotyaanantakawori Ishire, eejatzi ipitakari itajorenka; rootaki ik-inakinayitantakarini, ranantayitakaworini kameethatayitatsirini. Rowawijaakoeyakirini kyaantariri kamaari. Eejatzi retsyatakoeyakirini mantsiyaripaeni. Kijokiro royiri Tajorentsi, rootaki imatantakariri.

<sup>39</sup> Noñeyakirini rantayitzirini janta inampikipaeni nojoriyyotzinkaritepaeni, eejatzi janta Jerojareeki. Noñaakowenteeyakirini rowamaanteetakariri, ikentakontanteetakariri koroshiki.

<sup>40</sup> Aritaki okaataki kitejiri 3 ipiriinteeri Tajorentsi, roñaagakinari.

<sup>41</sup> Tee roñaagari maawaeni atziri, inta naakapaeni roñaagakari. Riyoyaakina Tajorentsi, rootaki noñaantawaariri. Ikamaperotawitaka, ipiriintanaa eejatzi. Roojatzi nowakaawaari, eejatzi nirakaawaari.

<sup>42</sup> Rotyaantayitakinani nokenkithatakoteri Jesoshi rirotaki owawi-jaakotantatsiri. Ikantakina: “Pikamanteeyerini atziri: ‘Ikowakaawaeri Tajorentsi Jesoshi ipiriinteeri maawaeni kamatsiripaeni roojatzi ikantakowenteeyerini maawaeni atziri: añaatsiri eejatzi kamawitachari’”.

<sup>43</sup> Tema paerani ikenkithatakotzirini Rotyaantanewo Tajorentsi riraga kamanantayitzirorini iñaani Tajorentsi, ikanteeyini: “Eeniro ranteeyakironi maawaeni atziri kaari kameethatatsi; omaanta aririka raapatziyeyarini Rotyaantanewo Tajorentsi, ikaminthagaeyerini rirori, eero ikijawentziri ranteeyirini, eero rowashironkaawentziniri kaari kameethatatsiri rantaw-itakari, eero ikenkithashiryakotero eejatzi”.

<sup>44</sup> Eeniro ikenkithatzia Peetero, roojatzi opokashitantakari Ishire Tajorentsi. Eejatzi opokashiteeyakirini maawaeni kemaeyawakirorini ikantakiriri.

<sup>45</sup> Ari rotsikanateeyakarini riragapaeni joriyyo, aapatziyariri Jesoshi: riraga tsipatariri Peetero. Ari riyoteeyanakini rotyaanaperotakiro Tajorentsi Ishire, okithaatakaakari paashinijatzitatsiri atziri. Rootaki rotsikanatanta-nakariri.

**46** Ikemaeyawakirini isheninka Koroneeryo iñaawaetantashitakawo paashinipaeni paantentsi, tee riyotagaetziri, eejatzi ikanteeyini:

—Kameetharini Tajorentsi.

**47** Ari ikantanaki Peetero:

—Ikimitakae aari, raashireteeyakironi Ishire Tajorentsi. Rooma okameethatzhi ikaawoshitakoteeyarini Tajorentsi.

Ikantziri paashinipaeni joriyyo:

—Jee, kameethataki.

**48** Roojatzi ikanantariri Peetero isheninka Koroneeryo:

—Pikaawoshitawenteeyarini Jesokirishito, riyoteeyantemirini atziri piñaaperotakiri.

Ikanteeyanakirini:

—Intsipaaeti pikaawoshitakotenari Tajorentsi.

Ari imatakini. Rootaki ikantantakariri isheninkapaeni:

—Pijeekimotanakinakya apaanipaeni kitejiri, piyotaaperotanakina paashini.

Ari ijeekanaki.

## 11

### ***Ikemaeyakini jerojareejatzi raapatziyakari Jesoshi kaari joriyyo***

**1** Ikemakoeyakirini riraga rotyaantanewo Jesoshi eejatzi maawaeni aapatziyaripaeni Jesoshi jeekatsiri janta joreeyaki, ikemakoeyakirini Koroneeryo. Ikanteetakiri:

—Raapatziyakari Jesoshi paashinijatzitsiri atziri; riro aapatziyakaakariri Peetero.

**2** Itonkaantanaari Peetero Jerojareeki, ikenkiimatashiteeyawakarini ijoriyyotzinkaritepaeni: aapatziyariri Jesoshi omaanta eeniro ikenkithashiriio eejatzi itotonatyva ishiramparitantari.

**3** Ikanteeyawakirini:

—¿litaka piyatashitantariri paashinijatzitsirtsiri atziri? ¿litaka pakiyotantariri rirori? Tee okameethatzhi.

**4** Ithotyaaperotakiniri Peetero, ikantziri:

**5** Iroñaka nokamantemi. Janta nojeekekakitzinta Joopeki, nokenkithatakaeri Tajorentsi. Koñaatziro noñaaperotakiro, tema noñaakiro oshiyawitawori tokoya antawomawo. Roerikaetakiro janta okaamawotayitapaaakinira, opoñaaka jenokinta, ayiitzimotapaaakina.

**6** Naminaperotawakiro, joreririri: noñaakiri kaari owaeyani: chaancho, maanki, jenokiweri, maawaeni.

**7** Nokemakiri Tajorentsi, ikantakina: “Iroñaka powamaeri; poyaari”.

**8** Omaanta nokantawitakari: “Nowinkatharite, eero nowari. Tee nametari kaari rowaetari, kaari ikowakagaetana noyaari”.

**9** Rapiitakina, ikantana: “Tema naaka Tajorentsi kantzimiri: ‘Kameetharini’. Eero pikantashitari eerori: ‘Tee ikameethatzzi’ ”.

**10** Aritaki okaatzi 3 rapiitakina. Roojatzi itzinagaero jenokinta.

**11** Ikanteeyapaakani 3 shirampari rareeteeyapaakani janta pankotsiki nojeekinta. Ipoñaanaka Sesareeyaki, rotyaanteetakinari.

**12** Roojatzi okanantakinia Ishire Tajorentsi: “Poyaatanakiri, eero pikijotanaki”. Ari noyaatanakiri. Eejatzi royaatanakina irikapaeni ayemijantzinkarite, ikaateeyini 6. Nokyagaeyapaakini ipankoki riraga kae-makaantakinari.

<sup>13</sup> Ikenkithatakaawakina, ikamantawakina tsika ikantakari iñaantakariri ronampiri Tajorentsi. Roñaagantapaakariri, ikantziri: "Potyaanteri atziri janta Joopeki. Pikaemakaanteri Shimo: iiteetziri eejatzi Peetero.

<sup>14</sup> Rirotaki iyotaapaemironi Iwaperite Tajorentsi, pawijakotanteeyaa. Eejatzi ikimitagaeya rirori maawaeni jeekayitatsirini pipankoki".

<sup>15</sup> Nitantakawori nokenkithatakaakiri, roojatzi okithaatakaanteeyakarini Ishire Tajorentsi. Okimiteeyakaenika aari itantakaeri.

<sup>16</sup> Nokenkithashiryaaanakiro iñaani Awinkatharite ikantztakari: "Riraga Jowa ikaawoshitakotantariri Tajorentsi iñaaki, rooma naaka ari nokithaatakaakimiro Ishire Tajorentsi".

<sup>17</sup> Paerani aapatziyanteeyakaririni Awinkatharite Jesokirishito, tema ikithaatakaakaero Tajorentsi Ishire. Iroñaaka imonkaatanakiniri rirori paashinijatzitsiripaeni atziri. ¿Arima nothañaakaayaari? Tema irira rirotaki Tajorentsi.

<sup>18</sup> Ikemaeyantawakaworini iroka, tekatsi ikantaneeri rakaneeri, inta ikanteeyanakini:

—Kameethaperotakiroña Tajorentsi. Rooma ikowakagaeyakirini eejatzi paashinijatzitsiripaeni atziri, ikenkithashiryaaagaeya, raapatziyaperoe-yarini rirori, ryaatanteeyanakarini janta jenokinta.

### *Itsiparyaayitanakironijanta paashinipaenikinampitsi*

<sup>19</sup> Riraga kijakiriri Eshiteewani, eejatzi ikijejeranakirini maawaeni aapatziyariri Jesoshi, roojatzi ishiyeyantanakanai paashinikipaeni kipatsi: Jeniishiya, Cheepere, Antyokiya, maawaeni. Janta tee ikenkithatakagaeyirini paashinijatzitsiripaeni atziri, inta rothataayitzirini ijoriyyotzinkaritepaeni ikenkithatakaayitakirini.

<sup>20</sup> Eniro itsipatayitakarini paashinipaenii aapatziyariri Jesoshi, poñaayitaneecharini Cheeperekii, eejatzi Shireeneki. Rareetantayita-paakarini rirori janta Antyokiyyaki, ikenkithatakaapaakiri kireeshiyajatzi eejatzi. Ikanteeyirini:

—Paapatziyari Jesokirishito pawijakotanteeyarini.

<sup>21</sup> Itajonkakowentapiintziri Awinkatharite, ikaatantakari oshekini aapatziyeyawakaririni Jesoshi, ameenteeyaririni Tajorentsi.

<sup>22</sup> Ari janta Jerojareeki ikemakoeyakirini riraga aapatziyariripaeni Jesoshi. Rotyaantakiri Werenawee janta Antyokiyyaki.

<sup>23</sup> Rareetapaaka rirori, iñaapaakiri ineshironatziri Tajorentsi antyokiyyatzi. Ikomoshiryaapaaki, ikanteeyirini:

—Kyaaryooroña, kijokiro powaeyirini riraga Awinkatharite, pikyaary-oowenteniri maawaeni ikowakagaeyakimirini.

<sup>24</sup> Kameetharini rirori Werenawee. Kijokiro rowaperotziro Ishire Tajorentsi, ashi royiro raapatziyaperotari Awinkatharite. Eejatzi eekiro riyaatzi roshekiteeyanakini aapatziyariripaeni Awinkatharite.

<sup>25</sup> Roojatzi rowaagantanaka Werenawee Taarishoki, ikowapaakiri Sawoori. Iñaapaeri, roojatzi royaatantaariri Antyokiyyaki.

<sup>26</sup> Janta ikantani ipiyotapiintzirinta aapatziyariri Jesoshi okaatzi apaani ojarentsi. Riyotaapaakiri oshekantzi atziri. Aritaki janta itanakawo iiteetziri aapatziyariri Jesoshi: "Kirishiteyanotatsiri".

<sup>27</sup> Roojatzi rareeteeyantapaakani Antyokiyyaki paashinipaenii kamanantayitzirorini iñaani Tajorentsi, ipoñaanaka rirori Jerojareeki.

<sup>28</sup> Eenitatsi apaani iitachari Akaawo. Ikatziyapaaka janta ipiyoteeyaninta, iyotaakiri Ishire Tajorentsi, rootakiikanantari:

—Inja itasheyeyanakini atziripaeni janta maawaeni Joreeyaki.

Eenironi ipinkathariwenantzi Kiraaworyo, tema monkaataka ikantzitarini Akaawo.

<sup>29</sup> Ikanteeeyini aapatziyariri Jesoshi:

—Thame akaminthagaeyerini ayemijantzinkaritepaeni janta Joreeyaki, apakaanteri oetarika koetyeemotariri.

<sup>30</sup> Tsikarika okaatayitzini jeekimotayiteerini, aritaki okaate apakaantayiteririni.

Aritaki imatakiro ikantakiri. Ipiyotakiri koriki, ipawakiri Werenawee, eejatzi Sawoori. Ikantakiri:

—Ajaa, irika koriki: pagayanakinirini aataperoteenchari aapatziyariri-paeni Jesoshi janta Jerojareeki, ikaminthagaeyantyaaririni ashironkagaeyacharini.

Ari raanakiniri jerojareejatzi, ipapaakiri rirori. Ari rowaagaeyakinirini rirori ashironkagaeyacharini.

## 12

### *Erooreshi Akiriipa, rivotaki kijakiriri aapatziyariri Jesoshi*

<sup>1</sup> Roojatzi riraga jewaperowenantatsiri Erooreshi, iiteetziri eejatzi Akiriipa, ikijayitakirini apaanipaeni aapatziyariri Jesoshi.

<sup>2</sup> Rowamaakaantakiri Jantyaako, ro ithatyanteetakariri jawiri, thatzik. Irira rirentzi Jowa.

<sup>3</sup> Riyotaki inimoeyakirini joriyyopaeni, rootaki raakaanantawitakariri Peetero eejatzi.

<sup>4</sup> Ro raakaanantakariri apaani kitejiriki rowantapiinteetawori paa kaari tapiyacha. Itashiwitaka aririka omonkaatakyta kitejiri Rawijantari acharinilueni paerani, roñaagaeyerini joriyyopaeni rowamaeri. Raakiri, roojatzi ipakiri 16 joraaro, shenterini.

<sup>5</sup> Ari romonkyaagaetaakiri. Riraga aapatziyariri-paeni Jesoshi ikantatyani maawaeni kitejiriki ramanakowentapiinteeyarini, ikantziri: “Powawi-jakoteeri Peetero”.

<sup>6</sup> Ari otsitenitananki, ro inkaamani roeyowakaanterimi Erooreshi, rowamaakaanantyaaririm. Ikowawita ramineeyerinimi atziri rowamaakaantakiririka. Ari omonkyagakaantawitakari Peetero omonkyagamentotsiki, imaanaki; rojatekakiri apite joraaro, imaaki irira. Roojotantakari apite karenatha. Ishentawitakawo ashitakontsi paashinipaeni joraaro.

<sup>7</sup> Ari romapokashitapaakari janta ronampiri Awinkatharite. Rotzinkapaakiri imerikiki, ikaakapaakiri. Ikantakiri:

—Pishintsite pipiriintee.

Roojatzi oshiryaashitantanaka karenatha apaniroeni rakokitzirira, roojotantawitakariri.

<sup>8</sup> Eejatzi ikantziri:

—Pikithaataneeyawo pimaatha, pijapatotaneeya.

Ari ikithaataa, ijapatotetaa. Eejatzi ikanteeri:

—Papineekakotya pijawamento poyaatanakina.

<sup>9</sup> Ishitowanee, royaatanakiri. Tee riyotzi Peetero kyaaryooperotakirika rowawijaakoteeri ronampiri Tajorentsi. Raamashitaka imishiwaetashitaka.

<sup>10</sup> Rawijanakiri shentawitariri apaani, eejatzi paashini rawijanakiri. Rareetakawo ironta ashitakontsi, ironta ikinantapiintari nampitsiki. Ashitari-imotashitanakari. Rawijaneero, rowaganaka janta awotsiki. Roojatzi rinteenaryaanatanakari ronampiri Tajorentsi.

<sup>11</sup> Riyotakota Peetero, ikantzi: "Iroñaaka niyoperotaki rotyaantakinari Nowinkatharite ronampiri raakowentakina rowamaenami Erooreshi. Eejatzi ikimitakowentakina, tsikarika ikantenami nosheninkapaeni".

<sup>12</sup> Ikenkithashiryaanakiro, roojatzi riyaatantaka opankoki Mariiya, riniro Jowa. Iiteetzi eejatzi Marikoshi. Janta ipiyoeyakaninta oshekí aapatziyariri Jesoshi, ikenkithatakagaeyirini Tajorentsi.

<sup>13</sup> Rompojakowitzapakawo Peetero ashitakontsi, rowaga othapikitzirinta: tok, tok. Ari okatziyashitawitanakari onampirentsi oetachari Roore.

<sup>14</sup> Iyowaantetawaeri ipaante Peetero, roojatzi okimoshiryaantaperotanaka. Omaanta tee ashitaryaanakiniri, omaanta oshiyashitanaka. Okamanteevirini kenkithatakagaeyiririni Tajorentsi:

—Pokapae Peetero omookinta.

<sup>15</sup> Ikantteeyawakironi:

—Pishinkiwentashitaka.

Eekiro okantanakitzi:

—Kyaaryooperotaki.

Ikantakiro:

—Kaari Peetero, irintakya ronampiri Tajorentsi aminakowentziriri.

<sup>16</sup> Eekiro rompojanakitziroroña, tok, tok, roojatzi rashitaryaantaanari. Ari iñeyawaerini, rotsikanatakari, ikantawakagaeyananakani:

—¿Tsika ikinapaeka?

<sup>17</sup> Ari rakotashitanakiri, ikantziri:

—Pimaerite.

Roojatzi ikamanteeeyapaerini tsika ikanteeri Awinkatharite, roeyowaantaariri. Eejatzi ikantziri:

—Pikanteri Jantyaako, eejatzi pikamanteeeyerini ayemijantzinkaritepaeni. Roojatzi ishitowantanaa, riyaatanee imanapithatakari joraaropaeni.

<sup>18</sup> Okitejitanaki osheki ikantawakaawenteeyakarini joraaropaeni:

—¿Tsikakya ikantanakaka iroñaaka Peetero?

<sup>19</sup> Ikowakowatakaantawitakari Erooreshi, tee iñaagaeri. Rojampiiyaw-itakarini joraaro shentawitariri:

—¿Tsikaroña ikinaneeka?

Rakanakiri, ikantanakiri:

—Taanitya, tsikarika, tee niyotzi; tee noñaawaerি.

Ari ikijakiri Erooreshi rirori, rowamaakaanteeeyakirini, shemi. Ari roojatzi rookaneero rirori Joreeya, rowaaganaa janta Sesareeyaki, roojatzi ijekantapaa.

### *Ikamantakari Erooreshi*

<sup>20</sup> Ari ikanta Erooreshi ikoshekawakari poñaachari Tziiroki eejatzi Shirooki ikanta ikenkithashiryaagaeyakani ikoshekanewo raakameethateeri, tema ari riyompariteeya. Rotaanteeyakini jatashiterini rirori.

Ikanta jeekapankotziriri rirori rameentaperotanewo, iitachari Waraashito raakameethatawakiri pokashitakiriri. Ikantteeyapaakirini:

—Pikanteri Erooreshi: "Paakameethateeri tziirojatzi eejatzi shiroojatzi riyomparityaata, eero pithañaawo royaari".

Ikantziri Waraashito:

—Ari, namitakoeyemini.

<sup>21</sup> Ari paashini kitejiri ikaemaeyakirini Erooreshi, raakameethateeyakirini. Rowaneenkatakawo jewawanantatsiri iithaari, ijekaki janta iwinkatharimentoki. Osheki ikantakaaperotaka ikenkithatakagaeyakirini. Ikantziri:

—Eero pikenkithashiryaashita. Nopaeylemini maawaeni koetyeemotayitakimirini.

<sup>22</sup> Roojatzi ikimoshireeyantanakani pokaentsiri, ikanteeyanakini:  
—Kaari irira atziri akemaeyakirini, inta apaani tajorentsi. Kameetharini rirori.

<sup>23</sup> Ari osheki ikantakaaperotaka Erooreshi, riweshiryawentakawo ikan-teyakiririni atziri. Omaanta roonakari Awinkatharite, rotyaantakiri ron-ampiri ikantakiri:

—Tee iñaaperotana Erooreshi. Piyaate pomantsiyeeri.

Ari ryaataki, roojatzi romantsiyaantakari, ikamantaka, roojatzi rowantakari chowitsi.

<sup>24</sup> Omaanta riraga aapatziyariri Jesoshi ikinakaantayitanakawoni iñaani Tajorentsi. Roshekiperotanaki aapatziyeyawakaworini.

<sup>25</sup> Riraga Werenawee, eejatzi Sawoori retakotari aapatziyariri Jesoshi janta Jerojareeki. Roojatzi ipiyantanaa Antyokiyyaki, itsipatanaari Jowa, iiteetziri eejatzi Marikoshi.

## 13

### *Riyaatzi Sawoori eejatzi Werenawee janta Cheepereki*

<sup>1</sup> Iroñaaka janta Antyokiyyaki ikaateeyirini aapatziyariri Jesoshi matakaakiriri Ishire Tajorentsi: omatakaakiriri apaanipaeni kamanantayitzirorini iñaani Tajorentsi eejatzi paashini apaanipaeni omatakaakiriri riyotaakiri atziri Iwaperite Tajorentsi. Iwaero apaani omatakaanewo Ishire Tajorentsi rirotaki Werenawee, paashini Shimo (iiteetziri eejatzi Chenkari), paashini Rooshiyo, (riraga shireeneejatzi); paashini Maneemi, (itsipamintharini pinkathari Erooreshi eenironi ikaatzini), paashini Sawoori, (iiteetziri eejatzi Paaworo), maawaeni.

<sup>2</sup> Ari paashini kitejiri ipiyoteeyani ipinkathatziri Awinkatharite ikenkithatakakiriri, itzitawenteeyakarini Tajorentsi. Roojatzi okanantakari Ishire Tajorentsi:

—Pikanteeyerini Werenawee eejatzi Sawoori: “Panteniri Tajorentsi oetarika ikowakaakimiri”.

<sup>3</sup> Ari roojatzi rowakiniri rako iitoki ramanakowentakiri Tajorentsi, roojatzi ikanantanakariri:

—Piyaate pantero ikowakayimiri Tajorentsi, naakakya kanterini Tajorentsi ramitakotemi.

<sup>4-5</sup> Ari otyaatankiri Ishire Tajorentsi, roojatzi riyaatantakari Sereeyoshiyaki janta okaakini inkaare antawo. Raanakiri Jowa Marikoshi ramitakontanyaariri. Ari rotetapaaka pitotsiki. Otyaatankotziri tampyyaa, ikinakotanaki Cheepereki, rootaki antawo othampishi. Ojeeki janta nampitsi oetachari Jaramiina: rareetanteeyapaakarini janta, ikenkithatapaakiro iñaani Tajorentsi janta ipiyotapiinteeyaninta joriyyopaeni.

<sup>6</sup> Roojatzi ithotyagaeyanakironi maawaeni nampitsiki janta Cheepereki, maawaeni. Roojatzi rareeteeyapaakanri Paajoshiki. Janta iñaapaakiri sheripi-yaritatsiri, iitachari Warijesooshi, rirotaki joriyyo. Roshiyaarimi kamanantayitzirorini iñaani Tajorentsi, ikantapiintzi:

—Naaka kenkithatzirori iñaani Tajorentsi.

Jaa, itheeyashita.

<sup>7</sup> Itsipatapiintari jewawenantatsiri iitachari Seerijiyo Paaworo. Eeniro riyoperotzi irira. Ikaemakaantakiri Werenawee, eejatzi Sawoori; ikowaki ikemiro iñaani Tajorentsi.

<sup>8</sup> Ari ikanta Sawoori ikenkithatakotapaakiri Jesoshi omaanta ithañaawitakari riraga sheripi-yari; tee ikowakaawitari riraga jewawenantatsiri raapatziyari Jesoshi.

**9** Ari iyotaaperotakiri Ishire Tajorentsi Sawoori, iitachari ejatzi Paaworo. Iyotaakotakiri sheriipiyyari, rootaki raminaperotanakiri Paaworo,

**10** ikantanakiri:

—Pamatawitantaperotaki. Teeroña pikameethatzi; pikimitakari iwinkatharite kamaari. Tee pikoyiro kameethatayitatsirini, inta pikowap-erotaki pamatawitantayiteni. Pikowaki pamatawiteeyerini maawaeni kowatsiri riyoteri Nowinkatharite. Eerowa pikenkithashiryaaeneenta.

**11** Iroñaaka itajonkemi Nowinkatharite pitsitenishitakote. Ojamanitanaki, eero paminitaa.

Roojatzi itsitenishitakotantanaka, tee ikokichaatanee. Ipampipampitanaki, ikantanaki:

—Teewee nokokichaatzti. Pikathataneenawee.

**12** Ari iňawakiri riraga jewawenantatsiri, rootaki rotsikanatantanakari. Roojatzi raapatziyantantanakari Jesoshi. Ikantzi:

—Kameethawee iroka ikamantakotziriri Awinkatharite.

### *Rowaaganaa kenkithatzirori iňaani Tajorentsi janta Aashiyaki*

**13** Ipoňaaka Paaworo Paajoshiki, rotetanaka pitotsiki, roteteeyanaani ee-jatzi maawaeni ikaateeyirini. Ikinakotanaki janta Peerijiki, rowaga pampi-iriyakiweri. Riraga Jowa Marikoshi rookanakiri, ipiyanaa rirori Jeroja-reeki.

**14** Roojatzi paashini kitejiri rowaagaeyanaani riroripaeni ejatzi. Ra-reeteeyapaakani janta paashiniki Antyokiyya: rowaga pishiiryawero. Saawaroki ikyeeyapaakini ipiyotapiinteyanira joriiyopaeni, ari ijeekaeya-paakini.

**15** Iňaanateetziro eechonkiini rojankinarini Moeseeshi paeraniperoroña, ejatzi eechonkiini rojankinarini kamanantayitzirorini iňaani Tajorentsi paerani. Roojatzi riraga jewawentzirori janta ikantawakiri:

—Nojoriyyotzinkarite, pikowakirika eerori pikemijantakayeri atziri jaka, pikamanteri iroñaaka.

**16** Ari ikatziyanaka Paaworo, rakotashitakiri romaveryagaeyakirini. Ikantziri:

—Nojoriyyotzinkarite, pikemijantena. Ejatzi eerokakya maawaeni paashinipaeni atzirika pinkathaperotakiriri Tajorentsi, pikemijanteyawakinani.

**17** Iroñaaka nokenkithatakotemiri Tajorentsi raapatziyari joriiyopaeni. Paerani riyoakirini riragapaeni achariniiteni raapatziyari. Impaetzti, ijeekantakari rirori janta Ejiipitoki romperatantawitakaririni, roshekitaawitakarini Tajorentsi. Itajonkakowenteeyirini, roojatzi rowawi-jaakowenantaari ejiipitojatzi.

**18** Okaatzi 40 ojarentsi ikempoyaakiri riraga achariniiteniroña janta okaankiteronkiitzinta ijeekakagaeyawitakarini omaanta osheki itheenkayakirini Tajorentsi.

**19** Ikowaeyawitakan rareeteeyaanimi Kanaanaki omaanta eenitatsi jeekwitacharini paashinijatzitsatirii atziripaeni, otzikaeyawitawakaririni. Rinashitayitani rirori. Roojatzi itajonkawentziniri Tajorentsi achariniiteniroña. Ithonkaeyakirini okaatzi ipaantepaeni 7. Roojatzi ipakiri achariniiteni iipatsite, ikantziri: “Ajaa, iroka piipatsite, pijectaeyantyaarini”.

**20** Paerani ikashiyakaakari Tajorentsi Awaraamani ipashityaari ichari-neeteni iipatsite, omaanta roojatzi ijeeki irirapaeni janta Ejiipitoki. Rim-paetakiri riraga Tajorentsi raantanaariri iipatsiteki. Maawaeni iroka okaatagi ojamanitaki 450 ojarentsi. Janta ijeekawitanta, tekatsi jew-awenantaperoeyeririni, inta riyoakirii Tajorentsi kantakotantatsiripaei

riyotakaantyaariri aririka rantziniri oetarika ikowakaakiri. Roojatzi reewatakaantzi riraga kamanantzirorini iñaani Tajorentsi iwaero Samoeri.

<sup>21</sup> Roojatzi ikantakiri achariniiteni Tajorentsi: "Nokowaeyakini atziri reewawentaperoyenani". Ari riyoyaakinirini noshametz Sawoori itomi Shishi, reewawenantaririni achariniiteni. Riroteeyakini icharineeten Irijamiini. Okaatzi 40 ojarentsi reewawenantaki Sawoori,

<sup>22</sup> roojatzi ikanantaa Tajorentsi: "Eero reewawenantanee eejatzi Sawoori, tee ikameethatzi, inta reewawenante Iraiviiri, riraga itomi Isayii. Rirotaki noñaaperotakiri ikameethaperotaki, tema ari rantakinawo maawaeni nokowakayiriri".

<sup>23</sup> Rirotaki icharineeten Iraiviiri owawijaakotakaeri: iwaero irira Jesoshi. Tema ikantzini Tajorentsi: "Riro icharineeten Iraiviiri owawijaakoeyeririni atziri". Monkaataka iroñaaka ikantzitakaririni.

<sup>24</sup> Roojatzikya Jowa kaawoshitantsiri ikenkithatakagaeyakiririni maawaeni ajoriyyotzinkaritepaeni: "Pikenkithashiryagaeyani, eero pikimiteeyaanai paerani, ari nokaawoshitakoeyemirini Tajorentsi, eejatzi rowawijaakoeyemini irira". Roojatzi ikenkithatapaaki riraga Jesoshi.

<sup>25</sup> Eejatzi riraga Jowa rooteentsi ikame, ari ikantzi: "Tee naaka irira pikenkithashireeyawitarini. Tee naaka riraga owawijaakoeyemirini, omaantakya poyaatanari rirotaki Jesoshi owawijaakotemini. Osheki noñaakoweenkatakari riori; rooma naaka tee noñaakoweenkata".

<sup>26</sup> Eekiro rowaganakitzinri Paaworo, ikanteeyakirini:

—Nojoriyyotzinkaritepaeni, tema ashenkintateeyakarini Awaraamani, eejatzi eerokapaei paashinijatzitsiri atziri, thame akimitaperoeyaarini riori, apinkathaperoyenani Tajorentsi. Iroñaaka nokanteeyemini: aririka aapatziyeyarini Jesoshi, ari rowawijaakoeyakaeni.

<sup>27</sup> Omaanta tee riyoteeyawakirini jerojareejatzi, itheenkaeyawakirini. Eejatzi ikimiteeyakan iwkinkatharitepaeni, tee riyoteeyawakirini rirotaki Rotyaantanewo Tajorentsi. Maawaeni saawaro iñaanatapiinteyawitawoni rojankinatayitzirini kamanantayitzirorini iñaani Tajorentsi, omaanta tee ikemaperotawakiro, rootaki kaari riyoperoyantawoni kameetha okenkithatákotziri Jesoshi. Tema okantzi: "Rowamaateri paata Rotyaantanewo Tajorentsi". Ari rowamaakaanteeyakirini maawaeni atziri riori, rooma tee riyotawakiri.

<sup>28</sup> Tekatsi rantawitya, rowamaakaantashitakari. Ikantakowentashitakari Peraato riraga jewawenziriri: "Powamaakaanteri".

<sup>29</sup> Monkaateeyakani maawaeni rojankinatakotziteetakaririni: osheki rowashironkaakiri, ikentakoteetakiri koroshiki, ikamaki. Roojatzi paashinipaeni atziri royiitakoteri rowaeri janta omooki impeeta.

<sup>30</sup> Ikamaperowitaka, omaanta rowañaagaeri Tajorentsi.

<sup>31</sup> Ari okaataki osheki kitejiri roñaagayitarini riyotaanewopaeni, riraga tsipateeyapaaririni chapinki Jerojareeki: riraga poñaachari Karireeyaki. Riroteeyakini iroñaaka kamantteeyiririni atziri:

—Piriintanaraa Jesoshi. Noñaagaeyakirini.

<sup>32-33</sup> Eekiro ikanteeyanakitzinri Paaworo:

—Okameethataki ikanteeyakiririni paerani Tajorentsi achariniiteni. Rojankinatakaakiri paerani ojeekantakari mampaantsi, apiteteenchari. Okantzini: "Ikanteri Tajorentsi Rotyaantanewo paata: 'Rooma naaka kowashitacha: nōpiriinanteemiri nokantaperotanteemiri notyom' ". Iroñaaka nokanteeyemini: imatakiro Tajorentsi ikantakiririni achariniiteni: ipiriinteeri Jesoshi, ayoteeyantakarini rirotaki Rotyaantanewo Tajorentsi.

<sup>34</sup> Iroka paashini ikantakiririni Tajorentsi: "Notyomi, nomonkaataperotemiro maawaeni okaatzira nokantayitakiririni Iraiviiri:

notajonkakowentemi peewaperowenantyaari". Aritaki okimitakaantzi Iwaperite Tajorents: ikamaperotawitaka, ipiriintaneeri Iriri, eero ijekaperotzi inthomaenta kipatsiki.

<sup>35</sup> Tema rootaki iroka rojankinatakiniri paashiniki mampaantsi: "Tajorents, niyotaki eero pishinetziri pitomi ipathaye kipatsiki: rooma osheki piñaaperotakiri ikameethaperotzi".

<sup>36</sup> Pikenkithashireeri Iraviirini, paerani imonkaatakiniri Tajorents maawaeni ikowakaeriri. Roojatz iкамантака rirori. Ikitateetakiri, itsipatagaetakiri isheninkapaeni, roojatz ipathaaperotantanaka.

<sup>37</sup> Omaanta irira Jesoshi ipiriinteeri Tajorents, tee ipathaaneentzi rirori.

<sup>38-39</sup> Iroňaaka, nojoriyyotzinkarite maawaeni, piyoteeyawakironi iroka. Eeniro panteeyakirini kaari kameethatatsiri, omaanta añaatsi iroňaaka Jesoshi, ikaminthagaeyakimini. Tee ikowakayimi piyaateeyeni paamariki kaari tsiwakanitatsini, inta ikowaki rowameethateeyemini, rowawijaakoeyemini. Iroka rojankinarini Moeseeshi, tekatsi okantya owameethateeyemini.

<sup>40</sup> Kyaaryoowa, pikimitarikari riraga ojankinatzirorini kamanantayitzirorini iñaani Tajorents ikantzini:

<sup>41</sup> "Ikantzimi Tajorents: 'Pamine, theenkantatsiri, pikenkithashireeyanakyaani: nothonkaeyiminikari. Iinja piňeyinani notajonkawenantaperotanaki nomatayiteroni kaari piňapiinteeeyini. Aririka nokamantawitemi oetarika nanteri, eero pikemijantana' ". Rootaki ikantziri kamanantayitzirorini iñaani Tajorents. Ari nojoriyyotzinkaritepaeni, iroňaaka paapatzyaari Jesoshi, ithonkaeyiminikari Tajorents.

Rootaki ikantakiriri Paaworo ijoriyyotzinkaritepaeni.

<sup>42</sup> Ari ishitowaeyanakinira, roojatz ikanaperoyawakirini riraga paashinijatzitsiri atziri:

—Inja paashini saawaro pipokaeyenira eejatzi. Paashini pikenkithatakagaeyenawoni niyotaperotantanakyaari.

<sup>43</sup> Ari ryaateeyanakini. Eeniro ikinanaki Paaworo awotsiki, itsipatanakari Werenawee. Royaateeyanakirini osheki aapatziyariri Jesoshi: rirotaki apaanipaeni joriyyopero, paashinipaeni peyachari joriyyo. Ari ikantakiri Paaworo:

—Eekirootaki pikemijantaperotapiinteri Jesoshi ineshironkatantemiri Tajorents.

<sup>44</sup> Ari paashini saawaro ipiyoteeyakani maawaeni antyokiyyajatzi. Ipiyotawentawo ikemijantero Iwaperite Tajorents.

<sup>45</sup> Riraga jewatatsiripaeni joriyyopaeni riraga kaari aapatziyariri Jesoshi iñaakirira piyoteeyeencharini, roojatz ikanzimoneenantanakari. Ikan-teeyini:

—Tee okameethatzi iroka ikantziri Paaworo, eejatzi tee ikameethatzi irira. Osheki ramatawitanz.

<sup>46</sup> Kameetha rakaperotanakiri Paaworo, eejatzi Werenawee. Tee ithaawashiretanaki, ikantzi:

—Eerokateeyakini nitawitakari nokamanteyawitakimironi iñaani Tajorents, omaanta pitheenkawakiro eeroka. Iroňaaka niyotaki tee pikoyi pikanteetatyeyaaani paňaaperotee janta jenokinta. Iroňaaka nyaatashiteri niyotaakiteri irira paashinijatzitsiri atziri, niyotaki raapatziyari Jesoshi rirori.

<sup>47</sup> Rootaki nyaatashitantlyaariri, rooma rotyaantakina Nowinkatharite ikantana: "Tema eeroka notyaantakiri maawaeni kipatsiki pikantayiterini

paashinijatzitatsiri atziri, rawijakotanteeyari riroripaeni. Pikenkithataka-gaeyerini maawaeni, pithotyeeyanakironi maawaeni nampitsipaeni".

<sup>48</sup> Ikemanteeyawakaririni riraga kaari joriyyotatsi, ikimoshireeyanakini. Ikanteeeyini:

—Kameetharini iñaani Awinkatharite.

Ari ijeeki osheki kaari joriyyotatsi riyyogaeyakirini Tajorentsi ijeekijenokinta, ikanteetatyeyaaani: riroteeyakini aapatziyeyakaririni Jesoshi, maawaeni.

<sup>49</sup> Othotyaayitanakani iñaani Awinkatharite maawaeni nampitsikipaeni janta.

<sup>50</sup> Omaanta irira jewatatsiri joriyyo, osheki ikijeeyanakani. Ryaatashiteeyironi tsinanipaeni aapatziyawitariri Tajorentsi sheninkatakarii aataperoteencharipaeni, eejatzi ryaatashiteeyakirini aataperoteencharipaeni rirori. Ikanteyirini:

—Thame akijeeyerini riraga Paaworo, eejatzi Werenawee. Tee ikameethatzi.

Roojatzi rotyaanantanakariri:

—Thame piyaateeyanakini. Eero pipokae paata jaka nonampikika.

<sup>51</sup> Ari rirori, rotekimotanakiri kipatsi iitzikira, pakak, pakak. Ikantziri:

—Iroñaaaka piyoteeyakinani eero napiiteero nopyiaa. Tee pikowaeyini pikemijante.

Roojatzi ryaatantanaka Ikooñoki.

<sup>52</sup> Omaanta ikimoshireperoeyanakini aapatziyariripaeni Jesoshi janta Antyokiiyaki. Kijokiro owaperoeyakirini Ishire Tajorentsi.

## 14

### *Rowaaganaa Paaworo janta Ikooñoki*

<sup>1</sup> Janta Ikooñoki ikyapaaki Paaworo eejatzi Werenawee janta pankotsiki ipiyoteeyantapiintarinira joriyyo, ikenkithatakapaaiki. Raapatziyeyawakarini Jesoshi oshekini joriyyo, eejatzi kaari joriyyotatsi.

<sup>2</sup> Riraga joriyyopaeni, kaari aapatziyari Jesoshi, riyotagaeyakirini paashinijatzitatsiripaeni atziri, ikijeeyawakirini aapatziyariripaeni Jesoshi.

<sup>3</sup> Ari ojamani ijeekapaaki Paaworo, ikenkithatakapoointziri Awinkatharite, tee ithawantari atziripaeni. Riraga Awinkatharite, imatakaakiri riraga Paaworo eejatzi Werenawee itajonkantayitzini, imatakaakiri oetarika kaari iñaapiintayitzini. Riyotakaakiri atziri kyaaryooperotaki ineshironkatantaperotaki Tajorentsi.

<sup>4</sup> Omaanta ikijathatawakagaeyanakani maawaeni ikooñojatzi. Eejatzi inashiyitanakani: apaanipaeni kimitayitanakaririni jewatatsiripaeni joriyyo. Rirori paashini kimitayitanakaririni riraga Paaworo eejatzi Werenawee.

<sup>5</sup> Maawaeni kaari aapatziyariri Jesoshi riraga joriyyo, kaari joriyyotatsi, jewatatsiri: ikowaeyawitakanri rompojanteeyarinimi mapi Paaworo, eejatzi Werenawee.

<sup>6</sup> Ari eenitatsi apaani kamantakiriri, rootaki ishiyeeyantanakarini janta Riishitaraki. Roojatzi rowaagantanaka Teeriwiki. Rootaki nampitsipaeni rikawooniyawero. Eejatzi ryaatzi othapikitapaakinta,

<sup>7</sup> ikamanteeeyapaakirini atziri tsika ikantyaari rawijakotanteeyari.

### *Riyaatzi Paaworo Riishitaraki*

<sup>8</sup> Janta Riishitaraki ari ijeekaki shirampari amashitachari iitziki. Roojatzi ikantzitapaaka owakirani ikoñaatapaaki. Tee ranashineenta eechonkiini.

**9** Ikemijantawakiri Paaworo. Ari raminapaakiri irira riyotakotakiri, rameentakari Tajorentsi, rootaki imatantyaariri retsiyatakotantyaariri.

**10** Antawo itacheronkawaantetanaki ikantakiri:

—Pikatziyaperotee.

Roojatzi romyaantanaka rirori, japo, roojatzi ikatziyatziyatantanaka.

**11** Oshekinivee ikaatzi ñaakirori iroka imatakiri Paaworo. Ari ñaaawetanteeyawoni ñaaani rikawooniyajatz, antawo ikanteeyanakini:

—Rayiitashitapaakae tajorentsika, ikimitapaakari shirampari.

**12** Riraga Werenawee iitashitari Joopiteri. Riraga Paaworo kenkithatakaantatsiri, rootaki iitantakariri rirori Merekooryo.

**13** Janta otsipanampitawo rotantoteetziri nampitsi ari ojeeki roori opanko Joopiteri. Eejatzi riraga ñaanakowenantsiri irira ramaeyakirini tooropaeni, eejatzi oteyaki inchateyaki. Ramayitakinirini janta ikyapiintziro nampitsi, ikaateeyakirini osheki isheninkapaeni. Ikowaeyawitakan rowamaenirimi tooropaeni; iperimi Werenawee eejatzi Paaworo.

**14** Ikemantawakari rirori, itzijagaanakiro imaaatha. Ishiyashiteeyanakarini piyotawentari. Ikaemanaki, ikantz:

**15** —Atziripaeni. ¿Oetaka panteeyirini? Eejatzi akimitawagaeyani: aaka atziri. Ro nopolcantakari nokamantemiro pookaera kaari kameethatatsiri pantayitzirini. Eero iroñaaaka patsipetashitawo piñaaperotashitawo piwetsikayitzirini. Pikenkithashireeyerini Tajorentsiper, riraga ñaaaperotatsiri. Rirotaki wetsikaeyirorini jenoki, kipatsi, inkaare, maawaeni; wetsikaeyirorini eejatzi maawaeni jeekanteeyaworini.

**16** Paerani ishineteyimini maawaeni kaari joriiyotatsiri oetarika pametayitakarini pantayiterini pikowashitayitakarini eerokapaeni.

**17** Omaanta riwetsikakimiro Tajorentsi riyotakagaeyimirini tsikarika ikanta. Ineshironkaperoteeyakimini. Rowariyeeyakimironi inkani. Ikithokitakaapiinantawori inchatopaeni. Ikemakaapiintzimiro poyaari. Roemoshirenkapiinteyimini pajankaneki. Rirotaki irika nokowakaakimirini pipinkathaperoteri; eerokya pipinkathaperotashitana naaka.

**18** Osheki ikamantapiintawitakariroña, omaanta roowitaneencha rowa-mashityaanarimi tooro.

**19** Roojatzi ipokantapaaka joriiyopaeni, poñaayitacharini Antyokiyyaki eejatzi Ikooñoki. Ramatawitapaakiri osheki atziri, ikantziri:

—Osheki ramatawitantz Paaworo; pikjeri.

Ari rompojanteeyakarini mapiki, iiteeyawitakarini kamaperotaki. Inoshikanakiri, rookakitziri janta othapikitapaakinta nampitsi.

**20** Ari ryaatashiteeyakirini aapatziyariri Jesoshi, itapotheetaapaakari; roojatzi piriinantanaa. Ipiyeeyanaani nampitsiki. Inkaamani rowaaganaa Paaworo Teeriwiki, itsipatanaa Werenawee.

**21** Ikenkithatakotapaakiri tsika ikantari Tajorentsi rowawijaakotantzi. Ikemijantaperotakaakiri osheki atziri. Roojatzi ipiyantaa Riishitaraki, Ikooñoki, Antyokiyyaki.

**22** Eekiro ryaatanakitzi raapatziyakaaperoeyakarini aapatziyariri Jesoshi. Ikantaperotziri:

—Eero pookiro iroka paapatziyaperotakari. Osheki akemaatsitayityaa-woni oetarikapaeni, roojatzikya aatanteeyaaarini janta reewaperotzinta Tajorentsi; omaanta eero akantashiryaa.

**23** Janta ipiyotapiinteyyanira aapatziyariri Jesoshi, riyyogaeyakirini aataperoteencharipaeni ashi piyotaantsi. Roojatzi itzitawenteeyakarini Tajorentsi ramaneeyirini, ikanteeyirini:

—Irika aapatziyeeyakimirini.  
pookakaakowenteeyerini.

<sup>24</sup> Ari ikinayitanakini paashiniki kipatsipaeni, ritapaakawo Pishiiriyaki, roojatzi rareetantapaaka eejatzi Pampiiriyaki.

<sup>25</sup> Ikamanantziro iñaani Tajorentsi janta nampsitsi owaero Peeriji, roojatzi rowaagantanaa janta Ataaryaki.

<sup>26</sup> Roojatzi rotetantanaka pitotsiki, ikinakotanee Antyokiiyaki. Ari-taki janta rotyaanteetakirinta paerani, ikanteetzirini Tajorentsi: “Irika, pineshironkateri imatantemirori oetarika pikowakayeriri”. Rooma aritaki imatakiro.

<sup>27</sup> Rareetantapaari Antyokiiyaki ipiyoteeyapaakirini aapatziyariripaeni Jesoshi. Ikenkithatakagaeyakirini maawaeni rantakagaeyakiririni Tajorentsi rirori. Eejatzi ikantakiri tsika ikantaari ishineteeeyantaaririni paashinijatzitatsiri atziripaeni raapatziyeeyantaaririni rirori Jesoshi.

<sup>28</sup> Ari ojamani ijekimotaatziri iyemijantzinkaritepaeni janta.

## 15

### *Ipiyoeyakan iapatziyariri Jesoshi janta Jerojareeki*

<sup>1</sup> Ari rareeteeyapaakani Antyokiiyaki joriyyopaeni poñaachari Joreeyaki. Irirapaeni rirotaki aapatziyariri Jesoshi omaanta ryotaapaakiri ayemijantzinkarite, ikantapaakiri:

—Rojankinatzini Moeseeshi: “Pitononayiteroni pishiramparitantari”. Eerorkira pantziro iroka, eero pawijakotee.

<sup>2</sup> Ari ipiyathawakari Paaworo, itsipatari Werenawee. Tee eechonki-ini iñaanatawakiri: osheki ryotaawakaeyawitakawoni. Riro ikowakaakari maawaeni aapatziyariripaeni Jesoshi rotyaantakiri Paaworo, Werenawee, eejatzi apaanipaeni paashini. Ikantawakiri:

—Piyaateeyeni Jerojareeki janta ijekinta rotyaantanewo Jesoshi, eejatzi rriraga aataperoteencharipaeni aapatziyariri Jesoshi. Pojampitakowenta-paakiri ikantakotziro iroka. —Kyaaryoma ikowakagaeyakinani nototonateeyeroni noshiramparitantari?

<sup>3</sup> Ari rotyaanteeyakirini, ikinanaki Jeniishiyaki. Rowaaganaka, roojatzi Jamaaryaki. Ikamantapiintayitzirini aapatziyariri Jesoshi janta:

—Osheki raapatziyeeyarin Jesoshi iroñaaka paashinijatzitatsiri atziri, rookaeyakironi rameteeyawitakarini paerani.

Rootaki ikimoshireperotanteeyawakarini maawaeni kemaeyawakiririni.

<sup>4</sup> Roojatzi rareeteeyapaakani janta Jerojareeki, raakameethateeyawakirini maawaeni aapatziyariripaeni Jesoshi: rotyaantanewo Jesoshi, aataperoteencharipaeni ipiyotantapiinantarri, eejatzi maawaeni aapatziyariri Jesoshi. Ikantapaakiri:

—Niyaatanaki intenanta oshekiniwhee inashitayitacharinipaeni nampsipaeni. Nokantakotakiri Jesoshi nokantayitakirini paashinijatzitatsiri atziri. Osheki imatakaakina Tajorentsi naapatziyakagaeyakarini paashinijatzitatsiripaeni atziri. Iroñaaka oshekini rirori rirotaki reentsitepaeni Tajorentsi.

<sup>5</sup> Omaanta ikatziyayitanakani apaanipaeni warijeeyo, aapatziyariri Jesoshi rirori. Omaanta ikantzi:

—Otzimatyte itotonatyta ishiramparitantari paashinijatzitatsiri atziri. Otzimatyte athoyeero rojankinarini Moeseeshi, maawaeni.

<sup>6</sup> Ari paashini kitejiri ipiyoteeyanaani eejatzi rotyaantanewo Jesoshi, aataperoteencharipaeni ipiyotantapiinantarira, maawaeni. Ikowaeyakini ryote oetarika ikanteriri Antyokiiyajatzi.

**7** Osheki iñaawaetantawakagaeyakawoni iroka. Roojatzi ikatziyantanaka Peetero, ikanteeyakirini:

—Noyemijantzinkarite. Paerani riyoyaakina Tajorentsi, piyoteeyakironi erori: tema piñaakoeyakinani. Aritaki riyoyaakina nokamantteeyirini paashinijatzitatsiri atziri tsika ikantyaari raapatziyanteeyariri Jesoshi, raw-ijakantteeyari.

**8** Tema riro Tajorentsi iyotzirori akenkithashireeyarini ajankaneki. Rirotaki otyaantziniriri paashinijatzitatsiripaeni atziri Ishire, ayoteeyantakarini rawijakoeyeeni. Rooma iroñaaka ikimiteeyakaeni aari.

**9** Kyaaryo, aritaki amonkaateeyakarini rirori. Tema eejatzi ikantzi Tajorentsi: "Pimonkaatawakagaeyakan". Raapatziyari Jesoshi paashinijatzitatsiri atziri, rootaki rowameethashiryantariri.

**10** Iroñaaka, ¿pikowakima pikanteri Tajorentsi: "Tee piyotzi"? Eeniro iroka pikowakiro pipomeentsitakaaperotyaari ayemijantzinkaritepaeni. Aaka-teeyakini joriyo ameteeyawitakawoni paerani, omaanta tee amatziro athtoyeeyironi, eejatzi maawaeni acharaniteni, tee imateeyironi rirori imonkaatero. ¿Tsika ikantyaari paashinijatzitatsiri atziri imatantyaawori? Osheki opomeentsitaka.

**11** Ineshironkatake Jesokirishito, rootaki awijakoeyantakarini. Tema maawaeni akemijanteeyironi iroka. Eejatzi ikimitagaeya rirori paashinijatzitatsiri atziripaeni.

**12** Imaeriteeyanakini maawaeni piyoteencharipaeni. Ikemijanteeyawakirini Werenawee, eejatzi Paaworo. Ikantakiri:

—Imatakaakina Jesoshi notajonkakowentziri paashinijatzitatsiri atziri. Imatakaakina kaari iñaapiinteyini, rootaki riyoteeyantakarini kyaaryo Jesoshi rirotaki Tajorentsi.

**13** Ikanta ithonkakiro ikamanantzi. Roojatzi ikantanaki Jantyaako:

**14** —Noyemijantzinkarite, pikemijantena. Ikenkithatakaemi Shimo tsika ikanta Tajorentsi ritantakawori ineshironkateeyakirini paashinijatzitatsiri atziri. Aritaki riyogaeyakirini ikenkithatakotantakariri.

**15** Omonkaataka iroka rojankinatzitakarini kamanantzirorini Iñaani Tajorentsi iitachari Amooshi. Rojankinatzini:

**16-18** "Ikantzi Awinkatharite: 'Inja nopyapae kipatsiki, niwetsikapaero eejatzi inampini Iraviri ishekiryagaeyawitakarini. Niwetsikapaero eejatzi maawaeni pankotsi. Nokowaki rameenteeyenani maawaeni paashinijatzitatsiri atziri, nokowaki raapatziyeeyenani'. Rootaki ikantziri Awinkatharite, wetsikirori paerani maawaeni jeekatsiri-paeni".

**19** Rootaki nakanantakari naaka tee okameethatzi apomeentsitakayaari rriraga paashinijatzitatsiripaeni atziri. Raapatziyaririka Tajorentsi, monkaataka.

**20** Omaanta, thame apakaanteri jankinarentsi. Akamanteri iroka: "Pi-jeekapithatero riwetsikani atziri iitajorentsitashitari: amatawitashiteeyiminikari. Eero piñaaminthatziro tsinani kaari payi. Eero powari shirkachari, powakotawokari iwatha riraa".

**21** Tema maawaeni saawaroki, aririka ipiyotapiinteyani ajoriyyotzinkaritepaeni, ikantani ithañaapiintakawo iroka nokantzimiri: tema ithañeyakawoni paerani Moeseeshi. Eerika ranteeeyironi iroka, ari okameethatzi raakameethateeyerini ajoriyyotzinkaritepaeni.

Rootaki ikantakiriri Jantyaako.

**22** Ari inimoeyakirini rotyaantanewo Jesoshi, aataperoteenchari eejatzi maawaeni aapatziyariripaeni Jesoshi, ikantzi:

—Kameethataki. Rootaki akamanteriri antyokiiyajatzi.

Ari riyooyeyakirini apite jewawentziriri aapatziyariri Jesoshi: Joorashi Warajawaashi, eejatzi Shiiplashi. Ikantakiri:

—Eerokapaeni oyaateeyaneerini Paaworo eejatzi Werenawee janta Antyokiyaki. Pikamantapaakiri ayemijantzinkaritepaeni nokantakiri eejatzi pipapaeri jankinarentsika.

<sup>23</sup> Iroka okantziri jankinarentsii rojankinatziniri:  
“Nokoyi niwethatemi noyemijantzinkarite tsikarika pikanta pijeeki. Jaka Jerojareeki nokaateeyirini rotyaantanewo Jesoshi eejatzi aataperoteenchari aapatziyariri Jesoshi. Iroñaaaka nojankinateeyimironi eerokapaeni kaari joriyyotatsi, jeekatsiri janta Antyokiyaki, Shiryaki, eejatzi Shiriishiyaki.

<sup>24</sup> Nokmekotakiri riraga nokaateeyawitarini: osheki ikenkithatakaashiwitakimiro, ikompitakaakimiro. Ikantashiretakaantemiri. Tee naaka otyaanterini.

<sup>25</sup> Aritaki inimoteeyakinani maawaeni naari notyaantemiri irika niyoyakirika. Itsipatanakyari Werenawee, eejatzi Paaworo: irika nonintaperotanewo.

<sup>26</sup> Riroteeyakini kaari thaawatsini ikamawenteri Awinkatharite Jesokirishito.

<sup>27</sup> Notyaantemiri Joorashi eejatzi Shiiplashi. Ikamantaperotemiro rirori, iroka nojankinatzimiri.

<sup>28</sup> Ari inimotakiro Ishire Tajorentsii, eejatzi inimotakina naari nokaman temiro iroka. Eero nopomeentsitakaantzimiro, omaanta apatziro pimatero iroka.

<sup>29</sup> Eero powari riraga rowawiitakanariri riwetsikani atziri. Eero powakotawo riraa iwathakira. Eero powari shirikachari. Aririka powakyari, osheki ikenkithashiryaanakya joriyyopaeni. Eero piñaaminthatziro tsinani kaari payi. Aririka pimatayitakironi irokapaeni, kameethataki. Ari kameetha pijeekaeyeni. Ari okaatzi nokantakimiri”. Rootaki rojankinatziniri Antyokiyajatzi.

<sup>30</sup> Ari riyaateeyanakini Antyokiyaki riraga rotyaantanewo, ipiyoteeyapaakirini aapatziyaripaeni Jesoshi, ipapaakiri jankinarentsii.

<sup>31</sup> Iñaanateeyawakironi, roojatzi ikimoshireeyantanakan.

<sup>32</sup> Rirotaki kamanantayitzirorini iñaani Tajorentsii riraga Joorashi, eejatzi Shiiplashi. Osheki ikenkithatakaapaakiri ikimoshiryaakaapaakiri, ikemijantakaaperoeyapaakirini.

<sup>33</sup> Ojamani ijeekimotakitziri, roojatzi ipiyantaa eejatzi Joorashi. Riwethateeyanaarini riraga iyemijantzinkaritepaeni, ikantawakiri:

—Kameethakya piyaatee.

Roojatzi ipiyantanaa kameetha janta ijeekinta otyaantakiriri.

<sup>34</sup> Omaanta riraga Shiiplashi ikowaki ijeekanaki Antyokiyaki.

### *Rapiitakiro ikinakinayitanakini Paaworo*

<sup>35</sup> Roojatzi ijeekantapaaka Paaworo, eejatzi Werenawee. Riyotaantaki, ikamanantanakiro iñaani Awinkatharite. Itsipateeyakarini eejatzi osheki paashinipaeni, ikamananteeyini.

<sup>36</sup> Paashini kitejiri ikantzi Paaworo:

—Werenawee. Thame añaagaateri eejatzi ayemijantzinkarite janta maawaeni nampitsikipaeni: riraga paerani akamanteeyakitzirini iñaani Awinkatharite. Aminaateriita tsikarika ikanteeyakan.

<sup>37</sup> Ikowawita Werenawee raanakirimi eejatzi Jowa. Iiteetziri eejatzi Marikoshi.

<sup>38</sup> Omaanta Paaworo, ikantakiri:

—Paerani janta aatantakari Pampiiriayaki, rookanakae. Tee itsipatanakae janta akenkithatzinta. Eero iroñaaaka aaneeri.

<sup>39</sup> Tee inimotanakiri, roojatzi rotsiparyaanantanakari. Riraga Werenawee raanakiri Marikoshi. Rotetanaka pitotsiki, ryaataki Cheepereki.

<sup>40</sup> Omaantyka Paaworo, raanakiri riraga Shiirashi. Ikanteeyini aapatziyariri Jesoshi:

—Nowinkatharite, pineshironkateeyerini irika, kijokiro powanakiri kameetha.

<sup>41</sup> Ari ikinanaki Shiiryaki, eejatzi Shiriishiyaki. Janta ikemijantakaaper- oeyakirininta aapatziyakariri Jesoshi.

## 16

### *Itsipatanakari Temoteeyo riraga Paaworo eejatzi Shiirashi*

<sup>1</sup> Injin rareetapaaka Teeriwiki, eejatzi Riishitaraki. Ijeekanaki janta aapatziyariri Jesoshì iitachari Temoteeyo. Rootaki rinirontari joriyyo. Rooma irira iriri, kaari joriyyo. Riniro rootaki kemijantzinkawo.

<sup>2</sup> Ikanteeyini aapatziyaripaeni Jesoshi janta Riishitaraki eejatzi Ikooñoki:

—Ikameethatzi Temoteeyo.

<sup>3</sup> Ikowaki Paaworo itsipatanakyaari. Riyotakoeyirini joriyyopaeni iriri rirotaki kaari joriyyo, ikanantariri Temoteeyo:

—Aririka pikowaki poyaatena pitotonatya pishiramparitantari, raakameethatanteeyemirini joriyyo.

Ikantziri:

—Ari.

Ari raanakiri, itothowawentanakari joriyyopaeni, jeekatsiri janta nampitskipaeni.

<sup>4</sup> Roojatzi ikinantanakari nampitskipaeni, riyotagaeyakirini maawaeni ikantayitzirini jerojareejatzi: riraga rotyaantanewo Jesoshi eejatzi aataper- teenchari aapatziyariri Jesoshi. Ikantzi:

—Aririka raapatzyakaari Jesoshi paashinijatzitsiripaeni atziri, eero akantziri: “Pipeyeeyani joriyyo”.

<sup>5</sup> Rootaki raapatzyakaaperotantakariri kameetha maawaeni aapatziyariri Jesoshi. Maawaeni kitejiripaeni eekiro ryaatatza roshekiper- otanakitzi aapatziyariri Jesoshi.

<sup>6</sup> Ikinanaki Jiriiyaki, Karaashiyaki. Tema okantzitakari Ishire Tajorentsi:

—Eero pikamanantzi janta Aashiyaki.

<sup>7</sup> Rareetaka Miishiyaki, ari ikowawitaka ryaatemi Witziiniyaki. Omaanta tee oshinetziri Ishire Tajorentsi.

<sup>8</sup> Ikinanaki Miishiyaki, roojatzi roerinkantanaka Toroowareki: ari noñaawakirini naari.

<sup>9</sup> Tsiteniriki imishitakiri Paaworo apaani masherooniyajatzi. Ikatziyimotapaakari, ikantaperotapaakiri:

—Pipoke jaka masherooniyaki, pamitakoeyakitenani.

<sup>10</sup> Roojatzi nokowantanaka tsika nokinantlyaari nareetantyaari masherooniyaki. Niyotanaki rotyaantakinä Tajorentsi janta nokamanantyaariri jeekatsiripaeni tsika ikanteeyaarini rawijakoeyan- teeyaarini.

### *Riyaatzi Paaworo Eyoroopaki*

<sup>11</sup> Janta Toroowareki noteteeyanakanpi pitsiki. Aakotanakina tampyaa Jamotowaashiyaki. Inkaamani eejatzi nowaaganaka Neyaaporishiki.

<sup>12</sup> Nowaganaka eejatzi Jiriposhiki. Rootaki jewatakaantzirori nampitsi Masheroonyawero. Inampitapaawo iroñaaka poñaachari Oroomaki. Ari nojeekaeyapaakini apaanipaeni kitejiri.

<sup>13</sup> Ari saawaroki noshitowanee omooki inkinagaakitzirori nampitsi, niyaatanaki janta othapyaakiini iñaa. Naamaapaakari aritaki janta ikenkithatakapiaintziri joriyopaei Tajorentsi. Nojeekapaaki, nokenkithatakapaaikiro tsinanipaeni piyoteenchari.

<sup>14</sup> Ojeeki apaani kemawakinari oetachari Rirya. Opoñaanaka paerani nampitsiki janta Tziyateeraki. Rootaki pinkathatakiriri Tajorentsi. Opiman-tapiintayitzironi tokoya kityonkaneeronkari. Raapatziyashiryaakaakawo Awinkatharite okaatzl okemawakiri ikantayitzirini Paaworo.

<sup>15</sup> Okaawoshitakotaki Tajorentsi, otsipateeyakarini maawaeni jeekatsiripaeni opankoki. Okantaperotakina:

—Piyotaakina nokemijantaperotziri Awinkatharite, piyaateeyeni nopankoki, pijeekimotakitenai.

Ari okowakaakina, rootaki nokanantakari:

—Thametya.

<sup>16</sup> Ari paashini kitejiri niyaateeyanakini janta ikenkithawaetakapiaintezirinta Tajorentsi. Otonkiyotawakina onampirentsi, riyyotakaero kamaari. Iyotashita, okenkithawaetakotzitawo oetarikapaeni tekiraatarika oñiiro. Rootaki raantayitarini osheki koriki riraga omperatawori. Ikantapiintziri atziri:

—Pikowakirika pikemero, pipinatena.

<sup>17</sup> Ari oyaateeyanakinani. Okaemanaki, okantzi:

—Irika shirampari, riroteeyakini aapatziyariri Tajorentsi, riraga jenokijatzipero. Ikamanteeyemini tsika pikantya pawijakotanteeyari.

<sup>18</sup> Aritaki okantapiintatyaaani maawaeni kitejiriki. Ijamapaakawo Paaworo, ipithokashitanakawo, ikantakiri kamaari:

—Riotaki Jesokirishito nokemijantziri, rootaki nakanantzimiri: pookaneero.

Roojatzi rookantanaawo.

<sup>19</sup> Roojatzi riytantanaka riraga omperatawori, ikantanaki:

—Tee okameethatzl; iroñaaka tekatsi akanteeya aanteeyari koriki.

Roojatzi raantakari Paaworo eejatzi Shiireshi, shepik. Inoshikanakiri nampitsiki, niyanki: janta ijekinta jewawentziroripaeni nampitsi.

<sup>20</sup> Raanakiri jewawentziroriki ikantapaakiri:

—Ikenkithashiryaakagaeyakinani maawaeni jeekatsiripaeni jaka anampiki. Tema joriyoi rirori.

<sup>21</sup> Ikamantakotziro iroka rametayitakarini rirori. Tee oshinetziro iroka, rowaga, rojankinatziri oroomajatzl. Tema aka ashenkateeyakarini oroomajatzl. Rootaki kaari okameethatanta akemijantawakiro ikantakaeri, eejatzi tee okameethatzl ametayityawoni.

<sup>22</sup> Ikijeyananakani maawaeni piyoteencharipaeni, roojatzi ikanantari komantaante:

—Paatonkoreeri iithaari Paaworoka, eejatzi Shiireshika; pipajamerikiteri.

<sup>23</sup> Osheki ipajaperotakiri, roojatzi romonkyaagantakari omonkyaagamentotsiki. Ikantaperotziri osheki riraga shentziriri:

—Kameethaga pishentaperoteri, ishiyakari.

<sup>24</sup> Ikemakiro iroka ikaminaaperotakiriri, romonkyaagaakiri. Eejatzi rawitayitzakiri iitziki, rawitatantakari inchakota.

<sup>25</sup> Niyankipaetenai tsiteniri, ari ramaneeeyirini Tajorentsi, romampaawaetawenteeyakarini. Ikemijanteeeyirini paashinipaeni romonkyaagayitzirini.

**26** Omapokashitanaka omoyekanaka kipatsi, eejatzi omoyekanaka pankotsi, tsikarika maawaeni otzinkampiaeni, moye, moye, moye. Intsipaete ashitareeyanakanani ashitakontsipaeni. Roojatzi awitaryaantanaka inchakota, rawitatanteetawitakariri iitzikira.

**27** Ipiriintanaka shentziriri. Iñaakiro ashitakontsi, ashitareeyanakanani. Itashiwitaka shiyeeyanakanani riraga romonkyaaganewopaeni, roojatzi raantanakawo ijawirite, roowiteenchami rowamashitanakyaami rirojatzi.

**28** Ari intspiaete ikaemakotanakiri Paaworo:

—Eero powamaashitaa eeroka. Roojatzi nojeekaeyini maawaeni jaka, tee noshiya.

**29** Ikantzi shentziriri ikantziri ronampiri:

—Pamakina ootamentotsi.

Ramakiniri, roojatzi ikyaanatanaka rirori janta roojotawitakarinta. Ropmetatanaka, rotziweroyimotapaakari Paaworo, eejatzi Shiirashi.

**30** Roojatzi raantanari inkokironta. Ikantziri:

—Iyotaantatsiri, ¿tsika nokantyaaka naari nawijakotanteeyari?

**31** Ikantawakiri:

—Paapatziyeeyarini Nowinkatharite Jesoshi, rowawijaakotanteemiri. Eejatzi ikimitagaeyani maawaeni pisheninka.

**32** Riyotaaperotziri iñaani Tajorentsi. Eejatzi isheninkapaeni rirori, riyota-gaeyirini.

**33** Aritaki tsiteniriki raantanakari riraga shentziriri, ikiwayiteerini iroka raawayaakirira ipajatakiri, roojatzi raawinantaari. Roojatzi ikaawoshitakontantaariri Tajorentsi, ikaateeyakirini maawaeni isheninka.

**34** Ari itsipatanakari rateetanaki ipankoki, rowakaapaakari. Raapatiyeeyarini Tajorentsi, rootaki ikimoshireeyantanakarini rirori eejatzi maawaeni isheninka.

**35** Ari okitejiityaanaki, riraga jewawentzirori nampsitsi rotyaantziri waariryaa:

—Piyyate omonkyaagamentotsiki, pikantakiteri shentziriri roeyowaeri apatziyariri Jesoshi.

Ari riyaataki, ikamantapaakiri shentziriri:

—Potyaanteeyeerini riyaateeta rirori.

**36** Roojatzi ikanantakari rirori:

—Ikantaana jewawentzirori nampsitsi notyaantaneemi. Iroñaaka pishitowanee, kameetha piyaatanaki.

**37** Omaanta ikantziri Paaworo:

—Tema eenitatsi nowaperite nokimitantariri oroomajatzi. Tee rojampitakowentena jewawentzirori, tee riyotzi eenirorika nantani. Ipajatakaantashitakina, eejatzi romonkyaagakaantashitakina. Tema ineyakinani maawaeni jeekatsiripaeni rowashironkaakina: iiteeyawitani eniro nantani. ¿Arima iroñaaka romanakiro roeyowakaantashitaana? Eerowa niyatza iroñaaka. Ipokeeta rirori, rirojatzitakya oeyowaatenani riyoteeyantyaarini atziripaeni tekatsi nante.

**38** Ari ipiyanaa waariryaa, ikamantapaeri. Riyotantakari jewawentzirori nampsitsi eenitatsi Paaworo iwaperite ikimitantariri oroomajatzi, ari ithaawaeyanakini.

**39** Ipokapaaki, kameetha ikenkithatakaapaakiri. Roojatzi roeyowaantapaari:

—Iroñaaka piyaatee, pookaneero nonampi.

**40** Ari ishitowanee, ikinanee opankoki Riiry. Iñaapaeri ayemijantzinkaritepaeni, ikantapaakiri:

—Kameethakya pijeekaeyeni.

Roojatzi rowaagantanaka paashiniki nampitsi.

## 17

### *Rareetapaaka Paaworo eejatzi Shiirashi Tejawoonikaki*

<sup>1</sup> Ikinakaanakiri Paaworo Ajiiporishiki, Aporooñaki, roojatzi rareetantaka Tejawoonikaki. Ari janta ojeeki ipiyotaantapiintarira Joriyo,

<sup>2</sup> roojatzi ikyaantapaaka. Aritaki ikantatyaa ri rametapiintawo ikenkithatakapiinteeeyirini joriyo. Okaatz 3 saawaro riyotagaeyirini okantayitzirini Iwaperite Tajorents.

<sup>3</sup> Ari riyotaaperotapaakiri. Roojatzi ikantziri:

—Aritaki okantzita Iwaperite Tajorents: “Ikemaatsitawakyaawoota ri-raga Rotyaantanewo Tajorents. Aritaki ikamaki, roojatzi ipiriinanteeya”. Riro nokamantakotziri Jesoshi, rirotaki Rotyaantanewo Tajorents.

<sup>4</sup> Raapatziyaperotawakari Jesoshi apaanipaeni kemijantziriri, roojatzi royaateeyantanakaririni Paaworo, eejatzi Shiirashi. Eejatzi ikimiteeyakani osheki kaari joriyotatsi, pinkathateriri Jesoshi eejatzi royaateeyanakirini Paaworo. Eejatzi okimitaka roori tsinan, isheninkapaeni jewatatsiripaeni. Aapatziyeyakarini Jesoshi. Rooripaeni osheki, tee apaanipaeni.

<sup>5</sup> Ari osheki ikijanaka joriyopaaeni, riraga kaari aapatziyarini Jesoshi; ipiyoteeyakirini antapiintziroripaeni kaari kameethatatsi, eejatzi perantziaeni. Ikijakagaeyakarini jeekatsiripaeni nampitsiki. Riyaateeyanakini ipankoki Jasoo, ikowaeyawitapaakarini Paaworo, eejatzi Shiirashi. Ikowawitaka raanakirimi janta ipiyoteeyakaninta atziri, ikijeeyerinimi.

<sup>6</sup> Tee iñaapaeri riroripaeni, omaanta inoshikashitanakari Jasoo, eejatzi apaanipaeni aapatziyariri Jesoshi. Raanakiri janta jewatatsiripaeniki nampitsi. Ikaemaeyapakini:

—Eeniro irika kijakaanteeyakiririni maawaeni jeekatsiripaeni maawaeni nampitsiki. Eeniro irika Jasoo aakameethatawakiriri.

<sup>7</sup> Ikaminaanteeyini aapatziyariri Jesoshi, ikantzi: “Eero pimonkaatziniri Seesari ikantzimiri. Eenitatsi paashini jewawenantatsiri, riraga Jesoshi: rirotaki pimonkaateniri rirori”.

<sup>8</sup> Ikemantawakawori iroka, ikijeeyanakani atziripaeni, eejatzi riraga jewatatsiripaeni nampitsi.

<sup>9</sup> Ikantanaki Jasoo, eejatzi paashinipaeni:

—Eeniroka koriki: pikempoyaanakinari piyotantenari eero noshiyapithatzimi, tekatsi nante. Otzimerika nantani, ari paaperoteriita noorikite.

### *Rareetaka Paaworo eejatzi Shiirashi Wereeyaki*

<sup>10</sup> Ikanta kemijantzinkaripaeni rotyaanteeri tsiteniriki riraga Paaworo eejatzi Shiirashi, ryaate Wereeyaki. Rareetantapaakari, roojatzi ryaatan-tapaaka ipiyotapiinanta joriyo.

<sup>11</sup> Irirapaani kameethaperoteentsiri, tee roshiyari riraga tejawoonikajatzi. Ikowaperotaki ikemijantero Iwaperite Tajorents. Ifaanatapiintziro maawaenai kitejiriki riyotantyaaari kyaaryooperorka iroka ikantakiriri.

<sup>12</sup> Oshekini raapatziyeyarini Jesoshi, joriyopaaeni eejatzi kireeshiyajatzi. Aapatziyari tsinanipaeni kaari joriyotatsi, rootaki isheninkapaeni pinkatharitatsiri, maawaenai. Eejatzi raapatziyari Jesoshi shiramparipaeni, tee apaanipaeni inta oshekyaantzi.

<sup>13</sup> Ari riyotaantziro Paaworo iñaani Tajorents janta Wereeyaki. Ike-makotakiri joriyotatsiri, riraga tejawoonikajatzi kaari aapatziyari Jesoshi. Ipokapaaki rirori, ikijakaapaakari atziri, ikantashiryakaakiri. Ikantziri:

—Eero pikemijanteeyirini Paaworo, inta pikijeyerini irira.

<sup>14</sup> Riraga aapatziyariri Jesoshi intsipaete rotyaantakiri Paaworo janta inkaareki. Omaanta irira jeekaneentsiri Shiirashi, itsipatanakari Temoteeyo.

<sup>15</sup> Eeniro aanakiriri Paaworo janta Ateenashiki. Ikantawaeri:

—Aririka pareeeteyya pinampiki, pikaemakaantapaenari Shiirashi eejatzi Temoteeyo ipokanakiita intsipaete.

Ari riyaatanaki, ikantakaantapaeri.

### *Rantayitapaakirini Paaworo janta Ateenashiki*

<sup>16</sup> Ari royaapaakiri Paaworo janta Ateenashiki. Rirotaki royeeyapaakirini Shiirashi eejatzi Temoteeyo. Iñaakiro janta nampsitsiki oshekini riwetsikashitayitarini iitajorentsitsashitayitarini, roojatzi rowashiretantaapaaka.

<sup>17</sup> Eejatzi janta osheki riyotagaeyirini joriiyopaeni eejatzi kaari joriyyotatsi: riraga pinkathateeyiririni Tajorentsi. Osheki riyotaawakagaeyakan. Eejatzi ikimitakaapiintakari maawaeni atziri janta nampsitsiki niyanki.

<sup>18</sup> Riyotaapaakiri kowapiintatsiri riyote oetarikapaeni, ikaateeyirini riyotaanewopaaeni Epekooreyo. Eejatzi ikaateeyirini oyaatzirori oetaka riyotaakiri riraga atziri ikanteetziri eshitokoeko. Riraga Paaworo ikamantakotziri Jesoshi ikamawentakae aaka, eejatzi ikantzi:

—Ipiriintee kamatsiripaeni.

Ikantzi apaanipaeni kemawakiriri:

—¿litaka ikantakiri irika ñaawaetashitachari?

Ikantzi paashini:

—Ikamantakotziri paashinijatzi tajorentsitsatsiri.

<sup>19</sup> Roerikakiri, raanakiri janta ipiyotapiinteeyaninta iiteetziri Areyoopawo, ikanteeyirini:

—¿Kameethama niyotero iroka pikantakiri? Nokowaeyini niyotero tsika okantakotari iroka.

<sup>20</sup> Tee nokemapiintziro iroka pikantakiri. Nokowaeyini niyotero oetaka kantakotachari.

<sup>21</sup> Aritaki ikantari ateenashijatzi: tee ithamaetzi, inta ikowaki ikemijantashityaari kenkithatakagaeyiririni owakiratatsiri apaanipaeni kaari ikemapiinteeyini. Eejatzi ikimiteeyani poñaacharipaeni inteea, ikenkithatakotashitayitawoni oetarikapaeni.

<sup>22</sup> Janta ikatziyaka Paaworo niyanki, ikantziri:

—Ateenashijatzi. Niyatotakimi eerori, ashi poyiro pikemijantaperoteeyawitaní.

<sup>23</sup> Janta nokinakinayitzininta noñaayitakironi iroka pikemijantashitayitarini. Eejatzi noñaapaakiro janta powapiintziniri pitajorentsite oetarikapaeni. Eeniro ojankinataka, okantzi: “Apinkathatantyaariri tajorentsitsatsiri kaari iyotakoetzi”. Riraga kaari piyotzi eeroka: pikemijantaperotashitari, rirotaki irika nokamantakotziri.

<sup>24</sup> Riraga Tajoarentsiperó, rirotaki wetsikirori kipatsi. Riwietsikaeyirini maawaeni jeekantaworipaeni. Rirotaki wetsikirori jenokinta eejatzi kipatsi. Tee ijekantawo rowaga pankotsi riwetsikiriri atziri.

<sup>25</sup> Inta aakakya, tekatsi akanteri etakotyaari. Teeroña ikoyiri etakotariri. Tema rirotaki owañaayiteerinipaeni, etakoteeyakaerini rirori. Tema rirotaki pakaerori maawaeni, oetarikapaeni.

<sup>26</sup> Apaani riwetsikawitaka paerani, rirotaki itakaworini; iroñaaka ashekiteeyanakini, athotyagaeyanakironi maawaeni kipatsipaeni. Rirotaki Tajoarentsiperó kantsisiri tsikarika ajeekaeyeni aaka maawaeni atziri, eejatzi tsikarika okaate othonkaeyantyaarini; rirotaki kantakaantzirori.

<sup>27</sup> Ijeekakagaeyakaeni akowantyaari ayoteeyerini, eejatzi añaanteeyaririni iinja. Omaanta tee rinteenatee.

<sup>28</sup> Rirotaki owañagaeyakaerini. Rirotaki shewatakaayiteerinipaeni. Rirotaki jeekakaayiteerin. Rooma aritaki ikantzitani atziri pashi paerani mam-paapiintachari: "Kyaaryo aakateeyakini ijeekakaani Tajorentsii".

<sup>29</sup> Aakateeyakinirika ijeekakaanipaeni Tajorentsii, tee okameethatzpikenkithashiryaaoteri Tajorentsipero roshiyari riwetsikanipaeni atziri: riwetsikaetziri ooro, peraata, mapi, oetarikapaeni. Ejatzi eero roshiyakaawentziri oetarika ikenkithashiryaaati atziri.

<sup>30-31</sup> Paerani tee riyotawitani achariniiteni, tekatsi ikanteri Tajorentsii ikijawenteri rantayitzirini. Omaanta riyotzi rirori tsika okaate ikan-takowenantyaariri maawaeni atziripaeni. Eenitatsi shirampari iitachari Jesoshi, ikamaperotawitaka. Roojatzi ipiriinantaari Tajorentsii, riyotanteeyaririni maawaeni atziri. Iitakiri rirori kantakowenantsatsiri. Linja ipiriinteeri atziri roojatzi kameetha ikantakowenteri. Rootaki ikananteeyaririni atziri iroñaaka: "Pikenkithashireeyanakyaaani, eero pikimita paerani, inta pameenteeyaarini Tajorentsipero". Aritaki ikanteevirini maawaeni atziri, tsikarika ijeekakagaeyirini.

Rootaki ikantakiriri Paaworo.

<sup>32</sup> Ikemanteeyawakaririni ikantzi: "Ari ipiriintanee kamawiteenchari", eenitatsi apaanipaeni shirontawentanakariri; omaanta ikantanakiri paashinipaeni:

—Inja papiiteenawo iroka eejatzi.

Roojatzi ryaatantanaa Paaworo.

<sup>33-34</sup> Ijeekagaantanaki aapatziyawakariri Jesoshi, roojatzi royaatantanakari rirori. Ita apaani aapatziyariri Jesoshi Ironishiyo: rirotaki jewatas-siri janta nampitsiki, ikaateeyirini ipinkathariiyini riyotaawakagaeyakan. Eejatzi okemijantzi tsinani oetachari Taamarishi. Ikaatziri eejatzi paashinipaeni aapatziyariri Jesoshi.

## 18

### *Riyotaantzi Paaworo janta Korintoki*

<sup>1</sup> Roojatzi rookanakiro Paaworo Ateenashi, rowaaganaa janta Korintoki.

<sup>2</sup> Janta iñaapaakiri joriiyotatsiri iitachari Akiirishi. Poontojatzi rinawita, ipoñaanaka iroñaaka Itaaryaki. Owakira rareetapaaka. Itsipatapaakawo iina, Pirishiira. Ro ipokantakari, riraga jewawenantatsiri iitachari Kiraaworyo ikijeeyakirini joriyyo jeekaeyawitacharini Oroomaki, rotyaanteeeyakirini:

—Piyaateeyeni paashiniki kipatsi, eero pijkeekaeinyi jaka.

Ari ijeekaeyapaakini Korintoki. Roojatzi rareetantapaaka Paaworo, ijeekimotapaakiri.

<sup>3</sup> Eejatzi ikimitawakagaeyakan, riyoteeyini rantziro kaawirawitzipankoriwetsikaetziro kaawirawitzi. Rootaki ijeekimotantapaakariri, itsipatawakaapaaka janta riwetsikaeyironi.

<sup>4</sup> Maawaeni saawaroki riyotaawakagaeyakawoni janta ipiyotaapiintanta joriyyopaeni. Raapatziyakaaperoeyakarini joriyyotatsiri, kaari joriyyotatsieejatzi.

<sup>5</sup> Ari ipoñaanaka masheroonyaki Shiirashi eejatzi Temoteeyo, rareetantapaaka jaka. Iñaapaakiri Paaworo, ikenkithatakaakiri rirori. Ikamantapi-intawitakari joriyyotatsiri:

—Rirotaki Jesoshi riraga Rotyaantanewo Tajorentsi aamagaeyarinipaerani.

**6** Omaanta ipiyathateeyawakarini joriyo eejatzi ikantzimaeyakirini, rootaki rotekimotantanaariri iithaari Paaworo riyoteeyantyaarini rootaki riyaatee. Ikantanakiri:

—Eerokatki jatashitachani janta paamariki kaari tsiwakanitatsini: tee afiiro nantani nashi naari, tema nokamantawitakimi. Iroñaaakaroña niyaatashteri irira paashinijatzitatsiri atziri, nokenkithatakagaeyerini.

**7** Ari ishitowanaki janta, ikinanakiro ipankoki Jooshito: rirotaki pinkatheri Tajorentsi. Itsipanampitawo pankotsi ipiyotantapiintarira.

**8** Riraga Kiriishipo rirotaki jewawentzirori janta ipiyotaantapiintari joriyopaeni. Kameetha raapatziyari Awinkatharite. Eejatzi ikimiteeyakani maawaenai jeekatsiripaeni ipankoki, raapatziyeeyarini Jesoshi. Eejatzi ikimitagaantaka osheki korintojatzi. Ikemawakiro iñaani Tajorentsi raapatziyap-erotawakawo roojatzi ikaawoshitakotanteeyakarini Tajorentsi.

**9** Ari paashini tsiteniriki kimitaka imishiwaetazzi Paaworo iñaashitakari riraga Awinkatharite, ikemakiri ikantziri:

—Eero pithayi. Eekiro piyaatatyee pikamanante, eero pimaeritzi.

**10** Kijokiro nowakimi. Jaka nampitsiki, tema ikaatzi osheki aapatziyanari. Tekatsi ikanteetemi rowashironkaetemi.

**11** Roojatzi ijekantanaka apaani ojarentsi, okyaawontsitapaaki eejatzi. Riyotagaeyakirini korintojatzi iñaani Tajorentsi.

**12** Ipinkathariwenantzi iroñaaaka Kariyooni akaayajatzi. Roojatzi joriyyopaeni ikijantanakari Paaworo. Raanakiri janta ijekinta iyotaawakaenchari.

**13** Ikantapaakiri:

—Irika shirampari, ikantajeempiyaakari atziri: "Paapatziyaperoeyaarini Tajorentsi", omaanta ikinakaashitakawo iñaani Tajorentsi.

**14** Roowitaneenchami iñaawaetanakimi Paaworo, ari riraga Kariyooni ikantziri joriyyotatsiri:

—Eeroka joriyyotatsiripaeni, pashiiryaakinani. Aririkami ranteromi irika kaari kameethatatsi, aririkami rowamaantemi, aritakimikya okameethatemi pamakirimi jaka naakaki.

**15** Iroñaaaka pikantawakaawentakawo iroka riyotaantziri. Pikantawakaawentashitakawo iwaeropaeni. Pikantawakaawentakawo Iwaperite Tajorentsi. Eerokaritya. Osheki pashiiryaakinani: eero pipokashitana.

**16** Piyaateeyaneeni.

Ari riyaateeyaneeni.

**17** Riraga kireeshiyajatzi raagaeyakirini Sooshiteneshi, shepik; ipajeeeyakirini, tak, tak. Riraga pajatakiriri rirotaki jewawentzirori janta ipiyoteeyantarintia joriyyopaeni. Iñaakotawitakari Kariyooni ipajeeeyakirini, omaanta tekatsi otzikaakotanakyaarini, tekatsi ikanteeyerini.

**18** Osheki kitejiri ijekanaki Paaworo, roojatzi ipiyanta, rookaneeri ayemijantzinkaritepaeni. Rotetapaaka pitotsiki, aakotanakiri tampyaa Shiiryaki, ikantanaka, jakiririri. Itsipatanakawo Pirishiira eejatzi oemi, Akiirishi. Eeniro ikashiyakaakiriri Paaworo Tajorentsi, rootaki rameetantawori iishi maawaenai janta Shinkereeyaki.

**19** Rareeteeeyantapaakarini Ejeesoki. Riyaatantanaari Paaworo, ari rookaneeri itsipatarini. Omaanta tekirani riyaateeni apaniroeni riyaatapanaaatzi ipiyotapiinanta joriyo, ikenkithatakapakiri.

**20** Ikanteeyawitawakarini:

—Ojamanitanakiita pijekanaki, piyotagaeyanakinaniita. Omaanta tee ikoyi rirori.

**21** Ikantanakiri:

—Osheki nothaankitee ironaaka; omaanta aririka ikowakaakina Tajorentsi, nopyiee iinja.

Roojatzi rotetantanaa eejatzi pitotsiki, aakotanakiri tampyaa, ikantanaka eejatzi jakiriristi.

<sup>22</sup> Rareetapaaka Sesareeyaki, roojatzi rowaagantanaka Jerojareeki, rareetapaakari ayemijantzinkaritepaeni jaga. Roojatzi rowaaganaa eejatzi Antyokiyyaki, ipoñaanakanta paerani.

### *Ikinayitakini Paaworo tres-tapaentsiri*

<sup>23</sup> Ojamani ijekananaki Paaworo Antyokiyyaki. Ari rapiiteero eejatzi. Ikinakinayitanakini Karaashiyaki, eejatzi Jiriiyyaki. Riyotaaperoeyakirini maawaeni aapatziyariri Jesoshi.

<sup>24</sup> Rareetaka Ejeesoki joriyyo iitachari Apooro, rirotaki arejanteriyyajatzi. Kameetha ikenkithatapiintzi, rirotantaperotziro Iwaperite Tajorentsi.

<sup>25</sup> Ikamanteetziri tsika ikantani Jowani, eejatzi tsika okantari maawaeni ikenkithatakotzirini Jesoshi, omaanta tekira ikemakoperotziro maawaeni rantayitzirini rirori. Ithotyaaperotakiro riyotaantziro maawaeni riyotayitawitarini.

<sup>26</sup> Ari ikenkithatakotaperotziro janta pankotsiki ipiyoteeyantararinira. Tee ithaayi, kameetha ikenkithatzi. Ikemantawakari Akiirishi, eejatzi Pirishiira, ikantziri Apooro:

—Nokowaki nokenkithatakayemi eechonkiini.

Ikantzi:

—Ajaaty.

Ari eechonkiini ithotyaakiniri, riyotagaeyakirini tsika ikantari Jesoshi, eejatzi tsika akanteeyarini aatanteeyarini janta Tajorentsi.

<sup>27</sup> Roojatzi ikantziri Apooro aapatziyariripaeni Jesoshi:

—Nokowaki niyaate iroñaaka Akaayaki, niyotagaeyerini jeekayitatsirini janta.

Ari ikanteeyawakirini:

—Kameethataki piyaate, piyotagaeyerini kameetha. Ajaa, jankinarentsi pagaeyanakinirini.

Iroka rojankinatawakiniriri iyemijantzinkarite janta: “Paakameethateeyawakiriniroña Apooro, pikemijanteeyawakirin”.

Ari paerani ineshironkatzikari Tajorentsi akaayajatzi, rootaki raap-atziyanteeyakaririni Jesoshi. Iroñaaka, rareetantakari Apooro, osheki retakoeyapaakarini.

<sup>28</sup> Riyotaaperotakiro riyotaperotantaari. Ikemaeyakirini atziri riyotaanta-perotziro Iwaperite Tajorentsi, ikantzi:

—Riotaki Jesoshi okenkithatakotziri Iwaperite Tajorentsi, rirotaki irira Rotyaantanewo Tajorentsi.

## 19

### *Riyaataki Paaworo Ejeesoki*

<sup>1</sup> Ijeekantakari Apooro Korintoki, riraga Paaworo ikinanaki tonkaarikipaeni, rareetapaaka Ejeesoki. Inaapaakiri apaanipaeni aapatziyariri Jesoshi.

<sup>2</sup> Ikantapaakiri:

—Paerani paapatziyeeyantakaririni Jesoshi, ḡokithatakaakimima Ishire Tajorentsi?

—Tee. Tee nokemakoneentziro roori.

<sup>3</sup> —Ɂlitakakyā pikaawoshitawentari?

—Nokaawoshitawentari Jowa.

**4 Ari ikantziri Paaworo:**

—Aririka ikenkithashiryaanakya atziri, rookaero kaari kameethatatsi rantziri, ari ikaawoshitakiri Jowa riyotantyaariri atziri tee ikoyi rapiitapi-intero kaari kameethatatsiri, inta ikowaki raapatziyaperotaari Tajorents. Tema eejatzi ikantzitarini: “Paapatziyeeyaarini riraga impaetapaenani, rirotaki Jesoshi”.

**5 Ikemanteeyawakaworini iroka, ikaawoshitawenteeyanakarini Awinkatharite Jesoshi.**

**6 Paaworo rowakiniri rako iitokipaeni aapatziyariri, roojatzi opokashitan-takariri Ishire Tajorents, iñaawaetanteeyanakawoni paashinipaeni paantentsi, kaari riyoteeyini.**

**7 Aamaashitya ikaateeyini 12 shirampari kaawoshitawenteeyakaririni Jesoshi.**

**8 Ari riyaatapiintzi Paaworo pankotsiki ipiyotantari joriyyopaeni, ikaatzi 3 kashiri ikenkithatakaantayitakini. Tee añaari thañaakotyaarini. Osheki ika-mantakotakiri Tajorents, tsika ikanta ikantakowenantzi. Roojatzi osheki riyotaawakagaeyakan.**

**9 Apaanipaeni, tee añairo ikenkithashiryaaantari, tee ikoyi ikemijante. Ikan-teeyirini riraga atziripaeni:**

—Tee okameethatzi iroka riyotaantziri Paaworo.

Roojatzi rookantanaari Paaworo, raanakiri aapatziyariripaeni Jesoshi. Ikenkithatakaapiintziri maawaeni kitejiri janta riyotaantapiintzinta Tzi-raano.

**10 Okaatzi apite ojarentsi riyotaantapiintzi, rootaki ikemantakawori maawaeni aashiyajatzi iñaani Awinkatharite. Ikemaeyakironi: joriyyopaeni, kaari joriyyotatsi, maawaeni.**

**11 Itajonkantayitzini Paaworo, imatantawori kaari añaapiintzi. Rirotaki matakaeriri osheki Tajorents.**

**12 Ipampitzitziri atziri iwañaerote Paaworo, eejatzi ipewiryakotaga roojatzi raanakiro paashinikipaeni mantsiyatzinkarikipaeninta inteenanta rootaki etsiyatakotakaakiriri. Eejatzi rowawijaakoteree kyaantariri kamaari.**

**13-14 Eeniyo janta joriyyo, kinakinayitatsirini, owawijaakotapiintawitariri kyaantariri kamaari: riroteeyakini itomipaeni Esheewa, ikaateeyini 7. Esheewa rirotaki joriyyo, isheninkatakari jewawenantatsiri ñaanakowenantsirsipaeni. Ifleeyawitakarini Paaworo rowawijaakotziri kyaantariri kamaari. Ikowaeyawitani ikimityaarimi, ikantashitantariri paashini kamaari:**

—Eeniyo Jesoshitatsiri ikenkithatakotziri Paaworo. Rirotaki amitakotanari nowawijaakoteri irika kyaantzimiri. Pookaneeri, atama pijekantakari.

**15 Rakanakiri kamaari:**

—Noñiiri Jesoshi. Noñiiri Paaworo. Rooma eeroka, tee niyotzimi. ¿litaka nokemijanantemiri?

**16 Roojatzi ijapokashitantanakariri kyaantariri kamaari, japok, japok; rantawakiri riroripaeni ranaakoeyawakirini. Roojatzi ishiyamerikiyanakani, rookanakiro pankotsi. Osheki rowsatsinaakiri.**

**17 Ikemakoejakirini maawaeni ejeesojatzi: joriyyo, kaari joriyyotatsini, maawaeni. Ithaawaeyanakini eejatzi ikanteeyakini:**

—Ikameethatzi Awinkatharite Jesoshi: imatakaeri aapatziyaperotariri rowawijaakotziri kyaantariri kamaari. Omaanta kantakaaperotawori, tekatsi matakayerini.

**18 Roojatzi ipokapaaki osheki aapatziyariri Jesoshi, ikanteeyapaakini:**

—Eeniro nantayitzironi kaari kameethatatsi, tee nokoyi napiitero, inta nokowaki rowameethatena Tajorentsi.

<sup>19</sup> Osheki sheripiyaritatsiri ramayitakironi jankinarentsi rashitayitarini: rotootai iyoteeripaeni isheripiyaritantarri. Ipiyoteeyakironi, roojatzi itayimotantakari maawaeni atziri. Ikanteeyini:

—Tee nokoyi namatawiteeyeerini eejatzi natziritzinkaritepaeni.

Imonkaateeyakironi owinawo jankinarentsi, opineeyakan S./11.000.000.

<sup>20</sup> Osheki ikinakayitanakironi iñaani Awinkatharite, eejatzi ijeeki osheki aapatziyeyaworini.

<sup>21</sup> Roojatzi roshiretantakawo Paaworo ryaate Jerojareeki, roojatzi ryaatantanaka. Ikinanaki Masherooniyaki, eejatzi janta Akaayaki. Ikantzitaka:

—Nitanakyaawo niyaate Jerojareeki, roojatzi niyaatanaki Oroomaki.

<sup>22</sup> Rotyaantaki apite amitakotapiintziriri masherooniyajatzipaeni: riraga Temoteeyo, eejatzi Eraashito. Rirori Paaworo, ojamani ijeekanaki janta Aashiyaki.

### *Ikijeeyanakan ejeesojatz*

<sup>23</sup> Tee iroñaaka eechonkiini ikantawakawentyaawo iroka akamantakotakiriri Awinkatharite.

<sup>24</sup> Ijeekinta wetsikapiintzirori peraata iitachari Rimiiteyo. Roshiyakawentapiintziro opanko Aretemija ikemijantapiinteyantaworini atziripaeni. Rowaga Aretemija rootaki iitajorentsiteeyirini. Eeniro riraga amitakotziriri, wetsikapiintziniriri rowaga oshiyakaantsi opanko Aretemija; ari ipinatapiintziri osheki peraata, ragaeyantarini osheki koriki. Omaanta tee iroñaaka ramananteero aapatziyariri Jesoshi, roojatzi ikenkithashiryaantanaka Rimiiteyo.

<sup>25</sup> Rootaki ipiyoteeeyantakaririni maawaeni atziripaeni, ikanteeyirini:

—Antapiinteeeyirorini iroka oshiyakaantsi agaeyantarini ayorikite osheki.

<sup>26</sup> Iroñaaka piñaakiri Paaworo, eejatzi pikemakotakiri: ramatawiteeyirini osheki atziri, ipaashinitezeyantaaririni asherinkapaeni. Ikantzi: “Riraga Tajorentsiperako iroka riwetsikayitzirini atziri”. Tee apatziro riyotaante jaka: rootenteens ithotyeero Aashiyaki riyotaantayiteni.

<sup>27</sup> Itheenkayyanakaenikari maawaeni atziri, eejatzi itheenkanakirokari maawaeni awetsikaeyakirini. Tema opinkathawoperotzi Aretemija: raa-patziyeyawitakawoni maawaeni aashiyajatzi, eejatzi maawaeni atziri. Ipinkathateeyawitawoni iroñaaka, omaanta raapatziyeyantaririni Paaworo, rookaeyaneeroni raapatziyawowa roori.

<sup>28</sup> Ikemanteeyawakaworini iroka, ikijeeyanakan. Ikaemaeyanakini:

—Opinkathawotaperotzi Aretemijaka, iroka pinkathariwenteeyiririni ejeesojatz.

<sup>29</sup> Ikaemaeyanakini jeekatsiripaeni nampitsiki. Ishiyeyanakan maawaeni janta rantawaetapiinteeeyininta. Inoshikaeyanakirini Kaayo, Arishitaariko, jererere. Irira rirotaki masherooniyajatz apite, tsipatapiinttariri Paaworo.

<sup>30</sup> Ikowawita Paaworo royaatakowentanakirimi janta, omaanta tee ishinetziri aapatziyariri Jesoshi.

<sup>31</sup> Eeniro ijeeki eejatzi apaanipaeni jewatatsiri, poñaachari Aashiyaki, nin-taperotziriri Paaworo. Rotyaantziri iyemijantzinkarite kantapaakiriri:

—Eerowa poyaatziri janta rowamaemikari.

<sup>32</sup> Ikaemaeyanakini piyoteencharipaeni, inashitayitakani ikantayitzirini. Ikaemashiteeyanakan. Omaanta tee riyoteeyini osheki atziri oetarika ipiyotawentari.

<sup>33</sup> Eenitatsi janta Arejaantero, rotyaantani joriyo, rojatekakiri niyanki. Itzinaapaakiri rako rirori, riyotantyaari ikwaki ikenkithatakagaeyerinimi.

<sup>34</sup> Omaanta riyoteeyantakarini irira joriyo, ojamanitanaki ikaemapiinteenyanakin maawaeni:

—Opinkathawoperotzi Aretemijja, iroka pinkathawowentziriri ejeesojatzi.

Roojatzi ishirinkakotantanaka oorya.

<sup>35</sup> Romaeryagaeyakirini riraga jankinatapiintatsiri janta nampitsiki. Roojatzi ikanteeeyirini:

—Natziritzinkaritepaeni. Tema aakateeyakini ñaaperoeyirorini Aretemijja, eejatzi ashentapiintziniro opango. Tema eejatzi ashentapiintziniro iroka oshiyakawori, pariyapaentsiri jenoki. Ayoteeyanakironi iroka,

<sup>36</sup> tekatsi kantatsini tee kyaaryoopero iroka nokantakiri. Kameetha iroñaaka pimaeriteeyanakini. Eero pishintsitzi panteri irika shirampari-paena.

<sup>37</sup> Irika pamakiri, tekatsi ikantero opango, eejatzi tee ikantzimatziro atajorentsite.

<sup>38</sup> Eeniropaatzi irika Rimiiteyo, ikaateeyirini paashini antzirori peraata. Ikwakirika ikantakotante apaani, kameetha raaneeri janta kantakotantsiriki, roojatzi riyotaawakagaeyani janta. Intsipaete riyaatanaki janta ikantakowentawakaya.

<sup>39</sup> Eenitatsirika paashini pikowakiri piyoteri, ari pikanteri iinja riraga iyotaawakaachari, ipiyyoteeyakanira.

<sup>40</sup> Jaka iroñaaka apiyoteeyakani, akijathatakagaeyakan. Ikantakotashiteekari akijeeyakirini awinkatharite, roojatzi tekatsi akantya akan-takowenteeyaa aaka.

<sup>41</sup> Ikanantawori iroka, rotyaanteeyeerini maawaeni piyoteencharipaeni:

—Iroñaaka, pipitsimaryagaeyaneeni, piyaateeyeni pipankokipaeni.

## 20

### *Riyaatanaki Paaworo Jerojareeki*

<sup>1</sup> Ari imaeeriiyanakin ejeesojatzi. Roojatzi rirori Paaworo ikaemaeyirini aapatziyeeyaririni Jesoshi, riyotaaperoeyirini. Roojatzi ryaatanee, rowaaganaa Masherooniyaki.

<sup>2</sup> Janta osheki ikinakinayitanakini, osheki riyotaantayitanakini. Roojatzi rareetantanaka Kireeshiyaki.

<sup>3</sup> Ikaatzi 3 kashiri ijekapaaki. Rooteentsi rotetyaawomi pitotsi ryaatantyaarimi Shiiryaki. Roojatzi riyotakotantakariri joriyo rajaryaawitakari rowamaerimi. Roojatzi ikenkithashiryaantanaka:

—Nopiyaneeta janta Masherooniyaki.

<sup>4</sup> Ari ryaatanaki, ikaateeyanakini Soopateri itomi Piilo rirotaki wereeyajatzi; Arishitaarik eejatzi irira Sekoonto rirotaki tejawoonikajatzi; Kaayo rirotaki teeriwijatzi; Temoteeyo; Teekiko, eejatzi Toroojimo rirotaki aashiyajatzi, maawaeni.

<sup>5</sup> Reewateeyanakinani Toroowareki, royagaeyakinani janta.

<sup>6</sup> Awijanaki kitejiri rowanteetiapiintawori paa kaari tapiyacha, roojatzi nopoñaanaa Jiriposhiki, nokinakotanaki pitotsiki. Okaatzi<sup>5</sup> kitejiri nareetantaari Toroowareki, janta ijekinta oyeeeyakinanini. Roojatzi nojeeekanta-paaka okaatzi 7 kitejiri.

<sup>7</sup> Otominkotapaaki. Nopiyoteeyakani nakiyoteeyantawakaakan iowanawontsi nokenkithashiryaanttaririni Jesoshi ikamawenteeyakaeni. Ikenkithatakagaeyakinani Paaworo. Roshiretakawo ryaate inkaamani,

rootaki rojamanitantanakawori ikenkithatanaki, wero, wero. Roojatzi niyankiiteni tsiteniri.

<sup>8</sup> Ijeeki oshekini ootamentotsi janta nopyoteeyakaninta. Ro nopyoteeyantakarini shitamenkotsi irona jeñokiininta.

<sup>9</sup> Ijeekaki omooki riraga ewankari iitachari Eyoteeko. Ojamani ikenkithataki Paaworo, rootaki aantapaakariri iwochokini. Roojatzi ipariyantanaka: ikinateenaki, sherooo, roojatzi jaawiki ompojateepaaka, tereei, janta kipatsiki. Ari nayiitashiiyanakirini, itzinaawitapaakari; irira kamapaaki.

<sup>10</sup> Ari ranashitashitapaakari Paaworo rirori. Imaechopineetapaakiri, rawithakiperotapaakiri. Ikantzi:

—Eero powashiretakotari: irika añaagae.

Ari ipiriintanaa.

<sup>11</sup> Ari nateeteeyaneeni, ikagaapaakiro Paaworo paa, nowaeyakawoni nokenkithashiryaanakari Jesoshi riraga kamawentakaeri. Ikenkithataka-gaeri, roojatzi okitejitantanaka. Roojatzi riyaatantanaa.

<sup>12</sup> Ragaetaneeri ewankari ipankoki, añaanee. Tee eechonkiini riweshireeyananakani.

<sup>13</sup> Neewatakotanaki pitotsiki, nokinakotanaki nokowaki noonthagaeyari Paaworo Ashooki; tema irira ikinanaki awotsiki.

<sup>14</sup> Ari iñaapaana Ashooki, roojatzi notetantanaariri pitotsiki. Nowaa-gaeyanaani Mitereeneki, nokantanaka, jakiririri.

<sup>15</sup> Inkaamani nowaaganaa eejatzi. Nomontenampitanakawo Kiiyo. Paashini kitejiri, roojatzi janta Saamoshiki. Roojatzi paashini kitejiri nareetapaaka Mireetoki.

<sup>16</sup> Ikenkithashiryaaka Paaworo rawijitanakyaawo Ejeeso, eero rojamanitapae Aashiyaki. Ikowaperotaki rareetziteeya Jerojareeki, roonthaantapaeyawori kitejiri oetachari Pentekoshiteshi.

### *Ikenkithatakayiri Paaworo ejeesojatzi*

<sup>17</sup> Rotyaantaki Ejeesoki, ikaemakaantakiri aataperoteenchari aapatziyariripaeni Jesoshi janta.

<sup>18</sup> Ari rareeteeyapaakani ejeesojatzi, roojatzi ikanteeyantawakarini:

—Piyotakoperotakina tsika nokantari nojeekimotanteeyakimirini. Owakirani nareetaka Aashiyaki, aritaki nokantzitapaaka, roojatzitatisi iroñaaka.

<sup>19</sup> Janta osheki nantawaetapiintziniri Awinkatharite, teekya ro nokantakaaperotya. Niraakotapiintakimi. Eejatzi okantzimoneentakina janta rajaryaawitakina nojoriyyotzinkaritepaeni rowamagaeyenanimi.

<sup>20</sup> Nothotaakiro, tema aritaki nokanteeyakimironi maawaeni iroka kameethatatsiripaeni. Tee nomaeaeritashita. Niyotagaeyimini janta ipyoteeyakaninta atziripaeni eejatzi janta pipankokipaeni.

<sup>21</sup> Nokanteeyirini joriiyo, kaari joriiyotatsiri, maawaeni: "Pikenkithashiryaagaeya piyoteeyantayaaririni Tajorentsi. Paapatziyari Nowinkatharite Jesokirishito".

<sup>22</sup> Ari iroñaaka niyaate Jerojareeki, iyaatakaanakina Ishire Tajorentsi. Tee niyotzi tsikarika ikanteetenira janta.

<sup>23</sup> Apatziro niyotakiro iroka okantakinari Ishire Tajorentsi. Maawaeni nampitsiki okantapiintana: "Kyaaryo roojoteetemi, rowashironkagaetemi".

<sup>24</sup> Omaanta tee nokowaperotzi nokanteetatyeyaaani nojeeki jika kipatsiki, intakya nokowaperotaki nomateniri Awinkatharite Jesoshi oetarika

ikowakaakinari. Eejatzi nokowaperotaki nothotyeeniri iroka nantawae-tapiintziniriri. Okameethatzi iroka nokamantapiinteeeyimirini: "Ineshironkateeyakaeni Tajorentsi".

**25** Niyotaki iroñaaka eero añaawakagaa ejatzi. Nokaateeyawitakimini, nokamantteeyakimironi tsika ikantari Tajorentsi reewawenantzi.

**26** Rootaki iroñaaka nokamanantzimiori iroka. Aririka rowashironkagaantem i Tajorentsi, tee naaka owashironkaakaantzimini: tema nokamantzitakimini paerani.

**27** Tee nothaayi, nothotyakimiro maawaeni ikantayitzirini Tajorentsi. Rootaki ikanteeyiririni Paaworo.

**28** Eenirop iroka ikanteeyiririni ejatzi:

—Kyaaryoowa, paakowenteeyerini piyemijantzinkarite janta. Tema eerokateeyakini iyoyaani Ishire Tajorentsi, paminakowenteri maawaeni aapatziyariripaeni Jesoshi, petakoeyaarini. Tema riroteeyakini rowawi-jaakoeyakirini Jesoshi, ikamawenteeyakirini, apaatawenteeyakarini riraa.

**29** Iinja, niyaatanerika, ipokashitemi amatawitemini: noshiyakaawen-takiri katsimatatsiri. Eero ipeyakotzimi, ikowaki rowashironkaemi. Niyotakiro iroka.

**30** Eenitatis jaka pikaateeyawitanika kenkithatakawitemini, omaanta eero otampsikataperotzi riyotagaeyemini. Rookakaemirikari piyemijantzinkarite, royaafantyaariri rirori.

**31** Kyaaryoowa, pikenkithashireperotero. Okaatakira 3 ojarentsi niyotaapiintakimi. Nokantatyeyaan: tsiteniriki, kitejiriki. Eejatzi niraako-tapiintakimi.

**32** Nokantziri Awinkatharite: "Paminakowenteeyerini ejeesojatzi, ee-jatzi pamitakoteri raapatziyawo piñaani". Aritaki omataka iñaani aapatziyakaaperotakimi, owawijaakoeyakimini. Tema pikaateeyirini aapatziy-eyekaririni Jesoshi riyogaeyakirini.

**33** Tee noñaawenatzitar iyorikite paashini atziri. Tee noñaawenatzitar iithaari.

**34** Piyoteeyakini naakakya antawaetantacha, naantari oetarika koety-eemotanari, ejatzi netakoeyakarini notsipateeyarin.

**35** Nomayitakironi maawaeni iroka piyoteeyantyaarini eerori petakotanteeyaririni paashinipaeni. Pikimiteeyenani naari, pantawaetaperoteeyeni, petakotanteeyaaririni owashironkaachari. Pikenkithashireero iñaani Awinkatharite Jesoshi, ikantzitarini: "Ro kameethaperotatsiri apashitantlya. Tee apatziro okameethatzi aashityaawo oetarika ipashiteeteeri".

**36** Rootaki ikanteeyakiririni Paaworo irira. Roojatzi rotziwerowanaka, ikateeyirini ejeesojatzi maawaeni, ikenkithatakagaeyirini Tajorentsi.

**37** Riragaeyanakan maawaeni. Rawithakiteeyawaerini, riwethateeyawaarini.

**38** Rowashiretakoeyanakarini ikemakirira ikantaneeriri: "Eero piñagaana ejatzi". Rookaeyawaerini janta pitotsiki, raminawaeri riyaatee.

## 21

### *Eekiro rowaagatya Paaworo*

**1** Roojatzinookaeyantanaarini aapatziyakaaperoeyaririni ejeesojatzi. Noteteeyanakan pitotsiki, tampatsika nokinakotanaki Kooshiki, nokantanaka jakiririri. Inkaamani nowaaganaa Roorashiki, roojatzi nowaagantanaa Paataraki.

<sup>2</sup> Noñaapaakiro janta pitotsi poñagaenchari Jeniishiyaki. Notetapaaka, nokinakanotanaki.

<sup>3</sup> Noñaantanakawori Cheepere, nokinanampitanakiro nampateki. Nanaanakiro, roojatzi Shiiryaki, naatakotapaaka Tziiroki. Janta nampitsiki royiitanakiro marineero owaagwontsi.

<sup>4</sup> Nokowayitapaakirini naari aapatziyariri Jesoshi. Noñaantapaakariri, nojeekimotapaakiri 7 kiteziri. Iyotagaeyakirini Ishire Tajorentsi, ikanteeyantaririni Paaworo:

—Eero piyaatzi Jerojareeki: rowashironkagaetawakimikari.

Omaanta tee ikemijantziri Paaworo.

<sup>5</sup> Ari omonkaataa notetantanaari eejatzi niyaateeyaneeni. Itsipateeyanakinani aapatziyariripaeni Jesoshi roojatzi othonkapaakanta nampitsi, janta othapyaaki, namaneeyakirini Tajorentsi. Roojatzi niwethawakagaeyanaani.

<sup>6</sup> Notetanaawo pitotsi, ari ipiyeeyanaani rirori ipankokipaeni.

<sup>7</sup> Ari nopoñaanaka Tziiroki, nokinakanotanaki, nowaaganaa eejatzi Toremraeki. Nareetapaakari ayemijantzinkarite niwethatapaakari. Apaani nomaaiki.

<sup>8</sup> Inkaamani nowaaganaa eejatzi. Nareetantapaakari Sesareeyaki, nareetapaakari Jiripi, riraga iyotaantatsiri. Aritaki ikaateeyirini riraga sietetatsiri paerani, payitzirorini owanawoni kamayiteentsirini oemini. Ari osheki nojeekimotapaakiri.

<sup>9</sup> Enitatsi rirori rishinto okaatzi 4, jeekashitachari; okamananteeyini roori Iñaani Tajorentsi.

<sup>10</sup> Osheki nomaanaki. Ari rareetapaaka kamanantzirorini iñaani Tajorentsi iitachari Akaawo, ipoñaanaka rirori Joreeyaki.

<sup>11</sup> Ipokashitapaakina, raapaakiro roojothakitaru Paaworo. Rirojatzi oojo-tashifeenchari iitziki, rakoki. Ikantzi:

—Aritaki okantzi Ishire Tajorentsi: “Eejatzi ikimiteetakiri paata riraga ashitaworika roojothakiro. Roojoteri joriiyopaeni, riraga jerojareejatzi: shirik, shirik. Iperi kaari yotziri Tajorentsi, raanakiri”.

<sup>12</sup> Nokemantawakawori iroka, nokaateeyakirini maawaeni kemijantzinkaripaeni janta, nokanteeyawitarini Paaworo:

—Eero piyaatzi Jerojareeki.

<sup>13</sup> Rakanakina:

—¿litaka piraantari? ¿litaka pikantashiryakaantanari? Tema naaka aapatziyaperotariri Awinkatharite Jesoshi. Roojoteetenataa janta Jerojareeki, rowamagaetenataa: tee nothaawantari.

<sup>14</sup> Tee ikemijantana, roojatzi nomeritantanaka. Nokanteeyini:

—Omawitya oetarika ikowakayimiri Awinkatharite.

### *Rareeteeyanakanji Jerojareeki*

<sup>15</sup> Roojatzi niwethateeyanaarini sesareeyajatzi, nokinanee tonkaariki, niyaatantyaari Jerojareeki.

<sup>16</sup> Itsipateeyanakinani apaanipaeni aapatziyariri Jesoshi, rirotaki sesareeyajatzi. Raanakina janta ipankoki Marashoo, riraga cheeperejatzi: rirotaki itakaantawori aapatziyariri Jesoshi. Nomayimotapaakiri rirori.

<sup>17</sup> Nareetantapaakari Jerojareeki, raakameethateeyawakinani ayemijantzinkarite, ikimoshirewentawakina.

<sup>18</sup> Okitejitanaki rareetakayenari Paaworo Jantyaako, noyaatanakiri naari. Janta ipiyeeyakaninta maawaeni aataperoteenchari aapatziyariripaeni Jesoshi.

**19** Niwethatawakagaeyakan, roojatzi ithotyaakiniri Paaworo, ikenkithataakaapaakiri:

—Rotyaantakina Tajorentsi nokenkithatakagaeyirini oshekini paashinijatzitatsiri atziri. Ikaateeyini osheki aapatziyeyakaririni Jesoshi.

**20** Ikemantawakawori, ikanteeyini:

—Tajorentsi rirotaki kameethari.

Roojatzi ikanteeyirini:

—Pamine, Paaworo, amonkaatawakagaeyakan aapatziyeyarin Jesokirishito. Raapatziyeyakarini oshekiperoroña ajoriyyotzinkaritepaeni, omaanta eejatzi ikemijantaperoteeyakironi rojankinatzirini Moeseeshi.

**21** Osheki ikemakoeyakironi pikantziriri ajoriyyotzinkaritepaeni, jeekimotziriri paashinijatzitatsiri atziri: “Pookero rojankinarini Moeseeshi. Eero pitothowaeyirini pitomi. Pookaeyeeroni iroka ameteeyawitarini aari”.

**22** ¿Tsika pikantyaari? Aritaki ikemakoeyakimini, areetapaakimini: iki-jeeyawakimi.

**23** Pikemijantero iroka nokantemiri: eeniroka paashinijatzi shirampari, enitatisi ikashiyakaakiriri Tajorentsi.

**24** Paaneeri maawaeni rirori Tajorentsipankoki, pikanteri Tajorentsi rowameethatanteeyemirini. Pipinateniri irikapaeni oetarika, rameetantyaawori iishi. Roojatzi riyoteeyantanakyaarini ajoriyyotzinkaritepaeni tee kyaaryoopero iroka ikemakotakimir. Riyotanaki pimonkaatakiro Iwaperite Tajorentsi rojankinatataakkiriri paerani Moeseeshi.

**25** Omaanta riraga paashinijatzitatsiri atziri, riraga aapatziyariri Jesoshi: nopakaantakiri rirori jankinarentsi. Eeniro iroka nokantakiriri: “Eero powayitarini iwatha rowetakinirori riwetsikaetziniri, kaari Tajorentsi. Eero powakotawo riraa iwathakira. Pityawo pookero riraa ari poyaawo iwathapero. Eero powari shirkachari. Eero piñaaminthatziro tsinani kaari payi”. Romonkyaagaetakiri Paaworo.

**26** Ari ikemijantakiri Paaworo. Okitejitanaki raanakiri ewankaripaeni, ikanteeyakirini rowameethatantyaariri, eejatzi ikyeeyapaakini Tajorentsipankoki. Ikanataapakiri janta:

—Okaate <sup>7</sup> kitejiri nomonkaatantakyaawori nanteeyerini rowameethatantenari Tajorentsi. Roojatzi nowamayeniri piratsipaeni, notayeniri.

**27** Roowiteencha omonkaatyamaami 7 kitejiri. Ifñeeyakirini janta Tajorentsipankoki joriiyopaeni, poñaachari Aashiyaki. Ikijakaakari piyoteencharipaeni, roojatzi ragaeyakirini Paaworo, shepik.

**28** Ikaemaeyanakini:

—Nojoriyyotzinkarite, pamitakoeyenani. Rirotaki irika kinakinatatsiri maawaeniki nampsiti amatawiteeyiririni atziri; ikanteeyakirini: “Tee ikameethatzi joriiyopaeni. Tee okameethatzi rojankinarini Moeseeshi. Tee okameethatzi Tajorentsipankoki”. Rootaki ikanteeyiririni atziri. Paminetya iroñaaaka ramakiri eejatzi jaka paashinijatzitatsiri atziri, kaari okameethatantanaa iroñaaaka iroka pankotsika kameethatawitachari.

Rootaki ikanteeyakirini.

**29** Chapinki iñaawakiri Paaworo janta nampsitsiki, itsipatawitari Toroojimo: riraga ejeesojatzi. Iitashiteeyawakarini rirotaki ikyakaapaakiri Tajorentsipankoki, rootaki ikanantakari: “Ramakiri jaka paashinijatzitatsiri atziri”.

**30** Ari ikijeyanakani maawaeni nampsitsiweri, ipiyoteeyanakani janta. Raakiri Paaworo shepik, inoshikanakiri inkokironta, jerererere. Roojatzi rashitantanakawo Tajorentsipanko.

**31** Roowiteencha rowamaerimi, omaanta ikemakotakiri riraga iyomantaantete joraaropaeni, kaateentsiripaeni 600. Ikamanteetziri:

—Ikijectyanakan maawaeni jerojareejatzi.

<sup>32</sup> Ishintsitzi raanakiri joraaro, eenitatsi kapitaanotatsiri, ishiyashiteeyananakarini. Iñaanteeyawakaririni atziri, ipakaanteeyanakanakaririni ipajeeeyirinira.

<sup>33</sup> Ari ipokapaaki komantaante, raapaakiri Paaworo. Roojotakaantakiri. Ro roojotantapaakariri apite karenatha. Rojampikowentapaakiri rirori-paeni:

—¿Ninka irika? ¿Oetaka rantakiri pikijeevantakaririni?

<sup>34</sup> Ipaashinitayitanakironi ikantayitanakirini. Ikaemaeyanakini, tekatsi ikantya komantaante Riyotakoteri, rootaki raakaanantanakariri janta ipankoki joraaro.

<sup>35</sup> Rareetapaakawo ateetamentotsinta, osheki rotatsinkaeyanakirini. Roojatzi rateetakaantapaakari joraaro.

<sup>36</sup> Royaatananakiri osheki atziri ikaemaeyanakini:

—Powamayeri.

<sup>37</sup> Roowitapaench ikyakaapaakirimi Paaworo pankotsiki. Ikantziri rriraga komantaante:

—¿Kameethama nokenkithatakayemi?

<sup>38</sup> Ikantziri:

—¿Piyotziroma ipaante kireeshiyajatzi? ¿Tema eeroka ejipiitojatzi rriraga kijakaakariri atziri chapinki? ¿Tema eeroka aaneeriri chapinki 4.000 owayiri janta okaankiityeenta tee oshookaperotzi oetarika?

<sup>39</sup> Rakanakiri:

—Tee. Naaka joriiyo. Nopoñaanaka Taarishoki, rowaga shiriishiyawero. Iyotakotzirori nonampi. Iroñaaka nokantemi: pishinetena nokenkithatakayeri atziri.

<sup>40</sup> Ari ishinetakiri, ikantziri:

—Intsipaaete, pikenkithatakayeri.

Roojatzi ikatziyantapaaka ateetamentotsiki. Roojatzi itzinayimotanakiri atziri rako. Imaeriteeyanakini, roojatzi ikenkithatakagaeyantakarini. Ro ikenkithatakantariri ipaante ewereeyo, rootaki rashì joriiyopaeni.

## 22

### *Ikenkithatakakaakiri Paaworo joriiyopaeni*

<sup>1</sup> Iroka ikanteeyiririni Paaworo:

—Nojoriiyotzinkarite. Iroñaaka naaka kantakotachani. Pikemijanteeyawakinani.

<sup>2</sup> Ikemantawakariri iñaawaetantanakawo ewereeyo, eekiro osheki imameritoeyanakini. Ari ikantanaki:

<sup>3</sup> —Naaka joriiyo. Ari ojeekakaakina nana janta Taarishoki, ironta shiriishiyawero. Jaka nampitsikika ari nantaritaki. Riyotaakina Kamariyeeri, ithotyaaperotakinawo iroka ikanteeyirini achariniiteni. Nokowaperotaki noshintiseniri Tajorentsi oetarika nantziniriri, nokimitawitakimi eerori iroñaaka.

<sup>4</sup> Nokijaperotziri iyotaantzirori iroka owakiratatsiri, rootaki nowantayitaririni, noojotakaantayitakirini, eejatzi nomonkyaaagakaantayitakirini shirampari, tsinani, maawaeni.

<sup>5</sup> Riyotana iwinkatharite ñaanakowenantatsiri kyaaryootaki iroka nokantakimiri. Eejatzi ikimiteeyanaani maawaeni aataperoteenchari joriiyopaeni: rriraga iyotaawakaenchari, ryoteeyini. Riroteeyakini panawori jankinarentsi rojankinatziniri tamaashikojatzi. Rotyaantakina nokijeeyantyaaririnimi aapatziyeyaririni Jesoshi. Niyaatawitaka

Tamaashikoki nayiterimi jeekatsiri janta, noojoterimi. Namakirimi jaka rowashironkaantyaaririmi ñaanakowenantatsiri.

<sup>6</sup> Nokinanaki awotsiki, nokaakintapaakawo Tamaashiko. Ari ikaataki tampatsika oorya. Omapokapaakina, amorekakotapaakina amorekatsiri, opoñaaka jenokinta.

<sup>7</sup> Notyaanaki kipatsiki, teree. Nokemakiri ikantakina: "Sawoori, Sawoori. ¿litaka pikijantakinari?"

<sup>8</sup> Nakanakiri: "¿Ninkamika Nowinkatharite?" Ikantakina: "Naaka Jesoshi, najareetejatzi: naaka pikijakiri".

<sup>9</sup> Ifñeyakironi notsipateeyarini iroka amorekatsiri, omaanta tee ike-maeyawakironi ikantakinari Jesoshi.

<sup>10</sup> Nokantziri: "¿litaka pikowakaakinari nanteri?" Ikantana Awinkatharite: "Pikatziyanee, piyaate Tamaashikoki. Janta ikanteetemi oetarika panteri".

<sup>11</sup> Oshipakiryaakoperotanakina amorekatsiri, rootaki kaari nokokichaatantanaa. Ari ikathatanakina notsipataripaeni. Roojatzi rareetakaantakina Tamaashikoki.

<sup>12</sup> Ijeeki janta shirampari iitachari Ananiyyashi. Ikemijantaperotziro rojankinarini Moeseeshi. Inaaperoeyirini maawaeni joriyo, jeekatsiripaeni janta.

<sup>13</sup> Ipokashitakina, rokaakintapaakina, ikantapaakina: "Sawoori, eeroakataki noyemijantzinkarite. Paminanee". Roojatzi naminantanaa, kokichaatanaana.

<sup>14</sup> Eejatzi ikantana: "Riyoyaakimi Tajorentsi piyotantyaawori ikowakaakimiri rirori. Riyoyaakimi pikemaperotantyaariri. Riyoyaakimi piñaawaetantyaawori rowaga Kameethaperotatsiri. Eejatzi ryoyaakimi pikemaperotantyaariri rirori.

<sup>15</sup> Eejatzi pikenkithatakoteri. Pikanteri maawaeni atziri iroka piñaakiri eejatzi iroka pikemakiri.

<sup>16</sup> ¿litaka pojamaninkantawori? Thame, pikaawoshitakotyaari Tajorentsi. Eniro kaari kameethatatsi pantayitzirini, omaanta aririka pameentyaari Tajorentsi, rowameethateemii".

<sup>17</sup> Ari roojatzi nopyiana Jerojareeki. Namanawitakari Tajorentsi janta Tajorentsipankoki, roojatzi okimiwitaka nomishiwaetatz,

<sup>18</sup> tema noñaashitakari Awinkatharite. Ikantakina: "Pishintsite, pookaneero Jerojaree, pishyanaki. Eero ikemijanteetziro iroka pikenkithatakatinari".

<sup>19</sup> Nokantziri: "Nowinkatharite, ryoteeyakini nothotyaakiro maawaeni pankotsi ipiyoteeyantaririna joriyo, nagaeyakirini aapatziyemini. Nomonkyaaagakaantakiri, eejatzi nopajatakaantakiri.

<sup>20</sup> Naaka owamaakaantakiriri Eshiteewani: riraga kantakotzimiri. Nokatziyaka okaakini, nokantziri: 'Kameetha ikame'. Naminakiniri owakiniriri imaatha".

<sup>21</sup> Omaanta ikantakina: "Thame piyaate. Nokowaki notyaantemii inteea, janta ijeekinta paashinijatzitsiri atziri".

<sup>22</sup> Ikemijanteeyawitakarini joriyopaeni, omaanta ikemaeyantawakaworini iroka, ikaemaeyanakini. Ikanteeyini:

—Pookaneeri. Tee okameethatzi rañee: powamayeri, ikameeta.

<sup>23</sup> Ikaemaeyanakini, ikijejerayanakani, rootaki raatonkoryagaeyanakawoni itzinaatzinaatakiro imaatha jenoki eejatzi kipatsipane romanapanetakiro jenoki.

**24** Iñaateeyakaririni komantaante ikijeyakani, roojatzi ikanantakari jo-raaro:

—Paanakiri, pikyaakaanakiri janta: pipajapajaateri ikanantemiri oetrika rantakiri ikijeyantakaririni ijoriyyotzinkaritepaeni.

**25** Ari roojotawitakari ipajatantyaaririmi. Ari ijeeki janta kapitaanotatsiri, ikantziri Paaworo:

—Eenitatsi nowaperite nokimitantariri oroomajatzsi. Tekira piyotako-teeyanani eenitatsirika nantani, ¿arima pipajatacantashitakina?

**26** Ikematziri, riyaatashitakiri komantaante. Ikantapaakiri:

—¿litaka pantakayeriri? ¡Kyaaryoowa! Eenitatsi irira iwaperite roshiyantariri oroomajatzsi ikimitantanari.

**27** Ari ipokashitakiri komantaante, ikantziri:

—Pikantaperotenaata. ¿Eenitatsima piwaperite pikimitantariri oroomajatzsi?

Ikantziri:

—Jee, eenitatsi.

**28** Ikantanaki komantaante:

—Osheki nopolawentakiro nowaperite nokimitantariri naaka oroomajatzsi.

Ikantziri Paaworo:

—Owakirani nokoñaataki ari otzimaki nowaperite nokimitantariri oroomajatzsi.

**29** Intsipaete rotyaantaneeri riraga pajaterinimi. Omaanta komantaante, ithaaawanaki. Riyotaki roojotakaantashitakari kimitakariri oroomajatzsi: tee okameethatawita roojotakaantashityaarimi.

### *Raanakiri Paaworo janta jewawentziririjoriiyopaeni*

**30** Ikowaki komantaante riyotaperote oetrika ikantakotantariri joriiyopaeni Paaworo. Inkaamani roojoryaakoteeri. Ipiyotakaanteyakirini je-wawenantsatsiripaeni ñaanakowenantatsiri, eeniro maawaeni jewawentziririjoriiyopaeni. Roojatzi roerinkakaantanakari Paaworo, raanakiri janta.

## 23

**1** Raminaperotapaakiri maawaeni iyotaawakagaenchari. Ikantziri:

—Nojoriiyotzinkarite. Niyotzi iñaaperotakina Tajorentsi. Nokantatyani kameetha nojeeki, roojatzi iroñaaka.

**2** Riraga Ananiyyashi iwinkatharite ñaanakowenantatsiri, ikantziri tsipatariri janta:

—Pipajawaanteteri.

Ari, ipajawaanteteetakiri.

**3** Ikantanaki Paaworo:

—Eerokataki eeroka ikijekya Tajorentsi: eeniro pantani: osheki pamatawitantzi. Iroñaaka eeniro pijeeki jaka, pikowaki pimonkaateromi Iwaperite Tajorentsi, pikantakowenantenarimi. Omaanta pipajatacantashitakina, tee pimonkaatziro Iwaperite Tajorentsi.

**4** Ikantanaki katziyeenchari jaga:

—Riotaki pikantakiri iwinkatharite ñaanakowenantatsiripaeni.

**5** Rakanakiri:

—Nojoriiyotzinkarite, tee niyotzi rirorika iwinkatharite ñaanakowenantatsiri. Okantzi Iwaperite Tajorentsi: “Eero pikantzimatzi jewawenantsatsiri atziripaeni”. Niyotakimirika, eero nokantzirimi.

**6** Opokimotapaakiri ikenkithashiryaanaka Paaworo janta rojatzinkaakarinta ūaanakowenantsirsi, eeniro janta saroseeyopaeni eejatzi warijeeyopaeni. Ikaemanakan:

—Nojoriyyotzinkarite. Naaka warijeeyo. Naaka itomi warijeeyo. Niyotaki ipiriinteeyeeni maawaeni kamaentsiripaeni, rootaki ikijantakinari iroñaka irikapaeni.

**7** Ikemanteeyawakaworini iroka ikantakiriri, ikijathatawakagaeyanakanani warijeeyopaeni eejatzi saroseeyopaeni. Ikijawaka-gaeyanakanani.

**8** Ikantapiinteeyini saroseeyopaeni: “Eero ipiriinta kamaentsiripaeni. Tee añiiri Tajorentsi ronampiri. Tee añiiro ashire aari”. Omaanta ikanteeeyini warijeeyo: “Apiriinteeyaneni. Eenitatsi ronampiri Tajorentsi. Eenitatsi ashire maawaeni”.

**9** Ari ikijathatawakagaeyanakanani. Ikatziyanaka iyotaantzirori Iwaperite Tajorentsi, rirotaki warijeeyo. Ikantaperotanaki:

—Tekatsi nokemakoteri írika rantakiro kaari kameethatatsiri. Aririka ryotaakiri Tajorentsi. Aririka ryotaakiri ronampiri.

**10** Eekirowa ikijathatawakagaeyanakanani. Raamaanaka komantaante ari ichokiryagaetakiri Paaworo. Rotyaantakiri joraaro:

—Piyaate, pagaateri.

Ari ranashiteeyanakanani, ryaatanaki niyanki, raapithateeyawaerini. Raaneeri janta ipankoki joraropena.

**11** Apaani imaaiki, otsitenitanee eejatzi, ikoñaztimotapaakiri Awinkatharite. Ikantapaakiri:

—Piweshiryaanakya. Pikenkithatakotakina jakä Jerojareeki, eejatzi pikimiteeya iinja janta Oroomaki.

### *Raaneeri Paaworo Sesareeyaki*

**12** Ari okitejitanaki, apaanipaeni joriiyopaeni, rajaryaagaeyawitakarini Paaworo rowamaerimi. Ikantawakagaeyakanani:

—Iroñaka tekiraata owamayiri, eero oyitaa, eejatzi eero iritaa amiri. Aririka amatawitawakagaeyani, tema akowatzi rowashironkagae Tajorentsi.

**13-14** Ikaateeyawitakani 40 shirampari ajaryaawitakariri rowamaerimi. Riyaatashteeeyakirin jewawenantatsiripaeni ūaanakowenantsiripaeni ee-jatzi ataperoenteencharipaeni. Ikantapaakiri:

—Tekiraata nowamaeri Paaworo, rooma eero nowanaa, eejatzi eero niranee. Eerorika nowamaeyirini, nokowaeyakini rowashironkayenaata Tajorentsi.

**15** Pikaateeyerini maawaeni iyotaawakagaenchari, pikantakiteri riraga komantaante: “Pamakinari Paaworo, nokowaki niyotakotaperoteri, iitarika rantakiri”. Rootaki pikanteriri. Omaanta naakanya, niwetsikaeyitakaani nowamaantawakyaariri niyanki awotsi, tekiraata rareetya.

**16** Eeniro otomi ritsiro Paaworo, ikemakowentakiri rikonkiri rajaryaagaetakari rowamagaeteri. Ari ryaatanaki janta ipankoki joraaro, ikaman-thatapaakiri rikonkiri.

**17** Roojatzsi ikaemakaanantakari rirori apaani kapitaanotatsiri, ikantziri:

—Paanakiri irika ewankari janta ijekinta komantaante. Eenitatsi ikanteriri.

**18** Roojatzsi raantanakari janta. Ikantapaakiri:

—Ikaemakina Paaworo, riraga omonkyaagakiriri chapinki. Ikantakina: “Paanakiniri komantaante irika. Eenitatsi ikanteriri”.

**19** Ari ikathathanakiri eekitziroeni jaga. Imanakaakari, rojampitakiri:

—Oetaka pikoyiri pikantenari?

**20** Ikantziri:

—Ikantawakaaka joriyyopaeni, ikowakoeyakimini paaneeniri Paaworo janta riyotaawagaeyakaninta. Ikowaki ramatawitemi, ikante ikowaki rojampitakowentaperoteri konki.

**21** Omaanta, eero paapatziyari Jesoshi. Eenitatsi shirampari, ikaateeyakini 40, ajaryaakariri rowamaeri. Ikanteeyakini: "Tekiraata owa-mayiri, eero oyita eejatzi eero irita amiri. Eerorika owamaeri akowaki rowashironkagaeyeenita Tajorentsi". Iroñaaka riwetsikaeyakan. Royagae-takimi iroñaaka panteniri iroka ikowakotemiri.

**22** Ari rotyaantziri komantaante riraga ewankari. Ikantawakiri:

—Eero pikantziri paashini atziri iroka pikantakinari.

—Ari.

**23** Roojatzi ikaemiri apite kapitaano. Ikantziri:

—Aririka oniyankiitetzimatanaaki, piwetsikaeyerini 200 joraaro raanakiro ichekamentopaeni, 70 kyaakotyaarini kawayo, eejatzi 200 oerikeroni rojataamento. Riyaateeinyi Sesareeyaki.

**24** Piwetsikeniri Paaworo kawayo, ikyaaakotanakyaari. Kameetha pa-gaeyanakirini janta ijekinta jewatatsiri Jeerishi.

**25** Roojatzi rojankinatziniri jankinarentsi, ikimitakiro iroka:

**26** “¿Eeniromi Jeerishi? Nokoyi niwethatemi tsikarika pikanta pijkeeki. Naaka Kiraaworyo Riishiyashi ojankinatzimirori iroka. Osheki nopinkathatzimi.

**27** Piñaawakirira irika shirampari notyaantemiri. Roowiteencha rowamaerimi chapinki joriyyopaeni. Ikanteetana eenitatsi iwaperite ikimitan-tariri oroomajatz, roojatzi niyaatashitantakariri, notsipateeyanakarini jo-raaro, nowawijaakoteeri.

**28** Nokowaki niyote oetaka ikantakotanteetariri, naanakiri janta riyotaawagaeyakaninta.

**29** Nokemapaakiri, ikantawakaawenteeyawoni jankinarentsi rashì rirori-paeni. Omaanta tekatsi ikantakoeteri omonkyaaaganteetyaariri eejatzi rowamaanteetyaariri.

**30** Eenitatsi kantapaakinari rajaryagaetakari rowamagaeteri, rootaki notyaantantakimiriri. Notyaantemiri iinja riraga kijakiriri ryaatashitemi ikantakoperoteri Paaworo". Rootaki rojankinatziniriri, roojatzi ipawakiri joraaro, ikantziri:

—Eenitatsi iroka nowaaritate paanakiniri Jeerishi, eejatzi paanakiniri Paaworo.

**31** Ari ikemijantakiri joraaro, raanakiri Paaworo. Tsiteniriki raree-takaakari Anteepatzirishiki.

**32** Okitejitanaki ipiyeeyanaani joraaro inampiki. Irira tsipataper-otanakariri Paaworo riraga kyaakoeyanakaririni kawayo.

**33** Rareeteeyantapaakarini Sesareeyaki, ipapaakiri pinkathari jankinarents. Eejatzi riraga Paaworo, roñaagapaakiri.

**34** Iñaanatawakiro jankinarentsi, roojatzi rojampitantawakari:

—¿Oetaka piipatsite pipoñaantakari?

Rakanakiri Paaworo:

—Nopoñaanaka Shiriishiyaki.

**35** Ikantziri pinkathari:

—Inja ipokawakiita kantakotemini, ari nokemijantanakimi.

Roojatzi ikanantakari joraaro:

—Pashitakoteri janta ipankoki Erooreshi, paminaperoteriroña.

## 24

### *Ikantakowentziri Jeerishi riraga Paaworo*

**1** Okaataki kitejiri apawakooni, ari riyaatananaki Ananiyashi, riraga iwinkatharite ñaanakowenantsiritsipatanakari apaanipaeni aataperoteenchari. Eeniyo eejatzi itsipatanakari ñawaetakontatsiri, iitachari Teeretoro. Riyaatashitakiri pinkathari ikantakooyerini Paaworo.

**2** Ikaemaetakiri, roojatzi ikenkithataapaakiri Jeerishi, riweshiryaaapaakari eejatzi ikantakotashitakari Paaworo, ikantzi: –Iroñaaka, nowinkatharite, nopaasonkiteeyimini. Kameetha pipinkathariwenteeyakinani, rootaki kameetha nojeeckaeyantakarini jaka. Powameethateeyakinawoni oetarakapaeni jaka aeapsiteki,

**3** pamitakoeyakinani rootaki nopaasonkitantakimirimaawaeni.

**4** Iroñaaka eero nojamanitzimiro. Aritakikya pametawo pineshironkatantzi, eechonkiini nokowaki pikemijantawakina.

**5** Noñaakiri irika Paaworo, osheki roñaashirenkantzi. Ikijakagaeyakarini joriyyopaeni maawaeni nampsikipaeniweri. Rirotaki jewatakaeriri kemi-janteeyiririni riraga najareefejatzi.

**6** Roowitanenecha ramashitantyaawomi Tajorentsipankoki kaari kite-tatsi, roojatzi nagaeyantakaririni. Roowitanenecha nomonkaateromi rojankinatteeyanarini Moeseeshi, nokantakowenantyaaririmiri iroka.

**7** Omaanta rareetapaaka Riishiyashi riraga komantaante. Rotatsinkantay-itapaaikinarini, raapithatapaakinari. Rotyaantakina nopokantakari jaka, noñaawaetakontyaariri Paaworo.

**8** Iroñaaka pojampiteri, piyotantyaari kyaaryorika iroka nokantakotakiriri.

**9** Ikanteeyanakini joriyyopaeni:

–Kyaaryootaki iroka ikantakiri. Aritaki okantakari.

**10** Ari riraga pinkathari ikantakiri Paaworo iñaawaete rirori, ikantzi: –Niyotaki okaatzi iroñaaka osheki ojarentsi pipinkathariwenteeyirini natziritzinkaritepaeni, rootaki nokimoshiretantanakari. Iroñaaka naaka kantakotaachani.

**11** Intsipaete, pojampitakowenteeyenani. Owakiratatsi okaatzi 12 kitejiri nyaatantakitarì Jerojareeki. Niyaatakitzi nopinkathatakitziri Tajorentsi.

**12** Tektsi ñeenani nokijathatawakayaani janta Tajorentsipankoki, eejatzi tee nokijathatawakayaani janta pankotsiki nopiyoteeyaninta nampsiksi, tektsi. Eejatzi tee nopiyoteeyirini osheki atziri.

**13** Tektsi ikantya iroñaaka riyotakaaperotemi iroka ikantakotashitakini.

**14** Iroñaaka nokamantaperotemi. Naapatziyari riraga Tajorentsi riro-taki raapatziyarini nochariniuteni paerani. Nokemijanteeyironi rojankininarini Moeseeshi, eejatzi roori rojankininarini kamantanayitzirorini iñaani Tajorentsi. Kyaaryo, eeniro riyoatakinari Jesoshi ayoteeyantyaarini aateyanteeyarini jenokinta, omaanta ikantashiteeyakanri irikapaeni tee okameethatziaapatziyawo.

**15** Nokomiteeyakarini rirori, niyatki ipiriinteyeyeerini Tajorentsi maawaeni kamawiteencharipaeni: kameethatatsiri, kaari kameethatatsi, maawaeni.

**16** Rootaki nokowaperotantakari nowameethashiretzimotyaari Tajorentsi, eejatzi atziri. Tema iñeeeyakinani. Nokowaki nojeeke kameetha, niyatontaari iñaaperotakina nokameethatzti.

**17** Nojeekawitaka janta inteea osheki ojarentsi, iroñaaka nopiyaa. Namakiniri nosheninkapaeni ipakaantashitayitakaririni jeekatsiri

inashitachariki nampitsipaeni. Eejatzi nopashitapaakari Tajorentsi oetarika.

<sup>18</sup> Paminetya iroñaaka, iñaakinna janta Tajorentsipankoki, nopinkathaper-otziri Tajorentsi. Tekatsi nopyotakayaari, eejatzi tekatsi nokijakayaari.

<sup>19</sup> Ari ijeekitaka janta joriiyopaeni poñaacharipaeni Aashiyaki, rirotaki kijakagaeyakaririni atziripaeni. Eenirorikami nantayitzirini, tema ari ipokakimi rirori ikantakowentenami.

<sup>20</sup> Omaanta ¿oetaka ikanteeyirini irikapaeni? ¿Oetaka riyotakotanari janta riyotaawakagaeyakaninta? ¿Eenitatsima nantakiri?

<sup>21</sup> Apatziro nokantakiri chapinki: "Niyotaki ipiriinteeeyaneeni maawaeni kamawiteencharipaeni, rootaki pikantakowenantakinari iroñaaka".

<sup>22</sup> Riyotaperotzi riraga Jeerishi iroka akantakotziriri Tajorentsi. Ikan-tanaki:

—Aritaama iroñaaka. Iinja ipokawaeta komantaante Riishiyashi, ari nokantakowentemi.

<sup>23</sup> Ikantziri kapitaano:

—Paaneeri Paaworo, pomonkyaagaeri: paminaperoteri, omaanta pishineteri oetarikapaeni ikoyiri. Eejatzi pishineteri tsipatapiintakariri retakotyaari.

<sup>24</sup> Paashini kitejiri ipokapaaki Jeerishi. Itsipatapaakawo iina oetachari Toroshiiya. Irowa rootaki joriiyo. Ikaemakaantziri Paaworo ikemijanantyaariri. Ikenkithatakotziro tsika akantya aapatziyantyaariri Je-sokirisho.

<sup>25</sup> Eejatzi ikenkithatakotziro tsika akantyaari akameethashiretanee, ee-jatzi ajeeke kameetha. Eejatzi ikenkithatakotziri Tajorentsi, tsika ikantyaari iinja ikantakowenantyaariri maawaeni atziri. Ari ithawanaki Jeerishi. Ikan-tzi:

—Iroñaaka piyaatee. Iinja tekatsirika nante, ari nokaemakaanteemi paashini.

<sup>26</sup> Ari oshekitaki ikaemakaantapiintakiri, iitashitaka Jeerishi ari ipashitaneyarimi koriki ishinetantyaaririm iyyaatanteyari. Ari ikenkithatakapiintakiri, omaanta tee ipiri koriki.

<sup>27</sup> Apite awijanaki ojarentsi. Ipoyaataari Jeerishi riraga Poorishiy Jeeshito. Ikowaki ikimoshiretakayeri joriiyopaeni, rootaki kaari ishinetantaari Paaworo ishitowae.

## 25

### *Rawentaakari Paaworo Seesari*

<sup>1</sup> Ari rareetapaaka Jeeshito janta ipinkathariwenantenta. Imaapaaki 3 Sesareeyaki, roojatzi rowaagantanaa Jerojareeki.

<sup>2</sup> Eeniropi riraga jewawenantatsiripaeni ūaanakowenantatsiri, eeniro jew-awenzitiriri joriiyo, iñaawaetakoeeyirini Paaworo. Ikantziri Jeeshito:

<sup>3</sup> Pimoshiretakayena. Pamakaantakinari Paaworo jaka Jerojareeki.

Ari rajaryaaawitakari romapokawakirimi niyanki awotsi, rowamaakirimi.

<sup>4</sup> Ikan-tzi Jeeshito:

—Ijeekawakiita Sesareeyaki. Eero ojamanitzi nopyiee.

<sup>5</sup> Ari eenirorika rantani, nokowaki itsipatanakina jewatatsiripaeni ikantakotantyaariri.

<sup>6</sup> Ari aamaashitya ijeekaki janta 8 kitejiri, rooma teerika 10. Roojatzi ipiyantaa Sesareeyaki. Inkaamani ijeekaki janta iwinkatharimentoki. Ikaemakaantziri Paaworo.

<sup>7</sup> Rareetapaaka, ari rojatekawakiriri joriiyopaeni riraga poñaachari Jerojareeki. Osheki ikantakotaperotantyaariri Jeeshito.

**8** Rirojatzi kantakowentaacha Paaworo, ikantzi:

—Tekatsi nokantero Iwaperite Tajorentsi raapatziyawo joriyyopaeni. Tekatsi nokantero Tajorentsipanko. Eejatzi okimitaaka, tekatsi nokantzimater Seesari.

**9** Omaanta Jeeshito ikowaki ikimoshiryaakagaeyerini joriyyopaeni. Ikantziri Paaworo:

—Pikemaki iroñaaka ikantakoeyakimini irikapaeni. ¿Pikoyima piyaate Jerojareeki? Janta ari nokantakowenteemiri.

**10** Rakanaki Paaworo:

—Eenitatsi nowaperite nokimitantariri naaka oroomajatzi, ariwitakami jaka pikantakowentenami. Piyoperotaki tekatsi nokantziri joriyyopaeni.

**11** Nantakirorika kaari kameethatatsi, nokantzimatakiririka Tajorentsi, eniro nantani rowamaanteetenari, ari. Kameethataki rowamagaetenataa. Omaanta aririka ikantakotashiteeyanani, tekatsi pikantya pishinetakowentena. Nokowaki potyaantena iroñaaka Seesariki: nawentayaari, ikantakowenantenari rirori.

**12** Ari ikenkithatakaakiri Jeeshito riraga iyotaawakaenchari. Roojatzi ikantziri Paaworo:

—Iroñaaka pikowaki notyaantemi Seesariki. Aritaki notyaantemi riroriki, ikantakowenantenemiri.

### *Ikenkithatakaakiri Jeeshito Akiriipa*

**13** Ari okaataki apaanipaeni kitejiri imaaki. Areetapaaka Sesareeyaki jewawanantatsiri Akiriipa, itsipatawo Wereniishe. Ipoki rareetari Jeeshito.

**14** Ijeekapaaki osheki kitejiri, ari ikenkithatakotakiri Paaworo:

—Eeniro jaka shirampari romonkyaaagakiri Jeerishi.

**15** Niyaatantakari Jerojareeki, ikantakotakiri joriyyopaeni: riraga jewanantatsiripaeni ñaanakowenantatsiri, aataperoteenchari joriyyopaeni, maawaeni. Ikowakotakina nokantakowentashityaari Paaworo: “Eeniro rantani”.

**16** Omaanta nokantakiri: “Naaka oroomajatzi. Tee nametawo noshinetakaantashityaari tekiraatarika ikantakoetziri. Ikemawakiroota irika pikantakoteriri eerokapaeni. Rirojatzikya ñaawaetakotaacha”.

**17** Roojatzi ipiyoteeyantakan jaka, ari tee nojamaninkiro. Inkaamani nojeekaki jaka nowinkatharimentoki, nokaemakaantakiri Paaworo.

**18** Ari neewawitaka ikanteeeyini rantaperotziro kaari kameethatatsi. Omaanta, tekatsi ikantakotaperoyerini.

**19** Ikkijathatawakaawentakawo iroka raamaashiteeyakarini rirori. Eejatzi ikkjathatawakaawentakari Jesoshini. Ikamaki, omaanta ikantzi Paaworo: “Añaagae”.

**20** Tee niyotzi tsika nokanterori nojampitakowenantyaawori iroka ikantayitzirini. Nojampiwitakari ikowakirika riyaate Jerojareeki, janta nokantakowenantyaaririmi.

**21** Omaanta ikowanaki ikantakowenteri irira Seesari, riraga Awoshito. Ari nokantakiri joraaro ishenteri, roojatzi notyaanantyaariri janta Seesariki.

**22** Ikantzi Akiriipa:

—Nokowaki nokemijanteri naaka.

Ikantziri:

—Aritaki, inkaamani pikemerri.

### *Ikenkithatakaakiri Paaworo Akiriipa*

**23** Inkaamani riyaataki Akiriipa, eejatzi Wereniishe. Ari rowaneenkaperoteeyanakan apite. Ikyaanaki janta ipiyotapiinteetanta. Ikaateeyakirini komantaantepaeni, eejatzi pinkatharitatsiripaeni: riraga jeekatsiripaeni

janta. Riraga Jeeshito, ikaemakaantakiri Paaworo. Ari ramapaakiri joraaropaeni. Ikantzi Jeeshito:

<sup>24</sup> —Pinkathariwenantatsiri Akiriipa. Maawaeni eeroka nokaateeyirini jaka. Eeniro irika. Ipokashiteeyakinanai maawaeni joriyyopaeni: jerojareejatzi, eejatzi irika jeekatsiripaeni jaka. Ikantakotawitari irika: "Tee okameethatz eekiro ijeeki".

<sup>25</sup> Omaanta tekatsi niyotakoteri nowamaantyaariri. Eeniro iroñaaka rawentaaaki Seesari, ari iroñaaka nokoyi notyaanteri riroriki.

<sup>26</sup> Omaanta tee niyotzi oetarika nokantaperoteriri awinkatharite. Rootaki nokaemakaanantakimiri eeroka, ojampitakowenantyaariri. Roojatzikya ojeeke nojankinatakotantyaariri.

<sup>27</sup> Eeniro irika nomonkyaaagakiri. Tee okameethatz notyaantashityaari, tekatsirika nokantakoteri.

## 26

<sup>1</sup> Riraga Akiriipa ikantziri Paaworo:

—Iroñaaka noshinetemi eeroka ñaawaetakotaachani.

Roojatzitzaantananakawo rako Paaworo, rirotaki ñaawaetakotaacha apaniroeni:

<sup>2</sup> —Piñaakin, Pinkathariwenantatsiri Akiriipa. Iroñaaka nokantemi oeta ikijawenantakinanai nojoriyyotzinkarite. Nokimoshirewentakimi,

<sup>3</sup> tema piyotaperotziro maawaeni rametayitarini nojoriyyotzinkarite, eejatzi piyotzitawoni maawaeni ikantawakaawenteeyarini. Nokowaki pikemijantaperotena, eero pijamashiryaa.

<sup>4</sup> Riyotakotziteeyakinanai nojoriyyotzinkaritepaeni paerani eenironi newankaritapaeni. Nojeekini Jerojareeki, nokaateeyakirini nosheninka. Roojatzitzaantananakawo rako Paaworo, rirotaki ñaawaetakotaacha apaniroeni:

<sup>5</sup> Tema kemijantzinkari warijeeyotatsiri. Paerani nowarijeeyowitani naari, nokimitaperowitarini. Riyotaperoeyakinanai nojoriyyotzinkaritepaeni, ikowakirkami ikanteeyeminimi.

<sup>6</sup> Nokowaperotaki noñeeri ikashiyakaakariri Tajorentsi nochariniiteni, rootaki iroñaaka pikantakowenantakanari.

<sup>7</sup> Pinkathari Akiriipa, paerani ikoñaatantapaakarini nochariniiteni Jakoowonni itomi ikaatzi 12, ijoriyyotseeyinini. Iroñaaka ikowaeyakini maawaeni icharineetenet iñeeri riraga Rotyaantanewo Tajorentsi, rootaki rantawaetantanariri irira iroñaaka. Ikantatyani raamagaeyawitakarini: kitejiriki, tsiteniriki. Iroñaaka nokantakiri ipokaperotaki, rootaki ikantakotantanari iroñaaka nojoriyyotzinkarite.

<sup>8</sup> ¿Piitzima eero imatziro Tajorentsi ipiriinteeri kamatsiripaeni? ¿Litaka pitheenkantariri?

<sup>9</sup> Nokenithashiryaaawitani naari paerani okameethatz nokijeri riraga aapatiyeeyaririni Jesoshi riraga najareetejatzi.

<sup>10</sup> Aritaki nomatakiro janta Jerojareeki. Nomonkyaaagayitawitakarini osheki riyoaanewopaeni Tajorentsi. Rirotaki otyaantakinari jewawenantatsiripaeni ñaanakowenantatsiri. Nokowaeyawitani ikamaeyenimi aapatziyeyaririni Jesoshi.

<sup>11</sup> Aritaki osheki nowashironkaapiintawitzitarini janta nampsikipaeni. Nokijantakariri, rootaki noyaakyaatantakariri roojatzi paashiniki nampsikipaeni ijeekinta paashinijatzitatsiri atziri.

<sup>12</sup> Rootaki niyaatashtitantawitakariri tamaashikojatzi, rotyaantana jewawenantatsiripaeni ñaanakowenantatsiri nayerimi.

<sup>13</sup> Ari nokantanaka niyaatanaki awotsiki, itampatsikataki oorya. Ari noñawakiro janta awotsiki shipakiryaatsiri opoñaanaka jenokinta,

shipakiririri. Oshipakiryaaperotapaakiroña, anaakoperotakiri oorya. Inkitapaakiria, eejatzi riori nokaateeyakinira.

<sup>14</sup> Notyagaeyanakini kipatsiki, tereei. Roojatzi nokemantakariri, ikenkithatakaana ipaanteki ewereeyo. Ikantakina: "Sawoori, Sawoori. ¿litaka pilkijantanari? Aririka nokenkithatakayemi, ¿itakaplikijashiryantanari? Tema eeroka kijashiteencha apaniroeni".

<sup>15</sup> Nakanakiri: "¿Ninkami, Nowinkatharite?" Ikantakina: "Naaka Jesoshi, piijaneentani.

<sup>16</sup> Pipiriintanee, pikatziyanee. Nokowaki nopeyeemmi etakoeyaaririni atziripaeni, kamanteeeyeririni; rootaki nokenkithatakantzimiri iroñaaka. Pikanteri atziri iroka piñaakirika, eejatzi okaatzni noñaayemiri iinja.

<sup>17</sup> Oetarika rantakayemiri pijoriiyotzinkaritepaeni, eejatzi paashinijatzitsirsipaeni atziri, ari nowawijaakotemi: eero noshineteeyirini rowashironkaeyemini. Ro notyaanantakimiri ryoteeyanteeyarini.

<sup>18</sup> Okimitzimotawitakari otsitenitzimotawitakari: tee ryoteeyanan, tema irira Jatanaashi amatawitezeyirini. Piyaatashiteeyerini piyoteeyerini rameenantenari, roojatzi okimitzimotyaari ijeki kitejiriki. Roojatzi nowameethateeyanteyyarini, eero nokenkithashiryaaokoteeri kaari kameethatatsi ranteeyawitakarini; ikaateeyerini maawaeni aapatziyeeyanarini, eejatzi nojeekakagaeyerini kameetha".

<sup>19</sup> Rootaki noñaakiria eejatzi rootaki ikantakinari Jesoshi. Tee nopyi-athatari, inta nothotyaaakiniri ikantakinari.

<sup>20</sup> Nitanakari riraga tamaashikojatzni, nokamantakiri. Roojatzi janta Jerojareeki nokamanantaki. Eejatzi nothotyagaeyakirini janta Joreeyaki. Nokamanteeeyakirini riraga kaari yotziri Tajorents, maawaeni. Nokamanteeeyakirini: "Pikenkithashireeyanakaani, eero pikimita paerani, inta paneenteeyaaarini Jesoshi. Kameetharoña pijkeakaeyeeni, ryoteeyanteeyarini atziri kyaaryo paapatziyaperoeyakarini".

<sup>21</sup> Ari nokenkithatakotakiri Jesoshi, rootaki ragaeyantakinarini joriyyopaeni janta Tajorentsipankoki, ikowaki rowamaenami.

<sup>22</sup> Ikantatyaaani Tajorents retakotana: paerani, roojatzi iroñaaka. Rootaki nomatantawori nokenkithatakagaeyirini pinkatharitsiri, kaari pinkatharitsini, maawaeni. Ari niyotaantapiintziro rojankinarini kamanantayitzirorini iñaani Tajorents, eejatzi rojankinarini Moeseshi. Nokamantakotziri ikenkithatakotziniri paerani: monkaataka ikenkithatakotziniri, añaayitakironi.

<sup>23</sup> Tema rootaki ikantzitarini: "Ikemaatsityaawo Rotyaantanewo Tajorents, ikamae. Roojatzi reewawenteeyerini maawaeni kamaentsirsipaeni, ipiriintanee. Ikanteeyerini joriyyo, eejatzi paashinijatzitsiri atziri: Iroñaaka piyotaperoeyerini Tajorents".

<sup>24</sup> Aritaki okantari ikantakiriri Paaworo. Antawo ikaemanaki Jeeshito:  
—Piñaawaetashitaka, pishinkiwentashitaka, piyojeempiyaaka.

<sup>25</sup> Rakanakiri:

—Tee noñaawaetashita, niyoperotaki. Kyaaryootakiroña iroka nokantakimiri.

<sup>26</sup> Irrika Akiriipa ryoteeyironi iroka nokantakiri, rootaki kameetha nokenkithatakaperotakiriri. Tekatsi nomaneri, niyoperotaki ithotyaaikiro, ryiotawakiro; tee omana.

<sup>27</sup> Pinkathariwenantatsiri Akiriipa, tema paapatziyakawo rojankinasteeyakinirini kamanantayitzirorini iñaani Tajorents. Niyatagi paapatziyakawo.

<sup>28</sup> Rakanakiri:

—Roowiteencha paapatziyakayenarimi Jesokirishito.

**29 Rakanakiri:**

—Roowiteenchami pikemijante, rooma ojamanitanakirika, tee niyotzi. Omaanta nokantakiri Tajorentsi pikimitanteenari naari. Eejatzi nokowakagaeyawitakarini ikimiteeyenaními maawaeni kemaeyakinarini iroñaaka: apatziro tee nokowakayimi roojotanteemiro iroka karenatha.

**30 Ikatziyanaka pinkatharitatsiri:** riraga Akiriipa, Jeeshito, eejatzi okimata Wereniishe, okatzianaka roori. Eejatzi ikimiteeyanakaní maawaeni jeekimoteeyiririni, ikatziyeeyanakaní.

**31 Riyaateeyanakaní, ikantawakagaeyanakaní:**

—Tekatsi rante Paaworo ikamantyaari. Tekatsi rantawitya, romonkyaa-gashii takari.

**32 Riraga Akiriipa ikantziri Jeeshito:**

—Eeromi rawentaarimi Seesari, potyaanterimi riyaateetami.

**27***Jataki Paaworo Oroomaki*

**1** Eeniro janta iyapitaanote osheki joraaro, iitachari Jooriyo. Rirotaki iyapitaanote joraaropaeni ii teetziri rashí Awoshito.\* Ikanteetziri:

—Eeniro iroñaaka antawo pitotsi, paaneeri Paaworo Itaaryaki, eeniro ironta paashini roojoteetziri.

Eejatzi ikanteetana:

—Pikowakirika poyaatanakiri Paaworo, potetyaawo ironta pitotsinta ikinantyaari rirori.

**2** Ari noteteeyanakawoni pitotsi poñaachari Ataramiishiyaki, roowiteencha iyaate nampitsikipaeni janta othaphyaakini Aashiya: janta owapiintanta pitotsi. Ari nokinakoyitanakini, notsipatanakari Arishitaariko. Ipoñaanaka rirori Tejawoonakaki, rowaga Masherooniyawero.

**3** Okitejitanaki nareetaka Shirooki. Riraga Jooriyo, ineshironkatakari Paaworo: ishinetakiri riyaatzi rareetantapaentari iyemijantzinkaritepaeni janta, ari retakoeyawakarini.

**4** Roojatzi nowaagantanaa eejatzi. Ro oepiyakoteenami tamptyaa, rootaki nokinantanakari okaakini kipatsi ojeeki niyankaanini inkaare antawopero othampishi owaero Cheepere. Tema nokinakotanaki jantakironta.

**5** Nomontyaanaawo inkaare okaakintawo Shiriishiya eejatzi Pampiiriya. Nowaagananáa, nareetapaaka Miiraki, rowaga Riishiyawero.

**6** Ari iñaapaakiro kapitaano joraaropaeni pitotsi poñaachari Arejanteriiyaki: iyaátemi Itaaryaki, roojatzi noteteeyantanakawoni.

**7** Okaatzi osheki kitejiri nokinakoeyanakini, eentsikiroeni. Opomeentsitz-imotakinani, omaanta nokaakintapaakawo Jeniiro. Tee oshinetaana tamptyaa, rootaki ninkitanakawori paashini kipatsi ojeeki niyankaani antawopero inkaare. Nokinakotanaki jakakiroka othampishiki owaero Kereeeta, ojeekira nampitsi Jaramoone.

**8** Opomeentsitzimotakina, omaanta ninkitanakiro rowaga othampishi. Roojatzi nareetanaka ironta ii teetziro Kameethari Othatapiinta Pitotsi. Okaakintakawo nampitsi oetachari Rasheeya.

**9** Iroñaaka ojamanitanaki, tema kyaawontsitakotaki. Ari okoweenkata-perotanaki nokinakotanaki, rooteentsi otampyaate, osheki omoetonkani. Ikaminaawitakari Paaworo:

\* **27:1** Awoshito okantakotziri apaanteki aaka: jewaperowenantatsiri.

**10** —Nojoriyyotzinkarite, niyotaki opomeentsitzimotakae aki-nakoeyanakini iroñaaka. Agaekari antawo tampyaa. Otsitsiyikari pitotsi, othonkakari owaagawontsi, eejatzi apiinkaeyinikari aari.

**11** Riraga kapitaano, tee ikemijantziri Paaworo, ikemijantaperotziri riraga jewatziriri marineero. Eejatzi ikemijantziri riraga ashitawori pitotsi. Ikan-teyini riori:

—Thame owaagaeyaneeyani.

**12** Rootaki opokantyaari antawo tampyaa, omaanta tee okameethatz-imotziri nojeekaperoeyeni janta. Riraga oshekiteentsiri ikowaeyakini nowaagaeyaneeyaani. Ikowawitaka nareetyaami Jeniishiyaki, ironta Kereetawero. Janta ojeekapintzi pitotsi, okameethatzimoteeyirini nojeekaeyenimi janta. Ikowaki janta royaawakirootami tampyaa, awijanakita kyaawontsi. Okameethatzzi ithatakoteromi pitotsi Jeniishiyaki: tee añaaperotziro tampyaa janta.

**13** Ari roojatzi kameetha otajonkakiro tampyaa: iyaatzi janta noshireeyawitakawoninta nyaatemi. Iitashiteeyawitani ari nareeteeyami Jeniishiyaki, roojatzi nowaagantanaa. Nokinakotanaki outhapyaka i thampishi Kereeta.

**14** Omaanta, tee ojamanitzi, ari omapokapaakina antawo tampyaa, ikan-teetziro Noreeshite. Opoñaanaka kipatsiki,

**15** otyaantaperotakiro pitotsi niyankyaani; tekatsi okantya iyaate okinapakinta tampyaa. Ari noshinetakotanaka, eekiro otyaantaperotziro.

**16** Nokinakotanaki janta oetachari Kaawora. Eejatzi opoñaanaka tampyaa otapothakyaaga. Opomeentsitzimoeyawitakinani, omaanta nomatakiro noojotakotakiro pitochaani: rowaga onoshikapiintziri opatakira.

**17** Roojatzi raamaashitakawo ari otsiparyaanakya taawirapaeni riwetsikantawori antawo pitotsi roojatzi roojontakawori. Eejatzi ithaawaeyanakini ookakoeyenanimi kipatsiki, janta Shiiriteki, rootaki ragaeyantaworini maawaeni tokoyatatsiri. Ishinetakiro pitotsi, ikantzi:

—Aanakiroota tampyaa, tekatsi akantero.

**18** Okitejitanaki eekirokya otyaantakotaperoteyakinani tampyaa. Ari rowi-inkaeyakironi owaagawontsi, poog, poog, poog.

**19** Awijanaki apite kitejiri. Okitejitanaki rowiinkashitakawo eejatzi owaagawo pitotsi, jookatha, maawaeni.

**20** Ari okaatanaki osheki kitejiri: tee ikoñaatee oorya, eejatzi ompokiro, tekatsi. Okantatyeyaanani tampyaa antawo otajonkaki, moo. Noeteeyaw-itakani eero nawijkoteyeeni.

**21** Awijanaki osheki kitejiri, tee nowaeya. Ikatziyanaka Paaworo, ikantaki:

—Atziritzinkari, okameethatakimi pikemijantawakinami. Eeromi ookiromi Kereeta, eero otsitsiyimi pitotsi, eero othonkami maawaeni.

**22** Omaanta piweshireeyanakyaani iroñaaka. Iinja otsitsyanaki pitotsi, omaanta eero apiinkaeyini aaka.

**23** Rirotaki Tajorentsi aakowentakinari. Naapatziyari naaka eejatzi nopinkathaperotziri. Chapinki noñaakiri ronampirí romapokapaakina.

**24** Ikantakina: “Paaworo, eero pithaayi. Aritaki pareetakyaari Seesari, riraga oroomajatzi. Pikantakiri Tajorentsi ikaminthagaeyerini maawaeni pikaateeyakirini jak: aritaki ikemijantakimi”.

**25** Iroñaaka piweshireyaanakya. Naapatziyakari Tajorentsi, niyotaki ari omonkaatakya maawaeni ikantayitakinarini.

**26** Omaanta iinja ookakotakae tampyaa outhampishiki, omaanta eero aka-maeyini.

<sup>27</sup> Okaatanaki iroñaaka 14 kitejiri, iroñaaka otsitenitanaki. Nokinakotashitanaka inkaareki oetachari Ateerya. Oniyankiityaanaki, raamaaka marineero ari nokaakintakawo othapyaakini.

<sup>28</sup> Iñaantakawo, ojaanaatzirika. Okaatzi 37 meetero. Tee ojamanitzi ari rapiitakiro. Okaatzi iroñaaka 28 meetero niyotantakari merikyaatapaaki.

<sup>29</sup> Ithaawaeyanakini, ikantzi:

—Kyaaryoowa, ompojakotawokari mapi.

Janta opataki rowiinkakiro 4 othatakotantari pitotsi tenatatsiri, othatakotantakari niyanyaaki. Ikowaperotanaki okitejitee.

<sup>30</sup> Ikowaperotawanaka riraga marineero rowawijaakotya, rowiinkeromi pitochaani ikinakotantyaarimi othapyaaki. Ikowawita rookaeyenanimi naariopaeni. Ikowaeyawitakan ramatawiteeyenanimi, ikanteeyawitanani:

—Nowiinkeroota othatakotantari pitotsi, irona othowakitziri. Ro naanteeyawori pitochaaniki, nowiinkero jaga, okijotantyaari antawo pitotsi.

Jaa, ikowaeyawitani rookaeyenanimi.

<sup>31</sup> Riraga Paaworo ikantakiri kapitaano, eejatzi joraaropaeni:

—Eerorika kijokiro royiro marineero pitotsi, tekatsi pikantya eerori pawijakoeyeeni. Eero pishinetziri rookaeyanakaeni.

<sup>32</sup> Roojatzi ipejantakawo joraaro jookatha: iroka othatakotantawitaripitochaani. Rowiinkakiro, poog.

<sup>33</sup> Rooteentsi okitejitee, ikanteeyakirini Paaworo:

—Thame, powaeyawakyaniita. Okaatzi iroñaaka 14 kitejiri pijkeekashitaka, tee powaeya.

<sup>34</sup> Iroñaaka nokantaperotakimi, powaeyani. Pishintsitantaneeyari. Piyoperotanaki: tekatsi oyeminiroña.

<sup>35</sup> Ikanantawori iroka, ipaasonkitakiri Tajorentsi, noñeeeyakirini. Ikaatakiro paa, reewataki rowaka.

<sup>36</sup> Riwershireeyanaani maawaeni rowaeyanakanani.

<sup>37</sup> Nokaateeyakini maawaeni otetawori pitotsi 276.

<sup>38</sup> Ikemaeyanakanani, ari rowiinkaeyakironi maawaeni teriiko, roojatzi opiyonkatantanaa pitotsi.

<sup>39</sup> Ari okitejitaperotanee, tee riyoteeyeeroni kipatsi. Omaanta iñaakiro othantha roojatzi janta kipatsiki, ojeekakinta impaneki. Ikowaeyawitakaniraatakatopaakyaaami janta.

<sup>40</sup> Rookaero othatakotantawitarinta inkaareki. Ari ithataryagaero jookatha oojontawitarini oomaro. Rowankitero tokoya, rowaga othowakitziri. Aakotanakina tampyaa, ikowaeyawitani raatakatopaakyaaami impanekiiteki.

<sup>41</sup> Omaanta nawikakotapaaka niyanyaaki, ayeentapaaka eentaatzira. Awikaperotapaaka othowaki. Okijotaperotapaaki, tee eewotanee. Rowaga omoetonkaare okagaakiro opataki, watzireeii.

<sup>42</sup> Ikowaeyawitani joraaro rowamagaeyerinimi maawaeni riraga romonkyaanewopaeni. Ikenkithashiryaaanaka:

—Ramaatanakikari, ishiyapithatanakaekari.

<sup>43</sup> Omaanta ikowaki kapitaano rowawijaakoteri Paaworo. Tee ishinetakaantziri rowamagaeteri. Ikanteeyakirini maawaeni iyotsiripaeni raamatzi:

—Peewaeyeni pijapokanaki, pamaateeyanakini roojatzi janta kipatsiki.

<sup>44</sup> Eerokapaeni kaari yotatsi pamaate, eenitatsi iroka okotaki taawira, eejatzi kagayiteentsirini: rootaki pamaatantanakyaari.

Aritaki okantakari, nawijakoeyantaarini. Naateeyapaakanji janta kipatsikinta.

## 28

### *Ijeekaeyapaakinji Maarataki*

**1-2** Naateeyantapaakarini, ineshironkataperoeyawakinani riraga jeekatsiri janta. Ikantawakina:

—Owaero iroka paashini othampishi Maarata: ojatekakiro inkaare antawo.

Ari roejawakinawo paamari, ikaemaeyakinani:

—Pipokanaki jaka, pakitsitapaeya paamarika.

Opariyaki inkani, okatsinkaetyaanaki.

**3** Raayitapaakinji Paaworo incheempeki, okaatsinatziitzi. Roejapaakiro paamariki. Ojaawaperotanaki roojatzisi ishitowantanaka maanki, roojatzisratsikawakotantapaakari rakoki, thatzik.

**4** Iñeeyatziiirini ithatantakari rakokira, ikantawakagaeyanakanji:

—Aamaashitya rirotaki owamaantatsiri. Ikemawakiroota. Tee ipiinkatziirakya janta inkaareki, omaanta iñaashityaawoota iroñaaka, roojatzsi ikaman-takya.

**5** Roojatzsi rotékantanakari maanki paamariki, rookakiri, pokiree; tee ikemaatsitsari.

**6** Iitashiteeyawitakani ari raawaakanakirimi; intsipaete ityaanakimi, ikamanakki. Ojamani raminashiiyakarini, joreririri. Iñaatziiiri ikenkithashiryaaanakanji eejatzsi, ikanteeyini:

—Riotaki tajorentsitsatsiri rootaki kaari ikamanta.

**7** Eniro okaakini rowaga iipatsite riraga pinkathariwentziriri jeekatsiri-paeni. Iwaero Poowiryo. Raakameethateeyawakinani. Okaataki 3 kitejiri kameetha ineshironkaeyakinani.

**8** Eeniro iriri rirori imaamentokinta. Ijaawamerikitaki, eejatzsi ishi-waetaka. Rareetapaakari Paaworo irira, ramanakiri Tajorentsi, eejatzsi rowakiniri rako iitoki, roojatzsi retsiyatatakotantaari.

**9** Imatantakawori iroka, ipokashiteeyakirini maawaeni paashini mantsiy-atatsiripaeni. Retsiyatakoeyeerini.

**10** Osheki iñaaperoeyakinani jeekatsiripaeni. Rooteentsi niyaate, ipaeyawakinani oetarika koetyeemotakinari.

### *Rareetaka Paaworo Oroomaki*

**11** Ari ikaatzsi 3 kashiri, roojatzsi noteteeeyantanakani pitotsiki poñaachari Arejanteriyyaki. Opokantakari chapinki antawo tampyaa, eeniro ojeekakki pitotsi janta othampishiki antawo inkaare. Eeniro ikijaathowayitzironi okimitakaantayitakawoni atziri tsipantzsi rowithaakotakiro janta opatakira pitotsi. Iwaero apaani Kaashitoro, paashini iwaero Pooroshi.

**12** Nareetapaaka Shirakoosaki, okaatzsi 3 nomaanakanji.

**13** Nowaaganaa eejatzsi, ninkitanero janta othappyaki, roojatzsi Reejyo. Okitejitanaki opoñaanaka tamypaa rampateki oorya. Roojatzsi okitejitanaki nareetantakawori Poteyooriki.

**14** Noñaappaakiri ayemijantzinkaritepaeni. Ikowaki nojeekimotanakiri 7 kitejiri. Ari nowaaganaka, nareetantaka Oroomaki.

**15** Ari ikemakoeyawakinani ayemijantzinkaritepaeni, roojatzsi ipokashiteeyantakinani, itonkiyoteeyawakinani. Ojamani ipoñaayitanakanji. Apaanipaeni itonkiyoteeyawakinani Jororepiyoki, eejatzsi paashinipaeni janta *Tres* Taweerinashiki. Paaworo, iñaantawakariri, ipaasonkitakiri Tajorentsi eejatzsi riweshiryaaanaka.

**16** Nareetantakari Oroomaki, ishinetakiri Paaworo ijeekapaaki ipankoki rirori. Itsipatakari apaani joraaro, aminiriri.

**17** Imaapaaki 3, roojatzi ikaemakaantakiri jewatayitziririni joriiyopaeni. Ipiyoteeyantakarini, ikantakiri Paaworo:

—Nokanteeyemini, nojoriyyotzinkarite. Tee nokantzimatzi atziritzinkaritepaeni aari. Eejatzi tekatsi nokantakotziro iroka rameteeyawitarini atziripaenini paerani.

**18** Omaanta roojoetakina janta Jerojareeki, ikantziri oroomajatzi: "Payeri irika". Rojampitakowentakina pínkathariwenantsiri, roojatzi ikowawita romishitowakaantenami. Riyotaki tekatsi nanteri nokamantyaari.

**19** Omaanta ipiyathatawakari joriiyopaeni, rootaki nawentaantakariri Seesari. Tekatsi nokantzimatzi natziritzinkaritepaeni.

**20** Rootaki nokaemakaanantakimiri, nokenkithatakagaeyakimini. Paeran aamagaeyawitakarini Rotyaantanewo Tajorentsi ipokantyaari. Iroñaaka nokanteeyirini atziripaeni areetaka, rootaki roojotanteetakinari karenathaki.

**21** Rakaeyanakirini:

—Tekatsí noñi jankinarentsi poñaachani Joreeyaki, kenkithatakotemini. Eejatzi tee ijeeki ajoriiyotzinkarite kantakotemini.

**22** Omaanta nokowaeyakini pikantena oetarika pikenkithashiryaayitzirini. Inashitaka iroka paapatziyari Jesoshi: niyotaki osheki ikjawenteeyakawoni janta maawaeni nampitsikipaeni.

**23** Ari riyotakagaeyakirini tsika okaate kitejiri ikantawakawenteeyantyaworini. Ari osheki riyaateeyanakini ipankoki. Ikantaperotawakiri tsika ikanta Tajorentsi reewawenantzi. Ritakawo amaetyaaka, roojatzi itsiteniityaakowentakiro. Ikowaki riyotakaaperotakiri rojánkinatakotziri Moeseeshini, eejatzi maawaeni kamanantayitzirorini iñaani Tajorentsi: tema rojankinatakotakiri Jesoshi.

**24** Raapatziyakari apaanipaeni, itheenkakiri paashinipaeni.

**25** Ipiyathatawakaanaka, roojatzi rinteenaryawakaanaka. Tekira riyaaatzini, ikantaki Paaworo:

—Kyaaryo iroka okantakiri Ishire Tajorentsi. Ojankinatakaakiri Iseeyashini, kamanantzirorini iñaani Tajorentsi. Rojankinatakiniri rirori ajoriiyotzinkaritepaeni.

**26** Ikantzini:

"Piyaate janta joriiyopaeniki, pikantapaeri: 'Eeniwitacha pikempita pikemantyaarimi, omaanta tee piyotawakiro. Eeniwitacha poki, pamiantarí, omaanta tee pikokichaaperotzi'.

**27** Iroñaaka tee afiiri atziri ikenkithashiryaantari kameetha. Tee ikoyi ikemijantzi, tee ikoyi raminaperotero kyaaryooperotatsiri, ikowaperotakiro rantero kaari kameethatatsi, rootaki ikantashireeyantakarini: 'Eero akemijantzi. Aminikari. Akemijantzikari. Ayotaperotzikari. Akenkithashiryaakari. Owawijaakotakari'."

**28** Piyoteeyawakironi iroñaaka: rowawijaakotantzi Tajorentsi. Iroñaaka rotyaantziri aapatziyakariri Jesoshi riyotakagaeyerini paashinijatzitsatsiri atziri. Ikemijanteeyawakini irirapaeni.

**29** Ikemantawakawori ajoriiyotzinkaritepaeni iroka ikantakiriri, riyaateeyanakini, ipiyapiyawaantetawakagaeyanakani.

**30** Okaatzi apite ojarentsi ijeekaki Paaworo pankotsinentsiki, ipinatakiro. Raakameethateeyakirini maawaeni areeteyayaririni.

**31** Ikantatyaaani ikantakotapiintziri Tajorentsi, tsika ikantari rirori reewawenantzi. Ikantakotapiintakiri Awinkatharite Jesokirishito, tee imaniro. Tekatsi thañaakotyaaani ikenkithatzi.

Naaka jankinatzimirori:

Rookashi

## RIRAGA PAAWORO ROJANKINATZINIRI OROOMAJATZI

<sup>1</sup> Nokoyi niwethateeyemini, oroomajatzi, tsikarika pikanta pijeeki. Naaka Paaworo jankineeyimurorini iroka. Rotyaantakina Jesokirishito nantawaetziniri. Ikowakaakina nokamanteeyerini atziri tsika ikantari Tajorentsi rowawijaakotantzi. Tekatsi paashini ikowakaenari.

<sup>2-3</sup> Tema paerani ikamanteeyakirini Tajorentsi riraga kamanantayitzirorini iñaani ipoñaakya jenokinta Itomi, ratziritapaaki, rowawijaakoeyantyaaririni maawaeni kaari kameethatayitsirini. Ikantakirini rirotaki icharineeteni Iraviiri riraga jewawenantsirsmaawaeni joriyo paeraniperoroña. Roojatz rojankinataktakaririni Tajorentsi riraga kamanantayitzirorini iñaani, rootaki ojeekantakari iroñaaka Iwaperite Tajorentsi.

<sup>4</sup> Roojatz ipokantaka Jesokirishito jaka kipatsikika, rowamagaetawakiri, roojaati ipiriinantanaa. Rootaki ayoteeyantakaneniro itajorenka, rirotaki Itomi Tajorentsi, eejatzi okithatakiri Ishire. Rootaki apinkathaperoeyantakaririni.

<sup>5</sup> Naapatziyakari riraga Jesoshi, rootaki ikaminthaatkakinarini, eejatzi rotyaanantakanarini aapatziyakagaeyaarini maawaeni paashinijatzitsiriatziri.

<sup>6</sup> Eejatzi eeroripaeni, ikowakaakimi pishenkateeyaarini.

<sup>7</sup> Osheki inintashireperoteeyakimini Pawa Tajorentsi janta Oroomaki, tema riyoakimireentsitentanzimiri eejatzi maawaeni paashinipaeni aapatziyeeyaririni. Iroñaaka nokowaki ikantyaani ineshironkaperoeyemini, eejatzi kameetha ijeebakagaeyemini. Eejatzi ikimitakagaeyemini Awinkatharite Jesokirishito.

### *Ikowaki Paaworo rareetyaari oroomajatzi*

<sup>8</sup> Iroñaaka nokamantemi: tsikarika niyaatayitakini nokemakotapi-intakimi pameentaperoeyakarini Jesokirishito. Ikemakoeyakimini maawaeni atziripaeni, jeekayitatsirini tsikarikapaeni, rootaki nopaasonkitantakariri Tajorentsi, tema naaka eejatzi aapatziyariri Jesokirishito.

<sup>9</sup> Riyotzi Tajorentsi namanapiintziri ramitakoeyemini. Nokyaaryoowentziniri nantawaetziniri, eejatzi nokantani nokenkithatakotziri Itomi: nokamanteevirini atziri tsika ikanta rowawijaakotantzi.

<sup>10</sup> Eejatzi nokantziri Tajorentsi: "Nokowaki, Pawa, pikowakayenarika, naareeteyarini oroomajatzi".

<sup>11</sup> Osheki nokenkithashireeyakimini noñeemi: nokowaki omatakagaeyemini oetarakipaeni rowaga Ishire Tajorentsi, paapatziyaperotantyaariri Jesoshi.

<sup>12</sup> Eejatzi aririka añaawakagaeyaani aapatziyawakaaperoeyakani, ari aweshiryaakaawakagaeyaani.

<sup>13</sup> Nokowaki piyoteeyeroni, noyemijantzinkarite, osheki nokowapi-intawitaka niyaatashiteeyemini, omaanta tee ikowakaana Tajorentsi niyaatashitemi. Nokowawita namitakoeyeminimi, nokimitaaikiromomitakoeyakirini paashinijatzitsiriatziri janta paashinikipaeninampitsi riyotaaperotakiri Tajorentsi

<sup>14</sup> Nokowaperotaki nokenkithatakapiinteri kireeshiyajatzi, riraga yotawitachari eejatzi paashinipaeni atziri; tema nokenkithatakapiinteri

maawaeni riroripaeni: riraga yotawitachari eejatzi riraga kaari yotatsi. Tema rotyaantakina Tajorentsi nokenkithatakagaeyerini maawaeni.

<sup>15</sup> Rootaki nokowaperotantakari nokenkithatakagaeyemini eerokapaeni jaga Oroomaki eejatzi.

### *Ikowaki Tajorentsi rowawijaakoteri maawaeni atziri*

<sup>16</sup> Tee nopashiwenta nokamanteeyirini atziri tsika ikanta Jesokirishito ikaminthagaeyakaeni. Itajonkawenteri Tajorentsi maawaeni aapatziyeyayaririni, rowawijaakoeyerini. Ritakari riyotaakiri joriyopaeni, eejatzi iroñaka riraga kaari joriyotatsi.

<sup>17</sup> Ñaakiro, aririka ameentaperotakyaari Jesoshi, iñaaperoeyakaeni Tajorentsi akameethatzhi. Tema paerani rojankinatakaakiri irira riraga Awakookoni: “Iñaaperoeyerini Tajorentsi ikameethatzhi maawaeni ameentariri kameetha ijeekanteeyaari janta jenokinta”.

### *Ikijeri Tajorentsi maawaeni theenkantatsiri*

<sup>18</sup> Riraga Tajorentsi jeekatsiri jenokinta, riyotakagaeyakaeni ikijakiri maawaeni kaari aapatziyari, eejatzi maawaeni antapiintzirori kaari kameethatatsi, eejatzi riraga maawaeni kaari kowatsi raapatziyawo iroka kameethatatsiri.

<sup>19</sup> Ikowakirkami riyoteeyenimi tsika ikantari Tajorentsi, aritaki riyoteeyakinimi. Tee opomeentsitzimotawitari, tema riyotagaeyawitakarini.

<sup>20</sup> Paerani okoñaataki maawaeni riwetsikaeyakirini, ayoteeyantakarini eenitatsi Tajorentsi, eejatzi eenitatsi itajorenka. Koñaataperotaki. Tekatsi ikanteeyaani theenkantatsiri ikanteeyen: “Tee niyotakotziri Tajorentsi”.

<sup>21</sup> Tema riyoteeyawitaririni, omaanta tee ipinkathateeyirini. Ikmintahaapiinteeyawitarini riraga Tajorentsi, omaanta tee ipaasonkitteeyirini riroripaeni. Tee ikenkithashiryaaagaeyani: ratsipetashitakawo ikenkithashiryaaashitakawo oetarikapaeni ikoyiri rirori; rootaki iroñaka kaari añaantawo riyotantari.

<sup>22</sup> Omawitya ikanteeyawitani: “Osheki niyotzi naaka”, omaanta tee riyotziri.

<sup>23</sup> Ikameethaperotaki Tajorentsi, ikantani ijeeki jenokinta. Omaanta tee ipinkathateeyirini atziripaeni, inta iitajorentsitsashiteeyakarini tsimeripaeni, oretsi, maanki, maawaeni: eejatzi iitajorentsitsashiteeyakawoni riwetsikanewopaeni ikimitakaantakari atziri eejatzi paashinipaeni oetarikapaeni.

### *Rowashironkagaeyirini Tajorentsi kaari aapatziyariri*

<sup>24</sup> Osheki ikowaeyakini atziri ikenkithashiryaaapiinteeyakironi kaari kameethatatsi, iñaathatapiinteeyawoni tsinani; rootaki ikanantari Tajorentsi: “Ari ikantakaata, tee ikoyi ikemi, ranterooota”.

<sup>25</sup> Ari paerani ryoperoeyawitarini tsika ikanta Tajorentsi, omaanta ramatawiteeyaaani apaniroeni. Ipinkathashiteeyakawoni maawaeni riwetsikaeyirini Tajorentsi, iitajorentsitsashitari. Omaantakya riraga wetsikaeyirorini, tee ipinkathateeyirini irira. Omaanta aaka thame añaaperoeyerini rirori, akanteetatyeyaaani. Aritaki okantyaari.

<sup>26</sup> Rootaki ishinetantariri Tajorentsi riraga kaari joriyio ranteeeyironi oetarika ikowaeyakirini. Tee okoyi tsinani aye oemi, omaanta okowaki antatenkatawakaeyani okaateeyini otsinaninkaeletki.

<sup>27</sup> Eejatzi ikimitzitaka riraga shirampari: tee ikoyi raye iina, omaanta ikowaki rantatenkatawakaeyani ishiramparinkaetki. Oetarikapaeni ranteeeyakirini, omaanta tee riyotzi ipashiwentakayaawo. Ari rowashironkaeyakirini Tajorentsi.

<sup>28</sup> Ari tee ikowaeyini ipinkatheeeyerini Tajorentsi eejatz ikenkithashiryaakotaari rirori, rootaki ikanantakari Tajorentsi: "Ikantyaata. Ikenkithashireeyaawoota kaari kameethatatsi, eejatz eero ijekimaeta kameetha".

<sup>29</sup> Rantapiinteeeyakironi kaari kameethatayitatsirini: ashi royiro tee ikameethateeyini, ishirontawo kaari rayi, oshirontari kaari ayi, inaawenatzitakari atziri rashitayitarini, ikowaki rowashironkaayiterini paashinipaeni, ikowawitaka ikimitakotaari paashinipaeni rootaki iki-jawakaanteeeyakarini, rowamaawakagaeyakan, ikijathatawakagaeyakan, ramatawitantiinteeeyini, ikatsimatawakagaeyakan, ikantakotantashita maaawaanteri riroripaeni,

<sup>30</sup> itheeyakotawakagaeyakan, ikijeeyakirini Tajorentsi, rakawaante-teeeyakirini paashinipaeni, ikantakaaperoeyani, ikantashiteeyawitani, "Naakapero", ikowakowayitakini ranteeeyeroni paashinipaeni kaari kameethatayitatsini, ipiyatheeeyakarini ashiteeyaririni,

<sup>31</sup> tee añeeyironi ryoteeyantarini, tee imonkaateeyironi oetarika ikanteeyawitarini, tee inintawakagaeyaani, tee ryotzi ipeyakoteniri paashinipaeni okaatzi rantziri, tema tee ineshironkatawakagaeyaani.

<sup>32</sup> Riyoteeyawitawoni ikantziri Tajorentsi: "Maawaeni antapiinteeeyirori kaari kameethatatsi riyaateeyeni paamariki kaari tsiwakanitatsini", omaanta rothataashiteeyani ranteeeyeroni eejatz inimotakiri paashinipaeni antzirori iroka kaari kameethatatsi.

## 2

### *Riraga joriyo eero rawijakotashiteeyaan omawitya rirotaki joriyo*

<sup>1</sup> Naamaaka ijeki joriyo kantsatsiri: "Ñaa, okantateekirira ikemawaki-roota, tee ikameetheeyeni". Omaanta nokamantemi: kyaaryoowa, aririka pikantakoteri paashinipaeni atziri: "Eeniro rantani", eejatz eerori eeniro pantani, pikimiteeyakarini riraga pikantakotawitakarira.

<sup>2</sup> Ayoteeyakini okameethatzi rowashironkagaeyirini Tajorentsi riraga antzirori kaari kameethatatsi. Tema ryotakotziri maawaeni atziri okaatzi rantziri.

<sup>3</sup> Omaanta eerori, pikantzi: "Eeniro rantanipaeni irinta", eejatz pikimi-teeyakarini, pantapiinteeeyakironi eerori kaari kameethatatsi. ¿Piitashitama eerori eero rowashironkaeyimini Tajorentsi? Tema ryoperotakiro okaatzi rantziri maawaeni atziri.

<sup>4</sup> Pamine, osheki ineshironkateeyakimini, ikaminthaaperoeyakimini, tee intsipaete roonimi: ojamani royaakoeyawitakimini pikenkithashireeyaneeyanimi pookaeyeronomi kaari kameethatatsi panteeeyirini. Omaanta, tee pookaeyironi.

<sup>5</sup> Tee pikenkithashiriio ikantziri Tajorentsi, tee pikoyi pikenkithashireeyaan. Eekiro piyaatatzi pantapiinteeeyironi kaari kameethatatsi, rootaki rowashironkawenantemiri rirori. Kyaaryo, iinja ikijaperoeyerini maawaeni antzirori kaari kameethatatsi. Omaanta ayoteeyanakini ikameethaperotzi rirori, eero ikijashitari atziri, ryoperotakiri maawaeni, tsikarika ikanteeyani.

<sup>6</sup> Rowashironkaeyerini maawaeni kaari kameethatatsi, omaanta ijekak-agaeeyerini kameetha janta jenokinta maawaeni kameethateeyatsirini.

<sup>7</sup> Aririka akowaperote añagaeyerini Tajorentsi eejatz akowaperote akameethaperotanaki, eejatz akowaperote akanteetatyeyaan ajeеке jenokinta, thame akyaryoowenteeyeroni maawaeni ikowaka-gaeyakaerini. Roojatzi ijekakagaeyeeni jenokinta, akanteetatyeyaan ajeekimotapera.

<sup>8</sup> Omaanta riraga kaari kameethatatsi, kaari kowatsi riyotero ikowakaawitariri Tajorentsi inta ikowashiteeyani rantapiintero kaari kameethatatsi, tema ikijaperooyerini rirori, rowashironkaaperooyerini.

<sup>9</sup> Imonkaatawakagaeyaani joriyyo ejatzti kaari joriyyotatsi: aririka ikantyaani rantero kaari kameethatatsi, ari rashironkagaeyaani, rowashironkaeyerini Tajorentsi.

<sup>10</sup> Omaanta maawaeni antapiintzirori kameethatatsiri iñaaapaeri Tajorentsi jenokinta, iñaaaperotawaeri rirori, ijeekakagaayerini kameetha: joriyyopaeni, kaari joriyyotatsi, maawaeni. Amonkaatawakagaeyakaani.

<sup>11</sup> Riraga Tajorentsi tee rinashitakagaeyarini paashinijatzipaeni atziri: ryotzi akimitawakagaeyakanı maawaeni.

<sup>12</sup> Riraga paashinijatzitatsiri atziri tee iñiilo rojankinarini Moeseeshi, omaanta eeniro rantayitzirini, ejatzti ryaate paamariki kaari tsiwakanitatsini. Omaanta eero ikantziri Tajorentsi: “¿Itaka kaari paapatziyawantawo rojankinatzirini Moeseeshi?” Omaanta riraga joriyyopaeni iyotawitawori rojankinarini, eeniro rantayitzirini, ejatzti ryaate rirori paamariki kaari tsiwakanitatsini; ari rowashironkaaperooteri Tajorentsi, ikanteri: “Tee paapatziyaperotawoni iroka rojankinatzirini Moeseeshi”.

<sup>13</sup> Eero iñaaoperotashitari Tajorentsi ikameethatzi riraga kemashiteeyawitaworini iñaaani, intakya iñaaoperotaperoeyini ikameethatzi riraga aapatziyaperotawori iñaaani: tema rootaki ikowakaakiriri.

<sup>14</sup> Paminerri riraga paashinijatzitatsiri atziri, tsika ikanteeyani. Tee iñaawitawo Iwaperite Tajorentsi, omaanta apaanipaeni eeniro rantayitakironi okantayitzirini. Ñakiro, ryotashitayitani ijeeki kameetha.

<sup>15</sup> Aririka ijeeki kameetha, ayoteeyakini ryotawitawo rirori okantziri Iwaperite Tajorentsi. Eeniro ikenkithashiryakaari Tajorentsi rajankaneki: ryoteeyakini okameethatzirika ranteeyirin, rooma teerika.

<sup>16</sup> Iinja ikanteri Tajorentsi riraga Jesokirishito: “Eeroka yotzirori tsikarika okantari ranteeyakirini atziripaeni, pithotyakiro maawaeni ikenkithashireeyirini. Iroñaaka eeroka kantakoterini tsikarika ryaateeyeni. Eeroka kantatsini aririka añaaperoteri ikameethatzi, aririka owashironkayeri”. Rootaki nokamantteeyiririni naari, ikenkithashireeyantyarini, rowawijaakoeyanteyayarini.

### *Riraga joriyyo ejatzti kaminagaantsi Tajorentsi*

<sup>17</sup> Omaanta, eerokarika joriyyo, kyaaryoowa. Pikantzikari: “Niyotziro naaka rojankinarini Moeseeshi. Nosheninkataperotakari naaka Tajorentsi”. Pikantakaaperotakarira.

<sup>18</sup> Piyoteeyironi ikowakagaeyakaerini Tajorentsi. Paerani piyotawitakawonIwaperite Tajorentsi, rootaki piyoteeyantawitakaworini kameethatayitatsiri.

<sup>19</sup> Iroñaaka piitashiteeyawitani pimatero piyotakagaayerini maawaeni kaari yoteeyatsini okaatzi ikowakaakimiri Tajorentsi. Kimiwitaka poorentakoeyerinimi maawaeni jeekaeyatsirini tsiteniriki,

<sup>20</sup> piyotakagaayerinimi maawaeni kaari yoteeyatsini, okimiwitaka piyotakoeyerinimi eentsipaeni. Kyaaryo piyoteeyawitawoni Iwaperite Tajorentsi, tema kameetha ryotaawitakimi, tee amatawitanzi.

<sup>21</sup> Pamine, piyotagaayerinimi paashinipaeni, omaanta, ¿itaka kaari pitantawo piyoteeyaa erori? Tema okameethatwita piyotaawakagaeyaanimi erori. Eeniro pikanteeyawitakaririni paashinipaeni: “Eero pikoshitzi”. Roojatzi pantzitanakawo erori pikoshitzi.

<sup>22</sup> Pikanteeyawitarini: “Eero piñaathatzimotawo piina paashini tsinani”. Roojatzi pantzitanakawo erori, eeniro piñaathatzimotawo piina paashini

tsinani. Pikanteeyawitarini: "Eero piitziro piwetsikani: 'Rootaki Tajorentsi'. Kaarimachee". Aririka poonari iitajorentsitsahitari, ḡiitaka pikoshitanta-wori ashi owaagwo ikemijantapiinteeztinz?

<sup>23</sup> Pikantakaaperoeyakan, pikanteeyawitan: "Niyotziro naaka iñaani Tajorentsi". Omaanta teerika pimonkaatayitzironi okantayitzirini, tema pitheenakiri Tajorentsi.

<sup>24</sup> Eenitatsi iroka rojankinateetziniriri paejatziieni: "Eeniro rantayi-takirini ajoriyyotzinkarite kaari kameethatatsi, rootaki ikantzimateeyan-takaririni Tajorentsi riraga kaari joriyyotatsi, ikanteeeyini: 'Tee ikameethatzi Tajorentsi, eero aapatziyari'".

### *Tee rinashitayitarini Tajorentsi joriyyopaeni*

<sup>25</sup> Pamine, aririka pikemijantaperotero iñaani Tajorentsi, tee patsipetashitawo pijoriiyotzi, tema piyotakiri rirori. Omaanta teerika pikemijantaperotziro, patsipetashitakawo pijoriiyotashitawita.

<sup>26</sup> Aririka rantapiintero kameethatatsiri kaari joriyyotatsi, tema iñaaperoteri Tajorentsi rirori ikameethatzi. Ikimitakaanteyari joriyo, aapatziyariri Tajorentsi rirori.

<sup>27</sup> Eerokarika joriyo, piyotawitaworka rojankinarini Moeseeshi; omaanta teerika pikemijantaperotziro, ḡokameethatzima? Teewee, tee okameethatzi. Paminerri riraga kaari joriyyotatsi: tee iñaaneentziro Iwaperite Tajorentsi, omaanta aririka ijeki kameetha, rantakiro ikowakaakiriri Tajorentsi. Tema okameethaperotzi iroka. Eejatzi tema roñaagakiri paashinipaeni tee pikameethatzi eerokapaeni.

<sup>28</sup> Kaari joriyyopero riraga kaari aapatziyarini Tajorentsi. Eejatzi tee okameethatzi itotonawitakyaarika ishiramparitantari, teerika raapatziyari rirori. Ratsipetashitakawo itotonatziro.

<sup>29</sup> Omaanta riraga joriyyoperotsatsi rirotaki riraga kenkithashiryaapi-intziriri Tajorentsi rajankaneki rootaki okithaatakaantariri Ishire Tajorentsi. Tee ro iñaaperotantariri itotonatzirowa ishiramparitantari, omaantakya iñaaperotantariri raapatziyakari. Eerorika iñaaperotziri atziri, omaantakya riraga Tajorentsi rirotaki iñaaperoterini.

## 3

<sup>1</sup> Naamaashitaka pikantzi: "¿Natsipetashitama nojoriyyotaki? ¿Natsipetashitama nototonatziro noshiramparitantari?"

<sup>2</sup> Tee patsipetawitawo pijoriiyotzi. Tema irira joriyo riyotaakiri Tajorentsi iñaani.

<sup>3</sup> Kyaaryo, tee raapatziyeyarini maawaeni, eenitatsi amatawiterinimi Tajorentsi. ḡArima ramatawitakiri Tajorentsi riraga aapatziyariri?

<sup>4</sup> Eero ramatawitziri. Omawitya ramatawitanteeyeeni maawaeni atziri, omaanta Tajorentsi tekatsi ikanty ramatawiteeyenee rirori. Tema paerani rojankinatzini Iraviri, ikantzi: "Kyaaryooperotaki, Tajorentsi, piñaani: tee pitheeyaa. Tekatsi ikanty atziri ipiyatheeeyemini".

<sup>5</sup> Naamaashita eeniro ijeki kantashitachari: "Aririka nantero kaari kameethatatsi, roojatzi ryoteeyantanakyaani paashinipaeni ikameethaperotaki Tajorentsi, tee ikimitana naari. Roojatzi aririka ipinkatheeeyerini, ḡiitaka iroñaka ikijawenantenawori Tajorentsi kaari kameethatatsi nantayitzirini? Tema rootaki ipinkathantyaariri paashinipaeni". (Iroñaka nokenkithatziro kimitariri kaari aapatziyariri Tajorentsi.)

<sup>6</sup> Tee okameethatzi iroka raamaayiwitakarini. ḡArima ramatawitakae Tajorentsi? Eero. Iantzi rotyaanteri antapiintzirori kaari kameethatatsi

paamariki kaari tsiwakanitatsini. Eeromi rantziromi iroka, eeromi imatziromi ikantakoneentawomi paashinipaeni atziri.

**7** Ñaakiro, ¿okameethatzima notheeya niyotakaantyaariri atziri tee itheeya Tajorentsi, roojatzi ipinkathatantyaariri? Teewee. Aririkami okameethatemi notheeya, eeromi ikijawentanawomni Tajorentsi notheeya. Omaanta, tee okameethatzi iroka ikantziri.

**8** ¿Okameethatzima antapiintero kaari kameethatatsi ikimoshiryaantyaari Tajorentsi? Teewee, eero antziro. Okameethatzzi rotyaante akaa Tajorentsi paamariki kaari tsiwakanitatsini kantashitayitaworini iroka, ñaa, okantateeteri iinja iñaashitateetyawaoota. Omaanta eeniro kantakotashitaki-nari: "Riyotaakiri Paaworo paashini atziri rantero kaari kameethatatsi". Itheeyashita rirori.

### *Aakapaeni maawaeni anteeyakironi kaari kameethatatsi*

**9** Pamine, aakapaeni joriyo. ¿Okameethatzima akante: "Tee ikameethateeyeni paashinipaeni atziri, omaantakya akaa kameethateentsiri?" Tee okameethatzzi akantero iroka. Tema amonkaatawakagaeyakan, eenitatsi antanipaeni maawaeni: aaripaeni, eejatzi riraga paashinijatzitsiripaeni atziri.

**10** Tema aritaki okantzi Iwaperite Tajorentsi: "Tee ijeki kameethaneen-tatsini apaani.

**11** Tekatsi kowatsini riyoteri Tajorentsi, eejatzi tekatsi kowatsini riyotero ikowakaawitariri.

**12** Ipiyathateeyakarini Tajorentsi maawaeni, ranteeeyironi maawaeni kaari kameethatatsi. Tekatsi antzirori kameethatatsiri, tekatsipero.

**13** Tee okameethatzzi iñaawaetashitayitarini. Osheki otheeyakaari ineni. Os-heki ikijathateeyirini paashinipaeni, ikimiwitakari maanki koweenkatatsiri atsikantaniri.

**14** Osheki ikatsimatakiri paashinipaeni, ikijathatapiinteeeyakirini.

**15** Eejatzi rametakawo rowamaayitashitakarini atziri.

**16** Tsikarika riyaatayitakini, rowashironkaayitakirini paashinipaeni.

**17** Tee riyotziro ikaminthante, ineshironkatante, ijekantyaari kameetha.

**18** Tee ipinkathateeyirini Tajorentsi". Rootaki rojankinatakainiriri Tajorentsi maawaeni atziri paeraniperoroña.

**19** Ayoteeyakini iroñaaka rashironkaaperota maawaeni yoteeyaw-itaworini rojankinarini Moeseeshi. Riyoteeyawitakawoni oetaka ikowakaakiriri Tajorentsi, tekatsi kanteeyatsini: "Tee niyotzi". Tema rowashironkagaeyerini maawaeni atziri antzirori kaari kameethatatsi.

**20** Tekatsi ikante atziri: "Nanteeyakironi maawaeni okantziri rojankinar-ini Moeseeshi, iroñaaka iñaaperotena Tajorentsi nokameethatzzi". Teewee, tee imatziro. Tema rootaki Rojankinarini Moeseeshi iyotagaeyakaerorini eeniro antani.

### *Rowawijaakoeyakirini Tajorentsi maawaeni aapatziyariri Jesokirishito*

**21** Iroñaaka nokamantemi: riyotagaeyakaeni Tajorentsi tsika ikantya iñaaperotanteeri akameethatzzi. Riraga Moeseeshini eejatzi riraga kamanan-tayitzirorini iñaani Tajorentsi rojankinatzakaero ipoke Itomi Tajorentsi ikamawentakae rowawijaakotanteeri. Tee ro ikamanteeri amonkaatero Rojankinarini Moeseeshi,

**22** omaanta ikamanteeyakaeni aririka aapatziyakaari Jesokirishito, iñaaperoyakaeni Tajorentsi akameethatzzi. Aritaki amonkaatawaka-gaeyakan, aakateeyakini joriyo eejatzi paashinijatzitsiri atziri:

<sup>23</sup> tema eeniro anteeyakironi kaari kameethatatsi, maawaeni. Tee anteeyironi kameethatayitatsirini ikowakagaeyakaerini Tajorentsi.

<sup>24</sup> Ikamawentakae Jesokirishi rootaki aririka aapatziyeyakarini irira, rowawijaakoeyakaenii Tajorentsi, iñaaperoyakaenii akameethatzi. Tema ineshironkateeyakaenii: tee ikenkithashireeeyeeyaawoni eejatzi kaari kameethatatsi anteeyakirini.

<sup>25-26</sup> Rotyaantakiri Itomi, ikamawentakae, apaatawenteeyakaenii riraa. Iroñaka, aririka aapatziyakyaari, monkaataka, eero ikenkithashiryagaawo eejatzi anteeyakirini. Eejatzi paerani, tekiraatani ipokini jika kipatsiki Jesoshi, tee rowashironkagaeyirini Tajorentsi riraga aapatziyariri. Riyotzitani iinja ikamawenteeyerini riraga Itomi. Rootaki ayoteeyantakarini ikameethaperotaki Tajorentsi eejatzi iñaaperoyakirini maawaeni aapatziyeyayaririni Jesoshi ikameethatzi.

*Tekatsi akantya aari akantakaaperotya, eero amatziro owawijaakoteeya apaniroeni*

<sup>27</sup> Iroñaka tekatsi akantya akantakaaperotya. ¿litarikya? Tema tekatsi akantya owawijaakoteeya apaniroeni. ¿litaka kaari amatantawo? Tema aapatziro Tajorentsi rowameethathee aakapaenii riraga aapatziyariri Jesoshi.

<sup>28</sup> Ñaakiro, aririka aapatziyakyaari Jesoshi, rowameethathee Tajorentsi. Tee ikanteeyeenii: "Pimonkaateeyeroni rojankinarini Moeseeshi pawijakoeyanteeyaarini".

<sup>29</sup> ¿Apaniroenima rowawijaakoeyirini Tajorentsi joriyo? Teewee, tema eejatzi rowawijaakoeyakirini paashinijatzitatsiri atziri.

<sup>30</sup> Apintzi Tajorentsi, ikaminthagaeyakaenii maawaeni. Riyotaki amonkaatawakagaeyakanii. Aririka raapatziyakyaari joriyo, riraga Jesoshi rowawijaakoteri. Aririka raapatziyakyaari irira paashinijatzitatsiri atziri, rowawijaakoteri eejatzi. Roojatzi iñaakiri riraga Tajorentsi ikameethatzi maawaeni.

<sup>31</sup> Aririka aapatziyakyaari Jesoshi, ¿okameethatzima ookaero Iwaperite Tajorentsi? Teewee, eero ookaero. Aririka aapatziyakyaari, rootaki anantyaawori okamanteeyakaerini.

## 4

### *Roshiyakaavenantzi Awaraamani*

<sup>1</sup> Piyoteeyakini tsika ikantani achariniiteniperoni Awaraama. Iroñaka nokamantemi:

<sup>2</sup> tee rowawijaakotaa apaniroeni. Rowawijaakotyami apaniroeni, imateromi ikantakaaperotyaami, ikantemi: "Osheki nokameethataki, nawijakotantaari". Omaanta tema riyotaki Tajorentsi tee ikameethatzi Awaraamani.

<sup>3</sup> ¿Oetaka okantziri Iwaperite Tajorentsi? Tema okantzizi: "Raapatziyakaarini Awaraama Tajorentsi, rootaki iñaaperotantaririni ikameethatzi".

<sup>4</sup> Noshiyakaawentemiri: eenirorika thamaetenirini iwaatorote, tema okameethatzi ipinateri. ¿Okameethatzima ikanteri: "Irika, korikika, nopashitzimirira"? Tee okameethatzi: tema ipomeentsitananari ithamaetziniri.

<sup>5</sup> Omaanta riraga Tajorentsi, rinashita: eerorika antayitzironi kameethatayitatsirini, omaanta ameentyaaririka Tajorentsi, aritaki rowameethathee yakaenii, iñaakae akameethatzi. Eero apomeentsiwentari apinateri.

**6** Ñaakiro, tektsi antaperote rowameethatanteeri Tajorentsi, omaanta riweshiryakaagaeyeenii, aririka aapatziyari ari iñaaperotakae akameethatzii. Tema rootaki ikantakirini Iraviri:

**7** "Ikimoshireeyakini maawaeni atziri riraga ikamintheeri Awinkatharite, Eero ikenkithashiryaaaneero eejatzi kaari kameethatatsi rantayitzirini.

**8** Kyaaryo, ikimoshiryaaperotanaki, riyotaki eero ikijawentziri riraga Awinkatharite rantayitzirini".

**9** ¿Ninka ikenkithatakotziri Iravirini? ¿Apaniroenima ajoriiyotzinkarite? Tema ikenkithatakotziri eejatzi maawaeni paashinijatzitatsiri atziri. Tema ayoteeyakini raapatziyakari Awaraamani, rootaki iñaaperotantakariri Tajorentsi ikameethatzii.

**10** Omaanta ¿tsika okaatzika iñaaperotantakariri Tajorentsi ikameethatzii? Tema tekirani ijoriyyotzini, tekirani itotonatzironi ishiramparitantari.

**11** Ñaakiro, tekirani itotonatzironi rameenttarini Tajorentsi, rowameethatantariri. Roojatzikya itotonatzironi, riyoteeyantakarini atziripaeni ritakawo rameentakari Tajorentsi rootaki iñaaperotakiri irira ikameethatzii. Iroñaka ayoteeyakini aritaki ikimiteeyaaarini rirori paashinijatzitatsiri atziri: eero iitashita itotonatero iñaaperotantyaariri Tajorentsi ikameethatzii, omaantakya rameentzitakarini irira. Tema riraga Awaraamani rivotaki itaperotakawori rameentakari rirori.

**12** Eejatzi ikimiteeyaaarini maawaeni atziritzinkarite aari, aririka rameentyaari Tajorentsi. Eero iitashita aririka itotonatero, ari rawijakotee, omaanta okameethatzii rameentyaari rawijakotanteeyaaari. Ikimityaari achariniiteni Awaraama, tekira itotonatzironi ishiramparitantari paerani rirori.

### *Eenitatsi iroka ikashiyakaakaririni Tajorentsi Awaraamani*

**13** Ari rameentashitakari Awaraamani Tajorentsi, rootaki iñaaperotantakariri rirori ikameethatzii, roojatzi ikantakiri: "Nokowakaakimi iinja paawakiro okaatzi nokashiyakaakirini maawaeni jeekatsiri kipatsiki". ¿litakaikanantaririni iroka? ¿Imonkaatayitakironima rojankinarini Moeseeshi? Teewee, tekirani ojeekini. Ro ikanantakarini, rameentakarini.

**14** Apatzirorikami iñaaperoterimi Tajorentsi riraga kowawitachari imonkaateromi rojankinarini Moeseeshi, tema ramatawitakirimi Awaraamani okaatzira ikantakiriri. Eero okameethataneemi rameentawitakarira.

**15** Rowashironkagaeeyerini Tajorentsi maawaeni kaari monkaaperotzirori rojankinarini Moeseeshi, ikijiri. Omaanta eerorikami otzimimi rojankinarini Moeseeshi, tekatsimi okantya ikijawenterimi Tajorentsi.

**16** Aririka ameentyaari Tajorentsi, tema imonkaatakiro ikantakaeri. Kyaaryo, ineshironkaeyakirini maawaeni kimitteeyayarini Awaraamani. Tee apaniroeni ineshironkaeyerini joriyo, omaanta ineshironkaeyakirini maawaeni aapatziyariri. Tema rivotaki Awaraamani itakawori raapatziyari; aririka aapatziyari aari, akimiteeyaaarini irira.

**17** Tema ikantakirini paerani Tajorentsi: "Eerokataki itaperotakaworini, impaetzikya ikimiteeyemini osheki paashinijatzitatsiri atziri". Rivotaki Tajorentsi kijokiro rowakiri Awaraamani tema rameentakari. Eejatzi rowañagaeri kamayitawiteencharini, tema rirojatzi tzimakagaeyirorini maawaeni añeyakirini.

**18-20** Riyotakotaka Awaraamani antyashiparitaki, rootzimateentsi ikame. Aamaashitya okaataki rojarentsite 100. Eejatzi rivotaki iina antyashipawotaki, eejatzi tee iyotzi otzimeri eentsite. Tekatsi

reentsite omaanta ikashiyakaakari Tajorentsi: "Aritaki roshekitaki picharineetaperoeyaarini". Omaanta tee itheenkiri Tajorentsi, riraga Awaraama ikenkithashiryakiro ikantakiriri, riyoperotaki kyaaryo ikantakiriri, imonkaatero maawaeni. Tekirani ijekini ichariniitenipaeni, raapatziyakari Tajorentsi eejatzi riweshiryaaawentakari, ikantzi: "Tema ikameethataki Tajorentsi".

<sup>21</sup> Riyoperotzini eenitatsi itajorenka, tekatsi pomeentsitzimotaarini; riyoperotzini rantero maawaeni ikantakiriri.

<sup>22</sup> Rootaki ikanantakari Tajorentsi: "Rameentakina Awaraama, rootaki noñaaperotantariri ikameethatz".

<sup>23-24</sup> Rootaki ikantakiririni Awaraamani, eejatzi iroñaaka ikanteeyakaerini aari; ayoteeyakini aririka ameentyaari Tajorentsi, iñaaperoeyakaeni akameethatz, ikimitakaanteyakaerini tee antziro kaari kameethatatsi. Tema rirotaki piriinteeriri Awinkatharite Jesoshi.

<sup>25</sup> Eeniyo anteeyakirini kaari kameethatatsi, rootaki ikamawenanteeyakaerini Jesoshi. Roojatzi ipiriintanaa eejatzi, rootaki ayoteeyantakarini maawaeni iñaaperoeyakaeni akameethatz maawaeni aapatziyariri rirori, okimitaka tee antapiintziro kaari kameethatatsi.

## 5

### *Iñaaperoeyakaeni Tajorentsi akameethatz, ayoteeyantakarini ajeeke jenokinta*

<sup>1</sup> Ari ikamawenteeyakaerini Awinkatharite Jesokirishito, rowawi-jakoeyantakaerini. Iroñaaka ameenteeyakawoni maawaeni ikantakaeri Tajorentsi, rootaki iñaaperoeyantakaerini akameethatz, okimitaka tee antziro kaari kameethatatsi; rootaki iroñaaka raakameethanteyakaerini maawaeni.

<sup>2</sup> Kyaaryo aapatziyakari Jesoshi, rootaki ineshironkatantakaeri Tajorentsi, ikantatyaaani. Osheki aweshiryaaawentakari, ayoteeyakini añeeyeerini janta ipinkatharitaperotzinta.

<sup>3</sup> Eejatzi, aririka akemaatsityaawo oetarikapaeni, kameetha aweshiryaaawentyaari Tajorentsi. Ayoteeyakini aririka akemaatsityaawo, iyotaakaero eshiwenantyaawori oetarikapaeni.

<sup>4-5</sup> Eejatzi aririka eshiwentakiro, ramitakotakae Tajorentsi akyaryooawentakiro antawaetziniri rirori. Aririka akyaryooawentakiniri oetarikapaeni, ayotanaki ameentakawo ikantakaeri, eejatzi ayotanaki tee ramatawiteeyeeni. Tekatsi ikantte ramatawiteeyeeni, tema rotyaantakaero Ishire okithaatakaakae, rootaki iroñaaka inintaperoeyantakaerini kameetha. Aweshiryaaawentakari.

<sup>6</sup> Ñaakiro, paeran ashironkaaperoeyakan, tekatsi akantya owawijaakotashitya aaka apaniroeni. Roojatzi omonkaatantakari kitejiri ikowakiri Tajorentsi, ipokaki Jesoshi. Tee apinkathatawitarini, omaanta ikamawenteeyakaerini.

<sup>7</sup> Ari tekatsi añaapiinte paashini atziri kowatsini ikamawenteri paashinipaeni kameethatsiri, rowawijaakotantyaariri. Omaanta eenitatsirika kameethaperotatsiri atziri, aamaashitya eenirorika apaanipaeni kamawentziriri rirori.

<sup>8</sup> Omaantakya aaka tee akameethateeyini, omaanta rotyaantakiri Tajorentsi Itomi riraga Jesokirishito ikamawenteeyakaerini. Tema rootaki ayoteeyantakarini ineshironkaperoeyakaeni, inintaperoeyakaeni.

**9** Apaatawentakae riraa, ikamawenteeyakaeni. Tema ameentakari rootaki iroñaaka iñaaaperotantakaeri Tajorentsi akameethatzi, okimitzimotawitakari tee antziro kaari kameethatatsi. Iinja, ikijeri Tajorentsi maawaeni antapiintzirori kaari kameethatatsi, inta aaka, aritaki rowawijaakoeyakaeni.

**10** Paerani akijawitarini Tajorentsi, omaanta ikamawenteeyakaeni Itomi, iroñaaka apinkathatakiri rirori; eejatzi irira, iñaaaperotakae akameethatzi. Iroñaaka eero rapiitero ikamae eejatzi Jesoshi, inta ikantyaani rañaaperotee, imatantawori itajonkawentapinteeyakaeni iroñaaka.

**11** Kaari apatziro iroka, inta eejatzi ayoteeyakini aapatziyakari Awinkatharite Jesokirishito, rootaki iñaaperoeyantakaerini Tajorentsi akameethatzi. Tema rootaki aweshiryaaawenantariri iroñaaka.

*Rantakiri Araani akamantyaari omaanta rantakiri Jesokirishito  
añaantyaari*

**12** Paerani ritakaantakawo kaari kameethatatsi apaani atziri, riraga Araani; rootaki ikamantakari rimpaezti. Eejatzi akimiteeyakarini aaka eejatzi riraga maawaeni paashinipaeni atziri: anteeyakironi kaari kameethatatsi, ashi owaeyanakironi. Rootaki iroñaaka akamaniteeyantarini aari maawaeni: ashi oyiro akamaeyini maawaeni.

**13** Paerani tekirani ojeekini rojankinarini Moeseeshi, rantapiinteeyakironi atziri kaari kameethatatsi. Omaanta tekira riyotaperoeyironi kameetha oetaka ikowakagaeyakiririni Tajorentsi: ñaakiro, tekirani ojeekini rojankinarini Moeseeshi.

**14** Omaanta eekiro ryaatananakitzi ikamaeyanakini maawaeni atziri, ritakaantakanawo owakira tzimajaantaneentsiri, riraga Araani, roojatzi ijekantapaaka Moeseeshini. Omawitya tekiraata otzimi kaminagaantsi rashì Tajorentsi, tema riraga anteeyakirorini kaari kameethatatsi ikamaeyakini, omawitya rantakiro inashitapaeni kaari kameethatatsi. Tema owamagaeyakirini okaatzi ranteeyakirini. Riraga Araani roshiyawitakari riraga pokapaentatsiri rimpaezti,

**15** omaanta rinashitaka rirori eejatzi. Eeniro rantakiri Araani akamaeyantakarini aakapaeni. Omaanta ikamintaaheroeyakaeni Tajorentsi, tee ikoyi ikijawentaperoteero antayitzirini, rootaki rotyaanantakariri pokapaentatsiri: riraga Jesokirishito.

**16-17** Iroka rantakiri Araani owamagaeyakirini osheki atziri, omaanta iroka rantakiri Jesokirishito owañagaeyakirini osheki atziri. Tema ikamawentakae maawaeni aaka, rootaki iroñaaka ineshironkataperoeyirini Tajorentsi rirori, tee ikenkithashiryaakoteero anteeyakirini, omaanta iñaaiperoteeyakaeni maawaeni aapatziyari Jesokirishito akameethatzi. Rowañagaeyakaeni maawaeni, akanteetatyeyaaani ajeekae jenokinta.

**18** Rantakiro kaari kameethatatsi apaani shirampari: riraga Araani, rootaki maawaeni aakapaeni aateeyantyaarinimi paamariki kaari tsiwakanitatsini. Omaanta eeniro rantakiri paashini shirampari, riraga Jesokirishito. Rootaki imatantawori Tajorentsi iñaaaperotakae akameethatzi, ajeekaeyanteyearini jenokinta, akanteetatyeyaaani.

**19** Tee ikemijantaperotziri Araani Tajorentsi okaatzi ikantawitakariri, rootaki kaari akameethateeyantani. Ikemijantaperotakiri Jesokirishito Iriri, rootaki imatanteyakaerini iñaaiperoyakaeni akameethatzi.

**20** Rojankinataakiri paerani Tajorentsi Moeseeshi ayoteeyantakarini tee okameethatzi iroka anteeyakirini. Tee akameethaneentzi eechonkiini, omaanta osheki ineshironkaeyakaeni Tajorentsi.

<sup>21</sup> Ari tee akameethateeyini, rootaki akamaeyantakarini, omaanta aapatziyeyakarini Awinkatharite Jesokirishito, rootaki ineshironkatanteeyakaerini Tajorentsi. Tee ikijawenteero anteeyakirini, omaanta iñaaperoeyakaeni akameethatzi rootaki akanteetatyeyaaani ajeekimotantapaeyaariri iinja jantajenokinta.

## 6

*Aririka akaawoshitakoeyaarini Tajorentsi kimitteeyakani atsipateeyakarini Jesoshi akamaeyakini eejatzti apiriinteeeyanaani*

<sup>1</sup> Ayoteeyakini ikamawentakae Jesokirishito rookakowentakae eero omperatantanee eejatzti kaari kameethatatsi. ¿Oetaka anteeeyerini iroñaaka? ¿Antapiinteeyeeronima kaari kameethatatsi ineshironkantapiinteeyeerinai Tajorentsi?

<sup>2</sup> Eero. Eero antapiinteeero eejatzti kaari kameethatatsi. Okimiwitaka akamaki, eero amatantawo antapiinteeero kaari kameethatatsi eejatzti. ¿Litaka, ikantantriaapaani kaminkari nantapiinteroota? Eero imatziro.

<sup>3</sup> Aapatziyantakariri Jesokirishito eejatzti akaawoshitawenteeyakarini, kimitaka akaateeyakirini akamaeyakini. ¿Tema piyotziro?

<sup>4</sup> Eejatzti okimitaka akaateeyakirini akitateeyakani, eejatzti okimitaka akaateeyakirini apiriinteeyaani. Iroñaaka ajeekaeyaneenikameetha, akimiteeyakarini Jesokirishito: ikamaki, ikitateetakiri roojatzti itajonkaperoteeri Ashitariri ipiriinantaariri eejatzti.

<sup>5</sup> Iroñaaka akimiteeyakarini Jesoshi. Okimitaka akaateeyakirini akamaeyakini, eejatzti okimitaka akaateeyakirini apiriinteeyananai: añaeyaneenai, omaanta inashiteeyanaani maawaenii aakapaenai.

<sup>6</sup> Paerani osheki akowapiinteeeyini antapiinteeeyironi kaari kameethatatsi, omaanta okimitaka atsipatakari Jesokirishito akentakoeyakanikoroshiki, akamaeyakini: ¿ittakama akowanteeyari eejatzti apitiitiero kaari kameethatatsi? Paerani okimitaka aakateeyakirini ratziritepaeniiwinkatharite kamaaripaenai, rantakaapiintakaero kaari kameethatatsi; omaanta iroñaaka okimiwitaka akamaki, tekatsi ikantya romperatee eejatzti.

<sup>7</sup> Ñakiro, aririka ikame atziri, tekatsi omperateeyaaarini. Iroñaaka aaka, eero anteero kaari kameethatatsi.

<sup>8</sup> Aririka akaateeyakirini Jesokirishito akamaeyakini, ayoteeyini akaateeyerini eejatzti ajeekimoteri janta ijeekinta rirori.

<sup>9</sup> Ayoteeyakini ikamaki, eejatzti ipiriintanaa. Eero rapiiteero ikamae eejatzti: tekatsi ikantteya ikamae eejatzti.

<sup>10</sup> Ikamtakari Jesoshi, ikamawentakiro kaari kameethatatsi anteeyakirini. Monkaatako: eero ikamae eejatzti. Iroñaaka añaanee: kijokiro rowaeri iroñaaka Tajorentsi, ikanteetatyeyaaani.

<sup>11</sup> Eejatzti eeroripaenai, pikimiteeyakani pikamaperoeyakini, eero panantaawo kaari kameethatatsi; omaanta rañaagagaeyemini eejatzti Awinkatharite Jesokirishito tema ijeekanaki pajankaneki, rootaki, piyoteeyantaaririni piweshiryakayaari Tajorentsi.

<sup>12</sup> Tema okimiwitaka pikamaki: eero iroñaaka pantapiinteeero kaari kameethatatsi, eero pikenkithashiriiro roojatzti eero pantziro okowashitari piwatha.

<sup>13</sup> Ari okimiwitaka pikamaki, eero pathaagakotaawo iroñaaka piwatha antakaapiintemiro kaari kameethatatsi. Eejatzti okimiwitaka rowañagaemi Tajorentsi, rootaki pishinetantyaariri rantakaayitemironi kameethatayitasirini.

**14** Eero iroñaaka panteero kaari kameethatatsi. Tekatsi okantya omperatemini pantero oetarikapaeni, tema ikaminthagaeyakimini Tajorentsii, ineshironkateeyakimini.

### *Noshiyakaawentemiri apaani omperateeraarewo*

**15** ¿Litaka anteri iroñaaka? Ayoteeyakini tekatsi omperateeyeenii eejatzi ayoteeyakini ineshironkatapiinteeeyakaeni Tajorentsii. ¿Okameethatzima antashitapiintyyaawa kaari kameethatatsi ineshironkatantapiinteeeyakaerini? Teejee, tee okameethatzi.

**16** ¿Ninkama pipinkathataperoteri? Aririka pipinkathateri iwinkatharite kamaariipaeni, rantakaapiintemiro kaari kameethatatsi, omaanta rootaki piyaatantyaari paamariki kaari tsiwakanitatsini. Omaanta aririka pipinkathateri Tajorentsii, eejatzi pikemijantaperoteri, rantakaapiintemiro kameethatayitatsirini, rootaki piyaatanteyari jenokinta Tajorentsiki.

**17-18** Kyaaryo paerani pipinkathatawitarini iwinkatharite kamaari, omaanta iroñaaka pipinkathateeeri Tajorentsii. Pikemijantaperoteri maawaeni riyotagaeyemirini irira, rootaki nopaasonkitantariri. Pantapiintawitanwoni kaari kameethatatsi, omaanta oeyowakimi Ishire Tajorentsii, iroñaaka pantapiintero kameethatayitatsirini.

**19** Nokamantemiro okimitawo ifñaawatzi atziripaeni, riraga theenkatsiri pikemaeyantyaaworini. Okimitaka paerani pipinkathawitarini iwinkatharite kamaari eejatzi eekiro piyaatatyee panantaworini kaari kameethatatsi, okameethatzi iroñaaka pipinkathateeeyerini Tajorentsii eejatzi eekiro piyaatatyee panteeyantyaaworini kameethatayitatsirini, pikameethaperoeyantyaarini.

**20** Paerani, pikemijantaperoeyawitarini iwinkatharite kamaari pantawitakowo oetarikapaeni, tee pipinkathateeeyirini Tajorentsii.

**21** Omaanta osheki iroñaaka pipashiwentakagaawo panteeyawitarini: ¿litaka ipinatemirimini kamaari? Panteeyawitanarini, rootaki piyaatantyaarimi paamariki kaari tsiwakanitatsini.

**22** Iroñaaka tekatsi ikantya iwinkatharite kamaari romperateeyeemini eejatzi: tema iroñaaka pipinkathateeeyerini Tajorentsii, panteeniri okaatzi ikowakayemiri. Rowameethashireeyemini rirori, ijekakagaeyemini jenokinta pikanteetapaatyeyaaani.

**23** Pantapiinteeyawitakawoni kaari kameethatatsi, piyaateeyantyaarinimi paamariki kaari tsiwakanitatsini. Omaanta paapatziyakari Awinkatharite Jesokirishito, rootaki ikaminthaantashitakimiri Tajorentsii, ijekakagaeyashitemini jenokinta, pikanteetapaatyeyaaani. Tema ikaminthaashiiyeeni ikowashita.

## 7

### *Aririka aapatziaari Jesoshi tee omperateeyeeni rojankinarini Moeseeshi*

**1** Noyemijantzinkarite, eerokateeyakini nojoriiyotzinkarite, nokenkithatakagaeyemini. Tema piyotzi aririka ikame asheninka, tekatsi ikanteeya raapatziyeyaaawo ikantawitakaririni kaminagaantsi.

**2** Noshiyakaawentemiro iroka. Okantzi Iwaperite Tajorentsii: "Aririka aye tsinani oemi, kijokiro owanakiri, roojatzi ikamantakya. Tee okameethatzi ookashityaari". Omaanta aririka ikamaki, ojeekashitanaa, omatero roori antero oetarika okoyiri.

**3** Omaanta eenirorika oemi, tee okameethatzi oñaathatzimotaari paashini shirampari. Aririka ikamaki oemi, ari okameethatzi agae paashini oemi, iroñaakakya tee oñaathatzimotari itaworini oemi. Tekatsi thañeeyaaawoni ayeeta paashini.

<sup>4</sup> Eejatzi, noyemijantzinkarite, ikamaki Jesokirishito: eejatzi okimiwitaka pikaateeyakirini, pikamaeyakini. Iroñaaka eero omperateemi rojankinarini Moeseeshi, tema okimiwitaka kamakimi. Omaanta rañaakagaeyeymini eejatzi Tajorentsi panteeeyantyaaworini maawaeni ikowakagaeyakimirini. Okimiwitaka aakiri paashini oemi, riraga Jesokirishito.

<sup>5</sup> Paerani aapatziyawitarini iwinkatharite kamaariipaeni. Akowapiintawitawoni antapiintero kaari kameethatayitsini, rowaga ithañaapithatawitakaeri Tajorentsi. Aritaki akanteeyarini, antapiinteyironi okaatzi okowakiri awatha, rootaki aateeyantyaarinimi paamariki kaari tsiwakanitatsini.

<sup>6</sup> Omaanta iroñaaka okimitaka akamaeyakini. Eero akenkithashiryaa-gaeyaawoni ikanteeyirini joriyyopaeni, rameteeyarini rirori. Iroñaaka tee antapiintziro okantzirini rojankinatzirini paerani okaatzi okowaki awatha, intakya antapiinte okowakagaeyakaerini Ishire Tajorentsi.

### *Akyaryoowentero eero anantaperotawo kaari kameethatatsi*

<sup>7</sup> ¿itaka nokanteeyimirini? ¿Nokantzimma tee okameethatzi rojankinarini Moeseeshi? Teewee, tee nokantzimi. Eeromi otzimimi, eero niyotziromi nantayitzirini kaari kameethatatsi. Eeromi okantzimi: "Eero piñaawenatowo rashityatarinirina paashinipaeni", eero niyotziromi kaarira kameethatatsi.

<sup>8</sup> Iyotaawitakina tee okameethatzi nokowashiryaaaperoeyironi oetarikapaeni, niyotawitawo; omaanta eekiro niyaatatyee nokowashiryaaapertanakiro oetarikapaeni. Eeromi otzimimi kaminagaantsi rashи Tajorentsi, eero niyotziromi tee okameethatzi nokowashiryaaawitakari.

<sup>9</sup> Paerani, tekirani niyotzironi Kaminagaantsi rashи Tajorentsi, noki-moshiryaaashitawitakanri. Omaanta roojatzi iyotaantakina eeniro nantani, rootaki nowashiretantakari. Niyotanaki niyaatemi paamariki kaari tsi-wakanitatsini.

<sup>10</sup> Noetawitaka aririka nanteromi maawaeni okantziri Rojankinarini Moeseeshi nokanteetatyeyaanri nojeeekemi jenokinta, omaanta tekatsi nokantya nomonkaatero. Iyotaakina iroñaaka eenitatsi nantani, rootaki niyaatantyaarimi paamariki kaari tsiwakanitatsini.

<sup>11</sup> Osheki nokenkithashiryaaakiro kaari kameethatatsi, amatawithawitakina, rootaki kaari nomonkaatantaworini okantziri Rojankinarini Moeseeshi. Roojatzi niyotantanaka iyaatakaatyeenami paamariki kaari tsi-wakanitatsini.

<sup>12</sup> Ñaakiro, okameethaperotaki Rojankinarini Moeseeshi: rootaki iñaani Tajorentsi, okameethaperotaki.

### *Ikantziri iitaka antapiinantawori kaari kameethatatsi*

<sup>13</sup> Ari okameethatzi Rojankinarini Moeseeshi, omaanta ¿itaka niyaatantyaarimi paamariki kaari tsiwakanitatsini? ¿Rooma rojankinarini Moeseeshi jatakayenanimi? Kaari, omaanta jatakayenanimi nantakiro kaari kameethatatsi, rootaki niyaatantyaarimi. Tema iyotagaana rojankinarini Moeseeshi tee okameethatzi iroka nantawitakarini.

<sup>14</sup> Okameethataki roori, tema Tajorentsi rirotaki jankinatakanantzirori; omaanta naaka, kantakaashitakawo tee nokameethatzi naaka.

<sup>15</sup> Tee niyotakota oeta awijimotakinri: nokowawita nojeeekemi kameetha, omaanta, tee nomatziro. Nantapiintakiro kaari nokowaperotawita nanteri.

<sup>16</sup> Niyotaki tee okameethatzi iroka nantayitakirini, niyotaki okameethataki iroka iyotaantziri Rojankinarini Moeseeshi.

<sup>17</sup> Tee nokowawita nanteromi oetarikapaeni, omaanta ashi noyiro tee nokameethatzi, rootaki nanantawori.

<sup>18</sup> Niyotaki tee nokameethaperotzi nowathaki. Nokowaperotawitaka nanteromi kameethatayitsirini, omaanta tee nomatziro.

<sup>19</sup> Tee nantapiintziro kameethatatsiri nokowawitari nanterimi, inta eekiro nantapiintanakitziro kaari kameethatatsi kaari nokowawita nanteri.

<sup>20</sup> ¿litaka nantashitantawori kaari nokowawita nantero? Rooma ashi noyiro tee nokameethatz, rootaki nantashitantakawori.

<sup>21</sup> Aritaki nokantatyani: nokowawitaka nojeekemi kameetha, omaanta omapokakinia eejatzitanee nantaneero kaari kameethatatsi.

<sup>22</sup> Nokenkithashiryaaoperotawitakawo najankaneki iñaani Tajorentsi, nokowaperotawitaka nanteromi kameetha ikowakaakinari.

<sup>23</sup> Osheki nokenkithashiryaaakotaka nowathakira eenitatsi kaari shinetenani nantero kameethatatsiri. Osheki nokenkithashiryaaawitakari Tajorentsi, nokowawitaka nanteromi ikowakaakinari. Omaanta tee nomatziro nantero, omapokashitanaana nantaneero eejatzti kaari kameethatatsi.

<sup>24-25</sup> Osheki nashironkaawitaka. Nokenkithashiryaaawitaka nanteromi ikantakinari Tajorentsi, omaanta ashi noyiro tee nokameethatz. ¿Ninka amitakotenani eero nantapiintantawo eejatzti kaari kameethatatsi? Tema tee nokoyi niyaate paamariki kaari tsiwakanitatsini. Rirotaki Awinkatharite Jesokirishito amitakotenani. Rootaki iroñaka osheki nopaasonkitantariri Tajorentsi.

## 8

### *Amitakoeyakaeni Ishire Tajorentsi*

<sup>1</sup> Rootaki aapatziyeyantaririni Jesokirishito kameetha, eejatzti kijokiro oyeri, eero rowashironkagaeyeeni. Tema eero iroñaka antapiinteyironi kaari kameethatatsi akyiri aari.

<sup>2</sup> Paerani ashi noyironi nantapiintzironi kaari kameethatatsi, niyaatemi paamariki kaari tsiwakanitatsini. Omaanta naapatziyakari rirori, owawijaakotantaanari Ishire Tajorentsi, owañaashiryaaantaanari. Ojeekakagaena injia janta jenokinta, nokanteetapaatyeyaaani.

<sup>3</sup> Ñaakiro, tekatsi okantya owawijaakoeyeeeni rojankinarini Moeseeshi: ashi oyiro tee akameethatz. Tee amonkaateeyironi okantakaeri. Omaanta rowawijaakoeyakaeni Tajorentsi. Rotyaantakiri Itomi jaka kipatsiki, ratziritapaka, ikimitaperotapaka aari, omaanta tee rantziro kaari kameethatatsi. Ikamawentakae aaka, ipaashinitakagae eero akimitantaa paerani.

<sup>4</sup> Iroñaka, aririka aapatziyawo Ishire Tajorentsi, ari amonkaatakiro okantakaeri Iwaperite Tajorentsi. Paerani ashi oyironi tee akameethatz, tee amonkaatzironi okantakaeri.

<sup>5</sup> Riraga kaari kameethateeyatsini ikenkithashiryaaakopiintawo rantero kaari kameethatatsi. Omaanta riraga yotzirori Ishire Tajorentsi ikowaki rantero okowakaakirii.

<sup>6</sup> Aririka akenkithashireero akowashitayitarini aari, aate paamariki kaari tsiwakanitatsini. Aririka akenkithashireero okowakaakaeri Ishire, ari ajeekaki kameetha eejatzti kameetha akanteetatyeyaaani ajeekimoeyerini Tajorentsi.

<sup>7</sup> Aririka akenkithashiryaaakotero antayiteroni akowakiri aari, atheenkakiri rirori: tee akyoi antayiteroni ikowakagaeyawitakaerini. Rootaki kaari amatantawo antero.

<sup>8</sup> Tee imatziro ikimoshiryaaakayeri rirori maawaeni antapiintayitzirorini oetarikapaeni ikowashitakari.

### *Tsika ikanta riraga kameethatayitatsirini*

<sup>9</sup> Omaantakya eerokapaeni, tee pijeekaeyini iroñaaka okimitaaga okoyiri piwatha, inta okithaatakaapaakimiro eerori Ishire Tajorentsii, rootaki pijeekaeyantaarini kimitaka òkowakaakimiri Ishire. Riraga kaari kithaatotawori Ishire, tee riyotziri Jesokirishito.

<sup>10</sup> Osheki pantakiro kaari kameethatatsi, rootaki pikamaeyantyaarini piwatha, omaanta pisheninkatakaririka rirori, iñaaaperotakimi Tajorentsii pikameethatzi pishireki, pikanteetatyeyaaani pijeekimoteri.

<sup>11</sup> Tema rowaga Ishire opiriinteeri Jesoshi. Iroñaaka aririka okithaatakaakimi roori, opiriinteeeyeemini eejatzi eerori, owañeeyeemini pishireki eejatzi. Ro imatanteemiri tameentakawo.

<sup>12</sup> Iroñaaka, noyemijantzinkarite, atsipetashiwitakawo aapatziyawitakari iwinkatharite kamaari, eejatzi atsipetashitawitakawo antero kaari kameethatatsi.

<sup>13</sup> Aririka pantapiintero iroka, piyate paamariki kaari tsikananitatsini. Omaanta aririka paapatziyawo Ishire Tajorentsii, eero panteero eejatzi kaari kameethatatsi, roojatzikya pijeeke jenokinta, pikanteetapaatyeyaaani.

### *Itominteeeyakarini Tajorentsi aapatziyariri Jesoshi*

<sup>14</sup> Maawaeni atziri ikithaatakaakari Ishire Tajorentsii, riroteeyakini reentsitepaeni Tajorentsii.

<sup>15</sup> Pamine, aririka okithaatakaakae roori, aakateeyakini itomipaeni rirori eejatzi rishinto. Tee akimitari romperanawo, eejatzi eero athaawantari. Eero akimitaa paerani athaawanteeeyawitarini iitarikapaeni. Tema kyaaryo, akanteeri Tajorentsi iroñaaka: "Pawa nashi".

<sup>16</sup> Aririka ayotaki okithaatakaakae roori, eejatzi iyotagaeyakaeni, rootaki ayoteeyantakarini reentsiteeyakaeni Tajorentsii.

<sup>17</sup> Aakateeyakinirika reentsitepaeni, ari ipaeyakaeni Tajorentsii maawaeni ikowakaakaeri ojeekimoeyeeni iinja, akimiteeyaaarini Jesokirishito. Iroñaaka aririka akimitakoeyakyaarini akemaatsityaawo oetarikapaeni, aritaki iinja akimitakoeyaaarini, kameetha ajeekimoeyaaerini Tajorentsii, aweshiryaaawenteeyaaarini.

### *Inja eero akenkithashiriilo oetarika akemaatsitawitakari iroñaaka*

<sup>18</sup> Inja kameetha ijekakaaperoeyeeni janta inampiki, kyaaryo ajeekaperoete roojatzii eero akenkithashiriilo oetarikapaeni akemaatsitawitakari iroñaaka jaka.

<sup>19</sup> Ayoteeyakini maawaeni riwetsikaeyakaeni Tajorentsii ijekakaaperoeyeakaeni kameetha, eejatzi ipeyee iinja pinkatharitatsini. Raamagaeyaarini maawaeni ikantzi: "Tsika okaateka itajonkawenanteeyeerini maawaeni reentsitepaeni ayoteeyantaririni?"

<sup>20-21</sup> Ratsipetashitakawo ijekayitakini maawaeni riwetsikaeyakirini Tajorentsii: ikamapiinteeeyakini rirori tsimeripaeni, pankirentsipaeni, maawaeni; eero añaagaeri eejatzi iinja. Tekatsi ranteeyawityaani ikamaeyantakarini, omaanta ikamaeyantakarini rantakirini paerani Araani. Riyotaki Tajorentsii iinja eero okimitaa iroñaaka, inta rowameethaperoeyeerini eejatzi maawaeni ikaatzi jeekanteeyaworini kipatsi, tema eejatzi ikimitagae aari iinja rowameethaperoeyeeni: tema aakateeyakini reentsitepaeni maawaeni.

<sup>22</sup> Ayoteeyakini rowashironkaapiinteeeyakani maawaeni riwetsikani Tajorentsii, eejatzi ikamaeyini: ikantani, roojatzii iroñaaka. Tema ikimiteeyakawoni tsinani, rowashironkaapiinteeeyironi, tema atsikamoonthatziro tsinani aririka okoñaawaanite eensite.

<sup>23</sup> Eero apatziro okaatzi riwetsikakiro Tajorentsi oyeero kitejiri rowameethatero, inta eejatzi aariapaeni aapatziyariri Jesoshi, ashironkagaeyawitakan, oyeero. Tema eeniro akemaatsiteeyakarini, omaanta eenitatsi Ishire Tajorentsi, ojeekantakaet ajankaneki amitakoeyakaeni. Omaanta akowaeyakini ikimitakaantaperoeyeeni Tajorentsi aaka reentsitepaeni ipaashinitakagae aririka apiriinte. Roojatzi eero akemaatsitaawo oetarikapaeni, eero akamae eejatzi.

<sup>24</sup> Aririka ayotaki imonkaatero Tajorentsi ikantakaeri, aapatziyakari awi-jakontaari. Omaanta tekira ithonkiro, tekira imonkaateeyironi maawaeni ikantakaeri aari rootaki oyaakotantyaariri. Omonkaatakyaarika, ¿arima oyaakoteero okaatzi ikantakaeri? Eero.

<sup>25</sup> Aririka ayotaperotaki imonkaateero ikantakaeri, kameetha eekiro atatyee oyaakotero, eero akantashiryaa.

### *Amitakoeyakaeni Ishire Tajorentsi, okantziri Tajorentsi ramitakoeyeeni*

<sup>26</sup> Tee ayoperoeyini aari, omaanta amitakoeyakaeni Ishire Tajorentsi. Tee ayoperoeyini amaneri Tajorentsi kameetha, omaanta iyotzi roori Ishire, okantakowenteeyakaeni; kameetha okenkithatakaeri, eero amatziro akimityaawo.

<sup>27</sup> Riyoperotakaet Tajorentsi okaatzi akenkithashiryaari ajankaneki, eejatzi riyotakiro oetarika okantziriri Ishire. Aririka okantakowentakae, iyotakiro maawaeni ikowakaakaeri Tajorentsi, rootaki amanantyaariri, tema rootaki Ishire kantakoteeni.

<sup>28</sup> Ayoteeyakini aririka anintaperotakiri Tajorentsi, eejatzi aririka antapi-intakiro ikowakagaeyakaerini, roojatzi ikantyaani rirori itajonkakowenteeyeeni. Aririka opomeentsitzimotawitakae, omaanta eero ishineteewashironkaeya.

<sup>29</sup> Paeraniperoroña riyotzitakaeni ari aapatziyakyaari rootaki ikantzitan-takarini: "Ikameethatanaki aapatziyeeyanarini, ikimiteeyaa Notyomi". Tema irira rirotaki Jesokirishito. Rirotaki itomipero paeraniperoroña, ijekitani; rimpaaeteeyakaeni aririka aapatziyeeyarini irira ari reentsiteeyakaeni aari, akimtaari paashini reentsite Tajorentsi.

<sup>30</sup> Paerani ikantzitakan: "Neentsiteteeyaaarini", roojatzi reentsitetap eroeyakaeni; eejatzi iñaaperoeyakaeni akameethatzi ikimitakaantakae tee antziro kaari kameethatatsi. Eejatzi ikantzitakan: "Inja kameetha ijekimoeyenani jaka nonampikika".

<sup>31</sup> Tema okameethateeyakini iroka. Ñaakiro, itajonkawentaperoeyakaeni Tajorentsi: ¿ninka iroñaaaka owashironkagaeyeeni? Tekatsi.

<sup>32</sup> Tee ithañeeyari Itomi, omaanta rotyaantakiri jaka kipatsiki ikamawen-teeyakaeni. Tema ayoteeyakini eejatzi iinja ipapiinteeyeeni aaka maawaeni koetyeemoeyleyakaerini.

<sup>33</sup> Tema riyoyagaeyakaeni Tajorentsi, iñaakae akameethatzi ikimitakaantakae tee antziro kaari kameethatatsi: ¿ninka iroñaaaka kantatsini eeniro antani? Tekatsika.

<sup>34</sup> ¿Ninkama kantakoteenika: "Eeniro pantani"? Tekatsi: tema ikamawen-teeyakaeni Jesokirishito rowawijaakoeyakaeni. Eejatzi ipiriintanaa, ijekimotapaeri Ashitariri rakoperoki, ikaatziri ipinkathariwenteeyakaeni, eejatzi raminakowentakae.

<sup>35</sup> ¿Ninkama ookakaeyerinika Jesokirishito inintaperoeyakaeni? Tekatsiroña. Omawitya rowashironkagaeteerika, aririka opomeentsitzimoeyeeni oetarikapaeni, rajaryagaeteerika rowashironkagaetee, aaperoterika atashe, tekatsirika akiitahtyaari, athaawantayitarini oetarikapaeni, rowamagaetakaerika; omaanta ikantani Jesokirishito, inintaperoeyakaeni.

**36** Okimita okantzitakarini rojankinateetakirini paeraniperoroña: “Naap-  
atziyakimi Tajorentsi, rootaki rajaryaantapiinteetakinari rowamagaetená.  
Ikimitakaantena owisha: tema rowamaapiinteetayitzirini maawaeni kite-  
jiri rowantariri”.

**37** Kyaaryo osheki inintaperoeyakaeni Jesokirishito, ikantani:  
itajonkawenteeyakaeni, ranaakotakaakaeri maawaeni kowatsiri  
rowashironkaakae. Tema rootaki aweshiryaaawentaperoeyantakaririni.

**38-39** Kyaaryo, tekatsi ookakagaeyenarini ininteeeyakaeni: eero imatziro  
ronampiri Tajorentsi, kamaaripaeni, pinkatharipaeni, jenokijatzi, kipatsi-  
jatzi, maawaeni riwetsikaeyakirini Tajorentsi, eero imatziro. Okantawitya  
aririka akamaki, eeniroka añi, eero imateeyironi iroñaaka, ejatzi eero  
imatziro iinja. Rooma aapatziyakari Awinkatharite Jesokirishito, iroñaaka  
inintaperoeyakaeni, ejatzi kijokiro rowaeyakaeni maawaení.

## 9

### *Tajorentsi riyoyaakiri ninkarika ikowakaakiri irira*

**1-3** Osheki nokenkithashiryaaakotakiri maawaeni nojoriyyotzinkarite.  
Kyaaryootaki iroka nokantakiri, riytaki Jesokirishito tee notheeya.  
Eejatzi okithaatakaakina Ishire, iyotakaakina kyaaryo nokantaki.  
Netakoperotakari nojoriyyotzinkarite, tee raapatziyari Jesoshi. Aririkami  
nomateromi nowajijaakoterimi riroripaeni, niyaateetami paamariki  
kaari tsiwakanitatsini rawijakotanteeyarinimi; niyaaterikami janta,  
eero noñiirimí naaka Jesokirishito. Ñakiro, osheki nokowaperowitaka  
rawijakoeeyenimi

**4** icharineeteeyakarini Ishirayeeri.\* Tema irira reentsiteteeyawitakarini  
Tajorentsi. Iñeeyakirini itajonkantaki, ejatzi ikemaeyawitakawoni ikantaw-  
itariri, riyoteeyawitakawoni Rojankinarini Moeseshi, riyoteeyawitakani  
tsika ikantyaami raapatziyarimi, eeniro ikashiyakagaeyakiririni aririka  
ikemijantaperoteri,

**5** riroteeyakini ichariniitenipaeni riraga itakaworini paerani,  
riroteeyakini ichariniiteni paerani Rotyaantanewo Tajorentsi. Tema  
rirotaki Tajorentsi, okameethaztaki akanteetatyeyaañi añaaperooyerini ejatzi  
apinkathataperooyerini maawaení. Aritaki okantyaani.

**6** Riyoteeeyawitawoni Iwaperole Tajorentsi, omaanta tee raapatziyeyawa-  
woni. ¿litaka kaari raapatziyeyantawoni? ¿Ramatawitakirima Tajorentsi?  
Teeewe, tee ramatawitziri. Pamine, maawaeni icharineetení Ishirayeeri tee  
ikimitaperooyerini: rooma tee raapatziyeyariní Tajorentsi maawaení, inta  
apaanipaeni.

**7** Eejatzi tee ikimitaperooyerini Awaraamani maawaení icharineetení.  
Tema ikantakirini paerani Tajorentsi: “Apatziro piccharinitaperooyaarini  
maawaení icharineetení riraga Ijaaka”.

**8** Iroñaaka nokamantemiro iroka roshiyakawenziri. Tee reentsitetari  
Tajorentsi maawaení icharineetení Awaraamani. Apatziro  
isheninkaeyakarini riraga icharineetení Ijaaka.

**9** Tema ikantakirini Tajorentsi riraga Awaraama: “Awijkeentsirika  
apaani ojarentsi roojatzi otzimantakya Jaara otomi”.

**10** Paashini ojarentsi ikoñaataki Ijaaka. Ikantaka rantaritaki, raaki iina,  
owaero Riweeka. Roojatzi omotzitakiri, rirotaki tsipantzi.

\* **9:4** Ishirayeeri ejatzi Jakooowo rirotaki apitetachari iwaero apaani atziri.

**11-13** Eenirowa rirori omotzitziri riniro, tekira rantziro kameethatatsiri eejatzti tekira rantziro kaari kameethatatsi, omaanta eeniro ikowakaetakariri Tajorents. Irira riyooyakiri ikantxitakawoni rowaga Riweeka: "Riraga jewatatsini ikoñaatapaaki ipinkatheteeri riraga oyaatapaakyaaarini". Tema rootaki okenkithatakotxitakaririni Iwaperite Tajorents: "Ikantxi Tajorents: 'Nonintaperoteri Jakoowo osheki, omaanta riraga Isawoori eero nonintaperotziri osheki' ". Ñaakiro, riyotzitani Tajorents ikowakaetakaririni: roojatzi imatakaantakari.

### *Tsika ikantziriri Tajorentsijoriiyo eejatzki kaari joriyyotatsi*

**14** ¿Okameethatzima akante: "Tee okameethatzzi iroka rantziro Tajorents"? Teewee, eero akantzi.

**15** Tema paerani ikantakirini Moeseeshi: "Tema naaka kantsatsiri ninkarika noneshironkateri, eejatzti ninkarika netakotyaari".

**16** Tee riro atziri kantsatsini, inta Tajorents. Riyotzi irira ninkarika ineshironkataperoteri.

**17** Tema paerani ojankinatakani ikantziririni riraga iwinkatharite ejipitojazzi: "Nopeyemi pinkatharitsatsini, riyoteeyantyaarini atziri osheki notajorentsitaki, eejatzti osheki ipinkathateeyantenerin maawaeni jeekatsiripaen ikipatsiki".

**18** Ñaakiro, tema rirotaki Tajorents kantsatsiri ninkarika ikowakaari ineshironkateri. Tema eejatzti rirotaki kantsatsiri ninkarika kijoshiretsatsiri rajankaneki.

**19** Naamaashita iroñaaka pikantena: "¿Arima? Kyaaryorka pikantakiri, ¿itaka ikijawanantenawori nantayitzirini? Tema nantayitakironi rantaakaakinari rirori".

**20** Pamine, eeroka atziri: tee okameethatzzi pipiyathatyari Tajorents, osheki ipinkatharitzi irira. Noshiyakaawentemiro kowitzi. Okantzirma wetsikirori: "¿Itaka kaari piwetsikantana naari kameetha?"

**21** Rowaga wetsikirori tema rootaki kowakawori tsikarika okanterori kipatsi. Apaani owatha kowitzi. Tema okameethatzzi owetsikakiri apaani rooperotatsiri, omaanta paashini tee opantaperotya.

**22** Aririka ikowaki Tajorents, tema okameethatzzi rowashironkaayiterini iinja. Tema okameethatzzi rirotakagaejerini atziri eeniro itajorenka. Omaanta tee rowashironkagaejerin intsipaete riraga kaari kameethateeyatsatsini, omaanta imauritakotashitawo rantayitzirini, tema ikowakiri ikenkithashireeyami ikamintaantakyaaririmi.

**23** Omaanta ikamintaaperotakiri riraga jatatsini jenokinta; ikowakaakiri riyoteeyeni osheki ikamintaantzi, eejatzti osheki ipinkatharitzi.

**24** Riyoyaakiri apaanipaeni joriiyo riyoteeyantaaririni eejatzti riyoyaakiri apaanipaeni kaari joriyyotatsi. Aakateeyakini riyoyayitakirini, ayoteeyantaaririni.

**25** Tema paerani rojankinatakotzakaeni riraga Oseeyashi, ikantzi: "Ikantzi Tajorents: 'Kaari naawita nosheninka, omaanta iroñaaka nosheninkataari. Kaari naawita nonintanewo, omaanta iroñaaka nonintaperoteeri' ".

**26** Eejatzti janta tsikarika Tajorents ikantakiri: "Kaari naawita nosheninka", iinja ikenkithatakoteeteeri riraga peyaachani ikanteri: "Eerokapaenireentsitepaeni Tajorents, riraga añaaperotatsiri".

**27** Eejatzti eenitatsi iroka rojankinatakirini Iseeyashi. Ikenkithatakotakiri joriiyopaen ikanteri: "Ikaateeyakini icharineeteni Ishirayeeri oshekiperorona. Ikitakawo opane impaneki roshekiperotaki. Omaanta eero roshekiperotzi awijakotaatsini".

<sup>28</sup> Inja imonkaatero Tajorentsi maawaeni ikantakiri: romapokaeyerini maawaeni theenkantsatsiri, rowashironkagaeyerini. Ithotyaaperooyerini, maawaeni”.

<sup>29</sup> Tema eejatzi rojankinatakini rirori, ikantzitakan: “Eeromi ikamintheeyeenimi Tajorentsi, riraga antzirori oetarikapaeni, eeromi isheninkateeyeenimi, tema ari ithonkaeyeenimi maawaeni, akimiteeyaarinimi riraga joroomajatzini eejatzi riraga komoorajatzini”.

### *Ikamtziri iitaka kaari raapatziyantarijoriyyopaeni*

<sup>30</sup> ¿Itaka eejatzi nokamantemiri? Paerani riraga paashinijatzitatsiri atziri tee ikowaeyawitani rowameethatheri Tajorentsi, omaanta iroñaaka raap-atiyeeyarin rootaki iñaaperotantakariri ikameethatzi.

<sup>31</sup> Omaanta riraga joriyyopaeni ikowaeyawitani rirori imonkaatayiteron-imi ikantayitziririni Moeseeshi ikameethatantyaarimi, omaanta tee ima-teeyironi.

<sup>32-33</sup> ¿Itaka kaari iñaaperotantariri riroripaeni ikameethatzi Tajorentsi? Tee rameenteeyarin omaanta ikowaeyawitani rantero oetarikapaeni. Osheki ikompitakawo, tee ikowaeyini raapatziyari Jesoshi. Paerani rojankinateet-zironi iroka: “Ikantakotakiniri Tajorentsi Rotyaantanewo: ‘Notyaantaw-tyaanari joriyyopaeni notyomi, omaanta eero riyoteeyawakirini. Okimi-witaka rantziwatyaawo mapi, ipariyantyaawo; tee riyoteeyirini rirotaki Notyaantanewo, rootaki rowashiretantaari. Omaanta eero rowashireta riraga aapatziyariri, inta riweshiryawentaperooyaarini’”.

## 10

<sup>1</sup> Noyemijantzinkarite janta Oroomaki, osheki nokowaperotaki rawijakoeyenimi maawaeni nojoriyyotzinkarite, osheki namanapiintziri Tajorentsi: “Paapatziyakagaeyaarini nojoriyyotzinkaritepaeni rawijakotanteeyaari”.

<sup>2</sup> Niyotaki osheki ikowaeyawitani ikyaaryoowentenirimi Tajorentsi oetarikapaeni rantziniriri, Ishintsiteniri maawaeni. Omaanta tee riyoteeyini oetarika ikowakaaperoeyakiririni.

<sup>3</sup> Tee riyoteeyini tsika ikanteeri Tajorentsi iñaaperotanteeyaarini ikameethatzi. Ikowaeyawitani rowameethashityaami apaniroeni, omaanta tee ikoyi raapatziyawo okaatzi ikantziro Tajorentsi iñaaperotantakariri ikameethatzi.

<sup>4</sup> Pamine, ipokaki Jesokirishito, ikamawenteeyakaeni. Iroñaaka, aririka aapatziyakyaari rirori, ari iñaaperoeyeeni Tajorentsi akameethatzi. At-sipetashitakawo iroñaaka antayiteroni ikantzirini Moeseeshi awijakotanteeyaarimi.

### *Tsika akantya awijakoeanteeyaarini*

<sup>5</sup> Paerani riraga Moeseeshi ikenkithatakotakiri riraga kowatsiri rawijakotantyaawomi Rojankinarini Moeseeshi: “Eenitatsirika kowatsini imonkaayiteroni rawijakotantyaari, okameethatemi imonkaateeyeronomi maawaeni, ikanteetatyeyaaani. Eeromi ikompitawomi”.

<sup>6</sup> Omaanta aririka aapatziyeyeaarini Jesoshi iñaaperotantariri Tajorentsi akameethatzi eero akantzi ajankaneki: “Pomeentsitaka awijakotanteeyari. Thame aatashiteri Jesokirishito janta jenokinta, aakiteri jaka rowawi-jakotanteeri”. Eero akantashita;

<sup>7</sup> eejatzi eero akantashita: “Thame aate tsikarika iyaatzi ishire kamaentsiripaeni inthomaenta kipatsi, apiriinantlyaariri Jesokirishito, rowawijaakotanteeri”. Eero akantzi. Tema tzinaanaa paerani.

<sup>8</sup> Aririka aapatziyakaari, aritaki awijakotee: eero antayitzironi pomeentsitayitacharini. Tema eeniro jaka iñaani Tajorentsi: kaari pomeentsitachani pikenkithatakotero eejatzi tameentyaawo. Rootaki iroka nokamanantapiintziri: paapatziyari Jesoshi pawijakontanteeyarini.

<sup>9</sup> Aririka pikamanteri paashinipaeni atziri pipinkathatakiri rirori, eejatzi aririka pikenkithashiryaakiro pajankaneki ipiriinteeri Tajorentsi, aritaki pawijakotee.

<sup>10</sup> Ñaakiro, aririka ameentyaari riraga Jesoshi ajankaneki iñaaperoeyeen Ashitariri akameethatzi; eejatzi aririka akamanteri paashinipaeni atziri aapatziyakari rirori, aritaki awijakotee.

<sup>11</sup> Tema okantzini Iwaperite Tajorentsi: “Eero ipashiwenta riraga aapatziyari Jesoshi, tema eero ramatawitziri”.

<sup>12</sup> Amonkaatawakagaeyakan: joriyyo eejatzi paashinijatzitsiri atziri, apintzi Awinkatharite. Ameenteeyakarini, rootaki ipinkathariwenanteeyakaerini, ineshironkateeyantakaerini maawaeni.

<sup>13</sup> Tema eejatzi okantzini Iwaperite Tajorentsi: “Rawijakoeyeen maawaeni ameenteeyaririni Awinkatharite”.

### *Osheki itheenkanteeyini joriyyopaeni*

<sup>14</sup> Eerrika raapatziyari Tajorentsi atziri, ¿tsikama ikantyaaka rameenantyaariri? Eero imatziro. Eerrika ikemakotziri, ¿tsika ikantyaaka raapatziyantyaariri? Eero imatziro. Tekatsirika kenkithatakaantatsini, ¿tsika ikantyaaka ikemakotantyaariri? Eero imatziro.

<sup>15</sup> ¿Arima imatakiro atziri riyaate ikenkithatero iñaani Tajorentsi tekatsirika otyaanterini irira? Eero imatziro. Tema okantzini Iwaperite Tajorentsi: “Tema osheki aweshiryaaawentakari riraga pokatsiri kenkithatzirorini iñaani Tajorentsi, tema añaaperoeyakirini”.

<sup>16</sup> Omaanta tee raapatziyeeyimini maawaeni. Tema rootaki ikantakirini paerani Iseyashi: “Nowinkatharite, nokamantteeyawitakarini, omaanta enitatisi osheki kaari aapatziyeeyimirini”.

<sup>17</sup> Eerrika ikamanteetee, eero amatziro aapatziyari Jesoshi. Tema ikamanteetakae ikamawentakae irira, rowawijaaktantakaeri.

<sup>18</sup> Tema ikemaeyakini maawaeni joriyyopaeni. Kyaaryo, ikemaeyawitakawoni. Tema okantzini Iwaperite Tajorentsi: “Riyaataki kenkithatakaantatsiri maawaeni kipatsiki, ikemaeyakirini maawaeni jeekatsiripaeni”.

<sup>19</sup> ¿Tee riyoteeyawakironi joriyyopaeni? Tema ikamantakirini paerani Moeseeshi: “Ikantzi Tajorentsi: ‘Inja paamakotaari paashinijatzitsiri atziri pimaninteeyawitakarini. Ro pikijantyaariri nowawijaakoeyeerinira’”.

<sup>20</sup> Ejatzi rojankinatakini Iseyashi: “Ikantzi Tajorentsi: ‘Tee ikowawitena riyotena riraga atziripaeni, omaanta riyoteeyakinani iroñaaka: niyotakaaproeyakirini’”.

<sup>21</sup> Omaanta riraga joriyyopaeni nokantapiintawitakari, omaanta ipiyathatakina, tee ikoyi raapatziyena”. Rootaki rojankinatakinarini riraga Iseyashi.

## 11

### *Tsika ikantyaaka riraga joriyyopaeni*

<sup>1</sup> Naamaashita pojampitena iroñaaka: “¿Arima? ¿Eeroma iroñaaka rookaeri Tajorentsi maawaeni joriyyopaeni, riraga reentsiteteeyawitarini?” Eero. Tema naaka joriyyo. Nocharineeteeyakarini Awaraamani eejatzi Irijamiini.

<sup>2-3</sup> Naakateeyakini joriyo. Tema paerani riyoyagaeyakinani Tajorentsi, roojaatzi iroñaaka raakameethateeyantaanarini. Tema piyoteeyakini okantzini Iwaperite Tajorentsi. Okenkithatakotakirini Iriiyashi paerani, ikenkithatakera Tajorentsi, ikantziri: "Nowinkatharite, teewee ikameethateeyini irika nojoriyyotzinkarite. Rowamaapiintayitakirini riraga kamanantayitzirorini piñaani. Rookakaayiteerini isheninka raapatziyeeyawitzimini. Iroñaaka ikowaeyakini rowamaena naari. Apaniroeni naaka naapatziyimi".

<sup>4</sup> Tema piyoteeyakironi eejatzi rowaga rakanakiriri, ikantzirini: "Eenitatsi ikaatzsi jeekatsiri 7.000 shirampari aapatziyaperotanari. Tee rotziwerowashitawo ipinkathatanteeyaworini rirori rowaga Waari iitajorentsisteeyawitarini paashinipaeni".

<sup>5</sup> Eejatzi okimitaaka iroñaaka. Eenitatsi eejatzi apaanipaeni joriyo riraga riyoaaanewo Tajorentsi, ineshironkaeyakirini.

<sup>6</sup> Ņaakiro, ineshironkaeyakirini, tee ikantziri rantero oetarikapaeni. Ikanterirkami rantayiteronimi oetarikapaeni, tee ineshironkatziri.

<sup>7</sup> Ari, ɿtsika okantari iroñaaka? Ikowaeyawitakani iñaaperoeyerinimi Tajorentsi, omaanta, tee. Iñaaperotayitakirini apaanipaeni: riraga riyoyayitakirini. Omaantakya paashinipaeni, tee ikowaeyini raapatziyaperoyaarini Tajorentsi inta romajontyaakiri rajankanekei.

<sup>8</sup> Tema eejatzi okantzini Iwaperite Tajorentsi: "Ipeyapithatakiri Tajorentsi ikenkithashiryaantawitari. Iñaayitawitakawoni oetarikapaeni, ikemayitawitakawoni, omaanta tee riyotakotawakiro: tee raapatziyari Tajorentsi. Aritaki ikantteeyani, roojaatzi iroñaaka".

<sup>9</sup> Eejatzi ikantzini Iravii: "Rireshiryaawentawitakawo oetarikapaeni, omaanta ramatawiteeyana apaniroeni. Roojatzi ikamaeyeni, ikemaatsi-wenteeyaaawoni rantayitzirini.

<sup>10</sup> Eero iinja ojeeki riyotantari, eero riyoteeyini. Ikantyaani ashi royro rashironkaeya".

### *Tsika ikantaka joriyo eejatzi paashinijatzitatsiri atziri*

<sup>11</sup> Ari itheenkayakini joriyyopaeni rootaki nojampitantzimiri: ɿkajaperoeyakirinima iroñaaka Tajorentsi rirori, eero išhinetantari rawijakotya? Teewee. Omaanta ranantakawori kaari kameethatatsi rowawijaakoeyantakaririni paashinijatzitatsiri atziri ikowantyaari joriyyopaeni ikimiteeyaarini riroripaeni, raapatziyaari Jesoshi.

<sup>12</sup> Itheenkayakini, tee ikowaeyini raapatziyari irira, omaanta rawijakoeeyeni paashinijatzitatsiri atziri. Iinja, aririka raapatziyaperoyaarini joriyyopaeni rirori, tema eekiro ryaatatayee raapatziyaperoyaarini eejatzi paashinijatzitatsiri atziri rawijakotanteeyaarini.

<sup>13</sup> Tee eerokapaeni joriyo. Piyoteeyini rotyaantakina Tajorentsi nokenkithatakagaeyakimini. Aririka notsipatyaari nojoriyyotzinkarite nokantani nokenkithatakotero nantawaero eejatzi pawijakotantyaari osheki eerokapaeni.

<sup>14</sup> Nokowaki nokenkithashiryaakagaeyerini iñaani Tajorentsi nojoriyyotzinkarite eejatzi raamaawaeta kaari joriyo, rawijakotagaananteeyarini rirori.

<sup>15</sup> Itheenkayakini iroñaaka, rootaki kaari iñaaperoeyantarini Tajorentsi ikameethatzi; omaanta eeroka iñaaperoeyakimini pikameethatzi. Omaanta iinja iñaaperoeyerini rirori ikameethatzi, tema okameethaperotanaki. Ryaateeyenimi oshekiperi janta paamariki kaari tsikanitatsini, omaanta iinja ryaatagaanteeeyini osheki janta jenokinta, okimiwitaka ipiriinteerimi.

**16** Pamine, iñaaoperotakirini Tajorentsi Awaraamani ikameethatz, rootaki riyoyaantakariri icharineetenipaeni ratziritantyaariri. Noshiyakaawentemiro eejatzi inchato: aririka okameethataki oparitha, tema eejatzi okameethatzaki owaempeki roori. Okimitaka ikameethatakini Awaraamani, eejatzi ikimityaari iinja icharineeteni ikameethateeyanakini.

**17** Iroñaaka noshiyakaawentemiro eerokapaeni kaari joriyo rowaga inchato oetachari oriwo. Okameethataki oparitha, omaanta tee okithokitzi owaempelki. Rootaki ichekanteawori, rookaeteero. Rayi paashini owaempelki, omaanta roori oriwoniro. Riyontaakiro roori, rootaki tzimatsini okithoki. Ro oparitha shookakayeroni. Rowaga owaempelki ichekaetziro oshiyakaawentziri joriyo; rowaga owakirari oriwoniro riyontakiro oshiyakaawentakimi eerripaeni, tema eero kaari joriyo.

**18** Iroñaaka eero pikantakaaperota eerori: "Nokameethatz naaka, tee nokimitari riraga joriyo". Naakiro, tee pijekashita apaniroeni, eero pimatziro apaniroeni, inta omatakaakimiro Ishire Tajorentsi, kimitaka oparitha oriwo amitakotakiro owaempelki oriwoniro. Ari okanta riyotaakaero riraga joriyopaeni ramitakotakae eejatzi riweshiryakaagagaeyakaeni.

**19** Naamaashita pikantzi: "Rookakiri Tajorentsi joriyo kimitaka ichekan-teetawori owaempelki oriwo rooma riyontaakinawo. Tema iroñaaka kitokiro royena naaka".

**20** Kyaaryo, omaanta itheenakiri, rootaki rookantawitakariri. Paapatziyyeeyakarini Jesoshi eero ka, rootaki kijokiro rowaeyantakimirini. Kyaaryoowa pikantakaaperotashitakarira, omaanta okameethatz pipinkathataperoteri.

**21** Pamine, rookakiri riraga Tajorentsi riraga theenkiriri, omawitya riro-taki riyoyaawitakari. Eejatzi eero ka, kyaaryoowa rookimikari aririka pitheenkirri.

**22** Piyoteeyakini ikaminthaantaki Tajorentsi, omaanta eejatzi rowashironkagaeyakirini riraga antzirori kaari kameethatatsi. Aririka pikantyaani paapatziyari, ari ikantyaani ikamintheeyemini. Eerorika pikantyaani paapatziyaperotari, rookaneemi eerori.

**23** Eejatzi riroripaeni: aririka rookaero itheenkirira roojatzi raap-attiyeyarini, ari iñaaoperoyerini Tajorentsi ikameethatz, tema rirotaki Pinkatharipero. Okimiwitaka riyontaakiro eejatzi oriiwoki. Tema rirotaki rirori kantakowenteririni tsikarika ikanteeyerini atziri.

**24** Paerani tee piyoteeyawitarini, omaanta iroñaaka iñaaoperoyerakirini pikameethatz. Aririka raapatziyari riraga iyoeyawitaririni, tema eejatzi iñaaoperoyerini rirori ikameethatz.

**25** Noyemijantzinkarite, eenitasi nokoyiri nokamanantemiri kaari piyoteeyawitan. Ro nokamanantemiri tee nokoyi pikantakaaperotya. Pamine, itheenkaeyawitan riraga joriyopaeni iroñaaka, omaanta eero roojatzi ikantatyaani. Aririka omonkaatakyraapatziyeyari Tajorentsi paashinijatztatsiri atziri, roojatzi omonkaatanteeya eejatzi raapatziyanteyaariri riraga Tajorentsi eejatzi joriyopaeni.

**26** Kyaaryo rawijakoeyeeni iinja, maawaeni irira. Tema paerani okantzini Iwaperite Tajorentsi: "Ikantzi Tajorentsi: 'Ijoriuyotaki riraga owawijaakoey-eririni, raapatziyakagaeyaaarini isheninka rookakagaeyerini itheenkantzi.

**27** Nomonkaatero iinja maawaeni nokantxitakaririni ichariniiiteni paerani: nowawijaakooyerini, eero napiiteero nokijantari kaari kameethatatsi ranteeyakirini".

<sup>28</sup> Iroñaka ikijeeeyakirini, eejatzi itheenkaeyakirini; rootaki iroñaka rowawijaakoeyantakimirini Tajorentsi eeroka. Omaanta intintzitarini ri-raga itakaantakaworini joriiyopaeni, rootaki eejatzi iroñaka intintaper-oeyantakaririni maawaeni.

<sup>29</sup> Tee ramatawitantzi Tajorentsi: eero raapithateero oetarika ipaeyakaerini, eero rotsiparyaagaari riraga riyooyakiri.

<sup>30</sup> Paerani tee paapatziyarini Tajorentsi, omaanta iroñaka itheenkaper-oeyakirini joriiyopaeni rirori, rootaki ikaminthagaeyantakimirini eeroka.

<sup>31</sup> Iroñaka tee raapatziyari joriyyo, omaanta iinja raapatziyeeyaari eejatzi, ikimitteeeyeemini eerori. Roojatzi ikaminthaaanteeyariri Tajorentsi, ikimi-takaanteeyeeemini eerori ikaminthagaeyakimini iroñaka.

<sup>32</sup> Ikantzi Tajorentsi: “Eniro rantanipaeni maawaeni atziri, omaanta nokowaki noneshironkaeyerini maawaeni, nowawijaakooyerini”.

### *Riraga Paaworo iñaaperoteri Tajorentsi*

<sup>33</sup> Tema osheki ikameethaperotaki. Eenitatsi Riyotantari, osheki Riyotzi. Tee amatziro ayotziro ikenkithashiryaaari rirori, tee ayotayitzironi rantay-itzirini.

<sup>34</sup> Tema rootaki okantziri Iwaperite Tajorentsi: “¿Eenitatsima yotzirori ikenkithashiryaaari Awinkatharite? ¿Eenitatsima yoteeriri ranantayitaworini oetarikapaen?”

<sup>35</sup> ¿Eenitatsima perini Tajorentsi oetarikapaeni ipantyaariri okaatzi ikoyiri? Tekatsi. Tema irira ipakae aaka maawaeni, oetarika”.

<sup>36</sup> Ñaakiro, rirotaki irira wetskirori maawaeni. Itajonkakiri maawaeni, ijeekeayantakarini. Tema rirotaki ashiteeyaririni maawaeni jeekaeyat-sirini. Thame iroñaka maawaeni apinkathataperooyerini, akanteetaty-eeyaani. Aritaki okantyaari.

## 12

### *Okaate rantayiterini aapatziyariri Jesoshi*

<sup>1</sup> Noyemijantzinkarite, tema osheki ikaminthaaaperoyerakaeni Tajorentsi. Rootaki nokowakaaperotantakimirni eero pantashitawo eerori oetarikapaeni, inta panteniri irira okaatzi ikowakayimiri. Eenirowa pañi, kameetha pijeeke riweshiryaawenantemiri: rootaki ikowakagaeyakiririni maawaeni aapatziyariri Jesoshi.

<sup>2</sup> Eero pikimiteeyearini theenkantsiri, omaanta paashini pikenkithashiryaaagaeyapiinteni. Piyotaperoteri ikowakaakimirni Tajorentsi: okameethaperotaki. Aririka pantapiintero iroka, monkaataka: iñaaperoyeremini Tajorentsi pikameethatz.

### *Eero pikantakaaperota*

<sup>3</sup> Ikantakina Tajorentsi: “Piyotagaeyerini oroomajatzi”, rootaki nokamananteeyimirorin iroka. Eero pikantakaaperota, eero piitashita panaakoeyakirini paashinipaeni pipinkatharitzi. Pikenkithashireeyaanai tsika pikantari, piyoteeyeni imatakaaperotakimirika Tajorentsi paapatziyakari Jesoshi.

<sup>4</sup> Pamine tsika akanteeyearini: eenitatsi oki aminantari, akempita akeman-tari, apaante añaawaetantari, ako oerikantari, aetzi anashitantarí, maawaeni.

<sup>5</sup> Eejatzi akimitteeeyakarini maawaeni aapatziyeeyaririni Jesokirishito: akaateeyakini osheki, ashenkatawakagaeyakaní. Omaanta inashitayi-takaní anteeyakirini.

<sup>6</sup> Tema osheki ineshironkaeyakaeni maawaeni. Imatakagaeyakaeni antayitakironi oetarikapaeni, omaanta inashitayitakaní. Eero aperawentawo

antayiteroni. Aririka imatakaakimiro pikenkithatakayeri atziri, paap-atziyaperotaari kameetha pikenkithatakantyaariri irira.

<sup>7</sup> Aririka imatakaakimi petakotyaari paashinipaeni, ari pantero petakotyaari kameetha. Aririka imatakaakimi piyotaante, ari piyotaante kameetha.

<sup>8</sup> Aririka imatakaakimi piweshiryaakazaari paashinipaeni, ari kameetha piweshiryaakazaayaarini. Eejatzi aririka ikantemi pipashitattyarini ashironkaenkari oetarikapaeni, pipaperoteri: eero pishampsitsizi. Aririka pamitakoteri paashinipaeni, eero piperatari, inta pishintsite pamitakoteri. Aririka pineshironkateri paashinipaeni, piweshireeeyeyani.

<sup>9</sup> Pinintaperoyerini paashinipaeni kameetha, eero pikantashitari: "Nonintakimi", omaanta pinintaperoteri. Eero poejokirotawo kaari kameethatayittatsini, omaanta pikowaperote pantayiteroni kameethaperotatsiri.

<sup>10</sup> Pinintaperotawakagaeyaani maawaeni: tema pikimitawakagaeyakan, paapatziyeyarini Jesoshi. Pikowaperoeyeni pipinkathatawakagaeyani paashinipaeni.

<sup>11</sup> Eero piperata, omaanta pikowaperoeyeni pishintsite panteniri Awinkatharite maawaeni ikowakagaeyemirini.

<sup>12</sup> Piyoteeyakini imatakimiro Tajorentsi maawaeni ikantakimiri: iroñaaka piweshiryawentuyaawo. Aririka opomeentsitzimotemi oetarikapaeni, pimaeritakotashitaawo inta pikanteri Tajorentsi: "Pamitakotena". Tema okameethatzi pikantyaani pamaneri Tajorentsi.

<sup>13</sup> Pipapiinteri piyemijantzinkarite koetyeemotariri. Paakameethatapiinteri ninkarika areetemini.

<sup>14</sup> Pikanteri Tajorentsi ikamintheeyerini kijeeyakimirini, eero pipiyatari.

<sup>15</sup> Aririka ikimoshiryaanaki atziri, pitsipatanakyaaari pikimoshiryaaerotanaki eerori. Aririka rowashiretya atziri, aritaki pitsipatanakyaaari powashiretya piweshiryaaantanaky.

<sup>16</sup> Paakameethatawakagaeyaani maawaeni atziripaeni. Eero pikantakaaperota inta paakameethateri owashironkaenkariipaeni pineshironkateri. Eero pikantzi: "Naaka yotzinkaripero".

<sup>17</sup> Aririka rantzimotemiro pisheninka kaari inimotzimi, eero pipiyatari. Kameetha pijkee riyoteeyantemirini atziri pikameethataki.

<sup>18</sup> Eero pipiyawaantetari paashinipaeni. Pikowaperoeyeni paakameethateyerini paashinipaeni, maawaeni.

<sup>19</sup> Noyemijantzinkarite, osheki nonintaperoyerakimini. Eero pipiyatari owashironkaawitemini. Rirokyo Tajorentsi piyakowentemini. Tema paerani rojankinataktakironi Iwaperiteki, ikantakini: "Naaka piyawenteemini, naaka owashironkagaeeyeririni. Tema naaka Piwinkatharite".

<sup>20</sup> Aririka ayeri kijkimiri itashe, piperi rowanawo roya. Aririka imiritaki irira, pipakoteri imiri. Pantakirorika iroka, roojatzikya ipashiwenantanaky, eerokyapipiiteero ikijeeme eejatzi".

<sup>21</sup> Eero pathaagawo kaari kameethatayittatsini antakayemiro oetarikapaeni, omaantakyaarikapakintayhayeri paashinipaeni, poñaayeri kameethatayittatsirini.

## 13

### *Okameethatzi apinkathateeyerini pinkathariwenteeyeerini*

<sup>1</sup> Pathaagakoperoeyaaarini maawaeni jewatatsiripaeni: tema rirotaki Tajorentsi kowakaakiriri reewawanante. Eeromi ikowakaerimi, eero-machee reewawanantzimi.

<sup>2</sup> Riraga piyathatariri jewatatsiri, eejatzi ikimitakiri Tajorentsi, ipiyathatakari irira. Tema rirotaki kowakayiriri reewawenantzi. Linja rowashironkagaeyerini maawaeni piyathateeyakaririni.

<sup>3</sup> Riraga jeekatsiri kameetha tee ithawantari pinkathari, intakya riraga antapiintzirori kaari kameethatatsi. Eerorika pikoyi pithaawantyaari pinkathari, pijeeki kameetha; pijekirika kameetha, tekatsi ikantemi.

<sup>4</sup> Kyaaryo, ikowakaakiri Tajorentsi ipinkathariwenante pi-jeekaeyantyaarini kameetha. Omaanta teerika okameethatz pantayitzirini, ari pithaawantakyaari. Tee ratsipetashita ipinkathariwenantzi. Ikowakaakiri Tajorentsi rowashironkagaeyerini maawaeni antzirori kaari kameethatatsi.

<sup>5</sup> Tee akoyi rowashironkagaeyeeni Tajorentsi, omaanta akowaki antero imotiziriri, rootaki okameethatantari apinkathateri pinkatharipaeni.

<sup>6</sup> Rootaki eejatzi pipagaanantariri pinkatharipaeni piyorikite. Pipinatakiri ranantyaawori ikowakayiriri Tajorentsi: ipinkathariwenteeyaki-mini.

<sup>7</sup> Pipinateeyeerini maawaeni okaatzira pireewitakiriri: pipaeri koriki, impoeshito oetarikapaeni. Pikemijantaperoeyerini eejatzi pipinkathateeyerini.

### *Kameetha anintawakaaperooyaani, maawaeni*

<sup>8</sup> Eero pireewitayitzirini atziri oetarikapaeni, inta pinintaperotawaka-gaeyaani. Aririka anintawakagaeyaani, amonkaatayiteroni rojankinatayitzirini Moeseeshi, maawaeni.

<sup>9</sup> Ikaminaakini: "Eero piñaathatzimotawo piina paashini tsinani, eero piñaathatzimotari piimi paashini shirampari, eero powamaantzi, eero pikoshitzi, eero piñaenatawato rashitayitarini paashini atziri". Osheki eejatzi ikantakirini. Eejatzi ikantakini: "Pikimitaaga eero ka pikaminthaaga, eejatzi pikimiteeyirini paashinipaeni pikaminthagaeyerini, pinintaper-ooyerini". Aririka anteeyakironi iroka, tema amonkaatakiro maawaeni ikantakirini Moeseeshi.

<sup>10</sup> Aririka anintashireperoteri paashini atziri, tekatsi akantya akijashireeri tema amonkaatakiro maawaeni ikantzirini Moeseeshi.

### *Eero ojamanitzi ipiyashitaate Awinkatharite*

<sup>11</sup> Eero ojamanitzi ipiyashiteeyeeni Awinkatharite ragaeyantaateerini atsipateeyantyaaririni. Paerani aapatziyantakaririni, aetashiteeyaw-itakarini, ari ojamanitanaki ipiyanteeyari. Iroñaka aamagaeyakarini, rootaki okameethatantari ajeeke kameetha.

<sup>12</sup> Aririka antapiintero kaari kameethatatsi, kimitaka ajeekaki tsiteniriki, amanantawori antayitzirini. Aririka ajeeki kameetha, kimitaka ajeekaki kitejiriki, tee apashiwentakaawo antayitzirini. Ari iroñaka oshiyawitakawo rooteentsi okitejitee, tema rootzimateentsirika ipokae Awinkatharite eejatzi. Eero antapiintziro iroñaka kaari kameethatayitatsini, inta okameethatz ajeekaeyeni kameetha.

<sup>13</sup> Thame iroñaka kameetha ajeekaeyeni. Eero antayiteeroni kaari kameethatayitatsini, eero ashinkiteeyaani, eero añaathatawo kaari ayi, eero oñaathatar kaari ayi, eero akijawakagaa, eero añaawenataperotzitari rowaa-gawo paashini atziri,

<sup>14</sup> eero antayitzironi kaari kameethatatsi akowayitzirini eejatzi ak-enkithashiryayitzirini. Omaantakya thame akanteri Awinkatharite Je-sokirishito ramitakoeyeeni kameetha ajeekaeyantyaarini.

## 14

### *Okameethatziraakameethatawakagaeyaani maawaeni atziri*

**1** Ikowakirika paashinipaeni aapatziyariri Jesoshi ikaateeyemini piñaaperoeyerini Tajorentsi, ari paakameethateeyawakirini. Tekirarika riyotaperotayiteroni maawaeni ikowakagaeyakaerini Awinkatharite, omaanta eero pipiyawaantetakotari okaatzi riyotawitari riori.

**2** Noshiyakaawentemiro. Eenitatsi kantatsiri okameethatziraakameethatawakagaeyaani iitarikapaeni: iwatha, shinki, chocokipaeni, maawaeni. Omaanta eenitatsi paashini kaari yotaperotatsi: iitawitachari tee okameethatziraakameethatawakagaeyaani iwatha.

**3** Pamatari eeroka powapiintari iwatha, eero pimanintaneentziri riraga kaari owari. Eejatzi, teerika powapiintyaari iwatha, eero pikantzi: "Tee ikameethatziraakameethatawakagaeyaani iwatha". Tema riroteeyakini itomipaeni Tajorentsi, ifñaaperoeyakirini riori ikameethatziraakameethatawakagaeyaani iwatha.

**4** Tema rirotaki Tajorentsi Iwinkatharite. ¿Okameethatzima pikante eerori: "Tee ikameethatziraakameethatawakagaeyaani iwatha". Tema Tajorentsi kantawenterini riori okameethatzirika rantayitakirini, eejatzi ramitakoteri rantayitakironi kameethatayitatsirini.

**5** Eejatzi eenitatsi paashini kantayitatsirini: "Tee omonkaatawakagaeyani kitejiripaeni, inashitakagaeyawoni apaanipaeni kitejiri añaaperotaperotantyaariri Tajorentsi". Irira paashini ikantzi: "Okameethateeyini maawaeni kitejiripaeni añaaperotantyaariri, tee inashitayitani". Ari okameethatziraakameethatawakagaeyaani iwatha.

**6** Riraga kantatsiri: "Ninashitakagaawo apaanipaeni kitejiri noñaaperotantaariri", tema ikowaki ipinkathateri Awinkatharite. ¿litaka athañaakontantyaariri? Riraga paashini, rowari iwatha, ipaasonkitziri Awinkatharite, eejatzi ipinkathatziri. ¿litaka athañaakontantyaariri? Eejatzi riraga kaari owari iwatha, ipaasonkitziri Awinkatharite eejatzi ipinkathatziri riori. Tema eejatzi okameethatziraakameethatawakagaeyaani iwatha.

**7** Tee ajeekawaetashita apaniroeni aaka iroñaaka anantyaawori akowayitzirini. Eero akantashita oetarika antayiterini iroñaaka, eejatzi tsikarika okaate akamantyaari.

**8** Iroñaaka añeeyatyeneen aari, kameetha apinkathateeyirini Awinkatharite, anteniri riori maawaeni ikowakagaeyakaerini. Riotaki kowakagaeroni tsikarika okaate akame, omaanta akantatyeyaaani apinkathateeyirini. Ikantani ipinkathariwenteeyirini añaatsiri eejatzi kamaentsiri, maawaeni.

**9** Ikowaki Jesokirishito ipinkathariwenteeyerini añaatsiripaeni eejatzi kamatsiripaeni, rootaki ikamantakari eejatzi ipiriinantaari.

**10** ¿litaka pikantakontakariri piyemijantzinkarite: "Tee ikameethatziraakameethatawakagaeyaani iwatha". Eero pipeyakotziro iroka: iinja añaagaeerika Tajorentsi, roojatzi ijekanaki Jesokirishito Iwinkatharimentoki ikantantereeri okameethatzirika anteyeyakirini aari.

**11** Iroka ikantzi Awinkatharite Iwaperiteki: "Nokantani nañaaperotzi naaka, kyaaryootaki iroka nokamantemiri. Iinja rotziwerowashiteeyenani maawaeni atziri ipinkathateeyenani. Ikanteeyenani: 'Eeroka Tajorentspiro'".

**12** Kyaaryo, añaagaeerini eejatzi, ari akamantteeyerini maawaeni okaatzika antayitakirini jaka kipatsiki, roojatzi ikantakoeyantakarini okameethatzirika antayitakirini.

*Kyaaryoowa, pantakaerikari piyemijantzinkarite kaari kameethatatsi*

<sup>13</sup> Ari iroñaaka tee okameethatzi akantakotantariri ayemijantzinkarite oetarika, akante: "Tee okameethatzi rantayitzirini rirori". Kyaaryoowa, pipakaakaerikarira raapatziyari Jesoshi.

<sup>14</sup> Riyotaakina Awinkatharite Jesoshi, rootaki niyotantakari okameethataki maawaeni rowaetayitarini. Okameethatzi oyaari iwatha. Omaanta riraga iitashitachari: "Tee okameethatzi oyaari iwatha", ari okameethataki eero rowantari rirori; rooma tee okameethatzimotziri aririka rowakyaa ri rorri.

<sup>15</sup> Eejatzi eerori, aririka poyimotaari piyemijantzinkarite ipinkakirira rirori, aritaki powashiretakaakyaari: tee okameethatzi. Aritaki pikenkithashiryaaakaanakyaari, tee pinintaperotziri. Tema ikamawentakiri Jesokirishito rirori, iroñaaka eero pitheenkakaeri.

<sup>16</sup> Piiteeyawitani okameethatayitakini pantayitakirini, omaanta kyaaryoowa, ikantzimawentzimirokari paashinipaeni.

<sup>17</sup> Aririka apinkathatakiri Tajorentsi, eero akenkithashiryayitzironi owayitarini eejatzi irayitzirini; omaanta akemijantaperotero Ishire Tajorentsi akameethatantyaari, ajeekantyaari kameetha, akimoshirewenteeyantyaaworini rowaga Ishire.

<sup>18</sup> Aririka kameetha akemijantaperotakiro, ari kameetha antawaeteniri Jesokirishito. Roojatzi ifnaaperoeyeeni Tajorentsi eejatzi maawaeni atziri-paeni akameethatzi.

<sup>19</sup> Thame iroñaaka aakameethateeyerini ayemijantzinkarite, maawaeni; eejatzi ikimitee rirori, raakameethateeyeeni. Eejatzi ayotaawakagaeyaani kameetha aapatziyaperoyantyaaririni.

<sup>20</sup> Piyoterika ari pookakaakiri atziri raapatziyari Jesoshi tema poyimotakiri iwatha, okameethatzi eero poyimotari iwatha. Kyaaryo okameethatzi oyaari iitarikapaeni, omaanta tee okameethatzi ookakayeri atziri raapatziyari Jesoshi.

<sup>21</sup> Tee okameethatzi pantero oetarikapaeni pookakaantyaariri atziri raapatziyakari Jesoshi: eero powashitari iwatha, eero pirashitawo pyaarentsi eejatzi kepishaari, oetarikapaeni, maawaeni.

<sup>22</sup> Aririka piyotaki ishinetakimiro Tajorentsi oetarikapaeni, eero pikantakowenanteeyarini riraga kaari ametawo, eero pikantawakaawentawo. Aririka piyotaperotaki okameethataki pantayitakirini, tema ari pikimoshiryaaoperotanaki.

<sup>23</sup> Omaanta piiterika tee okameethatzi oetarikapaeni rantayitzirini piyemijantzinkarite, eero pantashitawo eerori, otzimikari pantani. Teerika piyotzi ikowakaakimiro Tajorentsi pantero, tee okameethatzi pantashityawo.

## 15

*Pikenkithashiryaaakotaari                      piyemijantzinkarite,                      eero  
pikenkithashiryaaakotashita apaniroeni eeroka*

<sup>1</sup> Ñaakiro, aririka aapatziyaperotakyaari Jesoshi eejatzi ayoteeyakini okameethatayitakini iroka nokenkithatakotakiri, omaanta okameethatzi akenkithashiryaaakoeyarini riraga kaari shintsishireperotatsini, tekira riyoperotzironi kameetha Iwaperite Tajorentsi. Eero antashitawo akowakaayitarini aari,

<sup>2</sup> omaanta akenkithashiryaaakoeyerini ayemijantzinkarite, ikimoshireyantyaarini riroripaeni. Eejatzi amitakoeyerini riyoperotantyaari, raapatziyaperotantyaariri.

<sup>3</sup> Tema eejatzi riraga Jesokirishito, tee rantashitawo ikowakari irira. Tema rojankinatakotzitakan paerani: "Riraga Jesokirishito ikantziri Iriri: 'Iki-jeyakinani maawaeni kijeejakimirini eerori'".

<sup>4</sup> Rowaga Ishire Tajorentsi ojankinatakaakiri paejazziiteni ayoteeyantyaaworini kameethatayitatsirini antayiterini, eshiwenantyaawori pomeentsitzimoyiterini oetarikapaeni, aweshiryaaawenantyaariri Tajorentsi, eejatzi ayotaperotantyaari iinja ajeeke kameetha janta inampiki.

<sup>5</sup> Nokowaki Tajorentsi ramitakotapiinteeyakaeni eshiwenantakawori akemaatsitayitakarini oetarikapaeni, eejatzi riweshtyaaakagaeyakaeni. Nokowaki iroñaaka ramitakoeyemini paakameethatawakagaeyaani. Rootaki ikowakagaeyakimirini Jesokirishito eejatzi.

<sup>6</sup> Tema amonkaatawakagaeyakaani akanteeyeni: "Tema ikameethataki Pawa Tajorentsi eejatzi Awinkatharite Jesokirishito".

<sup>7</sup> Tema raakameethateeyakaeni irira. Iroñaaka pikimiteeyaarini, paakameethatawakagaeyaani maawaeni, iñaaperoeyantyaaririni atziri Tajorentsi ikameethatzi.

<sup>8</sup> Paerani ipokantakari Jesokirishito jika kipatsiki, retakoeyakarini ijori-iyotzinkaritepaeni ryoteyantakarini tee ramatawiteeyirini Tajorentsi. Eejatzi riyotakagaeyakirini imonkaateeyeroni maawaeni ikantakiririni ichariniiteni paerani.

<sup>9</sup> Eejatzi ikowakaakiri ryoteyeyeni paashinijatzitsiri atziri ineshironkaeyakirini, ikanantyaari rirori: "Tema ikameethataki Tajorentsi". Rootaki okantzirini Iwaperite Tajorentsi: "Nokamanteeyerini paashinijatzitsiri atziri: 'Ikameethataki Tajorentsi, thame omampaawenteeyaarini'".

<sup>10</sup> Eenitatsi paashini Iwaperite Tajorentsi kantatsiri: "Tee eero kaanaawita joriyo, omaanta pikaateeyerini rirori piweshtyaaawenteeyaarini Tajorentsi".

<sup>11</sup> Paashini eejatzi rojankinataki, okantzi: "Maawaeni kaari joriyyotsi ikanteeyeni: 'Tema ikameethatzi Tajorentsi'. Piñaaperoeyerini maawaeni".

<sup>12</sup> Eejatzi riraga Iseeyashi rojankinzini: "Itzimini icharineeten Isayii, ipoke ipinkathariwenteeyerini paashinijatzitsiri atziri, ryoteyakini rowawiyaakoeyerini".

<sup>13</sup> Tema ayoteeyakini imonkaateeniro Tajorentsi maawaeni ikantakaeri. Pameenteeyakarini, rootaki nokowantakari roemoshirenkaeyemini, kameetha ijekakagaeyemini. Roojatzi otajonkawenteeyemini Ishire Tajorentsi piyotaperotantyaari eero ramatawitzimi Tajorentsi, ithotaakimiro maawaeni ikantakimiri.

### *Osheki ikowaki Paaworo ikenkithate*

<sup>14</sup> Iroñaaka, noyemijantzinkarite, niyotaki pikameethateeyakini, eejatzi piyoperoeyakironi iñaani Tajorentsi pimateeyantakaworini piyotaawaka-gaeyakawoni.

<sup>15</sup> Iroñaaka osheki nojankinateeyakimironi, nokenkithashiretakaakimiro maawaeni iroka eero pipeyakotantawo. Kyaaryo, ineshironkatakina Tajorentsi,

<sup>16</sup> rootaki rotyaanantakinari nokenkithatakagaeyerini riraga kaari joriyyotatsi. Nokamanteeyakirini atziri tsika ikanta Jesokirishito rowawi-jaakoeyantakaerini. Roojatzi owameethaperoeyakirini Ishire Tajorentsi maawaeni raapatziyari Jesoshi, roojatzi raakameethateeyakirini Tajorentsi.

<sup>17</sup> Rootaki niweshtyaaawenantakimiri: ryoyaakina Jesokirishito noka-manteeyakimini tsika ikanta Tajorentsi.

**18** Eero nokenkithatakotashitayitawoni oetarikapaeni, apatzirokyo nokenkithatakotero imatakaakinari. Riraga paashinijatzitsiri atziri iñeyakinani, eejatzi ikemaeyakinani, rootaki raapatziyantayitaaririni Jesokirishito.

**19** Otajonkakaakina Ishire Tajorentsi, nomatayitantaworini oetarikapaeni kaari ifñaapiintzi atziripaeni.

Ari nokenkithatakagaeyakirini atziripaeni janta, nitanakawo nokinanaki Jerojareeki, tema nothotaanakiro maawaeni nampitsikipaeni roojatzi na-reetantaka janta Iriiriyaki. Nokamanteeyakirini tsika ikanta Jesokirishito rowawijaakotantzi.

**20** Nokowaperotaki nokenkithatakagaeyerini riraga kaari iyotakoeyiririni irira. Tee nokoyi napiitakotapaeri naari tsikarika paashini atziri ikenkithatakotakiri.

**21** Tema okantzi Iwaperite Tajorentsi: "Ikemero riraga kaari kemakowitawori; riyoteeri riraga kaari yotawitariri".

**22** Ari osheki nokenkithatakagaeyakirini kaari yotatsi, rootaki kaari na-reetanta pijekira eerori.

**23** Omaanta nothotaagaeyakironi nampitsi jaka, nokenkithatakagaeyakirini jeekayitatsirini, eejatzi osheki ojarentsi nokowawita noñeemimi,

**24** rootaki niyaatantyaari iinja pinampiki. Tsikarika okaate nojeekimoeyanakimini roojatzi nawijantanakya janta Eshipaañaki. Nokowaki eejatzi pamitakotena nowaaganakya janta.

**25** Omaanta nitapaentyaawoota niyaatapaente Jerojareeki, nagaeyanakinirini ayemijantzinkarite

**26** iyorikite ipakaantziriri riraga masheroonyajatzi eejatzi riraga akaaya-jatzi. Ipiyoteeyiniririni ashironkaenkari koriki.

**27** Aritaki ikowakaakawo ineshironkaeyerini joriyyopaeni janta Jerojareeki. Tee isheninkawitari, omaanta tema riroteeyakini itakariri ikaman-teeyakirini tsika ikantyaari rawijakotanteeyaaarini. Ikanteeeyini: "Tema rirotaki aapatziyakagaeyakaerini joriyyopaeni, rootaki okameethatantari iroñaaaka akaminthagaeyerini riori. Apaeyerini koriki ramananantyaawori koetyeemotakariri".

**28** Aririka nopapaakiri koriki ipiyoteeyiniririni, ari niyaate pinampiki. Roojatzi nowaaganeeya, roojatzi Eshipaañaki.

**29** Niyotaki aririka nareetapaakimi nokenkithatakapaakimi piweshiryaawentaperotantyaariri Jesokirishito.

**30** Iroñaaaka, noyemijantzinkarite, tema akimitawakagaeyakanii aapatziyakari Awinkatharite Jesokirishito, eejatzi iyotagaeyakaeni Ishire Tajorentsi arintaperotawakagaeyakanii. Nokowaki iroñaaaka pamaneri Tajorentsi pikanteeyerineri ramitakotena,

**31** eero raantana riraga theenkantatsiri janta Joreeyaki. Eejatzi pikanteri riyotagaeyerini riraga jerojareejatzi ikimoshirewenantyaariri koriki ipakaantziriri iyemijantzinkarite.

**32** Roojatzi aririka ikowakayena Tajorentsi, nareeteeyapaakimini, osheki nokimoshiretapaaki. Eejatzi osheki oemoshirenkawakagaeyaani maawaeni.

**33** Tema ijekakagaeyakaeni kameetha Tajorentsi, maawaeni. Nokowaki kijokiro rowaeyanakimini. Aritaki okantyaari.

<sup>1</sup> Iroñaaka nokamantemi: iinja iyaatashitemi oñeemi ayemijantzinkawote Jeewera. Opoñaaka Shinkereyaki, osheki etakoeyakarini aapatziyariri Jesoshi janta.

<sup>2</sup> Nokoyi paakameethateeyawakironi, tema rootaki aapatziyariri Awinkatharite. Petakoeyaawoni, pipayitawakironi maawaeni koetyeemotyaaworini. Tema etakoeyakarini osheki ayemijantzinkarite; eejatzi naari, etakotapiintakina.

<sup>3</sup> Niwethatawo Pirishiira eejatzi riraga Akiirishi. Osheki ramitakoeyakini niori nantawaeteeyinirini Jesokirishito.

<sup>4</sup> Paerani rooteentsi rowamagaetenami, omaanta owawijaakotakina Pirishiira eejatzi riraga Akiirishi. Owawijaakontakinari, rooteentsi rowamagaeteromi roori, eejatzi oemi. Osheki nopaasonkiteeyakironi: naari eejatzi maawaeni ayemijantzinkarite jaga, riraga kaari joriyyoteeyatsini.

<sup>5</sup> Niwethateeyarini maawaeni aapatziyariri Jesoshi piyotapiinteecharini jaga opankoki. Niwethatari eejatzi Epeneeto, nonintaperotakiri riori. Paerani nokenkithatakantakariri riraga aashiyajatzi, rivotaki jewateentsiri raapatziyakanakari Jesokirishito.

<sup>6</sup> Niwethatawo Mariiya, tema osheki etakoperoeyakimini roori.

<sup>7</sup> Niwethateeyarini notsipaminthari Antorooniko eejatzi Jooniyashi. Paerani notsipateeyakarini romonkyaagaetakina omonkyagamentotsiki. Osheki iñaaperoeyakirini riraga rotyaantanewopaeni Jesokirishito. Reewateeyakinani naari, raapatziyaperotakari Jesoshi paerani.

<sup>8</sup> Niwethatari Ampiiriyashi, raapatziyakari riraga Awinkatharite, osheki nonintaperotakiri riori.

<sup>9</sup> Niwethatari Orowaano, osheki ikaateeyakinani nokenkithatakotakiri riraga Jesokirishito. Eejatzi riori Eshitaakishi, niwethatari; osheki nonintaperotakiri.

<sup>10</sup> Eejatzi niwethatari Apereeshi; riraga Jesokirishito osheki iñaaperotakiri ikameethatzi, tema osheki ikemaatsitawenziniri. Niwethatari Arishitooworo, eejatzi maawaeni jeekatsiri ipankoki.

<sup>11</sup> Niwethatari nojoriyyotzinkarite Erooriyo. Niwethateeyarini riraga aapatziyariri Awinkatharite riraga jeekatsiri ipankoki rashni Narishiisho.

<sup>12</sup> Niwethateeyawoni Terijena, eejatzi Terijoosha, tema roojatzi antawaetziniriri Awinkatharite. Eejatzi okimitaka Peereshira, niwethatawo. Osheki nonintaperotakiro.

<sup>13</sup> Niwethatari Roojo, riraga aapatziyariroña Awinkatharite. Eejatzi niwethatawo riniro, osheki etakotakina nokimitakaantakawo ro nana.

<sup>14</sup> Niwethateeyarini Ashiinkirito, Jerekonte, Reemashi, Patoroowashi, Eeremeshi, eejatzi maawaeni ayemijantzinkarite tsipateeyaririni.

<sup>15</sup> Eejatzi niwethateeyarini Jirooroko, Joorya, Neeryo, eejatzi ritsiro, rowaga Oriimpashi, eejatzi maawaeni aapatziyeyyaririni Jesoshi tsipateeyaririni, maawaeni.

<sup>16</sup> Piwethatawakaya, paakameethaperotawakagaeyani. Riwethateeyimini maawaeni aapatziyeyyaririni Jesokirishito jeekatsiri paashinikipaeni nampitsi.

<sup>17</sup> Iroñaaka nokantemi, noyemijantzinkarite: piyoteeyerini riraga iyota-gaeyiririni ayemijantzinkarite ikantawakagaeyani, eejatzi piyoteeyerini antakayiriri kaari kameethatatsi, eejatzi kantzimiri: "Tee okameethatzi paapatziyawo iroka riyotagaeyakimirini". Eero pitsipateeyarini, eero poy-aaateeyirini.

<sup>18</sup> Tee rantziniri riori ikowakagaeyawitaririni Awinkatharite Jesokirishito, omaanta rantashiteeyawoni ikowayitzirini riori. Kameetha

iñaaawaetawita, omaanta ikowaki ramatawiteeyerini kaari tzimatsini riyotantari.

<sup>19</sup> Riyoteeyakimini atziri pikemijantaperotakiri Awinkatharite, rootaki niweshiryaawenantakimiri. Omaanta nokowaki piyotaperoeyeni pantero maawaeni kameethatayitatsirini; omaanta roori kaari kameethatatsi, eero pantaneentziro eechonkiini.

<sup>20</sup> Tema Tajorentsi jeekakagaeyimirini kameetha. Eero ojamanitzi ranaakotaperoteri Jatanaashi eero rantakaanteemiro eejatzi kaari kameethafatsi. Nokowaki iroñaaka ineshironkaeyemini Awinkatharite Jesokirishito.

<sup>21</sup> Riwethateeyimini Temoteeyo; itsipatakina nantawaeteeyinirini Jesoshi. Eejatzi riwethateeyimini notsipaminthari Rooshiyo, Jasoo, eejatzi Soshipatere.

<sup>22</sup> Naaka Teereshiyo jankinatziniriri Paaworo iroka. Eejatzi naari, aapatziyariri Awinkatharite. Niwethateeyimini naari.

<sup>23</sup> Eejatzi riwethateeyakimini rirori Kaayo. Nojeekimotziri jaka ipankoki. Eejatzi ipokapiintzi aapatziyariripaeni Jesoshi jaka ipankoki, osheki raakameethateeyakinani, ineshironkaeyakinani. Riwethateeyimini Eraashito, riraga kempoyeeyiniririni iyorikite jeekatsiri jaka. Eejatzi riwethateeyimini ayemijantzinkarite iitachari Kowaarito.

<sup>24</sup> Nokoyiri Awinkatharite Jesokirishito ineshironkateeyemini maawaeni eero ka. Aritaki okanty.

### *Ikaatakiro rojankinari*

<sup>25</sup> Thame iroñaaka apinkathateeyerini Tajorentsi. Rirotaki matakaakimiri pikemijantaperotantakariri, aririka ameentaperoeeyakaawoni iroka no-kenkithatakotakimiri Jesokirishito. Paeraniperoroina tee riyoteeyini riraga itakaantaworini ari ipokaki rirori rowawijaakoeyeeni. Tee ikamantzirini Tajorentsi,

<sup>26</sup> omaanta iroñaaka riyotakagaeyakaeni. Rojankinatakaakirini riraga kamanantayitzirorini iñaani paerani, eejatzi iroñaaka rotyaanteeyakinani naari nokamanteeyakirini maawaeni atziripaeni: "Okameethatzi paapatziyeyarini Tajorentsi". Tema okameethatzi aapatziyaperotyaari rirori, tee ikamanitzi irira, ikantatyaaani rañi.

<sup>27</sup> Osheki riyoperotziroña apaniroeni rirori. Thame, maawaeni aapatziyeyarini Jesokirishito, akanteeyeni: "Tema ikameethaperotaki Tajorentsi". Aritaki okantyaani.

Naaka ojankinatzimirori:

Paaworo

## RITAKAWO PAAWORO ROJANKINATEEYAKINIRINI KORINTOJATZI

**1-2** Nokoyi niwethateeyimini eerokapaeni, noyemijantzinkarite janta Korintoki, tsikarika pikanta pijeeki. Naaka Paaworo jankinateeyimirorini iroka. Tema riyoyaakina Tajorentsi, rootaki rotyaanantakinari Jesokirishito, ikowakaakina nokenkithatakoteri. Notsipatari jaka Jooshiteneshi nojankinateeyimironi maawaeni aapatziyeyayaririni Jesoshi jaga. Paapatziyakari rirori, rootaki rowameethateeyantakimirini; iroñaaka pisheninkatakari Tajorentsi. Pikimiteeyakarini maawaeni ameenteeyakaririni Awinkatharite, rootaki rowawijaakotantakariri. Tema iroñaaka ashenkinateeyakarini maawaeni aapatziyeyayaririni rirori tsikarika ijeekaeyini.

**3** Nokowaki ineshironkaeyemini Pawa Tajorentsi, eejatzi nokowaki kameetha ijekakagaeyemini. Eejatzi ikimiteeyemini riraga Awinkatharite Jesokirishito.

### *Riwershiryaawenteeyayarini Paaworo korintojatzi*

**4** Paapatziyakari Jesokirishito, rootaki ineshironkaeyantakimirini Tajorentsi, rootaki iroñaaka nokanantariri: “Ariwee, pimatagagaeyakirini korintojatzi”.

**5** Osheki itajonkakowenteeyakimini rirori, kameetha ijekakagaeyakimini, riyotakaaperoeyakimironi oetarikapaeni ikowakagaeyakimirini. Eejatzi imatakaakimiro piyotagaeyakirini paashinipaeni atziri tsika ikantya rirori rawjakotanteeyaaari.

**6** Tema monkaataka nokanteeyakimirini paerani: kyaaryo ranteeyakimironi Jesokirishito maawaeni.

**7** Tema rirotaki Awinkatharite: paamagaeyaari roojatzi ipokanteeya. Tema itajonkakowentakimi pimatantakawori pantziniri oetarika ikowakagaeyakimirini, tekatsi koetyeemotemini eejatzi.

**8** Ikanteetatyeyaaani ramitakotemi eekiro piyaatatayee pameentyaari rirori kijokiro poyer; roojatzi, aririka ipokae, iñaaaperoeyapaemini pikameethatzi. Eero ikijawentapaemiro pantayitawitarini.

**9** Eero ramatawiteeyimini Tajorentsi, aritaki imatakimirio okaatzi ikashiyakaakimiri. Tema eeroka riyoyagaeyakimini pikempiyaminthatantyaariri Itomi Awinkatharite Jesokirishito.

### *Ikantziri: “Pinintaperotawakagaeya”*

**10** Noyemijantzinkarite, tema apinkathateeyirini Awinkatharite Jesokirishito. Rootaki iroñaaka nokantakowenanteyantzimirini kameetha inimoeyakimini maawaeni, eerokya pikenkithashiryaantawo oetarikapaeni. Pikempiyaminthatawakagaeyani, eero pikantawakaawenteeyawoni oetarikapaeni.

**11** Rootaki nokantazimiri iroka, tema ikamantapaakina okaateeyinira Koroe osheki pipiyapiyawaantetawakagaeyanakan.

**12** Eenitatsi kantashitacharipaeni: “Naapatziyari naari Paaworo”. Eenitatsi paashini kantashitacharipaeni: “Riro naapatziyari Apooro”. Paashini kantashitacharipaeni ikantzi: “Riro naapatziyari Sheejashi”.<sup>\*</sup> Paashini kantashitacharipaeni eejatzi ikantzi: “Naaka apatziro naapatziyari Jesokirishito”. Rootaki nokantazimiri: “Eero pipiyawaantetawakagaeyani”.

\* **1:12** Sheejashi rootaki inashita iwaero Peetero.

<sup>13</sup> ¿Itsiparyaakama Jesokirishito? Tee, rirotaki apaani. ¿Nokentakotawentakimima naaka? ¿Pikaawoshitakotakinama naaka? Teewee.

<sup>14</sup> Iroñaaka nopaasonkitziri Tajorentsi tee nokaawoshitakoteeyimirini Tajorentsi. Inta apatziro nokaawoshitakotakiri Tajorentsi Kiriishipo, eejatzi Kaayo.

<sup>15</sup> Tektsi kantashitachani: “Pikaawoshitakotakari Paaworo”.

<sup>16</sup> Eejatzi nokaawoshitakotakiri Tajorentsi riraga Eshiteejana, eejatzi ikaateeyinira. Tee nokenkithashireeyari paashini nokaawoshitakotakiririka Tajorentsi.

### *Jesokirishito rirotaki iyothanitatsiri eejatzi itajorenka Tajorentsi*

<sup>17</sup> Tee rootaki rotyaanantenari Jesokirishito nokaawoshitakotanteri Tajorentsi, intakya rotyaanantanari nokamantakotziro kameethatatsiri. Nokamanantzirika, tee nokantakaaperothatakayaawomi noñaani. Nokantakaaperothatakayaawomi, eero okameethatzimi. Piitakaashiiyanikari ikowakaakimi Tajorentsi piyoteeyeni osheki pawijakotanteeyaaari. Omaanta rirotaki Jesokirishito kamawenteeyakaerini koroshiki, rootaki rowawijaakoeyantakaerini: rootaki iroka nokowakiri niyotakagaeyemini.

<sup>18</sup> Aririka akamantawityaari riraga jatatsini paamariki kaari tsiwakanittsini: “Ikamawentakimi Rotyaantanewo Tajorentsi koroshiki, ikowawita rowawijaakoeyemini”, tema ishirontawenteeyakaeni. Omaanta aaka, awijakoeyakaeni, ayoteeyakironi iroka iñaani rootaki itajorenka Tajorentsi omatantawori owawijaakoeyakaeni.

<sup>19</sup> Aritaki rojankinateetzini: “Ikantzi Tajorentsi: ‘Nothonkiteeri ryotantawitari riraga yotayitawitacharini. Nopeyapithateeri kenkithashiryaaawitachari okaatzi ikenkithashiryaaawitari’”.

<sup>20</sup> ¿Tsika ikantyaaka iroñaaka yotzinkari? ¿Tsika ikantyaaka iroñaaka iyotaantzirori Iwaperite Tajorentsi? ¿Tsika ikantyaaka eejatzi riraga yotaawakaachari? Tema itheenkakiro Tajorentsi maawaeni ryoteeyawitarini atziripaeni.

<sup>21</sup> Tema irira yotawitachari tee ryoteeyirini Tajorentsi. Omaanta irira ryotanetzi, rootaki ikowantari rowawijaakoeyerineri maawaeni aapatziyawori okaatzi nokamanteeyakiririni: riraga ameenteeyakaririni. Omaanta riraga theenkantatsiri ishirontawentashitakina okaatzi nokamantawitakariri.

<sup>22</sup> Tema ikowaki joriyyopaeni atajonkeniri oetarikapaeni ryotantyaari itsipatake Tajorentsi. Riraga kireeshiyajatzi ikowaki ryotaashitawakaapi-intyaawo oetarikapaeni.

<sup>23</sup> Omaanta nokamantziri atziri: “Ikamawentakae Jesokirishito koroshiki rowawijaakoeyantakaerini”, rootaki ikijantakinari joriyyo. Omaanta irira kaari joriyyotatsi, ishirontawenteeyakawoni okaatzi nokamantziriri.

<sup>24</sup> Omaanta ijeki ryoyagaeyakirini Tajorentsi rowawijaakoteri: joriyyo, eejatzi kaari joriyyotatsi. Ryotakagaeyakirini rirori eenitatsi itajorenka Jesokirishito, rowawijaakontantyaariri. Eejatzi eenitatsi iyothanetaantsi ryotakakae okaatzi ikowakaakaeri Iriri.

<sup>25</sup> ¿Litaka itheenkayantaririni atziri Tajorentsi? Tema irira anaakoperotantatsiri ryotzi. Tema rirojatzi anaakoperotantatsiri ishuntsitzi. Tee añiiri atziri kimityaarini.

<sup>26</sup> Pikenkithashireeyakya, noyemijantzinkaritepaeni, tsika pikanteeyawitarini ikaemanteeeyakimirini Tajorentsi. Osheki itheenkayakimini patzritzinkarite, ikanteeyini: “Tee ryotzi aapatziyariri Jesoshi”. Kyaaryo, tee peewawenteeyirini, eejatzi tee pashaaganta, rootaki itheenkayantzimirini.

<sup>27</sup> Ishirontawenteeyawitakimini atziri, tee iñaaperoeyawitzimini, tema ikenkithashiryaaakotawitakimi tee piyotzi, omaanta ryoyaakimi Tajorentsi

rowawijaakoeyemini. Riyotakaaperoeyemi, ipeyeeyemini jewawenantatsini. Roojatzikya ipashiwenanteeyanakyaani shirontawenteeyawitzimirini, theenkaeyawitzimirini.

<sup>28</sup> Riyoyaaperotakiri Tajorentsri riraga kaari jewatatsiri, riraga pinkimayitawitaririni atziri, riraga theenkapiintawitariri: irira reentsitetaperoeyarini rirori. Omaantakya riraga jewawenantawitachari eejatzi yoteeyawitacharini rowashironkagaeyirini.

<sup>29</sup> Iroñaaka tekatsi ikantya atziri ikantakaaperotzimotaari Tajorentsi.

<sup>30</sup> Paapatziyakari Jesokirishito, rootaki rowañagaeyantakimirini Tajorentsi, ijeekakagaeyemini inampiki. Tema rirotaki Jesoshi riyotakagaeyakaeni, owameethateeyakaerini, rinashitakaakae amatantyaari ashiperotyaari rirori, owawijaakoeyakaerini.

<sup>31</sup> Tema aritaki rojankinateetzironi: "Eero akantakaaperota aaka, omaantakya añaaperoteri Awinkatharite ikameethaperotzi".

## 2

### *Tsika ikanta Paaworo ikenkithatakaantapiintzi*

<sup>1</sup> Eejatzi naaka, nareetantapaakimiri, noyemijantzinkarite, nokenkithatakotapaakiri Tajorentsi. Tee nokantakaaperothatapaakawo noñaani, tee niyotaashitayitapaeemironi niyotayitzirini naaka; apatziro niyotaapaemiro ikantziri rirori.

<sup>2</sup> Eenironi notsipatzimi apatziro nokowaki nokenkithatakotapaakiri Jesokirishito, ikamawenteeyakaeni koroshiki. Tekatsi paashini nokenkithatakote.

<sup>3</sup> Nopashiwentashiryaawitapaaka, nothaawashiryaawitapaaka, okimityaami nokinakashiryaashityaawomi. Nokenkithashiryaakotakawo, aamashitya eero nomatziro kameetha naapatziyakaakimiri Jesoshi eeroka-paeni.

<sup>4</sup> Pamine, nokenkithatakapaakimi eejatzi nokamantapaakimiro iñaani Tajorentsi, omaanta tee niyotaashitapaeemiro niyotayitzirini naari. Iyotaakaaperotakimi Ishire Tajorentsri kyaaryootaki ini, eejatzi itajonkakowenteeyakimini piyotantawori kyaaryo niyotaakimiri.

<sup>5</sup> Rowaga riyotagaeyawitzimirini atziri, tekatsi okantya owawijaakoeyemini, omaanta itajonkakowentakimi Tajorentsi pawijakoeyantakarini.

<sup>6</sup> Aririka niyotaapiintziri aapatziyaperotariri Jesoshi riraga yoperotzirori iñaani Tajorentsi, kyaaryo nothoyaakiniri irira niyotaaperoyirini, niyotaki ikemawakiro nokantakiriri. Omaanta tee niyotaashitari riyotayitziririni atziripaeni riraga kaari aapatziyariri Jesoshi eejatzi iwinkatharitepaeni. Eero owawijaakoeyirini roori riyotaawakaashitayarini oetarika riyotashitari riroripaeni.

<sup>7</sup> Omaantaka nokenkithatakotziro riyotayitzirini Tajorentsi. Paerani imanawitakawo, tee ayoteeyawitawoni. Paeraniperoroña, tekiranri riwetsikironi oetarikapaeni, ikantzitani: "Nojeekakagaeyerini kameetha jika nonampiki maawaeni riraga pinkathaperoeyenarini paata".

<sup>8</sup> Tee riyoteeyironi paerani riraga jewatatsiri. Aririkami riyoteeyakironimi, eeromi ikentakotakaantzirimti Awinkatharite, riraga kameethaperotatsiri.

<sup>9</sup> Rootaki rojakinatanteteakawori: "Eeniro riwetsikakiri Tajorentsi kaari iñaayitzini atziri, tee ikemakotziro, tee ikenkithashiri. Omaanta riwetsikiniri maawaeni nintaperotziriri ijeekantyaari kameetha".

<sup>10</sup> Omaantakya riyotakagaeyakaerini Tajorentsi aaka, tema rootaki owaagakaerori Ishire. Iyotaaperoeyakaeroni maawaeni, tema othotyaakironi maawaeni ikenkithashiryaakiririori.

<sup>11</sup> ¿Ninkama yotzirori ikenkithashiryaaari atziritzinkari? Tema apatziro riyotziro riori. Eejatzi okimitaku, tekatsi yoteroni ikenkithashiryaaari Tajorentsi: apatziro iyotzi Ishire roori.

<sup>12</sup> Pamine, tee akemijantashitayitawoni riyotayitzirini atziripaeni, inta akemijantakiro Ishire Tajorentsi. Rootaki ayotantakawori ikowaki Tajorentsi íneshironkateeyeen, ijekakagaeyeen kameetha.

<sup>13</sup> ¿Pikemakiroma nokantakimiri? Tee riyotziro atziripaeni, eejatzi tee riyotagaeteeroni, inta iyotagaeyakaerorini Ishire Tajorentsi. Iyotagaeyakaeni aaakapaeni rowaga jeekantashiretariri, ikemaeyantaworini irowa.

<sup>14</sup> Riraga kaari ojeekantashireta Ishire Tajorentsi, tee ikemawakiro okantayitzirini, inta ishirontawentakowo. Tekatsi ikantya ikemero. Ro kaari ikemantawo, tee ojeekantashiretariri roori. Apatziro ikemaeyironi iñaani Tajorentsi ojeekantashiretaperotari.

<sup>15</sup> Ikemathateeyakironi riraga atziri ojeekashiretantari, omaanta riraga theenkantatsiri tee ojeekantari, rootaki kaari riyotantawo oetarika kameethatatsiri.

<sup>16</sup> Pamine, rojankinatakoetziro Ishire Tajorentsi okantzi: ¿Eenitatsima yotzirori ikenkithashiri Awinkatharite? ¿Eenitatsima materoni riyoteeri Tajorentsi? Tee afiiirikya. Omaanta aaka ojeekantakae roori, rootaki omatero iyotakagae oetarika ikowakaakaeri Jesoshi antero eejatzi ayotero. Omaanta niyotziro naaka ikenkithashiri riori, tema riyotaakinawo.

### 3

#### *Ikijawakagaeyakan korintojatzi*

<sup>1</sup> Eejatzi naaka, noyemijantzinkarite, tee nokantzimi kimitakimi kemijantaperotziro Ishire Tajorentsi, inta nokantakimi kimitakimi kaari kemijantaperotziro. Tema pikimitaka owakira paapatziyari Jesokirishito, pikimitateyakarini eentsi.

<sup>2</sup> Rootaki niyotagaeyantzimirovini paerani kaari opomeentsitanya. Noshiyakaawentzimiro: okimitzimotakina nirakaakimiro tenitsi; tee nopaeyimiriini iwatha, tekira pimatziro powa. Roojatzi pikanta iroñaaka, tekira pimateeeyironi.

<sup>3</sup> Tekira pikemijantaperotziro Ishire Tajorentsi. Eeniropaa makotawakäyawoni oetarikapaeni eejatzi pikijawakagaeyakan, tee pikemijantaperotziro rowaga Ishire. Pikimitakotakari kaari aapatziyeyaririni Jesoshi.

<sup>4</sup> Aririka ikantzi apaani: "Naapatziyari Paaworo", eejatzi ikantzi paashini: "Naapatziyari Apooro". Tema pikimiteeyakarini kaari aapatziyariri Jesoshi.

<sup>5</sup> Pamine, ¿tsika ikantaka Apooro? Eejatzi, ¿tsika nokantari naari pikantawakaawenantanari? Naakateeyakini apatziro atziri, omaanta riyoyaakina Tajorentsi romperatena, rootaki naapatziyakaantakimirori.

<sup>6</sup> Okimitzimotakina nopankitziro naari okithoki pajankaneki. Rowaga okithoki oshiyakaawentziro iñaani Tajorentsi. Paapatziyimaetakawo. Linja Apooro, kimitawitaka thamaetatsiri, eekiro riyaataki riyotaakimi iñaani Tajorentsi. Omaanta irira rirotaki aapatziyakaaperotakimirori kimitaka ishookakaayitzirorini okithoki.

<sup>7</sup> Rootaki riraga pankitatsiri eejatzi riraga thamaetatsiri riyotaakiri ee-chonkiuni; omaantakya irira Tajorentsi rirotaki shookakaayitzirorini. Tema raapatziyakari.

<sup>8</sup> Eejatzi imonkaatawakaaka riraga pankitziroi eejatzi riraga thamaetatsiri. Rootaki imonkaatanteeyaanaririni riraga ashitawori pankirentsi ipinatanteeyaariri.

<sup>9</sup> Eejatzi okimitaka, nomonkaatakari Apooro nantziniri Tajorentsi ikowakagaeyakinarini. Eerokapaeni poshiyeeyakawoni rowani Tajorentsi. Eejatzi poshiyakawo ipanko riwetsikakiri.

<sup>10</sup> Noshiyakaawenteri yotaperotatsiri wetsikirori pankotsi. Ikantakina nokatziyero otzinkamipaeni. Roojatzi paashini atziri wetsikakaakinawori pankotsi. Tema riyojaakina Tajorentsi eejatzi imatakaakina nityaawo nokenkithatatakacimirri eerokapaeni eejatzi oshekini paashini atziri iñaani Tajorentsi: naapatziyakaakari Jesokirishito. Inja eekiro ryaatatayee riyotaakimi Apooro iñaani Tajorentsi; eejatzi eenitatsi paashini owaagawakimiori. Omaanta okameethatzi aamayawo akompitakarikari ayotaakiriri paashini atziri iñaani Tajorentsi.

<sup>11</sup> Otzinkami pankotsi oshiyakari Jesokirishito, irira oshiyakawori otzinkamipero. Tee añiri paashini oshiyaaawoni otzinkamipanki.

<sup>12</sup> Riraga owaagawakirori, ¿itaka riwetsikantyaawori? Roorika ooro, roorika piraata, roorika mapi shipakiryaaatsiri, roorika inchato, roorika inhashi, roorika kompiroshi: akenkithashiryaakoperotero oetarika kijoperotatsiri.

<sup>13</sup> Ari okoñaatanaki iinja aririka ipokae Jesoshi riwetsikayitzirini okameethatatziriika. Okimitaka paamari otaaga inchapanki aawiyo, inchashi, kompiroshi, irira Tajorentsi ikantakowenteri romperanawo oetarika rantakiniriri aririka rantakiro kameethatatsiri rooma rantakirorika kaari kameethatatsi.

<sup>14</sup> Aririka okameethataperote anteeyenirini, oshiyakawo kijoperotatsiri awetsikantayitaworini; aritaki kameetha ipinateeyakaeni.

<sup>15</sup> Teerika okameethatzi antayitakirini, okimityaawo awetsikantakawo kaari kijotatsini; otaanakya irowa oshiyakaawentakae tee antaperotziniri Tajorentsi kameetha. Aririka awijakotawitakya, omaanta tekatsi jeekimotaneeni apatziro aaka owawaakotyaa. Tekatsi okantya ipinatee.

<sup>16</sup> Tema aakateeyakini oshiyakawori Tajorentsipango ijeekantari Tajorentsi. Tema eejatzi okimitaka ojeekanteeyakaeni Ishire.

<sup>17</sup> Erorika pikamintheeri ijeekantari rirori, eero eejatzi ikaminthayimi eerori. Okameethaperotzi ijeekantarira: tema ijeekantatzimmi eerokapaeni pajankaneki.

<sup>18</sup> Eero pamatawitashita eeroka apaniroeni. Aririka pikaateeyirini iitawitachari riyoperotzi oetarikapaeni, aritaki pikantakaaperota tee okameethatzi iroka. Aririka pikantakaaperotyaaawo piyotayitzirini, eero riyotakayimi Tajorentsi. Omaanta pikanteririka: "Tee niyotzi naaka, piyoteena", aritaki riyotaaperotakimi.

<sup>19</sup> Itheenkakirai Tajorentsi okaatzi riyotayitawitarini atziripaeni jaka kipatsiki. Tema aritaki rojankinatziteetani: "Riraga iyotayitawitaririni iitawitaka tekatsi ayerini, omaanta omapokapaakiri owashironkagaantsi owamaakiri. Eejatzi ikimiteeyakani maawaeni kantakaaperowenteeyaworini riyotayitzirini: romapokapaakiri Tajorentsi, rowashironkagaeyerini".

<sup>20</sup> Eejatzi rojankinatziteetani: "Riyotzi Awinkatharite tee okameethatzi ikimiteeyakirini yoperotawitachari".

<sup>21</sup> Eero pikantakaaperotashitari atziri, tee okameethatzi. Riwetsikaeyakimiorini Tajorentsi maawaeni jeekayitatsirini piweshiryaawenantyaaawori roori. Rootaki nokanantzimiri:

<sup>22</sup> "Rotyaantakina Tajorentsi namitakoeyantemirini, eejatzi rotyaantakiri Apooro eejatzi Peetero riori, maawaeni ramitakoeyantemirini. Riwetsikaeyakironi maawaeni jeekayitatsirini kipatsiki, aweshiryaaawenantyaa-wori. Añaatsimirkira piweshireeya, pikamakirkira eejatzi piweshiryaaanakya. Piweshiryaaawentyaawo jeekayitatsirini iroñaaka, eejatzi jeekayitatsirini iinja.

<sup>23</sup> Tema pikempiyamintheeyakarini Jesokirishito, riweshiryaaawentakimi. Eejatzi okimitaka, irira ikempiyaminthatakari Pawa Tajorentsi, rootaki eero ka pikempiyamintheeyakarini Pawa. Tema riweshiryaaawentakari riori eejatzi eerokapaeni".

## 4

### *Rantayitakirini Rotyaantanewo Tajorentsi*

<sup>1</sup> Iroñaaka piyoteeyakinanai naaka romperanari Jesokirishito. Omaanta rotyaanteeyakinanai nokamantayitenirini atziripaeni iroka kaari riyotawitarini paerani: okaatzi rantakiri Tajorentsi.

<sup>2</sup> Aritaki okameethaperotaki nokyaaryooowenteniri oetarika ikowakaakinari, eero namatawitziri. Eejatzi okimitaka, maawaeni antziniriri Tajorentsi okameethatz ikyaaaryooowenteniri okaatzi ikowakaakiniriri.

<sup>3</sup> Tee nokenkithashiryaaapiintawo oetarika pikantakotashiteeyanarini, eenitatsirika nantakiri; eejatzi tee nokenkithashiryaaapiintawo oetarika kantakotashiteeyenarini paashini atziripaeni. Eero nokantakota naaka, tee nokantzi: "Nokameethatz".

<sup>4</sup> Nokenkithashiryaaaka naari tekatsi nantani, omaanta eero nokantashita: "Kameetha nantakiro maawaeni". Intakyaa Awinkatharite rivotaki kantakowentenani riori, okameethatakira oetarika nantakiri.

<sup>5</sup> Rootaki iroñaaka nokamanantemirori: iroñaaka tee okameethatz ikan-takotashityaari paashinipaeni: "Eenitatsi nantani"; iinjakya ari ayotaper-oeyanakini. Aririka ipokae Awinkatharite, ikitejitatotapaakiro maawaeni okaatzi manawitachari iroñaaka tsiteniriki. Roñaagaero oetarika akowap-eroeyirini maawaeni ajankaneki. Akameethatzirika ari ikanteeyeeni Tajorentsi: "Kameethatakimi".

<sup>6</sup> Pamine, noyemijantzinkarite, naaka kenkithatakotacha, eejatzi no-kenkithatakotziri Apooro piyotanteeyenarini eero piñaaakoweenkatashitantar iatzi. Aririka pikante: "Nonintaperotziri irinta", paamawentyaawo piman-intzirikari paashini.

<sup>7</sup> ¿Itakama pikantakaaperotakari kimitaka panaakotakiri paashini atziri? Tema Tajorentsi pashiteeyimirorini maawaeni jeekimoteeyemirini. Iroñaaka ¿itakama pikantakaaperotantari, kimitaka tee ipashitzimiro?

<sup>8</sup> Pikimitakotawitakari ashaagantachari: piiashiteeyawitakan piyoper-oeyini: tee pikowaeyini riyotagaeyemini. Piashiteeyawitakan eeroka-paeni jewaperowenantatsiri, pimanintakina naari. Pikimitakaantakina naaka patzirile. Jaa, nokowawitaka peewawanantaperoeyanakinimi, atsi-patawakayaami eewawenanteeyenimi.

<sup>9</sup> Ari nokaateeyakirini paashinipaeni rotyaantanewo Jesoshi, tema pikimitakaanteeyashitakinanai onampirentsipaeni: pimaninteeyakinanai. Eejatzi okimitaka rajaryaagaetakina rowamagaetenai; ramineeyakinanai maawaeni: ronampiri Tajorentsi eejatzi atziripaeni.

<sup>10</sup> Noñaaperotakiri Jesokirishito ikameethatz, rootaki pikanteeyanta-narini: "Tee piyotzi". Omaanta pikenkithashiryaaashitaka paapatziy-eyeyakarini kameetha riori, rootaki pikanantari: "Niyoteeyakinimi naari". Pikanteeyashitani: "Tekatsi imatzimaetya riraga Paaworo,

osheki amateeeyakironi aaka". Osheki piñaaperotashita eeroka apaniroeni pikameethatzi, omaanta naaka pimaninteyakinani.

<sup>11</sup> Osheki aapiintakinan notashe, aapiintakinan nomiri, shipaakowae-takina nothaariki, ipajapajaapiinteetanani, nokinakinayitakini; roojatzi iroñaa. Tektsi nashi nopanko nojeekantyaari.

<sup>12</sup> Nokantatyaa ninopomeentsitapiintakawo nantawaetzi nakoki. Aririka ikiyeetakina, nokantziri Tajorents: "Pikaminthayeri riraga kijakinari". Aririka ikijaperopiinteetena, eero nopyiyatari.

<sup>13</sup> Aririka itheeyakoteetakina, kameetha nokenkithawaetakaawakiri. Kyaaryo, ipinkaetakina, ikimitakaanteetakina kaagashi, ikanteetzi: "Tee ikameethatzi Paaworo".

<sup>14</sup> Tee ro nojankinatantzimirori iroka nopashiwentakagaeyemini, omaanta nokimitakaantakimi eeroka neentsitepaeni nonintaperotziri; nokowaki nokaminthayemini, nokaminaantemiri kameetha.

<sup>15</sup> Omawitya eenitatsi oshekiperoroña yotagaeyakimiroini iroka kameethatatsiri okantakotziri Jesokirishito, omaanta tee ijeki osheki ashitzimirini. Pamine, nokamanteeyakimironi iroka kameethatatsiri paapatziyantakariri Jesokirishito, rootaki apaniroeni naaka nokimitakaanantakimiri eeroka notyomipaeni, nishintyopaeni.

<sup>16</sup> Rootaki nakanantaperoeyantzimirini: "Poshiyakotaperoeyenawoni".

<sup>17</sup> Rootaki notyaanantzimiriri Temoteeyo, nokimitakaantakari notyomi nonintaperotziri. Ikyaaryooyowentakiniri Awinkatharite oetariki rantziniriri. Ikenkithashiryaa kayemiro tsika okantari nokamantakotapiintziri Jesokirishito, tsikarika janta ipiyotawenteeyarin.

<sup>18</sup> Aapaanipaeni pikaateeyinira ikantakaaperoeyakani, tema iitakaashitawita eero niyaatashiteeyimini naari.

<sup>19</sup> Omaanta ikowakaakinarika Awinkatharite, nokowaki intsipaete niyaatashiteeyemini. Eero naapatziyashitapaa kawo ikantayitzirini riraga kantakaaperotachari, omaanta niyotapaaki naari eenirorika imatakaakiriri Tajorents.

<sup>20</sup> Aririka reewawentakae Tajorents, eero añaawaetashiwaetawo inta antaperoeyeroni kameetha okaatzi ikowakagaeri. Tema irira rirotaki amitakotakaeri.

<sup>21</sup> ¿Oetaka pikowaeyakirini? ¿Pikowaeyakinima nareetemi nowashironkaemi? ¿Rooma pikowaeyirini nareetemi noneshironkaper-oeyapaemini?

## 5

### *Itsipatayitakarini aapatziyariri Jesoshi kaari kameethatatsiri. Pookeri*

<sup>1</sup> Ikamanteetakina pikaateeyakirini ayirori iyashiyani. Raayiteeroni shirampari rinirothori raawitarini iriri. Tektsi kimityaarini: riraga kaari yoterini Tajorents eero rayiro raawitarri iriri.

<sup>2</sup> Omaantakya eeroka pikantakaaperoeyakani kimitaka kameetha paapatziyari Jesoshi. ¿Itaka kaari powashiretakotantari okaatzi rantakiri rirori? Roojatzi aririka pipiyotawenteeyaarini Tajorents, piyotemi tee okameethatzi pishinetziri ipokajeempiyaashitapaa rirori.

<sup>3</sup> Tee nokaateeyawitzimini, omaanta nokenkithashiryaa koeyakimini. Okimitzimotakina aririka nojeekimoteeyawitakimini, nokanantzimiri tee okameethatzi rayero iyashiyana paeni.

<sup>4</sup> Itajorentsiperotaki Awinkatharite Jesoshi, riro matakaakinawori nokantakowenantari riraganki. Aririka pipiyoteeyani piyoteeyeni nokenkithashiryagaeyakimini naari.

**5** Pishineteri Jatanaashi raanakiriita, rowashironkaeriita. Roojatzi aririka ikenkithashiryagaeya, ari rawijakotee paata ipokaerika Awinkatharite Jesokirishito.

**6** ¿Litakama pikantakaaperotantari? Tee okameethatzi. Noshiyakaawentemiro. Tema piyoteeyini ojeekirika tapiyakaawori paa eechonkiini, ot-sichaagantanakawo maawaeni paa, otapiyakagaeyakawoni maawaeni.

**7** Pookaeri riraga noshiyakaawentakimiri tapiyakaawori paa, pikimiteeyantyaaworini paa owakirari, kaari tapiyacha. Eerorika pookiri, poshiyakotanakarikari rirori. Ñaakiro, rowamagaetakiri Jesokirishito, roshiyakari owisha rowamaantapiinteetari rowaga kitejitalsiri rawijantakari paerani ronampiri Tajorentsi janta Ejiiptoki.

**8** Iroñaaka, aririka aweshiryaaawentyaari Tajorentsi, thame akameethatanaki: eero amatawitantzi. Eero akija, eero antapiintziro kaari kameethatatsi.

**9** Nojankinatantawori paerani, nokanteeyawitakimini eero pitsipatari mayempitzirori tsinani kaari rayi. Eejatzi eero pitsipatawo mayempitziriri shirampari kaari ayi.

**10** Tee nokenkithatakotziri kaari aapatziyariri Jesoshi mayempitzirori kaari rayi, riraga kowaperotzirori tzimimotayitziririni atziripaeni, amatawitantatsiri ikoshite, kenkithatakawitawori riwetsikashitayitarini atziri. Tee nokantzimi: "Eero pitsipatari kaari aapatziyariri Jesoshi". Tekatsi pikanteeyani pookawakaya, tema pikantyaani piñaapiinteri ijeki jaka kipatsiki.

**11** Omaanta nojankinatakotziri riraga kantatsiri: "Naaka piyemijantzinkarite". Omaanta eeniro imayempitziro tsinani kaari rayi, eero kijokiro powaeyirini. Eejatzi pikimiteeyirini riraga kowaperotzirori rashitayitarini paashinipaeni, eejatzi kenkithatakawitawori riwetsikayitzirini atziri, ikowawita ipeyiromi iitajorentsire, theeyawaetaashitachari atziri, eejatzi shinkitzinkari eejatzi amatawitziriri atziri ikoyi ikoshiteri. Aritaki nokantakimi, eero pitsipatari rirori eejatzi eero poymotari.

**12** ¿Arima pikantakotakiri tsika ikantyaaka kaari aapatziyariri Jesoshi? Eero. Omaanta pimateri irira pikantakowenantyaariri riraga piyemijantzinkarite.

**13** Omaantakya Tajorentsi rirotaki kantakowenterini kaari aapatziyariri Jesoshi. Iroñaaka pookaeyeerini riraga kaari kameethatatsiri pitsipateeyawitakarini: eero piitakashitari raapatziyakari Jesokirishito.

## 6

**1** Aririka pikijakiri piyemijantzinkarite, ¿okameethatzimotzimima pawentaapaakyaaari kaari aapatziyari Jesoshi ikantakotantemiri tsikarika pikanteeyaa? Teewe. ¿Tema okameethatemi pawentaapaakyaaarimi irira piyemijantzinkarite?

**2** Tema piyotzi riraga aapatziyariri Jesoshi rowameethatziri Tajorentsi imatero ikantakowenteeyantyaaririni maawaeni atziri, tsikarika ikanteeyaa. Aririka pikantakowenteeyerini iinja maawaeni atziri, ¿iitakakya kaari pimatantawo iroñaaka pikantakowenteeyerini piyemijantzinkarite? Tema aritaki pimatapiro pikantakowentawakaya.

**3** Tema piyotzi akantakowenanteeyerini iinja ronampiri Tajorentsi ri-nawita tsikarika ikanteeyaa. Akantakowenteeyerinirika rirori, ¿eeroma pimatapiro pikantakowenteeyerini iroñaaka atzritzinkari eerori?

**4** Eenitatsirika iroñaaka pikijawakaawentari, okameethatzi pii-teri paashini piyemijantzinkarite, ninkarika, ikantakowenanteeyemirini tsikarika pikanteeyaa.

5 Nokantero iroka pipashiwenantyaari. Ḷekatsima aapatziyariri Jesoshi yoteroni ikantakoteri paashinipaeni tsikarika ikantyaari?

6 Omaanta tee apatziro pikijakiri piyemijantzinkarite, tema eejatzi pawentaakari kaari aapatziyariri Jesoshi. Pantzimotakiri kaari kameethatatsi.

7 Patsipetashiteeyakawoni pawenteeyakarini kantakowenantatsiri riraga kaari aapatziyariri Jesoshi; tema tee ikowakaakimi Tajorentsí pantero iroka. Omaanta kameethatawitachari pimaeritakotero awijashitya: omawitya ikoshiteetemiita.

8 Omaanta eeroka tee pimaeritakotziro inta pantashiteeyakawoni: pamaawitantz eejatzi pikoshitawakagaeyakaní tema ari paanakiri pawentaanikinta kaarinta aapatziyariri Tajorentsí. Osheki pantapiinteeeyakirini piyemijantzinkarite.

9-10 Riraga kaari kameethatatsi eero rareeta janta ipinkatharitzinta Tajorentsí. Tema piyotziro, eero pikompitawo. Eero riyaatzi janta ipinkatharitzinta riraga shirontawori tsinani kaari rayi, eejatzi riraga pinkathatzirori iitajorentsitsahitari, eejatzi ūaathatzimotawori iina, eejatzi antatenkatawakaachari ishiramparinkaeteki, eejatzi koshintzi, eejatzi kowaperotzirori rashitayitarini rowaagawo paashinipaeni, eejatzi shinkitzinkari, eejatzi theeyawaetasahitachari ratzirkanki, eejatzi amatawitzirori ratzirkanki ikoshitatariri. Tekatsikya ikanteeya rirori rareeteeya janta ipinkatharitzinta Tajorentsí.

11 Aritaki pikimitayitawitarini. Omaanta rowameethateeyakimini Awinkatharite Jesokirishito, eejatzi Ishire Tajorentsí; rootaki iñaaperotantakimirí Tajorentsí pikameethatzi, reentsitetakimi.

12 Ikanteetzi: “Okameethatzi nantero oetarikapaeni kaari ithaūaakotée Jesoshi”, omaanta aririka antashityaawo oetarikapaeni, tee amitakotée maawaeni: tema atsipetashitakyaawo antero apaanipaeni. Tee akoyi ametaperotyaawo kaari inimotziri paashinipaeni aapatziyariri Jesoshi.

13 Eeniro owanawo akemari. Eejatzi eeniro asheetomawo ojeekantari owanawo. Omaanta iinja eero añaagaero owaeyari eejatzi asheetomawo. Ipeyeero Tajorentsí, eero añaagaero jenokinta. Tema atsipetashitawo añaawenaperotawo oetarikapaeni. Tee ro riwetsikantee amayempitero kaari ayi, intakya riwetsikantakaeri Awinkatharite akenkithashiryaaanteeyaaririni rirori. Eejatzi ikimita, ikenkithashiryaaapiinteeeyakaeni aaka.

14 Eenitatisi itajorenka Tajorentsí, rootaki imatantawori ipiriinteerí Awinkatharite Jesoshi, eejatzi ikimitagae aaripaeni: ipiriintanee iinja.

15 Awathapaeni aari rootaki rako Jesokirishito, ikempita, roki, iitzi, maawaeni. Tema piyotakiro iroka. Aakateeyakinirika iwatha rirori, Ḷokameethatzima amayempitero tsinani ūaayitziririni paashinipaeni shirampari? Tema okimiwitaka amayempitakaakiri Jesoshi tsinani. Teewee, tee ari okantakotya: tee okameethatzi.

16 Aririka imayempitziro shirampari tsinani, okimitzimotakari Tajorentsí raaperotakiro. Tema piyotziro. Rojankinateetzi, ikanteetzi: “Apite ikaatawitani shirampari eejatzi tsinani, omaanta aririka raawakakya apani ikantanakya, tee okameethatzi rookawakagaeya”.

17 Omaanta aririka akempiyaminthatakari Awinkatharite, tema apaani akanta ashireki.

18 Eerokya pimayempitziro kaari payi, eerokya pimayempitziri kaari payi. Oetarikapaeni paashini kaari kameethatatsi pantayitakirini, powashironkaakiri paashinipaeni pisheninka; omaanta riraga mayempitzirori paashinipaeni tsinani, rowashironkaakiro iwatha rirori apaniroeni.

<sup>19</sup> Tema piyotzi ojeekantakawo piwatha Ishire Tajorentsi. Rotyaantakimiro Tajorentsi kijokiro owantakimiri. Tee eero ka iroñaaka jewawentashitachani, inta riraga Tajorentsi jewawentzimiri.

<sup>20</sup> Rowawijaakoetanteemiri osheki opomeentsizmotawitakari: tema rotyaantakiri Itomi ikamawentakae, rapaatawentakaero riraa ipinawenantaerori kaari kameethatatsi antakiri. Iroñaaka, oetarikapaeni pantayitakirini, pantakiniri Tajorentsi, iñaaperotanteetyaariri irira ikameethatzi.

## 7

### *Ikenkithatakotziri aatsini iina*

<sup>1</sup> Ari chapinki pojankinatantakinari, eenitatsi pojampitakinari piyaaritatempi: okameethatzirika payi piina, piimi. Iroñaaka nakemi. Kyaaryootaki okameethataperotzi eero payi piina.

<sup>2</sup> Omaanta aririka pijkeekashitya, kyaaryoowa pimayempitzirokari tsinani kaari payi; eejatzi tsinani, kyaaryoowa omayempitzirkari shirampari kaari ayi. Rootaki okameethatantari paaperoteroota piina, eejatzi aaperoterita tsinani oemi.

<sup>3</sup> Okameethatzi shirampari imatero iina, eejatzi okimitya roori oshinetaytara oemi.

<sup>4</sup> Iina eero eewawentziro owatha roori apaniroeni, inta eejatzi reewawentziro owatha oemi. Eejatzi ikimitya rirori oemi, eero reewawentziro iwatha rirori apaniroeni, inta eewawentziro iwatha iina eejatzi.

<sup>5</sup> Eero pithañaapithatawo piina; eejatzi tsinani, eero pithañaapithataro piimi. Omaanta aririka pikantawakaya: "Eeroota añaaminthatawakaa ajeekashitawakya apaanipaeni kitejiri; iyotaata amaneri Tajorentsi", ari kameetha okanta, omaanta aririka omonkaatapaeya roojatzi pimataenteeyawo eejatzi. Pamine, eerorika papiitziro rantakaemirokari Jatanaashi kaari kameethatatsi.

<sup>6</sup> Tee nokantaperotawitzimi: "Paye piina", omaanta pikowakirika paye, okameethatzi.

<sup>7</sup> Nokowawitaka pikimiteeyenanimi naari,\* omaanta rinashitakagaeysakaeni Tajorentsi, tee amonkaatawakagaeyani. Irrika apaani, eeniro imatakaakaeri. Irira paashini, inashita imatakagaeyakaerini rirori.

<sup>8</sup> Riraga kaari aatsi iina, eejatzi kamaentsiri iina, nokamanteeeyemini: kameetha pikimiteeyenanmi naari, pijkeekashitya. Eejatzi okimitya tsinani, kameetha ojeekashitya roori.

<sup>9</sup> Omaanta eerorika pimatziro pijkeekashitya, kameetha pagae eejatzi. Kameetha paye, tee okameethatzi pikowawaetashitya paye. Eejatzi okimita tsinani, tee okameethatzi okowawaetashitya ayeeta.

<sup>10</sup> Iroñaaka nokaminaaperotero aatsiri oemi. Tee naaka kaminaaperoteroni inta Awinkatharite: tee okameethatzi pookaeri piimi.

<sup>11</sup> Aririka pookaeri, pijkeekashitaperoteeyaa. Eerorika pijkeekashita, papiiteeri pagaaeri eejatzi piimentawitari. Eejatzi okimitaka, tee okameethatzi rookaero shirampari iina.

<sup>12</sup> Iroñaaka nokamanteri paashinipaeni, tee riro Awinkatharite kamanterini: eenirorika ayemijantzinkarite iina kaari kemijantatsini, aririka okowaki aaperoteri, tee okameethatzi rookaero.

<sup>13</sup> Eejatzi tsinani, rirorika piimi kaari kemijantzinkari, aririka ikowaki kijokiro rowaperotemi, tee okameethatzi ookaeri.

\* 7:7 Tekatsi Paaworo iina.

**14** Ojeekirika tsinani aapatziyariri Jesoshi, eejatzi oemi tee raapatziyari Jesoshi, irira tee ikimitari theenkantatsiri; rinashitakari Tajorentsi, ikantzi: "Rirotaki oemi aapatziyanari. Rirotaki iriri eentsitepaeni. Nokowaperoteeyakirini raapatziyeeyenani maawaen". Eejatzi okimitaka iina aapatziyanari, teerika aapatziyari Jesoshi roori. Tee okimiteeyawoni theenkinkawo; rinashitakaakawo Tajorentsi, ikantzi: "Rootaki iina aapatziyanari. Rootaki riniro reentsitepaeni. Nokowakaaperotakiro aapatziyena, eejatzi nokowaperotakiri raapatziyeeyenani eentsitepaeni. Aririka rookiro aapatziyariri iina eejatzi rookakotantakiri reentsite, eero riyotakoteeri reentsitepaeni Tajorentsi. Omaanta eerorika ashitariri rookiro iina, eeniro riyotaakotziri Tajorentsi".

**15** Teerika okemijantzi iina ayemijantzinkarite, okowakirika ookaeri, ari okameethatz iokaerija. Eejatzi oemi ayemijantzinkawote, teerika raapatziyari riori: ikowaerika rookaero, ari okameethatz rookaerooota. Tekatsi iroñaaka kanterini shirampari ayemijantzinkarite kijokiro rowantyaawori rowaga kowatsiri ookaeri. Eejatzi okimityaari tsinani aapatziyariri Jesoshi aririka ikowaki oemi rookaero, tekatsi kanterini kijokiro owantyaawori. Tee ikoyi Tajorentsi akijawakagaeyaani.

**16** Tsinani, aririka kijokiro poyiri piimi kaari aapatziyarini Jesoshi, tee piyotzi aririka powawijaakotakaanteeri. Eejatzi pikimita eerori, shirampari: aririka kijokiro poyerpi piina kaari aapatziyariri Jesoshi, tee piyotzi aririka powawijaakotakaanteero.

**17** Aritaki riyyagaeaeyakimini Tajorentsi. Kameetha panteeeyenirini Awinkatharite oetarika ikowakaemiri eerori. Rootaki nokanteeyakiririni maawaen aapatziyariri Jesoshi tsikarika ipiyoteeyakani.

**18** Paerani riyyagaeaeyakimini Tajorentsi. ¿Pitakwoma pitotonatziro pishiramparitantari? Aritapaaki, pipeyakotero. Eeroka paashini, teerika pitotonatziro, eero pikoyi iroñaaka pitotonatero, ataama.

**19** Aririka pitothowawityaawo pishiramparitantari, tekatsi okantemi owawijaakotemi. Eejatzi okimita, teerika pitotonatziro, tekatsi okantemi owawijaakotemi. Ro kameethaperotatsiri anteri akemijantaperotero ikan-teeyerini Tajorentsi.

**20** Tsikarika pikanteeyawitani paerani riyyaantakimiri, aritaki pikantyaari.

**21** Riyoyaantakimiri Tajorentsi, ¿eerokarika ipimanteetziri? Eero pikenkithashiryaashitapiintawo. Omaanta ishinetemirika pipinateeya amanantawitzimiri, okameethatz pishitowanee.

**22** Riyoyaantakimiri Awinkatharite, eerokarika pimantaarewo paerani pinawita, ari iroñaaka okimitaka riraga Jesoshi ipakaakowenteemi. Tema rowawijaakotzimi. Eerokarika kaaririka pimantaarewo pinawita riyyaantakimiri, iroñaaka okimitaka ramananteemi Jesokirishito, iroñaaka ikantemi riori oetarikapaeni pantayiteniririni.

**23** Kimiwitaka ramanantakimi irira, osheki piwinawo. Rooma os-heki ipomeentsitawentakimi rowawijaakotantakimiri. Eero pishinetziri atziri ikantzimi oetarika panteri, omaanta panteniri Tajorentsi oetarika ikowakaakimiri.

**24** Rootaki, noyemijantzinkarite, nokamanantzimirori iroka: tsikarika pikanteeyawitani paerani riyyaantakimiri, aritaki pikantyaari; omaanta kijokiro powanakiri Tajorentsi.

**25** Iroñaaka nokenkithatakotero kaari shinetaariri shirampari, eejatzi kaari matzirori tsinani. Tekatsi ikantaperotena Awinkatharite, inta nokamanantem i nokenkithashiryaari naari. Ineshironkatakina, rootaki kaari namatawitantzimi. Piyoteeyironi iroka.

<sup>26</sup> Rooteentsi opomeentsitzimoteeyeeni, rootaki nokenkithashiryaantakawori iroka. Tsikarika pikanteeyakani iroñaaka, aritaki pikantyaari.

<sup>27</sup> Paakirika piina, eero pookaero. Pijkeekashitarika iroñaaka, eero pikoyipaye piina.

<sup>28</sup> Aririka paye piina, okameethatzi: tee pantziro kaari kameethatatsi. Eejatzirarika aye oemi rowaga kaari shinetaariri shirampari, kameetha: tee antziro kaari kameethatatsi; omaanta osheki pikemaatsiteeyaani. Aririkapayi, osheki opomeentsitzimotaperoeyakimini. Tee nokoyi opomeentsitzimotemi, rootaki nokanantzimiri: "Eero payi iroñaaka".

<sup>29</sup> Iroñaaka nokamantemi, noyemijantzinkarite: eero ojamanitzi ipiyan-teeyaari Awinkatharite. Kyaaryoowa, rookakaashiteetemirokari pantay-itawitanaririni Awinkatharite ikowakaemiri. Eenirorika piina, omaanta pikyaaryooventeniri riraga Tajorentsi ikowakaakimiri.

<sup>30</sup> Aririka petakowaetya, aririka pikimoshirewaete; omaanta eero pikenkithashiriilo inta pikyaaryooventeniri Awinkatharite panteniri. Aririka pamanantayiteni oetarikapaeni, omaanta eero ojamanitzi piñiiro pamanantayitawitarini.

<sup>31</sup> Eero ojamanitzi piweshiryaawentawityaawo jeekayitatsirini kipatsiki, roojatzi eero pimatziro piweshiryaawentyaawo. Kameetha pijeeckawita iroñaaka, eeniro pameteeyakarini, omaanta inashitayitanakyaani maawaeni añaayitzirinika kipatsiki; iinja opomeentsitzimoteyemini.

<sup>32</sup> Nokowaki eero pikenkithashiryaapiintanakawo. Riraga jeekashitachari, ikenkithashiryaapiintziro ikowayitzirini Awinkatharite, ikowaki ikimoshiryaakayeri irira.

<sup>33</sup> Omaantakya riraga aatsiri iina, ikenkithashiryaapiintziro maawaeni rantapiinteyirini atziri eejatzi okaatzi awijimotziriri jaka kipatsiki: ikowaki ikimoshiryaakayero iina,

<sup>34</sup> osheki ikenkithashiryaayitakawoni oetarikapaeni. Rowaga tsinani jeekashitachari eejatzi kaari shinetaariri shirampari: osheki okenkithashiryaagaeyeroni ikowayitzirini Awinkatharite, okamantakiri: "Oetarika pikowakaenari, ari nomatakimiro. Oetarika pikowakayenari nokenkithashireeyaari, ari nokenkithashireero". Omaanta rowaga aatsiri oemi okenkithashiryaatziro maawaeni rantapiinteyirini atziri, okowaki okimoshiryaakayeri oemi.

<sup>35</sup> Rootaki nokamanteyantzimiorini iroka, nokowaki namitakoeyemini, tee nokoyi nopomeentsitakaemi. Nokowaki kameetha pijkeekaeyeni, eejatzi piyoteeyini panteeyenirini Awinkatharite oetarikapaeni ikowakayemiri.

<sup>36</sup> Pamine, eenitatsirika pishinto kaari shinetaariri shirampari, aririka piñaakiro antawotaki, pikoyi iroñaaka paakayero oemi; ari kameethataki. Ayeeta, eero añaapro pantani.

<sup>37</sup> Aririka pikowaperote pithañeeyawo ari kameethataperotaki, eero pikemijantashitari riraga ashiryaayitemirini, omaanta pantero pikowaperotziri eerori, oetarika pikenkithashiryaari, okameethatzi.

<sup>38</sup> Ñaakiro, aririka paakayero pishinto, okameethatzi; omaanta aririka pithañeeyawo, okameethaperotzi.

<sup>39</sup> Aririka aye tsinani oemi, ari kijokiro owanakiri, roojatzi ikamakotaki. Aririka ikamaki, ari oshinetaantsiteya agae paashini oemi okowaperotzirika. Omaanta apatziro agae aapatziyariri Awinkatharite.

<sup>40</sup> Aririka okanteetatyeyaaani ojeekashitya, nokenkithashiryaaka okimoshireperotanaki. Ari naamaaka riyotaakinawo Ishire Tajorentsi iroka nokamantakimiri.

*Iwatha rowamagaetzinirori riwetsikashitayitarini iitajorentsitashitari*

**1** Iroñaaka nakemi tsika pikanteriri iwatha rowayitzinirorini riwetsikashitayitarini iitajorentsitashitayitarini pojampitakinaga chapinki. Iitakayitawitakan atziripaeni ryotaperotzi tsika ikanteriri iwatha. Omaanta, aririka ayotashitya, akantakaaperotakari. Tee ikowakaaperotee Tajorentsi ayowaetashitya, inta ikowakaaperotakae anintashireperotawakaeyani ayotaperotawakaantyaari ajeekanteeyari kameetha.

**2** Eenitatsirika iitakaawitachari ryotzi okaatzi kameethatatsiri rantero, apaniroeni ramatawitaa: tee ryotaperoeeyini.

**3** Omaanta aririka anintaperoteri Tajorentsi ryotagaeyeenii irira.

**4** Pojampitakowentakiri iwatha rowaetakinirori iitajorentsitashitari riwetsikayitzirini. Ari ayoteeyini tee otajorentsitzi riwetsikashiteetari. Apatziro ijeki apaani Tajorentsiperi, tekatsi paashini.

**5** Eenitatsi jeekayitatsirini janta jeñokiinira eejatzi jika kipatsiki iitajorentsitashitayitarini atziri. Eenitatsi osheki iitajorentsitashitayitarini, osheki iwinkatharitepaeni.

**6** Ayoteeyakini aaka apintzi Tajorentsi, riraga Pawa. Tema rajaryaakawo riwetsikero maawaeni ãñaayitakirinika eejatzi aakapaeni. Eenitatsi eejatzi apintzi Awinkatharite: riraga Jesokirishito, wetsikaeyakirorini maawaeni jeekayitatsirini eejatzi aaka.

**7** Omaanta eeniro ayemijantzinkarite kaari yoteeyirorini iroka nokaman-takimiri. Paerani rameteeyawoni apaanipaeni ikenkithatakaawitawoni riwetsikashitayitarini atziripaeni. Aririka rowakarini iwatha rowama-gaetzinironi, iitawitakarini ashipero riraga iitajorentsitashitayitarini. Tee ryotawita; aririka rowashitya iroñaaka iwatha rowamagaetzinirori riwetsikaetziri, osheki ikenkithashiryaaanakya, iitakawita tee okameethatzi royaari. Roshiyakaawitakawo rantakiro kaari kameethatatsi.

**8** Aririka oyaari iwatha, eero ikijawenteeri Tajorentsi. Oyaaririka, tekatsi ikantee. Atzityaaririka, eero rowameethashireetee.

**9** Kameetha poyaari, omaanta kyaaryoowa pantakaerikari kaari kameethatatsi riraga kaari yotatsi. Omaanta pishineteri royaariita iitarikapaeni ikoyiri.

**10** Iñemirika kaari yotatsi powaka janta opankoki iitajorentsitashitayitarini, ikantzikari: "Riyotzi rirori. Nokimityaariita noyaari naari iwatha rowamagaetzinirori iitajorentsitashiteetari". Rootaki rowantakawori omawitya ikenkithashiryaaakotawori: "Tee okameethatzi noyaawo". Rootaki ipakaagaanantakawori royaateri Jesokirishito.

**11** Piyotaperotzi okameethatantari poyaari. Omaanta rirori, tee ryotzi. Aririka rowashityaari, osheki ikenkithashiryaaanakya: "Teerika okameethatzi nantakirika, eeniro iroñaaka nantani". Aririka rookaero royaatzirira Jesoshi rootaki riyaatantyaari paamariki kaari tsiwakanitatsini. Omaanta rirotaki piyemijantzinkarite, ikamawentakiri Jesokirishito.

**12** Tee okameethatzi pantakiri. Tema ikantakae riraga Jesoshi: "Pinintaperoeyerini pisheninka, eero pantakayiri kaari kameethatatsi". Aririka pantakiro iroka, tema pantzimotakiri Jesokirishito.

**13** Rootaki nokanantzimiri: aririka nowakyaari iwatha, nantakaakiri noyemijantzinkarite kaari kameethatatsi, eerowa napiiteeri nowari iwatha eejatzi. Nantakaerikari kaari kameethatatsi.

*Ikantziri Paaworo: "Pikimiteeyenani naari"*

<sup>1</sup> Tema ishinetakina Tajorentsi oetarikapaeni. Tema rotyaantakina. Tema noñaaperotakiri Awinkatharite Jesokirishito. Tema rirotaki matakaakinawori naapatziyakaantakimiri.

<sup>2</sup> Teerika riyoteeyini paashinipaeni rotyaantakina Jesoshi, omaanta eeroekapaeni piyoperoeyakinani rotyaantakina. Tema eerokapaeni naapatziyakagaeyakimirini Jesoshi rowawijaakotantemiri. Rootaki piyotantari rotyaantakina Awinkatharite.

<sup>3</sup> Eenitatsi theenkakinari, ikantakowenantakinari, ikantzi: "Tee rotyaantzimi Tajorentsi". Ari eenitatsi iroka nokantawakiriri:

<sup>4</sup> "Tema okameethataki pamitakotena: pipena noyaari eejatzi nomiri.

<sup>5</sup> Aririka nokinayitanakini nokenkithatakaayiterini atziri; eenitatsirkami noena aapatziyariri Jesoshi, tema okameethatzimi notsipatanakyawomi. Aritaki rantapiinteeeyakironi paashinipaeni rotyaantanewo Jesoshi, eejatzi rirentzipaeni, eejatzi Peetero. Eejatzi okameethatzi ipakiromiowanawo eejatzi omiri.

<sup>6</sup> ¿Apaniroenima naaka eejatzi Werenawee nopomeentsiwentyaawo nopolatero nowanawo?

<sup>7</sup> Noshiyakaawentemiro: tema ipinakowentapiinteeetziri joraaro. Aririka apomeentsiwentyaawo apankitziro oowa, tema ari athotagaantero. Aririka ashentapiinteri apirapaeni, tema irapiintziro iteni". Rootaki nokantakiriri rriraga theenkakinari.

<sup>8</sup> Nokenkithatakotakiro añaapiinteeeyakirini, omaanta ¿oetaka okantziri rojankinatzirini Moeseeshi?

<sup>9</sup> Ajaatyta iroka okantziri: "Eero poojopatziri tooro ayiteetziri iyatharekitho aatzikakitzirori teriiko ishaagantyaawori, omaanta pishinetziri roya". ¿Apaniroenima waaka ikenkithashiryaaakotari Tajorentsi? Tee.

<sup>10</sup> Tema eejatzi aakapaeni oshiyakaawentakae rojankinarini. Iyota-gaeyakaeni oetarika anteeyakirini. Aririka atziri ikiyaapanetakiro kipatsi ipankitanyaawori, ikowaki irira raagaantayiteeroni okithoki paata. Eejatzi ikimita rriraga shaagakitzirori, ikowaki raagaantayiteeroni okithoki rirori.

<sup>11</sup> Pamine, oshiyakaawentaka nopankitakimiro pishireki iñaani Tajorentsi. ¿Opomeentsitzimotzimima iroñaaka pipagaantena noyaari, nokithaatyaari, oetarikapaeni?

<sup>12</sup> Aririka pipagaantashitayityaarini paashinipaeni, tema okameethatzimi pipagaantakinami naari. Omaanta tekatsi pipena. Paapatziyakawoni paerani iroka kameethatatsiri nokamantakotziriri Jesokirishito. Os-heki opomeentsitzimotzimana, omaanta tee nokoyi nookakayemiro paapatziyakarini, rootaki kaari nokowakotantzimini oetarikapaeni.

<sup>13</sup> Pamine. Riraga antawaetasirsij Tajorentsipankoki ari ipoñaakaapiintawo rowanawo janta, royaari. Eejatzi rriraga taakiniriri Tajorentsi piratsipaeni janta aritaariki, rowagaantakaga rirori iwatha ipashiteetariri Tajorentsi rootaki ipantakariri rirori koetyeemotariri. Tema piyotziro aritaki okantakota.

<sup>14</sup> Eejatzi okimita roori, ikantziri Awinkatharite: "Irira kemijantawakiriri okameethatzi ipashityaari koetyeemotariri rriraga kenkithatzirori iroka kameethatatsiri".

<sup>15</sup> Okameethawita naagaantemimi oetarikapaeni, omaanta tekatsi nayitemi.

Eejatzi tee ro nojankinatantzimiro pipantenari oetarikapaeni. Nokimoshiretaki tekatsi nokowakotemini; aririkami aakinani notashe, eero eejatzi nokantzimimi: "Pipena noyaari". Ayenaata, nokameeta. Eerokya nokowakotantzimiro oetarikapaeni.

**16** Aririka nokamantakoteri iroka kameethatatsiri riyotaantari atziri ikamawentakiri Jesoshi, tekatsi nokantya nokantakaaperotya. Tekatsi nokantya nomaeerite, eenitatsi nokenkithashiryaari: "Eerorika nantero, tee nantziniri Nowinkatharite ikowakaawitakinari rootaki rowashironkaanteri".

**17** Naakami kowashitachanimi niyotaante, tema ari ipinatenami Tajorentsi. Omaanta tee naaka nokowawita, tema rirotaki omperatakinari.

**18** ¿Iroñaaka oetaka ipinatenari? Okameethatawitani nokowakoteeyemini, omaanta tee nokoyi pipinatena. Apatziro niweshiryaawenteeyanakimini naapatziyakagaeyakimirini Jesoshi.

**19** Ipineetenarikami, nopeyakyaami ratzirite pinatenanimi, ikantapiintenami oetarikapaeni nantapiintenirimi. Omaanta nopomeentsiwen-tashiteeyakarini osheki atziri naapatziyakaantariri Jesoshi.

**20** Aririka nokaateeyakirini joriyo, nokimiteeyakarini rirori naapatziyakaantariri Jesoshi. Tema irira rirotaki aapatziyawori rojankinarini Moeseeshi, rootaki nokimitantakariri rirori, naapatziyakaantariri. Omaanta tee noñaaperotziro iroñaaka rojankinarini Moeseeshi, tee nopomeentsitawentawo.

**21** Omaanta aririka nokaateeyakirini paashinijatzitatsiri atziri riraga kaari aapatziyawori rojankinarini Moeseeshi, nokimiteeyakarini rirori, naapatziyakaantariri Jesokirishito. Tee nokamanteeyirini ikantawitari Tajorentsi paeraniperoroña; inta nokemijantakaaperoteeri ikantziri Jesokirishito.

**22** Eejatzi, aririka nokaateeyakirini kaari maperotzirori raapatziyawo kameetha, nokimitakowitakari rirori, naapatziyakaantaperotakari. Aritaki nokimiteeyawitakarini maawaeni atziripaeni naapatziyakaanteeyantakaririni Jesoshi apaanipaeni.

**23** Rootaki nokimitapiinanteeyaaririni riroripaeni raapatziy-eeyantyaaworini iroka kameethatatsiri niyotagaeyakiririni. Eejatzi naari niweshiryaawentyaawo iroka kameethatatsiri kenkitharentsi amitakoterini atziri.

**24** Pamine, tema piyoteeyini ishiyeeyanakan osheki shirampari riyotanteeyarini ninkarika anaakotanteentsini. Ranaakotantaki apaani riraga shiyaperoteenchari, ari ipaetziri iiitetziri pereemyo riweshrayaantyaari kameetha. Eejatzi pikimityaari eerori, pishiyaperotanaki paantyaawori pereemyo. Aririka pishintsiwenteniri ikowakaakimiri Tajorentsi, aritaki paakiro weshiryaakayemini.

**25** Rirojatzi aamakowentacha maawaeni kowawitachari ranaakotante aririka ishiye. Rootaki ikaminthaantari rirojatzi imatantyaawori ishiyaperote raantyaawori amantheerentsi. Intsipaete opathayi irowa, omaanta iroka amantheerentsi ayeri aaka, eero opathaanitzi roori, rootaki okameethatantari ashintstahiperotero aantyaawori kaari pathanitatsi.

**26** Eejatzi naaka tee notzipitzipitayitanakini noshianaka, omaantakya noshianaka nomatantawori nanaakotante. Paashini noshiyakaawen-temiri kapojawakaachari. Ikapojawakaaperotaka riyotantyaari ninkarika anaakotantatsini. Okimiwitaka ejatzi nokapojaperotziri paashini, tee nokapojashitari; tee nantashitawo naaka oetarikapaeni inta nokyaary-owentziniri Tajorentsi ikowakaakinari,

<sup>27</sup> noshintsitaperotakiniri; nomperata naaka. Osheki nokenkithatakagaeyirini paashinipaeni, tee nokoyi ikantena Tajorentsi paata: “Tee panta-perotanawo nokowakaawitzimiri”.

## 10

### *Ikenkithatakoyitzirini joriyyopaeni paerani*

<sup>1</sup> Iroñaaka, noyemijantzinkarite, nokamantemi piyotantyaari tsika ikanteeyarini joriyyopaeni janta okaankiityeenta paerani. Otsimakapitheeyakirini menkori ijeekantakawowa Tajorentsi: eejatzi oteenkaryaaganaki inkaare antawo, niyanki ranashitanteeyanakawoni piryapathatanaki.

<sup>2</sup> Janta jaawiki menkori, janta inkaareki riyotagaeyakirini Tajorentsi riyoteeyantakarini raapatziaperoeyakarini paerani Moeseeshi. Tema okimiwitaka ikaawoshitakotakiri Tajorentsi eeniro royaatziri Moeseeshi.

<sup>3</sup> Rowapiinteeeyakawoni rowanawo ipapiinteeeyakirini Tajorentsi.

<sup>4</sup> Rirapiinteeeyakironi iñaa ipapiintziriri, rowaga shitowaatsatsiri mapiki. Rowakiniri Tajorentsi rowaga mapi, oshiyakaawentakiri Jesokirishito, oyaaateeyanakiririni.

<sup>5</sup> Omaanta tee inimotziri Tajorentsi. Tee riweshiryaawenteeyarini osheki rriraga atziripaeni, rootaki ikamaeyantakarini janta okaankiityeenta.

<sup>6</sup> Pikenkithashiryaagaeyeroni iroka piyoteeyantyaarini ikowakaemiri Tajorentsi. Kyaaryoowa, pikimiteeyaríníkari joriyyopaeni: pikoyirokari kaari kameethatatsi.

<sup>7</sup> Eero paapatziyawo iitajorentsitsashiteetari jaka kipatsikika. Tema imatagaantakiro paerani. Ojankinatakani: “Ijeekaeyanakini atziri, rowaeyakanee ejatzi ishinkiteeyakani. Roojatzi ikatziyanteeyanakani, romampagaeeyanakani, eejatzi ishironteeeyanakawoni tsinanipaeni”.

<sup>8</sup> Kyaaryoowa, akimitakoeyarinikarira aakapaeni: paerani iñaamintahateeyakironi kaari iina, rootaki ikamanteeeyakarini 23.000 atziri apaani kitejiriki.

<sup>9</sup> Iñaantagaantakari Awinkatharite, riyotantyaari aririka ikijantakaari rantakiri, rootaki rotyaanantakanariri osheki maanki. Roojatzi ratsikan-teeyakaririni, ikamayitakini. Kyaaryoowa, oshiyakotarikarira aakapaeni, añaantarikari Tajorentsi.

<sup>10</sup> Eejatzi apaanipaeni ikiñaanikowentakiri irira, rootaki rowamaagaanteeyantakaririni rriraga ronampiri Tajorentsi. Kyaaryoowa, akimiteeyarinikari aaka, akiñaanikowenteri.

<sup>11</sup> Ro imatantayitakaworini iroka, akenkithashiryaantanaikyaari. Rojankinateetzironi, ayoteeyantakarini iroñaaka. Rootawiteencha omonkaateeya ipokanteyari Jesokirishito.

<sup>12</sup> Iroñaaka aririka pikante: “Nokantatyeyaaani naaka nokyaaryoowentero naapatziyari”, nokantzimi naari: “Paamawentyaaga, pantzirokari kaari kameethatatsi”.

<sup>13</sup> Eeniro akenkithashireeyironi antero kaari kameethatatsi: ashi owaeyironi maawaeni atziri antziro. Omaanta aririka ameentyaari Tajorentsi, ramitakoeyeeni eero anantawo. Ikyaaoyooentakae ramitakoperoeyeeni eerokya anantawo kaari kameethatatsi akenkithashiryaawitakari.

<sup>14</sup> Rootaki, nonintaperotanewo, nokamanantemirori iroka: “Eerokya pipinkathatziro riwetsikashiteetari iitajorentsitsashitari”.

<sup>15</sup> Eeniro piyotantari, iroñaaka pikenkithashireeyeroni iroka nokantzimirí.

**16** Aririka akanteri Tajorentsi: “Ariwee, Pawa, eeroka panawori iroka nimirri”, tema akimitawakaapiinteyakani, aweshiryaaawenteeyawoni riraa Jesokirishito rapaatawentakae. Eejatzi aririka akagaapiintziro paa, tema akimitawakaapiinteyakani, aweshiryaaawenteeyawoni iwatha, ak-enkithashireeyirini ikamawenteeyakaeni.

**17** Ari okaatzi owapiinteyyarini paa apaani. Eejatzi okimitawita, osheki akaateeyawitani omaanta amonkaatawakagaeyakani, ashenkateeyakarini Jesokirishito: tema apaani ikanta.

**18** Pikenkithashireeyeroni rameteeyakarini joriyyopaeni. Riraga ñaanakowenantatsiri aririka itaakiniri Tajorentsi ipira paashini atziri janta aritaariki, tema itsipatakaria irira ipinkathateeyakirini rirori, tema ari rowakaakyaaari iwatha.

**19** Eenitatsi iroka nojampitemiri: “¿Tajorentsima iroka riwetsikaetzirika?” Kaari. Tema ratsipetashitawo rowapiintziriro iwatha.

**20** Eenitatsi iroka nokamantaperotemiri. Eenirowakiniri kaari aapatziyariri Jesoshi ipira. Omaanta kaari Tajorentsi rowakiniri, inta kamaari. Tee nokowakayimi pitsipatyaari riroripaeni ipinkathateeyakirini kamaari.

**21** Aririka pirawenteri Awinkatharite, eero pimatziro pirawenteri kamaari ejatzi. Aririka powawentyaari Awinkatharite, eero pimatziro powawentyaari kamaari ejatzi.

**22** ¿Arima pikowaki ikijimi Awinkatharite? ¿Panaakoeyirinima pishintsi-taperotzi? Teewee. Tee panaakoeyirini ejatzi rowashironkaantyaari Tajorentsi ninkarika ameentakotaarini kamaari.

**23** Ikanteetzi: “Okameethatzi nantero oetarika kaari ithañaakotee Jesoshi”, omaanta aririka antashityaawo oetarikapaeni, eero oshintsitakae maawaeni, tema atsipetagaantashityaawo. Kyaaryo amatakiro akoyiri, omaanta eerorika amitakooyerini paashinipaeni atziri ishintsitakayeri rajankaneki, ari tee okameethatatzia antashitayitawityaarini.

**24** Eero pikenkithashiryaaakotapiintziro pikowayitawitarini eerori, omaanta pikenkithashiryaaakotapiinteri ikowayitziri paashinipaeni, ejatzi ikaatzi amitakoteri.

**25** Aririka ipimantayitzini iwatha, poyaari. Eero pojampitakowentziri: “¿Tsika ipofaaka irika? ¿Rooma rowamagaetzinirori iitajorentsitezirizi?” Aririka pamananteri iwatha, eero pojampitakowentziri, piitzikari aririka poyaari eero pikameethashiryaaanaki.

**26** Okantzini Iwaperite Tajorentsi: “Irira Awinkatharite ashitayitaworini kipatsi ejatzi maawaeni jeekanteeyaworini”.

**27** Aririka ikaememi kaari aapatziyariri Jesoshi rowakayemi ipankoki. Aririka pikowaki piyaate, powaeyaarinikya maawaeni ipaeyawakimirini. Eero pojampitakowentziri iwatha, eero piitziri aririka poyaari, eero pikameethashiryaaanaki.

**28-29** Omaanta ikanteetemirika: “Eenitatsi irika iwatha, rowaetzinirori iitajorentsifashitari”. Aririka eenitatsi jaga ejatzi piyemijantzinkarite kaari shintsiperotatsi rajankaneki, ari pikenkithashireeri irira iiteri tee okameethatzi royaari, eero powari eerori ejatzi. Omawitya eeroka piyotawitaka tekatsi ikantemi iwatha, omaanta pikaminthayeri riraga kaari yotatsi.

Naamaashitaka eenitatsi kantatsini: “Ishinetana Tajorentsi noyaari oetarikapaeni, ¿iitarikya ithañaakotashitantanariri riraga kaari yotatsi?

**30** Aririka owapiinteyyarini, akantapiinteyirini: ‘Ariwee, Pawa, eeroka panaariri nowayitarini’ . Aririka apaasonkiteri, ¿iitarikya ikiñaanikowenanteeriri oyaaririka?

<sup>31</sup> Ari nokamantemi. Aririka powaeeyani, eejatzi aririka pireeyeni; omaanta oetarikapaeni pantayiterini, panteniri Tajorentsi ikowakaemiri, riweshiryawenantemiri. Roojatzikya ikanteeeyeni atziri: "Tema ikameethatzi Tajorentsi. Kameetha ijekakagaeyirini aapatziyariri Jesoshi".

<sup>32</sup> Eero pantakayiri kaari kameethatatsi riraga joriyyo, riraga kaari joriyyotatsi, eejatzi aapatziyeyyaririni Tajorentsi.

<sup>33</sup> Oetarikapaeni nantayitzirini, nokoyi namitakooyerini atziri. Tee naaka etakotachani' apaniroeni, inta netakotapiinteeeyarini paashinipaeni atziri. Ro nomatapiinteeeyantanaririni rawijakoeyantakyaarini.

## 11

### *Antayitzirini tsinani kemijantayitatsirini*

<sup>1</sup> Poshiyakotenawo, nokimitaka naari nomonkaatakari Jesokirishito.

<sup>2</sup> Pikenkithashiryaapiintakina, eejatzi pikenkithashireero maawaeni niyotapiintakimirini, rootaki noñaaperotantakimir.

<sup>3</sup> Eenitatsi iroka, piyotero: riraga Jesokirishito kanteeyiririni atziri oetarika ranteeyerini; riraga shirampari kanteeyirorini iina; eejatzi riraga Tajorentsi kantziriri Jesokirishito.

<sup>4</sup> Pamine riraga shirampari, aririka ramaneri Tajorentsi, eejatzi aririka ikamanante iñaani, tee rametawo ipashikayinaty. Aririka ipashikayinatanya, tema itheenkatziiri Jesokirishito.

<sup>5</sup> Omaanta tsinani, aririka amaneri Tajorentsi, eejatzi aririka okamanante iñaani, opashikapiintaka. Teerika opashikapiinta, otheenkatzirii oemi: okimitzimotakawo ameetakiro oeshi, kimitaka tsinani mayempiro.

<sup>6</sup> Teerika okoyi tsinani opashikayinaty ari okameethatzi ameetero oeshi. Omaanta aririka opashiwentakayaawo ameeta, kameetha opashikayinaty.

<sup>7</sup> Riroma shirampari, eero ipashikayinata: tema ikimiwitakari Tajorentsi, eejatzi ipinkathatziri. Rooma tsinani, oñaaperotziri oemi.

<sup>8</sup> Paeraniperoroña ritakari Tajorentsi riwetsikakiri shirampari. Rootaki imeriki shirampari riwetsikakiniriri tsinani; omaanta omeriki tsinani, tee riwetsikaetziri shirampari.

<sup>9</sup> Riraga shirampari tee riwetsikawenteetakiniro tsinani, inta rowaga tsinani riwetsikawenteetakiniro shirampari.

<sup>10</sup> Okameethatzi opashikayinaty tsinani riyotanteeyaarini ronampiri Tajorentsi oñaaperotziri oemi.

<sup>11</sup> Pamine, tee ojeekashita tsinani, tee ijekashita shirampari. Ikowaki Awinkatharite akoetyaawakagaeyani.

<sup>12</sup> Irowa imeriki shirampari riwetsikakiro tsinani, eejatzi iroñaaka okoñaatapiintziri tsinani otomi. Omaanta Tajorentsi wetsikaeyiririni maawaeni.

<sup>13</sup> ¿Oetaka pikenkithashireeyarini eeroripaeni? Aririka amaneri tsinani Tajorentsi, ¿kameethama opashikaryaayinaty?

<sup>14</sup> Aakapaeni shirampari, iroñaaka tee ametawo aeshithanthamaeshiteeyini. Aritaki apashiwentakya.

<sup>15</sup> Omaanta tsinani, tema añaaperoteeyironi oeshithanthamaeshitzi oeshi: rootaki opashikayinatantari.

<sup>16</sup> ¿Enitatsima kowatsiri ipiyapiyawaantetena? Nokamantemi: nameetakawo iroka nokamantakimir, eejatzi rameeteeyakawoni maawaeni aapatziyeyakaririni Tajorentsi.

*Riyotaantziro rowawentapiinteeeyarini Jesoshi*

**17** Eenitatsi paashini nokamantemiri. Tee noñaaperotziro iroka panteyirini aririka pipiyoteeyani: tee okameethatzi, tee pamitakotawakaaneeta.

**18** Nityaawo nokamantemiro iroka. Ikamanteetana aririka pipiyoteeyani pipinkathatantapiintariri Tajorentsi, pipiyawaantetawakagaeyanakaani, tema pikenkithashiryatziro inashitachari. Naamaashita kyaaryo ikaman-tagaanteetakina.

**19** Pipiyawaantetawakagaeyanakaani piyoteeyantakaririni ninkarika kyaaryooventaperotzirori raapatziyari Jesoshi.

**20** Aririka pipiyoteeyani pikenkithashiryakoteri Awinkatharite, powaeyawitani, tema tee powakoeyarini Awinkatharite kameetha.

**21** Aririka powapiinteeeyani, pagaanteeyanakanı powanawo eerori, powapithateeyawakaani paashinipaeni. Tee poyaawakagaeyani powantyaari maawaeni. Itasheyaki apaanipaeni, ishinkitaka paashinipaeni.

**22** ¿Oetakama jaga panteeyirini? Tema eeniro pipanko powantyaari, pírantlyaari. ¿Pitheenkakirima riraga pokashitziriri raapatziyari Tajorentsi? ¿Pishirontawentarima riraga kaari ashaagantacha? ¿Tsikama nokantemika? ¿Arima noñaaperotemi? Teewee.

**23-25** Irira Awinkatharite iyotaanawori iroka nowaagakimirika. Paerani, tsiteniriki raakaanteeeyakirini, raakiro Awinkatharite Jesoshi paa. Ikantziri Iriri: "Ariwee, Pawa, eeroka panawori iroka noyaari", roojatzi ika-gaakiro. Ikantziri: "Eenitatsi iroka paa oshiyawori nowatha: aririka powapiintyyaawo, pikenkithashiryaaipiinteeeyenani. Tema naaka kamawen-teeyakimirini". Ari rowaeyakawoni. Roojatzi raakiro eejatzi riramento. Ikanteeyirini: "Eenitatsi iroka awishooawantsi oowa, aririka pirapiinteeeyeroni, pikenkithashireeyenani, piyoperoteeyeni apaatawenteeyemini niraaw pawijakoeyanteeyarini. Aririka nokamawentem, piyotanaki eero namatawitzimi, nomatemiro maawaeni nokamantakimir". Roojatzi ranashitantanaka tsiteniriki, roojatzi raanteetakari.

**26** Aripaete powapiinteeyaawoni, pirapiinteeeyeroni, piyotaantapi-ntyariri atziri ikamawenteeeyakaeni Awinkatharite. Pimatapiinteeeyeroni, roojatzi ipokanteeeyari.

**27** Aririka powawentyaari, aririka pirawenteri, pikenkithashiryakoteri: eero pantashitawo. Eeniro rantani riraga antashitawori: itheenkakiro iwatha Awinkatharite, itheenkakiro riraa.

**28** Pityaawo piyotakotya eeroka, eenirorika pantani. Piyotakotyaarika tektsi pantani, ari poyaawo, eejatzi pirero. Eenirorika pantani ari pityaawo pookaero kaari kameethatatsi pantziri eejatzi pamaneri Tajorentsi ipeyakotemiro pantani, eejatzi pijeki kameetha roojatzi pimatero powawentyaari Jesoshi, pirawenteri.

**29** Tee okameethatzi owashiwaetyaawo, eejatzi irashiwaetyaawo. Teerika akenkithashiryaaiperotziri Awinkatharite, tema owashiwaetakawo, irawaetashitakawo: eeniro ojeeki antani; ari rowashironkaakae Tajorentsi.

**30** Rootaki pimantsiyagaanantayitakarini osheki, eejatzi kaari pishintsitayitani. Rootaki eejatzi ikamagaantayitantakarini piyemijantzinkaritepaeni.

**31** Aririka ayotakotyka eenirorika antani, okameethatzi akenkithashireeya, eero akimitagaa paerani, ookaero kaari kameethatatsi antakiri; roojatzi ameentanteeyaariri Jesokirishito, eero rowashironkagae Tajorentsi.

**32** Tema eejatzi okameethatzi ikantakowentee Awinkatharite, eejatzi rowashironkae, okantyaatakyka eeroaatanta paamariki kaari tsiwakani-

tatsini. Tee ikowakagaeyeeni atsipateeyaarini maawaeni riraga theenkantsiri.

<sup>33</sup> Iroñaka noyemijantzinkarite, aririka pipiyoteeyani powawenteeyarini Awinkatharite, poyaawakaawakyaata.

<sup>34</sup> Aririka pitasheyaperotaki, pityaawo poya janta pipankoki. Eero pipiyotashiteeyani pikemantyaawori pitashe: eenirorika pantani. Aririka na-reetemi nothotyaapaemiro, niyotaayitemironi paashini.

## 12

### *Ikenkithatakotziro omatakagaeyeakaerini Ishire Tajorentsi*

<sup>1</sup> Iroñaka, noyemijantzinkaritepaeni, niyoteeyemironi maawaeni omatakagaeyakimirini Ishire Tajorentsi. Tee nokoyi pikompiteeyaawoni, inta nokowaki piyoteeyawakironi.

<sup>2</sup> Piyoteeyini paerani tee paapatziyeeyawitarini Jesoshi inta pikemijantashitatayitawitawomi piwetsikashitayitarini, piiitajorentsitsashitawitari. Tema omajontziteeyakini roori. Pamatitashitaka eero ka apaniroeni.

<sup>3</sup> Nokowaki piyoteeyawakironi iroka. Aririka oñaawaetaakiri Ishire Tajorentsi atziri, eero ikantzi: "Tee ikameethatzi Jesoshi". Ejatzsi okimitaka, eeromi piyoteerimi, eero pikantzimi: "Irira Jesoshi rirotaki nowinkatharite".

<sup>4</sup> Inashitayitakani omatakagaeyeakaerini antawaetziniri Tajorentsi, omaanta apaani Ishire Tajorentsi.

<sup>5</sup> Inashitayitakani iroka anteeyenirini Awinkatharite, omaanta apaani ikanta irira.

<sup>6</sup> Inashitayitakani anteyakinirini Pawa Tajorentsi, omaanta rirotaki irira riyoakaero oetarika antayiterini ejatzsi ramitakotakae amonkaatero maawaeni.

<sup>7</sup> Iyotagaeyeakaeni Ishire amitakotawakaantyaari kameetha ajeekimotantyaariri Tajorentsi.

<sup>8</sup> Iyotakaayitakirini apaanipaeni kameetha ikaminaantakariri paashinipaeni; riro paashinipaeni iyotakaakiri kameetha riyotaantakaerori paashinipaeni. Okaatzi iyotakaayitziririni apaani: rowaga Ishire Tajorentsi.

<sup>9</sup> Ejatzsi omatakaayitzirini paashinipaeni rameentaperoeyakawoni ikantayitzirini Tajorentsi; paashinipaeni omatakaakiri retsiyatatakotayitzirini mantsiyaripaeni.

<sup>10</sup> Ejatzsi matakayitziririni paashinipaeni itajonkantayitzini. Paashinipaeni omatakaakiri ikenkithatakotziro kameetha Iñaani Tajorentsi. Paashinipaeni iyotakaakiri riyotayiterini kenkithatakantatsiri: rirotakirika kenkithatakeraeriri kamaari, rooma kaaririka. Paashini, omatakaayitakirini iñaawaacheepookitashitawo paashinijatopaeni paantentsi kaari riyotyi riori. Paashini ejatzsi omatakaayitakirini riyotanakiro kameetha okaati iñaawaeteri riori ejatzsi rowagaakaeniro.

<sup>11</sup> Inashitayitakani iyotagaeyeakaerini, omaanta apatziro apaani iyotagaeyiririni: rootaki Ishire Tajorentsi. Oetarika okowakaayitziririni, rootaki iyotaayitziririni, omatakaantakariri.

<sup>12</sup> Pamine: apaani okantawita awatha, omaanta eeniro aetzi, ako, aeki, akempita, maawaeni. Osheki okantawita, omaanta apaani okantawita awatha. Ejatzsi ikimita riraga Jesokirishito.

<sup>13</sup> Apaani okantawita Ishire Tajorentsi. Opokapaaki ojeekanan-tapaakawori ashire, rootaki asheninkatawakaanteeyantakaririni, okimitakagaeyeakaeni apaani akanta. Akaateeyirini joriyyo, paashinipaeni kaari joriyyotatsi; omawitya apaanipaeni pimantaari rinawita,

paashinipaeni kaari ipimanteetzi. Kijokiro owaeyakaeni Ishire Tajorentsi: apaani okanta.

<sup>14</sup> Noshiyakaawentemiro. Apaani okantawita awatha, omaanta eenitatsi anashitantari, oerikantari, aminantari, akemantari, osheki inashitapaeni.

<sup>15</sup> Tee okantzi aetzi: "Tee naaka rako, tee naaka iwatha rirori". Kyaaryo aetzi rootaki awatha, tee inashita.

<sup>16</sup> Tee okantzi akempita: "Tee naaka roki, tee naaka iwatha rirori". Ņaakiro, tema rootaki akempita awatha, tee inashita.

<sup>17</sup> Iyotyaarikami awatha rootaki aminantyaarimi, ɿarima amatakiromi akemantyaawomi? Iyotyaarikami akemantyaarimi, ɿarima amatakiromi akemaenkatantyaarimi?

<sup>18</sup> Omaanta kameetha riwetsikayitakironi Tajorentsi awatha: akemantyaari, aminantyaari, akatziyatziyawaetantyaari, maawaeni. Otarika ikoyiri, imatakiro.

<sup>19</sup> Iyotyaarikami oki ojeekakimi, ɿtsika akantyaakami?

<sup>20</sup> Kyaaryo, apaani okanta awatha, omaanta eenitatsi aetzi, oki, akempita, ako, maawaeni.

<sup>21</sup> Tekatsi okantya oki okantero ako: "Tee pikameethatzi". Eejatzi aeto, tee okantziro aetzi: "Tee nokoyimi". Teewee, tee okantziro.

<sup>22</sup> Eenitatsi jeekantayiteerini awathakipaeni oetarikapaeni, omaanta apaanipaeni tekatsi ishintsini aetakaashiwitawo ojeekashita, omaanta okameethaperotaki ojeekayitzini.

<sup>23</sup> Eejatzi okimita, eenitatsi apaanipaeni apashiwentakaakari, omaanta okameethatzi ojeeki. Akithaatakotyaawo kameetha tee akoyiro iñaagaete.

<sup>24</sup> Tee akithaatakotawo kaari apashiwentaka. Omaanta kameetha riwetsikayitakironi maawaeni awatha riraga Tajorentsi. Okameethatzi ojeekaeyeni rowaga kaari añaaperotawita.

<sup>25</sup> Imatakiro iroka amitakotawakagaeyantyaarini aetzi, oki, maawaeni. Tekatsi okantteeyani okijawakagaeyani.

<sup>26</sup> Aririka okatsitaki eechonkiini apaani, ari akemaatsitanakyaawo maawaeni awathaki. Tekatsirika oyeroni awatha eechonkiini tema kameetha akimoshirewenteeyakironi maawaeni awatha.

<sup>27</sup> Aakateeyakini oshiyakawori iwatha Awinkatharite Jesokirishito. Aakateeyakini eejatzi oshiyakawori iitzi, rako, roki, ikempita, oetarika.

<sup>28</sup> Iroñaka akaateeyakirini osheki aapatziyeyaririni Jesoshi. Reewawentakae irira rotyaantagaantakae apaanipaeni ikenkithate. Paashinipaeni rotyaantakiri ikamanantayitzirorini iñaani. Paashinipaeni rotyaantzi ryotaantzi. Roojatzi paashinipaeni rotyaantayitakirini itajonkantzi, paashini retsiyatatakotayitzirini mantsiyatzinkari, paashinipaeni ramitakotziri paashini atziri, paashinipaeni rotyaantakiri ikantayitzirini aapatziyariri Jesoshi oetarika rantayiterini, eejatzi paashini iñaawaetashitayitawoni paashinijatopaeni paantentsi.

<sup>29</sup> ɿRotyaanteyakaenima akenkithate maawaeni? Teewee. ɿAkamananteyinima iñaani Tajorentsi maawaeni? ɿAyotaanteyinima maawaeni? ɿAtajonkantteeyinima maawaeni? Teewee.

<sup>30</sup> ɿEtsiyatakoeyirinima maawaeni aaka mantsiyaripaeni? ɿAmateeyakironima maawaeni ayotayitakironi paashinipaeni paantentsi? ɿAmateeyakironima maawaeni owaagakiniri ashenkina iroka ikantziriri rirori? Teewee.

<sup>31</sup> Omaanta kameetha pikowakotaperoteri Tajorentsi imatakayemiro rooperotatsiri antawaerontsi.

Omaanta iroñaaka niyotaaperotemiro kameethaperotatsiri.

## 13

<sup>1</sup> Aririka amatero añaawaetashiwityaawo paashinipaeni paantentsi, ee-jatzi aririka amatero akemero ipaante ronampiri Tajorents, omaanta eerorika anintaperoyerini paashinipaeni, tema atsipetashiteeyakawoni, ayotashitayitawitakawoni añaawaetzi. Akimitawokari kampana, okantashita, toon, toon, toon. Akimitarikari tampoo ikantashita, teen, teen, teen.

<sup>2</sup> Aririka ayotzitayityaawoni kaari iñeetzi, aririka ayotzitakityaawo maawaeni imanayitawiteeni Tajorents, aririka amatayitakironi maawaeni riyotayitzirini atziri Iwaperite Tajorents, eejatzi aririka akyaryoowentaperotero aapatziyaperotyaari Tajorents, rootaki amatantyaawori oshirinkayiteroni ochemempipaeni: omaanta eerorika anintaperotziri paashinipaeni, atsipetashiteeyakayaawoni ayotashitawitakawo maawaeni, tee iñaperotana Tajorents nokameethatzi.

<sup>3</sup> Aririka apashitayityaarini ashironkaenkari maawaeni jeekimoteeri, aririka akyaryoowentaperoteri kameetha Tajorents akenkithatakoteri, rootaki ikjanteeri atziri, itaawenanteerori; omaanta eerorika anintaperotziriri paashinipaeni, atsipetashiteeyakayaawoni maawaeni, tee iñaperotanee Tajorents akameethatzi.

<sup>4</sup> Aririka anintaperoyerini paashinipaeni, tema amaeritakotashityaawo oetarika awijatsini, akaminthayeri paashinipaeni, eero akijashiryaa-neentashitari riraga ashaagantzinkari eejatzi riraga jewatatsiri tema pikowawitaka poshiyaari, eero ajagaakotawo, eero akantakaaperota.

<sup>5</sup> Aririka anintaperoteri paashinipaeni eero akantakaaperota, eero oñaashirenkiri paashinipaeni, eero antashitawo akowaperotziri aka, inta anteniri ikowakagaeri rirori; eero akijiri intsipaete, eero akenkithashiryaaapiintziro kaari kameethatatsí rantayiteetzirini owashironkaakae.

<sup>6</sup> Aririka anintaperoteri paashinipaeni, eero akimoshirewentziro kaari kameethatatsi ranteetziri intakya akimoshiryaaawentero kyaaryooperotatsiri,

<sup>7</sup> akantani akempoyeeri, akantani kameetha ameentaperotyaari, akantani akenkithashiryaa-kotari ari rantakiro kameethatatsiri, omaanta amaeritakotashityaari oetarikapaeni ranteri.

<sup>8</sup> Aririka anintaperoteri paashinipaeni, eero apakaero; omaanta eero akantatyaaani akenkithatero iñaan Tajorents, eero akantatyaaani añaawaetashityaawo paashinipaeni paantentsi. Eero akantatyaaani ayotashitayityaawo oetarikapaeni, omaantakya akanteetatyeyaaani anintaperotawakagaeyani.

<sup>9</sup> Tee ayotaperotawitani iroñaaka, akamanantakoteri apatziro okaatzi ayotakotakiriri.

<sup>10</sup> Iinja ipokapaakirika kameethaperotatsiri, eero akowaero iroka kameethatayitawitacharini iroñaaka. Tema ari ayotakiro maawaeni.

<sup>11</sup> Paerani eenironi eentsitawitani añaawaetashiweta, ayotashitayitarini aari eechonkiini, ayotzi akenkithashiryaaawita eechonkiini. Omaanta iroñaaka antaritapaakika, ookaneakiro antzirowa akimiwitakari eentsipaeni.

<sup>12</sup> Iroñaaka kimitaka aminaatakotakiri Tajorents ñaarontsiki, tee ikoñaataperotzi. Iinja aminapootaperotapaeri jenokinta. Iroñaaka ayoteeyawitarini eechonkiini, iinja ayotaperoyerapaerini, okimitaka ryoperotakae iroñaaka.

<sup>13</sup> Iroñaaka akantatyaaani ameenteeyakarini Tajorentsi, ayoteeyakini eero ramatawitee rootaki ayotantari ari aate iinja jenokinta, anintaperotawaka-gaeyakan. Omaanta kameethaperoteentsiri anintaperotawakagaeyaani.

## 14

### *Iñaaawaetashitayitaworini paashinipaeni paantentsi*

<sup>1</sup> Pikowaperoeyeni pinintaperoyerini paashinipaeni. Eejatzi pikowaperotero pantero maawaeni omatakaakaeri Ishire Tajorentsi, pikamanan-teeyaaririni paashinipaeni iñaani Tajorentsi.

<sup>2</sup> Eenitatsi atziri omapokashitakari iñaawaetashitanakawo paashinipaeni paantentsi. Tee ikemawakiri atziri omaantakya Tajorentsi. Tekatsi atziri kemawakironi ikantziriri. Omanawitaka iroka oñaawaetakayiri Ishire.

<sup>3</sup> Omaanta riraga iyotaantzirori iñaani Tajorentsi, ryotaakiri atziri ish-intsitaakiri rajankaneki, ikimoshiretakaakiri, riweshiryakaakari.

<sup>4</sup> Riraga iñaawaetashitawori paashinipaeni paantentsi kaari riyotzi, ish-intsishiretaki apaniroeni, omaanta riraga kenkithatakotziriri Tajorentsi rashiki ipaante rirori riyotagaeyakirini maawaeni iyemijantzinkarite, ish-intsishiretaki irira.

<sup>5</sup> Nokowawita maawaeni eero piñaawaetero paashinipaeni paantentsi, omaantakya nokowaperotaki pikamanantero iñaani Tajorentsi pashiki pipaante. Riraga kenkithatakirori iñaani Tajorentsi ranaakotziri riraga iñaawaetashitawori paashinipaeni paantentsi; tema ramitakotakiri paashinipaeni atziri riyoperotziri Tajorentsi. Omaanta eenirorika owaayiniriri iñaani riraga iñaawaetashitawori paashini paantentsi, okameethatzeejatzi.

<sup>6</sup> Pamine, noyemijantzinkarite, noñaanatashitapaemirika paashinijatoki paantentsi tema natsipetashitapaakyawomi eero piyotawakiromi oetarika nokantemiri. Nokowapiintaki namitakoeyemini, tema rootaki nokamanantzimiroi okaatzi kaari piyotzi apaanteki ashi, rootaki niyotakaantakimiroi piyotakotantyaariri kameetha Tajorentsi. Tema nokamantzimiro iñaani irira. Tema niyotaakimi.

<sup>7</sup> Noshiyakaawentemiro. Tee aña kiina, tee oshiyari atziri. Omaanta ari omatashitakyaawo opaemate aririka ijonkateetero. Aririka apatziro ijonkatashityaawo toot, toot, tee ayotakotziro oetarika mampaantsi okanterimi.

<sup>8</sup> Pamine, itziwooteetziri joraaro riyotantyaari rooteentsi romanataya, tziiii, tziiii, tziiii. Eerorika opoemaenkatzikameetha, ¿arima riyoteeyakini omanatachani riwetsikanteyyarini romanatantyaari? Eero.

<sup>9</sup> Eejatzi pikimiteeyakawoni. Aririka iñaawaetashitawityaawo kaari ikemath-eetzi wero, wero, ¿tsika okantyaaka ikemanteteawakyaaworini pikanterimi? Okameethatzipi iñaawaetantyaawo ashi apaante akemathatakanntyaariri asheninkapaeni okaatzi pikanteriri. Tema ari patsipetashitakyaawo piñaawaetashitya.

<sup>10</sup> Jaka kipatsikika eenitatsi osheki paantentsipaeni. Inashitayitakani, omaanta tee ikompiteeyawoni riraga ashitawori ipaante.

<sup>11</sup> Omaanta teerika akemaperotziro ipaante iñaawaetatsiri, kaari asheninka.

<sup>12</sup> Tema pikowaeyakini omatakagaeyemini Ishire Tajorentsi, ari okameethatzipi pikowaperotaki iroñaaka omatakayemi pamitakoteri piyemijantzinkarite riyotantyaariri Tajorentsi kameetha.

<sup>13</sup> Rootaki nokamanantzimiroi iroka: aririka piñaawaetero paantentsi kaari ryoetzi, okameethatzipi pikanteri Tajorentsi ramitakotemi pimatantyaawori powaayeniri piyemijantzinkarite apaante ashi pikantakiriri.

**14** Aririka noñaanatantyaari Tajorentsi paantentsi kaari noñaawaetantari, nokenkithatakawitakari rirori noshireki, omaanta tee niyotziro noñaawaetashitaka. Eejatzi tee namitakotziri paashini atziri.

**15** ¿Itaka nanteri naari? Aririka namaneri Tajorentsi okameethatzin noñaawaetantyaawo paanteentsi noshireki kaari niyotzi; omaanta eejatzi okameethatzin namaneri nopaanteki nomatantyaari nokenkithashiryaaokotero okaatzi nokantziri. Aririka nomampaawentyaari Tajorentsi, rooma nomampaantyaaworika paanteentsi noshireki kaari niyotzi, omaanta okameethatzin eejatzi nomampaawentyaari nopaanteki okaatzi niyotzi.

**16** Pamine, aririka piñaaperoteri Tajorentsi, omaanta pinashitakyaaworika pipaante, ¿tsika ikantyaaka ikemathatantyaawori riraga owakirari tsipateeyakinurini? Eero riyotawakiro oetarikapaeni pikanterimi.

**17** Aririka pipaasonkiteri Tajorentsi paashinijatotsiriki paantentsi, ee-jatzi itsipatzimirikia paashinipaeni atziri, teerika riyotziro iroka paashini paantentsi eejatzi teerika ikemimi kameetha, tekatsi pikantya piyotayeri riroripaeni. Tee ikemawaantetzimi.

**18** Nanaakoeyakimini noñaawaetantashitakawo paanteentsi nojeejkira apaniroeni, kaari niyotzi, rootaki nopaasonkitantariri Tajorentsi.

**19** Omaanta aririka apiyotawenteeyarini Tajorentsi, nokowaperotaki noñaawaetantyaawo niyotaperotakiri, niyotaantyaariri paashinipaeni. Aririka noñaawaetantashityaawomi osheki ñagaantsi paantentsi kaari piyotzi, eero amitakotzimi. Natsipetashitakyaawomi, wero, wero. Okameethatzin noñaawaetero apaanipaeni ñagaantsi pikemaeyakirini.

**20** Iroñaaka, noyemijantzinkarite, eero poshiyakotari eentsi: pikenkithashiryaaoperotanakya. Eerokyä pikenkithashiriiro kaari kameethatatsi: infakya pikimiteeyarini owakira koñaatatsi, tee ikenkithashiriiro kaari kameethatatsi. Omaanta aririka pikenkithashiryaaoperotanakya, kameetha pikimityaari antaripaeni, eenitatsi riyotantari.

**21** Eeniropi iroka okantzirini Iwaperite Tajorentsi:  
"Ikantzi Awinkatharite: 'Nokantawitakari joriyopae, omaanta tee ikemijantana. Iinja notyaanteniri paashinipaeni atziri, inashitayitaworin ipaante, ikamantawityaari, omaanta eejatzi rirori, eero ikemijantawakiri'".

**22** Rootaki nokantanztimirori iroka: iñaawaetashiteetakawo paashinijato paantentsi riyotantyaariri kaari aapatziyari Jesoshi. Tee iñaanatashitanari aapatziyariri Jesoshi riyotaantariri. Omaanta okameethatzin akamanteri aapatziyariri Jesoshi okaatzi riyotaakaeri riraga Tajorentsi eerorika oetarika ikowakaakaeri antero. Omaanta eero akamanteri kaari aapatziyariri Jesoshi iroñaaka: rooma eeroota aapatziyawo.

**23** Pamine, nokamantemiro: pipiyotawenteeyaaririnika Tajorentsi, aririka piñaawaetantashiteeyakyawoni paantentsi kaari piyotzi: wero, wero, wero; eero ikemiro maawaeni. Aririka ikyaaapaaki paashini atziri, kaari aapatziyariri Jesoshi; tema ari ikantapaaki: "¡sha! Pamineritya irika, ithawirentsitaki".

**24** Omaanta aririka piyotaante apaanteki, ari ikemapaakiro kaari aapatziyariri Jesoshi aririka ipoki. Ikemapaakimirika, riyotantyaari tee ikameethatzin, eeniropi rantani. Okenkithashiryaaokayeri maawaeni ike-maeyapaakirini.

**25** Ikenkithashiryaaaneero maawaeni imanawitakari rajankaneki. Rootatzi rotziwerowashitantanakari Tajorentsi, ipinkathatantyaariri. Ikan temi: "Kyaaryo, itsipataperoeyakimini Tajorentsi".

**26** Ñaakiro, noyemijantzinkarite. Aririka pipiyoteeyani, kameetha pomampaaya apaanipaeni, riyotaante paashini, ikenkithatakaante paashini, paashini iñaawaetantahitakawo paantentsi kaari riyotzi, paashini rowaa-gaeyakinirini aapatziyariri Jesoshi ikantakiriri. Omaanta, oetarikapaeni panteeyerini, pantero piyotanteeyaaririni piyemijantzinkarite.

**27** Enenitsirika ñaawaetashityawoni paantentsi kaari riyotzi, kameetha iñaawaete aririka ikaate apite, eerorika 3: eerokya osheki. Eero itsipatatakagaeyani iñaawaetantyaawo. Rityaawo apaani, rimpetaapaki paashini. Omaanta okameethatzi ijekki rowagaeyakinirini pisheninka ikantakiriri.

**28** Teerika añiiri owaagaeyakirorini ikantziri, okameethatzi imaeerite, eero iñaawaetantahitawo paantentsi kaari riyotzi piyoteeyeencharini, omaanta kameetha iñaawaetashirete rajankaneki, eejatzi iñaanateri Tajorentsi rajankaneki.

**29** Okameethatzi riyotaantero Iñaani Tajorentsi, ikaatzi kamanantayitzirorini iñaani Tajorentsi apite, eerorika 3. Omaantakya paashinipaeni, ikenkithashiryakotaperoyereroni ikamantayitakiririni okameethatzirika.

**30** Aririka riyoteeri Tajorentsi paashini jeekatsiri kaari riyoteeyawitanipaashinipaeni, okameethatzi imaeerite. Aririka ithonkatapaakiro riraga jewatatsiri ikenkithatzi, roojatzi rirori imatantanakyaawo riyotaante.

**31** Okameethatzi riyotaantero iñaani Tajorentsi apaani, roojatzi rimpetaepaashini, roojatzi riyoteeyantyaarini maawaeni kowatsiri, riweshiryaanteeyaaarini maawaeni.

**32** Riraga kamanantayitzirorini iñaani Tajorentsi, kameetha imaeerite, aririka ritakyaawo iñaanataki paashini. Tema imatziro atziri imaeeritawakita roojatzi ithonkatapaakyaawo itakawori roojatzi iñaawaetantanakyaawo paashini.

**33** Tee ikoyi Tajorentsi akishiyeenkatyá añaawaete eero akemaperotantawakawo iyenkithari, inta ikowaki amaeriteeyanakini kameethá, akeman-teeyawakyaaworini.

Aririka ipiyotawentapiintari Tajorentsi maawaeni rowameethateeyirini, ameteeyakaní

**34** tsinani omaeriteeyakini. Tee oshinetaantsita. Kameetha okemijante, tema aritaki okantzi Iwaperite Tajorentsi.

**35** Okoyirika iyote oetarikapaeni, kameetha ojampiteri oemi janta opankoki. Tee okameethatzi oñawaete piyotawenteeyarinirika Tajorentsi.

**36** Pamine, tee eerokapaeni itawori piyotanteeyironi iñaani Tajorentsi. ¿Piitakima apaniroeni piyotziro eerokapaeni?

**37** ¿Pikaateeyirinima kamanantzirorini iñaani Tajorentsi? ¿Pikaateeyirinima aapatziyaperotawori Ishire Tajorentsi? Okameethatzi riyotawakiro iroka nojankinatzimiri rootaki kaminagaantsi rashì Awinkatharite.

**38** Eerorika raapatziyawo pisheninka iroka, eero paapatziyeeyarini rirori.

**39** Rootaki, noyemijantzinkarite, pikowaperotanteeyarini pikamanteri paashinipaeni iñaani Tajorentsi. Omaanta eero pithañaapithatarí iñaawaetantyaawo paantentsi kaari riyotzi.

**40** Omaanta powameethatero oetarikapaeni pantayitzirini. Tee okameethatzi píñaawaeteeyini: pimaeriteeyini maawaeni, pikemijanteri apatziro apaani ñaawaetatsini.

**1** Iroñaaka noyemijantzinkarite, nokenkithashiryaakagaemiro eejatzi nokamantzitakimiri: tema okameethataki paapatziyitawakawoni; roojatzi iroñaaka pikanta piyotaperotzi kyaaryooperotaki, tee otheeyaantsita.

**2** Rootaki owawijaakoeyemirini, aririka pikantatyeeyaani paapatziyantyaawo, omaanta eerorika eekiro piyaatatyee paapatziyawo eero owawijaakotzimi.

**3** Nityaawo nokamantakimiro iroka rooperotsiri ikamantziteetaknari: eeniro anteeyakirini kaari kameethatatsi, rootaki ikamawenanteeyakaerini Jesokirishito. Imonkaatakiro okamantakotzitaririni Iwaperite Tajorentsi.

**4** Romonkyaagaetakiri omooki. Okaataki 3 kitejiri ipiriinantanaari eejatzi. Imonkaatakiro eejatzi okamantakotzitaririni Iwaperite Tajorentsi.

**5** Roñaagakari Peetero, eejatzi roñaayitapaari riraga riyotaanewopaeni.

**6** Roojatzi roñaagaeyaarinis osheki ayemijantzinkarite, ipiyotawakagaeyani. Ranaakotakiri 500 ñagaeyakiririni. Ijeekaeyanakini iroñaaka osheki ñaakiriri rirori, omaanta ikamagaantaki apaanipaeni.

**7** Roojatzi roñaagantari Jantyaako, eejatzi roñaagaeyaarinis maawaeni rotyaantanewopaeni.

**8** Riweyaantanaana naari roñaagana, omaanta tee nokimitari paashinipaeni rotyaantanewo, tee nojeeckakaakiri Jesoshi eejatzi paashini riyotanewo jaka kipatsiki.

**9** Rotyaantakina, omaanta tee nokimitari paashinipaeni rotyaantanewo, tee nokameethatzi; tema nokijawitarini maawaeni aapatziyariri Jesoshi.

**10** Ineshironkatakina Tajorentsi, rootaki nokimitantariri iroñaaka. Tee ratsipetashitawo ineshironkatakina. Ipomeentsiuentaari Tajorentsi paashinipaeni riraga rotyaantakiri, omaanta nanaakoeyakirini naaka, nopomeentsiwentaperotakari nantawaeteniri. Tee nantashityaawo naari, omaanta ineshironkatakina, nomatantakawori.

**11** Aririka nokenkithatakagaeyemini, rirorika paashini rotyaantanewo kenkithatakagaeyemirini: tee opaashinitzi. Aritaki omonkaatawakaakya nokamanteyimirini: aririka paapatziyawo, aritaki pawijkottee.

### *Ipiriinte kamaentsripaeni*

**12** Pamine, nokamanteyakimini: "Ikamaki Jesokirishito, ipiriintanaa ee-jatzi". Paapatziyeyawakinani. ¿litarikya pikantagaanantakari eero ipiriinta kamaayiteentsirini?

**13** Eeromi ipiriintaami kamaentsiri, eeromi ipiriintaami riraga Jesokirishito.

**14** Eerorikami ipiriintemi, natsipetashitakawomi nokamanantayitzini, patsipetashitakawomi eerori aapatziyeyayarini Jesoshi.

**15** Eejatzi piyotakimi notheeyakotakari Tajorentsi. Ñaakiro, tema nokamantakotakiri: "Ipiriinteri Jesokirishito", omaanta eeromi ipiriintaami kamayiteentsirini, eeromi ipiriinterimi rirori.

**16** Eeromi ipiriintaami kamaentsiri, eeromi ipiriintaami Jesokirishito.

**17** Eeromi ipiriintaami, patsipetashiteeyakaawonimi paapatziyeyakarini; eeniromi ojeekimotemimi kaari kameethatatsi,

**18** eejatzi ikantyaami riyaatapiintemi paamariki kaari tsiwakanitatsini kamaeyatsirini, eejatzimi riraga aapatziyeyawitaririni Jesokirishito.

**19** Eejatzi aaka, eeromi apiriintaami, atsipetashitakawomi aapatziyawitakari iroñaaka Jesokirishito, owashironkaaperotakyaami, anaakoeyakirini maawaeni atziri ashironkagaeyacharinimi.

<sup>20</sup> Omaanta ipiriintaperotanaa Jesokirishito, reewaeyakirini maawaeni paashini kamaeyatsirini eero ikamae eejatzi.

<sup>21</sup> Eenirop rantakiri riraga Araani, rootaki akamaeyantakarini iroñaaaka. Eejatzi ikimitakari, eeniro rantakiri riraga paashini shirampari, riraga Jesokirishito, rootaki apiriinteeeyantaarini iroñaaaka.

<sup>22</sup> Asheninkateeyakarini Araani, rootaki akamaeyantakarini. Eejatzi okimitaka, asheninkateeyakarini Jesokirishito iroñaaaka, rootaki rowañaaanteeyeerini.

<sup>23</sup> Reewaeyakaeni rirori. Roojatzi aririka ipokae, ipiriinteeeyaneeni maawaeni aapatziyeeyaririni. Aritaki okantyaari: aririka omonkaataky, apiriinteeeyaneeni maawaeni.

<sup>24</sup> Ikantziri Jesoshi ashitariri:

—Ari okaatapaaki. Tema nothonkakiri kamaaripaeni, jewatatsiripaeni irira, nantatsiripaeni, theenkantatsiripaeni eejatzi ponampiripaeni naawita piyathatakimir paerani, maawaeni. Iroñaaaka Pawa, pipinkathariwenteri eeroka maawaeni jeekaeyatsirini.

<sup>25</sup> Ipinkathariwenante Jesokirishito jaka kipatsiki roojatzi ithonkaeyantyaaririni maawaeni kijeyawitakaririni.

<sup>26</sup> Roojatzi eero ikamae eejatzi atziri.

<sup>27</sup> Okantzini Iwaperite Tajorentsi: "Iitakiri Tajorentsi Jesokirishito jewawentzirori maawaeni jeekaeyatsirini". Tema okantzi: "Maawaeni jeekaeyatsirini", omaanta eero ipinkathariwenantzi Iriri: tema rirotaki iitakiriri pinkathariwenantatsini.

<sup>28</sup> Inja aritaki ranaakoeyerini Jesokirishito maawaeni jeekaeyatsirini, ipinkathariwenteeyerini maawaeni. Apatziro irira Iriri, tekatsi ikantya ipinkathariwenteri. Ikanteri: "Pawa, eeroka noñaaperotzimi, panaakoeyanan maawaeni pipinkathariperotaki eeroka". Kyaaryo, Tajorentsiperi irira, pinkathariwenantaperotatsiri rirori.

<sup>29</sup> Pamine, eenitatsi kaawoshitawentari kamaentsiri. Eeromi ipiriintaami kamaentsiri, tema ratsipetashityawomi ranteromi.

<sup>30</sup> Eejatzi, eeromi apiriintaami, tema natsipetashityawomi nopomeentsi-wentapiintawo nokenkithatzi.

<sup>31</sup> Paapatziyeeyakarini Awinkatharite Jesokirishito, rootaki niweshiryawenanteeyakimirini: kyaaryo iroka nokantakimir. Eejatzi okimitaka, kyaaryo iroka nokamantemir: tee niyotzi tsika okaateka rowamaawenteetenawo nokenkithatzi. Maawaeni kitejiri eenitatsi kowawitachari rowamaawenteenawo.

<sup>32</sup> Janta Ejeesoki ikijaperotakina jeekatsiri, osheki opomeentsitaka. Pamine, eeromi apiriintaami, tema natsipetashitakyaawomi. Eero apiriintaami, eero akenkithashiretzirimi Tajorentsi: thame owaeyani, thame ashinkiteeyani; roojatzi akamantakya, ari okaatzi.

<sup>33</sup> Eero pishinetziri theenkantatsiri ramatawitemi. Tema kyaaryo ikan-teetzi: "Eero, kijokiro poyiri theenkantatsiri: rantakaemirokari kaari kameethatatsi".

<sup>34</sup> Pikenkithashireeya, eero papiiteero eejatzi kaari kameethatatsi. Pikaat-apinteeeyirini kaari yoteeyirini Tajorentsi: ¿iitarika kaari pipashiwenanta?

### *Owakirari iwatha*

<sup>35</sup> Aririka rojampitee theenkantatsiri: "¿Tsika ikanteeyaka ipiriinanta-neyaari kamaentsiri? ¿Tsika okantyaaka iwatha, aririka ipiriinte?"

<sup>36</sup> Tee ikenkithashiryaa rirori. Eerorika opankita okithoki kipatsiki, roojatzi okamantakya, eero oshooki.

<sup>37</sup> Aririka apankitero okithoki, tee apankitakotziro owatha, owaato, oshi, maawaeni: athatyero apankitziro okithoki. Aririka apankitero teriiko, aririka paashini okithoki,

<sup>38</sup> omaanta Tajorentsi ijekakaakiro owatha, owaato, oshi, maawaeni; imatakiro ikowakaakirori. Teriiko okithokitakaero okithokipero roori. Kaniri ojeeki owathapero roori. Eejatzi okimiteeyakan maawaeni shookay-itatsirini.

<sup>39</sup> Tee imonkaatawakagaeyani iwatha maawaeni añayitatsiripaeni. Eeniro atziri rashri rirori iwatha, rinashita rirori tsimeri. Rinashita eejatzi shiwankitzinkari. Rinashita eejatzi shimapae.

<sup>40</sup> Eeniro jeekatsiri kipatsiki, eejatzi jeekatsiri jenokinta. Ikameethateeyakini, omaanta inashitayitakan, tee imonkaatawakagaeyani.

<sup>41</sup> Ishipakiri oorya. Rinashita riraga kashiri, ikitamaashitatzi rirori. Rinashita eejatzi riraga ompokiro, ikitapookitzi. Eejatzi rinashiteeyakan ompokiropaeni: apaani kitejagaakiwitachari, omaanta paashini, tee.

<sup>42</sup> Eejatzi oshiyakari aari, aririka apiriintanee: eero akimitaa iroñaaka. Ikkiteetee, ari apathagaeyanakini. Apiriinterika, eero apathaanee eejatzi.

<sup>43</sup> Kitateencharika, tee okameethatzi. Apiriinterika, eero apiiteero apathagae. Iroñaaka tee ashintsitzi, rooma apiriinterika, ashintsitaperotanee.

<sup>44</sup> Iroka awatha ikitateetziri, tema ametakawo kipatsi ajeekaeyantawoni. Aririka apiriintanee inashitanakya awatha, ametantapaakyawori ajeekaeyapaeni janta jenokinta.

<sup>45</sup> Okantzi Iwaperite Tajorentsi: "Añaatsiri naawitani riraga jewateentsiri paerani shirampari, riraga Araani". Omaanta impaetapaentsiri, riraga Rotyaantanewo Tajorentsi, rirotaki owañaantaperotatsiri, eenitatsi itajorenka irira.

<sup>46</sup> Tema itawo iroñaaka iroka awatha ajeekantakari jaka kipatsiki; iinja ojeekaa awatha owakirataatsini, jeekatsiri jenokinta roori.

<sup>47</sup> Riwegsikaetakiri kipatsi riraga jewateentsiri atziri iiteetziri Araani, rootaki kipatsi iwatha. Omaanta riraga apitetapaentsiri rinashita, ipoñaaka jenokinta. Tema rirotaki riraga Rotyaantanewo Tajorentsi.

<sup>48</sup> Ijeekawitani kipatsiki Araani, eejatzi akimiteeyakarini maawaeni jeekatsiri jaka kipatsiki. Ijeeki jenokinta paashini, eejatzi akimiteeyaaarini maawaeni jatatsini jenokinta.

<sup>49</sup> Eejatzi okimitaka: oshiyanteeyakawoni aaka iroñaaka iwatha riraga kipatsijatzi, iinja oshiyapaakyawo iwatha riraga Rotyaantanewo Tajorentsi riraga jenokijatzi.

<sup>50</sup> Rootaki, noyemijantzinkarite, nokamanantzimirori iroka: tekatsi okantya iroka awathaka iyaate janta ipinkatharitzinta Tajorentsi, tema ari opathagae. Tekatsi okantya iyaate janta teenta ipathagaeyininta jeekatsiri.

<sup>51</sup> Pamine, nokamantemiro iroka manawitachari: eero akamaeyini maawaeni, omaanta apaashinitieeyanakini maawaeni.

<sup>52</sup> Itziwootanteetanakya ayoteeyantyaarini monkaataka. Intsipaete kimiwitaka amachookanakitzi apaani aaka añaatsiri apaashinitanaki. Eejatzi intsipaete ipiriinteyanakirini Tajorentsi maawaeni aapatziyaririni Jesoshi riraga kamaeyawiteencharini; eero ikamae eejatzi. Ari ipaashinitanaki irirapaeni eejatzi.

<sup>53</sup> Ashi oyiro apathagaeyini, omaanta eero apathagaeyeeni eejatzi. Ashi oyiro akamaeyini, omaanta eero akamaeyeeni eejatzi.

<sup>54</sup> Opatheragaeyanakini iroka awathaka maawaeni, omaanta eenitatsi awatha kaari pathaanitatsini. Akamaeyanakini maawaeni, rooma iinja, eero akamaeyeeni eejatzi. Roojatzi omonkaatakyia iroka rojankinateetziri:

"Ariwee. Eero apiitaa akamaeyeeni eejatzi.

55 Eero akenkithashiryaaga akame. Kameethawee. Iroñaaka eero athaawan-teeyawaconi akame".

56 Aririka antayiteroni kaari kameethatatsi, ari athaawantakyaawo akame. Eenitatsi eejatzi rojankinarini Moeseeshi, kamantakaeri: "Eeniro pantani".

57 Rootakikya rowawijaakoeyantakaerini Awinkatharite Jesokirishito. Ariwee. Kameetharini Tajorentsi. Eero athaawanteeyawoni akame.

58 Rootaki, noyemijantzinkarite nonintaperotziri, nokamanantemirori iroka: pikyaaryoowenteniri Awinkatharite oetarikapaeni panteniriri, eero piperashirya, pikantatyeyaaani pikyaaryoowentero. Rootaki kaari pipakaantyaawo. Piyoteeyakini eero patsipetashitawo pipomeentsiwentyaari.

## 16

### *Aapatziyariri Jesoshi ipiyotziniri jerojareejatzi iyorikite*

1 Iroñaaka nokenkithatakoteri koriki pipiyoteniri ayemijantzinkarite ashironkagaeyacharini janta Jerojareeki. Iroka nokamantzimiri, nokamantakiri eejatzi aapatziyariri Jesoshi janta Karaashiyaki.

2 Maawaeni tominko okameethatzi pipiyotapiinteniri jerojareejatzi piyorkite, pikempoyeniri. Tsika ikaate piyorkite, pikempoyaagaanteniri. Pityaawo pipiyotzityaanari iroñaaka, opomeentsitzimotzimikari aririka na-reetaapaakya.

3 Eejatzi nokowaki piyoiitya aaneenirini. Aririka nareetapaeya, nojank-inateniri jerojareejatzi, riyotantawakaariri. Roojatzi otyaanantyaariri Jerojareeki.

4 Pikowaeyenirika niyaate naari, ari notsipateeyanakyaarin.

5 Inja niyaate noñeyemini, omaanta nityaawo niyatapaente Masherooniyaki.

6 Aririka ojamani nojeekimoteeyemini, aririka nokyaawontsitakotaki. Roojatzi pikaminthagaeyawakinani, tsikarika niyaate eejatzi.

7 Aririka noñaapaakimi, tee nokoyi noshintsitanaki nawijanakimi. Nokowaki ojamani nojeekimotanakimi, ishinetenarika Awinkatharite.

8 Omaanta nojeekanakiita jaka Ejeesoki, roojatzi omonkaatantyaari kite-jitatsiri owaero Pentekoshiteshi.

9 Ikowakagaeyakinani osheki nokenkithatakagaeyanakirini. Osheki raapatiyeeyarini Jesokirishito. Omawitya ijeeki eejatzi osheki kijeyakinarini.

### *Riwethateeyakarini iyemijantzinkaritepaeni*

10 Rareetapaemirika Temoteeyo, pineshironkaeyawakirini. Tema ikimitakina naari, osheki rantawaetziniri Awinkatharite.

11 Eero pitheenkawakiri. Aririka omonkaatapaakya ipiyee jaka, eejatzi kameetha pineshironkatawaeri, kameetha rareetztanteyaa jaka. Noyay-itakirini, eejatzi paashinipaeni ayemijantzinkarite.

12 Eejatzi nokantawitakari ayemijantzinkarite Apooro. Nokantaperotaw-itakari riyaatemi iñeemimi, itsipatyaarimi paashinipaeni aapatziyariri Jesoshi. Tee ikoyi riyaate iroñaaka. Aririka inja riyaatanaki.

13 Kyaaryoowa, ramatawiteetzimikari. Pikyaaryoowenteeyeroni paapatziyaperoeyarini Jesoshi. Eero pithaaawanteeyani. Pishintsiteniri Tajorentsi maawaeni.

14 Thame anintaperooyerini atziripaeni, oetarikapaeni anteniriri.

<sup>15</sup> Piyoteeyirini, noyemijantzinkarite, riraga Eshiteejana eejatzi ikaateeyinira irira reewateeyirini akaayajatzi raapatziyeeyarini Jesoshi. Ikyaryooowentakiro ikaminthagaeyirini maawaeni ayemijantzinkarite rowameethatziri Tajorentsi. Tekatsi kanterini, riyotashitaka ikaminthaaawakagaeyakan.

<sup>16</sup> Ipomeentsitaka ramitakotaperoteeyimini, oetarikapaeni rantayitzimirini. Nokowaki paapatziyeeyawakyaarini riori, eejatzi paapatziyeeyawakyaarini maawaeni kimitteeyakaririni.

<sup>17</sup> Niweshiryaaawentawakari riraga areeteeyacharini riraga Eshiteejana, Jorotonaato, eejatzi Akaeko. Eeniroteeyatsini jaka, okimtzimotakina eerokateeyakinirika tsipateeyakinarini jaka.

<sup>18</sup> Ikimoshiryaaakaakimi pajankaneki chapinki, iroñaaka ikimoshiryaaakaapakina naari najankaneki. Rootaki okameethatantari piñaaperoeyawakirini riori.

<sup>19</sup> Riwethataperoeyakimini maawaeni piyotawenttaririni Tajorentsi jaka Aashiyaki. Eejatzi riwethateeyimini Akiirishi eejatzi roori Pirishiira, eejatzi maawaeni piyotapiinteeeyacharini janta ipankoki. Tema riyoteeyakini aapatziyeeyaririni Awinkatharite.

<sup>20</sup> Riwethateeyakimini maawaeni ayemijantzinkarite kameetha.\* Aririka piwethatawakaakya, ari kameetha paakameethatawakagaeyaani.

<sup>21</sup> Naaka Paaworo wethateeyimirini. Naaka jankinateeyimirorini iroka nakoki.

<sup>22</sup> Riyaateeta paamariki kaari tsiwakanitatsini maawaeni kaari ninterini Awinkatharite. Pishintsite, Nowinkatharite, pipokae.

<sup>23</sup> Nokowaki kameetha ineshironkaeyemini Awinkatharite Jesoshi.

<sup>24</sup> Tema eeroka aapatziyeeyaririni Jesokirishito, rootaki iroñaaka noninta-peroeyantzimirini. Aritaki okantyaari.

Naaka jankinateeyimirorini iroka:

Paaworo

---

\* **16:20** Rametari joriiyopaeni paeraniperoroña ithwoootawakaeya aririka riwethatawakaeya.

## RIRAGA PAAWORO RAPIITEENIRI ROJANKINATEENIRI KORINTOJATZI

<sup>1</sup> Naaka Paaworo nojankinateeyimironi eerokapaeni korintojatzi. Nokoyi niwethatemi eerokapaeni tsikarika pikanta pijeeki. Paerani rotyaantakina Pawa Tajorentsi noshiyakaawenteri Jesokirishito, nokenkithatakayeri maawaeni atziri. Nojankinateeyimini maawaeni aapatziyariri Jesoshi jaga Korintoki ejatzi jaga maawaeni kipatsiki owaero Åkaaya. Iroñaaka notsipatari jaka ayemijantzinkarite Temoteeyo.

<sup>2</sup> Maawaeni kitejiriki namaniri Pawa Tajorentsi, nokantziri:

—Pineshironkaeyerini aapatziyariri Jesoshi janta Korintoki ejatzi pamitakoteri ijeekanteeyarini kameetha. Ejatzi ikimiteeyemini riraga Awinkatharite Jesokirishito.

### *Ashironkayaarika ari ishaintsitakaakae Tajorentsi ajankaneki*

<sup>3</sup> Thame añaaperoteri Tajorentsi, riraga Ashitariri Awinkatharite Jesokirishito. Rirotaki neshironkateeyakaerini ejatzi weshiryaakazaeyeerini.

<sup>4</sup> Aririka ashironkaeyawityaani tema ari riweshtiryaakazaeyakaeni. Pamine, itakawori riweshtiryaakazaeyakaeni aari, roojatzi ayoteeyantakarini aweshiryaakazaeyaaarini riraga paashinipaeni ayemijantzinkarite, aririka rashironkaeya rirori.

<sup>5</sup> Kyaaryo, aritaki okanta akemaatsitakyaawo ikimitaakaga paerani Jesokirishito, aritaki riweshtiryaaakaanakae Pawa Tajorentsi.

<sup>6</sup> Ro nokemaatsitaktakawori riweshtiryawenantemiri rirori, ejatzi rowawijaakotantemiri. Aririka riweshtiryawentakina naaka ejatzi eeroka ari riweshtiryawentetakimi, tema piyotakotakina riweshtiryawentakina irira. Ari pikanty eeroka pikemaatsitayityawonirika, ari riweshtiryaaakimi rootaki peshiwenantyaaatori oetarikapaeni.

<sup>7</sup> Rootaki niyotantari eerokapaeni eekiro piyaatatayee pameentyaari Jesokirishito. Tema niyoperotaki aririka pikimiteeyenani pikemaatsityaawo eerori oetarikapaeni, ejatzi pikimiteeyenani piweshtiryawenteeyaaarini Tajorentsi.

<sup>8</sup> Nokowaki piyoteeyeni, noyemijantzinkaritepaeni, osheki nokemaatsitaperotayitakawoni janta Aashiyaki, tema nokenkithatakotantakariri Jesokirishito. Osheki nashironkaaka, tee eechonkiini. Nokenkithashiryaaawitaka aritaki nokamaki.

<sup>9</sup> Kyaaryo nokamemi; omaanta ishinetziro Tajorentsi riyotaakina tee okameethatzi ameentyaawo ashintsini aakapaeni inta ameentyaawo ishntsini rirori, riraga piriinteririi kamaentsiripaeni.

<sup>10</sup> Ari rowawijaakotakina riraga Tajorentsi, kaari nokamanta; ejatzi eekiro piyaatatayee rowawijaakotena irira, roojatzi ikowaki nokame. Niyotzi ikantyaani rowawijaakotapiintena,

<sup>11</sup> aririka pamaneeeyerini Tajorentsi ramitakotena. Roojatzi, aririka riyoteeyeni paashinipaeni ikemijantakimi rirori, rowawijaakotakina, osheki riweshtiryawenteeyaaarini irira ejatzi ipaasonkiteri.

### *Pimatero pameentyaawo nokantzimiri*

<sup>12</sup> Niyotaki iroka: tema ramitakotakina riraga Tajorentsi, ineshironkatakina, rootaki nokyaaryoowenantanariri nantziniriri. Tee niyotashita oetarika nantziniriri, omaanta riyotaakina rirori okameethatantari nantayitakinirini. Niyotaki piñaaperotakiro

okameethataki nantayitakinirini, eejatzi ikimitaka paashinipaeni atziri, rootaki nokimoshiryaantakari.

**13-14** Tee opomeentsita piñaanatero maawaeni nojankinatzimiri, eejatzi tee opomeentsita piyoteeyeroni. Niyotaki iroñaaaka eechonkiini pikemap-erotawakiro nokamantakimiri paerani, eejatzi eechonkiini paapatziyaw-itakina. Nokowaki eekiro piyaatatye piyotero paashini nojankinatzimiri roojatzi piyoperoeyawakironi kameetharini. Aririka ipiyee Awinkatharite Jesoshi, niweshiryaawenteeeyemini, omaanta nokowaki pikemaperotero nokamantztakimiri piweshiryaawenteeeyantnarini iroñaaaka.

**15-16** Ari niyotaki piweshiryaawentawitakina, piñaaperotawitakina, rootaki nokenkithashiryaantawitakari napiitaatem i nareetaatem. Niteeyeminimi noñagaeyaneemini, roojatzi nowaaganakyaami janta Masherooniyaki. Roojatzi noñapaemimi eejatzi, roojatzikya nowaaganakyaami Joreeyaki. Apite aweshiryaawentawakagaeyaanimi.

**17** ¿Arima nokowaki namatawitemi? ¿Nokimitakarima amatawitantatsiri kantashitachari: "Ari", eejatzi kantashitachari: "Eero"? Tee nokimitari. Tee nokoyi naaka namatawitemi.

**18** Tema imonkaatziro Tajorentsi ikantziri, tee ramatawitantzi. Eejatzi naaka, nomonkaatziro ikowakaakinari, rootaki kaari nokanantapiintzimi: "Ari nantero", roojatzi nokantashitzimi: "Eero nantziro".

**19** Ari nokaatakiri Shiarashi, eejatzi Temoteeyo nokamanteeyakimini tsika ikantari Jesokirishito, riraga Itomi Tajorentsi. Tee ikantzí rirori: "Ari nantero", roojatzi ikantashita: "Eero nantziro". Apatziro ikantapiintzti: "Ari nomatakiro", roojatzi rantziro.

**20** Kyaaryo ranteeeyakaeroni maawaeni ikashiyakaakaeri Tajorentsi aakapaeni atziripaeni. Tema ikamawentakae rowawijaaktanteeri. Rootaki akanteeyantaririni maawaeni atziri ikameethataki, ipinkathateeyantyaaririni rirori. Aritaki okantyaari.

**21** Apatziyeeyakarini Jesokirishito, rootaki itajonkawenantakaeri Tajorentsi ashenkatawakagaeyantakarini. Eejatzi riyyoyeeyanani naaka nokenkithateeyakoterini.

**22** Tema rotyaantakiro Ishire ojeekantakae ajankaneki. Iroñaaaka ay-oteeyakini itomintakae, rishintontakae, rootaki kaari rookaeyanteeni.

### *Ikamanteeri iitaka kaari riyaatanta iñaagaeri*

**23** Rootaki kaari niyaatanta noñemi paerani, tee nokoyi nokenkithatakaawentemiro pantayitawitakarini: tee nokoyi nowashiretakagaeyemini. Riyotzi Tajorentsi tee notheeya.

**24** Tee nokoyi nokantapiinteeeyemini pike mijantaperoeyenani naari, tema pike mijantaperoeyakirini Tajorentsi. Omaanta nokowaki namitakoeyemini: niweshiryaakagaeyemini maawaeni.

## 2

**1** Nokenkithashiryaaka: "Iroñaaaka eero niyaatzi noñeeri riraga korintojatzi. Napiitakagaarikari nowashiretakagaeyaarini, eejatzi nowashiretakarikari naari".

**2** Aririka nowashiretakayemi, tema eejatzi naari ari nowashiretakoeyemini. Roojatzi tektsi janta weshiryaakagaeyenani naari. Aririka noñeyeeyemini piweshireeyani, ari niweshiryaaneeya naari. Rooma eororika piweshireeyya, eero niweshiryaaa naari.

**3** Rootaki paerani nojankinatantzimori, nokaminaantakimiri: "Pookero iroka kaari kameethatatsi pantayitzirini". Tema tee nokowaki nopolantyaari nowashiretakaoeyemini, omaanta okameethatzi

niweshiryaa kagaeyemini. Nokenkithashiryaa kotaenii eerokapaeni pikemijantaperotona okaatzi nojankinatzimiri rootaki atsipatawakaantaari akimoshireeyeni.

<sup>4</sup> Paerani nojankinateeyantakimirorini, osheki nowashiretakotakimi eerokapaeni, tema osheki niraakoeyakimini. Tee nojankinatakimo nowashiretakaantemiri, omaanta nokowakini piyoteeyenani osheki nonintaperoeyakimini.

### *Ipeyakotziri Paaworo riraga antawitaworini kaari kameethatatsi*

<sup>5</sup> Kyaaryo nowashiretakotawitakari riraga kantzimatanari, omaanta tee apatziro naaka rowashiretakaawitakina inta eejatzi eeroka rowashireperotakayimi. Tee nokoyi nokantakoteri osheki, tema tee nokoyi nokantakowaetashityaari.

<sup>6</sup> Ari powashironkaeyakirini rirori, rootaki rookantaawori rantawitakarini, iroñaaka monkaatapaaka.

<sup>7</sup> Iroñaaka eero pikijiri eejatzi, omaanta pikaminthagaeyerini: pipeyakoteniri okaatzi rantawitakari. Eerorika pipeyakotziniri ari ikantashireperotakya, ikenkithashiry: "Eero ipeyakotantanawo Tajorentsi eejatzi okaatzi nanantawitakawori".

<sup>8</sup> Nokowaki iroñaaka piyotakayeri kyaaryo pinintaperoeyakirini, pipeyakoteniri okaatzi rantawitakari.

<sup>9</sup> Paerani nojankinatzimiro nokantzimi: "Powashironkaeri riraga antzirori kaari kameethatatsi". Nokantashitzimi iroka noñaantashitzimi. Nokowaki niyote kyaaryorika pikemijantaperotakina.

<sup>10</sup> Niyotaki ari pipeyakoteeniri okaatzi rantakiri; eejatzi naari omawitakya oetarika rantawitakari nopeyakotantakawori. Okaatzi nopeyakotakayeniriri tema nopeyakowentemiri eeroka. Riyotzi Jesokirishito kyaaryo nopeyakotakiri pimatanteeyaaaworini pikimitaaawakaeyani iroñaaka.

<sup>11</sup> Tema tee akoyi rantakagaeyeeroni Jatanaashi kaari kameethatatsi. Ayotaki osheki ikowawita ramatawiteeyeenimi.

### *Ikamantakae Paaworo itaka ipaasonkitantariri Tajorentsi*

<sup>12</sup> Ari chapinki nareetaka Toroowashiki, nokamanteeyakirini jeekatsiripaeni tsika ikanta Jesokirishito rowawijaakotantzi. Osheki ramitakotakina Awinkatharite, osheki raakameethateeyakinani jeekatsiripaeni, eejatzi nokenkithatakotakariri Jesoshi osheki raapatziyakari rirori.

<sup>13</sup> Omawitakya osheki atziri janta raapatziyakari Jesoshi, osheki nokowawitapakari noyemijantzinkarite Teeto, omaanta tee noñiiri. Tema nokowawitaka nokemijantakotemi eerokapaeni. Osheki nokenkithashiryaa kimi, rootaki kaari nojeekaperotanta janta roojatzi nowaagaantanaari Masherooniyaki.

<sup>14</sup> Ari nokantani naari nopaasonkitapiintziri Tajorentsi. Tema intentapiintee tsikarika aateeyini. Naapatziyeeyarinii Jesokirishito, rootaki itajonkakowenteeyantakinanini, imatakagaeyantakinaworini maawaeni ikowakagaeyakinanini. Iroñaaka niyotakaakirini maawaeni jeekatsiripaeni riyotakotantyaariri rirori.

<sup>15</sup> Akimiwitakawo aaka kajankapaneri itagaetziniriri Jesokirishito inimotantyaariri Tajorentsi. Tema othotyaanakiro okajankaekatanaki maawaeni ikemaeyantyaaworini riraga awijakotatsini eejatzi riraga theenkantatsiri.

<sup>16</sup> Niyotagaeyawitarini iñaani Tajorentsi omaanta apaanipaeni itheenkaeyakironi, rootaki okantakowenantyaariri ryaatantyaari paamariki kaari tsiwakanitatsini. Rowaga kamantaantsi oshiyakariri riroripaeni kaminkari shitzitatsiri. Riraga paashinipaeni niyotagaeyakirini,

ari raapatziyawo rirori, rootaki ryaatanteeyaaarini jenokinta, ikantyaani ijejeri. Rowaga kamantaantsi oshiyakariri riroripaeni kajankatatsiri kameetha. Osheki nokenkithashiryaaoperotakirowee: noshinetzirkari ryaateeyeni paamariki kaari tsiwakanitatsini. Eeromi ramitakotanami Tajorentsi, eero nomatziromi naapatziyakagaeyaarinimi paashinipaeni.

<sup>17</sup>Eeniro osheki iyotaantashiteeyawitaworini iñaani Tajorentsi raantyaari koriki. Tee nokimitari naaka. Rotyaantakina Tajorentsi niyotaantero iñaani, riyotaki nokowaperotaki niyotaantero kameetha. Eejatzi ramitakotakina Jesokirishito.

### 3

#### *Ikenkithatakotziri riyotakayeriri atziri kameetha riyotaantzi*

<sup>1</sup> Nojankinatantawori iroka, ¿piitashitama napiitaatatyemiro eejatzi na-jagaashitaata? Tema eero. Tee nokoyi paashini atziri rojankinatakotena naaka nokameethatzri roojatzi rotyaantemii eeroka. Eejatzi tee nokoyi po-jankinatakotena nokameethatzri potyaanantyaari paashini atziri.

<sup>2</sup> Ryaateeyanakimini riraga amatawitanatsiri ipakimi kaarita rojankinatatzri paashini atziri, okantzi: "Irika atziri kameetha riyotaantzi iñaani Tajorentsi", omaanta otheeyashita. Omaanta naaka omawitya tekatsi kaarita rojankinatakotenari paashinipaeni atziri nopemiri eeroka, piyotzi kameetha niyotaantzi iñaani Tajorentsi. Tema paapatziyakawo rootaki ipaashinitantakimiri Tajorentsi, iroñaka pijkeeki kameetha, rootaki riyotan-takawori paashinipaeni atziri kyaaryooperaotaki okaatzi niyotaakimiri.

<sup>3</sup> Poñaaganteeyarini paashini atziri kyaaryo paapatziyari Jesoshi, tema pijkeeki kameetha. Tema pikimitakawo iyaaritate rojankinatzri Jesokirishito, ikantzi: "Riraga Paaworo riyotaantzri noñaani kameetharini". Tema niyotaakotakimiri Jesokirishito rootaki pijkeekantyaari kameetha iroñaka. Iroka kaarita kaari rojankinatantawo tziintaki paperiki, inta owameethashiretakimi Ishire Tajorentsi omatakaakimi pijkeeki kameetha. Paeraniperoroña riraga Tajorentsi rojankinatakiro iñaani mapiki omaanta opeyakotaka roori. Iroka kaarita iroñaka tee okimita iroka ojankinateenchari paerani mapiki, inta antawaetaakayirini Ishire Tajorentsi ojankinatakiro pajankaneki eerokapaeni; tema okanteetatyeyaaani ojeeki. Omawitya rojankinatakiro itakawori iñaani Tajorentsi mapiki.

<sup>4</sup> Niyotaki kyaaryootaki okaatzi niyotaakimiri. Nameentakari Jesokirishito rootaki ramitakotantanari Tajorentsi nantayitakironi nokantakimiri.

<sup>5</sup> Kyaaryo, tee nomatziro nantashitanari apaniroeni ikowakaakinari, omaanta rirotaki rirori matakaakinawori.

<sup>6</sup> Rirotaki irira riyotakaanari owakirani inimotawakaantsi: okantana tsika ikanta iroñaka rowawijaakotantz. Kaari nokenkithatakaoeyirini rojankinarini Moeseshi, inta nokantakoeyirini antzirori Ishire rajankanekipaeni atziri. Tema okantakoeyirini rojankinarini Moeseshi eeniro rantani atziripaeni, rootaki ryaatantyaari paamariki kaari tsiwakanitatsini, omaanta rowaga Ishire Tajorentsi añaakaakiri atziripaeni ikantyaani ijejeri.

#### *Okameethatzri iroka owakirari ikashiyakaakaeri Tajorentsi*

<sup>7</sup> Paeraniperoroña achariniiteni Moeseshi rameentaperotakari Tajorentsi. Rootaki ikantakiri irira itonkaashitanakiri itonkiyotawakari ikenkithatakayeri janta Shinayiiki. Ro rojankinatzimotantakariri rirori mapimaanka okaatzi ikowakaakiriri atziri. Eejatzi ikantakiri Tajorentsi: "Maawaeni kaari monkaatziro okantziri rojankinarini, ari ryaateeyakini paamariki kaari tsiwakanitatsini". Iñaantakariri Moeseshi

Tajorentsi ishipakiryaapaakiro irira rowaga ipoo, shipakiririri. Roojatzi roerinkantapaa ikenkithatakantaanyaariri ijoriyyotzinkarite iñaani Tajorentsi. Roojatzi iñaanteeyawaaririni rirori oshipakiryaaka ipoo, omaanta tee imateeyironi eekiro ryaataatee raminapooteeyeerini, tema osheki ishipakiryaaki: omaanta shipakiryaantsi eentsikiroeni opeyimata.

<sup>8</sup> Riyotaantakariri riraga Moeseeshi atziripaeni ikantziri Tajorentsi ari oshipakiryaanaki rootaki oñaaganteeyarini atziri eechonkiini itajorenka Tajorentsi. Omaanta iroñaaka ayotaki itajonkawentero irira osheki aririka niyoteeyerini atziri iñaani owakirari, okantakotziro Ishire.

<sup>9</sup> Riraga Tajorentsi roñaaganteeyeni eechonkiini itajorenka ishipakiryaan-tapaaki ipoo Moeseeshi riyotaantakariri iñaani rowaga kantakowentakiriri maawaeni atziri ryaate paamariki kaari tsiwakanitatsini. Ari roñaagaperotanteeyawoni itajorenka aririka ayotakagaeyerini atziri tsika ikantari Tajorentsi iñaaperoteri rirori ikameethatzi eejatzi ipeyakoteniri okaatzi rantakiri.

<sup>10</sup> Kyaaryo okameethatzi rowaga iñaani riyotaantzirini Moeseeshi enironi ishipakiryaaki ipoo omaanta iroñaaka tee oshintsitzi itawori iñaani Tajorentsi. Tema iroñaaka osheki anaakotakiro owakirari iñaani okantakotziro Ishire Tajorentsi.

<sup>11</sup> Okameethatutowaka okaatzi riraga Tajorentsi rojankinatakaakiriri Moeseeshi tema otsipatakari oshintsitzini, omaanta eero okanteetatyani ojeeki. Iroñaaka riyotaakae kameetha Jesoshi owakirari iñaani Tajorentsi, anaakotakiro itakawori ñaagantsi paerani, osheki oshintsitzi roojatzi okanteetyani ojeeki.

<sup>12</sup> Tema ayotaki eero othonka roori ayotagaeyirini atziripaeni eejatzi eero ipoyaataa rootaki kaari apashiwenanta ayotagaeyantakaririni atziri.

<sup>13</sup> Tee akimiteeyarini Moeseeshini, ipashikapootaka rirori riyotaantakiro iñaani Tajorentsi: tee ikoyi iñeeyerini ijoriyyotzinkarite opeyaneeya ishipakiryaapootawitaka.

<sup>14</sup> Omawitya ishipakiryaakiro ipoo Moeseeshi tee ikoyi raapatziyeeyawoni iñaani Tajorentsi riroripaeni, rootaki kaari ishinetantari irira raapatziyaperotyaari. Ikantani iñaanatapiintawito rojankinarini Moeseeshi roojatzi iroñaaka, omaanta tee riyotakotziro. Okimiwita ipashikawo ikenkithashiryantaarinti, ipakaera riyotaantziri rowaga owakirari iñaani Tajorentsi okantakotziri Jesokirishito opoyaatakawo rowaga rojankinarini Moeseeshi. Tekira ipashikaryaakaantziro riyotaantziri. Apatziro Jesokirishito matzirori ipashikaryaakaakaera aapatziyantyaariri.

<sup>15</sup> Kyaaryo, roojatzi ikanteeyani iroñaaka. Aririka iñaanatero rojankinarini Moeseeshi, tee riyotakotziro: tekatsi ikantya ikemantyaawori.

<sup>16</sup> Omaanta aririka rameentyaari Awinkatharite, riyotakayeri eero ramatawitanta rirojatzi; omaanta riyotaperotanaki Jesokirishito rirotaki owawijaakontatsiri rotyaantakiri Tajorentsi.

<sup>17</sup> Eenitatsi Awinkatharite Ishire, iyotagaeyakaeni eero apomeentsi-wentawo rojankinarini Moeseeshi.

<sup>18</sup> Iroñaaka tekatsi amatawiteeyeerini, inta eenitatsi ayoteeyirini. Ayoteeyakini ikameethaperotaki Awinkatharite. Otajonkawenteeyakaeni Ishire akimiteeyantyaaririni. Iroñaaka akimiteeyawitakarini eechonkiini. Akantani apaashinitapiintanaki. Iinja akimitaperoeyapaeyaarini, akameethaperoeyapaeni.

<sup>1</sup> Tema ikaminthagaeyakinani Tajorentsi ipeyakotakinawo nantawitakari, rootaki rotyaanantanar nokenkithatakayeri atziripaeni. Rootaki iroñaaka eero nokantashiretashita eejatzi eero nopakagaero niyoteeri paashinipaeni atziri.

<sup>2</sup> Omaanta tee nokoyi namatawiteri, eero napiitero nantero oetarika kaari kameethatatsi nopashiwentakotanakawokari aririka riyotanaki rirori: tee ikameethatzi riraga paashini amatawiteeyiririni. Tee nopaashinitziro iñaani Tajorentsi, eejatzi tee nokamantashitari atziri okameethatayitakini ikowayitzirini rirori: namatawitzirkari. Omaanta kyaaryo niyotagaeyakirini. Piyoteeyakini, eejatzi riyotaki Tajorentsi kyaaryo iroka nokantakimiri.

<sup>3</sup> Eenitatsirika kaari yotatsini tsika ikantyaari rawijakotanteeyaari, riroteeyakini jatatsini janta paamariki kaari tsiwakanitatsini. Tema tee ikoyi raapatziyawo iñaani Tajorentsi.

<sup>4</sup> Ramatawitakiri Jatanaashi kaari aapatziyariri Jesoshi. Tema rirotaki iwinkatharite maawaeni theenkantatsiri. Tee ikowakayiri riyote tsika ikantyaari rawijakotee; tee ikowakayiri riyoteeyeni osheki ipinkatharitzi Jesokirishito, eejatzi rirotaki irira Tajorentsipero.

<sup>5</sup> Tee naaka kenkithatakotacha naari, inta riraga Awinkatharite Jesokirishito nokenkithatakotziri. Naapatziyakari rirori, rootaki nokowan takari netakoeyemini.

<sup>6</sup> Paeraniperorofia riwetsikantawori Tajorentsi kipatsi otsitenitawitani, omaanta ikantzi: "Okitejitanaki". Roojatzi okitejitananaka, rootaki iroñaaka amineeyantarini oetarikapaeni. Okimiwitaka iroka iroñaaka riyotakagaeyakinani iñaani Tajorentsi tsika ikantakotari Jesokirishito. Okimiwitaka iroka iroñaaka otamoreka najankaneki iyotaakina nojeekantari kameetha. Tema iroka iñaani iyotaakotakinari Tajorentsi osheki inintaperotakae eejatzi osheki ikameethatzi, tekatsi rantani, eejatzi osheki ipinkatharitzi kimitaka roñaagakaero Jesokirishito. Okimiwitaka iroka iroñaaka riyotakagaeyakaeroni tsika ikantari Jesokirishito, ayotantakari osheki ipinkatharitzi irira.

### *Irira Tajorentsi rirotaki matakaakaeri akenkithatzi*

<sup>7</sup> Ayotantariri Tajorentsi eejatzi Jesokirishito kimitaka eenitatsi powaagawo pinaperotachari. Omaanta iroka pinaperotachari ojeeki awathäki. Tema roori osheki ashipepetawathatzi. Riraga Tajorentsi ikowakaakaero ashipepetawathate riyotanteeyaarin atziripaeni rotyaanakiro Ishire omataakaakina nokenkithatakoteri riraga Jesoshi. Eejatzi ikowaki riyotanteeyaari riroripaeni eero amataakaa aka apaniroeni.

<sup>8</sup> Nokantzimi iroka tema rowashironkaetakina riraga kijakinaripaeni. Omaanta tee ishinetziri Tajorentsi rookakaenawo nokenkithatakotziri Jesoshi. Tee niyotaperoyini oetarika nanteri omaanta niyotzi ikantani Tajorentsi ramitakoeyanani.

<sup>9</sup> Osheki iijkeetakina, omaanta riraga Tajorentsi tee rookana; ipajapajaatapiinteetakina, omaanta tee ishinetziri rowamaena.

<sup>10</sup> Okimitaka paerani ijeki osheki kowapiintawiteenchari rowamaakaanteri Jesoshi, ari iroñaaka ijeki osheki kowapiintawitachari rowamaakaantenami naari; tema niyotaakiri atziripaeni iñaani Tajorentsi. Apaniroeni Jesoshi rowawijaakotapiintakina, riyoteeyantakarini paashinipaeni atziri rirotaki Añaatsiri eejatzi ishintsitakaakina nokenkithatakantyaawori iñaani.

<sup>11</sup> Kyaaryo, eeniro nañi omaanta oshekiwitaka nokamapiintakoterimi Jesoshi. Ro nokemaatsitaptiintakawori iñaaperotanteri paashini atziri rirori rirotaki matakagaeyakinaworini eekiro niyaatyee niyotaakoteri.

<sup>12</sup> Nokenkithatzsi, rootaki nokemaatsitantakawori osheki rooteentsi nokamimi, omaanta paapatziyeyakarini Jesoshi eerokapaeni, rootaki pijekaeyantaarini kameetha, tema riro jeekakaakimiri Jesoshi.

<sup>13</sup> Tema rojankinatzini paerani riraga ayemijantzinkariteni: "Naapatziyakari Tajorentsi, rootaki nokenkithataantakariri atziri iñaani rirori". Eejatzi nokimiteeyakarini naari: naapatziyakari Jesoshi, rootaki eekiro niyaatatyye nokenkithatakotakiri irira.

<sup>14</sup> Ayoteeyakini eeniro riraga piriinteeriri Awinkatharite Jesoshi. Iinja ipiriintaperoyeroyeeni aari eejatzi, eekiro aatakotatyee atspateeyaarini Jesso.

<sup>15</sup> Osheki nokemaatsitawenteeyakimini, piyoteeyantyaarini ikamintheeyemini Tajorentsi. Rootaki paapatziyantakariri Jesoshi pipaasonkiteeyerini eerokapaeni, pikanteeyeni: "Tema ikameethatzsi Tajorentsi". Rootaki raapatziyakaantakariri rirori atziripaeni, roojatzi iñaaperotantyaariri riraga Tajorentsi ikameethatzsi.

### *Eero akantashiretashita*

<sup>16</sup> Iroñaakaka, osheki nokemaatsiwentakari nokenkithatakiro Iñaani Tajorentsi rootaki eenitatsi osheki paashini atziri iñaaperotantariri rirori rootaki kaari nokantashiretanta eejatzi tee nopakaero nokenkithatakotziri Jesoshi. Osheki amakoteeyapaakini, kimitaka antyaashipariteeyanakityeeni, akamaeyanakini; omaanta eero akenkithashireeyironi. Tema ikantani riraga Tajorentsi riweshiryaa kagaeyakaeni maawaeni kitejiriki.

<sup>17</sup> Iroñaaka rowashironkagaeyakinani theenkantatsiri, omaanta tee natsipetashitzimaetawo nashironkaaka. Eechonkiini noñaakiro iroñaaka, omaanta riyotzi Tajorentsi, roojatzi iinja kameetha ijekakagaeyenani janta inampiki. Nokanteetatyeyaaani nojeeki kameetha, eero okimittaa jaka.

<sup>18</sup> Rootaki eero nokenkithashireperoyeroyironi pomeentsitayitacharini eejatzi jeekayitatsirini noñeeyerini jaka kipatsiki. Ari iinja opeyeeyaanii maawaeni añeeyakirini jaka. Omaanta nokenkithashiryaa perotero kaari noñaapiintzi iroñaaka: rowaga jeekaeyatsirini jenokinta. Eero opeyaa roori.

## 5

### *Ikenkithatakotziro akimoshireeyantaarini*

<sup>1</sup> Tema ayotzi awatha jaka kipatsiki oshiyawitawo pankotsi kaari kijotatsi intspaeete ojoweyanaki. Eero ajeekantawo osheki ojarentsi. Omaanta ayoteeyakini aririka akamaeyeni jaka, aapatziyeyaririka Jesoshi, ari ajeekaeyini jenokinta. Eenitatsi janta awatha kameethari jeekanitatsini riwetsikakaeniri Tajorentsi, kaari irira atziri wetsikakaeroni. Akanteeta-paatyeyaaani ajeekie janta.

<sup>2</sup> Iroñaaka jaka kipatsiki osheki nashironkaapiintaka roojatzi osheki nokowakiri Tajorentsi ipenawo nowatha owakirari janta jenokinta.

<sup>3</sup> Roojatzi eero apatziro ojeeki ashire, omaanta ojeeki eejatzi awatha owakirari.

<sup>4</sup> Eeniropaeeki jaka osheki ratekaperotzi: tee akowaeyawitani ookaero iroka awatha, omaanta akowaperotaki awatha owakirataatsini. Akowaki apaashinitanee ojeekantyaari awatha owakirari kaari thonkanitachani.

<sup>5</sup> Rivotaki Tajorentsi reentsitetakae ipantakaerori owakirari awatha. Omaanta eejatzi iroñaaka rotyaantakinawo Ishire niyoperoeyantarini kyaaryo iinja itajonkawentena, ipoyaatantakinawori nowatha owakirari.

<sup>6</sup> Rootaki niyoperoeyantanakarini riraga Tajorentsi imonkaatero iroka. Ayoteeyakini eeniro nojeekaeyini jaka kipatsiki, tekiraata atspataper-tyaari Awinkatharite.

<sup>7</sup> Tekira noñeeyerini irira, omaanta nameentaperotari rirori, niyoteeyantakarini noñeeri iinja.

<sup>8</sup> Omaanta ayotakoeyakirini Tajorentsi iinja ipakaero awatha owakirari kimitaka ikantzitakaeri. Tema aweshiryaaawentakawo ookero awatha kipatsijao aatantyaari jenokinta ajeekantyaari awatha owakirari atsipatantapaeyaariri Awinkatharite Jesoshi. Aweshiryaaawenteeyawitarini irira jaka kipatsiki, omaanta osheki akowawitaka atsipataperotyaari janta jenokinta, anampitaperotyaawo.

<sup>9</sup> Rootaki nantziri naaka eeniroka nojeeki jaka, nokowaperotaki nomonkaateeyeroni okaatzi ikowakaakinari riweshiryaaawenanteeyenarini. Eejatzi, aaterika janta jenokinta atspateeyari, akowaki oemoshirenkanteeyaariri.

<sup>10</sup> Inja ikantakowenanteeyeeni Jesokirishito. Aririka iroñaaka antayiteroni kameethatatsiri, ipinateeyeeni; aririka antayiteroni iroñaaka kaari kameethatatsi eejatzi oetarika akowashitari aaka, eero ipinateeyeeni aritaki apashiwentaky.

### *Ikenkithatakota rirojatzi Paaworo*

<sup>11</sup> Kyaaryo niyotzi Jesokirishito iinja ikantakowenanteeyeeni, rootaki osheki nopinkathateeyantakaririni, rootaki naapatziyakaanteeyakaririni atziri. Riyotzi Tajorentsi nopinkathataperotakiri, rootaki eekiro niyaatatyee nokenkithatakayemiro kyaaryooperotatsiri; eejatzi nokenkithashireeya piyotakoeyakinani nokenkithatakayemiro kyaaryooperotatsiri.

<sup>12</sup> Tee nokoyi noñaanatakota naaka nokameethaperotzi. Omaanta tee nokoyi eejatzi pipashiwentakotena. Riraga kantzimatakinari, osheki ikantakaaperotaka rirori, ikantakaaperotawentayitakawoni rantayitzirini, omaanta tee ikameethashiretzi. Ikantzimatakinia rirori, omaanta nokowaki piyote nokenkithatziro kyaaryooperotatsiri, rootaki pimatantyaawori pikanteri: "Kaari. Riraga Paaworo riyotaakae rowaga kameethaperotatsiri".

<sup>13</sup> Aririka pikenkithashireeya noshinkiwentaty, tema eero nopalakaero niyotaantziro iñaani Tajorentsi, tema ikowakaakina nantero pikenkithashireeya: ro nanantawori ikowakaakinari rirori niyotaantakiro iñaani. Aririka pikenkithashireeya ayoperotaty, antero kameethatatsiri okameethatzi, tema antero kameethatatsiri amitakotantemiri.

<sup>14-15</sup> Osheki inintaperotakina Jesokirishito, ikaminthaaoperotakina. Niyotaki ikamawenteeyakaeni maawaeni: iroñaaka okimiwitaka akamaeyakini maawaeni, eero antapiinantaawo eejatzi kaari kameethatatsi. Eejatzi ikowakaakae eero antawentaa aaka apaniroeni, omaanta anteniri rirori ikowakaakaerii: tema ikamawenteeyakaeni, ipiriintanaa eejatzi.

<sup>16</sup> Paerani noetawitakari Jesoshi rivotaki atziri, tee niyotawitarini rivotaki Tajorentsi. Omaanta iroñaaka niyoperotakiri, niyotaki tsika ikanta. Eejatzi riraga ayemijantzinkarite, eero atheenkiri: tema iñaaperoeyakirini Tajorentsi ikameethatzi.

<sup>17</sup> Ninkarika aapatziyaarini Jesokirishito, ari rinashitakaakyaari rirori; eero ikenkithashiryaaapiintawo ikimitaaga paerani eejatzi eero rantapiintziro rantawitarini, omaanta ipaashinitanee.

<sup>18</sup> Rivotaki itakawori Tajorentsi rotyaantakiri Jesokirishito ikamawenteeyakaeni, rowameethateeyakaeni, rootaki imatantyaawori iñaaperotantakaeri rirori akameethatzi. Iroñaaka ikowaki akamanteri paashinipaeni atziri raapatziyari Jesoshi imatantyaariri Tajorentsi raakameethatantyaariri rirori.

**19** Ñaakiro, rotyaantakiri Jesokirishito rowameethateeyeeni aaka, iñaaperoeyanteerini akameethatzi. Eero ikenkithashiriiro eejatzi kaari kameethatatsi anteeyawitarini. Iroñaaka rotyaanteyakaeni aari akamanteyerini paashinipaeni atziri, aririka raapatziyaari Jesoshi, ari reentsitetakaari rirori maawaeni.

**20** Kyaaryo, rotyaantakina Tajorentsi nopyawenantyaariri Jesokirishito: nokamantemiro iñaani Tajorentsi. Rootaki niyotaantemirori okaatzti rantakiri Jesoshi okimiwitaka riyotaakimi Tajorentsi. Eejatzi riraga Jesokirishito ikowakaakimi paapatziyari iñaaperotantemiri rirori pikameethatzi.

**21** Tekatsi rante rirori kaari kameethatatsi, omaanta rotyaantakiri Iriri ikamawenteeyakaeni. Tema rowashironkaawentashitakawo okaatzti antayitzirini. Rootaki imatantyawori roeyowapithateero antani eejatzi iñaaperotee kimitaka tekatsi antani. Okimitzimotawitakari rantakiro rirori kaari kameethatatsi. Rootaki iroñaaka rowameethatanteeyeerini Tajorentsi, iñaakae akameethatzi.

## 6

### *Tsika ikantapiinta Paaworo*

**1** Iroñaaka nantziniri Tajorentsi ikowakaakinari, rootaki nokanantzimiri: ‘Ikaminthaaperoeyakimini; tema paapatziyari Jesokirishito eejatzi pinetheeri ipeyakotemiro pantani. Rootaki nokanantzimiri: ‘Eero ironaaka pitheenkirii: eero papiitziro pantapiintero kaari kameethatatsi’’.

**2** Enitatisi iroka ikantziri riraga Tajorentsi Iwaperiteki: ‘Pikantakina, rootaki nokemjanantakimiri; monkaataka kitejiri pawijakotantaari, rootaki namitakotantakimiri’.

Iroñaaka eejatzi naari nokamantemi: monkaataka iroñaaka kitejiri okameethatzi paapatziyari Jesoshi, pawijakotantyaari.

**3** Tekatsi nokantya pikijantenari; omaanta kameetha niyotagaeyakimini piyoteeyantakarini pawijakoeyeeni.

**4** Nokantani nopankinatanari Tajorentsi iñaani, nokyaaryoowentakiro, piyoteeyantakarini kyaaryo nopinkathaterotakiri. Nokantani nopankinatanari iñaani, omaanta osheki nokemaatsitawentakari, nashironkaapiintata, maawaeni.

**5** Ipajapajaatakina joraaro, romonkyaapiintakina. Ikijapiinteeeyakinani atziripaeni. Osheki opomeentsitzimotakina nokenkithatakagaeyirini atziripaeni. Nokakitapiintzi tsiteniriki. Nokemapiintakiro notashe.

**6** Omaanta kameetha nojeeki, niyotaantaperotakiro iñaani Tajorentsi, osheki nomae ritakotashitakawo ikijakina kaari kemijantatsi, nokaminthaakiri paashinipaeni. Amitakotapiintakina Ishire Tajorentsi, noneshironkaperotantakariri paashinipaeni,

**7** Kyaaryootaki iroka niyotaantapiintziri, tee notheeya. Itajonkakowen-tapiintakina Tajorentsi, rookakowentakina, eejatzi imatakaakina naapatziyakaakirii paashinipaeni. Naakapaeni rioperotatsiri omaanta ikantakotana notheeyashita.

**8** Eekiro niyaatatayee nopankinatanari Tajorentsi iñaani omawitya eenitatsirika pinkathatakinari, eenitatsirika shirontawentakinari, eenitatsirika iñaaperotakinari, eenitatsirika ookathatakinari. Naakapaeni rrioperotatsiri omaanta ikantakotana notheeyashita.

**9** Tee riyoteeyanani atziripaeni, omaanta riyotakina Tajorentsi. Rajareeyawitakinani atziri rowamaenami, omaanta eeniro nañi. Osheki ipajapajaateetakina, omaanta tee nokami.

**10** Nowashiretakoeyakarini ajoriiyotzinkaritepaeni, omaanta niweshiryaaawentakari Tajorentsi. Nashironkaawitaka naari, omaanta

niyotagaeyakirini atziripaeni kameetha riweshiryaa wenantaariri rirori. Tekatsi nowaagawo omaanta ipashitakina maawaeni koetyemotakinari.

*Osheki ikamintheeyakirini Paaworo riraga korintojatzi*

<sup>11</sup> Noyemijantzinkarite, nokamantaperoeyakimini maawaeni nokenkithashiryaaaka, eejatzi maawaeni nantziro eejatzi nokamantzimi iitarika nanantawori: tekatsi nomanapithatemi.

<sup>12</sup> Rootaki iroñaaka eekiro niyaatatyee nonintaperotakimi eerokapaeni, omaanta kimitaka eero ka tee pírintaperoeyinani kimitaka paerani.

<sup>13</sup> Ari nokimitakaanteeyakimini notyomipaeni, nishintyopaeni: osheki nonintaperoeeyakimini. Eejatzi nokowaki poshiyakotenawo, pírintaperoeyenani naakapaeni eejatzi.

*Eero kijokiro poyiri riraga kantashitachari raapatziyarimi Jesoshi*

<sup>14</sup> Eero kijokiro poyiri riraga kaari aapatziyariri Jesoshi. Pamine, aririka akameethataki, ¿akimitakarima riraga kaari kameethatatsi? ¿Amonkaateeyakarinima? Teewee. Okimitaka kitejiri eejatzi tsiteniri: tee omonkaatawakaaya, inashita roori. Riraga aapatziyaperotariri Jesoshi tee imatziro ijeki kameetha aririka itsipatakari aapatziyaperotariri Jatanaashi.

<sup>15</sup> Riraga Jesokirishito eero inimotziro oetarika rantziri Jatanaashi. Rootaki riraga ameentariri rirori eero imatziro itsipatapiintari atziri jashiryakariri Jesoshi.

<sup>16</sup> ¿Omonkaatawakaakama Tajorentsipankoki eejatzi opanko tsikarika ojeeki roshiyakaawentziriri iitajorentsite atziri? Teewee. Pamine, kijokiro rowaeyakaeni Tajorentsi, riraga añaaperotatsiri, tema paerani rojankinateetzironi iñaani rirori okantz:

“Ikantzi Tajorentsi: ‘Kijokiro nowaeyanakirini maawaeni aapatziyanari, eero nookaeyirini. Notajonkawenteeyerini, eejatzi ipinkathateeyenani’”.

<sup>17</sup> Eejatzi rojankinateetzironi:

“Pitsipareeri riraga antzirori kaari kameethatatsi. Eero kijokiro powaeyirini, eero pantayitzironi kaari kameethatatsi kimitariri rirori. Apatziro pijekanaki piweshtiryaa wentena naaka. Roojatzi naakameethaperoeyemini maawaeni eero nashi neentsitepaeni.

<sup>18</sup> Notominteeeyemini, nishintoteeyemini, pikanteeyenani: ‘Pawa’. Rootaki ikantakiririni Awinkatharite, riraga Tajorentsipero riraga antzirori oetarika”.

## 7

<sup>1</sup> Ari, nonintanewopaeni, ayoteeyakironi iroka ikashiyakaakaeri Tajorentsi. Eero iroñaaka antayitzironi kaari kameethatatsi, eejatzi eero akenkithashiryaa kotawo antero, apakagaerikari ameentarira Tajorentsi. Thame akyaaryoo wenteeyenirini ikowakagaeri. Eejatzi okameethatzi athaawantyari antero oetarika kaari ikowakaakaeri.

*Paaworo ikenkithatakotakiri raapatziyakari korintojatzi*

<sup>2</sup> Nokowaki kameetha pameenteeyenani eejatzi pinintaperoeyanani. Piyoteeyakini tee nowashironkagaeyimini, tee nantakagaeyimironi kaari kameethatatsi, tee namatawiteeyimini.

<sup>3</sup> Tee nokantzimi: “Eeniro pantani”, teewee. Tema nokamantakimi osheki nonintaperoeeyakimini. Nokantani nokenkithashireeyakimini jika kipatsiki, eejatzi aririka nokamae, nokantyaani nokenkithashireyapaemini janta jenokinta.

<sup>4</sup> Niyotaki pinintaperoeyakinani eejatzpi pipinkathateeyakinani rootaki niweshiryawenantakimir, nokimoshirewenantakimir. Nokantziri osheki atziri: "Riraga korintojatzi osheki raapatziyari Jesoshi". Omawitakya osheki rowashironkaetakina, niweshiryawentaperoeyakinini.

<sup>5</sup> Paerani, nareetantakari Masherooniyaki, tee nomatziro nomakoryaa-pae: rowashironkaapiinteetakina. Tsikarika niyaataki osheki ikowaki rookakayenawomi niyotaakiri atziri. Riraga kaari aapatziyariri Jesoshi ikijawakina osheki. Nokenkithashiryaakopointaka najankaneki.

<sup>6</sup> Omaanta riraga Tajorentsi tema riweshiryaaakaapiinteeyarini ninkarika kantashiretakirri. Eejatzpi naari, riweshiryaaakaakina rirori rareetantakinari Teeto. Rotyaantakinari rirori, rootaki nokimoshiryaaantakari.

<sup>7</sup> Ari niweshiryawentakari irira itsipatakina. Eejatzpi ikamantapaakina paakameethateeyawakirini chapinki, eejatzpi riweshiryawentakimi. Icamantakina pompeteeyakinani, eejatzpi pikenkithashiryaaanaka: eero papiiteero iroka pantawitarini paerani. Eejatzpi ikamantakina pinintaperoeyakinani. Nokemantawakariri ikantapaakina, osheki nokimoshiretanaki.

<sup>8-9</sup> Nojankinatantakimirori paerani, nokenkithashiryaaakagaeyakinini. Piñaanatantakawori nowaaritate, ari powashiretakoeyawitakan. Omaanta roojatzi pookakiro pantawitari, eejatzpi pikantziri Tajorentsi ipeyakotemiro okaatzi pantakiro. Rootaki tee natsipetawoni nojankinateeyakimironi. Tema ikowakimi Tajorentsi powashiretakotya pantakirowa. Paerani nokenkithashireeyanakimini, omaanta iroñaaaka akimoshireeyakini.

<sup>10</sup> Aririka kameetha rowashiretakotya atziri okaatzi rantakiri kimitaka ikowakiri Tajorentsi, ari ikantziri irira ipeyakoteniri okaatzi rantawitakari. Aritaki ipeyakotakiniri rantawitakari eejatzpi rowawijaakoteri, eero ikanteetyeeyaani ikemaatsitantlyaawori janta paamariki kaari tsiwakanitatsini. Roojatzi eero rowashiretantaawo paashini. Omaanta riraga atziripaeni omawitya rowashiretakotyaawo okaatzi rantayitzirini, tee ikoyi inetheeri Tajorentsi ipeyakoteniri roori. Tema tee ikoyi ijekki kameetha kimitaka ikowakaakiriri Tajorentsi. Rootaki riyaatantyaari paamariki kaari tsiwakanitatsini. Ikantatyeyaaani itsipareeri Tajorentsi.

<sup>11</sup> Omaanta eerokapaeni pinethaakiri irira ipeyakotemiro kaari kameethatatsi pantakiri. Iroñaaaka piyotakotaa okaatzi pantakiri. Pikantakiri paashinipaeni ipakaero kaari kameethatatsi. Pikantakina iroñaaaka rantakiro rirori. Tema pithawantari Tajorentsi rowashironkaemirk. Poyaakoperotana napiitantaatemiri nareetaatemiri niyontantyaari pikowaperotaki pikemijantaperoteri Tajorentsi. Pikowaki powashironkaeri antzirori kaari kameethatatsi. Rootaki poñaaagantakariri eeroka tekatsi pantani.

<sup>12</sup> Nojankinatantakimirori paerani kaari apatziro nokowakaakimi pamitakteri riraganki antakotziriri iriri kaari kameethatatsi, inta eejatzpi iriri, pamitakteri. Omaanta nokowakaaperotakimi piyoteeyakinini pinintaperoeyakinani. Tema rootaki ikowakaakimiri eejatzpi Tajorentsi.

<sup>13</sup> Ari iroñaaaka niweshiryawenteeeyakinini, eejatzpi niweshiryawentawaari Teeto. Osheki ikimoshiryaaapaaki, ikamantapaana: "Kameetha ijekkagaeyawakinani korintojatzi".

<sup>14</sup> Chapinki tekiraatani riyaatashitemi, nokamantawakiri: "Ikameethateeyakinini korintojatzi, kameetha raakameethatawakimi". Ari rareetantakimirri riyotaki kyaaryo nokantakiriri, tee notheeya. Eejatzpi okimitaka, tee namatawiteeyimini eerokapaeni.

<sup>15</sup> Iroñaaaka eenironi ikenkithashiryaakopoti, osheki inintaperoeyakinini: ryotaki pikemijantaperoyerawakirini eejatzpi pipinkathateeyawakirini.

**16** Eejatzi naari, niweshiryaawenteeeyakimini: niyotaki pantapiintakiro ikowakaakimiri Tajorentsi.

## 8

### *Osheki ikaminthaantzi riraga masherooniyajatzi*

**1** Iroñaaka, noyemijantzinkarite, nokowaki nokamantemi osheki ikamintheeyakirini Tajorentsi maawaeni ayemijantzinkarite jaka Masherooniyaki. Rootaki ikowantakari rantero okaatzi ikowakaakiriri Tajorentsi.

**2** Osheki rowashironkagaeyawitakarini ayemijantzinkaritepaeni jaka omaanta osheki riweshiryaawenteeeyakarini Tajorentsi. Eejatzi tee rashaagantaperotawita, omaanta osheki koriki ipiyoteeyinirini aapatziyariri Jessoši janta Jerojareeki, rotyaantakiri. Riyoteeyakini rashironkagaeyakan ayemijantzinkarite janta.

**3** Noñaakir rootaki nakanantakotakimiri tee eechonkiini rotyaantziri inta osheki. Tee riyoteeyini ithañeeyaari iyorikite. Tekatsi kanterini: "Pikaminthayeri ayemijantzinkarite omaanta naaka tee nomatziro". Rirotaki yotashitakawo apaniroeni ikamintheeri.

**4** Inethaaperoeyakinani, ikantzi: "Nokowaki namitakoeyerini noyemijantzinkarite".

**5** Ari niyotawitaka iperi koriki, omaanta romapokakina ikanteeyakinani: "Nanteniri Tajorentsi oetarika ikowakaanari, eejatzi nantemiro oetarika pikantakinari. Pikamantena oetarika ikowakaakinari Tajorentsi".

**6** Ari chapinki itanakawori Teeto ikantakimi: "Pipiyoteniri jerojareejatzi piyorkite". Ari kameetha pipiyoteeyakirini. Iroñaaka notyaanteemiri riori eejatzi ikanteemi pipiyotaperoeyeenirini eejatzi piyorkite, roojatzi potyaanteri ayemijantzinkarite janta Jerojareeki. Pikaminthaaperoeyerini piyemijantzinkarite.

**7** Osheki panaakoeyakirini paashinipaeni piyemijantzinkarite: panaaktakiri pameentaperoeyarini Tajorentsi, pikenkithataperoeyini, piyoper-oeyini, pikyaaryooventaperotziniri Awinkatharite ikowakaemiri, eejatzi pinintaperoeyakinani. Iroñaaka nokowaki panaakoeyerini pineshironkata-peroeyerini ashironkaenkari.

**8** Tee nokoyi nomperateri pipaeyerini ashironkaenkari, omaanta aririka pipaperoteri, piyotakagaeyerini paashinipaeni kyaaryo pinintaperoeyakirini piyemijantzinkarite.

**9** Tema eejatzi osheki inintashireeyakaeni Awinkatharite Jesokirishito. Osheki rashaagantaka janta jenokinta, eejatzi oshekiperi ipinkatharitzini, omaanta ipokantakari jaka kipatsiki, rookanakiro maawaeni kameethatatsiripaeni jenokinta. Rashironkaawitapaaka: tekatsi jeekimotaneerini, itheenkaeyakirini atziri. Rashironkaawentakae aari, okantyaata kameetha ijekakagaayeeni janta jenokinta.

**10** Ari iroka nokaminaakimiri oetaka kameethatatsiri pipantyaariri piperi piyorkite. Paerani tema eeroka itaperotakawori pikowakiro pipagaanteri piyorkite eejatzi itaperotakawori pipiyotapaakiri.

**11** Pikowaeyakini petakotaari jerojareejatzi: iroñaaka, eenitatsirika piyorkite pipagaanteritya, ajaatyta, pithonkeritya pipagaantanteryaaariri kameetha pipiyoteri, potyaantanteryaaariri. Pipagaantashiyiityaarini kameetha.

**12** Aririka pipashityaari Tajorentsi pikowashitantari pipagaantashitariri kameetha, aritaki riweshiryaawentakyaawo oetarika pipashitariri. Tekatsirika powaagawo eero ikijantzimiro riori eerorika pipashitariri.

<sup>13</sup> Tee nokoyi opomeentsitzimoeyemini pipantyaariri paashinipaeni eejatzi eero opomeentsitzimoeyarinii paashinipaeni. Nokowaki pimonkaatawakaeyani.

<sup>14</sup> Omaanta eenitatsi iroñaaka osheki pashaaganteeyakanii, okameethatzi pikaminthayeri riraga ashironkaenkari. Iinja aririka rashaagantakya rirori, eejatzi aririka pashironkagaeyakaani eerori, roojatzikya ipiyatemii ikaminttheeyemini eerori. Okameethatzi pimonkaatawakaya.

<sup>15</sup> Tema okantzini Iwaperite Tajorentsi: "Riraga piyotaperotawitakawori manaa, tee otzimimoteeri eejatzi tzimagaantapaetsiri. Omaantakya riraga aatsiri eechonkiini, tee rashironkaa rirori. Aritaki imonkaatawaka-gaeyakanii maawaenii".

Rootaki thame amitakotantyaariri riraga ashironkaenkari.

### *Rotyaanteeri Teeto iňaagaeri eejatzi korintojatzi*

<sup>16</sup> Ari ikimitakina Teeto, osheki inintaperoyerakimini, rootaki nopaasonkitantakariri Tajorentsi.

<sup>17</sup> Nokantakiri: "Piyaatashiteeri eejatzi korintojatzi, piñeeri". Omaanta tee apaniroeni naari nokowakayeri, rirojatzi kowashitaperotachari iňaagaemi eejatzi.

<sup>18</sup> Notyaantemiri paashini ayemijantzinkarite itsipatanakyaari. Osheki ikenkithatapiintziro iňaani Tajorentsi, rootaki iňaaperoeyantakaririni maawaenii aapatziyariri Jesoshi. Eejatzi eerori, pikemakoeyakirini.

<sup>19</sup> Eejatzi riyyoyeeyakirini ayemijantzinkarite jaka itsipatanakina naari janta Jerojareeki, ramitakotena naaneenirii ashironkaenkari koriki. Osheki ikaminttheeyakirini ayemijantzinkarite, rootaki ikanantyaari riraga jerojareejatzi: "Ikameethataki Tajorentsi". Eejatzi riyoteeyanakini osheki akaminthagaeyakirini.

<sup>20</sup> Ari ikaataki osheki koriki potyaanteniriri, osheki pikaminthaeeyakirini. Rootaki nokowantakari eenitatsi tsipatenani naaneeniri; tekatsi nokantya ikanteetanakari: "Pikoshitakiri".

<sup>21</sup> Tee apaniroeni nokoyi iňaaperotena Tajorentsi nokameethatzi, eejatzi nokoyi iňaaperoeyenani atziripaeni nokameethatzi.

<sup>22</sup> Eejatzi piňaawaeri paashini ayemijantzinkarite notyaanteri. Niyotakiri, ikyaryooventakiro rantziniri Tajorentsi. Nokamantakiri osheki pameenteeyakirini Jesoshi eejatzi osheki pikaminthaanteyakirini, rootaki ikowap-erotantakari riyaate iňeemi.

<sup>23</sup> Riraga Teeto, kijokiro rowapiintakina, ramitakopointakina netakoeyakimini. Eejatzi riraga itsipateeyaaarini iňeemi, rirotaki rotyaantanewopaeni ayemijantzinkaritepaeni jaka. Rirotaki kameethaperotatsiri aapatziyaper-otariri Jesokirishito.

<sup>24</sup> Ari osheki nokantapiinteyakirini aapatziyariri Jesoshi jaka: "Ikameethateeyakini korintojatzi". Rootaki nokowantari pipagaanteri ayemijantzinkaritepaeni janta Jerojareeki piyorikite riyotantyaawori kyaaryo pintaperoyerakirini rirori.

## 9

<sup>1-2</sup> Tekatsi okantya nojankinatantemirori: "Pikaminthaantyaariri piyemijantzinkarite". Tema piyoperotaki pikaminthaeeyakirini. Niyotaki tee pithaňeeyarini piyorikite, rootaki nokamanantariri masheroonyajatzi: "Okaataki iroñaaka apaani ojarentsi ikowantakari korintojatzi eejatzi paashinipaeni atziri janta kipatsi owaero Akaaya rotyaantenirii jerojareejatzi koriki". Ryotakoeyakimini, rootaki ikowaperoeyantakarini ikimiteeyemini, retakoeayatyaaririni riroripaeni.

**3-4** Ari nokanteeyakirini: "Ikowaki korintojatzi rotyaanteniri jerojareejatzi iyorikite". Iroñaka notyaanteri riroripaeni reewatanakina, ikantemi pipiyotaperotartyaariri. Nimpaaetanee naari noñeyemini, aririka itsipatanakina paashinipaeni masheroonyajatzi. Aririka iñaapaakimi pipiyotakiniri jerojareejatzi piyorkite, riyoteeyapaakini kyaaryo nokantakiriri, eejatzi eero nopashiwenta naari.

**5** Ari nokantakiri irika ayemijantzinkaritepaeni reewatanakina, pipiyoteeyantyaaririni piyorkite. Eerokapaeni kantashitachari paerani: "Netakotaari ashironkaenkari", tee naaka kantaperotemini. Rootaki okameethatantari piperi kameetha.

*Tajorentsi ramitakotemi oetarika aririka pamitakoteri paashini atziri oetarikapaeni*

**6** Pikenkithashiryaaakotero iroka: aririka pipiyoteri piyorkite, pikimiwitakari pankiwaetatsiri: aririka ipankitero osheki okithoki, rowiitero iinja osheki. Omaanta ipankiterorika eechonkiini, ari eechonkiini raye. Eejatzi eeroka, aririka piperi paashini eechonkiini piyorkite eejatzi Tajorentsi apatziro ramitakotemi eechonkiini; omaanta aririka piperi osheki ari osheki ramitakotemi.

**7** Rootaki pikenkithashiryaaakoeyeroni kameetha, piyoteeyakini tsika ikaate koriki pikowakiri piperiri. Aritaki ikaataki piperiri. Eero pithañaashiretarai, eejatzi eero ishindsightzimi paashinipaeni. Tema Tajorentsi inintashireperotakiri riraga pashtariri weshiryaaawenttariri. Tema ikoyi pimonkaatero iroka.

**8** Aririka kameetha piperi piyorkite, tema riyotzi Tajorentsi eejatzi ikaminthaaperotakimi kameetha. Aritaki ipakimiro maawaeni koetyeemotakimiri, ipaperotemiro ojeekantyaari, rootaki pimatantyaawori pikamintaantyaariri eejatzi paashinipaeni.

**9** Tema aritaki okantzini Iwaperite Tajorentsi:  
"Riraga oyaatziriri Tajorentsi ipashitagaantari rowaagawo owashironkaenkari. Tee ratsipetashita ikamintheeyirini irirapaeni, eeroky ipeyakotziro Tajorentsi ikaminthaantzi. Tema Tajorentsi imatakakirai eekiro riyaataatye ipashitari paashinipaeni".

**10** Riraga Tajorentsi ipapiintziri pankiwaetatsiri okithoki ipankitantlyawori, eejatzi ipapiinteeyakaeni owaeyerini. Tema eejatzi roshekitanakimiro tzimimoeyemirini ojeekantyaari pikaminthagaeyantyaaririni ashironkaenkari.

**11** Eekiro riyaataakaatyemii Tajorentsi petakotaperotantyaariri paashinipaeni. Roojatzi ipaasonkiteeyerini rirori, iñaaperotaperoeyerini.

**12** Aririka etakotantya aari, apaperoteri aapatziyariri Jesoshi riraga ashironkaenkari koetyeemotakariri. Omaanta eejatzi ayotagaeyerini ipaasonkiteeyerini Tajorentsi.

**13** Aririka pikaminthagaeyerini piyemijantzinkarite, riyoteeyanakini rirori kyaaryo eeroka rirotaki aapatziyaperoeyaririni Jesokirishito kimitaka pikantzi. Eejatzi riyoteeyanakini tee pithañeeyari piyorkite, omaanta osheki petakotantaka, roojatzi iñaaperotaperoeyerini Tajorentsi.

**14** Osheki ikenkithashireeyakimini, eejatzi osheki ramanapiintziri Tajorentsi ramitakoeyemini. Riyo teeyakini oshekiperi ineshironkateeyakimini Tajorentsi.

**15** Thame apaasonkiteeyerini irira okaatzi ipashitakaeri, tema ikaminthaaperoeyakaenivee: rotyaantakaeri Itomi Jesoshi ikamawentkakae rowawijaakotanteeri. Tee amatziro athotyeero ayotero tsika okaatzika ipashitakaeri.

## 10

### *Ikamantakowentaa rirojatzi Paaworo*

<sup>1-2</sup> Ari itsipateeyemini janta kijakinaripaeni, itheeyakotana, ikantzimi: "Tee ikameethatzi Paaworo: tee rantziro ikowakaakiriri Tajorentsi. Aririka itsipateeyakimini ithaawantzimi, tee ishincheenkaperotzimiro ipaante. Omaanta aririka ijeeki inteea ipakaantakimi iyaaritate, ari ishincheenkaperotzimiro". Omaanta tema ineshironkaeyakaeni Jesokirishito, tee ishincheenkatee: eejatzi naaka, nokoyi nokimityaari rirori. Nokantemi erokapaenai jewawentziriri maawaenai aapatziyariri janta: "Pookeri iriropaenai kantzimiri: 'Tee rantziro Paaworo ikowakaawitariri Tajorentsi, omaanta rantashitakawo ikowayitzirini rirori' ". Teerika imaeeritzi rirori, paminawakinakya niyaatashiteri, eero nothaawantapaakari, inta noki-jathatapaakiri. Omaanta tee nokoyi nokijatheeyapaemini eeroka, inta nokowaki aakameethatawakagaeyaani maawaenai.

<sup>3</sup> Jaka kipatsikika eenitatsi kamaari kijeeyakaerini: tekatsi akantya omanateri; tee ikimiteeyarini atziripaenai omanateeyantyaaririni.

<sup>4</sup> Ikimitaka joraaropaenai romanatzirri kijakiriri inashitzinkawokipaenai tonkamentotsi, eejatzi aakapaenai omanatantyaari kijanteerori iñaani Tajorentsi inashitzinkawokipaenai oshiyawoni tonkamentotsi. Tema riraga Tajorentsi rirotaki tajonkakowenteeyakaerini amatantyaariri apiyateeyantyaaririni riroripaenai, eejatzi anaakotakiri.

<sup>5</sup> Eenitatsi riraga piyathatakari Tajorentsi, eejatzi kantziriri atziri: "Eero paapatziyari Jesoshi". Omaanta itajonkakowenteeyakaeni Tajorentsi amaeeritakaantyaariri maawaenai piyatheeyawitakaririni, eejatzi ameen-takaaperotantyaariri; eejatzi akempoyaakiro okaatzi akenkithashiryantarri amatantyaawori akemijantaperoteri Jesoshi.

<sup>6</sup> Eejatzi janta pinampiki niyotaki pikemijantaperoeyakinani, omaanta naamaashitaka itzimagaantaki apaanipaenai piyathatakina. Omaantakya riraga piyathatakina, nokanteri Tajorentsi rowashironkagaeyerini.

### *Naaka rotyaantanewo Jesokirishito*

<sup>7</sup> Eeniyo kaweyakinari, eejatzi theenkakinari. Iitawitakina tee naaka rotyaantanewo Jesokirishito. Ikantakotashitaka rirojatzi: "Naaka rotyaantanewo Jesokirishito", omaanta nokantemi naaka: "Naakapero rotyaantanewo".

<sup>8</sup> Nokantapiintakimi rotyaantakina, omaanta kyaaryootaki iroka nokantzimiri. Ikowakaakina Awinkatharite naapatziyakaaperoeyemirini: tee ikowakaana notheenkakagaeyemini. Nantziniri ikantakinari, rootaki kaari nopashiwenanta.

<sup>9</sup> Tee nojankinatakotziro paashini, tema tee nokoyi nothaawakagaeyemini nowaaritateki.

<sup>10</sup> Eenitatsi kantayitzimirini: "Ichereemotakiri Paaworo rojankinatantzimiri: ikijathatashitakimi. Aririka ipoke jaka, piñaawakiri tekatsi pipinkathatantawakayaari. Tee riyotzi ikenkithatatakaaperoeyemini".

<sup>11</sup> Pikamanteri rirori: "Aririka rareeteeyemini Paaworo, ikamantaperota-paemiro iroka rojankinateeyimirini. Eero rinashitapaawo ipaante".

### *Tee okameethatzi ajagaaperotya*

<sup>12</sup> Ari iñaaperoeyashitaani ikameethatzi rirojatzi riraga theenkayeanarini. ¿Itaka nokowantyaari nokimiteeyarini irirapaenai? Ikanteeyakini: "Nomonkaatawakagaeyakanai naaka, nokameethaperoeyakini". Kyaaryo, imonkaatawakagaeyakanai, omaanta tee riyoteeyini, tee afiiro ryoteeyantarini.

<sup>13</sup> Tee nokoyi noñaaperotashitya naaka: apatziro nokowaki nantakiniri Tajorentsi maawaeni ikowakaakinari. Niyotaki ikowakaakina naap- atzyakaaperoeyemirini eerori.

<sup>14</sup> Tee nantziro kaari ikowakaana, omaanta tema naaka rirotaki itaperotakawori nokenkithatakagaeyakimini paerani. Naakakya itaperotakawori kamanteeyakimirini: "Aririka paapatziyeeyarini Jesokirishito, ari rowawi- jaakoeyeemini".

<sup>15</sup> Tee nokoyi nokantashitya nantakiro naaka rantakiri rirori: tema ri- nashitayitakan. Nokowaki eekiro piyaateeyatyenee eerori paapatziyaper- oeyanakyaarini Jesoshi. Roojatzu nokamanteeya naari,

<sup>16</sup> nokenkithatakagaeyerini paashinipaeni atziri eejatzi, riraga kaari riyoteeyirorini. Eero nimpaeztiri paashinipaeni kenkithatakaantatsiri, eero nokantashita naaka aapatziyakagaeyaririni riraga raapatziyakaakari rirori.

<sup>17</sup> Tee okameethatzu ajagaaperotya antakiri aari, omaanta okameethatzu aweshiryaaawentyaawo imatakagaeyakaerini Awinkatharite.

<sup>18</sup> Tee ikameethatzu ūaaperotashitachari rirojatzu ikameethatzu, omaantakya riraga atziri iñaantakari roojatzu ikanantakari Awinkatharite ikameethatzu.

## 11

### Riraga Paaworo ikenkithatakotaa rirojatzu eejatzi kijakiriri

<sup>1</sup> Nokowaki nokenkithatakoteeya naaka eejatzi. Teerika añiilo niyotan- tari, omaanta eero pijamaneentana.

<sup>2</sup> Omaanta niyotzi eeniro pimaeritakotana. Naamaakotapiintzimi kimitaka Tajorentsi ikenkithashiryaaakopiintzimi eero, tema nokowaki paapatziyaperotyaari apatziro Jesokirishito. Noshiyakaawentemiro, tema ikowaperotapiintzi shirampari rayero kaari shinetairiri shirampari. Aririka oshinetaakyaari paashini shirampari ari imantanakiro, rookaero. Eejatzi nokimitaka naari, nokowaki naapatziyakaaperotemiri Jesoshi iñaaperotantemiri Tajorentsi pikameethatzu, eero rookantzimi.

<sup>3</sup> Paerani riraga Jatanaashi ikyaatapaakari maanki ramatawitan- takaworini Eewa. Tema rantakaakiro opiyathatantakariri Tajorentsi.

Iroñaaka nothaawakaakimi poshiyawokari Eewa: ramatawiteeyi- minikari. Eero pishinetziri ikompitayemiro okaatzi pikenkithashiryaaari, inta eekiro piyaatatyee pikenkithashiryaaakoperotyaari Jesokirishito.

<sup>4</sup> Tee pikenkithashiryaaaneenta. Pikemijantashiteeyawakarini maawaeni jatashiteeyimirini. Inashita iroka ikenkithatakotakiri Jesoshi. Nokowakaakimi iyotagaeyemini Ishire Tajorentsi, omaanta ikowakaakimi rirori ryotagaeyakotemirini kamaari. Nokamanteeeyakimini paapatziyari Jesoshi pawijakoeyanteeyaarini, rinashita ryotagaeyakimirini rirori amatawiteeyimirini. ¿itaka pikemijanteeeyantaririni?

<sup>5</sup> Riraga amatawitanatsiri ikantakaaperotaka ikenkithashireeyaa ranakotakina ikenkithatakotziri Tajorentsi. Omaanta tee nokenkithashiryaaakotziri naaka ranakotakina. Itheenkayawitanani rirori, omaanta ¿itaka nokowantyaari nopinkathateri rirori?

<sup>6</sup> Raamaawitakina tee nokenkithatzu kameetha, omaanta niyotayitzironi kameetharini iñaani Tajorentsi. Piyoteeyakinani niyotayitzirini kameetha.

<sup>7</sup> Pamine, paerani owakira naapatziyakaantakimiri, tekatsi nokowakoneenteeyemini, inta nantawaetzi nojeekantyaari rootaki nomatantyaawori nokenkithatakotakimiri Jesoshi ari pawijakotanteeyari.

<sup>8</sup> Eejatzi naaki iyorikite ipakinari paashinipaeni aapatziyariri Jesoshi, rootaki kaari nonethaakotantzimiri piyorkite nomatantawori niyotaanteeyakimini eerokapaeni.

<sup>9</sup> Nojeekimoeyantakimirini, nashironkaawitaka, omaanta tee nokamantzimi. Roojatzi ipoñaaka Masherooniyaki ayemijantzinkaritepaeni, ipapaakinari eejatzi koriki. Rootaki tee nokowakoeyimini koriki eejatzi tekatsipero nokowakoeyemini eerori iinja.

<sup>10</sup> Iroka nokashiyakaakimiri rootaki kyaaryooperotatsiri kimitaka kyaaryooperotatsiri iñaani Jesokirishito rootaki iroñaaka nokamanteeyeririni māawaenii akaayajatzi tekatsi nokowakoeyemiririni.

<sup>11</sup> ¿Litaka nokamanantyaariri? ¿Piitzima tee nonintashireeyimini? Riyotzi Tajorentsi kyaaryo nonintashiryaperoeyakimini osheki.

<sup>12</sup> Omaanta nokowaki niyotakaaperoeyemini tee nokimitari riraga paashinipaeni iyotagaeyawitzimirini, amatawiteeyimirini. Pipinatziri, rootaki ryotagaeyantakimirini rirori. Omaanta naaka, tekatsi nokowakotemi.

<sup>13</sup> Tee rotyaantziri riraga Tajorentsi. Ramatawiteeyakimini. Roshiyakaantashitaka rirotaki rotyaantanewo Jesokirishito.

<sup>14</sup> Aritaki ikanta, ramatawitantzi, ikimitakari Jatanaashi, ramatawitantzi rirori. Roshiyakaantashitakari rirori ronampiri Tajorentsi.

<sup>15</sup> Aritaki ikantari aapatziyariri kamaari: ikowaki roshiyakaantashitaka aapatziyariri Tajorentsi. Tema ikenkithatakotashitakari atziri ijeeckantyaari kameetha. ¡Ashironkaamatsiterini! Iinja Tajorentsi rowashironkaeri rotyaanteri paamariki kaari tswakanitatsini.

### *Riraga Paaworo ranaakoeyirini kijakiriri ryotaperotzi*

<sup>16</sup> Napiiteemiro: eero piitashitana tee añiilo niyotantari. Omaanta pitashitenarika kaari yotatsi, pikemina nokantemi: kimitaka pikemijantakiri riraga amatawitantatsiri.

<sup>17</sup> Tee ikantana Awinkatharite nokenkithatakota, tee ikowakaana nokantakaaperotashitya, kimitaka riraga amatawitantatsiri.

<sup>18</sup> Omaanta ikantakaaperoeyani riraga kijeyakinanini: iroñaaka nokimitawityaari naari, nokantakaaperotya.

<sup>19</sup> Tema piiteyawitakawoni eenitatsi piyontari. Rootaki pikemijananteeyaririni riraga amatawitantatsiri paapatziyawo theeyaantsi ryotaakimiri.

<sup>20</sup> Omaantakya riraga amatawiteeyimirini, tee pitheenkiri rirori. Osheki romperateeyakimini, raapitheeyakimiri piyorkite, ikantakaaperotzimoyakimini, eejatzi ipajapooteeyakimini eejatzi ikaweyeeyakimini. ¿Litakakya?

<sup>21</sup> Pikowaki eerokapaeni nokimiteri irikapaeni kaari yotzinkari; omaanta kyaaryo tee niyotzi nokimityaari.

Ari riraga amatawitantatsiri eeniro osheki ikantakaaperotawentawoni okaatzi rantakiri: iroñaaka nokimiwityaari, noñaawaetakotero okaatzi awiji-motakinari.

<sup>22</sup> Ikantakaaperowentakawo ijoriyyotaki. Tema naakakya joriyyo. Isheninkatakari Ishirayeeri, riraga ryoyaanewo Tajorentsi. Eejatzi nokimitakari naari. Ikantzi: "Nosheninkatakari Awaraamani". Eejatzi naari, nosheninkatakari irira.

<sup>23</sup> Ikantashitawita: "Nantziniri Jesokirishito ikowakaakinari". Omaanta naaka osheki nanaakotakiri. Osheki nokyaaryooventakiro nantziniri Jesokirishito ikowakaakinari, rootaki romonkyaaganteetapiintawitakinari omonkyaaagamentotsiki, ipajapajaatantapiintetakinari, omaanta rirori-paeni, kaari. Osheki nokamapiintawitaka.

**24** Riraga nojoriyyotzinkarite ipajapajaatapiintakina, tak, tak, tak, okaataki 39 ipajatakina. Paashini kitejiri eejatzi 39 ipajapajaataana, tak, tak, tak. Eejatzi ikimitaana paashini kitejiri, okaataki kitejiri apawakooni ipajapajaatakin.

**25** Paashini kitejiri rompojantapiintakinawo inhashithaki, tak, tak, tak. Okaatzit apite rapiiteetakina. Eejatzi paashini kitejiriki rompojantaanawo mapi, pok, pok, pok. Eejatzi nokinakowitaa pitotsiki antawokiroña inkaare. Ari otsitsianakì, roowiteencha nopiinkemi. Roojatzi eejatzi nokimitapiintaka napiitaki 2 inashitaka kitejiri, nopiinkemi. Apaani kitejiri nothataaga inchapankikira niyankaanikira inkaare, opoñaaga pitotsi; roojatzi nokitejitatotaki.

**26** Osheki nokinakinayitanakini nokenkithatantakari. Osheki nopiinkemi eniki. Osheki ikoshitapiintakina koshitantatsiri, rowashironkaapiintakina. Rowamaenami nojoriyyotzinkarite eejatzi paashinijatzitsiripaeni atziri. Rowamaenami jeekatsiri nampitsiki. Notzimpinawitaka antamiki ari opomeentsitzimotakina osheki janta. Roowiteencha nopiinkemi antawokiroña inkaare. Rowamaenami atziri itheeyashita ikantzi: "Naaka aap-atiyariri Jesoshi". Omaanta tee.

**27** Osheki opomeentsitzimotakina, osheki nashironkaapiintaka. Osheki tee nomatziro nomaye tsiteniriki. Nokemapiintakiro notashe eejatzi nomiri. Osheki kitejiri tee otzimi noyaari. Nokemakiro nowatsinkari, tekatsi nopewiryaaakotari.

**28** Kyaaryo nokemaatsitawo maawaeni iroka, eejatzi nokantani nokenkithashiryaapiintakiri ayemijantzinkarite, nokowakaaperotakiri raap-atiyaaari Tajorentsi kameetha.

**29** Aririka rowashiretaka ayemijantzinkarite, nowashiretakotakari naari. Eenitatsirika ayemijantzinkarite rantakagaetakiri kaari kameethatatsi, ari noshiyari Tajorentsi nokijawentakirori okaatzti rantzi riraga antakaakiriri ayemijantzinkarite kaari kameethatatsiri. Eejatzi nopashiwentakotyaa antakirori.

**30** Nokamanteeyakimironi iroka piyoteeyantyaarini eero nokantakaaperota okaatzti nantakiri, tema tee naaka antashityaawoni oetarikapaeni, omaanta riraga Tajorentsi matakanawori maawaeni.

**31** Riyotaki rirori tee notheeya. Riyotaki Iriri Awinkatharite Jesokirishito, thame akanteetatyeyaaani añaaperoteeyerini maawaeni.

**32** Paerani ipinkathariwenantzini riraga Areetashi. Rotyaantziri amitakontatsiri ipinkathariwenantzi janta Tamaashikoki. Irira riyotaki otyaantziriri joraaropaeni jaga ashitakokira rinkiteeyakironi maawaeni nampitsi ragaetanteenarimi. Ikowakowaeyawitakinani joraaropaeni,

**33** omaanta raanakina ayemijantzinkarite janta shiirkoki inkitzirori nampitsi. Rateetakaanakina roojatzi omoo, impaetzti royiitakotaana kipatsiki kantziriki. Rootaki nomatantawori noshiyapithatakari pinkathari aakaantenanimi.

## 12

### Koñaztiro iñaakiri Paaworo kimitakajatakijenoki

**1** Pamine, tee okameethawita nokenkithatakotapiintya naaka nokameethatzi, omaanta nokowaki nokamantemi noñaakiri naari. Eejatzi nokamantemiro ikamantakinari Jesokirishito.

**2-3** Okaataki iroñaaka 14 ojarentsi raanakina Awinkatharite janta jenokinta, janta oshekinta okameetheetyaaperotzi. Iyaatakirika nowatha, tee niyotzi: apatzirorika iyaataki noshire. Riyotzi Tajorentsi rirori.

**4** Tekatsi nokantya nokamantemiro maawaeni nokemakiri janta. Arirkami nomawitakyaawomi, eero ikowakaanawo Tajorentsi nokamantemiro.

**5** Osheki niweshiryaawentayitakawoni noñaayitakirini, omaanta tekatsi nokantya nokantakaaperotyaawo. Omaanta nokamantemiro nokameethatzin naari apaniroeni. Tekatsi nomate nanteniri Tajorentsi ikowakaakinari apaniroeni: rirotaki Tajorentsi matakaanawori oetarikapaeni, rootaki niweshiryaawenantakariri.

**6** Niweshiryaawentayitaawomi nantakiri naari, eeromi otzimimi niyotan-tari, eejatzi notheeyami. Ñaakiro, tekatsi nante apaniroeni. Tee nokoyi nokamantemiro nantayitzinrinika naari. Eenitatsi piñaakotakinari eejatzi pikemakotakinari: monkaataka, eero nokantzimiro paashini.

**7** Eenitatsi osheki riytakaakinari Tajorentsi, omaanta tee ikowakaana nokantakaaperotyaawo. Rootaki ishinetantakariri Jatanaashi rowashironkaakina, nokemaatsitaktakawori nomantsiyataki.

**8** Okaataki 3 nonethaawitakari Awinkatharite nokantziri: "Petsiyatakotena",

**9** omaanta ikantakina: "Noneshironkatemi, monkaataka. Eero netsiy-atakotzimi, omaanta eero nookimi: notajonkakowentempi pimatantyaawori pantero oetarika nokowakaakimiri". Iroñaaka niweshiryaawen-takawo iroka nokemaatsitakari: niyotaki iroñaaka itajonkakowentakina Jesokirishito.

**10** Rirotaki niweshiryaawentaperotakari. Tee noshintsizti, ishirontawen-teeyakinani paashinipaeni, nokemaatsitayitakawoni oetarikapaeni, iki-jeetapiintakina, nashironkaapiintaka, omaanta niweshiryaawentakari Jesokirishito. Tema riytzi tee noshintsizti, eenitatsi osheki tee nomatziro nantero, omaanta imatakaakina nantero.

### *Kameetha ijekaki Paaworo janta Korintoki*

**11** Ñaakiro, osheki nokenkithatakotaa naaka. Okameethatempiñaaperotenami nokameethatzin, pikenkithatakotanamikyaaryooperotatsiri, omaanta, tee. Rootaki nokenkithatakotantaari naaka kyaaryooperotatsiri. Tee nokameethatzin naari, tekatsi nantaperote apaniroeni. Omaanta tee ranaakoeyananri riraga iyotagaeyawitzimirini piñaaperoeyawitarini ikameethatzin.

**12** Okameethawita pikenkithashiryaakoperotenami naari. Paerani, eniro notsipateeyimini, ari piñaakoeyakinani omatakaakina Ishire Tajorentsi notajonkantayitakini, nantayitakironi kaari piñaapiintzi. Tema iroka niyotakaperoyakimini kyaaryo rotyaantaperotakina Jesoshi.

**13** Nokamintheeyakimini, maawaeni. Nokimitakaanteeyakimini maawaeni aapatziyariri Jesoshi janta paashinikipaeni nampitsi. Apatziro eeroka, tee nokanteeeyemini: "Pipena koetyeemotakinari". Tekatsikya nantziri oetarika pitheenkantanari.

**14** Rooteentsi niyaate noñaantaatemiri eejatzi. Okaate 3 nareetaatempi. Eero opomeentsitzimoeyimini, tekatsi nokowakoeyemini. Apatziro nokowaki pinintaperoeyenani eejatzi pipinkathatena. Nokimitakagaeyakimini neentsitepaeni. Eentsitepaeni tee ipapiintee koetyeemoteeri, omaanta aaka apapiintziri koetyeemotariri rirori.

**15** Nokaaashitawo maawaeni nantakiri paapatziyaperoeyantyaaririni. Oshekiperi nonintaperoeyawitakimini eeroka, omaanta eerori, tee pipiy-atana pineshironkatena.

<sup>16</sup> Ari ikanteeyimini kijakinari: "Kyaaryo, tekatsi ikowakoeyemini Paaworo, omaanta eenitatsi riyotantari rirori. Naamaaka ramatawiteeyakimini, raapithatantzimiori oetarikapaeni".

<sup>17</sup> ¿Eenitatsima raapithatakimirri riraga notyaantakimirri? Tekatsi.

<sup>18</sup> Chapinki notyaantakimirri Teeto eejatzi notyaantakiri paashini ayemijantzinkarite. ¿Eenitatsima rayitakimirri rirori? Tema ikimitakina naari: tekatsi ikowakoeyemini.

### *Osheki ikenkithashiryaka Paaworo*

<sup>19</sup> ¿Piitashiteeyawitakan apatziro nokowaki noñaawaetakota naaka kyaaryooperotatsiri? Pikompitakawo iroka pikenkithashireeya. Naapatziyakari Jesokirishito, rootaki nokowantakari naapatziyakagaeylemirini.

<sup>20</sup> Osheki nokenkithashiryaka iroñiaaka. Naamaashitya aririka noñeyapaakimini eero noñaaperotaperoeyapaemini. Eejatzi naamaashitya eero piñaaperotawakina naari. Naamaashitya noñaapaakimi aririka pipiyapiyawaaantetawakaaka, aririka piñaawenashiryakotawakaya aririka tee pimonkaatawakaaka, aririka pikijathatawakaaka, aririka pinashiiyaawoni pikenkithashiryari, aririka pikantzimatawakagaeyakan, aririka pithawetakotawakagaeyakan, aririka pikantakaaperoeyakan, aririka osheki pikantashiwaetayitakan, maawaeni; tee pijeekaeinyi kameetha.

<sup>21</sup> Naamaashitya aririka nareeteemi eejatzi nowashiretakotapaemi. Ro nowashiretakotantemiri, riyotaakina Tajorentsí tee okameethatzi panteeyakirini. Nopashiwentakayaari riraga kaari ookironi kaari kameethatatsi rantapiintayitakirini: riraga mayempiyitzirorini tsinani, riraga shirontawentawori iina, riraga ayirori iyashiyani, maawaeni.

## 13

### *Ikowaki Paaworo ikemijantakaaperooyerini korintojatzi*

<sup>1</sup> Ari okaataki apite noñaantaatzimiri paerani, iroñiaaka nareetaatemi eejatzi. Ari okantzini Iwaperite Tajorentsí: "Eenitatsirika apite eerorika 3, ñaakoterini atziri rantapiro kaari kameethatatsi, piyoperotaki kyaaryo rantaperotapiro, rootaki okameethatantyaari powashironkaeri".

<sup>2</sup> Paerani eenironi nareetantakimirri apitetapaentsiri nokamineeyawitakarini ipakagaero riraga antzirori kaari kameethatatsi, eejatzi ironaaka nojankineeyakinirini ipakaanteeyaworini ninkarika eekiro riyaatatyee rantero kaari kameethatatsi. Tema iroka apitetapaentsiri nokaminaantziri. Aririka napiitero nareetaatemi tema rootaki tres-tapaentsiri rootaki nowashironkaantapaakyariri eerorika ipakaero rantziri.

<sup>3</sup> Rootaki piyoteeyantanakyaarini kyaaryo naaka rotyaantanewo Jesokirishito eejatzi nokamanteeyimironi iñaani. Tee ithaawakagaeyimini irira, omaanta osheki ipinkathariwenteeyakimini, itajorentsitsaperotaki.

<sup>4</sup> Ikentakotanteetakaririni paerani Jesoshi, tee ishintsitawita, omaanta itajonkakowentakiri Tajorentsí rañaantaari. Eenitatsi iroñiaaka osheki itajorenka. Tee noshintsiteeyini naari, nokimiwitakari Jesokirishito paerani janta koroshiki. Omaanta itajonkawentakina, rootaki iroñiaaka nomatantawori nanteniri oetarikapaeni ikowakaakinari namitakotantemiri.

<sup>5</sup> Okameethatzi piyotakoeyani eerokapaeni kyaaryorika paapatziyaperoeyakarini Jesokirishito, eejatzi kameetha pikemijantaperoeyakirini. Tema piyotzi okithaatakaakimi Ishire itajonkawenteeyakimini. Teerika okithaatakaakimi, tee kyaaryo paapatziyari Jesokirishito.

<sup>6</sup> Niyotzi aririka pikenkithashiryakoperotyaawo okaatzi nokantzimiri eejatzi nantziro, ari piyotero kyaaryo riyoyaakina Tajorentsí nokenkithatkaantemiri eerokapaeni iñaani.

<sup>7</sup> Namanapiintziri Tajorentsi ramitakoeyemini eero pantziro kaari kameethatatsi. Tee nokoyi nowashironkaemi. Eejatzi tee nokowawita piñaaperotashitena, omaanta nokowaperotaki pijkeekameetha omawitya paashini atziri ikenkithashiryakotena natsipetashitakawo nantakiri.

<sup>8</sup> Aririka pantero kyaaryooperotatsiri, eero nowashironkaemi. Tema eero nomatziro nantziro kaari ikantanari Tajorentsi. Omaanta aritaki apatziro namitakotakiri aapatziyariri Jesoshi.

<sup>9</sup> Nokimoshirewentzimi aririka pameentaperotakaari Jesoshi eejatzi pikemijantaperoteri. Aririka pameentapérotyaari monkaataka, eero okantzimoneentana pitheenkanarika, tema tekatsi okanya nowashironkaemi, omawitya ikenkithashireeya amatawitatantsiri nothaawaneentatzi. Omaanta aritaki namaniri Tajorentsi ramitakoeyemini paapatziyaperoeyarini.

<sup>10</sup> Rootaki noshintsithateeyantzimirini nojankinatakimo iroñaaka, roojatzi aririka nareeteeyemini tekatsikya noshintsithatawenta paemiri eejatzi. Ikowakaakina Tajorentsi nopinkathariwenante, omaanta tee nokoyi nowashironkaeyantemirini, omaanta namitakoeyemini paapatziyaperoeyariri.

### *Riwethateeyanaarini*

<sup>11</sup> Noweyaantaneemiro, noyemijantzinkarite, niwethateeyaneemini, nokowaki piweshiryaaawenteeyaarini Jesokirishito. Pikenkithashireeyani, eero papiiteero eejatzi kaari kameethatatsi. Piweshiryakaawakagaeyaani, paakameethatawakagaeyaani, roojatzi kijokiro rowaemi Tajorentsi. Tema osheki inintaperoeyakaeni, kameetha ijeekakagaeyaakaeni.

<sup>12</sup> Piwethatewakaeya, paakameethataperotawakagaeyaani.

<sup>13</sup> Riwethateeyimini maawaeni ayemijantzinkarite jaka.

<sup>14</sup> Nokowaki iroñaaka ineshironkaeyemini Awinkatharite Jesokirishito, inintashireeyakimini Pawa Tajorentsi, eejatzi ikithaatakaakimiro Ishire pijkeekanteeyaarini kameetha.

Ari okaatzi

Naaka nojankinateeyimirini:

Paaworo

## **RIRAGA PAAWORO ROJANKINATZINIRI KARAASHIYAJATZI**

<sup>1-2</sup> Nokoyi nowethatemi noyemijantzinkarite tsikarika pikanta pijkeeki janta Karaashiyaki. Naaka jakaa Paaworo jankinatzimirori iroka. Tee naaka rotyaantanewo atziri, tee ikantana atziri: "Pikenkithatakoteri Jesoshi", inta otyaantakinari rirotaki Jesokirishito, nokenkithatakapointziriri atziri. Eejatzi Ashitariri rotyaantakina: riraga piriinteeriri. Nokaateeyakirini jakaaapatziyariripaeni, notyaanteeyakimironi iroka jankinarentsi eeroka-paeni.

<sup>3</sup> Nokantapiintziri Pawa Tajorentsi: "Pineshironkaeyerini karaashiya-jatzi, pijkeekakagaeyerini kameetha"; eejatzi rirori nokantapiintziri Awinkatharite Jesokirishito.

<sup>4</sup> Tema rirotaki shinetashiteencha paerani ikentakotanteteetakariri, rootaki ikowakaakiriri Pawa Tajorentsi. Tee akameethawitani, rootaki iken-takowenantakaeri, rowawijaakoeyanteerini, maawaeni: eero akimitagaa paerani.

<sup>5</sup> Thame añaaperotaperoeyerini Tajorentsi akanteetatyeyaaani. Aritaki okantyaari.

### *Ijeeki apaani owawijaakotantsiri: riraga Jesokirishito*

<sup>6-7</sup> Nokenkithashiryaakotakimi, tsikarika pikanteeyakarini. Riyoyaay-itakimini Tajorentsi, rootaki ineshironkataantakimiri Jesokirishito. Ap-atziro irira rirotaki owawijaakotzimiri. Rooma eeroka paapatziyakari irira. Omaanta iroñaka netakoperotakimi, intspiae pipeyakotakiro iroka niyotaawitakimiri. Paapatziyimaatkarai paashinipaeni janta, ikompitaka-gaejakimironi. Ikwok rantaqagaeyemironimi paashini eejatzi, ikantawitzimi: "Eero imaziro Jesokirishito rowawijaakotemi apaniroeni, inta ee-jatzi pimonkaatero rametayitarini joriiyopaeni". Omaanta kyaaryo nokamanteyawitakimini tsika pikantyaaka pawijakonteeeyari. Eerrika paa-patziyana, eero pawijkakotee.

<sup>8</sup> Omaanta aririka naaka nopaashiniteromi iroka nokamantzitakimiri, okameethatemi rowashironkaenami Tajorentsi, rotyaantenami paamariki kaari tsiwakanitatsini. Eejatzi ikimitya riraga ronampiri Tajorentsi, aririka ipaashiniteromi, okameethatemi eejatzi rowashironkagaeyerinimi Tajorentsi.

<sup>9</sup> Aritaki nokamantzitakimi, iroñaka napiiteemiro: eenitatsirika paashiniteroni nokamantzitakimiri, aritaki rowashironkaakiri Tajorentsi.

<sup>10</sup> ¿Ninka nokowakiri nokimoshiryaakayeri? ¿Riroma atziripaeni? Kaari, tema rirotaki Tajorentsi. ¿Riroma atziri nokowaki niweshiryaakayaari? Kaari. Nokowakirkami niweshiryaakayaari atziri, tekatsi nokantyaami nantenrimi Jesokirishito.

<sup>11</sup> Iroñaka, noyemijantzinkarite, piyoteeyakini nokamanteyakimini tsika akanteeyari awijakoeyantyaarini. Tee riro atziri ashityaawoni iñaani kameethatatsiri.

<sup>12</sup> Kaari atziri iyotakaanawori iroka, tee riro iyotaanawori atziri, inta Jesokirishito iyotakaanawori maawaeni. Thame aapatziyawo apatziro iroka.

### *Tsika ikantaka Paaworo ipeyantaari rotyaantanewo Jesoshi*

**13-14** Piyoteeyakini tsika nokantawitani paerani: naaka joriyo, nanaakoeyakirini maawaeni noshiramparinkaki: nomonkaataperotawitawoni maawaeni rametapiinteyarini nojoriyyotzinkaritepaeni. Kyaaryo, nomataperotawitawoni maawaeni rameteeyarini nochariniiteni paerani, rootaki nokijantawitaririni maawaeni ameenteeyaririni Jesoshi. Najaryaagaeyawitakarini. Nokowawitani nookakagaeyerinimi ameenteeyaririni rirori.

**15** Omaanta paerani, tekirani nokoñaatapaakini, riyotzitakinani Tajorentsi. Ineshironkatzitakinani, rootaki riyoyaantaanari rowawijaakotaana.

**16** Riyotakaakinari itomi, rootaki niyotantariri tsika ikanta. Eroka kaari nojoriyyotzinkarite, omaanta ikowakaakina nokamanteeyanteemirini tsika ikanteeyakaerini rowawijaakotanteeyakaerini. Tee nojampitashitari paashinipaeni atziri: “¿Oetaka nokamanteriri atziri?”

**17** Tema rotyaantakina Tajorentsi rirotaki irira nokenkithatakotziri. Tee niyaatzi Jerojareeki nojampiteri paashini rotyaantanewo Jesoshi: ritakari rotyaantakiri riraga Tajorentsi, inta niyaataki Araawyaki. Roojatzi nopiyanaa ejatzti Tamaashikoki.

**18** Ari 3 ojarentsi nojeekanaki, roojatzi niyaatanaki Jerojareeki, noñaantapakaariri Peetero. Okaataki kitejiri 15 nojeekimotapaakiri.

**19** Ejatzti noñaakiri Jantyaako, riraga rirentzi Awinkatharite. Tee noñiiri paashinipaeni rotyaantanewo Jesoshi.

**20** Iñaakina Tajorentsi, rirotaki tee notheeya. Kyaaryootaki iroka nojankinatakimiri.

**21** Roojatzi nokinayitanakini janta iipatsitekinta shiiryajatzipaeni ejatzti shiriishiyajatzipaeni.

**22** Tekirani riyoteeyanani riraga aapatziyariri Jesokirishito janta Joreeyaki,

**23** omaanta ikemakotashitakina naapatziyari Jesokirishito. Ikanteeyakini: “Ikijeeyawiteeni maawaeni, ikowawitani ipakaakaerimi raapatziyakarira Jesoshi omaanta iroñaaka ikamanteeyeerini atziri: ‘Paapatziyeyarini Jesokirishito’”.

**24** Riwershiuyaawentakina maawaeni aapatziyariri janta, ikanteeyini: “Tema ikameethatzi Tajorentsi, rowawijaakotakiri Paaworo”.

## 2

### *Ipiyanaa ejatzti Paaworo Jerojareeki*

**1** Ari awijanaki okaataki 14 ojarentsi, roojatzi nopiyantanaa ejatzti Jerojareeki. Notsipatanakari Werenawee ejatzti naaneeri riraga Teeto.

**2** Tekatsi kaemakaantenani; omaanta riyotakaakina Tajorentsi okameethatzi niyatenten. Nitakawo tee niyaatashiiyirini maawaeni aapatziyaripaeni Jesoshi janta, inta niyaatashiiyakirini riraga jewawentziriri ayemijantzinkarite. Nokantziri: “Nokamantaperotakiri paashinijatzitsiri atziripaeni: ‘Riotaki Jesoshi apatziro imatakro rowawijaakote’”. Nojampiteeyirini: “¿Okameethatzima iroka nokamantapiinteyiririni riroripaeni? ¿Natsipetashitawoma?” Ikanteeyanani: “Jee, kameetha; tee patsipetashitawo”.

**3** Ejatzti Teeto, omawitya kaari joriyo, tee ikanteeyerini: “Pitonatya pishiramparitantari”.

**4** Omaanta ijeki paashinipaeni joriyo kantawitachari: “Naaka piyemijantzinkarite”, omaanta kaari. Tee raapatziyaperotari Jesokirishito. Ikenkithashiryaawita: “Kameetha Jesoshi, omaanta okameethaperotzi ejatzti amonkaateeyeroni rameteeyarini achariniiteni”. Itsipateeyakarini

aapatziyariri Jesoshi tsikarikapaeni iñaaperotzirinta Tajorentsi. Omaanta ro itsipatantakariri, ikowaki riyote nomonkaateeyironirika rameteeyarini ajoriiyotzinkaritepaeni, ikowaeyawitani itotonatakagaeyaaarinimi. Tee riyoti awijakoeyakaeni maawaeni aapatziyariri Jesokirishito, tee romperateeyeeni Jesokirishito amateeeyeroni rameteeyakarini joriyopaeni.

<sup>5</sup> Omaanta naaka, tee inimotana. Tee naapatziyakoneentari eechonkini ikantziri. Nokowaperoeyakini piyotaperotero apatziro riraga Jesoshi rerotaki owawijaakotantsiri.

<sup>6</sup> Pamine, riraga jewawentziriri aapatziyariri Jesoshi rerotaki paerani riyotaanewo Jesoshi, itsipatapiintari. Rootaki riroripaeni iyoteemiri iroñaaka iñaaperotantakariri. Omaanta riraga jewawentziriri aapatziyaripaeni Jesoshi tee inimotziri okaatzi riyotaantziri riraga joriyopaeni, inta inimotakiri niyotaantziri naaka. Rooma nokenkithawaetkaantakitariri, tekatsi paashini ikantawakinari. Tee ikantana: "Ipeyeeyani paashinijatzitsiri atziri joriyyo rawijakotanteeyari".

<sup>7</sup> Tekatsi romperatena, omaanta ikantaki: "Kyaaryo, rotyaantakiri Tajorentsi Paaworo ikenkithatakaeri paashinijatzitsiri atziri, ikamanteeyirini tsika ikantyaaka rawijakotanteeyaari. Ikimitaaka rotyaantakiri Peetero ikamanteeyirini ajoriiyotzinkaritepero aari".

<sup>8</sup> Kyaaryo, riraga Tajorentsi imatakaakiri Peetero ikenkithatakagaeyirini ijoriiyotzinkaritepaeni. Omaanta naakanya, imatakaakina nokenkithatakagaeyirini paashinijatzitsiri atziri.

<sup>9</sup> Naakiro, reewatakaantzi Jantyaako, Peetero eejatzi Jowa. Ari riyoteeyakini rirori itajonkakowentaana Tajorentsi. Iñaaperoeyawakinani, eejatzi iñaaperoeyawakirini Werenawee; ikanteeyakinani: "Kyaaryo, akimittawakagaeyakan. Okimitaka nokenkithatakagaeyirini naari ajoriiyotzinkarite, piyaateeyeni eeroka pikenkithatakagaeyerini paashinijatzitsiri atziri".

<sup>10</sup> Apatziro eejatzi ikantakina: "Pikaminthagaeyerini owashironkaenkari". Tema aritaki nametakawo nokaminthaapiintziri.

### *Rantziri Peetero janta Antyokiiyaki*

<sup>11</sup> Ikanta ipokantakari Peetero Antyokiiyaki, eeniro ikompitakawo, rootaki nokanantakariri. Iroñaaka nokamantemiro tsika okantari.

<sup>12</sup> Rareetantapaakari rirori, rowakotapiintawitakari kaari joriyyotatsi, rootaki rowantakariri riraga kaari rowayitani joriyyo. Okameethataki iroka, omaanta roojatzi rareeteeyantapaakani rotyaantanewo Jantyaako. Riraga Peetero ithawantakari riraga kantsiri okameethatzi amonkaateeyeroni rojankinarinji Moeseshi owawijaakotanteeri, rootaki itsiparyaantakariri riraga rowakoeyawitakarinira. Omaanta iroka rantakiri, tee okameethatzl.

<sup>13</sup> Roojatzi iñaakoeyakirini riraga paashinipaeni joriyyo rantakiri Peetero eejatzi ikimiteeyanakan: itsiparyaanteyanakaririni iyemijantzinkarite, ipashiwentakagaeyakarini itsipateeyaneeyarini. Riyotakagaeyawitakarini paashinipaeni ayemijantzinkarite tee okameethatzl riraga joriyopaeni rakiyoteri paashinijatzitsiri atziri, eejatzi ikimiteeyakarini Werenawee.

<sup>14</sup> Noñaantapaakariri naaka Peetero eejatzi paashini joriyopaeni tee itsipateeyarini paashinijatzitsiri atziri, niyotaki tee imonkaatziro iroka kyaaryootsatsiri akamanteeyiririni atziri: "Rowawijaakotashiteeyeeni apatziro Jesokirishito, tee ikanteeyeeni amonkaatero rametayitarini ajoriiyotzinkarite awijakotantyaari". Roojatzi ipiyoteeyantakarini maawaeni ameenteeyaririni Jesoshi, nokantzimotakiri irira riraga Peetero: "Tema eeroka joriyyo, omaanta chapinki tee pikimitaperotari ajoriiyotzinkaritepero, inta pikimitakari paashinijatzitsiri atziri.

Piyotaki apatziro Jesoshi rowawijaakotakimi; omaanta iroñaka tee powanaawo maawaeni owanawontsi ikimitaga kaari joriyyotatsi rowayitawoni maawaeni; inta powakawo rametayitarini achariniiteni. Kimitaka pikenkithashiryaa kagaeyakarini tee riro Jesoshi apatziro rowawijaakotantzi. Pikenkithashiryaa kagaeyakarini okameethatzi ejatzti imonkaatero maawaeni rametayitarini joriyyopaeni. Tee okameethatzi iroka.

<sup>15</sup> Pamine, aakataki joriyyo, ashi oyiro ajoriyyoeyini. Tee akimitari paashinijatzitsiri atziri: tee riyoteeyirini paerani riraga Tajorentsi.

<sup>16</sup> Riraga joriyyotatsiri ikantawita: ‘Aririka amonkaateeyeroni maawaeni rametayitarini ajoriyyotzinkaritepaeni, ari iñaaperotee Tajorentsi akameethatzi’. Omaanta ayotakiro kaari iroka, inta iñaaperotanteeri akameethatzi aririka ameenteeyari Jesokirishito, eero ikenkithashiryaa woooo ejatzti kaari kameethatatsi anteeyakirini. Tema aaka ameenteeyakarini Jesoshi, aapatziyakari, rootaki iñaaperoeyantakaerini Tajorentsi akameethatzi, ikimitakaantakae tee anteeyironi kaari kameethatatsi. Tee ikenkithashiriiro amonkaatakirorika rametayitarini ajoriyyotzinkarite. Tee iñaaperotashitari ikameethatzi riraga monkaateeyerorinimi maawaeni rametayitarini achariniiteni”. Rootaki nokantakiriri Peetero ejatzti maawaeni nojoriyyotzinkarite. Kyaaryo, aririka amonkaatawityaa woomi rametayitarini ajoriyyotzinkarite, eero omatee owawijaakotee. Apatziro rowawijaakotantzi Jesoshi.

### *Eero owawijaakotee rojankinarini Moeseeshi*

<sup>17</sup> Pamine, ¿iitaka ameenanteeyakarini Jesokirishito? Tema akowaki rowameethashireteeyeeni, rootaki apakaantawori akowawitari amonkaateromi rametayitarini achariniiteni rootaki awijkotanteeyaa. Rootakima ¿rantakagaeyakaerini Jesokirishito kaari kameethatatsi? Kaari, tee rantakagaero.

<sup>18</sup> Kyaaryo apakaantawori amonkaatawityaarimi rametayitarini achariniiteni, tee antziro kaari kameethatatsi. Omaanta nokantemirikami iroñaka: “Thame amonkaatero rametayitarini achariniiteni owawijaakotanteeri”, tema nantakiro kaari kameethatatsi nopakaantawitawori nomonkaatawityaarimi rametayitarini achariniiteni.

<sup>19</sup> Ñaakiro, nomonkaatakirkami rowaga ametayitarini aaka joriyyopaeni achariniiteni niyotanaki tee okameethatzi nameenteeyawo roori iñaaperotanteenari naari Tajorentsi nokameethatzi. Rootaki nopakaantawori, inta iroñaka nameentaari apatziro Jesokirishito.

<sup>20</sup> Ikentakotaka Jesokirishito koroshiki, ikamaki. Iroñaka kimiwitaka notsipatakari naari koroshiki, nokamaki. Kyaaryo, eenirona nañi, omaanta tee naaka añaashitachani apaniroeni, omaanta kijokiro rowana Jesokirishito. Iroñaka tee nantziro nokowakaari naari, inta nantziro ikowakaakinari Jesoshi. Rirotaki Itomi Tajorentsi naapatziyakari. Inintashireperotakina, ejatzti ikamawentakina.

<sup>21</sup> Tee ratsipetashitawo Tajorentsi ineshironkaeyakaeni. Omaanta, pikenkithashiryaa kagaeyakarini aririka pimonkaateeyakironimi rametayitarini nojoriyyotzinkarite ari pawijkaoeyakini. Pameentakyaaworkami rowaga rametayitarini tekatsi pikantyaami paapatziyari Jesokirishito. Eerikami paapatziyari, tema ratsipetashitakawo ikamawenteeyakimini.

<sup>1</sup> Iroñaaka, karaashiyajatzi, tee añiilo piyotantari. ¿Ninkama amataw-iteeyimirini? Paerani nokamanteeyakimini ikentakotawenteeyakaeni Jesokirishito rowawijaakotantakaeri. Piyotaperoyawitakawoni, iroñaaka pikompitanaawo.

<sup>2</sup> Apaani nojampiteeyemini: rowaga Ishire Tajorentsi, ¿itaka ikithataakaantakimiror? ¿Rootakima pimonkaateeyantakaworini rametayitarini nojoriyyotzinkarite ikithaataakaantakimiror? Kaari. Tema ro ikithaataakaantakimiror paapatziyakawo nokamantzitakimiri. Tema pameentakari Jesokirishito.

<sup>3</sup> Paapatziyantakariri paerani, ¿tsika pikantakari pawijakoeyanteeyarini? Tema ro Ishire Tajorentsi. ¿litateetaka jaga pikowantakari iroñaaka pimonkaateeyeroni rametayitarini nojoriyyotzinkarite? ¿Arima omatakagaeyakimiri ikowakagaeyakimiri Tajorentsi? Eero.

<sup>4</sup> Osheki pikemaatsitawentakari Jesokirishito. ¿Patsipetashitawoma?

<sup>5</sup> Pamine: tema rotyaantakimiro Tajorentsi Ishire. Tema itajonkakowen-tapiintakimi. ¿litaka itajonkakowenantakimir? ¿Rooma pimonkaatapiin-takiro rametayitarini nojoriyyotzinkarite? Kaari. Tema pameentakari, rootaki itajonkakowenantakimir.

### *Rameentakari Awaraama Tajorentsi, rootaki iñaaperotantakariri ikameethatzi*

<sup>6</sup> Tema eejatzi pikimitakari Awaraamani. Rameentakawoni paera-niperoroña maawaeni ikantakiriri Tajorentsi, rootaki iñaaperotantakariri ikameethatzi, kimiwitaka tee rantziro kaari kameethatatsi.

<sup>7</sup> Iroñaaka ¿ninka sheninkaperotaariri Awaraamani? Tema riraga kimitap-erotaaariri: riraga ameentaperotariri Tajorentsi.

<sup>8</sup> Paeraniperoroña ikenkithashiryaakotzitakarini aririka paashini-jatzitatsiri atziri rameenteeyaa, aritaki iñaaperotakiri Tajorentsi rirori ikameethatzi. Rootaki ikamantzitakaririni iroka kameethatatsi: "Eeroka pamitakotena iinja notajonkakowenanteeyaaaririni jeekaeyatsirini maawaeni kipatsikipaeni. Iinja rivotaki pisheninkani owawijaakotantat-siri".

<sup>9</sup> Aritaki ikanta, itajonkakowenteeyakirini maawaeni ameen-teeyakirini Jesokirishito, ikimitakaanteeyakarini Awaraama rameentakari Tajorentsi.

<sup>10</sup> Rootaki ayotantawori iroka: maawaeni kowatsiri imonkaateeyeron-imí maawaeni rojankinatakirini Moeseeshi rawijakotanteeyarimi, aritaki ikantakotzitakarini Tajorentsi paerani. Rooma rootaki ikantakotz-itantakaririni: tekatsi materoni imonkaatero, rootaki rowashironkaan-teeyaririni, rotyaanteeeyerini paamariki kaari tsiwakanitatsini. Ñaakiro, okantzi Iwaperite Tajorentsi: "Rowashironkaeyerini Tajorentsi riraga kaari monkaataperotapiinteeyirorini maawaeni rojankinayitzirini Moeseeshi".

<sup>11</sup> Ñaakiro, tekatsi akantero amonkaateeyeroni maawaeni rowaga jank-inarentsi. Rootaki kaari iñaaperotanteeyerini Tajorentsi akameethatzi, omaanta ikantakae irira: "Aririka pameenteena, ari noñaaperoeyakimini pikameethatzi, roojatzí pikanteetatyeyaaani pañagaeyaneeni".

<sup>12</sup> Eejatzi rowaga rojankinarini Moeseeshi tee iyotagaeyeeni ameentee-yari Tajorentsi awijakotanteeyari, apatziro rowaga iyotagaeyakaeni akan-tatyeyaaani amonkaataperoteromi maawaeni okantayiteerini, awijakotan-teeyaaari.

**13** Kyaaryo rowawijaakotakae Jesokirishito rootaki kaari rowashironkaantee Tajorentsi omawitya tee amonkaataawitawo rojankinarini Moeseeshi. Omaanta Tajorentsi rowashironkaantakari antani Jesoshi janta koroshiki ikamawentakae aaka rowawijaakotantakaeri. Tema okantzitani Iwaperite Tajorentsi: "Riraga kentakotachani inchatoki, rowashironkaanteetakari rantani. Ari ikantakaantziro pinkathari".

**14** Ari ikamawenteeeyakaeni Jesokirishito riraga icharineetenii Awaraamani. Ikamawenteeeyakaeni maawaeni joriyyotatsiri ejatzi kaari joriyyotatsi, rowawijaakoeyantaairirini maawaeni ameenteeyaririni. Ejatzi Ishire Tajorentsi, tema akithaatzitakari maawaeni ameenteeyaririni Jesokirishito. Rootaki ikashiyakaetakaririni Awaraamani paerani.

### *Ikashiyakaetakarini Tajorentsi Awaraamani*

**15** Pikenkithashireero, noyemijantzinkarite, iroka ameteeyakarini. Aririka akowaki akashiyakaera ajiroyiyotzinkarite aperi oetarikapaeni, ojankinateniri akashiyakaakiriri, riyoperotantyaawori. Ejatzi ojankinatero awaero. Tekatsikya paashini ikantya atziri rowashineero iwaero, eero imatziro ramatawiteri riraga akashiyakaakiriri oetarikapaeni.

**16** Ejatzi riraga Tajorentsi, ikantziri Awaraama: "Aririka paapatziyena ari nowawijaakoteemi". Ejatzi ikantakiri: "Notyaanteri picharineteeyaaari iinja, rowawijaakoeyeerini maawaeni ameenteeyaaaririni". Pamine, tee ikantzirini: "Notyaanteeyerini osheki owawijaakoeyemini". ¡Eero! Irira ikenkithatakotakiri apaniroeni icharineteeyari paata owawijaakotantsini: riraga Jesokirishito.

**17** Naakiro, ikantakirini Tajorentsi Awaraama paeraniperoroña. Ikanantakirini, tekirani ojeekeni rojankinarini Moeseeshi. Ari okaataki ojarentsi 430, roojatzi rojankinatakaantakari Tajorentsi Moeseeshi. Tee ipaashinitziro iroka ikamantzitakaririni riraga Awaraama, tee ramatawitziri.

**18** Aririkami imonkaateromi Awaraama rojankinarini Moeseeshi, rootaki rowawijaakotantakyaaririmi Tajorentsi, eeromi ikashiyakayirimi rowawijaakoterimi. Omaanta rirotaki kowashitacha rowawijaakotashitari. Tee ro rowawijaakotantakariri Tajorentsi Awaraama imonkaatakiro rojankinarini Moeseeshi. Rooma tekatsi.

**19** ¿Oetaka ojeekantakari rojankinarini Moeseeshi? Iyotakagaeyakaeni eeniro antani, rootaki akowaeyantakarini owawijaakoeyeeni. Ipokaki Rotyaantanewo Tajorentsi, iroñaaka tee akowaero rojankinarini Moeseeshi. Tema rirotaki Jesokirishito icharineni Awaraama: riraga ikamantzitarini paerani Tajorentsi: "Notyaantemiri iinja owawijaakotemini". Ejatzi nokamantemiro iroka: riraga Tajorentsi ikantziri ronampiri: "Pikamanteri Moeseeshi noñaani". Ari ikantakiri. Roojatzi riraga Moeseeshi ikamanteyakirini atziripaeni iñaani Tajorentsi.

**20** Omaantakya ikenkithatakaperotakiri Tajorentsi Awaraama, tekatsi kamanterini. Apatziro ikamantakiri apaniroeni.

**21** Paerani ikantziri Tajorentsi Awaraama: "Aririka paapatziyena, aritaki nowawijaakotakimi". Roojatzi rojankinatakaeri Moeseeshi, otzimantakari rojankinari. ¿Inashitama iroka rojankinatakaakiriri Moeseeshi? Teewee. Iroñaaka ayoteeyini tee owawijaakoeyeeni rojankinarini Moeseeshi, tekatsi okantee owameethashireperoeyeeni rootaki kaari imatantawori Tajorentsi iñaaperotee akameethatzi.

**22** Omaanta iyotakagaeyakaeni rowaga rojankinarini Moeseeshi eeniro antanipaeni maawaeni. Tee amateeyironi ikowakaakaeri Tajorentsi.

Omaanta eeniro ikanteeyakaerini maawaeni aaka aapatziyariri: rootaki akowantari ameenteeyaari Jesokirishito, aritaki rowawijaakoeyakaeni.

<sup>23</sup> Paerani, osheki omperateeyawitakaeni rojankinarini Moeseeshi, okimitakari waairiya, aririka romonkyaaagakae omonkyaaagamentotsiki. Okimitakantakae okempoyeeyakaeni roojatzi ipokanteeyaari riraga aapatziyeyarini.

<sup>24</sup> Eejatzi rojankinarini Moeseeshi oshiyakari iyotaantatsiri: iyotagaeyakaeni eeniro antani, akowanteeyakarini ameenteeyaarini Jesokirishito, rowameeethashiryaanteeri, iñaakae akameethatzi, ikimitaakaantee tee antziro kaari kameethatatsi.

<sup>25</sup> Iroñaaka ayoteeyakirini Jesokirishito, ameentakari. Aritapaaki. Tee okempoyee iroñaaka rojankinarini Moeseeshi: tema monkaataka.

### *Aakapaeni aapatziyariri, akimitteeyakarini Awaraamani*

<sup>26</sup> Ameenteeyakarini Jesokirishito, rootaki itominanteeyakaerini Tajorentsi.

<sup>27</sup> Pamine, eejatzi akaawoshitakotawentari Tajorentsi riyoteeyantakaerini atziri ameentakari Jesokirishito, eejatzi ashenkateeyakarini Tajorentsi.

<sup>28</sup> Iroñaaka akaateeyakirini joriyyotatsiri, kaari joriyyotatsi, eejatzi akaateeyakirini pimantaari, kaari pimantacha, shirampari, tsinani, maawaeni: amonkaatawakagaeyakaní ameenteeyakarini Jesokirishito.

<sup>29</sup> Eejatzi okimitaka, aririka ashenkateeyakarini Jesokirishito, eejatzi ashenkateeyakarini Awaraamani. Tema Jesokirishito rirotaki icharineni. Paerani riraga Tajorentsi ikashiyakaayitakarini itajonkakowenteeyakaeni aaka, ikimitaakirira itajonkakowentakiri Awaraamani.

## 4

### *Tsika akantawitani paerani, tekirani ipokini Jesokirishito*

<sup>1</sup> Piyotakotziri rametayitakarini ashaagantachari. Eeniro itomi, ikowaki iperi maawaeni rashitayitarini. Eejatzi ikantziri isheninka: “Aririka nokamaki paata, pikempoyaawakinri notyomyaaniki maawaeni nashitaytarini. Aririka rantarite, ari pipaera maawaeni”. Ikamantakari iriri, iroñaaka rirotaki ashitanaawori itomi maawaeni, omaanta eeniro reentsitzi, ari ikimitakotawitakari omperanarentsi.

<sup>2</sup> Eenitatsi kempoyiriri, eejatzi kempoiyiniriri rashitayitarini. Aririka omonkaatapaeya ikantakiriri iririni, aritaki ishinetagaeri ragaero rashaagawo.

<sup>3</sup> Aritaki akimitawitani paerani aari, tekirani ipokini Jesokirishito. Okempoyaawiteeni rojankinarini Moeseeshi, iyotagaeyawiteeni antapiinteyironi pomeentsitayitacharini. Akemijantashitayitawoni ikantayitzirini atziri, rootaki omperateeyantakaerini oshiyakari omperanarentsi ikemijantaperotapiintziri omperatariri.

<sup>4</sup> Rootaki areetantapaaka kitejiri riyoyaantakawori Tajorentsi omonkaaperotantakari ikantzitakarini rirori, rootaki rotyaanantakaririni itomi, ikoñaatantapaakawo tsinani, joriyyo rinawitapaaka. Otzimatye ikemijantaperotapaakiro rirori rojankinarini Moeseeshi.

<sup>5</sup> Rootaki rotyaanantakariri Pawa Itomi ikamawentakae rapaatawentaero riraa eero omperatanee rojankinarini Moeseeshi. Akimiwitari pimantaari, omaanta rowawijaakoeyakaeni, rootaki iroñaaka itomintaperoyeyantakaerini Tajorentsi.

<sup>6</sup> Rootaki ayotantariri aakateeyakini itomipaeni, aritaki ikanta Tajorentsi eejatzi Itomi rotyaanteeyakaeroni Ishire okithaatakaakae. Rootaki iroñaaka akanteeyantaaririni: "Eeroka Pawa".

<sup>7</sup> Tee aakapaeni iroñaaka pimantaari, inta iroñaaka aakateeyakini itomipaeni Tajorentsi. Ineshironkaeyakaeni, eeniro ikashiyakagaeyakaerini maawaeni.

*Aririka apomeentsiwentyaawo rojankinatziniriri Moeseeshi, akimitakari pimantaari*

<sup>8</sup> Paerani, eerokapaeni tee piyoteeyawitarini Tajorentsipero, piitajorentsiteeyawitarini riwetsikanipaeni atziri, rootaki omperatan-teeyawitakimirini. Omaanta tekatsi okanteeya otajorentssite.

<sup>9</sup> Omaanta iroñaaka piyoteeyakirini Tajorentsipero, eejatzi riyo taperotakimi eerori, reentsiteteeyakimini. Eejatzi ifñaaperotakimi pikameethatzi. ¿litaka pikowayantakarini pikimiteeya paeran? ¿Eniro pikenkithashiryakawo okameethatzi pimonkaateromi rametayitarini joriyopaeni aritaki owameethashiretakimi? ¿litaka paapatziyashitantyaariri kaari tajorentsitsati? Eero imatziro rowawijaakotemi. ¿Pikowakima pikimiteeya eejatzi pimantaari?

<sup>10</sup> Eerokapaeni rirotaki paashinijatzitatsiri atziri omaanta pikimitaari joriyopaen: pinashitakaapiintayitawoni kitejiripaeni, kashiripaeni, ojarentsipaeni, oetarikapaeni. Ro pinashitakaapiintayitantaworini piitashitawitaka ari rowameethatakimirini.

<sup>11</sup> Osheki nokantashiryaka iroñaaka. ¿Natsipetashitakawoma nopomeentsitawentakimi niyotagaeyawitakimirini?

<sup>12</sup> Iroñaaka, noyemijantzinkarite, osheki nokowaperotakamikyia pikimiteeyenani: eero pipomeentsitawentaawo rojankinarini Moeseeshi. Tema nookaero naari, iroñaaka nokimiteeyeemini eerori, tee pipomeentsitawentawoni paerani, tee piyotawitawoni. Niyaatashitantakitzimi paerani, tee pitheenkaeyawakinani inta paakameethateeyawakinani.

<sup>13</sup> Eejatzi piyoteeyakini nokamanantapaakimirini tsika pikantyaaka paw-ijakotantyaari, omawitya noshipetawathawitya naaka.

<sup>14</sup> Pipinkimatawakinarikami noshipetawathawaetantarini. Rooma tee pipinkimatawakina, kameethapero paakameethaperotawakina kimitaka riro paakameethaperotawaki ronampiri Tajorentsi, eejatzi kimitaka riro paakameethaperofawaki Jesokirishito.

<sup>15</sup> Omaanta iroñaaka pitheenkimatakina. Pipeyakotakiro paerani pikimoshirewentawakina. Nokamtakoeyakimini paerani pikaminthaaper-oeeyakinani. Nokantemirikami: "Pipenawo pokí", ari pipakinawomi, aririka pimateromi. Niyotaki osheki pinintaperoeyakinani.

<sup>16</sup> Ari piyotaki kyaaryooperotaki iroka nokenkithatakagaeyakimirini. Inta eekiro nokenkithatakagaeyanakitzimironi iroka kyaaryooperotatsiri, ¿iroñaakama pikijantenawo?

<sup>17</sup> Kyaaryo: ikowaki riweshtiryakayemi riraga amatawitzimiri, omaanta eero ramitakoperotzimi. Ikowaki pitheenkaeyenani naari, paapatziyantyaariri rirori.

<sup>18</sup> Pamine, nokowaki naaka namitakoperotemi maawaeni kitejiri: aririka notsipatemi, eejatzi aririka notsiparyaaneemi, nokowaki niyotaakotemiri Jesoshi, eejatzi nokowaki namitakotemi.

<sup>19</sup> Nokimiteeyakimini eeroka neentsite. Okimitaganki tsinani aririka okoñaawanite otomi, osheki okemaatsiperotanakawo katsiri. Ari okimitzimowitakina naari, oshekiperò nokemaatsitawenteeyakimini

najankanekira, roojatzi tameentaperotantakyaariri apatziro Jesokirishito, maawaeni pajankaneki.

**20** Nokowaperotawitakaroña nojeekimotanakimimi, kameetha nokenkithatakaaaneemimi. Tee niyotakotzimi oetarika nokantemiri ojeekantanakyaari piyoperotantyaari.

### *Iroñaka nokenkithatakotero Akaara ejatzi Jaara*

**21** Aririka piiitawitaka pimonkaatakiro rojankinarini Moeseeshi pawijakotanteeyari, pikamantena: ¿piyotaperotziroma okantziri rojankinarini?

**22** Okantzi eenitatsi Awaraama itomi apite. Apaani ashi omperanawo iina ramanantziro. Riraga paashini ashi iinapero, tee ramanantziro irowa.

**23** Riraga otomi omperanawo ikimitaperoeyakarini paashinipaeni eentsipaeni. Omaanta inashita rirotaki otomi iinapero. Ikantzitakawoni Tajorentsi: "Aritaki itzimaki pitomi paata". Ari monkaataka ikantakirori, tzimaki iroñaka.

**24-25** Eniromo oshiyakaawentakiri iroka tsinani apite. Owaero omperanawo Akaraa. Oshiyakaawentakiri roori pomeentsiwentawori rojankinarini Moeseeshi. Rojankinatakiro irira ikantakiriri Tajorentsi janta tonkaaeri jeekatsiri janta Araawyaki, oetachari Shinayii. Otomi rowaga omperanawo, ikimitakawo rimiyo: rirotaki omperanari rirori, eeniro omperatariri. Ejatzi oshiyakaawentakiri omperanawo joriiyopaeni jeekayitatisirini iroñaka Jerojareek: ratsipetashitakawo ipomeentsiwenteeyakawoni rojankinarini Moeseeshi, maawaeni.

**26** Omaanta eeniro paashini tsinani, rowaga Jaara iinapero Awaraama. Okimitakawo aniro. Oshiyakaawentakiri roori jeekayitatsini iinja paashiniki Jerojaree, jeekatsiri iroñaka janta jenokinta. Aakateeyakini jeekatsini iinja janta, anampiteeyawoni. Tee aakapaeni omperanawo; tee apomeentsiwentawo rojankinarini Moeseeshi; eero apomeentsiperowentawo.

**27** Rootaki rojankinatakotakirini Iseeyashi: "Pijeekashitawitaka omaanta piweshiryaanakya. Tekira itzimi pitomi, omaanta pikimoshireperotanaki, roshekiperotanaki pijaripaeni, eero roshekiperotzi ojaripaeni omperatzimiri".

**28** Iroñaka, noyemijantzinkarite, aaka asheninkateeyakarini Jesokirishito riraga icharineni iinja Ijaaka, riraga itomi ikashiyakaakiriri Tajorentsi Awaraama. Rootaki acharineteyantakaririni ejatzi ikashiyakagaeyakaerini rirori.

**29** Paerani, otomi omperanawo ikijapiintakiri rirentzi: riraga Ijaaka otomi Jaara iinapero Awaraama. Riraga Ijaaka rirotaki ikashiyakaakiriri Tajorentsi. Iroñaka ejatzi okimitaka, riraga kowatsiri amonkaateeyeroni rojankinarini Moeseeshi ikijapiinteeeyakaeni aari: tema aakateeyakini ameentakariri Jesoshi riraga icharineeteni Awaraama.

**30** Eniromo iroka okantziri rojankinatiniri Moeseeshi: "Ikantziri Tajorentsi Awaraama: 'Potyaanteero rowaga pomperanawo ejatzi otomi. Riraga otomi, eero ikimitaperotari otomi piinapero. Riraga Ijaaka rashitaperoteeyawo maawaeni jeekimoteeyimirini'".

**31** Ñakiro, noyemijantzinkarite, iñaaperotakae Tajorentsi rootaki tee ajawoteeyawoni rowaga omperanawo. Roori oshiyakaawentakiro rojankinarini Moeseeshi; rootaki kaari apomeentsiwenantawo rojankinarini Moeseeshi. Omaantakya ojaripaeni rowaga Jaara rirotaki ikashiyakaagaeeyakiririni Tajorentsi Awaraama. Iroñaka akimiteeyakarini rirori paeni rootaki asheninkateeyantaririni icharineteyayarini Awaraama: riraga Jesokirishito.

## 5

*Piyoyagaantya: teerika inimotzimi pipeyeeya joriyo, ari paapatziyari Jesokirishito*

**1** Tema paerani rowawijaakotakae Jesokirishito, rootaki iroñaaka okameethatantari oyaataperooyerini. Tee ikoyi akimiteeyari pimantaari. Eero pikoyi romperateetemi pantayiteroni oetarikapaeni pawijakotanteeyari.

**2** Pikemijantaperotena. Naakatakikya naaka kamantzimirori iroka. Aririka pitotonatakaantya pishiramparitantari, ¿piitzima ari owawijaakotakimi? Eero, patsipetashitakawo pitotonatakaanta. Apatziro pameentaperotyaari Jesokirishito, pawijakotantyaari.

**3** Nokamanteemi eejatzti: aririka pitotonatakaantya pawijakotanteeyari, okameethatzi pimonkaateeyeronimi maawaeni rojankinarini Moeseeshi, pithotyeero maawaeni. Eerrika pimonkaateeyironi maawaeni, eero pawijakotzi.

**4** Aririka pikoyi pimonkaateeyeroni rojankinarini Moeseeshi inaaperotantemiri Tajorentsi, tee pikoyi ineshironkatemi. Pitheenkakiri Jesokirishito.

**5** Omaanta naaka naapatziyari irira noyaataperoeyakirinikya. Niyotaki eerokapaeni tee kijokiro powaeyirini rirori. Omaanta aririka ashinetero Ishire Tajorentsi iyotagaeyeeni aapatziyari Jesoshi, ayoteeyakini imonkaatero riraga Tajorentsi maawaeni ikantakaeri. Aritakikya ayoteeyakini rowameethataperoeyeeni.

**6** Aririka akempiyaaminthatakyari Jesokirishito, ayoperotaki eero rojampiee Iriri: “¿Pitononatama?” Eero ikenkithashiryakotee. Omaanta ikenkithashiryakotakae aririka ameentaperotakyaarikya Itomi aritaki antaperoeyakirini paashinipaeni atziri. Rootaki ikowakaakaeri Tajorentsi.

**7** Paerani kameetha paapatziyeyawitarini. Paapatziyaperoteeyawitakawoni kyaaryootayitatsirini. ¿Ninkama ookakaakimorori paapatziyawitakari?

**8** Tee rookakaemiro Tajorentsi. Rirotaki kowakaakimorori poyaatero kyaaryooperotatsiri.

**9** Aririka owetsikya paa ari owaetakya tapiyakaawori apatziro owaetakya eechonkiini, othotyaanakiro maawaeni otsichaagantakawo. Eejatzti okimita roori, paapatziyakowitakarira eechonkiini ikantziri amatawitantsiri, ari ikenkithashiryaanakyaami atziri eekiro piyaatanakityeemi pameñaaperotanakyaawomi. Roojatzi pimataperotanteeyaaami pipaashiniperoteero oetarika pikenkithashiryaaityaarini.

**10** Omaanta naaka nameentakari Tajorentsi, niyotaki ikenkithashiryakaaperoeyemini, eekiro piyaatataye pikimiteeyantenarini. Omaanta iinja rowashironkaeri Tajorentsi, riraga kowatsiri ikompitakaayitemironi, omawitya rirorika atziri jewatatsiri.

**11** Noyemijantzinkaritepaeni, eenitatsi theeyakotakinari ikantakotakina nokamantziri atziri imonkaatero rojankinarini Moeseeshi. Nokantemirkami: “Pitononatya pawijakotanteeyaaarini”, eero nokamantzimimi: “Ikamawentakae Rotyaantanewo Tajorentsi koroshiki rowawijaakoeyakaeni”. Roojatzi eeromi ikijanami joriyyopaeni. Ikijaneenantakinawo osheki nokenkithatakotakirira Jesoshi ikamawentakae koroshiki omaanta rametayitarini nochariniiteni eero apomeentsitawentawo.

**12** Eenitatsi riraga kantawitzimiru pitotonaty, osheki roñaashirenkakina. Nokenkithashiryaaawita naari rirotaki oeyoyeroni iyatharekitho, aririka iyoteemi tee okameethatzi ikantzimiru.

*Aririka pinintaperotawakagaeyaani, ari monkaataka*

<sup>13</sup> Iroñaka, noyemijantzinkarite, nokamantemi. Ikowayitakimini Tajorentsi rowawijaakoeyemini, tee ikowaperotakayimi pipomeentsi-wentyaawo rojankinarinii Moeseeshi. Rowawijaakoeyakimini, omaanta tee ishinetzimi pantero oetarika kaari kameethatayitatsini pikoyiri eero. Ikowaki pinintaperotawakagaeyaani maawaeni, eejatzi pikaminthaawakagaeyaani.

<sup>14</sup> Eniro iroka rojankinatzirini Moeseeshi: "Kimitaka eeroka pikamintha-gaatyaa apaniroeni, eejatzi pikimiteeyerini paashinipaeni, pikaminthaap eroeyerini, pinintapereroeyerini". Aririka amateeyakironi iroka; kameetha. Monkaataka.

<sup>15</sup> Noshiyakaawentemiro iroka: aririka pikijawakagaeyaani, pikantzimatikirika paashini atziri pitheeyakotyaaririka kimitaka patsikawakagaeyatyaaani, eejatzi pitzimpithaawakagaeyaani. Kyaaryoowa, pithonkawakagaeyanikarira: pookakaawakagaeyaawoni paapatziyarira Jesoshi.

*Akowaeyawitarini aari, eejatzi okowakagaeyakaerini Ishire Tajorentsi*

<sup>16</sup> Nokamantaperotemi: pikantero Ishire Tajorentsi iyoteeyemini oetarikapaeni panteri eejatzi pimonkaaperoteri maawaeni. Eerokya pantero kaari kameethatatsi pikowaeyawitarini eerori.

<sup>17</sup> Eenitatsi kaari kameethatatsi pikowaeyirini panteeyerini eerori, eejatzi eenitatsi okowakaawitakimi Ishire Tajorentsi antakayemi. Tee omonkaatawakagaeyani. Inashitayitakan, rootaki kaari pimateeyanta-woni pantero kameethatayitatsirini okowakaawitakimi Ishire.

<sup>18</sup> Aririka aapatziyawo Ishire Tajorentsi oetarika antakagaeri, eero ak-enkithashiriyo amonkaatero rojankinarinii Moeseeshi.

<sup>19</sup> Ayoteeyakironi kaari kameethatatsi rantapiinteeeyirini kaari aapatziaperotawori Ishire Tajorentsi, shirampari iñaaminthatziro kaari rayi, oñaaminthatziri tsinani kaari ayi, rantaminthatawakagaeyani: ranteeeyakironiwee, tee ipashiwentakaaneetawo.

<sup>20</sup> Eejatzi iitajorentsitsashitayitakawoni oetarikapaeni, imatsitantzi, roon-awakaeyakan, ikijathatawakagaeyakan, raamaakotawakaeyani, intsi-paete ikijeeyani, ininatawakaeyani, riyoshiiteeyani tee ikoyi itsipateeyarini paashinipaeni, apatziro itsipateeyarini oshiyariri.

<sup>21</sup> Eejatzi iñaawenatzitayitakarini rowaagawo paashinipaeni atziri, ishinkiteeyani, osheki rowaperoteeyani, eejatzi maawaeni paashinipaeni kimitay-itavorini. Paerani nokamanantzimiri: "Kyaaryoowa. Aririka pantapiintero maawaeni irokapaeni, eero pimatziro piyaatee janta reewaperowenantzinta Tajorentsi". Iroñaka napiiteemiro: "Kyaaryoowa. Piyaateekari paa-mariki kaari tsiwakanitatsini".

<sup>22</sup> Omaanta aapatziyaantakawori Ishire Tajorentsi rootaki anteeyantakaworini inashitacharipaeni: tema iyoteeyakaeni anintashireperotawaka-gaeyakan; akimoshireeyakini; eero akenkithashiryaaapiintaneero oetarikapaeni tema aritaki itsipaperotakae Tajorentsi; eero ajamashiryaashitari; kaari akijathatawakaantya; akaminthaawakaeyakan; akameethataki, eero amatawitantz.

<sup>23</sup> kaari akantakaaperotantya, aamaakowentyaawo awatha aaka apaniroeni eero antayitzironi kaari kameethatatsi akowawitari anterimi. Tema inimotakiri rojankinarinii Moeseeshi maawaeni iroka.

<sup>24</sup> Riraga kentakoeyacharini koroshiki ikamaeyakini, tekatsi rannee eejatzi. Aapatziyantakariri Jesokirishito, kimitaka ari akaatakiri akentakotaka, kamakae; tekatsi akanteeya akowaeyeeni anteero kaari kameethatatsi.

*Eenitatsi iroka paashini riyotaayitziririni Paaworo*

<sup>25</sup> Omaanta okimitzimotakae owañaagae ejatzi Ishire Tajorentsi, iyotaka-gaeyakaeni. Thame anteeyeroni oetarikapaeni iyotagaeyeerini.

<sup>26</sup> Eero akantakaaperota, eero akijaneentziri paashinipaeni, eero akowashiriitziri rashitayitarini rashি riori.

## 6

<sup>1</sup> Noyemijantzinkaritepaeni, aririka piñeeri piyemijantzinkarite rantziro kaari kameethatatsi, pikantero Ishire Tajorentsi iyoteemi pikaminthaantyaariri. Kyaaryoowa, pikijirikari, eentsikiroeni pikanteri pikijakaarikari. Kyaaryoowa pantzirokari eerori kaari kameethatatsi.

<sup>2</sup> Pikaminthaawakagaeyani ejatzi pamitakotawakagaeyani. Aririka pantero iroka, aritaki pimonkaatakiro okaatzi riyotaakiri Jesokirishito.

<sup>3</sup> Eenitatsirika asheninka kantakaaperotachari, ramatawitatishitaka apaniroeni. Tee ikameethatzi riori.

<sup>4</sup> Pikenkithashiryaakotya: piyotantyaari okameethatzirika pantayitzirini. Aririka okameethatzipantayitzirini, pikimoshiryaanaki. Eero pikantakaaperota, eero pitheenkiri paashinipaeni,

<sup>5</sup> tema eenitatis anteeyirini maawaeni.

<sup>6</sup> Okameethatzipagaanteeyerini okaatzi tzimimoteeri riraga yotagaey-erorini iñaani Tajorentsi eero okoetyeemotantariri riori. Tee ákoyi ikoetyaayiteroni oetarikapaeni.

<sup>7</sup> Kyaaryoowa, eero pamatawiteeyaani eeroka, tee ikowakagae Tajorentsi atheenkaejerini. Noshiyakaawentemiro: oetarikapaeni apankitayitzirini, aayiteeroni okithokipaeni roori. Rooma atheenkakiririka Tajorentsi, eero raanee jenokinta.

<sup>8</sup> Oshiyakawo iroka aririka antapiintero kaari kameethatatsi akowaeyawitarini, ari aate paamariki kaari tsiwananitatsini. Aririka antapiintero okowakaakaeri Ishire Tajorentsi, ari akanteetatyeyaaani ajeke jenokinta.

<sup>9</sup> Eero apakayiro antapiintero oetarika okowakaakaeri Ishire Tajorentsi, rooma ari'pineeyakaeni iinja Tajorentsi.

<sup>10</sup> Ari thame akamintahaageyerini paashinipaeni atziri, eekiro aatatye akamintahaaperoyerini ayemijantzinkaritepaeni.

*Ari riweyyaakiro rojankinarini*

<sup>11</sup> Piñaakiro, antawo nojankinatakro naaka iroka.

<sup>12</sup> Riraga kowawitachari itotonatero ishiramparitantari, ikowaki riraga ijoriyyotzinkarite iñaaperoeyerini. Tee ikowaperotzi ikijeeyerini. Ikan-temimi: "Ikamawentakimi Jesokirishito koroshiki rowawijaakoeyeemini", ari ikijeeyerinimi ijoriyyotzinkarite.

<sup>13</sup> Maawaeni riraga totonatachari tee imonkaatzironi rojankinarini Moe-seeshi, omaanta ikowawitacha pitotonatyaa erori ikantakaaperotantyaariri. Ikantakaaperowentemimi, ikanterimi ijoriyyotzinkarite: "Naakiro, notot-natakaakari. Ikemjanteeyakinani".

<sup>14</sup> Omaanta tee okameethatzi nokantakaaperotya naaka, omaanta nokowaki niweshiryaawentyaari riraga Awinkatharite Jesokirishito, riraga kentakowentakaerori kaari kameethatatsi antziri.

<sup>15</sup> Eero rawijakotashita maawaeni totonatachari, ejatzi eero rawijakotashita kaari totonatacha. Omaanta aririka ipaashinitakaagae Tajorentsi aapatziyanteeyaririni Jesokirishito, ari owawijaakoteeya.

<sup>16</sup> Aririka pikemijantaperotakiro iroka, ari isheninkatakimi Tajorentsi, ejatzi nokowaki kameetha ijeekakayemi, ejatzi nokowaki

ineshironkatemi eerokapaeni eejatzi nojoriyyotzinkaritepaeni, riraga aapatziyariri Jesoshi.

<sup>17</sup> Iroñaaka roojatzi paata tee nokoyi nokemakoteemi eejatzi pookaero kyaaryooperotatsiri. Naaka antawaetziniriri Jesoshi, rootaki ikijantakinari theenkantatsiri, rootaki nopirotantayitakarini nowathakipaeni.

<sup>18</sup> Iroñaaka, noyemijantzinkarite, nokowaki ineshironkaeyeemi eejatzi Awinkatharite Jesokirishito. Tema aritaki ikantapiinteeeyemini.

Ari okaatzi.

Naaka jankinatzimiorori iroka:

Paaworo

## RIRAGA PAAWORO ROJANKINATEEYINIRINI EJESOJATZI

<sup>1</sup> Nokoyi niwethatemi eerokapaeni, ejeesojatzi, tsikarika pikanta pijkeeki. Naaka Paaworo jankinatzimiroi iroka. Rotyaantakina Jesokirishito no-kenkithatakoteri, tema rootaki ikowakaakinari Tajorentsi. Iroñaaka nojankinateeyakimironi maawaeni aapatziyariri Jesoshi jaga Ejeesoki: eerokapaeni reentsiteteeyakarini Pawa Tajorentsi.

<sup>2</sup> Nokowaperotaki iroñaaka ineshironkateeyemini Pawa Tajorentsi, eejatzi kameetha ijeekakagaeyemini. Eejatzi ikimitakari riraga Awinkatharite Jesokirishito.

### *Ikowakaakae Tajorentsi ayoteeyerini*

<sup>3</sup> Thame akanteeyerini atziri tema ikameethaperotaki Tajorentsi riraga Ashitariri Awinkatharite Jesokirishito. Aapatziyakari irira, iroñaaka ikan-takae Tajorentsi: "Ari pijkeekimotena paata janta jenoki". Tema eejatzi iroñaaka osheki ineshironkatake, itajonkawentakae aweshiryaa wentaper-oyakarini, kimitaka ajeekimotakiri jenokinta.

<sup>4</sup> Paerani tekirani riwetsikironi kipatsi, riyyogaeyakaeni, riyotzitakanri rirori aritaki rowawijaakotakae Jesokirishito. Ikenkithashiryaaka: "Nowameethaaperoeyerini maawaeni aapatziyarini Notyomi". Iroñaaka inaaperoeyakaeni akameethateeyeeeni ikimitakaanteeyakaeni tee antziro kaari kameethatatsi.

<sup>5</sup> Inintaperotashiteeyakaeni rootaki rotyaanantakariri Jesokirishito ika-mawenantakaeri. Rooma aritaki ikantxitakani paeraniperorofa: "Notomintayiteeyarinri riraga aapatziyeyakaririni Jesoshi". Rootaki ikowaka-gaeyakaeri maawaeni.

<sup>6</sup> Iroñaaka asheninkateeyakarini Itomi inintashireperotziri, rootaki ineshironkateeyantakaerini. Ikaminthaaperoeyakaeni osheki. Roojatzi akutani akanteeyerini atziri: "Ikameethaperotaki Tajorentsi". Eejatzi thame akanteeyerini Tajorentsi: "Eeroka pikameethaperotaki".

<sup>7-8</sup> Ineshironkaperoeyakaeni maawaeni, inintashireperoeyakaeni os-heki. Rotyaantakiri Itomi ikamawenteeyakaeni rapaatawenteeyakaeni ri-raa. Ikaminthaaperoeyakaeni iroñaaka tee ikenkithashiryaakoteero eejatzi kaari kameethatatsi anteeyawitakarini. Tema aritaki rowawijaakotakae. Riyotakagaeyakaeni, otzimantakari ayoteeyantarini.

<sup>9</sup> Eejatzi riytakaakaero iitarika rotyaanantakariri Jesokirishito: tee ay-otawitawoni paerani. Aritaki, paerani riyyoyatikarini rotyaanteri rowaw-ijaakotanteeri.

<sup>10</sup> Enitatisi iroka ikowakagaeyakaerini maawaeni: iinja reewawenan-taperotanaki Jesokirishito. Aririka omonkaatakyia iroka kitejiri, ari ipiy-teeyakaeni maawaeni: jenokijatzi eejatzi maawaeni kipatsijatzi. Roojatzi reewawenanteeyakaeni, maawaeni.

<sup>11</sup> Maawaeniroña okaatzika awijayiteentsirini iroñaaka, aritaki ikenkithashiryaakarini Pawa Tajorentsi paerani, tekirani riwetsikironi kipatsi. Imonkaatakiro iroñaaka ikantxitakarini paerani. Tema ikashiyakayitakaerini rotyaanteeniri Itomi Jesokirishito jaawikika ijeekashiretanteeyapaakaerini. Ari okantzimaetaka iroñaaka imonkaatakiro.

<sup>12</sup> Naakapaeni joriyo jewateeyatsirini naapatziyaperoeyakarini Jesokirishito. Rootaki nokowantakari noñaaperooyerini Tajorentsi, eejatzi nokanteeyerini atziri: "Ikameethaperotaki Tajorentsi".

<sup>13</sup> Eejatzi eeroripaeni pikemakoeyakirini Jesokirishito pikemaki ipokashitakaeni rowawijaakoeyakaeni. Kyaaryooperotaki paapatziyakari. Paerani ikanteeyakaeni Tajorentsi: "Aririka paapatziyakyaari Notyomi, okithatakaanakimi noshire". Kyaaryo iroñaaka kijokiro owakimi rootaki piyotantakari pisheninkatakari Jesokirishito.

<sup>14</sup> Aririka kijokiro owanakae, ayotanaki kyaaryoopero ithotaagaero Tajorentsi maawaeni ikantzitakaeri. Eero ramatawitee. Tema kyaaryooperotaki ragaeyaneeni jenokinta atsipateeyantapaeyaalaririni rirori. Tema ikameethaperotaki. Thame akanteeyerini maawaeni atziri: "Ikameethaperotaki Tajorentsi".

### *Ipaasonkitziri Paaworo Tajorentsi*

<sup>15</sup> Nokemakoeyakimini eeroka, paapatziyaperoeyakarini Awinkatharite Jesoshi, eejatzi pinintashireperoeyakirini piyemijantzinkaritepaeni.

<sup>16</sup> Nokantatyaaani nopaasonkitakowenteeyimini eerokapaeni, eejatzi namiri Tajorentsi eekiro ryaatatzi ramitakoeyemini.

<sup>17</sup> Namanapiintziri riraga Ashitariri Awinkatharite Jesokirishito. Tema ikameethaperotaki. Nokantziri: "Piyotakaaperooyerini ejeesojatzi, piyotakagaeyerini tsikarika pikanta eerori.

<sup>18</sup> Nokowaki eejatzi riyotakaaperoeyemini, piyotantyaari tsika ikanteeyani paata: tema okameethaperotakiroña janta jenokinta". Tema rashiteeyakaeni, rootaki nokowantakari piyoteeyeni okameethaperotaki maawaeni ikashiyakagaeyerakaerini.

<sup>19</sup> Oshekiperio itajorentsiperotaki, tee opeyaneenta itajorenka. Itajonkawenteeyakaeni aakapaeni maawaeni aapatziyariri. Paerani iyotakagaeyerakaenitajorentsiperotaki,

<sup>20</sup> tema ipiriinteeri Jesokirishito. Raaneeri janta jenokinta, eejatzi ijekakagaeri janta rakoperoki ikaatapaeri reewawenantapae.

<sup>21</sup> Ikantakiri: "Notyomi, nokowaki peewawentaperooyerini maawaeni jepaperoeyawitacharini: jewawenantatsiri, aataperoteenchari, eewatakan-tayiwitacharini, maawaeni jewatatsiri kamaripaeni, jewataperotsirini nonampiripaeni, maawaeni. Peewawentaperooyerini maawaeni jeekaeyatsirini iroñaaka, eejatzi peewawentaperooyerini maawaeni impaetayi-tatsini ikoñaatee paata". Ari ranaakoeeyakirini maawaeni, reewaper-ownantziroña.

<sup>22</sup> Eejatzi ikantakiri: "Notyomi, eeroka antakaantayiterorini tsikarika okantayityaarini oetarikapaeni, eejatzi peewaperowenteeyerini maawaeni aapatziyeeyemirini.

<sup>23</sup> Ifñaaperoeyemini rirori. Tema pikimitakina naari, pitajorentsitaperotaki kameetha, pikantatyaaani pitajonkawenteeyakirini maawaeni aapatziyeeyakimirini".

## 2

### *Itajonkawenteeyakirini Tajorentsi aapatziyeeyakaririni Jesoshi*

<sup>1</sup> Paerani, eerori, tee piyotawitarini Tajorentsi, pantapiintawitawoni kaari kameethatatsi, rootaki iroñaaka piyatantyaarimi paamariki kaari tsiwakanitatsini: omaanta rowawijaakoeyakimini Tajorentsi rootaki piyatanteevari jenokinta pañaaoperotapae janta eero pikamanitee.

<sup>2</sup> Kyaaryo pikimiteeyawitarini paerani paashinipaeni theenkantatsiri, paapatziyawitarini Jatanaashi, riraga iwinkatharite maawaenipaeni kamaari. Rirotaki jewawenteeyiriri maawaeni piyathatayitaririni Tajorentsi, rantakaanteeyantaririn kaari kameethatatsi.

<sup>3</sup> Tema paerani akimitawitarini riraga theenkantatsiri antapiintawitawoni kaari kameethatatsi akowawitawoni. Ari akantatyaaani antapiintawitawoni oetarikapaeni akowawitarini, oetarikapaeni akenkithashireeyawitarini. Rootaki ikijawenantawitakaerori Tajorentsi okaatzi antakiri, eejatzi kimitaka iroñaaka ikijantari riraga kaari aapatziyariri Jesoshi okaatzi rantziri.

<sup>4-5</sup> Paerani antapiintawitawoni kaari kameethatatsi ashi owaeyironi: tee ayotitarini Tajorentsi, eejatzi aateeyenimi paamariki kaari tsiwakanatatsini. Omaanta ashi royiroyriri ineshironkaperoeyakaeni osheki intashireperoeyakaeni. Paerani rowañaagaeri itomi ikantatyaaani iroñaaka rañi. Iroñaaka eejatzi rowawijaakoeyakaeni aari, akanteetatyeyayaani ajeekimoteeyerini jenokinta. Tema ineshironkaperotakae, rootaki rowawijaakoeyanteerini.

<sup>6</sup> Ikamawitaka Jesokirishito, rowañaagaeri Tajorentsi eejatzi aari akimitawitakari, ipaashinitakaakae Tajorentsi, eejatzi ayotaki akaateeyerini paata janta jenokinta.

<sup>7</sup> Ikanteetatyeyayaani riytakagaeyeni, oshekiperi ineshironkataperoeyakaeni, ikaminthaaoperotakae: ashi royiroyriri. Rootaki ikaminttheeyantakaerini ashenkatakari Jesokirishito.

<sup>8</sup> Aapatziyaperotakae rootaki rowawijaakontaktaeri Tajorentsi. Tema osheki ineshironkataperoeyakaeni. Tekatsi akanteeya owawijaakotashiteeyakaerini.

<sup>9</sup> Aakarikami owawijaakotashitachanimi, tema ari akantakaaperotakyaami.

<sup>10</sup> Omaanta iroñaaka rowashiñaashiretakae Tajorentsi rooma aapatziyakari Jesokirishito. Ikowakaakae antayitenirini okaatzi kameethayitsirsini. Paerani tekirani atzimini aari, eenitatsi ikowakagaeyakaerini antayiterini ikowakaakae akantatyeyayaani anteeyironi eero apakayiro.

### *Amonkaatawakagaeya*

<sup>11</sup> Tee eeroekapaenii joriyyo. Ipinkaeyakimini rirori, ikantzi: "Tee riyooteeyirini paashinijatzitatsiri atziri Tajorentsi, tee itotonatziro rirori ishiramparitantarri". Liteeyawitakanri rirotaki totonatachani, tema riyotziri riraga Tajorentsi.

<sup>12</sup> Pikenkithashireeyeroni tsika pikanteeyarini paerani: tee paapatziyeyawitarini Jesokirishito, tee pisheninkateeyarini joriyyopaeni, tee piyoteeyawitawoni ikantayitzirini Tajorentsi, eejatzi tee piyotawitarini ikashiyakagaeyakaerini. Tee piyotawitarini rirori eejatzi tee piyotawitanii ikowakini ineshironkateeyemini.

<sup>13</sup> Kyaaryooperotaki, paerani tee piyoteeyawitarini Tajorentsi, okimitzimotawitakimi pijeevakai inteenapero. Omaanta ikamawenteeyakimini Jesokirishito, apaatawenteeyakimini rira. Iroñaaka paapatziyeyakarini, pisheninkateeyakarini. Rootaki piyotantaariri Tajorentsi, kijokiro powanteeyakarini.

<sup>14</sup> Paerani naaka eejatzi maawaeni nojoriyyotzinkarite nokijawitakimini: naari eejatzi rirori maawaeni pisheninkapaeni eejatzi pikijeyawitanani naari. Omaanta rowawijaakoeyakaeni Jesokirishito ipeyakotereo akijawakaeyawitakanri, kameetha iroñaaka ijeekakagaeyakaeni. Kijokiro owawakaeyakanri: akimitawakagaeyakanri maawaeni, tee apaashinitzi.

**15** Ikamawentakae, eero apomeentsiwenantawo rojankinarini Moeseeshi, tekatsi okaminagaeyeni. Paerani inashitakaawitakaenii tee asheninkatawakaawitani omaanta iroñaaka asheninkateeyakarini Jesokirishito. Ejatzi asheninkatawakaeyakanii maaawaeni, kaari akijawakaanta,

**16** aakameethatawakaeyanani maaawaeni. Rootaki aakameethatawakaanteeyanarini, asheninkataari riraga kentakotawentakaeri koroshiki. Iroñaaka añaaperoeyirini Tajorentsii maaawaeni: nosheninkapaeni ejatzi pisheninkapaeni eerori.

**17** Naakapaeni joriyo: niyoteeyawitakanii tsika ikantari Tajorentsii, niyotawitawo iñaani, omaanta tee naapatziyeeyarini. Omaanta eerokapaeni tee piyoteeyawitariniroña, kimitaka pijekakini eero ka intenea. Omaanta ipokantakari Jesokirishito, ikamanteeeyakaeni maaawaeni tsika akanteeyari asheninkatawakaanteeyarini, akimitawakaanteeyaarini: tema ajeeki kameetha.

**18** Osheki imatakaeniri rirori, rootaki amateeyantakaworini akenkithatakagaeyakirini Tajorentsii. Ejatzi Ishire iyoteeyakaeni akenkithatakantaeyaririni.

**19** Paerani tee piyotawitarini rirori, tee pisheninkatawitarini. Omaanta iroñaaka, osheki pipaashinishiretanaki; ari pikimitakoteeyakarini paashinipaeni aapatziyakirini Jesokirishito, piyoteeyakirini Tajorentsii, pisheninkateeyakarini.

**20-22** Iroñaaka noshiyakaawentemiro. Aririka akoye awetsike pankotsi, tema ityaawo amine tsikarika okameethapathatzii kipatsi, roojatzi aminantakya otzinkamipanke kameetharipaeni, kijoperotatsiri ejatzi osheki inashitayitakaani inchapankipaeni aayiterini owashiterori achempokyaatantyaawori apango. Aririka athonkakiro pankotsi roojatzi ajeekantakya. Ejatzi akimiwitakawo aari, aririka aapatziyakyaari Jesokirishito. Ritakae riraga Rotyaantanewo Tajorentsii riyotaakaero iñaani Tajorentsii, ejatzi riraga kamanantayitzirorini iñaani Tajorentsii riyotaageyakaeni tsika ikantari Jesokirishito: ikameethaperotaki, imatakiro rowawijaakoeyakaeni. Tema rirotaki iroñaaka Awinkatharite. Roojatzi roshekitantanaka maaawaeni aapatziyariri, ejatzi otajonkawenteeyakaeni Ishire Tajorentsii akimitawakaanteeyantaarini: tema asheninkateeyakarini Jesokirishito, maaawaeni. Iroñaaka rashitakae Tajorentsii, kijokiro rowaeyakaeni.

### 3

#### *Rantayitzirini Paaworo*

**1** Tee eerokapaeni joriyo, omaanta nonintashireperoeyakimini. Nokaminthagaeyakimini, nokantakimi: "Aririka paapatziyeeyarini Jesokirishito, ari rowawijaakoeyakimini", rootaki romonkyaanteetakinari omonkyaaagamentotsiki.

**2** Tema ineshironkatakina Tajorentsii, rootaki nomatantawori nokenkithatakagaeyakimini.

**3** Riyotaakina kaari riyoteeyini paashinipaeni, kameetha riyotaaperotakina. Aritaki nojankinateeyakimironi, nokamanantakimirori ikantakinari.

**4** Aririka piñaanatakiro iroka nojankinatakimirri piyoperoeyawakironi iroka niyotaakotakiri Jesokirishito, kaari riyotawitani paerani.

**5** Tee riyotawitawoni riraga itakaantaworini, omaanta Ishire Tajorentsii iyotakaakina naakapaeni rotyaantanewo Jesokirishito riraga kameethashiretzinkari ejatzi riraga kamanantayitzirorini iñaani Tajorentsii.

6 Tee eerokapaeni joriyyo, omaanta iyotakaakina aririka paapatziyeyarini Jesokirishito, ari piwajakoeyeeni. Pimonkaateeyakarini nosheninkapaeni naari: aritaki ikashiyakayitakaerini Tajorentsi rotyaanteri owawijaakoteeni aakapaeni maawaeni. Rootaki iroñaka ashenkatawakaanteeyantaarini. Rooma aritaki paapatziyeyaaarini Jesokirishito eerokapaeni rootaki amonkaatwakaantakariño.

7 Rootaki iroka nokenkithatakotapiintakiri. Ineshironkatakina Tajorentsi, eejatzi itajonkawentakina nomatantakawori nokenkithatzi.

8-9 Ñaakiro, naapatziyawitari Jesoshi; omaanta tee nokimitari paashinipaeni aapatziyariri: tektsi nomine naari. Omaanta ineshironkatashitakina Tajorentsi, riraga wetsikaeyiririni maawaeni jeekatsiripaeni, rotyaanterina nokamanteeyakirini paashinijatzitsiriatzis tsika ikantari Jesokirishito ikaminthaaproeyakaeni. Tee ayotakotawitari paerani, omaanta iroñaka iyotagaeyakaeni Ishire. Eejatzi rotyaanterina nokanteeyakimini ikowaki rowawijaakoeyemini eureka, eejatzi maawaeni paashinipaeni atziri. Aritaki paeraniperoroña ikowakini rowawijaakoeyemini, omaanta tee riyotziteetani paerani rowawijaakoeyemini, owakira riyotagaeyakaeni.

10 Iroñaka ikowaki riyotakagaeyerini maawaeni riraga jenokiweri: riraga kantakaantayitatsirini eejatzi riraga jewawenantayitatsirini kamaaripaeni. Riyoteeyananakini Jenokijerri osheki itajonkawenteeeyakirini Tajorentsi aapatziyariripaeni Jesokirishito, roojatzi riyoteeyananakirini eeniro riyotantariño riori, ashi royo riyoperotziroña.

11 Aritaki ikoyitakanri paerani riyoteeyeni maawaeni Jenokijatzi roojatzi iroñaka. Eeniro imatayitakaerini Awinkatharite Jesokirishito, riyatantakari riraga Jenokijatzi oshekiniperoroña riyotzi Tajorentsi. Rootaki ikowakaakiriri.

12 Aapatziyakari Jesokirishito, rootaki ayotantakari okameethataki akenkithatakayeri Tajorentsi, ari ikemakae. Eero athaawantari.

13 Piyoteeyakini niyotagaeyakimini, rootaki osheki rowashironkaanteetakinari, omaanta eero powashiretakoeyashitanani, inta pikimoshireeyananakini.

### *Paaworo ramanakoventeri Tajorentsi ejeesojatzi*

14 Osheki riyotzi Tajorentsi, osheki imatakaeniri, rootaki notziwerowantranaka noñaaperotantanakariri, eejatzi nokenkithatakapiinantanakariri.

15 Rirotaki ashitakaeri aakapaeni, maawaeni aapatziyayitaririni Jesoshi. Ajeekaeyini aaka aka kipatsikika, eenitatsi ijeki paashini Jenokinta, omaanta ashenkataeeyakarini.

16 Ilameethaperotaki Pawa, itajorentsitaperotaki kameetha, rootaki nokanantakariri ikantero Ishire otajonkawentemi, oshintsitakaantemiri eejatzi iyotaaperotemi kameetha pajankaneki.

17 Nokantakiri raapatziyakaantaperoyemirini pikenkithashiryaaapi-inantyaariri Jesokirishito riraga kijokiro owakimiri. Eejatzi nokowaki pikenkithashireero tsika ikanta Tajorentsi inintaperoeyakimini, paapatziyaperotanteeyaririni.

18 Aririka paapatziyaperotakaari, pikimityaari paashinipaeni aapatziyariri, piyoperotaty osheki inintaperoeyakaeni Jesokirishito, tee eechonkiini inintee. Ashi royo inintaperoeyakaeni ikantatyaaani.

19 Nokowaki piyoteeyini inintashireperoyeyakaeni, omaanta tee ayoteeyini iitarika inintashireeyantakaerini. Aririka piyoteeyakini inintashireperoyeyakimini, nokowaki eejatzi pikenkithashiryaaaperoteeyananakirini Tajorentsi eejatzi nokowaki imatakaaperoteeyemini maawaeni ikowakagaeyakimirini.

### *Thame añaaperoeyerini Tajorentsi*

<sup>20</sup> Ari itajonkawentaperoeyakaeni Tajorentsi, osheki retakoeyakaeni, rowanakaeniro maawaeni koetyeemoyitakaerini. Tekatsi akantya athoty-eero akenkithashireeyironi maawaeni imatakayaayitakaerini.

<sup>21</sup> Thame maawaeni aapatziyeeyaririni Jesokirishito añaaperoeyerini Tajorentsi; akantapiinteeeyerini atziripaeni ikameethaperotzi, akanteetatyeeyaani. Aritaki okantyaari.

## 4

### *Thame akimitawakagaeyani*

<sup>1</sup> Naapatziyakari Awinkatharite, rootaki romonkyaanteetakinari jaka omonkyaaagamentotsikika. Iroñaaka nokanteeyemini kameetha pijeekaeyeni; riyyogaeyakimini riori iroñaaka panteniri maawaeni ikowakagaeyakimirini.

<sup>2</sup> Eero pikantakaaperoteeyani, pikaminthaanteeyeni, eero pijamashiryaashitari pisheninkapaeni, inta eekiro peshiwentatyere, pamawetawakagaeyaani, pinintashireperotawakagaeyaani, eero pikijiri.

<sup>3</sup> Pikanteeyeroni Ishire Tajorentsi iyotagaeyemini pikimitawakaanteyarini kameetha paakameethatawakaanteyarini.

<sup>4</sup> Maawaeni aapatziyariri Jesokirishito ashenkateeyakarini, eejatzi eenitatsi Ishire Tajorentsi apaani, rowaga kijokiro owaeyakaerini. Amonkaatawakagaeyakan: riyyogaeyakaeni Tajorentsi, ayotaki imatakeniro ikantakaeri, rootaki aweshiryaawenantaperotakariri.

<sup>5</sup> Apaani ikanta Awinkatharite añaaperoeyakirini, amonkaatawakagaeyakan: aapatziyeevakarini aakapaeni, eejatzi amonkaatawakagaeyakan akaawoshitawenteeyakarini Tajorentsi.

<sup>6</sup> Apaani ikanta Pawa Tajorentsi: riraga ashitaperoteeri maawaeni. Ipinkathariwenteeyakaeni aaka, itajonkawentaperoeyakaeni eejatzi ojeekashiretantakae ajankaneki Ishire.

### *Inashitaytakani imatakayaayitakaerini Jesokirishito*

<sup>7</sup> Ineshironkateeyakaeni Jesokirishito, eejatzi imatakagaeyakaerini maawaeni amitakoeyantyaaririni aapatziyariripaeni.

<sup>8</sup> Kyaaryo Iwaperite Tajorentsi okenkithatakotzitarini, okantzitakan: "Roenokaeyaarika Jesokirishito iinja jenokinta, ranaakoeyerini maawaeni kamaari kijeeyawitakaririni; omaanta atziripaeni imatakagaeyerini oetarakapaeni".

<sup>9</sup> ¿litaka okanantari: "Ari roenokaeya Jesokirishito"? Aritaki ipoñaaka paerani jenokinta roojatzi ipokantaka jaka kipatsiki eejatzi ipiyane.

<sup>10</sup> Riraga ayiitapaentatsiri jaka kipatsiki jatee eejatzi janta jenokinta. Janta ipinkathariwenteeyapaeni eejatzi itajonkawenteeyakaeni maawaeniroña.

<sup>11</sup> Jee, kyaaryooperotaki imatakaperoyakirini aapatziyeevakaririni ranteeyakironi oetarakapaeni ikowakagaeyakimirini: apaanipaeni rirotaki rotyaanewo Jesoshi, paashinipaeni rirotaki kamanantaytzirorini iñaani Tajorentsi, paashinipaeni rirotaki kenkithatakantzirori Iwaperite Tajorentsi, paashinipaeni rirotaki jewawentziriri aapatziyariri Jesokirishito, paashinipaeni rirotaki iyotaantatsiripaeni, maawaeni.

<sup>12</sup> Ari imatakagaeyakaeni aari eejatzi riori maawaeni aapatziyeeyaririni rootaki amateeyantakaworini antziniri. Eejatzi imatakagaeyakaeni aapatziyakaaperoyakirini maawaeni aapatziyeeyawitaririni Jesokirishito.

<sup>13</sup> Ari ikantatyeyaaani imatakagaeyeeroni roojatzi amonkaatawakaantyaari aapatziyaperotaari, eejatzi ayotaperotanteeyaririni rirori.

<sup>14</sup> Paerani akimiwitarini eentsi, intsipaete aapatziyashiiyawitakarini amatawiteeyawitakaerini, tee ayoperotawitani. Omaanta tee ikowakagaero Tajorentsi akimityaari eentsi, ikowakaaperotakae otzimaperote ayotantari.

<sup>15</sup> Ikowaperotaki iroñaaka akaminthaaaperooyerini paashinipaeni kameetha. Akamanteeyerini iñaani: tema kyaaryooperotaki. Ikowakaaperotakae maawaeni aaka eekiro aatatye akimitaperoeyanakyaarini Jesokirishito: riraga Awinkatharite.

<sup>16</sup> Aapatziyeyakarini, rootaki ashenkatawakaanteeyaarini. Eejatzi riyotagaeyakaeni amitakotawakaanteeyakarini, eejatzi riyotagaeyakaeni amateeyantakanaririni maawaeni ikowakagaeyakaerini. Eejatzi riyotagaeyakaeni anintaperotawakaanteeyakarini.

### *Eero pikimitagaa pikimitaaga paerani*

<sup>17</sup> Iroñaaka nokamanteemiro ikantakiri Awinkatharite, nokantaperotemiro ikowakaaperotakimiri. Tee ikowakagaeyimini pikimityaari kaari aapatziyariri Jesoshi: ratsipetashiteeyakawoni rirori rantayitakironi oetarikapaen, tee ikenkithashireeya.

<sup>18</sup> Tee riyoperotziri Tajorentsi. Tee inintashireperoeyini ikenkithashireeri, tee ikowaeyini riyoteri, rootaki kaari imatantawori irira rowañaaperooyerini ijekimotanteeyaririni janta jenokinta.

<sup>19</sup> Rantapiintashitakawo kaari kameethatatsi, tee ipashiwenteeyani ishirontawo tsinanipaeni, shirampari rantatenkatziri ikaateeyini ishiramparinkaeyini, tsinanipaeni antatenkatawakagaeyani, rotsinampaawakaeyani, maawaeni.

<sup>20</sup> Riraga Jesokirishito, tee riro yotayemironi pikimityaari riraga kaari aapatziyariri.

<sup>21</sup> Tema pikemakotakiri Jesoshi: kyaaryo niyotagaeyakimini tsika ikantari.

<sup>22</sup> Ari iroñaaka eero pikimitagaa paerani. Ashi poyironi tee pikameethap-erotzini. Pinintaperotzironi pantayiteroni kaari kameethatatsi, rootaki pamatawitantakarini apaniroeni.

<sup>23</sup> Eero papiiteero pikenkithashiryaaagaero pantawitarini paerani, omaanta pikenkithashiryaaagaero kameethatatsiri.

<sup>24</sup> Pipaashinitaperoeyanakinji: eero pantashitawo kaari kameethatatsi, omaanta pikimitaperotaari Tajorentsi, tema ikameethaperotaki kameetha.

### *Ikanteeyirini Paaworo oetarika rantayiterini*

<sup>25</sup> Iroñaaka eero pitheeya eejatzi, omaanta kameetha piñaawaetantyaawo oetarika pikanteriri paashinipaeni atziri. Tema ashenkatakari Jesokirishito, eejatzi ashenkatawakagaeyakani, maawaeni.

<sup>26</sup> Aririka pikijashiryaaakya eero pantaperotziro kaari kameethatatsi. Eejatzi aririka pikijashiryaaakya intsipaete pipitsimaryaanee eejatzi, eero pojamaninkiro,

<sup>27</sup> okantyaatakyaa erokya rantakaantzimiro kamaari kaari kameethatatsi.

<sup>28</sup> Pikoshiwitarika paerani, iroñaaka eero papiiteero pikoshitee; inta pantawaete paantyaari eerori oetarika koetyeemotakimiri, eejatzi pikaminthayiteerini ashironkaayitacharini.

**29** Eero piñaawaetantawo kaari kameethatatsi inta piñaawaetero ūaagantsi rooperotatsiri. Kameetha piyotaawakaya, piweshiryaa kagaeyarini piyemijantzinkarite.

**30** Teerika pijeeki kameetha, owashiretaka Ishire Tajorentsi. Eero powashiretakawo: tema rootaki kempoyagaeyakimirini. Okantatyaa ni okempoyagaeyakimini roojatzi pareetanteeyaari janta jenokinta. Pawi-jakotantaperotapaeyaari kameetha.

**31** Aritapaaki iroñaka pikija, eero pitsimaenkata, eero pikatsimatantz, eero pimashireyantzitzi, eero pikijeeri paashinipaeni. Eero pikijathapi-inantzi, eero pikantzimatantashita. Eero pashiminthatawo pitheeyakotashityaari paashini atziri pikowantyaari powashiretakayaari.

**32** Inta pikaminthagaeyerini, pineshironkaeyerini. Tema paapatziyakari Jesokirishito, iroñaka tee ikijantzimiro eerori Tajorentsi pantayiwitakarini omaanta ikaminthaaperoeyakimini eejatzi pikimiteeyirini riori pisheninkapaeni, eero pikijantari rantayitakirini, omaanta pikamintheeyerini.

## 5

**1** Tema eeroka reentsitepaeni Tajorentsi inintashireperotzimi. Ari iroñaka pikimitakoeyaарини.

**2** Inintashireperoeyakimini Jesokirishito, rirotaki shineta shiteenchapaniroeni ikentakotanteetakariri, ikamawenteeyakimini. Inimopero-takiri Tajorentsi iroka rantakiri Itomi. Kimitaka inintashireperoeyakimini Jesokirishito, eejatzi pikimiteri eerori pisheninka, pinintashireperoeyerini.

**3** Eero pishirontawo tsinani kaari payi, eero pishirontari shirampari kaari payi, eero powashiyathatakotawo, eero powashiyathatakotayitawoni oetarikapaeni kaari kameethatatsi, eero piñaawenatakotari rashitayitarini paashinipaeni atziri oetarika tzimimotayitziririni: tee okameethatzi aapatziyariri Jesoshi rowashiyakotanty.

**4** Eero powashiyathatakotawo tsinani, eero powashiyathatakotari shirampari. Okameethatzi pipashiwentakayaawo maawaeni kaari kameethatatsi. Omaanta okameethaperotzi apaasonkiteri Tajorentsi: tema ikaminthaaperoeyakirieni.

**5** Iroka nokantemiri, piyotaperotawakiro: eero ryaatzi jenokinta riraga shirontapiintawori tsinani kaari rayi, eejatzi eero ryaatzi jenokinta tsinani shirontapiintari kaari ayi, eejatzi eero ryaatzi owashiyathatakopi-intaworini kaari kameethatatsi, eejatzi ūaawenatakotzipiintariri rowaagawo paashinipaeni atziri. Riraga kowaperotzirori rashaagantya ikimitakaantakiro rootaki itajorentsie inintaperotantawori. Ūaakiro, irikapaeni tee raa-patziyari Jesoshi, rootaki kaari ryaatanteeyani riroripaeni janta ijekaperotzinta Jesokirishito eejatzi Tajorentsi.

**6** Eenitatsi kowawitachari ramatawitemi: osheki ūaanatasitemimi wero, wero, wero; ikantashitawiteeyemini okameethatzi pantero iroka kaari kameethatatsi, omaanta eero pikemijantaperotziri. Ari rowashironka-gaeayakirini Tajorentsi maawaeni kaari kemijantaperotziri.

**7** Eerokapaeni eero poshiyakotari ikimitaaga rirori.

### Pijeekaeyeni kitejiriki

**8** Paerani kimitaka pijeekini tsiteniriki: tema pantapiintzironi kaari kameethatatsi. Omaanta rowameethateemi Jesokirishito, kimitaka ijekak-agaeayakirini kitejiriki. Iroñaka kameetha pijeekae, kimitaka jeekaemi kitejiriki.

**9** Aririka ajeekaki kitejiriki, akaminthaante, ajeeki kameetha, kameetha ūaawaaete oetarika kyaaryooperotatsiri.

**10** Piyoperoeyeroni ikowakaakimiri Awinkatharite, ari panteeyeroni.

**11** Eero pantziro rantayitzirini maawaeni jeekatsiripaeni tsiteniriki, piyotakagaeyerini tee okameethatzi iroka ranteeyakirini rirori.

**12** Nopashiwentakaakawo nokenkithatakotziro ranteeyirini, rowaga imanakowitzakari.

**13** Aririka piyotakaakiri tee okameethatzi ranteeyakirini, okoñaaatzimotanakiri maawaeni ranteeyakirini. Roojatzi riytakotantanakya tee okameethaperotzi rantziri. Roojatzi aririka ikowanee ikameethate, kimitanakya ijeekanee rirori kitejiriki.

**14** Rootaki ikananteetari:

"Aririka pimaaki, pipiriintanee. Aririka pikamaki, pipiriintee eejatzi. Riyotakaaperotemi Jesokirishito, ijeekakagaemi kitejiriki".

**15** Pikenkithashiryaaperotero oetarikapaeni pantayiterini: eero pikimittari kaari yotatsi, omaantakya okameethaperotzi ojeekaperote piyotantari.

**16** Oshekiperoroña rantayitakironi atziri kaari kameethaperotatsi. Omawitya opomeentsitzimotemírika, pikyaaryoowentero pantero kameethatayitsirini.

**17** Eero pantashitayitawoni oetarikapaeni, inta pityaawo pikenkithashiryaaperotya. Piyoteeyeroni oetarikapaeni ikowakaakimiri Awinkatharite: roojatzi ari pimateeyeroni ikowakaemiri.

**18** Eero pishinkita, rooma eero piyotaneero oeta panteri: inta pikemijan taperotero Ishire Tajorentsi maawaeni oetariki iyotaanteeyantemirini.

**19** Osheki pikantapiinteri pisheninka: "Tema ikameethataki Awinkatharite", eejatzi pomampaawentapiinteeyarini Tajorentsi, piweshiryawentyaari maawaeni pajankaneki.

**20** Paapatziyakari Awinkatharite Jesokirishito, rootaki itajonkakowenan-takimiri Pawa Tajorentsi. Iroñaaka pipaasonkitapiinteri.

*Okameethatzi ikaminthaaperotero shirampari iina, eejatzi okameethatzi oñaaperoteri tsinani oemi*

**21** Aririka pipinkathaperoteri Jesokirishito, pipinkathawakagaeyani erokapaeni maawaeni shirampari eejatzi tsinani, eejatzi paapatziyawakagaeyani.

**22** Tsinani, ¿paapatziyaperotarima Awinkatharite? Ari, eejatzi pikimiteri piimi, paapatziyaperotyaari rirori.

**23** Ikimitaka Jesokirishito reewawenanteeyirini aapatziyaripaeni, eejatzi ikimitya shirampari, reewawentero iina. Tema osheki ikamintheeyakaeni Jesokirishito, rootaki rowawijaakoeyantakaerini.

**24** Maawaeni aapatziyeyyaririni Jesokirishito ipinkathateeyanakirini, ari okimiteeyani eejatzi maawaeni tsinanipaeni tzimayitatsirini oemi, otzimatye aapatziyaperotyaari.

**25** Ikimitaaka Jesokirishito inintashireperoeyakaeni, eeroka shirampari-paeni, kameetha pinintashireperotero piina. Ñakiro, inintaperoeyakaeni Jesokirishito, ikamawenteeyakaeni,

**26** rootaki rowameethatanteeyakaerini. Aririka aapatziyeyawoni iñaani Tajorentsi eejatzi akaawoshitawenteeyarini irira, ari rowameethaperoeyakaeni Jesokirishito akyaryoowenanteeyaworini maawaeni ikowaka-gaeyakaerini.

**27** Ikowaki iñaaperoeyeeni aaka akameethatzi, eejatzi riraga maawaeni paashinipaeni aapatziyariri Jesoshi; eero ojeekimoneentee kaari kameethatatsi. Ikowaki akameethataperotanaki, eero ojeekantaneenta eechonkiini kaari kameethatatsi. Ñakiro, osheki inintashireperoeyakaeni.

<sup>28</sup> Eejatzi, eeroka shirampari, pinintashireperoeyeroni piina. Pikimitaaga pineshironkata eeroka, pineshironkatero piina. Riraga neshironkatzirori iina rirojatzi neshironkatacha apaniroeni.

<sup>29</sup> Tee iñaagaetzi apaani atziri kijashitachani iwatha, inta ikaminthaa rirori. Eejatzi, ikimitakae Jesokirishito aaka, aririka aapatziyeyearini,

<sup>30</sup> tema ikamintaakae, ishenenikateeyakaeni, kijokiro rowaeyakaeni.

<sup>31</sup> Ayoteeyakini shirampari eejatzi iina apaani ikantana: rooma okantzi Iwaperite Tajorentsi: "Aririka raaki shirampari iina, rookanakiri iriri, eejatzi riniro, kijokiro rowanakiro iina. Riraga shirampari eejatzi iina teina kimitanaka apaani iwatha rirori: kijokiro rowawakaanaka, tee okameethaperotzi rookawakagaeya".

<sup>32</sup> Opomeentsiwitaka akemiro iroka, omaanta oshiyakari Jesokirishito eejatzi maawaeni aapatziyeyakaririni, apaani akanteeyakan: ashieninkatawakagaeyakan, atsipatawakagaeyakan.

<sup>33</sup> Ari napiiteemiro: kimitaka ineshironkataaga rirori shirampari, kameethaperotatsiri ineshironkataperotero iina, ikanteetatyeyeaani. Eejatzi okameethaperotzi oflaaperoteri tsinani oemi ikameethatzi.

## 6

### *Tsika akanteri eentsitepaeni ayotayeri*

<sup>1</sup> Eentsipaeni, paapatziyakaririka Awinkatharite, eejatzi ikowakaakimi pikemijantaperoteeyerini piri eejatzi piniro. Rootaki inimoperotziriri Tajorentsi.

<sup>2-3</sup> Eenitatsi ikaminaakiriri Tajorentsi paeraniperoroña itakaantakaworini, ikantakiri: "Piñaapinkataperoteri piri eejatzi piniro, rootaki kameetha nojeekakaantemiri: ojamani pijeeki eeroka jaka kípatsiki".

<sup>4</sup> Shirampari, eero pijamaneentari peentsitepaeni, pikijakarikari eejatzi pikantashiryakaaneentarikari inta piyotagaeyerini kameetha ikantayitzirini Awinkatharite, eejatzi piyotagaeyerini ipinkathateri rirori.

### *Ronampiripaeni eejatzi omperatatsiri*

<sup>5</sup> Ninkarika antawaetakayimiri, pikemijantaperoteri eejatzi pipinkatheri. Kimitaka pantakiniri Jesokirishito maawaeni ikowakaakimiri, panteniri antawaetakayimiri maawaeni ikowakaakimiri rirori.

<sup>6</sup> Eero pamatawitziri. Kameetha pantawaete aririka rotyaantemi apaniroeni. Eerorika raminimi pikantatyeyaaani pantawaeteniri kameetha: tema eejatzi kimitaka pantawaetatziiñiri Jesokirishito. Pikowaperoatanakikya pantawaeteniri Tajorentsi maawaeni ikowakaakimiri.

<sup>7</sup> Tee riro pantawaetaperotziniri apatziro atziri, inta eejatzi pantawaetatziiñiri riraga Awinkatharite.

<sup>8</sup> Tema ayoteeyakini irira Awinkatharite pinateni okaatzira antayitakirini kameethatayitatsirini, omawitakya aakarika omperataarewo teerika romperaete.

<sup>9</sup> Eejatzi eerori antawaetakayiriri atziri: pikamintaahagaeyerini maawaeni pantawaetakaanewopaeni eejatzi poejeekanewopaeni, tema nokantakiri ikemijantem. Eero pikijapiintziri. Eero pipeyakoeyironi: eerokateeyakini ipinkathariwenteeyakirini Jesokirishito, eejatzi ipinkathariwenteeyakirini rirori pantawaetakaanewopaeni: pimonkaatawaakeyakan.

### *Aapatziyariri Jesokirishito roshiyakari joraaro*

<sup>10</sup> Noweyaantemi nokantem: noyemijantzinkarite, pikanteri Awinkatharite reewawenteeyemini eejatzi ramitakoeyemini pishintsishiretantlyaari.

**11** Ikimitaaganki joraaro rawentaawo iithaari kijotatsiri eero raawayaan-tari ikentziri rowayirite, ari pikimiteeyaaani ironaaka eerori pameentee-yarini Tajorentsi, eero rotsinampaantzimi iwinkatharite kamaari riraga amatawifantaneri.

**12** Tee riyo owayirita atziri koñaatziro, omaanta owayiritakari kaari inagaetzi: riraga iwinkatharite kamaariipaeni, jewawentziriri kamaariipaeni, jewawenteeyeririni maawaeni theenkantatsiri, oshekiperoroña kamaari. Ikijectyakaeni riroripaeni maawaeni.

**13** Ikimitaaga joraaro rameentawo iithaari kijotatsiri, eejatzi eerori ari pikimitya pameentyaari Tajorentsi potsinampaantyaariri kamaari. Rowashironkaemikari inta eero imatantaperotzimi, panaakoteeyirini pitohiyayeniri Tajorentsi maawaeni ikowakagaeyakimirini; eero pipakaero paapatziyaperotakaria.

**14** Paapatziyaperotaari kameetha Jesoshi, pikenkithashireeyironi kyaaryooperotatsiri eero rowashironkaantzimi kamaari: poshiyakowitzakari ikimita joraaro rameentawo ishirikathakiro eero ikenantari riraga rowayirite. Pikameethaperote eerokya imatantzimi kamaari: pikimitakotyaari joraaro, rameentawo rotzikaayitawoni kijori.

**15** Ikimitaaga joraaro ijapatotaka kameetha raatzikantayitarini, tsikarika ryaatayitzini, ari pikimiteeyaaani eerori piwetsikashiretya kameetha, pikinakinayitantlyaarini piyotayeri atziri tsika ikanteeyaa-rawiyakotanteeyaaarini.

**16** Eejatzi eenitatsi joraaro rotzikaari, roepiyantawori chekopi jathowatatsiri kaari ikenanteetari. Eejatzi eerori, pameentaperotaari Tajorentsi, eerokya raawayantzimi iwinkatharite kamaari rantakayemiro kaari kameethatatsi.

**17** Eejatzi, joraaro ramatheetakawo iitoki kijotatsiri rootaki aakowentziriri; eejatzi pikimitya eerori, paapatziyeyaaarini Tajorentsi pawijakotanteeyaaarini, eerokya imatantzimi kamaari rantakayitemironi kaari kameethatatsi. Eejatzi eenitatsi ithatzinkamento kimiwityawaoni jawiri. Rootaki ithatzinkanttariri rowayiritepaeni kaari imatantari ipiyataaari: eejatzi okimita Iwaperite Tajorentsi oshiyakawo iroka thatzinkamentotsi, tema rootaki apiyakowenantyaari eero imatantee kamaari. Rooma Ishire Tajorentsi rootaki amitakoteeri iyotayitakaeni amatantyaawori apiyathatantyaari kamaari oetarika ikowakaawiteeri rantakagaerimi.

**18** Eero pipakayiro pikenkithatakapiainteri Tajorentsi. Pikanteri oetarika-paeni okowakayimiri Ishire. Pikanteri koetyeemotayitakimirini. Eero piperawentawo pamanakoeyaarini piyemijantzinkaritepaeni.

**19** Eejatzi pikanteri ramitakotena naari, eero nopashiwenanta nokenkitatakagaeyerini atziri. Nokamanteeyerini kaari riyoteeyawitanipaaerani: rowawijaakoeyerini Tajorentsi maawaeni aapatziyayi-teeyaaaririni.

**20** Niyotaapiintakiri atziri, rootaki romonkyaaganteetakinari jakaa monkyaaagamentotsiki. Pikanteri ramitakotenaata kameetha nokantapiinteri atziri, eero nomanantawo. Tema rootaki ikowakaakinari Tajorentsi.

**21** Aririka rareetakya Teekiko, ikantapaakimi tsikarika nokantakari, eejatzi ikamantemi oetarika rantayitakirini. Rirotaki ayemijantzinkarite, nonintaperotziri, ikyaaaryoowentaperotziniri Awinkatharite maawaeni ikowakaakiriri.

**22** Rootaki notyaanantakariri, nokowaperotaki piyoteeyini tsikarika nokantaka. Eejatzi nokowaki riweshiryaaakagaeyemini.

<sup>23</sup> Iroñaaka, noyemijantzinkarite, nokowaki kameetha ijekakaeyemini Pawa Tajorentsi, nokowaki riyotagaeyemini paapatziyaperotanteeyaririni eejatzi pinintaperoyerini pisheninka. Eejatzi nokowaki ikimitakayemi riraga Awinkatharite Jesokirishito.

<sup>24</sup> Aririka pikantyaani pinintaperoteri Awinkatharite Jesokirishito, nokowaki ineshironkateeyemini Tajorentsi, maawaeni.

Naaka jankinateeyimirorini:

Paaworo

## RIRAGA PAAWORO ROJANKINATZINIRI JIRIPOSHIJATZI

<sup>1</sup> Nokoyi nowethateeyemini eerokapaeni jiriposhijatzi tsikarika pikanta pijeeki. Naaka Paaworo jankinateeyakimirorini, notsipatakari jaka Temoteeyo. Naaka antawaetziniriri Jesokirishito ikowakaakinari. Nojankinateeyimironi maawaeni noyemijantzinkarite: jewawentziriripaeni, amitakoeyiririni aapatziyariripaeni eejatzi maawaeni aapatziyariripaeni Jesso.

<sup>2</sup> Nokowaki eekiro riyaatatyye ineshironkateeyemini Pawa Tajorentsi, eejatzi kameetha ijeekakagaeyemini. Eejatzi nokowaki ikimitakagaeyemini Awinkatharite Jesokirishito.

### *Ipaasonkitziri Paaworo Tajorentsi*

<sup>3</sup> Aririka nokenkithashireeyemini, nopaasonkitapiintziri Tajorentsi. Nopaasonkitakowentzimi eerokapaeni.

<sup>4</sup> Aritaki nokantatyaaani namanapiintziri Tajorentsi, nokantapiintziri: "Pikaminthagaeyerini jiriposhijatzi, pamitakooyerini", eejatzi niweshiryawenteeyakimini.

<sup>5</sup> Pikantatyaaani pamitakotapiinteeeyakinani akamanantakiro iñaani Tajorentsi, akamanteeyirini atziri tsika ikanteeyarini rawijakotanteeyari. Rootaki nopaasonkitawenantzimiri.

<sup>6</sup> Okameethataki iroka pantapiinteeeyakirini, tema riro Tajorentsi matakaakimirori. Niyotaki ikantatyeeyaani, imatakaapiintemiro, roojatzi ipokanteeyari riraga Jesokirishito. Aririka ipokapae rirori, ari monkaatapaaka maawaeni panteeyakirini.

<sup>7</sup> Tema okameethataki noñaaperoeyakimini, aritaki osheki nonintashireeyakimini. Eenirona nojeekaki jaka omonkyaaagamentotsiki, nokenkithatakotziri Jesokirishito, eejatzi aririka roeyoyena, eejatzi nokenkithatakoteri. Nokamantapiintziri riraga pinkathariwenan-tatsiripaeni oetaka nokenkithatakotantariri Jesokirishito; eejatzi nokamantziri okyaaryooperotaki iñaani Tajorentsi. Omaanta pikantani eerori pikamintaaperoeyakinani, pamanakotapiinteeeyakinani ineshironkatantenari Tajorentsi.

<sup>8</sup> Riyotaki irira osheki nonintaperoeyakimini. Osheki intaperoeyakaeni Jesokirishito, eejatzi naari nokimitakari irira osheki nonintaperoeyakimini.

<sup>9</sup> Eejatzi namaniri Tajorentsi ramitakoeyemini, tema nokowaki eekiro piyatatyepinintaperoeyerini paashinipaeni. Eejatzi nokantziri riyota-gaeymini rirori piyotaperoeyantyaaririni, eejatzi otzimimoeyantemirini piyotantyaari: eekiro piyaateeyanakityeeni.

<sup>10</sup> Nokowaki piyoteeyeni pantero kameethatatsiri, eerokya pantashitawo kaari kameethatatsi. Nokowaki pikameethaperoeyanakini, eero ojeeki pantani; pikanteetatyeeyaani, roojatzi ipokanteeyari Jesokirishito.

<sup>11</sup> Tema rowameethataperoeyakimini, iroñaaka nokowaki kameetha pijeekaayeni, ramitakoeyemini rirori. Roojatzi maawaeni atziri iñaaperoeyerini Tajorentsi, ikanteeyeni: "Tema ikameethaperotaki Tajorentsi".

*Ijeeki Paaworo omonkyaaagamentotsiki, omaanta oshekyaanaka iñaani Tajorentsi*

**12-13** Nokamantemi, noyemijantzinkarite: romonkyaagaetakina, omaanta tee natsipetashitawo nojeeki jaka omonkyaagamentotsiki. Nokantani nokamanteeyirini atziripaeni tsika ikantyaari rawijakoeuyanteeyaarini. Ike-maeyakina maawaeni joraaropaeni: riraga shenteeyirorini ipanko jew-awenantsiri oroomajatzsi. Eejatzi paashinijatzitsirii atziri, ikemaeyakanani. Riyoteeyakini tekatsi nante, omaanta romonkyaagashiteetakina; ap-atziro nokenkithatakowitari Jesokirishito. Eeromi nojeekimi jaka, eeromi riyoteeyeenimi tsika ikantyaari rawijakotanteeyaari.

**14** Iñaapaakina ayemijantzinkarite tsika nokantari jaka, rootaki riweshiryaawenteeyatkaririni Awinkatharite. Iroñaaka tee ithaawaeyini, omaanta ikowaperoeyanakini ikamanteeyerini maawaeni atziri iñaani Tajorentsi.

**15** Eniro osheki kenkithatakotziriri Jesokirishito. Iñaakina apaani-paeni osheki naapatziyakagaeyakarini atziripaeni, rootaki ikowantanakari ranaakoeyenani raapatziyakagaeyaarini atziripaeni. Omaanta eeniro paashinipaeni kamintaaperotakinari, kameetha ikenkithatakantakiro iñaani Tajorentsi.

**16** Osheki inintashireeyakinani rirorpae, rootaki riyotakotantakariri Jesokirishito. Riyoteeyakini nojeeki jaka omonkyaagamentotsiki nokamanteeyantyaaririni jewatatsiripaeni iitarika nokenkithatakontariri Jesokirishito, nokamanteeyerini tsika ikantyaari rawijakotanteeyari.

**17** Riraga kijakinari, tee ikowakayiri atziri raapatziyeeyenani, omaanta rirotaki kowaentsiri ranaakotena raapatziyakagaeyarini atziripaeni. Tee rantawaetaaperotziniri Jesokirishito, omaanta ikowashita rowashironkayenami jaka omonkyaagamentotsiki.

**18** Ari, omawitya ikijawitena. Apaanipaeni ikijaneentakina, riraga paashinipaeni ikamintaakina, omaanta ikenkithatakaoeyakirini Jesokirishito, rootaki niweshiryaantakari naari.

Nokantyaani niweshiryaaperotanakya.

**19** Tema pamanakoteeyakinani rootaki ramitakotantakinari, eejatzi amitakotakina Ishire Tajorentsi, rootaki niyotantakari ijekakaakina kameetha, nokimitakotantyaariri rirori. Rootaki noemoshiryaanttariri.

**20** Tee nokoyi nopashiwenya, omaanta nokowaperotaki naari kameetha naapatziyaperotyaari Jesokirishito; nokowaki nokimiteeya paerani, tee nothaayi. Omawitya rowamagaetenarika rooma eerorika rowamagaetana, omaanta oetarikapaeni nanteniriri, nokowaperotaki ikanteeyeni atziri: "Tema ikameethaperotaki Jesokirishito".

**21** Eerorika rowamagaetana iroñaaka, roojatzi nokantyaani naapatziyaperotyaari Jesokirishito. Aririka nokame, okameethaperotaki eejatzi: tema ari noñaaperotapaeri janta jenokinta; rootaki nokowaperotakiri.

**22** Eerorika nokami, roojatzi nokantyaani nanteniriri Awinkatharite oetarikapaeni ikowakaakinari. Tema okameethatakai. Eejatzi, aririka nokame okameethatakai. Tee niyotzi oetarika nokowaperoteri.

**23** Nokowaperotawitakawo apite. Nokowaki nokame, niyaatashitan-teeyaariri Jesokirishito, kijokiro nowantapaeyaariri. Tema okameethaperotaki.

**24** Omaanta eejatzi okameethaperotaki roojatzirika nañe, nokantyaani namitakoeyantemirini eerori.

**25** Niyotaki iroñaaka eero rowamagaetana, eero niyaatzita jenokinta. Nojeekimoteeyanakiminiita kipatsikika namitakoeyemini paapatziyaper-oeyaarini Jesoshi, eejatzi piweshiryaawenteeuyaarini riraga paapatziyakari.

**26** Aririka niyaatashiiyeemini eejatzi, piweshiryaawentawaena, eejatzi piyoteeyanakini ikameethaperotaki Jesokirishito.

*Ikantziri: "Kameetha pijeekaeyeni"*

27 Eenitatsi iroka nokowakaakimiri pikenkithashiryaaperoteri: paapatziyakari Jesokirishito pawijakotantaari, iroñaaka ikowaki kameetha pijeekaeyeni, pantapinteeeyeroni maawaeni ikowakaakimiri. Aririka niyaatashiteyemini nokowaki noñeeyapaemini eekiro piyaatatzpikyaryooowenteeyironi paapatziyeyakawoni maawaeni. Eerorka niyaatashiiyimini, omaanta nokowaki nokemakoeyemini eekiro piyaatatzpikempiyaaminthatawakagaeyani, pipomeentsiwentawo pikamanteeyerini atziri: "Aririka paapatziyaari Jesokirishito, ari rowawijaakotemi".

28 Eero pithaawanteeyarini riraga kijeyyawitakimirini: ari ikenkithashireeyanakyaani: "¿Itaka kaari ithaawanantana?" Ari riyoteeyanakini riori ryaateeyen paamariki kaari tsikanitatsini, riyoteeyeni eejatzi rowawijaakotimini Tajorentsi.

29 Ikaminthagaeyakimini Tajorentsi, ikowakagaeyakimini paapatziyeyarini pikantyaani kijokiro poyeri Jesokirishito. Omaanta ikowakagaeyakimini iroka omawitya pikemaatsitawenteeyaarini.

30 Aritaki amonkaatawakagaeyakan apomeentsiwenteeyarini Jesokirishito. Paerani piñeyakinani nopomeentsitawentakarini niyotaakoeyakimirini. Iroñaaka eejatzi pikemakoeyakinani, osheki nopomeentsitawentakarini niyotagaeyakirini paashinipaeni atziri.

## 2

*Eero pikaminthaashita eeroka apaniroeni, omaanta pikaminthagaeyerini paashinipaeni*

1 Tema riweshiryaawenteeyimini Jesokirishito. Inintaperoyakimini, retakoeyakimini, roemoshirenkaeyakaeni. Tema pikithaatatakawo Ishire Tajorentsi. Tema piyoteeyini ineshironkatake Jesoshi eejatzi ikaminthaakae.

2 Rootaki iroñaaka nakanantzimiri: "Kameetha pijeekaeyeni, paakameethatawakagaeyani, pinintaperotawakagaeyani. Kameetha omonkatawakagaeyani oetarikapaeni pikowaeyerini eejatzi oetarikapaeni pikenkithashireeyerini. Aririka panteeyeroni iroka, ari nokimoshirewenteeyanakimini".

3 Oetarikapaeni panteeyerini, eero pikijawakaanteeyawoni, eero pikantakaaperoeyani. Eero pikenkithashireeyani pikameethaperotzi, eero pikenkithashireeyani panaakoeyakirini paashinipaeni, inta pikenkithashiryaakoeyaaarini: "Ikameethaperoeyini paashinipaeni, ranaakoeyakinani ikameethatzi".

4 Okameethatawita pikaminthaya eeroka apaniroeni, omaanta okameethaperotzi eejatzi pikaminthagaeyerini paashinipaeni.

5 Pikimitakoeyaarinii Jesokirishito: tee ikenkithashiryaakota ikaminthaya rirori, omaanta ikenkithashiryaakoeyakaeni ikaminthagae aka.

6-7 Paeraniperoroña rivotaki Tajorentsipero, omaanta ikantakiri Iriri: "Pawa, niyotzi akimitawakagaeyakan, atajorentsitaperoeyakini aaka, omaanta nokowaki nopeyapaeya atziri, nantemiro maawaeni pikowakaakinari". Roojatzi rookantanakawo reewawenantzi, itajorentsitantari. Roojatzi ijeekantapaakari paerani kipatsikika, ratziritaperotapaaki:

8 ikimitteeypaakaeni aaka. Tee reewawenantawitapaaka, omaanta inaaperotakiri Iriri. Rivotaki kowashiteencha ikentakteetantakariri koshiki, ikamawenteeyakaeni. Rootaki ikowakaakiriri Iriri.

<sup>9</sup> Omaanta paata ragaeri jenoki, kameetha ijeekakagaerikya Ashitariri. Rapiitawaeri iitawaeri Tajoretsipero: ranaakoeypapaerini maawaeni jeekayatsirini.

<sup>10</sup> Ikowaki Tajorentsi apinkatheeeyerini Jesoshi maawaeni: riraga jenokijatz, aakapaen ikipatsijatz, riraga jeekatsiri inthomaenta kipatsi, maawaeni. Eekiro aatatyapinkathataperoyeriniroña rirori.

<sup>11</sup> Eejatzi akantaperoyerieni: "Rirotaki Jesokirishito Awinkatharite", rootaki añaaperotaperoyerantyaaririni kameetha riraga Pawa Tajorentsi.

<sup>12</sup> Ari, nonintaperotanewopaeni, pikantani paapatziyaperotapi-inteeyakawoni okaatzi niyotaakimiri. Notsipatantawitákimirini paapatziyaperoyerakawoni. Iroñaaka tee notsipateeyemini, omaanta nokowaki paapatziyaperoyerawoni eejatzi. Tema rowawijaakoeyakimini Tajorentsi: iroñaaka pipinkathataperoyerin, pantaperoteniri kameetha maawaeni ikowakagaejakimiri.

<sup>13</sup> Tema rirotaki kowakaashiryapiintakimirori pikowantapiintakari panteniri ikowakaakimiri. Rootaki imataktakimirori.

<sup>14</sup> Pantaperoyeroni maawaeni ikowakaakimiri: eero piñaawaepookitzi oetarika pantayiterini, eero pipiyawaantetari oetarika ikantemiri.

<sup>15</sup> Aririka panteniri Tajorentsi maawaeni ikowakaakimiri, eero ojeeki pantani, omaanta pikameethashiryaanaki. Tema itominteeeyakimini, rishintoeyakimini. Rowameethataperoyerakimini. Jaga pinampiki pikaa-teeyakirini osheki theenkantatsiri: tee ikameethatzi irirapaeni, tee riyotziri Tajorentsi. Kimitaka ootamentotsi ootaka aminantari, ari pikimitya eerori, kameetha pijkeekaeyeni piyotakagaeyantyaaririni riraga theenkantatsiri kyaaryo paapatziyeyakarini Tajorentsi.

<sup>16</sup> Napiitemiro nokantemi: kimitaka pootakawo ootamentotsi pamnantari tsiteniriki, eejatzi piyotagaeyerini maawaeni jeekimoeyimurinira jaga Inñaani Tajorentsi iñaantapaeyaaworini rirori jenoki, ikanteetatyeyaaani rañaapae janta. Ari pimateeyeroni iroka; roojatzi ipokanteyari Jesokirishito, nokimoshirewenteeyakimini. Niyotanaki tee natsipetashitawo niyotagaeyakimini.

<sup>17</sup> Iroñaaka paapatziyeyakarini Jesoshi. Tema naaka aapatziyakaakimiri, rootaki ikowanteetakari rowamagaeten. Aririka rowamagaeten iroñaaka, niyotatzi eekiro piyaatatyapinkathataperotanakiri Tajorentsi. Rootaki nokimoshiretantakari, eejatzi nokowaki pikimoshirewentena eerori.

<sup>18</sup> Kyaaryo, okameethatzi pikimoshireeyanakini, akimitawaka-gaejantyaarini, akimoshireperoyerantyaarini, maawaeni.

### *Rotyaantziri Paaworo Temoteeyo*

<sup>19</sup> Aririka ikowakayena Awinkatharite Jesoshi, nokowaki intsipaete notyaantemiri Temoteeyo. Aririka ipiyee eejatzi jaka, ikamantapaena tsika pikanteeyarini, nokimoshiretanta.

<sup>20</sup> Tekatsi paashini kimtyaarini rirori: osheki ikowaperotaki ikaminthagaeyemini kameetha pijkeekaeyantyaarini.

<sup>21</sup> Eeniro paashinipaeni: ikenkithashireeyakironi oetarikapaeni ikowayitzirini rirori, tee ikenkithashiryapoterero ikoyiri Jesokirishito.

<sup>22</sup> Omaanta piyoteeyakini ikameethataki Temoteeyo, ikyaaaryowentziro ramitakotakina nokenkithatakaakiri atziri: nokamanteyirini tsika ikantyaari rawijakontanyaari. Osheki ramitakotakina, ikimitakaantakina naaka ashitariri.

<sup>23</sup> Rootaki nokowantakari notyaantemiri. Aririka niyotaperotaki rowamagaeten, rooma eerorika, ari intsipaete notyaanteri Temoteeyo ikaman-tapaemi.

**24** Eejatzi nameentakari Awinkatharite ishinetana niyaatashiiyemini. Eero ojamanitzi, ari nareeteeyapaemini.

### *Ikenkithatakotziri Epajororiito*

**25** Chapinki potyaantakinari ayemijantzinkarite Epajororiito, osheki petakotakina. Ikaatakina, nantawaeteeyinirini Awinkatharite. Ikkimitaaganki joraaropaeni ikyaaryoowentzinirini iyapitaanote oetarikapena rantziniriri, ari nokimitaaka naaka eejatzi Epajororiito nokyaryoowentzinirini Awinkatharite maawaeni nantziniriri; tee noperatawentawo ikowakaakinari.

**26** Osheki ikoetyeeyakimini. Pikemakoeyawitakarini mantsiyataki, osheki powashiretakotawitakari. Iroñaaaka ikenkithashiryaakimi, tee ikoyi powashiretakotaari.

**27** Kyaaryo, imantsiyaperowitaka, roowiteencha ikamemi, omaanta ineshironkateeri Tajorentsi, retsiyatatakoteeri. Eejatzi naari, ineshironkataana, tee ikowakaana ikamimotena. Riyotzi nashironkaawitaka, tee ikowakaana nowashiretakotaari.

**28** Iroñaaaka nokowaperotaki notyaanteemiri. Aririka piñeyawaerini, piki-moshirewenteeyawaerini, roojatzi eero nowashiretakontaneemi.

**29** Rootaki paakameethatawaeyaariri, pikimoshirewentawaeri; tema rirotaki aapatziyariri Awinkatharite. Piñaaperotawaeri eejatzi piñaaperoyerini maawaeni kimitariri rirori.

**30** Tema rantawaetziniri Jesokirishito, rootaki imantsiyatantakari, roowiteencha ikamemi. Osheki retakotapiintakina: ikimitakimi petakotapiinteeyenanimi eeroka, pijekirkami jaka. Tee ikenkithashiryaakota rirori, rootaki ikamantyaarimi.

## 3

### *Paamayarira riraga kowatsiri ipeyakagaeyemini joriyo*

**1** Eejatzi, noyemijantzinkarite, nokanteeyemini: pikimoshirewenteeyerini Awinkatharite. Eero nojamaneentawo napiitemiro rowaga nojankinatakimiri, tema okameethatzi pikemapiintero.

**2** Paamayarira riraga kowatsiri ipeyakagaeyemini oyaatzirori rametiyatarini joriyyopaeni: tee ikameethatzi. Paamayarira, rowashironkaemikari, ikowawita itotonatakaemimi pishiramparitantari pawijkotanteeyari.

**3** Atsipetashita atotonatziro, eero owameethatee, eero owawijaakotee. Omaanta Ishire Tajorentsi iyotagaeyakaeni apinkathaperoyirini Tajorentsi, rootaki rowameethateyanteerini, rowawijaakoeyanteerini. Aweshiryaawenteeyakarini Jesokirishito, ayoteeyakini tekatsi akantya owawijaakotashitya aaka.

**4** Aririkami amateromi owawijaakotyaami aaka, tema naaka owawijaakotashitachanimi.

Osheki nomatayitawitakani, nanaakoteeyawitakarini paashinipaeni.

**5** Owakira nokoñaatapaakini, 7 nomaakotapaaki, ari itotonateetakiro noshiramparitantari. Naaka icharineeteni Ishirayererini. Eejatzi nocharinetakari Irijamiini. Tema naakapero joriyo. Nomonkaataperotakiro rojankinarini Moeseeshi, tema naakawitaka warijeeyo.

**6** Nokowaperotawitanikya osheki naapatziyarimi Tajorentsi, rootaki nokijeyantakaririni riraga aapatziyeyaririni Jesoshi nowamaayitakini apaanipaeni. Kameetha nomonkaatakiro rojankinarini Moeseeshi, tekatsi kan-tanani: "Eenitatsi pantani".

**7-8** Niweshiryaawentawonni maawaeni nantziniriri paerani, nokantaakaoperotawitani, nokantashiretaki, "Okameethatzi iroka nantakiniriri

Tajorentsi". Omaanta iroñaaka noyaateeri Jesokirishito, rootaki niyotantari natsipetashitawitakawoni paerani. Iroñaaka tee nokenkithashiryagaero maawaeni nantawitarini paerani. Omaantakya iroñaaka naapatziyaaari Jesokirishito rootaki nookantawori nantawitarini, nokimitakaantaa wo ookirowanki kaagashi. Omaanta iroñaaka naapatziyaaari Jesokirishito, nopinkathateeri. Nokoyi niyotaperoteri irira eejatzi nokoyi nanteniri oetarika ikowakaakinari.

<sup>9</sup> Nokowaki nosheninkataperotakyaari. Tee nokameethatashitya naari: nomonkaatayitawitawoni rojankinarinii Moeseeshi, omaanta tee owameethatena. Omaantakya naapatziyakari Jesokirishito, rootaki rowameethatantakinari rirori. Aritaki rowameethateeyirini Tajorentsi maawaeni aapatziyeyaririni.

<sup>10</sup> Nokowaki niyotaperoterikyaroña Jesokirishito. Ikimitagaerira Tajorentsi ipiriinteeri, nokowaki itajonkakowentapiintena naari. Eejatzi, okimitaka osheki ikemaatsitawenteeyakaeni, nokowaki nokemaatsitawentyaari naari; okimitaka ikamawenteeyakaeni, nokowaki nantawaeteniri naari omawitakya rowamaawenteetenawo.

<sup>11</sup> Roojatzi aririka ipiriinteeyaneeni kamakotakirorira raapatziyakarira Jesoshi, nokowaperotaki nopiriintanee naari, notsipataperotanta-paeyaariri Tajorentsi.

### *Ikamantakotaa rirojatzi Paaworo*

<sup>12</sup> Tekiraata nomonkaatayitzironi iroka nokenkithatakotakiri, tekiraata nokameethaperotzi okimitaka ikowakaakinari Jesokirishito. Omaanta nokowaperotaki nomonkaataperotayitenirini, tema rowawijaakotaana irira nomonkaatantyaawori.

<sup>13</sup> Ñaakiro, noyemijantzinkarite: tee nokantzimi nomonkaataperotayitakironi maawaeni nokowakiri nomonkaateri. Iroñaaka tee nokenkithashiryagaero maawaeni nantayitawitarini paerani, omaantakya apatziro nokenkithashiryaaiperotziro maawaeni nanteniriri Jesokirishito, eejatzi nokowaperotaki osheki kijokiro nowanakiri rirori.

<sup>14</sup> Naapatziyakari, rootaki ikowantakinari Tajorentsi niyaate jenokinta, nojeekimotapaeri rirori. Iroñaaka nokyaaryooowentziniri nantawaetaperotziniri, ipinatantenari iinja janta jenokinta.

<sup>15</sup> Nokowaki pikimiteeyenani, maawaeni aapatziyaperoeyaririni Jesoshi. Teerika pikimiteeyanani, riytakagaeyemini Tajorentsi tekiraata omonkaatya paapatziyaperoeyarini.

<sup>16</sup> Omaanta pikyaaryooowentero pimonkaataperotero maawaeni piyotakiri. Tema aritaki riytakaaakimiro.

### *Ikowaki Paaworo akimiteeyaaarini rirori*

<sup>17</sup> Noyemijantzinkarite, pikimiteeyenani. Eejatzi pamineeyerini paashinipaeni, ikimiteeyakinarinika. Roojatzi pikimiteeyenani maawaeni: paapatziyaperoeyarini Rotyaantanewo Tajorentsi.

<sup>18-19</sup> Paerani nokamantakimi eeniro osheki kijakiriri Jesokirishito: riraga kentakotawentakaeri koroshiki. Iroñaaka napiiteemiro: kyaaryo ikaatzi osheki kijakiriri. Tee iñaaperoeyerini Tajorentsi, omaanta riweshiryaawentashitawoni kaari kameethatatsi eejatzi rowayitarini: ikimitakaantakawo itajorentsitashitakawo iwatha okaatzira okowashitari. Okameethatemi ipashiwenteeyanimi, omaanta ikantakaaperotashiteeyakan. Apatziro ikenkithashireeyironi tsika ikanteeyani jika kipatsiki. Iinja riyaateeyanakini paamariki kaari tsiwakanitatsini. Niraakoeyakarini naari. Eero poshiyari rirori.

**20** Omaanta aaka akowaki anampitaperotyaawo jenokinta. Iroñaaka oy-aatziiri owawijaakoeyeerini riraga Awinkatharite Jesokirishito. Ikinantapaakyawao menkorri ragaeyantaneerini aakapaeni jenokinta.

**21** Ashi roiro itajonkantz, imatayitzironi iitarikapaeni ikowakiri. Itajonkakowentapaakae aari, ipaashinitapaakaeniro awatha, akimitanteeyaariri rirori. Iroñaaka ashii oyiro apathagaeyini, akamaeyini; omaanta iinja akimiteeyaarini rirori, okameethaperotanakikya awatha: eero apathagaeyeeni, eero akamae eejatzi.

## 4

**1** Rootaki noyemijantzinkarite, nonintaperoeyantakimirini, osheki nokoetyaakimi, osheki niweshiryawaenteevakimini. Kijokiro powaeyerini Awinkatharite, poyaataperooyerini. Kyaaryo, osheki nonintaperoeyakimini.

**2** Iroñaaka nokamantereo Ewoorya eejatzi Shainteki eero okijawakaa. Kameetha okanteri Awinkatharite ramitakotero aakameethatawakagaeya.

**3** Iroñaaka nokamantemi, nojoriiyotzinkarite, tema paerani atsipatawakaaka antawaetziniri Awinkatharite: iroñaaka nokowaki pamitakotero rowaga tsinani aakameethatawakagaeya eejatzi. Paerani opomeentsiwentawitonni okamanteeyawitarini atziri tsika ikantyaari rowawijaakotanteeyaari: okaateeyawitakinani, eejatzi rirori Kirimintzi, eejatzi paashini amitakoeyanarini. Ojankinateeyakan iwaeropaeni riraga amitakoeyanarini janta jenokinta, rojankinatakota maawaeni iwaero jekcatsini jenokinta inaanamentoki Tajorentsi.

### *Pikimoshirewenteri Tajorentsi*

**4** Pikanteetatyeyaaani pikimoshirewenteeyerini Awinkatharite. Napi-iteemiro: pikimoshirewentaaperooyerini, maawaeni.

**5** Nokowaki riyoteeyeni atziri pikamintaantaperoeyeni. Eero pipeyakotziro: rooteentesi ipokae Awinkatharite.

**6** Eero pikenkithashiryakopintziro oetarika awijimotemini. Pikanteetatyeyaaani pamaneri Tajorentsi, pikanteri oetarika pikoyiri. Oetarika-paenai koetyeemotzimiri, ari pikamanteri. Eejatzi pipaasonkitapiinteeyerini.

**7** Roojatzi Tajorentsi ijekakagaeyemini kameetha ikimoshire-takaaperoeyemini osheki. Ranaakotaperoeyakaeni aari, tee amatziro ajeekakagaeyerini kameetha paashinipaeni, tee ayotziro. Aririka paapatziyaari Jesokirishito, ikantyaani Tajorentsi ijekakagaeyemini kameetha, riweshiryaaakagaeyemini.

**8** Noyemijantzinkarite, eeniro paashini nokamantemiri. Okameethatzi pikenkithashiryakoeysteroni okaatzi kyaaryooperotayitatsirini, okaatzi añaaperotayiterini kameethayitatsirini; maawaeni okaatzi kameethatatsiri. Kyaaryo, pikantatyeyaaani eero pikenkithashiryakopintawo pantero kaari kameethatatsi, inta pikenkithashiryaperoeyaaarini maawaeni okaatzi inimotziriri Tajorentsi; eejatzi okaatzi kameethatatsiri inimoeyiririni maawaeni atziri. Kyaaryo okameethatzi ashii poyiro pikenkithashiryakotero oetarika kameethatatsiri eejatzi oetarika añaaperoteyerini okameethatzi.

**9** Pantapiinteeyeroni maawaeni niyotagaeyakimirini, maawaeni nokamanteevakimirini, maawaeni pikemaeyawakinarini. Oetarikapaeni piñaakirini nantakiri naari, ari panteeyeroni eerori. Rootaki kijokiro rowantemiri Tajorentsi: ijekakagaeyemini kameetha.

*Riraga jiriposhijatzi osheki ineshironkaeyakirini Paaworo*

<sup>10</sup> Paerani pikenkithashiryaawiteeyakinani, roojatzi pipeyakotawitaanani; omaanta niyotaki iroñaaka pikenkithashireeyaananeejatz, pikaminthagaeyakinani, rootaki nokimoshireperotantakari. Tema ikameethataki Awinkatharite. Tee pipeyakotaperotana, omaanta tee pimatawitatwoni pikaminthagaeyenani.

<sup>11</sup> Tee nokamantawitzimi eeniro koetyeemotakinari oetarikapaeni: tee. Tee otzimaperotawita tzimimotanari, omaanta iroñaaka nametakawo nokimoshiretashita, omawitya tekatsirika tzimimotenani.

<sup>12</sup> Nametakawo nojeeakashita tee nashaagantya osheki, eejatz nametakawo aririka nashitayityaawoni oetarikapaeni. Niyotayitakiromaaawaeni: niyotaki nokemakawo nowanawo, eejatz niyotakiro tsika okanta notasheyi. Niyotakiro nashaagantaka, eejatz niyotakiro nashironkaaka.

<sup>13</sup> Tema kijokiro rowana Rotyaantanewo Tajorentsi, imatakaakin, rootaki nomatantawori oetarikapaeni ikowakaakinari.

<sup>14</sup> Omaanta pineshironkaeyakinani. Piyoteeyakini nowashironkaawitaka, rootaki pikaminthagaeyantakinari. Tema kameethataki okaatzi pantakiri.

<sup>15</sup> Eejatz piyoteeyini tsika okantani paerani, owakiraani nokenkithataktakimirini jaga pinampiki, netakoperoeyakimini. Niyaatanta eejatz, nopoñaanaa Masherooniyaki, niyaatayitakini paashinipaeniki nampitsi. Apatziro eerkapaeni petakoeyawakinani, pipashiteeyawakinawoni koetyeemotakinari. Tee ikimiteeyemini riraga aapatziyeyaririni janta paashinikipaeni nampitsi.

<sup>16</sup> Eejatz, nojeeuktakarini janta Tejawoonikaki, potyaanteeyakinariniokaatzi koetyeemotakinari. Eejatz paashini pipakaantaana.

<sup>17</sup> Tee nokowakaawitzimi pipapiintena oetarikapaeni, omaanta nokowaperotaki pimatayiteroni kameethatatsiri, kameetha ipinataperoyantemirini Tajorentsi.

<sup>18</sup> Ipapaakinawo Epajororiito maawaeni pipakaantakinari. Okameethaperozioni iroka pantakiri, okimitaka riro pipakiri Tajorentsi maawaeni. Iñaaperotakiro, riweshiryaaawentakimi. Iroñaaka ojeekimotaperotakina oetarikapaeni, tekatsi paashini koetyeemotenani; monkaataka.

<sup>19</sup> Pameentaperotakari Jesokirishito, rootaki retakoeyantemirini Tajorentsi, ipaeyemini maawaeni koetyeemoeeyakimirini. Ashaagantzinkari rirori, tee imashithatzi. Tema reewawanantaperotzi, ikameethaperotzi.

<sup>20</sup> Thame añaaperooyerini Pawa Tajorentsi, akanteetatyeyaaani. Aritaki akantaperooyaani.

### *Riweyantakawo Paaworo rojankinari*

<sup>21</sup> Nowethateeyemini, eejatz nowethateeyariri maawaeni riraga aapatziyariri Jesokirishito. Riwethateeyakimini eejatz maawaeni ayemijantzinkarite jaka.

<sup>22</sup> Eejatz riwethateeyakimini maawaeni aapatziyariri: riraga ratziritepaeni Seesari, maawaeni.

<sup>23</sup> Nokowaki ineshironkaperoyeremini Awinkatharite Jesokirishito. Piweshiryaaawenteeyaaarini, maawaeni.

Naaka jankinatzimirori iroka:

Paaworo

## ROJANKINATZINIRI PAAWORO KOROJAASHIJATZI

**1-2** ḋEeniromi, noyemijantzinkarite, maawaeni aapatziyariri Jesokirishito janta Korojaashikinta? Naaka Paaworo nojankinatzimiro. Naaka Rotyaantanewo Jesokirishito, rootaki nokenkithatakaantzimiri, rootaki ikowakaakinari Tajorentsi. Notsipatakari jaka ayemijantzinkarite Temoteeyo. Nojankinatzimiro maawaeni aapatziyaperotariri Tajorentsi jaga pinampiki. Nokowaki ineshironkatapiintemi eejatzi riweshiryaa kayemi Pawa Tajorentsi, eejatzi rirori Awinkatharite Jesokirishito.

### *Ipaasonkitakowentziri Paaworo korojaashijatzi*

**3-5** Paerani pikemakironi iñaani Jesoshi paapatziyakawo, rootaki paw-ijakotantari. Kyaaryo iroka pikemakiri. Eejatzi piyoteeyawakironi kameetha ijeekakayemi riraga Tajorentsi janta jenokinta. Rootaki paa-patziyantaperotakariri Awinkatharite, eejatzi osheki pineshironkaper-otziri maawaeni ayemijantzinkarite. Nokemakotakimi, rootaki maawaeni kitejiri namanantapiintariri Tajorentsi, nokantapiintziri imatakaapiintemiro kameethatatsiri, eejatzi noñaaperotziri Tajorentsi, riraga ashitariri Awinkatharite Jesokirishito. Eerokateeyakini nopaasonkitakowentziri.

**6** Pikemakiro iyaatakotayanakini iñaani Tajorentsi maawaeni nampitskipaeni. Raapatziyeeyakarini Jesokirishito oshekini riroripaeni. Pike-mantakawori eerori, piyotaperotawakiro kyaaryo ineshironkatake riraga Tajorentsi. Paapatziyawakawo rootaki kaari pikimitanta paerani, omaanta eekiro, eekiro piyotakiro pantero ikowakiri rirori. Eejatzi ikimitakimi paashinipaeni kemaperotakirori ipaashiniperoteeyeeni.

**7** Rioma Epajagashi rirotaki kenkithatakaakimirini paerani. Ikim-itanan, ikantani ikyaaryoowentziniri Jesokirishito. Kameetha ikyaaryoowentziniri, rootaki notyaanantariri ikenkithatakaantayitakimirini.

**8** Ikamantapaakina omatakaakimiro Ishire Tajorentsi, rootaki pineshi-ronkaperotantakariri paashinipaeni atziri.

**9** Rootaki namanapiintariri Tajorentsi: "Pimatakayeri pikowakaakiriri maawaeni noyemijantzinkarite janta Korojaashiki".

Roojatzi nokantani nokantapiintziri Tajorentsi: "Piyotakayeri korojaashijatzi maawaeni pikowakaakiriri kameetha raapatziyantaperotemiri". Eejatzi nokantziri: "Nokowaki Pishire iyotaaperoteri maawaeni, iyotakaaperoteri, kameetha ikemantaperotyaawori pikantziri".

**10** Eejatzi nokantziri imatakayemiro apatziro pikenkithashiryaaapiintero pantero kameethatatsiri, piweshiryaaakaaperotantyaariri, eejatzi panantyaawori maawaeni kameethatatsiri. Rioma rirotaki Awinkatharite, rootaki okameethatantari anteniri iroka, iñaaperotanteeri. Nokantziri imatakayemiro apatziro pantero kameethatatsiri, rootaki imatakayemiro piyotantyaariri, eekiro, eekiro piyoperoteri.

**11** Rioma rirotaki Tajorentsiper, ikameethaperotaki, imataperoteri oetarika ikoyiri, rootaki nokantantariri imatakaantemirori pimatantapiintyaawori maawaeni kameethatatsiri, eero pijamashiryawo inta piki-moshirewentanakiri Tajorentsi. Rooma aririka rowashironkaawitemi atziri, rirotaki matakayemironi Tajorentsi eero pipiyatantari pikijiri.

<sup>12</sup> Rooma rirotaki owameethatakaeri, riwetsikashiryaaakae aatantyaari janta ikashiyaakaakaera. Rooma ari akaateeyapaakirini maawaeni ayemijantzinkarite janta okitejiperotzinta, kameetha ajeekapae. Rootaki akanantakiriri Tajorentsi: "Ariwee, Pawa".

### *Ikenkithatakotakiri Jesokirishito*

<sup>13</sup> Paerani reewawenantawitakaerini iwinkatharite kamaaripaeni rootaki akimitantawitakaririni ajeekawitani janta otsiteniperotzinta. Omaanta rowawijaakotake Tajorentsi, rootaki iroñaaka reewawenantakaeri Itomi, riraga inintaperotanewo rirori.

<sup>14</sup> Ikamawentakae riraga Itomi, rapaatawentakae riraa rowawijaakotatakaeri. Ineshironkaperotakae Iriri, iroñaaka eero ikenkithashiryaaakoteero kaari kameethatatsi antawitakari paerani.

<sup>15</sup> Kaari ikoñaanitzi Pawa Tajorentsi, omaanta ipokapaaki jaawikika Itomi, ikoñaatapaaki kipatsikika, rantaritapaaki jaka. Omaanta ikimitaperotari Ashitariri. Tekirani ojeekini kipatsi eejatzi maawaeni oetarikapaeni añaayitzirini, ari ijekitani janta jenokinta rirori.

<sup>16</sup> Rivotaki wetsikakiriri maawaeni: jenokijatzi, kipatsijatzi, koñaatatsiri, kaari koñaatatsi, maawaeni. Aritaki riwetsikakiriri maawaeni rinashitayitakan ronampiri Tajorentsi. Rivotaki Jesokirishito wetsikakiriri maawaeni. Tee riwetsikashitarit, inta riwetsikantayitakaririni maawaeni iñaaperoteri.

<sup>17</sup> Rivotaki Jesokirishito itaperotakaworiky ijeekitani paerani. Ikantakiri maawaeni riwetsikan: "Aritaki pikanteeyaani".

<sup>18</sup> Rivotaki Jesokirishito iyoperotatsiri reewatawentakae aaka, eejatzi maawaeni paashinipaeni aapatziyariri. Tekatsimi rirori, eeromi ayotzirimii Tajorentsi, eeromi aapatziyarimi, eeromi awijakoteemi. Ipiriinteri Itomi riraga Tajorentsi paerani, eero ikamae eejatzi. Rivotaki Jesoshi itakawori ipiriinta. Riro impaetatsini kaminkari ipiriintee aririka omonkaatapaakya ipokantaatyari Jesoshi jaka kipatsiki. Kyaaryo ipinkathariperowenantziroña maawaeni,

<sup>19</sup> itajorentsiperotakiroña. Rootaki ikowakaakiriri Ashitariri.

<sup>20</sup> Paerani eenitatsini kaari kameethatatsi rantawitarini maawaeni atziri, rootaki kaari riweshiryaaantawita riraga Tajorentsi, omaanta rotyaantakiriri Itomi ikamawentakae koroshiki, rapaatawentakae riraa. Ikamawenantakaeri kameetha atsipatanteeyaariri rirori, rootaki roemoshirenkan-takaeri. Rowameethatakae eejatzi ikoyi rowameethateri maawaeni kipatsijatzi eejatzi jenokijatzi. Iroñaaka iñaaperotakae akameethatzi, eejatzi añaaperoteeri rirori.

### *Ikenkithatakoteri korojaashijatz*

<sup>21</sup> Ari, paerani tee pikenkithashiryaaapiintzirini Tajorentsi, pikijawitarini. Pikenkithashiryaaawitawoni kaari kameethatatsi, eejatzi pantapiintawita-woni.

<sup>22</sup> Omaanta ipokapaaki Jesokirishito kipatsikika, ikoñaatapaaki ikimitakotawitapaakae aaka. Roojatzi ikamawentakae koroshiki rowameethatatakaeri, rootaki iroñaaka piñaaperotantariri Tajorentsi ikameethatzi, eejatzi iñaakimi eerori pikameethaperotaki, ikimitakaantimi tee pantziro kaari kameethatatsi.

<sup>23</sup> Omaanta ikowaki akantatyeeyaani aapatziyawo iñaani. Eekiro aatatyee aapatziyaperotanakyawo. Piyataperote kyaaryoopero atsipataperotyari Tajorentsi paata jenokinta. Eero pipakayiro paapatziyawo iñaani. Ñaakiro, othotyaaka okamantakotaka iñaani Tajorentsi maawaeni nampitsiki. Eejatzi naari nokenkithatakotakiro, notsipatakari paashinipaeni kenkithatakanantatsiri.

### *Riyoteeri Paaworo kaari riyotawitani paerani*

<sup>24</sup> Osheki ikemaatsitakawo Jesokirishito rowawijaakotantakariri maawaeni aapatziyariri, iroñaaka ikimitakaantakae aaka inampijatzipero, rooma aapatziyakari. Iroñaaka okimitaka maawaeni aapatziyariri ikemaatsitawentyaari paashinipaeni rawijakontanyaari, eejatzi naaka nokemaatsitawentzimi, niyotaantzimiri paapatziyari rirori, rootaki nokimoshiryantaari. Monkaataka iroñaaka.

<sup>25</sup> Ikantana Tajorentsi: "Pineshironkateri maawaeni piyemijantzinkarite, eejatzi piyotaaperoteri nokoyiri". Ari iroñaaka niyotaakimiro.

<sup>26</sup> Niyotaakimiro maawaeni kaari riyotawitani paerani ronampiripaeni Tajorentsi, eejatzi kaari riyoteeyawitani atziripaeni. Iroñaaka riyotakaakaero aaka eejatzi maawaeni paashinipaeni aapatziyariri.

<sup>27</sup> Iroñaaka ikowaperotaki piyotero imatakaakimiro; okameethaperotziroña. Eeroka kaari joriiyotsatsi, omaanta ikamawenteeyakimini eeroka eejatzi rootaki kijokiro rowaperotantzimiri Jesokirishito pishireki, rootaki piyotantari kameetha pijeekeimotaperoteri Tajorentsi iinja.

<sup>28</sup> Rivotaki Jesokirishito nokenkithatakotziri. Nokantziri maawaeni atziri: "Kyaaryoowa, pantzirokari kaari kameethatatsi". Eejatzi niyotaaperotziri irinta riyotaperantyaaariri riraga Jesokirishito, raapatziyaperantyaaariri kameetha. Eejatzi eeroka, aririka piyoperoteri, paapatziyaperotyaaariri, ari pikimitaperotaari Tajorentsi pikameethaperotanaki.

<sup>29</sup> Rootaki nopomeentsiwenantzimirori, kaari noperawenantzimi. Eejatzi rootaki niyotaantakariri maawaeni. Imatakaakina riraga Jesokirishito, rivotaki shintsitakaakinari, itajonkawentakina nomatantakawori.

## 2

<sup>1</sup> Nokowaki piyote nokantani nopomeentsitawentzimi nokenkithatakayiri Tajorentsi. Nokantapiintziri imatakayemiro kameethatatsiri, eejatzi nokimitakowentziri ayemijantzinkarite janta Raworisheeyaki. Eejatzi nopomeentsitawentziniri maawaeni kaari naana, nokantapiintziri Tajorentsi imatakayeri rirori kameethatatsiri.

<sup>2</sup> Nokantapiintziri eejatzi imatakayemiro piweshiryantaari, pineshironkatawakaantyaaari. Eejatzi nokowaki imatakayemiro pikemaperoteri maawaeni rantawentzimiri Jesokirishito. Rootaki nokowakiri piyoperoteri Jesokirishito.

<sup>3</sup> Paerani tee riyotawitarini atziri irira, omaanta iroñaaka riyoteeri rirori. Jee, nokowaki piyoperoteri kameetha. Rootaki nakanantakimiri.

<sup>4</sup> Omaanta eenitatsi paashini atziripaeni rinashita riyotaantzi. Kyaaryoowa, ramatawiteztimikari, rootaki niyotaantzimirori maawaeni iroka.

<sup>5</sup> Kyaaryo, tee notsipatawitzimi, omaanta osheki nokenkithashiryaaakimi. Niweshiryawentakimi kameetha pijeeki. Kyaaryo, pineshironkatawakaaka, eejatzi eekiro piyaatatzpi apapatziyaperotari Jesokirishito, rootaki niweshiryantaari.

### *Kijokiro poyeri Jesokirishito*

<sup>6</sup> Rooma paerani paapatziyakari Awinkatharite Jesokirishito, rootaki rowawijaakotantakimiri. Rootaki iroñaaka, eekiro piyaatatzpi apapatziyaantariri apatziro irira: maawaeni kitejiriki panteniri oetarikapaeni ikowakaakimiri.

<sup>7</sup> Noshiyakaawentemiro: rowaga pankirents, aririka oparithaperotaki inthomaeki kipatsi, rootaki oshookantari kameetha, eejatzi oshintsitan-takari. Eejatzi pikimtanakya eerori, kijokiro poyeri Jesokirishito. Ap-atziro pikenkithashireeri, ari imatakayemiro kameethatatsiri, eejatzi ish-intshiretakayemi. Pikantatyeeyaani pikemijantaperoteri, rooma rootaki riyotagaetakimiri. Aritaki pikantya, eekiro piyaatatye pipaasonkiteeyerini Jesokirishito, tema ineshironkaperotakae.

<sup>8</sup> Omaanta eenitatsi paashini atziripaeni inashita riyotaantzi. Kyaary-oowa, riyotaantziro theeyaantsi, rowaga maawaeni ikenkithashiryara rirori eejatzi maawaeni riyotashitawitari: rootaki riyotaanteeyawitarini ichariniuteni, itaperotakaworini ijekkini. Ramatawitzimikari. Eero paap-atziyari. Tee riyotagaero ikantaperotziri Jesokirishito: tema tee ikowakay-imiro paapatziyari.

<sup>9</sup> Inta okameethatzi paapatziyari irira. Paerani ikimitakae awatha aaka, omaanta itajorentsiperotakiroña, ashi royo.

<sup>10</sup> Eejatzi eerori, aririka kijokiro poyer, paapatziyari, ikantyaani itajonkawentapiintemi, eero powashironkaantaroña, inta ipashitzimiro maawaeni koetyemotzimiri. Ipinkathariperowenantziroña, ranaakoperotziri maawaeni paashinipaeni jewatawitachari.

<sup>11</sup> Paerani ikantzini Tajorents iotonateeyani ishiramparitantari joriyyopaeni, rootaki riyotantakari atziri raapatziyakari Tajorents. Omaanta iroñaaka aririka paapatziyari Jesokirishito, inashita ikowakayimiri. Kaari pitotonatantyaawo. Iroñaaka kimiwitaka pitotonatapiro, omaanta rówameethatatakimi pishireki pipakaantaawori kaari kameethatatsi pantzirini, iroñaaka eero pikoyiro pantapiintero.

<sup>12</sup> Eeroka ikaawoshitanteetakimiri, kimiwitaka itsipatifikimi Jesoshi, pikamaki eejatzi kimiwitaka romonkeetakimi omookinta. Tema Tajorents ipiriinteri Jesoshi, eejatzi eeroka kimiwitaka ipiriinteemi. Tema paapatziyakari riraga Tajorentsiper, riraga piriinterirri Jesokirishito, rootaki ipaashinitakaanteemiri. Iroñaaka tekatsi pikanteeyaa pantero kaari kameethatatsi, rooma kimiwitaka pikamakitzi.

<sup>13</sup> Paerani okimitzimotakimi tee pañi, tee pikenkithashireerini Tajorents; inta pantapiintawitawoni kaari kameethatatsi. Tee piyotawitarini riraga Tajorents. Iroñaakkaya ineshironkatakimi, tee ikenkithashiryagaero kaari kameethatatsi pantawitarini. Rowameethatantakimiri panteero kameethatatsiri, pikimitakari Jesokirishito.

<sup>14</sup> Paerani osheki apomeentsiwentawitakawoni rojankinarini Moeseeshi awijakontanyaarimi, omaanta tee amonkaatzironi. Ayotaki eenitatsini kaari kameethatatsi antzirini, rootaki aatantyaarimi paamarikinta ake-maatsityawomi. Omaanta ikamawentakae Jesokirishito koroshiki, rowaw-ijaakotakae. Iroñaaka eero apomeentsitawentawo ironta jankinarentsi awi-jakontanyaari.

<sup>15</sup> Paerani, ikamantari Jesokirishito koroshiki, riyotakaakae tekatsi ikante rowashironkae riraga iwinkatharite maawaeni kamaari eejatzi maawaeni pinkathatziriri riraga paashinipaeni kaari iñagaetzi. Ithañaakowentakae Jesokirishito, eero ishinetziri irintapaeninta ranaakotee.

### *Eero pikenkithashiryaa wo riyotaawitzimiri atziripaeni*

<sup>16</sup> Tee okameethatzi ikijantemiro atziripaeni oetarika powayitarini eejatzi pimiritayitzirini. Eenitatsi osheki kitejitsatsiri rinashitakayitakarini joriyyopaeni imakoryaanteeyarini. Rantzironi: maawaeni ojarentsi, maawaeni kashiri eejatzi maawaeni saawaro. Teerika pimonkaatziro eerori, eero pishinetziri ikijawentemiro.

<sup>17</sup> Paerani ikantani rametapiinteeyawoni joriyyopaeni, ikenkithashiryaaanttariri Tajorents, omaanta iroñaaka rareetaka Jesokirishito. Riroperotaki apinkatheeeyerini. Monkaataka, ari okaatzi: eero iroñaaka apiitapiintero rameteeyarini joriyyopaeni.

<sup>18</sup> Kyaaryoowa, eero pishinetziri riroripaeni ramatawitemi. Inashita oetarika riyotaantziri. Ikowakaemikari pikimityaari rirori, ikantzimikari: "Pipinkathateri ronampiri Tajorents pawijakotantyaari. Noñaakiro kaari iñaapiintziri paashinipaeni, ¿piñaakiroma eerori?" Ikantakaaperotashita. Eero pikenkithashiryawo ikantawitzimiri, itheeyashita.

<sup>19</sup> Tee raapatziyaperotari riraga Jesokirishito, omaanta irira rirotaki Jewateeni. Aakakya, aririka akenkithashireer irira apanairoeni, kameetha aapatiyaari. Riyotakaakae, imatakaakae kijokiro owakiri ayemijantzinkarite antaperantuyaawori ikowakaakaeri Tajorents.

<sup>20</sup> Ikamaki Jesokirishito, ejatzi okimiwitaka itsipatakimi pikamaki eerori. Iroñaaka eero pikenkithashiryawo riyotaawitzimiri atziripaeni, eero owawijaakotzimi. ¿litaka patsipetashitantawori pantashiwitakawo ikantzimiri irintapaeni?

<sup>21</sup> Tee okameethatzti ikantawitzimiri: "Aririka pikowaki pawijakote, eero pipampitziro okaatzi ithaawakari Tajorents, eero powari kaari ishinetzi Tajorents, eero poteeyiro ithaawakagaetari".

<sup>22</sup> Tee rootaki ikantziri Tajorents. Rooma riyotashitakawo atziripaeni iroka, riyotaashitzimiro. Pamine, riwetsikakaero Tajorents maawaen iwanawontsi owaeyarini. Aririka owaeyawo, ari okaatzi, thonkapaaka. Tekatsi okantziro ashire.

<sup>23</sup> Aririka atzityaawo owanawontsi aetakaashitakari ayotzi, aetakaashitakari aapatziyaperotakari Tajorents, aetakaashitakari tee akantakaaperota, aetakaashitakari ashironkaawentakari Tajorents. Omaanta atsipetashitakawo atzita. Aririka atzitayitaawoni owanawontsi, akantatyaaani akoyiro kaari kameethatatsi, tee akoyi amaejantero, ejatzi akantakaaperotaka.

### 3

#### *Ikanteri: "Kameetha pijeeki"*

<sup>1</sup> Paerani tee piyoteeyawityaarini Tajorents, piyaateeyenimi paamariki kaari tsiwakanitatsini; omaanta ikamawenteeyakimini Jesokirishito, rowawijaakoeyakimini. Roojatzi ipiriinanta; rootaki iroñaaka piyotantariri Tajorents, eero piyaateeyeeni paamariki, inta piyaateeyeeni jenokinta: janta ijekinta Jesokirishito rakoperoki Ashitariri, itsipatapaari ipinkathariperotzi. Iroñaaka eekiro piyatatyte pikowaperotanaki pijeekaayeni janta, pitsipateeyantapaeyaaririni.

<sup>2</sup> Rootaki kaari apatziro pikenkithashiryaaantapiintawo tsika pikantyaari jika jaawikika, inta pikenkithashiryakotaperotayaawo jenokinta, rowaga tsika ikanta Tajorents, ejatzi oetarika ikowakayimiri.

<sup>3</sup> Okimitaka pikamaki, eero iroñaaka pikenkithashiryayiteroni jeekatsiri kipatsikipaeni, eero pikimitaa paerani. Omaanta rafñaakagaemi Tajorents, pijeekantapaeyaari jenokinta. Ikempoyaaperotakimi, ikimitakaantakimi riraga Jesokirishito.

<sup>4</sup> Linja ipiyee kipatsikika Jesokirishito, riraga añaakaeyagaerini. Kameetha ipinkathariperotapaaki, akaateeyapaerini apinkatharitapae aakapaeni.

#### *Eero papiitziro kaari kameethatatsi pantawitarini paerani*

<sup>5</sup> Iroñaaka kimiwitaka kamakimi omaanta rowañaagaemi Tajorents, rootaki kaariroña papiittanteeyawo kaari kameethatatsi pantawitarini

paerani. Eeroka shirampari, eero pishirontawo tsinani kaari payi. Eeroka tsinani, eero pishirontari kaari piimi. Shirampari, eero pantatenkatawakaa pishiramparinkaki, pikimitakaantyaari riro tsinani. Tsinani, eero pantatenkatawakaa pitsinaninkaki. Eero pikowaperotziro pantero iroka, eejatzi oetarikapaeni kaari kameethatatsi. Eero piñaawenatapiintawo pipiyotaperotero pashaagawo maawaeni kitejiri. Aririka pikenkithashiryaaapiintero pipiyotero, pikimitakaantakawo rootaki pitajorentsite.

<sup>6</sup> Osheki rantayitzironi atziri irokapaeni, rootaki rowashironkaantyaariri Tajorentsi iinja.

<sup>7</sup> Paerani pantapiintawitawoni, ashi moyironi.

<sup>8</sup> Iroñaka pipakaoroña iroka: eero pikijawakaa, eero pimanintawakaa, eero powariperotawakaa, eero pikantzimatawakaa, eero powashiyakothatanta,

<sup>9</sup> eero pamatawitawakagaeyani, kameetha pijeeki; rooma iroñaka tee pikimitagaeya paerani, eero papiiteero pantawitakari, kameetha pijeeki.

<sup>10</sup> Paashinishiretayiteemini, tema rowameethateemi Tajorentsi. Iroñaka pikameethashireperotanaki, pikimiteeyaaarini riraga Wetsikanakimiri paerani. Eejatzi maawaeni kitejiri tema rirotaki amitakotzimiri pantero kameethatatsiri, eekiro piyaatataye piyotaperoteri kameetha.

<sup>11</sup> Tee ikenkithashiryaaakotero Tajorentsi tsika akantri: omawitya riorika joriyotatsiri, kaari joriyotatsiri, totonatachari ishiramparitantari, kaari totonatziro, poñachari paashiniki kipatsi, yotzinkari, kaari yotzinkari, pimantaarewo, kaari pimantaarewo, omaanta ikenkithashiryaaakoteeri aapatziyakaririka Jesokirishito riraga Awinkatharite.

### *Tsika akantyaaka ajeekae aakapaeni aapatziyariri Jesoshi*

<sup>12</sup> Pamine, ineshironkaperotakimi Tajorentsi. Rowameethatakimi pishireki, rooma riyyaakimi reentsitezimi. Rootaki ikowakaakimiri ashi moyero petakotantya, pikamintaante, eero pikantakaaperota, pitsinampashirete, eero peshiwentziro.

<sup>13</sup> Poyaakotawakagaeyani: eero pipiyatakotari kijawitemiri, inta pipeyakoteniri eejatzi pineshironkateri. Rooma ipeyakotzimiro Awinkatharite kaari kameethatatsi pantziri. Eejatzi pikimiteri atziripaeni eerori pipeyakoteniri oetarika rantzimatowitemiri.

<sup>14</sup> Iroka kameethaperotatsiri pantaperoteri: eekiro pinintashireperotawakagaeyanakyaani maawaeni. Ñaakiro, aririka anintashireperotawakaaya, aritaki aakameethatawakagaeyanakyaani maawaeni.

<sup>15</sup> Piweshiryaaawenteeyarini riraga Jesokirishito. Rootaki riyyaan-takimiri Tajorentsi piweshiryaaawentyaari rirori. Roojatzi pikantyaani pi-paasonkitapiinteri.

<sup>16</sup> Pikantyaani pikenkithashiryaaoperotantyaawori iñaani Jesokirishito. Pikanteri riyofakayemi kameetha piyotaawakagaeyantyaarini ikowakaakimiri Tajorentsi. Eejatzi pikantawakagaani: "Thame aweshiryaaawentyaari Tajorentsi". Ikamintheeyakimini Tajorentsi, iroñaka pipaasonkiteeyirini. Pomampaawenteeyarini irira maawaeni pajankaneki, pomampaawaetya okantziri Iwaperite. Pomampaawentyaari Tajorentsi, eejatzi pomampaakotyaawo Ishire Tajorentsi iyotashiretakaakimiri.

<sup>17</sup> Tee akowaeyeni ipashiwentakagaeyeeni Awinkatharite Jesoshi, rootaki nokowakaantakimiri powameethatayiteroni maawaeni oetarika pantero. Okameethatzi akenkithashiryaaapiinteri, apaasonkiteeyantyaaririni Tajorentsi.

### *Ikantziri tsika akanterika atziripaeni*

<sup>18</sup> Eeroka tsinani, pikemijantaperoteri piimi, rootaki ikowakaakimiri Awinkatharite.

<sup>19</sup> Eeroka shirampari, pineshironkaperoteri piina, eerokya pikijathatziro.

<sup>20</sup> Eejatzi eeroka eentsi, pikemijantaperoteri piri oetarikapaeni ikantemiri. Eejatzi pikimitero piniro, pikemijantaperoteri oetarikapaeni okantemiri. Tema rootaki inimotziriri Awinkatharite.

<sup>21</sup> Eenitatsirika pashi peentsitepaeni, kameetha pikemijantakayeri. Omaanta eero pikijathatapiintziri, pikantakaashiryaaakaneentarikari.

<sup>22</sup> Pimantaari, pikemijantaperoteri riraga amanantzimiri, oetarikapaeni ikantzimiri. Eero pamatawitziri: omawitya eerorika raminimi, omaanta kameetha pantawaeteniri. Pipinkathatziririka Awinkatharite, ari pikyaaryoowenteniri rirori kameetha piwaatorote.

<sup>23</sup> Oetarikapaeni panteniriri, pikyaaryoowenteniri. Pikimitakaantyaari riro Awinkatharite pikyaaryoowentziniri, tee riro atziri.

<sup>24</sup> Piyoperotaki pikyaaryoowenteniri Awinkatharite Jesokirishito, rirotaki pinatemini iinja, rañaaperotakagaemi janta Tajorentsikinta.

<sup>25</sup> Omaanta riraga antapiintzirori kaari kameethatatsi, ari rowashironkaakiri Tajorentsi. Oetarikapaeni anteeyakirini, eenitatsi ikanteeri aaka iinja, tekatsi akantya amatawiteri.

## 4

<sup>1</sup> Eeroka antawaetakaantatsiri, pineshironkateri patzirite, kameetha pipinateri. Eero powashironkaashitari, kameetha pijkeki. Rooma piyotzi ijeeki janta jenokinta Piwinkatharite, riyotaki maawaeni pantziri.

### *Pikenkithatakaapiinteri Tajorentsi*

<sup>2</sup> Pikanyaani pamanapainteri Tajorentsi, maawaeni kitejiri. Pikenkithashiryaakoperaotaari oetarika ikantziri, eejatzi ikoyiri, eejatzi pikantapiinteri: "Ariwee Pawa, paasonki", rooma ikameethaperotaki.

<sup>3</sup> Rooma nokamantapiintziri atziripaeni tsika ikantyaari rawijakotanteeyaari, rootaki romonkyaanleetakinari jaka omonkyaaagamentotsiki. Pamani Tajorentsi ramitakoeyenani nokamanteeeyerini paashinipaeni atziri tsika ikantakaeri Jesokirishito rowawijaakotantakaeri.

<sup>4</sup> Pikanteri imatakayenawo kameetha nothotyeeniri atziripaeni, ikemaperotantyaawori.

<sup>5</sup> Eejatzi aririka pitsipatyaaari kaari aapatziyariri Jesoshi, nokowaki kameetha pijkeki, eero pipashiwenta. Eejatzi kameetha piyotagaeyerini, eero piperashiryaaawo.

<sup>6</sup> Aririka pikenkithatakayeri, pineshironkateri, kameetha ikemaperotantemiri. Eero poñaashirenkiri piñañaatzziri. Aririka rojampitemi oetarika, piyote kameetha tsika pikanteri pakeri ikowantaperotaari rirori raapatziyari Jesoshi.

### *Ikenkithatakotziri Teekiko*

<sup>7-8</sup> Iroñaaka notyaantemiri Teekiko, ayemijantzinkarite nonintashireperottziri. Ikimitakina, ikyaaryoowentziniri Awinkatharite oetarikapaeni rantziri. Ikamantapaakimi tsikarika nokanta nojeeakaki. Rootaki notyaanantyaariri, piyotantyaari tsikarika nokanteeyarini jaka, eejatzi nokowaki riweshiryaaakayemi.

<sup>9</sup> Itsipatanakyaari irira Oneeshimo, poñaachari piipatsiteki. Rirotaki ayemijantzinkarite: ikyaaryoowentziniri Awinkatharite oetarikapaeni

rantziniriri. Nonintaperotziri. Ari ikaate apite kamantapaakimini maawaeni oetarika awiheitsiri jaka.

### *Riweyaantari riwethatzyaari korojaashijatzi*

<sup>10</sup> Eenirotziri jakaa eejatzi Arishitaariko, riwethatzimi. Ikaatakina nokyaaryooowentziniri Awinkatharite, rootaki romonkyaanteetekariri eejatzi naaka. Eejatzi riwethatzimi Marikoshi, riraga rirentzithori Werenawee. (Tema irika Marikoshi rirotaki nokamantakotakiri paerani. Nokantakimi: “Aririka rareetakya pinampiki, paakameethawakiri”.)

<sup>11</sup> Eenitatsi jakaa eejatzi Jesoshi, iitachari eejatzi Jooshito, riwethatzimi. Rirotaki joriyyopae ni omaanta ikaateeyakinani nokenkithatakotziri Tajorentsi tsika ikantari reewawenantee. Eejatzi osheki riweshiryakaakina. Paashinipaeni joriyyotatsiri tee ramitakotana.

<sup>12</sup> Eenirotziri Epaajagashi riwethatzimi eejatzi. Poñaachari pinampiki. Rirotaki kyaaryooowentziniriri Jesokirishito eejatzi. Ikantani ramanapiintziri Tajorentsi imatakayemi pikimtyaari, pikameethatantyaari, eejatzi pimatantyaawori maawaeni ikowakaakimiri.

<sup>13</sup> Nokantem: kyaaryo, ikyaaryoowentziniri rirori. Eejatzi ikyaaryoowentziniri riraga raworisheeyajatzi, eejatzi riraga iyeraaporeshijatzi.

<sup>14</sup> Eejatzi riwethatzimi Rookashi, riraga aawinantsirtsri noneshironkaperotziri. Eejatzi riwethatzimi irira Teemashi.

<sup>15</sup> Niwethatar maawaeni ayemijantzinkarite janta Raworisheeyaki, eejatzi niwethatawo Nijowa, eejatzi niwethatar maawaeni kemijantapiintzirori iñaanai Tajorentsi janta opankoki.

<sup>16</sup> Piñaanatawakiniri nojankinari maawaeni ayemijantzinkarite eerokakinta. Roojatzni pikanteri riraga raworisheeyajatzi iñaanatawakiniri maawaeni iyemijantzinkarite rirori. Eejatzi piñaanatawakiro nojankinatiniriri irinta.

<sup>17</sup> Iroka pikanteriri Arikiipo: “Pimonkaateniri maawaeni ikowakaakimiri Awinkatharite, eero piperawentawo”.

<sup>18</sup> Naaka Paaworo nojankinatamiro nakoki: “Nowethatzimi”. Eenirona nojeeki jaka omonkyaagamentotsikika, eero pipeyakotziro. Nokowaki ineshironkateemi Tajorentsi.

Ari okaatzi.

Naaka jankinateeyimironi:

Paaworo

## RITAKANARI PAAWORO ROJANKINATZINIRI TEJAWOONIKAJATZI

<sup>1</sup> Nokoyi niwethatemi eerokapaeni, noyemijantzinkarite, maawaeni aap-atziyariri Jesokirishito janta Tejawoonikakinta. Naaka jakaa Paaworo, not-sipatari Shuirashi eejatzi Temoteeyo nojankinatzimiro iroka. Tema eeroka sheninkateeyakaririni Pawa Tajorentsi eejatzi Awinkatharite Jesokirishito. Nokowaki ineshironkatapiinteeeyemini eejatzi kameetha ijeekakagaeyemini.

### *Riraga tejawoonikajatzi osheki rameentari Jesoshi*

<sup>2</sup> Nokantatyeyeeyaanii nopaasonkitziri Tajorentsi: nopaasonkitawenteeyimini eejatzi nokantani namaniri ramitakoeyemini.

<sup>3</sup> Nokenkithashiryapiintzimi osheki paapatziyeeyakarini Pawa, rootaki panantanakananariri maawaeni ikowakaakimiri. Eejatzi nokenkithashiryakimi pineshironkateeyirini, rootaki pamitakotantariri paashinipaeni atziri, pikyaaryooentziro, eejatzi pinintashiryaawakaaka. Eejatzi nokenkithashiryakimi pikyaaryooentziro pameentakari Awinkatharite Jesokirishito, paamaantaperotariri ipiye.

<sup>4</sup> Noyemijantzinkarite, ikantani ineshironkatakimi Tajorentsi. Niytaki riyooyeeyakimini, rootaki reentsitetanteeyakimirini.

<sup>5</sup> Piyoteeyakini paerani nokamanteyeyakimini tsika pikantyaari pawijakotanteyeyarini, tee nokantashitzimi. Iyotaakimi Ishire Tajorentsi kyaaryooperotakikya nokantakimiri. Eejatzi piyotzi okameethatki maawaeni nanteeyakirini, rootaki piyotantakari kyaaryooperotakikya okaatzi nokantakiri.

<sup>6</sup> Oetarika piñaakotakinari nantakiri naari, aritaki pikimitanteeyakinarinii eerori, paapatziyawo ikantziri Awinkatharite Jesoshi. Pikemaperotantari ikantziri irira, pameentakari roojatzi pikimitakari. Osheki rowashironkaakimi kaari aapatziyari, omaanta eekiro piweshiryaanakity; kaari pikantashiretzi, iweshiryaakaakimi Ishire Tajorentsi.

<sup>7</sup> Kameetha pijeevakki, rootaki ikowantakari ikimitemi maawaeni ayemijantzinkarite janta kipatsikipaen owaero Masherooniya eejatzi Akaaya.

<sup>8</sup> Aritaki powaaganakiro ikantziri Awinkatharite. Tee apaniroeni ike-makotakimi riraga masherooniyajatzi eejatzi Akaayajatzi, inta ikemakotakimi maawaeni paashinipaeni atziri paapatziyaperotakari Tajorentsi. Iroñaka tee nokamantziri naari, rooma ryotakotakimi paapatziyari Jesoshi,

<sup>9</sup> eejatzi ikenkithatakotashiteeyakimini. Riyoteeyakini maawaeni atziri paerani niyaatantashiteeyakimirini, niyotaakotakimiri rirori kameetha. Riyotaki pookaeyakironi maawaeni piwetsikashitawitari piitajorentsivitari, roojatzi pameentakari Tajorentsipero, riraga Añaaperotatsiri. Iroñaka paapatziyeeyaarini apatziro irinta: pikyaaryooentziniri ikowakaakimiri.

<sup>10</sup> Eejatzi ikenkithatakotashitakimi pikantyaani paamayari riraga Itomi Tajorentsi. Arimachee ipokae, ipoñakya jenokinta. Ikamaki paerani, ijeekaki 3 kiteziri omookinta. Roojatzi ipiriinteeri Tajorentsi, rañaakazaeri, roojatzi roenokantanaa jenokinta, eejatzi ipiye iinja. Ari rowashironka-gaeyerini iinja maawaeni kaari aapatziyari, omaanta eero athaawantari, tema rowawijaakotakae riraga Jesoshi maawaeni aari, riraga aapatziyaperotariri.

## 2

*Oetaka rantziri riraga Paaworo Tejawoonikaki*

<sup>1</sup> Piyotaki, noyemijantzinkaritepaeni, aririka nareetanteeyakimirini niyoteemi, tee natsipetashitawo.

<sup>2</sup> Piyotaki paerani tekirani niyaatzini pinampiki, ikijayitakinani janta Jiriposhiki, osheki nokemaatsitashitakawo eejatzi ishironteeawentakinanin inji, inji, inji. Omaanta ramitakotakina Tajorentsi imatakaakinawo rootaki kaari nothaawanta inta niyotagaeyakimirini maawaeni ikantziri Jesokirishito. Eejatzi osheki ipiyathatakina janta pinampirkinta, omaanta omatakaakina Ishire niyotaakotakimiri riraga Jesokirishito.

<sup>3</sup> Eejatzi piyotaki kameetha nokenkithatakaakimiro ikantziri Tajorentsi, tee nokompitawo. Tee namatawitzimi, inta niyotaakimi kameetha: tee notheeya.

<sup>4</sup> Omaanta iñaantakina rirori nokemijantaperotziririka. Tema iñaakina nantakiro, rootaki rotyaanantakinari nokamanantzimiri. Tee nokowashitawitari iñaaperotena atziri, inta apatziro nokoyiri Tajorentsi iñaaperotena nokameethashiretti. Rooma riyotzi irintapaeni maawaeni oetarika ak-enkithashiryari.

<sup>5</sup> Eejatzi piyotzi tee nokoyi kameetha niweshiryaaashiteeyemini namatawitantemiri, tee nokantashitzimi: "Pikameethaperoeyakini". Tee nokowashita piyorkite. Riyotzi Tajorentsi nokantzimiri kyaaryooperotatsiri.

<sup>6</sup> Tee nokowashita piñaaperotena eeroka, eejatzi tee nokowaki iñaaperotena paashinipaeni atziri. Omawitya naaka rotyaananewo Jesoshi,

<sup>7</sup> rootaki okameethatantawitari nokantemimi: "Piñaaperotena". Omaanta tee nokowaki. Tee nokimitari peewatzinkarite. Okimitaka aririka othoteeri tsinani eentsi otensi, oneshironkatantariri, eejatzi nokimitakaapaakimi, noneshironkatakami eerokapaeni.

<sup>8</sup> Osheki nonintaperoeyapaakimini, rootaki niweshiryaaantapaakari nokamanantapaakimiro okaatzi ikantziri Tajorentsi. Eejatzi nokyaaryooowentzimi namitakotakimi paapatziyaperotari Jesoshi. Iroñaka oetarikapaeni nantayitakirini, nokantani nokenkithashiryaaapiintzimi.

<sup>9</sup> Pikenkithashireyya, noyemijantzinkarite, nojeekantzimotakimiri osheki nantawaetakiroña kitejiriki eejatzi tsiteniriki, oshekini nomakotaperotakiwee. Tee nokoyi nonetheemi koetyeemotanari, rootaki nantawaetantari nopolinatantyaawori koetyeemotanari. Tee nokoyi pipomeentsiwente-nawo eerori pipashitayitenani oetarika. Nantawaetaki eenironi nokaman-teyakimironi ikantziri Tajorentsi.

<sup>10</sup> Piñeyakinanai naapatziyaperotakari Jesoshi, nomonkaatakiro ikowakaakinari rirori. Rootaki kameetha nojeekantakari, tekatsi kaari kameethatatsi nantziri, tekatsi nantani. Eejatzi iñaakina irira, kameetha nojeekimotakimi eeroka noyemijantzinkarite.

<sup>11-12</sup> Iroka noshiyakaawentemiri: tema kameetha riyoteeri shirampari reentsitepaeni. Piyoteeyakini nokimitakaanteeyakimini neentsitepaeni, nokanteeyakimini paapatziyari Jesoshi, niweshiryaaakagaeyakimini, eejatzi niyotaakimi kameetha pijekaeyen ikimoshiryaaawanantemiri Tajorentsi. Tema ikowakaakimi pathagakotyari rirori reewawanantemiri. Eejatzi iinja pijeekimotantyaariri janta ipankokinta, janta ishipakiryaakoeyininta maawaeni.

<sup>13</sup> Paerani, nokenkithatakaantapaakimirini, paapatziyaperotawakawo ikantziri Tajorentsi. Tee piitashitawakawo ro nashi nokantziri, inta piyotaki rooperotatsiri ikantziri irira. Tema kyaaryoopero ikantziri eejatzi paapatziyeeyakawoni, rootaki opaashinitakaantakimiri,

owameethashiryantakimiri pishireki. Rootaki nokanantakariri Tajorentsi: "Ariwee, raapatziyawo tejawoonikajatzi pikantziri". Aritaki nokantani nokantapiintziri.

<sup>14</sup> Ari, noyemijantzinkarite, pikimiteeyakarini riraga aapatziyariri Jesokirishito janta Joreeyaki. Ikiyeeyakirini ijoriiyotzinkarite ayemijantzinkarite janta, eejatzi ikimiteeyakimini kaari aapatziyariri riori jaga pinampiki, ikiyeeyakimini.

<sup>15</sup> Rowamaakaanteeyakirini joriyo Awinkatharite Jesoshi, eejatzi itakaworini ichariniiteni paerani rowamagaeyakirini kamanantayitzirorini iñaani Tajorentsi. Eejatzi rirotaki riraga joriyopaeni janta ikimitakina naari, ikijakina. Gee, rookakina romishiyakina, tee ikowakaana nonampijatzityaari. Tee okameethatzi rantziri, tee inimotziri Tajorentsi: tema ikiyeeyakirini riori maawaeni kaari joriyyotatsi.

<sup>16</sup> Gee, osheki ithañaakotapiintawitakina nokenkithatakayemi eeroripaeni, rooma eeroka kaari joriyyotatsi. Tee ikowakagaeyawitzimini paapatziyawo ikantziri Jesokirishito rowawijaakotantemiri Tajorentsi. Eekiro ryaatatatzি rantziro kaari kameethatatsi, omaanta iroñaaka ikijiri irira, kyaaryo rowashironkagaeyerini.

### *Ikowaki riraga Paaworo rapiiteri iñaakiteri tejawoonikajatzi*

<sup>17</sup> Noyemijantzinkaritepaeni, osheki nokowaki añaawakaya. Tee akaatawakaawita, tee añaawakaaga, omaanta osheki nokoetyagaemi, nokenkithashiryaaapiintzimi. Pijeeki inteenanta omaanta iroñaaka osheki nokowakiroña napiitemi nareetaatemi.

<sup>18</sup> Nokowaeyawitakani nareeteeyeeminimi, eejatzi nokowapiintawitaka naari niyaatashitemimi apaniroeni, omaanta rotzikaakina iwinkatharite kamaaripaeni.

<sup>19</sup> Inja ipokae Awinkatharite Jesokirishito. Riyotaki irira niyotagaeyakimini paapatziyaari. Aririka ipokae, nokimoshirewenteeyemini eerori, tsi-pateeeyakinariniroña akaateri aririka ikantena: "Kameetha pikenkithatakotakina eeroka piyotakaakiri raapatziyana riraga maawaeni irika tejawoonikajatzi".

<sup>20</sup> Kyaaryo, niweshiryaaawentaperoyakimini eeroka iroñaaka, nokimoshireperowenteeyakimini.

## 3

<sup>1</sup> Osheki nokenkithashiryaaawitakimi, omaanta tekatsi nokanta nareetakimi naari. Naamaaka okameethatzi nojeeki apaniroeni jaka nampsitsiki oetachari Ateenashi,

<sup>2</sup> notyaanantakimiriri riraga Temoteeyo. Tema rirotaki ayemijantzinkarite; ikimitakae akenkithatakotziri ikantziri Jesokirishito riraga Owawijaakotantatsiri. Ari rareetapaakimi riori, ramitakotapaakimi paapatziyaperotaari Jesoshi, eejatzi riweshiryaaakagaeyapaakimini.

<sup>3</sup> Nokowakaakimiri eeroka eero pikantashiretanaka aririka ikijakimi atziri. Piyotzi aapatziyari Awinkatharite, rootaki akemaatsiwenantariri iroñaaka.

<sup>4</sup> Paerani nareetantakimirini janta, nokamantakimini: "Aririka paapatziyari Jesoshi, rowashironkayemi theenkantatsiri". Aritaki piyotaki iroñaaka monkaataka nokamantakimirini paerani.

<sup>5</sup> Rootaki kaari nojamanitanta nokemakotakimi, ari notyaantakiri Temoteeyo iñaantakitemiri janta Tejawoonikakinta niyotantyaari eekirorika piyaatatzি paapatziyari Jesoshi. Naamaakowitakimi iñaantawitapaakari iwinkatharite kamaaripaeni rantakaakimiro kaari kameethatatsi.

Aririka pikemijanterimi irinta, natsipetashitakawomi nokantawitakimi niyotakaakimini paerani aapatziyari Jesoshi.

<sup>6</sup> Ari iroñaaka ipiyapaa jaka riraga Temoteeyo. Iñaapaakimi, ikamantako-tapaakimi kameetha paapatziyaperotari Jesoshi, eejatzi kameetha pineshi-ronkaperotawakaapaa. Eejatzi ikantapaakina pikowakina piñaaperotana. Eejatzi naari, oshekā nokowaki noñeemi eerori.

<sup>7</sup> Eeniro nowashironkaaka jaka, ikjeetakina. Omaanta niyotaki, noyemijantzinkarite, pikantatyeyaaani paapatziyari Jesoshi, rootaki piweshiryaakaantakinari.

<sup>8</sup> Iroñaaka nokimoshirewentakimi, kameetha nojeeki tema niyoteeyakini kyaaryo paapatziyari Awinkatharite Jesoshi.

<sup>9</sup> Oshekiperō nokimoshirewentakimiroña, rootaki nopaasonkitantakariri Pawa Tajorentsi eejatzi Awinkatharite Jesokirishito. Tema raminakoeyakaeni maawaeni.

<sup>10</sup> Namanapiintziri riraga Tajorentsi kitejiriki eejatzi niyankipaetenitsteniriki. Nokantani nokantziri: "Nokowaki potyaantena napiüteeri noñeeri tejawoonikajatzi". Rootaki nokanantari rotyaantakina eekiro niyotanteemiri paapatziyaperotantyaariri, eerokya pitheenkashiryaanta.

<sup>11</sup> Nokowaki riraga Pawa Tajorentsi eejatzi Awinkatharite Jesokirishito rareetakayena janta pinampiki.

<sup>12</sup> Nokowaki imatakayemi kameetha pineshironkaperotawakaya, eejatzi pineshironkaperoteri paashinipaeni. Nokowaki pimonkaatena, noneshironkaperotakimi eerori.

<sup>13</sup> Nokantawentakimiri nokowaki rowameethashiryaaperotemi, pikim-itanteriyariri riraga Pawa Tajorentsi. Iinja ipokae Awinkatharite Jesoshi, itsipatyaari maawaeni aapatziyariri, riraga rowameethashireeyakirini. Aririka ipokae, nokowaki iñaaperotemi riraga Tajorentsi pikameethatzi: tema irira rirotaki Pawa Atajorentsate.

## 4

### *Okaatzi inimotziriri Tajorentsi*

<sup>1</sup> Iroñaaka, noyemijantzinkaritepaeni, nokowaki panteyeroni iroka nokantemiri: rootaki ikowakaemiri Awinkatharite Jesoshi. Niyotaakimi paerani tsika pikantya pijeeki kameetha, piweshiryaakaantakyaariri Tajorentsi. Tema pantapiintakiro paerani; iroñaaka eekiro piyataperotatyee pantero kameetha.

<sup>2</sup> Piyotakiro nokaminaakimiri, rootaki riyotaakinari naari Awinkatharite Jesoshi niyotaantakimiri eeroka.

<sup>3</sup> Ikwaperotaki Tajorentsi pikameethaperoeyeni. Eejatzi ikwaperotaki eeroka shiramparipaeni eero pishirontawo tsinani kaari piina. Eejatzi tsinanipaeni, eerokya pishirontari shirampari kaari piimi.

<sup>4</sup> Inta ikowaki kameetha piyote eerori paaperotero pashi piinapero, kijokiro powaperotero, pineshironkaperotero.

<sup>5</sup> Eero pikimitari kaari aapatziyari Tajorentsi. Tema osheki iñaaminthatziro tsinanipaeni.

<sup>6</sup> Omaanta paapatziyaperotyaawo ikoyiri Tajorentsi, eero pishirontakotari iina paashini atziri. Aririka pantero, aritaki rowashironkaaperotakimi Awinkatharite. Tema nokamantaperotzitakimiro paerani.

<sup>7</sup> Ñaakiro, ikowakaakae riraga Tajorentsi antero kameethatatsiri, tee ikowakaagae antero oetarika kaari kameethatatsi.

<sup>8</sup> ¿litaka kaari raapatziyaperotantawo iroka nokantakimir? Tee naaka ipiyathata inta ipiyathatakari riraga Tajorentsi, riroma rirotaki otyaantz-imirori Ishire kameethatatsiri.

<sup>9</sup> Pinintashiryaaawakagaeyakan: tema rirotaki Tajorentsi iyotakimirori pinintashiryaaawakaantari maawaeni. Tekatsi okantya nojankinateemimi eejatzi: "Pinintashireeyerini piyemijantzinkarite", tema natsipetyaawomi. Tema pikantani pinintashiryaaawakagaeyakan.

<sup>10</sup> Gee, niyotaki pinehsironkatziri maawaeni masherooniyajatzi, riraga ayemijantzinkarite, omaanta iroñaaka nokantemi eekiro piyaatatayee pinehsironkaperotawakayaroña.

<sup>11</sup> Pikowakowataki pijeeki kameetha: eero pashiiri paashinipaeni. Eero pakita eerori inta pikenkithashiryakotya pashi eerori. Pantawaetaapiinte eerori paantyaari koetyeemotzimiri. Tema nokaminaakimironi paerani.

<sup>12</sup> Aririka pantero iroka, ari iñaaperotemi maawaeni kaari aapatziyariri Jesoshi, eejatzi eero okoetyeemotzimi oetarikapaeni.

### *Ipiriintaneerini kamaentsiri rañaagae, aririka ipokae Jesokirishito*

<sup>13</sup> Iroñaaka, noyemijantzinkarite, nokowaki nokantemiro tsikarika ikan-teeya riraga ayemijantzinkarite iinja, riraga kamaentsiripaeni. Nokowaki piyoperotero eero piraakoperotantari osheki. Ari papiiteri piñaagaeri. Eero pikimitari kaari iyotatsini ari ipiriinteeri Tajorentsi aapatziyariri rañagae.

<sup>14</sup> Ayotaki ikamaki Jesoshi, eejatzi rañagae. Eejatzi ari ikimitakyari maawaeni aapatziyariri, riraga kamaeyawiteencharini: aritaki ipiriinteeri Tajorentsi, aririka ipokae Jesoshi itsipateeyapaeyaarini.

<sup>15-17</sup> Rootaki nokamantzimiri iroka riyotaakina Awinkatharite. Inja aririka ipiye, rotyaanteri Tajorentsi apaani jewatakaakiriri ronampirepaeni ikaemeri paashinipaeni: "Iroñaakakya piyaate pipiyoteri maawaeni aapatziyariri Awinkatharite". Roojatzi itziwoontantkyawo itziwoore riraga jewatakaakiriri ronampirepaeni, eejatzi ikaemapaaki. Roojatzi ishaawinkantapaakyaari rirori Awinkatharite, ipoñaakya jenokinta. Tekirarika akami aaka, eero eewatziri kamayiteentsirini aate jeñoikiini. Ipiriintawakyata rañagae riraga aapatziyariri Jesokirishito. Roojatzikya aate, atsipatanakyaari kamawiteenchari. Ragaetanee janta menkoriki, atonkiyotawakyaaari Awinkatharite janta. Impaete akanteetateeyaaani kijokiroowanakiri.

<sup>18</sup> Pikanteri maawaeni ayemijantzinkarite okaatzika nokamantzimiri rootaki piweshiryaaantanakyaari maawaeni.

## 5

<sup>1</sup> Ari, noyemijantzinkarite, tee nokoyi nojankinateemiro tsikarika okaate ipokantyaari Jesoshi, tema tee ayotzi.

<sup>2</sup> Riraga koshitantatsiri: aririka ipokapaaki ikoshite, ramawenatawo tsiteniriki eero añaantari. Eejatzi ikimitapaakya Awinkatharite, romapokashitapaakae tsikarika ikaate ipiyanteeyari: tema piyoteeyakironi iroka, rootaki nokamtakimir paerani.

<sup>3</sup> Aririka ikante atziri: "Iroñaaka kameetha ajeeki, tekatsi antenani", roojatzi romapokapaakiri rowashironkaapaakiri Tajorentsi, eero imatziro ishiyaapithatari. Ikimityaawo tsinani motzitsatsiri, omapokapaakiro atsikamoonthatapaakiro, tekatsi okantya oshiyaapithatyawo atsikamoonthatakirowa.

<sup>4</sup> Omaanta eeroka noyemijantzinkarite, piyotaki tee okimitzimotzimi pijeeki tsiteniriki romapokantapaakimir Awinkatharite. Aririka ipokae,

omawitya romapokapaakimi, eero roshiyakaantapaakimi koshitantatsiri romapokapaakimi.

<sup>5</sup> Aritaki piyotaki, okimitzimotzimi eeniro pijeeki kitejiriki pantziro kameethatatsiri, rooma eero ka reentsite Tajorentsi. Tee akimitari kaari yotziriri Tajorentsi. Okimitzimotari irirapaen ijeeki tsiteniriki rantziro kaari kameethatatsi.

<sup>6</sup> Okimitaka imaakotapiintziri Awinkatharite riraga kaari aapatziyariri, tee ikenkithashiryaaakotapiintari, okimitzimotakari imaakitzi tsiteniriki.

<sup>7</sup> Tema imaapiinteetzi tsiteniriki, ishinkitapiinteeta tsiteniriki.

<sup>8</sup> Omaanta aapatziyari Jesoshi rootaki akinakinapiinte kitejiriki, eero antziro kaari kameethatatsi, eero ashinkita. Aririka romanatapiintya joraaro paerani, ikithaatanakaawo kijokiperotatsiri, eejatzi iitoki. Rameentakawo, eero rojanaryaakontantari rojataamentoki owamaerinimi. Thame akimiwityaari irintapaen omaanta thame ameentyaari Tajorentsi, rowakowenteeta: aapatziyari, anintashireperoteri, tema ayotaki aritaki rowawijaakotakae, rootaki kaari raawyaantee akaa riraga kamaari.

<sup>9</sup> Tee ikoyi Tajorentsi rowashironkae aari, inta ikowaki rowawijaakotee aririka aapatziyaari Awinkatharite Jesokirishito.

<sup>10</sup> Ikamawenteeyakaeni maawaeni, añaatsiri eejatzi kamaentsiri, atsipeeeyantyaaririni rirori maawaeni.

<sup>11</sup> Rootaki nokananteemiri: piyotaawakagaeyani maawaeni piweshiryaantyaaari, piyoperotantyaari. Rooma aritaki panteeyakironi iroñaaka.

### *Oetaka ikowakaakiriri Paaworo ranteri aapatziyariri Jesoshi*

<sup>12</sup> Noyemijantzinkarite, pipinkathateeyerini maawaeni iyotakaakimiri paapatziyari Jesoshi, rooma ikyaaryoowentzimiro maawaeni. Riroma rirotaki Awinkatharite otyaantakiriri, rootaki reewawenantakimiri eejatzi riyogaantakimi.

<sup>13</sup> Kameetha rantaawetaapiintzi, rootaki okameethatantari piñaaperoteri, pineshironkaperoteri. Eejatzi nokowaki kameetha paakameethateri paashinipaen, eero pikijawakaa.

<sup>14</sup> Eejatzi nokantaperotemi, noyemijantzinkarite, nokowaki pikanteri perantzi rantaawete, eero iperata. Riraga owashiretzinkari piweshiryaakazaari. Pikenkithatakayeri kaari aapatziyariri Jesokirishito. Eentsikiroeni piyoteeri maawaeni, eero pikijathatziri.

<sup>15</sup> Aririka rowashironkaemi ikijemi eero pipiyatari, inta maawaeni pikantyaani pineshironkatawakaapiintya eejatzi pineshironkatapiinteri maawaeni paashini atziri.

<sup>16</sup> Pikanteri pikimoshirewenteri Tajorentsi.

<sup>17</sup> Eekiro piyatatyee pamanapiinteri irira.

<sup>18</sup> Oetarika ikanteetemiri, pikanteri: "Ariwee, Pawa, rowashironkaete-naata inta eero ka nokimoshirewenzimi". Rootaki ikowakaakimiri riraga Tajorentsi, tema eero ka aapatziyariri Jesokirishito.

<sup>19</sup> Eero pithañaawo Ishire Tajorentsi yoteemi, eero pipiyathatawo.

<sup>20</sup> Eero pitheenkiro iñaani Tajorentsi ikamanteetemirika.

<sup>21</sup> Omaanta piñaantaperotawakaawo maawaeni ryoteemimi paashini-paen. Aririka okameethaperote, ari paapatziyawakyaawo.

<sup>22</sup> Pithañaapithatyaawo maawaeni kaari kameethatatsi.

### *Riwethateeeyanaarini Paaworo*

<sup>23</sup> Ashi royiro riweshiryaaakaakae Tajorentsi. Nokowaki ramitakotemi rowameethashiryaaaperoyemini.

powameethatero maawaeni oetarika pikenkithashiryaapiinteri, eejatzi imatakayemiro powameethatero maawaeni oetarika pantapiintziri. Kameetha ikempoyeemi roojatzi ipokantyaari Awinkatharite Jesokirishito.

<sup>24</sup> Paerani riyoyaakimi riraga Tajorentsi. Iroñaaka eero ramatawiteeyemini, aritaki rantakiro maawaeni ikanteeyakimirini, rowameethatemi.

<sup>25</sup> Noyemijantzinkarite, nokowaki pamanapiinteeyerini Tajorentsi imatakayena naari okaatzi ikowakaakinari.

<sup>26</sup> Kameetha pikanteri maawaeni ayemijantzinkarite janta niwethatari.

<sup>27</sup> Eejatzi nokowakaakimi piñaanateniri maawaeni ayemijantzinkarite iroka nojankinatakimirika; rootaki ikowakaakimiri Jesokirishito.

<sup>28</sup> Nokowaki ikanteetatyeyaaani ineshironkateeyemini irira Awinkatharite Jesokirishito.

Ari okaatzi iroka nojankinatakimirika:

Paaworo

## RAPIITAKIRO ROJANKINATZINIRI PAAWORO TEJAWOONIKAJATZI

<sup>1</sup> Nokoyi niwethatemi, noyemijantzinkarite, maawaeni aapatziyariri Jesokirishito janta Tejawoonikakinta, tsikarika pikanta pijeeki. Naaka jaka Paaworo, nokaatakiri Shiiashi eejatz Temoteeyo nojankinatzimiro. Rooma eeroka aapatziyariri Pawa Tajorentsi eejatz paapatziyari Awinkatharite Jesokirishito.

<sup>2</sup> Nokowaki ineshironkapiinteyemini eejatz ijeekakagaeyemini kameetha irirapaeni.

### *Ipaasonkitakotakiri Tajorentsi tejawoonikajatz*

<sup>3</sup> Okameethatzi nopaasonkitakowentapiintzimi, noyemijantzinkarite. Nokantapiintziri Tajorentsi: "Ariwee, Pawa, eekiro ryaatatayee raapatziyaperoyeranakimini riraga tejawoonikajatz eejatz eekiro ryaatatzi roshekyaanaka ineshironkaperotawakaanaka".

<sup>4</sup> Kyaaryo, aririka nopyoyoteeyirini paashinipaeni aapatziyariri Jesoshi nokantziri: "Pikantyaani paapatziyari Jesoshi. Osheki ikijeetzimi eejatz osheki rowashironkaetaki, omaanta tee pipakayiro paapatziyari irira".

<sup>5</sup> Ñaakiro, kameetha reewatawentzimini Tajorentsi. Omaanta ishinetanteeyakimirini pikemaatsitakawo maawaeni iroka, pikameethashiryaantyaarikya pitsipateeyantyaaririni janta ipankokinta.

<sup>6</sup> Ikameethataperotaki Tajorentsi: aritaki ipiyakowentakimi Tajorentsi riraga owashironkagaeyakimirini, aritakikya iñaashityawoota iroñaaaka.

<sup>7-8</sup> Iroñaaaka rowashironkaanteetawitakimiri, omaanta iinja aririka ipokae Awinkatharite Jesoshi, pikaatenaa naari ijeekakaakae kameetha, roojatz eerohya akemaatsitakawo. Linja romapokapae rirori, ipoñaanakya jenokinta, itsipatapaakyaa ronampiripaeni shintsitaperotsirs. Ishipakiryappaaki, ikimitapaakyaaawo paamari. Kameetha itsipatee ijeekakaakae omaanta rowashironkaapaakiri riraga maawaeni kaari kowatsiri ryoteri Tajorentsi, eejatz maawaeni kaari aapatziyawori ikantawitariri.

<sup>9</sup> Ikanteetatyeyaaani ikemaatsitakayaari irirapaeni riraga Tajorentsi janta paamarikinta kaari tsiwakanitatsinikinta. Eeroroña iñiiri riraga Awinkatharite. Kyaaryo, eero iñiiri reewaperote, eero iñiiri itajonkaperotantayiteni.

<sup>10</sup> Aririka ipokae Awinkatharite, maawaeni aapatziyariri ikimoshirewentawakiri iñaaperotawakiri rirotaki riroperori. Eejatz pikateeyerini eerori, rooma paapatziyeyawakawoni paerani maawaeni nokantakimiri.

<sup>11</sup> Ari riyoyaakimi Tajorentsi, rootaki nokantani namanakotapiinteyemirini. Nokantziri imatakayemiro pikameethatantyaari rootaki iñaaperotantemiri pikameethatzi. Eejatz nokantapiintziri imatakayemiro maawaeni kameethatatsiri ikowakaakimiri pikyaaryoyowenteniri. Eejatz nokantapiintziri itajonkawentempi pimataperotantyaawori ikantakimiri, tema paapatziyaperotakari.

<sup>12</sup> Roojatz aririka iñaawaemi atziri pikameethatanaki, iñaaperotantyaariri riraga Awinkatharite Jesokirishito. Riyotzi atziri eeroka aapatziyariri, rootaki iñaaperotantemiri. Rooma osheki ineshironkatake Tajorentsi eejatz Itomi.

### *Ipokapae Jesoshi*

<sup>1</sup> Ari piyotaki, noyemijantzinkarite, ipiyapae Awinkatharite Jesokirishito. Ipokaerika arimache ipiyotakaapaakae aakapaeni akaatantyaariri. Iroñaaka nokoyi nokantemi:

<sup>2</sup> eero powashiretakota, eejatzi eero pithaayi. Aririka ikanteetemi: "Iyotaakina Ishire Tajorentsí, pokaki Awinkatharite", eero paapatziyawo. Aririka ikanteetemi: "Noñaakiri naari". Aririka ikanteetemi: "Noñaakiro rojankinari Paaworo okantzi areetapaaka Jesokirishito", eero paapatziyawo. Tema ikantashita.

<sup>3</sup> Ramatawiteetzimikari. Eero paapatziyaneeentawo ikantemirika. Tekira omonkaata ipokantyaari riraga Jesoshi. Tekirani ipoki, rityaawo oshekini atziri ikijeri riraga Tajorentsí, ipiyathathyaaari. Roojatzi ipokantapaakya irinta shirampari riraga jataperotatsini paamariki kaari tsiwakanitatsini, riraga jewatziriri maawaeni piyathatariri Tajorentsí.

<sup>4</sup> Ari ikoyi rirori ipakaakayeri maawaeni aapatziyariri Jesoshi, eejatzi ipiyathatakari Tajorentsí, ikantzi:

—Naaka jewawentziriri maawaeni aapatziyariri Jesoshi. Naaka osheki notajorentsitaki, kameetha pipinkáthatena naaka. Tema naaka Tajorentsipero.

<sup>5</sup> Tema pikenkithashiriilo paerani nareetantakimirini nokantakimironi maawaeni iroka.

<sup>6</sup> Iroñaaka piyotaki ipokemi riraga piyathaperotariri Tajorentsí, omaanta iroñaaka eenitatsi thañaakariri rirori, rootaki kaari omonkaatanta kitejiri ryiowantyaari.

<sup>7</sup> Eenirop rantawitakari iroñaaka riraga piyathatapiintariri Tajorentsí, omaanta imanakiro rantziri. Tema tee okameethatzí okaatzí rantziri. Omaanta eenitatsi thañaakariri iroñaaka rowaga Ishire Tajorentsí, rootaki kaari ryiowanta rirori. Aririka omonkaatya kitejiri ipokantyaari, ari ishinetakiri iroñaaka riraga thañaakariri,

<sup>8-11</sup> roojatzi ipokaperotantapaakya rirori. Ramitakotakiri riraga Jatanaashi rareetantari rirori, roshiyakotapaakyaari irira. Eenitatsi ishindsight, osheki ramatawitatante aririka itajorentsijeempiyawaitapaakya. Ikowaki atziri rotsikaneyawakyaariniroña. Rantapiintero kaari kameethatatsi ramatawiperotantyaariri maawaeni jatatsini paamariki kaari tsiwakanitatsini. Kyaaryo, tee ikowaki ryiotero rooperotatsiri owawijaakoterinimi. Aritaki ishinetakiri Tajorentsí ramatawiteri raapatiyawo theeyaantsi. Aririka ipiyee riraga Jesokirishito ishipakiryakotapaakiri, roojatzi rowamaantapaakyaari itajonkapaaakiri itajorenkaki.

<sup>12</sup> Roojatzi rowashironkaeri Tajorentsí maawaeni kaari aapatziyawori kyaaryooperotatsiri riraga weshiryaaawentawori kaari kameethatatsiri.

### *Eekiro piyaatatye pameentyaari Jesokirishito*

<sup>13</sup> Omaanta ineshironkatzimi riraga Pawa Tajorentsí. Kyaaryo noyemijantzinkarite, paeraniperorona riyoyaakimi rowawijaakotantakimir. Owameethataperoeyakimi Ishire, eejatzi paapatziyakawo kyaaryooperotatsiri, rootaki rowawijaakotantakimir, rootaki nokanantapiintariri: "Ariwee, powawijaakotakiri tejawoonikajatzi rootaki ikameethatantakari".

<sup>14</sup> Nokamanantakimirori ikantziri Tajorentsí, pikemaperotakiro ikowan-takimir rowawijaakotantemiri. Ikowakimi pikimityaari Awinkatharite Jesokirishito, pikaateri peewawanenante.

<sup>15</sup> Ari, noyemijantzinkarite, pikantyaani paapatziyaperotaari Jesoshi. Eero pipeyakotziro maawaeni niyotaakimiri paerani nareetantakimiri. Eejatzi eero pipeyakotziro maawaeni nojankinatakimiri.

<sup>16</sup> Osheki ineshironkatake Awinkatharite Jesokirishito eejatzi Pawa Tajorentsi. Ikantyaani riweshiryakaakaee. Aririka owashironkaya omaanta ineshironkatake rootaki ayotantakari imatakaakaero maawaeni ikantakaeri.

<sup>17</sup> Nokowaki riweshiryakaagaeyemini pajankaneki. Eejatzi nokowaki imatakagaeyemironi eekiro piyaatatzi pantapiinteyeroni oetarika kameethatatsiri eejatzi pikantteyeroni oetarika kameethatatsiri.

### 3

#### *Paashini ikowakaakiriri Paaworo aapatziyariri Jesoshi Tejawoonikaki*

<sup>1</sup> Noweyaantemiro, noyemijantzinkarite, nokoyi pamanakoeyenani Awinkathariteki imatakayenawo nokyaaryoowenantyaawori nokamanteri paashinipaeni ikantziri, eejatzi ipinkathatantyaariri maawaeni kemawakirori, ikimitemi eerori.

<sup>2</sup> Eejatzi pikantteri rirori rowawijaakowentenari irintapaen i kijapiinta-nari riraga kowatsiri rowashironkaena. Jee, kaari maawaeni atziri kowatsiri rameentyaari Tajorentsi.

<sup>3</sup> Omaanta eero ramatawitzimi Awinkatharite, kameetha pameentyaari. Ishintsitakayemi pajankaneki pijekantyaari kameetha, eejatzi raakowentem, eero ishinetziri iwinkatharite kamaariapaeni rantakayemiro oetarika-paeni.

<sup>4</sup> Pameenteeyearini Awinkatharite ramitakoteeyemironi pantapiintero maawaeni nokaminaakimiri paerani. Aritaki pikantyaani pikemijantaperotena.

<sup>5</sup> Nokowaki Awinkatharite Jesokirishito imatakayemiro piyoperotero intashireperotzimi Tajorentsi eejatzi piyote ikantyaani ikyaa-ryooowentziniri irira maawaeni ikowakaakiriri. Nokowaki imatakayemiro pikimityaari.

<sup>6</sup> Iroñaaka, noyemijantzinkarite, ikowakaakina riraga Awinkatharite Jesokirishito nokaminaaperotem iroka ikowakaakimiri: aririka iperataky piyemijantzinkarite, eero pikimitari. Tee nokimitari naari, piñaakina tee noperata naaka.

<sup>7</sup> Piyotaki okameethatzimotzimi pikimitena naari. Paerani nareetantakimiri, tee noperata.

<sup>8</sup> Aririka pipakinawo nowari, nopolatakimiri. Arimache noshintszti nantawaetapintki kitejirikipaeni eejatzi tsitenirikipaeni. Nokyaaryooowentakiro nantawaetaki eenitatsi koetyeemotakinari: tema tee nokoyi opomeentsitzimotem eerori.

<sup>9</sup> Okameethatawitaka nokowakotemimi oetarikapaeni, omaanta nokoyi niyotayemiro okameethatzai pantawaetapiinte, eero piperata.

<sup>10</sup> Nareetantakimiri nokaminaaperotakimi aririka eenitatsi kaari antawaetatsiri, eero pipiri royaari.

<sup>11</sup> Nokemakotakiri ari pikaatakiri perantzi. Tee rantawaetzi, inta ikinashita iñaawaetashita, wero, wero, wero. Tee okameethatzai iroka.

<sup>12</sup> Tema iñaakae Awinkatharite Jesokirishito, rootaki nokaminatzimiroi iroka. Pikantaperoteri rirori imaerite, kameetha rantawaete rowantyaari.

<sup>13</sup> Noyemijantzinkarite, eero piperatawo pantapiintero kameethatatsiri.

<sup>14</sup> Piyoteri piyemijantzinkarite riraga kaari kemijantaperoteroni iroka nojankinatzimiri. Eero pitsipatari, rootaki ipashiwenantanakyaari.

<sup>15</sup> Omaanta eero pikijiri, inta kameetha piyotaaperoteri, tema rirotaki piyemijantzinkarite.

<sup>16</sup> Tema kameetha ijeeki Awinkatharite, iroñaaka nokowaki ijeekakagaeyeni kameetha maawaeni kitejiriki, tsikarika pijeekaeyini. Nokowaki kijokiro rowapiinteeeyemini.

<sup>17</sup> Naaka Paaworo wethatzimiri. Nojankinatzimiro iroka nakoki: "Ni-wethatemi"; kaari paashini atziri. Aritaki nametakawo, aririka nojankinatapiintziniri ayemijantzinkarite, nojankinatziniri naaka nowaero: kaari paashini atziri.

<sup>18</sup> Nokowaki ineshironkatapiintemi Awinkatharite Jesokirishito.  
Ari okaatzi iroka nojankinatakimirí:

Paaworo

## RITAKANARI PAAWORO ROJANKINATZINIRI TEMOTEEOYO

**1-2** Nokoyi niwethatemi, Temoteeyo, tsikarika pikanta pijeeki. Naaka Paaworo jankinatzimiori iroka; rotyaantakina Awinkatharite Jesokirishito no-kenkithatzi, eejatzi rotyaantakina Pawa Tajorents. Rirotaki rirori matzirori rowawijaakoeyeeni, tema ayoperoeyini tekatsi paashini owawijaakotantatsini. Naapatziyakaakimini paerani, rootaki noshiyakaanantakimiri notyomipero. Nokowaki ineshironkatemi Pawa, ikaminthayemi, eejatzi kameetha ijekakayemi. Eejatzi nokowaki ikimitakayemi Jesokirishito.

*Kyaaryoowa, ramatawitzimikari yotaawitantachari rojankinarini Moeseeshi*

**3** Niyaatantakari Masheroonyaki, nokaminaaperotanakimi: "Pijeekawakiita jaka Ejeesoki". Nokowakaakimi pikanteeyerini amatawitantatsiri: "Eero piyotaantziro theeyaantsi".

**4** Pikanteeyerini ayemijantzinkarite: "Eero pikemijantashitawo ikenkithatashitayitarini". Pikanteri eejatzi: "Eero paapatziyari ikenkithatakotashitayitarini maawaeni paejatotatsiri. Patsipetashitawokari paamaashitayityawoni oetarikapaeni. Tekatsi okantemi irokapaeni iyotagaeyemini. Eeniro ikowakaakaeri Tajorents: aririka aapatziyaari, ari ryotagaeyakaeroni".

**5** ¿Oetaka nokaminaantzimiori iroka? Rootaki nokamanantzimiori nokowaki pikameethashiretanee, nokowaki pijeeki kameetha, eerokya poshiyakaawaetashita pantero, inta kameetha paapatziyaperotanakarini Jesoshi. Aririka panteyakironi iroka, aritaki pimatakiro eejatzi pinintaperoeyaperoterini kameetha paashinipaeni.

**6** Eenitatsi apaanipaeni kompitayitakaworini, ikenkithatakotashitayitawoni riraga kaari ryotayitzini, ratsipetashitakawo ikantawitakariri.

**7** Ikowayitawitani ryotaanteromi ikantakaantziniri Moeseeshi, omaanta tee ryoperotziro ikantawitari. Tee ryoperotziro oetarika iñaawaetashita, wero, wero: roshiyakari tsiotzi.

*Ikenkithatakotziro kaminagaantsi rashii Tajorents*

**8** Ayoteeyini okameethatzi kaminagaantsi rashii Tajorents, omaanta akompitawokari.

**9** Piyoperotawakiro iroka nokamantemiri: aakateeyakini rowameethatani Tajorents, tee aaka rojankinateeteni, inta rojankinateetziniri kaari kemijantaperotzirori kaminagaantsi, riraga piyathatariri, kaari aapatziyariri Tajorents, antapiintzirori kaari kameethatatsi, kaari kameethatatsiri, kaari pinkathaterini Tajorents, owamayitziririni ashitariri, owamaantashitachari,

**10** mayempirite eejatzi mayempirote, antatenkatawakaenkari ishiramparinkaeteki, antenkatawakaenkawo otsinaninkaeteki, noshikantatsiri, theeri, theeyawaetashitachari, maawaeni. Eejatzi rojankinatziniri maawaeni kijayitziririni riraga iyotaantayitzirorini kameethatatsiri. Tema riro Tajorents jankinatakaakiririni Moeseshini.

**11** Kameetha iroka niyotaantziri. Rotaantakina Tajorents nokamantakoteri irira, ryotzi nomatakiniri ikantakinari. Kameetha iroka nokaman-takotziriri: tema ikameethataperotzi irira.

*Ikaminthaaakiri Tajorents riraga Paaworo*

<sup>12</sup> Riyoyaakina Awinkatharite Jesokirishito nanteniri oetarikapaeni ikowakaakinari. Riyotaki nomonkaateniri maawaeni: riyotaki eero namatawitziri. Ejatzi imatakaakinawo nantayitziniririni, rootaki nokanantariri: "Ariwee, pimatakaakinawo".

<sup>13</sup> Paerani nokantzimatawitarini, nokantakaaperotzimowitarini, ejatzi nokijeyawitarini maawaeni aapatziyariri. Omaanta tekirani niyotawitarini Jesokirishito, tekirani naapatziyawitarini. Tee niyotawitani oetarika nantayitzirini, rootaki ikaminthaaantakinari.

<sup>14</sup> Ineshironkaperotakina osheki Awinkatharite: riyotaakina naapatziyari Jesokirishito, ejatzi riyotaakina nonintaperotziri.

<sup>15</sup> Kyaaryootaki iroka nokamantemiri, kameetha paapatziyawakyawo. Ipokapaaki jaka kipatsikika Jesokirishito rowawijaakoeyakirini kaari kameethateeyatsirini. Nanaakoeyakimini maawaeni, tee nokameethatawitani.

<sup>16</sup> Rootaki ikaminthaaantakinari, ritakina naari reshiwentanakina, tee ikiijana, omawitya naaka antzirori osheki kaari kameethatatsi. Rootaki ayotantakari ejatzi ikimiteeyerini rirori maawaeni aapatziyariri iinja: ineshironkaeyerini, ikanteetatyeyani ijeekaperoeyantyaarini janta jenokinta.

<sup>17</sup> Ikanteetatyeyaaani Atajorentsite reewawenteeyakaeni aari. Tektsi ikantya ikame. Ashi royiro imana. Apaniroeni itajorentsiperotzi. Thame akanteetatyeyaaani añaaperotaperoeyananakirini, akamantapiunteeyananakirini atziri ikameethataperotzi. Aritaki okantyaari.

### *Eenitatis iroka ikantayitziririni Paaworo Temoteeyo*

<sup>18</sup> Piyotaki, Temoteeyo, noshiyakaantakimi notyomi. Paapatziyaperotyaawo iroka nonintakayemiri. Tema paerani Tajorentsikaminaakirin ayemijantzinkarite: "Osheki rantenawo Temoteeyo nokowakaakiriri. Roojatzi rowaagaeyantakaerorini aari". Iroñaaka pantero ikamantakotakimiri. Piyotzi riraga joraaropaeni ishintsiwentziniri iyapitaanote oetarika ikantziriri. Iroñaaka, pikimityaari eerori, pishintsiwenteniri Awinkatharite oetarikapaeni panteniriri,

<sup>19</sup> pamenantaperotanakyaari. Aririka piyotzi okameethatzi pantero oetarikapaeni, ari pantero. Eenitatis riraga yotawitachari rantziro kameethatatsiri oetarikapaeni, omaanta rantashitakawo kaari kameethatatsi, rootaki rookantawori raapatziyari Jesoshi.

<sup>20</sup> Aritaki rantakiro Imeneeyo ejatzi Arejaantero: rookaero raapatziyari rirori. Tee okameethatzi iroka, rootaki nokanantakariri rirori: "Rowashironkayemii Jatanaashi; roojatzi piyotantyaari paashini ajoriyyotzinkarite eero pikantzimatzi riraga Tajorentsi".

## 2

### *Riyotaakotziri tsika akantya apinkathatantyaariri Tajorentsi*

<sup>1</sup> Nityaawo nokamantemiro iroka: pamaneri Tajorentsi, pikanteri ramitakoeyerini maawaeni atziri, ejatzi pipaasonkitakowenteri.

<sup>2</sup> Ejatzi pikanteri ramitakoeyerini jewaperowenantsirsipaeni ejatzi maawaeni paashini iwinkatharitzinkarite, kameetha ajeekaeyantyaarini, eero añaantawo ashiiryagaeni. Ejatzi kameetha antaperotero aapatziyeyarini Tajorentsi, añaaperoyerini ejatzi akimityaari irira.

<sup>3</sup> Okameethatzi amanapiinteri Tajorentsi, tema rirotaki owawaakoeyakaerini, tema rootaki ikowakaakaerini.

<sup>4</sup> Ikowaperotaki rirori awijakoeyeni maawaeni, ejatzi ikowaki ayoteeyeroni kyaaryootatsiri, maawaeni.

<sup>5</sup> Maawaeni ajeekaeyini aari jaka kipatsikika. Omaanta apintzi Pawa Tajorentsi, ijeeki jantajenokinta. Tee añairi. Eejatzi eenitatsi apatziro apaani shirampari owaagapiinteerori iñaani: riraga Jesokirishito. Eejatzi apatziro irira rowaaagakiniri Tajorentsi añaani aari, asheninkatantakariri.

<sup>6</sup> Riraga Jesokirishito rirotaki kowashiteenchari, ikantzi: "Nokowaki nokamawenteeyerini maawaeni atziri nopolawentenirikaari kameethatatsiri rantziri nowawijaakoeyantaaririni". Ari imatakaeniro ayoteeyantakariri.

<sup>7</sup> Iitakina kenkithateroni iñaani, eejatzi rotyaantakina niyotagaeyerini maawaeni paashinijatztatsiri atziri raapatziyawo iroka kyaaryootatsiri. Tee notheeya, kyaaryootaki iroka nokantzimiri.

### *Tsika akantyaari akenkithatakayeri Tajorentsi*

<sup>8</sup> Ari nokowaki amaneeyerini Tajorentsi, maawaeni. Aririka amaneri, kameetha ajeekaeyeni: tee okameethatzi akijeri paashinipaeni, tee okameethatzi atheenkeri Tajorentsi.

<sup>9</sup> Eejatzi nokowaki okithaatya tsinani kameetha, omaanta tee riro okithaatshityaari shiramparipaeni iñaawenatantyaawori eejatzi tee okameethatzi okenkithashiryakaarakari shirampari kaari kameethatatsi. Tee okameethatzi otzipiyakaantero oeshi iñaawenatanteetyaawori, eejatzi tee okameethatzi owaneenkashityaawo ooro, eejatzi peraata. Eejatzi tee okameethatzi okantakaaperotakayaawo oethaari pinaperotachari: iñaawenatawokari.

<sup>10</sup> Omaanta okameethatzi oneshironkatante paashinipaeni: ari okameethatawitari anteeyeronimi maawaeni aapatziyariri Tajorentsi.

<sup>11-13</sup> Ritakari Tajorentsi riwetsikakiri Araani paerani, roojatzi roori riwetsikakiro Eewa. Okameethatzi okemijantaperoteri tsinani shirampari eejatzi omaerite, eejatzi tee okameethatzi omperatyari oemi, omaanta okameethatzi omaerite.

<sup>14</sup> Tee ramatawitziri Jatanaashi Araani, omaanta ramatawitakiro tsinani, rootak anantakawori kaari kameethatatsi: tee okemijantaperotziri Tajorentsi.

<sup>15</sup> Omaanta aririka okaminthayeri tsinani otomipaeni, okantatyeyaaani aapatziyari Tajorentsi, onintaperooyerini osheninkapaeni, kameetha ojeeeke, kameetha okenkithashiryaa, ari owawijaakotaka.

## 3

### *Tsika ikantyaari riraga jewawentziriri iyemijantzinkarite*

<sup>1</sup> Kyaaryo iroka ikanteetziri: "Aririka ikowaki shirampari reewatakagaeyerini iyemijantzinkarite, tema okameethatzi iroka ikowakiri".

<sup>2</sup> Aririka iiteetziri amitakoeyeririni iyemijantzinkarite, tee okameethatzi ojeeeke rantani. Kameetha raye iina apaani, tee okameethatzi ishinkitya, kameetha ikenkithashiryaanakya, ikameethashirete, kameetha ineshironkatawakiri areetyaarini, kameetha riyotaperote riyotaante.

<sup>3</sup> Tee okameethatzi rirapiintero kepishaaperotatsiri, tee okameethatzi ikijya; omaanta kameetha ikaminthaaante, kameetha ijeeki, tee okameethatzi ikowaperoteri koriki.

<sup>4</sup> Kameetha riyotaapiintero iina, kameetha riyotaapiinteeyerini reentsitepaeni raapatziyanteeyaririni irirapaeni, eerokya ipiyathateeyantaririni, kameetha ijeekanteeyarini.

<sup>5</sup> Eerorika imatziro raapatziyakayaari reentsitepaeni, eejatzi iina: ¿tsika ikantyaaka riyotaantyari maawaeni riraga aapatziyeyaririni Tajorentsi?

**6** Tee okameethatzi reewatakaante owakira aapatziyariri Jesoshi: aririka ikantakaaperotakya. Ikimitarikari iwinkatharite kamaari, ikantakaaperotakya paerani, rootaki roepiyantaariri jaawiki Tajorentsi.

**7** Kameetha riyoteeyerini riraga kaari aapatziyeyayaririni, ikanteeyeni: "Ikameethatzi riraga jewatakagaeyiririni aapatziyariri Jesoshi". Rootaki eero imatantari ikantzimateeyerini, ejatzi eero imatantari kamaari rantakayeri kaari kameethatatsi.

### *Ikenkithatakotziri amitakotziriri iyemijantzinkarite*

**8** Riraga amitakotapiintziriri iyemijantzinkarite: kameetha roshiyari riraga jewawenziriri iyemijantzinkarite, ikameethashiryaaanaki. Tee okameethatzi ramatawitatante. Ejatzi tee okameethatzi rirero osheki pyaarentsi. Ejatzi tee okameethatzi ikenkithashireeri koriki raapithatashtakari paashini atziri.

**9** Kameetha ikyaryoowentero ikemijantaperotero maawaeni riyotaayitziririni Tajorentsi, ejatzi okameethatzi riyote tekatsi rantani.

**10** Pityaawo paminaperoteri, piyotaperoteri ikameethataperotzirika. Aririka piyoteeyakini ikameethataperotzi, ari pikanteri ramitakoeyerini maawaeni aapatziyariri Jesoshi.

**11** Ejatzi okimityaari iina, okameethashiretanaki: okenkithashiryaa kameetha, tee okameethatzi okantzimatante, tee okameethatzi oshinkitya, tee okameethatzi amatawitatante.

**12** Riraga amitakotantsiri iyemijantzinkarite, kameetha raye iina apaani. Kameetha riyote raapatziyakaaperotyaari itomipaeni: iñaaperoteri irirapaeni iriri. Ejatzi kameetha riyote raapatziyakagaeyaarini maawaeni jekimoteeyiririni.

**13** Aririka kameetha ramitakooyerini iyemijantzinkarite, ari iñaaperoteri, ejatzi imatero ikenkithatakoperoteri Jesokirishito, eero ithaayi. Tema riyotzi kameetha raapatziyari irira.

### *Ikenkithatakotziri aapatziyeyayaririni Jesoshi*

**14-15** Nokowawitaka intsipaete nareetztapaeemimi, omaanta eerorika nomatziro. Rootaki nojankinatantzimirori iroka: nokowaki piyote tsika akan-teeyakani. Riyoyagaeyakaeni Tajorentsi: tema aakateeyakini aapatziyeyayaririni. Añaatsiri. Ayoteeyironi iroka kyaaryootaperotatsiri: kameetha akyaryoowentero owaagayiteron.

**16** Kyaaryo, tee ayotashita tsika ikantari Tajorentsi, omaanta riyotakagaeyakaeni Jesokirishito. Irira rirotaki Tajorentsi, omaanta ratziratapaaki. Rowaga Ishire, rootaki iyotakagaeyeerini itajorentsitsaki. Riraga ronampiripaeni Tajorentsi raminakowenteeyakirini Jesokirishito. Akamantakoeyakirini aari mawaeni kipatsikipaeni, raapatziyanteeyakaririni jekatsiripaeni. Roenokaeri Iriri ejatzijenokinta, kameetha ijekapaekya.

## 4

### *Kyaaryoowa, riyotagaetzimirokari theeyaantsi*

**1** Enitatisi iroka okamantaperoeyeeni Ishire Tajorentsi. Iinja, rootzimateentsi ipokanteeyari Jesokirishito, ijeki ookaeyerorini iroka kyaaryooperotatsiri aapatziyeyayaririni. Raapatziyari amatawiteeyeririni, riraga owaagayitzirorini riyotaayitziririni kamaaripaeni.

**2** Ramatawitatante riraga atziri, omaanta ikimitakaantyaami aapatziyariri Jesoshi. Tekatsi ikantya riyote tee okameethatzi iroka ikantayitzirini.

**3** Ithañaapiintyaari shirampari raye iina, eejatzi ithañaakyaawo tsinani aye oemi. Eejatzi ithañaapithatakero owaeyarini owanawontsi riwetsikakaero Tajorentsi. Aapatziyeyearini irira, ayoteeyini kyaaryootaki riyotagaeyakaerini rirori. Aritaki ikowaki apaasonkitakoteri oyaari, roojatzi owantyaari.

**4** Okameethateeyakini maawaeni riwetsikakiri Tajorentsi. Aririka apaasonkiteri, kameetha owaeyarini, eero apinkiri.

**5** Rowameethatantakaeniriri Tajorentsi owaeyarini. Aririka apaasonkiteri, eejatzi akenkithashireero iñaani, okameethatz iowapiinteeyaarini maawaeni.

### *Pikyaaryooowenteniri Tajorentsi maawaeni ikantayitzimirini*

**6** Aririka powaagaeyenirini ayemijantzinkarite iroka nokantzimiri, okameethatz. Tema paapatziyapiintakawo, iyotaaperotakimi. Aririka piyotagaeyerini paashinipaeni nokamantzimiri, ari ikantemi Jesokirishito: "Kameetha iroka pantakinari".

**7** Eero paapatziyawo iroka ikenkithatashitari theeyachari: tee okameethatz pikenkithashiryaaapiintero. Omaantakya pikyaaryooowentero paapatziyaperotyaari Tajorentsi.

**8** Okameethatawita pikinawaete eejatzi pithamaete, oshintsitaperotanteeyarini piwatha; omaanta okameethataperotziroña pikyaaryooowenteniri Tajorentsi oetarikapaeni panteniriri. Eero patsipetawo roori: kameetha pijeeke iroñaaka, eejatzi kameetha pijeeke iinja janta jenokinta.

**9** Kyaaryooperotaki iroka nokamantakimiri. Okameethataki raapatziyeyawoni maawaeni atziri.

**10** Apomeentsitawentakari atziri, akemaatsitawentakari raapatziyeyantyaaririni. Añaatsiri Tajorentsi, ayoteeyini eero ramatawitee: rirotaki rowawijaakoeeyiririni maawaeni atziri. Kyaaryo, rowawijaakotaperoeyirini maawaeni aapatziyeyaririni Jesokirishito.

**11** Pikaminaagaeyerini atziri ranteeeyeroni iroka nokantzimiri, piyotaapeoyerini.

**12** Eeroka ewankaritatsiri, omaanta eero pishinetayitzirini itheenkawentimo pewankaritzi. Inta oetarikapaeni pantayitakiniriri Tajorentsi, kameetha panteeyeroni, ikimitantemiri piyemijantzinkarite: piñaawaete kameetha, pijeeke kameetha, pinintaperooyerini paashinipaeni, paapatziyari Tajorentsi kameetha, powameethatero maawaeni pikenkithashiryayitarini.

**13** Inja noñagaatemi. Iroñaaka piñaanatapiinteniri ayemijantzinkarite Iwaperite Tajorentsi, pikenkithatapiintero iñaani Tajorentsi, piyotaapiinteri. Pikanteetatyeyaaani, roojatzi nareetantapaemi.

**14** Paerani ikamantakotantakimiri, eejatziikanantariri jewatakanatsiri Tajorentsi ramitakotemi, eejatzi roerikayinatakimini, rootaki omatakaantakimiri Ishire Tajorentsi. Iroñaaka eero piperawentawo iroka omatakaakimiri.

**15** Pantapiintero iroka imatakaakimiri, riyotaperoeyanteeyerini maawaeni atziri pantaperotakiro.

**16** Pikenkithashiryaaaperotero oetarika pantayiterini, eejatzi oetarika piyotaayiterini: pikyaaryooowenteeyeroni. Aririka panteeyeroni iroka, ari powawijaakotakaantteeyerini maawaeni kemaeyemirini, eejatzi pawijakotee eerori.

<sup>1</sup> Eero pikijathatziri antyashipari; inta kameetha pikenkithawaetakayeri, pikimitakaantyaari rirotaki piri eerori, kameetha pikaminthayeri. Ejatz iewankaripaeni, pikimitakaantyaari parentzi.

<sup>2</sup> Rowaga antyashipawo, pikimitakaantero piniro. Ejatz iewankawopaeni, pikimitakaantero pitsiro: eero pikenkithashiryaaokotawo piñaawenashiryawo ewankawopaeni.

<sup>3</sup> Aririka ojeekashiteeya kamatsiri oemi, teerika ijeeki paashini neshironkateeroni, pineshironkateroky aeroka.

<sup>4</sup> Omaanta ijeekirika otomi, ishinto, rirorika ojari, kameetha ineshironkatero rirori. Rootaki ikoyiri Tajorentsi kameetha ayoteeyeni akaminthayeri asheninkapero aari. Kameetha apaeyerini ashiteeyeerini koetyeemoeイヤカーリン. Tema paerani ipaeyakaeni maawaeni koetyeemoeイヤカーリン aari.

<sup>5</sup> Aririka ojeekashitaperotaa kamatsiri oemi, tee ijeeki paashini neshironkateroni, ari okameethatzi apaniroeni okenkithashiryaperotziri Tajorentsi rirori. Okantani: tsiteniriki, kitejiriki, amanapiintziri Tajorentsi, okantapiintziri oetarika okowayitzirini.

<sup>6</sup> Omaanta eeniro paashini, inashita roori: okowaki okimoshiryashitya. Añaawitaka, omaanta eero oñaagaeri Tajorentsi, rootaki iyaatantyaari paamariki kaari tsiwakanitatsini.

<sup>7</sup> Pikaminagaeyerini maawaeni aapatziyariri Jesoshi ranteeyeroniita iroka nokantzimiri, okantyaata eero ojeekanta rantani.

<sup>8</sup> Okameethatzi aneshironkaeyerini paashinipaeni ashinko, ejatz iasheninkapero aari aneshironkateroteri. Eerika aneshironkatziri, eero akantzi: "Naapatziyakari Tajorentsi naari". Teewee. Tee ikameethatzi theenkantatsiri, omaanta riyowita ineshironkatziri isheninkapero. Ejatz iaka teerika aneshironkatziri asheninkapero aari, osheki tee akameethaperotzi, anaakoperoyerakirini aaka riraga theenkawitachari.

<sup>9</sup> Aririka omonkaatakiro kamatsiri oemi 60 ojarentsite, ari pikantero etakoeyarini maawaeni ayemijantzinkarite. Okameethataki ejatz iawi tani apaani oemini, tee aminapithatziri paashini shirampari.

<sup>10</sup> Okameethatzi piñaakoteeyakironi antayitakironi kameethatayitatsirini: etakoeyakarini otomipaeni, oneshironkaeyakirini areeteeyacharini, amitakoeyakirini maawaeni aapatziyeeyaririni Tajorentsi, okaminthagaeyakirini ashironkaenkari, okyaaryooentakiro antayitakironi kameethatayitatsirini. Aririka piñaakoeyakironi antayitakironi iroka kameethatayitatsirini, ari okameethatzi pikantero etakoeyarini aapatziyeeyaririni Jesoshi ashironkagaeyacharini.

<sup>11</sup> Omaanta eero pikantziro rowaga kamatsiri oemi kaari antyashipawotsi. Okoyirkari shirampari antashityaari. Okoyikari agae ejatz i, ookaerokari aapatziyariri Jesokirishito.

<sup>12</sup> Eewawitaka okantawitakiri: "Nokemijantaperotemi", omaanta roojatzi amatawitakiri. Rootaki rowashironkaantyaawori.

<sup>13</sup> Ejatz i operatakari, okinakinayitzinikari pankotsikipaeni, okenkithawaetashitakari, wero, wero, otheeyantyaari. Okimitari tsiotzti. Okantakotashitarikari paashinipaeni, oñaawaetantawokari kaari kameethatatsi.

<sup>14</sup> Rootaki nokowantakari agae ejatz i kamatsiri oemi tekiraatarika antyashipawote. Kameetha ijeeki eentsitepaeni. Kameetha onkotsiteniri oemi royaari, ejatz i eentsite. Kameetha ontyeero iithaari rashii rirori, okiweniri iithaariipaeni, maawaeni. Aririka kameetha ojeeke, tekatsikya ikantya atziri ikantzimaeyeroni.

<sup>15</sup> Eejatzi rantayitakironi Jatanaashi apaanipaeni: rookakagaero aapatiyawitakirira Jesokirishito.

<sup>16</sup> Ojeekirika osheninkapero kamatsiri oemi, kameetha iyotashitya okaminthayero roori. Tee okameethatz ikanteri aapatziyariri Jesoshi: "Pikaminthagaeyeronikya eero". Eenitatsi paashini kamatsiri oemi, jeekatsiri apaniroeni: tekatsi osheninkapero kaminthayeroni. Irowakya roori, kameetha ikaminthagaeyeroni riraga aapatziyeeyaririmi Jesoshi.

### *Tsika akanteeyerini riraga jewatakagaeyeerini*

<sup>17</sup> Kameetharika reewatakaantzi riraga jewatakagaeyiririni aapatziyariri Jesoshi, okameethatz iñaaperoteri ikameethatz, eejatzi ipinataperoteri. Kameetha ikemijantaperoteri eejatzi. Aririka ipomeentsiwentakawo riroripaeni ikenkithatz, eejatzi riyotaantzi, okameethatz riraga aapatziyariri Jesoshi iñaaperooyerini, eejatzi ipinataperoteri.

<sup>18</sup> Aritaki okantzi Iwaperite Tajorentsi: "Eero oojopatziri riraga waaka aatzikakitzirori teriiko, pishineteri roya. Tema raatzikakitzimiro paantyaawori okithoki". Eejatzi okantzi: "Okameethatz ipinateeteri riraga antawae-tatsiri".

<sup>19</sup> Eero pikemijantashitari apaani kantakotashityaarini jewatakagaey-imirini, paapatziyawokari theeyaantsi. Omaanta ikaatakirika ñaaperoterini 2, eerorika 3, ari paapatziyawo iroka ikamantemiri.

<sup>20</sup> Kyaaryoorika ojeeki rantaperotakiri, ari pikantzimoteri janta ipiyotapiinteeyaninta aapatziyeeyaririni Jesoshi: "Eero papiiteero eejatzi iroka pantakiri". Kameetha riyoteeyeroni maawaeni aapatziyariri Jesoshi iroka pikanteriri, ikenkithashireeyantyaarini, riyoteeyantyaarini eero ranantawo rirori kaari kameethatatsi.

<sup>21</sup> Ayoteeyakini ikaateeyakaeni Atajorentsite, eejatzi Jesokirishito. Eejatzi ikaateeyakaeni ronampirepaeni rirori. Rootaki nokantzimotantzimiri eekiro piyaatatyee pikanteri maawaeni antzirori kaari kameethatatsi: "Tee okameethatz". Eero pipinkathatashitari jewawentzimiri eerori. Omaanta okameethatz piyoteeri ikoyiri Tajorentsi kimitaka piyoteeri maawaeni atziri.

<sup>22</sup> Eero pishintsiwentziri intsipaete apaani shirampari reewawenteri aapatziyariri Jesoshi, eero patsipetashitawo poyiniri pakoo iitoki. Peewate piyotaperoteri. Eerorika piyotaperotziri aririka paata rantakiro kaari kameethatatsi: eejatzi eerori eeniro pantani. Kyaaryoowa pantzirokaria kaari kameethatatsi.

<sup>23</sup> Eero apatziro piriro iñaa, omaanta pirero eejatzi awishoowaantsi oowa eechonkiini. (Iroka awishoowaantsi rootaki inashitachari pyarentsi.) Eechonkiini okaate apaani tajo, kaari osheki. Owameethateemiroota pisheetomawo pikatsitzira. Aapiintakimi pimakoni, omaanta oshintswathatakaaneemi aririka pirapiintero eechonkiini awishoowaantsi oowa, ari etsiyatakoteemi.

<sup>24</sup> Okoñaataki kaari kameethatatsi rantayitzirini apaanipaeni atziri; riyoteeyakini ikantakoteri Tajorentsi: "Eeniro rantani". Eenitatsi paashini manawitakawori rantayitzirini, omaanta iinja okoñaate eejatzi maawaeni rantayitzirini rirori.

<sup>25</sup> Eejatzi, aririka antayitakironi kameethatayitsirini, okoñaataki apaanipaeni, iñaakoteeyakaeroni atziri. Omaanta tekira okoñaate maawaeni kameethatatsiri anteeyakirini: iinja okoñaaperotaki maawaeni. Aritaki okantyaapa.

<sup>1</sup> Maawaeni riraga omperateetari pikemijantaperoteri kameetha riraga omperatzimiri, eejatzi piñaaperotaperoteri rirori kameetha. Okantyaatakyat tekatsi ikanteeteri ikantzimateri Tajorentsi, eejatzi tekatsi ikantawenteetero: "Tee okameethatzi iroka riyoteeriri aapatziyariri Jesoshi".

<sup>2</sup> Aririka raapatziyari Jesoshi riraga omperatzimiri, tee okameethatzi pikante eeroaka: "Iroñaka eerokataki noyemijantzinkarite, amonkaatawakaaka. Eero iroñaka noñaaperotzimi". Omaanta okameethap-erotzi pantawaetaperoteni: tema rirotaki piyemijantzinkarite pantawatziniri, rirotaki intaperotanewo riraga Tajorentsi. Rootaki, Temoteeyo, piyotagaeyeririni maawaeni aapatziyariri pikantteyerini maawaeni ranteeyeroni.

*Ikenkithatakotziri iyotaantzirori theevaantsi*

<sup>3</sup> Eenitatsi paashini atziri kinakaashitakawori riyotaantzi, tee omonkaatowo iroka niyoteeriri. Tee raapatziyawo rowaga kyaaryooperotatsiri riyotaawitariri Awinkatharite Jesokirishito. Ejatzti tee raapatziyawo iroka iyotagaeyakaerini ajeekantyaari kameetha, eero anantaneentaawo kaari kameethafatsi.

<sup>4</sup> Osheki ikantakaaperota, omaanta tee añiro riyotantari. Tee riyoperotziro. Rojampitakowentashitakawo oetarikapaeni. Iñaawaetashiwaetaka, wero, wero. Rootaki ikijashiryaantakariri paashini-paeni, ikijathatawakaaka, ikantzimatawakaaka, raamaakotawakaaka rantakiro kaari kameethatatsi.

<sup>5</sup> Ikijawakagaeyakanri riraga kenkithashiriiori kaari kameethatatsi, tee ikenkithashiriio kyaaryootatsiri. Ikemijantashijeempiyaaka, ikenkithashiryaawitaka ari rayemi oetarikapaeni.

<sup>6</sup> Omaanta aririka akemijantaperoteri Tajorentsi, eejatzi aweshiryaaawentyaari, ari ajeekaperoeyanakini kameetha.

<sup>7</sup> Akoñaantapaakari paerani, tekatsi akoñaatakaapaaki. Ejatzi okimiteeya, aririka akamae, tekatsi aanee ejatzi.

<sup>8</sup> Omaanta aweshiryaa wettanyaaririka Tajorentsi eejatzi eenitatsirika owaeyarini eejatzi akithaateeyarini aritapaaki, eero eekiro akowanakitye paashini.

<sup>9</sup> Omaantakya riraga kowatsiri rashaagantya rantashitayitakawoni oetarikapaeni roshekyaantyaawori rowaagawo. Omapokashitapaakari rantakiro oetarikapaeni. Tee ikenkithashireeya kameetha, ikowashitakawo kaari kameethatayitatsirini, roojatzi ikamakirika, riyaate paamariki kaartsiwananitatsini.

<sup>10</sup> Aririka akowaperotaki ashitayityaawoni oetarikapaeni, aritaki antakiro kaari kameethatatsi. Osheki aapatziyawitacharini rookaero raapatziyari. ¿Oetaka rookantawori? Tema ikowaki rashitayityaawoni oetarikapaeni, omaanta roojatzi osheki rowashireperotanakyaaroña.

## *Pikyaaryoowenteniri Tajorentsi pantawaeteniri*

<sup>11</sup> Omaanta eeroka, pikyaaryowentziniri Tajorentsi oetarika ikantzimiri. Kyaaryoowa, piñaawenatawokari eerori oetarikapaeni. Pikowaperote pikameethataperotanaki eeroka. Pikowaperote pameentaperotyaari Tajorentsi, omawitakya pomeentsitzimotayitemirini eekiro piyaatatye pikyaaryowenteniri maawaeni ikowakaakimiri panteniriri; pinintaperoeyerimiroña paashinipaeni, eekiro piyaatatye pantereniri oetarikapaeni, eejatzi eentsikiroeni pantero oetarikapaeni, eero pithaakyawentziro.

12 Aririka opomeentsitzimotawitemi paapatziyaperotaari Tajorents iroñaaka, omaanta okameethataperotzi pantakiro. Pikyaaryoowenteniri

ikowakagaeyimirini. Eero pipeyakotziro iroka: pikanteetatyeyaaani pañeejenokinta. Riyoyaakimi Tajorentsi rowañaanteemiri janta. Tema rootaki pikantakiri eerori, ikaateeyakini osheki kemaeyawakimirini. Kyaaryootaki pikantakiriri.

<sup>13</sup> Tema riro Tajorentsi owañagaeyeerini jenokinta, maawaeni. Eejatzi paerani Jesokirishito, tee ithaaawakari Poonshiyo Peraato, rirotaki owa-maakaantakiriri. Ikantziri: "Kyaaryo, naaka jewawenantsatsiri". Iroñaaka ikaateeyakaeni Tajorentsi eejatzi Jesokirishito, raminakowenteeyakaeni.

<sup>14</sup> Rootaki nokanantemirori iroka: pithotyaakiro maawaeni nokaminaakimiri, eero pikompitawo. Pikantatyeyaaani, pantaperotero roojatzipokanteevari Awinkatharite Jesokirishito.

<sup>15</sup> Riyotzi Pawa Tajorentsi tsika okaate ipokanteevari, rirotaki kantatsini. Irira apintzi ikanta, tajorentsiperotatsiri, reewatawenteeyirini maawaeni jewawentawitariri atziri, reewatakagaeyirini maawaeni jewatakagaeyawitaririni atziripaeni. Thame añaaperoteri.

<sup>16</sup> Apaniroeni irira eero ithonka, eero ikami. Janta ijekinta ojeeki kitejirioña, tekatsi akantya aatashiteri ontsirokyaa. Tekatsi ñeerinai Tajorentsi. Tekatsi akantya añaagaeyerini. Okameethatzi apinkathataperoeyanakirini maawaeni. Ikantatyaaani reewatawenantzi irira, ashi royro. Aritaki ikanta.

### *Jejatzi iroka ikantziriri ashaagantzinkari*

<sup>17</sup> Pikanteri ashaagantzinkari eero ikantakaaperota. Eejatzi pikanteri eero riweshiryaaawentawo rashitayitarini, tema ari opeyeeyaa iinja. Inta riweshiryaaawentyaari Tajorentsi. Ipapiinteyakaeni maawaeni koetyeemoteeyakaerini akimoshireeyantarini.

<sup>18</sup> Riraga ashaagantzinkari eenitatsi osheki rowaagawo. Pikamanteri iroñaaka ineshironkaeyerini ikaateeyini ijekkaeyini, osheki ineshironkateri. Tee okameethatzi ishampsitsite. Omaanta kameetha ikamintaahante.

<sup>19</sup> Aririka imatayitakironi iroka, kameetha. Ipinateri Tajorentsi iinja janta jenokinta, janta ikanteetatyeyaaani rañaaperotapae kameetha.

### *Riweyaantakawo rojankinari*

<sup>20</sup> Iroñaaka, Temoteeyo, eeniro ikantakimiri Tajorentsi panteniriri. Ari pimonkaateniri, eero pamatawitziri. Eero paapatziyashitawo oetarikapaeni ikantashitari, wero, wero, wero. Ikenkithashiryaashitawo iyotaantsi; omaanta kaari iroka.

<sup>21</sup> Eenitatsi iyotaantayitawitorini oetarikapaeni, iitakaawita ryotzi, omaanta tee ryotzi. Rootaki kaari raapatziyantaperotari Jesoshi iroñaaka.

Ari, nokowaki ineshironkateeyemini Tajorentsi.

Naaka jankinatzimiori iroka:

Paaworo

## RAPIITEENIRI PAAWORO ROJANKINATEENIRI TEMOTEEOYO

**1-2** Nokoyi niwethatemi, Temoteeyo, tsikarika pikanta pijeeki. Naaka Paa-woro jankinateemirori iroka. Rotyaantakina Jesokirishito nokamanteeyerini maawaeni atziri aririka raapatziyeyearini rirori, ari rowañaagaeyerini jika kipatsikika eejatzi janta jenokinta. Rootaki ikowakaakinari Tajorentsi. Notyomi, nonintaperotzimi. Nokowaki ineshironkatemi Pawa Tajorentsi, eejatzi Awinkatharite Jesokirishito. Eejatzi nokowaki ikaminthaa-perotemi, ijekakayemi kameetha.

### *Ipaasonkitakowentziri Paaworo Temoteeyo*

**3** Tema paerani rantawaetzinirini riraga nochariniitenipaeni. Iroñaaka eejatzi naari nantawaetzinirini. Tema namanakotapiintzimiri Tajorentsi maawaeni kitejiriki, eejatzi tsiteniriki. Otarikapaeni nanteniriri irinta, nokowaperotaki niweshiryaa-kayaari.

**4** Paerani, nookantanakimiranki, powashiretanaka, piraaka. Osheki iroñaaka nokoetyaakimi. Nokowawita noñeemimi eejatzi, niweshiryaa-wen-taperoteemimi.

**5** Nokenkithashireteemi, kameetharini paapatziyaperotakari Jesoshi, pikantataa-ni. Pikimitakawo pijawo Roera, eejatzi piniro Eyonishe: aapatziyaperoyerini roori. Niyotzi eeniro paapatziyari Jesoshi, rootaki nopaasonkitakowenantzimiri.

### *Eero pipashiwentakaawo paapatziyakayaari atziri*

**6** Paapatziyakari Tajorentsi, rootaki nakanantemiri: paerani, nowantakimirori nako, eejatzi nakanantakariri rirori ramitakotemi, eenitatisi imatakaakimiri. Iroñaaka pantaperotero maawaeni imatakaakimiri.

**7** Irinta Pawa Tajorentsi ipakaero Ishire. Roori tee okowakagae athaaye. Tee ari opoñeeya thaawaantsi Ishireki Tajorentsi, inta omataakaakao-oetarikapaeni ikowakaakaeri. Eejatzi omataakaakae anintaperooyerini Tajorentsi eejatzi maawaeni atziri; eejatzi omataakaakae aamakowentyaapaniroeni.

**8** Rootaki kaari pipashiwentakaantyaawo pikenkithatakoteri Awinkatharite. Eejatzi, eero pipashiwentakaana; nojeekakika omonkyaaagamentotsiki: nokenkithatakotakirira rirori, rootaki romonkyaa-ganteetakinari iroñaaka. Osheki nokemaatsitawentakari Jesokirishito, kameetha pikimitena eerori. Aritaki imatakayemiro Tajorentsi maawaeni ikowakaakimiri.

**9** Paerani, tekirani riwetsikironi iroka kipatsika, riyotzitakaeni aapatziyari Jesokirishito. Riyoyagaeyitakaeni kameetha ajeekaeyantyaarini. Tee akameethatawitanii paerani, omaanta eenitatisi ikowakaakaeri. Ineshironkatashiteeyakaeni, rowawijaakoeyakaeni.

**10** Ipokapaaki kipatsikika rirori, riraga owawijaakoeyakaeri. Iroñaaka aytaperoeyakironi maawaeni rantakaeniri Tajorentsi. Eero iroñaaka athaayi akame. Iñaani iyotakaakaero aririka akame, eero aatzi paamariki kaari tsiwakanitatsini. Kameetha iroka ikamanteeyeerini: rowañaaperoyerikaeni, akanteetatyeyaaani ajeekimoeysterini inampiki.

**11** Rotyaantakina rirori nokamanteeyerini atziri iroka kameethatatsiri, eejatzi niyotagaeyerini.

**12** Rootaki nokemaatsitantakawori maawaeni jika omonkyaaagamentotsika. Omaanta tee nopashiwenta. Niyotaperotziri riraga naapatziyari:

niyotaki eero ramatawitana, rootaki nokanantakariri: "Pikempoyeena". Niyotaperotzi ikempoyeena roojatzi ipokanteeyari.

<sup>13</sup> Kyaaryooperotaki maawaeni niyotaakimiri, tee namatawitzimi. Pi-monkaatero maawaeni nokantakimiri. Paapatziyari Jesokirishito, pinintashireperoteri. Pikaaryooowentero pikenkithatakotero iñaani.

<sup>14</sup> Okithaatakaakimi Ishire Tajorentsi. Omatakaakimiri pikempoyer oñaani kameetha eejatzi pikenkithatero.

### *Tsika ikanteeyiririnika Paaworo*

<sup>15</sup> Piyotzi rookaeyakinani aashiyajatzi: Jijeero, Eromoojeneshi, maawaeni.

<sup>16</sup> Nokowaki ineshironkateri Awinkatharite Oneshijjoro, eejatzi isheninka riori. Retakotapiintakina riori, tee ipashiwenta rareetaatana jaka omonkyagamentotsikika.

<sup>17</sup> Inta rareetantakari jaka Oroomaki, ikowakowayitakinani, roojatzi iñaantapaakinari jaka.

<sup>18</sup> Piyoperotzi eejatzi osheki ramitakotakina janta Ejeesoki. Iinja, ipokaerika Awinkatharite, aritaki ineshironkatapaeri.

## 2

### *Ikantziri: "Pikanteetatyeyaaani pantawaeteniri Tajorentsi"*

<sup>1</sup> Iroñaaka, notyomi, tema ineshironkatakimi Jesokirishito, rootaki nokamantzimiri pitontashirete maawaeni pantayitenirini.

<sup>2</sup> Eenitatsi pikemakinari, tema pikaateeyakirini osheki paashini ke-maeyakinari. Ari piyoyeeri apaanipaeni atziri ikyaaaryooowenteniri riyoteeri paashinipaeni atziri, rowaagaeniri eejatzi paashinipaeni iroka niyotaakimiri. Rowaagaeniri eejatzi paashinipaeni iroka niyotaakimiri.

<sup>3</sup> Riraga joraaropaeni kameethari ikemaatsitawentapiintari iwinkatharite. Pikimityari eerori, eero pithaayi pikemaatsitawentyaari Awinkatharite Jesokirishito.

<sup>4</sup> Eejatzi tee riyomparitapiinta joraaro, tee ipankiwaetzi, inta apatziro ikyaaaryooowentziniri iyapitaanote ikowantakariri.

<sup>5</sup> Eejatzi riraga peroottatsiri peroota ikemijantaperotziri riraga showirinkakotantatsiri. Eerorika ikemijantaperotziri, eero ipashiteetari irika ipapiintziriri anaakotantatsiri.

<sup>6</sup> Eejatzi riraga pankiwaetatsiri, aririka ithamaetakotaperotero iwankiri, ari rowiitero osheki okithoki iinja. Tee ratsipetashitawo ithamaetakotziro.

<sup>7</sup> Pikenkithashiryaaoperotero iroka noshiyakaawentzimiri, ari riyotakaaperotemiro Awinkatharite.

### *Pikenkithashireeri Jesokirishito*

<sup>8</sup> Pikenkithashireeri eejatzi Jesokirishito, riraga icharineeten iinja Iraviri; rowamaetawitakari, omaanta ipiriintanaa eejatzi. Rootaki iroka nokamantapiinteeeyiririni atziri, rowawijaakoeanteeyaaaririni.

<sup>9</sup> Nokantani nokenkithatakagaeyirini atziripaeni iroka, rootaki noñaashitaktakawori iroñaaka. Roojanteteakinawo kareenatha, ikimitakaanteetakina naaka owamaantaniri. Omaanta tekatsi ikanteetero roojotero iñaani Tajorentsi: tema owaaganaka roori.

<sup>10</sup> ¿Jitaka nokemaatsiwentakari maawaeni iroka? Riro nokemaatsiwentari maawaeni atziri riyoyaakiri Tajorentsi, ikanteetatyeyaaani ijekantyaari kameetha janta jenokinta. Rirotaki Jesokirishito owawijaakoterini.

<sup>11</sup> Kyaaryootaki iroka ikantziteetarin:

"Eerorika akimitaga paerani aritaki akimitakotawitakari atsipatakari Rotyaantanewo Tajorentsi, janta koroshiki akamaeyakini. Rootaki atsipatantapaeyaariri janta jenokinta, ajeekimotapaeri.

<sup>12</sup> Aritaki iroñaaka apomeentsiwentakanari antayitakinirini oetarikapaeni, rootaki eejatzi akaateeyerini eewawenanteeyini. Aririkaakanteri atziri: 'Tee niyotziri Jesokirishito', eejatzi ikantakotee paata rirori: 'Pawa, tee niyotziri tsikarika itzimi irira'.

<sup>13</sup> Aririka akenkithashireeya amatawiteri, akantashityaari: 'Naapatzi-yari', omaanta roojatzirika akimita paerani, eero amatawitziri Jesokirishito eejatzi eero ramatawitee rirori. Imonkaataperotero maawaeni ikantziri'.

Rootaki iinja rotyaanantyaariri kaari aapatziyarini janta paamariki kaari tsiwakanitatsini.

<sup>14</sup> Tema ikaateeyakaeni Awinkatharite. Pikantapiinteri riraga aapatziyariri Jesoshi janta eero ipiyapiyawaaantetari oetarikapaeni riyotaayitawitaririni. Ratsipetashitakawo ipiyawaantetakari iroka, ikompitakaarikari riraga kemaeyeririni.

<sup>15</sup> Pantaperotayitenirini Tajorentsi, ikanantemiri: "Kameetha maawaeni pantakinari", roojatzi eero añauro pipashiwenantyaari. Piyotaperotziro iñaani Tajorentsi, iroñaaka piyotaantero kameetha; tema kameethari iyotaantzi roori.

<sup>16</sup> Eero paapatziyawo okaatzi ikantashityaari kaari aapatziyariri Tajorentsi ikinakaashitanakawo, tema kaari rooperotatsini eejatzi kaari amitakoteeni, eero piñaawaetziro: pookakaaperotzirikari atziri aapatziyaririm Tajorentsi.

<sup>17</sup> Iroka kantashitaantsi oshiyakawo pathaawontsi. Aririka aakae, oth-onkanakae maawaeni awathakipaeni, apathaayitanakini. Ratsipetakawo ikantawakaantawo riraga Imeneeyo eejatzi Jireeto.

<sup>18</sup> Ikompiteeyakawoni kyaaryootayitatsirini. Ikantatzi: "Monkaataka. Ipiriinteyawitaani paashinipaeni, omaanta eero apiriinteeyaani aaka". Rootaki ipakaagaanantanakawori raapatziyari Jesoshi kemaeyakiririni. Omaanta ipiriinteero awatha Jesoshi aririka ipiye.

<sup>19</sup> Piyotero iroka okantziri iñaani Tajorentsi: "Riyotaperotziri Tajorentsi maawaeni aapatziyeeyaririni". Eejatzi okantzi "Eenitatsirika aapatziyariri Jesoshi tema rookero kaari kameethatatsi rantayitzirini". Aritaki okantkiri. Iñaani Tajorentsi oshiyakawo antawo mapi: tee opaashinitapiintee.

<sup>20</sup> Janta ipankoki ashaagantzinkari eenitatsi osheki iwiratote. Eenitatsi pinaperotachari, riwetsikaetziro ooro eejatzi piraata. Eenitatsi kaari pinatacha, riwetsikaetziro inchato eejatzi tsirepathari. Rowaga pinatachari, riweshiryawentakawo: ikowaki raminiteri maawaeni atziri. Rowaga kaari pinatacha aririka owantakyawo ookanteeyawo roojatzi kaagashiki.

<sup>21</sup> Aririka powameethateeya eeroka, pookakirorika kaari kameethatatsi pantapiinteeyaririni, ari pikimityaawo pirato pinaperotachari; riweshiryawentempi Awinkatharite, ikowaki iñaagaemi maawaeni. Tema iroñaaka pimatakiniri oetarika ikowakaakimiri.

<sup>22</sup> Eerowa pikenkithashiriilo kaari kameethatayitatsirini rantayitzirini ewankaripaeni. Intakya pikowaperotanaki pikameethatanee, pameenta-perotaneeyaaari, pinintaperoteri paashinipaeni, pijeeke kameetha, pitsipateeyaaarini paashinipaeni kameethatayitatsirini: maawaeni riraga aapatziyaperotakariri Awinkatharite ijeekaperotzi kameetha.

<sup>23</sup> Omaanta eero pikantawakaawentashitawo kaari ayotaperoyini: pikijawakaantawokari.

<sup>24</sup> Aaka aapatziyari Awinkatharite rootaki kaari okameethatantya akijeyerini paashini atziri; inta kameetha akaminthayeri paashinipaeni, kameetha ayoteeri, eero ajamaneentari,

<sup>25</sup> kameetha ayoteeri riraga kaari aapatziyeyawoni kyaaryooperotatsiri. Kameetharika ayoteeri, roojatzi apaanipaeni ikenkithashiryaaanakya, rookaero kaari kameethatayitatsirini ikemijanantyaawori kyaaryootatsiri. Ramitakoteri Tajorentsi.

<sup>26</sup> Ramatawitawitakari kamaari: ojeekawita ikowakaawitakariri, rootaki ranantawitakanariri rirori: omaanta ayotagaeri eentsikiroeni aritaki rowawijaakoteri Tajorentsi, aririka raapatziyeyayarini.

### 3

#### *Tsika ikantyaaka amatawitantatsiri, iinja*

<sup>1</sup> Piyotero iroka: iinja, rootentsirika omonkaatakya kitejitalsiri ipokantee-yari Jesoshi, osheki opomeentsitzimotaari aapatziyariri Jesoshi.

<sup>2</sup> Rirojatzi riraga atziri rirotaki nintaperotaachani apaniroeni, ikowaperoteri koriki, ikantakaaperotya, ishirontawentyaari paashinipaeni, ikantzmateri Tajorentsi, ipiyathatyaaari ashitariri, eero ipaasonkitziri neshironkaterin, eero ikenkithashirrii Tajorentsi.

<sup>3</sup> Eero riyotziro ikaminthayeri paashinipaeni, eero riyotzi ipeyakotziniri atziri rantziri, ikantzimatante, eero ipashiwentakaawo rantayiteroni tsinapeni, ikijanakya, itheenKayiterini kameethatayitatsirini,

<sup>4</sup> ramatawitayiterini isheninkaperopaeni, rantashitayityawoni oetarika-paeni, eero ikenkithashirya, ikantakaaperotanakya, ikowanaki ikmoshire-waetantyaari, eero ikoyi riyoteri Tajorentsi.

<sup>5</sup> Raapatziyajeempiyaashityaari Tajorentsi, omaanta tee ipinkathatziri. Eero pikimitakoteri eerori eejatzi eero pitisapeeyayarini.

<sup>6</sup> Ikyaaapankoteri paashinipaeni atziri, ramatawitapaero tsinanipaeni. Tee okenkithashireperota, rootaki imatantyaawori ramatawitapaero. Osheki antayitanakironi kaari kameethatatsi, okwaperotanaki antayiteroni.

<sup>7</sup> Osheki okemijantashitayitakarini paashini iyotaawitawori omaanta tee riyotaaperotziro kyaaryootatsiri ikantziri Tajorentsi.

<sup>8</sup> Paerani riraga Jaaneshi eejatzi Jaampireshi ipiyathatakarini Moeseeshi, tee ikowakayiri joriyopaeni raapatziyakagaeyaarin. Eejatzi ikimitakari iroñaaka riraga amatawitantatsiri: tee ikowakagaerini atziri raapatziyaperotawo kyaaryootaperotatsiri. Tee okameethatzi iroka ikenkithashiryaaayitakirini, ikemijantajeempiyaashitaka.

<sup>9</sup> Eero ikantatyaaani imatero iroka. Tema paerani riyotakoeyirini riraga piyathatakaririni Moeseeshi. Eejatzi iinja riyoteeyanakini atziri kyaaryo ramatawitantaki riraga amatawitantsiri.

#### *Pikemijantaperotero kyaaryooperotatsiri*

<sup>10</sup> Omaanta piyotakotaperotakina. Piyotakiro niyotaayitzimirini. Piyotakiro nantayitzirini. Piyotakiro nokowakiri nomatayiterini naari nantayiterini. Piyotaki eejatzi nameentaperotakari Tajorentsi, nokyaaryooventziniri maawaeni, nonintaperotakiri, tee nojamaneentawo nopomeentsitawentakari.

<sup>11</sup> Eejatzi piyotzi ikijantapiinteetakinawo naapatziyari Jesoshi. Piyotaki eejatzi nokemaatsitapiintakawo janta Antyokiyyaki, Ikooñoki, eejatzi Riishitaraki. Osheki ikijeeyakinani jeekaeyatsirini janta. Omaanta rowawijaakotapiintakina Awinkatharite.

<sup>12</sup> Kyaaryo, ikijeetziri maawaeni aaka aapatziyariri Jesokirishito, aririka akowaperotaki raapatziyaperotyaari.

<sup>13</sup> Eekiro riyaatatyee ramatawitaperotante riraga kaari kameethatatsi, eejatzi iyotaantzirori theeyaantsi. Eejatzi riraga kamaari ramatawiteri rirori.

<sup>14</sup> Omaanta eerokakya, paapatziyanyakyaawo iñaani Tajorentsi eeniro pikaatzini. Roojatzi paapatziyantariri Jesokirishito ari rowawijaakotakimi. Tema piyotaki tee namatawitzimi.

<sup>15</sup> Paerani, eeniro pikaatzini, ryotagaetakimiro iñaani Tajorentsi. Tema okameethaperotaki. Rootaki iyotaakimirori paapatziyakari Jesokirishito, pawijakotantaari.

<sup>16</sup> Rirotaki Tajorentsi jankinatakaantakirori Iwaperite, maawaeni. Iyotagaeyakaeroni kyaaryootaperotatsiri, teerika okameethatzi antakiri, okamantakae. Iyotagaeyakaeni tsika akantyari akameethatanteeyari, eejatzi iyotagaeyakaeni akameethapereroeyakaeni kameetha.

<sup>17</sup> Rootaki ojeekantakari Iwaperite Tajorentsi, akameethataperotanteevari. Tekatsi akantya akompitantyaawori, omaanta ayotaperotero antaperoyeroni maawaeni ikowakaakaeri Tajorentsi.

## 4

### *Riweshiryaakaakari Paaworo Temoteeyo*

<sup>1</sup> Inja ipokae Jesokirishito ipinkatharitapaaki. Aririka ipokae, ari roñaagayitapaakaeroni rantayitzirini maawaeni añeyatsirini eejatzi maawaeni kamaeyeentsirini. Ikamanteeyeeni tsika ikanteeyeeni. Ayoteeyini ikaateeyakaeni iroñaaka, eejatzi ikaateeyakaeni Pawa Tajorentsi, rootaki iroñaaka, nokamanantzimirori pantero iroka.

<sup>2</sup> Pikenkithatapiintero iñaani Tajorentsi maawaeni kitejiriki. Tsikarika ikaateri oorya, tsikarika pijeeki, eerokya pimaeritzi, omaanta pikenkithatakayeri maawaeni atziri. Teerika okameethatzi iroka rantakiri, ari pikanteri, eejatzi pikanteri eero rantziro. Pikanteeyerini kameetha ijeekaeyeni. Eentsikiroeni piyotaaperoeyerini paashinipaeni, eerokya pikijathatziri.

<sup>3</sup> Inja, aririka kameetha ayotagaeyawityaarini atziri iñaani Tajorentsi, omaanta eerorika ikemijanteeyironi.

<sup>4</sup> Eero ikoyiro iñaani Tajorentsi rowaga kyaaryooperotatsiri, omaanta ikowaperote ikemashityaawo ryotagaeteri theeyaantsi ikenkithatashitayitarini atziri.

<sup>5</sup> Omaanta eerokakya, paamawentya: pikimitarikari. Aririka pipomeentsitawentyaari Awinkatharite, eero petakoshiryaashita. Paapatziyakayaari paashinipaeni. Pimataperotakiniri Tajorentsi maawaeni ikowakaakimiri.

### *Ikenkithashireeri Paaworo*

<sup>6</sup> Ro nokamanantzimirori iroka, rooteentsi rowamagaeten, rooteentsi niyaate naari jenokinta.

<sup>7</sup> Nopomeentsiwentaperotakanari Awinkatharite, nomatakiniri maawaeni ikowakaakinari, tee namatawitziri.

<sup>8</sup> Inja, ipokaerika Awinkatharite, ipashitayitenawoni kameethatayitatsirini. Eero ipanawo apaniroeni naari, omaanta eejatzi ipaeyerini maawaeni aamagaeyakaririni. Tema kameetha ikantakowenteeyakaeni maawaeni. Riraga antapiintzirori kaari kameethatatsi riraga kaari aapatziyari Jesoshi ari rowashironkaeri. Omaanta naaka eejatzi maawaeni paashini aapatziyaperotariri eejatzi maawaeni paashini nintashireperottiriri riraga kantziriri: "Nokoyiipiyee intsipaete", kyaaryo ipinateeyenani kameetha.

*Paashini ikamanteeriri eejatzi*

- <sup>9</sup> Pishintsite pipoke piñeena.
- <sup>10</sup> Riraga Teemashi, ikowaki riweshiryaaawentyaawo jeekayitatsirini kipatsikika. Rookanakina, ryaatanaki Tejawoonikaki. Riraga Keresheente, ryaatanaki Karaashiyaki, riraga Teeto ryaatanaki Taramaashiyaki.
- <sup>11</sup> Apaniroeni Rookashi itsipatakina. Aririka pipoke, pamakinari Marikoshi, osheki nokowaki ramitakotena.
- <sup>12</sup> Eejatzi ryaatanaki riraga Teekiko. Notyaantakiri rirori Ejeesoki.
- <sup>13</sup> Eejatzi pamakinawo noethaari nowanakirowa Toroowareki, ojeeki janta ipankoki Kaaripo. Eejatzi pamakinawo maawaeni Iwaperite Tajorentsi, ejatzi nowaperitepaeni.
- <sup>14</sup> Rowashironkaaperotakina Arejaantero, riraga wetsikapiintzirori asheero. Tema itheeyakotana eejatzi okaatzi niyotaakiri atziri. Linja rowashironkaeri Awinkatharite.
- <sup>15</sup> Paamayarira eerori, rowashironkaemikari. Osheki ikijawentakinawo nokanteeyakiririni.
- <sup>16</sup> Ritantakari reewawenantzi rojampitakowentana, tee ijeeki kantakowentenani, ishiyapithateeyanakinani. Tee nokoyi rowashironkaeri Awinkatharite.
- <sup>17</sup> Omaantakya irira, kijokiro rowana. Itajonkawentakina, nomatantawori nokenkithatakagaeyirini paashinijatztatsiri atziri, maawaeni. Tema Jatanaashi rantakaakiri rowashironkaetenamira, omaanta rowawijaakotakina Awinkatharite.
- <sup>18</sup> Aririka rowashironkaetakina eejatzi, niyotaki ari rowawijaakoteena eejatzi; ijeekakayena jenokinta, janta reewawenantaperotzinta rirori. Thame añaaperotaperoyerini, aritaki akanteetatyeyaaani.
- <sup>19</sup> Niwethatawo Pirishiira, eejatzi rirori Akiirishi. Eejatzi niwethatari maawaeni isheninka Oneshijoro.
- <sup>20</sup> Eeniyo Eraashito, ijeeki janta Koriintoki. Nawijantakawori Mireetoki, noñaaneeri Toroojimo: imantsiyatagi.
- <sup>21</sup> Pishintsite pipoke, tekiraata okyaawontsitanaki. Riwehateeyemini Eywooro, Poreente, Riino, Kiraaworya, eejatzi maawaeni ayemijantzinkarite.
- <sup>22</sup> Nokowaki ikaminthayemi Awinkatharite, ineshironkataperotemi. Naaka jankinatzimirori iroka:

Paaworo

## RIRAGA PAAWORO ROJANKINATZINIRI TEETO

<sup>1</sup> Nokoyi niwethatemi eeroka Teeto tsikarika pikanta pijeeki. Naaka Paaworo nojankinatzimiro iroka. Riyoyakina Tajorents nanteniri oetarika ikowakaakinari. Rootaki rotyaanantakinari Jesokirishito niyotakaaperoteri maawaeni atziri kyaaryooperotatsiri, ikyaaaryoowenantyaawori rameentaperotaari Jesoshi ejatzi rantero oetarika ikowakaakiriri Tajorents.

<sup>2</sup> Paerani, tekirani riwetsikironi kipatsi, ikantzitakan Tajorents: "Nañaakaaperoteri maawaeni nokoyiri, nojeekakayeri jaka jenokinta". Tee riyotziro ramatawitantzi, rootaki ayotantari akanteetatyeyaaani añaagae janta Tajorentsikinta.

<sup>3</sup> Iroñaaka monkaataka kitejiri riyoteeyantyaaworini maawaeni atziri ikantziri Tajorents, riraga Owawijaakotakaeri. Rootaki rotyaanantakinari nokamanteyerin atziripaeni.

<sup>4</sup> Paerani niyotakaapiintzimi paapatziyari Jesoshi, rootaki, Teeto, iroñaaka nokimitakaantakimiri notyomipero ejatzi nojankinatzimiro iroka. Nokowaki ineshironkatapiintemri riraga Tajorents, riweshiryaakayemi, ejatzi ikimitakayemi Jesokirishito, riraga Owawijaakotakaeri.

### *Tsika ikantyaari jewatatsiri reewawenantyaariri aapatziyariri Jesoshi*

<sup>5</sup> Paerani nookanakimi janta Kereetaki pithonkantyaawori oetarikapaeni okaatzira tekiraga antakagaeyerini. Ejatzi nokantakimi: "Aririka pikinakinayitakini janta maawaeni nampitskipaeni, piyoyayiteeni aataperoteenchari aapatziyeyayaririni Jesoshi raapatziyakaantaperotaariri iyemijantzinkarite".

<sup>6</sup> Iroñaaka nokamantemri. Okameethatzi riraga aataperoteenchari iyemijantzinkarite eero reewatakaantashita, rooma teerika ijeeki kameetha. Inta okameethatzi ijeeki kameetha, ejatzi apatziro rayi apaani iina, ejatzi okameethatzi maawaeni reentsite raapatziyari Jesoshi: ijeeki kameetha, eero ipiyathatari iriri, rootaki tekatsikya ikantakotashiteetyaari oetarikapaeni.

<sup>7</sup> Ñaakiro, aririka ikowaki rantawaeteniri Tajorents amitakoeyerini iyemijantzinkarite, tema okameethatzi rameentaperotari rirori. Tee okameethatzi ipiyawaantantya, ikijya intskipaete, ishinkitya, rantawakaapiintya paashinipaeni. Tee okameethatzi ramatawiteri paashinipaeni raapithatantyaariri iyorikite ejatzi rowaagawo.

<sup>8</sup> Omaantakya okameethatzi raakameethatante roemaante ipankoki areeteetyaaririka; inintaperoteri maawaeni okaatzti kameethatatsiri; ikenkithashiryaanakya kameetha oetarika ranteri ejatzi iñaaawate; kameetha ikantya; ikameethashiryaaperote; ejatzi riyote raamawentya apaniroeni eero ranantawo kaari kameethatatsi.

<sup>9</sup> Kameetha ikyaaaryoowentero raapatziyaperotaawo ikantziri Tajorents, tema kyaaryooperotak rootaki amatantyaawori ameentyaawo. Rootaki rowaga ayotaakiriri aaka, imatantyaawori riyotaantaperotero paashinipaeni kyaaryootatsiri. Ejatzi imatantyaawori riyotayeri riraga theenkantatsiripaeni.

*Pomaereeri kereetajatzi riraga kowawitachari owameethaterinimi aapatziyariri Jesoshi*

<sup>10</sup> Eenitatsi janta oshekini theenkakirori iñaani Jesoshi. Ipiyathatakari kenkithatacantatsiri, rirotaki ñaawaetashiwaetchari, eejatzsi rirotaki amatavitantatsiri maawaeni. Tema ikanteeyani riraga kantashiteeyawitaririni aapatziyariri Jesoshi: "Pikimitakoperoyaarini kameetha joriyo".

<sup>11</sup> Nokowaki pomaereeri maawaeni irinta. Rooma tee okameethatzsi iroka riyotaantzirika, eejatzsi tee okameethatzsi rantakirika; osheki rookakaajeempiyaakari aapatziyawitakariri Jesoshi. Tee ikowanee raapatziyaneeyari. Ramatawitakiri. Apatziro ikowashitakawo rayitashityaari riraga aapatziyariri Jesoshi iyorikite.

<sup>12</sup> Paerani eenironi apaani kamanantatsiri riraga kereetajatzsi kenkithatakaakiriri isheninka, ikantakiri paashinipaensi atziri: "Riraga kereetajatzsi ashi rowaeyironi ramatawitantzi, kijaperotzinkari perantzi eejatzsi waagatzinkari".

<sup>13</sup> Kyaaryootaki ikantakiri. Rootaki pikaminaantaperotyaaariri rirangancki theenkantsirtsipaensi eero ranantawo inta raapatziyaperotantyaa-wori kyaaryooperotatsiri.

<sup>14</sup> Tee okameethatzsi raapatziyawo kenkitharentsi ikenkithashiryaashitayitarini joriyyotatsiri, eejatzsi tee okameethatzsi raapatziyawo ikantashitari riraga theenkirori kyaaryooperotatsiri.

<sup>15</sup> Aririka akameethashirete, tema ari antakiro kameethatatsiri. Omaanta irintapaensi teerika ikameethashiretsi, riraga theenkantsirtsir aritaki rantakiro kaari kameethatatsiri. Kyaaryo eero imatziro ikenkithashiryaawo kameethatatsiri.

<sup>16</sup> Ikantawita iriraki: "Niyotziri Tajorentsi", omaanta tee ijeki kameetha. Rootaki ayontakarri itheeyashita, tee riyotziri. Tee ikameethatziwee rirori, ipiyathatanta, tee riyotzi rantero kameethatatsiri.

## 2

### ***Ikaminagaeyakirini riraga Teeto tsika ikanteeyarini aapatziyariri Jesoshi***

<sup>1</sup> Eerokakya, kameetha piyotaantaperote kyaaryooperotatsiri.

<sup>2</sup> Piyoteeri maawaeni shirampari aatzimateencharira kenkithashiryaakotero okaatzi kameethatatsiri ranteri roojatzsi rantero imatantyaawo paashinipaensi iñaapinkathantyaariri, raamawentya apaniroeni, eero ishinkita, kameetha ijeki, ikenkithashireeya kameetha, rameentaperotyaaariri Jesoshi, ineshironkaperoteri maawaeni atziri eejatzsi eekiro ryaatatyye ikyaaaryoowenteniri Tajorentsi maawaeni ikowakagaeyakirini, omawitya opomeentsitzimotaari.

<sup>3</sup> Eejatzsi pikimitzityaawo maawaeni tsinani aatzimateencharira piyotayero kameetha ojeeki, kameetha aapatziyari Jesoshi. Tee okameethatzsi okantzimatante, eejatzsi tee okameethatzsi omiritapiintero shinchaari, oetarikapaensi. Kameetha ojeeki iyotaantawakyaariri paashinipaensi aapatziyariri Jesoshi okaatzi kameethaperotatsiri.

<sup>4</sup> Anteriorika iroka omatero iyotero maawaeni ewankawo oneshironkap-eroteri oemi eejatzsi eentsitepaensi.

<sup>5</sup> Eejatzsi iyotero maawaeni ewankawo tsinani aamawentya apaniroeni eejatzsi okameethashireperote. Eejatzsi iyotero kameetha onkotsiwaete, os-hirikawaete, okiwawaete, maawaeni; oneshironkatante, okemijantaperoteri oemi. Roojatzsi tekatsikya ikanteetero itheenkaetero iñaani Tajorentsi.

<sup>6</sup> Eejatzsi piyoteeri maawaeni ewankari raamawentya apaniroeni, ijekantyaari kameetha.

<sup>7</sup> Eejatzsi eeroka kameetha pantaperotzityaari maawaeni iroka imatantyaawori maawaeni paashini atziri riyotero tsika ikantya

ijee kantyaari kameetha. Kameetha piyota antaperote eerori, tema piyoperotzi raminakotzimi Tajorentsi.

<sup>8</sup> Kameetha pikenkithawa etakayeri atziri eero itheen kanteet zimi. Roojatzi ipashi wenan tanaka ya kowawitachari ithawetako temimi, tekatsi okantya ithawetako temimi.

<sup>9</sup> Piyota aperoteri pimanta arewo ikemijantaperoteri amanantziriri, ranta-peroteniri maawaeni ikanteriri. Tee okameethatzi ipiyawa antetyaari,

<sup>10</sup> tee okameethatzi ikoshite. Inta kameetha ijekae ri yotan tanaka yaari riraga amanantziriri eero ramata witanerie. Iña akiririka kameetha ijekae roojatzi ikanan tanaka ya atziri: "Tema osheki okameetha perotaki iñaani Tajorentsi ikenkithata koteetakiri".

### *Tsika ayotantakari ineshironkatakae Tajorentsi*

<sup>11</sup> Okameethatzi piyoteeri maawaeni ayemijantinkarite ijeki kameetha kimitarowi iroka nokamantzimiri. Tema ayoteeyakini ineshironkatakae Tajorentsi, rooma rotya antakiri Itomi jaka kipatsikika rowawijaakotee aakapaen i maawaeni atziri.

<sup>12</sup> Kyaaryo ineshironkatakae. Iroka iyotakae ookaero kaari kameethatatsi akowashitaka aaka antero, eejatzi ookaero maawaeni rametayitarini theenkantatsiri. Ayotaki okameethataki maawaeni kitejiri aamawentya apaniroeni, akameethate, ameentaperotyaari Tajorentsi.

<sup>13</sup> Eejatzi iyotakae maawaeni aamagaeyarini iroñaka Tajorentsi: riraga Awinkatharite Jesokirishito. Tema rirotaki Owawijaakotakaeri aaka maawaeni. Ayoteeyakini eero ramata witee, aritaki ipokae, rootaki aki-moshiryaantari. Ari afeeyawaerini ipinkatharita paapi.

<sup>14</sup> Antapiinteyawitakawoni kaari kameethatatsi, omaanta ikamawen-takae, rowawijaako eyantakaerini rowameethatanta kaeri, ashinkataper-oe yanta aririni. Rootaki akowaperotantakari antapiinteero kameethat-sipaaeni.

<sup>15</sup> Pikamantaperoteeyerini maawaeni atziri iroka nokantakimirika. Rooma ikowakaakimiroky Tajorentsi. Ikowaka antakimirori pithaamentakaashireeyari maawaeni atziri raapatzi yaperotantyaariri Tajorentsi. Teerika okameethatzi rantziri, kameetha pikamineeri. Eero pishinetayiri itheen kemi.

## 3

### *Eejatzi paashini ikanteri kameetha ikemijanantyaari aapatziyariri Jesoshi*

<sup>1</sup> Pikenkithashiryaa kayaari maawaeni aapatziyariri Jesoshi ipinkathateeyerini maawaeni ikaatzi jewatakanantatsiri paen i, pinkatharipaen i, ikemijantaperoteeyerini. Ikowaperoeyironi riroripaen i rantero maawaeni okaatzi kameethatatsi.

<sup>2</sup> Pikanteyeri eero ikantzimatzi paashini paen i atziri, inta kameetha raakameethateri maawaeni. Eero ikijantzi inta kameetha ikaminta haante, iña aperoteri maawaeni atziri ikameethatzi.

<sup>3</sup> Paerani aari tee akenkithashiryaa witawoni eejatzi apiyathata witakarini Tajorentsi, aateeyenimi paamariki kaari tsiwakanitatsini. Amata witantaw-itani, antapiintashita witawoni maawaeni akowashita witawoni. Akantani akowawita akemaatsitaka awityaari paashini atziri, antapiintawitawoni kaari kameethatatsi, akowapiinteyawitakani akimitakoeyaa rin i paashini-paen i; tema oonawakaapiinteyawitani.

<sup>4</sup> Omaanta ri yotakaakae Tajorentsi, riraga Owawijaakotakaeri. Riy-otakaakae, ineshironkatakae, eejatzi inintaperotakae.

<sup>5</sup> Rowawijaakotashitakae. Tee anteeyawitawoni kameethatatsiri-paeni, omaanta ineshironkatashitakae. Rowawijaakotantakaeri, rowameethatakae, ipaashinitakaakae owameethashiretakae Ishire, rootaki kaari akimitanta paeran, ajeekantari kameetha iroñaaka.

<sup>6</sup> Aapatziyakari Jesokirishito, riraga Owawijaakotakaeri, rootaki rotyaan-taperotantakaerori Tajorentsi Ishire, tee ithañeeyaawo.

<sup>7</sup> Tema ashi royiroyo ineshironkatantzti rootaki rowameethatantakaeri. Tema paeran kashiyakaakari atziripaeni aapatziyariri aritaki ijekae janta jenokinta. Ayotaki eero ramatawitee. Tema aapatziyari, rootaki iñaatantakaeri Tajorentsi akameethatzti, rootaki ayotantakari akanteetaty-eeyaani ajeeki kameetha janta jenokinta.

<sup>8</sup> Kyaaryooperaotaki iroka nokantakimiri. Nokowaki pikanteri maawaeni ameenteriri Tajorentsi rantero maawaeni iroka pikamantaperoteri. Rootaki ikenkithashiryaakontanyaawori rantapiintero kameethatatsiri. Okameethaperotaki maawaeni iroka, eero ratsipetashitawo rantero.

<sup>9</sup> Omaanta eero pojampitakowentziro kaari riyotaperoetzi, eejatzi eero paapatziyashitawo ikenkithatakotashitari riraga itakaantaworini. Eero piñaanatawakaanteeyawoni rojankinarini Moeseshi, eero pikijathatawakaantawo. Patsipetashitawokari, eero amitakotzimi.

<sup>10</sup> Eenitatsirika amatawiterini aapatziyariri Jesoshi ikijawakaanteeyaarini, pikamineeri eero ramatawitantzti. Eerorika raapatziyimi, apawo papiitaperoteri. Rooma eerorika raapatziyimi, pookeri, eero pishinetziri riyooteeri riraga aapatziyariri Jesoshi.

<sup>11</sup> Raapatziyawo theeyaantsi irinta. Tee okameethatzি rantziri. Rirojatzi yotakotaacha eeniro rantani.

### *Riweyaantakawo ikantakiriri Paaworo Teeto*

<sup>12</sup> Notyaantemiri Areteemashi, rooma eerorika irira, notyaantemiri Teekiko. Aririka piñaawakiri, pishintsitanaki piyaatanaki Nikooporishiki, aritaki piñaawakina janta. Aritaki noshiretakawo nokyaawontsitakote paata janta.

<sup>13</sup> Pamitakoteri irira Sheenashi, eejatzi Apooro. Riraga Sheenashi riyotziro ikantziri pinkatharipaeni. Pipawakiri maawaeni koetyemotziriri aririka itharyaanaxya. Tee okameethatzি ikoetyaawaete.

<sup>14</sup> Kameetha riyoteeyeni maawaeni ayemijantzinkarite ineshironkatante. Okameethatzি ramitakoteri riraga ashironkaenkari. Okameethatzি rantero maawaeni kameethatatsiri.

<sup>15</sup> Riwhethateeyimini maawaeni aapatziyariri Jesoshi jaka. Niwethatari maawaeni aapatziyariri Jesoshi jaga, riraga nintaperoeyanarini. Nokowaki Tajorentsi ineshironkatemi maawaeni.

Ari okaatzi

Naaka jankinatzimirori:

Paaworo

## ROJANKINATZINIRIRI PAAWORO JIRIMOONI

<sup>1</sup> Nokoyi niwethatemi eeroka Jirimooni, tsikarika pikanta pijkeeki. Naaka Paaworo nojankinatzimiro. Nojeeki iroñaaka jaka omonkyagamentotsikika, omaanta nanteniri Jesokirishito oetarika ikowakaanari. Notsipatakari ayemijantzinkarite Temoteeyo nojankinatzimiro iroka. Nonintaperotakimi. Pikimitakina, antziniriri Tajorentsi oetarikapaeni.

<sup>2</sup> Iroñaaka niwethatyaa wo Aapiya, ayemijantzinkawote. Eejatzi niwethatari Arikiipo, nokimitakaantakiri nojoraarotzinkarite. Riorama joraaropaenii ikyaa ryooowentapiintzini iyapitaanote maawaenii ikowakaakiriri. Okimitaki, eejatzi riraga Arikiipo, imonkaatakina, nokyaaryooowentziniri Tajorentsi maawaenii ikowakaakinari. Eejatzi niwethatyaa maawaenii ayemijantzinkarite piyotapiintachari pipankoki.

<sup>3</sup> Nokowaki ineshironkatapiinteeeyemini Pawa Tajorentsi, kameetha ijeebakagaeyemini. Eejatzi ikimitakagaeyemini Awinkatharite Jesokirishito.

### *Riwershinyaawentari riraga Paaworo Jirimooni*

<sup>4-5</sup> Ikamanteetapiintakina pikantani paapatziyari Awinkatharite Jesoshi, eejatzi pinintashireeyirini maawaenii aapatziyariri rowameethatanewo Tajorentsi. Rootaki namanapinantariri Atajorentsiti: “Ariwee Pawa, pimatakaakiri Jirimooni, eekiro piyaatatye pamitakoperoteriño”.

<sup>6</sup> Eejatzi namaniri ramitakotemi eekiro piyaatatye paapatziyari Jesoshi eejatzi ramitakotemi piyotero maawaenii kameethaperotatsiri ipakaeri riraga aapatziyantariri. Rootaki pimatantari pamitakoteri maawaenii aapatakariri iñaaperotantariri Tajorentsi.

<sup>7</sup> Iroñaaka niyotaki, nonintaperotanewo, pineshironkatziri paashinipaenii aapatziyariri Jesoshi rowameethatziri Tajorentsi, eejatzi piweshiryaaakaakari, rootaki nokimoshiryaa wenantakimiri, eejatzi niweshiryaa wenantakimiri.

### *Ikantakowentziri Oneeshimo*

<sup>8</sup> Niyotzi naaka rotyaantane wo Jesokirishito; ishinetakina nomperatemiro oetarika okameethatziz panteri,

<sup>9</sup> omaanta anintaperotawakaaka eejatzi niyotzi pinintaperotakiri ayemijantzinkarite, rootaki kaari nokowanta nokantemi: “Ajaa, iroka pantayiterini”. Rooma nantyashiparitaki iroñaaka, eejatzi apatziro nantziro ikowakaakinari Jesokirishito. Ñaakiro, nokenkithatakotziri Jesokirishito, rootaki romonkyaagaetantakinari omonkyagamentotsikika. Rootaki nokowantari eeroka pikemijantena.

<sup>10</sup> Eenitatis jaka atziri niyotakaakiriri Jesoshi, nokimitakaantakiri notyomi iroñaaka. Iwaero Oneeshimo: rirotaki irika nokantakowenteri.

<sup>11</sup> Paerani pitawitanakari omaanta tee ikemijantaperotzimi inta ishiyaappithatakimi. Omaanta iroñaaka kameetha ikemijantaperotemi eerori ramitakotemi, eejatzi ineshironkatena naari.

<sup>12</sup> Notyaanteri iroñaaka ipiyashitaneemi, irika nonintaperotakiriroña.

<sup>13</sup> Nokowaperowitaka kijokiro rowanakinami jaka, ramitakoperotenami omonkyagamentotsikika, okimityaami arimi pijkeekemi jaka, pineshironkatenami eerori, rooma nokenkithatziro ikantziri Tajorentsi, rootaki nojekantakari jaka iroñaaka.

<sup>14</sup> Omaanta tee niyotzi oetarika pikoyiri eerori. Tee nokoyi nokantaperotemi potyaanteri patzirite ramitakotena; eeroka kantatsini.

<sup>15</sup> Aririka riraga Tajorentsi ishinetakiri Oneeshimo ishiyapithatawitakimi eeroka eechonkiini aritaki raapatziyari rirori roojatzi ipiyashitatemiri ikantani ijeekakaakimi.

<sup>16</sup> Paerani pamanantanewo rinawitani. Omaanta iroñaaka kaari apatziro pamanantanewo inta irira rirotaki eejatzi piyemijantzinkarite, riraga anintashiretanewo. Osheki nonintaperotakiri naari, iroñaaka pinintaperotawaeri eerori. Okameethatzi pineshironkateri, tema atziri, omaanta okameethaperotaki pineshironkaperoteriroña, rirotaki piyemijantzinkarite.

<sup>17</sup> Pamine, pikenkithashiryaaka aaka atsipataminthatawakaaka antawaetziniri Awinkatharite. Ari, iroñaaka nokowaki pineshironkatawaeri riraga Oneeshimo, pikimitakaantenami pineshironkatawaenami naakami areetapaenchanimi.

<sup>18</sup> Aririka ikoshitakimi, eejatzi aririka rireewitakimi, ari pikowakotenawo naari maawaeni.

<sup>19</sup> Naakanya nojankinatzimiro iroka nashi nako, kaari paashini atziri. Nopinatemiri oetarikapaeni rireewitakimiri. Omaanta pikenkithashireero osheki noneshironkatakimi paerani; piyotzi eeromi nojeeckimi, eero pawi-jakotzimi.

<sup>20</sup> Rooma, noneshironkatanewo, paapatziyari Jesoshi Awinkatharite, iroñaaka nokowaki pineshironkatena naari. Rooma pikimitakina naaka paapatziyari Jesokirishito, iroñaaka nokowaki piweshiryaakayena. Pi-monkaaterorika iroka nokantzimiri, ari niweshiryaanakya.

<sup>21</sup> Niyotaki aritaki pikemijantaperotakina rootaki nojankinatantakimirori. Niyotaki ari pantakinawo maawaeni nokantakimiri, aritaki pantawaetakiro eejatzi paashini osheki kaari nokantzimiri.

<sup>22</sup> Eejatzi nokowaki piwetsikenawo tsikarika nojeeckantapaakyaaari. Niyotaki pikantani pamaniri Tajorentsi roemishitowanteenari, rootaki niyotantakari ari noñaapaemi.

<sup>23</sup> Eeniro ikaatakina Epaajagashi jaka omonkyaaagamentotsikika. Ikitakina ikenkithatakotziri Jesokirishito, rootaki romonkyagaetantakinari eejatzi; riwethatzimi rirori.

<sup>24</sup> Eejatzi riwethatzimi Marikoshi, Arishitaariko, Teemashi, Rookashi, maawaeni. Ikaatakina nokyaaryooowentziniri Tajorentsi oetarikapaeni.

<sup>25</sup> Nokowaki eekiro riyaatatyе ineshironkatemi Awinkatharite Jesokirishito.

Ari okaatzi.

Naaka jankinatzimirori:

Paaworo

## ROJANKINEETZINIRI IJORIYYOTZINKARITE

### *Tajorentsi rotyaantakiri Itomi ikenkithatkoteri*

<sup>1</sup> Paeraniperoroña riraga Tajorentsi riyotaqaeeyapiintakirini riraga kamanantayitzirorini iñaani rirori. Apaanipaen iñaaperotziri Tajorentsi, irira paashinipaen ikiemashitakari iñaanatziri, irira paashinipaen iñiiri ronam-piri, irira paashinipaen eejatzi imishitakaakiri. Eekiro, eekiro riyotaqaeeyakirini oetarika ikowakaakaeri aakapaeni. Roojatzi riroripaen, eekiro, eekiro ikamantanakitziiri riraga acharinuutenipaen paerani.

<sup>2</sup> Omaanta iroñaakakya, riyotaaperoeyakaen itomipero riraga Tajorentsi. Tema iitziri irira jewawentziriri maawaen atziri eejatzi maawaen oetarika añaayitzirinika. Ari ikantakiri paeraniperoroña: "Notyomi, eeroka wet-sikeroni kipatsi, jenokinta, maawaen okaatzi akowakaakari; pikanteey-eririni maawaen". Roojatzi imonkaatantakawo ikantakirir.

<sup>3</sup> Roshiyaperotakari Iriri, ishipakiryaaperotaki, rootaki roñaagakinari Tajorentsi riroperori. Tema ranaakoeyirini atziri ipinkatharitzi. Aririka ikowanani imatayitakironi oetarikapaen, tema ari itajonkayitanakironi. Ari imateeyakironi maawaen ikanteeyirini: apatziro ikantaki, matanaka oetarikapaen. Paeran aaka atziri antayitakironi kaari kameethatatsi, rootaki kaari akameethatantawitani. Omaanta ipokapaaki rirori ika-mawenteeeyakaen rowameethatanteeyakaerini. Ipiyantanaa eejatzi janta jenokinta, ijeekapae rakoperoki Tajorentsi, itsipatapaari Iriri ipinkathari-teeeyini.

### *Ranaakotakiri Itomi ronampiripaen Tajorentsi, ipinkatharitaperotzi*

<sup>4</sup> Rirojatzi Itomi Tajorentsi anaakoeyiririni ronampiripaen irira, ipinkatharitaperotzi; tema ikantziri Tajorentsi: "Notyomi". Isheninkataperotakari.

<sup>5</sup> ¡Pikenkithashiryakya! ¡Ikantzirma Tajorentsi ronampiri: "Eeroka notyomi, iroñaaka notomintakimi"? Tee itomintari ronampiri, intakya riraga Jesoshi. ¡Ikantzirma ronampiripaen: "Naaka piritaperotyaari, Naaka notomintakimi"? Tee ikantziri.

<sup>6</sup> Eejatzi ayotzi ranaakotakiri Itomi riragapaen ronampiri, tema eejatzi paerani, ipokantakari Itomi rapintsie kipatsikika, ikantzi: "Nokowaka-gaeyakirini maawaen nonampiripaen ipinkatheeeyerini Notyomi".

<sup>7</sup> Eejatzi ayotzi ranaakotakiri Itomi irirapaen, tema ikantakotziri Iwaperiteki: "Notyaantapiintziri nonampiripaen ikamanantyaariri atziri noñaani omaanta eero ijeekimoeyirini tema roshiyakawo tampyaa eejatzi paamari".

<sup>8</sup> Omaanta ikantakotakiri Itomi: "Osheki pipinkatharitzi, osheki pitajorentsitzi: pikanteetatyeyaa. Okameethaperotaki piñaani, okyaaryoperotaki.

<sup>9</sup> Osheki pikowakagaeyakirini atziri ijeeki kameetha; tee pikowaka-anentziri rantero kaari kameethatatsi. Rootaki niweshiryakaaperotanta-kimiri naaka, panaakoeyakirini maawaen paashinipaen piweshiryaper-otanaka eeroka".

<sup>10</sup> Eejatzi ikantzi: "Eeroka Nowinkatharite, aririka owakira piwetsiki-matziro oetarika, tema pitakawo piwetsikakiro kipatsi roojatzi piwetsiki-takawo roori jenoki eejatzi oetarikapaen.

<sup>11-12</sup> Inja ari roori othonkaeyeyani omaanta eeroka pikanteetatyeyaa. Oshiyakaawentero maathaantsi antyashipawote eejatzi okaatzi pijieki.

añayitakirinika ari antyashipawoperotanaki, roojatzi opeyimotantanakimi. Okimitaaganki maathaantsi aririka antyashipawote rookaetziro raanteenyari owakirari. Omaanta eeroka, eero pipaashinitzi, eero pipeya”.

<sup>13</sup> ¿Ikantzirima Tajorentsi apaani ronampiri: “Pijeeke nakoperoki roojatzi ipinkathariteeyantemirini kijeeyawitzimirini”? Tee ikantziri, omaanta ikantziri itomi.

<sup>14</sup> Tema riraga ronampiripaeni antayitziniririni ikowakagaeyakiririni: tema raminakowenteeeyakaeni maawaeni aakapaeni owawijaakotaachanipa.

## 2

### *Okameethatzi akemijantaperoeyerini Itomi Tajorentsi*

<sup>1</sup> Ikowakaaperoeyakaeni Tajorentsi akenkithashiryaaoperotero maawaeni ikanteeyakaerini Itomi: tema okyaaryooperotaki, tee okameethatzi aveyakotyaawo ikantakaeri, rootakikya anantyaawori kaarira ikowakagaeri.

<sup>2</sup> Paeraniperoroña ronampiripaeni Tajorentsi ramitakotakiri irira ikamantagaantakiniri Moeseeshi ikaminaakiriri riraga Tajorentsi ewereeyopaeni: rowaga ojankinatakaakirori riraga Moeseeshi. Tema okyaaryooperotaki maawaeni ikamanteeyakiririni ronampiripaeni. Ayotziro tema rowashironkagaeyakiririni Tajorentsi maawaeni ronampiripaeni kaari kemijantaperoeyawakirorini: ari iñaashitakawowee.

<sup>3</sup> Omaanta iroñaaka osheki ipomeentsiwenteeeyakaeni Itomi rirori rowawijaakoeyantakaerini. Aririka atheenkayerini, ¿piitzima eero rowashironkagaeyeeni Iriri? Ritakawo Awinkatharite riyotagaeyakiririni riyotaanewoponaen tsika ikanteeyaaani rawijakotanteeyaaarini; roojatzikya rowaagaeyakaeroni akaa riraga kemaeyakiririni.

<sup>4</sup> Eejatzi riraga Tajorentsi riytakaakiri atziripaeni kyaaryooperotatsiri okaatzi riytakaakiriri Jesoshi: tema imatakaakiri itajonkantayitakini; ejatzi roori Ishire omatakagaeyirini aapatziyariri oetarikapaeni, kaari amatziri aari. Ari añeyakiririni rirori okaatzi rantayitakirini, rootaki ayoteeyantakarini kyaaryootaki ikantziri Itomi Tajorentsi.

### *Inja ipinkathateeeyerini maawaeni atziri Jesoshi*

<sup>5</sup> Ari iroñaaka nokenkithatakotero paashini kipatsi irona jenokijato: rowaga ojeekaeyantapaeyaari iinja. Eero janta ipinkathariwenteeyeeni ronampiripaeni Tajorentsi, inta Itomi.

<sup>6</sup> Ayotzi kyaaryootaki iroka, tema paerani ikantzimini irira Iraviiri: “Tee nokimitzimi eeroka, tee notajorentsitzi naari. ¿litaka pikenkithashiryaaantanari? Tekatsi okantya pikenkithashiryaaakotaantenari. Tekatsi okantya paminakowiritaanantenari.

<sup>7</sup> Tema piwetsikakiri ponampiripaeni ejatzi atziripaeni. Omawitya ponampiripaeni ranaakotakae aaka atziripaeni eechonkiini, piitakina naakaapaeni atziri jewawentziriri maawaeni piratsipaeni ejatzi tema piwetsikakina oshiyakimiri eeroka.

<sup>8</sup> Tema pikantziri: ‘Eerokapaeni atziri pinkathariwenteeyeririni maawaeni jeekayitsirini: maawaeni añaayitakirini’.

Aritaki ikantaki Iraviiri paeraniperoroña. Omaanta tekira omonkaata maawaeni.

<sup>9</sup> Omaanta ayoteeyakini paerani ipoñaanaka Jesoshi jenokinta, ratziritapaaki kipatsikika. Tee ipinkatharitaperotapae, tee imonkaatapaeyaari

ronampiri Tajorentsi ipinkatharitzi. Osheki rowashironkaetawitakari, ikamawenteeyakaeni, rootaki kaari aateeyantaani paamariki kaari tsiwakanitatsini. Irira rirotaki otyaantakiriri Tajorentsi ayoteeyantakarini osheki ineshironkaeyakaeni. Iroñaaka kameetha ijeekapaejenokinta, ipinkatharitaperotapae eejatzi. Tema rirotaki pinkathariwenteeyeririni maawaeni: iitarikapaeni.

### *Ikamantakae iitaka ikamantakari Jesoshi*

**10** Ari riraga Tajorentsi riwetsikaeyakaeni maawaeni, eejatzi riwetsikakironi maawaeni okaatzti afieeyakirini. Tema ikowaki itajonkawenteeyeenii rootaki ajeekaeyantakarini iroñaaka. Eejatzi okameethatzi rowameethatakiri Itomi kameetha, tema osheki ikemaatsitawentakae ikamawenantakaeri. Rootaki okameethatthantri apinkathateeyerini, tema rirotaki awijakoeyanteeyaaarini; tema aritaki ikowaki itominteeyakaeni Tajorentsi, ikowaki ragaeyeenii jenokinta.

**11** Ari rowameethateeyakaeni Jesoshi, iroñaaka atsipateeyyarini akan-teeyirini Iriri: "Pawa". Rootaki kaari ipashiwentakaantee Jesoshi ikanteeyeeni: "Yeeyi", eejatzi: "Choeni".

**12** Tema okantzi Iwaperite Tajorentsi:  
"Ikantziri Jesokirishito Iriri: 'Nokamantteeyerini yeeyipaeni eejatzi choenipaeni tsika pikanta; notsipateeyaaarini nomampaawenteeeyemini'".

**13** Okantzi paashini Iwaperite Tajorentsi:

"Kameetha eekiro niyaatatyee nameentyaari Pawa".

Iroka paashini okantzi:

"Pawa, piñaakina jaka, nokaateeyirini pitomipaeni, eejatzi pishintopaeni. Rootaki potyaanantakinari nosheninkatanteeeyakaririni".

**14** Aakateeyakini atziri itomipaeni Tajorentsi, rishintopaeni; kamaniri aneeyakini. Ari ikimiteeyapaakaeni Jesoshi ratziritapaaki, ikamawenanteeyapaakaerini. Kyaaryo ikamawenteeyakaeni ithonkantteeyeririni iwinkatharite kamaari, riraga kowawitachari rowamagaeyeenimi eejatzi ragaeyanakaenimi paamariki kaari tsiwakanitatsini.

**15** Paerani athaawaanteeyawitawoni akamaeyenimi, akantatyaaani; omaanta iroñaaka ameentaperoeyakarini riraga Jesoshi rootaki kaari athaawanteeyanaani, omaanta eekiro aatatyee aweshiryaauentoeyanaarini. Tema ari aate jenoki atsipatantapaeyaariri Tajorentsi.

**16** Tee irira ipokashiteri Jesoshi ronampiripaeni Tajorentsi, intakya aaka maawaeni icharineetenii Awaraama ipokashiteeyakaeni.

**17** Rootaki ratziritantaapakari, rirentziteeyantapaakaerini; ikimiteeyantapaakaerini aari, rootaki rirotantakari ineshironkaeyakaeni eejatzi ikantakiri Tajorentsi ineshironkaeyeeni rirori. Tema roshiyakari iwinkatharite ñaanakowenantsirsipaeni. Eejatzi imateeyakironi maawaeni ikowakagaeyakiririni rirori, ikamaki rowameethateeyantakaerini maawaeni aaka antzirori kaari kameethatatsi. Rootaki iroñaaka kimiwitaka iwinkatharite ñaanakowenantsirsipi imateri ikanteri Pawa ineshironkaeyeeni. Rroojatzi iroñaaka ñaanakowenantsirsipi imateri ikanteri Pawa ineshironkaeyeeni. Eejatzi raakameethatee aaka janta jenokinta.

**18** Osheki ikemaatsitakawo rirori; eejatzi ñaanawitakari riraga iwinkatharite kamaariipaeni, rantakayerimi kaari kameethatatsi. Iroñaaka aariipaeni, aririka akemaatsitayitaawoni oetarikapaeni, eejatzi aririka ñaanawitakae kamaari, rirotzi riraga Jesoshi tsika okantari. Rootaki rirotantakari ramitakotanteeri aakapaeni. Ari imatero shintsitakagae ajankaneki amatantyaaawori eero akantawo kaari kameethatatsi.

### 3

#### *Jesokirishito ranaakotakiri Moeseeshini ipinkatharitzi*

<sup>1</sup> Rootaki iroñaaka, noyemijantzinkarite, nokamanantemiri tee pikimiteeyaaarini riraga kaari aapatziyaaariri Jesoshi: riyyogaeyaki-mini eeroka Tajorentsi pitsipatantaneeyaaarini janta jenokinta. Pikenkithashireeyanakirini Jesoshi, tsika ikanta: rirotaki rotyaanantewo Tajorentsi, ikamanteyeeroni maawaeni ikowakaakaeri irira. Eejatzi rirotaki kimitariri riraga iwkinkatharite ñaanakowenantatsiripaeni paerani: rowagaeniri rirori akowakotziriri aari.

<sup>2</sup> Paerani riraga Tajorentsi ikantakiri Moeseeshi: “Kameetha piyotagaeyerini pisheninkapaeni, piyotakagaeyerini maawaeni nokowagaeyakiririni”. Ari ikyaaryooentakirini Moeseeshi piyotagaeyakirini isheninkapaeni. Eejatzi riraga Jesoshi ikyaaryooentaperotakiniriroña Tajorentsi maawaeni ikantakiriri.

<sup>3</sup> Tema añaaperotaperotziri riraga wetsikirori ipanko: tee añaaperotaperotziro pankotsi. Tema irira piyotatziro riwetsikiro: tee iyota pankotsi apaniroeni owetsikya. Eejatzi okameethatzi añaaperotaperoteri Jesoshi, osheki ipinkatharitzi; eero añaaperotaperotziri Moeseeshi, tee ipinkatharitaperotzzi.

<sup>4</sup> Eenitatsi wetsikirori pankotsipaeni maawaeni, omaanta omaperotatyä riwetsikaeyakirini Tajorentsi maawaeni añaeyakirini.

<sup>5</sup> Ñaakiro, riraga Moeseeshi kameetha ikyaaryooentziniri rirori maawaeni ikowakaayitakiririni, omaanta ikimitakari ronampiri janta ipankoki. Ritawitakawo piyotagaeyakaeroni eechonkiini, rimpaedzi Jesoshi piyotaperotapaakaero maawaeni.

#### *Ikijakiri Tajorentsi theenkiriri eejatzi piyaathatariri*

<sup>6</sup> Omaanta Jesokirishito ikyaaryooentaperotziniri Tajorentsi maawaeni ikowakaakiriri. Tema raminakowiritantakae aaka maawaeni aapatziyari ikitimitaaganki apaani atziri raminakowitaanteri isheninkaperopaeni. Aririka akantyaani aapatziyeeyarini rirori, tema ayoteeyakini asheninka-teeyakarini; rootaki ayotakoeyantakaririni raanteeyanerini janta jenokinta iinja.

<sup>7</sup> Eekiro piyaatataye pikenkithashiryaaakotero iroka ojankinatakaakiririni Ishire Tajorentsi riraga Iraviiri:

“Iroñaaka pikemaeyawakironi ikantziri Tajorentsi.

<sup>8</sup> Eero pipiyathatapiintari pikimitaarkari riraga icharineetenipaeni Ishirayerini janta okaankiitzinta rapiitapiintakiri ipiyathatakari riraga Tajorentsi. Aritaki iñaantapiintakari osheki rantapiintakiro kaari kameethatatsi piyotantakariri irira rowashironkaeririka.

<sup>9</sup> Ikantzini riraga Tajorentsi: ‘Kyaaryo ipiyathateeyawitakinani naari pichariniiitenipaeni paerani. Okaataki 40 ojarentsi natsipetashitakawo notajonkakowentapiintziri’.

<sup>10</sup> Tema ipiyathateeyakinani, iñaanteeyakinani, rootaki nokijeeyantakaririni naari, nokantakotakirini: ‘Osheki itheenkakina, tee ikenkithashiryaaana rajankaneki. Tee ikowaeyini piyoteyeyeni oetarika nokowagaeyakiririni’.

<sup>11</sup> Tema nokijeeyakirini, rootaki nokantaperotakotantakariri: ‘Eero rareeteeyani janta Kanaanaki, eejatzi eero rareeteeyani jika okameetheetziika’”.

Rootaki rojankinatiniriri paerani Iraviiri.

<sup>12</sup> Kyaaryoowa, noyemijantzinkarite, eero pikimitari riroripaeni pitheenkirikari Tajorentsi: tee okameethatzi. Rañaatzi rirori, ashi royironi. Omaanta aririka pitheenkeri, ari pipeyakoteeri: eero pikenkithashiryaaeeri eejatzi.

<sup>13</sup> Okameethatzi iroñaaka eerokya pitheenkiri rirori inta pamitakotawaka-gaeyani eejatzsi poemoshirenkawaanteeyawoni eejatzsi maawaeni kitejiri paapatziyakaaperotyari Jesokirishito: iinja eerorika pimatziro. Eerorika paapatziyeyarini iroñaaka, roojatzi pikantyaani papiitapiintero kaari kameethatatsi, pametyaawo: osheki pamatawitakya apaniroeni, eerokya pikoyi paapatziyari.

<sup>14</sup> Aririka eekiro aatatyye ameentyaari Jesokirishito roojatzi akaman-takya, aritaki ayoteeyanakini akaateeyerini aateeyanakini jenokinta: eero ramatawitee.

<sup>15</sup> Omaanta pikenkithashireteero rojankinatziniri Iraviri: "Iroñaaka pike-maeyawakironi ikantziri Tajorentsi. Eero pimajontzishiretzi pajankaneki, eero poshiyari achariniitenipaeni paerani ipiyathateeyakarini rirori".

<sup>16</sup> ¡Pikenkithashireero! Paerani riraga ejipiitojazi osheki rowashironk-agaeyakirini maawaeni achariniitenipaeni paerani. Ari ikanteeyirini Moeseeshi: "Thame, nagaeyaneemini paashiniki kipatsi, kameethakya ajeekaeyanteyarini". Ikanteeyini: "Kameetha, thame aateeyeni maawaeni". Omaanta tema riroteeyakini piyathateeyakarini Moeseeshi eejatzsi Tajorentsi.

<sup>17</sup> Rootaki ijamatantakariri Tajorentsi. Okaataki 40 ojarentsi ijamatok-takari. Osheki ranteeyakironi rirori kaari kameethatatsi, rootaki ishinetan-takariri ikamaeyakini janta okaankiteronkiitza.

<sup>18</sup> Okameethatzi pikenkithashiryaakoteri ninkarika ikantakotziri Tajorentsi: "Eero pareeteeyani janta okameetheeteenta". Tema rirotaki achariniitenipaeni paerani riraga piyathatakari Tajorentsi.

<sup>19</sup> Ñaakiro, itheenkaeyakirini, tee raapatziyari rootaki kaari rareeteeyan-tani rirori janta okameetheeteenta.

## 4

### *Ikowaki Tajorentsi areeteeyaaani janta okameetheeteenta*

<sup>1</sup> Pamine, ikanteeyakaeni Tajorentsi: "Aririka paapatziyeyenani pijee-ki-moeyenani jaka nonampiki, jaka okameetheetziika". Omaanta kyaary-owa, pikimitarikari riraga paejatzsiiteni kaari aretachani.

<sup>2</sup> Okameethaperotzini rowaga ikashiyakaawitakaririni Tajorentsi, eejatzsi okameethatzi iroka ikashiyakagaeyakaerini aari. Omaanta tee raapatziy-eyearini riroripaeni, rootaki ratsipetashitakawori okaatzsi ikamantaw-itakariri.

<sup>3</sup> Aririka aapatziyaperotakyaari Tajorentsi, ari areetaperotakya janta okameetheetziinta, omaanta eero rareeta riraga kaari aapatziyari. Tema ikantakirini Tajorentsi: "Nokijakiri, rootaki nokantaperotantariri: 'Tee paapatziyana, rootaki kaari pareetanta janta okameetheetziinta' ". Paerani, tekirani riwetsikironi kipatsi, riwetsikitawitanari ijeekantyaarimi, omaanta tee rareeteeyani.

<sup>4</sup> Ayoteeyakini riwetsikaeyawitakawoni maawaeni, monkaataka. Tema okantzi Iwaperite Tajorentsi: "Okaataki 6 kitejiri riwetsikaeyantakaworini Tajorentsi maawaeni; monkaataka. Roojatzi, kitejiri 7 ipakaakiro riwet-sikantakawori, ari okaatzsi: makoryaapaaki".

<sup>5</sup> Ari riwetsikawitanari, omaanta tee raapatziyeyarini riroripaeni, rootaki ikanantari eejatzsi Tajorentsi: "Eerokya rareeteeyani jaka okameetheetyaaperotzika".

<sup>6</sup> Ari okameethataki iroka ikantakirini Tajorentsi, omaanta eero ra-teeeyani riraga paejatzsiiteni ikantakirini: ñaakiro, tee raapatziyeyarini. Omaanta ijeekagaantee areetagaantaachani.

<sup>7</sup> Rootaki riyoyaantakawori Tajorentsi paashini kitejiri, ikantzi: "Iroñaakakya nokowakagaeyakirini atziri raapatziyeeyenani rareeteeyanteeyarini jenokinta". Rootaki rojankinataakaantakaririni Iraviri: "Iroñaaka, aririka pikemawakiri Tajorentsi ikenkithatakayemi, eero pimajontzishiretzi, eero pitheenkir".

<sup>8</sup> Arimi rareetakaayaarimi Joshoe isheninkapaeni janta okameetheetziinta, ¿Arima roojatzi rojankinataakakirimi Tajorentsi Iraviri: "Inja rareeteeyanaani aapatziyeyanarini janta okameetheetziinta"?

<sup>9</sup> Rootaki ayoteeyantakarini inja aateeyeeni maawaeni aapatziyariri Jessoji janta okameetheetziinta amakoryaapae, eero janta apomeentsitapaa antawaetapae.

<sup>10</sup> Paerani ithonkantakawori Tajorentsi riwetsikayitakironi, ipakaakiro, tekatsi rantee eejatzi. Eejatzi aaripaeni, aririka aateeyeeni riorikinta, akimiteeyapaeyaarini, amakoreeyapaeni, tekatsi anteeypaena.

<sup>11</sup> Thame akowaperooyeeroni areeteeyaani janta: eero apiyathatari, eero atheenkir akimitarikari paejatziiteni. Eerorika aapatziyaperotari, eero areetaari.

<sup>12</sup> Kyaaryoowa, eero pikantashita paapatziyari Tajorentsi. Añaatsiri irira, osheki itajorentsitzi; imataperotakiro maawaeni ikanteeyirini. Tekatsi pomeentsitzimotaayarini irira, eejatzi Iwaperite oshiyakawo aña: temaa okyaantakae ajankaneki inashitantyaawori okaatz iakenkithashiryaa kimitaka jawiri apitetachari othoyempitzi aririka okyaantakae inthomaenta awatha. Temaa okyaantakae Iñaani ajankaneki eejatzi ashireki kimitaka jawiri okyaantakae aepatha eejatzi atonkiki. Temaa rirotaki oshiyakaawentacha Tajorentsi: riyotzi tsika okantari iakenkithashiryaaantari, riyotziro eejatzi ashire; riyotziroña tsika akantari.

<sup>13</sup> Tekatsi materini omanapithaterini: iñaaperoeyakaeni maawaeni; tsikarika ajeekaeyini, ifneyakaeni. Ithotyaayitzironi kipatsi; rirotaki aminakowenteeyeerorini antakirorika kameethatatsiri, rooma teerika.

### *Jesokirishito ikimitawitakari iwinkatharite ñaanakowenantatsiri*

<sup>14</sup> Ari riyaatee Jesoshi janta jenokinta, itsipatapaari Iriri, riraga Tajorentsi. Iroñaaka ikantziri irira: "Pikaminthagaeyerini aapatziyeyanarini", ikimitawitakari riraga iwinkatharite ñaanakowenantatsiripaeni, rootaki okameethatantari akanteetatyeyaaani aapatziyeyeyarini.

<sup>15</sup> Ratziritapaakini paerani, ikemaatsitayitakawoni oetarikapaeni, eejatzi riraga iwinkathariteni kamaaripaeni ikoyi rantakayerimi kaari kameethatatsi, omaanta tekatsi rantzi. Riyotzitantakaerori omaanta riorori maawaeni akemaatsitayitarini eejatzi tsika ikantakaeri kamaari. Riyotzi opomeentsitzimoyaeyakaeni, omaanta imatziro ramitakoperoeyakaeni.

<sup>16</sup> Eero iroñaaka athaawantari amaneri Tajorentsi: ayoteeyakini ineshironkaeyakaeni, ikamintthaaperoeyakaeni. Eero ishinetee owashironkaeyakaani.

## 5

### *Ikwakaakiriri Tajorentsi riraga iwinkatharite ñaanakowenantatsiri*

<sup>1</sup> Ari riyoyaakiri atziri Tajorentsi iitakiri iwinkatharite ñaanakowenantsatsiri, ikowakaapiintziri ramanakoeyaarini atziri. Irira taakiniriri Tajorentsi oetarika ipaeyeririni. Ranteeyironi kaari kameethatatsi, rootaki maawaeni ojarentsi rowantanariri ñaanakowenantatsiri Tajorentsi apaani piratsi kameethari, itaakiniri. Roojatzi raakameethatanteeyaariri maawaeni aapatziyariri riorori, ikimitakaanteeyakarini tee ranteeyironi kaari kameethatatsi.

<sup>2</sup> Ari ikimiteeyakaeni aari, rirotaki atziri; tee imatziro ijeeki kameetha, omaanta rantziro rirori kaari kameethatatsi. Rootaki Riyotantakari ikaminthagaeyakirini paashinipaeni aririka rantero kaari kameethatatsi.

<sup>3</sup> Omaanta otzimatye rirori rowamayeniri Tajorents'i rowishate, ipeyakotenir ikaatzi rantziri, ari ikimitari paashinipaeni atziri antzirori kaari kameethatatsi riraga amakiriri rowishate rowamayeniri Tajorents'i ipeyakotenir iantani.

<sup>4</sup> Tee rirojatzi iitashitachani iwinkatharite ñaanakowenantsiri, omaanta iitziri Tajorents'i; okimitaka paerani iitakiri Aawooni ñaanakowenantayitatsirini.

<sup>5</sup> Eejatzi ikimitaka Jesokirishito: tee rirojatzi peyashitachani kimityaarini iwinkatharite ñaanakowenantsiri, omaanta iitakiri Pawa Tajorents'i. Tema ikantziri paerani: "Eeroka notyomi, iroñaaka kitejiri notomintakimi".

<sup>6</sup> Paashini eejatzi ikantziri Iwaperiteki: "Pikanteetatyeyaaani piñaanakowenantanaki, pikimityaaari rirori Merekishereeki".

<sup>7</sup> Paerani, ratzirantapaentarini Jesoshi, osheki ramanapiintziri Iriri, iraaperotaka, eejatzi itacheronkawaantetanaki ikantziri: "Pawa, aririka nokame niyotaki pimateena pipiriinteeena". Ari osheki ipinkathatakiri Tajorents'i, rootaki imatakaantakariri irira ikowakaeriri.

<sup>8</sup> Kyaaryo, itomi Tajorents'i rini, omaanta paerani ikemijantaperotakiri ashitariri, rootaki ikemaatsitanakawori oetarikapaeni. Iroñaaka aririka aapatziaari aaka eejatzi akemaatsiwentyaari oetarika, riyotziro rirori tsika okantari.

<sup>9</sup> Ari imataperotakiro maawaeni ikowakaeriri Iriri, ikemijantaperotakiri: rootaki imatantawori eejatzi rowawijaakoeyirini maawaeni aapatziyaperoyearirini rirori. Iroñaaka eero aateeyini paamariki kaari tsiwakanitatsini, inta aateeyeni jenokinta, akanteetatyeyaaani ajeekaeyapaeni.

<sup>10</sup> Rirotaki roshiyakaawentakiri Tajorents'i iwinkatharite ñaanakowenantsiri, ikantzi: "Irira notyomi kimitaka Merekishereeki rirori".

### *Tekira pikemijantaperotziro rowaga rojankinatziri*

<sup>11</sup> Nokowawitaka nothoteemiromi tsika ikantaka Jesoshi roshiyantakariri Merekishereeki, niyotaaperoyemironimi. Eenitatsi piyotantawitari, omaanta tee pikemijantawakina kameetha, tema eentsikiroeni pinoshikawentyaawo.

<sup>12</sup> Okameethatemi piyotagaeyerinimi iroñaaka paashinipaeni, omaanta enitatsi pikowaeyini iyotagaeyemirini. Pikowaeyini napiiteemiro kaari pomeentsitatsi. Pikimitakari eentsi: kowatsimi pithote, tee paawiyo patsikero poayaari.

<sup>13</sup> Kyaaryo, pikimiteeyakarini eentsi, kowatsimi pithote: tekira piyotaperoyironi ñaaani Tajorents'i iyotagaeyeerini tsika akantyaari akameethateyanteyyarini.

<sup>14</sup> Piyotaperoterimi Tajorents'i, pikowaeyenimi poayaari patsikaperoterimi. Piyotakimi iitaka kameethatatsiri anteeyakirini, eejatzi piyotakiromi kaari kameethatatsi eero pantziromi.

## 6

### *Ikamantziri jankinatzirori iitaka rojankinatantanariri*

<sup>1</sup> Eero napiitapiinteemiro iroka niyotaakotapiintziriri Jesokirishito: tee opomeentsita. Eero iroñaaka pikantaana: "Papiitapiinteenawo": Okameethatzi eekiro piyaateeyatyeeeni piyotaperotanakiro maawaeni ikowakagaeyakimirini Tajorents'i. Nokantzimini paerani: "Eero pantashiyitawoni oetarikapaeni, eero owawijaakotzimi: tekatsi pikantya

powawijaakoteeya apaniroeni eeroka. Okameethatzi paapatziyari Jesokirishito pawijakotanteeyarini.

<sup>2</sup> Pikaawoshitawenteeyarini riyoteeyantyaarini atziri paapatziyaari Jesoshi. Aririka pikanteri Tajorentsi ramitakoteri piyemijantzinkarite, pipampiteeyerini. Aririka akamaeyeni apiriinteeyaneeni eejatzi, roojatzi ikantakowenteeyeeni riori". Ari eero napiiteemiro iroka piyotzitarini,

<sup>3</sup> omaanta roori aririka ikowakayena Tajorentsi, niyoteemiro owakirari, kaari pikemapiintzi.

<sup>4-6</sup> Pamine. Eeniro ashinka kemawitaworini ifñaani Tajorentsi, riweshiyaawentawitakari Tajorentsi, amitakotawitakari Ishire roori. Riyotawitaka okameethatzi ifñaani Tajorentsi; riyotawitaka iinja ipinkathariwenteeyeeni Jesokirishito. Omaanta rookaero raapatziyawitarira. Aririka rookaero raapatziyarira Itomi Tajorentsi, okimitaka ikowaki rapiiteerimi eejatzi ikentakotakaanteeri koroshiki. Itheenkakiri, ikowaki itheenkakagaeyerini paashinipaeni atziri, ishirontawenteeantyaaririni Jesokirishito. Ari tekatsi ikanteeya raapatziyaperotanteeyaaariri riraga kemijantawitacharini. Kyaaryoowa, poshiyarikarira eerori.

<sup>7</sup> Aririka kameetha opariyi inkani kipatsikira kaankipatharentsiki ari onintziro pankirentsii oshooki kameetha, rootaki rowaeyerini riraga pankitzirori. Tema rirotaki Tajorentsi owameethatzirori kipatsi. Kimitawori iroka pankirentsii rirotaki oshiyakaawentachari aapatziyariri Jesoshi.

<sup>8</sup> Omaanta aririka añaakiro owantsiki tsirompimashi eejatzi paashinipaeni kitchee, tema pikantzi: "Tee okameethatzi, thame akiyakooyerini, atagaoyeroni maawaeni". Kyaaryoowa, pikimitawokari eerori, omaanta okameethatzi pikimityaawo kameethari kipatsi.

### *Iweshiryaaakaakari riraga rojankinatziniri*

<sup>9</sup> Ari nokantawitakimi: "Pitheenikari", eejatzi nokantzimi: "Pikimittawokari kipatsi oshookantari tsirompimashi". Omaanta, nosheninka, noninteeeyakimini. Niyotakimi kameetha pijekaeyakini, eejatzi rowawi-jaakoeyemini Tajorentsi.

<sup>10</sup> Tema ikameethataki, eero ipeyakotawo maawaeni pantziniriri: riyotzi pikyaaryoowentakiro ikowakaemiri, riyotzi pikaminthagaeyerini piyemijantzinkarite, pikantani.

<sup>11</sup> Nokowakaaperoeyakimini pikyaaryoowenteeyeroni pinintashireeyerini paashinipaeni, pikantyaani, roojatzi omonkaatantyaari ipinatan temiri Tajorentsi.

<sup>12</sup> Eero piperashiryaaawo ikowakaemiri Tajorentsi, inta pikimiteeyarimi riraga paashinipaeni aapatziyaperotariri Jesoshi, kyaaryoowentziniriri maawaeni ikowakagaeyiririni riori. Kyaaryo iñeeyeroni maawaeni ikashiyakagaeyakiririni.

<sup>13</sup> Pamine, aririka akowaki ayotakaaperoteri paashinipaeni ashinka kyaaryo ani akantakiriri, akantziri: "Riyotzi Tajorentsi kyaaryo ini iroka nokantzimiri. Ranaakoeyakaeni rirori, ipinkatharitaperotzi. Aririka namatawitemi, rowashironkaenaata". Eenitatsi iroñaka ikantakaeri Tajorentsi, omaanta tekatsi anaakoterini rirori, tekatsi owashironkaerini rirori. Apatziro ikantziri Awaraama: "Kyaaryo iroka nokamantemiri, tema naaka Tajorentsi: eero nopaashinitayitzroni noñaani".

<sup>14</sup> Roojatzi ikantziri: "Kyaaryo, notajonkakowentemii, osheki netakotzimi; eejatzi noshekyaaakiri piccharineetenii".

<sup>15</sup> Riraga Awaraama eekiro ryaatatzi royaakotziri Tajorentsi imonkaatero okaatzi ikashiyakaakariri roojatziri iñaantakawo maawaenai.

<sup>16</sup> Tema aririka akowaki ayotakaaperoteri paashinipaeni asheninka kyaaryo rini akantakiriri, akantziri: "Riyotzi Tajorentsi kyaaryootaki iroka nokantzimiri. Ranaakoeyakaeni rirori ipinkatharitaperotzti. Aririka namatawitemi, rowashironkaenaata rirori". Aririka ayotaki ipinkathataperotaki Tajorentsi, ari ameentaperoteeyawo ikantakaera.

<sup>17</sup> Enenitatsi ikashiyakagaeyitakaririni Tajorentsi riraga paejatziieni. Ikowakini riyooteeyeni eero ramatawiteeyirini, rootaki ikantaperotantariri: "Kyaaryo iroka nokamantemiri, tema naaka Tajorentsi: eero nopaashini-tayitzironi noñaani".

<sup>18</sup> Ari okyaaryooperotaki iñaani Tajorentsi: tee riyotzi itheeya. Omaanta eejatzzi ikantzini: "Kyaaryo iroka nokamantemiri", ayotaperoeyantakarini eerokyo ramatawitantzi. Iroñaaka, aririka ameentyaari rowawijaakoeyakaeni, ayotaperotaki imatakaero iroka ikantakaeri: rowawijaakoperoeyeeni.

<sup>19</sup> Aririka ayoteeyakini awijakotakae, tema aweshiryaaoperotaka. Noshiyakaawentemiro: okimitaganki antawo pitotsi eenitatsi otenakirori jatatsiri inthomaenta iñaa areetakawo jaawikinta kipatsi, tema rameenteetawo eero omatantawo tampyaa onoshikero pitotsi mapimashiki ochereeteki. Eejatzzi aaka oshiyakawo, tema ameentapiintari Jesoshi riraga areetakariri ijeekinta Tajorentsi. Ikimitaga iwinkatharite ñaanakowenantatsiri ikyapaaki jantakironta Tajorentsinsakiki, tema ayotaki aaka aritaki aate jenokinta atsipatapaeyaari Tajorentsi.

<sup>20</sup> Reewateeyanakaeni Jesoshi, ikamantakowentakae: ikimitakari riraga Merekishereeki, riraga iwinkathariteni ñaanakowenantatsiri paerani. Tema ikantani iñaanakowenantzi.

## 7

### *Merekishereeki rirotaki ñaanakowenantatsiri ranaakoeyakirini maawaeni isheninkani Rewii*

<sup>1</sup> Ari iroñaaka nokenkithatakoteri riraga Merekishereeki: paerani ipinkathariwenteeyakirini riraga jareemijatzi. Eejatzzi Tajorentsi, riraga jeekatsiri jenokinta, iitakiri ñaanakowenantatsiri. Ari ijeeki paashiniki nampitsi Awaraama. Ragaeyanakirini isheninkapaeni, ryaateeyanakini romanateeyirini riraga rowayirite riraga noshikiriri itominthori: osheki rineeyawitani, omaanta ithonkaeyakirini maawaeni iijanipaeni, iwinkatharitepaeni, maawaeni. Ari ipiyanaa rirori, roepiyeeri itominthori, eejatzzi ramayiteeroni rowaagawoni riraga rowayirite. Ipiyanti, itonkiyotawakari Merekishereeki, ikantziri Tajorentsi: "Pitajonkakowenteri Awaraamaka kameetha ijeekantyaari".

<sup>2</sup> Roojatzzi raagaante Awaraama owaagawontsi, ipagaantakiri rirori, ikantziri: "Iroka rashii Tajorentsi". Oztimirika 10, ari ipakiri apaani. Akantziri Merekishereeki añaanekei: "Kameethatatsiri". Ipinkathariwenteeyirini jareemijatzi. Akantziri Jareemi añaanekei: "Kameetha ajeekaeyini".

<sup>3</sup> Rowaga Iwaperite Tajorentsi tee okenkithatakotziri iriri Merekishereeki. Tee okenkithatakotziro riniro, icharini, eejatzzi icharineetenipaeni. Tee okenkithatakotziro itzimantakari eejatzzi ikamantakari. Okimiwitaka ikantani ijeekini, rootaki roshiyantakariri Itomi Tajorentsi; ikantani rirori iñaanakowenantaperotanaki, ikantapiintziri Tajorentsi: "Pitajonkawenti maawaeni aaapatziyanari".

<sup>4</sup> Ñaakiro, osheki ipinkatharitzini Merekishereeki. Itakaanteeyakaririni paerani Awaraama, omaanta ipinkathatziri, eejatzi ipagaantakiri rowaagawonni rowayiritepaeni.

<sup>5</sup> Pamine, roojatzikya ijeki isheninkani Awaraamani: riraga Rewii. Rojankinatakaakiri Tajorentsi Moeseshi, rowaga kaminagaantsi: "Ikowaki Tajorentsi iiterikya isheninkani Rewii ñaanakowenantsini. Nokowaki maawaeni ijoriiyotzinkarite ipagaanteri rirori rowaagawo, ipira, maawaeni: ikaaterika 10, ari iperi apaani". Ñaakiro, isheninkani Awaraama rineeyini: isheninkani Rewii eejatzi maawaeni ijoriiyotzinkarite. Isheninkatawakagaeyakan.

<sup>6</sup> Omaanta paerani riraga Merekishereeki tee isheninkatyarini Rewii, rinashita rirori; omaanta raawakiro Awaraamani rowaagawo ipagaantakiriri rirori, roojatzki ikantawaeri riraga ikashiyakaakiri Tajorentsi: "Nokoyi itajonkawentemi Tajorentsi".

<sup>7</sup> Ñaakiro, riraga Merekishereeki anaakotantsiri ipinkatharitzi, rootaki ikanantariri Tajorentsi: "Pawa, pitajonkakowenteri Awaraamaka kameetha ijekantyaari".

<sup>8</sup> Jaka ashinka iñeeyini riraga isheninkani Rewii, imonkaateeyakaeni aariapaeni, akamaeyini, omaanta raapiintakiri maawaeni apaeyakiririni. Omaanta paerani riraga Merekishereeki, rinashita: okimiwitaka tee ikami omaanta rirori, tee okantzi Iwaperite Tajorentsi: "Kamaki".

<sup>9-10</sup> Paerani, ipagaanantakariri Awaraama owaagawontsi, tekirani ijekkeni Rewii: rimpae ijeeki rirori. Omaanta arimi ijekcityaami, ipagaanterimi eejatzi rirori: tema ikimityaarimi riraga jewatatsiri ijeki. Eejatzi ikimiteeyerinimi maawaeni isheninkapaenini Rewii: maawaeni ñaanakowenantsiri. Aritakimi ipinkathateeeyerinimi Merekishereeki maawaeni. Ñaakiro, ajoriiyotzinkarite ipinkathateeeyerinimi ñaanakowenantsiripaeni, rootaki ipagaanteeyantakaririni oetarikapaeni, omaanta riraga ñaanakowenantsiripaeni ipinkathataperoeyakirini Merekishereeki: tema ranaakotantaki rirori iñaanakowenantaperotaki, ipinkatharitaperotaki.

### *Jesoshi rirotaki ñaanakowentantsiri kimitaariri Merekishereeki*

<sup>11</sup> Ari ijekaeyawitani riraga isheninkani Rewii: riraga Aawooni eejatzi maawaeni isheninkani rirori, iñaanakowenanteeyakin; eejatzi eeniwitacha rojankinateeyinirini Moeseshi, iyotagaeyirini oetarikapaeni anteeyirini. Omaanta tekatsi ikantee riroripaeni rowameethateeyeeni, rowawijaakoeyeeni; rootaki rotyaanantakariri Tajorentsi paashini ñaanakowenantsiri, kimitaariri riraga Merekishereeki.

<sup>12</sup> Ari rinashita riraga ñaanakowenantsiri, eejatzi iroñaaka rinashita ikowakagaeyakaerini Tajorentsi.

<sup>13-14</sup> Eeniwitacha ñaanakowenantsiripaeni sheninkaeyakaririni Rewii, eejatzi rojankinateeyakinirini Moeseshi, riyotagaeyirini oetarika ranteeyakirini. Omaanta riraga owakirari ñaanakowenantsiri tee isheninkatari Rewii, omaanta rirori isheninkatakari Joraa. Tee iñaanakowenantayitzini paashinipaeni isheninkani Joraa: tee rojankinateeyinirini Moeseshi, tee ikantziri omaanta rirori iitakya ñaanakowenantsiri.

<sup>15</sup> Iroñaaka ijeki riraga kimitariri Merekishereeki, rinashita rirori, ayotantakari rinashita ikowakaeriri Tajorentsi.

<sup>16</sup> Tee isheninkatari Aawooni iitantakariri ñaanakowenantsiri; omaanta itajorentsitaki eejatzi ikanteetayaani rañi, rootaki iitantakari ñaanakowenantsiri.

<sup>17</sup> Tema ikantzirini Tajorentsi paerani: “Pikanteetatyeyaaani piñaanakowenantanaki, pikimityaari riraga Merekishereeki”.

<sup>18</sup> Eeniwitachani iroka rojankinatziniriri isheninkani Aawooni kamina-gantsi, omaanta tee ikoyi Tajorentsi apomeentsiwentyaawo iroñaaka. At-sipetyawomi, tekatsi okanteyeeni owawijaakoeyeeni.

<sup>19</sup> Amonkaateeyeromimi maawaeni, eero owameethateyeyeenimi. Omaanta riraga Jesokirishito aritaki imatacae ragaeyanakaeni janta Tajorentsiki. Tee atsipetashitawo aapatziyeyakirini rirori.

*Ikantzi Tajorentsi: “Kyaaryo, ikanteetatyeyaaani Jesokirishito iñaanakowenantaperotanaki”*

<sup>20</sup> Tee ikantashita Tajorentsi, ikantaperotzi: “Kyaaryo iroka nokamantemiri, tema naaka Tajorentsi. Ikanteetatyeyaaani Jesokirishito iñaanakowenantaperotanaki”.

<sup>21</sup> Tee ikimitari riraga isheninkapaeni Aawooni. Omaanta ikantziri Jesokirishito: “Kyaaryo iroka nokamantemiri, tema naaka Tajorentsi. Tee nokantashita, eero namatawitzimi. Eerokataki ñaanakowenantsiri, pikanteetatyeyaaani”.

<sup>22</sup> Rootaki ayoteeyantakarini ranaakotantaki Jesoshi iñaanakowenantaperotaki, imateeyakaeni rowawijaakoeyakaeni.

<sup>23</sup> Ari ikaateeyawitani osheki ñaanakowenantawitachari, omaanta kamapiinteyakini, rookapiinteeyakironi iñaanakowenantawitani.

<sup>24</sup> Omaanta riraga Jesokirishito, ikantani ijeki: rootaki imatantawori iñaanakowenantzi, ikantani.

<sup>25</sup> Imateeyakirini aapatziyeyayarini: rowawijaakoperoeyakirini maawaeni kowaperotatsiri raaneeri Tajorentsiki. Ikantani rañi, rootaki imatantawori ikamantakowenteeyakaeni.

<sup>26</sup> Kyaaryo, okameethaperotzi iñaanakowentaperowente; tema Tajorentsi rini, tee añiilo rantani, tee rantziro kaari kameethatatsi; tee ikimitteeyarini riraga kaari kameethateeyatsini ijekimoeyawitapaentarini. Iroñaaka ijeki kameetha janta jenokinta.

<sup>27</sup> Riraga iwinkatharitepaeni ñaanakowenantsiri, maawaeni kitejiri rowamaapiintziniri Tajorentsi ipirapaeni, itaapiintziniri. Ro rowamaapiintanariri, osheki ikenkithashiryaakiro kaari kameethatatsi ranteeyirini ee-jatzi ranteeyirini rirori ijoriyyotzinkarite. Tekatsi rowamaapiinte riraga Jesokirishito, omaanta apatziro ikamawenteeyakaeni: monkaataka, eero rapiiteero ejatzi.

<sup>28</sup> Ari paerani rojankinatzini Moeseshi, ikantzi: “Iiteeyanakyaani isheninkani Aawooni ñaanakowenantsiri”. Atziri rineeyini rirori, ranteeyironi kaari kameethatatsi. Omaanta roojatzti ikantzi Tajorentsi: “Kyaaryo iroka nokamantemiri, tema naaka Tajorentsi: ikanteetatyeyaaani Jesokirishito iñaanakowenantanaki”. Rirotaki Jesokirishito Itomi rirori, tee rantziro kaari kameethatatsi, omaanta ikantatyaaani ikameethaperotaki.

## 8

### *Iñaanakowenantaperotanaki Jesokirishito janta jenokinta*

<sup>1</sup> Pirotawakiro iroka nokamantemiri: rirotaki Jesokirishito ñaanakowenteeyakaerini. Ijeekimotziri Tajorentsi janta jenokinta, janta rakoperoki; ikaatziri ipinkathariteeyini.

<sup>2</sup> Riraga isheninkani Aawooni ikenkithatakaapiintziri Tajorentsi janta pankotsiki riwetsikiri atziri, iitakiro Tajorentsipanko. Omaanta riraga Jesokirishito ijekaperotzi janta Tajorentsiki: tee riro wetsikeroni atziri, omaanta Awinkatharite wetsikakirori ipankro janta.

<sup>3</sup> Riraga iwinkatharite ñaanakowenantatsiri ipapiintziri Tajorentsi oetarikapaeni; rowamaakirini piratsi, shemi; itaakiniri. Omaanta Jesokirishito, tee rowamaeniri piratsi; rirojatzi kowaanta rowamagaetantakariri. Roojatzi riyaatashtikiri Tajorentsi, ikantapaakiri: "Naaka kamawenteeyakiririni asheninka, owawijaakoeyakiririni".

<sup>4</sup> Ijeekemi iroñaaka jaka kipatsikika, eeromi iñaanakowenantzimi; ñaakiro, tee isheninkatari Aawooni: riroteeyakini isheninkani Aawooni thotyaakrori rojankinatziniri Moeseeshi.

<sup>5</sup> Rantawaetapiintzi janta ikanteetzirinta: "Ipankomawo Tajorentsi", omaanta tee janta ijeekaperote Tajorentsi. Apatziro oshiyakawentziro inampipero janta jenokinta. Paerani, riwetsikantawori Moeseeshi, ikantziri Tajorentsi: "Janta tonkaariki iitachari Shinayii niyotaaperotakimiro tsika pikanterori pankotsi: pimonkaataperotero nokantakimiri".

<sup>6</sup> Okameethatawitaka rowaga rojankinatziniri paerani Moeseeshi, iñaanatakowenatperoeyakaririni Aawooni eejatzi isheninkani, eejatzi ramitakoeyawitakarini ajoriuyotzinkarite. Omaanta iroka owakirari inimotaakiri iroñaaka Tajorentsi okameethaperotaki, osheki anaakotakiro rojankinatziniri Moeseeshi. Eejatzi ikimitaka, osheki imataperotakaeniro Jesokirishito, osheki ranaakotakiri Aawooni.

<sup>7</sup> Okameethaperotakimi rojankinatziniri paerani Moeseeshi, eeromi ikantzirim paashini Tajorentsi.

<sup>8</sup> Omaanta ikantzini Tajorentsi paerani: "Tekira omonkaata, tee okameethaperotzi iroka rojankinatziniriri Moeseeshi Aawooni". Rootaki rojankinataakantakariri paashinipaeni aapatziyaririni paerani: "Ikantzi Awinkatharite: 'Inja ojeeki paashini nokamanteeyeririni maawaeni joriyyopaeni, inashitanakya.

<sup>9</sup> Eero okimitaawo rowaga nokantakiriri riraga itakaantakaworini. Paerani ijeekawitani maawaeni joriyyopaeni Ejiipitoki, omaanta nagaeyanakirini paashiniki kipatsi. Rojankinatawitakawo Moeseeshi nokowakagaeyawitakaririni, omaanta tee raapatziyeyananani. Rootaki karri namitakoeyantaarini.

<sup>10</sup> Iroñaaka eenitatsi nokamanteeyeririni maawaeni joriyyopaeni. Iinja niyotaaperoeyakirini maawaeni nokanteeyeririni, ikenkithashireperoeyeroni, eero ipeyakoeyawoni. Ipinkathataperoeyakinani, eejatzi nota-jonkakowenteeyerini naari.

<sup>11</sup> Eero ratsipetashiteeyawoni riyotaawakagaeyeeyaani, eero ikantawakagaeyani: "Nosheninka, piyoteri Nowinkatharite". Aritaki riyotashiteeye-nani maawaeni: pinkatharitatsiri, kaari pinkatharitatsi, maawaeni riyoteeyenani.

<sup>12</sup> Noneshironkaaperoeyerini maawaeni antzirori kaari kameethatatsi ari nopeyakoteeniri, eero nokenkithashiryakoteero eejatzi rantayitzirini". Rootaki ikantzitakari paerani Tajorentsi.

<sup>13</sup> Ñaakiro, ikantzini: "Eenitatsi paashini nokamanteeyeririni atziri, eero okimitaawo nokantzirini paerani". Ari iroka ikantziri iroñaaka, rootaki poyaataawori ikantzirini paerani.

## 9

*Ikenkithatakotziro ipankomawo Tajorentsi rantawaetantari ñaanakowenantatsiripaeni*

<sup>1</sup> Paerani ikanteeyeririni Tajorentsi itakaantaworini tsika ikanteeyerani ipinkathatanteeyaaririni, eejatzi ikantziri tsika okantyaari ipankomawo Tajorentsi rantawaetantyaari ñaanakowenantatsiripaeni.

<sup>2</sup> Ari riwetsikaeyakironi ipankomawo, imonkaatakironi ikantziririni Tajorentsi. Janta rityaawo Tajorentsinki rantawaetapiintzinta ñaanakowenantatsiripaeni. Iiteetziro Tajorentsinki Kameethari. Eenitatsi janta rowantariri ootamentotsi, eejatzi eenitatsi meeja. Janta meejaki rowapiintziro paa, okaataki 12, akenkithashireeyantaworini ipapiinteeeyakaeni Tajorentsi owaeyarini.

<sup>3</sup> Jantakironta otzikaawo ari ojeeki Tajorentsinki inampiperotari. Tekatsi kyaapiintatsini. Iiteetziro Tajorentsinki Kameethaperotatsiri.

<sup>4</sup> Ontsiryaatakawo otzikaawo rowaga itaapiinrantawori kajankapaneri, riwetsikaetziri ooro. Eenitatsi jaga Tajorentsinkiki rowaga kimitawori tswoonaki, ro ipashikantawori ooro. Jaga inthomaenta, eenitatsi kowitzi riwetsikaetziri ooro, inthomaenta iroka roteteetziro manaa. Eejatzi eenitatsi inthomaenta ikotzi Aawooni, rowaga shookashitachari paerani oshi. Eejatzi eenitatsi inthomaenta rowaga mapi rojankinatakaeririni Tajorentsi Moeseeshi.

<sup>5</sup> Janta otatawoki kimitawori tswoonaki roshiyakaawentakiri apite jewatatsiri ronampiripaeni Tajorentsi iieteetziri kerowee. Roshiyakaantaka eeniro ijekkaki Tajorentsi. Ramineeyakironi otatawo kimitawori tswoonaki janta rowapiintziro maawaeni ojarentsi iwinkatharite ñaanakowenantatsiri riraa piratsi. Okimitaka ikenkithashireeyirini kamawenteeyeerini, neshironkaeyerini. Eero iroñaaka nothotyaaperotziro nokamantemiro tsika okantayitarini.

<sup>6</sup> Ari riwetsikaeyakironi paerani, imonkaatakiro ikantziriri Tajorentsi Moeseeshi. Roojatzi ikyapiinteeeyini ñaanakowenantatsiripaeni, rantawaetapiinteeeyinirini Tajorentsi.

<sup>7</sup> Omaanta tee riyaatapiinteeeyini otzikaawoki jantakironta. Apaani riyaatzi maawaeni ojarentsi riraga iwinkatharite ñaanakowenantatsiri. Reewataki rowamaeniri Tajorentsi piratsi, roojatzikya ikyaanaki apaniroeni, raaneero riraa, ipitenkakiro janta otatawoki kimitawori tswoonaki; ikantziri Tajorentsi: “Pawa, pikaminthagaeyenani, eero pikijawenteeyanawoni nanteeyakirini eejatzi ranteeeyakirini nosheninkapaeni; eero pikenkithashiryakaoyaanawoni eejatzi”.

<sup>8</sup> Ñaakiro, eenitatsi otzikaawo, otzikagaeyakiririni paashinipaeni ñaanakowenantatsiri eejatzi maawaeni joriyyopaeni. Tekatsi ikanteeyaani riyaateeyeni janta ijekkantaperotariki Tajorentsi. Rootaki oshiyakaawenanteeyakaerini Ishire irira, ayoteeyantakarini riraga isheninkani Rewii eejatzi paashinipaeni tekatsi ikanteeyeeni rareetakagaeyeenii janta Tajorentsikinta.

<sup>9</sup> Okameethatzi akenkithashireeyeroni iroñaaka ayoteeyantyaarini: maawaerii ipapiinteeeyakirini Tajorentsi, eejatzi maawaeni rowapiintziniri eejatzi itaapiintziniri, tee owameethateeyirini riraga papiintawitariri eejatzi taapiintawitanariri. Apatziro roshiyakaawentziro.

<sup>10</sup> Paerani riyotaashiteeyakarini oetarika rantashiteeyarini; oetarika rowagaeyarini, eejatzi oetarika imiriteeyirini; riyotaashiteeyakarini tsika ikantyaari ikiwapiintya, ikitantyaari. Rootaki ikowakagaeyawitakaririni Tajorentsi atziri paerani. Omaanta ari okaatzini, monkaataka. Ipokapaaki iroñaaka Jesokirishito aamagaeyarini. Iroñaaka inashita ikowakagaeyakaerini Tajorentsi aari, owakirari, kameethaperotatsiri.

### *Riraa Jesokirishito*

<sup>11</sup> Ipokapaaki Jesokirishito roshiyawitapaari iwkatharite ñaanakowenantatsiri, omaanta okameethaperotaki iroka rantapaakiri rirori. Rantawaetzimi paashinipaeni ñaanakowenantatsiri janta pankotsiki

riwetsikiri atziri; omaanta rirori, riyaataperotaki janta ipankoperoki Tajorentsi: kameethaperotaki roori janta jenokinta.

<sup>12</sup> Jaka kipatsiki riraga iwinkatharite ñaanakowenantsiri ryaatapiintzi maawaeni ñjarentsi, raapiintziro riraa chiiwo eejatzí waakaaniki janta ipankomawoki Tajorentsi inthomaenta, rowaga ikanteetawitari inampita-perotari Tajorentsi. Omaanta Jesokirishito ikamawenteeyakaeni, roojatzi ryaatee janta jenokinta ijeekaperotzinta Tajorentsi. Roshiyakaawentakiro raaneero riraa: kaari riraa piratsi, omaanta riraapero rirori. Ikantziri Tajorentsi: “Ñaakiro, nokamawenteeyakirini maawaeni atziri nowawijaakotantaariri, ikanteetatyeeyaani ijeekanteeyarini jaka anampikika”. Eero ratsipetashitawo rirori ipiyapiinte, apaani ikanta, ari okaatzti.

<sup>13</sup> Ari paerani aririka rantzironi ashenkika kaari kameethatatsi, rowamaakiri ñaanakowenantsiri waaka, rirorika chiiwo, rirorika waakaaniki janta ipankomawoki Tajorentsi. Roojatzi riraga ñaanakowenantsiri raakiro riraa, itsikirijantawakari riraga antzirori kaari kameethatatsi. Eejatzí itaakiri iwatha, roojatzi itsikirijantawakari shirampari itsimenkitote piratsi. Roojatzi ikanteeyirini isheninka: “Ikameethatee eejatzí irika. Okameethatzi ikaateeyeyerini eejatzí aapatziyariri Tajorentsi”.

<sup>14</sup> Omaantakya riraga Jesokirishito ikameethaperotaki rirori, okantani ojeeki Ishire amitakotziriri. Rootaki ikanantariri Tajorentsi: “Pawa, nokowaperotaki nokamawenteeyeyerini atziripaeni, nowawijaakoeyantyaaririni”. Ari apaatawenteeyakaeni riraapero rirori, tee ro riraa piratsi: ikamawenteeyakaeni, iroñaa eero atspetaawo akenkithashiriilo kaari kameethatatsi, rowaga jatakagaenimi paamariki kaari tsiwakanitatsini, omaanta anteniri Tajorentsi maawaeni ikowakagaeyakaerini. Roojatzi akanteetatyeeyaani ajeekimooyerini janta jenokinta.

<sup>15</sup> Ari paerani apatziro ayoteeyakironi rojankinarini Moeseeshi, eejatzí antapiinteeeyakironi kaari kameethatatsi, aateeyantyaarinimi paamariki kaari tsiwakanitatsini; omaanta ikamawenteeyakaeni Jesokirishito, rowawijaakoeyantakaerini. Tema irira rirotaki ñaanatakowentakaoeri owakirari inimotawakaantsi Tajorentsi. Iroñaa inashita ikanteeyakaerini rirori: “Okameethatzi maawaeni nokashiyakagaeyakiririni aapatziyeeyanarini niyoyagaeyakirini. Ikanteetatyeeyaani riweshiryaaawenteeyaaawoni”.

### *Riyotagaeyakaeni iitaka ikamawenteeyantakaerini Jesoshi*

<sup>16-17</sup> Ari pikenkithashireero rameteeyakarini ashenkapaeni. Eenitatsirika rowaagawopaeni, rojankinatzí paperiki: “Aririka nokame nokowaki rashitayiteeyawoni nosheninkapaeni”. Ari rojankinatakiro iwaeropaeni ashítayiteeyawoni rowaagawopaeni. Roojatzi, aririka ikamaki, ryoteyeanakini irira ninkarika ashiteeyawoni. Eerotzitarika ikami riraga jankinatzíori, eerotzita ragaeyironi owaagawontsi. Omaanta ikamakirika, monkaataka: roojatzikya ragaeyeroni.

<sup>18</sup> Eejatzí okimitakani paerani: eenitatis ikantziririni Tajorentsi ashenkani paerani. Tekatsi ikantya Tajorentsi ikame, omaanta ikamapiinteeeyakini tsimeri omonkaatantakari ikantziririni.

<sup>19</sup> Paerani ikamantziri Moeseeshi irira maawaeni ikaminagaeyakiririni ajoriyyotzinkariteni, roojatzi rojankinatantawori. Roojatzi ikamanteeyirini isheninka ikantziriri Tajorentsi; eejatzí rowamagaeyakirini waakaaniki eejatzí chiiwo, raawakiro riraa, itsipataawakiro iñaa. Roojatzi raakiro iwitzí owisha kityonkawitziri eejatzí piyonkashinkanari, rowiinkakiro iñaki, ijeetantariri isheninkapaeni. Eejatzí itsikirijakiro roori iroka rojankinatakaakiriri Tajorentsi.

**20** Aririka itsikirijeeyakirini, ikanteeeyirini isheninka: "Ari nokaman-teeyakimironi maawaeni owakirari ikamantakinari Tajorentsi. Ikantzi: 'Aririka pikemijantaperoteeyenani, notajonkakowenteeyemini'. Eejatzi eerori pikanteeeyini: 'Kameetha'. Rootaki notsikirijanantakimirori iroñaaaka riraa".

**21** Roojatzsi itsikirijakiro eejatzi ipankomawo ipinkathateeyantaririni, ee-jatzi itsikirijeeyakironi maawaeni jeekayitatsirini inthomaenta.

**22** Ari rojankinatzini Moeseeshi: "Rootaki riraa piratsi owameetha-teeyigorini oetarikapaeni; eejatzi eerrika ijeki kamawenteririni atziri, apaatawenziriri riraa, eero rawijakotee".

### *Ikenkithatakotziro ittaka ikamawenantaakaeri Jesokirishito*

**23** Ari eenitatsi oshiyakaawentziri iroka pankotsi eejatzi maawaeni jeekaeyatsirini inthomaenta. Okameethatzi itsikirijeeyakironi rowameethatantakawori. Omaanta ojeeki jenokinta iroka roshiyakaawen-teeyakirini, ijeki eejatzi anaakotzirori riraa piratsi, owameethaperotzirori maawaeni jeekaeyatsirini jenokinta:

**24** rirotaki Jesokirishito. Riraga ñaanakowenantsiripaeni ryaatapiintzi janta ipankomawoki Tajorentsi, riwetsikantawori kipatsi, rityawomi ikamapiintemi, roojatzi iroñaaaka. Omaanta riraga Jesokirishito jataperotee jenokinta ijekimotapaeri Tajorentsi, ikantakowenteeyakaeni.

**25** Riraga iwinkatharite ñaanakowenantsiripaeni ryaatapiintzi janta ipankomawoki Tajorentsi, raapiintziro maawaeni ojarentsi riraa piratsi: tee rayiro riraa rashì rirori. Omaanta riraga Jesokirishito eero rapiiteero ikamawentee.

**26** Aririkami raapiinteromi riraa Tajorentsiki, okameethatemi ikamapiintemi, paerani: riwetsikantawori kipatsi, rityawomi ikamapiintemi, roojatzi iroñaaaka. Omaanta monkaataka paerani ikamantakari: apaani ikamaki, rowawijaakoeyakaeni.

**27** Ayoteeyakini apaani akamaeyakini, ari okaatzi; tee apiitapiintziro akame. Aririka akamae, roojatzsi ikantakowenanteeyakaeni Tajorentsi, akameethatakirika.

**28** Ari osheki aneeyawitani, omaanta apaani ikamawenteeyakaeni Jesokirishito; imonkaatakiro, eero ikamae eejatzi. Ari ipokae eejatzi iinja ipiyoteeyapaakaeni, raantaneeri jenokinta maawaeni aamagaeyeririni.

## 10

### *Tekatsi okanteeyeeni rojankinarini Moeseeshi owameethateeyeeni*

**1** Pamine, maawaeni rojankinatakotakirini paerani Moeseeshi oshiyakaawentakiri riraga pokapaentatsirini, kameethaperotatsiri. Rareetapaenta, osheki itajonkawenteeyakaeni. Ikantziri Moeseeshi Aawooni: "Powamaapinteniri Tajorentsi piratsi maawaeni ojarentsi". Ari ikantzi isheninkani rowamaapiinteeyawitarinari, omaanta tekatsi okanteri owawijaakoeyerin riraga aapatziyaworinori rojankinatzirini Moeseeshi.

**2** Arimi owawijaakoeyerinimi irika rowapiintziri, tema ari ipakaakiromi rowamaapiintziniri. Eejatzi arimi rowawijaakoteeyaaami rirojatzsi, eero ikenkithashireeyeronimi eejatzi rantayitzirini.

**3** Omaanta rowamaapiinteeyawitarinari ipira maawaeni ojarentsi, roojatzsi ikanta okenkithashiryakaapiintari rantayitzirini.

**4** Tekatsi okanteri riraa waaka eejatzi chiiwo owameethateeyerini antzirori kaari kameethatatsi.

**5** Ipokantakari kipatsiki paerani Jesokirishito, tema ikantziri Tajorentsi: "Pawa, tee piñaaperotziro riraa piratsi, tee owameethateeyirini anteeyivorini kaari kameethatatsi. Rootaki piwetsikantanawori

nowatha nokamawenteeyantyaaririni maawaeni atziri,  
nowameethateeyantyaaririni.

<sup>6</sup> Tee piñaaperotziri ikameethatzi maawaeni itaapiinteeyawitzimirini atziri, eejatzi maawaeni rowamaapiinteeyawitzimirini powameethateeyantyaaririnimi.

<sup>7</sup> Rootaki nokanantzimiri: ‘Pamine, Pawa, nopolaki jaka nanantemirori maawaeni pikowakaakinari. Nomonkaatero maawaeni rojankinatakotziteetakinarini paerani’.

<sup>8</sup> Pikenkithashiryaaperotero iroka ikantzirini Jesoshi: “Tee pikoyi, Pawa, rowamaemiri atziri piratsi, itaapiinteeeyemirini. Tee piñaaperotawentari riraga pawitzimiriri maawaeni rojankinatakotzirini Moeseeshi”.

<sup>9</sup> Roojatzi ikantziri: “Pamine, Pawa, pokakina nanantemirori maawaeni pikowakaakinari”. Ikanantawori iroka, ikantzi: “Eeniwitacha maawaeni ranayitawitarini isheninkani Rewii. Eenitatisi owakirataatsini”.

<sup>10</sup> Apaani ikamawenteeyakaeni Jesokirishito, eero rapiatzaa ikamae eejatzi, imonkaatakiro. Rowameethaperoeyakaeni, eejatzi maawaeni riraga aapatziyeyaririni, ikimitakagaeyakaeni tee antziro kaari kameethatatsi.

### *Tee rowawijaakotantzi piratsi inta Jesoshi owawijaakotantatsiri*

<sup>11</sup> Maawaeni kiteziri rantawaetapiintaki maawaeni ñaanakowenantsirsipaeni, rowamaapiintziniri Tajorentsi piratsi, itaapiintziniri, omaanta tee owameethateeyirini maawaeni antzirori kaari kameethatatsi.

<sup>12</sup> Omaanta apaani ikamawenteeyakaeni Jesokirishito, rowameethateeyantakaerini, monkaataka. Roojatzi ijekkapae janta rakoperoki Iriri,

<sup>13</sup> royaakiri imatantyaawori ikantakiririni: “Inja nothonkaeyerini maawaeni kijeyakimirini”.

<sup>14</sup> Apaani ikamawenteeyakaeni maawaeni: tema riyoyagaeyakaeni Tajorentsi, rowameethaperoeyakaeni.

<sup>15</sup> Eejatzi iyotaaperoeyakaeni Ishire Tajorentsi imonkaatakiro Jesokirishito maawaeni ikowakagaeyakiririni Iriri rowawijaakotantakaeri. Tema rowaga Ishire ojankinatakayiriri paejatziiteni okaatzti ikantakiriri Pawa Tajorentsi.

<sup>16</sup> “Tema ritakari ikantzi: ‘Tema Naaka Iwinkatharite joriiyopaaeni, rootaki inimotaakina pimonkaateninami nojankinatakakiririni Moeseeshi pawijakotantanakya. Omaanta tee pimateeyironi nokantakiriri Moeseeshi. Roojatzi inimotaantanari owakirari. Tema inja nokenkithashiryaakagaeyeemironi maawaeni nokowakagaeyakimirini pajankaneki, nothotyaakagaeyeemironi, piyoperoeyantyaaworini maawaeni’”.

<sup>17</sup> Roojatzi eejatzi ojankinatakakiriri: “Ikantzi Tajorentsi: ‘Eero nokenkithashiryaakotziteeri eejatzi kaari kameethatayitsini ranateeyakiriri’”.

<sup>18</sup> Pamine, aririka ikaminthagaeyirini Tajorentsi antzirori kaari kameethatatsi, eejatzi teerika ikenkithashiryaakoteeri eejatzi rantakiri, eero ikowae eejatzi kamawenterini rowameethatantyaariri. Ñaakiro, iñaaperoeyakaeni iroñaka akameethatzi.

### *Ikamanteeyakaeni iitaka ikowakagaeyakaerini aari*

<sup>19</sup> Noyemijantzinkarite, ikamawenteeyakaeni Jesokirishito, rapaatawenteeeyakaeroni riraa rowawijaakotantakaeri. Iroñaka ayoteeyakini iñaaperoeyakaeni Tajorentsi akameethatzi rootaki kaari athaawanantari, inta akenkithatataapiinteeeyerini Pawa.

**20** Paerani eenironi ojeekini ipankomawoki otzikaawo, rowaga kaari ryaatapiinteyantani atziri janta Tajorentsinkiki: tema otzikagaeyakirini. Omaanta ikamawenteeyakaeni Jesokirishito, kaari otzimantaa iroñaaka otzikagaeni. Añaanee eejatzi, rootaki okameethatantari iroñaaka akenkithatakaapiinteri Tajorentsi.

**21** Iñaanakowenantaperotakae riraga Jesoshi, ipinkathariwentaperoeyakaeni aari, eejatzi maawaeni paashinipaeni aapatziyeyeyaririni rirori.

**22** Rapaatawenteeyakaeroni riraa, eejatzi akaawoshitawenteeyakarini. Rootaki iroñaaka kaari athaawanantari Tajorentsi, ayoteeyakini eero roepiyee, omaanta raakameethaperoeyeeni.

**23** Thame eekiroaatatyee aapatziyawo rowaga kyaaryooperotatsiri. Tema ayoteeyakini imatakaeniro maawaeni ikanteeyakaerini, eero ramatawiteeyeeni: rootaki okameethatantari akamanteeyerini paashinipaeni atziri iroka aapatziyakarika.

**24** Thame iroñaaka oemoshirenkaeyerini paashinipaeni: anintawaka-gaeyani eejatzi akaminthayerini.

**25** Eenitatsi ayemijantzinkarite kaari pokapiintatsi ikemijante: eero pikimiteeyarini eorori, omaanta pipiyotapiinteyyaani poemoshirenkawakagaeyantyhaarini maawaeni. Tema ayoteeyini eero ojamanitzi ipokantee-yari Jesokirishito, rootaki okameethatantari aweshiryaaawenteeyaarini eejatzi aweshiryaaakagaeaeyaarini paashinipaeni.

**26** Pamine, aririka ayoteeyakini ikamawenteeyakaeni Jesokirishito, rootaki rowawijaaktantakaeri, okameethataki ameentyaawo, akemijantaperooyerini: tema rootaki ikantziriri Tajorentsi, okyaaryooperotaki. Tee okameethatziroña atheenkiri, tee añiri paashini owawijaakoteeni.

**27** Aritaki iinja ikijeyyanakirini Tajorentsi maawaeni theenkiriri, rowashironkaaperooyerini. Tema rotyaanteeyerini maawaeni paamariki kaari tsiwakanitatsini.

**28** Riraga ajoriiyotzinkariteni rowamaapiinteyakirini kaari pinkathatzirori rojankinarini Moeseeshi. Eenitatsirika apite kantsiri, aririka ikaatzi 3: "Eniro rantani, noñeyakirini", ari rowamagaeyakirini isheninka. Tee ineshironkatzimaetari.

**29** Aririka itheenkeri atziri Itomi Tajorentsi, eejatzi ikanterika: "Ratsipetashita ikamaki Jesokirishito, ratsipetashita rapaatakiro riraa, eero rowawijaakotee"; eejatzi ikantzimaterorika Ishire Tajorentsi, rowaga kaminthagaeyeerini: ¿Piitzima eero rowashironkaeri Tajorentsi? Aritaki rowashironkaaperotakiri kameetha: ikemawakirota, kaari raapatziyantari.

**30** Tema ayoteeyini ikantzi: "Naaka aritaki nopyakowenteeyaaari, nowashironkagaeyerini naaka". Eejatzi ikantzi: "Kyaaryo nokantakowenteeyerini maawaeni atziri ikameethatakirkika, tema naaka pinkathariwenteeyiririni".

**31** Aririka itheenkante atziripaeni, ikijakiri Tajorentsi, riraga añaaperotatsiri: okameethatzi ithaawantaperoyeaarini kameetha, rowashironkaerikari.

*Pikyaaryoowentero paapatziyari Jesokirishito, eero pithaayi poyaatantyaariri*

**32** Pikenkithashireeyaani tsika okantari paerani, owakira pikemakotakirini Jesokirishito. Ikijawenteeyakimironi pisheninka pikemijantzi, omaanta eekiro piyatatzia paapatziyari rirori.

<sup>33</sup> Apaanipaeni ishirontawenteeyakimini, rowashironkagaeyakimini. Tema iñeeyakimini osheki atziri. Omaanta paashinipaeni pitsipateeya-pakarini piyemijantzinkaritepaeni riraga owashironkaenkari.

<sup>34</sup> Petakotapiintakiri riraga omonkyagaagarewopaeni. Eejatzi aririka ikoshitakiminí powaagawo, pikimoshireeyakini, pikantzini: "Rayeroota. Iinja ojeekaperotayiteeni kameethatayitatsirini janta jenokinta, eero añaapae koshiteeni janta. Akanteetatyeyaaani ajeekaeyeni janta okameetheetyaaperotzinta".

<sup>35</sup> Eero pipeyakotziro pikimoshirewentziri, eekiro piyaatatyyee piki-moshireeyanakini. Kyaaryo, ipinatemti Tajorentsi.

<sup>36</sup> Okameethatzi pikantyaani pikyaaryooowentero maawaeni ikowakaemiri Tajorentsi, roojatzi imatantakimirori ikantakimiri.

<sup>37</sup> Tema okantzini Iwaperite Tajorentsi: "Rooteentsi ipokae Awinkatharite, eero ojamanitzi, tema ikantzi: 'Ari nopolkae.'

<sup>38</sup> Okameethatzi ikemijantaperoeyenani riraga nowameethatziri. Omaanta rookaerorika ikemijantzi, eero niweshiryaaawentaari'".

<sup>39</sup> Tee atsipateeyarini aari riraga ookaeyirorini ikemijantzi: riyaateeyeni rirori paamariki kaari tsiwakanitatsini. Akemijanteeyini aaka, aateeyeni jenokinta.

## 11

### *Ranteeyinirini aapatziyariri Tajorentsi paerani*

<sup>1</sup> Paapatziyari Jesoshi piyotaperotantakari imataperotemiro maawaeni ikantakimiri. Eenitatsi osheki kaarira añeeyini, omaanta aapatziyari Jesoshi, rootaki ayotantakariri añeeyerini iinja maawaeni ikashiyakagaeyakaerini.

<sup>2</sup> Raapatziyari Tajorentsi riraga paejatziiteni rootaki iñaaperotantariri Tajorentsi ikameethatzia.

<sup>3</sup> Aapatziyari aaka, rootaki ayoteeyantakarini iñaawaetakira Tajorentsi rootaki ojeekantakari kipatsi, jenokinta, eejatzi maawaeni jeekantawori. Iñaawaetakira, jeekanaki: tekatsi raashitero riwetsikantawori.

<sup>4</sup> Raapatziyari Tajorentsi Aweerini, rootaki iñaaperotztantakariri Tajorentsi okameethatzia ipashitakariri; omaantakya riraga Kayeeni, tee raapatziyari, rootaki kaari iñaaperotantawo okameethatzia ipashiwitakaririni rirori. Iñaaperotakiri Tajorentsi Aweerini ikameethatzia, rootaki iñaaperotztantakariri ipakiriri. Ikamakini rirori paerani, omaanta okameethatzia akimiteeyaarini: aapatziyeeyaarini iñaaperoeyanteerini Tajorentsi akameethatzia.

<sup>5</sup> Raapatziyari Tajorentsi Enoko, kaari ikamanta. Añaatsi rini, raaneeri Tajorentsi jenokinta. Tekatsi ñeerini eejatzi: kyaaryo, raaperotaneeri jenokinta. Tekirani raayirini, ikantzini: "Kyaaryo, noñaaperotakiri Enoko ikameethatzia".

<sup>6</sup> Eerorika aapatziyari, eero iñaaperoeyeeni akameethatzia. Eenitatsirika kowatsiri rareetyaari Tajorentsi, okameethatzia raapatziyaperotyaari, eejatzi riyotaperotanaki ipinateri kowaperotatsiri riyoferi.

<sup>7</sup> Eejatzi raapatziyari Tajorentsi Noeni. Ikantzirini rirori: "Iinja opoke osheki inkani, inkaaretanaki maawaeni. Piwetsikero antawo pitotsi paw-ijakotanteyyarini". Ari ikemijantaperotakiri. Ojarentsitaperotawitani, omaanta rantaki pitotsi, rawijakotantaari, eejatzi rawijakoeeyantaarini maawaeni jeekimoeyiririni ipankoki. Tee raapatziyeeyarini paashini-paeni isheninka, rootaki ikantakotantakari, rowashironkaeyantakaririni Tajorentsi. Omaantakya riraga Noeni rowameethatziri: tema raapatziyari rirori.

<sup>8</sup> Eejatzi rirori Awaraamani, raapatziyarini Tajorentsi. Ikantzirini rirori: "Nokowaki piyaate paashiniki kipatsi, janta inteea: aritaki pijeekapae. Nopemiro pashitaperotaari eerori; eejatzi noperi pitomi, piccharini, maawaeni. Thame piyaate, nokoyi noñaayemiro". Ari riyaatanaki, omaanta tee Riyotztsikarika ryaate.

<sup>9</sup> Rareetantakari, iñaapaakiri paashini atziri jeekatsiripaeni. Okimiwitaka kaari iipatsite, tee ijekaperotzi, omaanta ikinayitakini; omaanta ikantani raapatziyari Tajorentsi. Eejatzi ikimiteeyakani itomi Ijaaka eejatzi icharini Jakoowo: tee ijekaperotzi, tee riwetsikaeyini kameethari ipanko,

<sup>10</sup> omaanta ikenkithashireeyironi paashini inampi, kaari riwetsiki atziri. Riyoteeyakini iinja ragaeyaneerini Tajorentsi janta inampiki, riwetsikakiri rirori.

<sup>11</sup> Aapatziyari Tajorentsi Jaaran: antyashipawo ini, tee itzimi otomi. Roojatzi antyaashipawoperotantanaka. Ikantakiro Tajorentsi: "Inja itzime pitomi", roojatzi aapatziyantakanari. Okantzi: "Eero ramatawitana Tajorentsi". Roojatzi itzimantaka.

<sup>12</sup> Eejatzi antyaashipariperowitakan Awaraama, oshekitaiperotaki rojarentsite. Tee itzimawita apaani itomi, omaanta roojatzi iroñaaka itzimakaantakawo iina otomi. Iroñaaka ikaateeyini isheninkapaeni oshekiperio, eero amatziri ayoteeyerini tsikarika ikaateeyini: ikimiteeyakarini omnipokiropaeni, eero amatziri ayoteeyerini tsikarika ikaateeyini. Eejatzi ikimiteeyakawoni opane impaneki janta othapyaaki inkaare, oshekiperio.

<sup>13</sup> Ari ikamaeyakini riroripaeni aapatziyariri Tajorentsi: ijekaeyawitani Kanaanaki, omaanta tee iñaaperoyironi maawaeni ikantakiririni Tajorentsi. Inta riyoteeyakini iñaagaero iinja. Ikanteeyini: "Tee nonampitaperotawo kipatsika, tee nojeekaperotzi jaka".

<sup>14</sup> Rootaki ayoteeyantakarini ikowaeyakini rareeteeyaani paashiniki nampitsi inampiperotantapaeyaawori.

<sup>15</sup> Ikowaeyeenimi ipiyeyaneenimi janta Ejiipitoki ipoñaakanta, ari riyaateyeenimi.

<sup>16</sup> Omaanta ikowaeyakini ryaateeyeni okameetheetyeenta nampitsi: rowaga jeekatsiri jenokinta. Rootaki riweshiryaaewenantakariri Tajorentsi rirori: tee ipashiwentakaematar, itomintaperoeyakarini. Eejatzi riwetsikaeyenirini ijekaeyantyaarini.

<sup>17</sup> Ari ewankaritapaaki Ijaaka, roojatzi iñaantakari Tajorentsi Awaraama, ryotantyaari kyaaryorika ikemijantaperotziri. Ikantziri: "Powamayenari pitomi papintzite, pitayenari". Ikemantakariri, ikantziri: "Ari, niyate nowamaeri".

<sup>18</sup> Paerani ikantzirini Tajorentsi Awaraamani: "Iroñaaka eenitatsi pitomi papintzite, piiitakiri Ijaaka. Rirotaki ashitayiteeyaaririni piccharineetayiteeyaarini, maawaeni. Tekatsi paashini ashityaarini".

<sup>19</sup> Ikenkithashiryaka: "Ikantana Tajorentsi: 'Rirotaki ashiteeyaaririni piccharineetayiteeyaarini, maawaeni', tekira itzime rirori. Omaanta iroñaaka ikantakina: 'Powamaeri'. Niyotaki aririka nowamaeri, ari ipiriinteeri". Riyaatanaki, rooteentsi rowamaerimi, omaanta ikantziri Tajorentsi: "Eero powamaeri, omaanta noñaantatzimi. Iroñaaka niyotaki pipinkathataperotakina". Ari okimitzimotawitakari Awaraama ipiriinteeneri itomi, añaanee eejatzi.

<sup>20</sup> Eejatzi rameentakari Tajorentsi Ijaakani, rootaki ikantakowenantariri Jakoowoni eejatzi Isawoorini. Ikantziri Tajorentsi: "Pitajonkakowenteri notyomi apite". Rootaki itajonkakowenantariri osheki.

<sup>21</sup> Eejatzi ikimitani Jakoowo, rameentakari Tajorentsi. Rooteentsi ikame, omaanta ipiriinanakawo ikotzi amitakoterini; roeyotashitakari Tajorentsi, ikantziri: "Pitajonkakowenteeyerini itomipaeni Josee".

<sup>22</sup> Eejatzi rirorini Josee, rameentakari Tajorentsi. Paerani ijeekini Ejiipito, eejatzi maawaeni isheninka, omaanta riyotaki ragaeyaneerini riraga Tajorentsi joriyyopaeni janta iipatsiteki. Rootaki ikanantariri isheninka: "Rooteentsi nokame. Iinja, arrika piyaateeyaneeni aepatsiteki aari, pagaeeyaneeronikya notonki, pikitatero janta".

<sup>23</sup> Paerani ikanteeyawitarini riraga iwinkatharite ejiipitojatz: "Nosheninka, piñaakiri roshekiiyanakini joriyyopaeni: tee okameethatz. Piyaateeyini powiinkaeyerini maawaeni itomipaeni, owakira tzimayitatsirini". Ari riraga iriri Moeseeshi rameentakari Tajorentsi, eejatzi rinro: ipinkathateeyirini Tajorentsi, rootaki ikanantari: "Eero apinkathatzir riraga iwinkatharite ejiipitojatz. Ikameethataki atomi, eero ashinetziri rowiinkiteeri". Ari imanapithakiri, kaari rowamaantyaari.

<sup>24</sup> Ari roojatzi oñaakiri Moeseeshi rishinto pinkathari. Okenkithashiryaka: "Eero nowamaeri, inta nokimitakaantyaari notyomi, ijeeki nopankoki". Roojatzi rantaranaki. Rameentakari Tajorentsi, rootaki ikanantari: "Tee nokoyi nosheninkatyari ejiipitojatz, naaka joriyi".

<sup>25</sup> Riyotaki raapatziyeeyarini Tajorentsi joriyyopaeni, rootaki rowashironkagaeyantakaririni rirori ejiipitojatz. Ikimoshireeyawitakan irirapaeni, omaanta tee okameethatz rantakiri, rootaki kaari ikowanta Moeseeshi isheninkateeyaaarini.

<sup>26</sup> Tee ikoyiri iyorkite ejiipitojatz ijeekimowitakari, omaanta ikowaperotaki raapatziyari Jesokirishito, ikemaatsitawentakari rirori. Riyotakini iinja ipinateri Tajorentsi.

<sup>27</sup> Rameentakari Tajorentsi, riyotaki tee ikoñaatzi irira, omaanta riyotaki kijokiro royiri; rootaki kaari ithaawanantari pinkathari, eejatzi ishiyapitheeyakarini ejiipitojatz, ragaeyanakirini maawaeni ijoriyyotzinkarite.

<sup>28</sup> Eejatzi rameentakari Tajorentsi, riraga kantziri: "Iroñaaka tsiteniriki notyaanteri nonampiri rowamaeri itomipaeni theenkayeanarini, riraga jematatsiri ikoñaatzi. Omaanta aririka powamaeri owisha, pitziritero pipanko rirara piykapiintzira, rawijantyari riraga owamaantatsiri, eerokya rowamaeri pitomipaeni". Ari raapatziyakirini Moeseeshi, eejatzi raapatziyakagayakarini ijoriyyotzinkarite, kaari ikamaeyantyaani itomipaeni. Ro aetantawori kitejiri: "Rawijantaririni ronampiri Tajorentsi".

<sup>29</sup> Eejatzi raapatziyeeyini maawaeni joriyyopaeni. Ishiyapitheeyakarini riraga ijoraarotepaeni ejiipitojatz. Royaateeyawitanakarini irirapaeni, raawaerimi. Eenitatsi otzikaeyakiririni joriyyopaeni antaworoña inkaare, tektsi ikineeyaneeni. Riyotaki Tajorentsi raapatziyeeyarini, rootaki iteenkaryaatantakawori inkaare, okipatsitanaki niyanki. Intsipaete rawijeyeanakini intatsikeronta maawaeni joriyyopaeni. Royaateeyawitapaakarini ejiipitojatz, omaanta roepiyaagaero Tajorentsi inkaare, agaeyakirini joraaropaeni.

<sup>30</sup> Eejatzi rameentakari Tajorentsi joriyyopaeni janta Jerikooki. Rotantonakitanteeyakawoni mapipaeni inkinaaakitakirori pankotsipaeni, rotzikagaeyakirini joriyyopaeni. Omaanta ikantziri Tajorentsi: "Pishonkaeyanakyaawoni nampsitsi. Apaani kitejiri, apaani pitapoteeyawo; paashini eejatzi, paashini eejatzi, roojatzi 7 kitejiri". Ari monkaatapaaka kitejiri 7, roojatzi opariyantanaka otantonagaakitachari. Rowamagaeyakitzirini theenkiriri Tajorentsi.

<sup>31</sup> Ojeeki janta tsinani, oetachari Raawa. Paerani osheki oshinetaayitarini shiramparipaeni kaari ayi. Aapatziyari Tajorentsi roori, rootaki ami-

takotantariri rotyaantane wopaeni Joshoe raminero nampitsi. Tee okami roori janta Jerikooki, tee okimitar paashinipaeni theenkaeyantsirini.

<sup>32</sup> „Litaka paashini nokenkithatakoteri? Oshekitanaki iroñaaka nojank-inari, omaanta ijekki oshekiper paashinipaeni ameentariri Tajorentsi: Jeryoo, Waraaka, Shaansho, Jete, Iraviiri, Samoeri, eejatzi paashinipaeni kamanantayitzirorini iñaani Tajorentsi. Eero iroñaaka nothonkimiro nokamantzimiro maawaeni rantayitzirini.

<sup>33</sup> Rameenteeyarini Tajorentsi paashinipaeni, rootaki ranaakoeyantawakaririni rowayiritepaeni. Rameenteeyarini paashinipaeni rootaki imatantawori kameetha ipinkathariwenteeyirini isheninka, eejatzi imatantakanariri Tajorentsi ikantakiriri. Rookawitakari manitzimashiki, omaanta rameentakari Tajorentsi, rootaki kaari rowantari.

<sup>34</sup> Paashini rookawiitari paamariki, omaanta tee itaga. Ithatyagaeterimi paashinipaeni, omaanta rowawijaakotagaantakiri Tajorentsi. Imantsiy-atagaantaki, omaanta retsiyatakotagaantakiri, ishuntsitakaagaantakiri. Imatakaagaantakiri omanatachari. Romishiyagaantakiri omanaterinimi aapatziyariri Tajorentsi.

<sup>35</sup> Ameentariri tsinanipaeni, rootaki ipiriinantaari oemini, eejatzi otomipaenini.

Omaanta omawitya ameentariri rowashironkaagaanteetakiri paashini-paani aapatziyariri Tajorentsi, rowatsinagaanteetakiri; ikantziri: “Aririka pookaero paapatziyari rirori, ari kameetha nopakagaemi”. Omaanta ikantziri: “Eero nookiro naapatziyari. Iinja kameetha ijekkakayena Tajorentsi”.

<sup>36</sup> Ari ishirontawentagaantakari, ipajapajaatagaantakiri, tak, tak, tak; roojotagaantakiri kareenathaki, romonkyagaantakiri,

<sup>37</sup> itsitokagaantaki mapiki, pog, pog, pog. Itotakiri ithakiryaakiri, thatzik. Ithatyaagaantakiri ithatyaamentoki, petzik. Paashinipaeni tee ikithaata kameetha, omaanta roori ikithaatashitakari imashi owisha eejatzi imashi chihiwo; okoetyeemotakari oetarikapaeni, ikijectakiri, rowashironkaetakiri.

<sup>38</sup> Ikinayitanakini teenta ijeki atziri eejatzi tonkaariki. Imanapithayitakarini kijakiriri janta omooki impeeta. Ikameethaperoyakini, omaanta tee raakameethatziri riraga theenkantatsiri.

<sup>39</sup> Ari rameenteeyarini Tajorentsi rootaki iñaaperotantakariri Tajorentsi ikameethatziri; omaanta tee iñaaperooyeroni maawaeni ikashiyakaakaririni.

<sup>40</sup> Okameethaperotaki ikowakagaeyakaerini Tajorentsi: tee ikowakagaeyirini riraga paejatziiteni reewateeyeeni iñeeyeroni, omaanta ikowaki amonkaatawakagaeyeaani añaeyeroni maawaeni.

## 12

*Ikantziri: “Pikyaaryoowenteniri Tajorentsi ikowakaemiri, eero piperashiryaawo”*

<sup>1</sup> Ari osheki raapatziyeyakarini maawaeni irikapaeni no-kennithatakaoeyakirini. Iroñaaka okimitaka ipiyotashiiyakaeni, raminakoeyakaeni riyoteeyantaarini oetarika anteeyerini aari. Noshiyakaawentemiro: tema rameteeyawoni ewankaripaeni ishiyeeyani riyotantyaari ninkarika anaakotantatsini. Aririka ishiyeeyanakini, rookagaantana kiro iithaaripaeni ishiyaperotantyaari. Aaka oshiyakaawentacha kaari anantyaawo kaari kameethatatsi amatantyaawori anteeyeroni maawaeni ikowakagaeyeerini Tajorentsi, akyaaaryoowentero.

<sup>2</sup> Akantyaani akenkithashireeyerini Jesoshi, riraga owawi-jaakoeyakaerini paerani, eejatzi rirotaki agaeyaneerini iinja jenokinta. Osheki ikemaatsitawenteeyakaeni koroshiki paerani, osheki rowashironkagaeyakirini riori. Omaanta rirotaki ijekakagaeyeeni kameetha janta jenokinta, rootaki ikemaatsitawenantaakaeri. Ironaaka ijeki riori janta rakoperoki Tajorentsi, ikaateeyakirini ipinkathariwenteeyakaeni.

<sup>3</sup> Osheki paerani ikijeeyakirini theenkantatsiri, osheki rowashironkagaeyakirini. Iroñaaka okameethatzi pikenkithashiryaaaperoeyerini, eejatzi eero powashireta, eero pijamashiryaaawo.

*Rowashironkaakiri Tajorentsi aapatziyariri Jesoshi antzirori kaari kameethatatsi*

<sup>4</sup> Aririka ikanteeyawiteeni antzirori kaari kameethateeyatsirini: "Thame ashinkitya. Thame antero oetarika akowakiri". Kyaaryo niyotakimi pikantekira: "Eero nantziro. Eejatzi eeroka, pookaero pantayitzirini". Omaanta tekira ikijantaperoetzimiro. Tekira rowamaanteetzimiro, tekira rowashironkaawentzimiro roojatzi pikamantakya.

<sup>5</sup> „Pipeyakotakiroma itomintakimi Tajorentsi? Pikenkithashiryagaero eejatzi iroka kaminaakiriri paejatzi: "Notyomi, aririka nowashironkagaemi, eero pikijana, tema naaka Piwinkatharite. Eejatzi aririka nowashironkayemi, eero pikantashiryaaashita.

<sup>6</sup> Aririka rantero nonintanewo kaari kameethatatsi, ari nowashironkaakiriri. Nokowaki niyotakaantyaariri tee okameethatzi rapiitapiintero. Aririka nowashironkayemi piyotantyaari notomintapero-takimi".

<sup>7</sup> Aririka rowashironkaeyemini Tajorentsi, eero pikantashiryaaashita. Intashireteeyakimini, itominteeeyakimini, rootaki rowashironkaantakimiri. Tema ameteeyawoni aari owashironkaapiinteeeyirini atomipaeni.

<sup>8</sup> Maawaeni shirampari rowashironkagaeyakirini itomipaeni. Eerorika rowashironkaemi Tajorentsi, tee eeroka itomi, rishinto: tee pisheninkatari.

<sup>9</sup> Rowashironkagaeyakaeni ashiteeyeerini, omaanta tema apinkathateeyakirini. Tema eejatzi okameethatzi apinkathateeyerini Tajorentsi ashiteeyeerini, akanteetatyeyaaani ajeekantyaari janta jenokinta.

<sup>10</sup> Riraga ashiteeyeerini rowashironkagaeyakaeni eejatzi riota-gaeyakaeni ayoteeyantakarini ajeekaeyini kameetha jaka kipatsiki: eero ojamanitzi, ari akamaki. Omaanta tee riyoteeyini maawaeni, raamaashitawitani riori; ikijashitee. Omaantekya riraga Tajorentsi, tee raamaashitayitani riori, riyoperoeyakaeni kameetha: kameetha rowashironkagaeyakaeni, kameetha riyotaaperoeyakaeni. Rootaki atspatantereyaririni riori akanteetatyeyaaani akameethaperoyerapaeni.

<sup>11</sup> Aririka rowashironkagae, tema owashirewitanaka, tee akimoshiryaaawitanaa. Omaanta roojatzi akenkithashiryaa, ayotaki riyotagaeyakaeni akimoshireeyanakini eejatzi akameethatanaki.

*Piweshiryaaawenteeyaarini Tajorentsi*

<sup>12</sup> Pikimiteeyawitakan pi makoteeyatzini. Pipiriintanee, pishintsitanee: piweshireeyanakyaani.

<sup>13</sup> Pikyaaryooentero ikowakaemiri Tajorentsi. Piweshiryaka-gaeyaaarini piyemijantzinkarite owashireeyawitacharini ikemijantaperoeyantyaarini riori.

<sup>14</sup> Pikowaperoeyeni paakameethateeyerini maawaeni paashinipaeni atziri, eero pikijiri. Eejatzi pikowaperotaki pijeki kameetha: eerorika pijeki kameetha, eero pimatziro pikemijantakagaeyerini paashinipaeni, eero riyoteeyirini Awinkatharite.

**15** Pamitakotawakagaeyaani, piyotaawakagaeyaani, riyoteeyantyaarini maawaeni ashenkapaenai ineshironkaeyakirini Tajorentsii. Kyaaryoowa pikijashireeyirinikari pisheninka, tee okameethatzi. Aririka pikijawakaeyaani, eero pijekaeyini kameetha, eejatzsi pookaeyeeronikari paapatziyari.

**16-17** Piyoteeyakini iitaka rantakirini Isawoori. Rirotaki itomi Ijaaka; Isawoori rirotaki jewatatsiri ikoñaaatzi; riraga Jakoowo, impaetatsiri. Ari rameteeyawoni ashiteeyaririni ikantakowentaperotziri jewatatsiri ikoñaaatzi itomi, itajonkakowenantaariri Tajorentsii. Eejatzsi ikantziri: "Eeroka poyaateenani, ashitayiteeyawoni tzimimotayitanarini". Eejatzsi ikimiterimi rirori Ijaaka, ikaminthaauperoterimi Isawoori. Omaanta paashini kitejiri osheki ikemakiro riraga Isawoori itashe, roojatzi iñaakiri rirentzi eenitatsi osheki rowari. Ikantziri: "Yeeyi, pipena noyaari: aaperotakina notashe". Ikantziri: "Aririka ikantakowentakina naaka Pawa, eejatzsi ikantena nopoyaateeyari, ari nopakimiro poyaari". Ikantziri: "Ari, eerokaritya. Člitaka nokowantyaari naaka ikantakowentena iinja? Rooteentsi nokame". Ari ipakiri rowari.

Tema piyotzi eerokapaeni, roojatzi ikenkithashiryaaawitanaa Isawoori, raawitanakanari rowanawo iriri, ikantawitapaakari: "Pawa, nokowaperotaki pikanteri Tajorentsii nopoyaateemi eejatzsi itajonkawentena". Rakawakiri: "Eero. Nokantakowentakiri iroñaaaka pirentzi. Eero iroñaaaka napiitziro nokantakowentzimi". Tee ikoyi Isawoori itajonkakowenteri Tajorentsii paerani, tema itheenakiri. Eero pikimitaari iroñaaaka eerori.

### *Kameetha ikaminthagaeyakaeni Tajorentsii iroñaaaka: eero akimitari pajatziuteni, riraga thaawanteeyakaririni*

**18** Tee piñeeyironi iñeeeyakirini paejatztiiteni janta tonkaariki Shinayiiki, ithaawaeyantakarini. Ikamanantakariri Tajorentsii Moeseeshi maawaeni ikowakagaeyakiririni, iñaakiro omapokanaka ootashitaka paamari, otsiteni-ityaanaki eejatzsi, iñaakiro antawo tampyaa.

**19** Ikemaeyakironi isheninka eejatzsi ishuntsitzi itziwootzi eejatzsi ike-maeyantakaririni Tajorentsii, ithaawanteeyakarini osheki, ikanteeyini: "Eero piñaaneeyanan eejatzsi, osheki nothaawanteeyakimini. Nokamikari".

**20** Ikantziri Tajorentsii: "Tee nokoyi ipoke jaka tonkaariki atziri eejatzsi ipira. Ipokerika jaka ipira, pompojeri, powamaeri". Ari ithaawaeyanakini osheki maawaeni atziri.

**21** Eejatzsi riraga Moeseeshi, ithaawaeyanakini maawaeni iñeeeyakirini; ikantziri: "Osheki nothaawanaki, rootaki nompetatantanakari".

**22** Omaanta eerokapaeni, tee piyateeyini Shinayiiki, rootaki kaari pithaawaeyantani. Omaanta okimitakawo piyateeyakini janta paashiniki tonkaari, iitachari Shiyoo, rowaga jeekatsiri janta Jerojareeki: oshiyakawori inampi Tajorentsii. Ñaakiro, kimitaka piyataperotaki paashiniki Jerojaree, rowagajenokijato: pareeteeeyakarini Tajorentsii, ikaminthaauperoeeyakimini, rootaki kaari pithaawaeyantani. Eenitatsi janta oshekiperonam-piripaeni, ipiyotawenteeyakarini, romampaawenteeyakarini, maawaeni.

**23** Janta ijeeki maawaeni aapatziyariri Jesoshi itominteeeyakarini Tajorentsii, maawaeni jeekaperotatsini janta: eeniro ojankinataka iroñaaaka iwaero, maawaeni. Rirotaki rirori, riraga kantakowenteeyakaerini aakapaeni maawaeni, antakirorika kameetha rooma teerika antziro. Eenitatsi eejatzsi maawaeni riraga aapatziyeeyaririni paerani; rowameethateeyakirini Tajorentsii, kameetha ijeekaeyini iroñaaaka jenokinta.

<sup>24</sup> Eejatzi okimitaka pareetaka Jesoshiki, riraga iyotagaeyeerini maawaeni ikanteeyakirini Tajorentsi. Paerani rowamaakiri Kayeeni rirentzi Aweeri, rootaki rowashironkaantakariri rirori. Rowamagaetakiri eejatzi Jesoshi, rapaatawenteeyakaeni rira. Anaakoperotantanaki rashì Jesoshi tema rootaki ayotantakari ari imatero rowawijaakotee ikaminthagaeyaantakaerini Tajorentsi.

<sup>25</sup> Paapatziyeyaaarinira riraga kenkithatakagaeyimirini, kyaaryoowa pipiyathatarikarira. Paerani ipiyatheeeyakarini ashinkani Moeseeshi. Isheninka rinawita, omaanta tee raapatziyari, rootaki rowashironkaanteeyakirini Tajorentsi. Kaari atziri kowatsini ikenkithatakayemi iroñaaka, omaanta riraga Tajorentsi. Osheki ranaakontaktaki ipinkatharitzi. Eerorika paapatziyari Jesoshi tema ari rowashironkaaperoeyemini osheki.

<sup>26</sup> Paerani janta Shinayiki ikenkithatakantakariri Tajorentsi Moeseeshi, omoyeka kipatsi. Omaanta ikantzirini rirori: "Inja noweyaantawakyaawo nomoyekero eejatzi kipatsi, omaanta eejatzi nomoyekakoteri jenokijatzi maawaeni".

<sup>27</sup> Ikantzini: "Ari noweyaantawakyaawo nomoyekero eejatzi". Aritaki ithonkiro maawaeni onikaeyacharini, maawaeni kaari kijotaperotatsi. Otzimagaantantanaki kaari onikachani.

<sup>28</sup> Ari inja ajeekaeyanteeyawoni janta paashiniki kipatsi, rowaga kaari thonkanitachani: janta ipinkathariwentaperoeyeeni. Rootaki okameethatantarri apaasonkitaperoeyerini, akyaryoowenteniri maawaeni ikowakaakaeri; thame apinkathataperoeyerini maawaeni.

<sup>29</sup> Tema roshiyakawo Tajorentsi paamari taantanero. Okameethatzi ithaawantaperoeyaaarinri maawaeni kaari pinkathatziriri rirori: tema ari ithonkaperoeyakirini maawaeni theenkayiririni.

## 13

### Riweyaantakari ikaminaakiri

<sup>1</sup> Ari, pinintashiryawakaaperoeyaaani: pikimitakaanteri paashinipaeni irira piyemijantzinkarite, eekiro piyaatatyee pinintashireperoteri.

<sup>2</sup> Aririka rareetemi kaari piñaapiintzi, paakameethatawakiri. Eeniro aakameethatawakiriri kaari iñaapiintzi, iitawitari isheninka riraga raakameethatziri: jaa, ronampiripaenimache Tajorentsi rineeyini.

<sup>3</sup> Pikaminthagaeyerini maawaeni ayemijantzinkarite, riraga romonkyaa-gaetziripaeni: Kimitakimi pijekakitzi janta omonkyaagamentotsiki, tema ari pikowakimi ikaminthagaeyeminimi eerori. Pikaminthagaeyerini maawaeni rowashironkagaetzirini: tema pisheninkaeyakarini.

<sup>4</sup> Okameethatzi aye aena; okameethatzi rowaga tsinani aye oemi. Okameethatzi imatero shirampari iina; okameethatzi oshinetayaari tsinani oemi. Omaanta rowashironkagaeyerini Tajorentsi maawaeni kaari kinatavori iina eejatzi roori tsinani kaari kinatiriri oemi. Eejatzi rirori ewankari aritaki rowashironkaeyakirini Tajorentsi ñaathatayitaworini tsinani kaari rayi. Eejatzi okimitya roori tsinani eero oñaathatari shirampari kaari ayi.

<sup>5</sup> Eero pikoyi poshekeeri piyorikite, omaanta piwesiryawawentyaawo tzimimoeyimirini. Tema ikantzi Tajorentsi: "Eero noshinetzimi pashironkaya, kijokiro nowaeyemini".

<sup>6</sup> Rootaki okameethatantarri akantapiinteeyeni: "Niyotaki ramitakotapi-intakina Awinkatharite, eero nokenkithashiryaaapiinta. Tekatsi ikantena atziri rowashironkayena".

<sup>7</sup> Pikenkithashiryaaoperoteri tsika ikantari riraga aapatziyakagaeyimirini: riraga iyotagaeyimirorini iñaani Tajorentsi. Pikenkithashiryaaopertero

maawaeni imatakagaeyakimirini, roojatzi pikimiteeyaarini rirori, paapattiyaperoyaarini Tajorentsi.

<sup>8</sup> Tee ipaashinitapiintzi Jesokirishito, roojatzi ikanta: paerani, iroñaaka, roojatzi finja.

<sup>9</sup> Eero paapatziyawo Riyotaantashitayitarini atziripaeni. Tema okameethatzia akemijantero Riyotagaeyeerini Tajorentsi, riraga neshironkaeyeerini. Eenitatsi kantawenteeyaeerorini oetarika owaeyaariniimi, omaanta ratsipetashitakawo: tee owameethateeyirini riroripaeni, eejatzi eero owameethateeyeeeni aari.

<sup>10</sup> Ikamawenteeyakaeni Jesokirishito, awijakoeyantaarini; omaantakya rirori riraga kantziriri ñaanakowenantsatsiripaeni: "Pitayeniri nopira nawi-jakotanteeyarini", ratsipetashiteeyakawoni, eero rawijkotee.

<sup>11</sup> Riraga iwinkatharitepaeni ñaanakowenantsatsi rowamaapiintziniri piratsi eejatzi raapiintziro riraa janta ipankoki Tajorentsi. Ikantziri: "Eeniro rantani nosheninka, rootaki nowamaantari piratsi piyotantyaari ikowaki pikaminthayeri. Eenitatsi iroka riraa". Roojatzi ragaeyanakironi iwatha piratsi janta intena, itaakiri.

<sup>12</sup> Eejatzi ikimitakaantakiri Jesoshi, ragaeyanakirini intena rowamaantakariri: tee ari rowamaeri nampitsiki. Omaanta ikamaki rowameethateeyantakaerini.

<sup>13</sup> Aririka ishirontawentee theenkantatsiri, aririka rowashironkagaeyeeni, omaanta okameethatzia akantyaani aapatziyari Jesoshi. Tema ishirontawenteeyakarini rirori, rowashironkagaeyakirini.

<sup>14</sup> Kaari anampipero iroka kipatsi, omaantakya akowaeyakini anampitaperoteeyawo janta jenokinta.

<sup>15</sup> Aririka aapatziyari Jesokirishito, okameethatzia akamantapiinteeeyerini paashinipaeni: "Osheki ikameethataki Tajorentsi, osheki nopinkathatziri".

<sup>16</sup> Pikantyaani pantayiteroni kameethatayitatsirini eejatzi pikaminthagaeyerini paashinipaeni: rootaki ikowakagaeyakimirini Tajorentsi.

<sup>17</sup> Pikemijantaperooyerini riraga kenkithatakagaeyimiorini iñaami Tajorentsi, pipinkathafeeyerini. Okameethatzia Riyotagaeyemini rirori kameetha, pikameethashireeyanteeyarini. Finja rojampitawakiri Tajorentsi: "¿litaka piyotaakiriri riraga kemijanteeyakimirini? ¿Kameethama raapatziyakimi?" Ari ikamanteri. Tema kameetha rakeri: "Jee. Kameetha raapatziyakina". Omaanta eerrika paapatziyari ikanteri: "Tee raapatziyana", roojatzi rowashironkaantakimi Tajorentsi.

<sup>18</sup> Tee niyotzi eenirorika nantani, nokenkithashirya tee añaaro; omaanta nokowaki pamanakotena eero otzimanta nantani.

<sup>19</sup> Eejatzi pamanakotena intsipaete nareetztanteemiri eejatzi, añaawakaanteeyaaarini.

<sup>20</sup> Eejatzi nokanteri ramitakoeyemini eerori. Niyotaki ikemijantena Tajorentsi, tema itajonkakowenteeyakaeni: ikowaki ijeekakagaeyeenai kameetha. Paerani eejatzi ipiriintaneeri Awinkatharite Jesokirishito: riraga kantakowenteeyakaerini, aminakowenteeyakaerini. Raminakowenteeyakaeni, ikimitakari ashitariri rowishate, raminakowritaantziri riroripaeni. Ikamawenteeyakaeni, apaatawenteeyakaeni riraa, ayoteeyantakarini kyaaryo ikantakaeri Tajorentsi: "Nowawijaakoeyemini, nojeekakayemi jaka nonampikika, pikanteetatyeyaaani".

<sup>21</sup> Iroñaaka nokantakiri: "Powameethataperooyerini nosheninka, pimatakayeri kameethatayitatsirini ranteeeyantemirorini maawaeni pikowakagaeyakirini: tema raapatziyeyakarini Jesokirishito". Eejatzi nokanteeyimini eero kapaeni: "Pipinkathataperooyerini Jesokirishito, pikanteetatyeyaaani. Aritaki okantyaari".

*Ithonkapaakiniri rojankinatziniriri*

<sup>22</sup> Noyemijantzinkarite, tee oshekitzi iroka nojankinateeyimirini: pikenkithashiryaa perooyeroni.

<sup>23</sup> Piyoteeyakini romonkyaagaetakiri ayemijantzinkarite Temoteeyo omonkyaaagamentotsiki, omaanta shitowanee iroñaaka. Aririka intsipaete rareetya jaka, notsipataneeyaari jaga pinampiki, noñeeeyapaemini.

<sup>24</sup> Niwethateeyakarini maawaeni kenkithatakaantatsiri eejatzi maawaeni ayemijantzinkarite. Riwethateeyimini maawaeni itaaryajatzi, riraga aapatziyariri Jesoshi.

<sup>25</sup> Nokowaki ineshironkaeyemini Tajorentsi, maawaeni. Aritaki okantyaari.

Ari okaatzi.

## JANTYAAKO ROJANKINATZINIRI IJORIIYOTZINKARITEPAENI JATAYITANEENTSIRINI

<sup>1</sup> Nokoyi niwethatem ierokapaeni nojoriyyotzinkarite tsikarika pikanta piujeeki. Naaka Jantyaako, roojatzi nokanta nokemijantaperotakiro ikowakaakinari Tajorentsi eejatzi nokemijantaperotakiro ikowakaakinari Jewaperowentakaeri, riraga Jesokirishito. Nojankinateeyemini erokapaeni noyemijantzinkarite jatayitaneentsirini inteenaperoki paashinikipaen ikipatsi.

*Opomeentsitzimotakimirika oetarika, pameentaperotyaari Tajorentsi*

<sup>2</sup> Iroñaaaka noyemijantzinkarite, nokamantemi: omawitya opomeentsitzimotakimi oetarikapaeni, eero pikijashitari Tajorentsi, inta okameethatz pikimoshireperotanaki.

<sup>3</sup> Tema piyotaki aririka eero pathaagakotawo kaari kameethatatsi oñaaantawitakimirika, ari piyotaperotanaki eekiro piyaatataye pameentanakyaari rirori roojatzi ari pikyaaryooventaperotanakiro maawaeni ikowakaakimiri, omawitya pikemaatsitawentyaawo. Roojatzi pishintshireperotantanakya.

<sup>4</sup> Eekiro piyaatataye kameetha pishintshireperoeyanakinikya pikyaaryowenantyaanariri irira ikowakaakimiri, rootaki pikameethashireperotantanakyaari piwetsikashireperoteeyaan, pimateeyantyaaworini pantero maawaeni ikowakagaeyakimiri.

<sup>5</sup> Tekirrika piyotaperotziro ikowakaemiri Tajorentsi, pamaneri ryotemeemi. Aritaki ikemaperotakimi, tema ipapiinteeyakimini okaatzi pamanakotziriri, aritaki ipakimi kameetha yotanitaantsi, eero ithañaapithatzimiro. Rootaki pimatantyaawori okaatzi ikowakaakimiri.

<sup>6</sup> Omaanta aririka pamaneri, kameetha pikenkithashiryaaoperota, pikante: "Kyaaryooperotaki niyotaki ikemakina Tajorentsi, aritaki imatakinawo okaatzi nokowakotziriri". Eero pitheenkashiretzikya pajankanekira. Eerorika pikenkithashiryaaoperota pajankaneki kyaaryoopero ipakimi Tajorentsi, pikimiwitakawo rowaga otamakaari janta antawokinta inkaare. Aririka otampyaate tampyaa ookaagakiro otamakaari janta eejatzi opiyaaganaa. Eejatzi okimita, aririka pikoyi ikemijantemi Tajorentsi pikantakiriri, omaanta pikenkithashiryaaarka: "Teerika ikemana aamashitya eerorika ipana". Kyaaryo eero ipimi, tema pitheenkatziziri.

<sup>7-8</sup> Riraga kantashitachari: "Naaka nokemijantaperotakiri Tajorentsi", omaanta tee imonkaatziro ikowakaakiriri, zpiitashitama ari ikemaperotakimi Tajorentsi pikantashiwaetyaaririka, teerika pikantaperotziri irira kyaaryoopero pajankaneki? Eero ikemaperotzimaetzimi, tema tee paapatziyaperotari. Rootaki kaari iñaantzimi rirori pikameethatz, rootaki kaari ramitakotantzimi, eero ipashitzimi oetarikapaeni pikowakowitariri. Pikenkithashiryaaawaetashitakawo oetarikapaeni. Tee kameetha pikenkithashiryaaoperota paapatziyari rirori.

<sup>9</sup> Okameethatz pikimoshireperotanaki, noyemijantzinkaritepaeni, kaari ashaagantcharipaeni, rooma reentsitetakimi Tajorentsi iñaaperotakimi pikameethatz.

<sup>10</sup> Eejatzi eeroka, noyemijantzinkarite ashaagantzinkaripaeni, okameethatz piweshiryaaawentaperotanakyaawo riyotakimiri

Jesokirishito; eero piweshiryaaawentashitawo pashaagawopaeni, tema pikimiwitakawo oteyaki inchashi, tee okijotzi; eechonkiini owaneenkata, intsipaete okami.

<sup>11</sup> Paminero inchashinta. Oteyakananaki owaneenkaperowitaka. Aririka ijenkitapaaki oorya ijaawaperotanakirika, intsipaete ojampiteyatanaki roojatzi opariteyatantanakya oteyaki, eero añaawaero othatanaa. Ari ikana riori ashaagantzinkari, eero ojamani ijeeki, intsipaete ikamae, rookawentanakyaawo maawaeni tzimimowitariri.

<sup>12</sup> Aririka ipokimotemirika kowatsiri rantakayemiro kaari kameethatatsi omaanta tee pathaagakotawakari okaatzi rantakayemirim, inta eekiro piyaatatyee pijeeki kameetha, pikyaaryooentaperotakiniririka Tajorentsi ikowakaakimiri, ari kameetha ikimoshiryaaakaakimi riori eejatzi ijeekakaantemiri iinja janta Jenokinta. Ashi poyiro pikanteetapaaeyeyaaani pijekaperotapae janta. Omawitya opomeentsizimotakae oetarikapaeni, aririka eshiwentanakiro tema iñaaperotakae Tajorentsi akameethatzi.

### *Eero athaagakotawo ūaantaantsi*

<sup>13</sup> Aririka pikenkithashireeyaaawo pantero kaari kameethatatsi, eero pikantashita: "Ikowakaakinawo Tajorentsi". Tee ikowakaeri Tajorentsi atziri rantero kaari kameethatatsi.

<sup>14</sup> Aririka akenkithashireero antero kaari kameethatatsi, rootaki akowantyaari antero.

<sup>15</sup> Eekirorika aatatye akowashireero antero aritaki antakiro. Eekirorika aatatye antero kaari kameethatatsi rootaki apeyakontanteeyaaariri Tajorentsi rootaki akamantari janta paamariki kaari tsiwakanitatsini.

<sup>16</sup> Ramatawiteemikari kamaari, noyemijantzinkaritepaeni nonintashiretanewopaeni, omaanta eero pishinetaari ramatawitemi.

<sup>17</sup> Riraga jeekatsiri Jenokinta riroperori, ikamintahaoperotakae. Opoña maawaeni kameethatatsiri janta Tajorentsi. Tema irira Pawapero rirotaki wetsikiriri kashiri eejatzi ompokiropaeen eejatzi oorya kitejitakotantatsiri. Tee ipaashinitzi riori, tee roepithokiro oetarika ikantziri, ashi royoiro iñaawaetzi ikenkithashiryaa kameetha.

<sup>18</sup> Ipakae iñaani rowaga kyaaryooperotatsiri. Aapatziyawori rootaki ikowantakari Tajorentsi asheninkatyaaari tema rootaki reentsitetantakaeri. Tema rowawijaakotakae, iroñaka ashi oyiro akameethatantakari. Eejatzi eekiro riyatatyee reentsitetyaari oshekiniroña paashinipaeni atziri, ashi royoiro ikameethatantanakyaari.

### *Paapatziyaperotyaawo okantziri Iwaperite Tajorentsi*

<sup>19</sup> Noyemijantzinkaritepaeni, tema eeroka nonintashiretanewopaeni, rootaki nokanantakimiri iroka eero pipeyakotziro: eero intsipaete piñaawaetashita oetarikapaeni pikenkithashiryaaari eeroka; inta okameethatzi pikowanaki pikemaperotero Iñaani Tajorentsi. Eejatzi eero pikijita intsipaete.

<sup>20</sup> Pikiyyaarka, ¿piitashitama inimotakiri Tajorentsi? Tee inimotziri, eejatzi eero amitakotzimi pikameethashiryaantyaaari.

<sup>21</sup> Rootaki nokanantakimiri: eero pompetawo kaari kameethatatsi pantawitakari, eero papiiteero panteero. Eejatzi eero pikenkithashiryaaanaawo kaari kameethatatsi. Pookaperotero maawaeni pikameethashiryaaantaperotaneeyari. Paapatziyawo kameetha okantziri Iwaperite Tajorentsi, rootaki omatanteemiri owawijaakoteemi.

<sup>22</sup> Pikemijantaperotero Iwaperite Tajorentsi okantzimiri: eerokya apatziro pikemashitawo, panterorika iroka pamatawitashita apaniroeni eeroka. Tee okameethatzi pikemashityaaawo, inta pantaperotero.

**23-24** Ninkarika kemashitakawori Iwaperite Tajorentsi ikimiwitakari aminapoowitachari ūaarontsikira, raminapoowitakawo ipoo riyotantyaari tsikarika ikantaka, omaanta aririka ryaatanee tee ikenkithashiryaaaneero, ipeyakotanakiro tsikarika okanta ipoo. Ari ikimita riraga kemashitawakawori Iwaperite Tajorentsi, ikemawitakawo tsikarika ikantari, omaanta aririka ryaatanee tee ikenkithashiryaaaneero, ipeyakotanakiro, ratsipetashitakawo ikemawitakawo, rooma tee ikemijantaperotziro.

**25** Rowaga Iwaperite Tajorentsi okameethaperotaki. Rootaki okameethatantari eekiro aatatye añaanatapiintero oetarika okantziri. Aririka añaanatapiintero maawaeni kitejiriki, eero apeyakotantawo okaatzti okantziri inta eekiro aatatye antero rootaki ramitakotanteeri Tajorentsi maawaeni okaatzti antziri. Itajonkawentee, rootaki akimoshiretanti.

**26** Enitatsirika atziri iitakaawitachari raapatziyakari rirori ikante; "Naaka kemijantzinkaripero", omaanta eeniro ikijathatapiintziri paashinipaeni atziri, tema ramatawitashitaka apaniroeni. Tee ikyaryoowentaperotziro ikantziriri Tajorentsi, inta ratsipetashitakawo, raapatziyajeempiyaakawo. Tema ikowakaakae riraga Tajorentsi eero ashintsithatziri asheninkapaeni.

**27** Aapatziyaaperotakyaaririka aritaki aneshironkatakiri ookaarewo, riraga ookawentayitanakaririni rinironi eejatzirika iririni, eejatzzi okamapithatantakaririni ririno eejatzzi ashitariri. Eejatzzi aapatziyaperotakyaaririka aritaki aneshironkatakiro roori kamaentsirini oemi. Eejatzzi eero apiyakotawo akenkithashiryagaero kaari kameethatatsi. Tema rootaki ikowakagaeyakaerini Tajorentsi.

## 2

### *Kameetha pinintaperotawakagaeyaani maawaeni*

**1** Rooma iroñaka, noyemijantzinkaritepaeni, paapatziyakari Awinkatharite Jesokirishito, riraga anaakoperotakaeri maperori ikameethaperotaki. Rootaki nokanantkimiri kameetha pinintaperotawakaeya maawaeni. Tee apatziro ikowakaemiro pikaminthaaipiintashityaari ashaagantachari, omaanta eejatzzi ikowakaakimi pikaminthayityaari riraga kaari ashaagantachari. Eero pimanintashiriiri paashinipaeni atziri.

**2** Noshiyakaawentemiro. Aririka pipiyoteeyani ipokapaakirika apite atziri, apaani kithaatawori iithaari rooperori pinaperotachari eejatzzi ikyaaantakari raniiyote rakoki pinaperotachari, omaanta paashini owashironkaenkari, antyashipawopookitaki imaatha;

**3-4** aririka eeroka pipashiwentakaawakyaaririka owashironkaenkari eerorika poejeekawakiri kameetha, pimanintawakiririka pikantashitakyaaririka: "Ari pikatziyapae jaga". Teerika paakameethatawakiri kameetha, omaanta pikantakotashitakari pipinkathatawakiri riraga ashaagantachari kameetha poejeekantyaari jeekamentotsi kameethari, ḷkyaryooperotakima paapatziyaperotakari Tajorentsi? Tee. Tee okameethatzi iroka, rooma tee paakameethaperotawakiri owashironkaenkari kameetha. Pantakiro kaari kameethatatsi, rooma pimanintawakiri owashironkaenkari pajankanekira.

**5** Pikemaperotawakina, noyemijantzinkaritepaeni. Tema riyoyaaperotakiri Tajorentsi riraga kaari ashaagantachari raapatziyaperotantyaariri rirori, kameetha ijekanteeyaaari iinja janta okameethaperotzinta. Tema rootaki ikantzitakarini: "Nojeekakagaeyerini jaka nonampiki maawaeni nintaperotanari".

**6** Omaanta eeroripaeni pimaninteeeyakirini riraga kaari ashaagantachari-paeni, apatziro pipinkathatasitakari ashaagantacharipaeni. Rioma riowitaka irintapaeni amatawitapiinteeeyakimiri kaari pinaperotzimiri pantawaeroki kameetha. Tema eejatzi rirotaki aapiinteeyimirini romonkyaaantemi omonkyaaagamentotsikinta.

**7** ¿Kaarima irintapaeni kantzimatapiintziriri Jesokirishito? Jee, kyaaryo, omaanta tema irira ikameethaperotaki, rirotaki kaminthagaeyakimiri. Tema tee okameethatzi pimaninteeeyerini paashinipaeni atziri.

**8** Eenitatsi rojankinatakotziteetakaririni ikantakirini Jesoshi. Ikantakini: "Pikaminthaaperoteri maawaeni atziri. Pikimitaaga pikaminthaaperotaaga eerokakya, eejatzi pikimiteri riraga paashinipaeni atziri pikaminthaaperoteri". Pimonkaaperotakirorka iroka, kameethaperotaki.

**9** Omaanta teerika pikaminthaaperotziri maawaeni atziri inta apaani-paeni pimanintakiri, ari pantakiro kaari kameethatatsi, tee pimonkaatziro ikantakiri Tajorentsi.

**10** Pimonkaatakirkami maawaeni okantziri rojankinarini Moeseeshi omaanta eenitatsirika apaani kaari pimonkaatzti, tema eejatzi pantakiro kaari kameethatatsi, kimitaka iroñaaka tee pimonkaataneentziro eechonki-ini apaani.

**11** Rirojazziita Tajorentsi kantatsiri: "Eero piñaaminthatziro tsinani kaari payi, eero piñaaminthatziri shirampari kaari payi". Eejatzi ikantzi: "Eero powamaantzi". Teerika piñaathatawo tsinani, teerika piñaathatari shirampari, omaanta powamaakiririka atziri, teekya pimonkaatziro ikantakiri Tajorentsi, eeniro pantakiro kaari kameethatatsi, tema pipiyathatakari rirori.

**12** Kyaaryo ikantakowentemini iinja Jesokirishito, pimonkaaterorika okaatzti ikowakaakimiri. Rootaki kameetha pipinkathantyaariri Tajorentsi, apatziro pikenkithashireeyawo kameethatatsiri, eejatzi powameethapinto maawaeni pantziri.

**13** Teerika pineshironkapiintziri paashinipaeni atziri eero ineshironkatzimi eeroka Tajorentsi. Omaanta pineshironkaperotakiririka paashinipaeni, tekatsi pikantya pithawantyaari Tajorentsi aririka iinja areetapaakya kite-jitatsiri ikantakowenanteeyaaririni maawaeni atziri ninkarika kameethateentsiri.

### *Kyaaryooperotakirika aapatziyaperotakyaari Tajorentsi aritaki amatakiro ikowakaakaeri*

**14** Pamine, noyemijantzinkaritepaeni, eenitatsirika kantashiwaetachari: "Naaka aapatziyaperotarotari Tajorentsi", omaanta teerika rantziro ikantziri Tajorentsi, ¿kyaaryooperotakima raapatziyaperotakari? Tee raapatziyaperotari. ¿Aritakima rowawijaakotakiri Tajorentsi kantashiwaetachari: "Naaka aapatziyariiri Jesoshi?" Eero.

**15** Oshiyakaawentero aririka piyotawitakya iroñaaka okoetyeemotakari piyemijantzinkarite, tee otzimimotziri iithaari eejatzi rowanawo.

**16** Eerorika pineshironkatziri, piñaawitakirira pikantashitawakyaaririka: "Piyaatera kameetha, ari itajonkawentakimi Tajorentsi paata paanteyari piithaari pikithaatyari eejatzi aritaki ipakimi powanawo paata poyaari". ¿Piitakaawitakama kameetha paapatziyaperotakari Tajorentsi? Tee paapatziyaperotari. Omaanta pantakiro kaari kameethatatsi: rooma tee pineshironkatawakiri thonkatakotachari.

**17** Ņaakiro, riraga maawaeni kantawaetashitachari: "Nameentakari Jesokirishito", teerika rantziro ikantziri Tajorentsi, tee kyaaryo rameentaperotari, ratsipetashitakawo ikantzi: "Nameentakari Jesokirishito", tema tee ineshironkaperotziri owashironkaenkarai.

**18** Eejatzi eenitatsirika kantemini: "Paapatziyashiwaetakari Tajorentsi eerori, omaanta naari nantakiro ikowakaakinari". Kyaaryootaki ikantzi. Eerrika pimonkaatziro ikowakaakimiri riraga Tajorentsi, Ɂtsika okantyaaka poñaagayitantenarini tsikarika pikantaka paapatziyaperotantakariri Tajorentsi? Omaanta naari nomonkaatakiro ikantziri rootaki piyotantakari kyaaryo naapatziyaperotakari.

**19** Pikenkithashireeyari eenitatsi apintzi Tajorentsi. Ari okameethataki, omaanta eejatzi riraga kamaripaeni riyotzi eenitatsi apintzi Tajorentsi, rootaki ithawantaperotakari rompetataka kamaari, tonki, tonki, tonki.

**20** Omaanta eerori kemijantashiwitachari, Ɂtekirama piyoperotziro iroka? Riraga kaari monkaatzirori ikowakaawitariri Tajorentsi raapatziyajeempiyaashitakari ratsipetashitakawo, tema tee rantziro okaatzi ikantawitari. Teerika imonkaaperotziro ratsipetahiperotakawo raapatziyawitari.

**21** Pikenkithashireeri Awaraamani, achariniiteperoni paeraniperoroña. Ikantzi Tajorentsi: "Kameethaperotaki rirori tema raapatziyaperotakina, imonkaataperotakiro nokowakaakiriri". Rootaki ikowantawitakaryaarimi rowamayerimi itomi iitachari Ijaaka. Tema ikantawitakari: "Piwetsikero aritaari janta eejatzi powamayenari pitomi Ijaaka". Ikemijantaperotakiri rirori: rooteentsimi rowamayerimi itomipero roejawenantyaariri, omaanta roojatzi ikanantanaari riraga Tajorentsi: "Eero powamaeri. Iroňaaka niyoperotakini pikemijantaperotakina, rooma pimonkaatakiro maawaeni nokantakimiri". Rootaki iňaaperotantakariri ikameethatzi, okimitaaka tee rantziro kaari kameethatatsi, tema ikemijantaperotakiri rirori.

**22** Ņaakiro, Awaraamani tee apatziro ikemashitari Tajorentsi ikantakiriri, inta ikenkithashireperotantakawori, maperori imonkaaperotakiniri ikowakaakiriri. Rootaki ayotantakariri kyaaryo raapatziyaperotakari, tema imonkaaperotakiniri kameetha Tajorentsi.

**23** Rootaki omonkaatantakari jankinarentsi paerani Iwaperiteki Tajorentsi okantzi: "Awaraama raapatziyaperotakari Tajorentsi rootaki ikanantakari: 'Iroňaaka rirotaki Awaraama notsipaminthatanewopero. Noňaaperotakiri ikameethatzi, rooma okimitaaka tee rantziro kaari kameethatatsi'".

**24** Ņaakiro, apatzirorika akemashitaworika ikantziri Tajorentsi akemijantashitaririka eero iňaaperotee akameethatzi. Ari ikantakowentee eenitatsi kaari kameethatatsi antakiri. Omaanta eejatzi amonkaaperoterorika ikowakaakaeri, ari kameetha aapatziyantaperotariri, aritaki kameetha iňaaperotee akameethatzi, eejatzi ikantakowentee kimitaka tekatsi antakiri kaari kameethatatsi.

**25** Eejatzi okimitaaka paeraniperoroña roorini Raawa. Ametakawo oňaaminthatapiintawitakarini shiramparipaeni, ipinatanteeyakaworini janta Jerikooki. Omaanta okemakotakirini Tajorentsi, iroňaaka okowanaki aapatziyaperotyaari, rootaki okaminthaanteeyawakaririni rotyaannewopaeni Joshoe tee akaantziri inta omanawakiri. Roojatzi oňaagantawakari paashini awotsi ikinantanakyaari riroripaeni ishiyapithatantanakariri kijakiriri. Tema amitakoeyawakirini rootaki oňaagantakariri Tajorentsi okemijantaperotakiri kameetha iroňaaka. Rootaki iňaaperotantakawori Tajorentsi okameethatzi, kimitaka tee antziro kaari kameethatatsi.

**26** Piyoperotaki eerorika aňi tema kamaperotakae, eejatzi okimiwitaaaka

iroka, eerorika amonkaatziro ikowakaawitakaeri Tajorentsi, tee aap-  
atziyaperotari.

### 3

#### *Eerorika pimonkaatziro oetarika piyotaantakiri paashinipaeni, ari iki-jawentawakimiro Tajorentsi*

<sup>1</sup> Pamine, noyemijantzinkaritepaeni, tee okameethatzi osheki eerokapaeni pilkowaki piyoteeri paashini atziri poshiyanteneri naaka. Tema ayotaki eerorika amonkaatziro ayotaapiintakiriri paashinipaeni, eejatzti eerorika ayotagaeyirini kameetha, roojatzti omonkaatantaakya kitejiri ikantakowenanteeri Tajorentsi antakirorika kameetha rooma teerika antziro. Tema aritaki ikantakae: "Pamine, osheki piyotaapiintawitakari paashinipaeni. ¿litaka kaari pimonkaatantawo eerori piyotaawitakariri? Okameethatemi pityaaawomi eerori pimonkaatero pikantakiriri". Okameethatawita pimonkaatero piyotaawitakariri.

<sup>2</sup> Maawaeni akaa antapiintziro kaari kameethatatsi. Omaanta eenitatsirka kaari ñaawaeteroni kaari kameethatatsi, tema rivotaki kameethaperotzinkari, riyoperotakiro rantapiintakiro kameethatatsiri, oetarika rantay-itakiriri.

<sup>3</sup> Pamine, pikenkithashiryaakotyaari antari kawayo: osheki ishintsini, omaanta amatakiri atzimpatakotziri jookathaki ipaanteki, kameetha ikemijanantyaawori inoshikakomento omawitya okantaka owaanini ijoockathate.

<sup>4</sup> Eejatzti okimitaka rowaga antawo pitotsi. Antawo inawita, omaanta aawyaakiro oshintsinka tampyaa otyaantakiro. Omaanta ontsiritziriorira rawayaantakawo owaanini komarontsi rontsiritantakawo raanakiro tsikarika ikowakawo ryaate.

<sup>5</sup> Eejatzti okimita roori aneni: owaanini okantawita; omaanta osheki antakagaeri oetarikapaeni: rootaki ayotaantyaariri atziri. Tema rootaki apaante akijantariri paashini atziri. Okimitakawo paamari aririka atayiro owantsi. Othonkaperotakiro maawaeni otaanakiro okaatzira owantsi. Omaanta okaatzini paamari itantakawori.

<sup>6</sup> Iroka apaanteka okimitakawo paamari. Otzinkamitakawo kaari kameethatatsi. Tema rivotaki riraga Jatanaashi iyotaakaerori añaawaetantawori kaari kameethatatsi. Eechonkiini akantawakaaneentakya oetarikapaeni amatakiro owaariperotawakaeyakan.

<sup>7</sup> Amatakiro aakapaeni ametakaari piratsipaeni: riraga tsimeripaeni, maankipaeni, shimapena, maawaeni. Eejatzti amatakiro aspiratakari rametantakaeri kameetha.

<sup>8</sup> Omaanta tekatsi materoni ojantzikaeroni ipaante. Rooma kaari imateetziro rojantzikagaetziro. Rootaki kaari amatantawitawo apaniroeni añaawaetapiintero kameethatatsiri. Eejatzti okimitakawo koñaapi, aririka irakiro aritaki owamaakae. Ari okimitaka roori apaante antakaerorika kaari kameethatatsi owashironkaakae, eejatzti owashironkaantakari paashinipaeni atziri.

<sup>9</sup> Añaaperotantapiintakari Pawa Tajorentsi iroka apaanteka akimoshirewentakiri, omaanta eejatzti rootaki akantzimatantapiintariri atziripaeni omawitya riwetsikakae Tajorentsi maawaeni akaa akimiwitakari rirori.

<sup>10</sup> Apinto apaante añaawaetantawori kameethatatsiri eejatzti añaawaetantzitawori roori kaari kameethatatsi. Eejatzti rootaki akimoshirewenantariri Tajorentsi, eejatzti akijathatantariri atziripaeni. Noyemijantzinkaritepaeni, tee ari okantakotyaari; okaanteekaata.

<sup>11-12</sup> Noshiyakaawentemiro. ¿Arima omatakiro iyowaatee iñaa apaani omookira otsipatyawo kameethatatsiri eejatzti kachotatsiri? Eero

omatziro. Eejatzi ḥarima ochochokitanaki ashetoona iyelerakira eejatzi ochochokitanaki iyeera oowakira? Eero. Eejatzi akimitya aka akyaryootanakirika akameethashiretanaki, apatziro añaawaetapiintanakiro apaanteki kameethatatsiri; eero atsipatayiro añaawaetzitawo kaari kameethatatsi.

### *Ikenkithatakotakiro iyotaantsi*

<sup>13</sup> Eenitatsirika apaanipaeni eerokapaeni yotzinkari, pikemaperotakirorika tsikarika pikantya kameethate, ari kameetha pijeeki; eero pikantakaaperota eerokakya inta pinintashireperoteri kameetha paashinipaeni. Rootaki riyotanyaari paashinipaeni kyaaryo eeroka yoperotzinkari.

<sup>14</sup> Omaanta pikijashireperotakiririka paashinipaeni, pikowashitakarika panaakoteri piyotzi, eero pikantakaaperotakya tema piyotaki tee okameethatzi pitheeya pikanantyaari: "Naaka yotzinkari".

<sup>15</sup> Kaari Tajorentsi iyotaayimirori panantyaawori kaari kameethatatsi, rooma opoñaaka oetarikapaeni pikenkithashiryaari pajankaneekira: aririka pikenkithashirepiintakiro oetarikapaeni kaari kameethatatsi, rootaki panantyaawori. Rivotaki iwinkatharite kamaariipaeni kenkithashiryaakaakimirori pikenkithashiryaantawori pantero kaari kameethatatsi.

<sup>16</sup> Naakiro, aririka piñaawenatakotakari eejatzi aririka pikijashiryaawakaya pikantzimashiryaawakaaka, rootaki pikijantapiintawakaakari eejatzi panantapiintakawori kaari kameethatatsi rootaki eero pijeekanta kameetha.

<sup>17</sup> Omaanta rivotaki Tajorentsi ipantakimirori iyothanitaantsi, ikowakaakimi pikameethashireperotanaki, eejatzi ikowakaakimi aritapaaki pikija, eejatzi petakoperotyaari paashinipaeni, pathaagakotyaari. Otarika ikantemiri, eejatzi ikowakaakimi ashi poyiro pineshironkapiinteri maawaeni, eejatzi kameetha pamitakoperoyerini paashinipaeni, eero pimaninteevirini apaanipaeni inta pinintaperoteeyerini maawaeni, eejatzi eero pamatawitantzi.

<sup>18</sup> Noshiyakaawentemiro: apankiterika oetarikapaeni aritaki owiiteero apankitakiri. Eejatzi okimita iroka aririka kameetha aneshironkateri paashinipaeni atziri aritaki ajeekanaki kameetha maawaeni.

## 4

### *ꝝlitaka kaari pikowanta pikaminthaapiinante?*

<sup>1</sup> ḥTsika opoñaaka pikijawakaapiinteeeyantarini? Tema opoñaaka inthomaeki pajankaneeki pikowashiryaantaworini oetarikapaeni, rootaki pikijawakagaeyantakarini roojatzii pikowantyaariika powamaawakaeyantyaarini.

<sup>2</sup> Pikowaeyawitakawoni rashaagawopaeni paashinipaeni teera pimatziro payi pikowaeyawitakarini, rootaki pikijawakaanteeyakarini eejatzi powamaawakaanteeyakarini. Pikowaeyawitakawoni pikimitakotyaarimi paashinipaeni tzimimotayitziririni. Omaanta tee pagaeeyironi rootaki pikijawakaantapiintakari. Rootaki kaari paantaatawo pikowawitakari, tema tee pikantaperotziri Pawa Tajorentsi ramitakotemi piñeero tzimimowitemiri pikowawitari.

<sup>3</sup> Pikanterowitakari, omaanta rootaki kaari piñaantawo pashitari paaperotantawo, tee okameethatzi pikantaperowitariri. Apatziro pikowashiwitaka pikamintheeya eerokakya.

<sup>4</sup> Pikimiwitakawo tsinani kaari kinatari oemi, inta osheki oñaathatzimotari oemi paashinipaeni shirampari. ḥTema piyotzi pikimoshirewentakirorika

rantziri kaari kemijantatsi kimitaka poonakari Tajorentsi? Rootaki nokanantakimiri iitarka kowatsiri ikimoshirewentero okaatzi rantziri kaari kemijantatsi, rirotaki oonakariri Tajorentsi tee raapatziyaperotari.

<sup>5</sup> Tee okantashita rojankinatakoetakirri Tajorentsi okantaki: "Riraga Tajorentsi rotyaanatakaeniro Ishire jeekantakaerika iroñaka ajankaneki, osheki oneshironkaperotakae kameetha. Okowakaaperotakae apatziro akimitakotyaari rirori".

<sup>6</sup> Omaanta Tajorentsi ikamintaahaperotakae, ramitakotakae ashintishire-tantanakari. Rootaki okanantakari Iwaperite Tajorentsi: "Roonari Tajorentsi riraga kantakaaperotachari, omaanta ineshironkaperotziri riraga athaagakotariri oetarika ikowakaakari".

<sup>7</sup> Rootaki pathaagakotantyaariri Tajorentsi maawaeni ikowakaemiri panteri, omaanta iwindikatharite kamaaripaeni pipiyathatyaari oetarika ikowakaawitemiri rantakayemiri. Aririka pipiyathatyaari aritaki rooka-neemi.

<sup>8</sup> Pikenkithashiryaaapiinterikya Tajorentsi pameentyaari. Irira kijokiro rowantemiri. Pantawitakawoni kaari kameethatatsi; iroñaka pookaero maawaeni iroka eejatzi pijeekeeteyari kameetha. Osheki pitheenkakirini Tajorentsi; pikanteri iroñaka: "Pawa, nantakiro kaari kameethatatsi, niyotzi tee okameethatzi, tee nokoyi napiitero, pipeyakotenawo. Powameethashiretena, pikenkithashiryaaakagaenawo kameethatatsiri".

<sup>9</sup> Pikenkithashiryaakoproteeya oetarika pantakiri, powashire-takota, rooma tee okameethaperotzi maawaeni pantapiintakiri. Pishirontawenteeyakawoni kaari kameethatatsi, omaanta okameethatzi powashiretakota; pikimoshirewentashitawo kaari kameethatatsi, omaanta okameethatzi powashiretakoperotanakya.

<sup>10</sup> Eero pikantakaaperota inta pikanteri Awinkatharite: "Pineshi-ronkatena, tee nomatziro naari nowameethatya, inta eeroka materoni pamitakotena". Pikantaperoteririka iroka ari ineshironkatemi iñaaperotemi pikameethatzi.

### *Eero pikantakowentziniri paashini atziri*

<sup>11</sup> Eero pikantzimatatakagaeyani, noyemijantzinkaritepaeni. Pikantzmateririka atziri pikanterika: "Eeniro pantani", tee paapatziyawo ikantakiri Jesoshi: "Pinintaperotawakagaeyani", omaanta pikimitashitakari pinkathariwenantatsiri pikantakowentashiteeyakarini piyemijantzinkaritepaeni. Omaanta tee ikowakayimiro Tajorentsi pantero iroka. Tema pitheenkakiro okaatzi ikantakiri Jesoshi; tee pimonkaatziro.

<sup>12</sup> Omaanta apaniroeni riraga Tajorentsipero rirotaki kantatsini oetarika kameethatatsiri anteri; eejatzi apaniroeni irira rirotaki kantakowenterini paashinipaeni rantzirorika kaari kameethatatsi rowashironkaantyaariri. Tekatsi paashini kantatsini. Irira apaniroeni matakirori rowawijaakotakayeri aapatziyakariri Jesoshi, eejatzi apatziro rirori kantakotanteentsiri kaari aapatziyariri Jesoshi rotyaanteri paamariki kaari tsiwakanitatsini. Rootaki üitaka pikantakotantakariri eerori paashinipaeni powashironkaantakariri? Tema fee ikowakayimi eeroka pantero.

### *Kyaaryoowa, tee piyotzi oeta awijimotemini inkaamani*

<sup>13</sup> Pikemaeyawakinani, eerokapaeni kantashiteeyawitacharini: "Iroñaka eerrika inkaamani aate janta nampitsikinta, ajeekakite janta apaani ojarentsi ayompariwaetakityataa, ayeeta oshekini koriki".

<sup>14</sup> Omaanta tee okameethatzi pikantashitya iroka: tema tee piyotzimaetawo oetarika awijaneentsini inkaamani. Tema pikimiwitakawo

menkoreenkaki, eechonkiini omenkoritzi omaanta tee ojamanitzi othaty-eetyaanaki. Eejatzi aaka maawaeni ari akimitaka, eechonkiini añaawitakya, omaanta eero ojamanitzi tsikarika okaate akamantyaari.

<sup>15</sup> Ņaakiro, tee okameethatzi pikimitakaantashitya eeroka añaashitacha apaniroeni, tee pikenkithashiryaakotari Tajorentsi, omaantakya kameethatatsiri pikante: "Ikowakaakaerika Tajorentsi eeniro ajeeki jaka kipatsikika, aritaki antayitakironi oetarikapaenì akowayitzirini".

<sup>16</sup> Omaanta eekiro pikantakaaperothatasitanaka eejatzi piňaaperotashitaka eeroka apaniroeni. Iroka pantakirika tee okameethatzi.

<sup>17</sup> Ninkarika yotawitakyaawoni kameethatatsiri ikowakaakiriri Tajorentsi omaanta tee imatzimaetawo, eeniro rantzimaetawo kaari kameethatatsi.

## 5

### *Ikantakiri ashaagantachari*

<sup>1</sup> Iroňaaka pikemero okaatzi nokantakotakiri riraga ashaagan-tacharipaeni, riraga kaari aapatziyariri Jesoshi. Tema okameethatzi ikenkithashiryaagaeya, eejatzi riraakotya, tema rantakiro kaari kamethatatsi. Aririka omonkaatapaakya kitejiri ikantakowenantyaariri Tajorentsi. Eerorika ipakaero rantziri, aritaki ikemaatsitakyaawo paamari.

<sup>2</sup> Maawaeni okaatzi tzimimotziriri opathaawaetashitya, eejatzi ari ithonkiteeyeerini jankori iithaaripaeni.

<sup>3</sup> Osheki ipinaperowitaka tzimimotayitakirini, ikimita roorote ee-jatzi ipiraatate ipitsimentakataawaetashitakari. Aririka ipitsimentakiyanakini roojatzi riytantanakya ratsipetashitakari ikempoyaawitakari. Rootaki okantakotziri iroka: tee ramitakotanteeyarini ashironkaenkaripaeni tzimimoeyawitarini; rootaki riyaatanteeyaaari paamariki kaari tsi-wakanitatsini.

<sup>4</sup> Pamine, ramatawiteeyakirini ratziritepaeni, tee ipinatziri rootaki ikiňaanikowenanteeyakaworini rantawaero, raantzitashiteeyakarini. Rootaki ipiyotantakawori osheki rowaagawo eejatzi iyorkite. Riraga Tajorentsi riytakiro maawaeni iroka okaatzika rantakagaeyakirini: tee ineshironka-teeyirini; rootaki paata rowashironkaantyaariri. Rirotaki Iwinkatharite maawaeni ronampiripaeni jenokinta.

<sup>5</sup> Ikenkithashiryaakotashitaka irira apaniroeni, tee ikenkithashiryaakotari paashinipaeni atziri, iweshiryaaawentashitakawo rashaagawopaeni ikowakirika jaka kipatsiki. Noshiyakaawentawakimiro: eenitatsirika atziri iwaakate ikoyiri rowamaeri intsipaete, tekirarka rowamaeri, eekiro rowakaatyaaari osheki paashito kameetha. Ikantaka iwathatapaaki. Riraga waaka kameetha rowa, tee ikenkithashiryaakota tsika okaatzi ikamantyaari. Roojatzi romapokashitakari rowamaakiri. Ari ikimitaka riraga Tajorentsi rantziri rirori: tee ikenkithashiryaakotari irira ashaagantzinkari eejatzi paashini atziri. Roojatzi romapokantapaakyaari rirori rowashironkayeri, rotyaanteri paamariki kaari tsiwakanitatsini.

<sup>6</sup> Rowashironkaaperotantakariri kameethatzinkari: tee ipashitzimae-tari koetyemoeyakaririni, rootaki ikamantakari; omaanta tee ikijawitari. Rootaki imaperotantyaariri rowashironkaantyaariri rirori Tajorentsi.

### *Peshiwintero paamayaari Jesoshi pikenkithatakapiainteri*

<sup>7</sup> Omaanta eeroka noyemijantzinkarite maawaeni, omawitya rowashironkaetemi eekiro piyaatatyee paamawentyaari Awinkatharite roojatzi ipokanteeyaa. Pikimitakotyaaari irira pankiwaetatsiri. Piňaakiri, ojamani royaakotziro aririka opariyaantsitapaaki inkaani

ipankiwaetantyaari pankirentsi. Eejatzi rapiitero royaakotawaeroota inkani okithokitantanakyaari kameetha. Roojatzi okithokitantanakya osheki, tema ari riweshiryaaawentanakyaawo ashitawori iwankiri.

<sup>8</sup> Eejatzi pikimitya eeroripaeni, eero pipakaero poyaakotziri Awinkatharite inta pishintshiretanaki paapatziyaperotyaari eero rojamanitzi ipokanteeyaari.

<sup>9</sup> Kaakite Tajorentsi riraga Kantakowenteen, rooteentsi iñaapaakae. Rootaki nakanantakimiri kyaaryoowa rowashironkaetzimikarira. Eero pikiiñaanikowentawakaawo ikantakowentzimirokari eerori. Ikantzimikari: "Enitatsi kaari kameethatatsi pantziri, tee okameethatzi".

<sup>10</sup> Pikenkithashireeri riraga kamanantayitzirorini iñaani Tajorentsi paera-niperoroña. Ikijectakirini rowashironkaetakirini opomeentsitzimotakarini ikenkithatakotzirini Tajorentsi omaanta ikyaaryoowentakiniri tee rookiro raapatziaperotari. Eejatzi pikimitya eeroripaeni pikimitakotyari, aririka rowashironkagaetemi omaanta pikyaaryoowentaperoteniri rirori, eero pookiro paapatziyari.

<sup>11</sup> Ayotaki iroñaaka maawaeni kyaaryoowentaperotakiniriri Tajorentsi kameethatatsiri omawitakya ikijeeifikimirkira, aritaki ikimoshirewentakiri irira. Tema iñaakiri ikameethaperotaki. Tema pikemakotakiri Jooponi paejatziiteni ikyaaryoowentaperotakiniri Tajorentsi oetarika, tee ipakaero raapatziyari omawitya rowashironkaetakiri. Eekiro raapatziaperotanakityaari. Roojatzi riraga Tajorentsi, iñaaperotakiri ikameethatzi: imaperotanakiri ikaminthaaoperotanakiriroña. Rootaki roshekyaantariri iroñaaka rashitayitaarini, anaakotakiro ritawitakari rashitawitakarini paerani. Piyanakira ashi royiro Tajorentsi ikowaperotakikya retakoperotanta eejatzi ineshironkaperotantzi. Rootaki okameethatantari pikyaaryoowentero oetarika pomeentsitzimotemini: pikimityaari Joopo.

<sup>12</sup> Pamine, noyemijantzinkaritepaeni, pikemaperotena. Oetarika pikenkithatakoteri eero pitheeya, piñaawaetero kyaaryooperotatsiri. Aririka pitheeya, erowa pikantashita: "Riyotzi Tajorentsi tee namatawitzimi". Eejatzi eero piñaawaetakotashitawo jenokinta, pikantashitantakari: "Namatawitzimirkira okameethatzi rowashironkaena Jeekatsiri jenokinta". Eejatzi okimitaaka kipatsi, eero piñaawaetakotashitawo pikantashitantakari: "Namatawitzimirkira kameetha rowashironkayenaata ashitawori kipatsi". Piñaawaete kameetha, eero piñaawaetashita. Pikanterika: "Jee, aritaki", pantaperotero pikantakiri. Eejatzi pikanterika: "Eero", eero pantziro. Eerowa pamatawitantzi: aririka pamatawitantaki, rootaki rowashironkaantemiri Tajorentsi.

### *Oetarika pomeentsitzimoteeyimirini, pikenkithatakapiinteri Tajorentsi*

<sup>13</sup> Eniriorika opomeentsitzimotakimi kameetha pamanapiinteri Tajorentsi ramitakotantemiri. Riraga kimoshiretatsiri okameethatzi romampaakowentyaari Tajorentsi pipaasonkitantyaariri.

<sup>14</sup> Enitatsirika mantsiyatinkari, kameetha ikaemakaanteri aataperoteencharipaeni aapatziyariri Jesoshi ramanakotyari Tajorentsi retsiyatatakantyaariri eejatzi itziritapaaakiri eechonkiini iyeenka ikante: "Ari nokowaki retsiyatatakagaemi Awinkatharite".

<sup>15</sup> Ramaneririka rirori Tajorentsi ryioperotakirika kyaaryoopero irira ikemaperotakiri, aritaki retsiyatatakirina mantsiyari, eejatzi aritaki ineshironkatakiri ipeyakoteeniri kaari kameethatatsi rantawitakari.

<sup>16</sup> Rootaki nakananteeyimirini: aririka antakiro kaari kameethatatsi, akamantawakagaeya oetarika antzimotawakagaeyakarini, eejatzi pamaneeyerini Tajorentsi: "Petakoeyenani, netsiyatakanteeyaari. Riraga atziri

rowameethatanewo Tajorentsi, oetarika ikanteriri, aritaki kameetha raap-atziyakaari ramitakoteri tema ari imonkaateero maawaeni ikantakiriri".

**17** Paeraniperoroña Iriiyashi ikimitakae aaka. Ramanaperotakari Tajorentsi: "Eero powariyeero iroñaaka inkaani. Pikenkithashiryakaantyaariri atziripaeni". Okaatzi 3 ojarentsi eejatzzi 6 kashiri tee opariyanee inkaani jaka kipatsikika.

**18** Ņaakiro, roojatzi eejatzi ramaneeri: "Iroñaaka papiiteero powariyeero inkaani", roojatzi opariyantanaa inkani, shookaeyaneeni eejatzi iwankiripaeni maawaeni atziri jaka kipatsikika. Tema apiitanaa okithokitanee. Rootaki thame amanaperoteri Tajorentsi.

**19-20** Piypopertero, noyemijantzinkarite maawaeni, eenitatsirika aapatziyawori kyaaryooperotatsiri rookawitaworika, raapatziyawitakari Tajorentsi, aririka ramitakoteri paashini atziri ikameethataneerika raapatziyeyawonirika, aritaki rawijakotee. Eero ryaatzzi paamariki kaari tsiwakanitatsini, eejatzi Tajorentsi ineshironkateeeri ipeyakoteeniri rantawitakari kaari kameethatatsi.

Ari okaatzi.

Naaka jankinatzimirori:

Jantyaako

## RITAKAWO PEETERO ROJANKINATZINIRIRI IYEMIJANTZINKARITE

<sup>1</sup> Naaka Peetero jankinateeyimironi iroka. Naaka rotyaantanewo Jesokirishito nokenkithatakotziri. Nojankinateeyimironi maawaeni nojoriyotzinkarite, riraga aapatziyeeyaririni Jesoshi, tsiparyaaityaneentsirini janta paashinikipaeni kipatsi owaero Poonto, Karaashiya, Kaparooshiya, Aashiya, Witziinya, maawaeni.

<sup>2</sup> Paerani riyyogaeyakimini Pawa Tajorentsi, tema riyyotzitakotakimini paapatziyeeyarini Itomi. Rootaki ikowantakari itominteeeyemini. Eejatzi owameethashireperotakimi Ishire paapatziyaperoeyantakaririni rirori: ikamawenteeyakimini, rapaatawenteeyakimini riraa rowawijaakotantakimiri. Nokowaki ineshironkaperoeyemini, eejatzi kameetha ijekakaaperoeyemini.

### *Thame apaasonkiteeyerini Tajorentsi, tema ineshironkaperoeyakaeni*

<sup>3</sup> Thame akamantteeyerini atziripaeni: "Ikameethaperotaki Tajorentsi: riraga Iriri Awinkatharite Jesokirishito". Ineshironkaperoeyakaeni, rashiteeyakaeni: okimiwitaka owakira añaagae eejatzi, rootaki ashengkatantakariri. Ipiriinteeri Itomi, rootaki ayoteeyantakarini apiriinteyaneeni aaka, akanteetatyeyaaani añaagayapaeni janta jenokinta.

<sup>4</sup> Eeniyo riwetsikaeyakimironi pijeekaeyantapaeyaarini janta jenokinta. Okanteetatyeyaaani ashi oyiro ojeeki, okameethaperotaki, eero othonkanita, eero opathagae, eero opaashinitzi, eeniyo ikempoyaakimiro janta.

<sup>5</sup> Paapatziyeyakarini Tajorentsi, rootaki itajonkakowenantakimiri; ikempoyeeyakimini itajorenkaki roojatzi ipokanteeya Jesoshi. Roojatzi piñeeyeroni maawaeni riwetsikaeyakimiri.

<sup>6</sup> Kyaaryo, aririka opomeentsitzimoeyemini oetarikapaeni iroñaaka, omaanta eero ojamanitzi roojatzi piñeeyeroni pinampi janta jenokinta. Aririka pikenkithashiryaaakotyaawo iroka, tema tempikimoshirewentaperotziro osheki.

<sup>7</sup> Pamine, riraga wetsikirori ooro iwyaaganaka paamariki, roojatzi rookantakyaawori ipachaarite. Roojatzi ijekanaki apaniroeni ooro kameethaperotaki. Eejatzi ikimitaka irika, riraga Tajorentsi iñaantapiinteeyakaeni riyatantyaari aapatziyaperotakaririka. Rootaki opomeentsitzimotanteeri oetarikapaeni eejatzi eekiro aatatye ameentaperotakari Jesokirishito eejatzi eekiro aatatye ajeeki kameetha aritaki iñaaperotakae akameethatzi, tema aapatziyaperotakari. Roojatzi, aririka ipokae, ikanteeyapaakaeni: "Noñaaperoeyakimini pikameethatzi: pikaateeyenani janta jenokinta, pitsipateeyenani apinkathariperoeyini". Naakiro, riraga ooro, osheki ipinawitaka, omaanta ari ipeyeeyaa; rooma aaka aapatziyakari, eero apeya.

<sup>8</sup> Iroñaaka tekira piñeeyerini, omaanta pinintaperoeyakirini, paapatziyeyakarini, pikimoshirewentaperoeyakirini osheki. Tee pimateeyeroni pikanteri paashini atziri tsika okaatzika pikimoshirewentaperotziri rirori.

<sup>9</sup> Pameenteeyakarini, rootaki rowawijaakotantakimiri, pisheninkatan-teeyakaririni.

<sup>10</sup> Paerani riraga kamanantayitzirorini iñaani Tajorentsi ikowaeyaw-itakani riyotemi tsika akantyaari awijakotanteeyaarini. Rojankin-natakotawitakarini Tajorentsi rowawijaakotantzi, riyoteeyawitakani ineshironkatantzi, omaanta tekira riyoperotzini kameetha.

<sup>11</sup> Enitatsi iyotagaeyakiririni Ishire Jesokirishito, omaanta tee riyotakoperoeyawakironi. Iyotaakirini, okantzi: "Osheki ikemaatsityaa wo Rotyaantanewo Tajorentsi, eejatzi ikame; roojatzi ipinkatharitanteeyaari". Ikenkithashireeyakani: "¿Ninkama okantakotziri? ¿Tsika okaateka ipinkatharitanteeyaari?"

<sup>12</sup> Omaanta ikamantakirini Tajorentsi: "Eero piñiiri eerori, omaantakya riraga ñiiri rirotaki impaetatsini ijeki inja". Tema aaka iroñaaka ikenkithatakotzitakae. Iroñaaka otyaantakina Ishire nokenkithatakagaeyakimini, nokamanteeyakimini rowawijaakotantzi Jesoshi, riraga Rotyaantanewo. Tema ikowaperoeyawitakani ronampiripaeni rirori riyotaperotero tsika akantyaari awijakotantyaari.

### *Pikameethataperoeyanakini*

<sup>13</sup> Rootaki iroñaaka pikenkithashiryanteeyarini, kameetha pijeekaeyeni. Piyoteeyeni aririka ipokae Jesokirishito afleeyawaerini, eejatzi osheki ineshironkateeyapaakaeni; ari pikimoshirewenteeyawakirini.

<sup>14</sup> Tema irira Tajorentsi ashiteeyimirini. Iroñaaka paapatziyaperoeyarini. Paerani tee piyoteeyawitarini, rootaki panantawitaworini kaari kameethatatsi. Iroñaakkya piyoteeri: eero papiiteero pikimitaa paerani.

<sup>15</sup> Ikameethaperotaki riraga iyoyagaeyakimirini rowawijaakoteemi: iroñaaka pikimifakoeyarini rirori pikameethate, powameethatayitaperoteroni maawaeni pantayiterini.

<sup>16</sup> Tema paerani rojankinateetakironi iroka ikantzitakarini Tajorentsi: "Nokameethaperotaki naari, rootaki nokowakaantakimiri eerori, pikameethaperotanaki".

<sup>17</sup> Ari iroñaaka piriteeyakarini: okameethatzi piyoteeyeni riyoteeyakimini maawaeni pantziri, ithotyeeyakimini. Rírotaki kantakowentemini, ikenkithashireeyeroni tsikarika okantari maawaeni panteeyakirini. Okameethatzirika, ari imatero iñaaperotemi pikameethatzi. Rooma teerika okameethatzi pantayitzirini, rowashironkaemi. Rootaki okameethatantari iroñaaka pipinkathateeyerini, kameetha pijeekaeyeni roojatzi pareetanteeyaarini jenokinta.

<sup>18</sup> Tema paerani patsipetashitawitakawoni pantashitayitawitakawoni rameteeyarini ajoriiyotzinkariteni, omaanta rowawijaakoeyakimini Tajorentsi. Tee ipinakowenantzimiro thonkanitachari ikimita koriki eejatzi ooro rowawijaakotantakimiri.

<sup>19</sup> Intaky rotyaantakiri Itomi, riraga inintaperotanewoka. Ikamawen-takimi rirori, apaatawentakimi riraa pawijakoteeyantaarini. Rameteeyawoni ajoriiyotzinkarite rantakirorika kaari kameethatatsi, rowamayiniri Tajorentsi ówisha kameethaperotatsiri, itaakiniri eero ikenkithashiryantanawo rantakiri. Apatziro rowamaakiniri kameethaperotatsiri ówisha. Eejatzi ikimitaka riraga Jesokirishito, osheki ikameethaperotaki: tekatsi rantani.

<sup>20</sup> Paeraniperoroña, tekirani ojeekini kipatsi, ikantzitakarini Tajorentsi: "Notyomi, iinja notyaantemi eeroka kipatsiki, powawijaakoeyerini atzipaen". Ari iroñaaka ipokantapaakari rowawijaakotapaakae.

<sup>21</sup> Kyaaryo ipokaki, ikamawenteeyakaeni, roojatzi ipiriinteeri Tajorentsi, raaneeri eejatzi janta okameetheetyeenta. Omaanta eeniro ijeki jika osheki riyotaakotakaeri Iriri. Rootaki iroñaaka piyoteeyantakarini kyaaryo

ineshironkaperoyakimini, eejatzi pameenteeyakarini, piyoteeyakini riro-tak jeebakagaemini janta jenokinta.

<sup>22</sup> Ari pikemijantaperotakiro maawaeni kyaaryootatsiri riyo-ta-gae-yakimiri Tajorentsi, tema okameethaperotaki maawaeni ikantaki. Iroñaaaka rowameethashireeyakimini, eejatzi ikowakagaeyakimini pinintaperoyerineri maawaeni piyemijantzinkarite. Pikyaaryoo-wentero, pinintawakaaperoyaani kameetha.

<sup>23</sup> Rooma paerani otzimimi piniro, ari iroñaaaka pikimiteeyakarini ashitzimiri, pikamaeyeni eerori. Omaanta paapatzyaperotakawo iñaani Tajorentsi, kaari thonkanitachani. Rootaki rashiiteeyantakimirini, rootaki pikimiteeyantaaririni riori: pikanteetatyeyaani pijeeki jenokinta.

<sup>24</sup> Tema okantzi Iwaperite:

“Eero akanteetatyaaani aña jaka kipatsiki, akimitawo inchashi intsipaete ojampiye. Eejatzi maawaeni okaatzi akenkithashiryaa-witari rooper-otayitsirini, eejatzi okaatzi antayitzirini, ari othonkaeya.

Okimitakawo oteyaki inchashi, intsipaete ojampiyashitzi, opariyanaki, opathaanaki.

<sup>25</sup> Omaanta okantyaani ojeeke iñaani Awinkatharite: eero opeya roori”.

Rootaki iñaani niyotagaeyakimirini: ineshironkateeyakaeni Tajorentsi, rowawijaakoeyakaeni. Tema okameethataki.

## 2

<sup>1</sup> Rootaki iroñaaaka pookanteeyawori maawaeni kaari kameethatatsi: eero pikijantzi, eero pamatawitantzi, eero pikenkithashireeya pikameethatzi teerika pimonkaatziro okaatzi pikantziri, eero pikijakoneentari paashini atziri teerika pimonkaatari, eero pitheeyawentashitari paashini powakaanantyaariri fiagaantsipaeni.

<sup>2</sup> Riraga owakira koñaatapaentsi eentsi apatziro ithotapiintziro oteni riniro, rootaki ikimotatantari intsipaete. Eejatzi iroñaaaka eerori, pikowaperotero Iwaperite Awinkatharite: piñaanatapiintero, pikenkithashiryaa-pintyawo, piyoperotantyaariri kameetha riori, oshintsiperotantyaari pishire, eekiro piyatayttee pameentyaari Pawa Tajorentsi roojatzi raanteemi jenokinta.

<sup>3</sup> Tema piyoteeyakini ineshironkaperoyakimini Awinkatharite.

<sup>4</sup> Aririka awetsike pankotsi mapipanko, eenitatsi apaani mapi rooper-oru anaakotakiro maawaeni paashinipaeni, tema okijotakayero mapipaeni pankotsiki. Eerorka otzimi iroka mapi rooperori, eero okijotzi pankotsi. Riraga Rotyaantanewo Tajorentsi rirotaki oshiyakawori mapi rooperori, rooma ashi royiro riori rañaaperotzi. Imanintaperowitakari atziripaeni, omaanta Tajorentsi iñaaperotaperotakiri ikameethatzi. Eeromi itzimimi, eero awijakoteemi.

<sup>5</sup> Eejatzi eerokapaeni pikimitawo mapipaeni riwetsikantawori mapi-panko omaanta rowañaakimi Jesokirishito pipiyotawenantyaawori, tema pikimitakawo pankotsi tsikarika ojeeki Ishire, tema ojeekashiretzimi pa-jankaneki. Eejatzi pikimitakotakari kantakanantatsiripaeni paeraniper-oruña ranantawori okaatzi ikowakaakiri janta ipankomawoki Tajorentsi, tsikarika ipinkathateetakiri irira. Eerokapaeni pikimityaari riroripaeni, pantapiinteniri Tajorentsi maawaeni okaatzi ikowakaakimiri. Roojatzi kameetha riweshiryawentempi okaatzi pantziniriri. Tema paapatzyari riraga Jesokirishito.

<sup>6</sup> Rootaki ikantztitakarini Tajorentsi Iwaperiteki, ikantzi:

“Pamine, notyaanteniri joriiyopaeni Notyaantanewo, riraga osheki noñaa-perotakiri ikameethatzi. Niyoyaakiri rowawijaakoeyerineri

maawaeni aapatziyeeyaririni, eero ratsipetashiteeyawoni irirapaeni".

<sup>7</sup> Eerokapaeni aapatziyeeyakaririni Rotyaantanewo Tajorentsi, tema piñaaperoejakirini ikameethatzzi. Omaantakya maawaeni kaari aapatziyarri, tee iñaaperotziri ikameethatzzi. Okenkithatakotzitakarini Iwaperite Tajorentsi, okantzi:

"Riraga wetsikawitawori pankotsi imanintakiro mapi, ikantzi: 'Tee okameethatzzi'. Omaanta riraga Tajorentsi iñaaperotakiro. Ņaakiro, imaninteeyawakirini joriyo Rotyaantanewo rirori, omaanta riraga Tajorentsi iñaaperotakiri ikameethaperotzzi".

<sup>8</sup> Eejatzi okantzi Iwaperite:

"Riraga Rotyaantanewo Tajorentsi roshiyakawo mapi rantziwataakaakari atziri ipariyantakari. Kyaaryo, tee riyoteeyawakirini, ikompi-teeyawakarini".

Ñaakiro, iroka oshiyakaawentakiri: ro kaari riyoteeyantarini, tee ikemijantaperotziro ikantawitakariri rirori, rootaki ranantyaawori ikantakiri paerani: rowashironkaeyantyaaririni.

<sup>9</sup> Omaanta riyyaaperoejakimini rowawijaakoeyantakimirini. Pantawaeeteeyinirini riraga pinkathariperi. Rowameethateeyakimini, pisheninkateeyaperotakarini Tajorentsi. Paerani tee piyoteeyawitani, okimitaka piijeeekawitani tsiteniriki; omaanta riyyagaeyakimini, riyotakaaperoeyakimini, kimitaka piijeekeae kitejiriki iroňaaka. Ikowakaakimiro pikamanteeyerini atziri: "Okameethaperotaki ranteeyakaenirini Tajorentsi".

<sup>10</sup> Paerani tee pikameethawityaani, omaanta iroňaaka pisheninkateeyakarini. Paerani tee piyoteeyawityaani ineshironkatawitakimi, iroňaaka piyoteeyeni, piweshiryaawenteeyakarini.

### *Kameetha piijeekimoteri paashinipaeni atziri*

<sup>11</sup> Nonintaperotanewopaeni, tee pisheninkaperoeyawitarini riraga piijeekimoyakirini jaga, tema pinampitaperotyaawo jenokinta. Eero pantashitayitawoni kaari kameethatatsi rantayitzirini paashinipaeni atziri. Aririka pantayiteroni, eero pikameethashiretzi.

<sup>12</sup> Ikantashiteeyawitziminirika paashinipaeni atziri: "Tee ikameethateeyeni joriyyopaeni", omaanta kameethaperi piijeekimoyerini, riyoteeyantyaarini kyaaryo paapatziyeeyakarini Tajorentsi. Aririka iñaakimi piijeeki kameetha, roojatzi raapatziyeeyantyaaririni rirori, eejatzi aririka ipokapae Jesokirishito, ikanteeyeni: "Tema ikameethaperotaki Tajorentsi".

### *Pikemijantaperoyerini pinkathariwenteeyiririni atziripaeni*

<sup>13</sup> Aririka pikemijantaperotakiri Awinkatharite, okameethatzzi pikemijantaperoteeyerini eejatzi riraga pinkathariwenteeyimirini jaka kipatsiki. Pikemijantaperoteeyerini riragapaeni pinkathariwenteeyiririni maawaeni jeekatsiripaeni,

<sup>14</sup> eejatzi pikemijantaperoyerini maawaeni rotyaantanewopaeni rirori. Rotyaantakiri rowashironkaeyerini kaari kameethatatsi ijeekaeyeni. Omaantakya riraga kameethatatsiri ijeeki, eero ikoshekari inta kameetha iñaaperoteri.

<sup>15</sup> Enenitatsi kaari yotziri Tajorentsi, ikantzimatzi aapatziyariri Jeshosi. Rootaki ikowantakari Tajorentsi kameetha piijeekimoteeyerini ikenkithashireeyantyaaririni rirori, imaaeriiyantyaaririni.

<sup>16</sup> Iroňaaka tekatsi omperatemini, rootaki nokanantzimiri: "Pantero oetarikapaeni kameethatatsiri. Eero pikantzi: 'Nantero oetarika nokowakiri naari iroňaaka; tekatsi omperatenani'. Tee okameethatzzi

pikante iroka. Okameethatzi pikemijantaperoteri ashitaperotzimiri, riraga Tajorentsi".

<sup>17</sup> Paakameethateeyerini maawaeni paashinipaeni atziri, pinintaperooyerini ayemijantzinkarite, pipinkathateeyerini Tajorentsi, eejatzi pipinkathateeyerini riraga pinkathariwenteeyiririni atziripaeni.

### *Riyotagaeyirini onampirentsipaeni*

<sup>18</sup> Onampirentsi, pikemijantaperoteeyerini riraga omperatzimiri, pipinkathateeyerini. Eero apaniroeni pipinkathatashitari kamintaakimiri, eejatzi neshironkatzimiri; omaanta pipinkathatzityaari eejatzi omperatzimiri, eejatzi kijimiri.

<sup>19</sup> Pamine, aririka ikijashitakimi omperatzimiri, tema riyotakiro Tajorentsi; eejatzi rowashironkaashitakimirika, riyotakiro eejatzi. Eero pipiyawaantetari riori. Rowashironkaashiteetakimirika eejatzi tee pipiyawaantetari tema pikenkithashiryaaatyawo ikowakayemiri riori pantero, aritaki iinja ikantemi: "Pantakiro kameetha".

<sup>20</sup> Pamine, aririka pamatawiteri omperatzimiri, aririka ipajatawetenmiro, eerorika pipiyawaantetari jkameethatakima pamatawitakirira? Tee. Tema eero iñaaperotzimi Tajorentsi pikameethatzi. Omaanta aririka ipajashitemi riraga omperatzimiri, eejatzi teerika pipiyawaantetari, ari iñaaperotakimi riori pikameethatzi.

<sup>21</sup> Rootaki ikowakaakimiri: eero pipiyawaantetari riraga kijashitzimiri. Pikenkithashireeri riraga Jesokirishito: osheki ikemaatsiwentakimi, ikowaki pikimitakotaari.

<sup>22</sup> Tema okantakotziri Iwaperite Tajorentsi:

"Tekatsi rante riori kaari kameethatatsi, eejatzi tee ramatawitantzi".

<sup>23</sup> Tee ipiyawaantetari riraga kijathatziriri, eejatzi tee ikijathatziri riraga owashironkagaeyiririni. Intaky ikenkithashiryaaakiri Iriri Tajorentsi, riraga kantakowentziriri kameetha. Rootaki rameenantariri.

<sup>24</sup> Rirotaki irira janta koroshiki ikamawenteeyakaeroni okaatzi kaari kameethatatsiri anteeeyirini, eerokya ikenkithashiryantaawo eejatzi Tajorentsi. Iroñakakya, eero antapiinteero eejatzi kaari kameethatatsi, inta antapiinte kameethatatsiri. Osheki ikemaatsitawenteeyakaeni, eero ashironkanta aaka.

<sup>25</sup> Piyoteeyakini riraga owisha tee añiilo riyotantari: osheki ikinashitayitaani tsikarikapaeni. Eerorika ijeki shenterini ari ipeyaagaantakya. Aritaki pikimiteeyawitarini owisha, tee piyoteeyawitan. Omaanta iroñaka eenitatsi Shenteeyimirini, ikempoyaaperoeyakimini.

## 3

### *Riraga shirampari eejatzi iina, okameethatzi raakameethatawakaya*

<sup>1-2</sup> Tsinani, paapatziyari piimi. Tekirarika raapatziyari riraga Jessoši, omaanta okameethatzi iñaakimi paapatziyaperotakari irira eejatzi kameetha pijeeki. Roojatzikya iñaaperotemi, eejatzi aririka pimateri paapatziyakayaari.

<sup>3</sup> Eero apatziro pikowashitaperotya powameethatero piishi, powaneenkatya, pikithaata kameethaperotatsiri, oetarikapaeni.

<sup>4</sup> Omaantakya pikowaperote pikameethashiryaanaki pajankaneki, pineshironkathateri piimi. Rootaki ikowakaaperotakimiri Tajorentsi.

<sup>5</sup> Aritaki okimiteeyani paejatoeteni aapatziyariri Tajorentsi: kameetha ojeekini, aapatziyari oemii.

**6** Rowaga Jaarani okemijantaperotzirini Awaraamani,\* oetziri nowinkatharite. Aririka pijkee kameetha, pikimitakotakawo roori, tekatsikya pikantya pithaaawntyari piimi: tema tekatsi ikijawentemi.

**7** Eejatzi eerori, shiramparipaeni: tee omonkaatzimi piina, tee oshintsi-taperotzi, rootaki nokantantzimiri pineshironkatero, piñaapinkathaperotero. Tema pimonkaatawakagaeyakan, ineshironkateeyakimini Tajorentsi pijkeekaeyantyaarini iinja janta jenokinta. Eerorika pikamintheero piina, eero rakimiro Tajorentsi aririka pamanawityaari.

### *Inja rowashironkagaeteri antzirori kameethatatsiri*

**8** Eejatzi nokanteeyemini maawaeni: pikimitawakagaeyaani, petakotawakagaeyaani, pinintaperooyerini piyemijantzinkarite, pineshironkatawakagaeyaani, eero pikantakaaperooyaani.

**9** Terika okameethatzি rantzimatotakimiri paashini atziri, eero pipiyatari; aririka ikijathatemi, eero pipiyatari, inta pikanteri Tajorentsi ikaminthay-eri. Tema riyyogaeyakimini irira: ikowaki ikaminttheeyemini.

**10** Pikenkithashireya, okantzirini Iwaperite Tajorentsi: "Pikowakirika pikimoshiryaanaki eejatzi pijkeek kameetha, eero piki-jathatziri paashini atziri, eero pamatawitanzi."

**11** Eero pantayitziron kaari kameethatayitatsirini, inta pantayiterini kameethatayitatsirini. Pikowaperotanaki pijkeek kameetha.

**12** Tema raminapiinteeyirini Awinkatharite maawaeni aapatziyeyearirini ishenteeyirini. Ikemapiintziri aririka ramaneri. Omaanta eero ineshironkateeri antapiintzirori kaari kameethatatsi, inta ipinkimateri".

### *Pantapiintero kameethatatsiri omawitya pikemaatsitawentyaawo*

**13** Pikowaperoterika pantapiintero kameethatatsiri, ¿eenitatsima kowatsiri rowashironkayemi? ¡Tekatsi!

**14** Omawitya eenitatsirika kijashitemini, omaanta itajonkakowentemi Tajorentsi. Eero pithaaawntari, eero pikantashiryaa, inta pikimoshirete,

**15** tempiipinkathataperoteri Jesokirishito pajankaneki. Aririka rojampiteetemi: "¿Itaka paapatiyantakariri Jesokirishito?" Kameetha pakanakiri, eero pikijathatziri. Pikamanteri itaka piyoperotantakari raaneemi jenokinta.

**16** Eerokya pantziro kaari kameethatatsi inta pantero maawaeni ikowakaakimiri rirori. Roojatzi riraga kijakimiri riyananaki rirotaki irira owameethatzimiri. Roojatzi ipashiwenantanakya, tema riyananaki tee okameethatzি ikantzmatakimiri.

**17** Aririka ishinetziri Tajorentsi rowashironkagaetemi, iñaaperotzimi pikameethatzি aririka pikemaatsitawentyaawo kameethatayitatsirini pantayitzirini. Omaantakya tekatsi ikantya iñaaperotemi pikameethatzি aririka pashironkaawentyaawo kaari kameethatayitatsini pantayitzirini.

### *Rantayitakirini Jesokirishito*

**18** Ñaakiro, paerani tee akameethateeyini aari, osheki antayitakironi kaari kameethatatsi, omaantakya ikameethaperotaki riraga Jesokirishito, tekatsi rantani. Ikamawenteeyakaeni rowawijaakoeyakaeni; ikowaki añaeyanteeyaririni Tajorentsi. Ikamaperowitaka; omaanta ipiriinteeri Ashitariri.

\* **3:6** Paminero OWAKIRANI ITAJAANTANEENCHA OETARIKAPAENI kapiitoropaeni 12 roojatzi 22.

<sup>19</sup> I kamantakari, riyaatashiretapaentzi janta paamariki kaari tsiwakanitatsini janta rowakirinta Tajorentsi kamaaripaeni eejatz i shirepaeni theenkantatsirini. Ari ikenkithatakapaaentziri.

<sup>20</sup> Paerani, tee raapatziyeeyarini Tajorentsi riraga atziripaeni eenironi i jee kini Noeni. Ri wetsikantakaworini irira ipito, ikantapiinteeyawitakarini atziri paerani: “Paapatziyeeyarini Tajorentsi”, omaanta tee ikowaeyini raapatziyeeyarini. Riraga Tajorentsi reshiwentawitakari royaakoeyawitakarini ikenkithashiryaa wakyaata ipakaawakiroota okaatzi kaari kameethatatsi rantakiro. Omaanta tee ikowaeyini ikenkithashireeya. Roojatz rotyaanantakanari rirori antwo inkani, oonkanaka maawaen i, othonkaeyakirini, kamanaki. Omaanta ikaatzi 8 awijakotaatsiri pitotsiki.

<sup>21</sup> Ari roshiyeeyakarini riraga kaawoshitawenteeyaririni Tajorentsi. Aririka akaawoshitawentyaari, teera akaawoshiwaetashita, omaanta oshiyakaawentziro ikamawenteeyakaeni Jesokirishito, eejatz i piriintanaa, rowawijaakoeyakaeni. Eejatz oshiyakaawentziro ameentakari Tajorentsi rowameethashireeyantakaerini.

<sup>22</sup> Ari iroñaka jatee Jesokirishito janta jenokinta, i jee kimo tapaeri Tajorentsi rakoperoki: ikaatapaeri ipinkathariwenteeyapaeni. Eejatz osheki ipinkathateeyirini ronampiripaeni, paashinipaeni pinkatharitawitachari, maawaen i. Eejatz imatziro romperatari kamaaripaeni riraga owashironkaachani iinja.

## 4

<sup>1</sup> Ari piyoteeyakini osheki ikemaatsitakawo Jesokirishito, tee ikantzi: “Tee nokoyi nokemaatsityaawo”. Eejatz eerokapaeni, pikimitakotyaari irira. Eero pikantzi: “Tee nokoyi nokemaatsityaawo”. Pamine, aririka pikemaatsityaawo oetarikapaeni, eero pikowanee pantapiinteero kaari kameethatatsi

<sup>2</sup> okaati ikowaeyirini atziripaeni. Omaantaky arikowaperotanaki pan teniri Tajorentsi okaatzi ikowakayemiri roojatz i pikamantaky.

<sup>3</sup> Paerani pantawitawoni rantapiintayitzirini riraga theenkantatsiri: monkaataka, eero papiiteero eejatz. Rantapiintayitzirini riroripaeni osheki inashitapaeni kaari kameethatatsi, ikenkithashiryaa kota piaintawo ishirontayitawoni kaari rayi, ishinkitapiinta, imayempitawakaapiinteeyan i, ikijawakagaeyakani, ipinkathatashitakawo iitajorentsitsashitawo, rantakiro osheki kaari kameethatatsi.

<sup>4</sup> Tee ri yoteeyini rirori, ikantzi: “Litaka kaari ikimitantana aapatziyariri Jesoshi?” Rotsikanateeyakimini, tee ri yotakoeyironi iñaakimira pipaashini teeyakini, rootaki ikantkimateeyantakimiri teera pikimitakotari.

<sup>5</sup> Omaanta iinja ipokae Jesokirishito ikantakowenteeyerini maawaen i atziri: aña gaeysirini eejatz i kamatsiripaeni. Rojampiteeyerini theenkantatsiri: “Litaka pikijantakariri aapatzianari? Tee okameethatzi”. Eero rakiri: osheki ipashiwentanaky.

<sup>6</sup> Paerani ikenkithatakayiteetakarini jeekawitacharini, ikamanteeyakirini: “Aririka paapatziyari Jesoshi pikanteetatyeyaa ni pijee ki janta jenokinta”. Roojatz i kamaeyantakani: tema ranteeyakironi kaari kameethatatsi, rootaki ikamaeyantakarini, ikimiteeyakarini maawaen i atziri. Omaanta iinja ipiriinteeri Tajorentsi maawaen i aapatziyariri, i jee kaka gaeysirini janta inampiki. Ikantya ikimiteeyaa rin i Tajorentsi: eero ikamaeyeen i eejatz.

<sup>7</sup> Pamine, rooteentsi omonkaatakyä ikantakowenanteeyeerini Tajorentsi. Kameethaperö pijkeekäyeni, pikyaaryoowentero pamanapiinteeyerini ri-raga Tajorentsi.

<sup>8</sup> Pikantani pikowaperoeyeni pinintaperotawakagaeyaani. Aririka pinintawakagaeyaani, tema eero pikenkithashiriiro kaari kameethatatsi rantayitzirini paashinipaeni, inta pineshironkatawakagaeyaani, pipeyakoteniri rantziri.

<sup>9</sup> Pikantyaani pineshironkaeyawakirini kameetha maawaeni areetemini. Eero pikantaakitziri riroripaeni.

<sup>10</sup> Tema eenitatsi omatakaakimiri Ishire Tajorentsi, rootaki iroñaaka pimatantyaawori petakotantyaariri atziripaeni. †Pantaperoterö! Piyotakagaeyerini rirori ikaminttheeyerini Tajorentsi.

<sup>11</sup> Aririka piyoteeri atziri, pikyaaryoowentero pikamanteeniri iñaani Tajorentsi. Aririka petakotyaari atziri, pikanteri Tajorentsi ramitakotemi, aritaki imatakaakimiro. Rootaki riraga paashinipaeni atziri riytakotantzimiri paapatziyaperotari Jesokirishito, roojatzi ikanteeyeni: "Tema ikameethaperotaki Tajorentsi". Okameethatzi iroñaaka añaaperoeyerini maawaeni, apinkathateeyerini: akanteetatyeyaaani. Aritaki okantyaari.

### *Aririka pikemaatsitawentyaari Jesokirishito, pikimoshiryaanaki*

<sup>12</sup> Nonintaperotanewopaeni, niyotaki osheki rowashironkaetakimi. Eero potsikananatawentawo, pikenkithashiryaaashita: "¿Iitarika awijantanakari iroka?" Aritaki okantyaari. Rooma rowashironkaetakiri eejatzi paashinipaeni aapatziyeyaririni Jesoshi.

<sup>13</sup> Tema eejatzi rowashironkaetakiri riraga Jesokirishito, iroñaaka pikimiteeyakarini: pikimoshireeyanakini. Iinja ipinkatharitapaaki rirori, roojatzi pikimoshirewenta-perotantyaariri.

<sup>14</sup> Aririka itheenkanteetemiro paapatziyarira rirori, pikimoshiryaanaki: tema aritaki itajonkakowentakimi Tajorentsi. Okithaatkayemi Ishire, rowaga kameethaperotatsiri.

<sup>15</sup> Omaanta eero powamaantzi, eero pikoshitzi, eero pantayitzironi paashini kaari kameethatatsi, eero pimatzitawo eerori piñaawaetzii iñaanatawakaeyaarika paashinipaeni atziri rashityaawo rirori. Aririka ikijawenteetemi irokapaeni, ari pikemaatsitaperotakyaawo osheki.

<sup>16</sup> Omaanta aririka paapatziyaperotyaari Jesokirishito, rootakirika ikijanteetemiri, eero pipashiwenta; inta pikante: "Tema ikameethataki Tajorentsi, ishinetakina nokemaatsitawentyaari Jesokirishito".

<sup>17</sup> Pamine, rooteentsi ikantakowenteeyeeni Tajorentsi: riteeyeeni maawaeni aari itominteeyarini, roojatzikya rirori theenkayiririni. Aririka iroñaaka rowashironkaakae anantawori kaari kameethatatsi, tema ikowanaki ajeeke kameetha. Aririka ikenkithashiryajankanetakaakaero antakiri eejatzi owashiyaanteero, tema iinja aate jenokinta. Omaanta riraga kaari aapatziyeyaririni Jesoshi, tema osheki rowashironkaaperoeyerini iinja.

<sup>18</sup> Tema okantzi Iwaperite Tajorentsi:

"Ari rowawijaakoeyakirini Tajorentsi riraga aapatziyeyaririni, omaantakya irira jateeyawitakan paamariki kaari tsiwakanitatsini. Omaantakya riraga theenkiriri Tajorentsi, rantapiintziro kaari kameethatatsi, ¿oetaka awijimoterini irirapaeni? Tema ari rashironkaaperoeyakaani rirori paamariki kaari tsiwakanitatsini".

<sup>19</sup> Aririka panteniri Tajorentsi ikowakaakimiri, rootaki pikemaatsitawenantakariri, okameethataki. Pikyaaryoowentero pantayiteroni kameethatayitatsirini. Pikanteri Tajorentsi: "Pikempoyeena". Tema rivotaki wet-sikakimiri, ikempoyaaperotemi, eero ramatawitzimi.

## 5

### *Peetero riyotaatziiri aataperoteenchari iyemijantzinkarite eejatzi ewankaripaeni*

<sup>1</sup> Rootaki iroñaaaka nojankinatantanariri aataperoteenchari aapatziyariri Jesoshi. Tema eejatzi naaka aataperoteenchari. Paerani noñaaperotakiri Je-sokirishito ikemaatsitaka osheki. Eejatzi iinja, aririka ipokae Awinkatharite ipinkathariwenantapae, notsipataari nopinkathariwenante. Ari iroñaaaka eenitatsi nokoyiri nokamantteeyemirini:

<sup>2</sup> riraga shentziriri rowishate raminakowentziri riroripaeni. Eejatzi eerori, pikimityaari rirori, paminakowiritaantapiinteri piyemijantzinkarite, irirapaeni ikimitakari rowishatepaeni Tajorentsi. Paapatziyakaaperoeyaarini Jesoshi. Omaanta pantero pikowashitari, tekatsi omperatemini. Tema ari okanta ikowakaakimiri Tajorentsi. Tee ro pikenkithataantapiinteeyaaririni payitantlyaari iyorikite, omaanta pikowaperotantyaari kameetha paminakowiritaanteri.

<sup>3</sup> Eero pishintsitheeyirini kimitakami pinkathariperi, omaanta kameetha pijeeki, ikimiteeyantemirini rirori.

<sup>4</sup> Inja ipokaerika Jesoshi, riraga iwinkatharite shentziriri rowishate, ragaeyaneeni, ijekakagaeyapaeni janta jenokinta. Akanteetatyeyaanai ajeekaeyeni janta okameethaperotzinta.

<sup>5</sup> Eejatzi ewankaripaeni, nokamanttemi: pipinkathateeeyerini maawaeni aataperoteencharipaeni. Eero pikantakaaperoeyani, omaanta kameetha pineshironkatakawagaeyaani. Tema okantzi Iwaperite Tajorentsi: "Riraga Tajorentsi ikiñiri riraga kantakaaperotzinkari, omaanta ineshironkateyakirini kaari kantakaaperoeeyachani".

<sup>6</sup> Pipinkathheeeyerini rirori: tema itajorentsitaperotaki, ipinkathariperotaki; roojatzi ipokaerika Jesokirishito ipinkathariwentakae.

<sup>7</sup> Pikanteri Tajorentsi oetarikapaeni pikenkithashiryaakopointari, eejatzi eero pikenkithashiryaakopawo paashini oetarikapaeni, inta tameentyaari Tajorentsi. Tema raminakowentakimi.

<sup>8</sup> Paamawentya apaniroeni, paamayarira iwinkatharite kamaariipaeni. Osheki ikinakinayitanakini, ikowaki ithonkaeyerinimi aapatziyeyaaririni Jesoshi, maawaeni. Tema ithawetakotantariri aakapaeni: ikowanaki rookakagaero aapatziyari, apeyakoteri. Ikimitakari antari manitzi aririka itasheyaperotaki: raminiri iwathatsite royaari.

<sup>9</sup> Pameentaperotyaari Awinkatharite potsinampaantyaariri iwinkatharite kamaariipaeni eero rantakaantzimiro kaari kameethatatsi. Kyaaryo eeniro pikemaatsitayityaarini, omaanta tee apatziro pikemaatsitya eero apaniroeni, eejatzi ikimiteeyakimini rirori ayemijantzinkarite janta paashinikipaeni kipatsi.

<sup>10</sup> Eero ojamanitaperotzi pikemaatsitya: riyotzi Tajorentsi pipinkathatakiri riraga Jesokirishito, roojatzi ragaeyanakimini janta jenokinta. Pikanteri Tajorentsi: eekiro ryaataty rowameethataperoeeyemini, riweshiryaakazaeyemini, ishintishireeyemini pajankaneki, eero pikantashiryaaapaa eejatzi.

<sup>11</sup> Thame maawaeni apinkathataperoyerini, akanteetatyeyeaani. Tema osheki ikameethaperotaki. Aritaki okantyaari.

<sup>12</sup> Ari nojankinatakimi eechonkiini nokamanantakimiri osheki ineshironkaperoéyakimini Tajorentsi, kyaaryo nokantakimiri. Iroñaaka paapatziyaperotaari irira, piweshiryaawentyaari. Eeniro irika Shiriwaano,\* rirotaki aaneemironi iroka nojankinari. Osheki noñaaperotziri: rirotaki ayemijantzinkarite, ikyaaaryoowentziro raapatziyaperotakari Jesoshi.

<sup>13</sup> Riwethateeyakimini maawaeni ayemijantzinkarite jaka Wawiroomiyaki,<sup>†</sup> tema rirojatzi riyoyaanewopaeni Awinkatharite raapatziyeeyearini. Eejatzi riwethateeyimini niyotaanewo Marikoshi. Tema kimitaka rirotaki notyomi.

<sup>14</sup> Paakameethatawakagaeyaani maawaeni, pineshironkatawakagaeyaani. Nokantziri Tajorentsi: "Pineshironkateeyerini maawaeni aapatziyariri Pitomi, kameetha pijeekekagaeyerini".

Naaka jankinatzimirori:

Peetero

---

\* **5:12** Shiriwaano apite okanta iwaero, paashini okantzi Shiireshi. † **5:13** Riraga aapatziyariri Jesoshi iitziro nampitsi owaero Orooma paashini owaero Wawiroomiya.

## RAPIITEENIRI PEETERO ROJANKINATZINIRIRI IYEMIJANTZINKARITE

<sup>1</sup> Naaka Shimo Peetero jankinatzimirori eerokapaeni noyemijantzinkaritepaeni. Naaka rotyaanatanewo Jesokirishito, nantziniri rirori oetarika ikowakaakinari. Tema amonkaatawakagaeyakanani ameenteeyakarini Jesokirishito, riraga Owawijaakoeyakaerini. Tema rirotaki Tajorentsi. Rirotaki kameethaperotatsiri.

<sup>2</sup> Ari piyoteeyakirini, rootaki nokanantariri osheki ineshironkateeyemini eejatzi kameetha ijekakagaeyemini.

### *Pikañaaperota ashi poyiro pikameethatzı*

<sup>3</sup> Ari roñaagakaero Tajorentsi rirotaki kameethaperotatsiri eejatzi eenittasi itajorenka, ikaemashiryaaanteeyakaerini aapatziyaari. Aririka aapatziyaari aritaki itajonkawenteeeyakaenii akanteetatyeyaaani ajeeki eejatzi oshiyakotyaari rirori akameethashiryaantyaaari.

<sup>4</sup> Osheki itajonkawenteeeyakaenii akimoshirewenteeyantyaaririni, rantakaeniro maawaeni ikantakaeri. Ikashiyakae ramitakoeyeeni eero akowantawo antero kaari kameethatatsi jaka kipatsiki. Eejatzi ramitakoeyeeni akimiteeyantyaaririni rirori. Tee akimitari iroñaaka riraga theenkantatsiri.

<sup>5</sup> Tema rantakaeniro Tajorentsi maawaeni iroka, rootaki okameethathan-tari akañaaperota kameetha ameentyaari Jesoshi. Aririka ameentyaari, roojatzi ari okameethatzi akameethathanaki. Aririka akameethatakii, okameethatzi eejatzi ayoperotanaki oetarika ikowakaakaeri.

<sup>6</sup> Aririka aytaki oetarika ikowakaakaeri, okameethatzi eejatzi aamakowentya apaniroeni anantyaawori. Aririka aamakowentanakya, okameethatzi akyaryooventero ikowakaakaeri. Aririka akyaryooventero ikowakaakaeri, okameethatzi eejatzi oshiyakotyaari Tajorentsi, antapi-intziro okaatzi kameethatatsiri.

<sup>7</sup> Aririka oshiyakotyaari Tajorentsi, antapiintziro okaatzi kameethatatsiri, okameethatzi eejatzi anintaperoeyananakirini maawaeni ayemijantzinkarite, eejatzi okameethatzi aneshironkateeyananakirini maawaeni atziri.

<sup>8</sup> Aririka pantaperoeyananakironi maawaeni iroka, ari osheki pantakiniri Awinkatharite Jesokirishito, eejatzi piyotaperotanakiri.

<sup>9</sup> Riraga kaari anteroni irokapaeni ikimiwitaa kamampowaaktitsiri. Tema ipeyakotari osheki ranteeyawitakawoni kaari kameethatatsi paerani, omaanta Awinkatharite ineshironkaperotakiri, rowameethashiryaakiri, ari tee ikenkithashiriir eejatzi kaari kameethatatsi rantzimotawitakariri.

<sup>10</sup> Iroñaaka, noyemijantzinkarite, eero pikimitari riroripaeni inta pikyaaryooventaperotero panteniri Tajorentsi maawaeni ikowagaeyakimirini. Tema pikowaki piyote ikaemakimi Tajorentsi eejatzi riyoyaakimi. Aririka pantapiintakiro maawaeni iroka, eero pipakagaero paapatziyari Jesoshi.

<sup>11</sup> Okantyaatakya raantaneemiri janta jenokinta, janta ikantani ipinkathariwenantzi Awinkatharite Jesokirishito: riraga owawi-jakoeyakaerini.

### *Eero pipeyakotziro iroka nokantakimiri*

<sup>12</sup> Tee owakira pikemaeyakironi iroka nokantakimiri: piyotziteeyawoni, eejatzi pimatayitakironi kameetha. Omaanta okameethatzi eekiro niyaatatayte napiiteemiro eejatzi nokenkithashiryaakagaemiro.

**13-14** Riyotakaakina Awinkatharite Jesokirishito eero ojamanitzi nokamantyaari. Omaanta okameethatzi nokenkithashiryaakagaeyemironi roojatzi nokamantakya.

**15** Roojatzi nokamantaka, eero pipeyakotantawo, inta pikantyaani pikenkithashiryaapiintyaawo.

### *Kameetha iyotagaeyakaeni iñaani Tajorentsi*

**16** Tema nokamanteeyakimini iinja ipokae ejatzti Awinkatharite Jesokirishito, osheki ipinkatharentsitapaaki. Kyaaryo iroka nokantakimiri, tee nokamantashiteeyemironi naamaashiteeyakarini. Tema naakapaenii ñaaperoeyakiririni Jesoshi paerani ishipakiryaaki ejatzti itajonkantayitakini.

**17-18** Paerani ryaatantakari Jesoshi tonkaariki, noyaatananakira naaka ejatzti paashini apite ryotaanewo; noñaaperoeyakirini ishipakiryaanaki, ejatzti nokemaeyawakirini Pawa Tajorentsi, riraga kameethaperotatsiri. Ikkantzi: "Rirotaki irika notyomi nonintaperotziri, osheki noñaaperotakiri ikameethatzi".

**19** Eejatzti eenitatsi iroñaaka rojankinatziteeyanarini riraga kamanantayitzirorini iñaani Tajorentsi paerani: okyaaryooperotatzzi. Okameethatzi pikenkithashiryaaperoeyeroni okaatzi rojankinatzzi; tema iyotaatziimi piyote okyaaryooperotzirika okaatzi ryotaantziri paashinipaenai atziri. Okimitakawo oorenty tsiteniriki: eerorika oorenta, eero aminashita. Ari okameethatzi pikantyaani pikenkithashireeyeroni Jankinarentsiper, roojatzi kitejiriki ipokantyaari Jesoshi; roojatzi ryotakaaperoeyemini Tajorentsi, okimitzimoeyemini okitejitaperotzi.

**20-21** Nokowaki piyoperoeyeroni iroka: rowaga rojankinarini riraga kamanantayitzirorini iñaani Tajorentsi okameethaperotaki. Tee ryotawitani irirapaenii, riraga paejatzüteni, kaari ashitarori rojankinari rirori; omaanta iyotagaeyakirini Ishire Tajorentsi, rootaki rojankinatantakawori iroka.

## 2

### *Ikenkithatakotziri amatawitantatsiri*

**1** Eeniwitacha paerani kamanantawitachari ikaateeyinira ijoriyyotzinkaritepaenii, omaanta ramatawitagaanteeyirini; roojatzi ijeeki iroñaaka amatawiteeyemironi eerori. Riyotagaeyemironi theeyaantsi, itheeyakotaari Tajorentsi. Tema ayoteeyakini ikamawenteeyakaeni Jesoshi aateeyantyaarini jenokinta, omaanta ikante riraga amatawitantatsiri: "Eero apinkathatziri Jesoshi". Rootaki kaari ojamanitanta rowashironkaaperoteri Tajorentsi.

**2** Eenitatsi osheki eerokapaenii rirotaki oyaaterini: pikimityaari, tema pantayitzironi kaari kameethatatsi; rootaki itheenkanteetyawori Ñaagantsiper kenkithatakotziriri Jesokirishito.

**3** Osheki ramatawiteeyemini rioripaenii, ryotaashitayitemironi oetarikapaenii rayitatemiriri piyorikite. Paerani ikantzi Tajorentsi: "Aritaki nowashironkaaperoeyakirini riraga amatawiteeyeririni aapatziyanari". Kyaaryo, eero ojamanitzi ryaateeyenii paamariki kaari tswakanitatsini.

**4** Paerani riraga ronampiripaenii Tajorentsi ipiyathateeyakarini, rantayitakironi kaari kameethatatsi. Rootaki rowashironkagaeyantakaririni, rookaeyakirini janta jaawiki janta otsitenitaperotzinta. Aritaki ijeekanaki rioripaenii janta, roojatzi ikantakowenantyaariri Jesokirishito iinja.

**5** Pamine, rowamagaeyakirini Tajorentsi riraga atziripaenii paeranipero-roña. Tee ipinkathateeyirini rirori, rootaki rotyaanantakanariri oonkawo agaeyakirini. Tekatsi paashini rowawijaakote, apatziro Noe, itomi 3

eejatzi iinapaeni, ikaateeyini 8. Tema rirotaki kenkithatakagaeyawitakaririni atziripaeni, ikanteeyawitakarini okameethatzi pookero kaari kameethatatsi, pantero kameethatatsini.

**6** Eejatzi paeraniperoroña itagaeyakirini Tajorentsi maawaeni joroomajatzsi, eejatzi maawaeni komoorajatzsi; itagaeyakironi ipankopaaeni, rowaagawo, maawaeni. Ootaka maawaeni. Okameethatzi iroñaaka akenkithashiryaakoperotyaawo rantakiri Tajorentsi, ayoteeyantyaarini ari rowashironkagaeyakirini iinja maawaeni kaari pinkathatziriri.

**7-8** Ari ikameethashiryaaakini Rooteni; ijeekawitani janta Joroomaki, omaanta osheki rowashiretakotaki ijeekimoteeyakirini, iñaakiri, ikemiri ranteeeyakironi oshekiperi kaari kameethatatsi. Osheki ikenkithashiryaakoperoeyakirini maawaeni kitejiri ikantzi: “*Ilata kaari raapatziyeeyantyari Tajorentsi? Raapatziyaarimi ari ijeekimi kameetha*”. Omaanta iñaakiri Tajorentsi ikameethaperotaki riraga Roote rootaki kaari itaatanti inta rowawijaakotakiri.

**9** Ñaakiro, riyotaperotzi Tajorentsi rowawijaakoeyirini pinkathateeyiririni, omaanta kaari ikimitantari theenkantatsiri. Kyaaryo, rowashironkaeyeerini irirapaeni iroñaaka eejatzi ipokaerika ikantakowenanteeyaaarini, aritaki rotyaantakiri paamariki kaari tsiwakanitatsini.

**10** Aritaki rowashironkagaeyakirini maawaeni kowatsiri rantero kaari kameethatatsi antashitatayitaworini ikowayitzirini rirori, omaanta rowashironkaaperoeyakirini riraga ñaaminthashitawori kaari rayi eejatzi riraga atziri rantatenkatawakaeyaani ishiramparinkaki eejatzi rowashironkaaperoeyakironi rowaga ñaaminthashitariri kaari ayi eejatzi rowaga tsinani antatenkatawakaeyaani otsinaninkaki. Eejatzi rowashironkaaperoeyakirini riraga theenkiriri Awinkatharite eejatzi theenkiriri maawaeni jewatatsiri.

Tema osheki ikantakaaperotaty riraga amatawitantatsiri, ikantzimatatziri jewatatsiripaeni eejatzi ronampiripaeni Tajorentsi.

**11** Omaanta ijeekaeyini ronampiripaeni janta Awinkathariteki, omawitya oshekiperi ishuntsitzi, tee ipiyatakotari riraga kantzimateeyiririni.

**12** Riraga amatawitantatsiripaeni ikimiteeyakarini tsimeripaeni, tekatsi riyote. Riraga tsimeri ijeekashiteeyaani inimoteeyakirini, roojatzi ikenteri atziri, chek, rowamayeri. Ikimiwitakari riraga theenkantatsiri ikantzimatashitatayitawoni kaari riyotzi, rootaki ithonkantyaariri Tajorentsi.

**13** Kyaaryo iinja rashironkagaeyakaani rirori, tema ikantzimatatakiri paashinipaeni eejatzi ramatawitakiri. Riweshiryaaawentashitatayitawoni rantero kaari kameethatatsi kitejiriki, omawitya iñaakiri paashinipaeni atziri. Kyaaryo rantzimoteemiro kaari kameethatatsi itsipatantakimiru rootaki itheenkantakimiru atziripaeni. Tee okameethatzi ranteeeyirini rirori, omaanta rantakagaeyakimironi kaari kameethatatsi pikimiteyantyaaririni eerori.

**14** Tema iñaawenaperoteeyawoni ishirontawo tsinanipaeni, ikantani rantapiintziro kaari kameethatatsi: tekatsi ikantero rookaero, ashi royo. Rantakagaeyakirini kaari kenkithashireeroni kameetha kaari kameethatatsi. Ashi royo, iñaawenaperoteeyawoni ashaagawontsi. Kyaaryo riraga Tajorentsi rotyaanantyaariri rirori paamariki kaari tsiwakanitatsini.

**15** Paerani ikemijantaperotaki kyaaryooperotatsiri omaanta iroñaaka rookakiro, rantashitatayitawoni octarikapaeni ikowakiri. Ikimiteeyakawoni rantakiri Waraamini, itomini Weyori. Ikenkithatawitawoni paerani iñaani Tajorentsi, omaanta iñaawenaperotakawo ashaagawontsi. Ikowawitakan

ipeyiri ashaagantzinkari. Rootaki ikimoshiretantakari ipinatanteetariri ranantyaawori kaari kameethatatsi.

**16** Tee raapatziyaperotari Tajorentsi omaanta royaatakiri kowaentsiri ipinateri ashaagawontsi. Ari romapokashitakari iwoorote iñaanatakiri, kim-itaka rirotakimi atziri. Tee Riyotzi Waraami riro ñaawaetakaakirri Tajorentsi. Ikjaperotakiri rompojantakariri, ipiyawaantetantakariri, roojatz iñaakiri ronampiri Tajorentsi rootaki osheki rotsikanatantanakariri, eejatzi osheki ikenkithashiryaaanaka: tee ikenkithashiryaaawitanaawo eejatzi ashaaga-wontsi.

**17** Aririka pikeekakotero iñaa iyowaatantyaari tema pikowaperotaki ojeeki iñaa. Omaanta aririka opiryaaatki, tema tee okameethatzi, tekatsi paye iñaa. Ari riraga amatawitantsiri roshiyakawo piyanarite piryaateentsiri iñaa: tee ikameethatzi. Osheki iñaawaetashita, wero, wero, wero, omaanta tekatsi ramitakotemi. Eejatzi ikimitawitakawo menkori, aririka piñaakiro amakiro tampyaa, pikenkithashireeyaa: "Opriyathee inkani". Omaanta kimitawitaka amatawiwitakimi, teemaeta opariye. Eeniro ijekaperotantyaari rirori janta otsitenitaperotzinta riwetsikakiniriri Tajorentsi. Tema rootaki paamariki kaari tsiwakanitatsini.

**18** Osheki ikantakaaperota eejatzi ikantapiintzi: "Ñaakiro, nantashitay-itakawoni oetarikapaeni nokowayitzirini". Ari ramatawitayitzirini os-heki owakira aapatziyawitakariri Jesoshi: owakira rookawitakawo kaari kameethatatsi rantayitzirini, omaanta rantakagaeri eejatzi.

**19** Ikanteevirini: "Tema irira Tajorentsi owawijaakotzimiri, tee pimatziro powawijaakotya apaniroeni. ¿litaka kaari panantawo oetarika pikoway-itzirini? Tema ineshironkatakimikya, eero ikijawentzimiro. Thame pikimitena naari". Rootaki ikantayitawitarini, omaanta osheki ramatawitantsi. Tee imatziro rirori rantero oetarika ikowaki inta rantapiintziro kaari kameethatatsi. Tema piyotzi aririka ranaakoteetakae oetarika eero amatziro apaniroeni ookaero iroka.

**20** Pamine, paerani riraga amatawitantsiripaeni rantapiinteyawita-woni kaari kameethatatsi ranteeyironi maawaenii theenkantatsiri. Roojatz iryotaakoteetakiri Awinkatharite Jesokirishito riraga Owawijaakotakaeri, ari ipakaawitakawo rantziro kaari kameethatatsiri. Roojatz ipiyashitan-taawo rantziri paerani. Iroñaaka tekatsi ikantya ipakantyaawori eejatzi rantayitzironi, rootaki osheki rowashironkaaperotantyaari.

**21** Ñaakiro, okameethawita eero Riyotzimi riroripaeni ijeeki kameetha. Tema iroñaaka tee ikoyi rantero okaatz i kaminaakirri Tajorentsi, omawitya okameethaperotaki; rootaki tekatsi okantya rawijakotantyaari.

**22** Ikanteetzini: "Riraga otsitzi roepiyeyeo iyamaankani, rowaawo". Eejatzi ikanteetzini: "Atsipetashitakari akiweri chaancho, tema eejatzi ipiyanee rantaatapaero jampowatha". Kyaaryootaki ikanteetziri. Aritaki ikimi-teeyarinia rirori riraga iyyotakowitariri Jesoshi omaanta kaari aapatziyariri, ipiyakoteeyaaawo kaari kameethatatsi.

### 3

#### *Ikenkithatakotziri Jesoshi ipokanteeyaaari ikantawenteri atziri*

**1-2** Ari, noyemijantzinkarite, piyoteeyini nonintaperoeyakimini. Paerani-nente nitantakimiroi nojankinatakimo, nokenkithashiryaaakaakimiro rojankinatziniriri riraga kamanantayitzirorini iñaani Tajorentsi kameethashiretatsiri paerani. Eejatzi nokenkithashiryaaakaakimiro maawaenii ikaminaakaeri Awinkatharite, riraga owawijaakotakaeri. Roojatz rotyaanteyakinarini aapatziyakagaeyemirini. Iroñaaka

napiiteemiro nojankinateemiro pikenkithashiryaakoperotantyaawori maawaeni okaatz kameethatatsiri.

<sup>3</sup> Okameethatzi piyoteeyeni erotzitarika ipokira Awinkatharite, ijeekera osheeki theenkantatsiri, rantashitayijeempiyawoni oetarikapaeni ikoway-itzirini riori. Ishirontawenteeyarini Awinkatharite,

<sup>4</sup> ikanteeyeni: “¿Ikantzima Jesokirishito ari ipokae? Injii, injii, injii. ¿ilitarika iroñaaka? Tema kamaki paerani. Eero ipokae. Paerani raamaawitakarini riraga itakaantaworini aapatziyariri roojatzi ikamaki, omaanta tee iñii, roojatzi iroñaaka. Paejatotaki paerani. ¿Piitzima eeroaka ari piñaagaeri? Injii, injii, injii. Roojatzi okantani kipatsi, tee opaashinitzi”. Rootaki ikanteeyirini theenkantatsiri.

<sup>5</sup> Riyotaki itheeyashita, omaanta tee ikoyi ikenkithashireero rantayitakirini Tajorentsi. Paerani ikantaki riori: “Otzimeeta jenoki, eejatzi otzimeeta kipatsi”, roojatzi otzimantakari. Ari riwetsikakiro kipatsi, shi-towanaki niyanki inkaareki, iroñaaka otapotakawo inkaare.

<sup>6</sup> Aritaki okantakari paerani, omaanta roojatzi rowashironkagaeyakirini riraga atziri eejatzi piratsipaeni ikaateeyinira ijeekantakarira Noe paerani. Rootaki rowashironkaanteeyakaririni, tee ijeekaeyini kameetha. Ari opariyaki antawo inkani, oonkanaka maawaeni kipatsi, eejatzi ithonkaeyanakani theenkantatsiri.

<sup>7</sup> Eejatzi ikantzi Tajorentsi: “Inja notayero jenoki eejatzi kipatsi, eejatzi notaakooyerini maawaeni jeekantawori”. Tema paerani ikantzini: “Niwetsikero kipatsi”, roojatzi otzimantakari. Iroñaaka ikantzi: “Inja notagaero kipatsi”, tema eejatzi rantero. Kyaaryo tekiraata omonkaatyta itaanteeyawori, omaanta iinja itagaero, eejatzi itaakooyerini maawaeni theenkantatsiri, rowashironkagaeyerini.

<sup>8</sup> Iroñaaka, nonintanewopaeni, pikenkithashiryaakooyeroni iroka: ae-takaawitawo 1000 ojarentsi paeraniperoroña. Omaanta tee iitziro riraga Tajorentsi. Iñaakiro tee ojamanitzi, okimitzimotakari apaani kitejiri. Ae-teeyironi tee ojamanitzi apaani kitejiri, omaantakya irira iñaakiro ojamani, okimitzimotakari 1000 ojarentsi.

<sup>9</sup> Ñaakiro, aetakaawiteeyakawoni opaeranitaki, tekira imonkaatziro ikantakaeri: tekira ipokae Awinkatharite. Omaanta tee iitziro rirora opaeranitzi. Eero ramatawiteef, omaanta ojamani royeeyirini theenkantatsiri, ikowaki ikenkithashiryaaperoteeya, retakotantanakya okaatz kaari kameethatatsi rantakiro eejatzi rookero. Ikowakiri maawaeni atziri eero riyaatanta paamariki kaari tsiwakanitatsini.

<sup>10</sup> Omaanta kyaaryo iinja romapokaperotapae Awinkatharite, ipokaerika. Okimitaaganki tee ayotzi tsika ikaatzika ipoki koshintzi eejatzi tee ayotzi tsika ikaatzika ipokae Jesoshi. Antawo otonkanaki jenoki, toon: othonkaperotanakya, thopereee. Itaaperotanakya ompokiro, oorya, kashiri, maawaeni. Eejatzi kipatsi, otaanakya; eejatzi otaakötaperoyeranakyaani maawaeni riwetsikakiri Tajorentsi jaka kipatsiki eejatzi itaakoeyanakyaani maawaeni atziri: jeeee.

<sup>11</sup> Ari iroñaaka ayoteeyanakini othonkaeya maawaeni añeevirini, rootaki okameethatantari akenkithashiryaanakya, aapatziyaperotyaari Tajorentsi, kameetha ajekaperote.

<sup>12</sup> Kameetha aamagaeyaarini Jesokirishito ipokae, kameetha eejatzi anteeyenirini maawaeni ikowakaakaeri ishintsitanteeyaaari ipokae. Aririka omonkaataky, otaanakya jenoki eejatzi jenokijatopaeni othonkaeyanakyaani, maawaeni, thopereee.

<sup>13</sup> Omaanta eenitatsi paashini ikantakaeri, ayotaki eero ramatawitee. Tema ikantzi: “Niwetsikae paashini jenoki owakirari, eejatzi kipatsi

owakirari. Okameethaperotee roori, eero ijeekae antayiteeroni kaari kameethatatsi".

### *Riweyaantapaakari rojankinari*

**14** Rootaki nonintaperotanewopaeni, paamagaeyantaworini ikantakaeri. Pikañaaperotya pijeki kameetha pikimitya Tajorentsi, eejatzti paakameethatawakagaeyaani; roojatzi aririka ipokae, iñaaperotapaakimi pikameethaperotaki, tektsi pantani.

**15-16** Ejatzti pikenkithatakotero iroka: kyaaryo, tekira ipokae Awinkatharite, omaanta royagaeyakirini paashinipaeni atziri raapatziyeeyarinri rirori rawijakoeyanteeyaaarini. Rootaki rojankinatteejakimiri Paaworo rirori, riraga anintaperoeyirini. Osheki riyotaakiri Tajorentsi irira. Roojatzi rirori ikamantakotakaero iroka maawaeni rojankinari. Eenitatsi pomeentsitagaanteenchari rojankinayitzirini. Iroñaaka riraga kaari iyotsati, riraga kaari aapatziyaperotariri Jesoshi, ikinakaashitakawo ifñaani Paaworo, tee rothatayiro ikamantakotero. Ejatzti ikinakaashitayitakawoni paashini ifñaani Tajorentsi, rootaki rowashironkaeyantyaaririni iinja.

**17** Ari, nonintaperotanewopaeni, nokamantakimi tsika okantyaari iinja. Nokamanteejakimini ijeeki riraga kaari kameethatayitatsini, piyathateeyaaririni Tajorentsi, riyotaantero theeyaantsi. Kyaaryoowa, paapatziyarikari, ikompitakaemikari.

**18** Eekiro piyataty paapatziyaperotyaari Awinkatharite Jesokirishito, riraga owawijaakoeyakaerini, piyoperotantakariri. Thame iroñaaka eejatzti apinkathataperooyerini, akanteetatyeyaaani. Aritaki okantyaari.

Naaka jankinatzimirori:

Peetero

## RITAKANARI ROJANKINATZINIRI JOWA RIYOTAANEWOPAENI

*Riraga iyotakoperotakagaeyakaeririni Tajorentsi ryoteeyakaeni tsika akantyaari ajeekantyaari jenokinta*

<sup>1-2</sup> Nokoyi niwethatemi eerokapaeni tsikarika pikanta pijeeki. Naaka Jowa jankinatzimirori iroka. Iroñaaka nojankinatakotakiri itaperotakawori ijeeki. Paeraniperoroña, tekirani otzimini kipatsi, roojatzi ijeekitani riraga Jesoshi. Itsipatakarini ashitariri, riraga Pawa Tajorentsi, roojatzi ipokantapaaka jika kipatsikika. Rirotaki iyotakoperotakagaeyakaeririni Ashitariri. Ikanta riyotagaeyakinani tsika akanteeyarini ajeekashiryaaanteeyari jenokinta. Naaka maawaeni riyotaanewo nokemapiinteyakirini, noñaapiinteyirini, naminapiinteyakirini, nopampitapiinteyakirini: iroñaaka nokamanteyemini tsika ikantari, eejatzi nokamanteyemini tsika akantya añaaperotanteeyaririni janta jenokinta.

<sup>3</sup> Irira noñaaperotakiri, nokemaperotakiri, rirotaki nokenkithatakotziri. Iroñaaka nokamantaperotemi tsika pikantya pikempiyaamintthatantenari kijokiro powanakina naariapaeni. Eejatzi akempiyaamintthatantyaariri Ashiteeri, eejatzi Itomi, riraga Jesokirishito.

<sup>4</sup> Nojankinatzimiro iroka akimoshireperotanteeyarini kameetha.

### *Roshiyaperotakawo Tajorentsi kitejiri*

<sup>5</sup> Iroñaaka nokamantemiro ikamantakinari rirori. Maawaeni okaatzi rantziri Tajorentsi okameethatatz, rootaki roshiyaperotantakawori kitejiri koñeetyaaki kameetha: tee ikemakaaneentawo rantziro kaari kameethatatsi, rootaki kaari itsitenitaneeantari rirori.

<sup>6</sup> Akanterika: “Nokimitakari: tema kijokiro nowakiri”, omaanta eniriorika antapiintziro kaari kameethatatsi, okimitaka eeniro akinaki tsiteniriki: atheeyashitaka amatawitashitakari paashinipaeni.

<sup>7</sup> Omaanta Tajorentsikameethaperotaki, ikimitakawo ikinanaki rirori kitejiriki. Eejatzi aari, aririka kameetha ajeeki, okimitaka ajeekaki kitejiriki, akimitakotakari ikimitaaga rirori: akameethatawakagaeyakan. Ika-mawentakae Jesoshi, riraga itomi Tajorentsi rowawijaakotantakaeri: okimitaka rapaatawentakae riraa okitetanteeri kaari kameethatatsi antziri. Rootaki iñaaperotanteeri Tajorentsi akaa kimitaka tektsi antani.

<sup>8</sup> Akanterika: “Tee nantziro kaari kameethatatsi”, akaa amatawitaacha apaniroeni, tekiraata ayotaperotziroota kyaaryooperotatsiri.

<sup>9</sup> Tee ramatawitee Tajorentsi, ikameethaperotaki eejatzi ikyarayooowentziro okaatzi ikantakaeri. Aririka athawetakotya akanteri: “Nantakiro iroka kaari kameethatatsi, eero napiiteero, eero pikijawentanawo inta pipeyakotenawo”, aritaki imatakiro: kyaaryo ikaminthaaakae, rowameethatacae, tema apaatawentakae riraa Jesoshi paerani okitetakaakae.

<sup>10</sup> Akanterirkami Tajorentsi: “Tee nantziro kaari kameethatatsiri”, kimitaka akimitakaantakari rirotaki theeri Tajorentsi. Tema ikantzi Iwaperiteki: “Maawaeni atziri rantziro kaari kameethatatsi”. Akanterirkami Tajorentsi: “Tee añiiro nantani”, rooma tekiraata ayoperotziro kameetha kyaaryooperotatsiri okantziri iñaani. Tema athañaakawo okaatzi ikantakaeri.

**2**

<sup>1</sup> Iroñaaka, niyotaanewopaeni, nojankinateeyemironi eero panantawo kaari kameethatatsi. Eenitatsi Pawakinta ūaanatakowenteeyakaerini, riraga Jesokirishito, ikameethaperotaki. Aririka antero kaari kameethatatsi, ari ūaanatakowentakae. Ikanteri Ashitariri: "Pikaminthayeri riraga aapatziyani; tema nokamawentakiri".

<sup>2</sup> Eenitatsi anteeyakirini maawaeni, rootaki ikamawenantaakaeri rirori koroshiki ikowashitaka. Tee aapatziro ikamawenteeyirini anampijatzi-paeni aaka, inta eejatzi ikamawenteeyakirini rirori maawaeni atziri, rowameethatanteeyakaerini Tajorentsi, eejatzi riroripaeni maawaeni aapatziyari Jesoshi. Roojatzi aapatziyaririka irira, eero ikiyawenteero Tajorentsi kaari kameethatatsi anteeyakirini, eero rowashironkagae.

*Aapatziyaperotariri Tajorentsi, rirotaki iyotziriri*

<sup>3</sup> Aririka akemijantaperotapiintero ikaminaakaeri Tajorentsi, ayoper-oevakini ashenkatakari.

<sup>4</sup> Eenitatsi kantashitachari ikantzi: "Nosheninkatakari Tajorentsi", omaanta tee imonkaatziro rantziniri ikaminaawitariri, rirotaki teeyinkari, riro amatawitaacha apaniroeni.

<sup>5</sup> Omaanta aririka antaperotakiniri ikaminaakaeri Tajorentsi, aakaperotaki nintaperotakiriri. Rootaki ayotawakaantakari akimitakari.

<sup>6</sup> Akanterika: "Kijokiro nowakiri Tajorentsi", kameetha akanteetaty-eeyaani akimitakotaari, ajeeki kameetha ikimitaaga Jesokirishito ijekawitanii paerani.

<sup>7</sup> Nonintaperotanewopaeni, kaari owakirari iroka nokaminaakimi, inta paerani pikemakiro. Paerani pitakawoni paapatziyakarini Jesoshi riraga Tajorentsi ikaminagaeyakaeroni.

<sup>8</sup> Tee ayotawitani, okimitzimotawitakaeni ajeekaki tsiteniriki, omaanta ipokashiteeyakaeni riraga Jesokirishito riyotakaakae, iroñaaka okimitzimotanakae ajeekae kitejiriki. Rootaki napiitantzimirori. Ikyaaryoowentakiro Jesokirishito inintaperoyerakaeni. Eejatzi eerori ari pikimitya pikyaaryooentero pinintaperoyerineri paashinipaeni.

<sup>9</sup> Aririka akantashitya: "Nokinaki kitejiriki, niyoperotziri Tajorentsi", omaanta eenirorika oonari ayemijantzinkaritepaeni, tekiraata ajeeki kitejiriki, inta eeniro akimita paerani akinaki tsiteniriki.

<sup>10</sup> Omaanta aririka anintaperoteri ayemijantzinkaritepaeni, tema eekiro aatatye ajeeki kitejiriki, akimitakari Tajorentsi, eejatzi eero antapiintziro kaari kameethatatsi.

<sup>11</sup> Omaanta ooñaririka rirori, kimitaka akinaki tsiteniriki, eeniro antapiintziro kaari kameethatatsi. Tee ayotzi tsikarika akinanaki, kimitaka ot-sitenitzimotakae, rootaki kaari añaantawo oetarika.

*Eero pikowaperotziro rantapiintziri theenkantsiri*

<sup>12</sup> Nonintanewopaeni, eeniro panteeyawitakarini, omaanta rowawi-jaaakoeyakimini Jesoshi. Tema ipeyakotakimiro Tajorentsi okaatzi pantaw-itakari. Rootaki iroñaaka nojankinatantzimirori iroka.

<sup>13</sup> Eerripaeni yotziriri kameetha Tajorentsi oshiyariri shirampari pish-intsishiretaki tema piyoteeyakirini Jesokirishito riraga itaperotawori ijeki, rootaki nojankinatantzimirori iroka. Eerripaeni antziniriri Tajorentsi oetarikapaeni, poshiyakari ewankaripaeni, tema panaakotakiri Jatanaashi tee pantziniri ikowakaawitakimiro, rootaki nojankinatantzimirori iroka.

<sup>14</sup> Kyaaryo nojankinatzimiro eerripaeni kimitakimi neentsitepaeni, niyotaakimiro paapatziyari Jesoshi rootaki piyoteeyakirini ashitakaeri. Eerripaeni antaripaeni, piyotakiri riraga itaperotawori ijekaperotzi,

rootaki nojankinatantzimiori iroka. Eeroripaeni ewankari, pishintsi teyanakini, pikyaaryooventaperotakiro ikantziri Tajorentsi, eejatzi tee paapatziyanaari Jatanaashi, rootaki nojankinatantzimiori iroka.

<sup>15</sup> Eero pikowaperotziro pantero rantapiintziri theenkantatsiri. Eero pikowaperotziro oetarikapaeni tee okameethatzzi ikowaperotziri jeekayitatsirini kipatsiki. Aririka pikowaperotero, eero pimatziro pinintaperoteri Tajorentsi.

<sup>16</sup> Riraga kowaperotachari ijeeki kimitariri theenkantatsiri eejatzi kowashitachari rashitari oetarikapaeni tema ari ikanteeyani jaka: ikenkithashiryagaeyakironi oetarika ikowaperotakiri ranteri. Ikowaperotakiro oetarika iñaakiri, ikantakaaperotawo rashitawitaripaeni. Tee riro yoteeroni Pawa Tajorentsi, inta yotagaerori theenkantatsiri tsika ikanta ikenkithashiryaaantari.

<sup>17</sup> Opeyaneeya jeekayitatsirini kipatsiki, eejatzi opeyaneeya maawaeni ikowaeyawitarini theenkantatsirini. Omaanta aririka anteniri Tajorentsi ikowakaakaeri, akanteetatyeyaaani ajeekae janta jenokinta Pawaki.

### *Kijaneentakiriri Rotyaantanewo Tajorentsi*

<sup>18</sup> Niyotaanewo, rooteentsi ipokae Jesokirishito riraga Rotyaantanewo Tajorentsi, eero ojamanitzi. Pikemakotakiri riraga paashini pokatsini, riraga amatawitantashitachari, kantatsini: “Tee ratziritapaaki Rotyaantanewo Tajorentsi. Tee ipoñeeya jenokinta Jesoshi. Kaari irira Rotyaantanewo Tajorentsi”. Irika ii teetziri Kijaneentakiriri Rotyaantanewo Tajorentsi: \* omaanta nokantemi, areeteeyakani osheki riroripaeni. Eenitatsi iroñaaka osheki amatawitantatsiri itheenkiri Jesoshi, rootaki ayoteeyantakarini eero ojamanitzi ipiyaperotanteyarini Rotyaantanewo Tajorentsi jaka kipatsikika.

<sup>19</sup> Paerani ikaateeyawiteeni riraga amatawitantatsiri, ikemijantawitani rirori, omaanta iroñaaka rotsiparyaanee. Tee ikimitaperotee. Ikimitaperotakaerikami, kijokiro rowanakaemi, omaanta rotsiparyagaeyakaeni. Iroñaaka riyotaperotanakiri maawaeni atziri tee ikimitee aaka, tee raapatziyaperotari Jesoshi.

<sup>20</sup> Omaantakya eeroka, rotyaanteevakimironi Tajorentsi Ishire, okithaatakaapaakimi. Iyotaaperotakimiro, rootaki pinashitanteeyakworini eeroka kyaaryooperotatsiri eejatzi kaari kyaaryooperotatsi. Tee pikimitari riraga kaari yoteroni kyaaryootatsiri: tee riyotzi irinta.

<sup>21</sup> Piyoteeyakironi kyaaryootatsi, rootaki nojankinatantzimiori iroka. Pirotaki amatawitantatsiri: eero ipoña Tajorentsiki, tema rowaga iñaani Tajorentsii rootaki kyaaryooperotatsiri.

<sup>22</sup> Theeyaperotachari riraga Kijaneentakiriri Rotyaantanewo Tajorentsi riraga kantashitachari: “Riraga Jesoshi, kaari Rotyaantanewo Tajorentsi”. Tema itheenakiri Ashitakaeri eejatzi itheenakiri Itomi.

<sup>23</sup> Riraga theenkakiriri Itomi Tajorentsi, tee riyotziri Ashitariri eejatzi. Omaanta riraga kantaperotatsiri: “Jesoshi rirotaki Itomi Tajorentsi”, tema rirotaki yoperotziriri ashitariri.

<sup>24</sup> Pikanfeetatyeyaaani pikenkithashireero pajankaneki iroka kyaaryooperotatsiri pikemakiri paerani. Aririka pikenkithashiryaaoperotakiro, aritaki kijokiro powanakiri Itomi Tajorentsi, eejatzi Ashitariri.

<sup>25</sup> Ajaa, iroka ikashiyakaakaeri: “Okanteetatyeyaaani ojeeki pishire”.

<sup>26</sup> Ari nojankinatakakiri riraga amatawiteminimi, nokantemi: “Kyaaryooowa, ramatawitzimikarira”.

---

\* <sup>2:18</sup> Ipaante paashini **Peru-jatzi** okantzi “Kijaneentakiriri Rotyaantanewo Tajorentsi”: “Anti-cristo” eejatzi “enemigo de Cristo”.

<sup>27</sup> Omaanta rotyaantakimiro Tajorentsi Ishire, okithaatakaapaakimi. Rootaki kaari pikowanta paashini yoteemini. Okithaatantakaakimiri, omatakayemiro othotyeemiro maawaeni iyotaaperotemiro. Kameetha iyotayemi, tee otheeyanita. Rooma iyotaakae kijokiro oyeri Jesokirishito: ari kijokiro poyer, pikantyaani.

### *Reentsitetakae Tajorentsi*

<sup>28</sup> Iroñaaka, niyotaanewo, pikempiyaminthatakari Jesokirishito. Inja ipokapae. Aririka pikantyaani pikempiyaminthatakari, ari piweshiryawentawakyaari, eero pipashiwentakaawakari aririka ipokae.

<sup>29</sup> Aritaki ayotaki ikameethataki Tajorentsi. Aririka eekiro ryaatayee rantero kameethaperotatsiri riraga atziri, aritaki ayotanakiri rirori reentsitetakari Tajorentsi.

## 3

<sup>1</sup> Tee amatziro athotyeero tsika okaatzika inintaperotakae Pawa Tajorentsi. Tema ikantakae rirori: "Eerokateeyakini notyomipaeni, nishintyopaeni". Kyaaryo ikantzi. Ņaakiro, osheki inintaperotakae. Omaanta tee riyotziri theenkantatsiri tsikarika ikanta, rootaki kaari riyotantee aaka rashি reentsite.

<sup>2</sup> Iroñaaka, nonintaperotanewopaeni, eeroka itomipaeni Tajorentsi, rish-intopaeni. Tekira ayotzi tsikarika akantaperotyaari inja. Aririka ipiyapae jika kipatsikika Jesoshi, añaawaeri tsikarika ikantaperota. Roojatzikya akim-itaperotanakyaari aaka.

<sup>3</sup> Ayoteeyirini rirori ka piyaacha, rootaki akowantakari iroñaaka akameethatanaki: akimityaari rirori, ikameethataki.

<sup>4</sup> Omaanta aririka eekiro aatayee antero kaari kameethatatsi, tee aapatziyaperotawo ikaminaawitakaeri Tajorentsi. Tee okameethatzi apiy-athatyaawo ikaminaawitakaeri.

<sup>5</sup> Rooma piyotaki ipokapaaki riraga Jesoshi paerani jika kipatsikika imatakaakae eero anantawo kaari kameethatatsi. Piyotaki eejatzi tee ikemakaaneentawo rantziro rirori kaari kameethatatsi.

<sup>6</sup> Rootaki aririka kijokiro owanakiri, eero antapiintziro aari kaari kameethatatsi. Omaanta riraga antapiintzirori kaari kameethatatsi tekira raapatziyari rirori eejatzi tee riyotziri tsikarika ikanta.

<sup>7</sup> Rootaki nokantemiri niyotaanewopaeni, eero pishinetziri paashini rantakayemiro kaari kameethatatsi. Aririka eekiro aatayee antapiintero kameethatatsiri, tema akameethataki: amonkaatakar Jesokirishito, ikameethataki.

<sup>8</sup> Omaanta riraga antapiintzirori kaari kameethatatsi, reentsitetakari iwinkatharite kamaaripaeni: rooma rirotaki itaperotakawori antzirori kaari kameethatatsi. Rootaki ipokantapaakari Itomi Tajorentsi. Ro ipokashitaperotziri rookakayeri maawaeni rantayitzirini iwinkatharite kamaari.

<sup>9</sup> Aririka reentsitetakae Tajorentsi, eero antapiintziro kaari kameethatatsi. Reentsitetakae, rootaki okithaatakaantakaeri Ishire, akimitakari riraga Tajorentsi. Rootaki kaari antapiiniantawo kaari kameethatatsi.

<sup>10</sup> Rootaki ayotantakari asheninkatakari Tajorentsi. Riraga kaari antzirori kameethatatsiri, tee isheninkatari Tajorentsi. Eejatzi ikimita riraga kaari nintaperotziri iyemijantzinkarite eejatzi paashinipaeni atziri, tee isheninkatari Tajorentsi, rootaki ayotantariri reentsitetakari iwinkatharite kamaari.

<sup>11</sup> Ajaa, iroka ritakimiri Tajorentsi ikantakimiri paerani owakira paapatziyantakariri: "Okameethatzi anintashireperotawagaeyaani".

<sup>12</sup> Eero oshiyakotari Kayeeni, riraga jeekatsiri paeraniperorono: reentsitekari iwinkatharite kamaari. Tema roonakari rirentzi rootaki rowamaantakariri irira. ¿litaka rowamaantakariri? Ashi royiro tee ikameethatzi, omaanta iñaakotakirira rirentzi kameethataki okaatzi rantakiri, rootaki rowamaantakariri.

### *Pinintaperoteri piyemijantzinkaritepaeni*

<sup>13</sup> Noyemijantzinkarite, ikijemirika theenkantatsiri, eero pikenkithashiryaaashita, "¿litaka ikijantakinari?" Rooma ashi royiro theenkantatsiri ikijantzi.

<sup>14</sup> Anintaperotakiri ayemijantzinkarite, rootaki omawitya paerani tee ayotawitarin Tajorentsi akamashirewitaka, iroñaaka aapatziyari rootaki owañaashiretantakaeri Ishire. Ayoperotziro iroka tema rootaki anintaperotantakariri ayemijantzinkarite. Riraga kaari nintashireperotziri aapatziyariri Jesoshi, eekiro ryaatataye ikamashireperotzi.

<sup>15</sup> Riraga oonakariri atziri, aritaki ikenkithashiryaaakotziri Tajorentsi, rirotaki owamaantatsiri. Piyotaki eero ishinetziri Tajorentsi owamaantatsiri ikanteetatyeyaaani itsipatyaari inta rotyaanteri paamaariki.

<sup>16</sup> Riraga Jesokirishito riro kowashiteencha ikamawentakae, rootaki ayotantakariri inintaperotakae. Eejatzi akimitya aari. Okameethatzi apashityaari ayemijantzinkarite oetarika koetyeemotariri omawitya roojatzi akamantaka.

<sup>17</sup> Añaawitaririka rashironkaaka osheki ayemijantzinkarite, teerika akoyi akaminthayeri, ¿anintaperotzirima Tajorentsi akimita akantzi? Teewee.

<sup>18</sup> Nonintanewopaeni, tee okameethatzi akantashitya: "Nonintaperotziri maawaeni". Inta okameethatzi aneshironkaperoteri, eejatzi anintaperoteri amitakoperoteri maawaeni.

<sup>19</sup> Rootaki ayoperotantakari oyaataperotakiri Tajorentsi, tee añiilo antani. Rootaki iñaaperotanteeri rirori akameethaperote.

<sup>20</sup> Omawitya ajankaneki okantakotakae: "Eenitatsi pantani", tema Tajorentsi ranaakotakiro ajankane: riyotzitakaero maawaeni, oetarikapaeni.

<sup>21</sup> Eejatzi, nonintaperotanewo, aririka athawetakota eejatzi ipeyakotewo Tajorentsi kaari kameethatatsi antakiri, ayotziro eejatzi okameethatzi akenkithatakapiainteri Tajorentsi.

<sup>22</sup> Aririka akemijantaperoteri ikaminaakaeri, eejatzi amateniri ikowakaakaeri, ayotaki aririka akowakoteririka, aritaki ikemakae; tema ari ipashitakaero.

<sup>23</sup> Ajaa, iroka ikaminaakaeri: "Paapatziyaari notyomi Jesokirishito. Pi-monkaateniri ikantakimiri rirori: 'Pinintaperotawakaeyani'".

<sup>24</sup> Aririka aapatziyaperotyaawo ikantakaeri, akempiyaminthataari. Rotyaantakaeniro Ishire okithaatakaakae, rootaki ayotantakari akempiyaminthatakari.

## 4

### *Piyotaperoteri maawaeni iyotaantzirori kameethatatsiri eejatzi kaari kameethatatsi*

<sup>1</sup> Nonintaperotanewopaeni, eero paapatziyayitarini intsipaete maawaeni iyotaawitemini: ramatawitzimikari. Aririka ikantemi: "Rotyaantakina

Tajorentsi", omaanta pityaawo pojampiteri oetarika riyotagaemiri, piyottantyaariri kyaaryorika rotyaantakiri Tajorentsi. Jaka kipatsikika eenitatsi osheki kowatsiri ramatawitanente.

<sup>2</sup> Ajaa, iroka piyotantyaariri otyaantane wopaeni Ishire Tajorentsi: ikanteeyemini rirori: "Ipoñaaka Jesoshi riraga Itomi Tajorentsi jenokinta ipokaapi jaka kipatsikika ratziraperotapaaki".

<sup>3</sup> Omaanta tee otyaantziri Ishire Tajorentsi kowatsiri ramatawitemi riraga kaari kantsatsini: "Jesoshi rirotaki Itomi Tajorentsi, ratziriperotapaaki". Omaanta rirotaki theenkiriri irira, tema ikimitakari riraga Kijaneentakiriri Rotyaantane woa Tajorentsi. Tema pikemakiri irira ikanteetzi: "Ipoke inja". Omaanta nokantemi: "Pokaki kijakiriripaeni iroñaaka".

<sup>4</sup> Niyotaanewopaeni, reentsitetakimi Tajorentsi, kijokiro rowakimi. Tema ipinkathariwenantzi irira ranaakotakiri maawaeni kowawitachari ramatawitemimi. Imatakaakimi, rootaki kaari paapatziyantaperotaari Jatanaashi, riraga theeyachari jeekatsirika jaka.

<sup>5</sup> Rooma reentsitetakari irira riraga amatawitantatsiri, rootaki ikenkithashiryanta kawori ikoyiri atziri. Ikemijantawakiri atziri rirori.

<sup>6</sup> Omaantakya naakapaeni nosheninkatakari Tajorentsi, rotyaanteyakanani niyotaantyaariri atziripaeni kyaaryooperotatsiri. Raapatziyakae maawaeni iyotziriri rirori, rootaki ayotantariri okithaatakaakari Ishire Tajorentsi: rowaga yoteeriri kyaaryooperotatsiri. Riraga kaari iyoterini Tajorentsi, tee ikemijantana, rootaki ayotantariri rirotaki amatawitanantiri.

### *Thame anintaperotawakaya*

<sup>7</sup> Nonintaperotanewopaeni, thame anintaperotawakaya. Rirotaki Tajorentsi itaperotakawori riyotaakae anintaperotawakaantyari. Aririka anintaperoteri paashinipaeni, aakaperotaki reentsitepero Tajorentsi,

<sup>8</sup> riraga kaari nintashirereperotziri aapatziyariri Jesoshi, tee reentsitetari Tajorentsi: reentsitetyaaririkami, aritaki ikimitakyaarimi rirori, tema ashi royo inintaperotantzi.

<sup>9</sup> Rootaki ayotantariki inintaperotakae, rotyaantakiri Itomi rapintzite kipatsikika ikamawentakae rowawijaakotantakaeri, akanteetatyeyaanai ajeekimotantyaariri.

<sup>10</sup> ¿Ninka nintaperotantatsiri? Tee aaka anintaperotziri Tajorentsi, inta inintaperoteyakaeni rirori. Rotyaantakaeri Itomi, ikamawentakae, rowawijaakotantakaeri ikowashitaka. Iroñaaka tee ikenkithashiryagaero Tajorentsi antawitarri, inta ipeykottero eero rowashironkagae: tema riraga Itomi ipinawentakaero okaatzi antani janta koroshiki.

<sup>11</sup> Ñaakiro, nonintaperotanewo, inintaperotakaeroña Tajorentsi. Rootaki okameethatantari anintaperotawakaya aakapaeni.

<sup>12</sup> Tektsi ñeerini Tajorentsi, omaanta aririka anintaperotawakaeya, kijokiro rowanakae irira, imatakaakae akimitakari, rootaki eekiro aatatyne anintaperotantanakariri.

<sup>13</sup> Rotyaantakaero Ishire, ikithaatakaero, omatakaakae akimityaari rirori. Rootaki ayotantariki akempiyaminthatarri.

<sup>14</sup> Rotyaantakiri ashitakaeri Itomi jaka kipatsikika rowawijaakotantakaerori maawaeni atziri kaari kameethatatsi antakiri. Noñeyakirini, rootaki iroñaaka nokamantakotantakariri.

<sup>15</sup> Akanterika: "Rirotaki Jesoshi Itomi Tajorentsi", kijokiro rowanakae Tajorentsi. Eejatzi akimitya aari, kijokiro owanakiri: rootaki akimitawagaeyantyaarini maawaeni.

<sup>16</sup> Ari ayoperotaki inintaperotakae, tema aapatziyakawo. Ashi royiro inintaperotantzi. Aririka ashī oyiro anintaperotawakaya aari, akempiyaminthatari Tajorentsi, eejatzi ijeekakaakae kameetha akimitakari rirori.

<sup>17</sup> Paata aririka akamae, eero athaawantawaari Tajorentsi. Aririka aweshiryaaawentyaari, ayotanaki anintaperotakiri aari, aritaki amonkaatakari riraga Jesokirishito.

<sup>18</sup> Aririka ayoperotaki anintaperotakiriroña kameetha eejatzi akemijantaperoteri rirori, ḥiitakaka athaawanantyaariri? Ayoterikami ari rowashironkakae, tema aritaki athaawantakyaaarimi. Riraga thaawantariri Tajorentsi, tekiraata inintaperotziri eejatzi tekiraata ikemijantaperotziri: rootaki ithaanawantakari.

<sup>19</sup> Ritakae Tajorentsi inintaperotakae, thame anintaperoteri aari iroñaaka.

<sup>20</sup> Ikanterika atziri: “Nonintashireperotziri Tajorentsi”, omaanta iki-jirrika atziri roonaririka, rivotaki theeri. Teerika inintaperotziri atziri, tekatsi ikanteri inintaperoteri Tajorentsi. Ņaakiro, eerorika imatziro inintaperoteri atziri iňaapijintziri, ḥtsika ikantyaaka inintaperotantyaariri Tajorentsi? Kaari iňeetzi rirori.

<sup>21</sup> Ajaa, iroka ikaminaakaeri irira: “Aririka anintaperoteri Tajorentsi, eejatzi akimiteri atziripaeni, anintaperoteri rirori”.

## 5

### *Okaataki 3 rirotakaakaeri Jesoshi rirotaki Rotyaantanewo Tajorentsi*

<sup>1</sup> Aririka aytakiri Jesoshi rirotaki Rotyaantanewo Tajorentsi aaka reentsite Tajorentsi. Tema owaňaakaero ashire rowaga Ishire rirori. Aririka anintaperoteri ashitariri, anintaperotzityaari eejatzi maawaeni reentsitepaeni, riraga owaňaakiri ishirepaeni.

<sup>2</sup> Aririka, akemijantaperotero ikantakaeri Tajorentsi, amonkaatakari anintaperoteri, rootaki ayotantyaari anintaperotziri maawaeni reentsitetaytarni.

<sup>3</sup> Anintaperotziririka riraga Tajorentsi, akemijantaperotero ikaminaakaeri. Tee opomeentsitaperota anteniri ikantakaeri.

<sup>4</sup> Aririka rashitakae riraga Tajorentsi, eero oyaatziri theenkantatsiri. Ameentaperotakari Jesoshi, rootaki anaakotantakariri riraga theenkantatsiri: kaari oyaatantari.

<sup>5</sup> ḥNinka kaari oyaatziriri theenkantatsiri? Tema rirotaki iyoperotakiriri Jesoshi, kantatsiri: “Jesoshi rirotaki Itomipero Tajorentsi”.

<sup>6</sup> Paerani, ipokantapaakari Jesokirishito kipatsikika, ikaawoshitawentakari Tajorentsi iňaaki, eejatzi ikamawentakae, ayotantakari irira rirotaki Rotyaantanewo Tajorentsi. Tee apatziro ikaawoshitawentakari Tajorentsi eejatzi ikamawentakae: rapaatawentakae riraa. Eejatzi iyotaakae Ishire Tajorentsi tsika ikantari. Kyaaryoopero iyotaakae.

<sup>7</sup> Janta jenokinta okaatzi 3 kantakotziriri irira Jesoshi rirotaki Rotyaantanewo Tajorentsi: riraga Iriri, rowaga Iwaperite Tajorentsi, eejatzi rowaga Ishire.

<sup>8</sup> Eejatzi jaka kipatsiki eenitatsi 3 kantakotziriri: rowaga Ishire, ikaawoshitawentakari Tajorentsi, eejatzi riraa rapaatawentakae ikamawenantakaeri. Omonkaatawakaaka, iyotakaakae tsika ikantari riraga Jesoshi.

<sup>9</sup> Rooma aapatziyakawo ikantakaeri atziri, omaanta ranaakotakiri Tajorentsi atziri, kyaaryo ikanantaki rirori. Ikantakoperotakiri Itomi.

<sup>10</sup> Aririka aapatziyaperotakyaari Itomi, akenkithashireperotakiri, eejatzi anteniri ikowakaakaeri. Riraga kaari aapatziyari Tajorentsi, tee

ikenkithashiriilo ikantakotziriri Tajorentsi Itomi: itheenkakiri rirori, tee rantziniri ikowakaakiriri, inta iitziri rirori theeyinkari.

<sup>11</sup> Aapatziyakari aaka Itomi, rootaki ijekakaanteeri Tajorentsi aaka jaka iroñaaaka eejatzi iinja janta jenokinta, akanteetatyeyyaani.

<sup>12</sup> Aritaki akanteetatyeyyaani añaagae maawaeni ayoperotziri Itomi eejatzi akempiyaminthatar. Riraga kaari iyoperotziri, kaari owañi ishire rootaki tekatsi ikantya rareetya janta jenokinta.

### *Pamanapiinteri Tajorentsi*

<sup>13</sup> Paapatziyakari Itomi Tajorentsi, iroñaaaka nojankinatzimiro piyotantyaari pikanteetatyeyyaani añaagae pishire iroñaaaka eejatzi iinja janta jenokinta.

<sup>14</sup> Eero apashiwenta akenkithatakayeri: eenitatsi ikowakaakaeri antapi-inteniriri. Aririka anethayeri oetarika ikowakaakaeri tema ayotaki aritaki ikemijantakae.

<sup>15</sup> Ayotaki oetarikaakanteriri, ikemijantakae. Eejatzi ayotaki aritaki imatakaakaero iroka akantakiriri.

<sup>16</sup> Aririka piñeeri piyemijantzinkarite rantziro kaari kameethatatsi, omaanta teerika itheenkiri Tajorentsi, pamanakowentyaari ramitakotanteeri rookantyaawori kaari kameethatatsi rantziri ijekantyaari kameetha. Eenitatsi rantakiri paashini theenkantaperotatsiri: aririka piñaakotakiri, piyotanaki riyaate rirori paamariki kaari tsiwakanitatsini. Tee nokantzimi pamanakowentyaari irinta.

<sup>17</sup> Tee okameethaperotzi antero kaari kameethatatsi, omaanta eero aetakaashita maawaeni antzirori kaari kameethatatsi riyaate paamariki kaari tsiwakanitatsini.

<sup>18</sup> Ayotaki aririka rashitakae Tajorentsi, tee antapiintziro kaari kameethatatsi. Rookakowentakae Itomi, tekatsi ikantee Jatanaashi rowashironkaeri.

<sup>19</sup> Ayotaki asheninkatakari Tajorentsi. Omaanta maawaeni theenkantsiri, ipinkathariwentakiri iwinkatharite kamaariipaeni.

<sup>20</sup> Ayotaki ipokaki paerani Itomi Tajorentsi, rirotaki iyotakaakaeri, ayoperotantariri riraga Tajorentsipero. Tema eejatzi Jesoshi rirotaki Tajorentsipero. Rowañagaeyakaeni, akanteetapaatyeyyaani añaagaeyapaeni janta jenokinta. Tema akempiyaminthari Tajorentsi eejatzi Itomi.

<sup>21</sup> Kyaaryo Jesoshi rirotaki Tajorentsipero. Rootaki niyotaanewo, kyaaryooowa pikemijantaperotzirokari iitajorentsitsashitayitarini.

Ari okaatzl.

Naaka jankinatzimiro:

Jowa

## RAPIITAKIRO JOWA ROJANKINATZINIRI RIYOTAANEWO

**1-2** Nokoyi niwethatemi, choeni, tsikarika pikanta pijeeki. Eejatzi niwethatyari peentsitepaeni. Naaka jewawentziriri ayemijantzinkarite jaka. Niyotaki, choeni, riyoakimini Tajorentsi eeroka eejatzi peentsitepaeni piyotantakariri. Kyaaryo, nonintaperoeyakimini. Tee apatziro naari nonintaperoeyakimini, eejatzi ikimiteeyakani maawaeni ayemijantzinkarite: inintaperotakimi. Osheki aapatziyakawo ikantziri Tajorentsi, aritaki akan teateyyeaani, tema kyaaryooprotaki okamanteeyakaerini.

**3** Osheki inintaperoeyakaen Pawa Tajorentsi, eejatzi Itomi, riraga Awinkatharite Jesokirishito, kyaaryo rootaki iroka riyotagaeyakaerini. Eejatzi ikanteteatyeyaaani ineshironkatee, rowawijaakotakae, ijeekakagae kameetha.

### *Enitatsi iinja oshekini theeyakowentyaarini Jesokirishito*

**4** Noñaayitakirini apaanipaeni peentsite osheki niweshiryaaawentakari. Tema kameetha ijeekayitzini, ikemijantaperotakiro kyaaryootatsiri riyotagaeyakaerini Ashiteeri Tajorentsi, eejatzi rantziniri rirori maawaeni ikowakagaeyakaerini.

**5** Iroñaaka, choeni, nokowaki nokenkithashiryaakagaemiro ritakaeri Tajorentsi riyotaakaeri paerani: okameethatzi anintaperotawakaeya, maawaeni. Tee naaka ityaawoni niyoteemiro iroka.

**6** Aririka anintaperoteri Tajorentsi, amonkaateniri maawaeni ikowakaakaeri. Rootaki ikowakagaeyakaerini ashi oyiro anintaperotawakaagaeyaaani, maawaeni, akyaaryooentero. Tema rootaki ikanteeeyakaerini paerani.

**7** Enitatsi iroñaaka oshekini amatawitantsiri, riyotaantziro theeyantsi, ikanteeeyini tee ipoñeeye Jesokirishito jenokinta, tee ratziritaperotapaaki jaka kipatsiki. Kaari irira Rotyaantanewo Tajorentsi inta irira atziriper. Riraga kanteentsiri iroka rirotaki theeyakowenttariri Jesokirishito, ikijaneentakiri; tee ikoyi raapatziyaari.

**8** Paamayaarira: ramatawitzimikari. Kameetha pikyaaryooentero pantapiinteniri Tajorentsi ikowakaakimiri; aririka pikantyaani, eero patsipetashitawo, ari ijeekakagaeyemini janta jenokinta. Omaanta paamayaarira riraga kowatsiri ramatawitemi: aririka poyaatawitaneeyaaari, patsipetashityawaao maawaeni pantawitakanariri Tajorentsi, eero ijeekakayimi janta jenokinta.

**9** Kyaaryoowa, pookirikarira Jesokirishito: eerorika eekiro piyaatatye paapatziyeyawoni riyotaakaeri rirori, tekira piyoperotziri Tajorentsi. Rooma aririka pikantyaani pikenkithashireero riyotaakaeri, piyotziri irira eejatzi Ashitariri: kijokiro rowakimi Ashitakaeri eejatzi Itomi.

**10** Riyaatashitemirika atziri riyoteemi, okameethatzi piyotawakiri kameetharika riyotaakopiintziri riraga Jesokirishito. Teerika okameethatzi iroka ikowawitari riyoteemirimi, eero paakameethatawakiri: eero pijeekakayiri pipankoki, eerokya pikemijantziri.

**11** Aririka paakameethatawakiri, aritaki pikaatakiri eerori piyotaantziro theeyantsi. Tee okameethatziroña.

### *Riweyaantakawo rojankinari*

**12** Enitatsi paashini osheki nokowaki nokantemirimi, omaanta tee nokoyi nothotyaayemiro nojankinatemiro. Nokowaki nopoki nareetemi. Aririka

añaawakagaeyaani, nothotyeemiro nokamantemi maawaeni. Eejatzi aki-moshireeyantanakyaarini maawaeni.

<sup>13</sup> Eeniro jaka eentsitepaeni pirento. Tema riyoyaakiri Tajorentsi. Ri-wethateeyakimini rirori. Ari okaatzi.

Naaka jankinatzimirori:

Jowa

## RAPIITZINIRI EEJATZI ROJANKINATZINIRIRI JOWA RIYOTAANEWO

<sup>1</sup> Nokoyi niwethatemi, Kaayo, tsikarika pikanta pijeeki. Naaka Jowa, jewawentziriri ayemijantzinkarite jaka. Kyaaryo, osheki nonintaperotakimi.

### *Kameetha pineshironkateri ayemijantzinkarite*

<sup>2</sup> Nokamantemi, nonintaperotanewo, namanapiintakiri Tajorentsi, nokantakowentapiintakimi: nokantziri itajonkakowentemi kameetha pijeekantyaari, eero agaemi mantsiyarentsi. Niyotaki paapatziyaperotakari, eejatzi nokantakowentzimi pishintsiwathataperotantyaari eejatzi pishintshireperotantyaari.

<sup>3</sup> Eenitatsi areetapaenchari ayemijantzinkarite, ikamantapaakina pikyaaryoowentziro pijeeki kameetha pantapiintziro kyaaryooperotatsiri, eejatzi paapatziyaperotakari Tajorentsi, rootaki nokimoshirewenantakimiri.

<sup>4</sup> Nonimoshireperotaki nokemakotantakariri niyotaanewo ikempoyaaperotakiro kameetha okaatzi niyotaakiriri paerani. Tema rootaki kyaaryooperotatsiri. Kijokiro rowakiro okantziri iñaani Tajorentsi.

<sup>5</sup> Nonintaperotanewo, pikyaaryoowentaperotakiro pikaminthagaeyakirini ayemijantzinkarite, pithotyaakiri: riraga poñaacharipaeni paashinikipaeni nampitsi, omawitya kaari piyotzi. Okameethataki.

<sup>6</sup> Ikamantakina naaka eejatzi maawaeni ayemijantzinkarite jaka, osheki pinintaperoyerawakirini. Aririka rareetemi eejatzi pipankoki, okameethataki pamitakoteri; aririka ryaatanee, pipaeyerawakirini koetyeemotariri: rootaki ikowakaakimiri Tajorentsi.

<sup>7</sup> Ikinakinayitanakini ikenkithatakopiintziri Jesokirishito, tekatsi rawakinirini riraga kaari aapatziyariri,

<sup>8</sup> rootaki okameethatantari etakoeyaarin aaka, amitakoeyerini imatantyaawori ikenkithatero rowaga kyaaryooperotatsiri ikantziri Tajorentsi: rootaki akimtantawakaantyaari antakiniri Tajorentsi.

<sup>9</sup> Eenitatsi nojankinatawitanakanariri maawaeni ayemijantzinkarite janta, omaanta riraga Riyooterijeshi tee ikoyi raapatziyawakyawo eejatzi tee ikoyi ipinkathatena. Ikowaperotaki rirotakiita jewawenterini kemijantzinkaripaeni janta.

<sup>10</sup> Nareetanteeyemirini nokenkithatakagaeyapaakimini tsikarika ikantari: itheeyakotakina, ikantzimatakina. Eejatzi, rareetantawitakariri ayemijantzinkarite janta, tee raakameethatawakiriri. Eejatzi ikijakirri riraga akameethatawakiriri areetachari, eejatzi tee ikowakagaeyirini itsipatyaari janta ipiyotapiintaga aapatziyariri Jesoshi.

<sup>11</sup> Nonintaperotanewo, tee okameethatziroña iroka rantayitakirini riraganki: eero poshiyakotari. Inta poshiyakotyaari antzirori kameethaperotayitatsirini. Riraga antapiintayitzirorini kameethatatsiri, riyotziri Tajorentsi; riraga antapiintayitzirorini kaari kameethatatsi, tee riyotziri.

<sup>12</sup> Kyaaryo, ikameethaperotaki Rimiiteyo. Rooma iñaaperoyerawakirini maawaeni aapatziyariri Jesoshi jaka ikameethatz, eejatzi naari noñaaperotakiri ikameethatz. Piyoperotzi okaatzi noñaawaetapiintziri rootaki kyaaryooperotatsiri.

### *Riveyaantakawo rojankinari*

<sup>13</sup> Eenitatsi osheki nokowawitakari nokamantemirimi, omaanta tee nokoyi nojankinatemiro maawaeni.

<sup>14</sup> Niyotaki rooteentsi noñeemi: añaawakagaeyaarika paata janta, ari notho-tyeemiro, nokamantemiro maawaeni.

<sup>15</sup> Nokowaki Tajorentsi ijeekakayemi kameetha. Riwethateeyakimini maawaeni ayemijantzinkaritepaeni jaka. Eejatzi ayemijantzinkaritepaeni janta, niwethateeyarinii, maawaeni.

Naaka jankinatzimirori:

Jowa

## RIRAGA JOORASHI ROJANKINATZINIRIRI IYEMIJANTZINKARITE

<sup>1</sup> Nokoyi niwethatemi, noyemijantzinkarite, tsikarika pikanta pijeeki. Naaka Joorashi jankinatzimirori iroka, naaka pankinatanariri Jesokirishito; naaka rirentzi Jantyaako. Kyaaryo niyotakimi riyooyeyakimini Pawa Tajorentsí, rootaki paapatziyeeeyantaririni, eejatzi osheki intintaperoeyakimini rirori. Ikempoyaawenteeyakimini, piñaanteeyaaaririni iinja Jesokirishito.

<sup>2</sup> Nokowaki osheki ineshironkateeyemini, kameetha ijeekakagaeyemini. Eejatzi nokowaki paakameethatawakagaeyaani maawaeni, osheki pin-intawakagaeyani.

### *Paamayaarira kowatsiri ramatawitemi*

<sup>3</sup> Piyoteeyakini osheki nonintaperoeyakimini. Tema rowawi-jaakoeyakaeni Tajorentsí. Inkaaganki nokenkithashiryaaawitakawo nokamantemiromi tsika ikantakaeka rirori rowawijaakotantakaeri: itajonkawenteeyakaeni, ikaminthaaake, maawaeni; omaanta iroñaka eero nokamantzimiro iroka. Tema eenitatsi paashini nokoyi nokamantemiri. Iroñaka nokantzimi: nokowakaakimi pikyaaryooowentero paapatziyaperotaawo riyotagaeyakaerini Tajorentsí paerani, rooma tee opaashinitzi. Iroñaka eero paapatziyari riraga paashinipaeni kowaeyawitacharini ramatawiteeyemini.

<sup>4</sup> Eenitatsi riraga kantatsiri: "Naapatziyari Jesoshi", omaanta ramatawitanzi. Riyotzi ineshironkaeyakaeni Tajorentsí, rowawijaakoeyakaeni. Omaanta eejatzi ikantashiteeyakimini riraganki: "Okameethatzi anteeyeroni oetarika akowaeeyirini, eero ikjee rirori", omaanta ramatawitahtzimi. Tee ipinkathatziri Awinkatharite Jesokirishito, rootaki riyaatantyaari iinja paamariki kaari tsiwakanitatsini. Tema aritaki okantzi Iwaperite Tajorentsí.

<sup>5</sup> Eeniropiyoperoyakirini, omaanta nokoyi nokenkithashiryaaaka-gaemiro eejatzi. Paerani osheki rashironkaeyakaní maawaeni joriyyopaeni janta Ejipitoki, omaanta rowawijaakoeyakirini Tajorentsí, ragaeyaneerini paashiniki kipatsi. Omaanta joriyyopaeni rirotaki theenkiriri Tajorentsí, rootaki rowamaantakaririni maawaeni riroripaeni.

<sup>6</sup> Eejatzi paeraniperoroña ijeekawitani jenokinta ronampiripaeni Tajorentsí, ikameethaperowitani, omaanta ipiyathatantakariri irira. Iroñaka tee ijeekanee janta okameetheetyaaperotzinta, inta rookaeri janta jaawiki, otsiteniperotakinta. Rotsiparyaaperotanakari rirori. Aritaki ijeekaki janta roojotakitya kareenathaki, roojatzi iinja aririka omonkaatapaakya kitejittatsiri ikantakowenantyaariri, rotyaanantyaariri paamariki kaari tsiwakanitatsiri.

<sup>7</sup> Eejatzi ikimiwitteeyakani riraga joroombajatzini eejatzi komoora-jatzini, eejatzi maawaeni isheninkapaeni, osheki ranteeeyakironi kaari kameethatatsi. Ithawinateeyakawoni iyashiyanipaeni, ipiyaankashitawakagaeyakaní; shirampari rantatenkatawakagaeyani ishiramparinkaetekei eejatzi omatzitanakawo tsinani roori. Rootaki rowashironkaanteeyakaririni Tajorentsí, maawaeni; rootaki ayotantakari ari ikemaatsitakyaawo paamari kaari tsiwakanitatsini, tema ro rowashironkagaeyantyaaririni maawaeni antapiintzirori kaari kameethatatsi: ikanteetatyeyaaani ikemaatsityaawo paamari.

<sup>8</sup> Omaanta tee ikenkithashireeyani riraga amatawitatatsiri. Ikantatyami ithawinatawo iyashiyani, rantatenkatawakaaka ishiramparinkakteki eejatzi; itheenkakiri Iwinkatharite riraga Tajorentsi, ishirontawenteeyakarini; ikantzimateeyakirini riraga kameethari ronampiripaeni Tajorentsi. Tema maawaeni iroka owaariperotakiri ishireki.

<sup>9</sup> Paeraniperoroña ikanteetzini: ikamantakarini Moeseeshi, ikowawita Jatanaashi raanakirimi janta iwatha paamarikinta kaari tsiwakanitatsini. Eejatzi ikimitaka Miyiiri, apaani jewatatsiri ronampiripaeni Tajorentsi: ikowakirimi raanakirimi rirori jenokinta. Iñaanatawakaanteeyakarini. Riraga Miyiiri Riyotaki tee okameethatzi ikantakowenantaariri Jatanaashi, eejatzi tee okameethatzi itheeyakowentyaari, rootaki kaari rakakontantariri. Apatziro ikantziri: "Irira Tajorentsi piyatemi". Rootaki ikantakiriri.

<sup>10</sup> Noyemijantzinkarite, riraga kowatsiripaeni ramatawiteeyemini tee ryotziro ijeki kameetha, rootaki ikantzimatanteeri aka aririka ajeeki kameetha. Tee afiiro ryotantari, ikimiteeyakarini tsimeri: rantashiteeyawoni oetarika ikoyiri. Rootaki rowashironkaeyantyaaririni Tajorentsi, rashironkaeyakaani.

<sup>11</sup> Ashironkaamatsiterini! Ikimiteeyakarini riraga Kayeeni, riraga owaakiririni rirentzini. Ikimiteeyakarini riraga Waraamini: ipinateetakiri koriki, rootaki ranantakawori kaari kameethatatsi. Ikimiteeyakarini eejatzi riraga Koree eejatzi isheninkaapeni: ipiyathatakari paeran Moeseeshi. Tema rootaki rowashironkaantitakaririni Tajorentsi. Maawaeni amatawitatatsiri eejatzi ikimiteeri iinja rowashironkaeteri.

<sup>12</sup> Pamine, aririka pipiyotapiinteeyaani powaeyaani, pikowaeyawitani pinintashireperoeyawakagaeyaanimi, pikaminthaawakagaeyaanimi. Omaanta ikaateeyapaakimini riragankipaeni, rootaki kaari pantaperotantawo kameethari. Tee ryotzi rirori ipashiwentya, osheki rowaagatashita, tee ikenkithashiriyo paashinipaeni. Irirapaeni roshiyari shentziriri rowishate kaari owaakari kameetha rowishatepaeni inta apaniroeni rowaagata rirori. Osheki iñaawaetashwaeta wero, wero, wero, omaanta tee ramitakoeyemini. Ikimitashitakawo menkori amatawiteeyemini: amirorika antawo tampyaa, piitakaashitawitakawo opariyatyeemi inkani, omaanta eero opariyi. Ikimitakawo inchato kaari tzimatsi okithoki, tee okameethatzi akapatero; inta okameethatzi atoyer, apiyoteero, atayero.

<sup>13</sup> Tema piñaapiinteeyironi othaphyaakiini opitsishimoretzi, tee kameetha okanty: ari ikimiteeyani riroripaeni, tee okameethatzi rantayitzirini, okameethatemi ipashiwentakagaeyawonimi. Roshiyakaantawitakariri omnipokiro iyotakaemirimi tsika pikine, omaanta ramatawiteeyakimini. Tema itzimpinatashitaka, ryaatzzi otsitenitzinta. Kimitaka irika ompokiro, riraga amatawitatatsiripaeni ryaateeyanakini rirori janta otsitenitaperotzinta rowaga paamariki kaari tsiwakanitatsini, ikanteetatyeeyaani ashi royironi ijeeki janta.

<sup>14</sup> Paeraniperoroña ikenkithatakotakirini Enoko, riraga icharineeteni Araani, ikantzini: "Ñaakiro, iinja ipokae Awinkatharite, ikaateeyerini oshekiperoroña ronampiri, riraga kameethaperotatsiripaeni.

<sup>15</sup> Ikantakotakaanteeyapaakirini maawaeni kaari kameethatatsini. Riyoteeyerini maawaeni theenkaeyiririni: ipiyatheeeyawitakarini, kantzimaeyawitakaririni maawaeni, rootaki rowashironkagaeyantyaaririni".

<sup>16</sup> Ari ikijashireeyanakani, iñaawaepookiteeyanakini, ikantzimaeyanakirini atziri, ikowaperotakiro rantapiintero kaari kameethatatsi, osheki rajagaatya, tema ikowaki iñaaperotantyaariri ikameethatzi atziripaeni

imatantyaariri ramatawitantyaariri.

***Ikaminaakiri Joorashi aapatziyariri Jesoshi***

<sup>17</sup> Omaanta, noyemijantzinkarite, osheki nonintaperoyakimini, rootaki nokowakaantzimirori pikenkithashiryaaoperotero ikantayitzimirini rotyaantanewopaeni Awinkatharite Jesokirishito.

<sup>18</sup> Tema ikamanteeyakimini: "Inja piñaaperoeyawakirini theenkantaperotatsiri rantashiteeyawoni oetarikapaeni ikoyiri riori".

<sup>19</sup> Riroteeyakini amatawiteeyiririni paashinipaeni, rootaki ikijawakaanteeyarini; eejatzi rinashiteeyantaririni osheki itheenkanteeyini, tee okithaataakaari Ishire Tajorentsii.

<sup>20</sup> Omaanta eeroka, nonintaperotanewopaeni, paapatziyaperooyaarini Tajorentsii tema kameethaperotaki, rootaki pimataperoeyantaaworini pijeki kameetha. Pikowaperotero Ishire iyotaaperoeyemini pamaneri riori.

<sup>21</sup> Pikowaperoyeni pikenkithashiryaakopointerii Tajorentsii. Piyoteeyakini ineshironkateeyimini Awinkatharite Jesokirishito, ragaeyemini janta jenokinta, pikanteetatyeyaaani pijkeekimoteeyapaerini.

<sup>22</sup> Pikaminthaaperooyerini riraga kaari yoteeyiririni Tajorentsii: piyotaaperooyerini.

<sup>23</sup> Pawijakotakayeri paashini atziri, taachanimi janta paamariki kaari tsiwakanitsatsi. Kyaaryoowa, pikimitarikari riraga paapatziyaka-gaejakaririnira. Eero pantzimaetawo okaatzira rantziri riori.

***Thaamentaantsi***

<sup>24</sup> Athaamentawentyaari irika matzirori ikempoyaawentee eero otzimanenanta kaari kameethatatsi. Athaamentawentyaari irika ikimoshire-takaanee atsipatyari.

<sup>25</sup> Athaamentawentyaari apintzi Tajorentsi, owawijaakoteeri. Irira eenitatsi rowaneenkawo, pinkathari iiteetziri, omaperotaty eenitatsi itajorenka, pinkatharipero rini, rirotaki itawori ijeki, tekiranai otzimini kipatsi, roojatzi ikanta iroñaka ijeki, ashi rowatyeeroni ikanteetatyeyani ijekanakya. Aritaki okantyaari.

Naaka jankinatzimirori:

Joorashi

# ROÑAAGAYITAKIRINI JESOSHI JOWA OETARIKAPAE NI AWIJATSINI IINJA OTHONKANTAPA AKYAARI KIPATSI

## *Itanakawo Jowa rojankinari*

<sup>1</sup> Ritaperotakawo Tajorentsi ikamantakiri Jesokirishito oetaka awijatsini iinja, roojatzi rowaagantakanariri irira ronampiri, roojatzi roñaagantakinawo naari. Naaka Jowa riraga antziniriri Jesoshi okaatzti ikowakaakinari. Tema koñaatziro noñaakiri oetaka rootzimateentsi awijanaki. Iroñaaka nowagaeyemironi eerori.

<sup>2</sup> Naaka Jowa, jankinatzimirori maawaeni noñaakiri eejatzi maawaeni nokemakiri. Tema ikantana ronampiri okaatzti ikantakiri riraga Jesokirishito eejatzi okaatzti ikantakiri Pawa Tajorentsi.

<sup>3</sup> Okameethatzi iñaanateeyeroni maawaeni atziri iroka ñaanamentotsi eejatzi okameethatzi ikemero maawaeni atziri okaatzti okantziri. Omaanta eero ikemashitawo, inta ikenkithashiryaa kotaawo ikimoshirewentero. Pamine, eero ojamanitzi awijanaki maawaeni iroka nokenkithatakotzimiri.

## *Rojankinateeyakinirini aapatziyariri Jesoshi janta 7 nampitsiki*

<sup>4</sup> Naaka Jowa jankinatzirori iroka. Nojankinateeyakinirini jeekatsiri-paeni jaka piipatsitekika owaero Aashiya,\* riraga aapatziyeyaririni Jesoshi jaga 7 nampitsiki. Nokoyi niwethatemi eerokapaeni tsikarika pikanta pi-jeeki. Eeniftasi rirori, roojatzi ikanta: paerani ijeekita, roojatzi iroñaaka, roojatzi ikantyaani ijeekini iinja. Nokamantakiri: "Pineshironkateyelerini noyemijantzinkarite janta Aashiyaki, kameetha pijeekakagaeyerineri". Eejatzi ikaatakira 7 ronampiri Tajorentsi rowaga amitakotapiinteeyerini, inewootakiri iwinkatharimentoki tema ikowaki eejatzi ineshironkatzimi Tajorentsi eejatzi ijeekakaakimi kameetha.

<sup>5</sup> Eejatzi nokamantakiri Jesokirishito: tema kameetha ika-manteeyakaeroni aari ikantakiriri Tajorentsi. Rirotaki itawori ipiriintanara, eero ikamae eejatzi, tema eejatzi ipinkathariwenteeyakirini pinkatharitawitachari jaka kipatsikika.

¡Ol! ¡Thame añaaperoteri Jesoshi!

¡Osheki inintashireperotanteeri; tema ikamawentakae raapithatantakaerori kaari kameethatatsi antakiro!

<sup>6</sup> ¡Tema ii teeyakaeni amitakotantaniri aririka reewawenteeyeeni! Eejatzi ii teeyakaeni amanakotariri paashinipaeni atziri riyotanteriri Tajorentsi.

¡Ol! ¡Thame añaaperoteri! ¡Tema akowaki intsipaete reewawenteri irira maawaeni atziri! ¡Tema akowaki ikanteetatyeyaaani reewawenante! Eejatzi akowaki rantero intsipaete. Aritaki okantyaari.

<sup>7</sup> ¡Pamine! Kyaaryo ikinapae menkoriki riraga Jesoshi. Aritaki añaeyawaerini aaka maawaeni jaka kipatsiki. Eejatzi iñaeyawaerini kentakoeyawitakaririni paerani. Rootaki ithaawanteyawakayaarini maawaeni theenkayayiririni, riragaeyanakyaani, jmm, jmm. Kyaaryo, aritaki okantyaari intsipaete.

<sup>8</sup> Tee ipaashinitapiintzi Awinkatharite, ikanteetatyaaani itajorentsitaki, roojatzi ikantani: paerani, eejatzi iroñaaka, eejatzi ikantyaani iinja.

\* <sup>1:4</sup> Paerani ijeekanaki Jowa Aashiya ari iroñaaka ii teetziro Toorokiya.

Ikantzi: "Naaka itzitaworini nojeeekini, roojatzi nokantani nojeeekini, nota-jorentsiperotzi".

### *Ritakari iñaakiri Jowa*

<sup>9</sup> Ari, noyemijantzinkarite, akimitawakagaeyakan: aapatziyeyeyakarini Jesoshi, rootaki rowashironkaapiinteeeyantakaeri theenkantatsiri. Ipinkathariwenteeyakaeni Jesoshi, rootaki amateeyantakaworini eshiwentakiro akemaatsitawatayaaari irira. Nokenkithatziro iñaani Tajorentsi, tema nokenkithatakotakir Jesoshi, rootaki rookanteetakinari jaka othampishiki iiheetziri Paatzimosh.

<sup>10</sup> Apaani tominkoki omataakaolina Ishire Tajorentsi nokenkithashiryaap-erotanakiri Tajorentsi, roojatzi nokemantakariri ikenkithatakaakina. Iñaanatakina, ikimitakari iwaemanka tziwoorentsi: koñeenkataki iñaani,

<sup>11</sup> ikantakina:

—Pojankinatero maawaeni noñaagayitemirini, roojatzi pipakaanteri aapatziyeyyanarini janta Ejeesoki, Eshimiirinaki, Peerikamoki, Tziyateeraki, Jaarireshiki, Jirareerejyaki, eejatzi Raworisheeyaki. Okaatzinta nampitsi 7.

<sup>12-13</sup> Nopithokashitanakari riraga kenkithatakaakinari; ari noñaakotakiri ijekantari itamorekatheeta, ikaataki 7, riwetsikaetziro ooro. Niyanke noñaakir rojatekaka kimitariri atziri. Rirotaki Jesoshi, riraga poñagaenchari jenokinta paerani, ikoñaatapaaki jaka kipatsikika. Ikithaatakawo eepirothatzi iithaari rooperori, kimitawori ikithayitarini pinkathari; ojeekaki ichopineeki kimiwitawori ishirikathakiro, riwetsikaetziro ooro.

<sup>14</sup> Okitamaeshitaperotaki iishi, okimitakawo ampeeranki eejatzi kitamaari menkor: kitamaariroña. Okimitaka roki amoreki kiraamenkyaanikitaki. Tema riyotziro maawaeni, oetarikapaeni akenkithashiryaayitzirini.

<sup>15</sup> Oshipakiryaki iitzi kareenatha. Ishincheenkatzi iñaawaetzi, ikimitakawo antawo opareenkaayi osheki ojootzi, jooo.

<sup>16</sup> Kimitaka roerikakiri rakoperoki 7 ompokiro; okontetapaaki ipantekira ithatyamento, othoyempitzi apite omitzikaaki; oshipakiryaperotaki ipoo, ikimitakari oorya, ishipakiryaperotaki, shipakiririri.

<sup>17</sup> Noñaantakariri, okimiwitaka nokamanaki notyeemotanakiri iitziki, teree. Tema nothaawantanakityari. Roojatzi ipampitantakina rakoperoki, ikantakina:

—Eero pithaawantana. Naaka Jesoshi riraga itaperotanakawori maawaeni, tema najaryaakawo maawaeni paerani tekiraní niwetsikiro kipatsi. Eejatzi naaka oweyaantawori maawaeni, tema aritaki nomonkaataki okaatzi najaryaakari.

<sup>18</sup> Ashi noyiro nañaaperotzi. Nokamaperowitapaenta, omaanta añaagaana eejatzi; iroñaaka nokanteetatyeyaaani nañe. Eero nokamae eejatzi. Naaka kantatsini tsika okaate ikame atziri; naaka kantatsini ninkarika jatatsini jenokinta eejatzi ninkarika jatatsini paamariki kaari tsiwakanitatsini.

<sup>19</sup> Iroñaaka pojankinatero iroka piñaakiri, rowaga awijatsini iinja.

<sup>20</sup> Iroñaaka nokamantemiro kantakotachari kaari piyotzi inkaaganki. Piñaakiri 7 ompokiro noerikakiri nakoperoki: roshiyakari riraga jew-awentziriri aapatziyeyyanarini janta 7 nampitsiki. Iroñaaka piyotaki noppinkathariwenteeyakirini. Eejatzi rowaga ojeekantari itamorekatheeta: oshiyakaawentakiri maawaeni aapatziyeyyanarini janta nampitsikinta. Iroñaaka piyotaki kijokiro nowaeyakirini.

—Noyempyaaminthari, nokowakimi pojankinateniriri riraga jewawentziriri aapatziyeeyanarini janta Ejeesoki iroka noñaani pikantziri: “Iroñaaka nokamantemiro naaka riraga oerikakiriri 7 ompokiro rakoperokira: riraga anashitachari janta ojeekantari itamorekatheeta, kaatatsiri 7.

<sup>2</sup> Nokantzimi: ‘Niyotakiro pantayitakirini, niyotakiro pipomeentsi-wentakinawo nokowakaakimiri, tee pijamaneentawo. Niyotakimi tee pishinetziri piyemijantzinkarite rantapiintero kaari kameethatatsi. Eniro jatashitawitzimiri kantashitawitachari: “Naaka Rotyaantanewo Jesokirishito”, omaanta piyotawakiri ikowawita ramatawiterimi aapatzianar: niyotaki tee pishinetziri ikenkithatakayemi.

<sup>3</sup> Niyotaki osheki pikemaatsitawentakina, omaanta tee pijamaneentawo, pantayitakinarini.

<sup>4</sup> Omaanta eeniro pookakiri apaani: paerani pinintaperotawitakina; omaanta iroñaakaroña tee pinintaperotanaana.

<sup>5</sup> Pikenkithashiryagaagaeyaaani tsika pikantari paerani owakirani paaptziyatakinari; tee pikimiteeyaani iroñaaka. Pikenkithashireeyeyaaani, petakotya, eejatzi pikimitanteeyaari pikimitaaga paerani, owakira paaptziyeeyakinani. Pikenkithashiryaperoteeya, pinintaperotanteenari eejatzi. Eerorika pinintaperotaana, eero añaawaeri aapatziyeeyanarini jaga pinampiki.

<sup>6</sup> Omaanta eenitatsi noñaaperotantakimiri: poonawo rantayitakirini oy-aateeyiririni Nikoraashi, rantashitayitakawoni kaari rayi. Eejatzi naari, noñaperotawo ranteeyiririni.

<sup>7</sup> Aririka pikoyi piyoperotero aritaki pikemaperotawakiro iroka nokamantzimiri. Paerani ojeekaki Ereeki inchato owañaantatsiri: aririkami royaawomi paeranijatzi, ikanteetatyeyaaanimi rañeemi. Iroñaaka eeniro kimitawitawori janta okameetheetyaaperotzinta, janta Tajorentsiki. Aririka kameetha pijejerkaeyeni eejatzi eekiro piyaatatyye pantapiintakinawo nokowakaemiri, okimitakya powakyaawo iroka chochoki jenokinta owañaaperoyemirini: kyaaryo pikanteetatyeyaaani pijejerkaeyeni janta jenokinta”.

Rootaki rojankinatakaakinari Jesoshi.

### *Rojankinateeyinirini aapatziyariri Jesoshi janta Eshimiirinaki*

<sup>8</sup> Eejatzi ikantakina Jesoshi:

—Enitatsi iroka pojankinateeyenirini riraga jewawentziriri aapatziyeeyanarini janta Eshimiirinaki: “Iroñaaka nokamantemiro naaka riraga Itaperotakawori maawaeni, tema najaryaakawo maawaeni paerani tekrani niwetsikironi kipatsi. Eejatzi naaka riraga Oweyaantawori maawaeni, tema ari nomonkaatero okaatzi najaryaakari. Nokamaki paerani, roojatzi nopersiintanaa.

<sup>9</sup> Nokantzimi: ‘Niyotakiro pantayitakirini, niyotakiro osheki pikemaatsitawentakina, niyotakiro pashironkaawentakina tektsi tzimimotemini; omaanta eero pipeyakotawo nopolinaperotemi janta jenokinta. Niyotaki osheki ikantzimateeyakimini riraga kimityaaranimi aapatziyeeyanarini. Ikanteeyawitan: “Naapatziyari Jesoshi”. Omaantakya, tee raapatziyeeyanani, inta raapatziyari rirori Jatanaashi.

<sup>10</sup> Kyaaryo, rooteentsi osheki pikemaatsityaawo, omaanta eero pithaayi. Riraga iwinkatharite kamaari romonkyaagakaantem iapaanipaeni eeroka omonkyaaagamentotsiki, ikowaki rookakayemiro paapatziyawitakinaga. Ojamanineentapaente osheki pikemaatsitayityaawoni oetarikapaeni. Ojamanineentapaente pikyaaryooowentenawo maawaeni nokamantakimiri,

roojatzi pikamantyaari; roojatzi nopolataperotemi, eejatzi pikanteetaty-  
eeyaa ni pañe janta nonampiki.

<sup>11</sup> Aririka pikoyi piyoperotero, iroñaaka powakempitaperotawakyaawo  
okaatzni nokamantemiro roojatzi panantakyaawo. Aririka kameetha pijeek  
eejatzi pantapiintenawo nokowakaemiri, eero piyatzi eerori paamariki  
kaari tsiwakanitatsini. Tema iroka oshiyawori pikame apite'".

Rootaki rojankinatakaakinari Jesoshi.

### *Rojankinateeyakinirini aapatziyariri Jesoshi janta Peerikamoki*

<sup>12</sup> Eejatzi ikantakina Jesoshi:

—Pojankinateniri iroka riraga jewawentziriri aapatziyeeyanarini janta  
Peerikamoki eekiro iñaanateniri aapatziyeeyanarini janta ikantzi: "Iroñaaka  
nokamantemiro naaka riraga ashitawori nothatyaamento, thoyempitatsiri  
omeniki eejatzi omitzikaati.

<sup>13</sup> Nokantzimi: 'Niyotakiro maawaeni pantayitakirini, niyotaki jaga pi-  
jeekira ijeeki eejatzi osheki pinkathatziriri Jatanaashi: kyaaryo ijeekimoeyi-  
mini riori. Niyotaki paapatziyaperotakina, tee pookana. Paerani ijeekakini  
pinampiki Antzipashi: riraga kenkithatakotanari, tema ikyaa yoowenan-  
takinawo maawaeni nokowakaakiriri. Piñaakoeyakirini rowamagaetakiri,  
omaanta tee pookaeyironi paapatziyeeyanani.

<sup>14</sup> Omaanta eenitatsi pantayitakirini kaari inimotana. Noshiyakaawen-  
temiro: paeraniperorona riraga Waraami eeniro riyoakiririni Waraaka  
riraga iwinkathariteni mowawajatzirira riraga kijaniri icharineetenipaeni Ishi-  
rayeeri tsika ikantyaaka rantakaantyaaariri irirapaeni kaari kameethatatsi.  
Roojatzi irirapaeni rantakagaeyakirini rowakari iwatha ashi riwetsikay-  
itzirini atziri itajorentsitsashitari; eejatzi ishirontapiinteyakawoni kaari  
iina. Eeniro iroñaaka pikaateeyakirini jaga oshiyakiririni riraga Waraami:  
irirapaeni rantakaagaantakimi rowakari iwatha ashi riwetsikani atziri ita-  
jorentsitsashitari; eejatzi pishirontashitayitakawoni kaari payi.

<sup>15</sup> Eejatzi eeniro itsipateeyimini oyaateeyiririni Nikoraashi. Tee  
okameethatzri ranteeeyakirini irirapaeni: rantakagaeyimironikari  
rantayitzirini riori.

<sup>16</sup> Rootaki pikenkithashiryaanteeyaneeyaarini, eero pikimitaa chapinki.  
Eerorika pookaeyironi pantayitzirini, niyaatashiteeyiminkari nompo-  
jeeyapaakiminikari. Nothatzinkaeyakitziuminikari nothatyaamento  
rowaga thoyempitatsiri apite: nothonkaeyeminikari thatzik, thatzik.

<sup>17</sup> Powakempitaperotawakya kameetha iroka nokamantzimiri. Aririka  
kameetha pijeeki eejatzi pantapiintakinawo nokowakaemiri, ari nopakimi  
poyaari kaari iñagaetzti, kimitawori nopashiteeyakarini paejatzilteni manaa.  
Eejatzi nopemi kitamaari mapi, jankinateenchari mapiki piwaero owaki-  
rari: piyotero eerori piwaero, omaanta eero riyoziro paashinipaeni'".

Rootaki rojankinatakaakinari riraga Jesoshi.

### *Rojankinateeyinirini aapatziyariri janta Tziyateeraki*

<sup>18</sup> Eejatzi ikantakina Jesoshi:

—Pojankinateniri iroka jewawentziriri maawaeni aapatziyanari janta  
Tziyateeraki: "Iroñaaka nokamantemiro naaka Itomi Tajorentsi: okimi-  
takawo noki paamari amorekaanikitzi, eejatzi oshipakiryakirini noetzi, okim-  
itakawo kijokitatsiri poreryaanikitatsiri.

<sup>19</sup> Nokantzimi: 'Niyotakiro pantayitakirini. Niyotaki pinintaperotawak-  
agaeyakani, paapatziyeeyanan, petakoeyakarini atziripaeni, pikyaary-  
oowentakinawo maawaeni nokowagaeyakimirini. Eekiro piyaa teeyatzi-  
ni pantaperoeyanakironi.

<sup>20</sup> Omaanta eeniro apaani pantziro kaari inimotana: peshiwentakiro rowaga Jesaweera iyotagaeyakimironi aapatziyanari ishironteyawoni kaari iina eejatzi iyotagaeyakimironi aapatziyanari oshironteyarini kaari oemi, eejatzi raapatziyeeyakawoni riwetsikashitayitarini atziri. Okantawita: "Nokenkithatakotapiintziri Tajorentsi", omaanta amatawitapiinteeeyakirini aapatziyeeyanarini.

<sup>21</sup> Noyaakotawitakawo okenkithashiryaaagaeyaami; omaanta tee okoyi okenkithashireeya, tee okoyi opakayiteeroni oshirontayitarini kaari oemi.

<sup>22</sup> Iroñaaka nokamantemi: aritaki nomantsiyatakaakiro; eejatzi eerorika ikenkithashiryaa riraga aapatziyeeyaworini, nowashironkaaperoeyerini rirori kameetha eejatzi.

<sup>23</sup> Kyaaryo nowamagaeyerini maawaeni oyaateeyirorini Jesaweera, nothonkaeyerini maawaeni. Roojatzi riyoteeyantanakyaani maawaeni aapatziyeeyanarini niyotzitakiri ikenkithashireeyirini atziri eejatzi niyotakiro maawaeni ikowaeyakirini rajankaneki. Okameethatzirika panteeeyakirini, aritaki nokaminthaaperoeyemini; omaanta teerika okameethatzzi, aritaki nowashironkagaeyakimini.

<sup>24</sup> Omaantakya paashinipaeni eeroka kaari aapatziyaawonи Jesaweera, eejatzi kaari antziniri Jatanaashi ikantawitariri, tekatsi nokanteeyemini;

<sup>25</sup> omaanta pikantyaani paapatziyena roojatzi nopolanteeyaa.

<sup>26</sup> Aririka pikyaaryooventakinawo maawaeni nokowakaakimiri roojatzi nareetanteeya, ari noetakimini pinkathariwenteeyiririni osheki atziri.

<sup>27</sup> Nokimitaka naari, ikowakaakina Pawa nopolinkatharitantzakari, eejatzi nokantemi eerori pipinkatharitaperotantanakyaari. Aririka opariye chomo, thonkapaka otzimpookapaaki maawaeni, eejatzi pikimitya eerori: pithonkaeyeerini maawaeni kaari aapatziyeeyanarini, thopere.

<sup>28</sup> Pipinkatharitaperotanaki, osheki nowaneenkatem, pikimityaari kamori.

<sup>29</sup> Powakempitaperotawakyyawo iroka nokamantzimiri'".

Rootaki rojankinatakaakinari Jesoshi.

### 3

#### *Rojankinateeyinirini aapatziyariri Jesoshi janta Jaarireshiki*

<sup>1</sup> Roojatzi eejatzi ikantakina Jesoshi:

—Pojankinateniriri jewawentziriri aapatziyeeyanarini janta Jaarireshiki: paerani ikantakiri atziripaeni: "Riraga jaarireshijatzi ikemijantaperotziri kameetha Jesoshi". Omaanta iroñaaka noñeemi naari, rooteentsi pipakayimateromi paapatziyana. ¡Pikemena, naaka piwinkatharite! Èenitatsi irika 7 jewawenterini ronampiri Tajorentsi ikemijantaperotana. Eejatzi enitatsi nakokira noerikakiri ompokiro ikaatz 7. Tema irira oshiyawori 7 kenkithatakantaranri noñaani janta 7 nampsitski. Nokantzimi: ikenkithashiryaa atziri poyaataperotana, omaanta niyotakimi pajankaneki, tee paapatziyaperotana.

<sup>2</sup> Kyaaryooowa, pitheenkaperotanakarira, piyaateekari paamariki kaari tsiwakanitatsini. Tee inimotziri Tajorentsi pantayitakirini. ¡Pikakishirete! Paapatziyena kameetha, pantenawo nokowakaakimiri.

<sup>3</sup> Pikenkithashiryaaaperotaneero noñaani pikemakiri paerani: pikemijantaperotero, pikenkithashiryaaaneeya, pookaero pantziri. Eerorika paapatziyaperotaana, niyaatashitemi, nowashironkaemi. Tee piyoteeyini tsika okaate niyaatashitemiri: nokimityaari koshintziranki, eero piyotzi tsika okaate ipokashitatemiri ikoshitatemiri.

<sup>4</sup> Osheki pitheenkanteeyini, omaanta eeniro apaanipaeni aapatziyanari janta kameetha ijekaeyini rirori. Panteeyakironi kaari kameethatasi noshiyakaantakimiro poepatsitziwanki piithaari; omaantakya riraga aapatziyanari kameetha, tee roepatsitziro iithaari; noñaakiro okitetaki, okitamaamawoperotaki. Kyaaryo ikameethataki noñaaperotantakariri ikameethatz. Ijeekimotena rirori, ikithaatawo kitamaamawoperotatsiri.

<sup>5</sup> Maawaeni eekiro ryaatatyye ranteeyakironi nokowakagaeyakiririni ikithaatawo rowaga kitamaaperotatsiriroña. Eeniro ojankinataka iwaeropaeni maawaeni riroripaeni noñaanamentoki tsikarika rojankinatakotapiintzirira nonampiri iwaeropaeni atziri ikanteetatyeyaaani ijeki jenokinta. Eero noshepowakotziri iwaeropaeni. Ejazti nokamanteri Pawa: "Riotaki irika aapatziyanari". Roojatzri nokamanteeyeririni maawaeni ronampiripaeni.

<sup>6</sup> Powakempitaperotawakyaawo iroñaaka nokanteeyimirini, iroñaakakya pantero.

Rootaki rojakinatakaakinari Jesoshi.

### *Rojankinateeyakinirini aapatziyariri Jesoshi janta Jirareerejyaki*

<sup>7</sup> Eejazti ikantakina Jesoshi:

—Pojankinateniriri jewawentziriri aapatziyeyyanarini janta Jirareerejyaki: "Iroñaaka nokamantemiro naaka Jesoshi nokyaaryooowentziniri okaatzi nokantziri, eejazti riraga kyaaryooperotatsiri. Naaka icharineeteni Iraviiri, naaka riraga Rotyaantanewo Tajorentsi, nopinkathariwentaperote. Naaka riotaki yoyaanakirini ninkarika jatatsini jenokinta eejazti ninkarika jatatsini paamariki kaari tsiwakanitatsini. Nokanterika: 'Itsipatena irika', tekatsi ookakayerini. Nokanterika: 'Eero itsipatana rirori', tekatsi ammotenarini janta nonampirkinta.

<sup>8</sup> Nokantzimi: 'Niyotakiro pantayitakirini. Paerani nokowakaayitakimini: "Pikenkithatero noñaani, namitakotemi". Ari pantzitakinawo, roojatzri iroñaaka pantakinawo: tekatsi ikanteetemi romaryaagatem. Tee posheki-teeyini, eejazti tee pipinkathariteeyawityaani, omaanta pikyaaryooowenteeyakinawoni nokanteeyakimirini. Pikanteeyakirini atziri: "Naapatziyari Jesokirishito", tee pipashiwentakayina.

<sup>9</sup> Eenitatisi atziri aapatziyariri Jatanaashi, rootaki ikijantakimiri, omaanta ikantawaetashita: "Naaka joriyo, tema naapatziyari Tajorentsi". Omaanta tee raapatziyana, itheeyashita. Iinja nareetakagaeyaarini eeroriki rotziwerowashitantanpaemiri, ipinkathatantanpaemiri: riyoteeyanakini osheki nonintaperoeyakimini.

<sup>10</sup> Rowashironkagaeyawitakimini, omaanta pikyaaryooowentakiro nokantakimiri, tee pijamashiryawo. Rootaki notzikakowenantakimiri iinja pipomeentsitakotanakya maawaeni kipatsiki. Opomeentsitzimoeayakaarini maawaeni atziri; omaanta, kyaaryo naakowenteeyemini.

<sup>11</sup> ¡Pamine, sha! Eero ojamanitzi nareetanteemiri. Pikantyaani paapatziyeyenani, roojatzri tekatsi thañawakimini piyaatanaki jenokinta; pijekapae janta, pikanteetatyeyaaani.

<sup>12</sup> Aririka eekiro piyaatatyye pantakinawo maawaeni nokowakagaeyakimirini, ari nojeekakaaperotemi janta ijekinta Tajorentsi: eero pipiyya eejazti. Nojataakotemi pipankaki iwaero Tajorentsi riyotanteetyaari pishenkatakari. Eejazti nojataakotemi owaero inampi Tajorentsi: rowaga Jerojaree owakirari poñaachani jenokinta. Okantyaani riyotanteetyaari pinampitawo eerori. Eejazti nojataakotemi nowaero naari, owakirari, riyotanteetyaari ashenkatakawagaeyakan.

<sup>13</sup> Powakempitaperotawakyaawo iroñaaka nokantzimiri eejazti pantero". Rootaki rojakinatakaakinari Jesoshi.

### *Rojankinateeyinirini aapatziyariri Jesoshi janta Raworisheeyaki*

**14** Eejatzi ikantakinina Jesoshi:

—Pojankinateeyeniririni jewawentziriri aapatziyeeyanarini janta Raworisheeyaki: “Iroñaaka nokamantemiro naaka riraga Kyaaryooperotsiri, owaagakimiroi okaatzi ikantakinari Tajorentsi. ¡Pikemina! Nokantapiintzimi kyaaryooperotsiri. Naaka itaperotakawori niwetsikantakawori maawaeni oetarikapaeni: nantakiro maawaeni ikantakinari Tajorentsi.

**15** Nokantzimi: ‘Niyotakiro maawaeni pantayitakirini. Pikyaaryoowen-tenawomi nokowakaemiri, noshiyakaantemimi iñaa jaawari; pitheenkaperotenami, noshiyakaantemimi iñaa katsinkaari. Noshiya tee pitheenkaperotana omaanta eero poyaataperotana kameetha aanantakimiroi jaawanenteentsatsiri. Tema niyotaki tee pikyaaryoowentanawo nokowakaemiri, omaanta tee pitheenkaperotana; rootaki noshiyakaantakimiroi jaawanenteentsatsiri. Naaka nokoyi eeroka eerorika pikoyi pijaawaperote, ari pikatsinkaate; eejatzi okimitaka, eerorika pikoyi paapatziyaperotena, ari pitheenkaperoteeta: eero pitsipateero. Noepiyaatzirokari jaawaneentatsiri.

**16** Tee nokoyi nirero jaawanenteentsatsiri: neewatakiro, ojeekiita okaanteekaata. Eejatzi eerori, tee noñaaperotzimi. Otzimatayee pantapiintero kameethatatsiri eejatzi poñaayenawo kameetha poyaataperotena. ¡Noepiyimikari!

**17** Pikanteeyawitani: “Naakapaeni ashaaggantzinkaripaeni osheki nantayitakini, tekatsi koetyeemoteenani naaka”. Pikompitakawo: tee piyotzi ashironkaakimi; pashironkaaperotaka, tekatsi tzimimotemini, pikimitaka pikaankimerikitaki. Tee piyoperotziri Tajorentsi: okimiwitaka tee pii.

**18** Iroñaaka nokantemi: pamanantenari ooro kameethaperotatsiri, otzimimotantemiri pashaagananteeyaa kyaaryoopero. Eejatzi pamanantenawo kithaarentsi kitamaari pikithaatanteeyaa riyotanteetemiri kyaaryo nowameethateemi. Pamanantenawo eejatzi awintawontsi pikaakiteeyaa pokiki, paminanteeyaa. Ñaakiro, kimitaririka irika, pamanantenari naaka aritaki nowameethateemi pajankaneki pikimitanteeyaa riri ooropero ari niyotakaaperoeyakimirini Tajorentsi.

**19** Maawaeni ikaatzi nonintaperotziri atziri, nokaminayeri eejatzi nowashironkaeri, riyotantyaari tee okameethatzi rantero kaari kameethatatsi. Iroñaaka eero pitheenkante, omaanta pikenkithashiryaagaeya, eero pikimitaka paerani: pikowaperote piyoperotena naaka.

**20** Pamine, okimitaka nokatziyapaaka omookira ashitakontsi nokaemimi, nokoyi notsipatemi. Aririka pikemawakina roojatzi piwethatantawakina, roojatzi nokyaantapaquaari, nojeekimotantapaakimi eejatzi nakiyotapaakimi. Nokowaperotaki atsipatawakagaeyaani.

**21** Tema nantakiniri Pawa maawaeni ikowakaakinari, rootaki nojeekimotantakariri, notsipatari nopinkathariwenantzi. Iroñaaka ari pikimitaka eerori: aririka pikyaaryoowentakinawo maawaeni nokowakaeyakimirini, ari atsipatawakagaeyakaani apinkathariwenanteeyeni.

**22** Powakempitaperotawakyaawo okaatzi nokamanteeyimirini roojatzi pantero’.

Rootaki rojankinatakaakinari Jesoshi.

### 4

#### *Jeekimoeyiririni jenokinta iñaaperoeyakirini Tajorentsi*

**1** Roojatzi koñaatziro noñaakiri eejatzi, noñaaperotakiro jenokinta, inthomaenta; okimitaka ashitaryaaka ashitakontsi. Roojatzi nokemantaari

eejatzi riraga nokemakiri inkaaganki, aririka iñaawaete roshiyawitakari tziwoorentsi. Ikantakina:

Pipokanaki jaka jenokika. Noñaayemiro oetarika awijatsini iinja.

<sup>2-3</sup> Rootaki omatakaakinawo Ishire niyaatantakari jenokinta. Janta noñaapaakiri ishipakiryakki ikimitakawo mapi iporereryaataki kityonkari eejatzi natsiryathari. Niyotantakariri riro Tajorentsi. Iyotaakina Ishire. Eejatzi noñaakiri ijeekaki iwinkatharimentoki. Ari rinkinagaakitakiro kimitaka oye inta apaani ikanta natsiryathari. Ari ikanta ishipakiri. Omaanta Tajorentsi osheki ishipakiri, morek, morek, tharek, tharek, morek, tharek.

<sup>4</sup> Eejatzi inkitakiro ijeekantari osheki paashini jekamentotsi, okaatz 24. Janta ijeekaeyakini 24 aataperoteenchari, pinkathariteeyatsirini. Ikithaa-teyawoni iithaari kitamaamawori, ramantheeteeyakani. Ro riwetsikaetziri ramantan ooro.

<sup>5</sup> Opoñaaka iwinkatharimentoki Tajorentsi kimitawori oñaawaepookitziranki, eejatzi tariito. Eejatzi inewootakawo ootamentotsi amorekaki, okaataki 7: oshiyakaawentaka 7 ronampiri kameethari.

<sup>6</sup> Eejatzi inewootakawo iwinkatharimentoki owinteniyteera omaanta shipakiryakki okimitakawo jiriniki koñaarini.

Eejatzi rinkitheetakiro iwinkatharimentoki Tajorentsi 4 ronampiri kameethari omampaawaetapiintzinkari. Janta ichopineetakiri apaani ronampiri kameethari, eeniro paashini itapiitaki, eeniro paashini rakoperoki, eeniro paashini rampateki. Enitatsi rokipaeni rirori maawaeni iwathakipaeni.

<sup>7</sup> Roshiyakari apaani manitzi; irira paashini roshiyakari waaka; irira paashini roshiyakari ipoo shirampari; irira paashini roshiyakari pakitha raanaki.

<sup>8</sup> Enitatsi irira ishiwankipaeni okaatz 6; osheki rokipaeni ojeekayitakini maawaeni iwathaki. Ikantatyaaani romampaawenteeyarini Tajorentsi: kite-jiriki, tsiteniriki; tee roshitayiro. Iroka ikantziroka romampagaeyani:

“Osheki pikameethataki, osheki pikameethataki, osheki pikameethataki eeroka Nowinkatharite Tajorentsi:

osheki pitajorentsitaki, tekatsi pomeentsitzimotemini.

Pikantani pijeeki: paeraniperorona, roojatzi iroñaaka, eejatzi iinja”.

<sup>9</sup> Roojatzi rapiitapiintziri iñaaperotantariri riraga Tajorentsi riraga ikantani ijeeki:

“Ikameethaperotzi Tajorentsi, osheki nopinkathatziri.

Osheki nopaasonkitziri riraga pinkathariwentakinari.

Ikantani rañi, eero ikamanitzi”.

<sup>10</sup> Aririka ikemapiinteyawakirini riraga 24 aataperoteenchari, rotziwerowashitapiinteyakarini Tajorentsi riraga añaaperotatsiri ikanteetatyeyaaani, ipinkathateeyakirini. Ragaeyakironi ramatheerepaeni royiiteeyakinirini iitziki, romampaawenteeyakarini:

<sup>11</sup> “Pikameethaperotaki, Nowinkatharite, osheki pitajorentsitaki.

Okameethatzti noñaaperoeyemini, nopinkathateeyemini.

Niyotaki tekatsi pomeentsitzimotemini: tema piwetsikakiro maawaeni jeekaeysirsirini.

Pikowakini paerani ojeekini oetarikapaeni, rootaki ojeekantakari iroñaaka”.

## 5

### *Jesoshi oshiyariri rowishate Tajorentsi*

<sup>1</sup> Ari koñaatziro noñaakiro eejatzi, noñaakiro rakoperoki Tajorentsi rapi-neeteetakiro Iwaperite, ojankinataka inthomaenta eejatzi jakakiroka. Ari apineekaka eejatzi ontsirekaka kameetha, okaataki 7.

<sup>2</sup> Eejatzi noñaakiri ronampiri Tajorentsi, shintsitaperotatsiri, itacheronkawaantetapaaki ikantawita:

—¿Ninka kameethaperotatsiri imatantyaawori riyontareero iroka jankinarentsika, rapineereero?

<sup>3</sup> Ari namineeyawitanakanı, tekatsi akirini. Tekatsi materoni rapi-neereero. Tee imatziro jenokijatzi, kipatsijatzi, jeekatsiri tsikarikapaeni. Tekatsikya.

<sup>4</sup> Tekatsi apaani kameethaperotatsini, mataperoterorini rapineereero, rootaki netakoperotantanakari: kyaaryo niraakoperotantanakari, tekatsi kamanenawoni oeta okantakotayitzírini jankinarentsika.

<sup>5</sup> Roojatzi ikantakina apaani aataperoteenchari:

—Eero piraaga. Eenitatsi apineeryagaeroni: riraga icharineetenı Joraani; ikimiwitakari chaanari, osheki ishintsitzi. Eejatzi rirotaki icharinetakarini Iraviiri, tema osheki ipinkatharitzi. Imatakıniri Tajorentsi maawaeni ikowakagaeyakiririni, rootaki imatanteyaworini riyontaryaagero eejatzi rapineereero Iwaperite.

<sup>6</sup> Roojatzi naminakotziri Tajorentsi janta iwinkatharimentoki, eejatzi ikaatzi ronampiri kameethari 4, eejatzi riraga 24 aataperoteenchari. Eejatzi noñaakiri rojatekaka niyanki inewootziri Tajorentsi riraga Jesoshi iiteetziri Rowishate. Noñaakiri rakoki imoontawaetaka eejatzi iitziki rowamaantetakariri paerani. Eenitatsi ichee 7, eejatzi roki 7: oshiyakaawentziro riraga 7 ronampiri Tajorentsi jewawenantatsiri rotyaatakiri ithotyaaakiro raminiri maawaeni atziri jaka kipatsikika.

<sup>7</sup> Ari riyaatashitakiri Tajorentsi roerikakiro rakoperoki Iwaperite, apineekachari.

<sup>8</sup> Roojatzi roerikantapaakawo, riraga 4 ronampiri omampaawaetapiintachari eejatzi riraga aataperoteencharipaeni rotziwerowashiteeyakarini riraga Rowishate Tajorentsi. Roerikaeyakironi kimitawitawori aaripa; roerikaeyakironi eejatzi kimitawitawori pajo, riwetsikaetziri ooro: ojeekaki inthomaenta kajankapaneri. Iroka kajankapanerika oshiyakawo amanaantsipaeni aapatziyeyayaririni Tajorentsi.

<sup>9</sup> Roojatzi romampaawenteeyantakarini Rowishate Tajorentsi mampaantsi owakirari. Romampaawentakari iroka:

“Pikameethaperotaki poerikero Iwaperite apineekachari piyontareero; Tema paerani rowamagaetakimi, papaaatawenteeyakinawoni piraanakapaeni maawaeni atziripaeni, pipinawentakinawo okaatzinanteeyirini.

Powawijaakoeyantakinarini nojeekimoeyantyaaririni Tajorentsi, maawaeni.

Powawijaakoeyakirini jeekayitatsirini maawaeni inashitzinkaripaeni atziri, inashitayitaworini maawaeni ipaantepaeni.

Kyaaryo, powawijaakoeyakinani poñaayitacharini maawaeni nampitsikipaeni, tsikarika nojeekayitzini.

<sup>10</sup> Pipeyeeyakinani pinkathariteeyatsirini, eejatzi pipeyeeyakinani ñaanakowenantapiinteeyiririni atziripaeni iroñaaka: rootaki iinja nopinkathariwenanteeyaarini maawaeni paashinipaeni jeekatsiripaeni kipatsiki, tema namanakowenanteeyaaririni ramitakoeyerini Piri.

Rootaki pimatantawori paglero eeroka Iwaperite Tajorentsi, eejatzi pimatantawori piyontaryaakiro rowaga ontsirekakaga”.

<sup>11</sup> Roojatzi naminantanaa eejatzi; noñeeyakirini riraga osheki ronampiri-paeni Tajorentsi: tee apaanipaeni ikanta, oshekiperoroña kameetha. Eejatzi

noñeeyakirini eejatzi riraga 4 ronampiri kameethari eejatzi riraga 24 aatap-erooteenchari.

<sup>12</sup> Ishincheenkataki romampaawenteeyakarini:  
“Osheki ikameethaperotaki Jesoshi iiheetziri Rowishate Tajorentsi rowama-gaetawitakari, riyoteeyakini maawaeni jeekaeyatsirini  
osheki itajorentsitaki rirori, rashiteeyakawoni maawaeni oetarikapaeni,  
osheki riyotziro oetarikapaeni, maawaeni imatayitakironi oetarikapaeni.  
Thame maawaeni apinkathateeeyerini, añaaperoeyerini, aweshiryaaawenteeyaarini”.

<sup>13</sup> Eejatzi nokemaeyakirini maawaeni jeekatsiripaeni jenokinta, eejatzi kipatsiki, eejatzi maawaeni kamaeyawiteencharini: riraga kitatawiteenchari kipatsiki, eejatzi piinkawitachari; romampaawenteeyakarini maawaeni kameetha:  
“Thame maawaeni aweshiryaaawenteeyaarini Tajorentsi jeekatsiri iwkinkatharimentoki eejatzi Rowishate,  
apinkathateeeyerini, añaaperoeyerini, akanteetatyeyaaani.  
Tema itajorentsitaperotaki, ikanteetatyeyaaani”.

<sup>14</sup> Roojatzi ikanantaka riraga 4 ronampiri omampaawaetapiintachari:  
“Aritaki okantyaari”.

Eejatzi rotziwerowashiteeyakarini riraga aataperoteencharipaeni ipinkathateeeyerakirini maawaeni.

## 6

### *Riyontaryagaero Iwaperite Tajorentsi*

<sup>1</sup> Ari okaataki 7 ontsirekaenchari Iwaperite Tajorentsi. Noñaakotakiri Jesoshi iiheetziri eejatzi Rowishate Tajorentsi riyontaryaakiro itanakawori apineetachari, roojatzi nokemantakari apaani ronampiri omampaawaetapiintachari, tacheronkawaanteri iñaawaetzti, ikimiwitawo oñaawaepookitziranki, toog, toog. Ikantzi:

—¡Pipoke jaka!

<sup>2</sup> Roojatzi noñaantawakariri jewatapaentsiri: ikyaakotapaakari kawayo kitamaari, roerikapaakiro iwyaaani. Ramantheeteetakiri; jataki raminiri rowayirite romanateri, ikowaki ranaakoeyerini, romanateri ithonkeri rowamayeri.

<sup>3</sup> Roojatzi riyontaryaantakawo rowaga apitetapaentsiri, roojatzi ikanantaka paashini ronampiri:

—¡Pipoke jaka!

<sup>4</sup> Eejatzi ikinapaaki paashini kawayo, kityonkaperotatsiri. Ikanteetakiri: —Iroñaaka ishineteetakimi piyoteeri atziri romanatawakagaeyaani, rowamaawakagaeyaani.

Ari ipaetakiri antawo ithatyaamento.

<sup>5</sup> Roojatzi riraga Rowishate Tajorentsi riyontaryagaero rowaga tres-tapaentsiri roojatzi nokemantakari paashini tacheronkawaanteri ikantzi:  
—¡Pipoke jaka!

Roojatzi noñaantawakari ikinapaaki chenkari kawayo, roerikapaakiro kiyaakotakiri rotenakamento, rotenakantyaawori oetarikapaeni.

<sup>6</sup> Roojatzi nokemantakari ronampiri omampaawaetapiintachari ojatekaenchari niyanki, ikantzi:

—Tee añaaperoztiro osheki teriko eejatzi shinki, rootaki pinaperotachari. Omaanta oyeenka oriwo eejatzi awishoowaantsi oowa, eero peewanatawo inta pikempoyeero kameetha.

<sup>7</sup> Roojatzi riyontaryagaero paashini, okaatapaaki iroñaaka 4, roojatzi nokemantakari paashini ronampiri omampaawaetapiintachari ikantziri:

—Pipokanaki jaka.

<sup>8</sup> Ejatzsi noñaawakiri paashini kawayo, kiteriwitziri; iita iwaero riraga kyaakotapaariri: Owamaantatsiri. Royaatapaeri itapiiki oshiyakaawentziriri kamaentsiripaeni. Tema ishineteetakiri rowamaeyakirini oshekiperotakae atziri jaka kipatsiki: apaanipaeni kamaentsiri itonkakiri rowayirite; paashinipaeni kamaentsiri aakiri itashe; paashinipaeni aakiri mantsiyarentsi; paashinipaeni rowamaeri koweenkatatsiri piratsi.

<sup>9</sup> Roojatzsi riraga Rowishate Tajorentsi riyontaryaantakawo paashini, okaatapaaki iroñaaka apawakooni; roojatzsi noñaantakawo aritaari itaapi-inantawori kajankapaneri. Okimitaka noñaakiri janta eenitatsi osheki aapatziyeeyaririni rirori, kamaeyawiteencharini. Paerani ikenkitheeyawitan iñaani Tajorentsi, riyotaapiinteeyawitarini atziri tsika ikantari rirori, rootaki rowamaanteetakariri.

<sup>10</sup> Itacheronkawaantetakiri ipaante ikanteeyini:

—Nowinkatharite, eeroka pinkathariwenteeyiririni maawaeni jeekatsiripaeni. Osheki pikameethaperotaki, pitajorentsitaperotaki. Niyatki otampatsikataperotzi piñaani, kaari pamatawitantzi. {Tsika okaate pikijakowenanteenari? {Tsika okaate powashironkaanteeyantyaaririni riraga jeekatsiripaeni kipatsikinta, owamagaeyakinarini? Tee nokoyi nojamanite.

<sup>11</sup> Raapatziyeeyakarini riroripaeni Jesoshi rootaki ipaeyantakaririni kithaarentsi kitamaaperotatsiri. Ikantziri:

—Pimakoryaaawakiita. Tekira omonkaata nowashironkaaperoeeyantyaaririni owamagaeyakimirini. Eenitatsi ijeki paashinipaeni piyemijantzinkarite rowamagaeteri. Paapatziyeeyakinani, rootaki rowamaanteetakimiri; raapatziyeeyakinani paashinipaeni, rootaki rowamaanteetyaariri rirori. Aririka omonkaatapaakya nokoyiri, aritaki nowashironkagaeyakirini maawaeni owamaantatsiri.

<sup>12</sup> Roojatzsi riyontaryaantakawo paashini, okaataki iroñaaka 6. Noñaanakiro omoyekaperotanaka kipatsi, antawo omoyekaka, moye, moye, moye. Itsiteniperotanaki oorya, ikimitanakawo tsimenkito; omaanta riraga kashiri, ikityonkataperotanaki, ikimitanakawo iraantsi, kityonkatanaki kameetha.

<sup>13</sup> Ejatzsi ipariyeeyanakini osheki ompokiropaeni kipatsiki: ikimitakwo okithoki atsimiriki rowaga irakatsiri, aririka opoki antawo tampyaa, roojatzsi omoyekakotantapaakyaawori.

<sup>14</sup> Opeyanaka jenoki, okimitakwo apineetzirowanki paperi. Opeyaka maawaeni kipatsi: tonkaaripaeni, othampishipaeni, owinteniiyaanakirapaeni maawaeni; ari okaatapaaki.

<sup>15</sup> Ejatzsi noñaakiri iwinkatharitepaeni atziri, ejatzsi iwinkatharitepaeni joraataropaeni, ashaagantzinkaripaeni, shintsitayitatsirinipaeni, iwaatorotepaeni atziri, ejatzsi ratziritepaeni, maawaeni atziri: ishiyeeyanakani omooki impeeta. Romaneeypaakani mapinaki janta tonkaariki.

<sup>16</sup> Ikantziri:

—Thame amaña omooki mapinaki, eero iñaantee Tajorentsi rootaki ashiyaapithatantyaawori rowashironkaaperotakae riraga rowishate Tajorentsi. Tema ikijaperotakae osheki iroñaaka. ¡Oeeii! ¡Kijaka Tajorentsi! ¡Rooteentsi rowamagae!

<sup>17</sup> Iroñaaka ikijaperoyakinani maawaeni; iroñaaka ithonkayenani naaka-paeni.

<sup>1</sup> Roojatzi noñaantakari ronampiripaeni Tajorentsi ikaataki 4, ikatziyeyakanri rinkitakiro kipatsi, janta othapikitapaakinta. Raatzinkakaaperotakiro shintsitsatsiri tampyaa eero otampyaaperotanta osheki kipatsiki, inkaareki, inchatomashiki, tsikarikapaeni.

<sup>2</sup> Roojatzi noñaantakari paashini ronampiri Tajorentsi, ipoñaaka janta ikinapaenta oorya, ramakiro riwitaahamento riwitaahokantyaaariri atziripaeni. Ikaemakoeyapaakirini paashini 4 ronampiri, ishineteetziri thonkaeyerorini kipatsi eejatzi inkaare iinja.

<sup>3</sup> **Ikantakiri:**

—Eeroota pithonkitawo kipatsi, inkaare, inchato, maawaeni iroñaaka. Itawakyaaarita ojataakotawakiriita ipankakira joriyyopaeni antziniriri Tajorentsi ikowakaakiriri.

<sup>4</sup> Ari nokemakowentakiri tsika ikaateeyini ojataakoeyeencharini: ikaateeyini 144.000 joriyyopaeni antziniriri Tajorentsi ikowakaakiriri. Maawaeni ikaateeyakirini icharineetenipaeni inashitayitacharini itomipaeni Ishirayeeri.

<sup>5</sup> **Ari rojataakoeyakirini ipankaki:**

ikaateeyakini icharineeteni Joraa 12.000,  
ikaateeyakini icharineeteni Roweeni 12.000,  
ikaateeyakini icharineeteni Kaara 12.000,

<sup>6</sup> ikaateeyakini icharineeteni Asheeri 12.000,  
ikaateeyakini icharineeteni Nejatarii 12.000,  
ikaateeyakini icharineeteni Manaseeshi 12.000,

<sup>7</sup> ikaateeyakini icharineeteni Shimiyo 12.000,  
ikaateeyakini icharineeteni Rewii 12.000,  
ikaateeyakini icharineeteni Ijakaari 12.000,

<sup>8</sup> ikaateeyakini icharineeteni Shaporooni 12.000,  
ikaateeyakini icharineeteni Josee 12.000,  
ikaateeyakini icharineeteni Irijamiini 12.000.

Ari rojataakoeyakirini ipankaki, maawaeni.

***Osheki kithaatatakawori kitamaari***

<sup>9</sup> Roojatzi naminantanaka eejatzi, noñeeyakirini osheki kameethari atziri, ipiyoteeyakani: tekatsi akantyi ayoteeyerini tsikarika ikaateeyini. Rinashiteeyakani atziripaeni, inashiteeyakani iñaanipaeni, maawaeni. Ikatziyashiteeyapaakarini inewooteeyakirini Tajorentsi, eejatzi inewooteeyakirini janta ijekinta Rowishate Tajorentsi. Ikamawentakiri irira, rootaki ikithaatayantakaworini kitamaari iithaari. Roerikaeyakironi kompiroshi rakoki,

<sup>10</sup> **Itacheronkawaantetaki maawaeni ikanteeyakini:**

—Rirotaki owawijaakoeyakaerini riraga Pawa Tajorentsi jeekatsiri iwinkatharimentoki, eejatzi riraga Rowishate rirori.

<sup>11</sup> Ari ijekki okaakini Tajorentsi riraga 24 aataperoteenchari eejatzi riraga 4 ronampiri omampaawaetapiintachari. Rinkiteeyakirini irirapaeni oshekinipaeni kameetha ronampiripaeni Tajorentsi, ari iroñaaka rotziwerowashiteeyakarini ipinkathateeyakirini,

<sup>12</sup> **ikanteeyini:**

“Aritaki okantyaari.

Jee, eejatzi naakapaeni noñaaperotzimi. Tema osheki piyotzi, notajorentsite, osheki pitajorentsitzi.

Thame maawaeni aweshiryaaawentapiinteeyaarini, noñaaperotapiinteeyerini, nopaasonkitapiinteeyerini, nopinkathatapiinteeyerini; aritaki nokanteetatyeeyaani naakapaeni.

Aritaki okantyaari".

<sup>13</sup> Roojatzi rojampitantakina apaani aataperoteenchari:

—¿Tee piyotziri ninka riraga kithaateeyakaworini kitamaari? ¿Tee piyotziri tsika ipoñeeyakaní?

<sup>14</sup> Nokantakiri:

—Taanitya, tee niyotzi. Pikamantena: naamashita piyotzirika eeroka.

Ikantawakina:

—Riroteeyakini aapatziyeeeyakaririni Jesoshi ashirokaawenteeeyakaririni osheki ikemaatsitawenteeyakarini rirori, omaanta tee ipakaero raapatziyari Jesoshi riraga apaatawentakari riraa rowawijaakotantakariri. Ñaakiro, raapatziyaperotakari irira rootaki rowameethatantakariri rajankaneki.

<sup>15</sup> Rootaki,

ipiyotawenantakariri Tajorentsi, iñaaperoeyantakaririni jaka inampitari.

Ikantani iñaaperooyaikirini: kitejiriki eejatzi tsiteniriki.

Ari kijokiro rowaeyakirini Tajorentsi rirori, rookakowenteeyerini, maawaeni.

<sup>16</sup> Rootaki kaari agaeyantyaaririni eejatzi itashe,

eejatzi kaari agaeyantyaaririni imiri.

Kaari itagaeyantyaaririni eejatzi oorya,

eejatzi kaari oñaashirenkantyaari eejatzi majawiri.

<sup>17</sup> Riraga Rowishate ikatziya inewootziri okaakini itsipatari Tajorentsi:

rirotaki shenteeyeririni maawaeni kithateeyakaworini kitamaari,

papiinteyiririni maawaeni koetyemoeyakaririni.

Roemoshirenkaeyakirini, eero riraaga eejatzi.

## 8

<sup>1</sup> Roojatzi riyontaryaantakawo weyantapaakawori ontsirekaenchari, rowaga *siete-tapaentsiri*. Ari imaeeriteeyananakini maawaeni jeekatsiripaeni janta jenokinta. Ojamani imaeeritaperotapaentzi kameetha.

*Itiwooteeyini itayitakawori ronampiri Tajorentsi, kaatatsiri paashini-jatzi*

<sup>2</sup> Roojatzi koñaatziro noñaakiri eejatzi: tema noñaakiri 7 ronampiri Tajorentsi, ikatziyeeyananakani Tajorentsikira newootziriri. Ipaetakiri 7 tziwoorentsi.

<sup>3</sup> Eejatzi paashini ronampiri, ikatziyimotapaakawo aritaari riwetsikaetziri ooro, itaapiintzironta kajankapaneri. Roerikakotakiro iyajankarimentoteki riwetsikaetziri eejatzi ooro. Ari itaakiniri Tajorentsi kajankapaneri. Iroka oshiyakaawentakiro amanaantsipaeni aapatziyeeyaririni Tajorentsi.

<sup>4</sup> Ari areetakari owachaarite Tajorentsiki, okajankaenkataapaaki, otsipatakawo amanaantsipaeni aapatziyariripaeni. Tema osheki iñaaperotakiro okameethazi.

<sup>5</sup> Okaankinakitantanakari riraga onampirentsi raakiro iyajankarimentonaki royaankamenkitakiro ojeekantari kajankapaneri, roojatzi rookantakawori kipatsikira. Roojatzi omapokantanaka oñaanaki tziriririri; aamorenkanaki, morek, morek; eejatzi rookathatanaka tariito, toog, toog; eejatzi antawo omoyekanaka kipatsi, moye, moye, moye.

*Rowaga tziwoorentsipaeni*

<sup>6</sup> Roojatzi riwetsikanteeyananakani ronampiri Tajorentsi ikaatzi 7 itziwoontantyaari.

<sup>7</sup> Itziwootaki jewateentsiri, tziii, tziii, tziii; roojatzi opariyantanaka kipatsiki jiriniki, eejatzi otsipatanakawo paamari. Eejatzi noñaakiro os-heki iraantsi. Otaagaantaka jeekayitatsirini kipatsiki, otaagaantaka in-chatopaeni; taaperotaka roori inchashi, thonkanaka maawaeni.

<sup>8</sup> Roojatzi itziwootaki apitetapaentsiri onampirentsi, tziii, tziii, tziii; roojatzi noñaantakawori oshiyawori antawo tonkaari, tagaenchari: rookaetakiro inkaareki, thapok. Opeyagaantaka inkaare iraantsi.

<sup>9</sup> Ikamagaantanaki jeekatsiri inkaareki, eejatzi othonkagaantanaka antawo pitotsipaeni.

<sup>10</sup> Roojatzi itziwootantanaka *tres-tapaentsiri*, tziii, tziii, tziii; roojatzi noñaantawakari oshiyariri antari ompokiro ipariyanaki, amorekanaki, moreriririri. Iparyapaaki iñaa eejatzi iñaa.

<sup>11</sup> Opeyagaantaka okepishaatanaki rootaki iitanteetariri kimitawitariri ompokiro: owaero Kepishiri. Ikamaeyanakini osheki atziri ireeyawitakaworini iñaa.

<sup>12</sup> Roojatzi itziwootantanaka *cuatro-tapaentsiri*, tziii, tziii, tziii; roojatzi itsiwakaagantayitanakini itsimankantanaka oorya eejatzi kashiri. Eejatzi itsiwakaagaantayitanakini riraga ompokiropaeni. Tema tee ikoñeetyaaperotanee kitejiriki eejatzi tsiteniriki.

<sup>13</sup> Ari naminanee eejatzi, noñaakiri antari pakitha rewotaka jenoki. Eejatzi nokemakiri, itacheronkawaantetaki iñawaetzti, ikantzzi:

—¡Ashironkaamatsitemiini! Osheki rashironkaaperoeyanakyaani kameetha jeekatsiripaeni kipatsiki. Rooteentsi itziwooteeyeni riraga paashinipaeni ronampiri Tajorentsí, kaatatsiri 3, roojatzi rashironkaantaperoeyanakyaani maawaeni atziripaeni.

## 9

### *Itziwootzi impaetapaentsiri 3*

<sup>1</sup> Ari itziwootaki paashini ronampiri Tajorentsí, riraga apawakoonita-paentsiri, tziii, tzii, tziii. Roojatzi noñaantakariri ronampiri Tajorentsí ipoñaanaka jenoki, ipokapaaki kipatsiki. Ipaetakiri iyaawiryaantyawori omoo jatatsiri inthomaenta kameetha, tee añiiro tsika okaatapaaki,

<sup>2</sup> roojatzi jantoo. Roojatzi iyaawiryaaantapaakawo, itaaparyaapakiro, iyowoenkatapaaki osheki owachaarite. Iyaataki jenoki roojatzi otzikaantapaakari oorya janta jenoki roojatzi otsitenitantanaka.

<sup>3</sup> Eejatzi noñaakiri kimitariri tsitsiri, ikinantapaakawo kachaari, ithotyaa-paakiro kipatsi, imatakaakiri Tajorentsí ikentantzi, kimitaka kitoniro.

<sup>4</sup> Ikantziri ronampiri Tajorentsí:

—Eero powaaneentawo inchashipaeni, eejatzi inchatopaeni. Omaanta riraga kaari ojataakoeyacharini ipankakira ari pimateri pikenteri.

<sup>5</sup> Nokowaki pikemattsitakagaeyaarinai maawaeni kaari aapatziyeyyaririni Tajorentsí, ikaate 5 kashiri, omaanta eero powamagaeyirini.

Ikenanteyakaririni, osheki ikatsitaki, ikimitakiri kitoniro ikentakiri.

<sup>6</sup> Ikaatakika irika 5 kashiri ikemattsitakari atziri ikentakiri oshiyawitariri kitoniro ari ikowaeyawitanakyaani atziripaeni ikamaeyenimi; omaanta eero imatziro ikami. Ikowaeyawitanakyaani rowamaashiteeyaanimi apaniroeni, omaanta eero añaawaero ikamanitanee.

<sup>7</sup> Ari naminaperotakiri oshiyariri tsitsiri: roshiyakari kawayo, ikyako-tarira joraaro raantawakaantari paashinipaeni ipashikayitakawoni kijokitatsiri, eero aawyaantari okyaantyaari ojataamentotsi eejatzi chekopi. Ramantheetakawo iitoki oshiyawori ooro. Rowaga ipoopaeni oshiyakawo apoo aari.

**8** Iwitzi okimitakawo oeshi tsinani, eepeteesha. Raeki okimitakawo raeki manitzi, antawoparaeki.

**9** Ichopineeki oshiyakawo kijokitatsiri, aririka raanaki, shintsi raanaki, roshiyakari tariito ipoemaenkatziranki, tog tziriririri.

**10** Ishitha oshiyakawo ishitha kitoniro, eenitatsi ichee. Aririka ikentakiri atziri, osheki ikemaatsitaperotyaari, tema iroñaaka ikaate apawakooni kashiri ishineteetziri ikentakiri atziripaeni.

**11** Eenitatsi iwinkatharite tsitsiripaeni: rirotaki ronampiri Tajorentsi am-inakaantzirori antawo omoona. Iita iñaaniki joriyo Awaatoni; omaanta iñaaniki kireeshiyajatzi iita Aporyooni. Akantziri añaaneki aari: Thonkan-taneri.

**12** Aritaki ikantakari riraga jewateentsiri owashironkagaeyakiririni kipat-sijatzipaeni. Omaanta tekiraata eenitatsi apite yotapaenchari.

**13** Roojatzi itziwootantaka riraga kaatapaentsiri *seis-tapaentsiri* tziii, tziii, tziii; roojatzi nokemantakari paashini ñaawaetatsiri. Ari opoñaaka iñaami jaga itaapiinantaworiki kajankapaneri, riwetsikaetziri ooro. Ojeekimotakiri ichopineekira Tajorentsi.

**14** Ikantziri tziwooteentsiri:

—Piyaate janta antawokiroña eni: rowaga iitachari Eyojaraate roeyowa-teri riraga 4 ronampiri Tajorentsi oyaakiriri janta. Aritaki monkaatapaaka kitejiri rowamaantyaariri atziripaeni.

**15** Ari riyaataki, roeyowatziri ronampiripaeni, ikantziri: “Tema ikantzi Tajorentsi paerani: ‘Niyotakiro tsika okaate pithonkatagaanantyaariri atziripaeni. Niyotakiro tsika okaate omonkaatantyaari ojarentsi, kashiri, kitejiri, eejatzi tsika ikaate oorya’”. Iroñaakaroña omonkaataka; rootaki powamaantyaariri.

**16** Riraga ronampiri reewateeyakiririni oshekiperoroña joraaropaeni, ikaa-teyini 200.000.000. Niyotakiro, ikantakinari.

**17** Eejatzi noñeyeyakirini iyawayote. Ipashikachopineetawo kijotatsiri kraatatsiri, oshiyakawo paamari, rowaga amorekaperotatsiri. Iito kaway-opaeni oshiyakawo iiropaeni manitzi. Opoñaaka ipaanteki osheki paamari, eenitatsi kachaareenkafatsiri osheki, eenitatsi amorekaperotatsiri.

**18** Rooteeyakini rowamagaananteeyakaririni oshekiperero atziripaeni: rowaga paamari, kachaareenkafatsiri, eejatzi jankaenkafatsiri poñaachari ipaantekipaeni kawayo.

**19** Rootaki rowamaantariri kawayo atziri: ipante eejatzi ishitha. Ro ishitha oshiyakariri maanki, eenitatsi iito, ratsikantakariri atziri.

**20** Ari ijeekagaantaki atziri, omaanta tee ikenkithashireeyani: tee ikoyi raapatziyari Tajorentsi. Ikantani rantapiintziro kaari kameethatatsi, ipinkathatapiinteeyirini kamaari, eejatzi ipinkathatashiteeyawoni riwet-sikayitzirini: oorotayitatsirini, peraatatayitatsirini, paashini ashirötayitatsirini, mapitatsiri, inchatotayitatsirini, maawaeni. Itajorentsitsashitayitawoni, omaanta tekatsi okantya amini, okemi, eejatzi tee anashita.

**21** Ikantani rowamaantzi, imatsitantzi, ishirontawo kaari rayi, ikoshitzi. Tee ikenkithashiriimaeta.

## 10

### *Ronampiri Tajorentsi eejatzi Iwaperite Tajorentsi owaanini*

**1** Roojatzi eekiro niyaatatzi koñaatziro noñaakiri, tema noñaakiri paashini ronampiri Tajorentsi, shintsitaperotatsiri. Ipoñaaka jenokinta, oshonkakiri menkori, eenitatsi oye iitoki jeñoikiini. Ipooni oshiyakari oorya, ipori os-hiyakawo paamari.

<sup>2</sup> Roerikiro Iwaperite Tajorentsí, apineeryaachari. Iitzipero raatzikaatero inkaare, omaanta roori rampate raatzikero kipatsi.

<sup>3</sup> Ishintsitsi ikaemapaaki, ikimitakari manitzi rajootziranki, joon, joon. Roojatzi itacheronkawaantetawaki ikaatki 7, kimitaka tariito.

<sup>4</sup> Nokemantakariri ikimitaka itariitotanaki; rooteentsi nojankinatemí okaatzi ikantziri, omaanta nokemakiri ikantakina jenokijatzí:

—Eero pikantziri paashinipaeni okaatzi ikantzirira tariitoteentsirira, pimanakotawakiro iroñaaka.

<sup>5</sup> Ari noñagaeri eejatzi ronampiri Tajorentsí, riraga aatzikirori inkaare eejatzi kipatsi: rowaankiro rakopero jenokinta,

#### <sup>6</sup> ikantzi:

—Eenitatsi Tajorentsí añaaperotatsiri, ikantani rañi, eero ikami. Riwetsikakiro jenoki eejatzi maawaeni jeekanteeyaworini; riwetsikakiro kipatsi eejatzi maawaeni jeekanteeyaworini; riwetsikakiro inkaare eejatzi maawaeni jeekanteeyaworini. Riyotzi riori tee notheeya. Rooteentsi imonkaatero maawaeni okaatzi rantayitzirini.

<sup>7</sup> Roojatzi itizwootee riraga ronampiri Tajorentsí, riraga *siete-tapaentsiri*. Ari okoñaatapaaki manawitachari paerani: iroka ryoteeriri Tajorentsí aapatziyaririni paerani, kimitaka ikantzitakari riraga kamanantayitzirorini iñaani Tajorentsí paeraniperoroña.

<sup>8</sup> Roojatzi nokemakiri eejatzi jenokijatzí kenkithatakaakinari inkaaganki. Ikantana:

—Piyaate, paawakiro Iwaperite Tajorentsí roerikiri nonampiri aatzikirori inkaare eejatzi kipatsi.

#### <sup>9</sup> Roojatzi niyaatashitantakariri, nokantapaakiri:

—Pipenawo Iwaperite Tajorentsí.

#### Ikantawakina:

—Ajaatya, payero, poyaawo; aririka powakyaawo, ari pikemakiro opochaatzi, kimitaka iyaa pitsi. Omaanta ari opiyashiryaamoonthatakimi.

<sup>10</sup> Ari naawakiro nakoki, nowakowo. Nokemawakiro opochatawita-paaka. Opochaawitaka nopaanteki kimitaka iyaa pitsi, omaanta roojatzi opiyamoonthatantapaakina.

#### <sup>11</sup> Roojatzi ikantakina:

—Iroñaaka eekiro piyaatatye pikenkithatakoyiterini rowashironkaeri Tajorentsí maawaeni antapiintzirori kaari kameethatatsi. Pikamanteri maawaeni paashinipaení atziri: inashiyitacharini ipaantepaeni, inashitachari pinkathariipaeni, kipatsipaeni, maawaeni.

## 11

### *Ikenkithatakotziri apite kenkithatakaantatsiri*

<sup>1</sup> Roojatzi ipantakinawo Tajorentsí inchaki, oshiyawori kotzikiirontsi, roojatzi ikanantakina:

—Ajaa, iroka monkaatamentotsika. Piyaate iroñaaka pimonkaatakitero Tajorentsípanko; eejatzi pimonkaatakitero itaapiinanteetawori kajankapaneri, eejatzi piyotakiteri tsikarika ikaateeyini maawaeni pinkathateeyanarini janta.

<sup>2</sup> Omaanta eerowa pimonkaatziro janta inkokironta: ikinapiintzinta kaari yotatsiri Tajorentsí. Ikaataki 42 kashiri\* ikinayitanakini paashinijatzitsatsiri atziri janta nonampiki: rowaga Jerojaree. Osheki rowashironkagaeyerini jeekatsiripaeni janta tema ari ikemaatsitakaakyaaari.

\* <sup>11:2</sup> Iroka 42 kashiri omonkaatka 1.260 kitejiri.

<sup>3</sup> Notyaanteri apite kenkithatakotenani, nomatakaakiri ikenkithatapiinte ikaante 42 kashiri. Ikithaatakawo ontyaachari iwitzu kaawira, tema retakoshiryaaakari anteeyirorini kaari kameethatatsiri. Ikantapiinteyerini atziri: "Pikenkithashireeyanakaani. Pookaero kaari kameethatatsipantziri, roojatzi paapatziyeyarini Jesoshi, pijkeekaeyeni kameetha".

<sup>4</sup> Ikenkithatakotzitakarini paerani Jakariiyashini riraga apitetatsiri os-hiyakaworka oriwo. Eejatzi oshiyakaworka ijeekantari itamorekatheeta jeekatsiri janta Awinkathariteki. Tema rirotaki pinkathariwenteeyiririni maawaeni atziri.

<sup>5</sup> Eenitatsirika kowawitachari rowashironkaerimi riraga apitetatsirira, apatziro ipoñaanakya roeyowanakiro paamari ipaanteki othonkaperoyeरerini, otagaeyanakirini maawaeni, pokirireei.

<sup>6</sup> Osheki imatakagaeyerini Tajorents. Ikenkithatapiinte, omaanta ikowakirika eero opariyi inkani, eero ipariyakayiro, roojatzi ikaatanyaawori ikenkithate. Eejatzi, ikowakirika, ipeyeero iñaa iraantsi. Eejatzi ikowakirika, rowashironkaapiinteeyerini maawaeni jeekaeyatsirini, inashitayitacharini mantsiyarentsipaeni.

<sup>7</sup> Aririka imonkaatakiro ikenkithate, eejatzi ipoñaakya omooki inthomaenta piratsitatsiri koweenkatatsiri riori. Ikjapaeri kenkithatatsirini, ranaakotapaeri, rowamaapaeri, shemi.

<sup>8</sup> Romaryagaeyashitarini kamaeyatsirini janta Jerojareeki niyanki. Roshiyakaantakiro Tajorents Jerojareera, Jorooma eejatzi Ejipito; ro roshiyakanantawori, osheki rantapiinteeeyironi jerojareejatzi kaari kameethatatsiri. Tema aritaki ikentakoetakiriri Jesoshi jaga.

<sup>9</sup> Okaate 3 kiteziri romaryagaeyaani nampitsiki niyanki, roojatzi itampatsikatanteeyarini oorya eejatzi. Maawaeni atziripaeni kipatsiki ramineeyerini kamayiteentsirini, inashitayitakyaani amineeyiririni: ipoñaayitakyaani paashinikipaeni nampitsi, inashitayitakyaani iñaanipaeni. Eero ishinetakaantziri ikitateeteri.

<sup>10</sup> Ikomoshirewenteeyanakirini maawaeni jeekaeyatsirini kipatsiki ikamakira riraga apite kamanantitawitaworini iñaa Tajorents: ipashitawakagaeyakawoni oetarikapaeni. Ikanteeyeni:

—Thame akimoshireeyeni. Kamaki riraga kenkithatakowitaririni Tajorents: eero imateeero roñaashirenkaa eejatzi.

<sup>11</sup> Omaanta ikaatapaaki tampatsika oorya itajonkaeri Tajorents, rowañaagaeyeerini apite, ikatziyeyanaani. Roojatzi ithawanteeyan-tanakarini maawaeni ñeyawakiririni.

<sup>12</sup> Roojatzi ikemantakari Tajorents, ishintsitakiro ipaante ikantzi:

—Pipokae jaka jenokika.

Ari riyaateeyaneeni jenokinta, rojatekantaneeyawo menkori shipakiryaaperotatsiri; iñeyawaerini maawaeni kijeyawitakaririni.

<sup>13</sup> Roojatzi omoyekantanaka kipatsika, ontyaagaantanaki pankotsipaeni. Ikamaeyakini atziri 7.000. Osheki ithawaayañakini paashinipaeni jeekagaantaneentsiri roojatzi iñaa peroyantanakarini Tajorents, ikanteeyanakini:

—Tema osheki ipinkatharitzi Tajorents, itajorentsitaperotzi.

<sup>14</sup> Omonkaatapaaka apitetapaentsiri rowashironkagaeyakirini Tajorents atziripaeni. Omaanta iyotapaaka apaani, rowaga tres-tapaentsiri.

### *Itziwootaki weyantapaakawori*

<sup>15</sup> Roojatzi itziwootantaka riraga paashini ronampiri Tajorents, riraga si-ete-tapaentsiri: tzii, tzii, tzii. Nokemaeyakirini jeekatsiripaeni jenokinta, ishintsiwaantetakiro ipaante, ikanteeyini:

—Pikemaperote iroñaaka.

Tema iroñaakaroña ipinkathariwenteeyerini Awinkatharite maawaeni kipatsijatzi,

ikaateri Rotyaantanewo ipinkathariwenanteeyeni, ikanteetatyeyaaani.

<sup>16</sup> Roojatzi riraga 24aataperoteenchari apatziro ipoñaka iwinkatharimentoki, roojatzi rotziwerowashiteeyantakaririni Tajorents: osheki ipinkathateyakirini.

<sup>17</sup> Romampaawenteeeyakarini, ikantzi:

—Nopaasonkitemi Nowinkatharite, eerokapero Tajorentsiperotatsiri: osheki pishintsitaki, osheki pipinkatharitaki.

Tee pipaashinitsi, pikantani pitajorentsitsaki.

Eejatzi pipinkatharitaperotaki, iroñaaka pipinkathariwenteeyerini maawaeni atziri;

eero pookaero, roojatzi pikantyaani.

Rootaki nopaasonkitanteeyimirini.

<sup>18</sup> Ikijeeyawitakimini atziripaeni maawaeni kipatsi, omaanta iroñaakaroña monkaataka pipiyateeyantyaarini.

Pipiriinteeyeerini kamaeyawiteencharini, maawaeni pikantakotantyaarini:

pipineeyerini maawaeni antzimirori pikowakagaeyakiririni, maawaeni kamantanayitzirorini piñaani, aapatziyeyimirini, maawaeni.

Pipinkathateeyerini, pinkatharitawitacharini kipatsiki, kaari pinkatharitawitachani, maawaeni.

Kameetha pjeekakagaeyerini pinampiki.

Omaantaky riraga kijeeyawitakimirini, kaari kameethateeeyatsini, powashironkagaeyerini, pookaeyerini rirori paamariki kaari tsiwakanitatsini.

<sup>19</sup> Roojatzi ashitaryaantanaka ipanko ijekantari Tajorentsi jantajenokinta, noñaakiro inthomaenta oshiyawitawori tsiwoo, rowaga ojeekantari rojankinari Tajorentsi inthomaenta paerani. Tema ikashiyakaakariri irira ikenkithatakagaeyerini joriyyopaeni jaga. Eejatzi noñaakiro aamorenki, morek, morek; eejatzi ishuntsitzi tariito, tyaaag, tyaaag, eejatzi omoyekanaka kipatsi, moye, moye; eejatzi opariyaperotaki osheki jiriniki, chekiriririri.

## 12

### *Tsinani eejatzi maankitsatsi*

<sup>1</sup> Roojatzi koñaatziro noñaaperotakiro paashini. Noñaakiro apaani tsinani, kimitaka okithaatakawo oethaari oshipakiryakki kimitaka oorya, aatzikakiri kashiri oetziki eejatzi amantheetakotakari 12 ompokiro oetoki. Tema notsikanatakawo noñiiro.

<sup>2</sup> Omotzitaki, rooteentsi otzimakote, atsikamoonthatakiro, okaemawae-taki:

—¡Akayawee! ¡Akayawee, nokamaatyeeewe!

<sup>3</sup> Romapokashitapaaka jenoki, ipokapaaki iwinkatharite kamaaripaeni roshiyapaakari antari maanki, kityonkamanthari. Okaatzi iito 7, eejatzi ichee 10. Ramantheetayitakani iitokipaeni.

<sup>4</sup> Inoshikagaanantakarini ishitha osheki ompokiropaeni; ari rookapirothatiakotakiri kipatsiki. Ikatziyapaaka janta ojeekakira tsinani, royaawentapaakawo otzimeri otomi, rowantawakyaariri.

<sup>5</sup> Roojatzi okoñaatantakari otomi, riraga pinkathariwentaperooyeririni maawaeni atziri; tekatsi piyathatyaaarini iinja. Omaanta eentsitera raapi-thatanakiro Tajorentsi raanakiri jenokinta, ijekakaapaakiri iwinkatharimentoki.

**6** Oshiyanaka tsinani janta okaankiityeenta tekatsinta atziri ipanko riwetsikakinirona Tajorentsi ojeekantyaari. Ari roejeekawakiro kameetha janta, okaatzi 42 kashiri.

### *Ikoshekawakaeyakanijenokijatzi janta jenokinta*

**7** Eekiro niyaatzi koñaatziro noñaaperotakiro. Noñaakir ikoshekawakaeyani janta jenokinta. Riraga Miyiiri, ikaateeyakirini paashinipaeni ronampiri Tajorentsi, ikoshekaeyakarini riraga Jatanaashi oshiyawentariri maanki eejatzi iyamaaritepaeni rirori; ikoshekawakagaeyakan.

**8** Omaanta riraga maanki tee rotsinampaeri ronampiripaeni Tajorentsi. Rootaki iroñaaka roemishitowantaariri jenokinta maanki eejatzi ikaateeyinira, iroñaaka Tajorentsei tee ikowaeyirini ipiyimoteeyaaarini jenokinta riraga Jatanaashi eejatzi iyamaaritepaeni ijekantyaari.

**9** Kyaaryo, rookaperoeyakirini riraga maanki iiteetziri Jatanaashi jaka kipatsiki, eejatzi maawaeni iyamaaritepaeni ikaatzi akakotayitawitaririni. Riraga maanki rirotaki amatawitakirori Eewa paerani. Rirotaki iwinkatharite kamaariipaeni. Osheki ramatawitapiinteyakirini atziripaeni roojatzi iroñaaka.

**10** Roojatzi nokemantakari jenokijatzi, tacheronkawaanteri ipaante, ikantzi:

“Iroñaaka rowawijaakotaperoeyakirini Tajorentsi neentsiteteeyakarini, itajonkakowenteeyakirini, ipinkathariwenteeyakirini; eejatzi Itomi riraga Rotyaantanewo ipinkathariwenteeyakirini. Kameethatak.

Ikantani paerani ithawetakoeyakirini Jatanaashi, riraga maawaeni kemi-jantzkaripaeni, ikowapiintawitaka rowashironkagaeyerinimi, rootaki ikantani ithawetakotantariri kitejiriki, tsiteniriki janta Tajorentsi. Iroñaakkya eero imateero Jatanaashi eejatzi.

**11** Irirapaeni raapatziyeeyarini Jesoshi ikamawenteeyakironi kaari kameethatatsi rantakiri, rootaki imatantakawori raakowentawakiri tema ipinawentakiro Jesoshi riraa okaatzi rantakiri rowawijaakotanteeri. Tema roñaagakiri royaaperotziri Rowishate Tajorentsi. Tee ishiyapithatari atziri kowatsiri rowamayerimi: tema royaaperotakirri rirori.

**12** Iroñaaka akimoshireeyakini aakapaeni maawaeni jeekatsiripaeni jaka jenokinta; akantyaani akimoshireperoeyanakini. Omaanta ashironkaamatsitemiini kipatsi eejatzi inkaare. Tema ijekanaki Jatanaashi eejatzi iyamaarite jaga jaawikira iroñaaka. Rashironkaaperoeyanakyaani maawaeni kipatsijatzi. Osheki ikijaperota Jatanaashi, riyotzi eero ojamanitzi ijeki kipatsiki, osheki rowashironkagaeyanakyaani jeekatsiripaeni jaga”.

### *Riraga maanki ikijakiro tsinani*

**13** Ari rowariyeetakiri riraga maanki Jatanaashitatsiri kipatsiki jaka, osheki ikijapaakiro tsinani koñaatakiriri otomi.

**14** Omaanta itajonkakiro Tajorentsi otzimantakari oshiwanki apite, okimitakawo ishiwanki antari pakitha. Roojatzi aapithatanakiri iwinkatharite kamaariipaeni, iyaataki inteeena tekatsinta atziri ipanko, riwetsikakaantakironta Tajorentsi. Ari janta retakoetawakawo ipaetakiro owanawo, ikaataki 42 kashiri ojeekaki janta. Tee imateero riraga Jatanaashi riyaatashtiteero janta.

**15** Roojatzi riraga maanki Jatanaashitatsiri osheki roemishitowaatakiro iñaa ipaantekira. Ikowawita roonkakayaawomi kipatsi opiinkantyaarimi tsinani. Ikowawita ithonkaeyeronimi.

**16** Omaanta ramitakotakiro ronampiri Tajorentsi, tema rirotaki ashitaryaakinirori kipatsi okyaagantaneeyaa maawaeni iñaa kipatski.

**17** Eekiro riyaatatzsi ikijanakiro tsinani. Tee imatziro roori, rootaki riyatasthitantariri paashinipaeni eentsitepaeni: maawaeni riraga antziniriri Tajorentsi ikaminaakiriri, rowaga riyotaakiriri Jesoshi; tema ikowawita riraga Jatanaashi ithonkaeyerinimi rioripaeni.

**18** Roojatzi noñaakiri riraga Jatanaashi ikatziyapaaka ocheraaki inkaare antawo royeeri pokatsini.

## 13

### *Koweenkatatsiri riyoyi antawoki inkaare*

**1** Roojatzi nokatziyaka naaka Jowa impanekiki, janta othapyaaki antawo inkaare. Eekiro niyaatatza koñaatziro noñaakiri. Tema noñaakiri piratsitatsiri koweenkatatsiri riyowapaakira inkaarekira. Eenitatsi ichee okaatzi 10, eejatzi eenitatsi iitopaeni okaatzi 7. Jaga icheekipaenira ramanteetakawo amantheerentsi, kimitawori rash eewawenantatsiri. Eejatzi rojankinatakotaka iwaero iitokipaeni; omaanta tee okameethatzi, tema itheenkakiri Tajorentsi: iitawaetashitaka kimitaka rirotaki inashitzinkari tajorentsi.

**2** Ari roshiyapaakari manitzi. Omaanta iitzi oshiyakawo iitzi maeni; eejatzi ipaante oshiyakariri ipaante chaanari. Ikantawakiri maanki:

—Iroñaaka nokowaki nomatakayemi, pikimitantenari: osheki pimatayitakironi, osheki pipinkatharanaki, osheki pikantakaantayiterini paashinipaeni.

**3** Amashitaperowitaka kameetha iitoki apaani, naamaashitaka roowiteencha owamayerimi amashitakiriri. Rotsikanateeyanakarini maawaeni kipatsijatzi, ikanteeyini:

—¿Itakakya kaari ikamanta? Ooo, paminerotya iito, ¿itakakya kaari owa-maantari?

Kyaaryo, etsiyatakotee, rootaki rotsikanateeyantaperotanakaririni riroripaeni eejatzi ipinkathatanakiri, royaatanakiri.

**4** Roojatzi ipinkathateeyakirini maanki, ikanteeyini:

—Piñaakiri, osheki imatakaakiri koweenkatatsiri.

Eejatzi ipinkathateeyakirini koweenkatatsiri, ikanteeyini:

—Piñaakiri, osheki ishindsight, tektsi materini ipiyatyari.

**5** Roojatzi riraga maanki ikantziri koweenkatatsiri:

—Iroñaaka pikijanakiri Tajorentsi pipinkatharitaperotanaki.

Ari osheki rajagaaperotaka, osheki ikantzimatakiri Tajorentsi. Omaanta eero iñashintzirri irira inta ishinetakiri ikantzimatakiri 42 kashiri.

**6** Ari ikantzimatakiri rirori, ikantzimatakiro inampi, eejatzi ikantzimateeyakirini jeekatsiripaeni janta.

**7** Eejatzi ikantakiri maanki:

—Pikijeeyerini maawaeni aapatziyeeyaririni Tajorentsi, powashironkagaeyerini. Eejatzi pipinkathariwenteeyerini jeekatsiripaeni kipatskipaeni, paashinitayitzirorini ipaantepaeni.

**8** Aritaki ipinkathateeyerini maawaeni atziripaeni. Apatzirokyaa riraga aapatziyariri Jesoshi, eero ipinkathatziri. Aritaki, tekirani riwetsikironi kipatsi, riyotzitakarini Tajorentsi maawaeni aapatziyeeyaririni. Aritaki rojankinatakironi iwaeropaeni iñaanamentoki rash Jesoshi iiheetziri eejatzi Rowishate Tajorentsi tema riyotzitayitakarini irira kamawenteeyeririni atziripaeni.

**9** Powakempitaperotawakyaawo iroñaaka iroka nokanteeyakimirini.

**10 Ikantzi Jesoshi:**

—Aapatziyanaripaeni, omawitya rooteentsi pikemaatsiperotatyatya osheki, pishintshiretaki apaniroeni, eekiro piyaatantatyaa poyaataperotena naaka. Aririka ragaetemi eejatzsi romonkyaagaetemi: omonkyaaagamentotsiki, eekiro piyaatatyee pishintshiretaki eeroaka apaniroeni. Ikowakirika rowamaemi, eekiro piyaatatyee pishintshiretaki. ¡Naminakowentemi!

***Paashini koweenkatatsiri riyowapaaki kipatsiki***

**11** Roojatzsi noñaakiri paashini piratsittsiri koweenkatatsiri, ipoñaaka rirori kipatsiki inthomaenta. Ikimitawitakari owisha, eenitatsi ichee owaanini apite; ikoweenkatzi iñaawaetzi kimitaka riraga maanki Jatanaashitatsiri.

**12** Osheki ipinkatharitaki, ikimitakari paashini koweenkatatsiri, riraga amashiwitachari iitoki. Iitziri irira riraga apitetapaentsiri amitakotanniri. Eejatzsi ikanteeyirini maawaeni jeekatsiripaeni:

—Pipinkathetheyerinira riraga amashiwitachari iitoki.

Ari ipinkathateeyawakirini.

**13** Osheki itajonkantayitakini riraga apitetapaentsiri. Imatayitakironi kaari iñaapiinteeyini asheninkapaeni. Ineeyakirini atziri rowariyakiro paa-mari: opoñaaka jenokinta, roojatzsi kipatsiki.

**14** Osheki imatayitakironi, rootaki ramatawiteeyantakaririni osheki atziri, ikimitakaantakiri rirotaki itajorentsire. Aririka itsipatakari riraga jewatziriri, osheki imatayitakironi. Eejatzsi ikanteeyakirini atziri:

—Ajaatya, poshiyakaawenteeyenarini irika jewatakinari, irika ithatyaagaetawitakari apaani iitoki. Thatzik. ¡Pamineeteeri! Tee ikamateetezi. Ichewakiitatkarira pirotee.

**15** Ari ikemijantaperoeyakirini, riwetsikaeyakironi oshiyakaantsi. Okimitaka imatakaakiri Jatanaashi itajonkakiro, añaantakari, eejatzsi oñaawaetantakari. Roojatzsi ikanteeyakirini atziripaeni:

—Pipinkathetheyeroni iroka awetsikaeyakirini: rootaki atajorentsire.

Ari ipinkathetheeyawitakawoni. Omaantakya maawaeni kaari pinkathatzirori, rowamaakaanteeyakirini.

**16** Eejatzsi rojataakotakaantakiri atziripaeni, maawaeni. Rojataakoeyakan rakoperoki, rooma aririka ipankaki, maawaeni: pinkathariteeyatsirini, kaari pinkatharitatsiripaeni, ashaaganteeyacharini, kaari ashaaganteeyachani; riraga ramananteetziri eejatzsi riraga kaari ramananteeti: rojataakoeyakan maawaeni.

**17** Ro rojataakoeyakiririni iwaero koweenkatatsiri, aamaashitya paashinipaeni rojataakoeyakirini inoomerote. Ikanteeyirini:

—Eerorka rojataakoeyani atziripaeni, eero noshinetziri ramanantayiteni oetarikapaeni eejatzsi eero noshinetziri ipimantayiteni oetarikapaeni.

**18** Noyemijantzinkaritepaeni, okameethatzi iroñaaka pikenkithashiryaakotero inoomerote koweenkatatsiri. Rootaki inoomerote atziri, tema okaataki 666. Eerokarika yotzinkari, ari piyotakiro oetarika oshiyakaawentachari.

**14*****Jowa iñaakiri Rowishate Tajorentsi eejatzsi omampaawaetawenteeyaririni***

**1** Eekiro niyaatatzi koñaatziro noñaakiri, tema noñaakiri riraga Jesoshi iiteetziri Rowishate Tajorentsi, ikatziyaka owinteniiyeera ichopineekira Tajorentsi iitachari Shiyoo: ojeekaki Shiyoo Jerojareeki. Ikaateeyakirini maawaeni aapatziyeyearirini, ojataakotacharipaeni ipankaki iwaerokira Rowishate eejatzsi Iriri. Ikaateeyakini 144.000.

<sup>2</sup> Roojatzi nokemaeyirini eejatzi jenokijatzi, ishintsitzi ipaante; ikimi-takawo antaworona opareenkaari, eejatzi antawo ookathata. Riroteeyakini piyompiteeyirorini omampaakayaawori oshiyawori piyompirents.

<sup>3</sup> Eenitatsi janta Tajorentsiki, janta ijeekinta aataperoteencharipaeni eejatzi riraga 4 ronampiri omampaawaetapiintachari. Roojatzi romampaawaeteeyantanakawoni mampaantsi owakirari; okameetheenkataki, omaanta tekatsi paashini materoni riyotero mampaantsi: apaniroeni riraga kaateentsiri 144.000 atziri owawijaakoeyeencharini.

<sup>4</sup> Irikapaeni tee ranteeeyironi kaari kameethatatsi. Tema ikempoyaaka ikiteshiretsi, tema tee ishirontawo tsinani kaari rayi; inta ikantani royaateeyakirini Rowishate, tsikarika ryaatayitakini. Apatziro ipinkatha-teeyakirini Tajorentsi eejatzi Rowishate.

<sup>5</sup> Tee itheeyeyani, eejatzi ikameethateeyakini, tee ranteeeyeroni kaari kameethatatsi.

### *Rooteentsi rowashironkaeyerini Tajorentsi kaari aapatziyari*

<sup>6</sup> Roojatzi noñaakirini paashini ronampiri Tajorentsi, raayitanakini jeñokiinira. Ikenkithatakagaeyakirini maawaeni jeekatsiripaeni kipatsiki, tsikarika ojeekayitzin inampipaeni, eejatzi tsikarika okantayitarini ipaantepaeni. Ikamanteeyakirini tsika ikantyaari Tajorentsi rowawijaakoeyanteeyaaririni. Rootaki ikantapiinteeeyiririni Tajorentsi maawaeni atziri paerani, tee ipaashinitziro.

<sup>7</sup> Itacheronkawaantsetzi ikantzi:

—Pipinkathetheyerini Tajorentsi, pikantteeyerini pisheninka: “Ikameethataki Tajorentsi”. Pamine, rootzimateentsi omonkaataky rowashironkaeyerini maawaeni kaari aapatziyeeyaririni Tajorentsi. Pipinkathataperoyerini: tema rirotaki wetsikirori jenoki eejatzi kipatsi, inkaarepaeni eejatzi ñaatenipaeni, maawaeni.

<sup>8</sup> Royaatanakiri paashini ronampiri Tajorentsi, ikantzi rirori:

—Paerani riraga jeekawitacharini Wawirooniyaki rantakaapi-inteeyakirini paashinipaeni atziri kaari kameethatatsi, omaanta rootzimateentsi ithonkimaeyerini Tajorentsi wawirooniyajatzi. Eero imatakagaeyeerini eejatzi oetarikapaeni.

<sup>9</sup> Roojatzi royaateeri paashini ronampiri Tajorentsi eejatzi: riraga tres-tapaentsiri. Itacheronkawaantetapaakiri, ikantapaakiri rirori:

—Kyaaryoowa, pipinkathatzirkari riraga koweenkatatsiri, eejatzi rowaga oshiyakaantsi. Eejatzi pishinetarikari rojataakotemi pipankaki, eerorika pakoki.

<sup>10</sup> Aririka pipinkathateri koweenkatatsiri eejatzi pishinetyaaririka rojataakotemi, ari ikijakimi Tajorentsi; ikijaperotemi, eero ikamintheemaetzimi. Pikemaatsitaperotakyaawo paamari otsipatakyaaawo opane shi-mashiretatsiri tema rootaki tacheronkaetyaaperotatsiri. Tema inñeeyemini maawaeni ronampiri Tajorentsi, riraga kameethaperotatsiri, eejatzi riraga Rowishate rirori.

<sup>11</sup> Pikanteetayyeayaani pikemaatsityaawo paamari; eero otsiwakanitzi, okantatyeyyaani eekiro okachaareenkatanakitye: kitejiriki, tsiteniriki, eero othonkanita. Aritaki ikemaatsiteyawoni maawaeni pinkathatzirkiri koweenkatatsiri eejatzi oshiyakaantsi, eejatzi maawaeni ojataakoeyaworini iwaero.

<sup>12</sup> Rootaki riraga reentsitepaeni Tajorentsi okameethatzi eentsikiroeni royaawentya imatantawori ikemijantaperotziri okaatzti ikaminaakiriri Tajorentsi eejatzi ikyaaaryoowenantyaawori royaatantyaariri Jesoshi.

<sup>13</sup> Roojatzi nokemakiro eejatzi Ishire Tajorentsi janta jenokinta, okantakina:

—Eenitatsi iroka pojankinateri: “Ikimoshiretakayeri Tajorentsi maawaeni kamatsiripaeni, raapatsiyakaririka Iwinkatharite, roojatzi ikamantakya. Kyaaryo, ikimoshiryaakaaperotyari Tajorentsi, tema riyotziro maawaeni ranteeeyakinirini kipatsiki. Iroñaaka ijekakagaeyakirini kameetha, imakoryaakaaperoyeyerini. Eejatzsi ipinateri Tajorentsi tema ikyaaryooowentziniri rantziniri irira ikowakaakiriri roojatzi ikamantakya”.

### *Noñaakiri ronampiri Tajorentsi rowamaattiiri atziri*

<sup>14</sup> Roojatzi eekiro niyaatatzsi koñaatziro noñaakiri, tema noñaakiro menkori, okitamaamawotaperotaki. Eejatzsi noñaakiri kimitakariri atziri, ijekakki menkoriki. Ramantheetakawo wetsikachari ooro. Eejatzsi roerikakiro os-hiyawitawori jawiri tzipiro, othoyempitaperotaki, ithatzinkakotantyaawori raroosote jampatesirsira.

<sup>15</sup> Roojatzi noñaakiri paashini ronampiri Tajorentsi, ipoñaaka Tajorentspankoki. Itacheronkawaantetzti ikaemakotakirri riraga jeekatsirri menkoriki: —Ikantzi Tajorentsi: “Monkaataka iroñaaka: poshiyakaantakiro pi-thatzinkakotero pankirensi, ari pikantakirri iroñaaka powamaeri maawaeni kaari kameethatatsi jeekatsirika kipatsiki”.

<sup>16</sup> Riraga jeekawiteencharira menkoriki, ari ithatzinkakotakiro, thatzik, tema rowamagaeri maawaeni kaari kameethatatsiri.

<sup>17</sup> Roojatzi ipoñaantanaka paashini ronampiri Tajorentspankoki janta Jenokinta. Eejatzsi ramaki rirori oshiyawitawori jawiri tzipiro.

<sup>18</sup> Eejatzsi ipoñaaka paashini ronampiri Tajorentspankoki, tema rirotaki aminawentzirori paamari janta itaapiintzironta kajankapaneri. Itacheronkawaantetzti ikaemakotakirri isheninka oerikirori ijawirite:

—Pimonkaatakayaawo jaawiki eejatzsi eeroka, powamayeri atziripaeni kaari kameethatatsi kimitakirri pipejirowanki otha oowa irakaanto.

<sup>19</sup> Roojatzi kimitaka ipejantawori maawaeni oowapaeni janta kipatsiki, riraga ronampiri imonkaatakayaawo maawaeni kipatsi rowamaantyaariri atziripaeni kaari kameethatatsi. Intsipaeete ipejeeyerini. Roojatzi ipiyoteeyantyaarini raatzikatzikaatantyaariri. Kimitaka iroka ari okanta rowamaantyaariri Tajorentsi riraga kaari kameethatatsiri. Tema iroñaaka yomaatapaaka rowashironkaantyaariri Tajorentsi riroripaeni.

<sup>20</sup> Ari raatzikatzikaateri janta owantsiki, tee ojeeki nampitsikira. Ari opoñaanakya osheki iraantsi raatzikatzikaatakirirá, oonkanakya kipatsiki; Jenokyaatanaki, areetakawo ipaanteki kawayo. Othotyananakiro iraantsi 300 kiroometero ojanthatzi.

## 15

### *Tajorentsi rotyaantakiri 7 ronampiri rowashironkagaeyerini atziri*

<sup>1</sup> Roojatzi koñaatziro noñaaperotakiro paashini: tema noñaakiro janta Jenokinta paashini awijatsini iinja, kaari añaapiintzi. Roñaagakinawo Tajorentsi maawaeni iroka aytantyaari tsika okantyaari iinja. Osheki nokenkithashiryaakiro, osheki notsikanatawakawo. Noñaakiri 7 ronampiri Tajorentsi, owashironkagaeyeroteririni atziri. Rioteeyakini weyeeroni maawaeni owashironkayeririni atziri; omonkaatapaakya ikijanakya Tajorentsi.

<sup>2</sup> Noñaakiro eejatzsi inkaare koñaaganto, oshipakiryaaki oshiyakawo otsipatawo paamari. Noñeeyakirini janta ikatziyeeyakaní kaari pinkatheeyirini riraga koweenkatatsiri, eenitatsi eejatzsi roshiyakaantawo rirori; riroteeyakini maawaeni kaari ojataakotacha iwaero eejatzsi inoomerote. Ari roerikaeyakironi kimitawitawori iwiyompiriki ipashitakariri Tajorentsi.

<sup>3</sup> Romampaawaeteeyakawoni kimitawitawori romampaani Moeseeshi, riraga antawaetzinirini Tajorentsi paerani. Tema romampaawenteeyakarini riraga Rowishate Tajorentsi. Iroka okantzi mampaantsi:

“Nowinkatharite, tema eeroka Tajorentsi, osheki pimatayitakironi.

Osheki pitajonkantayitakini, notsikanatakawo pantayitakirini.

Okameethaperotayitakini pantayitakirini, tee pamatawitantzi.

Kyaaryo, pipinkathariwenteeyakirini jeekatsiripaeni maawaeni nampitskipaeni, pikantani. Eejatzi maawaeni pantzi okameethatz.

<sup>4</sup> Tema, Nowinkatharite, okameethatzzi nopinkathateeyemini naakapaeni maawaeni jeekatsiripaeni tsikarika.

Okameethatzhi nokamanteeyerini atziri: ‘Kameethari Tajorentsi’; tema kyaaryo, pikameethataki.

Ipoñeeyanakyani atziri maawaeni nampitskipaeni ipinkathateeyantemirini.

Tema riyoteeyanakini okameethataki panteeyakirini”.

<sup>5</sup> Roojatzi naminanee eejatzi, noñaakiro ashitaryaanaka ipankomawo Tajorentsi, ironta jeekatsirinta jenokinta. Noñaaperotakiro janta inthomaeperokinta ijeekinta rirori.

<sup>6</sup> Riyowanee Tajorentsipankoki riraga 7 ronampiri, riraga owashironkagaeyaperoteririni atziri. Ikithaateeyakawoni kithaarentsi okitamaawomatperotaki. Ichopineeki eenitatsi oshiyawori ishirikathakitari, riwetsikaetziro ororo. Tema riyoyaakiri riraga Tajorentsi riroripaeni rowashironkaeri atziripaeni.

<sup>7</sup> Eejatzi eenitatsi apaani ronampiri omampaawaetiintachari ipakoeyawakirini paashini ronampiripaeni apaanipaeni pajo. Iyeekitaki pajokipaeni owaa, owashironkaantyaariri atziri. Oshiyakaawentakiri ikijeri Tajorentsi iinja theenkayeyiririni. Tema ikantatyaaani rañi rirori, eero ikamanatee.

<sup>8</sup> Kachaarenkatanaki Tajorentsipanko inthomaenta, ikantakaakawo ipinkatharitzira eejatzi itajorenka. Teksti ikanteetero ikyagaeyeroni, roojatzi imonkaatantyaawori ronampiri ikantakiriri Tajorentsi.

## 16

### *Tsika okantari tzimatsiri pajoki*

<sup>1</sup> Roojatzi nokemakiro Ishire Tajorentsi iñaawaetaki janta ipankoki Tajorentsi. Itacheronkawaantetzi ikantziri riraga 7 ronampiri:

—Iroñaakaroña piyaateeyeni pijakotero kipatsiki rowaga 7 pajokitzirira, rootaki oshiyakawori ikijaka Tajorentsi.

<sup>2</sup> Roojatzi ryaatantaka riraga jewatatsiri ronampiri. Ijakotakiro kipatsiki owaa, roojatzi ijoeteyantanakanai maawaeni ojataakoeyaworini iwaero koweenkatatsiri, eejatzi maawaeni pinkathatzirori oshiyakaantsi. O, osheki ijoetayitanakini; opathayitanakini, ishitzyitanakini.

<sup>3</sup> Roojatzi ryaataki apitetaapaentsiri ronampiri, ijakotziro owaa janta antawokiroña inkaarepaeni. Opeyanaka, okimitakawo riraani kamaentsirini. Ikamaeyakini jeekaeyawitacharini inkaareki: shimapaeni, omanipaeni, koshoshikopaeni, maawaeni.

<sup>4</sup> Roojatzi ryaataki tres-tapaentsiri ronampiri Tajorentsi, ijakotziro pajokira janta enkipaeni eejatzi ñaatenikipaeni. Opeyeeyanakanai iraantsi.

<sup>5</sup> Roojatzi ikantziri ronampiri Tajorentsi riraga jewawentzirori iñaa:

—Tajorentsi, osheki pikameethataki; pikantani pijeeki: paerani, roojatzi iroñaaka. Okameethataki powashironkagaeyerini maawaeni irintapaeni, iñaashiteetyawaoota;

<sup>6</sup> tema riroteeyakini owamagaeyiririni aapatziyeyimirini eejatzi kamanantayitzirorini piñaani. Iroñaaka pipiyatakowentaari, powamagaeyakirini. Iñaashitawo rirori, tema riyoteeyakini rirotaki owamaantatsiri.

<sup>7</sup> Eejatzi ijeki paashini janta itaapiintzironta kajankapaneri. Ikantzi rirori:

—Kyaaryo, Nowinkatharite, eeroka Tajorentsi matayitzirorini maawaeni. Tema okameethataki powashironkagaeyerini, ikemawakiroota: piyotakiro powashironkaawentziriri.

<sup>8</sup> Roojatzi ryaataki paashini ronampiri eejatzi, riraga *cuatro-tapaentsiri*. Ijakotziro pajokitzirira janta ooryaaki, imatantakariri itagaeyakirini atziripaenai.

<sup>9</sup> Ari itagaeyakirini, roojatzi ikijatheeyantakaririni Tajorentsii: riraga otyaantziriri owashironkagaeyiririni. Tee ikenkithashireeyani. Tee ikowaeyini rookaero kaari kameethatatsi rantayitzirini, eejatzi tee ikowaeyini ipinkatheeeyerini Tajorentsi.

<sup>10</sup> Roojatzi riraga apawakoontapaentsiri ronampiri, ijakotziro pajokitzirira janta iwinkatharimentoki koweenkatatsiri. Roojatzi ositenitananaka janta ipinkatharitzinta. Osheki oshinkotakiri atziri, tema osheki ikenkithashiryapiinteeyanakironi, roojatzi ratsikanenetantanaka.

<sup>11</sup> Eekiro ryaatatye ikijathateeyakirini Tajorentsii, ikijawentawo ijoepaeni eejatzí maawaeni ikemaatsitayitakarini. Osheki ikantzimatakiri. Omaanta tee ikenkithashiryanaani, tee ikowaeyini rookaero kaari kameethatatsi ranteeyakirini.

<sup>12</sup> Roojatzi riraga paashini ronampiri riraga *seis-tapaentsiri* ijakotziro iwajonekira janta antawokiroña eni oetachari Eyojaraate, roojatzi opiryaat-aperotantanaka. Iroñaaka tekatsi otzikaawakirini riraga pinkatharipaeni jewateeyiririni maawaeni ijoraarotepaeni. Ipoñeeyanakaani janta ikinapaenta oorya. Tema riyotzi Tajorentsii ikowaki riraga jewawenantatsiri-paeni nampitsikipaeni janta ikowaki ipoke ranantawakaantyaari joraaro rirori rootaki rowiryaatantakawori enini rawijantanakaari kameetha.

<sup>13</sup> Roojatzi noñaakiri eejatzi riraga maanki, riraga koweenkatatsiri, eejatzi riraga amatawitantatsiri; tema irira ipoñeeyakan ipaantekipaeni 3 kamaari, roshiyapaakari pirinto.

<sup>14</sup> Kyaaryo, ikamaaritaperotaki; itajonkantajeempiyaawitaka, imatayitakironi kaari añaapiinteeeyini. Riyaatashiteeyirini maawaeni pinkatharipaeni maawaeni kipatsi, rajaryagaeyakarini:

—Thame atsipatwakagaeyana, amitakotawakagaeyeeyana omanateeyerini maawaeni oyaateeyiririni Tajorentsii, athonkaeyerini maawaeni.

Aririka ipokapae irira, riraga matzirori maawaeni, romanatawakagaeyeeyaani riroripaeni. Ikemakoyeroni maawaeni atziripaeni rantayitapaakirini Tajorentsi.

<sup>15</sup> Ikantapaaki:

—Pamine, nokimitaka koshitantatsiri romapokiri rirori, eejatzi naari, nomapokaeyapaakimini. Tee piyoteeyini tsikarika okaate nopokanteeyaari. Nokimoshiretakagaeyeerini maawaeni aamagaeyanarini, kimitaka ijaakitkitzi irirapaeni. Nokowaki ikameethateeyanakini, eero rantapiintziro kaari kameethatatsi. Ikimitakaantya ikithaata kameetha, tekatsi ñaamerikiterini eero ipashiwenanta.

<sup>16</sup> Omaanta riraga kamaaripaeni ipiyoteeyakirini riraga maawaeni jiwawenantatsiri eejatzi ijoraarotepaeni janta owinteniityeenta ikantziro ipaantek ioriiyo Arimakeroni.

<sup>17</sup> Roojatzi riraga ronampiri seis-tapaentsiri: riraga kaatapaentsiri ijakotziro iwajonekira janta tampyaaki, roojatzi nokemantakari jeekatsiri janta Tajorentsipankoki, jeekatsiri iwinkatharimentoki. Itacheronkawaantetaki, ikantaki:

—Monkaatapaaka, aritapaaki.

<sup>18</sup> Roojatzi osheki aamorenki, morek, morek; roojatzi itonkantanaka tariito, toog, toog, tereeii, tziiririri. Eejatzi antawo omoyekaka kipatsi. Tee añiitapiintawo kimityaawoni iroka, paeraninki roojatzi iroñaaka. Antawo omoyekaka: moye, moye, moye.

<sup>19</sup> Roojatzi okotaantanaka nampitsikipaeni eejatzi maawaeni pankotsipaeni oparyaantanaka janta Wawiroomiyaki, eejatzi maawaeni paashinipaeniki nampitsi, othonkaeyakanı maawaeni, kaatapaaki. Ikenkithashiryakiro Tajorentsi maawaeni ranteeyakinirini wawiroomiyajatzi, rootaki ikijaperoeyantakaririni, rowashironkaaperoeyakirini.

<sup>20</sup> Opeyeeyananaki maawaeni othampishaapaeni; eejatzi otzishipaeni, opeyeeyananaki, peyaka.

<sup>21</sup> Ajaatyaa eejatzi opariyaki jiriniki, omaanta antawopero ini. Okaatzi otenataki 45 kiilo: tenaperotaki. Opoñaaka jenokinta, opariyaki atziriki, osheki othonkaeyakirini. Osheki ithaawanteeyakawoni rirori, roojatzi ikijathateeeyantakaririni Tajorentsi.

## 17

### *Jowa iñaakiro antawo nampitsi Wawiroomiya*

<sup>1</sup> Roojatzi koñaatziro noñaaperotakiri ronampiri Tajorentsi oteyirori pajo inkaaganki, tema ipokashitakina ikantakina:

—Pipokanaki jaka: noñaayemiro tsika ikantakowenantyaariri Tajorentsi rowaga anteeyiririni shiramparipaeni, jeekatsiri enikipaeni, eejatzi ñaatenikipaeni. Rowashironkayero. Tema oshiyakawo rowaga antawo nampitsi owaero Wawiroomiya.

<sup>2</sup> Ranteeyakironi iwinkatharitepaeni paashinipaeni atziri. Iyotagaeyakirini maawaeni atziri rantapiintziro kaari rayi. Okimitakaakari oshinkitakaakari rootaki antakaantakariria oetarika okowakaari roori.

<sup>3</sup> Roojatzi raanakina janta okaankiuteenta tekatsinta atziri ipanko, eeniro janta oñaagakinawo Ishire Tajorentsi. Koñaatziro noñaapakiro tsinani, okyaakotakari koweenkatatsiri, kityonkatatsiri: eenitatsi 7 ii, eenitatsi ichee 10. Rojataakoetakirira maawaeni iwathaki: okantzimatziro Tajorentsi ojataakorentsira.

<sup>4</sup> Okithaatakawo tsinani kamoshinetatsiri eejatzi kityonkari. Rowaneenkatakaakawo ooro, eenitatsi mapipaeni shipakiriinkawo eejatzi inashita mapipaeni kitamaakiri. Oerikanakitziro omirimento, riwetsikaetziri ooro; yekitapaaki kaari kameethatayitatsini, oshiyakaawentziro antakagaeyirini atziri raapatziyashitawo riwetsikani atziri eejatzi iyotagaeyirini imayempitantzi.

<sup>5</sup> Ojataakotaka opankaki: eenitatsi okantakotziri, omaanta tekira okoñaaperotzi. Okantzi ojankinatakaga: “Antawopero Wawiroomiya, tema iyotagaeyironi tsinanipaeni omatakayitarini kaari ayi. Eejatzi iyotagaeyiririni osheki atziri raapatziyashitawo riwetsikashitayitarini eejatzi rantero oetarika kaari kameethatayitatsirini”.

<sup>6</sup> Roojatzi niyotakiro kimitaka oshinkitaka tsinani. Ro oshinkitakari riraani aapatziyawitaririni Jesoshi owamagaeyakiririni.

Osheki notsikanatanakawo, naminaperotakiro, joreriririni.

<sup>7</sup> Omaanta rojampitana riraga ronampiri Tajorentsi:

—¿litakaka potsikanatantanakawori? Nokamantemiro kaari piyotzitziro, eejatzsi nokamantemi kaari piyotzitziri riraga koweenkatatsiri okyako-takari.

**8** Ijeekawitani riraganki, tee añiiri iroñaaka, tema ijeeki omooki inthomaenta, jatatsiri jantoo. Inja ragaeri eejatzsi Tajorentsi, rotyaanantyaariri paamariki kaari tsiwakanitatsini: janta ikanteetaty-eeyaani rashironkaya. Ijeekawitani, ipeyaka, ijeekae eejatzsi; aririka ñeeyawakirini theenkaeyatsirini, rotsikanatawakawoni. Paerani, owakira riwetsikapiro Tajorentsi kipatsi, rojankinatakiro iwaeropaeni maawaeni jatatsintia jenokinta, omaanta tee rojankinatziro iwaeropaeni riraga theenkantatsiri.

**9** Pamine, pikenkithashiryaa-peroteri iroka noshiyakaantemiri piyotyantyaawori: rowaga iitopaeni okaatzi 7 oshiyakaawentziro 7 tonkaari-paeni ojeekinta tsinani.

**10** Eejatzsi oshiyakaawentziri 7 jewawenantatsiripaeni. Ikamanaki apawakooni, ijeeki iroñaaka apaani, inja ijeeki riraga kaatapaentsiri. Eero ojamanitzi ipinkathariwenante riraga kaatapaentsirira.

**11** Riraga koweenkatatsiri kityonkari, rirotaki apaani pinkathar-itawitachari nokantakimiri: “Ikamaki”. Omaanta ipiriintanee eejatzsi, ipinkathariwenante eejatzsi riraga *ocho-tapaentsiri*, roojatzi rotyaanantakaari Tajorentsi paamariki kaari tsiwakanitatsini.

**12** Eejatzsi rowaga 10 ichee piñeeyakirini, oshiyakaantziri 10 paashinipaeni jewawenantatsiri inja. Ikaateeyerini koweenkatatsiri, ipinkathariteeyawi-tanakaayani, eero ojamanitzi ipinkathariwenante.

**13** Ikimitawakagaeyeeyaani jewawenantatsiripaeni, ikanteeyerini koweenkatatsiri: “Nokenkithatakaaperoeyemini eerori, nanteeyemironi oetarika pikowakaagaeyenarini”.

**14** Roojatzi ikijeeyerini irirapaeni Jesokirishito riraga Rowishate Tajorentsi, eejatzsi oyaateeyiririni: romanateeyawityaarini, ikowaeyaw-ityani ithonkaeyerinimi. Omaanta ipieyeeyaarini Jesoshi, ithonkaeyerini rirori. Irira apintzi ikanta, tajorentsiperotatsiri, reewatawenteeeyirini maawaeni jewatawentawitariri atziri, reewatakagaeyirini maawaeni jewatakagaeyawitaririni atziripaeni. Riyoyagaeyakirini maawaeni aapatziyeeyaririni, ipaashinitakagaeyeerini, ari kijokiro rowaeyaneerini rirori, maawaeni.

**15** Eejatzsi ikantakina ronampiri Tajorentsi:

—Eejatzsi piñaakiro enipaeni eejatzsi ñaatenipaeni ojeekantari tsinani. Oshiyakaantakiri irowapaeni maawaeni atziripaeni, riraga jeekatsiripaeni tsikarika, tsikarika okantayitarini ipaantepaeni, maawaeni.

**16** Riraga koweenkatatsiri eejatzsi riraga 10 jewawenantatsiripaeni iki-jeeyakironi tsinani: rowaga matakapiuntariria kaari ayi. Rotzioreero maawaeni nampitsi, ikoshitero oetarika jeekatsirira, itayero maawaeni pankotsi. Eero ojeekaneentzi oetarika kameethatatsiri.

**17** Riraga Tajorentsi ikenkithashiryaa-kayaari ikijeeyeroni roori, imonkaatantyaawori okaatzi ikoyiri Tajorentsi. Rootaki ikananteeyerini riraga jewawenantatsiripaeni: “Thame apinkathateeyerini riraga koweenkatatsiri kityonkatatsiri, antenri oetarikapaeni ikowakagaey-erini”. Aritaki ikanteeyerorini iroka omonkaatantyaari ikoyiri Tajorentsi.

**18** Iroka tsinani piñaakiri oshiyakaanteeyakirini maawaeni jeekatsiripaeni nampitsikinta: riraga anaakoeyiririni paashinipaeni atziri ipinkatharitzi.

Aritaki ikantayitanani ronampiri Tajorentsi okaatzi okantakotya ñaayitzirini.

**18*****Itagaetakiro Wawirooniya***

<sup>1</sup> Roojatzi koñaatziro noñaakiri. Tema noñaawakiri ipokapaaki paashini ronampiri Tajorentsi, ipoñaanaka jenokinta. Osheki ipinkatharitapaaki, ishipakiryaapaaki, ikitejitaperotapaakiro kipatsi, rochookyapaakina ee-jatzi nothaawantanakari.

<sup>2</sup> Itacheronkawaantetapaaki ikaemapaaki:

“Rooteentsi ithonkaeyani maawaeni jeekaeyawitacharini Wawirooniyaiki; osheki inashiwitani, osheki ipinkatharitawitani, rooteentsi ithonkaeyani.

Irira jeekapentsiri kamaariipaeni inampityaawo, eejatzi mamawoniro, thoowoniro, peyaripaeni, maawaeni. Roshiyeeyakawoni rowaga tsinani, matakapiintariri kaari ayi.

<sup>3</sup> Tee okameethatawitani ojeeke, eejatzi iyotagaeyakirini maawaeni paashinipaeni atziri ikimiteeyantakaworini rirori.

Ranteeyakironi pinkatharipaeni; osheki raagaantaki riraga pimantzirori owetsikani, kyaaryo maawaeni rantayitakironi osheki kaari kameethatayitatsini. Tema amanantaperotaka osheki”.

<sup>4</sup> Roojatzi nokemakiro Ishire Tajorentsi janta jenokinta, okantzi:

“Aapatziyeeyaririni Jesoshi pishitowaeyaneeni, rowaga nampitsiki: pikimitawokari, pantzirokari erori kaari kameethatayitatsini antziri roroi. Pikaateeyironikari, nowashironkagaeyiminikari.

<sup>5</sup> Riyotzi Tajorentsi osheki rantapiintziro kaari kameethatatsi. Eekiro riyaatatye ikenkithashiryaakotero okaatzi rantziri, eejatzi royaakotziro kitejiri rowashironkaeri. Rooteentsi monkaatapaaka. Intsipaete rowashironkagaeri”.

<sup>6</sup> Roojatzi ikantziri apaani ronampiri Tajorentsi inashiyitacharinipaeni:

“Paerani osheki owashironkagaeyakirini paashinipaeni roroi, iroñaaka pipiyeeyawaoni, eekiro piyaateeyatyenei powashironkaaperoey-erini. Tee okameethatzi anteeyakirini.

<sup>7-8</sup> Iroko tsinani okenkithashiryaaka osheki okameethaperotaki roroi. Tekatsi kimityaawoni. Osheki amanantakiro oethaari rooperori eejatzi othatanepaeni owaneenkayitantyaarini”.

Ajagaakawo ajankaneki okantzi: “Tema naaka kimitawori jewawenan-tatsiri. Osheki nokimoshiretaka. Eero netakotzimaetawo. Eekiro niyaatatyyee niweshiryaawentyaawo”.

“Rootaki iroñaaka powashironkaantyaaawori kameetha. Ari aashitakyaawopa otashe; pimantsiyataakaakiro; pikemaatsitakaakyawo katsiri; ari picherajagaakitanaki eejatzi ari pomiraakiro.

¡Omapokapaakya pitaya! Tema shistsiperotaki Tajorentsi riraga kantakotan-tatsiri. Rootaki ikantakotziri ronampiri Tajorentsi”.

<sup>9</sup> Riraga pinkatharipaeni antayitzirorini kaari kameethatatsi eejatzi ithonkatashitakawo tsinani iyorikite, iñeeyeroni otaaya, eejatzi iñeeyerori owachaarite; roojatzi riraakoeyaantyaaawoni, rowashiretakotyaaawo.

<sup>10</sup> Inteena ikatziyeeyanakanji; ithaawaeyanakini, raamaashitya rowashironkagaeyironi Tajorentsi rirori. Ikanteeyeni:

“O, wawiroomiyajatzi, pashironkagaeyakanwiwee. O, antawo pinampi, os-heki pikaateeyawitani jeekaeyawitacharini.

Romapokapaakimi Tajorentsi, intsipae te ithonkaeyakimini, maawaeni”.

<sup>11</sup> Ari riraakoeyaantyaaawoni, pimanteeeyatsirini maawaeni kipatsi, rowashiretakoejakimini. Paerani osheki piñaawenashiryaagayawitawoni oetarikapaeni ipayitawitzimirini, omaanta eero iroñaaka pamanantee eejatzi.

**12** Tekatsi ikantya ipimantemiro ooro, piraata, shipakiryaatsiri mapi, kitamaakiri mapi, riino kitamaari, kityonkamawori, jentamawori, kiraamawori. Tekatsi ikantya ipimantemiro taawirakota inchato kajankakotari, ajawaka raeki kitamaacheekiri riwetsikaetziro oetarika kameetha, pinatachari inchato riwetsikaetziri oetarika, kijotayitatsirini, pinatachari mapi.

**13** Eejatzi tekatsi ikantya ipimantemiro majankapaneri eejatzi pochapaneri, tsipataapanetachari rowari, kajankapaneri, kajankaayitatsirini, awishooawaantsi oowa, oyeenka oriiwo, opane teriiko, teriikopaeni, waakapaeni, owishapaeni, kawayopaeni, shiyakomentotsipaeni, eejatzi atziripaeni; kyaaryo, ipimantayitzirini atziri.

**14** Ikanteete:

“Eero powawo eejatzi chochoki pinintawitari; tee okowanee pipaante owaneeyaa; paerani eeniro powaneenkatawitan. ¿Tsika pimaathaaganki kityonkamaworiranki iroñaaka? Tekatsi, taaka. ¿Arima pamanante paashini? Eero. Thonkakimi eeroka”.

**15** Riraga pimantapiintawitaworini maawaeni iroka owaagawontsi raan-tapiintawitaririni osheki koriki; omaanta iroñaaka ikatziyeeyanakini inteea, ithaawaeyanakini, raamaashitya eejatzi rowashironkagaeyerini Tajorentsi rirori. Riraanakya eejatzi ishenkatanakya.

**16** Ikante:

“¡Ashironkaamatsitemiini, wawiroomiyajatz! Pashironkaawkee. Antawo naawita pinampi, osheki pikaatawitani jeekaeyawitacharini. Pikithaaeeyawitakawoni riino jentamawori, kityonkanirromawori, eejatzi kiraamawori, powaneenkaeyawitawoni ooro, mapi shipakiryaatsiri, eejatzi kitamaakiri mapi.

**17** Romapokakimi Tajorentsi, ithonkitakimiro maawaeni, thonkapaaka”.

Eejatzi maawaeni marineero eejatzi ashiteeyaworini pitotsi aapiintzirori owaagawontsi ikatziyakoeyakaani ipitoki infeneena.

**18** Inteena raminakoeyeroni owachaarite, teyariririri, roojatzi riragaeyantanakyaani. Ikanteeyeni:

“O, okameethatawitani nampsinta, tekatsi kimityawoni”.

**19** Osheki rowashireteeyanakyaani, rootaki imaaeritantanakyaari eejatzi roeyotantanakyaari iitoki. Osheki riraakoeyakaawoni eejatzi rowashiretakotakayaawo, ikaemaeyanakini:

“¡Ashironkaamatsitemiini! Pashironkagaeyatyeyaaaniwee wawiroomiyajatz, antawo naawita pinampi, osheki pikaateeyawitani. Osheki iyaatapi-intzini antawo pitotsi janta, ipimantziro ashitawori osheki owaagawontsi, raantari osheki koriki.

Omaanta omapokanakya othonkanakya pinampi, maawaeni”.

### ***Ikimoshireeyanakini aapatzkiyeeyaririni Jesoshi***

**20** Roojatzi nokemakiri ronampiri Tajorentsi, ikanteetzi: “Pikimoshireeyanakini, maawaeni jenokijatz: aapatzkiyeeyaririni Tajorentsi, rotyaantanewopaeni Jesokirishito, kamanantawitacharini, maawaeni.

Paerani osheki owashironkagaeyakimini, rootaki ipiyatakowenantakimiri Tajorentsi”.

**21** Roojatzi noñaakiri ronampiri Tajorentsi, shintsiperotatsiri. Raakiro antawo mapi, rookakiro antawokiroña inkaare, poog. Icantzi:

“Nowiinkakiro mapi, peyaperotaka; tekatsi ñeeroni eejatzi. Eejatzi ikimiteero Wawiroomiya, ithonkaeteero roori, thonkapaaka; tekatsi ñeeroni eejatzi.

**22** Eeniro akemapiintawitari chapinki piyompiwaetawitacharini, omampaawaeteeyawitacharini, showitawaetawitacharini, tziwootawaetawitacharini; omaanta iinja tekatsi kemaerini. Eeniro naawita chapinki wetsikayitawitorini oetarikapaeni, omaanta iroñaaka tekatsi.

Tee akemaeri iroñaaka toonkirori rowaetari, tok, tok, tok.

**23** Eero otziwootaa eejatzi itziwoomento; eero ijekae eejatzi aatsini iina.

Paerani riyotakoeyakirini riraga pimantayitsirini janta Wawiroomiyaki, osheki ipiyotakiri iyorikite. Riraga jeekatsiripaeni ramataw-iteeyakirini jeekatsirpaashinipaeniki kipatsi,

**24** eejatzi rowamaakaanteeyakirini maawaeni kamanantayitzirorini iñaani Tajorents, eejatzi maawaeni aapatziyaririni Tajorents, eejatzi paashinipaeni owamagaetsiri jaka kipatsiki; rootaki ithonkanteeyemirini Tajorentsi maawaeni eerokapaeni wawiroomiyajatzi".

## 19

**1** Roojatzi eekiro niyaatatzti koñaatziro noñaaperotakiro. Tema noke-maeyakirini oshekiniroña Jenokijatzi, ishintsitzi romampaawaeteeyani: "Ariwee, ikameethaperotaki Tajorents: rirotaki owawijaakoeyelerini.

Thame apinkathataperoeyerini, tema itajorentsiperotaki.

**2** Okameethataki rowashironkaero matakapiintariri kaari ayi, riyotakiro rantayitzirini, tekatsi ikompityaawo.

Osheki iyotagaeyakirini paashinipaeni atziri imatayitzironi kaari rayi, rootaki rowashironkaantakawori; tema oñaashitakawowe roori.

Eejatzi osheki owashironkagaeyakirini aapatziyeyayaririni Jesoshi, rootaki ipiyatakowenantakariri".

**3** Roojatzi rapiiteeyeeroni riroripaeni:

"¡kameethataki Tajorents!

Tema taaperotaka, okanteetatyeyaanı okatziyeenkatanaki kachaari, eero opeya".

**4** Ari ijekaki Tajorentsi janta iwinkatharimentoki. Rotzi-herowashiteeyakarini riraga **24** aataperoteenchari eejatzi riraga **4** ronampiri omampaawaetapiintachari osheki ipinkathateeyakirini. Ikanteeyini:

"¡Aritaki okantyaari! ¡Apinkathateeyirini Tajorentsi, tema ikameethaperotaki!"

**5** Roojatzi nokemakiro Ishire Tajorentsi, opoñaaka okaakini Tajorentsiki, okantzi roori:

"Maawaeni antawaeteyinirini Tajorentsi piñaaperoeyerini iroñaaka, eejatzi pipinkathateeyerini.

Pinkatharipaeni, piñaaperoeyerini;

eejatzi eeroaka, maawaeni kaari pinkatharitawitachari, piñaaperoeyerini eerori eejatzi".

**6** Roojatzi nokemaeyakirini osheki Jenokijatzi, itacheronkawaantetzi iñaawaeteeyini, ikimiteeyakawoni osheki opareenkayi antawaatatsiri eejatzi ikimiteeyakarini antari tariito. Ikanteeyini:

"¡Maawaeni atziri, thame añaaperoteri Jeyowaa!

Tema ikameethaperotaki irira: tema ipinkathariwenteeyakaeni Awinkatharite, osheki itajorenka.

**7** Thame aweshiryawenteeyaaarin, akimoshirewenteeyerini maawaeni. Thame apinkathateeyirini maawaeni.

Iroñaaka omonkaataka kiteziri raantyaawori Rowishate Tajorentsi iina.  
 ¡Pamine sha! Tema wetsikaka roori kameethaanikitaki tema iñaakiro rirori ayeroni okameethataki.

**8** Okithaatakawo riinomawo kameethari, jentamawori, kitamaaperotatsiri; tee okipatsineentzi, kiteri. Tema ipashitakawo Tajorentsi.

Rowaga riinomawo kameethari roshiyakaawentakae Tajorentsi iñaakae akameethatzhi tema aakapaeni reentsite rirori anteeyakironi kameethatayitatsirini ikowakaakaeri”.

**9** Roojatzi ikantakina ronampiri Tajorentsi:

—Pojankinatera iroka: “Rooteentsi raye Rowishate Tajorentsi iina. Tema ikaemaeyerini osheki atziri rakiyoteeyerini. Okameethatzirkami maawaeni atziri ikowakimi rakiyoteeyerinimi rootaki raapatziyeeyantyaaririnimi riroripaeni. Omaanta apatziro ikaemeri riraga aapatziyariri riraga ayirorira. Ikimoshirewenteri riroripaeni”.

Roojatzi ikantakina:

—Iroka nokamantakimir, rootaki ikantaperotakinari Tajorentsi. Kyaaryoperotatsiri ini.

**10** Ari notziwerowashitawitakari ronampiri, nopolinkathaterimi, omaanta ikantakina:

—Eero pipinkathatana. Tema akimitawakagaeyakan: naari, eejatzi eerori, eejatzi maawaeni piyemijantzinkarite kenkithatakotapiintziriri Jesoshi. Aritaki akimitawakagaeyakan anteeyinirimi ikowakagaeyakaerini. Eero pipinkathatana, omaantakya riraga Tajorentsi pipinkathate.

Riraga kenkithatakotziriri Tajorentsi, riroteeyakini kenkithatakotziriri eejatzi Jesoshi.

### *Riraga kyaakotariri kawayo kitamaari. Romanatawakagaeyakan janta Arimakirooni*

**11** Roojatzi koñaatziro noñaakiri eejatzi: tema noñaakiro jenokinta inthomaenta, eejatzi noñaakiri kawayo kitamaaperotatsiri. Noñaakiri Jesoshi ikyakotakari, iiteetziri: Monkaatzirori Okaatzi Ikantziri; eejatzi iiteetziri: Kyaaryoperotatsiri. Ikameethatagi: tee rowashironkashitari atziri, tee rowamaashitari. Riyotzi oetarika rantziri, tee ikiwashitari.

**12** Roki okimitakawo paamari amoreki, ramantanheetakawo osheki amantheerentsi. Rojataakotaka ipankaki iwaero, omaanta tekatsi yoteroni; apaniroeni riyoziro rirori.

**13** Otsikirijakoteetakiri imaathakira iraantsiki; eejatzi iiteetziri: Iyoperotakotakaaneeriri Tajorentsi.

**14** Rimpaaeteeyapaakirini osheki joraaro jenokijatzi, ikyakoeyakarini kawayo, rirotaki kitamaari eejatzi; ikitheeyawoni riinomawo kameethari, okitamaamawotaperotaki, tee opitsitzi.

**15** Ojeeki ipaanteki jewateeyiririni ithatyamento, thoyempitaperotatsiri ipejeeyantyaaririni kaari pinkatheeeyiririni. Ipinkathariwentaperoeyerini, eerowa ikaminthayiri eechonkiini. Riraga wetsikirori awishooawaantsi oowa rawishoowantakawori owaa. Aritaki ikimitakiriri riraga kyaakotakariri kitamaaperotatsiri raatzikaperoyakirini atziri, riyoteeyantyaarini rirori ikijaperoyakirini Tajorentsi, riraga Shintsitaperotatsiri.

**16** Ojankinataka iithaariki jewateeyiririni, eejatzi iporiki, okantzi: “Irira pinkathariwenteeyiririni maawaeni jewawenantatsiripaeni, anaakoeyiririni maawaeni jeekakaanteeyantatsirini”.

**17** Roojatzi noñaakiri apaani ronampiri Tajorentsi katziyeenchari ooryaaki. Itacheronkawaantetaki ikaemaeyakirini maawaeni tzijopaeni:

—Pipoke, powaeyani. Powaeyaarini iwatha ipaeyemirini Tajorentsi; eenitatisi osheki powaeyaarini.

<sup>18</sup> Poyaari iwatha pinkathari, iwatha kapitaanotatsiri, iwatha shirampariperotatsiri, iwatha kawayo eejatzi riraga kyaakowitariri. Poyaari iwatha maawaeni atziri: pimantaarewo eejatzi amanantawitariri, pinkatharitatsiri eejatzi kaari pinkatharitatsi.

<sup>19-20</sup> Roojatzi noñeyakirini riraga koweenkatatsiri eejatzi maawaeni riraga pinkatharipaeni kipatsiki, ipiyoteeyakirini ijoraarotepaeni, maawaeni. Eejatzi royaatakiri koweenkatatsiri riraga atziri, kantawitachari: "Nokamantemi tsika ikantari Tajorents". Osheki itajorentsijeempiyawitakan, ramatawiteeyantakaririni kaari aapatziyeeyaririni Tajorents ipinkathata-neeri riraga koweenkatatsiri eejatzi roshiyakaawero. Rojataakoeyakan ipankaki riraga kaari aapatziyariri Jesoshi. Ari riyaatashiteeyawitakarini romanateeeyerinimi riraga kyaakotakariri iyawayote eejatzi joraaroapaenii rirori. Omaanta raawakiri apite: riraga koweenkatatsiri eejatzi riraga amatawitantsiri. Rookakiri janta antawoki inkaare, eeniro rañi. Tema rootaki paamariki kaari tsiwakanitatsini.

<sup>21</sup> Omaanta paashinipaeni, ipejeeyakirini riraga kyaakotachari, ipejeeyakirini maawaeni, thatzik, thatzik. Ro ipejantakariri ithatyamento ipaantekira. Ari rowaeyakawoni tzijopaeni iwatha, ikemaperotakawo.

## 20

### *Ikenkithatakotziro 1000 ojarentsi*

<sup>1</sup> Roojatzi eekiro niyatatzti koñaatziro noñaaoperotakiro. Tema noñawakirirayiitapaaki paashini ronampiri Tajorents, ipoñaanaka jenokinta. Roerikiro iyaawiryantawori omoo kipatsi, jatatsiri jantoo. Eejatzi ramapaakiro antawo kareenatha.

<sup>2</sup> Raapaakiri riraga maanki, jeekitachari paerani. Rirotaki kamaari riraga iwkatharite maawaeni paashinipaeni kamaari. Tema iiteetziri Jatanaashi. Ari roojotaperotapaakiri kareenathaki, shirik, shirik; okaataki 1000 ojarentsi roojoryaakotanteeyaririni eejatzi iinja. Tema ojamaniperotaki ramatawitakiri irira atziripaeni.

<sup>3</sup> Roojatzi rookakiri omooki, rashitakotakiri, riyaawitakotakiri. Tekatsi ikanteeya eejatzi ramatawiteeyeerini atziripaeni, okaataki 1000 ojarentsi. Omaanta roojatzi riyowanee, eero ojamaniperotzi ramatawitantee eejatzi.

<sup>4</sup> Roojatzi noñeyakirini osheki jeekatsiripaeni iwkatharimentokipaeni: riyoteeyakini ikantziri Tajorents: "Pikantakowenteeyerini maawaeni atziri". Paerani tee ipinkathateeyirini riraga koweenkatatsiri eejatzi roshiyakaawero. Eejatzi tee rojataakota ipankaki eejatzi rakoki iwaero koweenkatatsiri. Ikenkithatakoyeyakirini Jesoshi eejatzi riyotaanteeyironi iñaani Tajorents, rootaki ipejanteetakariri ikentsiki. Iroñaka ipiriinteyaneerini Tajorents, ikaateeyerini Jesokirishito okaataki 1000 ojarentsi ipinkathariwenanteeyeni.

<sup>5</sup> Irika itanaawori ipiriintanaa; omaanta tekira ipiriinteyaneenipashinipaeni. Aririka awijanaki 1000 ojarentsi, ari ipiriinteyaneenirioripaeni.

<sup>6</sup> Osheki ikimoshireeyanakini riraga jewataperoeyatsirini ipiriinteyaneen: rowameethaperoteri Tajorents. Riyotanaki eero riyaatzi paamariki kaari tsiwakanitatsini, omaanta ipinkatheeeyerini Tajorents eejatzi Jesokirishito eejatzi rantawaeteniri kimitaka ñaanakowenantsiri. Tema okaataki 1000 ojarentsi ikaateeyerini ipinkathariteeyanakini.

### *Ikaatantyaawori romanatawakaya*

<sup>7</sup> Aririka omonkaatapaakya 1000 ojarentsi, ari rashitaryaakoteetakiri Jatanaashi, roemishitowaeteeri eejatzi.

<sup>8</sup> Roojatzi riyaatanaki rirori maawaeni nampitsikipaeni, ithotyaanakiro kipatsi, ramatawiteeyerini maawaeni atziri ipiyoteeyantyaaririni jekatsiripaeni romanateeyaaaririni aapatziyeeyaririni Jesoshi. Ikanteetziri riraga oyaateeyiririni Jatanaashi: Kogo, eejatzi Makogo. Ikaateeyanakini osheki kameetha. Okimitaka tee amatziro ayotero tsika okaatzti opane impaneki, eejatzi eero amatziro ayotero tsikarika ikaateeyini riroripaeni.

<sup>9</sup> Ikineeyanakini janta opankaeteetziinta, rinkiteeyanakirini maawaeni aapatziyeeyaririni Jesoshi, aritaki itapoteeyapaakawoni Jerojaree: rowaga nampitsi aninteeeyakironi. Romanateeyapaakirinimi aapatziyeeyaririni, omaanta omapokanakya opoñaanakya jenokinta antawo paamari, otheronkaeyapaerini; otagaeyapaakirini, pomeei.

<sup>10</sup> Roojatzi ragaeteri iwinkatharite kamaaripaeni, riraga amattawiteeyiririni atziri, rookanteetyaariri janta antawo inkaare. Tema paamariki kaari tsiwakanitatsini. Janta ikaateeyerini riraga koweenkatatsiri eejatzi riraga amatawitantatsiri, kantawitachari: "Nokenkithatakotziri Tajorentsi". Ari osheki ikemaatsiteeyawoni: kitejiriki, tsiteniriki; ikanteetatyeyaaani.

### *Iñaaakiro janta kitamaawoki jeekamentotsiki*

<sup>11</sup> Roojatzi noñaakiro antawo iwinkatharimento, okitamaamawotaki; eejatzi noñaakiri riraga Tajorentsi riraga jeekantawori. Opeyaperotanaka kipatsi eejatzi jenoki, peyanaka.

<sup>12-15</sup> Eejatzi noñaakiri maawaeni piinkaeyawitacharini inkaareki. Ipirinteeyanaani tsitsiyawiteenchari eejatzi maawaeni jateeyatsirini jaawiki. Kyaaryo, noñeeyakirini: pinkatharitawitacharini eejatzi kaari pinkatharitawitachani, ikatziyimoteeyakawoni iwinkatharimento Tajorentsi. Roojatzi roepithokakiro paajinapaeni osheki Iwaperite rirori. Ojankineeyakan jankinarentsipaeni maawaeni ranteeeyiririni atziripaeni. Aririka ranta-neentero eechonkiini kaari kameethatatsi ari omawitya rotyaanteri rirori irira janta paamariki kaari tsiwakanitatsiri eero ikemaatsitaperotawo katsiri. Omaanta riraga antzirori osheki kaari kameethatatsi osheki ikemaatsitaperotyaawo katsiri. Eenitatsi paashini ifñaanamento rashì rirori eejatzi, roepithokakiro paajinapaeni ojankinatakota waeropaeni maawaeni aapatziyaririni Jesoshi. Riraga kaari jankinatakota rookaeteri janta antawoki paamari: janta rookaeri Tajorentsi maawaeni theenkantsatsi eejatzi maawaeni kamaari. Iiteetziro paamari Inampi Ashironkaaperotachari: riraga kaari ñayiterini Tajorentsi. Oshekiperi ikemaatsiperotakawo katsiri janta ikowaki ikamae omaanta tee imatziro, eekiro riyaatatzzi ikemaatsitaperotyaawo.

## 21

### *Ikenkithatakotakiro Jerojaree owakirari*

<sup>1</sup> Roojatzi koñaaztiro noñaakiri: tema noñaakiro paashini jenoki eejatzi paashini kipatsi, owakirari. Aritaki opeyaperotanaka rowaga itakawori, eejatzi opeyaka inkaare, tekatsikya iroñaaka.

<sup>2</sup> Eejatzi noñaakiro rowaga Jerojaree owakirari, rowaga kameethaperotatsiri inampi Tajorentsi; opoñaanaka jenokinta, ayiitapaaki kipatsiki. Osheki owaneenkayitakani, okimitakawo tsinani, rootentsirika aye oemì, owaneenkataka.

<sup>3</sup> Nokemakiri jenokijatzi, jeekatsiri okaakini iwinkatharimentoki Tajorentsi. Itacheronkawaantetzi, ikantzi:

—Pamineeyeni: riyaataki Tajorentsi jaawiki ijeekimoeyerini atziri. Kijokiro rowaeyerini, isheninkaeyantyaaririni. Eero rookaeyirini. Rirori-paeni ipinkathateri apatziro rirori.

<sup>4</sup> Riweshiryaaakagaeyerini, eero ishinetziri atziri riragaeyeyani ejatzi; eero ikamaeyeeni. Eero riraakotaari ejatzi kamaentsirini, eero ishenkataa, eero ikemaaitsitaawo oetarikapaeni. Aritaki othonkyaari maawaeni iroka-paeni. Tekatsi.

<sup>5</sup> Roojatzi ikantzi Tajorentsi:

—Pamine, nowakiratakagaero maawaeni.

Eejatzi ikantakina:

—Pojankinatero iroka: kyaaryootaki okaatzi nokantakimiri, tee namatawitzimi. Pimatero pameentyaawo.

<sup>6</sup> Ejatzi ikantakina:

—Monkaataka, nomatakiro. Naaka itakaantawori maawaeni, ejatzi naaka weyeeroni maawaeni. Iroñaaka eenitatsirika miritatsini, nopashityaari rireri iñaa owañaantatsiri; eero nokowakotziri: aritaki nopashiteeyaarini maawaeni koetyeemoeyakaririni.

<sup>7</sup> Eekirorika riyaatatyyee ranteeyenawoni maawaeni nokowakagaeyiririni, nopaperoeyerini maawaeni koetyeemoeyakaririni. Notajonkakowentapiinteeeyerini, rootaki riyotantanari naaka rashì Pawa Tajorentsi ejatzi neentsitetaperoeyaarini.

<sup>8</sup> Omaantakya riraga thaantzi, tema ari intsipaete ipakaanakiro raap-atziyari Tajorentsi aririka opomeentsitzimotakyaari. Rirori-paeni ejatzi riraga theenkantatsiri, antayitzirorini kaari kameethatayitatsini, owamaantatsiri atziri, mayempitzirori kaari rayi, matsitantatsiri, pinkathatashitayitaworini riwetsikayitzirini atziri iitajorentsitashitari, ejatzi maawaeni amatawitantatsiri, nookaeyerini antawoki paamari kaari tsiwakanitatsini. Rootaki noshiyakaanantakariri rapiiteeya ikamaeyeeni.

<sup>9</sup> Roojatzi ipokashitakina apaani ronampiri, riraga ikaateeyirini inkaaganki <sup>7</sup> oerikakirori iwajoni yekitawitachari owaa owashironka-gaeyakiririni atziri. Ikantakina:

—Pipoke, noñaayemiro owakira aatsiri oemi: rootaki iina Rowishate Tajorentsi.

<sup>10</sup> Intentashiretanakina janta antawoperoki otzishi, roñaagapaakinawo Jero-jaree: rowaga kameethaperotatsiri nampsiti. Opoñaanaka Tajorentsiki janta jenokinta, ayitapaaki.

<sup>11</sup> Ishipakiryaakaakiro nampsiti, okimitaka shipakiryaaperotatsiri mapi kimkitaka ishiwaki shiyentzi chamao.

<sup>12</sup> Eenitatisi nampsiti otantotsi inkitzirori, jatatsiri jenoki. Eenitatsi otantotsi 12 omoopaeni okaatzi, ikyaatapiintawo nampsiti; eenitatsi janta 12 ronampiri Tajorentsi shenteeyirorini. Ojankinataka omookipaeni apaani iwaero riraga 12 itomini Ishirayeeri.

<sup>13</sup> Okaatzi 3 omoopaeni janta ikinapaenta oorya, okaatzi ejatzi 3 omoopaeni janta itziroryaaneenta oorya, ejatzi ojeeki omerikikipaeni omoopaeni: eenitatsi 3 jakakiroka, eenitatsi 3 jantakironta.

<sup>14</sup> Ojeeki jaawiki antawo mapipaeni kaatatsiri 12, rowankitantawori os-heninkapaeni mapi. Ojankinataka antawoki mapipaeni apaani iwaero riraga 12 rotyaantanewopaeni Rowishate Tajorentsi.

<sup>15</sup> Ari roerikakiro ronampiri Tajorentsi imonkaatantawori nampsiti, ri-wetsikaetziro ooro. Ari imonkaatakiro nampsiti ejatzi otantotsi, ejatzi omoo roori, ikyaatteeyapiintarinii.

**16** Eenitatsi 4 otantotsi omonkaatawakagaeyakan maawaeni. Ejatzi okimitaka jenoki omonkaatawakaaka. Okaataki 2.200 kiroometero maawaeni.

**17** Imonkaatakiro tsika okaatzti otontaperotaki. Tema okaataki 65 meetero. Ari nojankinatakimo ikantakinari riraga ronampiri Tajorents.

**18** Ro riwetsikantawori otantotsi mapi shipakiryayiperotatsirini, kimitawori ishiwanki shiyentzi chamaero. Omaanta roori nampitsi, ro riwetsikayitzirini ooro, omaanta okitetakiperotanee maawaeni.

**19** Jaga otantotsiki eeniro shipakiryaaatsiri rootaki kamaapookitatsiri antawo mapi shawitziinirira nokamantakotakiri inkaaganki. Owaneenkayitakawoni shipakiryayitatsirini mapi, pinataperotayitacharini: itanakawori eenitatsi kamaapookitatsiri kimitaka ishiwanki shiyentzi chamaero; apitetapaentsiri mapi shipakiryaaatsiri rootaki kamaapookitatsiri kimitaka cheetzi; rowaga *tres*-tapaentsiri mapi shipakiryaaatsiri kimitaka oteyaki teneritoki; rowaga *cuatro*-tapaentsiri mapi shipakiryaaatsiri kamaapookitatsiri kimitaka chokyo;

**20** rowaga *cinco*-tapaentsiri mapi shipakiryaaatsiri rootaki thapatonkeerikitachari kitamaari eejatzi kimitaka maankicheetzi; rowaga *seis*-tapaentsiri mapi shipakiryaaatsiri rootaki kimitaka maankicheetzi; rowaga *siete*-tapaentsiri mapi shipakiryaaatsiri rootaki kamaapookitatsiri kimitaka shi-mashiri; rowaga *ocho*-tapaentsiri mapi shipakiryaaatsiri kimitaka iithoki kenthori; rowaga *nueve*-tapaentsiri kimitaka paryaantzi irakaanto; rowaga *diez*-tapaentsiri mapi shipakiryaaatsiri kimitaka paryaantzi eeriki; rowaga *once*-tapaentsiri mapi shipakiryaaatsiri rootaki kamaapookitatsiri kimitaka kenthoryaaniki; rowaga *doce*-tapaentsiri mapi shipakiryaaatsiri rootaki kamaapookitatsiri kimitaka tsirapateya. Okaataki rinashitayitarini mapipaen 12.

**21** Rowaga ashitakontsi janta ikyapiinantaworikinta otantotsi riwetsikaetayitzironi mapi kitamaakiri. Ro riwetsikaetziri ashitakontsi apaani mapi. Ejatzi maawaeni awotsi janta nampitsiki riwetsikaetziro ooro, ryoshiitashitaka ooro, tekatsi itsipateerori; eejatzi okitamaataperotaki.

**22** Tee noñiilo nampitsiki ipanko Tajorentsi ipinkathateeyantyaaririni jeekatsiripaeni. Aritaki ithotyaakiro Tajorentsi eejatzi Rowishate nampitsi, apatziyeeyakarini jeekatsiripaeni tsikarikapaeni. Tema rirotaki Awinkatharite matayitzirorini maawaeni.

**23** Tee ijeki oorya roorenantyaawori nampitsi, eejatzi tekatsi kashiri kitamashiteroni: tekatsi ikowaeyantyaaririni. Tema ijeki Tajorentsi, osheki ishipakiri okitejitantari nampitsi. Ejatzi ikimita Rowishate, roorentakoeyakaeni.

**24** Roojatzi maawaeni atziri ikemijantaperotero okaatzti rametari atziri jaga owakirari Jerojaree, rowaga ikoyiri Tajorentsi. Maawaeni jewawenan-tatsirii kipatsiki ipokapae jaga ipinkathateri Tajorentsi eejatzi ipashiyita-yaarini oetarikapaeni kameethatatsiri.

**25** Aakapaeni joriyyopaeni ametapiinteeyakani ashitapiintziro anampitsiteniriki, omaanta janta tee rashitapiintziro: tema okantani okitejitzi, tee otstenitezimaeta.

**26** Kyaaryo, ipokaeyakini maawaeni atziripaeni ipinkathateeyakirini Tajorentsi, ikanteeyini: "Tema ikameethataki Tajorentsi". Ejatzi ramayitakironi ipashiyayaariri pinaperotachari, rovaga owaneenkata.

**27** Eero okaayapae janta kaari kiteshiretayitatsirini oetarikapaeni. Ejatzi eero rareetanta antayitzirorini kaari kameethatayitatsini, tsikarika okantayitarini; eejatzi eero rareetanta amatawitantatsiri. Omaantakya riraga areeteeyachani rirotaki jankinatakaoeyacharini iwaeropaei

janta iñaanamentoki rashì Rowishate Tajorentsi. Riroteeyakini jeekatsini Tajorentsiki, ikanteetatyeyaaani.

## 22

<sup>1</sup> Roojatzi roñaagakinawo ronampiri Tajorentsi antaworoña eni, jaankanaanikitatsiri, ikanteetziro: iñaa owañaantatsiri. Oshiyakaawentzirori tsika ijekakaantee akanteetatyeyaaani. Opoñaaka iwinkatharimentoki Tajorentsi eejatzi Rowishate, yowaatapaaki, shaaag.

<sup>2</sup> Okinaatanaki nampitsiki niyanki. Ojeeki othapikipaeni inchatopaeni, owañaantatsiri. Oshiyakaawentzirori tsika ijekakaantee akanteetatyeyaaani. Tema okithokitapiintzi maawaeni kashiri. Rowaga chochoki owañaaperotakaeri. Eejatzi oshi oshiyakawo aawintawontsi etsiyatakoeyririni maawaeni atziri katsitatsiri rajankaneki.

<sup>3</sup> Eero añiilo janta nampitsiki kaari iñaaperotziri Tajorentsi kameethatayitatsini; tema janta ijeki rirori eejatzi Rowishate. Ipinkatheeeyerini maawaeni atziri janta, tema riroteeyakini aapatziyeeyaririni Jesoshi.

<sup>4</sup> Iñaapootheeyerini maawaeni, eejatzi rojataakoeyakaawoni ipankaki iwaero, maawaeni.

<sup>5</sup> Eero otsitenitee eejatzi, eero akowaeyirini ootamentatsi eejatzi oorya. Rirotaki kiteitakayeroni riraga Awinkatharite Tajorentsi. Akaateeyerini rirori maawaeni, kimiteeyakaeni pinkatharipaeni. Tema akanteetatyeyaaani ajeeki kameetha.

### *Ari ithonkapaakiro Jowa rojankinari*

<sup>6</sup> Roojatzi ikantakina riraga ronampiri Tajorentsi:

—Kyaaryootaki iroka noñaagaeyakimirinika, tema pimatziro pameenantyaaworini. Iroñaaka nothonkakiro noñaayemiri okaatzi awijanaki inja, tema awijanaki intsipaete. Rirotaki riraga Tajorentsi ikanteetatyeyaaani riyotakaakiri riraga kamanantayitzirorini iñaani otyaantakinari niyotaantakimiri eerokapaeni okaatzi awijaneentsini paata.

<sup>7</sup> Ikantzi Jesoshi:

—¡Paminety sha! Kaikitakina. Okimoshiryaakayeri maawaeni atziri eekiro riyaatatyee raapatziyawo okaatzi nojankinatakaakiriri Jowa iroka ñaanamentotsikika.

<sup>8</sup> Nowaero naari Jowa. Naaka kemakirori eejatzi ñaakirori maawaeni iroka nojankinatakotakirika. Irira oñaagakinawori ronampiri Tajorentsi. Roñaagantakinawori, notziwerowashitawitakari, nopinkathatantakariri,

<sup>9</sup> omaanta ikantakina:

—Eero pipinkathatana, akimitawakagaeyakan: tema aaka-teeyakini antawaeteyiniririni Tajorentsi. Naari, erori, eejatzi piyemijantzinkaritepaeni, riraga kamanantayitzirorini iñaani Tajorentsi, eejatzi maawaeni aapatziyeeyaworini iroka pojankinatziri: akimitawakagaeyakan. Eero pipinkathatana naari, omaantakya riraga Tajorentsi pipinkathaperoteri.

<sup>10</sup> Roojatzi eejatzi ikantakina:

—Eero pimaniro iroka pojankinatakiri, rooteentsi omonkaataky.

<sup>11</sup> Eerotzitarika omonkaata nokantakimiri, ikantyaani rapiitapiintero kaari kameethatatsi ranteeeyirini, eekiro riyaatatyee. Eejatzi ikimityaari riraga kameethatatsiri: eekiro rowaagatyero rantayitzirini rirori. Riraga aapatziyaperotariri Jesoshi ikanteetatyeyaaani imataperoteniri Tajorentsi maawaeni ikowakaeriri.

<sup>12</sup> Ikantzi Jesoshi:

—Eero ojamanitaperotzi roojatzi nopolanteeyari. ¡Kaakitakina! Aririka nareeteeyapaakimini, tema nopolanteeyapaerini maawaeni anteeyakina-worini nokowakaeriri.

<sup>13</sup> Naaka itakaantawori maawaeni, eejatzi naaka weyeeroni maawaeni. Nitaperotakawoni nojeekini, eejatzi iroñaaka nokanteetatyeyaaani nojeeki.

<sup>14</sup> Noemoshirenkaeyerini maawaeni aapatziyariri Jesoshi. Noshiyakaawentemiri eerokapaeni. Tema kimitawitaka pikiwaeyironi piithaaripaeni pikameethatantari. Tema iroñaaka noshinetemi powaeyaawoni okithoki inchato owañaantatsiri, eejatzi noshineteeyemini pijkeekaeyeni nonampiki: pikyagaeyapaeroni omoo lkyapiinteyeyantarini.

<sup>15</sup> Omaanta janta nampsitsiki tee ishineteetziri ijeeki theenkantsiri, matsitantatsiri, mayempitzirorini kaari rayi, owamaeriri atziri, pinkathatzirori riwetsikashityitarini atziri, kowatsiri ramatawitya rirojatzi, amatawiteeyiririni paashinipaeni, maawaeni. Eero rareeteeyawoni riroripaeni nonampiki. ¡Eerowa!

<sup>16</sup> Naaka Jesoshi. Notyaantakimiri nonampiri, ikamantakimiro noñaani powagaeyantyaanaririni maawaeni aapatziyeyyanarini. Naaka wetsikiriri Iraaviirini, eejatzi naaka icharineeteni. Noshiyakari kamori okitejitzimata-neerika.

<sup>17</sup> Ishire Tajorentsi eejatzi roori iinathori Rowishate Tajorentsi, okanteeyirini: "Thame paapatziyari Nowinkatharite". Thame maawaeni kemaeyirorini, pikimiteeyawoni, pikanteeyeni: "Thame paapatziyari Nowinkatharite". Eejatzi eerori, tsikarika pijkeekaeyini: noshiyakaawentemiro. Aririka pikemakiro pimiri, pameentyaari Nowinkatharite. Ninkarika kowaentsini rire, pameenteeyarini: tema ipakimi iñaa owañaantatsiri, tekatsi ikowakoeyemini.

<sup>18</sup> Eeniroka nokamanteeyeririni maawaeni ñaanateroni iroka jankinarentsika. Monkaata: ari okaatzi. Tekatsikya pojankinatee eejatzi iroka ñaanamentotsika. Aririka pojankinawaetashitakyawo oetarikapaeni, piyotaashityaaririmi inashitachari, aritaki rowashironkaaperotemi Tajorentsi: rowashironkaaperotemi okimita rowashironkaaperoyakirini maawaeni atziri Iwaperitekika.

<sup>19</sup> Eejatzi okimitaka, kyaaryoowa pipeyeerokari jankinarentsika. Aririka pipeyeero oetarikapaeni, eero ishineteemi Tajorentsi poyaawo okithoki inchato owañaantatsiri; eejatzi eero piñiilo inampi Tajorentsi, iroka okenkithatakotzirika.

<sup>20</sup> Jesoshi riraga iyotaakinawori iroka, ikantzi:

—Kyaaryo, eero ojamanitzi nopyanteeyaaari.

Nokantzi naaka:

—Aritaki okantyaari. Pipokae Nowinkatharite Jesoshi.

<sup>21</sup> Nokowaki Awinkatharite Jesoshi ineshironkaperoeyemini maawaeni aapatziyariri. Aritaki ikantapiintyaani.

Naaka jankinatzirori:

Jowa